


Tte Pa'ali Me'  
Skököl tö Se' a



New Testament and Shorter Old Testament in Bribri  
(CS:bzd:Bribri)

Tte Pa'ali Me' Skököl tö Se' a  
New Testament and Shorter Old Testament in Bribri (CS:bzd:Bribri)

copyright © 2010 Wycliffe Bible Translators, Inc.

Language: Bribri

Translation by: Wycliffe Bible Translators, Inc.

Bribri

bzd

Costa Rica

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Shorter Old Testament

in Bribri

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-22

---

PDF generated using Haiola and XeLaTeX on 4 Mar 2019 from source files dated 27 Nov 2018

70b70297-578d-5d61-9b6f-3119201e28ca

## Contents

Génesis . . . . .	1
Éxodo . . . . .	61
Jonás . . . . .	85
Mateo . . . . .	88
Marcos . . . . .	136
Lucas . . . . .	166
Juan . . . . .	217
Hechos . . . . .	255
Romanos . . . . .	297
1 Corintios . . . . .	316
2 Corintios . . . . .	334
Gálatas . . . . .	346
Efesios . . . . .	354
Filipenses . . . . .	361
Colosenses . . . . .	366
1 Tesalonicenses . . . . .	371
2 Tesalonicenses . . . . .	375
1 Timoteo . . . . .	378
2 Timoteo . . . . .	384
Tito . . . . .	389
Filemón . . . . .	392
Hebreos . . . . .	394
Santiago . . . . .	410
1 Pedro . . . . .	416
2 Pedro . . . . .	422
1 Juan . . . . .	426
2 Juan . . . . .	431
3 Juan . . . . .	432
Judas . . . . .	433
Apocalipsis . . . . .	435

## Íyi ulitane e' wì tkënewami

### Génesis

Si'kuaie yëkkuö i' kiè *Génesis*, e' wà kiane chè, *íyi ulitane e' wì tkënewami*. Yëkkuö i' blatëule böt tsíní. Et tsíní e' dör capítulo et dò capítulo dabom eyök kí et (1–11). Iët tsíní e' dör capítulo dabom eyök kí böt dò capítulo dabom skeyök (12–50). Et tsíní e' tò se' a íyi kos e' wì pakè. Ká jai ena ká i' e' yöne kewe. Nies ñiwe, nañewe, diwö, si'wö ena bëkwö e' yöne tsawe. Es ñies dayë, ká sí, iyiwak, se' wëpa ena alakölpa, e' kos yö' Skëköl tö, e' pakè yëkkuö et tsíní tö. Nies wes s'ditsö tsá e'pa tö ì sulu wamblë' ena ì o' Skëköl tö ie'pa tsatkoie inuí yöki, e' tso' kitule yëkkuö et tsíní ki. Nies wes s'ditsö pone'mi ká wa'ñe senuk ditséwö wa ditséwö wa ena ì kuëki s'ttò tso' taië kuá'ki kuá'ki, e' kos pakè yëkkuö et tsíní tö.

Yëkkuö iët tsíní tö ikkachè se' a tö wes Israel aleripa e'pa dë'bitu wëm eköl kiè Abraham e' wa. Israel aleripa wa Skëköl tö ibikeitsétke ká ulitane wakpa tsatkök inuí yöki. As e' wà tkò, e' kuëki Skëköl tö Abraham klöo' iwák a. Abraham erblë' Skëköl mik buaë, e' kuëki Skëköl tö ittè me' ie' a. E' tso' kitule yëkkuö iët tsíní ki.

Ttè me' Skëköl tö Abraham a, e' è me'itö Abraham alà Isaac ena Isaac alà Jacob e'pa a. Jacob ñe' è kiè ñies Israel. E' kuëki ie' aleripa kièsö Israel aleripa. Yëkkuö iët tsíní è ki itso' kitule tö wes Skëköl tö Abraham, Isaac ena Jacob, e'pa tsatkë'bitu ibolökpa kos yöki as ttè me'itö ie'pa a e' wà tkò wake'.

#### Skëköl tö íyi ulitane yö'

<sup>1</sup> Tsawe ta ká jai ena ká i', e' yö'at Skëköl tö. <sup>2</sup> Mik ie' tö íyi ulitane tsá yö'mi, eta ká wa'ñe kè ki ì ku' yës. Ká sí kè ta'. Di' è me'r iskië. Ká dör ttsettseë. Erë Skëköl Wiköl shkòar di' tsaka.

<sup>3</sup> Eta Skëköl tö iché: “¡Ká ñinú!”

Eta ká ñine. <sup>4</sup> Ie' tö isué tö ká ñiwe e' dör buaë, e' méatitö ñiweie. Ká ttsettse, e' méatitö nañeweie. <sup>5</sup> Ñiwe, e' kiéitö ñiwe. Ká ttsettseë, e' kiéitö nañewe. Ekkë kanewéitö ká tsawe a.

<sup>6</sup> E' bule es ta ie' tö iché: “¡Iyönú wes skátke kkò dapee es di' shua iblatoie as kè iwöiërwane ñi a!”

<sup>7</sup> Eta es iyuéitö di' blatoie. Es di' atë ká jaishet ena ká i' ki. <sup>8</sup> Ì yuéitö, e' kiéitö kakölttö. Ekkë kanewéitö eta ká de böt.

<sup>9</sup> E' bule es ta ie' iché: “¡Di' atë ká i' ki, e' e' dapa'úka ek tsíní ème as íyök poppo döka!”

Eta es iyöne. <sup>10</sup> Wé íyök poppo deka, e' kiéitö íyök. Wé di' dapaneka, e' kiéitö dayë.

Ie' isué tö e' kos dör buaë. <sup>11</sup> E' ukuöki ta ie' tö iché: “¡Íyök ki íyi kuá ulitane tskinú! Kakö wör ta' ese, ñies kal ulitane wör ta' ese kos tskinú iwakmik iwakmik.”

Eta es ekkëpa tskine. <sup>12</sup> Es íyök ki íyi kuá ulitane tskine kakö wör ta' iwakmik iwakmik, ñies kal wör ta' iwakmik iwakmik. Ie' tö isué tö ekkëpa kos, e' dör buaë. <sup>13</sup> Ekkë kanewéitö eta ká de mañat.

<sup>14</sup> E' bule es ta ie' iché: “¡ì dalöburta' yönú ká jai a! Ekkëpa dör buaë ká blatoie ñiwe nañewe, ñies ikkachoie mik ta' diwö de kawö tköwoie, ñies ká shta'woie ena duas tköke e' jchënoie. <sup>15</sup> Ekkëpa kos dalöburke taië ká i' ki.”

Eta es iyöne. <sup>16</sup> Es ie' tö ì dalöburta' taië ese yuéat böc. Ikibiie dör ká ñiwoie ñiweie. Wéne dalöbur diöshet e' dör olo'bunoie nañeweie. <sup>17</sup> Ekkëpa méatitö ká jai a dalöbunoie ká i' ki <sup>18</sup> ñië nañeë, ñies ká ñiwe ká nañewe e' blatoie. Ie' tö isué tö ekkëpa dör buaë. <sup>19</sup> Ekkë kanewéitö eta ká de tkël.

<sup>20</sup> E' bule es ta ie' tö iché: “¡Iyiwak serke di' a dayë a, e' kos yönú taië! ¡Ñies dù ulitane yönú as iur kashuk a!”

<sup>21</sup> Età es iyiwak blubluë serke dayë a, ekkëpa yuëitö. Ñies iyiwak kos serke di' a ena dayë a ekkëpa yuëitö iwakmik iwakmik. E' sù dù ulitane yuëitö, iwakmik iwakmik.

Ie' isuë tö ekkëpa kos dör buaë. <sup>22</sup> Età iyiwak yuëitö e'pa a ie' er buaë ché ttè i' wa: “a' alönú taië, di' kos, dayë kos, e' wà iókà taië. Ñies as dù alör taië ká wa'ñe.”

<sup>23</sup> Ekkëpa kanewëitö età ká de skel.

<sup>24</sup> E' bule es tã ie' tö iché: “¡Iyiwak serke ká sí ki, e' ulitane yönú iwakmik iwakmik! ¡Iyiwak uru, iyiwak kañiru, iyiwak e' kuke iski, ekkë kos yönú iwakmik iwakmik!”

<sup>25</sup> Età es ie' tö iyiwak ulitane yué ká sí ki iwakmik iwakmik. Ie' tö isuë tö ekkëpa kos dör buaë.

<sup>26</sup> E' ukuöki tã ie' tö iché: “Ditsö yuösö wes se' es as ie'pa tkòkasö ká i' kos wökirie. Nima, dù, iyiwak uru, iyiwak kañiru, iyiwak e' kuke iski, ekkë kos tso' ká i' ki, e' atdaë ie'pa ulà a.”

<sup>27</sup> Mik Skëköl tö s'ditsö tsá yö',  
etã iyuëitö wes ie' es;  
Ie'pa yuëitö wëm eköl ena alaköl eköl.

<sup>28</sup> Ie' er buaë ché ie'pa a i' es:

“A' ala'r kókà taië,  
a' alönú taië ká ulitane ki.  
Ká i' kos e' kané ú a' tö.

Nima, dù, ena iyiwak ulitane ekkëpa kos wökir a' dör, e' wà ú.”

<sup>29</sup> E' ukuöki tã Skëköl tö iché ie'pa a: “Ye' ttò ttsó. Íyi kuá kos wörta' ñarta', ese méatyö a' a ñè. Ñies kalwö ulitane katarta' ku'yarta' ese kos méatyö a' a katè ku'yè. <sup>30</sup> Erë iyiwak kañiru, iyiwak uru ena dù, ekkëpa kos a kakö méatyö katè.” Etã es iate. <sup>31</sup> Ie' isuë tö ekkë kos dör buaë shute. Ekkë kanewëitö etã ká de teröl.

## 2

<sup>1</sup> Es ká jai ena ká i', ñies íyi ulitane tso' iki, e' yöne one se. <sup>2</sup> Ká de kul etã i' kos yö'bituitö e' yöne one, e' kueki diwö e' wa ie' kè kanëblëne. <sup>3</sup> E' diwö wa kè ie' kanëblëneia ká i' yuök e' kueki ie' iché tö diwö e' dör buaë. Ñies ie' iché tö semana bit e' diwö bata e' dör batse'r se' a.

### *Skëköl Jehovahá tö s'ditsö tsá yué*

<sup>4</sup> I' dör ká jai ena ká i' tsá yöneat, e' pakè.

Mik Skëköl Jehovahá tö ká jai ena ká i' e' yö', <sup>5</sup> e' këwö ska' tã kam ie' tö kalj patkò ká i' ki, ñies kè yi ku' ká kanëuk. E' kueki kam kal kuá tskir ena kam kakö tskir. <sup>6</sup> Erë di' tskirke íyök a, e' tö íyök kos nuweke. <sup>7</sup> Etã Skëköl Jehovahá tö íyök yué s'ditsöie eköl wák dör wëm. Etã ie' tö iwöiké iyik a tã iyöne se'ie ttsë'ka.

<sup>8</sup> E' ukuöki tã ie' tö ká buaala yué ekwöki diwö tskirke e' ëka, ká kiè Edén ee. Etã wëm yö'itö, e' méatitö ká buaala e' a senuk. <sup>9</sup> Ee ie' tö kal ulitane wër bua'buä, ñies iwö dör buaë katano ese tské. Ká buaala e' shusha, ie' tö kal tské bölka. Kal elka dör sene michoë e' kéli. Kal iëlka e' dör íyi buaë ena íyi suluë ese jchenoie e' kéli.

<sup>10</sup> Edén ká shua di' tskirke etö, e' tö ká buaala nuweke. Wé ká e' kkò döwa ee di' e' ulà jcherke dökà tkëtö. <sup>11</sup> Di' ulà etö kiè Pison. E' tkökemi ká kiè Havilá, e' kos a. Ká e' ki oro tso'. <sup>12</sup> Oro e' dör oro bua'buä. Ñies kiè masmas bua'buä, ese tso' ena ák bua'buä kiè ónice ese tso'. <sup>13</sup> Di' ulà etö tkökemi ká kiè Cus, e' kos a. E' kiè Guihón. <sup>14</sup> Iulà etö skà mir ká kiè Asiria diwö tskirke, e' ëka. E' kiè Tigris. Etã di' ulà bataie, e' kiè Éufrates.

<sup>15</sup> Mik Skëköl Jehovahá tö wëm tsémi méat ká buaala atë Edén e' shua as ikaneütö, as ikkö'nüitö, <sup>16</sup> etã ie' tö ttè dalöieno i' mé ia: “Ká buaala e' kéliwö ulitane katëmibö. <sup>17</sup> Erë íyi buaë ena íyi suluë ese jchenoie e' kéliwö kè katar. Mik kal e' wö katébö, etã be' duöwaraë. E' kueki kè ikatar.”

<sup>18</sup> E' ukuöki ta ie' tö iché: “Kè idör bua' wëm a senuk ekörla. Súyö ie' a wapie yuè eköl ikimuk buaë.” <sup>19</sup> Eta iyiwak yö'itö íyök wa ekkè qos debitu iwa wëm a suè tö ima ie' tö ikiè mekami. Ta wes wëm tö ikiè méka es iate. <sup>20</sup> Es wëm tö iyiwak uru ena iyiwak kañiru, ñies dù, ekkè qos kiè méka. Erè kè ie' kimuk kune buaë ie' wapieie.

<sup>21</sup> Eta Skëköl Jehová tö wëm kapöwéwa taië, e' dalewa ie' tö ichane yéttsa etö, e' chkà wöiwaneitö. <sup>22</sup> Ichane e' yuëitö alakölie ta idebitu iwa wëm a. <sup>23</sup> Mik wëm tö isué, eta ichéitö:

“j' je' dör ye' wák dichéwö ena ye' wák chkà! Alaköl dë'ka wëm wa, e' kueki ikirdaë alaköl.”\*

<sup>24</sup> E' kueki wëpa kè serpaia iyé ena imì e'pa dapömik, iserdawa alaköl ta. Ie'pa böl serdaë ñita, ta imía wes wák eköl è es.

<sup>25</sup> E' këska' ta wëm ena alaköl iëter sume, erè ie'pa kè wa jaë jcher.

## 3

*S'ditsö tö Skëköl ttò dalösewéwa*

<sup>1</sup> Tkabè tso' etö, e' erbikö taië s'kitö'woie iyiwak kañiru yö' Skëköl Jehová tö, ekkè qos tsata. Ká et ta ie' tö alaköl a ichaké:

—j'Moki Skëköl tö iyë'at a' a tö ká buaë shua kal ulitane tso', e' wö kè katar yës?

<sup>2</sup> Alaköl tö iiuté:

—Au, e' kè dör es. Ie' tö sa' a iché tö kal ulitane wö katarmi. <sup>3</sup> Erè kal àr ká i' shushaë, e' wö kè katanuk, kè e' kanuk sa' a. E' wamblé sa' tö, eta sa' duöralur.

<sup>4</sup> Eta tkabè tö iché alaköl a:

—Au, e' dör kache. A' kè duöpawa. <sup>5</sup> Ie' wa ijcher buaë tö mik kalwö e' katéwa a' tö, eta ì dör buaë, ì dör suluë e' jcherdaë a' wa wes ie' wák wa ijcher es.

<sup>6</sup> Eta alaköl isué tö kalwö e' wër buaë katè. Ie' éna ikatak íyi jchenoie buaë. E' kueki ie' tö kalwö batsée, katéwaitö. E' ukuöki ta ie' tö imé iwëm a, eta iwëm ikatéwa ñies. <sup>7</sup> E' bet ta ì dör sulu, ì dör buaë ese ane ie'pa éna, eta ie'pa wa ijchenewa tö ie'pa iëter sume. Eta ie'pa tö kal kiè higuera, e' köyök yué banoie e' wa ie'pa e' patréwa.

<sup>8</sup> Siwa' bitsirke tsáli, eta wëm ena ilaköl tö Skëköl Jehová shkokedur ká buaë shua, e' ttsé. E' yöki ie'pa e' blélur kal tso' taië ese shua.

<sup>9</sup> Erè Skëköl Jehová tö wëm kié ta ichaké:

—j'Wé be' tso'?

<sup>10</sup> Wëm tö iiuté:

—Ye' tö ittsé tö be' shkokedur ká buaala shua. Ye' dur sume, e' kueki ye' suane be' yöki. E' kueki ye' e' bléwa be' yöki.

<sup>11</sup> Eta Skëköl tö ie' a iché:

—j'Yi be' a iché tö be' dur sume? Ichó ña tö kalwö yë'yö be' a tö kè ikatar j'e' katébö?

<sup>12</sup> Ie' tö iiuté:

—Be' tö ye' a alaköl me', ye' wapieie, e' tö ye' a kalwö mé katè. E' katéwayö.

<sup>13</sup> Eta Skëköl Jehová tö alaköl a ichaké:

—j'Íók bö iwamblé?

Ie' tö iiuté:

—Tkabè tö ye' kitéka, e' kueki ye' tö kalwö e' katéwa.

<sup>14</sup> Eta Skëköl Jehová tö tkabè a iché:

—Ì wamblé be' tö, e' kueki ye' tö be' a iché tö iyiwak qos shua be' è weirdaë michoë. Këkraë be' shköraë e' kuule be' batsi' ki ta be' kkò a ká po mirawa. <sup>15</sup> Be' ena alaköl meraatyö ñi bolökie. Be' aleripa qos ena alaköl aleripa qos, e'pa ate ñi bolökie ñies. Alaköl aleri eköl tö be' wökir shka'weraë ena be' tö ie' klò kaniñak shka'weraë.

<sup>16</sup> E' ukuöki ta ie' tö iché alaköl a:

\* 2:23 Hebreoie ttè kiane yënuk wëm e' dör ish ena ttè kiane yënuk alaköl e' dör isha.

—Mik be' alà kūrketke eṭa be' weirdaë siarë, idalë'r taië e' ttseraëbö. Erë be' kṭ be' wëm kiardaë ena ie' dōraë be' wōkirie.\*

<sup>17</sup> E' ukuōkṭ ṭa ie' tō iché wëm a:

—Be' tō be' alakōl ttō iūté, kalwō yē'yō be' a tō kè ikatar, e' wà katébō. E' kuēkṭ be' weirdaë ñies. Be' kuēkṭ íyōk sulu'wērawayō. Be' kanēblōraë darērëë be' chkè yuloie. <sup>18</sup> Íyōk kṭ dika'chka ena kakō sulusi, alōrdaë. Ñies kalwō kañiru katerabō. <sup>19</sup> Be' kawōṭa kanēblōk darērëë chkoie dō mik be' duowa, miāne íyōkie wēs be' dōr kuaë es eṭa. Be' yōne íyōk wa, e' kuēkṭ be' dōrane íyōkie.

<sup>20</sup> Wëm tsá yōne, e' kiè Adán. Ilakōl dōr se' mī tsá. E' kuēkṭ Adán tō ikiè méka Eva.†

<sup>21</sup> Eṭa Skēkōl tō datsi' yué ie'pa a iyiwak kkuōlit wa, ṭa ie'pa paiéitō. <sup>22</sup> Eṭa ie' tō iché: “I'ñe ì dōr buaë ena ì dōr suluë, e' jcher ditsō wā wēs se' wā ijcher es. E' kuēkṭ dō' ie'pa mi', sene michoë e' kéli wōbatsōk katè ṭa iser michorak.”

<sup>23</sup> E' kuēkṭ ie' tō wëm ena ilakōl yéṭṭsa ká buaala tso' Edén e' a, ṭa ipatkémiitō íyōk wakanéuk. Íyōk wa wëm yōne e' kṭ ipatkémi kanēblōk. <sup>24</sup> Ie' tō itrë'wēshka, e' ukuōkṭ ṭa ì ttsé'ka pik ṭa' tso' ká jaì a kiè kērub, e'pa tuléwaitō ká buaala e' ñalé ska' diwō tskirke e' éka ikkō'nuk. Ñies tabè wōñarke dalōlōë ratkear siwā' kṭ, e' méatitō as kè yi dōwāia sene michoë kéli ska'.

## 4

### *Caín tō iël kiè Abel, e' ttéwā*

<sup>1</sup> Eṭa Adán sené Eva ṭa. Eva dunekā ṭa ilà kune wëm. Ikiè mékaitō Caín.\* Mik alà kune, eṭa Eva tō iché: “Jehová tō ye' kimé, e' kuēkṭ ye' alà kune ekōl wëm.” <sup>2</sup> E' ukuōkṭ ṭa ilà skà kune ek, e' kiè Abel, Caín èl tsirla. Abel tō obeja alōweke. Caín tō dalì kuaṭkeke.

<sup>3</sup> Ká et ṭa, Caín wā idali wōne, ese kak mī mè Jehová a idalōioie. <sup>4</sup> Eṭa Abel wā ie' icha mī ñies. Ie' obeja tsá bua'buā, ese kak mī ie' wā mè Jehová a. Abel ena ì méitō e' wēr buaë Jehová wa. <sup>5</sup> Erë ie' kè wā Caín ena ì méitō e' sune es, e' kuēkṭ Caín ulunekā taië, iwō yée suluë. <sup>6</sup> E' kuēkṭ Jehová tō Caín a ichaké: “¿Iók be' ulune wō yée sulu? <sup>7</sup> Be' tō ì bua' úpa, e'ma be' jañuke tsuleë. Erë ì sulu wamblébō, e' kuēkṭ ì sulu e' métēr bër be' panuk namuie e' aloká be' kṭ. Erë be' ké e' alökkā iki.”

<sup>8</sup> Ká et ṭa, Caín tō iël Abel kiémi kañikā. Mik ie'pa demi kañikā, eṭa eë Caín ñippéka iël ṭa eṭa iël ttéwaitō. <sup>9</sup> E' ukuōkṭ ṭa bet, Jehová tō Caín a ichaké:

—¿Wé be' èl Abel?

Caín tō iūté:

—Ye' kè wā ijcher. Ye' kè dōr ie' kkō'nukwak.

<sup>10</sup> Skēkōl tō ie' a iché:

—¿Iók bö iwamblé es? Be' èl ttéwabō, e' pé tēne taië íyōk kṭ, e' nuí tso' be' kṭ. E' kṭ ye' kawōṭa be' we'ikök. <sup>11</sup> E' kuēkṭ be' weirdaë íyōk kṭ wé be' tō be' èl pé tkō'wé, e' kṭ be' yerattsayō. <sup>12</sup> Be' kanēblōmi taië, erë kè wā wōrpa buaë. Be' kawōṭa shkōk ká wa'ñe, kè a eno ṭa' yēs.

<sup>13</sup> Eṭa ie' tō Jehová iūté:

—E' darērë ye' a. Kè ye' a idalë'ttsēnuk. <sup>14</sup> I'ñe be' tō ye' uyéṭṭsa ká i' kṭ, e' ukuōkṭ ṭa ye' kawōṭa shkōk ká wa'ñe kamië, kè a eno ṭa'. Be' kè ku'ia ye' ṭa, e' kuēkṭ yi ye' kuéwa, ese tō ye' tterawa.

<sup>15</sup> Erë Jehová tō iūté:

—Yi be' ttéwā, ese kṭ weirdaë siarë taië iskéie.

Eṭa Skēkōl tō iwakyuée iwā kkachōie as yi tō ikuéwa, ese kè tō ittōwā. <sup>16</sup> Eṭa Caín e' yéṭṭsa Jehová wōrkṭ ṭa imía ká kiè Nod ee, ká e' atē Edén diwō tskirke e' kke.

\* 3:16 Mik be' alà kūrketke...ie' dōraë be' wōkirie: Ñies ttè e' mane'wēmisō i' es: Be' éna e' alakā be' wëm kṭ, erë ie' e' alōrakā be' kṭ. † 3:20 Eva: Hebreoie s'kiè e' wà kiane chè ttsé'ka. \* 4:1 Caín: Hebreoie s'kiè e' wà kiane chè ye' ulà a ide.

<sup>17</sup> Età Caín sené ilaköl t̄a. Idunek̄a t̄a ilà kune wák dör wëm, e' kiè Enoc. E' ukuöki t̄a Caín tö ká yué et, kiè mék̄aitö ilà kiè wa Enoc. <sup>18</sup> Enoc dör Irad yé. Irad dör Mehujael yé. Mehujael dör Metusael yé. Metusael dör Lámeç yé.

<sup>19</sup> Età Lámeç senéwa alakölpa böi t̄a. Eköl kiè Adá, eköl kiè Silá. <sup>20</sup> Età Adá dè' alàè kiè Jabal. E' aleripa dör iyiwak alöukwakpa e' serke úla yöule datsi'tak wa ese a. <sup>21</sup> Ie' èl kiè Jubal. E' aleripa dör ma'ma kicha t̄a' guitarra sù ena ma'ma pulè sù ese bla'ukwakpa. <sup>22</sup> Silá dè' alàè ñies kiè Tubal-Caín. E' aleripa dör tabechka kiè bronze ena hierro ese sté. E' kutà kiè Naamá.

<sup>23</sup> Ká et t̄a Lámeç tö iché ilakölpa a:

“A Adá, a Silá, ye' ttò t̄tsó:

Wëm eköl duladula tö ye' shkaö',

e' kueki ye' tö ikötwa.

<sup>24</sup> Yi tö Caín ttéwa, e' tö iské tueraè siarè, erè yi tö ye' ttéwa, e' tö iské kí tueraè jaishet shute.”

<sup>25</sup> Adán alà skà kékane ilaköl t̄a wák wëm. Eva tö iché: “Skéköl tö ye' a alà ské mé eköl, Caín tö Abel kötwa, e' skéie.” E' kueki ie' tö ikiè méka Set.†

<sup>26</sup> Ñies Set de alàè wák wëm kiè mék̄aitö Enós. E' kèwö ska' t̄a s' ditsö tö Skéköl a ñyi tsá ki'mi ena idalöiè'mi ikiè Jehová e' wa.

## 5

### Adán aleripa

<sup>1-2</sup> Mik Skéköl tö s'ditsö tsá yö', et̄a iyuéitö wës ie' wák es. Ie'pa yuéitö wëm ena alaköl. Ie' er buaè ché ie'pa a. Ie' tö ie'pa yué, e' diwö shà t̄a ikiè mék̄aitö s'ditsö. I' dör Adán aleripa e'pa kiè.

<sup>3</sup> Mik Adán ki duas de cien eyök ki dabom mañayök (130), et̄a ie' alà kune eköl, e' dör wës ie' wák es, ikiè mék̄aitö Set. <sup>4</sup> E' ukuöki t̄a ie' kí seneia duas cien paryök (800). E' shua ie' ala'r kí kune wëpa ena alakölpa. <sup>5</sup> Es ie' ki duas deka seraa cien suliyök ki dabom mañayök (930) et̄a ie' blénewa.

<sup>6</sup> Mik Set ki duas de cien eyök ki skel (105), et̄a ie' alà wëm kiè Enós, e' kune. <sup>7</sup> E' ukuöki t̄a ie' kí seneia duas cien kuryök ki kul (807). E' shua ie' ala'r kí kune wëpa ena alakölpa. <sup>8</sup> Es ie' ki duas deka seraa cien suliyök ki dabom eyök ki böc (912) t̄a iblénewa.

<sup>9</sup> Mik Enós ki duas de dabom suliyök (90), et̄a ie' alà wëm kiè Cainán, e' kune. <sup>10</sup> E' ukuöki t̄a ie' kí seneia duas cien paryök ki dabom eyök ki skel (815). E' shua ie' ala'r kí kune wëpa ena alakölpa. <sup>11</sup> Es ie' ki duas deka seraa cien suliyök ki skel (905) t̄a iblénewa.

<sup>12</sup> Mik Cainán ki duas de dabom kuryök (70), et̄a ie' alà wëm kiè Mahalalel, e' kune. <sup>13</sup> E' ukuöki t̄a, ie' kí seneia duas cien paryök ki dabom tkëyök (840). E' shua ie' ala'r kí kune wëpa ena alakölpa. <sup>14</sup> Es ie' ki duas deka seraa cien suliyök ki dabom (910) t̄a iblénewa.

<sup>15</sup> Mik Mahalalel ki duas de dabom teryök ki skel (65), et̄a ie' alà wëm kiè Jéred, e' kune. <sup>16</sup> E' ukuöki t̄a, ie' kí seneia duas cien paryök ki dabom mañayök (830). E' shua ie' ala'r kí kune wëpa ena alakölpa. <sup>17</sup> Es ie' ki duas deka seraa cien paryök ki dabom suliyök ki skel (895) t̄a iblénewa.

<sup>18</sup> Mik Jéred ki duas de cien eyök ki dabom teryök ki böc (162), et̄a ie' alà wëm kiè Enoc, e' kune. <sup>19</sup> E' ukuöki t̄a, ie' kí seneia duas cien paryök (800). E' shua ie' ala'r kí kune wëpa ena alakölpa. <sup>20</sup> Es ie' ki duas deka seraa cien suliyök ki dabom teryök ki böc (962) t̄a iblénewa.

<sup>21</sup> Mik Enoc ki duas de dabom teryök ki skel (65), et̄a ie' alà wëm kiè Matusalén, e' kune. <sup>22</sup> Ie' tö Skéköl ttò è dalöieke. Matusalén kune, et̄a ie' kí seneia duas cien mañayök (300). E' shua ie' ala'r kí kune wëpa ena alakölpa. <sup>23</sup> Es ie' ki duas deka seraa cien mañayök ki dabom teryök ki skel (365). <sup>24</sup> Ie' sene' buaè Skéköl t̄a, e' kueki ká et t̄a Skéköl wa ie' mítser t̄ts'ka, e' kueki kè ie' ku'ia.

† 4:25 Set: Hebreoie s'kiè e' wà kiane ché ie' tö imé.



<sup>25</sup> Mik Matusalén k<sub>i</sub> duas de cien eyök k<sub>i</sub> dabom paryök k<sub>i</sub> kul (187), etä ie' alà wëm kiè Lámeç, e' kune. <sup>26</sup> E' ukuök<sub>i</sub> ta, ie' k<sub>i</sub> seneiä duas cien kuryök k<sub>i</sub> dabom paryök k<sub>i</sub> bök (782). E' shuä ie' ala'r k<sub>i</sub> kune wëpa ena alakölpa. <sup>27</sup> Es ie' k<sub>i</sub> duas deka seraä cien suliyök k<sub>i</sub> dabom teryök k<sub>i</sub> sulitu (969) ta iblënewa.

<sup>28</sup> Mik Lámeç k<sub>i</sub> duas de cien eyök k<sub>i</sub> dabom paryök k<sub>i</sub> bök (182), etä ie' alà kune wëm. <sup>29</sup> E' kiè mékai<sub>tö</sub> Noé.\* Mik ie' tö ilà kiè méka, etä ie' tö iché: “Jehová tö íyök suluo'wa. E' kueki se' kawöta kanablök darërë ikuatkoie; erë alà i' tö se' keraë enuk.” <sup>30</sup> Noé kune, e' itök<sub>i</sub> Lámeç k<sub>i</sub> seneiä duas cien skeyök k<sub>i</sub> dabom suliyök k<sub>i</sub> skel (595). E' shuä ila'r k<sub>i</sub> kune wëpa alakölpa; <sup>31</sup> Es ie' k<sub>i</sub> duas deka seraä cien kuryök k<sub>i</sub> dabom kuryök k<sub>i</sub> kul (777) ta iblënewa.

<sup>32</sup> Noé k<sub>i</sub> duas de cien skeyök, e' itök<sub>i</sub> ila'r kune mañal. Ikibi kiè Sem. Ishu ék kiè Cam. Ibata ék kiè Jafet.

## 6

### *S'ditsö ì sulu è wambleke këkraë*

<sup>1-2</sup> Mik s'ditsö alönemi taië ká i' k<sub>i</sub>, etä Skököl ala'r\* tö isué tö s'ditsö alà busipa dör bua'buaala. E' kueki ie'pa tö busipa wa ie'pa wöbatse ese tsélur. <sup>3</sup> Erë Jehová tö iché: “Ditsö dör duöta'wa ese wakpa. I'ñe ta ye' kè tö kawö mepaiä ditsö a seno ká taië. Es iserdaë duas cien eyök k<sub>i</sub> dabom böyök (120), ekkë ulat.”

<sup>4</sup> Mik Skököl ala'r bak senuk s'ditsö alà busipa ta alà koka ie'pa ta, etä e' këska' ta wëpa blubluë, kakkeë, esepa wëlepa bak ká i' k<sub>i</sub>. Nies e' ukuök<sub>i</sub> wëpa esepa bakia. E'pa dör pë' darërë kkeaulëka taië ia'chki ta ese.

<sup>5</sup> Jehová tö isué tö s'ditsö tö ì sulu è wambleke taië shute. Ì sulu è bikeitseke ie'pa tö këkraë. <sup>6</sup> E' kueki Skököl er a idalënene taië. Ie' tö ibikeitsé: “Kè yö ditsö yuópa.” <sup>7</sup> Etä ie' iché: “Ditsö yö' ye' tö ká i' k<sub>i</sub>, súyö e'pa ewëwa. Nies iyiwak kos serke ká sí k<sub>i</sub>, e' ewerawayö. ¿lie ye' tö ie'pa yö'?” <sup>8</sup> Erë wëm tso' eköl kiè Noé, e' sueke Jehová tö er bua' wa.

### *Noé tö kanò bërie yué*

<sup>9</sup> Ttè ikkë dör Noé pakè.

Noé dör wëm yësyësë Skököl wörki. Këkraë ie' tö Skököl ttò dalöieke buaë. Ie' eköl è serke wes Skököl k<sub>i</sub> ikiane es. <sup>10</sup> Ie' ala'r dör mañal wëpa kiè Sem, Cam, ena Jafet.

<sup>11</sup> Skököl wörki s'ditsö tso' e' wamblök sulu ème, ñippök taië shute. <sup>12</sup> Ie' tö isué tö taië íyi suluè è tso' íyök k<sub>i</sub>. <sup>13</sup> E' kueki ie' tö Noé a iché: “Ye' tö ibikeitsétke tö ditsö kos tso' ká i' k<sub>i</sub> e' ewerawayö se. Ie'pa ñippöke taië shute ká i' k<sub>i</sub>. E' kueki ye' tö ditsö kos tso' ká i' k<sub>i</sub> e' ewerawa seraä di' taië wa. <sup>14</sup> E' kueki kanò yuó etö bërie kal bua'buwa ese wa, e' shu blató. Kanò wöar tso' ipamik, e' wötó kiöchka dalolo bötsböts ese wa u'rki ena ishüa as di' kè tköwaja. <sup>15</sup> Kanò yuó batsí metro döka cien eyök k<sub>i</sub> dabom mañayök k<sub>i</sub> skel (135 metros) ekkë. Nies ishóló yuó metro döka dabom böyök k<sub>i</sub> böt k<sub>i</sub> shaböts (22,5 metros) ekkë. E' sù ispe yuó metro döka dabom eyök k<sub>i</sub> mañat k<sub>i</sub> shaböts (13,5 metros) ekkë. <sup>16</sup> Kanò k<sub>i</sub> u yuóka, erë kanò kkò k<sub>i</sub> iulat múat metro shaböts. Kanò shu blató mañat kuó. Nies iwékkö yuó et kanò spé mik shkowaie kanò a. <sup>17</sup> Di' patkerayö íyi tso' ttsé'ka ká i' k<sub>i</sub> e' kos ewowa. Ekkë duörawa seraä ká wa'ñe. <sup>18</sup> Erë ye' ttè meraë be' a tö be' tsatkeraëyö kanò a di' yöki. Be' ala'r ena be' alaköl ena be' yakpa, e'pa tsúmi e' ta kanò a. <sup>19</sup> E' sù iyiwak kua'ki kua'ki tso' ká sí k<sub>i</sub>, e' iómi kanò a etö wë'ñe etö alaki as itsatkër wes be' es. <sup>20</sup> Iyiwak kos ió kanò a. Iyiwak kua'ki kua'ki urta', iyiwak uru, dò iyiwak e' kuke iski, e'

\* 5:29 Noé: Hebreoie s'kiè e' wà kiane chë enuk. \* 6:1-2 Skököl ala'r: Kè s'wa ijcher mok<sub>i</sub> tö yi chéitö es. Wëlepa tö ibikeitsé tö e' dör Skököl biyöchökwakpaie ö aknamaie erë Jesús tö iché tö esepa kè a senukwa s'ditsö ta (Marcos 12.25). Wëlepa skà tö ibikeitsé tö e' dör s'ditsö wësele ser suluë. Ì wamblekerakitö ese kè wër buaë Skököl wa, e' è jcher se' wa.

kos iómi kanò a, etö wë'ñe etö alaki, as kè iduölur. <sup>21</sup> Ñies chkè ulitane dapa'ú bló be' a ena iyiwak a katè.”

<sup>22</sup> Età ekkè kos wakanewé Noé tö se wes Skèköl tö iché ia es.

## 7

*Di' bak taië ká i' kî*

<sup>1-4</sup> E' ukuöki ta Jehovahá tö Noé a iché: “I'ñe kuiki ta ye' tö kalî patkeraë ká i' kî doka ká dabom tkëyök (40) ñië nañeë. jE' wa iyi ulitane yö' ye' tö tso' ttsë'ka ká sí kî, e' kos ewerawayö yës! Erë ye' tö isué tö ditsö ulitane shua be' è serke buaë yësyësë wes ye' kî ikiane es. E' kueki be' e' ióka kanò a be' yamipa kos ta. Ñies iyiwak batse'r\* kos ese tsúmi doka kuktö wë'ñe kuktö alaki. Erë iyiwak kè dör batse'r, ese tsúmi etö wë'ñe etö alaki. E' sù ñies dù kua'kî kua'kî tsúmi doka kul wë'ñe kul alaki as kè ierwa. Kos ttè chéyö be' a, e' wakaneú es.” <sup>5</sup> Età e' kos wakanewé Noé tö yësyësë wes Jehovahá tö ie' a iché es.

<sup>6</sup> Mik di' bak taië ká i' kî, età Noé kî duas tso' cien teryök (600). <sup>7</sup> Ie' e' iéka kanò a ila'r ena ilaköl ena iyakpa e'pa kos ta e' tsatkök di' alörke taië e' yöki. <sup>8-9</sup> Iyiwak batse'r, e' sù iyiwak kè dör batse'r, iyiwak e' kuke ibatsi' kî ñies dù, ekkè kos dewa kanò a Noé ta bölka bölka wes Skèköl tö iché ia es.

<sup>10</sup> Ká de kul, età di' tö ká katémitke. <sup>11</sup> Noé kî duas de cien teryök (600), kî si' et kî ká dabom eyök kî kul (17). E' diwö shà ta ýök tskirolone ta di' tso' idikia e' deka taië ká wa'ñe. Ñies ká jaishet kköburoolone ta di' biteshka taië kalîe ká i' kî. <sup>12</sup> Età kalî yëne darërëë doka ká dabom tkëyök (40) ñië nañeë. <sup>13</sup> Kalî yënémi, e' diwö shà ta Noé e' iéka kanò a ila'r ta. Ila'r kiè Sem, Cam ena Jafet. E' sù ilaköl, iyakpa mañal, e'pa e' iéka ñies ie' ta kanò a. <sup>14</sup> Ie'pa ta iyiwak ulitane dewa kanò a, iyiwak uru, iyiwak kañiru, iyiwak e' kuke iski kî ena dù ulitane. Ekkè kos dewa kanò a ie'pa ta. <sup>15</sup> Iyiwak kos ekkè dewa kanò a bölka bölka. <sup>16</sup> E' shua imí wë'ñe etö alaki etö, wes Skèköl tö iché ia es. E' one yës ta, Skèköl tö kanò wékkö wötéwa.

<sup>17</sup> Età kalî yënemie doka ká dabom tkëyök (40). Wes di' alör mirka es kanò batsemirkaitö. <sup>18</sup> Es di' kî alönèmi taië ta kanò batsemirkaitö buaë. <sup>19-20</sup> Es di' alöneka taië kabata kos blubluë, e' tsata jaishet dò metro kul ekkè. <sup>21</sup> Es kos iyi tso' ttsë'ka ká sí kî, ekkèpa duolur di' a se. Dù kos, iyiwak uru kos, iyiwak kañiru kos, iyiwak e' kuke iski kos, ñies s'ditsö ekkèpa kos duolur yës. <sup>22</sup> I kos tso' ká sí kî ttsë'ka, e' enewa se. <sup>23</sup> Erë Noé ena i tso' ie' ta kanò a, e'pa è tsatkëne. Età imalepa kos e' enewa. Es ñies iyiwak ulitane ewéwa di' tö. Dù ulitane, iyiwak uru, iyiwak kañiru dò iyiwak e' kuke iski, ekkè kos enewa sera. <sup>24</sup> Es di' atë ýök kî ká doka cien eyök kî dabom skeyök (150) ekkè.

## 8

*Di' sinewane*

<sup>1</sup> Erë Skèköl kè éna Noé chë'wa. Ñies iyiwak ulitane tso' Noé ta kanò a e' kè chë'wa ie' éna. Ie' tö siwa' patké as itö di' siüwane ká wa'ñe. Età di' pasinemine enaena. <sup>2</sup> Ýök tskirolone e' wötënene. Ñies ká jaishet kköburoolone e' wötërlunene. Età kalî wöklönewa kè yërku'ia. <sup>3</sup> Di' tso'ia e' pasirmirne enaena. Ká de cien eyök kî dabom skeyök (150), età di' sirmir ème. <sup>4</sup> E' kî si' de teröl (6) diwö de dabom eyök kî kul (17), età erpa kanò sineka kabata kiè Ararat e' kî. <sup>5</sup> Età di' pasinemie. Si' de dabop (10), e' tsá diwö, età kabata kakkeë ese wënemitke.

<sup>6</sup> E' kî ká de dabom tkëyök (40), età Noé tö kanò wékkö tsitsir kköppée. <sup>7</sup> Ie' tö dù ölö sù, e' émi et. Erë dù e' kè dë'iane kanò a ie' urke wíshwish dò mik di' sine età. <sup>8</sup> E' ukuöki ta ie' tö nuböl émi et isuöie tö ká sinene. <sup>9</sup> Erë di' tso'ia ýök kî, kam isirwa, e' kueki nuböl

\* 7:1-4 Iyiwak batse'r: E' wá kiane chë iyiwak kè dör ná ie'pa a. Se' welepa tö ichè iyiwak skítane.

dene kanò a. Kè ie' wà ká ulat poppo kune e' tkowa. Noé tö nuböl klò'wéwa ulà wa ta itséwaneitò kanò a.

<sup>10</sup> Ie' tö iskà pané döká ká kul, eta ie' tö nuböl skà émine. <sup>11</sup> Ká tuinemitke ta nuböl dene, e' wà kal ulatska debitu ikà k<sub>i</sub>. Es Noé éna iane tö íyök k<sub>i</sub> sirmir. <sup>12</sup> Ie' tö iskà pané döká ká kul, eta ie' tö nuböl skà émine. Nuböl e' kè dè'iane.

<sup>13</sup> Mik Noé k<sub>i</sub> duas tso' cien teryök k<sub>i</sub> et (601), eta íyök pasinene. Eta si' kewe, e' tsá diwö, ie' tö kanò k<sub>i</sub> u tso' e' kléttsa. Eta ie' isué tö íyök pasinene. <sup>14</sup> Kawö de si' et k<sub>i</sub> diwö dabom böyök k<sub>i</sub> kul (27), eta ie' isué tö íyök pasinene seraä. <sup>15</sup> Eta Skököl tö ie' a iché: <sup>16</sup> “Be' e' yóttsa kanò a, be' alaköl ta, be' ala'r ta, be' yakpa ta ñies. <sup>17</sup> Es iyiwak ulitane yólbö se. Dù ena iyiwak uru ena iyiwak e' kuke iski e' kos yólbö kanò a, as imi' ká wa'ñe alönuk taië ká wà iökne.”

<sup>18</sup> Es Noé alaköl ena ila'r ena iyakpa, e'pa e' yélur kanò a. <sup>19</sup> Es ñies iyiwak ulitane, uru ena kañiru ena iyiwak e' kuke iski, ñies dù e' kos e' yéttsa kanò a se. <sup>20</sup> E' ukuök<sub>i</sub> ta ie' tö ák kataté ka'ie\* et Jehovah a. E' bata k<sub>i</sub> ie' tö iyiwak batse'r ese jché ña'wéitö etö etö Jehovah dalöioie. Ñies dù batse'r jchéitö ña'wéitö Jehovah a etk etk. <sup>21</sup> Mik ishklé alar buaë, e' demi Jehovah ska' ta ittseitö ta ibikeitséitö: “Eré ditsö ià duladula döká kèchke, eta ì sulu è bikeitsekeitö. Eré kè yö ká sulu'wepawaia ie'pa kuëki. Es ñies kè yö ì kos tso' ttsé'ka e' ewèwaia wes yö iewéwa es.

<sup>22</sup> “Ká i' tso'ia,  
eta dalì kuatkèrmi, iwà wörm<sub>i</sub>;  
kaba tso', kase tso' ñies;  
kali tso', duas tso' ñies;  
ká ñiwe tso', ká nañewe tso' ñies.”

## 9

### *Skököl Jehovah tö ittè mé Noé a*

<sup>1</sup> Eta Skököl er buaë ché Noé a ñies ila'r a ta ichéitö ie'pa a: “A' alönú taië. Ká wa'ñe wà ióne a' ala'r wa. <sup>2</sup> Ditsö yöki iyiwak ulitane suardaë. Iyiwak ulitane urke kashuk a ena iyiwak serke ká sí k<sub>i</sub> ena iyiwak serke dayë a, e' kos atë a' dikia. <sup>3</sup> Iyiwak ulitane ena kalwö ena kakö e' katèmi a' tö wé kiane a' k<sub>i</sub> ese. E' kos méatyö a' a katanoie. <sup>4</sup> Chkè ulitane katèmi a' tö, eré kè ikatar ipé ta, se' serke s'pé mik e' kuëki. <sup>5</sup> Se' serke s'pé mik, e' kuëki kè se' meneat ñi ttökwa, e' nuí ta'. Yi tö eköl ttéwa, ese kichatërdaë. E' sù iyiwak wé tö s'ttéwa, ese kawöta ttéwa ñies. A' wé tö s'ttéwa, ese nuí patueraëitö ye' a.

<sup>6</sup> “Skököl tö s'ditsö yö' wes ie' es,  
e' kuëki yi tö se' ttéwa,  
ese wák kawöta' ttéwa wake'.

<sup>7</sup> Eré a' alönú taië,  
ká wa'ñe wà ió ala'r wa.”

<sup>8</sup> Ñies Skököl tö iché Noé a ena ila'r a: <sup>9-10</sup> “I'ñe ye' ttè mukeat a' a ena iyiwak e' yéttsa kanò a a' ta, e' kos a. <sup>11</sup> Mokië ye' tö a' a iché tö ye' kè tö ditsö ena iyiwak tso' ká wa'ñe, e' kos ewepawaia di' wa. Di' kè döpaia ká wa'ñe sulu'ukwa wes itka es.” <sup>12-13</sup> Ye' tö shkaba' tkekear mò shua iwà kkachöie a' a ena ditsö ulitane a tö ye' ttè méatyö a' a ena iyiwak kos a kekraë. <sup>14</sup> Mik ye' tö mò patké ta e' shua shkaba' tkéne e' wèrmi, <sup>15</sup> eta ye' éna iane tö ye' ttè me'atbak a' a ena iyiwak kos a tö kè ye' tö ditsö ena iyiwak ulitane ewepawaia di' wa. <sup>16</sup> Es mik shkaba' tkéne mò shua e' suéyö, eta bet ye' éna idaa tö ye' ttè me'at ditsö a ena iyiwak kos a michöë kekraë. <sup>17</sup> E' dör iwà kkachöie tö ye' ttè me'atbak ditsö ulitane a ñies iyiwak tso' ká i' k<sub>i</sub> e' kos a.” Es Skököl tö Noé a iché.

\* 8:20 Ák kataté ka'ie: E' wà kiane ché si'kuaie altar.

*Noé alà kiè Cam e' kè wā iyé dalò tã'*

<sup>18</sup> Noé ala'r e' yè'lur kanò a, e'pa kiè Sem, Cam ena Jafet. Cam dör Canaán yé. <sup>19</sup> E'pa mañal dör Noé ala'r. Ie'pa aleripa tō ká wà iéne.

<sup>20</sup> Noé dalì kuatkémi. E' shua uva kuatkéitō. <sup>21</sup> Ká et tã ie' tō uva diò shkōshkō e' yé tã e' tō ie' ttéka taië. Ie' datsi' yéttsã tã ianewa iski sume iu a. <sup>22</sup> Cam dör Canaán yé, mik e' tō iyé sué sume, etã ie' míã ibiyó chök iëlpa bøl e'pa a. <sup>23</sup> Erë Sem ena Jafet e'pa kè éna iyé tēr sume e' suak. E' kueki ie'pa tō datsi' klö'wéwã, imékarakitō e' o' bataki tã ie'pa shkémi tsikka iwotrélur bánet dò wé iyé tēr ee tã ipabakéwã datsi' e' wa.

<sup>24</sup> Noé tté taië blo' tō e' tì'neka. Mik ie' wã ijchēnewã ilà tsirla ék kè wã ie' dalöiēne', <sup>25</sup> etã ichéitō:

“jAs Canaán kawō tkò suluë!

jIe' weirdaë siarë shütë klöulewã iëlpa bøl e'pa kanè mésoie!”

<sup>26</sup> E' ukuöki tã ikí chéitō:

“jJehová dör Sem Këköl as e' kikarka!

As Canaán aleripa kaneblò Sem aleripa a ikanè mésopaie.

<sup>27</sup> As Skëköl kawō buaë mù Jafet a as ie' alör michoë.

As Jafet ditséwöpa ser Sem yamipa ska'.

As Canaán aleripa kaneblò ie' a klöulewã ikanè mésopaie.”

<sup>28</sup> Di' bak taië ká i' ki, e' ukuöki tã Noé sene'ia duas cien mañayök kí dabom skeyök (350). <sup>29</sup> Mik ie' blénewã, etã ie' ki duas tso' cien suliyök kí dabom skeyök (950).

## 10

*I' dör Noé aleripa kiè*

<sup>1</sup> Noé ala'r kiè Sem, Cam ena Jafet. Di' bak taië e' ukuöki tã ie'pa wák ala'r kune. Ikképa dör Noé aleripa kiè.

<sup>2</sup> Jafet ala'r wëpa dör Gómer, Magog, Madai, Javán, Tubal, Mésec, ena Tirás. <sup>3</sup> Gómer, e' ala'r wëpa dör Asquenaz, Rifat, ena Togarmá. <sup>4</sup> Javán e' ala'r wëpa dör Elisá, Tarsis, Quitim ena Rodanim. <sup>5</sup> E'pa qos dör Jafet aleripa. Ie'pa ñi blatérak ulawa ulawa. Es iká yuéraitō tseë iwakpa a dayë kkömik. Ittò kuã'ki kuã'ki iwakpamik.

<sup>6</sup> Cam ala'r wëpa dör Cus, Misraim, Fut, ena Canaán. <sup>7</sup> Cus ala'r wëpa dör Sebá, Havilá, Sabtá, Raamá ena Sabteca. Raamá ala'r wëpa dör Sebá ena Dedán. <sup>8</sup> Cus dör wëm kiè Nimrod, e' yé. Nimrod de keweie blu' darërëë ká i' ki. <sup>9</sup> Jehová ttò wa Nimrod dör yëria poë. E' kueki ttè i' meneat se' a: “Be' dör yëria poë Skëköl ttò wa wes Nimrod es.” <sup>10</sup> Mik Nimrod bak ká kiè Sinar, e' wökirie etã ká e' shua ká tso' tkël kiè Babel, Érec, Acad, ena Calné. E' qos dör ká bua'ie ese. <sup>11</sup> Wëm e' yéttsã Sinar a eköl kiè Asur. E' míã ká bánet. Etã ee ie' ká yué tkël kiè Nínive, Rehobot-ir, Quélah ena Resen. <sup>12</sup> Resen dör ká bërie. E' atë Nínive ena Quélah, e' shushã.

<sup>13</sup> Etã Misraim aleripa míã ie'pa ikkë wakpaie: ludeowak, anameowak, lehabiwak, naf-tuhiwak, <sup>14</sup> patruseowak, casluhítawak, ena caftoritawak. Filisteowak datse caftoritawak wa.

<sup>15</sup> Canaán dör Sidón yé. Sidón dör ie' alà tsá. Ie' alà skà kiè Het. <sup>16</sup> Canaán aleripa míã ie'pa ikkë wakpaie: jebuseowak, amorreowak, gergeseowak, <sup>17</sup> heveowak, araceowak, sineowak, <sup>18</sup> arvadeowak, semareowak ena hamateowak. Ká taië tã e' wakpa qos ñi blabatsérak ponemi ká kuã'ki kuã'ki. <sup>19</sup> Canaánwak ká atë ká kiè Sidón döwã ká kiè Gaza. Gaza atë ká kiè Guerar e' kke. Nies ie'pa ká atë döwã ká kiè Lesa diwö tskirke e' kke. Lesa atë ká tkël kiè Sodoma, Gomorra, Admá ena Seboím e' kke. <sup>20</sup> E' wakpa qos dör Cam aleripa. Ie'pa ñi blabatsérak ulawa ulawa. Es iká yuéitörak tseë iwakpa a. Ittò kuã'ki kuã'ki iwakpamik.

<sup>21</sup> Nies Sem dë' alàë, e' dör Jafet ël kibi ék. Heber ala'r kôs dör Sem aleripa. <sup>22</sup> Sem ala'r dör Elam, Asur, Arfaxad, Lud ena Aram. <sup>23</sup> Aram ala'r dör Uz, Hul, Guéter ena Mas. <sup>24</sup> Arfaxad dör Sélah yé. Sélah dör Heber yé. <sup>25</sup> E' ukuökí tã Heber alà de bøl. Eköl kiè Péleg.\* E' kéwö ska' tã sulitane ñi blabatsérak, e' kuëkí ikiè mékaitö es. Iëköl kiè Joctán. <sup>26</sup> Joctán ala'r dör Almodad, Sélef, Hasar-mávet, Jérah, <sup>27</sup> Hadoram, Uzal, Diclá, <sup>28</sup> Obal, Abimael, Sebá, <sup>29</sup> Ofir, Havilá, ena Jobab. E'pa kôs dör Joctán ala'r. <sup>30</sup> Ie'pa serke ká micho ká kiè Mesá tkörö ká kiè Sefar e' shuulat a. Sefar atë kabata a, wé diwö tskirke, e' kke. <sup>31</sup> E' wakpa kôs dör Sem aleripa. Ie'pa ñi blabatsérak ulawa ulawa. Es iká yuérakitö tsee iwakpa a. Ittö kuá'kí kuá'kí iwakpamik.

<sup>32</sup> Pë' kôs ekképa dör Noé aleripa kiè kitule wës iditséwö kuá'kí kuá'kí ena wé iserke ká kuá'kí kuá'kí es. Di' bak taië, e' ukuökí tã se' alönene taië e' ñi blabatsérak ká wa'ñe.

## 11

### *Skëköl tó s'ditsö ké ttök kuá'kí kuá'kí*

<sup>1</sup> Kuaë tã sulitane ttöke ttè etökicha è wa. <sup>2</sup> Mik ie'pa míyaldak diwö tskirke, e' ëka, demirak kakkue kiè Sinar ee, etã ee ie'pa e' tséat senuk. <sup>3</sup> Ká et tã ie'pa iché ñi a: “Mishkarak skauchka yuök blok sù, e' kukuësö bö' a as imi'a darërëë u yuoie.” Es iwakanewérakitö ák skéie. Nies kiöchka dalolo bötsböts ese wa ibatsérakitö ì tso' shutuule ese skéie. <sup>4</sup> E' ukuökí tã iskà chénerakitö ñi a: “Mishkarak ká blublu yuök. E' shua u yuösö kakkëë döka ká jai a. Es se' e' chömi buaë kéképa taië ena kè se' kawötã ñi blabatsök ká wa'ñe.”

<sup>5</sup> Erë Jehová e' éwa isaukrak tó ie'pa ká blublu yueke ena u kakkëë yuekerakitö. <sup>6</sup> Etã ie'pa tó ibikeitsé: “Ie'pa dör ká etkè wak ena ittörak etkè ñies, e' kuëkí ie'pa tó kanè i' kékami. E' ukuökí tã kè ì a ie'pa wöklönuk. Ie'pa sermi wës ie'pa kí ikiane es. <sup>7</sup> E' kuëkí súyö ie'pa kè ttök kuá'kí kuá'kí as kè ñi ttö ania.”

<sup>8</sup> Es Jehová tó iblabatsérak ká wa'ñe. Eë ie'pa ká yué e' kané wöpanere. <sup>9</sup> Ká e' kí Jehová tó ie'pa ké ttök kuá'kí kuá'kí ena iblabatsérakitö ká wa'ñe. E' kuëkí ká e' kinewã Babel.\*

### *Sem aleripa*

<sup>10</sup> I' dör Sem aleripa kiè. Di' bak taië, e' ukuökí duas bök, e' kéwö ska' tã Sem kí duas tso' cien eyök (100). Etã ie'pa alà kune wëm kiè Arfaxad. <sup>11</sup> Arfaxad kune, e' ukuökí Sem kí seneia duas deka cien skeyök (500), etã ie'pa ala'r skà kune wëpa ena alakölpa.

<sup>12</sup> Mik Arfaxad kí duas tso' dabom mañayök kí skel (35) etã ie'pa alà kune wëm, e' kiè Sélah. <sup>13</sup> Sélah kune, e' ukuökí tã Arfaxad kí seneia duas cien tkëyök kí mañal (403), etã ie'pa ala'r skà kune wëpa ena alakölpa.

<sup>14</sup> Mik Sélah kí duas tso' dabom mañayök (30), etã ilà kune, e' kiè Heber. <sup>15</sup> Heber kune, e' ukuökí tã Sélah kí seneia duas cien tkëyök kí mañal (403), etã ie'pa ala'r skà kune wëpa ena alakölpa.

<sup>16</sup> Mik Heber kí duas tso' dabom mañayök kí tkël (34), etã ilà kune, e' kiè Péleg. <sup>17</sup> Péleg kune, e' ukuökí tã Heber kí seneia duas cien tkëyök kí dabom mañayök (430), etã ie'pa ala'r skà kune wëpa ena alakölpa.

<sup>18</sup> Mik Péleg kí duas tso' dabom mañayök (30), etã ilà kune, e' kiè Reú. <sup>19</sup> Reú kune, e' ukuökí tã Péleg kí seneia duas cien böyök kí sulitu (209), etã ie'pa ala'r skà kune wëpa ena alakölpa.

<sup>20</sup> Mik Reú kí duas tso' dabom mañayök kí bök (32), etã ilà kune, e' kiè Serug. <sup>21</sup> Serug kune, e' ukuökí tã Reú kí seneia duas cien böyök kí kul (207), etã ie'pa ala'r skà kune wëpa ena alakölpa.

<sup>22</sup> Mik Serug kí duas tso' dabom mañayök (30), etã ilà kune, e' kiè Nahor. <sup>23</sup> Nahor kune, e' ukuökí tã Serug kí seneia duas cien böyök (200), etã ie'pa ala'r skà kune wëpa ena alakölpa.

\* 10:25 Péleg: Hebreoie s'kiè e' wà kiane chè ñi blabatsè.

\* 11:9 Babel: Hebreoie s'kiè e' wà kiane chè chilineka.



<sup>24</sup> Mik Nahor k<sub>i</sub> duas tso' dabom böyök k<sub>i</sub> sulitu (29), et<sub>a</sub> ilà k<sub>u</sub>ne, e' kiè Térah. <sup>25</sup> Térah k<sub>u</sub>ne, e' ukuök<sub>i</sub> t<sub>a</sub> Nahor k<sub>i</sub> seneia duas cien eyök k<sub>i</sub> dabom eyök k<sub>i</sub> sulitu (119), et<sub>a</sub> ie' ala'r skà k<sub>u</sub>ne wëpa ena alakölpa.

<sup>26</sup> Mik Térah k<sub>i</sub> duas tso' dabom kuryök (70), e' ukuök<sub>i</sub> t<sub>a</sub> ie' ala'r k<sub>u</sub>ne mañal. Ala'r e'pa kiè Abram, Nahor ena Harán.

### *Térah ala'r*

<sup>27</sup> E'pa dör Térah ala'r. Térah dör Abram, Nahor ena Harán, e'pa yé. Harán, e' dör Lot yé. <sup>28</sup> Harán blënewa kewe iyé Térah e' yöki ká kiè Ur ee. Ká e' atë Caldea. Ie' blënewa wé ie' k<sub>u</sub>ne ee.

<sup>29</sup> Abram senéwa alaköl kiè Sarai, e' t<sub>a</sub>. Nahor senéwa alaköl kiè Milcá, e' t<sub>a</sub>. Milcá dör Harán alà busi ena Iscá kutà. <sup>30</sup> Sarai kè döt<sub>a</sub> alàè.

<sup>31</sup> Térah e' yéttsa Ur, dör caldeawak ká e' a. Ie' alà Abram ena itala kiè Lot dör Harán alà ena iyàk kiè Sarai e'pa mía ie' t<sub>a</sub>. Warma ie'pa mörö döká ká kiè Canaán ee, erè ie'pa demi ká kiè Harán, et<sub>a</sub> ee ie'pa e' tséat senuk. <sup>32</sup> Ee Térah blënewa. Ie' k<sub>i</sub> duas tso' cien böyök k<sub>i</sub> skel (205).

## 12

### *Jehová tté Abram t<sub>a</sub>*

<sup>1</sup> Mik Abram bak senuk ká kiè Ur ee, et<sub>a</sub> Jehová tö ie' a iyè': "Be' ká ena be' ditséwöpa ena be' yé yamipa, e' múat t<sub>a</sub> be' yúshka senuk, ká kkachekeyö be' a ee. <sup>2</sup> Ká e' k<sub>i</sub> ye' tö be' aleripa alöweraè taië. Ie'pa döraè ká taië wakpaie. Ye' er buaè chöraè be' a. Ye' tö pè' taië keraè be' kkeökka taië. Nies be' er buaè chöraè pè' taië a. <sup>3</sup> Wépa er buaè ché be' a, esepa a ye' er bua' chöraè. Wépa tö alibché be' k<sub>i</sub>, esepa we'ikerayö. Be' batamik ye' er buaè chöraè ká ulitane wakpa a."

<sup>4</sup> Et<sub>a</sub> Abram e' yéttsa ká kiè Harán wes Jehová tö ie' a iyè' es. E' késka' t<sub>a</sub> ie' k<sub>i</sub> duas tso' dabom kuryök k<sub>i</sub> skel (75). Ie' mía Canaán. <sup>5</sup> Et<sub>a</sub> ie' w<sub>a</sub> iyamipa mítser seraa. Ilaköl kiè Sarai ena ilayök kiè Lot ena iyi ulitane tso'rak iw<sub>a</sub>, ekké k<sub>o</sub>s mítserak iw<sub>a</sub>. Nies Harán wakpa wëlepa tso' ie' w<sub>a</sub> kanè mésoie, e' mítser ie' w<sub>a</sub>. Mik ie' demi Canaán, <sup>6</sup> et<sub>a</sub> ie' tkami ká k<sub>o</sub>s ekké dòmi ká kiè Siquem atë Canaán ee. Ee ká atë kiè Moré. Ee kós klò àr elka. Canaánwakpa a ká e' dör ká dalöiërta' ese. (E' kèwö ska' t<sub>a</sub> Canaánwakpa serkeia ee.) <sup>7</sup> Et<sub>a</sub> ee Jehová e' kkaché Abram a t<sub>a</sub> ichéitö ia: "Ká i' meraëyö be' ditséwö a."

Et<sub>a</sub> Abram tö ák kataté ká'ie et iyiwak jchoie Jehová dalöioie ee Jehová e' kkayè' ie' a e' kueki. <sup>8</sup> E' ukuök<sub>i</sub> t<sub>a</sub> imía ká dör kabataie atë Betel diwö tskirke e' ëka. Et<sub>a</sub> ee ie' sené ekuölö. Ká e' atë Betel ena ká kiè Ai e' shulul a. Ee ie' tö ák skà kataténe et. Ee ie' tö Jehová dalöié. <sup>9</sup> E' ukuök<sub>i</sub> t<sub>a</sub> Abram mía enaena Négueb kke.

### *Abram mía Egipto*

<sup>10</sup> E' kèwö ska' t<sub>a</sub> ketba tkënewa poè ká e' k<sub>i</sub>. Kè ì t<sub>a</sub> katè wé Abram serke ee. E' kueki ie' mía Egipto senuk ekuölö. <sup>11</sup> Abram dökemitke Egipto et<sub>a</sub> ilaköl Sarai, e' a ichéitö: "Ye' ttò ttsó. Ye' w<sub>a</sub> ijcher buaè tö be' dör buaala. <sup>12</sup> Mik Egipto wakpa tö be' sué tö be' dör buaala, et<sub>a</sub> ie'pa tö ichèmi: 'Wì dör wëm wì alaköl.' Et<sub>a</sub> ye' tteraw<sub>a</sub> ie'pa tö be' kueki erè ie'pa be' meraat senukw<sub>a</sub> ie'pa t<sub>a</sub>. <sup>13</sup> E' kueki, be' we'ikèyö, ichó ie'pa a tö ye' dör be' akè as kè itö ye' ttòw<sub>a</sub> be' kueki as ye' kawö tkò buaè."

<sup>14</sup> Mik Abram demi Egipto, et<sub>a</sub> Egipto wakpa isué tö Sarai dör alaköl buaala. <sup>15</sup> Ká e' blú kueblupa tö isué nies tö Sarai dör alaköl buaala. E' kueki ie'pa mía ichök blu' a tö alaköl e' dör buaala. Et<sub>a</sub> imítserak iw<sub>a</sub> blu' wé a.

<sup>16</sup> Et<sub>a</sub> Egipto blú tö Abram kk'óné buaè Sarai dalërmik. Taië ie' tö Abram a iyiwak uru kakmé. Obeja, baka, burro ena kameio e' kakméitö ie' a. Se' nies kakméitö ie' a kanè mésoie wëpa ena alakölpa. <sup>17</sup> Erè Sarai kueki Jehová tö Egipto blú ena iyamipa we'iké taië. Duè méka taië ie'pa k<sub>i</sub>. Kawö darërèè mék<sub>a</sub>itö ie'pa k<sub>i</sub>. <sup>18</sup> E' kueki Egipto blú tö Abram tsuk patké t<sub>a</sub> ichéitö ia: "¿Iók bö iwamblé ye' t<sub>a</sub> es? ¿ì kueki be' kè w<sub>a</sub> ye' a iyène

tö alaköl i' dör be' alaköl? <sup>19</sup> Be' tö ye' a iyë' tö ie' dör be' kutà. E' kuëki tsir età ye' senéwa ie' ta. I' be' alaköl, itsúmine ta be' yúshka.” <sup>20</sup> Età Egipto blú tö ishkekípa patké Abram yöktsa ká e' ki ilaköl ta ena ì kos tso' ie' wa ekkëpa ta.

## 13

*Abram ena Lot ñi blabatsélor*

<sup>1</sup> E' ukuöki ta Abram ena ilaköl e' yélur Egipto míane Négueb. Ie' íyi kos mítserak iwa sèraa. Ie' alayök Lot e' mía ie'pa ta ñies. <sup>2</sup> Abram dör íyi blu' taië. Ie' wa oro tso'. Ie' wa inuköl tso' taië. Ñies ie' wa iyiwak tso' taië. <sup>3</sup> Négueb ee ta ie' míane enaena dò Betel. Betel ee ta ie' míane tkörö wé ie' bak senuk kewe ee. Ká e' atë Betel ena Ai e' ulat shusha. <sup>4</sup> Ká e' a ie' wa ák katatëulebak ka'ie, ee ie' tö Jehová dalöiéne.

<sup>5</sup> Lot dör ñies íyi blú taië wes iyëla Abram es. Iyiwak tso' taië ie' wa obeja ena baka. Se' tso' ie' wa ñies kanè mésopaie. <sup>6</sup> Erë wé ie'pa serke ká e' ki kakö kè ku'ia ie'pa iyiwak kos a katè. Ie'pa kè chë'kaia ñi o'mik. <sup>7</sup> Abram ena Lot e'pa iyiwak kkö'nukwakpa ñippöke, ñi wöñatköke. Ñies pë' tso'tke kenet ká e' ki. E' wakpa dör canaánwak ena fereseowak. <sup>8</sup> Ká et ta Abram tö iché Lot a: “Se' dör ñi yami. Kè imène buaë tö se' ñippö. Ñies se' iyiwak kkö'nukwakpa ñippöke ème e' kè dör buaë. <sup>9</sup> Ká saú wì ká bua' tso'. Be' ishustó wéne wa be' wöbatse, e' a be' yúshka. Be' mí wì ëka, e' ta ye' mí dià ëka. Età be' mí dià ëka, e' ta ye' mí wì ëka.”

<sup>10</sup> Età Lot ká kí sué kamië, età kos di' kiè Jordán, e' kkömik ká buaë tso', e' kí sué ie' tö. Età ie' tö isué tö ká e' dör buaë dò ká kiè Sóar ee. Buaë di' tso' wes ká buaë yö' Jehová tö es ena wes Egipto es. (E' kéwö ska' ta kam Jehová tö ká kiè Sodoma ena ká kiè Gomorra, e' böt eüwa.) <sup>11</sup> Età kakkue tso' Jordán di' kkömik e' shushté Lot tö, età e' wa ie' mía. Es ie'pa ñi blabatsélor. <sup>12</sup> Abram e' tséat senuk Canaán. Lot mía senuk Jordán kakkue ki, ee ká tso' tseë. Ie' sené tsinet ká kiè Sodoma e' o'mik. <sup>13</sup> Sodoma wakpa, serke suluë. Ie'pa ì sulu è wambleke kekraë Jehová wöa.

<sup>14</sup> Lot mía e' ukuöki ta, Jehová tö iché Abram a: “Wé be' tso' ee ká kí saú bua'ie shkit wöwí wöia dià ëka jai ëka ká wa'ñe tö ¿is idör? <sup>15</sup> Ká kos kí suébö, e' meraëyö be' a ena be' aleripa a kekraë. <sup>16</sup> Ye' tö be' aleripa alöweraë taië wes íyök po taië es. Wes íyök po kè shtarpa' es be' aleripa alördaë kè ishtarpa yi a. <sup>17</sup> Ká i' kos meraëyö be' a. E' kuëki be' yú iweblök sèraa.”

<sup>18</sup> Età Abram e' yéttsa ta imía senuk kós klò wökir àr taië dör wëm kiè Mamré e' icha ee. E' atë tsinet ká kiè Hebrón ee. Ee Abram tö ák skà kataté ka'ie Jehová dalöioie.

## 14

*Abram tö ilayök Lot, e' tsatké*

<sup>1</sup> E' kéwö ska' ta blu'pa tso' tkël. Eköl kiè Amrafel, e' dör ká kiè Sinar, e' blú. Iëköl kiè Arioc, e' dör ká kiè Elasar, e' blú. Iëköl skà kiè Quedorlaómer, e' dör ká kiè Elam, e' blú. Età ibata ék kiè Tidal, e' dör ká kiè Goím, e' blú. <sup>2</sup> Blu'pa skà tso' döka skel e' eköl kiè Bera, e' dör ká kiè Sodoma, e' blú. Iëköl kiè Birsá, e' dör ká kiè Gomorra, e' blú. Iëköl kiè Sinab, e' dör ká kiè Admá, e' blú. Skà kiè Seméber, e' dör ká kiè Seboím, e' blú. Ibata ekkë e' dör ká kiè Bela, e' blú. Ká e' kiè Sóar ñies. E' kéwö ska' ta blu'pa döka tkël ñe' e' kéka ñippök blu'pa skà döka skel ñe' ta. <sup>3</sup> Blu'pa skel e'pa tö ñippök wakpa dapa'wé ek tsini ñippök blu'pa tkël e'pa ta kakkue kiè Sidim ee. Ee dayë wölö me'r bérie kiè Mar Muerto.

<sup>4</sup> Blu'pa döka skel e'pa bak senuk iwakpa ta döka duas dabom eyök ki bök (12), blu' kiè Quedorlaómer, e' dikia. Mik e' ki duas de dabom eyök ki mañal (13) età ie'pa kè éna Quedorlaómer ttè dalöiakia. Ie'pa e' kakká ñippök ie' ta. <sup>5</sup> E' ki duas de ek età Quedorlaómer e' yéttsa mía ñippök ibolökpa ta. Blu'pa döka mañal dör ie' klépa, e' míyal ie' ta ñippök. Ie'pa mía ká kiè Astarot Carnaim ta ee ie'pa e' aléka refaitawak ki. E' ukuöki ta ie'pa e' aléka zuzitawak ki, ká kiè Ham ee. E' ukuöki ta ie'pa e' aléka emiwak ki, e' wakpa ká kiè Savé-quiriataim. <sup>6</sup> E' ukuöki ie'pa e' aléka horeowak ki kabata kiè

Seír ee. Etā itōtiēmi ie'pa tō dō tkörö ká kiè El-parán ee. Ká e' ate ká sir poë, e' kkōmik.  
<sup>7</sup> Etā ee ie'pa bitene itō wane dō ká kiè En-mispat. Ká e' kiè Cadés ñies. Ie'pa e' aléka Amalec aleripa kī tā iká klō'wéwarakitō. Ñies ie'pa e' aléka amorreowak kī. E' wakpa ká kiè Hasesón-tamar. E' ukuōkī tā ie'pa mi'ke ñippök blu'pa skel tā. E' kuekī blu'pa skel e' dapa'wéka Sidim kékkue kī blu'pa tkël kinuk ñippoie.

<sup>8-9</sup> Etā Sodoma blú ena Gomorra blú ena Admá blú ena Seboím blú ena Bela blú (Bela kiè Sóar ñies), blu'pa skel ekkēpa ñi dapa'wéka Sidim kékkue kī ñippoie, Quedorlaómer, e' dör Elam blu', e' tā ena blu'pa tso' ie' tā e'pa tā ñies. Blu'pa e'pa dör Tidal, e' dör Goím blu'. Iëköl dör Amrafel, e' dör Sinar blu'. Bata ék dör Arioc, e' dör Elasar blu'. Es blu'pa tkël míyal ñippök blu'pa skel tā. <sup>10</sup> E' kéwō ska' tā Sidim kékkue kī kiöchka dalolo bötsböts ese dapé tso' taië. Mik Sodoma wakpa ena Gomorra wakpa tkayal ñippè yöki etā ie'pa shāböts anemi kiöchka dapé tso' taië ese a. Imalepa tkayalmi kabata shua.

<sup>11</sup> Es blu'pa dōka tkël e'pa e' aléka blu'pa skel kī. Etā ie'pa tō chkwō ena íyi bua'buwa tso' Sodoma ena Gomorra e' kos klō'wéwarakitō tā iponemirak. <sup>12</sup> E' kéwō ska' tā Abram alayök Lot serke Sodoma. E' mítserak iwā, es ie' dalì kos e' mítserak iwā ñies.

<sup>13</sup> Etā ñippè shua wēm tkashkar eköl, e' wā ibiyó mí Abram a. Abram e' dör hebreowak. Ie' serke tsinet wēm kiè Mamré dör amorreowak e' kós klò wökir àr ee. Mamré dör Escol ena Aner ël. Ie'pa wa Abram wër buaë.

<sup>14</sup> Mik Abram tō ibiyó ttsé, etā ie' kanè mésopa kune ie' u a, e'pa dapa'wéitō dōka cien mañayök kī dabom eyök kī pāköl (318) ilayök tsatkoie. Etā ie'pa míyal blu'pa tkël itōkī dōka ká kiè Dan ee. <sup>15</sup> Etā nañewe ie'pa demi me'ie ñippémiie blu'pa tā. Etā ie'pa tō blu'pa tōiēmi tkörö ká kiè Hobá ee. Hobá ate ká kiè Damasco e' wōwí. <sup>16</sup> Etā ì kos minetser blu'pa wā, e' kos yélur ie'pa tō blu'pa ulà a. Es Abram tō ilayök Lot e' tsatkée. Ñies ì tso' ilayök wā e' kos dene iulà a. Ñies alakölpa ena pè' malepa tso' klöulewā e'pa kos tsatkée ie' tō.

#### *Melquisedec er buaë ché Abram a*

<sup>17</sup> Mik Abram e' aléka Quedorlaómer kī, e' sù blu'pa mañal shkōke ie' tā, e'pa kī. E' ukuōkī tā ie' bitene de Savé kékkue kī. Kakkue e' kiè ñies Blu' Kékkue. Etā ee Sodoma blú de ie' ñaletsuk ie' shke'uk. <sup>18</sup> Ñies ká kiè Salem, e' blú kiè Melquisedec, e' dör Skököl dör íyi ulitane tsata e' sacerdote. Ie' tō pan ena vino yéttsa. <sup>19</sup> Etā ie' er buaë ché Abram a ttè i' wa:

“Skököl dör íyi ulitane tsata, e' tō ká jai ena ká i' yö'.

Ie' tō be' kímè as be' kawō tkò buaë kekraë.

<sup>20</sup> Ie' dör íyi ulitane tsata, e' kikōkasö.

Ie' tō be' kímé e' alökka be' bolökpa kī, e' kuekī ikikōkasö.”

Etā íyi kos de Abram ulà a ñippè shua, e' mú blatèsö dōka dabop tā e' tsá eyök yéttsaitō méitō Melquisedec a Skököl dalöioie. <sup>21</sup> E' ukuōkī tā Sodoma blu' tō iché Abram a:

—Sa' yamipa tsatkée be' tō, e'pa múne ye' a. Erë dalì kos e' tsúmi be' tō be' a.

<sup>22</sup> Erë Abram tō iüté:

—Au. Jehová dör Skököl íyi ulitane tsata, e' tō ká jai ena ká i' yö', ie' a ye' kablétke <sup>23</sup> tō ì kos dör be' icha, e' kè tsepaatyö yës. Dò be' datsi'takla ö be' klökkuö kicha kè tsepaatyö etkla wé'ia as kè be' ichò tō be' íyi wa ye' blune. <sup>24</sup> Kè ì kiane ye' kī ye' wák a. Chkò kos ñétke ye' kanè mésopa tō, e' è dör wé' ye' a. Erë wépa dare ye' tā ñippök bulu'pa tā kiè Aner ena Escol ena Mamré, as ie'pa wā dalì kakmi' kos ikawötā tsukmi eköl eköl ekkë.

## 15

#### *Jehová tō ittè mé Abram a*

<sup>1</sup> E' ukuōkī tā Jehová tté Abram tā kabsueie, etā ichéitō ia:

—A Abram, kè be' suanuk. Ye' dör be' tsatkökwak. Íyi buaë merayö be' a taië shute.

<sup>2-3</sup> Erë Abram tō iüté:



—A Skëköl, ye' wák alà kè ta', e' kuëki ì kòs memibö ye' a e' kè dör iie bua' ye' a. Ye' íyi kòs atdaë ye' kanè méso kiè Eliézer dör Damasco wak e' ulà a. Erë ie' dör o'ka.

<sup>4</sup> Età Jehovahá tö iiüté:

—Be' wák alà kurdaë, e' kè dör o'ka.

<sup>5</sup> Età Jehovahá wà Abram mítser u'rki, ta ichéitö ia:

—Ká saú buaë siwá' ki. Bëkwö saú ta ishta'ú. ¿Be' a ishtarmi? E'ma bua', es be' aleripa alördaë taië.

<sup>6</sup> Età Abram erblé Jehovahá mik, e' kuëki iklö'wéitö wes pè' buaë yësyësë es.

<sup>7</sup> Età ichéitö ia:

—Ye' dör Jehovahá. Ye' tö be' yë'ttsa caldeawak ká kiè Ur e' a ká i' moie be' a ena be' aleripa kòs a.

<sup>8</sup> Età Abram ie' a ichaké:

—A Skëköl, ¿wes e' jchermi ye' wà yësyësë tö ká i' dõmi ye' ulà a?

<sup>9</sup> Jehovahá tö iiüté:

—Baka ena chibo ena obeja e' kòs ki duas tso' mañal, ese tsúbitu ña etö etö. Ñies nuböl et ena ipupula et, e' tsúbitu ña.

<sup>10</sup> Età Abram wà iyiwak kòs ekkë debitu Jehovahá a. Età ie' tö iyiwak e' ttélur télor shushaë. Shaböts méwaitö wí wa shaböts méwaitö i' wa. Es iate ñi wöshaë. Erë dù kè ténane ie' wà es. <sup>11</sup> Età öló dettsa iyiwak chkà dalërmik, erë Abram tö ibukueke chkè ki. <sup>12</sup> Ká tuinemitke, età Abram kapowá taië. E' bet Abram pamik ká míá ttsetseë shute se' suawè ekkë.

<sup>13</sup> Età Jehovahá tö iché ia:

—Be' wà ijchenú buaë tö be' aleripa serdaë ká kua'ki ki wes ká kua'ki wakpa es. Eë ie'pa klördawá kanè mésopaie kè patueta'. Ie'pa weirdaë doka duas cien tkëyök (400), ekkë ulatök. <sup>14</sup> Erë ká wé wakpa tö ie'pa we'ikera, e' wakpa ské we'ikerayö siarë. E' ukuöki ta be' aleripa yërdattsá ká e' a. Ie'pa wà íyi bua'buá tuë darërëë ese miraë taië iwákpa a.

<sup>15</sup> Età mik be' kënewá etá be' duöwami buaë, kè weir ta'. Es be' michoë be' dëütöpa itöki.

<sup>16</sup> Età mik be' aleripa tso' ká kua'ki ñe' a e'pa de doka tkëtökicha, etá ie'pa dörane ká i' ki. Ká i' wakpa, kiè amorreowak, kam e'pa tö ì sulu wamblò dò wë' ishuloie. E' kuëki be' aleripa kè döpane ká i' ki bet.

<sup>17</sup> Katuine de kamië, etá ì dettsa tabechka ukuöie, e' shua shkle batröke taië. Ñies kuatak sí wönarke taië ese dettsa ta itkami iyiwak chkà blatéule tkëter eë, e' shusha.

<sup>18</sup> Età Jehovahá tö ttè mé Abram a i' es:

—Ká i' meraëyö be' aleripa a. Di' kiè Egipto dí\* eëmi doka di' kibi kiè Éufrates, ká ekkë kòs meraëyö be' aleripa a. <sup>19</sup> I'ñe ta ká e' dör quenitawak, quenizitawak, cadmoneowak, <sup>20</sup> hititawak, fereseowak, refaitawak, <sup>21</sup> amorreowak, canaánwak, gergeseowak ena jebuseowak e'pa kòs wakpa ká.

## 16

### *Abram alà kune kiè Ismael*

<sup>1</sup> Abram alaköl Sarai, e' kè döta' aläë. Ie' wà alaköl tkër eköl kanè mésoie kiè Agar. E' dör egiptowak. <sup>2</sup> Età Sarai tö iché Abram a:

—Isaú tö Jehovahá kè wà ye' a alà mène. E' kuëki be' senú ye' kanè méso Agar ta. Età isalema ie' batamik alà dõmi ye' ulà a.

Età Abram tö Sarai ttò iüté. <sup>3</sup> Età Sarai tö egiptowak tso' ie' wà kanè mésoie, e' tsébitu, mé iwëm a alakölie. E' kéwö ska' ta ie'pa sené Canaán e' ki duas de dabop. <sup>4</sup> Età Abram senéwá Agar ta, etá Agar duneka. Mik ie' isué tö ie' duneka, etá ie' tö iwökir Sarai suémi suluë. <sup>5</sup> Età Sarai tö iché Abram a:

\* 15:18 Egipto dí: E' kè dör di' bërie tso' Egipto kiè Nilo e'. E' dör di' tsitsirla tso' Egipto ena Canaán e' shusha.

—¡Be' iane iwiie tö Agar tö ye' sueke suluë! Ye' wák tö be' a Agar me' alakölie i' ta idurtke e' wà kurdaë, etä ie' e' ttsöke jaishet ye' tsata. ¡As Jehová tö se' a ichò tö yi iane iwiie, ye' ö be'!

<sup>6</sup> Etä Abram tö iiüté:

—Ye' ttò ttsó, be' kanè méso tso' be' ulà a. Be' iú wes be' éna iwak es.

E' ukuöki ta Sarai tö ikanè méso we'ikémi taië. E' kueki Agar tkashkar. <sup>7</sup> Etä Jehová biyöchökwak bua'ie, e' tö ikué di' tum o'mik ká wé kè yi ku' ese ska'. Di' tum e' tso' ñala micho ká kiè Sur e' kkömik. <sup>8</sup> Etä Jehová biyöchökwak bua'ie tö ie' a ichaké:

—A Agar, Sarai kanè méso, ¿Wé be' bite? ¿Wé be' micho?

Ie' iiüté:

—Ye' tkashkar ye' wökir Sarai yöki.

<sup>9</sup> Etä ie' iché ia:

—Be' dakóne be' wökir ska' ta idalöió bèrë.

<sup>10</sup> Ie' tö ikí ché ia:

“Ye' be' aleripa alöweraë taië. Kè yi a ishtanuk ekkë.

<sup>11</sup> Be' eriarke, e' ttsé Jehová tö,

e' kueki se be' dur, e' wà kune,

ta ikiè múkabö Ismael.\*

<sup>12</sup> Be' alà döraë wes burro pupula kè urutërta' es.

Ie' ñippöraë darërë sulitane ta. Ñies sulitane ñippöraë ie' ta.”

Ie' serdaë kekraë ñippök iëlpa ta.

<sup>13</sup> Jehová tté Agar ta, e' ukuöki ta Agar tö iché: “Skököl ye' sué, e' wák suéwayö.” E' kueki ie' tö Skököl kié i' es: “Skököl tö ye' sué e'.” <sup>14</sup> E' kueki ñies di' tum e' kiè mékaitö: “Skököl tso' e' ye' sueke”. Di' tum e' tso' Cadés ena Béred e' shushaë.

<sup>15</sup> E' ukuöki ta Abram alà kékä Agar ta e' wà kune wák wëm. Abram tö ikiè méka Ismael.

<sup>16</sup> Ismael kune, e' kèwö ska' ta Abram ki duas tso' dabom paryök kí teröl (86).

## 17

### *Jehová tö ittè mé Abraham a, e' wà kkacho méqtitö*

<sup>1</sup> Mik Abram ki duas tso' dabom suliyök kí sulitu (99), etä Jehová e' kkaché ie' a ta iché ia:

—Ye' dör Skököl Diché Ta' Íyi Ulitane Tsata e'. Be' senú yësyësë ye' wörki kekraë, <sup>2</sup> e' ta ye' ttè meraë be' a tö be' aleripa alördaë taië be' itöki.

<sup>3</sup> Etä ie' e' téwä iski iwötsa méwä íyök ki. E' dalewa Skököl tso' ttök ie' ta, ta ichéitö ia:

<sup>4</sup> —Ye' ttè meke be' a e' dör i' es: Be' döraë ká taië wakpa yéie. <sup>5</sup> E' kueki i'ñe ta be' kè kièia Abram. Ye' tö be' tkéka ká taië wakpa yéie, e' kueki be' kiè mékayö Abraham.\* <sup>6</sup> Ye' tö be' aleripa alöweraë taië. Ie'pa döraë blu'paie ena ká taië wakpaie. <sup>7</sup> Kekraë ye' dör be' Kököl ñies be' aleripa Kököl. Kawö e' mekeyö be' a. <sup>8</sup> I'ñe ta be' serke Canaán, ká e' kos meraëyö be' a ena be' aleripa a. E' atë ie'pa ulà a kekraë. Ye' dör ie'pa Kököl.

<sup>9</sup> Skököl tö iskà chéne Abraham a:

—Erë be' ena be' aleripa kos e' kawöta ttè muk ye' a ñies. <sup>10</sup> E' dör i' es: A' wëpa kos kawöta itóttola kkuölitla tök tsir. <sup>11</sup> E' kueki a' wëpa kos e' wakyuó es. E' tö ikkacheraë tö se' ttè me' ñi a. <sup>12</sup> Kekraë kos a' ala'r kurke wëpa, ñies a' kanè mésopa ala'r wëpa, mik e' ki ká de paköl, etä a' kawöta iwakyuök es. <sup>13</sup> A' kawöta iuk kröröë ala'r kos kurke a' u a ekkëpa ta. Es ttè me'tkeyö a' a, e' atë wakyöule a' chkà ki kekraë. <sup>14</sup> Wëm kè wakyöule, ese kè wä ye' ttò dalöiëne, e' kueki kè ikawö ta'ia senuk a' shua.

<sup>15</sup> Ñies Skököl tö iché Abraham a:

\* 16:11 Ismael: Hebreoie s'kiè e' wà kiane chè Skököl tö ittésé. \* 17:5 Abraham: Hebreoie s'kiè e' wà kiane chè ká wakpa taië, e' yé.

—Be' alaköl kè kièia Sarai. I'ñe ta ikirdaë Sara.† 16 Ye' er buaë chöraë ie' a as ie' alà kòka be' a. Mokì ye' er buaë chöraë ie' a. Ie' döraë ká taië wakpa miie. Nies ie' aleripa shu döraë blu'paie.

17 Abraham skà e' téwane iski iwötsa méwaitö íyök ki. E' dalewa ijañéka ta ibikeitséitö: “¿Ye' ki duas tso' cien eyök (100), wes e' dòmi yéie? ¿Sara ki duas tso' dabom suliyök (90), eta wes ie' dòmi alàë?”

18 Erë ie' tö iché Skëköl a:

—¿Be' mú er buaë chò Ismael a!

19 Erë Skëköl tö iiuté:

—Au, e' kè dör es. Be' alaköl Sara, e' döraë alàë ta ikiè múkabö Isaac. Ttè me'yö be' a e' è meraneyö ie' a ena ie' aleripa a kekraë. 20 Kè ye' éna Ismael ché'wa. Ye' tö ie' kimeraë ñies. Ye' tö ie' ala'r alöweraë taië as ileripa dò taië ká i' ki. Ismael döraë s'blu'pa doka dabom eyök ki böel e'pa yéie. Ie' aleripa alördaë taië. 21 Erë ttè me'tkeyö be' a e' atdaë be' alà kurdaë kiè Isaac e' a. Be' alà e' keraka Sara tö duas iëk wa kawö ikkë ta.

22 Mik Skëköl ttè one Abraham ta, ta imía. 23 E' wöshaë Abraham tö ilà Ismael e' tottola kkuölitla téé tsir. Nies ie' wa kanè mésopa tso' kune ie' u a ena wëpa toule ese, e'pa kos tottola kkuölitla tééitö tsir wes Skëköl tö iyé'ia es. 24-25 Mik Abraham ki duas tso' dabom suliyök ki sulitu (99) ena ilà ki itso' dabom eyök ki mañal (13) eta ie'pa tottola kkuölitla téne tsir.

26-27 Es e' diwö è wa Abraham ena ilà tottola kkuölitla téne tsir. Nies wëpa dör ie' kanè mésopa, e'pa kos tottola kkuölitla téne tsir.

## 18

### *Jehová tö iché Abraham a tö alà meraëyö be' a*

1 Ká et dibata a ta Abraham tkër ie' ukkö a. Ie' u tso' wé wëm kiè Mamré e' kós klò wökir àr ee. Ie' tkër ee eta Jehová e' kkaché ie' a. 2 E' wà pakè i' es: Abraham wökéka ta ie' isué tö wëpa de iëter ie' wörki mañal. E' sué ie' tö ta bet ie' e' kéka, mía ie'pa ñaletsuk ta ie' e' téwa iski ta iwötsa méwa íyök ki ie'pa shke'woie. 3 Ie' tö iché:

—A kékëpa, be' we'ikèyö, kè be' minuk bet. 4 Ye' mi' di' tsuk a' klò skuoie, e' ukuöki ta a' enú bèrè kal i' dikia. 5 A' detke ye' ska', eta ilè mekeyö a' a ñe as a' diché iërne shkoie. Eta ie'pa tö ie' iiuté:

—E'ma iú wes be' tö iché es.

6 Abraham tkawa iu a, ta ichéitö Sara a:

—Bet, harina bua'buaya yuló kilo doka dabom böyök (20) ekkë, e' wa pan yuó.

7 E' ukuöki ta bet ie' wák tunemi baka pupula shushtök wé bua'buaya ese klò'wéwaitö. E' mítser ie' wa méitö ikanè méso eköl a. Bet ta ikanè méso tö ikanewé ie' a katè. 8 Abraham tö baka chkà ena baka tsu'diö wösi ena baka tsu'diö pa'ali e' mé ie'pa a. Ie'pa tulur chkök kal àr ukkö a e' dikia. E' dalewa Abraham dur ie'pa tiök ee.

9 E' dalewa ie'pa tö ichaké Abraham a:

—¿Wé be' alaköl kiè Sara e'?

Ie' iiuté:

—Ie' tkër weshke.

10 Eta ie'pa eköl tö iché ia:

—Duas iëk e' wa ye' döne be' pakök. E' kéwö ta be' alaköl Sara alà ta'tke.

E' dalewa Sara tkër Abraham tsikka u wékkö a. Ie' tso' ie'pa ttöke, e' ttsök. 11 Abraham ena ilaköl, e' dewatke kékëpala. Bànet Sara kè tö alakölpa duè sueta'ia. 12 E' kuëki Sara kè a jañe wöklönuk ta ibikeitsé: “¿Wes ye' tö ttè i' klò'wèmi tö sa' kërulunetke e' dòmi alàë?” 13 Jehová tö iché Abraham a:

† 17:15 Sarai: Eré s'kiè e' ena Sara ttsër bére kuë'ki, erë iwà dör ñies. Iwà kiane ché blu' alà busi ö alaköl dalöiërta' taië ese. Skëköl tö ie' kiè mane'wé es iwà kkachöie tö ttè mène Abraham a e' wà döraë ie' ki ñies.

—¿Ì kuekì Sara jañéka? ¿Ì kuekì ie' tò iché: “¿Wes ye' kënewatke e' dõmi alàè?” <sup>14</sup> Kè ì ta ye' a darërë. Duas iëk ye' dõne, eta ie' alà ta'tke.

<sup>15</sup> Sara suane e' kuekì ichéitõ: “Kè ye' jañine'.”

Erë Jehová tò iché ia:

—E' kè dör es. Moki be' jañéka.

*Abraham kköché Jehová a Sodoma wakpa tsatkö*

<sup>16</sup> E' ukuökì ta ipakökwakpa e' duëkarak ta imiyal dõ wé Sodoma kí wëne ee. Abraham tò ñalé mére e' choat ie'pa a. <sup>17-19</sup> Eta Jehová tò ibikeitsé: “Abraham aleripa alördaë taië diché ta' taië. Ye' tò iyé'at ie' a tò ie' batamik ye' er buaë chöraë ká ulitane wakpa a. Ye' tò ie' shukit as ie' tò ila'r ena ileripa a ichò tò ye' ttè dalöió ñies tò ì kos buaë yësyësë e' ú. Es ì kos yé'yö ie' a e' weraëyö. E' kuekì ye' kawõtá ichökia tò iók ye' mí Sodoma.” <sup>20</sup> E' kuekì ie' tò iché Abraham a:

—Sodoma wakpa ena Gomorra wakpa e' wamblökerak suluë taië shute, e' ché sulitane tò. <sup>21</sup> E' kuekì ye' mia ee isauk tò yëne ie'pa e' wamblöke suluë ichók wes ye' a ikkatëne es.

<sup>22</sup> Eta Abraham pakökwakpa bõl e' yéttsa mia Sodoma. Erë Abraham atë dur Jehová ta. <sup>23</sup> Ie' e' skéwa tsinet Jehová ska' ta ichakéitõ ia:

—¿S'ser mokië esepa ewèwamibö se' sulusipa ta? <sup>24</sup> Isalema s'ser mokië esepa tso' Sodoma döká dabom skeyök (50), eta ¿ká e' wakpa ewèwamibö sera? ¿Kè be' tò ilo'yepa ie'pa kí s'ser mokië tso' döká dabom skeyök (50), e'pa kuekì? <sup>25</sup> ¿Moki be' kè tò s'ser yësyësë esepa ewepawa se' sulusipa ta ñita! Kè bö iwamlepa es. ¿E' kè wamblërpa! Be' dör sulitane shulökwak e' kuekì ¿wes e' kè tò se' shulepa yësyësë?

<sup>26</sup> Jehová tò iüté:

—S'ser mokië esepa kuéyö döká dabom skeyök (50) e' ta e'pa dalërmik kè ye' tò imalepa ewepawa.

<sup>27</sup> Eta Abraham tò iskà chéne ia:

—Be' dör Skököl. Ta ye' dör wes ká po ena muluchka es be' wöa. E' tò be' chakè taië kè suane. Isalema s'ser mokië esepa kianeia skel (5) as idöká dabom skeyök (50). <sup>28</sup> Skel e' kianeia, e' ta e'pa è kuekì ¿ká e' wakpa ewèwamibö?

Jehová tò iüté:

—S'ser mokië esepa kuéyö döká dabom tkéyök kí skel (45), e' ta kè ye' tò ká e' wakpa ewepawa.

<sup>29</sup> Abraham tò iskà chaké:

—Dö' dabom tkéyök (40) è tso', e' ta ¿be' tò ká e' wakpa ewèwami?

Jehová iüté:

—Au, kè yö ká e' wakpa ewepawa dabom tkéyök (40) e' dalërmik.

<sup>30</sup> Eta Abraham tò ikí ché ia:

—Taië be' tsiriwéyö, e' kuekì kè be' ulunuk ye' kí. Dö' s'ser yësyësë tso'ia dabom mañayök (30) è.

Jehová tò iüténe:

—Au, dabom mañayök (30), e'pa dalërmik kè yö iwepawa.

<sup>31</sup> Abraham tò ikí chaké ème:

—A ye' Kököl, taië yö be' dalösewéwa be' chakök i' es, erë ká kí s'ser mokië tso' dabom böyök (20) è, e' ta e'pa kuekì, ¿ká e' wakpa ewèwamibö?

Jehová tò iüté:

—Au, ie'pa dabom böyök (20), e' è dalërmik kè ye' tò ká e' wakpa ewepawa.

<sup>32</sup> Abraham tò ikí chaké ta ichéitõ ia:

—Kè be' ulunuk ye' kí. I' è chakekeyö be' a. S'ser mokië esepa tso' döká dabom eyök (10) è, e' ta ¿wes bö iwèmi? ¿ká e' wakpa ewèwamibö?

Jehová tö iiüté:

—Dabom eyök è dalërmik kè ye' tö ká e' wakpa ewepawa.

<sup>33</sup> Mik ie'pa tté one ñita etá Jehová míane. Abraham biteane ie' u a.

## 19

*Skëköl tö Sodoma ena Gomorra wakpa ewéwa*

<sup>1</sup> Ká tuinemitke tá Skëköl biyöchökwakpa bö l e'pa demi ká kiè Sodoma eë. Abraham alayök kiè Lot, e' tkër ká e' kköiëulewá e' wékkö a.\* Mik ie' tö Skëköl biyöchökwakpa sué, etá ie' e' kéká ie'pa shké'uk. Ie' e' téwá iski iwötsá méwaitö iyök ki. <sup>2</sup> Ie' tö iché ie'pa a:

—A kékëpa, ye' kköchò a' a tö a' kapóro ye' ska'. Eë a' klò skuòmi etá bule bla'mi a' mi'mine.

Ie'pa iiüté:

—Au. Kè be' tkinuk. Sa' kapömi u'rki.

<sup>3</sup> Erë Lot kköché taië ie'pa a. Bata ekkè tá ie'pa míyal ie' u a. Mik ie'pa dewá weshké, etá ie' tö ie'pa a chkè yulé buaë. Pan kè wötuule iwölöwoka wa ese yuëitö ie'pa a. Ie'pa chké.

<sup>4</sup> Kam ie'pa kapòlur e' yöki Sodoma wakpa wëpa debitu taië. E'pa tö Lot u kköiëwá shkit. Ie'pa ulitane, duladulapa dò kékëpaë, e'pa kulémi Lot wöa. <sup>5</sup> Ie'pa tö ichaké aneule:

—I'ñe wëpa bö l debitu be' u a ¿wé e'pa? ¡Ie'pa yó l ur íe sa' a u'rki as sa' serka ie'pa tá kësik wa!

<sup>6</sup> Lot e' yéttsá ttök ie'pa tá. Ukkö wötéwaitö buaë itsikka. <sup>7</sup> Ie' tö ie'pa a iché:

—A yamipa, ye' kköchò a' a tö ì sulu e' kè wamblar ie'pa tá. <sup>8</sup> Ye' alà busipa tulur bö l kam ser wëpa tá, e'pa yekeluryö a' a as a' tö iwamblò ie'pa tá wes a' ki ikiane es. Erë kè ì wamblar sulu ye' pakökwakpa dewá ye' ska', e'pa tá.

<sup>9</sup> Erë ie'pa iiüté:

—¡Be' e' skóu bánet! Be' kè dör ká i' wak. Be' kè a' ì yënuke sa' a. ¡E' kueki be' we'ikeraë sa' tö ie'pa se tsatá!

E' ukuöki tá iwe'ikémi ie'pa tö tá idemirak u wékkö batsökök. <sup>10</sup> Etá Lot pakökwakpa ulà tiéwá u'rki ukkò a Lot tséwá weshké. Etá ie'pa tö ukkò wotéwá. <sup>11</sup> Pë' sulusi qos wöbla sulu'wélur ie'pa tö, kè wawëneia. Duladulapa dò kékëpaë e'pa qos wöbla sulurulune. E' kueki ie'pa shtrinewá ukkò yulök. Kè ie'pa wá ikune. <sup>12-13</sup> Lot pakökwakpa tö iché ia:

—Taië ká i' wakpa kkatëne e' tté demi Jehová wö ki. E' kueki sa' patkéitö ie'pa eukwa. Ie'pa ewekewa sa' tö yës. E' kueki be' yamipa ekká kí tso' ká i' ki, e' tá e'pa yó l ur. Be' alà duladulapa tá' ö be' alà busipa tá' ö be' nuakipa tá', ö be' yamipa skà tso' ká i' ki, e' tá ¡iyó l ur bet tsúmi kamië!

<sup>14</sup> Etá Lot míá wëpa tté meule senukwá ila'r busipa tá e'pa weblök tá iché iarak:

—¡A' e' kóka! ¡A' yúshka! Jehová tö ká i' ewekewa.

Erë ie'pa tö ibikeitsé tö ie' kalöke ie'pa tá. <sup>15</sup> Ká ñirketke, e' ulatök tá Skëköl biyöchökwakpa tö iché Lot a:

—Sa' tö ká i' ewekewa. Kè be' duakwá, e' tá ¡bet, be' e' kóka! ¡Be' alaköl ena be' ala'r busipa tsúmi!

<sup>16</sup> Erë ie' e' ukeia enaë. Erë Jehová er buaë ché ie' a, e' kueki Skëköl biyöchökwakpa tö iklö'wéwá iulà a yéttsa. E' sù ñies ilaköl ena ilà busipa yélur ie'pa tö Sodoma a itsatkoie.

<sup>17</sup> Mik ie'pa tö iyéttsarak bánet etá Skëköl biyöchökwakpa tö iché ie'pa a:

—¡A' tunú as a' tsatkër! ¡Kè a' ká i' saukia tsikkane yës! ¡E' sù kè a' e' wöklö'uk kakkue i' ki! ¡A' éna e' tsatkak, e' tá a' yúshka etkéme kabata a!

<sup>18</sup> Erë Lot tö iché ia:

\* 19:1 ká e' kköiëulewá e' wékkö a: E' kèwö skà tá ká ulitane dör kköiëule ese ké wékkö tso'.

—Ja kékëpa, au, a' we'ikèyö! <sup>19</sup> A' tö ye' kimé taië. A' tö ye' tsatké duòwà ulà a, erë kè ye' shkak kabata a. Ye' ibikeitsè tö ì sulu datse ká i' eukwa, e' tö ye' kuèmi ñalà kî eta ye' duòwami. <sup>20</sup> Ká tsitsir tso' ië tsinet, eë ye' tkòshkarmi. Kawö mú ña shkowà eë e' tsatkoie. Mokî e' dör ká tsir.

<sup>21</sup> Eta ie'pa eköl tö iiüté:

—Ye' be' ttò ttsé, e' kuekî yö iweke wes be' tö ye' a ikié es. Ká chébö ye' a e' kè eweku'wayö. <sup>22</sup> Erë be' yú etkéme eë. Kè ye' a ì wamblënu kãm be' dòmi e' dalewa.

E' kuekî ká e' kiè Sóar.†

<sup>23</sup> Mik ká ñine eta Lot demi Sóar. <sup>24</sup> Eta azufre wöñarke bö'ie e' patkébitu Jehová tö taië Sodoma ena Gomorra kî. <sup>25</sup> Ká e' wakpa ewéwa bö' tö yës. Ñies dalikua kos tskirke ká e' kî e' ñanewà seraä. <sup>26</sup> Erë Lot alaköl dami itöki. E' tö ká sué itsikka. Bet ie' yönane dayë wösiie shkë'ka.

<sup>27</sup> Bule es bla'mi ta Abraham míane wé ikapaké Jehová ta ee. <sup>28</sup> Sodoma ena Gomorra kí suéitö ta ishlé batróke taië wes të blublu ña'wèsö es. <sup>29</sup> Es Skéköl tö ká e' wakpa ewéwa. Erë ì ki' Abraham tö ie' a, e' ska' ie' er de, e' kuekî ie' tö Lot tsatké.

*Lot alà busipa alà kéká ie' ta*

<sup>30</sup> Sodoma ena Gomorra ewéwa Skéköl tö, e' ukuöki ta Lot suane senukiá Sóar. E' kuekî imía senuk kabata a ila'r busipa böl ta. Eë ie'pa mañal sené ákuk a.

<sup>31</sup> Ká et ta ilà busi kibi tö iché itsirla a:

—Se' yé kënewatke eta kè wé wëpa ta' senuk se' ta wes alakölpa malepa wëpa ta' es.

<sup>32</sup> E' kuekî se' yé ttökasö blo' wa eta se' ser ie' ta, eta es se' ulà a alà dòmi.

<sup>33</sup> E' nañewe ta ie'pa tö iyé ttéka blo' wa taië, eta ilà busi kibi ék sené ie' ta. Erë ie' tteke blo' tö taië, e' kuekî kè ie' éna ì aneia. <sup>34</sup> Bule es ta ilà busi kibi tö iché itsirla a:

—Bö ittso', ye' sené se' yé ta. I'ñe nañewe iskà ttökasö blo' wa. Eta be' senú ie' ta. Eta es se' böl ulà a alà dòmi.

<sup>35</sup> E' nañewe ta ie'pa tö iyé skà ttéka blo' wa. Eta ilà busi tsirla sené ie' ta. Erë ie' tteke blo' tö taië, e' kuekî kè ie' éna ì aneia. <sup>36</sup> Es ilà busipa böl e' bukluwéka iyé wa. <sup>37</sup> Eta ikibi ék alà kune kiè mékaitö Moab. I'ñe ta Moab aleripa datse e' batamik. <sup>38</sup> Ñies itsirla de alàè, kiè mékaitö Ben-amí. I'ñe ta amonwak datse e' batamik.

## 20

*Abraham ena Abimélec*

<sup>1</sup> Abraham e' yéttsa Mamré a, mía tkörö ká kiè Négueb eë. Eta ie' e' tséat senuk ká kiè Guerar eë. Guerar atë Cadés ena Sur e' shushaë. <sup>2</sup> Ie' tö ká e' wakpa a iché tö Sara dör ie' kutà. Ká e' blú kiè Abimélec, e' tö Sara tsuk patké alakölie e' a. <sup>3</sup> Erë nañewe ta ie' kapowà e' dalewa, Skéköl tté ie' ta kabsuè a ta iché ia:

—Alaköl tsuk patkébö e' wëm ta', e' kuekî be' duòwami.

<sup>4</sup> Erë kãm ie' ser Abraham alaköl ta, e' kuekî ie' iiüté:

—A kékëpa, ye' kè kî e' nuí ku' ¿wes e' ttëwamibö? <sup>5</sup> E'ma Abraham wák tö ye' a iché tö alaköl e' dör ie' kutà. Ñies ilaköl tö ye' a iché tö Abraham dör ie' akè. E' kuekî ye' tö ì kos wé er bua' wa. Kè ye' wà iwamblëne er sulu wa.

<sup>6</sup> Skéköl tö iskà iüténe kabsuè a ta ichéitö ia:

—Ye' éna iane buaë tö be' tö iwé er bua' wa. E' kuekî kè ye' wà be' kàne ie' kökwà as be' kè tö ì sulu wamblö ye' kî. <sup>7</sup> Abraham dör ye' tteköl, e' kuekî bet be' yú ilaköl mukne ia. Ie' tö ye' a ikieraë as be' seriä ttsë'ka. Erë be' kè dë'ne imukne, e' ta be' ena be' yamipa kos duöralur.

<sup>8</sup> Bule es bla'mi ta Abimélec shkëne ikanè mésopa kiéitö ta ì suéitö kabsuè a e' kos pakéitö ie'pa a. Mik e' ttsé ie'pa tö eta taië ie'pa suanéka iyöki.

<sup>9</sup> Eta Abimélec tö Abraham kié ta iché ia:

† 19:22 Sóar: Hebreoie ká kiè e' wà kiane ché ká tsir.



—¿Iók be' tō iwamblé sa' tã es? Be' kuęki Skėköl tō sa' paũné ewèwa, erë Skėköl tō sa' paũné es, etã ¿ì sulu wambléyö be' tã? Íyi ese kè kawö tã' wamblėnuk. <sup>10</sup> Be' tō ì sulu wamblé ye' tã, etã ¿ì dör iwà?

<sup>11</sup> Abraham tō iüté:

—Ye' tō ibikeitsé tō ká i' kī kè yi tō Skėköl dalöieta'. Ye' suane dö' a' ye' ttèwã ye' alaköl yottsã ye' ulã a. <sup>12</sup> Erë iyëne tō ie' dör ye' kutã. Ie' yé dör ye' yé, erë ie' mì kè dör ye' mì. Ñies ie' dör ye' tayë. <sup>13</sup> Mik Skėköl tō ye' a iyë' tō be' e' yóttã be' yé ká a, etã yö iché ye' alaköl a: “Ká wa'ñe wé se' demi, etã ichó tō ye' dör be' akë.”

<sup>14</sup> Etã Abimélec tō Sara méne iwëm Abraham a. Ñies iyiwak kakméitö Abraham a obeja ena baka. Ñies kanè mésopa kakméitö ie' a wëpa ena alakölpã. <sup>15</sup> Etã ie' iché Abraham a:

—Ye' ká saú seraã wé wa be' wöbatse e' kī be' yú senuk.

<sup>16</sup> Etã Sara a ichéitö:

—Ye' tō inuköl wömulę kakmé be' akë a dökã mil ekkë. E' dör ì sulu wambléyö be' ta be' wakpa ulitane wöã e' patuöie. Es be' kè jaëneia.

<sup>17</sup> Etã Abraham tō Skėköl a ikié tō Abimélec ena ilaköl duöke, e' bua'üne. Etã Skėköl tō ie' pa bua'wéne. <sup>18</sup> Alakölpã kôs tso' Abimélec u a, e' pa shu mo'wã Jehová tō as kè idöiarak alãë Sara kuęki. Ie' pa kôs shu wötséene Jehová tō.

## 21

### *Sara alã kėkã Abraham a*

<sup>1</sup> Ì yé' Jehová tō Sara a tō be' alã kōrakã, e' wã tka wës iyëne bak es. <sup>2</sup> Erë Sara ena iwëm dör kėkėpalatke, erë ie' dunekã e' wã kune. Alã e' kune mik Skėköl tō ikėwö ye' ie' a etã. <sup>3</sup> Sara alã kune wëm e' kiè mékã Abraham tō Isaac. <sup>4</sup> Mik Isaac kī ká de pàköl, etã Abraham tō itóttola kkuölitla tée tsir wës Skėköl tō ie' a iyë' es. <sup>5</sup> E' kėwö ska' tã Abraham kī duas tso' cien eyök (100). <sup>6</sup> Etã Sara tō ibikeitsé: “Skėköl tō ye' jañawéka. Mik sulitane wã ijchenewã tō ye' de alãë etã taië ie' pa jañumi ye' tã. <sup>7</sup> Kam ye' alã kōkã etã kè yi a iyėnuk tō ye' dōmi alãë. Erë i' tã ye' alã kėkã Abraham a, ie' kėnewatke etã.”

### *Agar ena Ismael uyéttsã bánet*

<sup>8</sup> Etã Abraham alã Isaac de bėrie tã itsu'batsée e' kėwö tkö'wé Abraham tō taië. <sup>9</sup> Etã Sara tō isué tō Abraham alã kune egiptowak kiè Agar e' tã kiè Ismael, e' tō Isaac wayueke suluë. <sup>10</sup> E' kuęki Sara mía ichök Abraham a: “Ì kôs tso' be' wã mè se' alã Isaac a, e' kè kawö tã' blatè se' kanè méso e' alã a. E' kuęki iyuóshkar alãë.”

<sup>11</sup> Ismael dör Abraham alã ñies e' kuęki ì ché Sara tō e' tō ie' eriwé taië. <sup>12</sup> Erë Skėköl tō iché ia: “Be' aleripa chökle e' pa döraë Isaac wa. E' kuęki kè be' tkinuk be' alã kibi ék kī ena imi kī. Ì kôs ché Sara tō e' ú. <sup>13</sup> Be' alã kune a' kanè méso tã, ñies e' aleripa alöweraëyö taië, ie' dör be' alã e' kuęki.”

<sup>14</sup> Etã bule es bla'mi tã Abraham tō Agar a chkè mé. Ñies di' méitö ia iyiwak kkuölit yöule di' tsöie ese a. E' tiéka ie' tō seraã itsi kī tã iyuéshkar ilã Ismael e' tã. Agar mía shkėmi éanas wé kè yi serku' ese ska' ká kiè Beerseba e' éka. <sup>15</sup> Mik idi' enewa, etã ilã tkéséritö kal dikia. <sup>16</sup> Ie' kè kī ilã kiane suë duökwa, e' kuęki imia e' tkésər kukuie. Mik ie' e' tkésər iski etã ilã iémi.

<sup>17</sup> Ilã iuke e' ttsé Skėköl tō tã bet Jehová biyöchökwak bua'ie e' tō Agar a ichaké ká jai a: “¿A Agar wës be' de? Kè be' suanuk. Be' alã tkër iuk e' ttsé Skėköl tō. <sup>18</sup> Be' yú be' alã yulök. Ikókã ulã a kè arwa. Ye' tō ie' aleripa alöweraë taië.”

<sup>19</sup> Etã Skėköl tō Agar a di' tum kkaché et. Ie' mía di' e' tsuk, iyiwak kkuölit a e' méitö Ismael a yè. <sup>20</sup> Skėköl tō Ismael kkö'né buaë. Ie' talane sené ká wé kī kè yi ku' kiè Parán eë. Ie' de suléname buaë. <sup>21</sup> Ie' kibine tã imi tō iulabatséwã alaköl dör egiptowak ese tã.

### *Abraham ena Abimélec tō kawö mé ñi a*

<sup>22</sup> E' kəwō ska' t̄a blu' kiè Abimélec míā ttök Abraham t̄a. Ie' ñippökwakpa wökir, kiè Ficol, e' mí ie' wapie. Et̄a Abimélec tö iché Abraham a:

—Sa' w̄a ijcher tö Skököl be' kimeke taië ì k̄os w̄ekebö e' wa. <sup>23</sup> E' kuëki be' ttè mú ye' a íe Skököl wö wa tö be' kè tö ì sulu wamblepa ye' k̄i ñies ye' ala'r k̄i ena ye' aleripa k̄os e'pa k̄i. Be' ttè mú ye' a tö be' er bua' chöraë ye' a w̄es ye' er buaë ché be' a es. Ñies be' ttè mú ye' a tö be' er buaë chöraë k̄á i' w̄é be' serke e' wakpa a.

<sup>24</sup> Abraham tö iiuté:

—Tó. Es ye' ttè mé be' a.

<sup>25</sup> Erë Abimélec wakpa tö di' tum biule yé'tts̄a et Abraham wakpa ulà a. E' chaké Abraham tö ie' a. <sup>26</sup> Ie' tö iiuté:

—Erpa be' ye' tkiw̄ew̄a ttè e' wa. Kè bö ichópa ye' a, e'ma kè ye' w̄a ijcher. Brör çyi tö e' wamblé be' k̄i?

<sup>27</sup> Abraham tö baka ena obeja kakmé Abimélec a et̄a ie'pa böi k̄awö mé ñi a. <sup>28</sup> E' ukuöki t̄a Abraham tö iobeja alakipa pupula e' dapa'w̄é döka kuktö ek ts̄iní. <sup>29</sup> Mik e' sué Abimélec tö et̄a ie' tö Abraham a ichaké:

—çì kuëki be' iyiwak kuktö dapa'w̄é ek ts̄iní?

<sup>30</sup> Abraham tö iiuté:

—Iyiwak kuktö, e' meke ye' tö be' a iwà kkachoie tö mok̄i ye' tö di' tum e' bi'.

<sup>31</sup> Ie'pa böi k̄awö mé ñi a eë e' kuëki k̄á e' kinew̄a Beerseba.\*

<sup>32</sup> Ie'pa k̄awö mé ñi a, e' ukuöki t̄a Abimélec ena Ficol e'pa biteyal filisteowak k̄á a.

<sup>33</sup> Et̄a Abraham tö kal kuá kiè tamarisco ese kuatké elka Beerseba. Eë ie' tö Jehová dör Skököl yöbië e' dalöié. <sup>34</sup> Eë ie' sené k̄á taië filisteowak k̄á a.

## 22

### *Skököl tö Abraham ma'w̄é ilà wa*

<sup>1</sup> E' ukuöki t̄a Skököl tö Abraham ma'w̄é tö mok̄i ie' tö idalöieta'. Ie' chakéitö:

—A Abraham.

Abraham tö iiuté:

—çì?

<sup>2</sup> Et̄a Skököl tö iché ia:

—Be' alà eköl è kiè Isaac e' dalër be' éna taië, e' tsúmi Moria. Mik be' demi eë, et̄a ye' tö be' a kabata kkacheke, e' k̄i be' alà ttówa t̄a ñña'úwa ye' a ye' dalöioie.

<sup>3</sup> Bule es bla'mi t̄a Abraham e' kék̄a t̄a burro payuéitö. Bö' jchéitö tsèmi. Et̄a ie' míā w̄é Skököl tö ie' a iyë' eë ilà ena ikanè mésopa böi e'pa t̄a. <sup>4</sup> E' böiki es t̄a Abraham tö k̄á yöne ie' a e' k̄i sué kamië. <sup>5</sup> Et̄a ie' tö iché ikanè mésopa a:

—Íe a' e' tsúat burro i' t̄a. Ye' ena ye' alà, sa' micho kabata jai a Skököl dalöiök, e' wa sa' döne.

<sup>6</sup> Et̄a Abraham w̄a bö' mí e' ppékaitö Isaac kuli' k̄i. Tabela ena bö'ka bö' batsoie e' mí Abraham w̄a. Et̄a imíyal ñita. <sup>7</sup> Et̄a Isaac tö iché iyé a:

—A, yéwö.

Abraham tö iiuté:

—A alà, çì kiane be' k̄i?

Isaac tö iché ia:

—A Yéwö, bö' tso' se' w̄a, ñies bö'ka, erë çw̄é obeja pupula ttekew̄a Skököl a e'?

<sup>8</sup> Iyé tö iiuté:

—A alà, Skököl wák tö e' meraë se' a.

Ie'pa mir ñita. <sup>9</sup> Mik ie'pa demi w̄é Skököl tö iyë' Abraham a eë, et̄a Abraham tö ák kataté et ka'ie. E' ukuöki t̄a ibö' dapa'w̄éka ka' e' k̄i t̄a ilà klö'w̄éwaitö payuéwa mékaitö bö' bata k̄i. <sup>10-11</sup> Ie' tabela klö'w̄éwa ilà ttowa ña'w̄é Jehová a. E' wösh̄a t̄a Jehová biyöchökwak bua'ie e' tö Abraham chaké siwa' k̄i:

\* 21:31 Beerseba: Hebreoie k̄á kiè e' w̄a kiane ché ttè mène ñi a e' di' tum biule ö Obeja kuktö e' di' tum biule.



—¡A Abraham, a Abraham!

Ie' tö iüté bet:

—¿Í?

<sup>12</sup> Jehová biyöchökwak bua'ie e' tö iché ia:

—¡Be' alà kè shkà'war, kè ittarwà! Be' wák alà eköl ème e' kè kkëone be' wà ye' yöki. E' wa ye' wà ijcher tö moki be' tö ye' dalöieta' taië.

<sup>13</sup> E' wöshà Abraham tö isué tö obeja wè'ñe e' malítséwà idula' a kal tsitsir chale a. Ie' tö iyiwak e' klö'wéwà jché ña'wéwa ilà skéie Jehová dalöioie. <sup>14</sup> Ie' tö ká e' kiè mékà i' es: “Í kiane se' ki e' mera Jehová tö.” E' kuëki i'ñe tã se' tö ichekeia: “Í kiane se' ki, e' merdaë se' a Jehová kébata a.”

<sup>15-16</sup> Jehová biyöchökwak bua'ie e' tö Abraham skà kié ká jaì a tã ichéitö ia:

—Jehová tö iché: ‘Buaë be' tö ye' dalöieke, be' alà eköl è, e' méttšabö ye' a. <sup>17</sup> E' kuëki ye' er buaë chöraë be' a taië. Be' aleripa alöweraëyö taië wes bëkwö tso' taië ká jaì a es, wes tšsa'wö tso' taië dayë kkömik es. Nies ie'pa e' alörakà ibolökpa ki kekraë. <sup>18</sup> Be' tö ye' ttò dalöié, e' kuëki be' aleripa batamik ye' er buaë chöraë ká ulitane wakpa a.’

<sup>19</sup> Etã Abraham biteane wé ikanè mésopa atéat eë tã imíyal seraã ñita dömine Beerseba wé ie' serke eë.

#### *Nahor ala'r*

<sup>20-23</sup> E' ukuöki tã biyò debitu Abraham ki tö ie' èl kiè Nahor, e' alaköl kiè Milcá, e' ala'r de pàköl (8). E' alà ko'k kiè Uz. Imalepa kiè dör Buz, Quemuel, e' dör Aram yé, Quésed, Hazó, Pildás, Ildaf ena Betuel e' dör Rebeca yé.

<sup>24</sup> Nahor alaköl skà tso' kiè Reumá, e' tã ie' ala'r kékà tkèl. E'pa kiè dör Teba, Gáham, Tahas, ena Maacá.

## 23

#### *Sara blënewa*

<sup>1</sup> Mik Sara ki duas tso' cien eyök kí dabom böyök kí kul (127), <sup>2</sup> etã ie' blënewa ká kiè Quiriat-arbá atë Canaán eë. Nies ká e' kiè Hebrón. Abraham schöne e' ieitséitö siarë. <sup>3</sup> Ie' tkër idëütö nu o'mik e' e' kékà tã imía ttök hititawakpa tã, tã ichéitö ie'pa a:

<sup>4</sup> —Eré ye' dör ká kuá'ki wak serke a' shua e' è, eré ká wataú ña pöie ye' dëütö blowá.

<sup>5</sup> Ie'pa tö iüté:

<sup>6</sup> —A kékëpa, be' we'ikè sa' tö, sa' ttò ttsó. Sa' a tã be' dör kékëpa taië e' serke sa' shua. E' kuëki be' dëütö nu bló sa' pö bua'ie ese a. Sa' ulitane kè tö ichepa be' a tö kè iblar sa' pö a.

<sup>7</sup> Ie' e' duékà ie'pa wörki tã ie' e' tkéwà kuchë ki ie'pa dalöiök <sup>8</sup> tã ichéitö ie'pa a:

—Moki a' ki ikiane tö ye' dëütö nu blëwayö ie a' ká a, e' tã wëm kiè Efrón dör Sóhar alà, e' a ichó <sup>9</sup> tö ákuk tso' ie' ká kkò a kiè Macpelá e' wataúttša ye' a ye' yamipa pöie. Ye' tö ipatuëmi ie' a kos ituë ekkë. Es ákuk e' atë ye' ulà a a' shua.

<sup>10</sup> Etã Efrón dör hititawak e' tkërñak ie'pa shua, e' tö Abraham iüté darërë as iyamipa ena kos daparke ká e' wékkö a e'pa tö ittò ttsò. Ie' tö iché Abraham a:

<sup>11</sup> —A kékëpa, kè ye' tö ákuk watuëpa be' a. Ká e' ñies ákuk tso' ia, e' kakmekeyö be' a é. Ye' yamipa kos tso' ie e'pa tö ye' ttò ttsé tö ká e' kakméyö be' a. Be' dëütö nu bló eë.

<sup>12</sup> Eré Abraham e' tkéwane kuchë ki ká e' wakpa wörki <sup>13</sup> tã ichéitö ie' a sulitane wörki: —Ye' ttò ttsó. Be' pablëyö tö ká e' ské klö'ú ye' ulà a. E' ukuöki ye' dëütö nu blekewayö.

<sup>14</sup> Ie' tö iüté:

<sup>15</sup> —A kékëpa, ye' ttò ttsó. Ká e' ské dör inuköl wömulë döka cien tkëyök (400), eré inuköl ekkë è, kè e' ki se' tkinuk. Be' dëütö nu bló eë.

<sup>16</sup> Etã kos ie' tö ká ské ché imalepa wörki e' mène buaë Abraham a, ekkë patuëttsaitö.\*

\* 23:16 Es ie'pa wöblar iyi watauk ñi a. Eré Efrón tö iché tö ká e' kakméitö Abraham a eré e' kè yëne. Nies e' ane Abraham éna, e' kuëki ie' tö Efrón patuë bèrë kos Efrón ie' a iché ekkë.

17-18 Es Efrón ká tso' Macpelá atē Mamré diwö tskirke e' ëkã e' de Abraham ulà a iákuk ta ena kal tso' kôs iki e' ta. Hititawak ena sulitane dami ká e' wékkö a e'pa kôs dör ká tōne e' ttekölpa.

19 E' ukuöki ta, Abraham tö idëütö nu bléwã ákuk tuéitö Macpelá eē. Ká e' atē Mamré atē Canaán e' o'mik tsinet (Mamré kiè ñies Hebrón). 20 Ká e' watuéttsã ie' a hititawak tö. Es ká e' ena ákuk e' de Abraham ulà a iyamipa pöie.

## 24

### *Abraham tö alaköl yulök patké Isaac a*

1 Abraham dewã kékëpalaie. Ie' a Jehová er buaë ché iyi ulitane wa. 2 Ká et ta ie' tö ikanè méso kibi kié. E' dör ie' iyi kôs e' kuëblu. Ie' tö iché ia:

—Be' ulà múwã ye' tu' dikia iwã kkachöie tö mokì ì kiekeyö be' a e' wawëraëbö. 3 Jehová dör ká jaì ena ká i' e' Këköl e' wörki be' ttè mú ye' a mokie tö ye' alà kè kar senukwã Canaán ie se' serke e' alékölpa ta. 4 Be' yú ká wé ye' manét eē, etã eē alaköl yuló eköl ye' yamipa shuã senukwã ye' alà ta.

5 Ie' tö iiüté:

—Dö' alaköl kè bitu ye' ta, e' ta ¿wes ye' iwëmi? ¿Buaë idir be' a tö be' alà mi' ye' wa dò wé be' manét eē?

6 Ie' iiüté:

—¡Au, kè ye' alà tsarmi eē! 7 Jehová dör ká jaì Këköl, e' tö ye' yé'ttsã ye' yé u a ena ye' yamipa ká a. Ie' tö ittè me' ye' a tö ká i' meraëitö ye' aleripa a. Ie' tö ibiyöchökwak patkeraë be' kímuk alaköl tsukbitu ye' yàkie. 8 Alaköl kè shkak be' ta, e' ta kè be' tkinuk. Kè be' kàne iskã yulök. Erè kè ye' alà tsarmi eē.

9 Etã ikanè méso ulà méwã ie' tu' dikia ta ittè mé ia tö iweraë wes iuk patkéitö es. 10 E' ukuöki ta ie' tö iwökir iyi kôs bua' bua, ese shtë tsëmi kadmè. Ekkè kôs payuëitö iyiwak kiè kameio e' ki dökã dabop. Etã ie' mia iyiwak wëttsë tkörö Nahor atē Mesopotamia eē. 11 Mik ie' demi tsinet Nahor, etã ká tuirketke. Diwö ekkè ta ká e' alékölpa mi'ke di' tsuk. E' wöshã ta ie' de di' tum biule e' kkömik ta ikameio kéitö e' tulöksër enuk eē. 12 Etã ie' tö iché Skëköl a: “A Jehová, be' dör ye' wökir Abraham e' Këköl. Ye' kímú i'ñe ñies er buaë chó ye' wökir a. 13 Ie di' tum biule o'mik ye' e' tsukeat bërbër è ká i' busipa tso' di' tsuk e' dalewa. 14 Kawö mú ña tö wéne ék a ye' iché: ‘Be' kakö' ówa ye' a di' kadmú yé’, as e' tö ye' iütö: ‘Be' di' yó ñies be' kameio a ikakmekeyö.’ Es ye' éna iane tö e' ék shushtë be' tö Isaac a alakölie. Es ye' wa ijchermi tö be' er bua' ché ye' wökir a.”

15 Etã kam ì chekeitö e' or, etã ie' isuë alaköl datse eköl kakö' bune kuli' ki di' tsoie. E' dör Rebeca, ie' dör wëm kiè Betuel e' alà busi. Betuel mî dör Milcá ena iyé dör Nahor. Nahor dör Abraham ël. 16 Rebeca dör busi buaala kam isër wëm ta. Ie' mia döttsã di' tum biule e' a ikakö' wã iök. 17 Mik imítke etã Abraham kanè méso tunemi itökì ta iché ia:

—Be' we'ikèyö, di' dami be' wã e' kadmú ña yè.

18 Ie' tö iiüté,

—A kékëpa, be' di' yó.

E' bet ie' kakö' éwa klö'wéwã ulà a ta di' méitö ia yè. 19 Mik ie' di'yé one ta Rebeca tö iché ia:

—Ye' mí di' tsuk ñies mè be' kameio a.

20 Bet ikakö' wã ka'wëitö wé iyiwak di'yöke e' a ta imí di' kí tsuk iyiwak a. Es iwëitö kameio ulitane a. 21 E' dalewa Abraham kanè méso tso' isauk bërrë, wã dör tö ie' ki ikiane jchenowã yësyësë tö Jehová tö ie' kímé ì dalërmik ie' shkò e' wa as idöttsã buaë ö au.

22 Mik kameio di'yé one, etã ie' tö ula'tsio sù es dör gramo teröl ese tkéwã busi yik a. Ñies ulaio méitö böt, e' es dör cien gramos tsatã. 23 Etã ie' tö iché ia:

—Be' we'ikèyö, ichó ña ¿Yi alà busi be' dör? ¿Ye' chòmi i'ñe nañewe be' yé u a kapökrö ye' kanè mésopa ta?

24 Ie' iiüté:

—Ye' dör Betuel alà busi, e' dör Milcá ena Nahor alà wëm. <sup>25</sup> Sa' u a a' chòmi. Ñies a' kameio a chké tso'.

<sup>26</sup> Etā Abraham kanè méso e' tkéwā kuchē kī Jehová dalöiök <sup>27</sup> tā ichéitö: “Jehová dör ye' wökir Abraham e' Këköl. E' kīkōkka ye' tso'. Këkraë ie' tö ye' wökir Abraham kīmeke buaë. Këkraë ie' er buaë chöke ye' wökir a. Ie' wā ye' debitū buaë ñalā kī dō íe ye' wökir yamipa u a. E' kueki ikikékayö.”

<sup>28</sup> Rebeca tunemi shkālālāë imì u a ì kōs tka ie' tā e' pakök. <sup>29-30</sup> Ie' akë kiè Labán, e' tö ula'tsio sué ena ulaio sué ikutà ulā a. Ñies ì ché Abraham kanè méso tö e' tté ttséitö. E' kueki ie' biteā ñlaletsuk di' tum biule a. Ie' de Abraham kanè méso ska' e' tso'ia ikameio tā di' tum biule ska'. <sup>31</sup> Etā Labán tö iché ia:

—Jehová tso' be' tā buaë. ¿Mishka ye' ska'! ¿Wes be' e' tsukeat u'rki? Ye' u kanewétke be' a ñies kameio a.

<sup>32</sup> Es Abraham kanè méso biteā ie' tā. Eë ie' tö dalì tso' kameio kī e' éwa tā itiéitö. E' ukuöki tā ie' wā di' debitū Abraham kanè méso a ena iwapiepa a klò skuoie.

<sup>33</sup> Mik ie'pa tö itié, etā Abraham kanè méso tö iché:

—Kè ye' chköpa kam ye' tö iök ye' debitū e' wà pakò a' a' eta.

Labán tö iiuté:

—E'ma ichó. ¿ì dör iwà?

<sup>34</sup> Ie' tö iché:

—Ye' dör Abraham kanè méso. <sup>35</sup> Jehová tö ikimé taië. Ie' tö iblu'wé taië. Obeja, baka, orochka, inukölchka, kanè mésopa wëpa ena alakölpa, kameio ena burro, e' kōs méitö ia taië. <sup>36</sup> Ñies ilaköl Sara e' tö alà mé ia eköl wák wëm ikënewatke etā. Ì kōs tso' ye' wökir wā e' méitö ilā a. <sup>37</sup> Ie' tö ye' ké ttè muk ie' a. Ye' a ichéitö: ‘Ye' alà kè kar senukwā Canaán wé ye' serke e' alékölpa tā. <sup>38</sup> Be' yú wé ye' yépa tso' eë tā alaköl yuló eköl ye' yàkie ye' ditséwö shua.’ <sup>39</sup> Ye' tö iiuté: ‘A ye' wökir Abraham, ¿dö' alaköl kè bitū ye' tā?’ <sup>40</sup> Ie' tö ye' iuté: ‘Këkraë ye' serke buaë Jehová wōa, e' kueki ie' tö ibiyöchökwak patkeraë be' tā as be' kawö tkò buaë ñalā kī, ñies as alaköl kùbö ye' yàkie ye' yamipa ye' yé wa e'pa shua.’ <sup>41</sup> Erë ye' yamipa kè éna ilà busi patkak be' tā, e' tā kè be' tkinuk. Kè ì tté tā'ia be' kī.’

<sup>42-44</sup> “E' kueki ye' debitū i'ñe di' tum biule ska'. Eë ye' tö ikié Jehová dör ye' wökir Abraham e' Këköl e' a: ‘tö mokī be' ye' kīmeke alaköl yulök ye' wökir Abraham yàkie, e' tā as e' bitū ye' ska' íe di' tum biule ska'. Mik ye' tö ie' a di' kak kié, etā as imùitö ye' a ena ichòitö: Ñies ye' tö be' kameio a ikakmeke. Es ye' isuèmi tö alaköl e' shushté be' tö ye' wökir yàkie.’ <sup>45</sup> Mik e' chekeyö e' erketke, etā ye' isué tö Rebeca datse ikakö' bune ikuli' kī. <sup>46</sup> Mik ie' di' yinetke etā ye' tö ie' a iché: ‘Be' we'ikèyö, di' dami be' wā e' kakmú ña yè.’ E' bet ikakö' éwaitö tā ichéitö: ‘Be' di' yó. Ñies imekeyö be' kameio a.’ Ie' ye' a di' mé ñies ye' kameio a. <sup>47</sup> E' ukuöki tā ye' tö ie' a ichaké: ‘¿Yi alà busi be' dör?’ Ie' iiuté: ‘Ye' dör Betuel alà busi e' dör Nahor ena Milcá alà.’ Etā ula'tsio sù e' tkéwayö iyik a ena ulaio tkéwayö böt iulā a. <sup>48</sup> E' ukuöki tā ye' e' tkéwā kuchē kī tā Jehová dalöiéyö. Ie' dör ye' wökir Abraham e' Këköl e' kīkékayö. Ie' wā ye' debitū buaë yësyësë busi shukititö ye' wökir yamipa shua ilā a e' ska'. <sup>49</sup> Es ¿a' er buaë chöke ye' wökir a? ¿A' e' chöke ikimuk er bua' wa? Ichó ña i' tā yësyësë ima a' tö iché, es ye' éna iarri tö ì wëmiyö.”

<sup>50</sup> Etā Labán ena Betuel e'pa tö iiuté:

—E'ma i' kōs debitū Jehová ttò wa. E' kueki kè wes sa' a ì onuk. Kè sa' a ì yënuk yës.

<sup>51</sup> I' Rebeca. Itsúmi be' wökir a senukwā ilā tā wes Jehová kī ikiane es.

<sup>52</sup> Mik Abraham kanè méso tö tté e' ttsé, etā ie' e' tkéwā kuchē kī iwötsā méwā íyök kī Jehová dalöiök. <sup>53</sup> E' ukuöki tā ie' tö íyi yöule orochka wa ena inukölchka wa ñies datsi' bua' bua e' taië yélur méitö Rebeca a. Ñies ie' tö ikakmé Rebeca akë a ena imì a. <sup>54</sup> E' ukuöki tā ie' ena iwapiepa chké di'yé tā ikapere eë. Bule es tā itì'nerak tā Abraham kanè méso tö iché:

—Ye' míane ye' wökir ska'.

<sup>55</sup> Erë Rebeca akë ena imì e'pa tö iché ia:

—Rebeca kè tsarmi bet. Kawö mú ie' a as ie' e' tsuat sa' ta ká dabop, e' wa wë' be' wa imi'mi.

<sup>56</sup> Erë ie' tö iché ie'pa a:

—Kè ye' wöklö'ukia a' tö. Jehovah tö ye' kimé as ì kos döttsa buaë ye' a. E' kueki ye' ómi ye' wökir u a.

<sup>57</sup> Ie'pa tö iiuté:

—Sa' mí Rebeca kiök chakè jima ichèmiitö?

<sup>58</sup> Eta Rebeca kíerakitö ta ichakéraitö ia:

—A Rebeca jbe' shkak wëm i' ta?

Ie' tö iiuté:

—Tó.

<sup>59</sup> Es ie'pa tö Rebeca ena alaköl tso' ie' kkö'nuk kekraë e'pa a kawö mé as imi'rak. Nies Abraham kanè méso ena iwapiepa kos e'pa a kawö méraitö as imi'rak. <sup>60</sup> Ie'pa mitke ta Rebeca yamipa er buaë ché ie' a ttè i' wa:

“A sa' yami,

As be' alör taië shuteë.

As be' aleripa e' alökä ibolökpa kos ki.”

<sup>61</sup> Eta Rebeca ena ikanè mésopa e' tuléka ie'pa kameio ki ta imíyal Abraham kanè méso itöki.

<sup>62</sup> E' kéwö ska' ta Isaac serke Négueb wé di' tum biule tso' kiè “Skököl tso' e' tö ye' sueke” ee, e' dene iyé ska'. <sup>63</sup> Tsáli ta Isaac e' yéttsa shkök kabikeitsörami. E' wöshä ta ie' isué tö kameio datse tseë. <sup>64</sup> E' wöshä Rebeca tö ie' sué nies ta ie' e' éwa kameio ki.

<sup>65</sup> Rebeca tö ichaké Abraham kanè méso a:

—jWëm doä wì se' kke, e' dör yi?

Ie' iiuté:

—E' dör ye' wökir Isaac.

Eta Rebeca wö pabakéwä datsi'tak wa.

<sup>66</sup> Abraham kanè méso tö ì kos tka ie' ta e' paké Isaac a. <sup>67</sup> E' ukuöki ta Rebeca mítser Isaac wä imi Sara blënewä e' u a. Es Isaac senéwä ie' ta. Isaac éna Rebeca dalër taië, es ie' er pabléne imi blënewä e' kueki.

## 25

### *Abraham ena Queturá e'pa aleripa*

<sup>1</sup> Abraham alaköl ské tséwä kiè Queturá. <sup>2</sup> Ie' ala'r kéka Abraham ta wëpa dökä teröl. E'pa kiè dör Zimrán, Jocsán, Medán, Madián, Isbac ena Súah. <sup>3</sup> Jocsán dör Sebá ena Dedán, e'pa yé. Dedán aleripa e' ditséwö dökä mañal kiè asurwak, letuswak ena leumwak.

<sup>4</sup> Madián ala'r wëpa kiè Efá, Éfer, Hanoc, Abidá ena Eldaá. E'pa kos dör Queturá aleripa.

<sup>5-6</sup> Ì kos tso' Abraham wä e' atë Isaac ulà a. Erë kam Abraham duöwä, e' yöki ie' tö íyi kakmé ilakölpa malepa ala'r a. Ie'pa patkémiitö senuk ká bánet atë diwö tskirke e' éka kamië as kè iku'rak Isaac ska' tsinet.

### *Abraham blënewä*

<sup>7</sup> Abraham sene' duas cien eyök kí dabom kulyök kí skel (175) seraa <sup>8</sup> eta iblënewä buaë ikënewatke kè weine siarë. Es ie' michoë idëutöpa itöki. <sup>9-10</sup> Ila'r Isaac ena Ismael e'pa tö inú blé ilaköl Sara pö e' o'mik ákuk kiè Macpelá ee. Ákuk e' atë Mamré diwö tskirke e' wa. Ká e' bak hititawak kiè Efrón dör Sóhar alà e' ulà a. Ká e' watottsa hititawak tö Abraham a. <sup>11</sup> Abraham blënewä, e' ukuöki ta Skököl er buaë ché Isaac a. Ie' e' tséat senuk tsinet di' tum biule kiè “Skököl tso', e' ye' sueke” ee.

### *Ismael ala'r*

<sup>12</sup> Ismael dör Abraham alà Agar ta. Agar dör Abraham alaköl Sara, e' kanè méso e' dör egiptowak. Ikkë dör Ismael ala'r e'pa kiè <sup>13</sup> wes ikunerak es: Nebaiot, e' dör ilà tsá. E' itöki

Quedar, Adbeel, Mibsam, <sup>14</sup> Mismá, Dumá, Masá, <sup>15</sup> Hadar, Temá, Jetur, Nafis ena ibata kiè Quedmá. <sup>16</sup> E'pa kos dör Ismael ala'r doka dabom eyök ki bö! (12). Ie'pa ká kiérak iwákpa kiè wa. Ie'pa kos dör iwakpa ká wökirpa.

<sup>17</sup> Ismael ki duas de cien eyök kí dabom mañayök kí kul (137) ta iblënewa. Es ie' michoë idëütöpa itöki. <sup>18</sup> Ie' aleripa mía senuk Havilá ena Sur e' shusha. Ká e' atë Egipto wöshaë Asiria ñalé kke. Ie'pa serke eë bánet Abraham aleripa malepa yöki.

### *Jacob ena Esau kune*

<sup>19</sup> Ttè i' dör Isaac dör Abraham alà, e' pakè. <sup>20</sup> Isaac ki duas de dabom tkëyök (40) ta isenëwa Rebeca ta. Rebeca dör Betuel e' alà busi ena Labán kutà. Ie'pa dör arameowak serke ká kiè Padán-aram eë. <sup>21</sup> Rebeca kè dò alàë. E' kueki Isaac tö Jehovah a ikié as Rebeca dò alàë. Jehovah tö ittò ttsé ta Rebeca duneka e' wakpa dör klò. <sup>22</sup> Erë klöpa ñippöke taië ie' shua. E' kueki ie' ibikeitsé: “Ye' weirke i' es, e'ma jioök ye' sermiia?” E' kueki ie' mía iwà chakök Jehovah a. <sup>23</sup> E' tö ie' a iché:

“Be' shua ala'r tso' bö!.

Mik ie'pa de këchke, eta ikibi ék döraë itsirla kanè mésoie.

Ie'pa aleripa döraë ká böt ñi bolökpa ese wakpa.

Itsirla aleripa döraë diché kibiie ikibi aleripa tsata.

E' kueki ie'pa ñippémitke kam ikur e' yöki.”

<sup>24</sup> Rebeca kéwö de, eta klöpa kune wëpa. <sup>25</sup> Ikewe ék kune e' tsà dör mashmash ipàkö shamamaë. Ie' kiè mékaitö Esau.\* <sup>26</sup> Alà tsá kune e' klöulewa iël tsirla wa iklò kaniñak a iulà et wa. E' kueki ikiè mékaitö Jacob.† Mik Rebeca klöpa kune eta Isaac ki duas tso' dabom teryök (60).

### *Iyé wa ì tso' mekeat Esau a e' kéwö watuéttsaitö*

<sup>27</sup> Klöpa kibinetke. Esau dör yëria poë. Ie' wöbatsö sulu yëble wa. Erë iël Jacob, e' kè dör es. Ie' serke bèrë. Ie' wöbatsö senuk u a è. <sup>28</sup> Iyiwak kañiru tteke Esau tö e' chkà wa Isaac wöbatsö suluë. E' kueki Isaac ki Esau kiar kibiie Jacob tsata. Erë Rebeca ki Jacob kiar kibiie Esau tsata.

<sup>29</sup> Ká et ta Jacob tso' ulök. E' dalewa Esau debitu shtrinëwa taië datse kañika. <sup>30</sup> Ie' iché Jacob a:

—Be' we'ikëyö, ì alé be' tö mat se kakmú ye' a ñè. Sulu ye' dué bli wa. E' kueki Esau kiè Edom‡ ñies.

<sup>31</sup> Jacob tö iiuté:

—Keweie ì mekeat se' yé tö be' a be' dör ilà kibi e' kueki, e' kéwö múttsa ye' a chkò i' skéie.

<sup>32</sup> Esau tö iché:

—Ye' tteke bli tö dö' e' tö ye' ttëwa, e' ta ì mekeat se' yé tö ye' a jìie bua' e' dör ye' a?

<sup>33</sup> Jacob tö ikí ché ia:

—I' ta be' ttè mú ye' a tö mokí be' tö ye' a imeke.

Eta Esau tö ittè mé Jacob a yësyësë Skëköl wöa. Es ì mekeat iyé tö ie' a, e' kéwö métttsaitö Jacob a. <sup>34</sup> Jacob tö chkò mé ia pan ta. Mik Esau chké one di' yé one, ta ie' e' kéka ta imía. Ie' dör ilà kibi e' ulà a iyi bua' kéwö tso', e' kè ki ie' tkine yës.

## 26

### *Isaac mía Guerar*

<sup>1</sup> E' kéwö ska' ta ketba ane taië ká e' kos ki wes ibak Abraham kéwö ska' ta es. E' kueki Isaac mía Guerar wé filisteowak blú serke kiè Abimélec eë. <sup>2</sup> Eë Jehovah e' kkaché ie' a ta

\* 25:25 Esau: Esau kiè ñies Seír. Hebreoie Seír wà kiane chè pakò. Génesis 36.8 saü. † 25:26 Jacob: Hebreoie s'kiè e' wà kiane chè s'klò kaniñak. ‡ 25:30 Edom: Hebreoie s'kiè e' wà kiane chè mat.

ichéitö ia: “Kè be' minuk Egipto. Be' e' tsúat wé ye' be' a iché eē. <sup>3</sup> Be' senúia ká i' kī. Ye' tso' be' ta. Ye' er buaë chöraë be' a. Ká i' kōs meraëyö be' a ñies be' aleripa a. Es ye' ttè muke be' a wes kewe ime'yö be' yé Abraham a es. <sup>4</sup> Be' aleripa alöweraëyö taië wes bëkwö tso' taië es. Ká i' kōs merayö be' aleripa a. Ñies ie'pa batamik ye' er buaë chöraë ká ulitane wakpa a. <sup>5</sup> Abraham tö ye' ttè kōs e' iütë' buaë. Ttè mé ye' tö ie' a e' kōs blë' buaë ie' tö e' kuëkī ye' tö ttè buaë e' meke be' a ñies.”

<sup>6</sup> Isaac e' tséat senuk Guerar. <sup>7</sup> Ká e' wakpa tö Isaac a ichaké: “¿Rebeca dör be' yaie?” Erë ie' suane ichök: “Ie' dör ye' alaköl.” E' kuëkī ie' iché: “Ie' dör ye' kutà.” Ie' tö ibikeitsé tö ká e' wëpa tö ie' ttëwami ilaköl buaala kuëkī.

<sup>8</sup> Isaac kī ká de taië eē. Ká et ta, ká e' blú kiè Abimélec, e' tö isuë ukkò tsitsir a tö Isaac tso' ilaköl Rebeca peñuk. <sup>9</sup> Bet itsuk patkëmiitö ta ichéitö ia:

—¿Mokī tö alaköl sē dör be' alaköl? ¿Ì kuëkī be' tö iyë' kuaë tö ie' dör be' kutà?

Isaac tö iüté:

—Ye' ibikeitsé tö isalema a' ye' ttëwami ie' kuëkī.

<sup>10</sup> Erë Abimélec tö iché ia:

—¿Ì kuëkī i' wamblébö sa' ta? Tsir etā wëm wele senéwa ie' ta, e' ta iekkë ta be' tö sa' ké ì sulu wamblök Skëköl wöa.

<sup>11</sup> Abimélec tö iché sulitane a:

—A' isie tö Isaac tsiriwé ö ilaköl tsiriwé, e' ta e' tterawa.

<sup>12</sup> Duas e' wa Isaac tö dalì kuatké, wà wöne buaë, Jehová er buaë ché ie' a e' kuëkī. <sup>13</sup> Ie' de íyi blú taië. Taië íyi tso' ie' wa. <sup>14</sup> Ie' wa obeja ena baka tso' taië. Ñies kanè mésopa tso' taië ie' wa. E' kuëkī filisteowak er ttsë'r suluë ie' kī. <sup>15</sup> E' kuëkī ie'pa tö di' tum bi' iyé Abraham e' kanè mésopa tö, e' kōs wötéwa íyök wa. <sup>16</sup> Bata ekkë ta Abimélec tö iché Isaac a:

—Be' yöne íyi blu' taië sa' tsata, e' kuëkī ¿be' yúshka!

<sup>17</sup> Etā Isaac míā senuk Guerar kakkue kī. <sup>18</sup> Eē di' tum bi' iyé tö, e' wötë'wa filisteowak tö iyé blënewa ukuöki ta, e' kōs biéneitö ta ikiè mékaitö wes iyé tö ime'ka es. <sup>19</sup> Ká et ta ie' kanè mésopa tso' di' tum biök ká e' kī, etā ie'pa tö di' tum a di' tuökeka taië ese kuë et. <sup>20</sup> Erë ká e' obeja kkö'nukwakpa debitü ñippök Isaac obeja kkö'nukwakpa ta. Ie'pa tö iché tö di' tum e' dör ie'pa icha. E' kuëkī Isaac tö di' tum biule e' kiè méka “Ñippök.” <sup>21</sup> E' ukuökī ta Isaac kanè mésopa di' tum skà bié et, e' kī iskà ñippérak. E' kuëkī di' tum biule e' kiè mékaitö “Se' ñi bolök.”

<sup>22</sup> Ie' míā kamië ká e' kī, eē di' tum skà biéitö et. E' kè kī ñi bunerak. Ie' iché: “I'ñe ta Jehová tö ká bua' mé se' a wë' ta se' serdaë buaë.” E' kuëkī ká e' kiè mékaitö “Ká tso' taië se' a.”

<sup>23</sup> E' ukuökī ta ie' míā Beerseba. <sup>24</sup> E' nañewe Jehová de ie' ska' ta ichéitö ia:

“Ye' dör be' yé Abraham e' Këköl.

Ye' tso' be' ta, e' kuëkī kè be' suanuk.

Abraham dör ye' kanè méso e' dalërmik ye' er buaë chöraë be' a, ñies be' aleripa alöweraëyö taië.”

<sup>25</sup> Eē Isaac tö ák kataté et ká'ie iyiwak jchoie Jehová dalöioie. Eē ie' sené ta ikanè mésopa tö di' tum bié et eē.

*Isaac ena Abimélec kawö mé ñi a*

<sup>26</sup> Ká et ta, Abimélec datse Guerar debitü ttök Isaac ta. Iyamipa debitü böi ie' ta. Eköl kiè Ahuzat. Iëköl kiè Ficol. E' dör Abimélec ñippökwakpa wökir. <sup>27</sup> Isaac tö iché ia:

—A' éna ye' ar suluë. A' ye' yö'shkar a' ká kī. Etā ¿iók a' do ye' ska'?

<sup>28</sup> Ie'pa tö iüté:

—Sa' isuë tö Jehová tso' be' ta. E' kuëkī sa' bitea be' a ichök tö kawö mùwasö ñita. <sup>29</sup> Sa' kè wa be' tsirioule ì wa. Kekraë sa' tö be' kímé. Mik be' manetwa, etā sa' kè wa ì tté ku'



a' k<sub>i</sub>. I'ñe t<sub>a</sub> iwënew<sub>a</sub> tö be' a Jehová er buaë chöke taië. E' kuëki be' ttè mú sa' a tö be' kè tö ì sulu wamblepa sa' k<sub>i</sub>.

<sup>30</sup> Et<sub>a</sub> Isaac tö kawö buaë tkö'wé ie'pa t<sub>a</sub>, chkè wa di'yè wa. <sup>31</sup> Bule es bla'mi t<sub>a</sub> ie'pa tö ikawö mé ñi a tö kè ñippöiarak. E' ukuöki t<sub>a</sub> ie'pa e' chéat ñi a er bua' wa.

<sup>32</sup> E' diwö shà t<sub>a</sub> Isaac kanè mésopa tso' di' biök, e'pa w<sub>a</sub> ibiyó de tö sa' di' kué. <sup>33</sup> Ie' tö di' e' kiè méka Sebá.\* E' kuëki i'ñe t<sub>a</sub> ká e' kièia Beerseba.

<sup>34</sup> Mik Esau k<sub>i</sub> duas de dabom tkëyök (40), et<sub>a</sub> ie' senéw<sub>a</sub> alakölpa böi t<sub>a</sub>. Eköl kiè Judit e' yé kiè Beerí, e' dör hititawak. Iëköl kiè Basemat e' yé kiè Elón, e' dör hititawak ñies.

<sup>35</sup> Alakölpa böi e'pa tö Isaac ena Rebeca eriwéka tsiriwéka taië.

## 27

*Isaac er buaë ché Jacob ena Esau a*

<sup>1</sup> Isaac dew<sub>a</sub> këkëpalatke. Ie' kè wöbla wawëria. Ká et t<sub>a</sub> ilà kibi Esau e' kiéitö t<sub>a</sub> ichéitö ia:

—A alà!

Esau tö iiuté:

—A yéwö, ¿ì?

<sup>2</sup> Et<sub>a</sub> Isaac iché ia:

—Be' tö isué tö ye' kënewatke dö' wekkè alè t<sub>a</sub> ye' duòw<sub>a</sub>. <sup>3</sup> E' kuëki ye' k<sub>i</sub> ikiane tö be' kuaböt klö'ú t<sub>a</sub> be' yú ye' a yëblök. <sup>4</sup> Et<sub>a</sub> iwakaneú ña buaë wës ye' wöbatsö iwa es, t<sub>a</sub> itsúbitu ña katè. E' wa ye' er buaë chöke be' a kam ye' duòw<sub>a</sub> e' yöki.

<sup>5</sup> Erë Isaac ttöke Esau t<sub>a</sub> e' ttsé Rebeca tö. E' kuëki mik Esau mía yëblök kañika <sup>6</sup> et<sub>a</sub> bet ie' tö iché Jacob a:

—A alà, ye' ttò ttsó. Ye' tö be' yé ttsé ttök be' èl Esau t<sub>a</sub>, t<sub>a</sub> iché ia: <sup>7</sup> “Be' yú yëblök, e' wakaneú ña buaë t<sub>a</sub> itsúbitu ña katè. E' ukuöki t<sub>a</sub> ye' tö be' a íyi qos bua' e' kèwö mekeyö be' a Jehová wörki kam ye' duòw<sub>a</sub> e' yöki.” <sup>8</sup> E' kuëki ye' ttò ttsó buaë. <sup>9</sup> Be' yú chibo pupula bua' bua ese tsúbitu ña bötö t<sub>a</sub> ikanewekeyö buaë wës be' yé wöbatsö iwa es. <sup>10</sup> E' ukuöki t<sub>a</sub> be' tö chkè tsúmi be' yé a as iñuitö. Es íyi qos e' kèwö atmi be' a be' èl skéie.

<sup>11</sup> Erë Jacob tö iché imì a:

—Ye' èl pa shamamaë. Ye' kè dör es. <sup>12</sup> Ye' yé tö ye' kèmi, e' t<sub>a</sub> ittswami tö ye' idir, et<sub>a</sub> ie' ichèmi tö ye' tso' ie' dalöseukw<sub>a</sub>. Ie' kè er buaë chepa ye' a. E' skéie ie' er sulu chöraë ye' k<sub>i</sub>.

<sup>13</sup> Erë imì tö iiuté:

—A alà, as ie' er sulu chò ye' k<sub>i</sub>. Ye' ttò iütó. Be' yú chibola chéyö be' a e' tsuk.

<sup>14</sup> Et<sub>a</sub> Jacob mía chibola tsuk e' debitu iw<sub>a</sub> imì a. E' kanewé imì tö buaë wës Isaac wöbatsö iwa es. <sup>15</sup> Ilà kibi Esau datsi' tso' blëule u a e' bua' bua yétsa iékaitö ilà tsirla k<sub>i</sub>.

<sup>16</sup> E' ukuöki t<sub>a</sub> chibola kkuölit wa Jacob ulà ena ikuli' patrëw<sub>a</sub>itö. <sup>17</sup> Chkö bua' ena pan yuétkeitö, e' méitö Jacob a tsèmi iyé a.

<sup>18</sup> Jacob dew<sub>a</sub> iyé ska' t<sub>a</sub> ichéitö ia:

—A yéwö.

Isaac tö iiuté:

—A alà, ¿be' dör ye' alà wéne ék?

<sup>19</sup> Ie' iiuté:

—Ye' dör Esau, be' alà kibi ék. Ì chébö ña, e' kanewétkeyö. Be' e' tköser iyiwak ttéyö e' katök. E' ukuöki t<sub>a</sub> be' íyi buaë e' kèwö mekebö ye' a, e' mú ye' a.

<sup>20</sup> Erë Isaac tö ichaké ia:

—A alà, ¿wës be' ulà de iyiwak e' ska' bet?

Ie' iiuté:

—Jehová dör be' Këköl e' tö ye' kímé e' wa ikuéwayö bet.

\* 26:33 Sebá: Hebreoie di' biule kiè e' wà kiane chè ttè mène ñi a.

<sup>21</sup> Isaac tö iché iā:

—Be' e' skówa ye' o'mik pattsèyö tö mokië be' dör ye' alà Esáu.

<sup>22</sup> Ie' e' skéwa iyé o'mik as ipattsòitö. Isaac tö iché:

—Be' ttò e' dör Jacob ttò. Erë be' ulà e' dör Esáu ulà.

<sup>23</sup> Jacob ulà kò shamamaë wës iël kibi ulà es, e' kuëki Isaac kè éna iane buaë tö e' dör Jacob. Mik ie' er buaë chöketke ilà a, <sup>24</sup> etā iskà chakéneitö:

—¿Moki be' dör ye' alà Esáu?

Ie' iiüté:

—Tó, ye' dör Esáu.

<sup>25</sup> Iyé tö iché iā:

—A alà, iyiwak ttébö kanewébö e' mú ña katè as ye' er buaë chò be' a.

Ie' tö iyé tié ñies vino mé iā yè. Isaac chké, vino yé. <sup>26</sup> E' ukuöki tā ichéitö iā:

—A alà, be' e' skówa ye' o'mik ye' wöalattsó.

<sup>27</sup> Mik Jacob e' skéwa iyé wöalattsök, etā iyé tö idatsi' alattsé tā ier buaë ché ilà a ttè ikkè wa:

“Tó, ipaalar wës ye' alà paalar es.

Ie' paalar buaë wës kañika kkò'nè Jehová tö e' alar è.

<sup>28</sup> As Skéköl tö be' a mò wöli mè kekraë be' dalikua ki.

As ie' tö be' dalikua kôs e' wöü buaë

as be' wā trigowö tā taië ena vino tā taië.

<sup>29</sup> Ká kuā'ki wakpa taië as e' dò be' kanè mésopaie.

As ie'pa e' tulòwarak kuchë ki be' wörki be' dalöiök.

As be' mú dò be' èlpa wökirie.

As ie'pa e' tulòwā kuchë ki be' wörki be' dalöiök.

Wépa er sulu ché be' ki, esepa ki Skéköl er sulu ské chöraë.

Ñies wépa er buaë ché be' a, esepa a Skéköl er buaë ské chöraë.”

<sup>30</sup> Isaac er buaë chétke Jacob a tā Jacob míatke. E' bet tā Esáu tso' yéblök e' dene. <sup>31</sup> Ñies ie' tö chkè alé buaë, e' mí iwā iyé a tā ichéitö iā:

—A yéwö, dúla ttéyö e' alí kató. E' ukuöki tā be' er buaë chöke ye' a e' chó ña.

<sup>32</sup> Isaac tö ichaké:

—¿Yi dör be'?

Ilà tö iiüté:

—Ye' dör Esáu be' alà kibi.

<sup>33</sup> Isaac tkinewā painéka taië tā ichéitö:

—E'ma ¿yi dare yéblök, e' wā chkè debitu ña? E' katéwayö seraa kam be' dò e' yöki. E' a ye' er buaë chétke. Es ie' a ye' er buaë ché e' atetke.

<sup>34</sup> Mik Esáu tö à ché iyé tö e' ttsé, etā ie' erianekā anekā taië tā ichéitö:

—¿A yéwö, ye' a er buaë chó ñies!

<sup>35</sup> Erë Isaac tö iiüté:

—Be' èl datke ye' kitö'uk e' a ye' er buaë chétke be' skéie.

<sup>36</sup> Esáu tö iiüté:

—Wëe' ie' kiè Jacob. I' tā bötökicha iwambléitö ye' tā i' es. Be' iyi kéwö mekebö ye' a ye' dör be' alà kibi e' kuëki, e' kéwö yé'ttsa ye' ulà a ie' tö kuaë. I' ñe tā be' er buaë chöke ye' a e' yéttaitö ye' yöki. ¿Warma be' er buaë chöke ye' a e' kè tā'ia?

<sup>37</sup> Isaac tö iiüté:

—Ittsó. Ye' tö ie' mékatke be' wökirie. Ye' tö be' aleripa kôs e' métke ie' kanè mésopaie. Ñies ye' tö ichétke as chkewö ena vino dò ie' ulà a taië. A alà, ¿i memiia ye' tö be' a i' ta?

<sup>38</sup> Erë Esáu tö ikí ché iyé a:



—A yéwö ꞑbe' er buaë chöke sa' a e' dör etkè? ꞑYe' a er buaë chó ñies! Eta Esau íéka taië.

<sup>39</sup> Isaac tö iché ia:

“Be' serdaë wé mò wöli kè ta' taië ese ska'.

Eë be' dalikua kè wörpa buaë.

<sup>40</sup> Be' ñippöraë tabè wa o'ka ta ííyi kuëki, e' mik be' serdaë.

Be' döraë be' ël kanè mésoie.

Erë mik be' ñippémi ie' ta,

eta be' e' yörattsa ie' ulà a.”

### *Jacob tkashkar Esau yöki*

<sup>41</sup> Isaac er buaë ché Jacob a Esau skéie. E' kuëki Esau éna suluë Jacob arke. Ie' ibikeitsé: “Ye' yé duökewatke. Mik iduowa e' kéwö tka, eta ye' ël tterawayö.”

<sup>42</sup> Mik Rebeca wa ijchenewa tö Esau tö iël bikeitsé ttèwa, eta Jacob tsuk patkéitö ta iché ia:

—A alà, ittso. Be' ël Esau e' pablöke tö ie' be' tterawa. <sup>43</sup> E' kuëki ye' ttò ttsó. Be' tkóshkar bet ye' akè kiè Labán serke Harán e' u a. <sup>44-45</sup> Be' e' tsúat ie' ska' ká taië dò mik be' ël er buanene be' ki ena ì sulu wamblébö e' chowane ie' éna eta. E' ukuöki ta ye' tö be' tsuk patkeraë, e' wa be' döne. ꞑYe' kè ki ikiane tö ye' ala'r bö! e' duöwa diwö etkè a!

<sup>46</sup> E' ukuöki ta Rebeca tö iché Isaac a:

—Esau alakölpä dör hititawak e'pa tö ye' shtriwétke taië. Jacob senéwa alaköl ese ta, e' ta ye' mú duöwa.

## 28

<sup>1</sup> Eta Isaac tö Jacob kié ta ishke'wéitö ta ichéitö ia:

—Kè be' senukwa canaánwak ta. <sup>2</sup> Be' yú be' duöchke kiè Betuel serke Padán-aram e' ska'. Eë be' senúwa be' nau Labán alà busipa e' eköl ta. <sup>3</sup> Skököl Diché Ta' Íyi Ulitane Tsata as e' er buaë chò be' a. Ñies as ie' tö be' aleripa alöu taië ká wa'ñe. <sup>4</sup> Ie' tö iyë'atbak Abraham a tö ká i' meraëitö ie' a. E' ki se' serke shkal. As ie' er buaë chò be' a ena be' aleripa a wes ie' er buaë yé' Abraham a es as ká i' dò a' ulà a.

<sup>5</sup> Es Isaac tö Jacob patkémi Padán-aram. Jacob demi inau Labán ska'. Labán dör arameowak kiè Betuel, e' alà. Ie' dör Rebeca akè. Rebeca dör Jacob ena Esau e'pa mì.

### *Esau senéwa Mahalat ta*

<sup>6</sup> Esau wa ijchenewa tö Isaac er buaë ché Jacob a ñies tö ipatkémiitö ká kiè Padán-aram senukwa ee. Ñies ie' wa ijchenewa tö mik iyé er bua' ché Jacob a eta ichéitö ia:

—Kè be' senukwa canaánwak ta.

<sup>7</sup> Ñies ie' wa ijchenewa tö Jacob míá ká kiè Padán-aram wes iyé ena imì tö iché ia es. <sup>8</sup> Es ie' éna iane tö iyé kè ki ikiane tö ie'pa serwa canaánwakpa ta. <sup>9</sup> E' kuëki ie' míá alaköl skà yulök Ismael dör Abraham alà e' ska'. Eë ie' senéwa Ismael alà busi kiè Mahalat e' ta, e' dör Nebaiot kutà. Es alaköl kí tséwaitö eköl e' kè dör canaánwak wes imalepa es.

### *Jacob kabsué Betel*

<sup>10</sup> Eta Jacob e' yéttsa Beerseba michoë Harán. <sup>11</sup> Ie' michoë wé katuine iki ta eë ikapere. Ák méwaitö wókir kataie, e' ki ie' kapöwa. <sup>12</sup> Eë ie' kabsué. Ie' isué tö klökata batsië tkér iski ibata döka ká jai a. E' ki ie' isué tö Skököl biyöchökwakpa shköke wo'k wa'k. <sup>13</sup> Ñies ie' isué tö Jehová dur ie' o'mik ta ichéitö ia: “Ye' dör Jehová. Ye' dör be' talà, Abraham, ena be' yé, Isaac, e'pa Kéköl. Ká i' wé be' tër, e' meraëyö be' a ena be' aleripa a. <sup>14</sup> Ie'pa alördaë taië wes ká po es. Ie'pa michoë senuk ká wa'ñe. Ye' er buaë chöraë ká ulitane wakpa a be' ena be' aleripa e'pa batamik. <sup>15</sup> Ye' tso' be' ta. Ye' tö be' kk'neraë ká wa'ñe wé be' mir ee. Be' dörane ye' wa ká i' ki. Kè yö be' we'ikepa. Ttè qos méyö be' a, e' waweraëyö es.”

<sup>16</sup> Mik Jacob t̄i'neka, et̄a ie' ibikeitsé: “Mok̄i Jehová tso' ká i' k̄i, e' kè jcher ye' w̄a.”  
<sup>17</sup> Taiē ie' suane t̄a ibikeitséitō: “Ká i' dör batse'r taiē. ¡̄Iē dör Skököl wé! ¡̄Iē dör ká jai wékkö!”

<sup>18</sup> Bule es t̄a Jacob e' kéka bla'mi. Ák méwaitō iwök̄ir kataie, e' kékaitō duékaatitō iwà kkachōie tō ká e' dör batse'r. Kiō téitō ák bata k̄i iwà kkachōie tō ká e' tso' Skököl dalōioie.

<sup>19</sup> Ká e' kiè mane'wéttsane ie' tō Betel\* Kewe t̄a ká e' kiè Luz.

<sup>20</sup> Eē ie' tō ittē mé Jehová a i' es: “Be' tso' ye' t̄a ena ye' kkö'né be' tō i' ye' mir et̄a, ena be' tō chkè ena datsi' mé ye' a, <sup>21</sup> ñies ye' dene buaē ye' yé ska', e' k̄os wébō ye' a, e' t̄a be' klö'weraëyō ye' Kéköl̄ie. <sup>22</sup> Ák duékayō i', e' dör iwà kkachōie tō iē be' dalōiërdaë. A Skököl, ì k̄os mekebō ye' a, e' mú blatèsō dōka dabop t̄a e' tsá eyök meraneyō be' a.”

## 29

### *Jacob demi Labán ska'*

<sup>1</sup> E' ukuök̄i t̄a, Jacob mía p̄e' serke diwō tskirke e' éka. <sup>2</sup> Eē ie' tō di' tum biule sué et kañika. E' pamik obeja daparke mañayök enuk eē di' e' yekerakitō e' kuek̄i. Di' tum biule kkò k̄i ákkue b̄erie me'r et. <sup>3</sup> Iyiwak kkö'nukwakpa wöblanewatke tō as iyiwak ulitane daparka eē, e' ukuök̄i t̄a ákkue skeuke di' tum biule kkò k̄i as iyiwak di'yò. Iyiwak di'yane one t̄a ie'pa tō ikkò pabakéwane ákkue wa. <sup>4</sup> Jacob tō iyiwak kkö'nukwakpa a ichaké:

—A yamipa, ¿ká wé wakpa a' dör?

Ie'pa tō iiüté:

—Sa' dör Harán wakpa.

<sup>5</sup> Ie' tō iskà chakéne:

—¿A' w̄a wēm kiè Labán dör Nahor alà, e' suule?

Ie'pa tō iiüté:

—Tó, e' suule sa' w̄a.

<sup>6</sup> Ie' tō ichaké:

—¿Is ie' tso'?

Ie'pa tō iiüté:

—Ie' tso' bua'. Isaú. Wì busi datse e' dör ie' alà kiè Raquel e'. Ie' datse iyé iyiwak wéttsé.

<sup>7</sup> Ie' tō iché:

—Ká tso'ia ñiwe. Diwō tso'ia k̄akkeē iyiwak dapa'wow̄a ek tsiní. Ì kuek̄i a' kè tō di' mè ia t̄a ièmirak chkök.

<sup>8</sup> Eré ie'pa tō iiüté:

—Kè sa' a e' wambl̄enuk. Sa' kawöt̄a ipanuk. Mik obeja de seraa, et̄a sa' tō di' tum kkò ppekeka t̄a di' meke sa' tō iyiwak a.

<sup>9</sup> Ie' ttöke ie'pa t̄a, e' dalewa Raquel debit̄u iyé iyiwak wéttsé, ie' dör iyé iyiwak kkö'nukwak e' kuek̄i. <sup>10</sup> Jacob tō Raquel sué inau iyiwak wéttsé, e' bet ie' tunemi di' kkò kéka t̄a iyiwak a di' méitō. <sup>11</sup> E' ukuök̄i t̄a Raquel shke'wéitō wöalatséitō t̄a ie' iékaie ttsé'ne buaē kuek̄i. <sup>12</sup> Ie' tō iché ia: “Ye' dör Rebeca alà ena Labán nauyö.” E' bet t̄a Raquel tunemi ichök iyé a.

<sup>13</sup> Mik Labán tō inauyök tté ttsé, et̄a bet itunemi ñ̄aletsuk. Ipaklö'wéwaitō t̄a iwöalattséitō t̄a imítser iw̄a iu a. Ì k̄os tka Jacob t̄a e' pakéitō inau a. <sup>14-17</sup> T̄a Labán tō iché ia: “Mokiē be' dör ye' yami ekka.”

### *Jacob senéw̄a Lía ena Raquel t̄a*

Labán alà busi b̄öl, ikibi ék̄ kiè Lía, itsirla ék̄ kiè Raquel. Lía wöbla e' kè dör buaala\* eré Raquel dör buaala wa'ñe.

Jacob sené Labán ska' dō si' et. E' ukuök̄i t̄a Labán tō iché ia:

\* 28:19 Betel: Hebreoie kiè e' wà kiane chè Skököl wé. \* 29:14-17 Lía wöbla e' kè dör buaala: Hebreoie ttè e' wà kè jcher se' w̄a bua'iew̄a. Isalema e' wà kiane chè Lía wöbla dör buaala.

—Be' dör ye' yami, erë be' kè kawöta kanablök ye' a éme. Ichó ña ¿kos be' tö ye' ña'wèmi? <sup>18</sup> Jacob wöbatse Raquel wa, e' kuëki ie' tö Labán iüté:

—Be' tö kawö mé ye' a senukwa Raquel ta, e' ta e' skéie ye' kanablöke be' a döka duas kul.

<sup>19</sup> Labán tö iüté:

—Ye' a ta e' dör buaë. Be' je' a ye' tö imèmi buaë. Ye' kè éna imak o'ka a. Be' e' tsúat ye' ska'.

<sup>20</sup> Es Jacob kanablë' döka duas kul Raquel dalërmik. Erë ie' ki Raquel kiane tajë, e' kuëki kawö ekkë e' ttséitö ká bërber è. <sup>21</sup> Mik duas kul tka, eta Jacob tö iché Labán a:

—Kawö ye'yö be' a, e' detke. Kawö mú ye' a senukwa be' alà busi Raquel ta.

<sup>22</sup> Eta Labán tö sulitane a ishkeñé tö a' shkó ulabatsè e' kéwö tkö'uk. <sup>23</sup> Erë katuine, e' shua Lía mí ie' wa Jacob a Raquel skéie ta Jacob kapé ie' ta. <sup>24</sup> Labán tö ikanè méso eka kiè Zilpá, e' me'tke Lía a ikanè mésoie. <sup>25</sup> Bule es bla'mi ta Jacob tö isuëwa tö e' dör Lía. Ie' mia Labán ska' ta ichéitö ia:

—¿I wamblé be' tö ye' ta? Ye' kanablé be' a Raquel dalërmik. ¿Iók be' tö ye' kitö'wé es?

<sup>26</sup> Labán tö iüté:

—Íe sa' wöblar tö alà busi kibi ese serkewa keweie, e' itöki itsirla ék. <sup>27</sup> Se' kawöta Lía ulabatsöke e' kéwö tkö'uk döka ká kul. Mik kéwö e' tka, eta ye' tö be' a Raquel meke ñies. Erë be' kawöta skà kanablökne ye' a duas kul Raquel dalërmik.

<sup>28</sup> E' dör buaë Jacob a. Mik Lía ulabatsè kéwö e' diwö tka, eta Labán tö Raquel mé Jacob a alakölie ñies. <sup>29</sup> Ñies ie' tö ikanè méso eka kiè Bilhá e' mé Raquel a ikanè mésoie. <sup>30</sup> Es Jacob senéwa Raquel ta ñies. Eré ie' kawöta kanablökne skà Labán a döka duas kul, erë ie' éna idalër kibiie Lía tsata.

### Jacob ala'r

<sup>31</sup> Jehovah tö isuë tö Jacob kè ki Lía kiane bua'ie. E' kuëki Lía a alà méitö. Erë Raquel kè döta' aläë. <sup>32</sup> Lía duneka alà kune ta ie' tö iché: “Ye' eriarke tajë e' suë Jehovah tö, e' kuëki i'ñe ta ye' dalërdaë ye' wëm éna.” E' kuëki ikiè mékaitö Rubén.†

<sup>33</sup> E' ukuöki ta ie' alà skà kune eköl ta ichéitö: “Ye' wëm kè tkine ye' ki e' suë Jehovah tö e' kuëki alà skà méitö ye' a.” E' kuëki ikiè mékaitö Simeón.‡

<sup>34</sup> Ie' alà skà kéka ta ichéitö: “Ire' ye' ala'r deka mañal e' kuëki ye' wëm éna ye' dalërmi kibiie.” E' kuëki ikiè mékaitö Leví.§

<sup>35</sup> E' ukuöki ta ie' alà skà kéka ta ichéitö: “I'ñe ta ye' tö Jehovah kikekeka.” E' kuëki ikiè mékaitö Judá.\* Eta ekkë è ie' alà dë'.

## 30

### Raquel ala'r

<sup>1</sup> Mik Raquel tö isuë tö ie' kè dö aläë, eta ie' sibineka iël ki. Ie' tö iché iwëm a:

—Be' kè tö ye' a alà mè, e' ta ye' duörawa.

<sup>2</sup> Jacob uluneka ie' ki ta ichéitö ia:

—Ye' dör Skököl kalì, e' ma ye' a alà mermi be' a. Ie' wák tö be' méat kè dö aläë.

<sup>3</sup> Ie' tö iüté:

—Ittsó, ye' kanè méso kiè Bilhá, e' ta be' senú. Mik ie' alà kéka eta e' dör wes ye' alà es. Es ye' döraë aläë ie' batamik.

<sup>4</sup> Es ie' tö ikanè méso Bilhá e' mé iwëm a alakölie, e' ta Jacob sené. <sup>5</sup> Ie' ta Jacob alà kéka. <sup>6</sup> Raquel tö iché: “Skököl tö ye' tsatké buaë. Ie' tö ye' ttò ttsé ta alà méitö ye' a wëm.” E' kuëki ie' tö ikiè méka Dan.\*

† 29:32 Rubén: Hebreoie s'kiè e' wà kiane chè ye' eriane e' suéitö. ‡ 29:33 Simeón: Hebreoie s'kiè e' wà kiane chè ittsök. § 29:34 Leví: Hebreoie s'kiè e' wà kiane chè ñita. \* 29:35 Judá: Hebreoie s'kiè e' wà kiane chè Skököl kikèkasö.

\* 30:6 Dan: Hebreoie s'kiè e' wà kiane chè Skököl tö s'tsatkè buaë.

<sup>7</sup> E' ukuökᵢ tᵃ Billhá alà skà kᵤne Jacob tᵃ. <sup>8</sup> Raquel tō iché: “Ye' ñippé taië ye' ël tᵃ etᵃ ye' e' aléka iki.” E' kueᵑᵢ ikiè mékᵃitō Neftalí.†

<sup>9</sup> Mik Lía tō isué tō ie' kè dē'ia alàë, etᵃ ie' tō ikanè méso kiè Zilpá, e' mé Jacob ᵃ alakölie. <sup>10</sup> Zilpá alà kéka Jacob tᵃ. <sup>11</sup> Lía tō iché: “jEdaa ì mène ye' ᵃ!” E' kueᵑᵢ ilà kiè mékᵃitō Gad.‡

<sup>12</sup> E' ukuökᵢ tᵃ Zilpá alà skà kéka Jacob tᵃ. <sup>13</sup> Lía tō iché: “jYe' ttsē'r buaë! Ire' alakölpa kᵃs tō icheraë tō be' ttsē'r buaë.” E' kueᵑᵢ ilà kiè mékᵃitō Aser.§

<sup>14</sup> Trigo wö alirke e' késka' tᵃ Rubén míᵃ kañika. Eë ie' tō kalwö kiè mandrágora\* e' alí kué. E' bitᵃ iwa imì Lía ᵃ. Mik Raquel tō kalwö e' sué tᵃ ichéitō Lía ᵃ:

—Be' we'ikèyö, kalwö debitu be' alà wa be' ᵃ, e' kalmú ña.

<sup>15</sup> Lía tō iiüté:

—jBe' kè ᵃ wè' idir tō be' wa ye' wëm mítser? jKíie tᵃ be' éna kalwö debitu ye' alà wa ye' ᵃ, e' yaktsᵃ ye' ulà ᵃ!

Erë Raquel tō iché ia:

—Kalwö e' skéie ì'ñe nañewe ye' wëm patkekeyö be' tᵃ kapök.

<sup>16</sup> Katuirketke tᵃ Jacob tso' kaneblök e' debitu tᵃ Lía míᵃ ññaletsuk tᵃ ichéitō ia:

—Ye' tō ye' alà mandrágora e' mé Raquel ᵃ, e' skéie be' kawöta kapök ye' tᵃ ì'ñe nañewe.

E' nañewe Jacob kapé ie' tᵃ. <sup>17</sup> Etᵃ Skököl tō Lía ttò ttsé tᵃ iduneka tᵃ ilà skà kᵤne Jacob tᵃ. Es ie' alà deka ské. <sup>18</sup> Lía tō iché: “Ye' tō ye' kanè méso mé ye' wëm ᵃ e' skéie Skököl ye' ᵃ alà i' mé.” E' kueᵑᵢ ilà kiè mékᵃitō Isacar.†

<sup>19</sup> E' ukuökᵢ tᵃ Lía alà skà kéka Jacob tᵃ, e' tᵃ ideka teröl. <sup>20</sup> Ie' iché: “Skököl tō ye' ᵃ ì buaë kalmé. Ire' ye' ala'r de teröl. E' kueᵑᵢ ye' wëm éna ye' dalërdaë jaishet.” E' kueᵑᵢ ilà kiè mékᵃitō Zabulón.‡

<sup>21</sup> Bata ekké tᵃ ie' alà skà kᵤne alaköl. E' kiè mékᵃitō Dina. <sup>22</sup> Erë ñies Raquel kímé Skököl tō. Ie' tō ala'r mé ia wës Raquel tō ikié ia es. <sup>23</sup> Ie' duneka tᵃ ilà tsá kᵤne kiè mékᵃitō José. Ie' tō iché: “Ye' jaëne' siarë e' yéttsᵃ Skököl tō ye' kᵢ. <sup>24</sup> Jehová mú tō ye' ᵃ alà kí mè ia eköl.” E' kueᵑᵢ ikiè mékᵃitō José.§

### *Jacob iyiwak alöne taië*

<sup>25</sup> José kᵤne e' ukuökᵢ tᵃ Jacob tō iché Labán ᵃ:

—Ye' ómine ye' kaska'. <sup>26</sup> Ye' alakölpa ena ye' ala'r e'pa mú ye' ᵃ ᵃs imi'rak ye' tᵃ. Ye' kaneblétke be' ᵃ ie'pa skéie. Be' wa ijcher buaë tō kᵃs ye' kaneblé be' ᵃ.

<sup>27</sup> Erë Labán tō iiüté:

—Be' we'ikèyö. Be' e' tsúatia senuk ye' ska'. Ye' tō itötké tō Jehová er buaë ché ye' ᵃ be' batamik. <sup>28</sup> Ichó ña kᵃs be' kᵢ inuköl kiane be' kanè skéie, e' ma ekké ye' be' patuëmi.

<sup>29</sup> Ie' tō iiüté:

—Be' wa ijcher tō ye' kaneblé buaë be' ᵃ. Ñies ye' tō be' iyiwak kkö'né buaë be' ᵃ. <sup>30</sup> Mik ye' dē'bitu be' ska', etᵃ be' kè wa ì ku' taië. I'ñe tᵃ be' wa íyi tso' taië. Jehová er buaë ché be' ᵃ ye' kueᵑᵢ. Erë jmik ye' kaneblömi ye' wák ᵃ? Ye' wöché yamipaë.

<sup>31</sup> Labán tō iskà ché ia:

—jKᵃs be' kᵢ ikiane tō be' patuëyö?

Ie' tō iiüté:

—Be' kè tō ye' patauk. Erë ì chekeyö be' ᵃ e' iütó, e' tᵃ ye' tō be' iyiwak kkö'nemi. <sup>32</sup> I'ñe ye' mi'ke be' iyiwak shushtök. Obeja kᵃs dalolo ena chibo kᵃs wöaule shkitshkit ö ulaula ese klö'wekeyö ye' wák ᵃ e' patuoie. <sup>33</sup> Mik be' de ye' iyiwak sauk tᵃ eë be' isuëmi

† 30:8 Neftalí: Hebreoie s'kiè e' wà kiane chè ñippök. ‡ 30:11 Gad: Hebreoie s'kiè e' wà kiane chè kawö buaë mène. § 30:13 Aser: Hebreoie s'kiè e' wà kiane chè ittsē'r buaë. \* 30:14 mandrágora: Ká e' kévöska tᵃ ie'pa tō ibikeitseke tō mandrágora wö katé alakölpa tō, e' tᵃ e' tō ie'pa kímëmi dök alàë. † 30:18 Isacar: Hebreoie s'kiè e' wà kiane chè ské. ‡ 30:20 Zabulón: Hebreoie s'kiè e' wà kiane chè kakmeule. § 30:24 José: Hebreoie s'kiè e' wà kiane chè ilè kímú.

tö obeja dalolo ö chibo wöaule shkitshkit ö ulaula ese è tso', e' ta be' wa ijcherwami tö ye' dör wëm yësyësë. E' kè dör es, e' ta be' wa ijcherdaë tö ye' tö be' iyiwak ekiblë.

<sup>34</sup> Labán tö iüté:

—Tó, buaë idir. Iüsö wes be' iché es.

<sup>35</sup> Erë e' diwö shà ta ie' mía ie' iyiwak shushtök. Ie' chibo kos tso' wöaule skëkshkëk ö ulaula ese yéluritö. Nies ie' obeja kos tso' dalolo ese yéluritö ta iméitö ila'r wëpa a kkö'nè. <sup>36</sup> E' ukuöki ta iyiwak yélur ie' tö e' wëttsë ie' mía shkè dè ká mañat Jacob yöki. Etä Jacob kawöta Labán iyiwak malepa e' kkö'nuk.

<sup>37</sup> Erë Jacob tö kal kua'ki kua'ki dè mañalka e' ulà aki téé. Elka kiè álamo, skà kiè almendro, skà kiè castaño. Kal ulà kkuölit takla jchéloritö as iwër wöaule saruru skëkshkëk. <sup>38-39</sup> E' ukuöki ta kal ulà e' tuléwaitö wé iyiwak daparke di'yök e' wöshaë. Eë iyiwak wöbatsöke ñi wa. Iyiwak wöbatsöke ñi wa kal ulà ñe' wöshaë e' ala'rla kos tskirke wöaule skëkshkëk ö shkitshkit ö ulaula. <sup>40</sup> Iyiwak tskirke wöaule e' kos dapa'wéitö bánet ie' wák a. Ese wé'ñe kos uyéwaitö Labán iyiwak kos wöaule ö dalolo ese a as itskir wöaule ö dalolo. Es ie' iyiwak alörke taië bánet, kè ky' Labán icha ta ñita. <sup>41</sup> Mik iyiwak bua'buä ese wöbatsöke ñi wa, etä ie' tö kal ulà ñe' tuléwa wé iyiwak di' yöke eë. Es ie'pa tö kal ulà wöaule e' sué mik iwöbatsöke ñi wa e' dalewa. E' ala'rla tskirke kos e'pa dör wöaule. <sup>42</sup> Erë mik iyiwak sí po ese datse, etä ie' kè tö kal ñe' tuléwa. E' kuëki iyiwak sí po ese ala'rla kos tskirke e' dör Labán icha. Erë wé bua'buä ese dör ie' icha. <sup>43</sup> Es ie' de íyi blú taië. Obeja ena kanè mésopa wëpa ena alakölpä nies kameio ena burro e' kos tso' ie' wa taië.

## 31

### *Jacob tkakshkar Labán yöki*

<sup>1</sup> Erë Jacob tö ittsé tö Labán ala'r dulakölpä tö icheke: “Jacob tö se' yé íyi kos e' klö'wéwa, e' wa ie' e' blu'wé taië.” <sup>2</sup> Nies ie' tö isué tö Labán kè tö ie' suéiä buaë wes kenet es. <sup>3</sup> Etä Jehová tö ie' a iché: “Be' yúne be' yépa kaska' wé be' yamipa tso' eë. Ye' michoë be' ta be' kkö'nuk.”

<sup>4</sup> Jacob tö Raquel ena Lía tsuk patké dè wé ie' tso' obeja wëttsë eë <sup>5</sup> ta ichéitö ia:

—Ye' wa ijchenewa tö a' yé kè ki ye' kianeia wes kenet es. Erë ye' yé e' Këköl tso' ye' ta kekraë ye' kimuk. <sup>6</sup> A' wa ijcher buaë tö ye' kaneblé a' yé a moki. <sup>7</sup> Erë ie' tö ye' kitö'wé kekraë ye' kanè ské wa. Erë Skëköl kè wa ie' a ikéwö mène as ì sulu wamblöitö ye' ki. <sup>8</sup> Mik ie' tö ye' a iché: “Ye' be' patueke iyiwak wöaule shkitshkit ese wa”, etä iyiwak ulitane pane wöaule shkitshkit ème. Mik ie' tö ye' a iché: “Ye' be' patueke iyiwak wöaule shkëkshkëk ese wa”, etä iyiwak ulitane pane wöaule shkëkshkëk ème. <sup>9</sup> Es Skëköl tö a' yé iyiwak yé'lur mè ye' a.

<sup>10</sup> “Iyiwak wöbatsöke ñi wa e' kéwö ska' ta ye' kabsué tö iyiwak wé'ñe wöbatsöke iláki wa, e' kos wák dör wöaule shkëkshkëk ena shkitshkit ena ulaula. <sup>11</sup> Kabsué e' a, Skëköl biyöchökwak ye' chaké ye' kiè wa ta ye' iüté: ‘¿ì?’ <sup>12</sup> Ie' ye' a iché: ‘Isaú bua'ie ta be' isueraë tö iyiwak wé'ñe wöbatsöke iláki wa, e' kos dör wöaule shkëkshkëk ena shkitshkit ena ulaula. Ì sulu kos wamblé Labán tö be' ki, e' suéyö, e' kuëki ye' tö iwé es. <sup>13</sup> Ye' dör Këköl dè'bitu be' wörki ká kiè Betel eë e'. Eë be' tö ák du'kaat ye' dalöioie. Eë be' tö kawö me' ye' a. Be' e' kókä bet, be' e' yóttsa ká i' a. Be' yúne wé be' kune eë.’ ”

<sup>14</sup> Etä Raquel ena Lía e'pa tö iüté:

—Kè sa' a sa' yé daliukuö ta'ia. <sup>15</sup> Nies sa' sué sa' yé tö sulué wes o'ka es. Kíie ta sa' wato'ttsaitö be' a, sa' ské klöo'itö buaë e' ewéwaitö yës. <sup>16</sup> E'ma kos Skëköl tö íyi yé'lur sa' yé ulà a, e' dör sa' icha ena sa' ala'r icha. E' kuëki ì kos ché Skëköl tö be' a e' iütö.

### *Jacob e' yéttsa Padán-aram*

<sup>17-18</sup> E' ukuöki tã Jacob tö ila'r ena ilakölpa e'pa ké e' tkökka kameio ki. Ie' iyiwak kos ena ie' íyi kos dë' ie' ulà a Padán-aram ikanè skéie, e' patkémiiitö keweie ie' yöki. Etã ie' e' yéttsa micho iyé Isaac ska' Canaán. <sup>19</sup> Labán míã ká bánet ioveja köyök tök, e' dalewa ie' wã íyi diököl tso' dalöie e' kos bléwami Raquel tö. <sup>20</sup> Jacob kè wã iyéne Labán a tö ie' mi'keã. Es ie' tö ikité buaë. <sup>21</sup> Ie' tkashkar. Íyi tso' ie' wã e' kos wéttsë. Bet tã ie' tkattsa di' kiè Éufrates, e' wishet. Eë tã ie' micho ká kiè Galaad e' ká köwö ki.

### *Labán tö Jacob tötié*

<sup>22</sup> Jacob bakshkar e' ki ká de mañat, etã Labán wã ijchenewã tö ie' bakshkar. <sup>23</sup> Etã ie' míã itöki iyamipa tã. Ká de kul tã ie' tö ikué Galaad ká köwö ki. <sup>24</sup> E' nañewe Labán kabsué tö Skéköl de ie' wörki tã ichéitö ia: “Ye' ttò ttsó. Kè be' kàne ttök Jacob tã kèsik wa.”

<sup>25</sup> Ie' de wé Jacob úla tultur Galaad ká köwö ki eë. Eë ie' ena iyamipa, e'pa tö iúla tuléka kapowaie ñies. <sup>26</sup> Ie' tö iché Jacob a:

—¿Ì wamblé be' tö i' es? ¿Iók be' tö ye' kitö'wé i' es? Be' wã ye' alà busipa bitetsër wës ñippökwakpa tö s'tsëmi es. <sup>27</sup> ¿Ì kueki be' ye' kitö'wé? Be' tkashkar akir ye' yöki. Be' e' biyó chõpa ye' a, e'ma kawö buaë tkö'wé ye' tö a' wéttsë ttsëne buaë wa, ma'ma kicha tã' ese wa ena sabak blar buaë ese wa. <sup>28</sup> Kè be' wã kawö méne ye' a ena ye' ala'r busipa ena ye' duöchkepa e'pa a as sa' e' chòat ñi a. Be' tö iwamblé wës pë' suluë es. <sup>29</sup> Ye' wã diché tso' a' ulitane tsãioie buaë, erë eniã nañewe be' yé e' Kéköl tö ye' a iché: ‘Ye' ttò ttsó. Kè be' kàne ttök Jacob tã kèsik wa.’ <sup>30</sup> Be' mitkene be' yé u a wës be' ki ikiane taië es, etã ¿lie be' tö ye' wã íyi diököl tso' dalöie e' ekiblé?

<sup>31</sup> Etã Jacob tö iüté:

—Ye' suane be' yöki. Ye' ibikeits dö' be' ye' yöki be' ala'r busipa yéttsane er sulu wa. <sup>32</sup> Yi wã be' íyi diököl tso' dalöie e' tso', e' tã as e' wák duòwã. Se' yamipa kos tso' íe se' sauk, e'pa wörki be' yú be' íyi yulök. E' kuébö, e' tã itsúmi.

Erë ie' kè wã ijcher tö Raquel tö iyé íyi diököl e' blé'wãbitu.

<sup>33</sup> Etã Labán tkawã Jacob úla a ie' íyi yulök. E' ukuöki tã ie' tkawã Lía úla a. Ñies Lía ena Raquel kanè mésopa bøl e'pa úla shuyuléitö. Erë kè ie' wã ikune. Ie' e' yéttsã Lía úla a míã Raquel úla shuyulök. <sup>34</sup> E' dalewa Raquel tö iyé íyi diököl bléwã kameio tsikkuö dikia tã ie' wák e' tkéka ibata ki. Labán tö ie' úla ulitane shuyulé erë kè iwã ikune yës.

<sup>35</sup> Raquel tö iché ia:

—A yéwö, kè be' ulunuk ye' ki. Ye' e' kòkami be' wörki, erë ye' duöke sik duè wã.

Labán tö ie' íyi diököl yulé taië. Erë kè ie' wã ikune. <sup>36</sup> E' kueki Jacob ulunekã taië tã ichéitö Labán a:

—¿Ì sulu wambléyö be' ki, e' kueki be' ye' tötié dò íe? <sup>37</sup> Be' tö ye' íyi kos e' shuyulé tã ¿be', ì kuébö? E' tuló íe se' yamipa wörki as ie'pa tö ichò tö yi ttè dör mokjé, be' ö ye'. <sup>38</sup> Ye' kaneblé' be' a duas döka dabom böyök (20), e' dalewa tã be' chibo ena be' obeja e' kos tskirke bua' buaë. Be' iyiwak bobokpa kè tkëulettsã yës. Ñies kè ye' wã be' obeja pupula è kataulewa. <sup>39</sup> Namu tö be' iyiwak ttéwã, e' tã kè ye' wã inú dë' bitu. E' nuí pato' ye' tö be' a. Ñiwe ö nañewe be' iyiwak ekiblélur akblökwakpa tö, e' patauk be' tö ye' ka'. <sup>40</sup> Ñiwe ye' tteke kãba tö. Nañewe tã ye' tteke kasë tö. Kè ye' kapowã buaë. <sup>41</sup> Ye' kaneblé' be' a duas dabom böyök (20) etã es ye' bak weinuk kekraë. Ye' kaneblé' duas dabom eyök ki tkél (14) be' alà busipa dalërmik. E' ukuöki tã ye' skà kaneblé' duas teröl be' iyiwak kueki, erë be' bak ye' kitö'uk kekraë ye' kanè ské wa. <sup>42</sup> Abraham ena ye' yé Isaac e'pa Kéköl kè kúpa ye' tã, e'ma be' ye' patké' bitu ulà wöchka. Erë Skéköl tö isué tö ye' siarla, e' kaneblé' taië, e' kueki ie' tö be' wöuñé eniã nañewe.

### *Jacob ena Labán e'pa kawö mé ñi a*

<sup>43</sup> Etã Labán tö Jacob iüté:



—Be' alakölpa dör ye' alà busipa. Be' ala'r dör ye' duöchkepa. Obeja kōs e' dör ye' icha. Ì kōs suébō ie, e' dör ye' icha è. ¿Wes ye' a ye' alà busipa ena ye' duöchkepa e'pa ormi? <sup>44</sup> E' kuëki be' shkó. Mishka kawō muk ñi a. Es se' wā ijcherdaë tö wes se' kawōta ñi dalöiök.

<sup>45</sup> Ee ta Jacob tö ák duéka ek ie'pa kawō muke ñi a e' wà kkachöie. <sup>46</sup> Ie' tö iché iyamipa a:

—Ák dapa'ú ie.

Ie'pa ulitane tö ák dapa'wé ta ichkérak ák dapaule e' o'mik. <sup>47</sup> Eta Labán tö ká e' kiè méka iwák ttò wa “Jegar Sahadutá”. Ñies Jacob tö ikiè méka iwák ttò wa “Galaad.”\*

<sup>48</sup> Labán tö iché:

—I'ñe ák ikké dapa'wéatsö kawō mésö ñi a e' wà kkachöie.

E' kuëki Jacob tö ká e' kiè méka es. <sup>49</sup> Ká e' kine ñies Mispá, wà dör tö Labán tö iché:

—Mik kè se' ñi suneia, eta as Jehová tö se' saú tö wes se' ñi wamblöke. <sup>50</sup> Be' tö ye' ala'r busipa we'iké ö be' senéwā alakölpa kuá'ki ta, e' ta e' sueraë Skéköl tö. Eré kè yi ku' e' sauk chène ye' a, eré Skéköl wák tö isueraë.

<sup>51</sup> Eta Labán tö ikí ché Jacob a:

—Ák dur i' ena ák dapaule i' e' dapa'wéyö se' böi shushäë. <sup>52</sup> Ák dur i' ena ák dapaule i' e' dör se' böi a iwà kkachöie tö ie è se' kawōta dökwa. Kè ye' tkòpami be' kker ñippök be' ta. Ñies kè be' tkòpami ye' kker ñippök ye' ta. <sup>53</sup> Abraham dör be' duöchke ena Nahor dör ye' duöchke, e'pa Kéköl eköl è, as e' tö se' shulò.

Eta Jacob tö kawō mé mokië Labán a Skéköl dalöieke iyé Isaac tö e' wörki. <sup>54</sup> E' ukuöki ta ie' tö iyiwak jché ña'wé Skéköl dalöioie ee. Ie' tö iyamipa kié chkök. Ie'pa ulitane chké ta ikaperö ee.

<sup>55</sup> Bule es bla'mi ta Labán tö iduöchkepa ena ila'r busipa e'pa wöalattsé e' choat ie'pa a. Ie' tö iché iarak: a' mú kawō tkò buaë kakraë. E' ukuöki ta imichone ikaska'.

## 32

### *Jacob tö Esau ma'wé er bua'wè*

<sup>1</sup> E' ukuöki ta Jacob mir è wé imíró ee. Ñala ki Skéköl biyöchökwakpa de ie' ska'. <sup>2</sup> Mik e'pa suéitö, eta ichéitö: “I'pa dör Skéköl ñippökwa.” E' kuëki ie' tö ká e' kiè méka Mahanaim.\*

<sup>3</sup> Eta ie' tö ikanè mésopa patkémí biyò muk ie' èl Esau a tö ie' datse. Ie' èl serke ká kiè Seír ate Edom ee. <sup>4</sup> Ie' tö ichémi ikanè mésopa a: “A' tö ichó ye' èl a: ‘Be' èl Jacob datse be' wöki be' kanè mésoie. Ie' tö ichébitu be' a: Dwas ikké kōs ye' sené Labán ska'. <sup>5</sup> Ye' wā baka tso' ena obeja tso' ena burro tso' taië. Ñies kanè mésopa tso' ye' wā taië wēpa ena alakölpa. Be' dör ye' kékēpa. Be' a ttè i' patkémíyö as be' tö ye' kiōwā er bua' wa.’”

<sup>6</sup> Mik ibiyò wakpa dene, eta ie' a ichéitö:

—Sa' dare be' èl ska', e' wák datse bet be' shké'uk. Eta ie' wā wēpa datse e' ta dōka cien tkéyök (400).

<sup>7</sup> Mik e' ttséitö, eta taië ie' suane. Taië ie' kabikeitséka wes ye' e' ùmi. E' kuëki ie' tö iyamipa ena ikanè mésopa ena iobeja ena ibaka ena ikameio e' kōs blabatsélor böi tsiní.

<sup>8</sup> Ie' ibikeitsé tö isalema ye' èl ñippömi ek tsiní ta, e' dalewa iëk tsiní tköshkarmirak. E' kuëki ie' iblabatsélor es. <sup>9</sup> E' ukuöki ta ie' tö iché Skéköl a: “A Jehová, be' dör ye' talà Abraham ena ye' yé Isaac e'pa Kéköl. Be' ye' a iyé: ‘be' yúne be' yamipa ska', eta ye' tö be' kimerä as be' kawō tkò buaë.’ <sup>10</sup> Be' er bua' ché ye' a. Be' kè wā ye' meätule bērbēr è. Warma e' kè dör ye' siarla e' a. Ye' bakmi di' Jordán wī a kè wā ì ta', e' kēwō ska' ta ye' wā shko kéli è dami. Eré i'ñe ta ye' wöché taië iyiwakie ena se'ie blabutsule böi tsiní. <sup>11</sup> Be'

\* 31:47 Galaad: Ká e' kiè dör böt eré iwà kiane ché ñies. E' dör ák dapaule kawō mène e' wa kkachöie. \* 32:2 Mahanaim: Hebreoie ká kiè e' wà kiane ché ñippökwa böltēpa.

we'ikèyö, ye' tsatkö ye' ël Esaú e' ulà a. Ye' suane ie' yökî dö' ie' datse ñippök ye' ta; ñies dö' ye' alakölpa ena ye' ala'rla e'pa kos ewèwa ie' tö. <sup>12</sup> Be' tö ye' a iyè'atbak yësyësë tö be' tö ye' kimeraë as ye' kawö tkò buaë. Ñies be' tö iyè' tö ye' aleripa alördaë taië wes dayë tséwö kè shtarta' es.”

<sup>13</sup> E' nañewe ie' kapére ee. Iyiwak tso' ie' ta ee e' shushtë ie' tö kakmè ie' ël a. <sup>14</sup> Ikkè shushtë ie' tö: chibo alaki dökā cien böyök (200); chibo wè'ñe dökā dabom böyök (20); obeja alaki dökā cien böyök (200); obeja wè'ñe dökā dabom böyök (20); <sup>15</sup> kameio alaki pane ñiköl ilà ta, ese dökā dabom mañayök (30); baka alaki dökā dabom tkëyök (40); baka wè'ñe pupula dökā dabop (10); burro alaki dökā dabom böyök (20); burro wè'ñe dökā dabop (10). <sup>16</sup> E' ukuökî ta iyiwak ekkè kos tuléitö ikanè mésopa a iwakmik iwakmik ulawa ulawa ta ichéitö iarak:

—A' yú ye' yökî kewe. Ká ulat múat iyiwak a ulat ulat as kè iwöierwa ñita.

<sup>17</sup> Etā kanè méso kewe patkémiiitö e' a ichéitö:

—Mik be' tö ye' ël kué ta ie' tö be' chaké: “¿Yi be' wökir? ¿Wé be' micho? ¿Sekkè dör yi iyiwak?”, <sup>18</sup> etā iiütó: “A kékëpa, iyiwak i' kos e' kak patké be' kanè méso Jacob tö be' a. Ie' wák datse sa' itökî.”

<sup>19</sup> E' sù ikanè mésopa malepa patkémiiitö iyiwak wëttsë, e'pa a ichémiiitö ñies:

—Mik a' tö Esaú kué, etā ichó ia es è. <sup>20</sup> Kè a' éna ichökwa ché ia: “A kékëpa, be' kanè méso Jacob e' datse sa' itökî.”

Ie' tö ibikeitsé: “Iyiwak patkémiiitö keweie ye' ël a e' dör as ie' er buarne ye' kî. E' ukuökî ta ye' wák tö isuëmi. Es ie' tö ye' kièwami er bua' wa.” <sup>21</sup> Es iyiwak kak patkémiiitö keweie ie' yökî. Erë ie' wák e' tséat kapökrö ie' úla a.

### *Jacob ñippé kapa wa Skéköl ta*

<sup>22-23</sup> E' nañewe Jacob e' kékā. Ie' tö ilakölpa böi ena e'pa kanè mésopa böi ena ila'rla dökā dabom eyök kî eköl e'pa kos dapa'wéitö ta iuyöktsa ké di' Jaboc wishet ñies ì kos tso' iwa ekkè uyéttaitö. <sup>24</sup> Ie' e' tséat eköl. Ee ta wëm de eköl ie' ska' ta ie'pa ñippé kapa wa darërè dò ká ñine etā. <sup>25</sup> Erë wëm e' tö isuë tö kè ie' e' alòpaka Jacob kî. E' kuëkî ie' tö itéwa itu' wöierkewa e' kî ta itu' wöyënettsa. <sup>26</sup> Etā wëm ñe' tö iché ie' a:

—Ká ñirkewatke e' kuëkî ye' ówa.

Ie' tö iiüté:

—Kè be' tö ye' a kawö bua' mè, etā kè ye' tö be' epamine.

<sup>27</sup> Wëm tö ie' a ichaké:

—¿Ima be' kiè?

Ie' tö iiüté:

—Ye' kiè Jacob.

<sup>28</sup> Wëm tö iché ia:

—Kè be' kièia Jacob. Be' kirdaë Israel.† Be' ñippé Skéköl ta ñies s'ditsö ta etā ì kiane be' kî e' de be' ulà a, e' kuëkî be' kiè mékayö es.

<sup>29</sup> Jacob tö ie' a ichaké:

—Ichó ña, ¿ima be' kiè?

Ie' iiüté:

—¿Iók be' kî ye' kiè kiane jchenuk?

Ee ta wëm ñe' er bua' ché ie' a. <sup>30</sup> Ie' tö ká e' kiè mékā Penuel.‡ Ie' tö iché: “Erë ye' tö Skéköl wák suéwa ye' wöbla wa, erë kè ye' du'wa.” E' kuëkî ká e' kiè mékaitö es.

<sup>31</sup> Mik ie' tkökemitke Penuel, etā diwö tskine. Erë ie' tu' wöyënettsa, e' kuëkî ie' shkörami shaotshaot. <sup>32</sup> Ie' ténéwa itu'kicha kî, e' kuëkî dò ikké ta ie' aleripa kos kè tö iyiwak tu'kicha kateta'.

† 32:28 Israel: Hebreoie s'kiè e' wà kiane ché ñippé Skéköl ta. ‡ 32:30 Penuel: Hebreoie ká kiè e' wà kiane ché Skéköl wö.



## 33

*Esaú er buanene Jacob ki*

<sup>1</sup> Mik Jacob tö isuë tö ie' ël datse ena wëpa taië datse ie' wä dökä cien tkëyök (400), eta ie' tö ila'rla blabatsé. E'pa méitö Lía a ena Raquel a ena e'pa kanè mésopa bölä. <sup>2</sup> Kanè mésopa bölä e'pa patkëmiitö keweie ila'r ta. E' ukuökü ta ie' tö Lía ena ila'r patkëmi. Bata ekkë Raquel ena ilä José e'pa patkëmiitö. <sup>3</sup> Eta ie' wák tkami kewe ie'pa yöki. Ie' mirwa ie' ël wörki e' dalewa ie' wöëmi dö iski es iwöömir dökä kuktökicha (7 veces). Es ie' demi tsinet iël wörki. <sup>4</sup> Eta Esaú tñnebitü ie' wöki, ta ipaklö'wëwaitö ikuli' a ta iwöalattséitö ta iërak ñita. <sup>5</sup> E' ukuökü ta Esaú tö Jacob alakölpa ena ila'rla e'pa suë ta ichakéitö ia:

—¿Wikkëpa dör yi?

Jacob tö iiüté:

—A kékëpa, Skëköl tö ala'rla wikkëpa mé ye' a.

<sup>6</sup> Eta ilakölpa kanè mésopa e'pa de ila'rlaë ta iwö éwarak dö iski. <sup>7</sup> E' ukuökü ta Lía de ila'rë ta ie'pa wöëwa iski ñies. Bata ekkë ta Raquel de ilä José ta eta ie'pa wöëwa dö iski ñies. <sup>8</sup> E' bet ta Esaú tö ie' a ichaké:

—Iyiwak kuéyö ñalä ki ulawa ulawa ¿ie e' dör?

Ie' iiüté:

—E' dör as be' er buarne ye' ki.

<sup>9</sup> Esaú tö iiüté:

—Au, kë be' tkinuk ye' ki. Ye' wä itso' taië. E' tsúat be' wák tö.

<sup>10</sup> Erë Jacob tö iskà ché ia:

—Au, kë be' tö ye' ttë watöktsa. Be' er buanene ye' ki e' ta iyi kakmekeyö be' a e' klö'ü. Be' tö ye' kiéwa buaë. Be' suëneyö e' dör buaë ye' a wes Skëköl wák suëyö es. <sup>11</sup> Taië Skëköl tö ye' blu'wé. Kë ì kianeia ye' ki. E' kuëki ye' be' pablè tö iyi kakméyö be' a e' tsü ye' ulä a.

Jacob tö iyiwak watké ia taië, e' kkëpa iël Esaú tö iyiwak tsé iulä a. <sup>12</sup> Esaú tö iché ia:

—E'ma mishka ñita. Ye' mi'ke kewe.

<sup>13</sup> Erë Jacob tö iiüté:

—A kékëpa. Be' wä ijcher bua' tö ye' ala'r ia tsitsirla. Ñies obeja ena baka tso' aläe e' bikeitséyö dö' ishtrirwa ta iduölurmi sekka ká etkëme. <sup>14</sup> Ye' a ta buaë idir tö be' yu'tke kewe, eta wë' ye' do be' itöki enaena wes ye' iyiwak ena ye' ala'rla shkëmir es. Es ye' mir ie'pa ta dö be' serke Seír ee.

<sup>15</sup> Eta Esaú tö iiüté:

—E'ma buaë idir. Kawö mú ña ye' kanè mésopa wëlepa mukat be' a be' kimoie.

Erë Jacob tö iiüté:

—Au, ¿iók be' e' we'ikö ye' wä ekkë chökke?

<sup>16</sup> E' è diwö ta Esaú míane Seír iyamipa ta. <sup>17</sup> Erë Jacob míä ká kië Sucot\* ee. Eë ie' u yué iwák a. Ñies iyiwak wé chali'wëitö. E' kuëki ká e' kië mékãitö Sucot.

<sup>18</sup> Es Jacob manétat Padán-aram dö Canaán. Ie' dettsa buaë. Ie' sené ká kië Siquem, e' wösha. <sup>19</sup> Wé ie' tö ká yué e' tuëttsa ie' tö. E' ské dör inuköl wömule dökä cien eyök (100). Hamor dör Siquem yé, e' ala'r tö ká watué Jacob a. <sup>20</sup> Ká e' a Jacob tö ák kataté et ka'ie iyiwak jchoie Skëköl dalöioie. E' kië mékãitö El-elohé-israel.†

## 34

*Dina dalösewëwä Siquem tö*

<sup>1</sup> Jacob alä busi Lía ta kië Dina, ká et ta e' míä ká e' wakpa busipa pakök. <sup>2</sup> Eta Hamor e' dör heveowak e' dör ká e' wökir, e' aladulaköl kië Siquem e' tö Dina suë. Eta ie' tö

\* 33:17 Sucot: Hebreoie ká kië e' wä kiane chë u yöule chalichali. † 33:20 El-elohé-Israel: Hebreoie kië e' wä kiane chë Israel Këköl diché ta' taië.

iklö'wéwā tā isenēka itā kēsik wa. <sup>3</sup> Erë ie' wöbatse Dina wa taië tā ipabléitö taië. <sup>4</sup> Etā ie' tö iché iyé a:

—A yéwö, be' yú kékēpa Jacob ska' ilà busi kiöktsa ye' a as ye' serwā ie' tā.

<sup>5</sup> Ì sulu wamblé Siquem tö Dina tā e' jchenewā Jacob wā. Erë ie' aladulakölpa tso' kañika iyiwak kanéuk, e' kuëki ie' kè wā iyène ie'pa a. <sup>6</sup> E' dalewa Hamor dör Siquem yé e' mía Jacob ska' ttök ie' tā.

<sup>7</sup> Mik Jacob aladulakölpa dene u a, etā ì wamblène Dina tā e' jchenewā ie'pa wā. E' tö ie'pa uluwéka taië. Siquem senéka Jacob alà busi tā e' dör iyi sulué Israel aleripa a. E' kè kawö tā' wamblè es. <sup>8</sup> Erë Hamor tté ie'pa tā, tā ichéitö ia:

—Ye' aladulaköl Siquem, e' wöbatse taië a' kutà wa. A' we'ikèyö kawö mú ie' a senukwā ie' tā. <sup>9</sup> Es a' yörmi sa' yamipae. Es sa' serwami a' alà busipa tā. Ñies a' serwami sa' alà busipa tā. <sup>10</sup> A' e' tsuat senuk sa' shuā. A' senú sa' ká a wé a' ki ikiane ee. A' tö iyi wataú ena iyi taú. A' tö ká taú. Kè yi tö a' wöklö'wepa.

<sup>11</sup> Ñies Siquem tté Dina yé tā ena ikēpa tā, etā ichéitö ia:

—Ye' a' pablè tö ye' ttè klö'ú. Ye' tö a' a iyi kakmeraë kos a' ki ikiane ekkè. <sup>12</sup> Kos iské\* dör e' tsatā a' tö ye' a ikí kié, e' tā ekkè meraëyö a' a. E' kè ki ye' tkine. Ye' tö iyi meraë taië a' a, erë kawö mú ye' a senukwā be' kutà tā.

<sup>13</sup> Erë Siquem tö ie'pa kutà dalösewéwā, e' kuëki ie'pa tö ie' ena iyé iuté kachè wa. <sup>14</sup> Ie'pa tö iché ia:

—Kè sa' a sa' kutà menuk wēpa kè tottola kkuölitla tüule tsir, esepa a. E' dör sulué sa' a jaë taië. <sup>15</sup> Es è sa' tö a' iutèmi. A' wēpa kos tottola kkuölit téé tsir wes sa' es, e' tā sa' tö a' ttö iutèmi. <sup>16</sup> Es a' serwami sa' alà busipa tā. Ñies sa' serwami a' alà busipa tā. Es sa' sermi a' tā ñita wes ká etkè wakpa es. <sup>17</sup> Erë kè a' wā a' tottola kkuölitla tëne wes sa' tö iché a' a es, e' tā sa' míyalne ká i' ki. Sa' kutà mítserne sa' wā.

<sup>18</sup> Etā Hamor ena ilà Siquem e'pa a imène buaë. <sup>19</sup> Taië duladula e' ki Jacob alà busi kiane, e' kuëki bet iwéitö wes ie'pa tö iché es. Ie' dalò taië iyé ska' imalepa tsatā. <sup>20</sup> E' kuëki ie' mía iyé tā ká kköiëule e' wékkö a. Ee ká e' wakpa ñi dapa'uke ttè shuloie. Ee Siquem ena iyé mía ttök iká wakpa tā. Tā ichéitö iarak:

<sup>21</sup> —Pè' debitu ie er buaë se' tā. Ie'pa de senuk se' tā, iyi taük ena iyi wataük se' shuā. Ká tso' wé' ie'pa a. Se' serwami ie'pa alà busipa tā. Ñies ie'pa serwami se' ichapa tā. <sup>22</sup> Etā as se' dö ká etkè wakpaie ie'pa tā ñita, etā s'kawötā iük wes ie'pa tö iché es. Ie'pa tö iché tö se' wēpa ulitane kawötā itóttola kkuölitla tök tsir wes ie'pa wöblane iük es. <sup>23</sup> Etā kos ie'pa wā iyiwak tso', ì tso' e' döraë se' icha. Sö ichò ie'pa a tó. Etā es ie'pa e' tsukeat senuk se' shuā.

<sup>24</sup> Etā wēpa tso' ká e' ki kibinetke, e'pa ulitane a buaë idir. Etā ie'pa kos tottola kkuölitla télor tsir.

<sup>25</sup> E' ukuöki bökki es tā mik e' dalërkeia taië kè wa ie'pa e' tsatkër, etā Jacob aladulakölpa dör Dina akēpa kiè Simeón ena Leví, e'pa míyal Siquem, etā ká e' wakpa wēpa télurdakitö seraa tabè wa. <sup>26</sup> Es ie'pa tö Hamor ena ilà Siquem e'pa ttéwā tabè wa. Ie'pa tö ikutā yéttsa Siquem u a tā imíyal. <sup>27</sup> Ká e' wēpa ttélur seraa. E' ukuöki tā Jacob aladulakölpa malepa debitu tā iyi kos tso' ká e' ki e' tsémirakitö. <sup>28</sup> Es ie'pa wā obeja ena baka ena burro ena iyi kos tso' ká kköiëulewā e' a, ñies ì kos tso' kañika e' mítser. <sup>29</sup> Ñies iyi tso' kos u a, e' mítser ie'pa wā seraa. Ala'rla kos ena alakölpa kos e'pa klö'wélur ie'pa tö ie'pa kanè mésopaie. <sup>30</sup> Etā Jacob tö iché Simeón ena Leví a:

—A' tö se' tsaié. A' kuëki ká i' wakpa e' dör canaánwak ena fereseowak e'pa ulurdaë se' ki taië. Ie'pa ñi dapa'uraë ñippök se' tā. Kè se' wā ñippökwakpa tā' taië, e' kuëki ie'pa e' alörakā se' ki. Ye' ena ye' yamipa kos ttelurdaë ie'pa tö.

<sup>31</sup> Erë ie'pa tö iuté:

\* 34:12 iské: E' kèwö ska' tā ie'pa wöblar tö ilà busipa watueke inuaki a.

—¿Ima ie'pa erbikò tò ie'pa wà sa' kutà mi'mitser wës alakölpa sulusi es?

## 35

*Skëköl er buaë ché Jacob a Betel*

<sup>1</sup> E' ukuöki tã Skëköl tò iché Jacob a: “Be' yú senuk Betel. Eë ák katató kã'ie ye' dör be' Këköl e' kkayë' be' a mik be' bakshkar Esau yöki etã, e' dalöioie.” <sup>2</sup> Etã Jacob tò iché iyamipa a ena kôs itso'rak ie' tã, e'pa a ñies:

—Íyi diököl tso' a' wã dalöie, ese kôs tulóttã bet. A' kuó tã a' datsi' mane'úlor. <sup>3</sup> Mishkarak bet Betel. Eë ye' tò ák katateke et kã'ie iyiwak jchoie Skëköl dalöioie. Ie' tò ye' kime' mik ye' bak erianuk taië etã. Ie' tò ye' kköna' kôs ye' kãka're ekkë.

<sup>4</sup> E' bet tã iyi diököl tso' ie'pa wã dalöie ese tulérakitö Jacob a. Ñies ikukuöio kôs, e' tulérakitö Jacob a. E' kôs wötéluritö kós klò ter tsinet Siquem e' dikia. <sup>5</sup> Etã ie'pa e' yélur. Erë kã tso' tsinet tsinet e' wakpa kôs suawéka taië Skëköl tò, e' kueki e'pa kè wã ie'pa töiëne.

<sup>6</sup> Etã Jacob ena iyamipa kôs demi kã kiè Luz atë Canaán. Kã e' kiè ñies Betel. <sup>7</sup> Etã eë ák katatëtö et kã'ie iyiwak jchoie Skëköl dalöioie. Eë Skëköl e' kkayë' ie' a mik ie' bakshkar iël yöki etã. E' kueki ák katatëtö e' kiè mékãitö El-Betel.\* <sup>8</sup> E' ukuöki tã kã e' a Rebeca kkö'nukwak bak kiè Débora, e' blënewã tã inú bléwarakitö kós klò ter eë e' dikia. Kal e' ter kã kiè Betel e' o'mik. Jacob tò kã e' kiè méka “Ië kéli”.

<sup>9-10</sup> Mik Jacob biteãne Padán-aram dene Canaán, etã Skëköl e' kkachéne etökichane ie' a. Etã Skëköl er buaë ché ie' a i' es:

“Be' kiè Jacob,  
erë be' kè kiëia es.  
I'ñe tã be' kiè mékayö Israel.”

Skëköl tò ie' kiè mane'wéttsã, <sup>11</sup> e' ukuöki tã ichéitö ia:

“Ye' dör Skëköl Diché Tã Íyi Ulitane Tsatã e';

Be' ala'r ena be' aleripa alónú taië.

Be' aleripa alördaë taië,

e'pa döraë kã taië wakpaie.

Ñies ie'pa shua blu'pa döraë.

<sup>12</sup> Kã me'bakyö Abraham a ena Isaac a,

e' méyö be' a ñies be' aleripa a.”

<sup>13</sup> Mik Skëköl tté one Jacob tã, tã imía. <sup>14</sup> Eë Jacob ák duéka ek sè sù. Ák e' ki ie' tò kiò ena vino té iwà kkachöie tò e' dör bats'e'r Skëköl a. <sup>15</sup> Kã e' kiè mékãitö Betel.

*Raquel blënewã*

<sup>16</sup> E' ukuöki tã ie'pa e' yélur Betel míyal Efrata. Kam ie'pa dòmi Efrata e' tso'ia elkeë, etã Raquel alà kúrketke e' diwö de. E' tò Raquel kiri'wéwã taië erë kè iwà kúr yës. <sup>17</sup> Ie' tso'tke suluë ichók etã ikkö'nukwak dur eë, e' tò iché ia: “Kè be' suanuk. Be' alà kune. E' wák dör wëm.” <sup>18</sup> Etã Raquel wake' duökewatke, isiwa' bata tkökeia, e' shua ilà kiè mékaatitö Ben-oní.† Erë ilà yé tò ikiè mane'wé Benjamín.‡

<sup>19</sup> Es Raquel blënewã. Inú wötéwarakitö Efrata ñalé ki. I'ñe tã kã e' kiè Belén. <sup>20</sup> Etã wé Raquel nu bléwaitö e' ki ák duéka ek Jacob tò iwà kkachöie. I'ñe tã ák e' tkëria Raquel pö kkachöie.

\* 35:7 El-Betel: Hebreoie kiè e' wã kiane chè Skëköl tso' Betel. † 35:18 Benoni: Hebreoie s'kiè e' wã kiane chè ye' eriane e' alé. ‡ 35:18 Benjamín: Hebreoie s'kiè e' wã kiane chè ye' ulà bua'kka e' alé.

<sup>21</sup> Etá Israel<sup>§</sup> michoë wé imi'kerö ee. Ie' e' tséat senuk ká kiè Migdal Éder e' wishké. <sup>22</sup> Ie' tö ká yué senoie ee, e' ukuöki tá ilà Rubén senéka ie' alaköl kiè Bilhá e' tá, e' jchenewa ie' wa.

### *Jacob aladulakölpa*

Jacob aladulakölpa döka dabom eyök ki böi (12). <sup>23</sup> Ie' ala'r Lía tá e'pa dör Rubén, e' dör ikibi, ñies Simeón, Leví, Judá, Isacar ena Zabulón. <sup>24</sup> Ila'r Raquel tá e'pa dör José ena Benjamín. <sup>25</sup> Raquel kanè méso kiè Bilhá, e' tá ila'r dör Dan ena Neftalí. <sup>26</sup> Lía kanè méso kiè Zilpá, e' tá ila'r dör Gad ena Aser. E'pa dör Jacob aladulakölpa kune Padán-aram e'pa.

### *Isaac blénewa*

<sup>27</sup> Jacob minea iyé Isaac sauk ká kiè Mamré ee. Ká e' kiè ñies Arbá ö Hebrón. Ká e' a Abraham ena Isaac bak senuk. <sup>28-29</sup> Isaac kënewatke. Mik ie' ki duas tso' cien eyök ki dabom paryök (180), etá iblénewa mía idéütöpa itöki. Ila'r Esaú ena Jacob e'pa tö inü wötéwa.

## 36

### *Esaú aleripa*

<sup>1</sup> I'pa dör Esaú aleripa. Esaú kiè ñies Edom. <sup>2</sup> Esaú senéwa canaánwak alakölpa mañal tá. Eköl dör Adá, e' dör hititawak kiè Elón, e' alà busi. Iëköl kiè Oholibamá, e' dör Aná alà busi ena heveowak eköl kiè Sibón, e' talà. <sup>3</sup> Bata ék kiè Basemat, e' dör Ismael alà busi ena Nebaiot kutà. <sup>4</sup> Adá alà tsá kune e' kiè Elifaz. Basemat alà kiè Reuel. <sup>5</sup> Oholibamá ala'r kune mañal. E'pa kiè dör Jeús, Jaalam ena Coré. E'pa dör Esaú ala'r kune mik ie' bak senuk Canaán etá e'pa.

<sup>6</sup> Esaú wa ilakölpa ena ila'r wépa ena ila'r busipa ena imalepa qos serke ie' ska' e'pa qos míyal ie' wa e' tá senuk ká bánet iël Jacob e' yöki. Ñies ie' wa iyiwak qos ena ì qos dè' ie' ulà a Canaán, e' mítser serea. <sup>7</sup> Esaú ena Jacob wa iyi tso' taië. E' kueki ie'pa kè chë'kaia ñita. Kè ì ku'ia wè' ie'pa böi iyiwak a katè. <sup>8</sup> E' kueki Esaú (e' kiè ñies Edom) e' mía senuk Seír kébata a.

<sup>9</sup> I'pa dör Esaú aleripa bak senuk Seír ké köwö ki, e'pa kiè edomwak. <sup>10</sup> I'pa dör Esaú ala'r: Elifaz e' dör Esaú alà Adá tá, ena Reuel e' dör Esaú alà Basemat tá.

<sup>11</sup> Elifaz ala'r dör Temán, Omar, Sefó, Gatam ena Quenaz. <sup>12</sup> Elifaz alaköl skà bak eköl kiè Timná, e' tá ilà tá' eköl kiè Amalec. E'pa dör Esaú alaköl kiè Adá e' uyökpa.

<sup>13</sup> Reuel ala'r dör Náhat, Zérah, Samá ena Mizá. E'pa dör Esaú alaköl kiè Basemat e' uyökpa.

<sup>14</sup> Esaú alaköl kiè Oholibamá, e' dör Aná alà busi ena Sibón talà. Ie' ala'r dör Jeús, Jaalam ena Coré.

<sup>15</sup> I'pa dör Esaú aleripa e'pa ditséwöpa wökirpa:

Esaú alà kibi kiè Elifaz e' aleripa dör: Temán, Omar, Sefó, Quenaz, <sup>16</sup> Coré, Gatam ena Amalec. E'pa dör Elifaz aleripa e'pa ditséwöpa wökirpa bak senuk Edom. Ie'pa dör Adá uyökpa.

<sup>17</sup> Esaú alà kiè Reuel e' ala'r dör: Náhat, Zérah, Samá ena Mizá. E'pa dör Reuel ditséwöpa wökirpa bak senuk Edom. Ie'pa dör Basemat uyökpa.

<sup>18</sup> Esaú alaköl kiè Oholibamá e' dör Aná alà busi. Ie' ala'r dör: Jeús, Jaalam ena Coré. E'pa dör Oholibamá ditséwöpa wökirpa.

<sup>19</sup> E'pa qos dör Esaú (kiè ñies Edom) e' aleripa. E'pa dör ie'pa ditséwöpa wökirpa.

<sup>20</sup> I'pa dör wëm dör horeowak eköl kiè Seír, e' ala'r. Ie'pa bak senuk Edom ñies. Ie'pa kiè dör: Lotán, Sobal, Sibón, Aná, <sup>21</sup> Disón, Éser, ena Disán. E'pa dör Seír ala'r wépa. Ie'pa dör horeowak wökirpa bak senuk Edom. <sup>22</sup> Lotán ala'r dör Horí ena Hemam. Lotán kutà dör Timná. <sup>23</sup> Sobal ala'r dör Alván, Manáhat, Ebal, Sefó ena Onam. <sup>24</sup> Sibón ala'r dör Aiá ena Aná. Ká e' tá Aná tso' iyé kiè Sibón e' burro kkö'nuk e' dalewa ie' tö di' tum kue tajë ká sí po e' a. <sup>25</sup> Aná alà wëm kiè Disón. Ie' alà busi kiè Oholibamá. <sup>26</sup> Disón ala'r dör

§ 35:21 Israel: E' dör Jacob kiè pa'alí me'ka Skëköl tö ikí e'.

Hemdán, Esbán, Itrán ena Querán. <sup>27</sup> Éser ala'r dör Bilhán, Zaaván, ena Acán. <sup>28</sup> Disán ala'r dör Us ena Arán.

<sup>29</sup> Horeowak wökirpa dör Lotán, Sobal, Sibón, Aná, <sup>30</sup> Disón, Éser, ena Disán. E'pa dör horeowak wökirpa iyamipa wa. Ie'pa bak senuk Seír.

<sup>31</sup> I'pa dör Edom blu'pa, kam Israel aleripa blúpa dò e' yöki. <sup>32</sup> Bela, e' dör Beor alà, e' de Edom wakpa blúie. Ie' ká kiè Dinhaba. <sup>33</sup> Bela blënewa e' skéie Jobab yöne blu'ie. Ie' dör Zérah alà. Ie' datse Bosrá. <sup>34</sup> Jobab blënewa e' skéie Husam datse Temán e' yöne blu'ie. <sup>35</sup> Husam blënewa e' skéie Hadad dör Bedad alà e' yöne blu'ie. Bedad e' ali'ka Madián wakpa ki ká kiè Moab ee. Husam ká kiè Avit. <sup>36</sup> Hadad blënewa, e' skéie Samlá yöne blu'ie. Ie' ká kiè Masrecá. <sup>37</sup> Samlá blënewa, e' skéie Saúl yöne blu'ie. Ie' ká dör Rehobot. Ká e' atë di' kkò a tsinet. <sup>38</sup> Saúl blënewa, e' skéie Baal-hanán yöne blu'ie. Ie' dör Acbor alà. <sup>39</sup> Baal-hanán blënewa, e' skéie Hadad yöne blu'ie. Ie' ká kiè Pau. Ie' alaköl kiè Mehetabel, e' dör Matred alà busi ena Mezaab talà.

<sup>40</sup> I'pa dör Esau aleripa kiè iyamipa wa ñies iká wa: Timná, Alvá, Jetet, <sup>41</sup> Oholibamá, Elá, Pinón, <sup>42</sup> Quenaz, Temán, Mibsar, <sup>43</sup> Magdiel ena Iram. Esau kiè ñies Edom. E'pa kos dör Edom ká blu'pa wé isenerak iká ki ee.

### 37

<sup>1</sup> Jacob e' tséat senuk Canaán wé iyé bak senuk ee. <sup>2</sup> Ttè i' dör Jacob aleripa e' pakè.

#### *José ena iëlpa*

Jacob alà kiè José, mik e' ki duas tso' dabom eyök ki kul (17) etä ie' tso' iyé obeja kkö'nuk iëlpa ta. Iëlpa dör iyé alakölpa kiè Bilhá ena Zilpá, e'pa ala'r. Etä ì sulu kos wambleke iëlpa tö ie' wöwa, ese kkateke saraq ie' tö iyé a.

<sup>3</sup> Ie' kune mik iyé Jacob kënewatke etä. E' kueki Jacob ki ie' kiar ila'r malepa tsata. E' kueki Jacob tö datsi' yué ie' a kitküle buaë. <sup>4</sup> Erë mik ie' ëlpa wa ijchenewa tö ie'pa yé ki ie' kiar ie'pa ulitane tsata etä ie'pa éna iar suluë, kè ishke'weta'.

<sup>5</sup> Ká et ta ie' kabsué e' pakéitö iëlpa a. E' kueki ie'pa éna suluë ie' kí ane. <sup>6</sup> Ie' tö ikabsué paké iëlpa a i' es:

—Ye' ttò ttsó. Ye' kabsué e' pakekeyö a' a. <sup>7</sup> Ye' kabsué tö se' ulitane tso' kanëblök kañika dali shua. Se' tso' dali wöshök e' tsatésö ettsak ettsak. Ye' tö isuë tö bet ye' icha e' duéka bua' shkë'ka. A' ichapa e' dapa'wé ye' icha pamik shkit ta e'pa tö ye' icha dalöie.

<sup>8</sup> Etä iëlpa tö iiüté:

—¿Be' éna iwà chak tö be' döraë sa' blúie? ¿Sa' serdaë be' dikia?

Ie' kabsué ena wes ipakéitö ie'pa a, e' kueki ie'pa éna suluë ie' kí ane.

<sup>9</sup> E' ukuöki ta ie' ská kabsuéne, e' pakéitö iëlpa a ñies. Ie' tö iché ie'pa a:

—Ye' kabsué tö diwö ena si'wö ñies bëkwö döka dabom eyök ki et (11), e' kos tö ye' dalöieke.

<sup>10</sup> Mik ie' tö ikabsué e' paké iyé a ena iëlpa a, etä iyé tö iuñé:

—¿Ì kiane chë be' ki kabsué e' wa? Ttsëskua be' mì ena be' ëlpa ena ye', sa' kawöta be' dalöiök.

<sup>11</sup> Ie' ëlpa éna iar suluë. Erë iyé tö ibikeitsé tajë: ¿ì kébisué José tö es?

#### *José watuëttsa iëlpa tö*

<sup>12</sup> Ká et ta José ëlpa míyal dò Siquem iyé iyiwak wëttsë kakö yulök. <sup>13</sup> Etä Jacob tö iché José a:

—Be' ëlpa tso' tsinet Siquem iyiwak kkö'nuk. Ye' ki ikiane tö be' yú isaük.

Etä José tö iiüté:

—E' buaë. Ye' mí isaüktrak.

<sup>14</sup> Jacob tö iiüté:

—Èkëkë. Be' yú be' ëlpa saük, is itso'rak, is iyiwak tso' ñies. E' wa be' wa ye' a itté dömine.

Etā Jacob tō ie' patkémi. Ie' e' yétt̄sa Hebrón ké kkue k̄i m̄iá Siquem. <sup>15</sup> Eē ie' shkòdur chò kañika, e' kuéwā wēm eköl tō tā e' tō ie' a ichaké:

—ǰ̄l̄ yulök be' tso'?

<sup>16</sup> Ie' tō iiüté:

—Ye' tso' ye' ēlpa yulök. ǰ̄Be' kè wā ijcher wé ie'pa tso' ye' yé ijiwak kkö'nuk?

<sup>17</sup> Wēm e' tō iiüté:

Ie'pa kè ku'iā íe. Ie'pa mineyalbak. Ye' ittò ttsérak tō ie'pa mi'keā Dotán.

Etā ie'pa m̄iá iēlpa yulök. Etā ie'pa kuéitō Dotán. <sup>18</sup> Etā iēlpa tō ie' sué kamiē tō ie' datse. Kam idò e' dalewa iēlpa kawō mérak ñi a ie' ttowā. <sup>19</sup> Ichérakitō ñi a:

—Kabsaukwak datse. <sup>20</sup> Ittōwasö. Inú batröomisö kauk kè a di' ta' ese a. Etā ichösö tō ijiwak sulusi ie' katéwa. Es ie' kabsuē e' kè wā tkòpa yēs.

<sup>21</sup> Mik Rubén tō ttè e' ttsé, etā ie' éna iēl tsat̄kak. E' kuēk̄i ie' tō iché iēlpa a:

—Kè ittarwā. <sup>22</sup> Kè a' tō ie' pé tkö'uk. A' tō iómi kauk i' a. Kè a' ulà mukka iki.

Rubén éna José tsat̄kak tsèmine iyé a, e' kuēk̄i ie' tō iché ie'pa a es. <sup>23</sup> Erè mik José debitu iēlpa ska', etā ie'pa tō ie' datsi' kit̄kēule bua', e' yétt̄sa. <sup>24</sup> Etā iklö'wéwarakitō batréemi, kauk tso' di' blóie, erè kè iwā tā' ese a.

<sup>25</sup> E'ukuök̄i tā ie'pa e' tuléwā chkök, e' shuā ie'pa isué tō taiē Ismael aleripa datse. E'pa datse Galaad michoë Egipto dalì dami iwā e' watauk. Kameio k̄i ie'pa wā kiò alar buaē e' dami. Nies kiò masmas kiè bálamo ena mirra e' dami iwā. <sup>26</sup> Etā Judá tō iché iēlpa a:

—Se' ēl ttéwasö tā e' tté blésö, e' tā e' wa ǰ̄i buaē dòmi se' ulà a? <sup>27</sup> Ye' iché buaē idir tō iwatauttsasö Ismael aleripa a. Ie' dör se' ēl se' yami ekka, e' kuēk̄i kè sö ittōwā.

E' mène buaē iēlpa a. <sup>28</sup> Mik íyi wataukwakpa datse Madián e'pa tkami ee, etā ie'pa tō iēl yétt̄sa kauk a watuéttsarakitō Ismael aleripa a inuköl wömulē dōka dabom böyök (20) ské ekkè. Es Ismael aleripa wā José minets̄er Egipto.

<sup>29</sup> Mik Rubén debitu kauk kkò k̄i, etā kè iēl ku'iā. E' tō ie' eriauwé taiē. E' kuēk̄i idatsi' jchélor. <sup>30</sup> E' ukuök̄i tā, ie' m̄iá iēlpa ska' tā ichéitō ie'pa a:

—Se' ēl tsirla kè ku'. ǰ̄Wes ye' e' ùmi?

<sup>31</sup> Etā ie'pa tō chibola ttéwā tā e' pé wa José datsi' patiēkarakitō. <sup>32</sup> Etā datsi' e' patkémiitō iyé a tā ichémi ia: “Datsi' i' kué sa' tō. Ì saú bua'ie. ǰ̄Kè idör be' alà datsi'?”

<sup>33</sup> Etā Jacob tō iché: “ǰ̄Tó, i' dör ye' alà datsi'! Ijiwak sulusi wésele tō ye' alà ttéwā katéwa.” <sup>34</sup> Etā Jacob tō idatsi' jchéloyar eriane kuēk̄i. Etā datsi' tso' iēno mik schönewa ese iékaitō. Etā ilà blēnewā e' eriaitséitō ká taiē. <sup>35</sup> Etā ila'r, wēpa ena alakölpa, e'pa kos de ie' pablök, erè kè ie' pablēr yēs. Ik̄i ijuke taiē shutē ilà dalërmik. Ie' tō iché: “Ye' schö eriaitséraē dò mik ye' duowā ekkè, es ye' döraē ie' ska'.”

<sup>36</sup> Etā madiánwakpa demi Egipto. Eē ie'pa tō José watuéttsa wēm kiè Potifar e' a. Wēm e' kaneblöke Egipto blú a. Potifar dör Egipto blú tsat̄kōkwakpa e' wökir.

## 38

### *Judá ena Tamar*

<sup>1</sup> E' kéwö ska' tā Judá e' batsétt̄sa iēlpa yöki m̄iá senuk wēm kiè Hirá e' ska'. E' serke ká kiè Adulam. <sup>2</sup> Eē Judá tō alaköl sué eköl. E' dör wēm canaánwak kiè Súah e' alà busi, e' tā ie' senéwa. <sup>3</sup> E' ukuök̄i tā idunekā tā ilà kune wēm, e' kiè mék̄aitō Er. <sup>4</sup> E' ukuök̄i ilà skà kune wēm, e' kiè mék̄aitō Onán. <sup>5</sup> E' ukuök̄i tā ilà skà kune wēm, e' kiè mék̄aitō Selá. E' kune mik ie' serke ká kiè Quezib, ee etā.

<sup>6</sup> Judá tō alaköl yulé senowaie ilà kibi kiè Er e' tā. E' kiè Tamar. <sup>7</sup> Etā Er serke suluē shutē Jehová wōa. E' kuēk̄i Jehová tō ittéwā. <sup>8</sup> Etā Judá tō iché Onán a:

—Be' kawōtā senukwā be' dabököt tā alà kōk̄a be' ēl blēnewā e' a wes se' wakpa a imeneatbak es.

<sup>9</sup> Onán éna iane tō ie' alà kurmi kos ischó tā, e' kè dör ie' wák ala'r. E' kuēk̄i mik ie' serke ischó tā, etā bet tā ie' e' skéu bánet as kè alà kōk̄a ischó tā. Es ie' kè wā iēl a iditséwö



meneat. <sup>10</sup> E' dör suluë ichók Jehová a, e' kueki ie' tö Onán ttéwa ñies. <sup>11</sup> Eta Judá tö iché iyàk Tamar a:

—Be' yú senuk be' yé u a wes schó es dò mik ye' alà Selá talane eta.

Erë Judá tso' Tamar kitö'uk. Ie' ibikeitsé tö Selá duöwami wes iëlpa duolur es. Es Tamar minea senuk iyé ska'.

<sup>12</sup> Ká de taië ta Judá alaköl dör Súah alà busi e' blënewa. Ie' schó kéwö tka ta ie' mía ká kiè Timnat, wé itso'rak ie' obeja köyök tök ee. Ie' yami kiè Hirá e' dör adulamwak, e' mí ie' ta ie' wapiöuk. <sup>13-14</sup> Tamar tö isuë tö Judá alà kiè Selá, e' detke këchke erë kè ie' senèwa ie' ta. E' wa ie' wa ijchenewa tö Judá tö ie' kitö'wé Selá wa. E' kueki mik ie' wa ijchenewa tö inuaki mía Timnat iobeja köyök tök, eta ie' e' paiöke schóie e' mane'wéttsaneitö. Iwö pabakéwa datsi'tak wa as kè yi a iwërwa. Eta imía ká kiè Enaim. Ee ie' e' tkéser Timnat ñalé kkò a.

<sup>15</sup> Mik Judá tö Tamar sué ta ie' ibikeitsé tö e' dör alaköl sulusi iwö pabakéwa e' kueki.

<sup>16</sup> Eta ie' mía iwöki. Kè ie' wa ieri ta' tö e' dör ie' yàk. Eta ichéitö ia:

—¿Se' ser ñita?

Eta Tamar tö iché ia:

—¿Ì meke be' tö ye' a iskéie?

<sup>17</sup> Eta Judá tö iiuté:

—Ye' chibo patköke be' a etö iskéie.

Ie' iiuté:

—Èkëké. Erë be' íyi tsá múat ye' a dò mik be' tö chibola patké eta.

<sup>18</sup> Judá tö ie' a ichaké:

—¿Ì kiane be' ki tö ye' imèat be' a?

Eta ie' tö iiuté:

—Be' tabechka tso' e' kiè shtoie, e' múat ye' a ikichaë. Ñies be' shko kéli múat ye' a.

Judá tö imé ia ta ie' sené ie' ta. Eta alaköl duneka. <sup>19</sup> E' ukuöki ta Tamar mía iu a eta idatsi'tak wa iwö pabakéwa e' yéttaitö. Eta ie' e' paiéne schó es.

<sup>20</sup> E' ukuöki ta Judá tö chibo patkémí iyami adulamwak e' ulà a as ie' tö imù alaköl a as alaköl e' tö ie' íyi méat alaköl ulà a e' mùbitüne. Erë ie' yami kè wa alaköl e' kuneia.

<sup>21</sup> Eta ie' tö ká e' wakpa a ichaké:

—Alaköl sulusi e' dör enaimwak atéat ñala ska', ¿wé e'?

Eta ie'pa tö iiuté:

—Íe alakölpa sulusi kè dè'.

<sup>22</sup> Eta ie' biteane Judá wörki ta ichéitö ia:

—Kè ye' wa alaköl kune. Ye' tö ichaké ká e' wakpa a. Ie'pa tö ye' a iché: 'Íe alakölpa sulusi kè dè'.

<sup>23</sup> Judá tö iiuté:

—As ye' íyi tsúatitö es kè yi tö sa' jaëwepa. Kè ye' iane iwíie. Ye' tö ichibo patkémí be' ulà a, erë kè be' wa alaköl kune.

<sup>24</sup> Eta si' mañat ulatök ta Judá ki biyò de tö:

—Be' yàk Tamar e' sene' wëpa kua'ki ta. Ie' duneka.

Eta Judá tö iché aneule:

—¿Iyóttsa ta ñna'úwa!

<sup>25</sup> Erë mik ie' yekettsa ie'pa tö ttéwa, e' wösha ie' ttè mémi inuaki a: “Yi íyi a'tser ye' ulà a i', e' wák tö ye' duéka. Be' isaú. ¿Yi kiè shto tabechka i' ikichaë ena shko kéli i'? ¿e' suule be' wa?” <sup>26</sup> Mik Judá tö ie' íyi suéwa iyàk ulà a ta ichéitö: “Alaköl i' dör buaë. Kè ye' wa ulabatsé ye' alà Selá ta. Ye' e' wamblé sulu ie' ki.” Eta kè ie' seneia ie' ta.

<sup>27</sup> Tamar alà kune klò wák dör wëpa. <sup>28</sup> Itsörke e' wösha, eta eköl ulà dettsa kewe. Eta ie' kkö'nukwak tö datsi'kicha batsé e' muéwa ilà ulà mik ta ichéitö: “I' ék kune kewe.”

<sup>29</sup> Erë e' wöshaë bet ta alà ulà tiéwane etökichane eta iëk kune keweie. Eta ikkö'nukwak

tö iché ia: “¿Wes be' kune keweie?” E' kueki ikiè mékai'tö Fares.\* 30 E' ukuöki ta, iulà a datsi'kicha tkër batsë e' kune, e' kiè mékai'tö Zérah.

## 39

*José tkashkar Potifar alaköl ulà a*

<sup>1</sup> José minetsarak iwà Egipto. Ká e' ki wëm tso' eköl kiè Potifar, e' tö ie' tuéttsa Ismael aleripa a. Wëm e' kanebloke Egipto blú a. Ie' dör Egipto blú tsatkökwakpa wökir. <sup>2</sup> Erë Jehová tso' José ta, e' kueki ì kôs kanewekeitö e' dökettsa buaë iwökir egiptowak e' ska'. <sup>3</sup> Iwökir tö isuë tö Jehová tso' José ta, e' kueki ì kôs kanewekeitö e' dökettsa buaë. <sup>4</sup> E' kueki iwökir ki ikiarke taië. Ie' tö iméka ie' wák kimukwakie. Nies imékai'tö ie' íyi kôs e' kuebluie. Ie' wá íyi kôs tso' e' kkö'nekeitö. <sup>5</sup> Mik Potifar tö ie' méka íyi kôs kuebluie, etá Jehová er buaë chémi Potifar a. Ie' íyi kôs tso' iu a ena kañika e' kôs mir buaë. <sup>6</sup> José tö Potifar íyi ulitane kkö'neke buaë. E' kueki Potifar kè wöki ì wëneia yës. Ì ñak ie' éna e' è bikeitsekeitö.

José wák dör bua'bluka. <sup>7</sup> Ká de iki taië etá iwökir alaköl wöbatseka iwa. Ká et ta ie' iché ia:

—Be' senúka ye' ta.

<sup>8</sup> Erë José kè wá ie' ttè iütëne ta ichéitö ia:

—Ye' ttò ttsó. Ye' wökir íyi ulitane méat ye' ulà a sunoie. Ye' tso' íe, e' ta kè ie' tkine ie' íyi kôs ki. <sup>9</sup> Ye' tso' ie' u kueblu kibiie. Ye' wökir kè wá ì kkëone ye' ki. Be' è kè meneat iwá ye' a be' dör ie' alaköl e' kueki. ¿Wes ye' tö ì sulu i' wamblëmi be' ta? ¿Wes ye' tö ì sulu wamblëmi Skëköl ki?

<sup>10</sup> Kekraë alaköl tö ie' a icheke: “Be' senú ye' ta.” Erë ie' kè tö iüteta' yës. Ie' tö iulawaté kekraë. <sup>11</sup> Ká et ta ie' tkawa weshke íyi kanéuk etá iwökir alaköl e' è tkër. <sup>12</sup> Etá iwökir alaköl tö ie' klö'wéwa idatsi' a ta ichéitö ia:

—Be' senú ye' ta.

Erë ie' tkashkar iulà a mía tuneule. Ie' datsi' yënettsaat alaköl ulà a. <sup>13</sup> Mik iwökir alaköl tö isuë tö José datsi' ate ie' ulà a <sup>14</sup> etá ie' tö ikanè mésopa kié ta ichéitö ie' pa a:

—Isaú, ye' wëm wá hebreowak dë'bitu e' tso' se' wayuök. Ie' dewa ye' ska'. Ie' senakka ye' ta kësik wa erë ye' aneká taië. <sup>15</sup> Mik ie' ittse tö ye' aneká taië ta ie' tkashkar tuneule. Ie' datsi' yënettsaat e' ate ye' ulà a.

<sup>16</sup> E' ukuöki ta ie' tö José datsi' blé kkeyënoie iwëm a mik idene etá. <sup>17</sup> Mik iwëm dene, etá ipakéitö ia ta ichéitö ia:

—Be' wá hebreowak dë'bitu kanè mésoie, e' tkawa weshke ye' ska'. Ie' senakka ye' ta.

<sup>18</sup> Erë mik ye' aneká taië, etá ie' tkashkar tuneule ta idatsi' ate tër íe. <sup>19</sup> Es be' kanè méso tö ye' dalösewéwa.

Mik iwökir tö ttè e' tse etá iluneka taië. <sup>20-21</sup> José klö'wéwaitö wötökwá patkéitö wé Egipto blú bolökpa tso' wötëule eë. Erë Jehová tso' José kimuk s'wöto wé a ñies. Ie' er bua' chöke ia. Ie' tö s'wöto wé wökir ké er buaë chök ia. <sup>22</sup> S'wöto wé wökir tö iméka s'tso' wötërulewá malepa kôs kuebluie. José tö ì kôs weke s'wöto wé a e' kéwö meke. <sup>23</sup> Jehová tso' José ta. Ie' tö ikimeke as ì kôs döttsa buaë ie' a. E' kueki ì kaneweke José tö e' kè sueku'ia s'wöto wé wökir tö tö is imir.

## 40

*Kabsuë böt e' wà paké José tö*

<sup>1-2</sup> E' ukuöki ta wëm dör Egipto blú a vino mukwakpa e' pa kueblu ena wëm dör blu' a pan yuökwakpa e' pa kueblu, e' pa böi tö iblú tsiriwéka. E' kueki ie' uluneka ie' pa ki <sup>3</sup> ta ie' pa patkéitö wötëwá ikkö'nukwakpa kueblu e' u a s'wöto wé tso' e' a. Eë José tso' wötëule ñies. <sup>4</sup> Etá Egipto blú kkö'nukwakpa e' kueblu tö José ké wëpa böi ñe' pa kkö'nuk. Eë ie' pa sené wötëule ká taië.

\* 38:29 Fares: Hebreoie s'kiè e' wà kiane chë tkabitü keweie.

<sup>5</sup> Ká et nañewe ta ie'pa bö́l kabsuè kuá'kí kuá'kí. E' wà dör kuá'kí kuá'kí. <sup>6</sup> Bule es bla'mi ta José debitu isauk. Ie' tö isuè tö ie'pa eriane. <sup>7</sup> E' kueki ie' tö ie'pa a ichaké:

—¿Iók i'ñe ta a' wö wër siar?

<sup>8</sup> Ie'pa tö iiüté:

—Sa' kabsuè, erë kè yi ku' sa' a iwà pakök.

Ie' tö iché ie'pa a:

—¿A' kè wá ijcher tö Skéköl tö s'kabsuè e' wà chëmi se' a? ¿Ima a' kabsuè? E' chó ña.

<sup>9</sup> Eta blu' a vino mukwakpa kueblu e' tö ikabsuè paké ia ta ichéitö:

—Ye' kabsuè tö uva kicha me'r ye' wösha <sup>10</sup> e' ulà tso' mañat. E' dapëneka e' wörkua bune taië ta iwörkua míane iwóliie e' yua' tso' taië. <sup>11</sup> Egipto blú tka' a'tser ye' ulà a. E' a uvawöli diò tuéeyö. E' ukuöki ta ye' wák tö imé blu' a. Es ye' kabsuè.

<sup>12</sup> José tö iché ia:

—Be' kabsuè e' wà kiane yënuke i' es: Be' tö uva kicha ulà kébisuè mañat. E' wà kiane yënuke ká mañat. <sup>13</sup> Ká mañat ta blu' tö be' shuleraë. Be' kané meraneitö be' a. Vino meranebö ie' a wes be' tö io' kuaë es. <sup>14</sup> Be' we'ikèyö, mik iwà tka, eta kè be' éna ye' chökwa. Ye' tté chó blu' a as itö ye' yöttsa íe. ¿Be' er buaë chó ye' a! <sup>15</sup> Ye' dör hebreowak e' ekiblè'wabitu ie'pa tö. Ye' kè wá i sulu wamblène. Ye' tso' wötèule é.

<sup>16</sup> Mik blu' pan yuökwakpa kueblu e' tö isuè tö José tö iyami kabsuè e' wà paké ta idettsa buaë eta ie' tö ie' icha paké ia ñies. Ie' iché:

—Ye' kabsuè tö ye' wá kkó dami mañal ye' wökir kí, e' a pan saruru dami. <sup>17</sup> Kkó tkër kákke ék e' a pan dami blu' a daklili. Erë pan dami ye' wá kkó a ye' wökir kí e' ñeke dù tö.

<sup>18</sup> Eta José tö iché ie' a:

—Be' kabsuè e' wà kiane yënuke i' es: kkó mañal e' dör ká mañat. <sup>19</sup> E' wà kiane chë tö ká mañat ta blu' tö be' kuli' tökök patkeraë, ta be' nu kichatkeraka kal ulà a. Dù tö be' nu katerawa.

<sup>20</sup> Ká de mañat ta blu' tö iduéswo tkó'wé chke wa di'yè wa taië ikueblupa ulitane kanèbloke ie' a e'pa a. E' shua ie' tö ivino mukwakpa kueblu ena ipan yuökwakpa kueblu e'pa bö́l tsukbitu patké s'wöto wé a ikueblupa ulitane wörki. <sup>21</sup> Vino mukwakpa kueblu e' a ikané méneitö. Ie' tö blu' a itka' méne wes kuaë es. <sup>22</sup> Erë pan yuökwakpa kueblu, e' patkëmi nu kichatkëka wes José tö iyë' es. <sup>23</sup> Erë vino mukwakpa kueblu e' kè er aneia José ska'.

## 41

### *Egipto blú kabsuè bötökicha e' wà paké José tö*

<sup>1</sup> Dwas de bö́k, e' ukuöki ta Egipto blú kabsuè tö ie' dur di' kiè Nilo e' kkömik. <sup>2</sup> Ie' isuè tö baka deyal di' a kuktö. E' dör baka bua'buajë jani'janila. E' iëter chök kuachka shua. <sup>3</sup> E' itöki baka skà deyal kuktö di' a. Erë e' dör sulué sí sulula. E' míyal di' kkömik baka malè o'mik. <sup>4</sup> Eta baka sí sulula kuktö, e' tö baka bua'buajë kuktö e' katélur.

Eë ta blu' ti'neka. <sup>5</sup> E' ukuöki ta bet ie' kapowane ta ikabsuène tö i talarke kuò sù kiè trigo e' klò elka è a ila'k deka kul. Ila'k e' dör bua'buajë iwö blubluë. <sup>6</sup> E' itöki iskà tskine e' klò elka è a ila'k deka kul ñies, erë sulula idir. Siwa' datse diwö tskirke e' kke e' tö isiwéwa ña'wéwa sulué mía wö yabé è. <sup>7</sup> Eta ila'k kul siulewa sulu e' tö ila'k bua'buajë katélur seraä.

Blu' ti'neka ta iéna iane tö ie' kabsuè moki. <sup>8</sup> Erë bule es bla'mi ta ie' kabsuè e' tö ie' eriawéka. E' kueki ie' tö Egipto íyi tötkökwakpa ena íyi jcher taië ese wakpa, kos tsuk patké. Ie' kabsuè e' pakéitö ie'pa a. Erë ie'pa ulitane kè a ie' kabsuè e' wà ane. <sup>9</sup> Eta vino mukwakpa kueblu e' tö iché blu' a:

—A blu', erpa ye' éna idaa tö sulu ye' e' wamblé. <sup>10</sup> Mik be' uluneka taië be' pan yuökwakpa kueblu kí ena ye' kí, eta be' tö sa' wötökwá patké' be' kkö'nukwakpa kueblu e' wé a. <sup>11</sup> Ká et nañewe ta pan yuökwakpa kueblu kabsuè. Ye' kabsuè ñies. Sa' kabsuè e' wà ta' ulawa ulawa. <sup>12</sup> Eë wëm dur eköl duladula hebreowak, e' dör s'wöto wé wökir

e' kanè méso. Ie' a sa' tö sa' kabsué e' paké ta' ie' tö iwà ché sa' a. <sup>13</sup> ¡Iwamblène yésyèsé wes ie' tö sa' a iyè' es! Ye' dene ye' kanè a ta' iëköl nu kichatkéka kal ulà a.

<sup>14</sup> Età blu' tö José tsuk patké ta' iyéttsarakitö bet s'wöto wé a. José tsà téé buaë, e' paié buaë, ta' ide ie'pa wa' blu' wörki. <sup>15</sup> Blú tö iché ia:

—Ye' kabsué erë kè yi éna iwà ane. Erë ie'pa tö iché ye' a tö buaë be' tö s'kabsué e' wà pakè.

<sup>16</sup> Ie' tö iüté:

—A kéképa e' kè yénuk ye' a. Erë Skéköl tö e' chëmi be' a be' kimoie.

<sup>17</sup> Blu' tö iché ia:

—Ye' kabsué tö ye' dur di' kiè Nilo e' kkömik. <sup>18</sup> Ye' isué tö baka deyal di' a kuktö. E' dör baka bua' buaë jani' janila. E' iëter chkök kuachka shua. <sup>19</sup> E' itöki baka skà deyal di' a kuktö. Erë e' dör sulué sí pola. ¡Kè ye' wa' baka suule sí poë sulué ká i' a ekkè chökle! <sup>20</sup> Età baka sí sulula kuktö, e' tö baka bua' buaë kuktö e' katélur. <sup>21</sup> Baka sí sulué e' tö baka bua' buaë katélur erë kè iwër tö ikatélur. Itso'ia sí poë wes kenet es.

“Ee ta' ye' ti'neka. <sup>22</sup> Età bet ye' skà kapowane ta' ye' skà kabsuéne tö ì talarke kuò sù e' klò elka è a ila'k deka kul. Ila'k e' dör bua' buaë iwö blubluë. <sup>23</sup> E' itöki iskà tschine e' klò elka è a ila'k deka kul ñies. Erë e' ala'k dör sulula. Siwa' datse diwö tskirke e' kke e' tö isiwéwa ña'wéwa sulué mía wö yabé è. <sup>24</sup> Età ila'k kul siulewa sulu e' tö ila'k bua' bua katélur seraa. E' kos pakéyo s'tötkökwakpa a erë ie'pa shua kè yi a iwà ane yës.”

<sup>25</sup> Età José tö blu' iüté:

—A kéképa, be' kabsué bötökicha, e' wà dör etkè. Ì weraë Skéköl tö kukuie e' chök ie' tso' be' a kabsué a kam iwà tkò e' yöki. <sup>26</sup> Baka bua' buaë ena ala'k bua' buaë e' wà dör etkè, e' dör duas kul. <sup>27</sup> Baka sulula sí poë deka ibua' buaë itöki ena ala'k sulué siulewa siwa' wa, e' wà dör etkè. E' dör duas kul skà. E' duéswö wa ketba ardaë s'ki dò duas kul e'. <sup>28</sup> Ì weraë Skéköl tö kukuie e' chök ie' tso' be' a wes ye' tö be' a ichétke es. <sup>29</sup> Kewe dalì wördaë taië Egipto kos a doka duas kul. <sup>30</sup> E' ukuöki ta' duas skà datskene kul e' dör ketba taië duéswö. Bli e' tö Egipto kos sulu'wërawa. E' kuëki duas kul buaë e' a dalì wöne taië e' kè arpaia yi éna. <sup>31</sup> Bli ardaë taië darërë, e' kuëki dalì wönebak taië e' peli kè wërpaia yës. <sup>32</sup> A kéképa, be' kabsué bötökicha, e' wà kiane chë tö Skéköl tö iweraë mokië. Bli doraë se' ki bet.

<sup>33</sup> A kéképa, be' kawöta wëm yulök eköl erbikò buaë wa' íyi jcher taië ese. E' múka ká kuëbluie. <sup>34</sup> Ikaneú i' es: wëpa yuló as ie'pa mi' Egipto kos a daliwö kak blök daliwö tso' taië duas kul e' dalewa. Mik daliwö tso' doka saco skël età ikió ia sacco et blënoie ketba yöki. <sup>35</sup> Ie'pa a ichó tö daliwö ñe' kos dapa'ú bänet bänet ká tso' kos Egipto e' a. E' kkö'nuk patkó be' wák tö sulitane tioie. <sup>36</sup> Es daliwö blërdaë a' wakpa ulitane a as ie'pa kè ttò ketba tö mik ketba duéswö de s'ki età.

### *José yöne Egipto wökirie*

<sup>37</sup> Ì ché José tö ie' a e' mène buaë ie' a ena ikueblupa kos e'pa a. <sup>38</sup> E' kuëki ie' tö iché ie'pa a:

—Wëm i' a Skéköl Wiköl tso'. Kè se' a wëm skà kurpa wes ie' es.

<sup>39</sup> Età ie' tö iché José a:

—Skéköl tö íyi ulitane ikkè e' kkaché be' a. E' kuëki be' erbikò buaë, be' wa' íyi jcher taië sulitane tsata. <sup>40</sup> Be' tkekekayö ye' ká kos e' wökirie. Sa' wakpa kos tö be' ttò dalöieraë. Ye' eköl è dör kibiie be' tsata, ye' dör blu' e' kuëki. <sup>41</sup> I'ñe ye' tö ichè tö be' dör Egipto wökir kibi. <sup>42</sup> Età blu' tö iulatsio tso' iwà ikka shtioie, e' yéttsa iéwa José ulatska a. José paiéraitö datsi' bua' bua ese wa. Ñies bulë dör oro ese iéwaitö José kuli' a et. <sup>43</sup> E' ukuöki ta' ie' tö José ké e' tkökka shkök karreta shköke ie' karreta itöki e' ki. Ie' tö ie'pa wëlepa patkëmi kewe ichök pë' a aneule: “¡A' e' skó! ¡Kawö mú se' wökir kibi datse as e' tkömi!” Es ie' tö José yué Egipto wa'ñe e' wökirie.

<sup>44</sup> Età blu' tò iché José a:

—Ye' dör Egipto blú erë kè yi a ì onuk ká i' ki, be' kè wà ikéwö mène e' ta.

<sup>45</sup> Ie' tò José kiè méka Safenat-panéah egiptowak ttò wa. Ie' tò tayë kiè Asenat e' mé José a senowaie. E' dör wëm kiè Potifera e' alà busi. Potifera dör egiptowak sacerdote\* eköl. Ie' kaneblöke ká kiè On ee. Es José atë Egipto wa'ñe e' wökirie. <sup>46</sup> Mik ie'pa wà José dë'bitu blu' ska', e' kéwö ska' ta ie' ki duas tso' dabom mañayök (30).

José e' chéat blu' a ta imítke ikaneuk Egipto kos a. <sup>47</sup> Duas kul tsá shua dali wöne taië shute. <sup>48</sup> Daliwö e' kos kak dapa'wé José tò ta ibléitö ká wa'ñe. Wé dali e' wöne ese wakpa ká a ibléat u tso' daliwö blóie ese a. Es ibléitö ká ulitane tso' Egipto e' a. <sup>49</sup> Ie' tò daliwö dapa'wé taië wes dayë tséwö kè ishtar es. E' kueki ie' kè wà ishtaneia.

<sup>50</sup> Ketba kéwö kam döwa e' yöki José alaköl kiè Asenat, e' alà kune böi wëpa. <sup>51</sup> Mik ilà tsá kune, età José tò iché: “Skököl tò ye' bak erianuk ena ye' yamipa e' kos chöwéwa ye' éna.” E' kueki ikiè mékaitö Manasés.† <sup>52</sup> Mik ilà skà kune, età ie' iché: “Skököl tò ye' a alà mé ká wé ki ye' bak weinuk taië ee.” E' kueki ikiè mékaitö Efraín.‡

<sup>53</sup> Duas kul dali wöne taië Egipto e' tka. <sup>54</sup> E' ukuöki ta duas kul skà debitu e' dör ketba poë duéswö wes José tò iyë' es. Ketba de ká wa'ñe erë Egipto kos a chkewö tso'. <sup>55</sup> Mik Egipto wakpa teketke ketba tò, età ie'pa mía iblú a chkewö kiök. Ie' tò iché iarak: “A' yú José ska' ta ì kos chéitö a' a e' wà iütö.”

<sup>56</sup> Mik ketba de ká wa'ñe, età José tò dali tso' bléule iwé a e' kos kköppée chkewö watuo Egipto wakpa a. Ketba kí datse taië shute. <sup>57</sup> Ká ulitane wakpa a kè ì ku'ia katanoie, e' kueki ie'pa de Egipto chkewö tauk José ska'.

## 42

### *José ëlpa mía Egipto*

<sup>1</sup> Mik Jacob wà ijchenewa tò chkewö tso' Egipto watuè, età ila'r a ichéitö: “¿Iók a' iëter ñi sauk è? <sup>2</sup> Ye' a iyéne tò chkewö tso' Egipto. A' yú ee chkewö tauk as kè se' duòlur ketba wa.”

<sup>3</sup> Età José ëlpa döka dabop, e'pa míyal Egipto chkewö tauk. <sup>4</sup> Erë Jacob kè wà ilà Benjamín, e' dör José ël táie imi wa, e' patkënemi iëlpa ta ie' ibikeitsé dö' ì tkò ita ñala ki. <sup>5</sup> Ketba tso' taië Canaán e' kueki taië Canaánwakpa míyal chkewö tauk Egipto. Esepa shua Jacob ala'r mirwarak chkewö tauk ñies.

<sup>6</sup> José dör Egipto ká kueblu. Ie' tò chkewö watuëke sulitane datse itauk e'pa a. Mik iëlpa demi iwörki, età ie'pa wöéwa dò iski ie' dalöiök. <sup>7</sup> Ie' tò ie'pa suéwa bet tò ie'pa dör iëlpa. Erë ie' e' éwa iyöki wes kè ie' wà isuule es. Kè ie' e' kkayënewa ie'pa a tò ie' dör ie'pa ël. Età ie' tò iëlpa chaké kësik wa:

—¿Wé a' sekképa bite?

Ie'pa tò iüté:

—Sa' bite Canaán chkewö tauk be' ska'.

<sup>8</sup> Ie' tò ie'pa suéwa, erë ie'pa kè wà ie' sunewa. <sup>9</sup> Ie' tò iëlpa kébisu' e' anewa ie' éna. Ie' tò iché ie'pa a:

—A' dör sa' bolökpa datse sa' sauk tò wes a' döwami ñippök sa' ta e' aloka sa' ki.

<sup>10</sup> Ie'pa iüté:

—A kéképa, e' kè dör es. Sa' kè dör a' bolökpa. Sa' debitu chkewö è tauk. <sup>11</sup> Sa' kos i' e' yé dör eköl è. Sa' serke buaë yësyësë. Kè sa' dör yi bolökpa.

<sup>12</sup> Ie' tò ichéne ie'pa a:

—Au. A' sekké tso' kachök. A' datse sa' ká sauk tò wes a' döwami ñippök sa' ta e' aloka sa' ki.

\* 41:45 sacerdote: Sacerdote i' kè dör wes i'ñe itso' es. E' skéie ie'pa dör egiptowakpa siwa' e' wà kaneukwakpa.

† 41:51 Manasés: Hebreoie s'kiè e' wà kiane chë ichöwéwa ye' éna. ‡ 41:52 Efraín: Hebreoie s'kiè e' wà kiane chë alà kéka ö dali wör.

<sup>13</sup> Erë ie'pa tö iiüté:

—Sa' tso' be' wörki wes be' kanè mésopa es. Sa' dōka dabom eyök ki böl (12). Sa' yé dör eköl è. Sa' serke Canaán. Sa' èl tsirla ék e' atē sa' yé tā. Iëköl blënewatke.

<sup>14</sup> Erë ie' tö iskà chënerakia:

—Ye' ichétke tö a' dör sa' bolökpa. <sup>15</sup> Egipto blú ttò wa yö ichè a' a tö a' kè wā a' èl tsirla e' dè' íe, e' tā a' kè mi'pa ká i' ki. Es ye' isuèmi tö a' ttò moki. <sup>16</sup> A' eköl yú a' tsirla tsukbitu. A' malepa atē wötëule. Es ye' wā ijchermi tö a' ttòke e' dör moki. E' kè yëne, e' tā a' dör sa' bolökpa. E' chéyö Egipto blú ttò wa.

<sup>17</sup> Ie' tö ie'pa wötéwā sēkkā dōka ká mañat. <sup>18</sup> Ká de mañat etā ie' tö iché iarak:

—Ye' tö Skëköl dalötsetā'ka. Ì cheke ye' tö a' a e' ú, e' tā ye' kè tö a' ttökwa patkepa. <sup>19</sup> Yëne tö a' dör wēpa ttò moki ese, e' tā a' eköl múat wötëule. A' malepa yúne, chkewö tsúmi a' yamipa tteke ketba tö e'pa a. <sup>20</sup> E' ukuöki tā a' èl tsirla e' tsúbitu ye' a suè. Es ye' tö isuèmi tö a' ttòke e' dör moki. E' kè dör es, etā a' duöralur.

Etā ie'pa tö iché: “E' dör buaè sa' a.” <sup>21</sup> Etā ichéraitö ñi a:

—Mokië se' e' wamblë' suluë se' èl José tā. Mik ie' kköyë' taië se' a tö ì sulu kè wamblar ie' ki eré se' isu' tö taië ie' eriane, erë kè e' ska' se' tkine. E' nuí ki se' weirke i'ñe.

<sup>22</sup> Etā Rubén tö iiüté:

—Ye' tö iyë' a' a: “Kè ì wamblar José ki.” Erë a' kè wā ye' ttò iütëne. E' kueki i'ñe tā se' kawötā idu'wā e' nuí patauk.

<sup>23</sup> José ttòke iëlpa tā egiptowak ttò wa e' pakekene o'ka tö ie'pa a iwakpa ttò wa. E' kueki ie'pa kè wā ijcher tö ie'pa ttòke e' ane ie' éna. <sup>24</sup> Mik ie' tö ie'pa ttòke e' ttsé, etā ie' e' skéttsa míā bānet iuk. Mik ie' er dekane ttoie, etā ie' dene ie'pa ska'. Ie' tö Simeón yöktsā patké tā ipayuëwarakitö iëlpa wörki. <sup>25</sup> E' ukuöki tā ie' tö ikanè mésopa patké iëlpa sku' wā iök chkewö wa. Ñies ichéitö iarak: “Ie'pa chkewö e' ské iówā iwakpa bil ekké sku' a. Ñies chkè bakómirakia ñe ñalā ki.” Etā ie'pa tö iwé wes ie' tö iché iarak es. <sup>26</sup> E' ukuöki tā ie'pa tö ichkewö mékā iburro ki tā imíyal.

<sup>27</sup> Mik ie'pa demi ñalā ki wé ie'pa kapökerö eē etā ie'pa eköl tö isku' a burro chkò tso' e' kkò wöttsee iburro tioie tā isué tö inuköl àr sku' shuā. <sup>28</sup> Ie' tö iché iëlpa a:

—¡Isaú! Ye' inuköl mébitune ie'pa tö e' àr sku' a.

Ie'pa ulitane suane taië eriane taië. Ichéraitö ñi a:

—¿Ì wamblök Skëköl tso' se' tā?

<sup>29</sup> Mik ie'pa demine Canaán, etā ì tka ie'pa tā Egipto e' qos pakéraitö iyé a. Ie'pa tö iché ia:

<sup>30</sup> —Ká e' wökir e' tté sa' tā kësik wa. Ie' tö iché tö sa' dör ie'pa bolökpa. <sup>31</sup> Sa' tö iché ia: “Sa' serke buaè. Kè sa' dör yi bolökpa. <sup>32</sup> Sa' dōka dabom eyök ki böl. Sa' yé dör eköl è. Sa' èl eköl blënewatke, iëköl atē sa' yé tā Canaán.” <sup>33</sup> Etā ie' tö sa' iüté: “A' ttò moki, e' tā a' èl eköl e' múat íe ye' ska' etā chkewö tsúmi a' yamipa a. <sup>34</sup> Erë a' èl tsirla ék e' tsúbitu ña suè. Es ye' wā ijchermi tö a' ttò moki. A' tö iwé es, e' tā ye' tö a' èl èmimine. Ñies a' íyi tuèmi bua' sa' ká i' ki.”

<sup>35</sup> Mik José èlpa tso' isku' wakkauk, etā ie'pa isué sku' a inuköl deyal parratulewā. Mik e' sué, etā ie'pa tkirulune iyé ñies. <sup>36</sup> Jacob tö iché iarak:

—A' tso' ye' mukat alà kè tā'. José blënewā se' yöki. Simeón ñies, kè ku' se' tā. I' tā Benjamín kiane tsèmi a' ki darë wa. Këkraë ye' weirke.

<sup>37</sup> Rubén tö iché iyé a:

—Benjamín múmi ye' a. Ye' tö ikkö'neraë buaè. Ye' wā idörane be' a. Ye' kè wā idë'ne, e' tā ye' alà böl e' ttólur.

<sup>38</sup> Ie' tö iiüté:



—Ye' alà kè mîne a' ta. Iël José du'wa ta ie' è dawaja. Dö' ì sulu tkò ie' ta ñala ki, e' ta kékëla i' duömiwa ilà dalërmik ta a' iane iwiie.

## 43

### *Benjamín ëlpa wa imítser Egipto*

<sup>1</sup> Ketba tkëneia darërë Canaán. <sup>2</sup> Chkewö dë'biturak iwa Egipto, e' enewa. Eta Jacob tö iché ila'r a:

—A' yúne chkewö skà taük se' a.

<sup>3</sup> Erë Judá tö iüté:

—Wëm tso' ee e' tö iyë' sa' a yësyësë: “A' kè wa a' ël tsirla dë' ie, e' ta a' kè tö ye' suepa.”

<sup>4</sup> Be' tö sa' ël tsirla émi sa' ta, e' ta sa' mi'mi chkewö taük be' a. <sup>5</sup> Erë be' kè tö ièmi sa' ta, e' ta kè sa' mîne. Wëm e' tö sa' a iché: “A' kè wa a' ël tsirla dë' ie, e' ta kè a' tö ye' suepa.”

<sup>6</sup> Jacob tö iüté:

—¿Iók a' tö ì sulu wambleke taië ye' ki? ¿Iók a' tö iché wëm e' a tö a' ël skà tso'ia eköl?

<sup>7</sup> Ie'pa tö iüté:

—Wëm e' tö sa' chakéwaie darë wa: “¿A' yé tso'ia ttsë'ka? ¿A' ël skà tso'?” Kè wës sa' a ionukia. Sa' kawöta iütök yësyësë. Sa' kè wa ijcher tö wëm e' tö sa' a ichémi: “A' ël tsúbitu ye' a suë.”

<sup>8</sup> Judá tö iché ie' a:

—Se' senakia, e' ta be' alà ómi ye' ta. Ye' tö ikkö'neraë. Es be' ena sa' ena se' ala'r kos kè duöpalur ketba wa. <sup>9</sup> Ye' e' chò ie' skéie. Ì de wës ie' ta, e' nuí tueraëyö. Ye' kè wa ie' dë'ne be' ska', e' ta ye' iane iwiie kekraë. <sup>10</sup> Kè sö kawö chöuk taië. Warma i' ta sa' daretke bötökicha.

<sup>11</sup> Iyé tö iüté:

—E'ma kè wës ionuk. A' tö iú i' es: A' sku' a iyi bua'buatso' se' ká a, ese kak tsúmi wëm e' a. Bálsamo elkela ena bul alí elkela ena kiö masmas ena mirra ena kalwö wödalo katanoie ese kos kak tsúmi ia elkela. <sup>12</sup> Nies inuköl tsúmi ia jaishet dökä bötökicha. Wé a' wa idë'ne e' tsúmine múne ia a' wák ulawa dö' ie' wöa ká chë'wa. <sup>13</sup> A' yúne wëm e' ska'. Alà tsúmi. <sup>14</sup> Skököl Diché Ta' Iyi Ulitane Tsata e' a ikiéyö as wëm ñe' tö a' saü er siarë wa ta imú tö be' ël ena Benjamín óbitune. Ye' atë alà kè ta', erë ¿wës ye' e' ùmiiä?

<sup>15</sup> Eta Jacob ala'r tö iyi kak ié, nies inuköl ié jaishet dökä bötökicha. Nies Benjamín mirak iwa ta imíyal. Mik idemirak José ska' <sup>16</sup> eta ie' isué tö Benjamín debitü ie'pa wa. Ie' tö iché iu kueblu a:

—Wëpa wikkë tsúmi ye' u a. Be' yú baka ttökwä elka e' kaneú se' a. Ie'pa chköke i'ñe ye' ta dibata a.

<sup>17</sup> Eta iu kueblu tö iwakanewé wës ichéitö ia es. Imítserak iwa e' ta José u a. <sup>18</sup> Erë taië ie'pa tkinewä imítserak iwa José u a e' kueki. Ie'pa ttöramirak ñita: Ie'pa tso' se' kitö'uk. Ie'pa tö inuköl ië'mi se' sku' a e' nuí tkëne se' mik. E' nuí kueki ie'pa tö se' klö'werawa kanëblök ie'pa a kanè mésopaie kè patuë ta' ese. Nies se' iyiwak klö'werawarakitö nuí ki.

<sup>19</sup> Mik ie'pa demi u wékkö a, eta ie'pa de tsinet u kueblu wörki <sup>20</sup> ta ichéraitö ia:

—A kékëpa, suköt sa' dë' ie chkewö taük. <sup>21</sup> Erë sa' dë'mi wé sa' kapökerö ee ta sa' sku' kos kkò wöttsée ta e' a kos sa' tö chkewö to' e' inuköl kuéne sa' tö seraä. E' debitüne sa' wa mène. <sup>22</sup> Nies sa' wa inuköl skà de chkewö kí tuoie. Erë kè sa' wa ijcher yi tö sa' inuköl ië'kane sa' sku' a.

<sup>23</sup> U kueblu tö iüté:

—Kè a' tkinuk. Kè a' suanuk. Ye' tö a' chkewö pato' e' inuköl klöo'. A' Këköl dö'r a' yé Këköl nies, e' tö inuköl e' ië'wa a' sku' a.

E' ukuökü ta ie' tö Simeón yéttsa tsémi wé iëlpä tso' ee. <sup>24</sup> E' ukuökü ta imítserak iwa seraä José u a. Eta di' méitö iarak klö' skuoie. Nies iburro tiéraitö. <sup>25</sup> Ie'pa wa ijchenewa

tö ee ie'pa chköke José ta dibata a. E' kueki ie'pa wa íyi kak de ie' a e' dapa'wérakitö mö ie' a.

<sup>26</sup> Mik ie' dewa weshke, eta ie'pa wa íyi kak de e' mé ia. Ie'pa wöéwaie dò iski idalöiök.

<sup>27</sup> Ie' tö ie'pa shke'wé ta ichakéitö:

—A' yé de kéképalatke yé' a' tö ye' a suköt ¿is e' tso'? ¿Idobyërkeia?

<sup>28</sup> Ie'pa skà wöéwane dò iski ta ichéitö:

—A kéképa, tó, sa' yé tso' buaë. Ie' dobyërkeia.

<sup>29</sup> Eta José ká sué ipamik shkit, ta Benjamín dör iël ekka imì wa ena iyé wa e' suéitö. Eta ichéitö ie'pa a:

—A' èl tsirla yé' a' tö ¿e' dör wí?

Ie' tö iché Benjamín a:

—A alà, Skököl er buaë chò be' a. <sup>30</sup> Ie' tö iël suéwa e' tö ie' ttsé'wé buaë ta ie' iakka. Bet ta ie' e' skéttsa mía wé ikapöke ee iuk. <sup>31</sup> Mik ie' ié one ta ier pablène ta iwö skuée ta imíane iëlpa skà ta ichéitö: “Chkò watió bet.”

<sup>32</sup> José tiérakitö bánet. Iëlpa tiérakitö bánet. Egiptowak chköke José u a e'pa tiérakitö bánet ñies. Hebreowak dör ñá egiptowak a e' kueki ie'pa kè a kawö ta' chkök ie'pa ta ñita. <sup>33</sup> José tö ie'pa tulökwa patké chkök ñi o'mik wes duas tso' iki es dò ibataë. Ie'pa tö ibikeitsé: “¿Wes ie'pa wa se' duéswö jcher?” E' kueki ie'pa tkinewa taië ta ñi suéka. <sup>34</sup> Ie'pa dène chkè tso' José mesa ki e' wa. Es iméitö ulitane a. Erë Benjamín a chkè méitö kibiie dökä skëtökicha iëlpa dène e' tsata. Ie'pa chkè taië blo'yé José ta ttsé'ne buaë.

## 44

### *José tka' tso' iwá wayè*

<sup>1</sup> E' ukuöki ta iu kueblu kiére José tö ta ichéitö ia:

—Ie'pa sku' kos wà iókä chië chkewö wa. Ñies ie'pa inuköl iókane isku' kos kkò ki.

<sup>2</sup> Ñies ye' tka' yöule inukölchka wa tso' ye' wa wayè e' iókä ie'pa èl tsirla e' sku' kkò ki, inuköl chkewö patuo e' ta ñita.

Eta u kueblu tö iwakanewé wes José tö iché ia es. <sup>3</sup> Bule es bla'mi diwö tschine ta José tö iëlpa a kawö mé shkökne iu a iburroë. <sup>4</sup> Kam ie'pa dòmi kamië, eta ie' tö iché iu kueblu a:

—Be' yú ie'pa itöki. Mik be' ikué, eta ichó ia: ‘Ye' e' wé buaë a' ta, ¿iók a' e' wamblé sulu ye' ki? ¿iók a' tö ye' wökir tka' yöule inukölchka wa, <sup>5</sup> e' dör wayè ena íyi tötkoie, e' bléwabitü a' tö? A' e' wamblé suluë.’

<sup>6</sup> Mik ie' ikuérak, eta ichéitö wes iwökir tö iché ia es. <sup>7</sup> Eta ie'pa tö iüté:

—¿iók be' tö ttè e' ché sa' a es? Kè ekké chók sa' e' wamblöpa. <sup>8</sup> Sa' bite Canaán tkörö ié inuköl mène sa' sku' a e' mukne. ¿Wes be' ibikeitsèmi tö sa' tö inukölchka ö orochka e' blèwami be' wökir u a? <sup>9</sup> Sa' sku' shuyuló. Yi icha a ikuébö, as e' wák duòwa. Sa' malepa atë be' kanè mésopaie.

<sup>10</sup> Ie' tö iché ie'pa a:

—Iwà tköraë wes a' tö iché es. Erë wé ék sku' a ikunewa e' è döraë ye' kanè mésoie. A' malepa kè iane iwiie. A' mi'mine buaë.

<sup>11</sup> E' bet ie'pa ulitane tö isku' éwa iski ta ikkò wöttésélor. <sup>12</sup> U kueblu tö sku' shuyulérak ikibi ék kewe dò itsirla Benjamín ska'. Eta Benjamín sku' kkò a tka' ar. <sup>13</sup> Ie'pa datsi' jchélor eriane taië kueki. Ie'pa dali payuéne burro ki ta ibiteyalne José ska'. <sup>14</sup> Mik Judá ena iëlpa demine José ska', eta José duria. Ie'pa wöéwa iski iwörki. <sup>15</sup> E' dalewa ie' tö iché iarak:

—¿iók a' e' wamblö es? ¿A' kè wa ijcher tö wém dör wes ye' es, e' s'tötkè buaë?

<sup>16</sup> Judá tö iüté:

—¿Ima sa' tö be' iütèmi? ¿Ì wa sa' tö be' a ikkachèmi tö sa' kè wà ì sulu wamblène? Ì wamblèule sulu sa' wà e' sué Skèköl tö. I' sa' ièter be' wörki. Sa' klö'ú be' kanè mésoie. Yi sku' a be' tka' kune e' klö'ú ñies.

<sup>17</sup> Erë ie' tö iüté:

—Kè ye' a e' wamblènik es. Yi sku' a ye' tka' kune, e' è atè ye' kanè mésoie. A' malepa mi'mine buaè a' yé ska'. Kè yi tö a' tsiriwèpa.

#### *Judá kköché siarla Benjamín dalèrmik*

<sup>18</sup> Età Judá debitu José wörki tsinet, età ichéitö ia:

—A kèkèpa, be' we'ikèyö, mishka ttök se' böl è. Be' dalò dör wès Egipto blú dalò es e' kuèki kè be' ulunuk ye' ki. <sup>19</sup> Be' tö sa' a ichaki' tö sa' yé ta', sa' èl skà ta'. <sup>20</sup> Sa' tö be' iüté' tó, sa' yé ta' kèkèpalatke, ñies sa' èl ta' eköl ià duladula. E' kune mik sa' yé kènewatke età. Sa' be' a iyé' tö sa' yé ki taiè ilà tsirla ék kiar. Alà e' è atéat imi a. Ie' èl blènewa. <sup>21</sup> Be' tö sa' a iyé' tö alà e' tsúbitu suèyö. <sup>22</sup> Sa' tö be' a iyé' tö kè ie' dōpa. Kè ie' a iyé' menukat ekōrla. Mik ie' tö iyé' méat eköl, età iyé' duōwami ie' dalèrmik. <sup>23</sup> Erë be' sa' a iyé' tö sa' kè wà ie' dē', e' ta' be' kè sa' kiepawa.

<sup>24</sup> “Mik sa' dē'mine sa' yé wörki, età ì kōs yé' be' tö sa' a, e' paké sa' tö ie' a. <sup>25</sup> Ie' tö sa' a iché: ‘A' yúne chkewō tāk.’ <sup>26</sup> Erë sa' tö iüté: ‘Sa' kawōtā sa' èl tsirla tsukmi. Sa' kè wà ie' mine, e' ta' wēm e' kè tö sa' kiepawa.’ <sup>27</sup> Ie' tö sa' iüté: ‘A' wà ijcher buaè tö ye' alaköl e' tö ye' a alà mé böl è. <sup>28</sup> Iaiāè eköl minea ye' yōki, kè ye' wà isuneia. Ye' iklō'wé tö ie' kōtwā iyiwak sulusi tö. <sup>29</sup> A' wà ye' alà bata i' mítser ta' ì sulu tka ie' ta' ñalā wa, e' ta' wō'kela i' duōrawā eriar è wà. Itka es, e' ta' a' iane iwiie.’

<sup>30-31</sup> “Sa' yé éna ilà dalèr taiè. E' kuèki sa' demine ie' ska', erë ie' isué tö ilà tsirla kè dē'ne sa' wà, e' ta' ie' duōrawā eriar è wà. E' wiie sa' iardaè. <sup>32</sup> Ye' tö ye' yé a iyé': ‘Ye' e' chō be' alà tsirla kkō'nuk. Ye' kè wà idē'ne, e' ta' ye' iane iwiie kēkraè.’ <sup>33</sup> E' kuèki ye' kköchō be' a tö ye' tsúat be' kanè mésoie, alà tsirla skéie. Ie' ómi as imi' iēlpa ta. <sup>34</sup> Alà tsirla kè minene ye' ta, e' ta' ¿wès ye' mi'mine ye' yé ska'? Ye' kè ki ye' yé kiane sué weinuk siarè.”

## 45

#### *José e' chéka iēlpa a*

<sup>1</sup> José kè a iwōklōneia ikanè mésopa ulitane tso' kanèblök eē e'pa wörki. E' kuèki ie' tö iché ie'pa a aneule: “A' kōs yúshka bánet. Sa' múat sa' wakpa è.” Es mik José e' chéka iēlpa a, età ikanè mésopa kè ku' yés ie' ta.

<sup>2</sup> Età ie' iéka taiè, e' ttsé Egipto wakpa tö. Egipto blú a itté demi tö José tso' iuk. <sup>3</sup> José tö iché iēlpa a:

—Ye' dör José. ¿Se' yé tso'ia ttsé'ka?

Ie'pa tkirulune taiè suane José yōki, e' kuèki kè ie'pa a ie' iütèneia. <sup>4</sup> José tö iché ie'pa a:

—A' shkōwā tsinet ye' o'mik.

Mik ie'pa e' skéwā tsinet, età ie' tö iché ie'pa a:

—Ye' dör a' èl José watō'ttsā a' tö tsèmi Egipto e'. <sup>5</sup> Skèköl tö ye' patkè'bitu ié a' yōki kewe s'tsatkoie ketba ulà a. E' kuèki kè a' erianuk, kè a' tkinuk ye' watō'ttsā a' tö e' kuèki. <sup>6</sup> Ketba de e' ki duas de bōk. Età duas skēl kianeia. E' shua iyi kōs kuatkémisō erë kè itskirpa yés. <sup>7</sup> Erë Skèköl tö ye' patkè'bitu ká i' ki a' yōki kewe as a' aleripa kè erwa as Skèköl tö a' tsatkò ie' diché taiè e' wa. <sup>8</sup> Es Skèköl wák tö ye' patkè'bitu ié, e' kè dör a' ye' watō'ttsā e' kuèki. Skèköl tö ye' méka Egipto blú pattōkwakie. Ye' dör ie' u kuēblu ena Egipto wa'ñe wōkir. <sup>9</sup> A' yúne bet ye' yé ska' ta' ichó ia: ‘Be' alà José ttè i' patkébitu be' a: Skèköl tö ye' méka Egipto ká kōs, e' wōkirie. Be' shkó ye' sauk bet. Kè bō ipanuk taiè.

<sup>10</sup> Be' serdaë ká kiè Gosen ee be' yamipa kos ta, ñies be' iyiwak kos ena ì kos tso' be' wa ekkë ta. <sup>11</sup> Ketba duéswo kianeia skel. E' kuëki ye' tö chkewö meraë a' ulitane a as a' wa chkewö tso' wë'. <sup>12</sup> Ye' ël Benjamín ena a' ulitane tö ichëmi ye' yé a tö moki ye' wák tté a' ta. <sup>13</sup> Ipakó ye' yé a tö ye' dör Egipto wökir. Ñies ì kos sué a' tö íe, e' pakó ia. ¡Ye' yé tsúbitu bet íe!

<sup>14</sup> Eta José tö iël Benjamín paklö'wéwa ta iieka. Es Benjamín tö José paklö'wéwa ta iie ñies. <sup>15</sup> Eta José tö iëlpa kos wöalattsé, ñi paklö'wéwarak ta iierak. Eta erpa iëlpa er deka ttök ie' ta.

<sup>16</sup> Eta Egipto blú u a ttè demi tö José ëlpa debitu ie' ska', e' tö Egipto blú ena ikueblupa kos e'pa ttsé'wé buaë. <sup>17</sup> Eta Egipto blú iché José a:

—Ichó be' ëlpa a: 'A' chkewö payuó iyiwak ki ta a' yúne Canaán. <sup>18</sup> Eta a' yé ena a' yamipa kos e' tsúbitu ye' a. Ká tso' Egipto e' bua'ie mekeyö a' a. Ñies chkewö tso' Egipto e' bua'ie mekeyö a' a.' <sup>19</sup> Ñies ichó ie'pa a: 'karreta tsúmi taië a' alakölpa ena a' ala'r ena a' yé e'pa kos tsobitu. <sup>20</sup> Egipto íyi tso' bua'buá e' kakmeraëyö a' a. E' kuëki kè a' tkinuk ì tso' a' wa e' ki.'

<sup>21</sup> Eta Jacob ala'r tö iwé i' es. José tö karreta mé ie'pa a wes Egipto blú tö iché es. Ñies chkò méitö ie'pa a ñè ñala ki. <sup>22</sup> Ñies datsi' pa'ali mé iarak e' mane'woie. Erë Benjamín a datsi' kakkéitö sketökicha iënoie. Ñies inuköl wömule méitö ia doka cien mañalyök (300). <sup>23</sup> Íyi bua'buá tso' Egipto e' kak patkëmi iyé a payöule burro ki doka dabop. Ñies trigowö ena pan ena chkewö skà e' payuëitö burro dabop skà ki iyé a ñè ñala ki. <sup>24</sup> Mik José ëlpa mitke, eta José tö iché ie'pa a:

—Kè a' mía ñippök ñala ki.

<sup>25</sup> Ie'pa e' yéttsa Egipto a demi Canaán iyé ska'. <sup>26</sup> Eta ie'pa tö iché iyé a: "Be' alà José tso'ia ttsé'ka. Ie' tso' Egipto ká kos e' wökirie." Ttè e' tö Jacob wökrawéwa taië. Kè uteia. Ie' kè wa ttè e' klöone. <sup>27</sup> Erë mik ie'pa tö ì kos yé José tö ie'pa a e' paké iyé a, ñies mik Jacob tö karreta patké José tö ie'pa tsomi e' sué, eta ie' er dekane ttsé'ne buaë. <sup>28</sup> Eta ie' iché: "E' è kata ye' a, ye' alà José tso'ia ttsé'ka. Ye' mi'ke isaük kam ye' blërwa, e' dalewa."

## 46

### *Jacob mía Egipto*

<sup>1</sup> Eta Jacob e' yéttsa iu a. Ì kos tso' iwa e' mítser seraa. Mik idemirak ká kiè Beerseba ee, eta iyiwak ña'wéitö iyé Isaac, e' Këköl dalöioie. <sup>2</sup> E' nañewe Skëköl tté ie' ta kabsueie ta ikiéitö ikiè wa:

—A Jacob.

Jacob tö iiuté:

—¿ì?

<sup>3</sup> Eta Skëköl iché ia:

—Ye' dör be' Këköl. Ye' dör be' yé Këköl. Kè be' suanuk shkökmi Egipto. Ee ye' tö be' aleripa alöweraë taië. <sup>4</sup> Ye' mi'ke be' ta Egipto. Ñies ye' wák tö be' aleripa yerattsane ká e' a. Ñies mik be' duökewatke eta José tso' be' o'mik.

<sup>5</sup> E' ukuökí ta Jacob e' yéttsa Beerseba a. Eta ie' ala'r tö ie' iéka karreta patké Egipto blú tö ie'pa tsomi e' a. Ñies ie'pa ala'r ena ie'pa alakölpa e'pa iékarakitö karreta a. <sup>6</sup> Eta Jacob mía Egipto iyamipaë se. Ie' baka kos ena ie' obeja kos e' mítser ie' wa. Ñies ì kos dë' ie' ulà a Canaán e' mítser ie' wa seraa. <sup>7</sup> Ila'r kos ena isibayökpa kos e'pa mía da'a Egipto.

<sup>8</sup> Ikkëpa dör Israel aleripa mineyal Egipto. E'pa dör Jacob ena ila'r.

Rubén, e' dör Jacob alà kibi ék. <sup>9</sup> Eta Rubén ala'r kiè: Hanoc, Falú, Hesnón, ena Carmí.

<sup>10</sup> Simeón ala'r kiè: Jemuel, Jamín, Óhad, Jaquín, Sóhar, ena Saúl. Saúl mi dör canaánwak.

<sup>11</sup> Leví ala'r kiè: Guersón, Quehat ena Merarí.

<sup>12</sup> Judá ala'r kiè: Er, Onán, Selá, Fares ena Zérah. (Er ena Onán, e'pa blēnewa Canaán.) Fares ala'r kiè Hesrón ena Hamul.

<sup>13</sup> Isacar ala'r kiè: Tolá, Puvá, Job ena Simrón.

<sup>14</sup> Zabulón ala'r kiè: Séred, Elón ena Jahleel.

<sup>15</sup> E'pa qos dör Jacob ala'r kune Padán-aram Lía ta. Ie'pa kutà kiè Dina, e' kune ee ñies. Jacob aleripa qos wēpa ena alakōlpa e' dōka dabom mañayök ki mañal (33).

<sup>16</sup> Gad ala'r kiè: Sefón, Haguí, Esbón, Suní, Erí, Arodí, ena Arelí. <sup>17</sup> Aser ala'r kiè: Imná, Isvá, Isví ena Beriá. Ie'pa kutà kiè Sérah. Beriá ala'r kiè Heber ena Malquiel. <sup>18</sup> E'pa dör Jacob aleripa Zilpá ta, e' mé Labán tö ilà busi Lía, e' a ikanè mésoie. Ie'pa qos dōka dabom eyök ki teröl (16).

<sup>19</sup> Jacob alaköl kiè Raquel, e' ala'r kiè José ena Benjamín. <sup>20</sup> José ala'r dör ilaköl Asenat ta e'pa kiè Manasés ena Efraín. Ie'pa kune Egipto. Asenat dör wēm kiè Potifera, e' alà busi. Potifera dör egiptowak awá eköl. Ie' kaneblöke ká kiè On ee. <sup>21</sup> Benjamín ala'r kiè Bela, Béquer, Asbel, Guerá, Naamán, Ehi, Ros, Mupim, Hupim ena Ard. <sup>22</sup> E'pa dör Jacob aleripa Raquel ta. Ie'pa qos dōka dabom eyök ki tkël (14).

<sup>23</sup> Dan alà kiè Husim. <sup>24</sup> Neftalí ala'r kiè: Jahseel, Guní, Jezer, ena Silem. <sup>25</sup> E'pa dör Jacob aleripa ilaköl Bilhá ta, e' mé Labán tö ilà busi Raquel a ikanè mésoie. Ie'pa dōka kul (7).

<sup>26</sup> Jacob ta iyamipa ekka mine Egipto, e' wakpa dōka dabom teryök ki teröl (66). Ie' ala'r e' alakōlpa, kè shtane ishūa. <sup>27</sup> José ala'r kune Egipto e'pa dör böl. Jacob yamipa dē'mi Egipto dōka dabom kuryök (70) seraa.

<sup>28</sup> Eta Jacob tö ilà Judá patkēmi kewe José a ibiyöchök: “Be' shkó Gosen ye' ñaletsuç.” Eta mik ie'pa demi Gosen, <sup>29</sup> eta José tö ikanè mésopa ké ie' karreta yöktsa tsēmi iyé ñaletsoie. Mik idemi iyé ska' eta iyé paklö'wēwaitö eta ie' ié taië. <sup>30</sup> Eta Jacob tö iché José a:

—Ire' ye' blērwa mi buaë! Ye' be' suēne buaë, be' serkeia e' kueki.

<sup>31</sup> Eta José tö iché iyamipa qos a:

—Ye' mía Egipto blú a a' biyöchök tö 'ye' ëlpa ena ye' yé yamipa qos serke Canaán e'pa debitū e' tsukat ye' ska'. <sup>32</sup> Ie'pa dör iyiwak alöukwakpa. E' kueki ie'pa baka qos ena ie'pa obeja qos ena i qos tso' ie'pa wa e' debitū ie'pa wa.' <sup>33</sup> Mik Egipto blú tö a' chaké: 'çl dör a' kanè?', <sup>34</sup> e' ta ichó ia: 'Kekraë sa' kanè dör iyiwak alöuk wes sa' tsá bak es.' Egiptowak kè kane senuk obeja alöukwakpa ta ñita, e' kueki Egipto blú kawö mēmi a' a' senuk Gosen.

## 47

<sup>1</sup> Eta José mía ibiyó muk Egipto blú a ta ichéitö ia: “Ye' yé ena ye' ëlpa serke Canaán, e'pa debitū ie. I' ta ie'pa tso' Gosen. Ie'pa obeja ena baka ena i qos tso' iwa e' debiturak iwa seraa.” <sup>2</sup> José tö iëlpa shushté dōka skel ta imitser iwa Egipto blú ska' as ie' tö iwakpa saü. <sup>3</sup> Eta Egipto blú tö José ëlpa a ichaké:

—çl dör a' kanè?

Eta ie'pa tö iiuté:

—A kēkēpa, sa' dör obeja alöukwakpa wes sa' tsá bak es. <sup>4</sup> Ketba meneka taië sa' kaska'. Sa' iyiwak a kè chkè ta'ia, e' kueki sa' bitea senuk ká i' ki. Be' we'ikè sa' tö, kawö mú sa' a senuk Gosen.

<sup>5</sup> Eta Egipto blú tö iché José a:

—Be' yé ena be' ëlpa de senuk be' ta. <sup>6</sup> Ká tso' Egipto e' wé kiane be' ki e' mú ie'pa a senoie. Qos ká tso' Egipto e' bua'ie dör Gosen e' mú ie'pa a senoie. Be' yamipa shua wēpa tso' iyiwak kkö'nè buaë, e' ta esepa múka ye' iyiwak kkö'nuk.

<sup>7</sup> Ñies José wa iyé Jacob mí kkachè Egipto blú a. Jacob tö Egipto blú shke'wé er bua' wa. <sup>8</sup> Eta Egipto blú tö ie' a ichaké:

—çl qos tso' be' ki?

<sup>9</sup> Jacob iiuté:

—Ye' k<sub>i</sub> duas de cien eyök k<sub>i</sub> dabom mañayök (130) shkök w<sub>i</sub> a dià a. Kawö e' kè dör taië. E' tka ye' k<sub>i</sub> darërë. Erë kam ye' k<sub>i</sub> duas dò kos ye' yépa k<sub>i</sub> duas bak ekkë.

<sup>10</sup> E' ukuök<sub>i</sub> ta Jacob e' chéat Egipto blú a ta imía. <sup>11</sup> Eta José tö ká bua' bua' tso' Egipto, e' mé iyé ena iëlpa a senoié wes Egipto blú tö iché es. Ká e' atë Ramsés. <sup>12</sup> Nies ie' tö chkewö meke iyamipa a kos ila'rla tso' u a u a ekkë.

#### *José tö chkewö watué Egipto wakpa a*

<sup>13</sup> Ká ulitane kè íyi wöria, e' kuëki ketba k<sub>i</sub> tkërke poë. Ketba tö s'tteke taië Canaán ena Egipto. <sup>14</sup> Chkewö tué Egipto wakpa tö ena Canaánwakpa tö, e' ské kos blé José tö Egipto blú u a. <sup>15</sup> Mik Egipto wakpa ena Canaánwakpa inuköl enewa sera, eta Egipto wakpa mía José ska' ta iché ia:

—jBe' sa' a chkewö mú! Kè sa' inuköl ta'ia. Kè idör bua' tö e' è kuëki be' tö sa' méttsa duökwa ketba a.

<sup>16</sup> Eta ie' tö ie'pa iüté:

—A' kè wá inuköl ta'ia, e' ta a' iyiwak tsúbitu ña, e' skéie ye' tö a' a chkewö meke.

<sup>17</sup> Egipto wakpa wá kabaio ena obeja ena baka ena burro e' kos mí ie' a. E' skéie ie' tö chkewö mé ie'pa a dò duas ek. <sup>18</sup> Duas e' tka eta ie'pa míyalne ie' ska' ta iskà ché ia:

—Be' wá ijcher buaë tö kè sa' wá inuköl ta'ia. Nies sa' iyiwak kos, e' dör be' icha. Sa' ká è tso'ia sa' wá ena sa' wakpa, e' è tso'ia sa' wá mè be' a <sup>19</sup> Sa' wákpa taú. Sa' ká taú nies. E' skéie iyiwö mú sa' a. Sa' kanablömi sa' wákpa ká a Egipto blú a. Es sa' atë Egipto blú kanè mésopaie. Eta chkewö è memibö sa' a as kè sa' duölur ketba wá ena sa' ká kè weir é ichök.

<sup>20</sup> Egipto wakpa tö iká watuéttsa José a ketba kuëki. Es Egipto ká kos de Egipto blú ulà a. <sup>21</sup> Nies Egipto wakpa kos atë blu' kanè mésopaie. <sup>22</sup> Ie'pa sacerdotepa ká e' è kè töne José wá. Egipto blú tö chkewö kakmeke ie'pa a, e' kuëki ie'pa kè wá iká watonettsa.

<sup>23</sup> E' ukuök<sub>i</sub> ta José tö iché Egipto wakpa a:

—A' wákpa kos ena a' ká kos e' to'ttsa ye' tö se' blú a, e' kuëki i'ñe ta a' kos atë ie' ulà a. Iyiwö i' tsúmi a' tö ta ikuatkó. <sup>24</sup> Mik iwöne ta iyiwö tso' döká sacco skel, eta itsá yóttsa sacco et mè Egipto blú a. Iyiwö eyök atë e' dör a' a kuatkè, nies a' yamipa ulitane a ñanoie.

<sup>25</sup> Eta ie'pa tö iüté:

—Be' tö sa' tsatké ketba ulà a. Be' er bua' sa' ta. E' kuëki sa' e' chöke Egipto blú kanè mésopaie.

<sup>26</sup> Es José tö kawö mé Egipto wakpa a tö iyiwö tso' döká sacco skel e' tsá yóttsa sacco et mè Egipto blú a. I'ñe ta e' wekeia ie'pa tö es. Egipto sacerdotepa è kè kawöta iyiwö tsá muk Egipto blú a, ie'pa ká kè dë' Egipto blú ulà a e' kuëki.

#### *Jacob tö ittè bata ché José a*

<sup>27</sup> Es Israel aleripa e' tséat senuk Gosen, ká e' atë Egipto. Ká e' kos de ie'pa ulà a. Ee ie'pa alöne taië. <sup>28</sup> Jacob sene'ia ká e' a duas döká dabom eyök k<sub>i</sub> kul (17). Duas de ie' k<sub>i</sub> cien eyök k<sub>i</sub> dabom tkëyök k<sub>i</sub> kul (147).

<sup>29</sup> Mik ie' tö ittés tö iduökewatke, eta José tsuk patkëitö ta ichéitö ia:

—Mok<sub>i</sub> be' er buaë chak ye' a, e' ta be' ulà múwa ye' tu' dikia iwá kkachoié tö mok<sub>i</sub> ì kiekeyö be' a e' waweraëbö. Ye' nu kè wötarwa Egipto. <sup>30</sup> Mik ye' blénewa mía ye' dëütöpa itöki, eta ye' nu yóttsa ká i' k<sub>i</sub> tsúmi wötewa ie'pa pö a.

Eta José tö iüté:

—Es yö iweraë.

<sup>31</sup> Iyé tö iché ia:

—Ichó ña mok<sub>i</sub> Skököl wörki tö be' iweraë es.

Eta José tö ittè mé mok<sub>i</sub> iyé a. Eta Jacob wóméwa ika' k<sub>i</sub> ta Skököl kikékaitö.



## 48

*Jacob er buaë ché José ala'r a*

<sup>1</sup> E' ukuöki ta ie'pa wa biyö debitü José a: “Be' yé duöke tso' suluë.” Etä José mía isauk ila'r böl mí iwä e' ta. <sup>2</sup> Mik ie'pa tö iché Jacob a tö José debitü be' sauk, etä ie' e' tkéka isulú wa ika' ki. <sup>3</sup> Etä ie' tö iché José a:

—Skököl Diché Ta' Íyi Ulitane Tsata e' e' kkayë' ye' a ká kiè Luz atë Canaán eë. Eë ie' er buaë yë' ye' a <sup>4</sup> ta ichéitö ña: “Ye' tö be' aleripa alöweraë taië. Ie'pa döraë ká taië e' wakpaie. Ká i' meraëyö ie'pa a, e' atdaë ie'pa ulà a kekraë michoë.” <sup>5</sup> Be' ala'r böl, Efraín ena Manasés, e'pa kune kam ye' dò Egipto e' yöki. Ie'pa tsétköyö wes ye' wák ala'r es wes ye' ala'r Rubén ena Simeón dör ye' ala'r es. <sup>6</sup> E' kuëki ká meraëyö ie'pa a wes ye' wák ala'r a es. Ie'pa itöki be' ala'r skà kurmi, e'pa dör be' wák a. Erë ie'pa dör Efraín ena Manasés elpa, e' kuëki ká ñe' kak döraë ie'pa ulà a ñies. <sup>7</sup> Mik ye' manét Padán-aram e' demi Canaán dökettsatke Efrata, etä eë ñalä ki be' mì blënewa ye' yöki. Eë ye' tö ie' nu blë'waat Efrata ñalé ki. (I'ñe ta ká e' kiè Belén.)

<sup>8</sup> Mik Jacob tö José ala'r sué etä ichakéitö:

—¿Sepa dör yi?

<sup>9</sup> Ie' tö iüté:

—I'pa dör ye' ala'r mé Skököl tö ye' a ká i' ki.

Etä iyé tö iché ia:

—Ie'pa tsúbitü ye' ska' as ye' er bua' chò ie'pa a.

<sup>10</sup> Jacob kënewatke e' kuëki iwöbla kè wawëria buaë. E' kuëki José tö ila'r patkëmi tsinet iyé o'mik. Etä Jacob tö italapa paklö'wé wöalattsé. <sup>11</sup> E' ukuöki ichéitö José a:

—Ye' ibikeits tö ye' kè tö be' suepaia, erë Skököl tö kawö mé ye' a be' ena be' ala'r suoie.

<sup>12</sup> Etä José tö ila'r skétsa iyé o'mik ta iwöëwa dò iski iyé dalöioie. <sup>13</sup> E' ukuöki ta ila'r böl klö'wéwaitö iulà a. Efraín mí José ulà bua'kka, Manasés mí José ulà bakli'kka. Es itsémiitö iyé ska'. Etä Efraín atë Jacob ulà bakli'kka, Manasés atë Jacob ulà bua'kka. <sup>14</sup> Erë Jacob ulà bua'kka méka Efraín dur ie' ulà bakli'kka e' wökir ki. Eré e' dör alà tsirla. Etä iulà bakli'kka mékaitö Manasés dur ie' ulà bua'kka e' wökir ki. Eré e' dör alà kibi. Es Jacob ulà tsétkö wi'kè io'kè. <sup>15-16</sup> Etä ier bua' ché José a i' es:

“As Skököl er buaë chò ala'r böl i' a kekraë.

Ye' yépa bak Abraham ena Isaac, e'pa bak Skököl e' dalöiök,

e' tö ye' kkö'nami kuaë dò ikkè ta.

Ie' tö ye' tsatke kekraë íyi sulusi ulà a.

As ala'r i' wa kè ye' chöwa sulitane éna kekraë.

Ñies ye' yépa bak Abraham ena Isaac as e'pa kè chöwa sulitane éna kekraë.

As ala'r i' alör taië ká ulitane ki.”

<sup>17</sup> Jacob ulà bua'kka méka Efraín wökir ki, e' kè mène José a buaë. E' kuëki ie' tö iyé ulà bua'kka e' klö'wéwa méka ilà kibi dör Manasés e' wökir ki. <sup>18</sup> E' dalewa ichéitö ia:

—¿A yéwö, kè idör es! I' dör alà kibi. Be' ulà bua'kka múka i' wökir ki.

<sup>19</sup> Erë iyé kè wa ionë es. Ie' tö iché ia:

—¿A alà, e' jcher ye' wa, e' jcher ye' wa! Ie' alördaë taië, ie' döraë kékëpa taië. Erë itsirla ék e' döraë kékëpa taië shütë ikibi tsata. Ñies ie' aleripa döraë ká taië e' wakpaie.

<sup>20</sup> Es e' è diwö wa Jacob er buaë skà ché italapa a i' es:

—Mik Israel aleripa er buaë cheke ñi a etä ie'pa tö icheraë ñi a i' es: ‘As Skököl er buaë chò be' a wes Efraín ena Manasés e'pa a er buaë yëne es.’

Es Jacob er buaë ché Efraín a, Manasés a imène, e' tsata. <sup>21</sup> E' ukuöki ta José a ichéitö:

—Ye' duökewatke erë Skëköl tö a' kkö'neraë. Ie' wā se' aleripa mirane Canaán wé se' yépa bak senuk ee. <sup>22</sup> Ye' tö ká bua'ie méat be' a ime'bakyö be' ëlpa a e' tsata. Ká e' kiè Siquem. E' yé'ttsa ye' tö amorreowak ulà a ñippè wa.

## 49

*Jacob tö ittè bata ché ila'r kos a*

<sup>1</sup> Jacob tö ila'r kié e' ska' ta ichéitö ie'pa a: “A' e' skówa ye' o'mik. Ì tköraë a' ta e' wà chekeyö a' a:

<sup>2</sup> “A ala'rla, a' e' skówa tsinet ye' ttò ttsök, ye' dör a' yé. Ye' ttò ttsó.

<sup>3</sup> “A Rubén, be' dör ye' alà kibi. Be' dör ye' diché tsá e' alé. Be' dalöier̄ta' taië, be' diché ta' taië be' ëlpa tsata.

<sup>4</sup> Erë i'ñe ta kè idör es. Be' dör wes di' yöliie es kè iwöklör yës. Be' tö ye' dalöse'wa. Be' sene'ka ye' alaköl ta. E' kuëki be' kè dalöier̄paia wes ko'k es.

<sup>5</sup> “Simeón ena Leví, e'pa dör ñi ëlpa; ie'pa tabè tso' ñippoie è.

<sup>6</sup> ¡Wé ie'pa e' dapa'uke ee ye' kè shkak! Ie'pa tö wëpa kötulur kësik è kuëki. Baka wë'ñe klökicha blublu e' télorakitö éanas.

<sup>7</sup> Ie'pa kësik dör suluë ichökle e' kuëki ie'pa kawö tköraë suluë. ¡Ye' tö ie'pa aleripa powerami senuk iëlpa malepa aleripa shua wì a dià a!

<sup>8</sup> “A Judá, be' ëlpa tö be' kikeraka taië. Be' bolökpa klö'wëwaraë be' tö ikuli' a, es be' e' alöraka ie'pa ki. Be' ëlpa ekka e' wöörawa iski be' dalöioie.

<sup>9</sup> ¡A Judá, be' dör ye' alà! Be' dör wes ma'name alà es. Mik ì ttéitö ta ikaté one, eta ie' e' wöéwa e' téwa iski wes ma'name këchke es.

¡Yi dömi ie' tsiriuk?  
<sup>10</sup> Judá aleripa döraë blu'paie taië kekraë dò mik iblú chók de eta. Blu' e' ttò iüteraë sulitane tö.

<sup>11</sup> Ie' tö iburro pupula muëke uva shua.

Ñies idatsi' skuöke uva diò wa.  
<sup>12</sup> Ie' wöbla dör daloloë uva diò tsata. Ie' kà dör saruruë baka tsu'diö tsata.

<sup>13</sup> “Zabulón serdaë dayë kkömik. Eë taië kanò irirke ese ké tso'. E' ká kkò dörawa Sidón kkömik.

<sup>14</sup> “Isacar dör wes iyiwak tso' dalì oie diché ta' taië ese e' mùtër enuk iwé a es.

<sup>15</sup> Mik ie' isuë tö ká e' dör buaë sènoie ñies enoie, eta ie' tsiwö ki dalì dekañe kaneblök.

Ie' e' mèttsa kanēblök kanè mésoie, kè tkine e' k̄i.

16 “Dan ditséwö shuā s'shulirdaë buaë yēsēsē wēs Israel aleripa e' ditséwö malepa es.

17 Dan dōraë wēs tkabè chók tso' ñala kkò a tō kabaio kuè iklö a ta iwák brutane itsiwökka ese es.

18 “¡A Jehová, ye' tso' be' panuk tō ye' tsatkó!

19 “Gad ppök ñippökwakpa dōraë taië.

Erë ie' tō ie'pa ppēraë, itötieraë.

20 “Aser ká k̄i chkè kata' buaë tskirdaë.

Ì wörke kōs e' dör buaë shütē mēne buaë blu'pa a.

21 “Neftalí dör wēs sulī alaki dur áie ala'rla ta' bua'buāala ese es.

22 “José dör wēs burro kañiru suè dur di' tum kkömik es, wēs burro pupula kañiru suè dur ká tukir k̄i es.\*

23 Kuaböt namépa éna sulu iar, ie' k̄i kuaböt uyérakitö kēsik wa.

24 Erë ie' ulà diché darērē; e' wa ie' wā ishkame' shuirikar darērēē, kè ulà shtrirta'wā yēs.

Skéköl tō ie' a diché e' mé.

Skéköl e' dör Jacob Kéköl e' diché ta' taië.

Skéköl e' dör Israel aleripa kkö'nukwak.

Ie' tō Israel aleripa tsatkeke.

25 A José, be' yé e' Kéköl tō be' kimeke kekraë.

E' dör Skéköl Diché Ta' Íyi Ulitane Tsata,

Ie' er buaë chōraë be' a.

Kalī buaë patkeraë ie' tō be' daliwö k̄i.

Ñies be' a di' atdaë buaë íyök k̄i as be' dalikua talar buaë.

Be' aleripa alakōlpa ala'r dōraë taië, ñies be' iyiwak dōraë taië.

Es Skéköl er buaë chōraë be' a.

26 Be' yé er buaë yé' be' a,

e' tkòka ye' yé er buaë yé' ye' a e' tsata.

Skéköl tō José shukit iēlpa shuā iwökirie,

e' a ie' er buaë chò michoë wēs kabata yöbië kè erta'wa es.

27 “Benjamín dör wēs chichi kañiru kēsikie ese es;

bla'mi ta iyiwak ttéwaitö katè,

tsalī ta ibata watiéwaitö.”

28 E'pa dör Israel ditséwōpa daia itök̄i dōka dabom eyök k̄i böt (12), e' yépa tsá. Es ie'pa yé tō ie'pa a iché mik ie' tō ittè bata ché ie'pa a eta.

### *Jacob blēnewa*

29 Jacob tō iché ila'r wēpa a: “Ye' blērkwā e' kēwö dōkewatke. Mik ye' blēnewa, eta ye' nu blōwā ákuk a ká wé ye' yamipa nu blēne eē. Pö e' atē wēm kiè Efrón dör hititawak e' ká a. 30 Ká e' atē Macpelá Mamré wōshaë. Ká e' atē Canaán. Ká e' ena ákuk e' watō'ttsa Efrón tō Abraham a as Abraham tō iyamipa nu blō eē. 31 Eē Abraham ena ilaköl Sara, ñies

\* 49:22 José dör wēs burro...ká tukir k̄i es: Ñies hebreoie ttè e' mane'wēmiso i' es: José dör wēs kal tskirke di' kkömik es; tkakā iké kkōiēule e' mik buaë, ñies iwōrdaë taië.

Isaac ena ilaköl Rebeca, e'pa nu blëne. Ee ye' tö ye' alaköl Lía, e' nu blë'wä ñies. <sup>32</sup> Ká e' ena ákuk e' wato' hititawak tö.”

<sup>33</sup> Mik Jacob tö ttè e' kòs ché one etä ie' e' téwane ika' ki ta iblënewä mía idëütöpa itöki.

## 50

<sup>1</sup> Etä José tö iyé nu paklö'wéwä wöalattséitö ta iie' taië. <sup>2</sup> E' ukuöki ta ie' tö egiptowak dör s'nu kanéukwakpa e'pa kié iyé nu kapeyökwä as kè inurwä. Etä es ikanewérakitö. <sup>3</sup> Ikanewérakitö dökä ká dabom tkëyök (40 días), ekkë kawö kiane ikanewoie e' kueki.

Egiptowak tö ischó eriaitsé kawö dökä dabom kuryök (70 días). <sup>4</sup> E' ukuöki ta José ttè Egipto blú kueblupa ta, ta ichéitö ie'pa a:

—A' éna er bua' chak ye' a, e' ta a' yú ichök Egipto blú a <sup>5</sup> tö mik ye' yé duökewatke, etä ie' tö ye' ka' ie' a ttè muk Skëköl wörki tö inú blerawayö ákuk kaneo'at ie' wák tö atë Canaán e' a. E' kueki kawö mú ña ie' nu tsomi blëwä ee. Mik ye' ibléwä ta ye' dotkene.

<sup>6</sup> Etä Egipto blú tö iüté:

—Be' yú be' yé nu blökwä wes ie' tö be' a iki' es.

<sup>7</sup> Etä José mía iyé nu blökwä. Egiptowak kueblupa kòs e'pa míyal ie' ta. <sup>8</sup> Jacob yamipa ekka ena José yamipa ekka ena iëlpa e'pa kòs mí ñies. Ie'pa ala'r ena ie'pa iyiwak e'pa è atéat Gosen. <sup>9</sup> Ñies pë' mí taië karreta ki ena kabaio ki. Es pë' mí taië José ta. <sup>10</sup> Mik ie'pa demi ká kiè Goren-ha-atad atë tsinet di' Jordán diwö tskirke e' kker ee, etä ee ie'pa ulitane tö Jacob nu wöterkewä e' kèwö tkö'wé dalò taië wa. Ee José tö iyé eriaitsé dökä ká kul.

<sup>11</sup> Mik canaánwak serke ee, e'pa tö Jacob nu wöterkewä kèwö tkö'wé e' sué, etä ie'pa tö iché: “Moki egiptowak tö s'nu wöterkewä e' kèwö tkö'wéke dalò taië wa.” E' kueki ká e' kiè méka ie'pa tö Abel-Misraim.\* Ká e' atë tsinet di' kiè Jordán e' kkömik.

<sup>12</sup> Es Jacob ala'r tö iyé nu kanewé wes ie' tö iyé' ie'pa a es. <sup>13</sup> Ie'pa wä inú mítser Canaán ibléwarakitö ákuk yöule Abraham wä iyamipa pöie e' a. E' atë Macpelá. E' wato'ttsa hititawak kiè Efrón tö Abraham a. Ká e' atë Mamré wöshaë. <sup>14</sup> Mik José dëütö nu blëne one, etä ie' biteane Egipto. Ie' ëlpa ena pë' ulitane mène ie' ta e'pa kòs biteyalne ie' ta.

### *José ëlpa suanéqane ie' yöki*

<sup>15</sup> Jacob blënewä e' ukuöki ta José ëlpa tö ibikeitsé: “Isalema José éna sulu se' arke. Ì kòs wamblè' se' tö ie' ki e' skéie se' we'ikeraëitö.” <sup>16</sup> E' kueki ie'pa ttè mémi ie' a: “Kam be' yé blërwa, <sup>17</sup> etä ie' tö sa' a iché tö ichó be' a: ‘ì kòs suluë wamblè' sa' tö be' ki, e' olo'yó sa' ki.’ E' kueki sa' kköchò be' a tö e' olo'yó sa' ki. Sa' tö be' yé e' Këköl dalöieke e' kueki.”

Mik biyò e' demi José a, etä ie' ié siarë. <sup>18</sup> Etä iëlpa demi iwöki. Ie'pa wöéwa dò iski idalöioie ta ichéraitö:

—I' sa' de be' wörki. Sa' dör be' kanè mésopa.

<sup>19</sup> Etä ie' tö ie'pa iüté:

—Kè a' suanuk. Ye' kè a' a' shulinuk Skëköl skéie. <sup>20</sup> A' iyi sulu bikeits wamblè ye' ki, erë e' mane'wéttsane Skëköl tö buaë se' ki. E' wa taië pë' tsatkëne i'ñe ta. <sup>21</sup> E' kueki kè a' suanuk. Chkewö meraëyö a' a' ena a' ala'r kòs a.

Es ie' tö ie'pa a iché er buaë wa. E' tö ie'pa ttsë'wéne buaë.

### *José blënewä*

<sup>22</sup> José ena iyé alikpö yamipa e'pa sene'ia Egipto. Ie' sene' dökä duas cien eyök ki dabom eyök (110). <sup>23</sup> Ie' tö ilà Efraín talapa e' ala'r suéia. Ñies ie' tö ilà Manasés e' alà kiè Maquir e' ala'r suéia.

<sup>24</sup> Ká et ta ie' tö iché iëlpa a: “Ye' duökewä e' kèwö kianeia tsir. Erë Skëköl wák tö a' kimeraë. Ie' tö a' yelurdaë ká i' ki. Ká yë'bakitö mè Abraham a ena Isaac a ena Jacob a

\* 50:11 Abel-mizraim: Hebreoie ká kiè e' wä kiane chë egiptowak schó eriaitsè.

e' a a' tsemiraëitö.” <sup>25</sup> Etā ie' tö iēlpa kié as ie'pa ttè mù ie' a Skëköl wörki. Ie' tö ie'pa a iché: “Skëköl tö a' yerattsa ká i' kī. Mik e' tka, etā ye' sik tso' blëule e' tsúmi e' ta.”

<sup>26</sup> Mik ie' blënewā Egipto, etā ie' kī duas de cien eyök kī dabom eyök (110). Ie' nu kapeyanewā as kè inurwā e' iënewā s'nu kélkuö a.

## Israel aleripa yërulune Egipto

### Éxodo 1.1–20.21

Yëkkuö i' kiè si'kuaie *Éxodo*, e' wà kiane chè *yërulune*. Kam sa' tö yëkkuö i' mane'ù seraä se'ie, ishāböts maneö' sa' tö dò capítulo 20.21. Ì maneö' sa' tö e' blatëule mañat tsiní. Et tsiní e' dör capítulo et dò capítulo dabom eyök kí skel (1-15). Iët tsiní e' dör capítulo dabom eyök kí teröl dò capítulo dabom eyök kí pāköl (16-18). Ibata ék tsiní e' dör capítulo dabom eyök kí sulitu dò capítulo dabom böyök (19-20).

Et tsiní e' tö se' a ipakè tö ì bak Israel aleripa ta ie'pa mía Egipto e' tsatkök ketba yöki e' ukuöki. Kewe ie'pa kawö tka buaë Egipto. Ie'pa ena ie'pa iyiwak alöne taië. Kä tka taië ta egiptowak suanémi dö' Israel aleripa e' alòka ie'pa ki. E' kueki ie'pa tö Israel aleripa sué suluë ta iwe'ikérakitö siarë. Ie'pa kékakitö kaneblök darërë kè patueta'. Erë Skéköl tö ie'pa weirke e' sué ta wëm kékakitö eköl ie'pa yöktsa egiptowak ulà a. Wëm e' kiè Moisés, e' è tö yëkkuö i' kit. Skéköl e' kkayë' ie' a ta iwák kiè yë'itö ia. E' ukuöki ta ipatkéitö Israel aleripa yöktsa Egipto. Moisés tö iché Egipto blú a tö Israel aleripa ómine. Erë Egipto blú kè éna Skéköl ttò iütak. E' kueki Skéköl tö egiptowak we'iké siarë tsakië ie' diché taië wa. E' wa ie' tö ikkaché ie'pa a ena Israel aleripa a tö yi dör ie'. Skéköl tö Israel aleripa tsatkée yéttsa Egipto ie' diché taië wa, e' wa ie'pa de ie' ichaie ena ie' de ie'pa Kékölíe. Ie'pa yënettsa Egipto e' kèwö tkö'uk ie' tö ie'pa patké duas bit ekkë.

Iët tsiní e' tö se' a ipakè tö wës Skéköl tö ie'pa wëttse' ena ie'pa kime'itö shköktkö ká sir poë wé kè yi serku' ee. Eré ie'pa tö ie' tsiriwé taië kabene wa, erë ie' tö ie'pa tié ena ie'pa tsatkéitö ibolökpa yöki er bua' wa.

Ibata ék tsiní e' tö se' a ipakè tö Skéköl ena Israel aleripa ttè me' ñi a. Mik ie'pa de Siná kébata a, eta ie' tö ittè dalöiëno mé ie'pa a döka dabop. Ie' tö iché ie'pa a tö ie'pa tö ie' ttè dalöiëno e' kos iuté buaë, e' ta ie'pa döraë ie' wák icha chókíe ena ie'pa a ie' er buaë chöraë ká malepa wakpa tsata.

#### *Israel aleripa tso' Egipto e'pa weine taië*

<sup>1-4</sup> Israel kiè ñies Jacob e' ala'r dë'mi Egipto ie' ta, e'pa kos yamipa ta'. Ie'pa kiè Rubén, Simeón, Leví, Judá, Isacar, Zabulón, Benjamín, Dan, Neftalí, Gad ena Aser. <sup>5</sup> Jacob yamipa mène ie' ta Egipto e'pa döka dabom kuryök (70) seraä. Erë José, e' tso'tke Egipto kewe iyamipa yöki.

<sup>6</sup> Kawö tka taië, eta José ena iëlpa blërulune. Ñies iyamipa dë'mi Egipto ie'pa ta, e'pa kos blërulune se. <sup>7</sup> Erë Israel aleripa alöne taië, e' kueki ie'pa de diché ta' taië. Ie'pa tso' Egipto wa'ñe.

<sup>8</sup> E' ukuöki ta blu' ské tkëneká eköl e' kè wá José pakè jcher. Ie' tö iché egiptowak a: <sup>9</sup> “Ye' ttò ttsó. Israel aleripa dör taië. Ie'pa diché tkòka se' diché tsata, dö' ie'pa e' alòka se' ki. <sup>10</sup> Mik se' bolökpa ñippòmi se' ta, e' ta dö' ie'pa ñi wöiöká se' ppök se' bolökpa ta, ta es imi'miyal se' yöki. E' kueki se' tö ibikeitsó bua'iewa tö wës se' tö ie'pa wöklö'wëmi as kè ikí alör taië.”

<sup>11</sup> E' kueki egiptowak tö iwökirpa patké Israel aleripa we'ikök kanè darërë wa as ieriardak. Ie'pa tö ikérak ká yuök böt chkewö dapa'woie Egipto blú a. Kä e' kiè Pitón ena Ramsés. <sup>12</sup> Israel aleripa we'ikeke ie'pa tö siarë, erë ikí alörkerak taië. E' kueki egiptowak suarke taië ie'pa yöki.

<sup>13</sup> Egiptowak tö ie'pa ké kaneblök kësik wa. <sup>14</sup> E' tö ie'pa eriawé taië. Ikérakitö skauchka yuök shtrót shtrót u yuoie. Ñies ikérakitö kaneblök kañika kanè ulitane uk. Es Israel



aleripa kōs we'ikérakitō siarë. <sup>15</sup> E' kīie tã Egipto blú tté alakōlpa kiè Sifrá ena Puvá e'pa tã. Ie'pa dör hebreowak\* alakōlpa alà kurke e' kanéukwakpa. Ie' tō iché ie'pa a:

<sup>16</sup> —Mik a' tō hebreowak alakōlpa alà kurke, e' kaneweke, etã isaú ¿i iwák dör? Iwák wëm e' tã ittōwã. Iwák dör alakōl, e' tã imúat, kè ittarwã.

<sup>17</sup> Erë alakōlpa e'pa tō Skëkōl dalöieta'. E' kuëki ie'pa kè wã Egipto blú ttò iütëne wes itō iché es. Ie'pa ala'r wëpa méat ttsë'ka. <sup>18</sup> Etã Egipto blú tō ie'pa kiére tã ichéitō iarak:

—¿Iók a' tō iwamblé es? ¿Iók a' tō ala'rla wëpa e' méat ttsë'ka?

<sup>19</sup> Ie'pa tō iiüté:

—Hebreowak alakōlpa kè alà kur wes egiptowak alakōlpa es. Ie'pa alakōlpa dör darërë. Ie'pa alà kur bet buaë. Mik sa' demi, etã ie'pa alà kunetke.

<sup>20-21</sup> Es Israel aleripa kí alönëmi taië. Ie'pa diché kí iërke taië. Sifrá ena Puvá e'pa tō Skëkōl dalöieta'. E' kuëki Skëkōl tō ie'pa kímé, ala'r méitō ie'pa a taië.

<sup>22</sup> Etã Egipto blú tō ikueblupa ulitane a kawō mé tō hebreowak ala'rla wëpa kune kōs e' ómi di' ki. Alakōlpala è múat.

## 2

### Moisés kune'

<sup>1</sup> E' kèwō ska' tã wëm ekōl dör Leví aleri, e' senéwã alakōl dör Leví aleri ñies ese tã.

<sup>2</sup> Etã ie' alà skà kékã e' dör wëm. Etã imì tō isué tō alala buaala, e' kuëki ibléwaitō dò si' mañat. <sup>3</sup> Mik imì kè a ilà blëneia, etã ie' kkó yulé et, patié buaë kiöchka tso' chkuã'chkuã ese wa as kè a di' tkòwã. E' ukuöki tã alala iéwaitō kkó a, méreitō di' kiè Nilo e' kkömik kãkō tso' e' shua. <sup>4</sup> Etã alala kutã e' duëser kamië ikí sauk tō wes idömi.

<sup>5</sup> E' ukuöki tã Egipto blú e' alà busi míã kuök di' a. E' dalewa tayëpa tso' ie' wã ikanè mésopaie e'pa shkò iëter ákitō ki. Etã ie' tō kkó sué kãkō shua. Ikanè mésopa ekōl patkëmiitō itsukbitu. <sup>6</sup> Etã ie' tō ikkókékã tã isué tō alala wëm a'ria ekōl e' iuke. Ie' isué er siarë wa tã ichéitō:

—Bëbëla i' dör hebreowak.

<sup>7</sup> E' wöshã bëbëla kutã de tã ichéitō ia:

—¿Be' ki ikiane tō ye' mi' tayë hebreowak yulök ekōl be' a alala sã kkö'noie as itala'ütitō itsu' wa?

<sup>8</sup> Etã Egipto blú alà busi tō iiüté:

—Be' yú iyulök.

Etã bëbëla kutã míã imì yulök tã idebitu iwã. <sup>9</sup> Etã Egipto blú alà busi tō iché alà mì a:

—Alà i' tsúmi kkö'nú ñã tala'ú ñã buaë. Ye' tō be' patueke iki. Etã imì wã ilà mítser tala'wë. <sup>10</sup> Mik alà de bërie, etã imì wã ibitëtserne Egipto blú alà busi a. Etã ie' tō iklö'wé wes ie' alà ekka es. Ikiè mékãitō Moisés.\* Ie' tō iché:

—Ye' tō iyë'ttsã di' a.

E' kuëki ie' tō ikiè mékã es.

### Moisés tso' Egipto e' tkashkar

<sup>11</sup> Moisés kibineone. Kã et tã ie' míã iyamipa hebreowak, e'pa pakök. Etã ie' tō isué tō iyamipa weirke siarë kaneblök darërë. Etã ie' isué tō egiptowak ekōl tso' iyami hebreowak ekōl e' ppök siarë. <sup>12</sup> Etã ie' kã sué kã wa'ñe. Kè ie' wã yi sune. E' dalewa ie' tō egiptowak e' ttéwã inú wötéwã ie' tō ttsã'wö a. <sup>13</sup> Bule es tã ie' skã e' yéttã, etã ie' isué tō hebreowak bōl tso' ñippök ñita. Ie' tō iëkōl tso' ekōl ppök, e' a iché:

—¿Iók be' tso' be' yami ppök?

<sup>14</sup> Etã hebreowak e' tō iiüté:

—¿Yi tō be' tkékã sa' wökirie sa' shulökwakie? ¿Be' tso' ye' bikeitsök ttéwã wes egiptowak kötwa bö es?

\* 1:15 hebreowak: E' kiè ñies Israel aleripa. \* 2:10 Moisés: Hebreoie s'kiè e' wã kiane chë iyëulettsã.

Mik ttè e' ttsé Moisés tö, etä e' tö ie' suawé. Ie' ibikeitsé: “Ie'pa wä ijchenewä tö ye' tö egiptowak kötwa.” <sup>15</sup> Mik e' jchenewä Egipto blú wä, etä ie' tö Moisés ttökwa patké. Erë Moisés tkashkar ie' yöki, mía senuk ká kiè Madián ee. Eë ie' e' tkére di' tum biule kkömik.

<sup>16</sup> Ká e' a sacerdote† serke eköl kiè Reuel. E' alà busipa dökä kul. E' diwö wa alà busipa e'pa dë'bitu di' chkök kulë' a mè iyé iyiwak a yè. <sup>17</sup> Etä iyiwak kkö'nukwakpa skà wëpa debitu busipa trë'wémi. Etä Moisés e' kéka e' tö busipa tsatkée. Etä ie' tö di' mé iyiwak a. <sup>18</sup> Mik ie'pa demine iyé ska', etä iyé tö ie'pa a ichaké:

—¿I wa i'ñe a' dene bet?

<sup>19</sup> Ie'pa tö iiuté:

—Egiptowak eköl tö sa' tsatkée iyiwak kkö'nukwakpa ulà a. Ie' di' yéttsa mé iyiwak a.

<sup>20</sup> Iyé tö iché ia:

—¿Wé wëm e'? ¿Iók a' iméat ekörla? A' yú itsukbitu as ichkö se' ta.

<sup>21</sup> Es Moisés e' tséat senuk wëm e' ska'. E' ukuöki tã Reuel tö ilà busi kiè Séfora, e' mé Moisés a senowäie itã. <sup>22</sup> Etä Moisés alà kéka eköl kiè mékaitö Guersón‡ wä chéitö: Ká i' ki ye' dör o'ka.

<sup>23</sup> Dwas tka taië, etä Egipto blú blënewä. Erë Israel aleripa kköchökeia taië kekraë kanë darërëe kueki. Ie'pa kköchöke taië e' ttsé Skököl tö. <sup>24</sup> Ttè me'bak ie' tö Abraham a ena Isaac a ena Jacob a e' wä tsá detke kanewë. E' kueki ie' tö ibikeitsé tö Israel aleripa kimeraëyo i' ta. <sup>25</sup> Ie' tö ie'pa sué ta ie' éna iane tö ì tköke ie'pa ta.

### 3

#### *Skököl tö Moisés patké Israel aleripa tsatkök*

<sup>1</sup> Ká et ta Moisés tso' inuaki Jetró,\* e' iyiwak kkö'nuk. Inuaki kaneblöke sacerdoteie Madián. E' dalewa ie' wä inuaki iyiwak mítser ká sir po, e' jaishet, demi Skököl kébata kiè Horeb† ee. <sup>2</sup> Etä ee Jehovah biyöchökwak bua'ie e' e' kkachéwa ie' a bö' wörkueie taië kal tsir elka shua. Moisés tö isuéwa bua'ie ta isué tö kal wöbatsekä taië bö'ie, erë kè ñarwa. <sup>3</sup> Etä Moisés tö ibikeitsé: “¿Wì dör i? Ye' mí isaük ì kueki kal wì kè ñarwa.”

<sup>4</sup> Mik Jehovah tö isué tö Moisés dökewatke tsinet bö' ñarke e' o'mik isaük, etä Skököl tö ichaké:

—¡A Moisés! ¡A Moisés!

Moisés tö iiuté:

—¿I?

<sup>5</sup> Etä Skököl tö iché ia:

—Kè be' dökwa tsinet. Wé be' dur e' ké dör batse'r, e' kueki be' klökkuö yóttsa. <sup>6</sup> Ye' dör be' yé e' Kököl ena be' yépa bak ká iaiaë kiè Abraham, Isaac ena Jacob e'pa Kököl.

Moisés suane Skököl saukwa, e' kueki ie' e' wöpabakéwa. <sup>7</sup> Erë Jehovah tö iché ia:

—Ye' isué tö wépa dör ye' icha tso' Egipto e'pa weirke siarë. Ie'pa kköchöke taië ikanë wökirpa ulà a e' ttséyo. Ye' wä ijcher buaë tö iweirkerak siarë. <sup>8</sup> E' kueki ye' dë'ttsä ie'pa tsatkök egiptowak ulà a. Ye' tö ie'pa yerattsa ká e' ki. Ye' wä ie'pa miraë ká taië buaë ese ki. Ká e' ki íyi ulitane tskir buaë, iwà wör buaë shute.‡ Ká e' ki pé' tso' taië. E'pa ditséwöpa dör canaánwak, hititawak, amorreowak, fereseowak, heveowak, ena jebuseowak. <sup>9</sup> Ittsó, ye' tö Israel aleripa kköchöke e' ttsé. Ye' tö isué tö egiptowak tö ie'pa we'ikeke siarë. <sup>10</sup> E' kueki ye' tso' be' patkök Egipto blú ska' Israel aleripa dör ye' icha e'pa yökulur Egipto a. Be' yú Egipto.

<sup>11</sup> Erë Moisés tö iché ie' a:

—¿Yi ye' dör e' döwami Egipto blú wörki Israel aleripa yökulur ie' ulà a?

† 2:16 sacerdote: Kè se' wä ijcher yësyësë tö sacerdote wése e' dör, erë kè idör wës i'ñe itso' es. ‡ 2:22 Guersón:

Hebreoie s'kiè e' wä kiane chë ká bánet wakpa. \* 3:1 Jetró: E' dör Moisés nuaki. Ie' kiè ñies Reuel ena Hobab.

† 3:1 Horeb: E' kiè ñies Sinaí. ‡ 3:8 Ká e' ki íyi ulitane tskir buaë, iwà wör buaë shute: Ttè e' dör Hebreoie i' es: Wé baka tsu'diö ena bul alí shköke di'ie.

<sup>12</sup> Ie' tö iüté:

—Be' kè mi'pa ekörla. Ye' tso' be' ta be' kimuk. Mik be' tö Israel aleripa yélur Egipto a, etä a' tö ye' dalöieraë kabata i' ki. E' wa be' wa ijcherdaë tö ye' wák tö be' patkë'.

<sup>13</sup> Erë Moisés tö ie' iüté:

—Dö' ye' mia ta ye' tö ichè ie'pa a: “A' yépa bak iaiaë e' Këköl tö ye' patkë' a' tsatkök.” Dö' ie'pa tö ye' a ichakè: “¿Ima e' kiè?”, e' ta ¿i chëmi ye' tö ie'pa a?

<sup>14</sup> Etä ie' tö iüté:

—Ye' dör yi tso'tke e'. Ichö ie'pa a tö Ye' Tso'tke e' tö ye' patké a' ska'.

<sup>15</sup> Skëköl tö ikí ché Moisés a:

—Ñies ttè i' chó Israel aleripa a: ‘Se' yépa bak ká iaiaë kiè Abraham, Isaac ena Jacob, e'pa Këköl kiè Jehová<sup>§</sup> e' tö ye' patké a' tsatkök.’ Ttè e' chó ie'pa a. Ye' kiè dör Jehová i' dör ye' wák kiè këkraë. Kiè i' wa ye' kirdaë aishkuö ta këkraë. <sup>16</sup> Be' yú Israel aleripa kuëblupa dapa'uk ta ttè i' ichö ie'pa a: ‘Jehová, dör se' yépa bak ká iaiaë kiè Abraham, Isaac ena Jacob e'pa Këköl e' e' kkayë' ye' a ta ye' a iyë'itö tö ie' tö a' weirke siarë egiptowak ulà a e' sué. <sup>17</sup> Ñies ye' a iyë'itö tö a' tsatkeraëitö egiptowak tso' a' we'ikök e'pa ulà a. Ie' wa a' miraë ká buaë ese ki. Ká e' ki iyi ulitane tskir buaë, iwà wör buaë shüte. Ká e' wakpa ditséwöpa dör canaánwak, hititawak, amorreowak, fereseowak, heveowak, ena jebuseowak.’ Ttè e' chó ie'pa a. <sup>18</sup> Israel aleripa kuëblupa tö be' ttò ttseraë ta be' yú ie'pa ta Egipto blú ska' ta ttè i' chó ie' a: ‘Jehová dör hebreowak Këköl, e' dë'bitu sa' wöki. E' kuëki sa' ómi ká mañat shkar ekkë wé kè yi ku' ese ska' iyiwak ña'uk Jehová dör sa' Këköl e' dalöioie.’ Ttè e' chó ie' a. <sup>19</sup> Erë ye' wa ijcher buaë tö ie' kè tö ie'pa a kawö e' mepa éanas. Ye' kawöta ie'pa yöktsa ye' diché taië e' wa. <sup>20</sup> E' kuëki ye' diché taië e' kkacheraëyö egiptowak a. Ì weraëyö ie'pa shua e' tö ie'pa tkiweraë. E' wa ie'pa we'ikeraëyö siarë. E' ukuöki ta Egipto blú tö Israel aleripa erami as imi'yal. <sup>21</sup> Ñies ye' tö egiptowak keraë ie'pa dalöiök taië. E' kuëki mik a' e' yökettsa Egipto a, etä a' kè minuk ulà wöchka. <sup>22</sup> Israel aleripa e' alakölpa kos e'pa tö iyi yöule inukölchka wa ö orochka wa ö datsi' ese kak kieraë egiptowak alakölpa serke bánet ö iserkerak Israel aleripa u a esepa a, e' kos ieraë a' ala'r tö. Es a' tö iyi bua'buä tso' taië Egipto e' yerattsä ie'pa ulà a.

#### 4

<sup>1</sup> Erë Moisés tö iüté:

—Ie'pa kè tö ye' ttò klö'wëpa. Kè itö ye' ttò iütëpa. Ie'pa tö ye' a icheraë: “Jehová kè dë'bitu be' ska'.”

<sup>2</sup> Etä Skëköl Jehová tö ie' a ichaké:

—¿I' a'tser be' wa ulà a?

Moisés tö iüté:

—Ye' shko kéli.

<sup>3</sup> Jehová tö iché ia:

—¿Iuyómi iski!

Etä Moisés tö iuyémi iski. E' wösha ta ishko kéli yönane tkabèie. Moisés e' skéu iyöki bet <sup>4</sup> erë Jehová tö iché ia:

—¿Iklö'úwa ikirë bata a ulà wa!

Etä Moisés tö iklö'wéwa etä imiáne shko kéliie.

<sup>5</sup> Etä Jehová tö iché ia:

—Mik be' dene Egipto, etä be' tö iú es as ie'pa tö iklö'ù mokí tö ye' dör a' yépa bak ká iaiaë kiè Abraham, Isaac ena Jacob e'pa Këköl e' e' kkaché be' a. <sup>6</sup> I' ta be' ulà tiúwa be' batsi' a.

Etä Moisés ulà tiéwa ibatsi' a. Mik ie' ulà yéttsa, etä ie' isué tö iwölineka saruruë duè kiè lepra e' wa. <sup>7</sup> Etä Skëköl tö iché ia:

—Be' ulà skà tiúwane be' batsi' a.

§ 3:15 Jehová: Hebreoie kiè e' wì dör ye' tso'tke.

Etā Moisés tö iwé es. Mik ie' ulà yéttsane, etā ie' ulà buanene buaë. <sup>8</sup> E' ukuöki ta Skéköl tö iché ia:

—Ì kkachéyö be' a kewe e' kè klönerak iwā, ñies ie'pa kè wā be' ttò iütēne, e' ta iët skà ú. Isalema e' klö'wēmi ie'pa tö. <sup>9</sup> Erë e' kos wa ie'pa kè wā be' ttò klöne be' ttò iütēne e' ta di' chkóka di' kibi a e' tóttsa ká sí ki. Mik e' tēnettsa ká sí ki etā di' miāraë péie.

<sup>10</sup> Moisés tö iüté:

—¡Ayëwë! ¡A ye' Kéköl! Ye' siarala, kè tto buaë. E' kè dör i'ñe ème be' ttöke ye' ta etā. Es ye' wák dër ká iaiaë. Ye' ttò enaë. Ye' kè a s'iütēr buaë.

<sup>11</sup> Erë Jehová tö iüté:

—¿Yi tö a' a kkò méat? Ye' wák tö a' méat kè tto ö kè kukuò wattsēr. Ñies a' wöbla kè wawër ö a' wöbla wawër e' kos méat ye' wák tö a' a. <sup>12</sup> E' kuëki be' yú. Mik be' ttöke, etā ye' tso' be' ta. Ì kiane ye' ki tö be' tö ichè, e' kkacheraë ye' tö be' a.

<sup>13</sup> Erë Moisés tö iché ia:

—¡A kékëpa! Ye' kköchö be' a tö o'ka patkómi ye' skéie.

<sup>14</sup> Etā Jehová uluneka ie' ki ta ichéitö ia:

—E'ma be' èl Aarón dör Leví aleri ¿ima e' bikeitsè be' tö? Ye' wā ijcher tö ie' ttò buaë. Ie' tso'tke ñalā ki datse be' ska'. Mik ie' tö be' sué, etā e' tö ie' ttsè'wēmi buaë. <sup>15</sup> Ì kos chak be' éna e' kos chó Aarón a as ie' tö ichòne. Ye' wák tö a' böl kimeräe as a' ttò buaë. Ì kiane ye' ki tö a' tö iwè e' kkacheraë ye' tö a' a. <sup>16</sup> Aarón ttöraë be' skéie. Ie' döraë be' ttekölle wes be' dör ye' tteköl es. Ì cheke ye' tö be' a e' cherane be' tö ie' a ta e' cherane ie' tö a' yamipa a. <sup>17</sup> Shko kéli se tsúmi. E' wa ì kè or yi a ese weraëbö. Ie'pa wökrardawa iweblök.

### *Moisés míane Egipto*

<sup>18</sup> E' ukuöki ta Moisés míane inuaki, Jetró ska' ta ichéitö ia:

—Kawö mú ña. Ye' kawöta shkökmine Egipto ye' yamipa sauk tö itso'iarak ttsè'ka.

Etā Jetró tö iüté:

—Èkëkë. Be' shkó wöbla wa.

<sup>19</sup> Moisés tso'ia Madián, etā Jehová tö iché ia:

—Yi ki be' kiarke ttèwā Egipto, e'pa blërulune. Kè ì dalò ta'ia be' ki ee. E' kuëki be' yúne Egipto.

<sup>20</sup> Etā Moisés tö ilaköl ena ila'r tkéka burro ki ta imíyal Egipto. Ie' wā Skéköl shko kéli dami ulà a.

<sup>21</sup> Jehová tö ie' a iché:

—Mik be' demi Egipto, etā ye' tö diché me'bak be' a ì kè or yi a ese woie, e' wakaneú kröröe Egipto blú wörki. Erë ye' tö ie' a er suluë meraë as kè ie' tö Israel aleripa òmine.

<sup>22</sup> Etā ttè i' chó ie' a: 'Jehová tö iché be' a: Israel aleripa dör wes ye' alà wēm tsá es. <sup>23</sup> Ye' tö be' a ichétke tö ie'pa òmine as imi'yalne ye' kikókka. Erë be' kè wā ie'pa a kawö mène as imi'yal. E' kuëki be' alà wēm tsá e' tterawayö.' Ttè e' chó ie' a.

<sup>24</sup> Moisés ena iyamipa minia ñalā ki etā wé ie'pa kapökerö ñalā ki, ee Jehová debitu Moisés ska' ittökwa. <sup>25</sup> Erë Moisés alaköl Séfora e' tö ák di'dië klö'wéwā e' wa ilà tottola kkuölit téé tsir. E' kkuölit takla pé wa ie' tö Moisés klò patié ta ichéitö Moisés a: "Moki be' tso'ia ye' wémie pé i' wa."

<sup>26</sup> Etā Jehová tö Moisés émi. (Séfora tö ilà tottola kkuölit téé tsir e' kuëki ie' tö iché Moisés a tö "be' tso'ia ye' wémie pé i' wa.")

<sup>27</sup> Etā Jehová tö Aarón a iché: "Be' yú Moisés ñalé yulök wé kè yi serku' ee." Aarón mia Moisés ñalé yulök ta ie' ikué Skéköl kébata a. Ee ishke'wéitö wöalattsè wa. <sup>28</sup> Etā ì kos chök Jehová tö Moisés patké', e' pakéne Moisés tö Aarón a. Ñies ì kè or yi a ese kkayë' Jehová tö Moisés a wawè e' kos pakéneitö Aarón a.

<sup>29</sup> E' ukuöki ta ie'pa böi míyal Israel aleripa kueblupa dapa'ukka kapakök ie'pa ta. <sup>30</sup> Ì kos yè' Jehová tö Moisés a e' pakéne Aarón tö Israel aleripa kueblupa a. Ñies ì kè or yi a ese kKayè' Jehová tö Moisés a e' kos wé Moisés tö Israel aleripa ulitane wörki.

<sup>31</sup> Israel aleripa tö Aarón ttè klö'wé. Mik ie'pa éna iane tö Jehová éna ie'pa dalërke, ñies tö ie'pa weirke siarè e' suéitö, etä ie'pa e' wöéwa iski ie' dalöiök.

## 5

*Moisés ena Aarón tté Egipto blú ta*

<sup>1</sup> E' ukuöki ta Moisés ena Aarón míyal Egipto blú ska' ta ichéitö ia:

—Jehová dör Israel aleripa e' Këköi, e' tö iché be' a tö e'pa dör ie' icha. Ie'pa ómi as imi'yal wé kè yi serku' ee kawö tkö'uk ie' dalöioie.

<sup>2</sup> Eré Egipto blú tö iüté:

—¿Yi dör Jehová? Ye' kè wa ie' suule. Ye' kè kawöta ie' ttö iütök. Ye' kè kawöta Israel aleripa ökmi. E' kuëki kè ye' tö Israel aleripa epami.

<sup>3</sup> Etä ie'pa tö iché:

—Hebreowak Këköi e' dè'bitu sa' wöki. E' kuëki sa' ómi ká mañat shkar ekké wé kè yi ku' ese ska' iyiwak ña'uk sa' Këköi Jehová e' a idalöioie dö' ie' tö sa' wömëttsa duökwa duè a ö tabè a.

<sup>4</sup> Eré Egipto blú tö iüté:

—A Moisés. A Aarón. ¿Iók a' ki ie'pa kiane wöklö'wé ikanè a? ¿A' ena a' yamipa yúshka kaneblök!

<sup>5</sup> Ñies Egipto blú tö iché ie'pa a:

—I'ñe ta Israel aleripa tso' taië ká i' ki, etä ¿wes a' ki ikiane tö ie'pa kè kaneblöia?

<sup>6</sup> E' diwö wa Egipto blú tö iché ikanè wökirpa a:

<sup>7</sup> —Tala'chka kösi e' kè tsarbituia Israel aleripa a skauchka shtrót shtrót yuoie wes se' tö ikanewèrö es. As ie'pa wákpa mi' itsuk. <sup>8</sup> Eré ikórak iyuök kos kekraë iyuekerakitö ekké, kè wöarwa yës. Ie'pa bikënak è taië, e' kuëki ie'pa arkerak: ‘¿Mishka iyiwak ña'uk se' Këköi a!’ <sup>9</sup> Ie'pa kí kó kaneblök darërèè. Kanè mú ie'pa a taië as kè itö kachè iütö.

<sup>10</sup> Etä ikanè wökirpa míyal ta ichéitörak Israel aleripa a: —Egipto blu' tö kawö mé tö kè a' a tala'chka kösi tsarbituia. <sup>11</sup> I'ñe ta a' wakpa kawöta iyulök wé a' ikué, e' ma ee itsúbitu. Eré a' kawöta iyuök kos a' iyueke kenet ekké, kè wöarwa.

<sup>12</sup> Etä Israel aleripa mía Egipto ká wa'ñe kachka èse yulök tala'chka skéie. <sup>13</sup> Kanè wökirpa tö ikérok kaneblök kësik wa ta ichekerakitö ie'pa a kekraë: “A' tö iyuó kos a' tö iyueke kenet mik sa' tö tala'chka mekeia a' a ekké.” <sup>14</sup> Egiptowak tö Israel aleripa welepa me'ka ñi wökirie. E'pa ppeke egiptowak tö tsa' bata wa ta ichekerakitö ie'pa a:

—¿I' kuëki a' kè wa iyöne chki ena i'ñe wes kenet es?

<sup>15</sup> Etä Israel aleripa kanè wökirpa míyal kköchök Egipto blú wöa. Ie'pa tö iché ia:

—A këképa. ¿I' kuëki be' tö be' kanè mésopa we'ikè es? <sup>16</sup> Tala'chka kè mèneia sa' a, eré ie'pa ki ikiane tö sa' tö iyuè kos sa' a tala'chka merkeia ta iyörke ekké. Ie'pa tö sa' ké kaneblök kësik wa. Ñies sa' ppekeitö siarè. ¿A këképa, be' wakpa iane iwiie!

<sup>17</sup> Egipto blú tö ie'pa iüté:

—¿A' dör bikëwakpa wöchka! E' kuëki a' icheke kekraë: “¿Mishka ká bánet iyiwak ña'uk Jehová a!” <sup>18</sup> ¿A' yúshka kaneblök! Eré kè tala'chka kösi merku'ia a' a, eré a' kawöta iyuök kos kenet a' tö iyueke ekké.

<sup>19</sup> Mik Israel aleripa kanè wökirpa a iyëne tö ie'pa kawöta iyuök kekraë kos iyuekerakitö kenet ekké, etä ie'pa eriane taië. <sup>20</sup> Ie'pa e' yélur Egipto blú ska' de wé Moisés ena Aarón tso' ie'pa panuk ee. <sup>21</sup> Ie'pa tö iché iarak:

—Ì wamblé a' tō sa' kī e' kuekī as Jehovahá tō a' we'ikò. Egipto blú ena ikuēblupa e'pa éna sa' ar suluē. A' iane iwiie. E' dör wes a' wakpa tō tabè mé ie'pa a as sa' ttōwā ie'pa tō es.

*Moisés kköché Skököl a*

<sup>22</sup> Etā Moisés tō iché Jehovahá a:

—A Jehovahá. ¿Íók be' tō Israel aleripa we'ikeke siarē? ¿Íók be' tō ye' patkē'bitū íe? <sup>23</sup> Mik ye' dē'bitū ttök Egipto blú tā' be' ttō wa, etā ie' tō wépa dör be' icha e'pa kī we'iké siarē. Dò ikké tā iweirkeiā iwák suē. Erē be' kē wā ì one yēs ie'pa tsatkoie.

6

<sup>1</sup> Etā Jehovahá tō ie' iüté:

—Kukuie bö isueraē tō wes ye' tō Egipto blú we'ikeraē. Ye' diché taiē e' wa ye' tō ie' keraē ie'pa ökmi. Ye' diché wa ye' tō ie' keraē ie'pa patkökmi iká kī.

*Skököl tō Moisés skà patkémine Egipto blú ska'*

<sup>2</sup> Nies Skököl tō iché Moisés a:

—Ye' dör Jehovahá. <sup>3</sup> Mikā ye' e' kkayē' Abraham a ena Isaac a ena Jacob a, etā ye' iché tō ye' dör Skököl Diché Tā' Íyi Ulitane Tsata e'. Erē ye' kiè Jehovahá, e' kē yēne ye' wā ie'pa a. <sup>4</sup> Ye' tō ttè me' ie'pa a. Ye' tō iyē'at ie'pa a tō ká kiè Canaán e' merayö a' aleripa a. Ee ie'pa bak senuk wes o'ka ká es. <sup>5</sup> I'ñe ye' wā ijcher tō ie'pa weirke siarē. Egiptowak tō ie'pa keke kaneblok darērēē kēsik wa. E' kuekī ttè me'bak ye' tō ie'pa a e' wawekeyö i'ñe tā. <sup>6</sup> E' kuekī be' yú ichök ie'pa a tō ye' dör Jehovahá. Egiptowak tō a' we'ikeke siarē kanè darērēē wa, e' kōs ulā a a' yerattsa ye' tō. Ye' tō egiptowak we'ikeraē siarē ye' diché taiē e' wa. Es a' tsatkerāē ye' tō egiptowak ulā a. <sup>7</sup> Ye' tō a' klō'weraē ye' ichapaie. Ye' dōraē a' Kököl. A' wā ijcherdaē tō ye' dör Jehovahá. Ye' dör a' Kököl. A' wā ijcherdaē tō ye' tō a' yē'lur egiptowak bak a' we'ikök kanè darērēē wa e' ulā a. <sup>8</sup> Ye' wā a' miraē ká muk ye' kablē' Abraham, Isaac ena Jacob e'pa a ee. Ká e' meraē ye' tō a' a. E' atdaē a' a. Ye' dör Jehovahá e' tō iché es.

<sup>9</sup> Etā Moisés tō ttè e' skà chéne Israel aleripa a. Erē ie'pa eriarke taiē kanè darērē kuekī. E' kuekī ie'pa kē wā ittō iütēne. <sup>10</sup> Etā Jehovahá tō iché Moisés a:

<sup>11</sup> —Be' yú ichök Egipto blú a tō kawö mú ye' ichapa a e' yöktsa Egipto a.

<sup>12</sup> Erē Moisés tō Jehovahá iüté:

—Israel aleripa kē tō ye' ttō iütè, etā ¿wes Egipto blú ye' ttō iütèmi? Ye' kē tto buaē.

<sup>13</sup> Etā Jehovahá tō Moisés ena Aarón e'pa patkēmi ichök Israel aleripa a ena Egipto blú a tō “Jehová tō sa' patkē Israel aleripa yökulur Egipto.”

*Moisés ena Aarón ditséwöpa*

<sup>14</sup> I' dör Moisés ena Aarón ditséwö datse iyēpa wa:

Rubén e' dör Jacob alā wēm tsá, e' ala'r dör Hanoc, Falú, Hesrón ena Carmí. Ditséwöpa datse ie'pa wa e'pa kōs dör Rubén aleripa.

<sup>15</sup> Simeón ala'r wēpa dör Jemuel, Jamín, Óhad, Jaquín, Sóhar ena Saúl. Saúl mì dör cananeawak. Ditséwöpa datse ie'pa wa e'pa kōs dör Simeón aleripa.

<sup>16</sup> Leví sene' duas dōka cien eyök kī dabom mañayök kī kul (137). I'pa dör ila'r wēpa ikibi ék dò ibata ék: Guersón, Quehat, ena Merarí. <sup>17</sup> Guersón ala'r wēpa dör Libní ena Simí. <sup>18</sup> Quehat sene' duas cien eyök kī dabom mañayök kī mañat (133). Ie' ala'r wēpa dör Amram, Ishar, Hebrón ena Usiel. <sup>19</sup> Merarí ala'r wēpa dör Mahli ena Musí. Ditséwöpa datse ie'pa wa e'pa kōs dör Leví aleripa.

<sup>20</sup> Amram sene'wā iyéchke kiè Jocabed e' tā. E' dör Moisés ena Aarón mì. Amram sene' duas cien eyök kī dabom mañayök kī kul (137).

<sup>21</sup> Ishar ala'r wēpa dör Coré, Néfeg ena Zicrí.

<sup>22</sup> Uziel ala'r wēpa dör Misael, Elsafán ena Sitrí.



<sup>23</sup> Aarón sene'wə alaköl kiè Eliseba e' tə. E' dör Aminadab alà busi ena Nahasón kutà. E' ala'r wəpa kiè Nadab, Abihú, Eleasar ena Itamar.

<sup>24</sup> Coré ala'r wəpa dör Asur, Elcaná ena Abiasaf. Ditséwöpa datse ie'pa wa e'pa kōs dör Coré aleripa.

<sup>25</sup> Eleasar dör Aarón alà, e' sene'wə Futiel alà busi tə. E' alà kune kiè Finees. E'pa kōs datse iyé tsá kiè Leví e' wa.

<sup>26</sup> Aarón ena Moisés e'pa patké' Jehová tō Israel aleripa yökulur Egipto a dapauleka wes ñippökwakpa taië e' dapa'ù es. <sup>27</sup> Aarón ena Moisés e'pa ut Egipto blú tə as ie' tō kawō mù ie'pa a Israel aleripa yöktsarak Egipto a.

*Aarón tté Egipto blú tə Moisés skéie*

<sup>28</sup> Mik Jehová tté Moisés tso' Egipto e' tə, <sup>29</sup> etə ichéitō iā:

—Ye' dör Jehová. Ì kōs chekeyö be' a e' skà chóné Egipto blú a.

<sup>30</sup> Erë Moisés iüté:

—A Jehová, ye' kè tto buaë, etə ¿wes Egipto blú ye' ttò iütèmi?

7

<sup>1</sup> Etə Jehová tō iché Moisés a:

—Ye' ttò ttsó. Be' èl Aarón ttöraë Egipto blú tə be' skéie wes ye' ttekölpa ttöke ye' skéie es. <sup>2</sup> Ì kōs chekeyö be' a, e' cherane be' tō Aarón a tə Aarón tō icherane Egipto blú a as ie' tō kawō mù a' a Israel aleripa yöktsarak Egipto a. <sup>3</sup> Erë ye' tō Egipto blú er darë'wəkewā. Ì kè or yi a ese wərayö Egipto ye' diché taië e' wà kkachoie. Ie'pa wökrardawā isauk. <sup>4</sup> Egipto blú kè tō a' ttò iütəpa. Erë ye' tō egiptowak we'ikeraë siarë ye' diché taië e' wa. Es ye' tō Israel aleripa yeralur. Ie'pa dör ye' a wes ñippökwakpa tso' taië es. Ie'pa dör ye' icha. <sup>5</sup> Egiptowak we'ikéyö siarë ye' diché taië wa ñies Israel aleripa yéttsayö e' ukuöki tə egiptowak tō isueraë tō mokië ye' dör Jehová.

<sup>6</sup> Moisés ena Aarón e'pa tō iwakanewé wes Jehová tō iché ie'pa a es. <sup>7</sup> Mik ie'pa tté Egipto blú tə etə Moisés kī duas tso' dabom paryök (80). Aarón kī duas tso' dabom paryök kī mañat (83).

*Aarón shko kéli yönane tkabèie*

<sup>8</sup> Jehová tō iché Moisés ena Aarón a:

<sup>9</sup> —Egipto blu' tō a' a iché: 'Ì kè or yi a ese ú', e' tə ichó Aarón a tō ishko kéli iuyómi iski as iyónar tkabèie Egipto blú wörki.

<sup>10</sup> Etə Moisés ena Aarón míā Egipto blú ska' etə ie'pa iwé wes Jehová tō iché ie'pa a es. Aarón tō ishko kéli uyémi iski Egipto blú ena ikueblupa e'pa wörki tə iyönane tkabèie.

<sup>11</sup> Etə Egipto blú tō wəpa wa iyi jcher taië ena ie'pa awápa esepa tsuk patké. Ie'pa tō ikanewé ñi suë isiwé wa. <sup>12</sup> Ie'pa shko kéli uyémi iski ñies tə iyönane ñies tkabèie. Erë Aarón shko kéli tō Egipto shko kéli katéwarak seraa. <sup>13</sup> Erë Egipto blú er téwā darërë wes Jehová tō iyé' es. Ie' kè wā ie'pa ttò iütène yës.

*Jehová tō di' yuée péie*

<sup>14</sup> E' ukuöki tə Jehová tō iché Moisés a:

—Egipto blu' er téwā darërëë. Kè ie' éna Israel aleripa akmine. <sup>15</sup> Bule bla'mi mik ie' míā di'kka, etə be' yú ttök ie' tə. Ie' panú di'kka. Shko kéli yönane tkabèie e' kéli tsúmi.

<sup>16</sup> Ie' a ichó: 'Jehová dör hebreowak Kéköl, e' tō ye' patké ichók be' a tō ie' ala'r ómine as imi'rak ie' kikökka ká wé kī kè yi serku' ee. Ikké tə kam bö ie' ttò iütò yës.' <sup>17</sup> E' kueki Jehová tō ye' patké ichök be' a: 'Ire' bö isueraë tō moki ie' dör Jehová. Mik ye' tō di' ppé shko kéli a'tser ye' wā e' wa, etə di' miāraë pé wöchka. <sup>18</sup> Nima duölurdaë. Di' alaburdakā suluë. Egiptowak kè a di' e' yanuk, taië ie'pa dako'wəkaraëitö.'

<sup>19</sup> Ñies Jehová tō iché Moisés a:

—Ichó Aarón a tö ie' shko kéli klö'ú ta ikóka di' kos tso' ie'pa wa yè ese tsaka. Di'la, batsöri, di' wöblë, di' bló tso' ese kos tsaka ie' ulà kóka as imi'a péie. ¡Es imiaraë pé wöchka di' bló ulitane yöule kal wa ö ák wa ese a!

<sup>20</sup> Etá Moisés ena Aarón iwakanewé wes Jehová tö iché ie'pa a es. Aarón tö ishko kéli kéka e' wa di' ppéitö Egipto blú ena ikueblupa wöshaë. Etá di' kos ekkë míá péie. <sup>21</sup> Nima kos duolur. Di' alanewá suluë kè yar egiptowak a. ¡Ká wa'ñe di' míá pé wöchka!

<sup>22</sup> Erë egiptowak awápa tö iwé ñies isiwé wa. E' kueki Egipto blú er téwá wes Jehová tö iyé' es. Ie' kè wá Moisés ena Aarón ttò iütëne yës. <sup>23</sup> Ie' míane iu a. Kè tkine íyi kos ki. <sup>24</sup> Egiptowak kos kè a di' yar e' kueki ie'pa tö di' wöblë bié di' kkömik di' manene yottsäe.

*Jehová tö egiptowak we'iké siarë bukuë' wa*

<sup>25</sup> Jehová tö di' kiè Nilo e' suluwá e' ki ká de kul,

## 8

<sup>1</sup> etá ie' tö iché Moisés a:

—Be' yú Egipto blú ska' ta ichó ia: 'Jehová tö ye' patké ichök be' a i' es: Ye' ichapa ómine as imi' ye' dalöiök. <sup>2</sup> Kè be' tö ie'pa èmi, e' ta ye' tö bukuë' alöweraká taië a' ká ki a' we'ikoie. <sup>3</sup> Di' Nilo a bukuë' alördaë taië shütëë. E' e' yöralur di' a mirawá be' u a. Idörawá weshkë wé be' kapöke ee, be' ká' ki. Ñies idörawá be' kueblupa u a ena be' yamipa kos e'pa u a. Ie' tiurawá wé a' ulöke ese a ena wé a' pan wötuöke ese kos a. <sup>4</sup> Bukuë' urdaka be' ki ena be' kueblupa ki ena kos be' ká wakpa tso' e'pa ki.'

<sup>5</sup> Etá Jehová tö Moisés a iché:

—Ichó Aarón a tö ie' ulà ena ie' shko kéli kóka di' kibi ena di' tsitsir ena batsöri kos ekkë tsaka as bukuë' döka di' a Egipto kos wà iökka.

<sup>6</sup> Aarón tö ishko kéli kéka Egipto di' kos tsaka. Etá Egipto ká wa'ñe bukuë' alöneká taië. <sup>7</sup> Erë egiptowak awápa tö iwé ñi suë isiwé wa. Ie'pa tö bukuë' alöwéka ñies. <sup>8</sup> E' ukuöki ta Egipto blú tö Moisés ena Aarón e'pa tsuk patké ta ichéitö ie'pa a:

—A' tö ikió Jehová a tö bukuë' yólur ye' ki ena ye' ká wakpa kos ki ñies. E' yéluritö eta ye' tö a' yamipa émimi as imi' iyiwak ña'uk Jehová dalöioie.

<sup>9</sup> Etá Moisés tö Egipto blú iüté:

—Ichó ña tö ¡Mik be' ki ikiane tö ye' tö ikiè Jehová a be' ki ena be' kueblupa ki ena be' ká wakpa kos ki as bukuë' kè tö a' tsiriwëia ta iatdaë di' è a?

<sup>10</sup> Egipto blú iiüté:

—Ikió Jehová a bule.

Etá Moisés tö iché ie' a:

—E' wà tköraë wes be' ki ikiane es as be' wá ijcher tö kè yi dör wes sa' Këköl Jehová es. <sup>11</sup> Bukuë' e' yölurdane be' u a atdaë di' è a. Kè itö be' tsiriwëpaia. Ñies be' kueblupa ena be' ká wakpa kos kè tsiriwëpaiaitö.

<sup>12</sup> Etá Moisés ena Aarón e' yéttsa Egipto blú wöwa. E' ukuöki ta Moisés ikié Jehová a tö bukuë' patké'bitu Egipto blú ki e' trë'úmi ie' yöki. <sup>13</sup> Etá Jehová tö iwakanewé wes Moisés tö ikié ia es. Bukuë' tso' egiptowak u a iupamik u'rki e' kos duolur. <sup>14</sup> Egiptowak tö bukuë' nu kos shtë dapa'wé taië. E' nu alabuneka suluë ká e' kos a. <sup>15</sup> Erë mik Egipto blú tö isuë tö ie' tsatkëne bukuë' ulà a, etá ier téwane darërëë wes Jehová tö iyé' es. Kè ie' wá Moisés ena Aarón ttò iütëne.

*Mulu'shwak patké taië Jehová tö ie'pa ki*

<sup>16</sup> E' ukuöki ta Jehová tö iché Moisés a:

—Ichó Aarón a tö ie' shko kéli kóka siwá' ki e' wa íyök po ppó as imi'a mulu'shwakie Egipto wa'ñe.

<sup>17</sup> Etá iwakanewéraitö es. Aarón tö shko kéli kéka ta íyök po ppéitö iwa etá íyök po tso' Egipto wa'ñe e' míá mulu'shwakie e' iëneká se' ki ñies iyiwak kos ki. <sup>18</sup> Egiptowak awápa

ima'wé mulu'shwak alöukka isiwé wa, erë kè iwà yöne ie'pa a. E' dalewa mulu'shwak iënekä taië ie'pa ki ñies iyiwak ki. <sup>19</sup> Etä iwépa tö iché Egipto blú a:

—I' dör Skököl kanè moki!

Erë ie' er téwä darërë wes Jehovahä tö iyë' es. Kè ie' wä ie'pa ttò iütëne.

*Ó iéka taië Skököl tö ie'pa ki*

<sup>20</sup> E' ukuöki tä, Jehovahä tö iché Moisés a:

—Bule bla'mi Egipto blú mi'ke di'kka, e' kuëki be' e' kóka bla'mi tä be' yú ñi kükwä itä. Ichó ie' a: 'Jehová tö ye' patké ichök be' a i' es: Ye' ichapa ómine as imi' ye' kikökka. <sup>21</sup> Kè be' tö ie'pa èmine, e' tä ye' tö ó taië patkeraë be' ki ena be' kuëblupa ki ena kos be' ká wakpa tso' e'pa ki. Ó iërdakä egiptowak u kos ekkë ki dò íyök ki. <sup>22</sup> Mik e' wà de a' ki, etä ó patkeraëyö a' è ki. Wé ye' ichapa serke Gosen eë ó kè suepasö yës. Es be' éna iarmi tö moki ye' dör Jehovahä, e' durse ká i' ki. <sup>23</sup> Be' ká wakpa e'pa è we'ikeraë ie' tö. Erë ye' ichapa kè we'ikepayö. E' wà tköraë bule.'

<sup>24</sup> Es Jehovahä tö iwakanewé. Ó dettsa chkaie Egipto blú u a ena ikuëblupa u a ñies Egipto wa'ñe e' a. Ó tö Egipto ká kos klö'wéwä se, sulu'wéwä yës.

<sup>25</sup> Etä Egipto blú tö Moisés ena Aarón tsuk patké tä ichéitö ie'pa a:

—A' yú, e'ma a' Këköl a iyiwak ña'uk. Erë kè a' e' yökulur Egipto a.

<sup>26</sup> Moisés tö iüté:

—Kè e' dör buaë es. Sa' iyiwak ña'weke sa' tö sa' Këköl Jehovahä e' a, e' dör iyiwak dalöieke a' tö skökölie ese. A' tö sa' sué iyiwak ese ña'uk, e' tä a' tö sa' ttëwami ák wa. <sup>27</sup> Sa' kawöta shkök dò ká mañat dò wé kè yi serku' ese ska'. Eë sa' tö iyiwak ña'weke sa' Këköl Jehovahä a wes kawö méatitö sa' a es.

<sup>28</sup> Egipto blú tö iché:

—A' kè mine kamië shüte, e' tä ye' tö a' èmimirak wé kè yi serku' ese ska', iyiwak ña'uk a' Këköl Jehovahä e' a. A' Këköl Jehovahä a ikió ye' ki.

<sup>29</sup> Moisés tö iüté:

—Mik ye' e' yéttä íe, etä ye' mía Jehovahä a ikiök be' ki as ó pormi be' yöki ena be' kuëblupa yöki ena be' ká wakpa kos e'pa yöki. Erë kè be' tö sa' kitö'ukia. Kè be' tö Israel aleripa wöklö'uk as imi' iyiwak ña'uk Jehovahä a.

<sup>30</sup> Mik Moisés e' yéttä Egipto blú wöwa, etä ie' ikié Jehovahä a. <sup>31</sup> Etä Jehovahä tö iwé wes Moisés tö ikié ie' a es. Es ó po'wémiitö Egipto blú yöki ena ikuëblupa yöki ena iká wakpa kos e'pa yöki. Kè ó ateia etkla wë'ia. <sup>32</sup> Erë Egipto blú er skà téwane darërëë. Kè ie' wa Israel aleripa anemi.

9

*Jehová tö egiptowak iyiwak ttélur*

<sup>1</sup> E' ukuöki tä Jehovahä tö iché Moisés a:

—Be' yú ttök Egipto blú tä, tä ichó ia: 'Jehová dör hebreowak Këköl, e' tö ichè i' es: Ye' ichapa ómine as imi' ye' kikökka. <sup>2</sup> Be' kè tö ie'pa èmine, be' tö ie'pa wöklö'wekeia, <sup>3</sup> e' tä ye' tö duè mekaraë be' iyiwak kos e' ki ye' diché taië wa. Be' kabaio, be' burro, be' kameio, be' baka ena be' obeja ekkë kos duölurdaë. <sup>4</sup> Erë Israel aleripa iyiwak ulitane kè duöpalur etö wë'ia. Es ye' tö ikkacheraë tö ie'pa dör ye' ichapa.'

<sup>5</sup> Etä Jehovahä tö ikéwö méwä i' es:

—E' kos weraëyö bule.

<sup>6</sup> Bule es tä Jehovahä tö iwé. Egiptowak iyiwak kos e' duolur. Erë Israel aleripa icha kè du'wä etö wë'ia. <sup>7</sup> Egipto blú tö Israel aleripa icha sauk patké etä ie' isué tö moki Israel aleripa icha kè du'wä etö wë'ia. Erë ie' er kitéwä darërëë. Kè ie' wä Israel aleripa a kawö mène as imi'rak.

*Jehová tö duè mékə egiptowak kɪ skuëkie*

<sup>8</sup> E' ukuökɪ tə Jehová tö iché Moisés ena Aarón a:

—Muluchka tso' bö'kkö a e' klö'ú tə as Moisés tö iuyò siwə' kɪ Egipto blú wörkɪ.

<sup>9</sup> Muluchka e' po ardaë Egipto kos e' kɪ. E' tskirdane ie'pa kɪ skuëkie ñies iyyiwak kɪ.

<sup>10</sup> Etə Moisés ena Aarón muluchka klö'wé bö'kkö a tə imía Egipto blú ska' tə e' wörkɪ Moisés tö muluchka uyé siwə' kɪ. Etə egiptowak mik imonekə skuëkie. Ñies iyyiwak kos mik imonekə skuëkie. <sup>11</sup> Egipto awápa kɪ skuëk tskinekə taië wes imalepa es, e' kuekɪ ie'pa kè dè' Moisés wörkɪ. <sup>12</sup> Erë Jehová tö Egipto blú er darë'wéwə as kè itö Moisés ena Aarón ttò iütò wes ie' tö iyë' es.

*Mò wösi səsëë ese patké Jehová tö egiptowak kɪ*

<sup>13</sup> E' ukuökɪ tə Jehová tö iché Moisés a:

—Be' e' kóka bule bla'mi etə be' yú Egipto blú a ichök: 'Jehová dör hebreowak Këköl, e' tö ichè be' a i' es: Ye' ichapa ómi as imi'rak ye' kíkökka. <sup>14</sup> Kè be' wə ye' ttò iütène i' tə, e' tə ye' tö íyi sulusi kos patkeraë be' kɪ ena be' kueblupa kɪ ena a' wakpa kos e' kɪ. Es be' wə ijcherdaë tö kè yi ku' ye' tsatə ká wa'ñe. <sup>15</sup> Ye' mú kɪ ikiane, e'ma ye' tö íyi sulusi me'kabak be' kɪ ena be' yamipa ulitane kɪ a' eukwa ká i' kɪ. <sup>16</sup> Erë ye' wə be' tso'ia ttsë'ka as be' tö ye' diché taië e' saù, ñies as yi dör ye' e' tté pakar ká wa'ñe. <sup>17</sup> Erë be' er dör suluë kekraë. Kè bö ye' ichapa Israel aleripa émi. <sup>18</sup> Bule ikkè mò wösi səsëë ese patkeraëyö a' kɪ taië. E' dardaë taië a' kɪ tkòka kenet idarke Egipto e' tsatə. <sup>19</sup> Mò wösi ardaë e' tö a' tso' u'rki ena a' iyyiwak kos tso' kañika e' ttémilur sɛ. E' kuekɪ a' iyyiwak ena ì kos tso' a' wə kañika e' blök patkó u dikia as itsatkër.'

<sup>20</sup> Etə Egipto blú kueblupa welepa suane Jehová ttò yöki. E'pa tö iyyiwak blé, ñies ikanè mésopa blé u dikia. <sup>21</sup> Erë imalepa kè wə Jehová ttò klöne, e'pa tö icha méat u'rki. <sup>22</sup> Etə Jehová tö Moisés a iché:

—Be' ulà kóka siwə' kɪ as mò wösi səsëë ese dar taië Egipto kos a. E' ardaë ie'pa kɪ ena iyyiwak kɪ ñies idaliwö tso'rak iwə e' kɪ.

<sup>23</sup> Mik Moisés tö shko kéli kéka siwə' kɪ, etə Jehová tö alá bla'wé taië wöñawéitö taië döttsə iyök kɪ etə mò wösi səsëë ákwöie e' patkéitö Egipto kos a. <sup>24</sup> Es Jehová tö mò wösi səsëë ese patké taië Egipto ká wa'ñe a. Etə mò wösi ese darke taië ena ká wöñarke taië, kè iwöklörta'. Kè yi wə e' suule yës Egipto. <sup>25</sup> Etə mò wösi e' biteshka taië ì kos tso' ká áie a e' kɪ, se' kɪ ena iyyiwak kɪ ñies. Dalí kuá kos péluritö sulu'wéluritö. Kal tso' ká wa'ñe e' ulà jchërolone. <sup>26</sup> Erë ká kiè Gosen, wé Israel aleripa serke, e' a mò wösi kè dane yës.

<sup>27</sup> Etə Egipto blú tö Moisés ena Aarón tsuk patké tə ichéitö ia:

—Ire' yö isué tö ye' e' wamblé suluë. Jehová e' ttè dör mokië. Etə ye' ena ye' ká wakpa sa' iane iwiie. <sup>28</sup> Taië alá blarke ñies mò wösi darke taië e' kè dalë'ttsëneia sa' a. Jehová a ikió tö iwöklö'úne, e' tə ye' tö a' ekemi. Kè yö a' wöklö'wèia.

<sup>29</sup> Etə Moisés tö iüté:

—Ye' e' yéttsə ká i' a tə bet ye' ikieke Jehová a, etə mò wösi ena alá wöñarke kos e' wöklördawə as be' wə ijcher tö Jehová dör ká wa'ñe e' wák. <sup>30</sup> Erë ye' wə ijcher buaë tö be' ena be' kueblupa kam tö Sa' Këköl Jehová e' dalöiö.

<sup>31</sup> Etə daliwö kiè lino e' tso' wörkuaie ena cebada e' wö tə'tke, e' kuekɪ iweinewa sɛ. <sup>32</sup> Erë daliwö kiè trigo ena centeno, kè e' dè' wes kam iwörkua bur e' kuekɪ.

<sup>33</sup> Mik Moisés e' yéttsə ká e' a mía bánet, etə ee ie' tö ikié Jehová a. Etə bet tə mò wösi kè daneia ñies ká kè wöñaneia. Kalí taië e' kè yëneia. <sup>34</sup> Mik Egipto blú tö isué tö kalí kè yërku'ia, mò wösi kè darku'ia ena alá kè blarku'ia, etə ie' e' wambléne suluë. Kè ie' è er darë'nəwə ñies ikueblupa. <sup>35</sup> Es Egipto blú er téwə darërëë. Kè iwə Israel aleripa a kawö mène as imi'yal wes Jehová tö iyë'ia Moisés ttè wa es.

## 10

*Jehová tö ditski patké taië Egipto*

<sup>1</sup> E' ukuöki ta Jehová tö Moisés a iché:

—Be' yúne Egipto blú ska'. Ye' tö ie' ena ikuëblupa er téwa darërëë as ie'pa tö isaù tö ye' diché taië, e' wa ì kè or yi a ese wè ye' tö taië. <sup>2</sup> Ye' tö ie'pa er téwa darërëë as be' tö ipakò be' ala'r a ena be' talapa a tö wës egiptowak we'ikéyö ñies wës ì kè or yi a ese wéyö taië ie'pa wörki. Es a' ulitane wa ijcher tö ye' dör Jehová.

<sup>3</sup> Eta Moisés ena Aarón míyal Egipto blú ska' eta ichéitö ia:

—Jehová dör hebreowak Këkö, e' tö ichè i' es: “¿Mik be' tö ye' ttò dalösewemirö? Ye' ichapa ómi as imi' ye' kikökka. <sup>4</sup> Kè be' tö ie'pa èmi bule, e' ta ditski patkeraëyö a' ká ki. <sup>5</sup> Ditski tö a' ká wà ierawa taië, kè a íyök ulat wëneia. A' daliwö bata méat mò wösi tö e' kôs katerawaitö yës. Ñies kal ulitane katerawaitö seraa. <sup>6</sup> Ñies ditski dörawa taië be' u kôs a ena be' kuëblupa u a ena egiptowak kôs u a. jýi i'se kè suule a' yépa bak ká iaiaë e'pa wa ie'pa tsá dë'bitu ká i' ki dö ikkè ta!”

Moisés tté one ta ie' e' wötrée ta imía. <sup>7</sup> E' bet ta Egipto blú kuëblupa tö iché iblú a:

—¿Mik ta wëm e' kè tö se' we'ikèia? A blu', ie'pa ómi ie'pa Këkö dör Jehová, e' kikökka. A blu', ¿be' kè wa isune tö se' ká sulunewatke seraa?

<sup>8</sup> Eta Egipto blú tö Moisés ena Aarón tsuk patkéne eta ichéitö ia:

—A' yúshka Jehová dör a' Këkö, e' kikökka. Erë keweie a' tö ye' a ichó tö ¿a' wénepa è mi'ke?

<sup>9</sup> Moisés tö iuté:

—Sa' kawöta shkökmi sekka. Sa' kawö taië tkö'uke Jehová a. E' kuëki sa' ala'r ena sa' kékëpa, e'pa kôs kawöta shkökmi. Ñies sa' obeja kôs ena sa' baka kôs e' mi'ke sa' wa.

<sup>10</sup> Eta Egipto blú tö iché ia:

—¿Iwënewa wöshak tö a' erbiköke suluë ye' ki! ¿Ima a' erbikö tö Jehová tö a' kimèmi as ye' tö a' ómi a' alakölpäe ena a' ala'rè? <sup>11</sup> Kè iwamblërpa es. A' wëpa kibineone esepa è yú Jehová kikökka es a' ki ikiane e' kuëki.

Eta Egipto blú tö ie'pa tsukmi ké ie' yöki. <sup>12</sup> Erë Jehová tö iché Moisés a:

—Be' ulà kóka Egipto ki as ditski bitu Egipto kôs wà iökka ñies dalikua bata méat mò wösi tö e' kôs katökwa.

<sup>13</sup> Eta Moisés tö ishko kéli kékä Egipto ki eta Jehová tö siwa' patkébitu diwö tskirke e' kke Egipto kôs ki ñië nañë. Bule es bla'mi ta siwa' wa ditski debitu. <sup>14</sup> Ditski tö Egipto ká kôs e' wà iéwa taië. Ekkè kè suule yi wa ká iaiaë es kè yi tö isuepaiane. <sup>15</sup> Es ditski dapaneka ká kôs ekkè ki. Kè a íyök ulat ta'ia. Dalí kuá ena kalwö e' kôs bata méat mò wösi tö e' katélur ditski tö yës. Egipto kôs a kakö kôs kal kò kôs e' kè ateia yës.

<sup>16</sup> E' bet ta Egipto blú tö Moisés ena Aarón e'pa tsuk patké ta iché ia:

—Ye' e' wamblé sulu a' Këkö dör Jehová e' ki ñies a' ki. <sup>17</sup> Ye' kköchò a' a i'ñe è tö a' tö e' olo'yó ye' ki. Ikió a' Këkö dör Jehová e' a ye' ki tö ditski è trè'úlur ye' ki as kè sa' duòlur.

<sup>18</sup> Moisés e' yéttsa Egipto blú u a ta bet ikiéitö Jehová a. <sup>19</sup> Eta Jehová tö siwa' e' wötréene tsikka darërë e' wa ditski mítser anene dayë kiè Dayë Mat, e' ki. Eta ditski kè atë yës Egipto. <sup>20</sup> Erë Jehová tö Egipto blú er sulu téwane darërëë. Ie' kè wa Israel aleripa a kawö mène as imi'rak.

*Jehová tö ká ttsettseë patké Egipto ki*

<sup>21</sup> Eta Jehová tö Moisés a iché:

—Be' ulà kóka siwa' ki as ká ttserwa ttsettseë shuteë.

<sup>22</sup> Eta Moisés ulà kékä eta ká ttsetnewa míä ttsettseë Egipto ká wa'ñe ki döka ká mañat.

<sup>23</sup> Kè yi wa iyami serke tsinet e' sune yës. Kè yi a e' yënuksa wé itkër ee döka ká mañat. Erë Israel aleripa u a, ee je' ká olo tso' dalölö.



<sup>24</sup> Età Egipto blú tò Moisés tsuk patké ta iché ia:

—A' yúshka Jehová kíkòkka. A' ala'r kòs tsúmi. Erë a' obeja ena a' baka e' kòs múat.

<sup>25</sup> Età Moisés tò iüté:

—Au. Be' kawöta kawö muk sa' a sa' iyiwak tsukmi ña'wè sa' Kèköl dör Jehová e' a idalöioie. <sup>26</sup> E' kíie ta sa' icha kòs, e' michoë sa' wakpa wa. Sa' iyiwak shushteke sa' tò ña'wè sa' Kèköl Jehová a ikíkokaie. Kam sa' dòmi ee età kè sa' wa ijcher iyiwak isie ëtö kiane sa' ki ña'wè Jehová a. E' kueki kè sa' tò sa' iyiwak mepaat yës.

<sup>27</sup> Età Jehová tò Egipto blú er sulu téwa darërëë. E' kueki ie' kè wa kawö mène Israel aleripa a as imi'rak. <sup>28</sup> E' kíie ta Egipto blú tò iché Moisés a:

—Be' e' yóttsa íe. Be' e' kkö'nú ye' yökí. Be' dene ye' sauk, e' ta be' duörawa.

<sup>29</sup> Età Moisés tò iüté:

—Buaë bö iché es. Kè ye' dë'iane be' sauk.

## 11

*Ala'r wëpa kibi esepa duöralur e' biyöché Moisés tò*

<sup>1</sup> E' ukuöki ta Jehová tò iché Moisés a:

—Ye' tò Egipto blú ena egiptowak ulitane e' bata we'ikekeia. E' ukuöki ta Egipto blú tò a' erami, e' kíie ie' wák tò a' ulitane uyerattsa da'aie iká ki. <sup>2</sup> Età ichó Israel aleripa ulitane a, wëpa ena alakölpä tò íyi yöule orochka wa ena inukölchka wa, ese kak kió egiptowak serke ie'pa pamik esepa a.

<sup>3</sup> Età Jehová tò egiptowak ké Israel aleripa dalöiök taië. Egipto blú kueblupa ena egiptowak ulitane e'pa tò iklö'wé tò Moisés dör kékëpa taië.

<sup>4</sup> Età Moisés tò iché Egipto blú a:

—Jehová tò iché i' es: Ká shäböts nañewe ye' mi'ke Egipto kòs a. <sup>5</sup> Ala'r wëpa kibipa e' kòs duöralur. Egipto blú tso' s'wökirie e' alà wëm kibi duörawa, ñies egiptowak malepa icha kòs dò s'siarëpa tso'rak iwa iyiwö woie esepa icha duöralur ñies. Ñies iyiwak uru alà wë'ñe kibi ese kòs duöralur. <sup>6</sup> Sulitane iuraë taië Egipto kòs a. Kè ese ttsëule yi wa es, ñies kè yi tò ese ttsepaia es. <sup>7</sup> Erë Israel aleripa shua kè chichi isie arpa yës se' wöa ena iyiwak wöa. Es a' wa ijcherdaë tò ye' dör Jehová e' tso' Israel aleripa kimuk, erë egiptowak we'ikök ye' tso'.

<sup>8</sup> Età Moisés tò ikí ché ia:

—Be' kueblupa kòs döraë ye' ska', età ie'pa e' tkörawa kuchë ki ye' wörki ta ikköchöarak ye' a: 'Be' yúshka. Be' yamipa tso' kòs be' ta e'pa tsúmirak ñies.'

Età Moisés ulune taië e' yéttsa Egipto blú wörki. <sup>9</sup> E' ukuöki ta Jehová tò iché Moisés a:

—Egipto blu' kè tò a' ttò iütepa as ye' tò ì kè or yi a ese kí ù taië Egipto.

<sup>10</sup> Íyi ekkë kòs wé Moisés ena Aarón tò Egipto blú wörki, erë Jehová tò ie' er darë'wéwa as kè itö ittò iütö. E' kueki ie' kè wa kawö mène Israel aleripa a as imi'yal.

## 12

*Israel aleripa tsatkëne e' kéwö*

<sup>1</sup> Jehová tò iché Moisés ena Aarón tso' Egipto e'pa a:

<sup>2</sup> “Si' i' döraë a' a duas si' tsawe kekraë. <sup>3</sup> Israel aleripa ulitane a ichó: 'Si' i' e' diwö dabop (10) età u bitkue ekkë wakpa tò obeja ö chibo ese wë'ñe pupula yuló etö katè ila'r ta. <sup>4</sup> U wakpa welepa kè dör taië, kè a chkè ekkë katarwa, e' ta ie'pa tò iyamipa tso' iupamik esepa kió chkök ie'pa ta ñita kòs iwakpa döka ekkë ena kòs ie'pa a ikatar ekkë. <sup>5</sup> Obeja ö chibo wë'ñe bua'buá, kè ki ì sulu ku' ki duas tso' ek ese yuló etö. <sup>6</sup> E' bló. Si' i' e' diwö de dabop ki tkël (14) e' tsáli età a' wa iyiwak tso' blëule ese ttó u a u a. <sup>7</sup> E' ukuöki ta a' tò iklö'ú ta u wé a a' tò ikateke, e' wékkö kátke patiúka a' tò ipé wa. <sup>8</sup> Ká e' nañewe chkè e' kató katuule bö' a ár bacha'bacha ta ñies pan kè yöule iwölöwoka wa, ese ta. <sup>9</sup> Kè



ikatar aki ena paliule elkela wë'ia. Ichkà kòs, iwökir, ikla'tska, ena ñattse e' kòs kawöta kakuèwà bö' a. <sup>10</sup> Kè a' tò ibata mukat dò bule es. Ibata a'teia, e' ta ña'ùlor bö' a. <sup>11</sup> Mik a' chköketke eta a' e' paió, a' klökkuö ió, a' shko kéli klö'ú. Ye' dör Jehová e' tò a' tsatkeke e' kèwö tkö'weke a' tò, e' kueki a' chkó bet.

<sup>12</sup> “ ‘I'ñe nañewe ye' tköraë Egipto ká kòs a' egiptowak ala'r tsá wëm esepa ttökulur. Ñies ie'pa iyiwak ala'rla tsá dör wë'ñe e' kòs tteralur ye' tò. Es kékölpa kòs tso' egiptowak wà dalöie e' we'ikeraë ye' tò tajë. Ye' wák dör Jehová e' tò ichè es. <sup>13</sup> U kòs a' wé a' tso' e' wékkö ta'oule ipamik iyiwak pé wa e' dör a' wakpa a' ikkachoie. Mik ye' tò pé e' sué, eta ye' damitkö u e' ttómik. Mik ye' tso' egiptowak we'ikök siarë, eta e' kè dòpa a' ska'.

<sup>14</sup> “ ‘A' kawöta kawö e' tkö'uk. A' kawöta itkö'uk kekraë duas bit ekkë ye' dör Jehová e' dalöioie. <sup>15</sup> Ká döka ká kul e' shua a' kè kawö ta' pan yöule iwölöwoka wa ese ñuk. E' kueki kawö tkö'weke e' diwö tsá eta pan wölöwoka kòs ese tulótsa a' u a. Yi tò pan yöule iwölöwoka wa ese ñé ká kul e' shua, e' ta ese wák kè kawö ta' senuk Israel aleripa shua. <sup>16</sup> Kawö tkö'weke e' tsá diwö eta a' e' dapa'úka ek tsiní ème ye' dalöioie. Ñies e' diwö bata ta a' e' dapa'úkane. Ká tsá ena ibata, e' diwö kè a' kawö ta' kanablök yës, ù è alirmi a' a. <sup>17</sup> Kawö kiè Pan Kè Yöule Iwölöwoka Wa, e' kèwö tkö'uk a' kawöta. E' è kèwö wa ye' tò a' yerattsa Egipto a' sera. E' kueki a' kawöta e' kèwö tkö'uk. E' kèwö tkö'weraë a' tò kekraë. E' meneat dalöie a' a ena a' ditséwöpa datse a' itöki aishkuö ta e'pa kòs a. <sup>18</sup> Si' i' dör duas si' tsá, e' diwö dabom eyök ki tkël (14) e' tsáli a' kè kawö ta' pan yöule iwölöwoka wa ese ñuk dò si' i' ki diwö de dabom böyök ki et (21), e' tsáli eta a' tò ñèmine. <sup>19</sup> Kawö kul e' shua a' kè kawö ta' pan wölöwoka seuk u a. Yi tò pan yöule iwölöwoka wa ese ñé ká kul e' shua, ká kua'ki wakpa ö Israel aleripa, e' ta ese wák kè kawö ta' senuk Israel aleripa shua. <sup>20</sup> E' kueki ì kòs yöule pan wölöwoka wa, ese kè ñar yës. Wé a' tso'rö ee ta a' kè kawö ta' pan yöule iwölöwoka wa, ese ñuk.’ ”

<sup>21</sup> Eta Moisés tò Israel aleripa kueblupa dapa'wé ta ichéitö ia: “A' wakpa bil ekkë yú obeja ö chibo klö'uk etö etö, tsúmi a' u a a' yamipa a. Ittówa, Jehová tò se' tsatkere i'ñe, e' kèwö tkö'woie. <sup>22</sup> Ipé klö'ú tka' a. Eta kakö kiè hisopo e' ulà klö'ú eyök, e' nuúka pé wa, e' wa u wékkö kàtke patiúka. Kè a' e' yökulur u a kam ká ñir e' yöki. <sup>23</sup> Mik Jehová tkömi egiptowak ttökulur, eta ie' tò u wékkö e' kàtke sué iauleka pé wa eta ie' damitkö u e' ttómik. Es Jehová kè kawö mepa ibiyöchökwak tò s'ttekelur e' a a' ttökulur weshke. <sup>24</sup> A' kawöta ttè i' kòs dalöiök kekraë, ñies a' aleripa kòs datse a' itöki e'pa kawöta idalöiök. <sup>25</sup> Mik a' demi ká yé' Jehová tò tò imeraë se' a ee, eta a' kawöta kawö i' tkö'uk. <sup>26</sup> Mik a' ala'r tò ichaké a' a: ‘¿Iók se' tò kawö i' tkö'weke?’, <sup>27</sup> eta a' kawöta iütök: ‘Iyiwak i' ttekesö Jehová dalöioie ie' tò se' tsatké' egiptowak ulà a' kueki. Mik ie' bakmi egiptowak ttökulur, eta ie' bakmi se' Israel aleripa u ttómik kè dè'wa. Es ie' tò se' yamipa tsatké'lor.’ ”

Eta Israel aleripa e' tkélur kuchë ki Jehová dalöioie. <sup>28</sup> E' ukuöki ta ie'pa mía iwakanewé wes Jehová tò iché Moisés ena Aarón a es.

#### *Ala'r wëpa kibipa esepa duolur*

<sup>29</sup> Ká shaböts Jehová tò egiptowak ala'r wëpa kibipa esepa kòs ttélur sera. Egipto blú tso' s'wökirie e' alà wëm kibi e' duowa. Egiptowak malepa icha kòs dò s'tso' wötëule s'wöto wé a e'pa ala'r wëpa kibipa e'pa duolur ñies. Ñies iyiwak alà wë'ñe kibi e' kòs duolur. <sup>30</sup> E' nañewe Egipto blú ena ikuëblupa ñies egiptowak kòs e'pa e' kékarak sera iük ème. Kè u ku' yës e' kè a' s'nu ku'. <sup>31</sup> E' nañewe Egipto blú tò Moisés ena Aarón tsuk patké ta ichéitö ia:

—A' yúshka a' yamipaë. A' e' skó bánet sa' yöki. A' yúshka Jehová kikökka wes a' tò iyé' kuaë es. <sup>32</sup> Iyiwak kòs tsúmi wes a' ki ikiane es. A' yúshka sa' yöki. Ñies a' kköchö Jehová a' as ie' ye' kimù.

<sup>33</sup> Età egiptowak tö iché Israel aleripa a: “A' yúshka betbet sa' yöki. A' kè mìnè e' tã sa' ulitane duöralur.” <sup>34</sup> Israel aleripa tö harinachka, kè wötuule iwölöwoka wa, ese patrëwa tka'ë idatsi' a iéka ppéka kuli' ki tã imíyal. <sup>35</sup> Ie'pa tö orochka ena inukölchka ena datsi' e' kos kak kié egiptowak a wes Moisés tö iyë' ia es. <sup>36</sup> Jehovahä tö egiptowak ké Israel aleripa dalöiök e' kueki ie'pa tö iyi kos kak kiérakitö e' mé Israel aleripa a. Es Israel aleripa tö egiptowak iyi bua'buwa e' kos tsémi.

#### *Israel aleripa e' yélur Egipto a*

<sup>37</sup> Israel aleripa e' yélur Ramsés, míyal Sucot. Ie'pa wëpa kibineonetke doka 600.000. Alakölpa ena ala'rla kè shtaoule. <sup>38</sup> Ie'pa tã pë' kua'kipa mí nies taië. Nies iyiwak mírak iwã taië obeja ena chibo ena baka. <sup>39</sup> Egiptowak tö Israel aleripa ka' e' yöktsã bet kè wã kawö meneat ie'pa a uloie, e' kueki ie'pa wã harinachka mir kè iwölöwoka tã'. E' wa ie'pa pan yué ñalã ki.

<sup>40</sup> Israel aleripa bak senuk Egipto duas doka cien tkëyök ki dabom mañayök (430). <sup>41</sup> Ie'pa sené Egipto duas doka cien tkëyök ki dabom mañayök (430) tas, etã e' nañewe wöshã tã ie'pa e' yélur Egipto a iditséwö wa iditséwö wa wes ñippökwakpa taië es. <sup>42</sup> E' nañewe Jehovahä tö ie'pa kkö'né buaë as ie'pa e' yölur Egipto a. E' kueki nañewe e' kéwö kawötã tkö'wë wöñine wa duas bit ekkë kekraë Jehovahä dalöioie.

#### *Wes Israel aleripa ké itsatkëne e' kéwö tkö'uk*

<sup>43</sup> Jehovahä tö iché Moisés ena Aarón a:

“Ye' tö a' tsatkeke egiptowak ulã a' kéwö tkö'uk a' kawötã i' es: Kã kua'ki wakpa esepa kè kawö tã' obeja ö chibo tteke a' tö e' kéwö ska' tã ese chkã katök. <sup>44</sup> Erë kã kua'ki wakpa wëpa ena alakölpa wëpa to'tsatke a' tö kanè mésoie ena e' wëpa tottola kkuölit tëule tsir, esepa è tö ikatëmi. <sup>45</sup> Erë kã kua'ki wakpa tso' shkar ö kaneblök inuköl klö'uk, esepa kè kawö tã' ikatök. <sup>46</sup> A' kawötã chkè e' katök weshkë. A' kè kawö tã' chkè e' tsukmi u'rki yës. Nies a' kè kawö tã' idichéwö pukwã. <sup>47</sup> Israel aleripa ulitane kawötã kawö e' tkö'uk. <sup>48</sup> Erë a' shua kã kua'ki wak tso' senuk esepa éna kawö e' tkö'wak a' tã Jehovahä dalöioie e' tã as itö itkö'ùñak. Erë kewe ie'pa tö iyamipa wëpa ulitane tso' ie' u a' e'pa keraë itöttola kkuölit tök tsir. E' ukuöki tã ie'pa kawö tkö'wëmi a' tã a' yamipaie. Erë wëpa kè tottola kkuölit tëule tsir esepa kè kawö tã' a' kawö tkö'uke e' chkè katök. <sup>49</sup> A' ulitane ena kã kua'ki wakpa serke a' shua e' kawötã ttè i' dalöiök ñikkëë.”

<sup>50</sup> Israel aleripa tö ttè i' kos iüté wes Jehovahä tö iché Moisés ena Aarón a es. <sup>51</sup> E' diwö Jehovahä tö Israel aleripa yélur Egipto iditséwö wa iditséwö wa wes ñippökwakpa taië es.

## 13

<sup>1</sup> Jehovahä tö iché Moisés a:

<sup>2</sup> “Israel aleripa ala'r wëpa kibi esepa kos dör batse'r ye' a. Nies a' iyiwak alã tsã wë'ñe e' kos dör batse'r ye' a. E' kueki e' kos bló ye' a.”

<sup>3</sup> Etã Moisés tö iché Israel aleripa a: “I'ñe Jehovahä tö a' yekettsã Egipto a ie' diché taië e' wa. Kã i' a' a' weine siarë kaneblök egiptowak a kè patuë tã'. E' kueki a' er anú diwö i' ska'. A' kè kawö tã' pan yöule iwölöwoka wa ese ñuk. <sup>4</sup> I'ñe a' e' yökettsã, si' i' kiè Abib e' a. <sup>5</sup> Mik a' demi kã muk Jehovahä kablë' se' yépa bak kã iaiã e'pa a ee, etã a' kawötã kawö i' tkö'uk si' i' a. Kã e' ki iyi ulitane tskir buaë, iwã wör buaë shutë. Kã e' dör canaánwak, hititawak, amorreowak, heveowak ena jebuseowak, e'pa kã. <sup>6</sup> A' kawötã kawö i' tkö'uk i' es: Kã kul shua a' kè kawö tã' pan yöule iwölöwoka wa ese ñuk. Kawö e' diwö bata, etã kawö tkö'weraë bua'ie Jehovahä dalöioie. <sup>7</sup> Kawö kul e' shua a' kè kawö tã' pan yöule iwölöwoka wa ese ñuk. Pan wölöwoka ena pan yöule iwölöwoka wa ese kos kè kawö tã' se'wë a' tö a' kã kos e' a. <sup>8</sup> E' diwö tã a' tö ichó a' ala'r a: Kawö e' tkö'weke se' tö, e' wã dör tö Jehovahä tö se' yë'lur Egipto a. <sup>9</sup> Ie' tö se' yë'ttsã Egipto a idiché taië wa, e' kueki se' dör ie' icha. Mik se' tö kawö e' tkö'weke, etã e' tö se' ulitane a ieri meraë as Jehovahä ttè

kᵢ se' er me'rie. E' dör wes se' e' wakyuò se' wötsa kᵢ ena se' ulà kkue kᵢ es. <sup>10</sup> E' kuëkᵢ a' kawöta kawö e' tkö'uk duas bit ekkë idiwö i' è wa.

<sup>11</sup> “Ká iaiäé Jehovahä tö iyë'at a' yépa a tö ie' tö canaánwak ká meraë a' a. Mik ie' wa a' demi ká e' a, <sup>12</sup> eta a' kawöta a' ala'r wépa kibi esepa kos blök ie' è a e'pa kos dör ie' icha, e' kuëkᵢ. Nies a' iyiwak parke kos wë'ñe, e' kibi kos e' dör ie' icha, e' kuëkᵢ ese kawöta blè ie' è a. <sup>13</sup> Eta obeja wë'ñe pupula ö chibo wë'ñe pupula e' mú a' tö burro alaki e' alà wë'ñe kibi e' skéie burro alà tsatkoie. Erë a' kè a e' patuak es, e' ta burro alà wë'ñe kibi e' kuli' púwa. Es a' kawöta a' ala'r wépa tsá kune esepa kos skéie iyiwak muk itsatkottsä. <sup>14</sup> Aishkuö ta mik a' ala'r tö a' chakeke tö: ‘¿Iók a' tö ikanewè i' es?’, eta iütó: ‘Jehová tö se' yë'ttsa Egipto a idiché taië e' wa. Eë se' bak weinuk siarë kaneblok kè patuè ta'. <sup>15</sup> Mik Egipto blú er tē'wa darërëë, ie' kè wa kawö mène se' a e' yöktsane ie' ká a, eta Jehovahä tö egiptowak ala'r wépa tsá kune e'pa kos ttélur. Nies iyiwak alà wë'ñe kibi e' kos ttéluritö. E' kuëkᵢ se' tö se' iyiwak alà wë'ñe kibi, ese kos meke Jehovahä a. Nies se' ala'r wépa tsá kune, ese skéie iyiwak mekesö Jehovahä a itsatkottsä. <sup>16</sup> E' kuëkᵢ kawö i' tkö'ú as kè a' éna ichöwa tö Jehovahä tö a' yë'ttsa Egipto a idiché taië e' wa. E' dör wes se' e' wakyuò se' wötsa kᵢ ena se' ulà kkue kᵢ es.’ ”

#### *Jehová tö Israel aleripa wëttseke mò wa*

<sup>17</sup> Mik Egipto blú tö Israel aleripa émi, eta Skéköl tö ibikeitsé tö Israel aleripa mú kè ñippò filisteowak ta, e' ta ie'pa bitumiane Egipto. E' kuëkᵢ ie' kè wa ie'pa wëttsenemi ñala michoë filisteowak ká a e' wa, e' dör ñala yësyësë. <sup>18</sup> E' kuëkᵢ ie' tö ie'pa wëttsemi bänet kamië ñala tköke ká sir po e' shua dötsa dayë kiè Dayë Mat e' ska'.

Israel aleripa e' yë'lur dapauleka wes ñippökwakpa taië e' e' dapa'ù es. <sup>19</sup> Moisés wa José sik këchke e' mítser ie'pa ta ñita. Kam José blërwa e' yöki ie' tö iyë' iëlpa a: “Moki Skéköl dörane a' tsatkök. Mik e' wà tka, eta ye' sik tsúmi a' ta.” Es ie'pa tö kawö mé ñi a. E' kuëkᵢ Moisés wa José sik mítser ie'pa ta.

<sup>20</sup> Eta Israel aleripa e' yélur ká kiè Sucot míyal ká kiè Etam, eë ie'pa e' tséat. Ká e' ate ká sir po e' kkömik tsinet. <sup>21</sup> Niwe ta Jehovahä tö ie'pa wëttseke mò àr taië alabo e' wa. E' mir ie'pa yöki kewe ñala kkachoie ie'pa a. Nañewe ta mò e' wöñarke bö'wöie dalöburke. E' wa ie'pa shkömir wes ká ñiwe es. <sup>22</sup> Niwe ta mò e' mir këkraë ie'pa yöki kewe. Nañewe ta mò e' wöñarke bö'wöie e' mir ie'pa yöki kewe.

## 14

#### *Israel aleripa tkattsä Dayë Mat a*

<sup>1</sup> Eta Jehovahä tö iché Moisés a:

<sup>2</sup> “Ichó Israel aleripa a: A' yüne a' itò wane ta a' e' tsúat ká kiè Pi-hahiroth e' wösha. Ká e' ate ká kiè Migdol ena dayë kkömik e' shusha, ká kiè Baal-sefón, e' wösha. E' wösha dayë kkömik tsinet úla yuó. <sup>3</sup> Es Egipto blú tö ibikeitseraë: ‘Israel aleripa kè wa ijcher wé imi'mirö. Ie'pa cholurmi ká sir po, e' shua.’ <sup>4</sup> Erë ye' tö ie' er terawa darërë as ie' tö a' tötiümi. Ye' e' alörakä ie' kᵢ ena iñippökwakpa kos kᵢ, e' wa ye' dalöierdaë taië. Egiptowak ulitane wa ijcherdaë tö moki ye' dör Jehovahä.”

Eta Israel aleripa tö iwakanewé es. <sup>5</sup> E' dalewa Egipto blú wöki ibiyò demi tö Israel aleripa tkayal. Ie' ena ikuëblupa erbikéne kuä'ki ta ichéraitö ñi a: “¿Wes se' tö ì wamblé i' es? ¿Iie se' tö Israel aleripa émi ta yi kaneblömiia se' a?”

<sup>6</sup> E' ukuökᵢ bet ta Egipto blú tö ikarreta tso' ñippoie e' tsuk patké ta iñippökwakpa patkéitö ñi dapa'uk. <sup>7</sup> Eta imía Israel aleripa itöki karreta ñippoie ibua'buä döka cien teryök (600) ekkë. Egipto karreta ñippoie e' malepa kos mírak iwa ñies. Karreta kos e' a ñippökwakpa wökir shköke ek ek. <sup>8</sup> Jehovahä tö Egipto blú er darë'wéwa as ie' mi' Israel aleripa itöki eré ie'pa yënettsa Egipto a Jehovahä diché taië wa.

<sup>9</sup> Etä Egipto ñippökwakpa mirwa kabaio ki, karreta ki, e'pa qos tö Israel aleripa tötiémi kuérakitö wé Israel aleripa tso' dayë kkömik ká kiè Pi-hahirof e' o'mik ena ká kiè Baal-sefón, e' wöshaë. <sup>10</sup> Mik Israel aleripa isuë tö egiptowak datse, e' tö ie'pa suawé taië. Ie'pa kköché taië Jehová a tö sa' tsatkó. <sup>11</sup> Moisés a ichéraitö:

—¿Ima be' iklö'wé pö kè ta' Egipto, e' kueki be' tö sa' yé'ttsa duökwá íe ká sir po shua? ¿Íök bö iwamblé es sa' ta? ¿Íie be' tö sa' yé'lur Egipto a? <sup>12</sup> Kuaë sa' tö be' a iyë' Egipto: 'Sa' múat kanablök bèrë egiptowak a. ¿Sa' weirke siarë kanablök egiptowak a, e' dör bua' sa' a duökulur íe ká sí poë a e' skéie!'

<sup>13</sup> Erë Moisés tö iüté:

—Kè a' tö egiptowak suëpaia. E' kueki kè a' suanuk. A' e' tkówa darërë. I'ñe Jehová tö a' tsatkeraë e' saü. <sup>14</sup> Kè se' tkinuk i ki. Jehová ñippöraë se' skéie.

<sup>15</sup> Jehová tö iché Moisés a:

—¿Kè be' kköchökiä ye' a! Ichó ie'pa a tö a' shkó wöwí è. <sup>16</sup> Be' shko kéli kóka dayë tsaka as dayë blatënar ñalaie shkotkö poppo dayë shua. <sup>17</sup> Erë ye' tö ie' er terawa darërë as ie' tö a' tötiümi. Ye' e' alöraka ie' ki ena ñippökwakpa qos ki, e' wa ye' dalöierdaë taië. Egiptowak ulitane wa ijcherdaë tö moki ye' dör Jehová. <sup>18</sup> Egiptowak ulitane wa ijcherdaë tö moki ye' dör Jehová.

<sup>19</sup> E' wöshaë ta Skököl biyöchökwak mirwa Israel aleripa yöki kewe e' e' mane'wéttsane ie'pa tsikkane. Nies mò àr taië alabo e' mía ie'pa tsikkane. <sup>20</sup> Es mò e' atë Egipto ñippökwakpa ena Israel aleripa e' shusha. Egiptowak kke mò ettaie dör ttsettseë, e' kueki ie'pa tso' ká ttsettse a. Erë Israel aleripa kke mò e' dalöburke taië ká ñiwe sü. E' kueki egiptowak kè ulà dë' Israel aleripa ska' e' nañewe.

<sup>21</sup> Etä Moisés ulà kékä dayë tsaka ta Jehová tö siwa' bitsiwéka darërë datse diwö tskirke e' éka. E' bitsine nañeë dayë ki. E' tö dayë blatée shusha. Es Jehová tö ká ulat poppo yué ñalaie dayë shua ie'pa a shkotkö. <sup>22</sup> Ie'pa tkami ká poppo a. Es dayë wötuki atë wí'kè io'kè.

<sup>23</sup> Etä egiptowak ñippökwakpa mirwa kabaio ki ena karreta ki e'pa qos tö Israel aleripa tötiémi dayë a. <sup>24</sup> E' bla'mi ká ñirketke etä mò wöñarke bö'wöie e' shua Jehová tso' egiptowak sauk. Ie' tö ie'pa suawéka taië e' tö ie'pa wöa ká chöwéka taië. <sup>25</sup> Nies ie' tö ie'pa karreta wöshki qos e' wötélur dó a as kè ishkö bet. Ie'pa tö iché ñi a:

—Mishka Israel aleripa yöki. Jehová tso' ñippök se' ta ie'pa tsatkoie.

<sup>26</sup> Jehová tö iché Moisés a:

—Be' ulà kóka dayë tsaka as iwöierwane Egipto ñippökwakpa ki.

<sup>27</sup> Moisés ulà kékä dayë tsaka. Mik ká ñine, etä dayë wöienewane es. Mik egiptowak mí tkökshkar, etä dayë wöienewa ie'pa ki. Es Jehová tö ie'pa ewéwa dayë a. <sup>28</sup> Es Egipto ñippökwakpa mineyal Israel aleripa itöki e'pa qos durulune seraä dayë a ikabaioë. Egipto blü ñippökwakpa e' kè atë yës ttsé'ka. <sup>29</sup> Erë Israel aleripa tkami buaë dayë a dò wíshet ká sí ki, dayë wötuki wí'kè io'kè e' shusha.

<sup>30</sup> E' kéwa Jehová tö Israel aleripa tsatkée egiptowak ulà a. Ie'pa tö egiptowak nu sué dayë kkömik. <sup>31</sup> Mik ie'pa tö isuë tö wes Jehová tö egiptowak ewéwa idiché taië e' wa, etä ie'pa tö ie' dalöie taië. Ie'pa er blé ie' mik ñies itteköl Moisés e' mik.

## 15

### *Moisés tö Jehová kikéka ttsè wa*

<sup>1</sup> Moisés ena Israel aleripa ttsé Jehová kikoka ttsè i' wa:

“Ye' ttsöke Jehová dalöioie.  
Kabaio taië ena iwákpa qos e' ewéwaitö dayë a.  
Es ie' e' alé taië shutë ie'pa ki.

<sup>2</sup> Ye' tso' ttsök Jehová è a.  
Ie' tö ye' a idiché mé. Ie' tö ye' tsatkée.

Ie' dör ye' Këköl. Ye' k̄awöt̄a ie' k̄ikök̄ka buaë.  
 Ie' dör ye' yé Këköl. Ye' tō ie' dalöieraë er mok̄i wa.  
<sup>3</sup> Ie' dör ñippökwak darërëë bua'ie.  
 Jehovah e' dör ie' kiè.

<sup>4</sup> Egipto blú karreta tso' ñippoie ena ie' ñippökwakpa  
 e'pa k̄os émi dayë a Jehovah tō.  
 Egipto blú ñippökwakpa bua'bu  
 e'pa k̄os duolur s̄e Dayë Mat a.  
<sup>5</sup> Ie'pa katsirulune dayë shua w̄es ák es.  
 Dayë iskië e' è me'r ie'pa ki.

<sup>6</sup> A Jehovah, be' ulà bua'kka diché taië,  
 e' wa be' tō be' bolökpa batsélor.  
<sup>7</sup> Ie'pa demi ñippök be' ta,  
 erë ie'pa k̄os ewéwa be' tō be' diché taië, e' wa.  
 Be' uluneka ie'pa ki,  
 ta ie'pa ñanewa w̄es kakö sí es.  
<sup>8</sup> Dayë wöikébö darërëë  
 ta iwöklönewaie wi'kè io'kè  
 mía w̄es k̄a ukuö es.  
 Dayë wöklönewa, kè shkoku'ia.  
<sup>9</sup> Be' bolök e' ttséka taië ta iché:  
 'Ye' mi' ie'pa itök̄i wéyö ikuérö  
 ta ee ì mirwarak iwa e' yerattsayö iulà a,  
 e' wà tierayö k̄os ye' ki ikiane ekkè.  
 Ye' tabè yerattsa iñaléka,  
 e' wa yö ie'pa tterawa.'  
<sup>10</sup> Erë be' tō dayë wöiké ta e' tō ie'pa ttélur.  
 Ikatsinewa dayë a w̄es tabechka es.

<sup>11</sup> A Jehovah,  
 ¡Wépa skà kiekerakitö “skëköl”, esepa k̄os tsata be' dör!  
 ¡Kè yi dör batse'r taië w̄es be' es!  
 ¡Kè yi diché ta' taië w̄es be' es!  
 ¡ì kè or yi a ese wè be' tō buaë, e' tō sulitane tkiwèwa!  
 ¡Sulitane k̄awöt̄a be' k̄ikök̄ka!  
<sup>12</sup> Be' ulà bua'kka kéka  
 ta íyök tō ie'pa maléwa.  
<sup>13</sup> Be' tō sa' tsatkée. Be' éna sa' dalër taië,  
 e' kuëki be' tso' sa' wëttsuk.  
 Be' wa sa' mi'ke be' diché wa dò wé be' wák serke ee.  
<sup>14</sup> Mik k̄a ulitane wakpa wa e' jchenewa,  
 eta ie'pa painuraë suane è wa.  
 Filisteowak krardawa suane è wa,  
<sup>15</sup> Edomwak wökirpa chkerdawa suane è wa,  
 Moabwak wökirpa painuraë taië.  
 Canaánwak ulitane kësik k̄os e' chörawa yës.

<sup>16</sup> A Jehovah, ¡as ie'pa tkirwa! ¡as ie'pa suar taië!  
 Be' diché wa as ie'pa at kè tiriä suane kuëki

dò mik sa' ulitane dör be' icha e'pa tka eta.

<sup>17</sup> A Jehová,

Sa' tseramibö doka be' kabata buaë e' a.

Eë sa' serdaë buaë kekraë.

Kabata e' shukitbö be' a senioie.

Eë be' wák e' wé yué e'dör yöbië.

<sup>18</sup> Jehová tso' se' wëttsuk s'blúie kekraë.”

*María tö Jehová kíkéká ttsè wa*

<sup>19</sup> Mik Egipto blú ñippökwakpa tkawa dayë a kabaio ki, karreta ki, eta Jehová tö dayë wöiwéwane ie'pa ki erë Israel aleripa tka buaë ká poppo a. <sup>20</sup> E' ukuöki ta Jehová tteköl kië María, e' dör Aarón kutà, e' tö ma'ma klö'wéwá ttsoie, ta alakölpa kos mí ie' itöki klötökerak es ima'ma blardami. <sup>21</sup> E' dalewa María ttsöke i' es:

¡A' ulitane ttsó Jehová kíkoka!

Kabaio ena iwákpa uyéwaitö dayë a.

Es ie' e' aléka ie'pa ki.

*Jehová tö di' bacha'bachaë e' bua'wéne.*

<sup>22</sup> Moisés tö Israel aleripa ké e' yöktsa Dayë Mat e' kkömik. Ie'pa míyal ká sir poë kië Sur e' a. Eë ie'pa shkére ká mañat eta kè ie'pa wa di' kune yè yës. <sup>23</sup> Mik ie'pa demi ká kië Mará, eta eë di' tso' bacha'bachaë, kè yar ie'pa a. E' kuëki ká e' kië mékarakitö Mará\*

<sup>24</sup> Eta Israel aleripa tö Moisés chémi suluë. Moisés chakérakitö: “¿Ì yèmisö?” <sup>25</sup> Eta Moisés tö Jehová a ikié tö sa' kimú. Eta Jehová tö ie' a kal tsitsir kkaché elka e' iéwaitö di' a eta di' baché chowa de buaë yè.

Eë Jehová tö ittè dalöiëno mé ie'pa a, ñies ie'pa ma'wéitö isuöie tö ie'pa tö idalöiëmi. <sup>26</sup> Ie' tö iché ie'pa a: “Ye' dör Jehová. Ye' dör a' Kéköl. Ye' dör a' bua'ukwak. Ì cheke ye' tö a' a e' ttsé a' tö, e' iuté a' tö ñies a' sené buaë wes ye' ki ikiane es, e' ta ye' kè tö a' we'ikepa ì sulu patké'yö egiptowak ki ese wa.”

<sup>27</sup> E' ukuöki ta ie'pa demi ká kië Elim. Eë di' tum tso' döká dabom eyök ki böt (12). Ñies ì klö tso' dikó klö sù ese tso' dabom kuryök (70). Eë ie'pa e' tséat di' kkömik tsinet.

## 16

*Jehová tö Israel aleripa tié chkè kië maná e' wa*

<sup>1</sup> E' ukuöki ta Israel aleripa ulitane e' yélur ká kië Elim míyal ká sir poë kië Sin eë. Ká e' ate Elim ena Sinaí, e' shusha. Ie'pa e' yé'ttsa Egipto e' ki si' de et ki shaböts. <sup>2</sup> Eta eë ká sir poë shua ie'pa ttémi taië késik wa Moisés ena Aarón ki. <sup>3</sup> Ie'pa tö iché iarak:

—Jehová tö sa' ttópalur Egipto! Eë sa' e' tulökeser ù tukurá wà iëule chikchië chkè wa e' o'mik ta sa' bak iwà katök wè' kos sa' ki ikiane ekkè. Erë a' wa sa' dè'bitu ká sir po i' a sa' ulitane ttowá bli wa.

<sup>4</sup> Jehová tö iché Moisés a:

—Súyö pan da'wè siwa' ki a' a. E' shtó ká bit ekkè. Erë ishtó kos ñnar ká etkè ekkè è. Ye' ki ikiane suè tö wépa tö ye' ttò iütèmi ena wépa kè tö ye' ttò iütepa. <sup>5</sup> Ká de teröl e' bule es ta a' tö chkè kí shtó wè' katar ká böt ekkè. Es a' tö iü kekraë.

<sup>6</sup> Eta Moisés ena Aarón tö iché Israel aleripa a:

—Ì ñe tsáli ta a' tö isueraë tö moki Jehová tö se' yé'lur Egipto a. <sup>7</sup> A' ttöke késik wa e' ttsé ie' tö, e' kuëki bule bla'mi ta ie' wák olo taië dalölöë e' sueraë a' tö. Ì cheke ie' tö sa' a e' è chökne sa' tso' a' a. E' kuëki a' kè ulurku' sa' ki. A' ulurke ie' ki.

<sup>8</sup> Ñies Moisés tö iché iarak:

\* 15:23 Mará: Hebreoie Mará e' wà kiane ché ì bacha'bacha.



—A' ulurke tajë e' sué Jehová tö. E' kuëki i'ñe tsáli ta ie' tö iyiwak chkà patkeraë a' a. Bule bla'mi ta pan patkeraëitö a' a ñè tajë kos a' ki ikiane ekkë. Sa' kè dör yi, as a' ulur sa' ki. A' ulurke Jehová ki.

<sup>9</sup> E' ukuöki ta Moisés tö iché Aarón a:

—Ichó Israel aleripa a tö a' ttöke kësik wa e' ttsé Jehová tö e' kuëki a' e' dapa'ú Jehová wörki.

<sup>10</sup> Aarón tso' ttök ie'pa ta, e' dalewa ie'pa ulitane ká sué ká sir po e' ëka. Ie'pa isué tö Jehová olo dalölöë dettsa mò tso' ie'pa wëttsuk e' a. <sup>11</sup> Eta Jehová tö iché Moisés a:

<sup>12</sup> —Israel aleripa ttöke kësik wa, e' ttséyö. Be' ttó ie'pa ta, ta ichó iarak: 'I'ñe tsáli a' tö iyiwak chkà kateraë. Bule bla'mi ta a' tö pan ñeraë kos a' ki ikiane ekkë. Es a' wa ijcherdaë tö ye' dör Jehová, e' dör a' Këköl.'

<sup>13</sup> Ká e' tsáli ta tajë dù debitu kälö sù. E' tö wé ie'pa serke e' wà iéwa seraa. Eta bla'mi ta upa kos shkene mò wöli è. <sup>14</sup> Mik mò wöli kaneka, eta itöa iski ì atë taklaie sabubula. <sup>15</sup> E' kè suule Israel aleripa wa. E' kuëki mik ie'pa tö isué, eta ie'pa tö iché ñi a: "¿Dió dör ì?" Eta Moisés tö iché iarak:

—E' dör pan mé Jehová tö a' a ñè. <sup>16</sup> Ie' tö iché tö a' kawöta iuk i' es: A' tö ishtó eköl eköl kos a' tso' u a e' a ñar ekkë è. Ishtó skátke böt ulatök wák eköl eköl a.

<sup>17</sup> Eta Israel aleripa ishté wes ikéwö mène es. Welepa tö ishté bërëbërë, welepa tö ishté kibiie. <sup>18</sup> Mik ie'pa tö ima'wé, eta wé tö ishté tajë ese icha kè bata atë. Wé tö ishté bërëbërë ese icha deka wé'. Ie'pa ulitane tö ishté eköl eköl kos ñar ekkë è. Es sulitane iñé wé'.

<sup>19</sup> Moisés tö iché ie'pa a: "Kè a' kawö ta' pan e' blök dò bule es."

<sup>20</sup> Erë welepa kè wa Moisés ttò iutène. E'pa tö icha bata blé dò bule es. E' a öña iëneka ena ilabuneka suluë. E' kuëki Moisés uluneka ie'pa ki.

<sup>21</sup> Mik diba ba'nebitu, eta pan e' diarolone, e' kuëki ie'pa wakpa bik tö ishteke bla'mi kos ñar ekkë. <sup>22</sup> Erë mik ká de teröl, eta ie'pa ishté dò ñar ká böt ekkë. E' dör skátke tkél wák eköl eköl a. Eta Israel aleripa wökirpa mía ichök Moisés a. <sup>23</sup> Eta Moisés tö iché ia:

—Jehová tö iché tö a' kawöta iuk i' es: Bule dör eno diwö. Diwö e' dör se' a ie' dalöioie. A' kè kawö ta' ulök e' diwö wa. E' kuëki ì aleke a' tö e' aló i'ñe. Ibata atë e' bló ñè bule.

<sup>24</sup> Eta ie'pa tö iwé wes Moisés tö iché es. Ie'pa tö chkè bata e' blé dò bule es. Eta kè ilane sulu, kè ia öña iëneka. <sup>25</sup> Eta Moisés tö iché ie'pa a:

—I'ñe dör eno diwö e' dör se' a Jehová dalöioie. I'ñe kè ì kuëpa a' tö ñè u'rki. E' kuëki chkè bata atë e' è ñú. <sup>26</sup> A' ishtëmi kekraë dò ká teröl. Erë e' bule es dör eno diwö, e' diwö kè a' tö ì kuëpa u'rki.

<sup>27</sup> Eta eno diwö shua ie'pa welepa míyal chkè shtök, erë kè iwa ì kune yës. <sup>28</sup> Eta Jehová tö iché Moisés a:

—¿E' ma kos a' tö ye' ttè dalösewemirö? <sup>29</sup> A' éna ianú tö ye' dör Jehová, ye' tö eno diwö me'atbak a' a. E' kuëki eno diwö e' chkì es ye' tö a' a chkè meke tajë ñè ká böt ekkë. E' kuëki a' ulitane kawöta senuk weshke è eno diwö wa. Kè a' patkëne bánet.

<sup>30</sup> E' kuëki Israel aleripa enuke diwö e' wa, kè kanëblënerak.

<sup>31</sup> Israel aleripa tö chkè shteke e' kiè méka maná\* Iwà chkà dör saruruë wes suiyök es. E' dör blo'bloë wes pan yöule bul alí wa es.

<sup>32</sup> E' ukuöki ta Moisés tö iché:

—Kanè i' me' Jehová tö se' a: 'Maná e' ió skátke böt ekkë ta ibló a' aleripa a kkachè as ie'pa tö chkè me' ye' tö a' a ká sir poë e' a mik a' yé'ttsayö Egipto eta, e' saù.'

<sup>33</sup> Eta Moisés tö iché Aarón a:

—Tka' klö'ú et, e' a maná ió skátke böt ekkë. E' bló Jehová wörki as a' aleripa tö isaù.

\* 16:31 maná: Hebreoie maná e' wà kiane chè ¿Dió dör ì?

<sup>34</sup> Età Aarón tò maná e' blé wé Jehovah á íyi tso' blëule, e' kélkuö wöshäë wes Jehovah tò iyë' Moisés a es.

<sup>35</sup> Israel aleripa bak maná ñuk dò mik ie'pa demi wé pë' serke ee eta. E' dör Canaán kkömik. Ie'pa bak maná ñuk duas döka dabom tkëyök (40) seraä.

<sup>36</sup> (Í wa Israel aleripa tò maná ma'wè, e' kiè ie'pa tò gomer. E' wà dör skátke blublu böt ekkë. E' dör litro böt ulatök.)

## 17

### *Ák a di' dettsa*

<sup>1</sup> Israel aleripa ulitane e' yélur ká sir po kiè Sin ee ta imía ñalá kī enaena wes Jehovah tò iyë' iarak es. Ie'pa demirak ká kiè Refidim, ee ie'pa e' tséat. Erë ee di' kè ta' ie'pa a yè.

<sup>2</sup> E' kuekī ie'pa tò Moisés a di' kié kësik wa. Ie'pa tò iché ie' a:

—¡Sa' a di' mú yè!

Moisés iiüté:

—¿Ì kuekī a' tò ye' a di' kié kësik wa? ¿Ílök a' tò Jehovah wöñatkeke?

<sup>3</sup> Ie'pa ersine taië e' kuekī ie'pa tò di' kiekerak kësik wa Moisés a. Ie'pa tò iché ie' a:

—¿Ílök be' tò sa' ena sa' ala'r ena sa' iyiwak e' yë'lur Egipto a ttëwä ersir wa?

<sup>4</sup> Età Moisés kköché taië Jehovah a ta' ichéitö ia:

—¿Wes ye' ie'pa i' wëmi? ¿Tsir eta' ie'pa ye' ttëwä ák wa!

<sup>5</sup> Jehovah tò iiüté:

—Be' yú ie'pa wëttsë keweie. A' kueblupa welepa tsúmiñak. Be' shko kéli wa be' tò di' kiè Nilo e' buk, e' tsúmi. <sup>6</sup> Be' yú Horeb kébata\* a. Ee ye' be' paneke ák bërie tso' e' ska'. Mik be' tò ák e' ppé be' shko kéli wa, eta' di' dörattsa taië ie'pa a yè.

Età es Moisés tò iwakanewé Israel aleripa kueblupa wörki. <sup>7</sup> Israel aleripa tò di' ki' kësik wa, e' kuekī Moisés tò ká e' kiè méka Meribá.† Nies ie'pa tò iyë', “Sa' kè wä iklöne tò Jehovah tò sa' kimèmi.” E' kuekī Moisés tò ká e' skà kiè méka Masá.‡ Ee ie'pa tò Jehovah wöñatkë' e' kuekī.

### *Amalec aleripa ñippé Israel aleripa ta*

<sup>8</sup> Amalec aleripa debitu ñippök Israel aleripa ta Refidim. <sup>9</sup> Moisés tò iché Josué a:

—Be' tò se' wëpa welepa shushtó tsúmi ñippök Amalec aleripa ta. Bule ye' tso' kabata wöbata kī Skëköl shko kéli yaar.

<sup>10</sup> Età Josué tò iwakanewé wes Moisés tò iché ia es ta imíyal ñippök Amalec aleripa ta. E' dalewa Moisés ena Aarón ena Hur míyal kabata wöbata kī. <sup>11</sup> Mik Moisés ulà kéka, eta' Israel aleripa e' alöke ibolökpa kī. Erë mik ie' ulà éwa, eta' Amalec aleripa e' alöke ie'pa kī. <sup>12</sup> Ie' ulà shtrinewä taië, e' kuekī ie'pa ák yulé ie' a e' tkoie. Nies Aarón ena Hur e'pa tò ie' kimé iulà böt kökka siwa' kī as kè ishtrirwa. Es ie' ulà se'wé ñië siwa' kī dò katuine ekkë. <sup>13</sup> Es Josué ena Israel aleripa e' aléka Amalec aleripa kī tabè wa.

<sup>14</sup> Età Jehovah tò iché Moisés a:

—A' ñippé i' e' pakè shtóka yëkkuö kī as a' wakpa kè éna ichöwa kekraë. Ichó Josué a tò ye' tò Amalec aleripa ulitane ewerawa yës.

<sup>15</sup> Età Moisés tò ák dapa'wéka ka'ie et iyiwak ña'woie Jehovah dalöioie. E' kiè mékaitö “Jehová diché wa se' e' aléka.”§ <sup>16</sup> Ie' tò iché:

“¡Ye' ulà kéka Jehovah a ikiök as ie' tò se' kimù!  
¡Jehová ñippöraë Amalec aleripa ta kekraë!”

E' kuekī ie' tò ikiè méka es.

\* 17:6 Horeb kébata: Kábata e' kiè nies Sináí kébata. † 17:7 Meribá: Hebreoie kiè e' wà kiane chë ñippé. ‡ 17:7 Masá: Hebreoie kiè e' wà kiane chë s'ma'wè. § 17:15 Jehovah diché wa se' e' aléka. Iwakpa ttò wa Moisés tò ikié Jehovah nisi, e' wà kiane chë Jehovah dör ye' bandera. Wësua e' kiéitö es ie' ulà kéka Jehovah a wes bandera kèka es, e' wa ie'pa e' aléka e' kuekī.

## 18

*Jetró de Refidim Moisés pakök*

<sup>1</sup> Jetró dör ká kiè Madián e' sacerdote ena Moisés nuaki.\* Kòs Skèköl tö Moisés ena Israel aleripa kime', e' jcher ie' wà. Nies ie' wà ijcher tö wes Jehovahä tö Israel aleripa yè'lur Egipto a. <sup>2</sup> Moisés tö ilaköl Séfora e' patkè'mi iyé ska'. <sup>3</sup> Ie' tö ilà busi kiéwà buaë ila'r böl ta. Séfora alà eköl kiè Guersón. Moisés tö iyé': "Ye' sene' ká kuà'kì kì wes ká kuà'kì wakpa es." E' kuèkì Moisés tö ikiè méka Guersón† <sup>4</sup> Ilà eköl kiè Eliézer. Moisés tö iyé': "Ye' yé Kèköl e' dè'bitu ye' kimuk. E' tö ye' tsatkè' Egipto blú ulà a." E' kuèkì ie' tö ikiè méka Eliézer‡

<sup>5</sup> Moisés úla yuéka Skèköl kébata o'mik tsinet. Eta eë inuaki Jetró e' de Moisés alaköl ena ila'r böl, e'pa ta. <sup>6</sup> Jetró tö iché Moisés a:

—Ye' dör Jetró, be' nuaki, ye' debitu be' pakök. Be' alaköl ena be' ala'r böl e'pa de ye' ta nies.

<sup>7</sup> Moisés e' yéttsa ta inuaki shké'wéitö buaë dalöie wa wöalattsè wa. E' ukuöki ta idewarak weshké. <sup>8</sup> Wes Jehovahä tö Israel aleripa tsatké Egipto blú ena egiptowak ulà a nies wes ie' tö ie'pa kkö'né ì sulu tka ie'pa ta ñala wa eta, e' kòs paké Moisés tö inuaki a.

<sup>9</sup> Kapakè e' tö Jetró ttsé'wé buaë. Jehovahä er bua' ché taië Israel aleripa a. Ie' tö ie'pa tsatkè'lor egiptowak ulà a. E' kuèkì Jetró ttsé'ne buaë. <sup>10</sup> Ie' tö iché Moisés a:

—As sulitane tö Jehovahä kikòka. Ie' tö be' ena be' wakpa kòs tsatkè'lor buaë Egipto blú ena egiptowak ulà a. <sup>11</sup> Ire' ye' tö isué tö mokì Jehovahä dör wépa kiekerakitö "skèköl" esepa ulitane tsata. Yi bak a' we'ikök kèsik wa, e'pa kòs we'ikéitö siarè.

<sup>12</sup> Eta Moisés nuaki, Jetró, e' tö iyiwak klö'wéwà etö ña'wéitö Jehovahä a idalöioie. Nies íyi skà méitö ie' a idalöioie. E' ukuöki ta Aarón ena Israel aleripa kuèblupa debitu chkök Moisés nuaki ta Jehovahä dalöioie.

*Moisés tö s'shulökwakpa kí yulé*

<sup>13</sup> Bule es ta Moisés e' tkéser ikula' kì Israel aleripa shulök. Ie'pa e' dapa'wé iëter ie' wörki ñiè bla'mi dò tsáli as Moisés tö ishulörak. <sup>14</sup> E' kòs sué Moisés nuaki tö ta ichéitö Moisés a:

—¿Ì wamblök be' tso' ie'pa ta? Be' è e' tkéser ie'pa shulök ta ie'pa iëter ñiè be' panuk.

<sup>15</sup> Moisés tö iüté:

—E'ma ie'pa wák de ye' ska' ittök tö ima Skèköl tö ichè. <sup>16</sup> Mik ie'pa wèlepa ñippöke ñita, eta ie'pa datse ye' ska' ta ye' tö ie'pa ttè shuleke. Nies ye' tö ie'pa patteke Skèköl ttè wa.

<sup>17</sup> Moisés nuaki tö iché ia:

—Wes be' tö iweke e' kè dör buaë. <sup>18</sup> Be' shtrirwami. Nies ie'pa tso' be' wörki e'pa shtrirwami. Kanè e' e' alökami be' kì. Kè be' a iwöklönuk ekörla. <sup>19</sup> A Moisés, ye' tö be' patteke e' ttsó. As Skèköl tö be' kimù. Be' kawöta ttök Skèköl ta ie'pa skéie. Be' kawöta ie'pa ñippöke e' chök Skèköl a as ie' tö ichè be' a tö wes ishuleke. <sup>20</sup> Ie'pa wöbla'ú Skèköl ttè wa. Ikkachó ie'pa a wes ie'pa kawöta senuk yësyësë. Ichó ie'pa a tö ì kiane Skèköl kì tö ie'pa tö iwè. <sup>21</sup> Erè be' kawöta a' wèpa shushtök tseë be' kimuk ttè shuloie. Wèpa serke yësyësë, Skèköl dalöieta' taië, kè e' watauta'ttsa ì sulu wambloie, esepa shushtó Israel aleripa shulök be' ta. Ishulökwakpa blató i' es. Israel aleripa mil biyök (1000) e' kòs kì ishulökwakpa múka eköl eköl. Mil biyök e' kòs blabatsólor cien eyök (100) cien eyök doka dabop. Cien biyök e' kòs kì ishulökwakpa múka eköl eköl. Cien biyök e' kòs blabatsólor dabom skeyök (50) dabom skeyök. E' kòs kì ishulökwakpa múka eköl eköl. Dabom skeyök kòs e' blabatsólor dabom eyök dabom eyök doka skel. E' kòs kì ishulökwakpa múka eköl eköl. <sup>22</sup> Ie'pa tö Israel aleripa kòs ttè shuleraë kekraë be' skéie. Erè ttè wé kè shulinuk

\* 18:1 Jetró: E' kiè nies Reuel, e' dör Moisés tayé kiè Séfora e' yé. Éxodo 2.21 saú. † 18:3 Guersón: Hebreoie s'kiè Guersón wà kiane ché ká kuà'kì wak. ‡ 18:4 Eliézer: Hebreoie s'kiè Eliézer wà kiane ché ye' Kèköl dör ye' kimukwak.

ie'pa a ese bituraë ie'pa wa be' ska' shulè. Ttè wé shulirmi ie'pa a e' ta ese shuleke ie'pa tö. Eta es be' ki kanè e' öshtëmi. Ie'pa tö be' kimèmi kanè e' wa. <sup>23</sup> Skëköl tö be' ké iwakanéuk, ñies be' tö iwakanewé es, e' ta be' a ikatatkërmi. Ñies Israel aleripa kos mi'mine iu a ttsë'ne buaë.

<sup>24</sup> Eta Moisés tö inuaki ttò iuté. Iwakanewéitö wes inuaki tö iché ia es. <sup>25</sup> Ie' tö Israel aleripa shua wëpa didir ese shushtë. E'pa mékaitö Israel aleripa shulökwakpaie. Welepa meneka mil biyök e' kos ki ishulökwakpaie. Welepa skà meneka cien biyök e' kos ki ishulökwakpaie. Welepa skà meneka dabom skeyök e' kos ki ishulökwakpaie. Welepa meneka dabom eyök e' kos ki ishulökwakpaie. <sup>26</sup> Ie'pa tö Israel aleripa ttè shuleke këkraë. Ttè wé darërëë, ese mí ie'pa wa Moisés a shulè. Eta ttè wé tottola, ese shuleke ie'pa tö. <sup>27</sup> E' ukuökü ta Moisés nuaki e' chéat ie' a ta imiane ikaska'.

## 19

### *Israel aleripa demi Sinai*

<sup>1-2</sup> E' ukuökü ta Israel aleripa e' yélur Refidim a demirak Sinai. Ie'pa e' yè'lur Egipto, e' ki si' de böt kí ká et. Sinai dör ká sir poë. Eë ie'pa e' tséat Sinai kébata o'mik tsinet. <sup>3</sup> Eta Moisés mía kabata a ttök Skëköl ta. Eë Jehová tö ikié ta ichéitö ia:

—Ttè cheke ye' tö be' a e' chône Israel aleripa a. E'pa dör Jacob aleripa. <sup>4</sup> Ichó ie'pa a: 'Ye' tö egiptowak we'ik e' su' a' tö. Ñies a' wa ijcher tö wes ye' wa a' dë'bitu buaë íe ye' wörki wes pu wa ilala mi' ipik ki es. <sup>5</sup> Ká ulitane wakpa dör ye' icha. Erë ye' ttò iuté a' tö seraä, ñies ttè mekesö ñi a e' wà iuté a' tö buaë, e' ta ká ulitane wakpa shua a' döraë ye' icha chókíe. <sup>6</sup> A' döraë ye' sacerdotepaie. A' döraë batse'r ye' a.' Ttè i' kos chó Israel aleripa a.

<sup>7</sup> Eta Moisés biteane, e' tö Israel aleripa kueblupa kos dapa'wé. Ì ché Jehová tö ie' a e' kos chéneitö ie'pa a. <sup>8</sup> Ie'pa ulitane tö iüté ñikkëë:

—Ì kos ché Jehová tö e' wà iüteraë sa' tö.

Eta Moisés míane ttè e' chökne Jehová a. <sup>9</sup> Eta Jehová tö iché ia:

—Ye' ttò ttsó. Mochka tërdawa kabata ki taië e' shua ye' datse ttök be' ta as Israel aleripa ulitane tö ye' ttöke be' ta e' ttsö. Es ie'pa tö be' ttè klö'weraë këkraë.

Eta ima Israel aleripa tö iüté e' chéne Moisés tö Jehová a. <sup>10</sup> Jehová tö iché ia:

—Be' yú Israel aleripa batse'uk i'ñe ena bule. Ñies ichó iarak: 'a' datsi' skuólor.' <sup>11</sup> Ye' dör Jehová, e' datse böiki Sinai kébata a ie'pa ulitane wörki, e' kueki ie'pa batse'ú as ie'pa tso' batse'r böiki yöki. <sup>12</sup> Kabata wakyuó shkit as kè yi mi'tkö e' wishet. Ichó iarak: 'A' kè a kawö ta' shkökwa iwakyöne e' wishet. Ñies a' kè a kawö ta' shkökwa tsinet ipamik. Wëpa tkawa e' wishet esepa duörawa. <sup>13</sup> Yi míwa eë ese kè kawö ta' kè ulà wa. Ese kawöta ttëwa ak wa ö sulè wa. Kè a' tkinuk tö se' idir ö iyiwak idir, a' kawöta ittökwa. Mik a' tö duk blar ttsé e' è ta a' dömiwa tsinet kabata o'mik.'

<sup>14</sup> Eta Moisés biteane tö Israel aleripa batse'wé ta ie'pa ulitane datsi' skuélor. <sup>15</sup> Moisés tö iché ia:

—A' ulitane e' kkö'nú batse'ne böiki yöki. E' dalewa kè a' senukka alakölpä ta.

<sup>16</sup> Böiki es bla'mi ta kabata a ká wöñane alá blane taië. Mò taië dettsa kabata e' ki. Ie'pa tö ittsé tö duk blane taië, e' tö ie'pa suawé taië painékaie. <sup>17</sup> Eta Moisés tö Israel aleripa tso'rak iwakpa u a e'pa yélur tsémi Skëköl wörki. Ie'pa e' wöklö'wërak kabata kuli' a tsinet. <sup>18</sup> Jehová dettsa Sinai kébata ki bö' shua, e' kueki kabata e' mía shkle ème. Shkle e' wër wes të shkle butrò es. Kabata kos wötirke darërëë. <sup>19</sup> Duk kí blarke taië shute. Moisés ttöke ta Skëköl tö ie' iüteke alá blar ttsëë.

<sup>20</sup> Jehová dettsa kabata kakkeë, e' wöbata ki ta Moisés kiékaitö eë. Moisés tkaka eë, <sup>21</sup> ta Jehová tö iché ia:

—Be' e' ówane ta' ichó ie'pa a: 'Kè a' tkökbitu wé iwakyöule e' ioshet ye' weblök dö' ie'pa duòlur taië.' <sup>22</sup> Ñies wépa kaneblöke ye' a' sacerdotepaie esepa kawöta e' batse'uk buaë dö' ñies ye' tö ie'pa ttèlurmi.

<sup>23</sup> Età Moisés tö Jehová iüté:

—Be' tö sa' ké iwakyuök as kè ie'pa döwa kabata a tsinet. E' kueki kè ie'pa bitúpa kabata i' a.

<sup>24</sup> Età Jehová tö iché Moisés a:

—Be' yúne ta' Aarón tsúbitu e' ta. Erë a' sacerdotepa ena Israel aleripa malepa e'pa kè kawö ta' shkökbitu wé ye' tso' ee dö' ye' tö ie'pa ttèlur.

<sup>25</sup> Età Moisés biteane Israel aleripa ska' ta' à ché Jehová tö ie' a e' chéne ie' tö ie'pa a.

## 20

### *Ttè dalöiëno döka dabop*

<sup>1</sup> Skököl tté ta' ichéitö i' es:

<sup>2</sup> “Ye' dör Jehová. Ye' dör a' Kököl. Ye' tö a' yé'lur Egipto wé a' bak weinuk siarë kanè wa ee.

<sup>3</sup> “Kè a' kawö ta' kékölpa skà dalöiök. Ye' è dalöiö a' Kékölie.

<sup>4</sup> “Kè a' kawö ta' à diököl yuök dalöië yës. à kos tso' ká jai a ena ká i' a ena dayë a ena iyök dikia, e' kos diököl kè yuar a' tö dalöië. <sup>5-6</sup> Ye' dör Jehová. Ye' dör a' Kököl. A' tö kékölpa kua'ki dalöië, e' kè dalë'ttsénuk ye' a. Wépa ye' suë suluë esepa we'ikeraëyö, ñies ileripa dö inukökopaë e'pa we'ikeraëyö. Erë wépa tö ye' dalëritseke ena ye' ttè dalöiëno e' iuteke, esepa ena iëtkuöpa döka mil e' dalëritseraëyö. E' kueki kè a' e' tulökwa kuchewö ki iyi ñekkë kos wörki idalöioie.

<sup>7</sup> “Ye' dör Jehová. Ye' dör a' Kököl. Ye' kiè kè aritsar éanas iyi sulu wambloie. Yi tö e' wamblé ese wák we'ikeraëyö.

<sup>8</sup> “Éno diwö e' bló Ye' è dalöioie. E' kè chökwa a' éna. <sup>9</sup> Semana bit e' a kawö tso' kul. Kawö teröl e' dör a' wákpa a kanebloie. <sup>10</sup> Erë kawö teröl e' bule es e' dör éno diwö ye' dalöioie. E' kéwö a a' kè kawö ta' kaneblök. Ñies a' ala'r ena a' kanè mésopa ena a' iyiwak ena ká kua'ki wakpa serke a' ska', e'pa kos kè kawö ta' kaneblök e' diwö a. <sup>11</sup> Ye' dör Jehová. Ye' tö ká i' ena ká jai ena dayë ena iyi ulitane e' kos yö' ká teröl shua. E' bule es ta ye' eni', e' kueki kawö e' batseoyö me'atyö a' a éno diwöie ye' dalöioie.

<sup>12</sup> “A' yé ena a' mi e'pa dalöiö as a' ser ká taië ká mekeyö a' a e' a.

<sup>13</sup> “Kè a' kawö ta' s'ttökwa.

<sup>14</sup> “Kè a' kawö ta' s'senewabak dalöseukwa.

<sup>15</sup> “Kè a' kawö ta' akblök.

<sup>16</sup> “Kè a' kawö ta' s'kkatök kachè wa.

<sup>17</sup> “Kè a' kawö ta' o'ka u kkechök. Ñies ilaköl ena ikanè mésopa, alakölpa ö wépa, ena iyiwak kos ena à kos tso' iwa, ese kè kkechar.”

### *Israel aleripa suane Skököl yöki*

<sup>18</sup> Mik Israel aleripa ulitane tö alá blarke e' ttsé ena iwöñarke e' sué ñies duk blarke taië e' ttsé ena shkle butrökeka taië kabata a e' sué, età e' yöki ie'pa suane taië painékarak taië. Ie'pa iëter isaük kamië. <sup>19</sup> E' kueki ie'pa tö iché Moisés a:

—Be' ttó sa' ta, età sa' tö be' ttò dalöieraë. Erë kè sa' ki ikiane tö Skököl ttò sa' ta dö' sa' duòlur.

<sup>20</sup> Moisés tö iüté:

—Kè a' suanuk. Skököl dettsa a' ma'uk isuöie tö moki a' tö ie' dalöieke. Ie' ki ikiane tö a' tö ie' ttò dalöië as kè a' tö à sulu wamblö.

<sup>21</sup> Ie'pa atë isaük kamië. Moisés è mía tsinet mò taië wé Skököl tso' ee.

## Jonás dör Jehová ttéköl e' pakè

### Jonás

Yëkkuö i' tō se' a ipakè tō ì bak Israel aleri eköl kiè Jonás e' ta. Ie' kanèblè' Skèköl ttékölíe duas cien paryök ena duas cien kuryök kī dabom skeyök (800-750 AC) e' shū ulatök kam Jesucristo kūr e' yöki.

Skèköl kè wā ie' patkène Israel aleripa malepa pattök wēs Skèköl ttékölpa malepa patkèitö es. E' skéie ie' tō ie' patkè' ká kiè Nínive, e' wakpa pattök. Nínive dör ká kiè Asiria e' ká kibi. Asiria wakpa dör Israel aleripa bolökpa kibi. Ie'pa serke suluë taië shütē Skèköl wōa. E' kueki ie' tō Jonás patké ichök ie'pa a tō ká de dabom tkëyök etā ie'pa erdawa. Jonás wā ijcher tō Skèköl tō s'suè er siarè wa. Ie' ibikeitsé: “Nínive wakpa er mane'wé, e' ta ie'pa nuì olo'yeraè Skèköl tō ie'pa kī.” Erè ie' kī ikiane tō Skèköl tō ie'pa ewèwa, e' kueki ie' kè shkakmi ie'pa pattök. E' skéie ie' tō ima'wé tkökshkar bānet Skèköl yöki. Erè Skèköl tō ie' wöklö'wé ta ipatkémi Nínive wakpa pattök wake'. Ie'pa er mane'wé, e' kueki Skèköl kè wā ie'pa eonewa.

Yëkkuö i' wa se' éna iane tō Skèköl tō ká ulitane wakpa suè er siarè wa. Ì sulu wamblekesö ese nuì olo'yak ie' éna se' kī. Ie' kī ikiane tō se' er mane'ù ie' a as kè ie' tō se' we'ikò.

#### *Jonás kè éna Jehová ttò iutak*

<sup>1</sup> Etökicha ta Jehová tō iché itteköl kiè Jonás dör Amitai alà, e' a: <sup>2</sup> “Be' yú ká kibi kiè Nínive eē, ta ichó ká e' wakpa a wēs a' e' wamblö e' dör suluë ye' wōa, e' kueki ye' tō a' ewerawa.”

<sup>3</sup> Erè ie' kè éna Jehová ttò iutak. E' kueki ie' tkashkar iyöki. Ie' mía dayè kkömik ká kiè Jope wé kanò irirke eē. Eē ie' tō kanò kué etö mitke ká kiè Tarsis e' patuèitö shkomi ta ie' e' iéka iki ta imía.

<sup>4</sup> Erè Jehová tō sèrkè patké ie'pa kī taië darèrèè. E' tō kanò uyé taië dò wēsua itskirwami. <sup>5</sup> Etā kos ie'pa tso' kanò a, e'pa suane taië. Ie'pa eköl eköl tō ikieke aneule iwák kèköl a: “¡Sa' tsatkó, sa' tsatkó!” Etā dalì kos tuléttsami dayè kī as kè kanò katsirwā.

Erè Jonás e' a'wa kanò shūa dalì bló wé a, eē ie' kapötër taië. <sup>6</sup> Etā kanò ñakökwak mía dò wé ie' kapötër eē ta iché ia:

—¿Iók be' kapötër? ¡Be' e' kóka! Be' kèköl a ikió as ie' tō se' tsatkò. Isalema ie' se' suèmi er siarè wa ta se' tsatkèmitö.

<sup>7</sup> E' dalewa kanò wakpa malepa tō iché ñi a:

—Mishka itötkök isuöie yi iane iwiie e' kueki se' weirke i' es.

Etā iwène tō Jonás idir. <sup>8</sup> E' kueki ie'pa iché ie' a:

—Ichó sa' a, ¿ì kueki ì sulu i' tköke se' ta? ¿Iók be' e' iébitu kanò i' a? ¿Wé be' datse? ¿Yi ditséwö be' dör?

<sup>9</sup> Ie' iüté:

—Ye' dör hebreowak. Jehová dör Skèköl tso' ká jaì a e' dalöiökwak ye' dör. Ie' tō dayè ena ká i' yö'at.

<sup>10-11</sup> Ie' tō ie'pa a ipaké tō ie' tso' tkökshkar Jehová yöki. Mik e' ttsé ie'pa tō ñies isuérakitö tō dayè kī ulune taië, etā ie'pa suane taië shütē. Ie'pa tō ie' a ichaké:

—¿ì wèmi sa' tō be' ta as sèrkè wöklörwā?

<sup>12</sup> Ie' tō iüté:

—Ye' wā ijcher buaè tō ye' kueki sèrkè i' bitsineka taië a' kī. E' kueki ye' uyómi dayè a etā sèrkè wöklördawa.

<sup>13</sup> Erè kanò wákpa tō kanò iklémi darèrèè as irirka. Erè kè ie'pa diché dè'ka, dayè kī ulune taië e' kueki. <sup>14</sup> Etā ie'pa tō Jehová a ikié i' es: “A Jehová, kè sa' maktsa duökwa



wëm i' kuëki. I' uk be' tso' sa' ta, e' wëkebö wes be' ki ikiane es. E' kuëki wëm i' kè ki ì nuí ta', e' ta sa' tö ie' uyekemi dayë a e' nuí kè marka sa' ki.”

<sup>15</sup> E' ukuöki ta ie'pa tö Jonás uyémi dayë a, etä sèrkë wöklönewa ta dayë míane almië. <sup>16</sup> Mik kanò wákpa tö e' sué, etä ie'pa suane taië Jehovah yöki ta idalöierakitö taië. E' ukuöki ta ie'pa tö iyiwak jché ña'wé mè Skëköl a idalöioie, ñies ie'pa tö ttè mé ie' a tö sa' tö be' dalöieraë.

<sup>17</sup> Etä Jehovah tö nima bërie shütë patké etö Jonás mulukwa. Etä nima e' tö imuléwa ta ee nima shua ie' sené doka ká mañat ñië nañeë.

## 2

### *Jonás tté Jehovah ta*

<sup>1</sup> Etä Jonás tté Jehovah dör ie' Këköl e' ta nima shua, <sup>2</sup> ta ichéitö ia i' es:

“A Jehovah, ye' eriarke siarë,

e' shua ye' tö be' a ikié tö ye' tsatkó,

etä be' tö ye' iüté.

Ye' tso'tke ká dià kaska' s' duulewa ké a,

ee ye' be' a ikié tö ye' kimú,

etä ye' ttò ttsébö.

<sup>3</sup> Be' ye' uyémi dayë a iskië dayë dikia,

ye' kitëulewa dayë wa.

Dayë urke taië e' patkébö, e' tka ye' kikke.

<sup>4</sup> Ye' ittse tö ye' kè ku'ia be' wörki.

Ye' ibikeitse tö ye' kè dë'iane be' wé buaë e' a.

<sup>5</sup> Dayë taië, e' shua ye' anemi.

Ye' kikke, ye' pamik, ye' dikia, e' dör dayë ème.

Dayë a itò'könu tso', e' malitséka ye' wökir mik taië dayë shua.

<sup>6</sup> Ye' anemi dayë a dò iskië,

dò wé kabata bitukeka ee.

Ye' ittse tö ye' wötënewa da'a ká dià kaska'.

Erë, a Jehovah, be' dör ye' Këköl,

be' dör ye' yétsane s' duöwa ulà a dekañe ttsë'ka.

<sup>7</sup> A Jehovah, mik ye' ittse tö ye' duökewatke,

etä ye' be' a ikié tö ye' tsatkó,

etä ì kiéyö, e' ttsébö be' wé buaë e' a.

<sup>8</sup> Wépa tö iyi diököl dalöieke be' skéie,

e'pa kè tö be' dalöieku'ia.

<sup>9</sup> Erë ye' tö wéstela cheraë be' a kekraë,

iyiwak jcheraë ña'weraëyö be' a be' dalöioie.

Ye' ttè mé be' a, e' waweraëyö.

¡A Jehovah, be' è a sa' tsatkërmi!”

<sup>10</sup> E' ukuöki ta Jehovah tö nima patké Jonás tuöktsa ká sí ki, ta ituéttsaitö.

## 3

### *Jonás tö Jehovah ttò iüté*

<sup>1</sup> Etä Jehovah tö iskà chéne Jonás a: <sup>2</sup> “Be' yú ká kibi kië Nínive ee ta ì chekeyö be' a, e' chó ká e' wakpa a.”

<sup>3</sup> Etä ie' tö Jehovah ttò iüté. Ie' mía Nínive. E' dör ká bërie. Shkotkö ká e' shua, e' dör ká mañat wa'ñe. <sup>4</sup> Jonás shké ká e' shua ká et wa'ñe ta ie' tö icherami ká e' wakpa a aneule: “Ká i' ki ká de dabom tkëyök (40), etä a' erdawa.” <sup>5</sup> Etä Nínive wakpa kos erblé Skëköl

mik. E' kueki ie'pa kos, ësepala ena dalöiërta', e'pa kos tö iché: “S'kawöta batsök, ñies s'kawöta datsi' ajaë ese iök iwà kkachoie tö se' er mane'wé.” Eta es ie'pa tö iwé.

<sup>6</sup> Mik ttè e' ttsé Nínive blú tö, eta ie' e' kéka ikulé ki, ta idatsi' bua'buä iëtkër iwa, e' yétsa skéie datsi' ajaë iékaitö ta ie' e' tkéser iski muluchka ki. <sup>7-9</sup> Eta ie' tö ttè patké ká e' ulitane wakpa a. Ttè e' tö ichè i' es: “A' ulitane kè kàne chkök di'yök yës. Ñies kè a' kàne a' baka ena a' obeja tiök. A' ulitane kawöta datsi' ajaë iökka. A' kköchó Skököl a a' diché kos wa as a' e' wamblò suluë ese kos nuí olo'yöitö a' ki. Ñies a' e' wamblò suluë, ese kos olo'yó. Isalema ie' er mane'umine, eta ie' er buarmine se' ki, eta ie' kè tö se' ewepawa. Ttè i' dör ye' dör a' blú e' ttè ena a' wökirpa ttè, e' kueki a' ulitane kawöta idalöiök.”

<sup>10</sup> Eta ie'pa tö ttè e' iuté buä. Ie'pa e' wamblò suluë ese kos olo'yérakitö. Mik e' sué Skököl tö, eta ie' ibikeitséne kè yö ie'pa we'ikepa wes ye' ibikeits es.

#### 4

##### *Jonás uluneka Skököl ki*

<sup>1</sup> Erë e' kè dör bua' Jonás a ta ie' uluneka taië. <sup>2</sup> Ie' iché Jehová a:

—A Jehová, be' isué. Mik ye' tkëria ye' kaska', eta ye' iyë' tö be' er buä chöraë Nínive wakpa a. Ye' wa ijcher tö be' dör es, e' kueki ye' bakshkar Tarsis. Ye' wa ijcher tö be' kè ulurta'ka bet. Be' er tuttoë. Be' sa' suë er siarë wa. Mik sa' tö ì sulu wamblé ta sa' er mane'wé, e' ta bet e' nuí olo'yé be' tö sa' ki, kè sa' we'ikè wes be' sa' pauñé es. <sup>3</sup> A Jehová, e' kueki ye' be' a ichè ye' ttówa, e' dör bua'ie ye' a.

<sup>4</sup> Erë Jehová tö ie' a ichaké:

—¿Ima be' ibikeitsè tö be' wa kawö ta' ulunukka sè es?

<sup>5</sup> Eta Jonás e' yétsa Nínive miá diwö tskirke e' kke ta ee úla yuékaitö e' blóie diba yöki. Ee ie' e' tkéser ì tkömi Nínive wakpa ta e' wà panuk. <sup>6</sup> Eta Skököl Jehová tö kalkua tskéka elka tala'wékaitö Jonás tsaka as ikí ttsë'r buä. E' tö ie' ttsë'wé buä. <sup>7</sup> Erë bule es bla'mi ká ñine eta Skököl tö ì patké kalkua katökwa ta isinewa duowa. <sup>8</sup> Mik diwö deka, eta ie' tö siwa' darërë ba'baë e' patké diwö tskirke e' kke Jonás ki. Diba ane darërë Jonás wökir ki, ta ie' tö ittsé tö ie' siwa'arkewa. Ibikeitséitö “¿Ye' mú duòwa!” Ie' iché, “Ye' duowa, e' dör bua'ie ye' a.”

<sup>9</sup> Erë Skököl tö iché ie' a:

—¿Ima be' ibikeitsè tö be' wa kawö ta' ulunukka kalkua sinewa e' kueki?

Ie' iüté:

—Tó, ye' wa kawö ta'. ¿Ye' ulune taië mik ye' duowa eta e' olone!

<sup>10</sup> Eta Jehová tö iché ie' a:

—Kal kuá kè tkëne be' wa, kè talane kè kaneone be' wa. E' tskine talane ká et nañewe è, bule es nañewe ta iduowa, e' dalëne be' éna. <sup>11</sup> Eta ¿wes ye' kè éna Nínive wakpa dalënu? Ie'pa dör taië, ie'pa ala'rla tso' taië döka 120.000 kè wa ijcher ì dör buä, ì dör suluë. Ñies ie'pa iyiwak tso' taië.

## Jesús Tté Buaë Kit Mateo tö Mateo

Wëm bak eköl kiè Mateo e' tö yëkkuö i' kit. Nies ie' kiè Leví. Ie' dör Israel aleripa eköl. Jesús tö ie' ki' ittökataie (Mateo 9.9 saú), erë e' yökí ie' bak kanëblök inuköl patueke Roma wökirpa a ese shtök. Erë mik Jesús tö ie' ki' ittökataie, etä ie' mineaie Jesús ta.

Ì o' Jesús tö su' Mateo tö iwák wöbla wa, ese tso' kitule yëkkuö i' ki. Nies ì su' ie' tö ena ì ttsé'itö Jesús tö s'wöbla'weke e' a, ese kit ie' tö.

Ká iaiä Skëköl tö iyë' tö wëm döraë eköl Israel aleripa tsatkök e' paneke ie'pa tö. S'tsatkökwak e' kiè Mesías hebreoie ena griegoie ikiè Cristo. Se'ie kiè e' mane'wésö wé pairine'bitü idi' wa s'blúie e'. Mateo tö yëkkuö i' kit bua'ie Israel aleripa a ikkachoie tö s'tsatkökwak ñe' dör Jesús.

### Jesucristo yépa bak (Lucas 3.23-38)

<sup>1</sup> Jesucristo dör se' blú bak kiè David e' aleri, David dör Abraham aleri. Jesucristo yépa bak qos e'pa wëpa kiè dör i' es:

<sup>2</sup> Abraham alà dör Isaac, e' alà dör Jacob, e' ala'r dör Judá ena iëlpa. <sup>3</sup> Judá ala'r dör Fares ena Zérah, e'pa mì dör Tamar. Fares alà dör Hesrón, e' alà dör Aram. <sup>4</sup> E' alà dör Aminadab, e' alà dör Nahasón, e' alà dör Salmón. <sup>5</sup> E' alà dör Booz, e' mì dör Rahab. Booz alà dör Obed, e' mì dör Rut. Obed alà dör Jesé, <sup>6</sup> E' alà dör se' blú bak David e'.

Se' blú bak David, e' alà dör Salomón, e' mì bak Uriás ta kewe. <sup>7</sup> Salomón alà dör Roboam, e' alà dör Abías, e' alà dör Asá. <sup>8</sup> E' alà dör Josafat, e' alà dör Joram, e' alà dör Ozías. <sup>9</sup> E' alà dör Jotam, e' alà dör Acáz, e' alà dör Ezequías. <sup>10</sup> E' alà dör Manasés, e' alà dör Amón, e' alà dör Josías. <sup>11</sup> E' ala'r dör Jeconías ena iëlpa. E' kèwö ska' ta Israel aleripa klö'wélur Babilonia wakpa tö ta itsémirakitö Babilonia.

<sup>12</sup> Israel aleripa aneyalne Babilonia, e' ukuökí ta Jeconías alà kiè Salatiel e' kune. Ie' alà dör Zorobabel, <sup>13</sup> E' alà dör Abihud, e' alà dör Eliaquim, E' alà dör Azor. <sup>14</sup> E' alà dör Sadoc, e' alà dör Aquim, e' alà dör Eliud. <sup>15</sup> E' alà dör Eleazar, e' alà dör Matán, e' alà dör Jacob. <sup>16</sup> E' alà dör José, e' dör María wëm. María dör Jesús mì. Jesús dör wé pairine'bitü idi' wa s'blúie e'.

<sup>17</sup> Es Abraham kèwö ska' dökä David kune', etä Jesús ditséwö alöne dökä dabom eyök kí tkëtökicha (14). Nies David kèwö ska' dökä Israel aleripa minetsër Babilonia, etä Jesús ditséwö alöne dökä dabom eyök kí tkëtökicha (14). Nies Israel aleripa minetsër dökä wé pairine'bitü idi' wa s'blúie e' de, etä Jesús ditséwö alöne dökä dabom eyök kí tkëtökicha (14).

### Jesucristo kurke e' biyó yëne (Lucas 2.1-7)

<sup>18</sup> I' dör Jesucristo kune' e' pakè: Ie' mì kiè María. E' bakia busi kam ser wëm ta, erë ittè me'bak senukwä wëm kiè José e' ta. Kam ie'pa serwä ñita, kam ie'pa ñi köwä, etä María buklunekä Wiköl Batse'r diché wa. <sup>19</sup> José dör wëm buaë yësyësë, e' kueki ie' kè éna María jaëwakkä sulitane wörki. E' kueki ie' tö ibikeitsé: “Súyö imèat bèrë.” <sup>20</sup> Ie' tso'ia ibikeitsök ta ikapowä ta ikabsué tö Skëköl biyöchökwak de eköl e' tö ie' a iché: “A José, David aleri, María buklunekä e' dör Wiköl Batse'r diché wa. E' kueki kè be' suanuk senukwä ie' ta. <sup>21</sup> Ie' alà kurdaë eköl wák wëm. Ikiè múkabö Jesús† Ie' tö iwakpa tsatkeraë sene sulu nuí yökí, e' kueki ikiè múka es.” Es Skëköl biyöchökwak tté José ta.

<sup>22</sup> E' qos tka es as ì yé'atbak Skëköl tö itteköl wa e' wà tkò, e' tö ichè:

<sup>23</sup> “Busi eköl kè wä wëm kaule e' buklurdakä,

\* 1:16 wé pairine'bitü idi' wa s'blúie: E' dör Mesías si'kuaie. † 1:21 Jesús: S'kiè e' wà kiane chè S'tsatkökwak.

e' alà kūrdaē wák wēm,  
ikirdaē Emanuel.”†

(s'kiè e' wà kiane chè: “Skëköl tso' se' ta”).

<sup>24</sup> Mik José tì'nekane, eta ie' tö iwé wes Skëköl biyöchökwak tö ie' a iché es. Ie' ulabatséwā María ta. <sup>25</sup> Erë alà kam kūr, e' yöki ie'pa kè ñi kànewā. Mik alà kune, eta José tö ikiè mékā Jesús.

## 2

### *Wëpa yöule iyi tötkök bëkwö wa esepa de Jesús sauk*

<sup>1</sup> Jesús kune' ká kiè Belén aṭe Judea ee. E' kèwö ska' ta wëm eköl kiè Herodes e' dör ká e' blú. Eta wëpa wëlepa datse ká kamiè aṭe diwö tskirke e' kke, e'pa de Jerusalén. Ie'pa dör iyi tötkök bëkwö wa esepa. <sup>2</sup> Ie'pa tö ichaké:

—¿Wé alala kune judiowak blúie e'? Sa' tö ibëkwö su' sa' kaska', e' kueki sa' de íerö idalöiök.

<sup>3</sup> Mik Herodes tö ttè e' ttsé, eta e' tö ie' ena Jerusalén wakpa qos tsiriwékarak taië. <sup>4</sup> E' kueki ie' tö sacerdotepa wökirpa ena s'wöbla'uk ttè dalöiëno wa wakpa kiéttsa seraṭ ta ichaké ie'pa a:

—¿Ima a' ichè? Wé pairine'bitu idi' wa s'blúie, ¿wé e' kurmi?

<sup>5</sup> Ie'pa tö iutérak:

—Ie' kūrdaē Belén aṭe Judea ee. Skëköl tteköl tö ikitat i' es:

<sup>6</sup> Skëköl tö ichè:

Belén aṭe Judea, e' wakpa a ye' ichè tö  
a' shua blu' kardaka eköl,  
e' tö ye' icha dör Israel aleripa e'pa wëttseraë.  
E' kueki a' ká dör ká bua'ie  
wes Judea ká bua'ie malepa tso' es.\*

<sup>7</sup> Mik Herodes tö ttè e' ttsé, eta ie' tö wëpa tö iyi tötköke bëkwö wa ñe'pa kié akir ijchenowā tö mik ie'pa tö bëkwö e' su'mi, qos e' ki ká de. <sup>8</sup> Ie' tö ie'pa a iché:

—A' yú Belén. Alala e' yuló bua'ie. Mik a' tö ikué, eta ibiyó chó ye' a as ñies ye' mi' idalöiök.

<sup>9-10</sup> Mik blu' tö ttè e' ché one, eta ie'pa míyal. Eta bëkwö su' ie'pa tö ikaska', e' suéne ie'pa tö ñalā wa. E' tö ie'pa ttsé'wéne buaë shute. Wé bëkwö mirwā e' wa ie'pa mi'ke dò wé bëkwö e' wöklö'wéwā ee. Bëkwö e' wöklö'wéwā wé alala e' tso' e' u tsaka. <sup>11</sup> E' ukuöki ta ie'pa dewā u a ta ie'pa tö alà ena imi María kué. Ie'pa e' tuléwā kuchë ki ta idalöiérakitö. Kalkuöla dérak iwā e' kköyéttsarakitö ta orochka ena ñi masmas ña'wé ena mirra, ese mérakitö alà a. <sup>12</sup> E' ukuöki ta ie'pa a iyëne kabsuë a tö ie'pa kè minukne Herodes ska'. E' kueki ie'pa míyalne iká ki ñalā kuá'ki wa.

### *José ena María tkashkar míyal Egipto*

<sup>13</sup> Wëpa tö iyi tötköke bëkwö wa e'pa ponemine, e' ukuöki ta José kabsuë tö Skëköl biyöchökwak eköl tö ie' a iché: “Be' e' kóka, María ena ilà klö'ú ta be' tkóshkar Egipto. Blu' Herodes tö alala se yuleraë ttèwā, e' kueki be' e' tsuat senuk ee dò mik ye' tö be' a iché eta.”

<sup>14</sup> Eta ie' tì'nekā e' kékā ta alà ena María klö'wéitö ta e' nañewe imíyal Egipto. <sup>15</sup> Ee ie'pa sené dò mik Herodes blënewā ekkë. E' tka es as itkò wes Skëköl tö iyë' itteköl wa es. Ie' tö iyë': “Ye' alà tso' Egipto, e' kiéne ye' tö.”†

### *Herodes tö kawö mé ala'rla ttökulur*

<sup>16</sup> Mik Herodes wā ijchenowā tö wëpa tö iyi tötköke bëkwö wa, e'pa kè wā ie' ttö dalöiëne', eta e' tö ie' uluwéka taië. Belén ena ká tso' ipamik e' a ala'rla wëpa kurke qos,

e'pa ttökulur patké ie' tö seraa kam k<sub>i</sub> duas dö böc e' yöki. Wëpa tö íyi tötkeke bëkwö wa e'pa tö bëkwö su' qos e' k<sub>i</sub> ká de, e' yë' ie'pa tö Herodes a. E' wa ie' tö ikéwö yë'ttsa tö duas döketke böc e' k<sub>i</sub>. E' kuëki ie' tö ala'rla wëpa kurke e' kéwö ulatök, esepa qos ttökulur patké.

<sup>17</sup> Es ì yë' Skëköl tteköl kiè Jeremías e' tö, e' wà tka. Ie' tö iyë':

<sup>18</sup> “Ká kiè Ramá ee ittseñe tö taië ie'pa iuke aneule kköchöke siarë. Ee alakölpa dör Raquel aleripa e'pa iuke ila'rla jeitsök. Ila'rla qos ttélur, e' kuëki ie'pa kè er pablërta'.”

*María ena ilà ena José e' yétsa Egipto biteyalne Israel*

<sup>19</sup> Blu' Herodes blënewa, e' ukuöki ta José tso' Egipto, e' kabsué tö Skëköl biyöchökwak eköl tö ie' a iché: <sup>20</sup> “Wëpa éna alà ttakwa, e'pa blërulunetke. E' kuëki be' e' kókka ta María ena ilà klö'ú ta a' yúshkane Israel.”

<sup>21</sup> Eta José e' kéka ta María ena ilà klö'wëitö ta ie'pa biteyalne Israel. <sup>22</sup> Erë mik ie' wa ijchenewa tö Herodes alà kiè Arquelao e' tso'ne Judea blúie iyé skéie, eta ie' suane senuk ee. Eta ie' kabsué tö Skëköl tö ie' a iché: “A' yúshkane Galilea.” E' kuëki ie'pa míyalne Galilea. <sup>23</sup> Mik ie'pa de Galilea, eta ie'pa míyal senuk ká kiè Nazaret ee. E' tka es as ì yë' Skëköl ttekölpa tö e' wà tkò wé ichéitö: “Ie' kirdaë Nazaret wak.”

### 3

*Juan S'wöskuökwak tö s'patté*

*(Marcos 1.1-8; Lucas 3.1-9,15-17; Juan 1.19-28)*

<sup>1</sup> E' kéwö ska' ta Juan S'wöskuökwak de Skëköl ttè pakök ká sir poë wé kè yi serku' ate Judea ee. <sup>2</sup> Juan tö ie'pa a icheke: “Ì blúie Skëköl tso' e' kéwö dewatke tsinet, e' kuëki a' er mane'ú ie' a.”

<sup>3</sup> Skëköl tö Juan yë' itteköl Isaías wa i' es:

“Ká sir poë wé kè yi serku' taië,  
ee yile ttöraë aneule, e' tö icheraë:  
'A' er mane'ú Skëköl datse e' yöki,  
e' dör wes ñala yuèsö yësyësë ie' yöki es.’ ”\*

Es Isaías tö iyë'at.

<sup>4</sup> Juan datsi' yöule kameio köyök wa; ikipamo e' dör iyiwak kkuölit. Ie' chkè dör ditski ena bulali. <sup>5</sup> Jerusalén wakpa ena ká malepa tso' Judea e' wakpa de taië ie' ttöke e' ttsök. Ñies ká tso' di' Jordán kkömik, e' wakpa de. <sup>6</sup> Ì sulu qos wambleke ie'pa tö e' chekekarakitö ta Juan tö iwöskueke Jordán a.

<sup>7</sup> Erë mik Juan tö isué tö fariseowakpa ena saduceowakpa de taië as ie' tö ie'pa wöskuölor eta ie' tö ie'pa a iché: “¡A' dör s'kitö'ukwakpa suluë wes tkabè es! ¿Yi tö a' a iché tö a' tkömishkar Skëköl tö a' we'ikeraë siarë e' ulà a? <sup>8</sup> A' senú yësyësë, e' wa iwërwa mi tö moki a' er mane'wétke Skëköl a. <sup>9</sup> Kè a' tö ibikeitsök tö a' dör Abraham aleripa, e' è kuëki Skëköl kè tö a' we'ikepa. Ye' tö a' a iché tö Skëköl k<sub>i</sub> ikiane, e' ta ie' tö ák ikkè yuèmi Abraham aleripaie. <sup>10</sup> Ie' dör wes kal bikökwak es. Ie' tso'tke kal ulitane kè wörta' ese qos bikökök ña'wëwa bö' a. <sup>11</sup> Moki ye' tö a' wöskueke di' a iwà kkachöie tö a' er mane'wétke Skëköl a. Erë ye' itöki idatse eköl, e' tö a' ierawa Wiköl Batse'r a ena bö' a. Ie' dör këképa taië ye' tsata, e' kuëki ie' klökkuö è tsèmi e' kè dör ye' siarla e' a. <sup>12</sup> Ie' tö s'wöpperaë wes iyiwö wöppèsö es. Ihua'hua bleraëitö idichakuö a, erë isulusi uyerawaitö bö' kè wöitta'wa e' a.”

*Jesús wösune*

*(Marcos 1.9-11; Lucas 3.21-22)*

\* 3:3 Isaías 40.3

<sup>13</sup> Jesús e' yéttsa Galilea demi Jordán di'kka wé Juan tso' ee as e' tö iwöskuò. <sup>14</sup> Kewe ta Juan kè éna ie' wöskuak, ie' tö iché ia:

—Warma be' kawöta ye' wöskuök. ¿Wes be' do ye' ska' as ye' be' wöskuò?

<sup>15</sup> Ie' tö iüté:

—Ì dör yësyësë Skëköl wöa, ese kos kawöta wè se' tö es, e' kueki imuatsö es i'ñe ta.

Eta Juan tö ie' ttò iüté. <sup>16</sup> Jesús wösune e' e' duékane di' a e' wösha ta ká jai kköbunane ta ie' isué tö Skëköl Wiköl bite ie' ki nuböl sù. <sup>17</sup> Eta ttò ttsëne datse ká jai a e' tö iché: “Se dör ye' alà dalër taië ye' éna, e' wër buaë shute ye' wa.”

## 4

### *Bé tö Jesús erkiöwé*

*(Marcos 1.12-13; Lucas 4.1-13)*

<sup>1</sup> E' ukuöki ta Skëköl Wiköl tö Jesús tsémi ká sir poë wé kè yi serku' ee as bé tö ie' erkiöu à sulu wamblök. <sup>2</sup> Ee ie' sené doka ká dabom tkëyök (40), kè chkane yës. Ekkë ta ie' due bli wa. <sup>3</sup> Bé debitu ie' ska' ta ichéitö ia:

—Be' dör Skëköl Alà, e' ma ichó ak sekkëpa a tö a' yönú chkeie.

<sup>4</sup> Jesús tö iüté:

—Au. Skëköl yëkkuö tö iché: ‘Kè se' senuk chkè è mik. E' skéie à kos cheke Skëköl tö e' mik se' serke.’\*

<sup>5</sup> E' ukuöki ta bé wa ie' mítser Jerusalén dör ká batse'r ee ta itsémikaitö Skëköl wé kakkeë e' bata ki <sup>6</sup> ta ichéitö ia:

—Be' dör Skëköl Alà, e' ma be' e' batróömi döttsa iski. Skëköl yëkkuö tö iché: ‘Skëköl tö ibiyöchökwakpa patkeraë be' kkö'nuk.

Ie'pa tö be' klö'wëra ká iulà a as be' klö kè tërwa ak ki yës.’†

E' kueki be' e' batróömi döttsa iski.

<sup>7</sup> Eta Jesús tö iüté:

—Au. Nies Skëköl yëkkuö tö iché: ‘A' kè kawö ta' Skëköl dör a' Këköl e' wötsiriuk.’‡

<sup>8</sup> E' ukuöki ta bé tö ie' tsémi kabata kakkeë a, ta ee ká kos wes ká tköke ekkë, nies íyi bua'buä tso' iki, ese kkachéitö ie' a seraa bet. <sup>9</sup> Ie' tö iché ia:

—Be' e' tkéwa kuchëwö ki ye' wörki ye' dalöiök Skëkölíe, e' ta à kos sué be' tö e' meraëyö be' a.

<sup>10</sup> Erë Jesús tö ie' iüté:

—A Satanás, Skëköl yëkkuö tö iché: ‘Skëköl dör a' Këköl, e' è dalöiö a' tö Skëkölíe, ie' è a' senú.’§ E' kueki be' yúshka.

<sup>11</sup> Eta bé tö Jesús méat wák mía bánet. Ta Skëköl biyöchökwakpa de Jesús ska' ikimuk.

### *Kanè mène Jesús a e' tsá wéitö Galilea*

*(Marcos 1.14-15; Lucas 4.14-15)*

<sup>12</sup> Mik Jesús wa ijchënewa tö Juan S'wöskuökwak wötëwarakitö s'wöto wé a, eta ie' dene Nazaret atë Galilea ee. <sup>13</sup> Erë kè ie' atë senuk Nazaret. Ie' mía senuk Cafarnaúm, e' atë batsöri kiè Galilea e' kkömik. Cafarnaúm atë zabolónwak ena neftalíwak e'pa ké a.

<sup>14</sup> Itka es as à kit Skëköl tteköl Isaías tö yëkkuö ki e' wà tkò es. Ie' tö iyë':

<sup>15</sup> “Zabolónwak ena neftalíwak, e'pa serke di' kiè Jordán e' wíshet batsöri kkömik.

Ie'pa serke Galilea wé nies pë' kè dör judiowak esepa serke ee.

<sup>16</sup> Ie'pa serke wes se' serke stui a es e' kè wa Skëköl suule.

Ie'pa dör wes s'duulewa es.

Erë eköl doia, e' tö ie'pa er ñi'wëraë Skëköl ttè wa

wes ká olo tö ká ñiwe es.”\*

\* 4:4 Deuteronomio 8.3 † 4:6 Salmo 91.11-12 ‡ 4:7 Deuteronomio 6.16 § 4:10 Deuteronomio 6.13 \* 4:16 Isaías 9.1-2



Es Isaías tö iyë'at.

<sup>17</sup> E' ukuöki ta Jesús tö s'pattémitke ta ichéitö: “ÿ blúie Skéköl tso' e' kéwö dewatke tsinet, e' kueki a' er mane'ú ie' a.”

*Jesús tö nima klö'ukwakpa döka tkël e'pa kié ittökatapaie*

*(Marcos 1.16-20; Lucas 5.1-11)*

<sup>18</sup> Jesús shkörämi batsöri kiè Galilea e' kkömik, eë ie' tö wëpa sué böi ñi ëlpa. Eköl kiè Simón, e' kiè ñies Pedro. Iëköl kiè Andrés. Ie'pa kanè dör nima klö'uk. Ie'pa tso' ikla' uyök batsöri a nima klö'woie. <sup>19</sup> Ie' tö ie'pa a iché:

—A' shkó ye' ta. A' yueraëyö s'ditsö klö'uk ye' a ye' ttökataie.

<sup>20</sup> E' bet ta ie'pa tö ikla' tuléat ta imíyal ie' ta.

<sup>21</sup> E' wí'kie ie' tö wëpa skà sué böi ñi ëlpa kiè Santiago ena Juan, e'pa dör Zebedeo ala'r. Ie'pa tulur kanè a iyé ta kla' wöyuök, ie'pa kiémi ie' tö e' ta. <sup>22</sup> E' wösha ta ie'pa tö ikanö ena iyé méat ta imíyal ie' ta.

*Jesús tö s'wöbla'wé taië*

*(Lucas 6.17-19)*

<sup>23</sup> Jesús shké Galilea kos a s'wöbla'uk judiowak ñi dapa'wo wé kos a. ÿ blúie Skéköl tso', e' tté buaë pakekeitö, ñies s'duöke kos, ÿ dalërke s'mik kos, ese bua'wëkeitö. <sup>24</sup> Ie' tté buneka Siria kos a. E' kueki pé' wa taië iyamipa duöke duè daklilië wa ese debitü ie' ska'. Wëlepa a aknama tso', wëlepa siwa' arke iröirö, wëlepa kraulewa, esepa kos bua'wénéitö.

<sup>25</sup> Eta pé' datse Galilea, Decápolis, Jerusalén, Judea ena ká ate Jordán wishet, e'pa mi'ke taië ie' ta.

## 5

*Jesús tö ittökatapa wöbla'wé kabata a*

<sup>1</sup> Mik Jesús tö isué tö pé' dapane taië, eta ie' mia kabata tukir ki ta eë ie' e' tkéser ta ittökatapa de ie' ska'. <sup>2</sup> Ie' tö ie'pa wöbla'wémitke ttè i' wa:

*ÿ wër buaë Skéköl wa*

*(Lucas 6.20-23)*

<sup>3</sup> “Wépa morke Skéköl è mik, esepa tso' ÿ blúie ie' tso' e' a, e' kueki ayëcha buaë esepa.

<sup>4</sup> “Wépa eriarke siarë, esepa er pablërdaë, e' kueki ayëcha buaë esepa.

<sup>5</sup> “Wépa e' wöökewa diöshet, esepa a ká i' merdaë, e' kueki ayëcha buaë esepa.

<sup>6</sup> “Wépa tö sene yësyësë ese kos iëitseke chkè ena di'yè tsata, esepa ulà a iwà döraë, e' kueki ayëcha buaë esepa.

<sup>7</sup> “Wépa tö s'malepa suëke er siarë wa, esepa suëraë Skéköl tö er siarë wa, e' kueki ayëcha buaë esepa.

<sup>8</sup> “Wépa er maneneë, esepa tö Skéköl suëraë, e' kueki ayëcha buaë esepa.

<sup>9</sup> “Wépa tö s'er bua'wëkene ñi ki, esepa kieraë Skéköl tö ila'r, e' kueki ayëcha buaë esepa.

<sup>10</sup> “Wépa weirke iserke yësyësë e' kueki, esepa tso' ÿ blúie Skéköl tso' e' a, e' kueki ayëcha buaë esepa.

<sup>11</sup> “Ayëcha buaë mik pé' tö a' cheke suluë, a' we'ikeke, a' kKateke kachè wa ye' dalërmik.

<sup>12</sup> Ká jaì a ÿ buaë merdaë a' a iskéie, e' kueki mik ese tköke a' ta, eta a' ttsë'nú buaë kaneë. Es ñies Skéköl ttekölpa bak a' yöki kewe e'pa weine.

*A' dör wës dayë katanoie es*

*(Marcos 9.50; Lucas 14.34-35)*

<sup>13</sup> “A' dör wes dayë es ká i' wakpa a. Erë dayë kè kke ta'ia, e' ta kè ibuarpaiane. Kè iia iie bua' ta ikeukemi ñala kī ta pē' dakòlor iki.

*A' dör wes bö'wö es*

<sup>14</sup> “A' dör wes bö'wö es ká i' wakpa a. U tso' taië kabata kī, e' kè blënuqwa, e' wëne kamië. <sup>15</sup> Kè yi tö bö'wö tskepaka ta ibléwaitö ö ipatkéwaitö kalkuö dikia. E' skéie itkekekaitö kákke sulitane tso' u a esepa wö a ká ñi'woie. <sup>16</sup> Es ñies a' senú buaë yësyësë sulitane wörki as e' saü ie'pa tö ta a' Yé tso' ká jai a e' kīkarka.

*Ttè dalöiëno kit Moisés tö e' ché Jesús tö*

<sup>17</sup> “Kè a' tö ibikeitsök tö ye' dē'bitu ì kit Moisés ena Skëköl ttekölpa tö yëkkuö kī, e' wöshtökwa. E' skéie ye' dē'bitu as iwà tkò wes itso' kitule es. <sup>18</sup> Moki ye' tö a' a ichè tö ttè e' kè watërpattsa etkla wē'ia kam ká jai ena ká i' erwa e' yöki; ttè e' qos wà tköraë. <sup>19</sup> E' kueki yi tö ttè e' wele dalösewëkewa, eré ttè tsir idir, ena o'ka wöbla'wekeitö idalöseukwa, ese döraë s'ësela imalepa blúie Skëköl tso' esepa dikia. Erë yi tö ttè e' dalöieke ena o'ka wöbla'wekeitö idalöiök, ese döraë kéké taië imalepa blúie Skëköl tso' esepa tsata. <sup>20</sup> E' kueki ye' tö a' a ichè tö a' kè ser yësyësë tkòka s'wöbla'uk ttè dalöiëno wa wakpa ena fariseowakpa tsata, e' ta a' kè döpa ì blúie Skëköl tso' e' a.

*S'ulurke ñi kī ese ché Jesús tö*

*(Lucas 12.57-59)*

<sup>21</sup> “A' wá ittsëule tö iyënebak ká iaiaë a' yépa a: ‘Kè a' kawö ta' s'ttökwa,’ ñies ‘Yi tö s'ttëwa, ese wák kichatërdaë.’ <sup>22</sup> Erë ye' tö a' a ichè tö yi uluneka iyami kī, ese kichatërdaë. E' kīie ta yi tö iyami ché suluë, ese kichatërdaë. Ñies yi tö iyami kichatëttsa, ese kī inuí tso' taië tö ipatkerami bö' ké a.

<sup>23</sup> “E' kueki a' wá ilè mí mè ka' tso' íyi moka Skëköl a e' kī ta eë a' éna ianewa tö a' yami wele wá ilè ttè tso' a' kī, <sup>24</sup> e' ta ì mí a' wá mè e' múat eë, kè imar. A' yú a' yami er bua'ukne a' kī. E' ukuöki ta a' yúne ì meke a' tö e' mú.

<sup>25</sup> “Yile wá a' mí kkatè s'shulo wé a, e' ta mik a' dami ñala kī ie' ta, eta ishuló ie' ta as ie' kè tö a' mùttsa s'shulökwak ulà a. A' kè tö iwè es, e' ta s'shulökwak tö a' merattsa s'shkëkipa ulà a ta esepa tö a' wöterawa s'wöto wé a. <sup>26</sup> Moki ye' tö a' a ichè tö a' kè döpattsa dö mik a' tö inuí patuëttsa seraë eta.

*S'senewabak dalösewëwá ese ché Jesús tö*

<sup>27</sup> “A' wá ittsëule tö iyënebak: ‘Kè a' kawö ta' s'senewabak dalöseukwa.’ <sup>28</sup> Erë ye' tö a' a ichè tö yi tö o'ka alaköl sué ta ikkechéitö, e' ta e' wa isenewabak dalösewëwaitö ier a.

<sup>29</sup> “E' kueki a' wöbla bua'kka tö a' keke ì sulu wamblök, e' ta iyóttsa kóumi bánet. A' yese alè kéu a' tö, e' dör bua'ie a' uyëwá bö' ké a wa'ñe e' tsata. <sup>30</sup> A' ulà bua'kka tö a' keke ì sulu wamblök, e' ta itóó uyómi bánet. A' yese alè kéu a' tö, e' dör bua'ie a' uyëwá bö' ké a wa'ñe e' tsata.

*Se' ñi òwa ese ché Jesús tö*

*(Mateo 19.9; Marcos 10.11-12; Lucas 16.18)*

<sup>31</sup> “Ñies iyënebak: ‘Wëm tö itayë éwa, ese wák kawöta ñi owa yëkkuö muk ia.’ <sup>32</sup> Erë ye' tö a' a ichè tö wëm tö itayë éwa, kè dör itayë trër kueki, e' ta e' wa ese tö itayë wömëttsami isenewabak dalöseukwa\* Ñies wëm wele senéwa tayë ese ta, e' wa e' tö tayë senewabak dalösewëwa.

*S'ttè mè ñi a Skëköl wörki ese ché Jesús tö*

<sup>33</sup> “Ñies a' wá ittsëule tö iyënebak ká iaiaë a' yépa a: ‘A' ttè mé Skëköl wörki, eta e' wá uk a' kawöta mokië.’ <sup>34</sup> Erë ye' tö a' a ichè tö kè a' kawö ta' ttè muk ñi a Skëköl wörki ö

\* 5:32 itayë wömëttsami...e' dalöseukwa: Ttè i' wá armi se' éna ñies i' es: “e' ta ie' tso' itayë sauk wes alaköl trërta' es.

ilè skà wa. Kè a' k̄awö t̄a' ttè muk ñi a k̄a jai wa, e' dör wé Skéköl tkër s'blúie e' kueki. <sup>35</sup> Kè a' k̄awö t̄a' ttè muk ñi a k̄a i' wa, e' dör Skéköl klò tkokaie e' kueki. Kè a' k̄awö t̄a' ttè muk ñi a Jerusalén wa, e' dör Skéköl dör s'blú, e' ké, e' kueki. <sup>36</sup> Ñies a' wakpa kè a' tsà è manenuk saruru ö dalolo, e' kueki a' kè k̄awö t̄a' ttè muk ñi a i' es: “Ì chéyö e' kè yène, e' t̄a ye' wökir tóö.” <sup>37</sup> E' kueki mik a' ttè meke ñi a, t̄a a' tö icheke, “tó”, et̄a e' dör tó; mik a' tö icheke, “au”, et̄a e' dör au. A' tö ì skà chéne bánet, e' t̄a e' dör suluë.

*Se' e' tsatkò s'sulusipa yöki ese ché Jesús tö*  
(Lucas 6.29-30)

<sup>38</sup> “A' w̄a ittseüle tö iyënebak: ‘Yi tö o'ka wöbla tskéw̄a, ese wák k̄awöt̄a wöbla ské tskèw̄a. Yi tö o'ka kà péw̄a, ese wák k̄awöt̄a kà ské pèw̄a.’ <sup>39</sup> Erë ye' tö a' a' ichè tö kè a' e' tsatkök pè' sulusipa yöki. E' skéie yi tö a' ppé a' aswö bua'kka ki, e' t̄a a' aswö etta mú ia ppè. <sup>40</sup> Yi tö a' kkaté s'shulökwakpa wörki a' paio kiane iki e' kueki, e' t̄a a' paio mú ia, ñies a' paio kikke mú ia. <sup>41</sup> Yi tö a' ké idali tsukmi kësik wa dò kilómetro et†, e' t̄a iki tsúmi dò kilómetro böt. <sup>42</sup> Yi tö a' a' ilè kak kié, e' t̄a imú ia. Ñies yi tö a' a' íyí kié peitule, e' t̄a ipeitó ia.

*S'bolökpa ché Jesús tö*  
(Lucas 6.27-28,32-36)

<sup>43</sup> “Ñies a' w̄a ittseüle tö iyënebak: ‘S'yamipa dalëritsó erë s'bolökpa saú sulu.’ <sup>44</sup> Erë ye' tö a' a' ichè: A' bolökpa dalëritsó. Wépa tö a' we'ikeke, esepa ki ikió S'yé a' tö ikimú. <sup>45</sup> A' tö iweke es, e' t̄a e' wa a' tso' ikkachök tö mokí a' dör a' Yé tso' k̄a jai a' ala'r. Ie' tö diba patkeke s'ser buaë ena s'ser sulu esepa ki. Ñies ie' tö kalí patkeke s'ser yësyësë ena s'ser sulu esepa ki. <sup>46</sup> Wépa tö a' dalëritseke esepa è ské dalëritseke a' tö, e' t̄a ¿wes Skéköl tö ì buaë mèmi a' a' iskéie? Ñies inuköl shtökwakpa Roma wökirpa a' e'pa tö iweke es. <sup>47</sup> A' tö a' yamipa è shké'weke, e' t̄a ¿ì buaë weke a' tö s'sulusipa tsat̄a? Ñies pè' kè tö Skéköl dalöie esepa tö iweke es. <sup>48</sup> A' senú buaë yësyësë wes Skéköl dör S'yé tso' k̄a jai a' e' ser buaë yësyësë es.

## 6

*Jesús tö s'wöbla'wé tö wes se' ké s'siarëpa k̄imuk*

<sup>1</sup> “¡A' e' kkö'nú! Mik a' tö ì buaë weke s'kimoie, et̄a kè iwar sulitane wörki as ie'pa tö a' kkeòka. A' tö iwé es, e' t̄a Skéköl dör S'yé tso' k̄a jai a, e' kè tö ì mepa a' a' iskéie.

<sup>2</sup> “E' kueki mik a' tö s'siarëpa k̄imeke, et̄a kè e' tté p̄parka sulitane kukua wes e' ökwakpa es. Ie'pa tö iweke ie'pa ñi dapa'wö wé a' ena ñala wa as sulitane tö ie'pa kkeòka. Mokí ye' tö a' a' ichè tö pè' tö ie'pa kkeekëka e' è dör ie'pa icha ské. <sup>3</sup> Erë mik a' tö s'siarëpa k̄imeke, et̄a a' tö iú bèrè, kè ichar yi a. <sup>4</sup> Es Skéköl tö ì kos tso' blëule ese sueke, e' tö ì buaë meraë a' a' iskéie.

*Jesús tö s'wöbla'wé tö wes se' ké ttök S'yé t̄a*  
(Lucas 11.2-4)

<sup>5</sup> “Mik a' ttöke S'yé t̄a, et̄a kè a' ttök sulitane wörki wes e' ökwakpa es. Sulu ie'pa wöbatsö e' duöks̄er ttök S'yé t̄a ie'pa ñi dapa'wö wé a' ena wé pè' daparke taië k̄a áie ese ska' as ikkeark̄a. Mokí yö ichè a' a' tö ie'pa icha ské detke iulà a' sera. <sup>6</sup> Erë mik a' ttöke S'yé t̄a, et̄a a' yúwa a' úshu a, ukkö wötów̄a ee a' ttó Skéköl dör a' Yé e' t̄a bèrè. A' tö iweke es, e' t̄a Skéköl tö ì kos tso' blëule ese sueke, e' tö ì buaë meraë a' a' iskéie.

<sup>7</sup> “Ñies mik a' ttöke S'yé t̄a, et̄a kè a' ttök wes pè' kè tö ie' dalöie e'pa ttöke ie'pa kékölpa t̄a es. Ie'pa ttöke ttè etkè wa taië batsjè kè wà t̄a'. Ie'pa tö ibikeitseke tö ikékölpa tö ie'pa

† 5:41 E' k̄ewö skà t̄a Roma ñippökwakpa w̄a k̄awö t̄a' judiowak kök idali tsukmi dò kilómetro etk.

ttò ttsèmi ie'pa tté taië e' kueki, <sup>8</sup> Kè a' tò iuk wës ie'pa es. Ì kiane a' ki e' jcher Skèköl wä kam a' tò ie' a ikiò e' yöki. <sup>9</sup> A' ttó ie' ta i' es:

'A Sa' Yé tso' ká jai a,  
as be' dalöiò sa' tò ì ulitane tsata.

<sup>10</sup> As be' dò sa' blúie da'aie.

Ì kiane be' ki as e' or ká i' ki  
wës iorke ká jai a es.

<sup>11</sup> Chkè kiane sa' ki i' ñie sènoie e' mú sa' a.

<sup>12</sup> Sa' nuì olo'yó sa' ki  
wës sa' tò s'malepa ki inuì olo'yeke es.

<sup>13</sup> Kè sa' marttsa tò ì sulu tò sa' erkiöù,  
e' skéie sa' tsatkó yi dör sulu ichók\* e' yöki.'

<sup>14</sup> "S'malepa nuì olo'yeke a' tò ie'pa ki, e' ta ñies S'yé tso' ká jai a, e' tò a' nuì olo'yeraë a' ki. <sup>15</sup> Erë a' kè tò s'malepa ki inuì olo'yè, e' ta S'yé kè tò a' nuì olo'yepa a' ki.

*Jesús s'wöbla'wé tò wës se' ké batsök*

<sup>16</sup> "Mik a' batsöke Skèköl a, etä kè a' e' ök siarë wës e' ökwakpa es. Ie'pa e' öke siarëla as s'malepa tò isaù ta ikkeökarakitö ibatsökerak e' kueki. Moki ye' tò a' a ichè tò ie'pa icha ské detke ie'pa ulà a. <sup>17</sup> Erë mik a' batsöke, etä a' wöskuóó, a' tsajklöö, <sup>18</sup> as s'malepa kè tò isaù tò a' tso' batsök. S'yé kè wërta' e' tò íyi ulitane tso' blëule e' sueke. A' batsó ie' è wöa ta ie' tò iské meraë a' a buaë.

*Íyi bua'buá bló ká jai a*  
(Lucas 12.33-34)

<sup>19-21</sup> "Wé a' íyi bua'buá tso' blëule eë a' er me'rie. E' kueki kè a' tò íyi bua'buá blök ká i' ki. Ká i' ki powak se' íyi sulu'wékewa, ñies akblökwakpa tò iekibleke. E' skéie, a' íyi bua'buá e' bló ká jai a. Eë powak kè döpa íyi sulu'ukwa ñies akblökwakpa kè döpa íyi ekiblök.

*S'wöbla buaë ena s'wöbla suluë*  
(Lucas 11.34-36)

<sup>22</sup> "S'wöbla dör wës bö'wö es s'chkà qos a. E' kueki s'wöbla dör buaë, e' ta se' chkà qos e' a ká olo ta' buaë. E' dör wës se' er dör buaë es, ì qos dör buaë yësyësé ese ki se' er me'rie. <sup>23</sup> Erë s'wöbla kè dör bua', e' ta s'chkà qos e' tso' stui a. E' dör wës se' er suluë es, ì sulu qos ese ki se' er me'rie. Erë se' er buaë e' míane suluë stuiie, e' ta e' dör suluë ichökle.

*¿Yi dör a' wökir?*  
(Lucas 16.13)

<sup>24</sup> "Wé klöulewa kanè mésoie, ese kawöta iwökir è ttò dalöiök. Ie' wökirpa chópa bö, e'ma ie' kawöta eköl è dalöiök ena iëköl watöktsa. Es a' kè a er menukwa Skèköl ki ena inuköl ki ñita.

*Kè a' tkinuk ì ki*  
(Lucas 12.22-31)

<sup>25</sup> "E' kueki ye' tò a' a ichè: Ì kiane a' ki sènoie chkeie, di'ie, datsi'ie ñie, ese qos kè ki a' tkinuk. S'tso' ttsè'ka e' kè dör chkök ème, ñies s'chkà kè dör datsi' è ioie. <sup>26</sup> Dù saú a' tò. Ie'pa kè tò ì kuatketä' ì wöshteta', ie'pa kè tò chkè bleta', erë S'yé tso' ká jai a e' tò ie'pa tieke. Ie' éna a' dalër taië dù qos tsata. <sup>27</sup> A' tkirke taië e' ki, e' kè tò a' a kawö kí mepa sènoie ekuölö è.

\* 6.13 Yi dör sulu ichók: E' dör bé kiè Satanás e'.

<sup>28</sup> “¿Ì kuèkì a' tkirke datsi' kì? Ma'ma wörkua bua'buaala ese saú wes italar, kè kaneblötä', kè datsi' yueta'. <sup>29</sup> Eré blu' bak kiè Salomón, e' wä íyi ulitane bua'buaë bak taië, erë ye' tö a' a ichè tö ie' datsi' bua'bua kè wër buaë wes ma'ma wër es. <sup>30</sup> Käkö suésö ìñe, bule tä ñanewa, erë Skëköl tö ikitkeke buaala iwörkua wa. Ie' tö kākō kitkeke es, je' yitā ie' tö a' kianeia erblök buaë ie' mik, esepa paieraë! <sup>31</sup> E' kuèkì kè a' tkinuk. Kè a' e' chakök, ‘¿ì ñemi sa' tö?’ ö ‘¿ì yèmi sa' tö?’ ö ‘¿ì wa sa' e' paiòmì?’ <sup>32</sup> Pë' kè tö Skëköl dalöiè esepa tkirke taië íyi kōs ekkè kì. Erë ì kōs kiane a' kì e' jchertke a' Yé tso' ká jai a e' wä. <sup>33</sup> E' kuèkì ì kōs blúie ie' tso' ena ì dör yësyësë ie' a ese kì a' er múwä kewe. A' tö iweke es, e' tä ñies íyi ñekkè kōs döraë a' ulä a. <sup>34</sup> Diwö bit ekkè íyi tso' kì tkine e' dör wë' se' a. Bulebök se' tkirmi ì tkömi ee e' kì, e' kuèkì kè a' tkinuk iki i' tä.

## 7

*Kè a' tö s'kichatök*  
(Lucas 6.37-38,41-42)

<sup>1-2</sup> “Ttè wa a' tö s'malepa kichaté e' è wa Skëköl tö a' kichateraë. Wes a' tö s'malepa weke e' sù a' weraë Skëköl tö. E' kuèkì kè a' s'kichatök as Skëköl kè tö a' kichatò. <sup>3</sup> Kaltak jchela tsir tso' a' yami wöbla a, e' sué a' tö, erë ¿ì kuèkì kaltak bërie tso' a' wák wöbla a, e' kè sune a' wä? <sup>4</sup> ¿Wes a' tö ichèmi a' yami a: ‘súyö be' wöbla a kaltak jchela tsir tso' e' yëttsä?’ Erë kaltak bërie tso' a' wöbla a, ¿e' kè sune a' wä? <sup>5</sup> ¡A' e' öke suluë! Kaltak bërie tso' a' wöbla a e' yöttsä kewe, es a' yami wöbla a kaltak jchela tsir tso' e' wërmi a' a buaë yëttsä.

<sup>6</sup> “Ì dör batse'r ese kè tularitssa chichi a dö' ie'pa bitune a' jchöklor. Ñies a' íyi bua'bua\*, ese kè tularitssa köchi a, ie'pa tö ñateraë ikla'tska wa.

*Ì kiane a' kì, ese kió Skëköl a*  
(Lucas 11.9-13; 6.31)

<sup>7-8</sup> “Wépa tö íyi kieke Skëköl a, esepa a imeraë ie' tö; wépa tö íyi yuleke ie' ska' esepa tö ikueraë; wépa tö ie' chakeke, esepa kierawä ie' tö weshke. E' kuèkì ì kiane a' kì e' kió ie' a, etä ie' tö a' a imeraë; e' yuló ie' ska', etä a' tö ikueraë; ie' chakó, etä ie' tö a' kierawä weshke.

<sup>9</sup> “Kè a' wéne tö ák mepa ilä a pan kiéitö e' skéie. <sup>10</sup> Ñies kè a' tö tkabè mepa a' alä a nima kiéitö e' skéie. <sup>11</sup> A' dör pë' suluë erë e' tö íyi buaë meke a' alä a. ¡E' yitā buaë S'yé tso' ká jai a, e' tö íyi buaë meraë yi tö ie' a ikieke ese a!

<sup>12</sup> “A' senú s'malepa tä wes a' kì ikiane tö ie'pa ser a' tä es. Ttè e' a ì kit Moisés ena Skëköl ttekölpa tö yëkkuö kì e' kōs wöiëulewä. E' kuèkì a' senú es.

*Sene michoë wékkö e' dör tsir*  
(Lucas 13.24)

<sup>13</sup> “Sene michoë e' wékkö dör tsir, e' a a' shkówä. S'weir micho e' ñalé ena iwékkö dör shoë; taië s'mi'ke iki. <sup>14</sup> Erë sene michoë e' wékkö dör tsir ena ñalé kì darërëë shka', wépa tö ikué esepa kè dör taië.

*Kal buaë ena kal suluë*  
(Lucas 6.43-44)

<sup>15</sup> “A' e' kkö'nú kachökwakpa e' chò tö ie'pa dör Skëköl ttekölpa esepa yöki. Ie'pa e' ö tö ie'pa dör buaë wes obeja urula es, erë ie'pa er suluë wes iyiwak sulusi es. <sup>16</sup> Wes ie'pa e' wamblöke, e' wa a' tö isuerawä pë' wése idir. ¿Wé a' wä isuule tö uvawö ö higowö e' shtetä'sö dika' kicha mik? <sup>17</sup> Kal buaë kōs ese wö dör buaë, erë kal sulusi kōs ese wö dör suluë. <sup>18</sup> Kal bua'bua kè wörtä' kalwö sulusiie. Ñies kal sulusi kè wörtä' kalwö bua'buaie.

\* 7:6 íyi bua'bua: E' dör perla si'kuaie.

19 Kal qos kè wör buaë, ese bikeeke ta ñña'wëkewa bö' a. 20 Es a' tö kachökwakpa suerawa wës ie'pa e' wamblò e' wa.

*Jesús tö icheraë 'kè ye' wa a' suule'*  
(Lucas 13.25-27)

21 “Wépa tö ye' a icheke: ‘A Skëképa, a Skëképa’, kè esepa döpaḡa seraa ì blúie Skëköl tso' e' a. Erë wépa serke wës ye' Yé tso' ká jaì a e' kî ikiane es, esepa è dörawa. 22 Aishkuö ta mik a' wöchakirketke a' nuì kî e' kéwö de, eta taië ie'pa tö ye' a icheraë i' es: ‘A Skëképa, be' ttò wa sa' ut Skëköl ttekölie, be' ttò wa sa' tö aknama uya'lur, be' ttò wa ì kè or yi a ese o' sa' tö taië.’ 23 Erë ye' tö ie'pa iüteraë: ‘Kè ye' wa a' suule yës. A' e' wamblò suluë. ¡A' yúshka bánet ye' yöki!’

*U yuökwak bö*  
(Marcos 1.22; Lucas 6.47-49)

24 “E' kueki yi tö ye' ttò ttsé ta iwà iuteke, ese dör wës wëm eköl tö u yué es. E' tö u chkí töbié iskië ká dör ák è ese a. 25 Kalí yëne taië, di' pone taië, sèrké tka taië, e' qos tëne u e' mik, erë u kè anerö, ichkí tuluulewa ák a e' kueki. 26 Erë yi tö ye' ttò ttsé, erë kè iwà iuteku', ese dör wës wëm eköl kè kabikeitsöta' es. E' tö u yué tsa'wö a ta chkí ate jalëjalë. 27 Kalí yëne taië, di' pone taië, sèrké tka taië, e' qos tëne u e' mik ta ñanerö iski ta kè ì ta'ia iwa.”

28 Mik Jesús tté one ta wës ie' tö s'wöbla'weke e' tö sulitane tkiwéwa. 29 Ie' tö ie'pa wöbla'weke ttè moki, diché ta' taië, ese wa. E' kè dör wës s'wöbla'uk ttè dalöiëno wa wakpa s'wöbla'weke es. E' kueki ie'pa wökranewa ittök.

## 8

*Wëm eköl kiri'weke lepra tö e' bua'wé Jesús tö*  
(Marcos 1.40-45; Lucas 5.12-16)

1 Mik Jesús biteatkene kabata a, eta taië pé' dami ie' itöki; 2 e' shua wëm debitu eköl ie' ska' kiri'weke lepra\* tö. Ie' e' tkéwa kuchë kî Jesús wörki ta ichéitö:

—A këképa, be' kî ikiane, e' ta be' a ye' buarmine as ye' batse'rne.

3 Jesús tö ikéwa ulà wa ta ichéitö ia:

—Tó, ye' kî ikiane. Be' dene batse'r.

E' wöshā ta ie' buanene, kè kî lepra ku'ia. 4 Jesús tö iché ie' a:

—Ittsó, kè ichar yi a. Be' yú e' kkachök sacerdote a. Ì muk Moisés tö a' ka' e' batse'woie, e' tsúmi mè Skëköl a iwà kkachoie tö be' buanene.

*Kanè méso eköl bua'wéne Jesús tö*  
(Lucas 7.1-10; Juan 4.43-54)

5 Mik Jesús de Cafarnaúm, eta Roma ñippökwakpa döka cien ese wökir de eköl ie' ska' kköchök, 6 ta ichéitö ia:

—A këképa, ye' kanè méso duladula eköl kirinewa taië. Ie' me'r u a ka' kî pa dalërke taië kranewa.

7 Jesús tö iuté:

—Ye' mí ibua'ukne.

8 Ñippökwakpa wökir tö iuté:

—A këképa, be' döwa ye' u a e' kè dör ye' siarla e' a. Erë ikéwö è mú ta ye' kanè méso buardane. 9 Ye' wökirpa ta', e'pa ttò iütök ye' kawöta. Ñies ye' dör ñippökwakpa taië e'pa wökir, ie'pa kawöta ye' ttò iütök. Mik ye' tö eköl a icheke: ‘Be' yú, ta imí. Eköl a ye' tö icheke: ‘Be' dou’, ta ide. Ñies ye' tö icheke ye' kanè méso a: ‘Íyi ú’ ta iwéitö. Ye'

\* 8:2 Lepra: E' dör duè s'méwöie ese. Judiwak tö ikló'wé tö duè e' tö yi tteke ese dör ñá. Esepa batseketsa bánet kè a kawö ta' senuk pé' malepa shua. Ñies ie'pa kè a kawö ta' shkókwa Skëköl wé a.



iklö'wé tö be' wá kawö tã' íyi ulitane tsãta, e' kueki ye' wá ijcher tö be' tö ikéwö mé, e' ta ye' kanè méso buardane.

<sup>10</sup> Mik Jesús tö e' ttsé tã e' tö ie' tkiwéwã. Ichéitö pë' dami ie' itöki e'pa a:

—Moki ye' ichè a' a tö Israel aleripa qos shua kè ye' wá yi kune erblök ye' mik wes wëm i' es. <sup>11</sup> Ye' tö a' a ichè tö mik ì blúie Skéköl tso' e' kéwö de da' aie, etã pë' kè dör judiowak tso' kã wa'ñe, esepa döraë taië e' tköksér chkök se' yépa bak kiè Abraham ena Isaac ena Jacob e'pa tã. <sup>12</sup> Erë warma wépa e' tulökeser ee esepa uyardattsã bánet stui ké a. Ee ie'pa iuraë siarë ikà yilitdawa weine kueki.

<sup>13</sup> Etã Jesús tö iché ñippökwakpa wökir a:

—Be' yú u a tã itköraë wes be' erblé ye' mik es.

E' wöshã tã ikanè méso buanene.

*Jesús tö Pedro yàk bua'wéne*

*(Marcos 1.29-31; Lucas 4.38-39)*

<sup>14</sup> Jesús míã Pedro u a tã ie' isué tö Pedro yàk me'r kã kã kiri'weke duè dalölö tö. <sup>15</sup> Ie' tö iké iulã kã tã duè dalölö tö iéwa tã ie' e' kéka tã ilè yuléitö ie' a ñè.

*Jesús tö s'duöke taië esepa bua'wéne*

*(Marcos 1.32-34; Lucas 4.40-41)*

<sup>16</sup> Kã tuirketke tã taië ie'pa wá pë' a aknama tso' esepa debitu Jesús ska'. Ittò è wa ie' tö wimblupa ñe' trë'wéyal sërãã. Ñies s'kirirke e'pa bua'wéneitö sërãã. <sup>17</sup> E' tka es as ì yë'at Skéköl tteköl kiè Isaías e' tö, e' wà tkò. Ie' iyé':

“Se' duè qos e' yéttsã ie' tö se' kã,

Se' weirke qos e' mítser ie' wá se' yöki bánet.”†

*Wépa böi e' yuak Jesús ttökatapaie*

*(Lucas 9.57-62)*

<sup>18</sup> Mik Jesús tö isué tö pë' dapanekã taië ipamik, etã ie' tö iché ittökatapa a: “Mishka batsöri wishet.” <sup>19</sup> Etã s'wöbla'ukwak ttè dalöiëno wá eköl de ie' ska' tã ichéitö ia:

—A S'wöbla'ukwak, ye' shkak be' tã be' ttökataie kã wa'ñe wé be' mírö ee.

<sup>20</sup> Jesús tö iüté:

—Bakli' u tã' ñies dúla u tã', erë ye' dör S'ditsö Alà e' kè wá u tã' sënöie.

<sup>21</sup> Etã wëm skà dör ie' klé eköl e' tö ie' a iché:

—A kékëpa, kawö mú ña, mik ye' yé blënewã tã inú wötökwa, e' ukuöki ye' mi'ke be' tã.

<sup>22</sup> Jesús tö iüté:

—I' tã be' shkó ye' tã. Wépa dör wes s'duulewã es Skéköl wöã, as esepa tö iyamipa nu blö.

*Sërkë wöklö'wé Jesús tö*

*(Marcos 4.35-41; Lucas 8.22-25)*

<sup>23</sup> Etã Jesús e' iéka kanò a ittökatapa tã tã imiyal batsöri kã. <sup>24</sup> Ie'pa mirwaiã e' shua siwa' batsineka taië tö di' uyéka taië tã kanò a di' iënekami. Erë ie' kapöme'r. <sup>25</sup> Etã ittökatapa de ie' ska' tã itj'wéka tã ichéitörak ia:

—¡A Skékëpa, se' tsatkó! ¡Se' duölurmi!

<sup>26</sup> Ie' tö ie'pa iüté:

—¿Ì kueki a' suane sekké? Wësua a' kè erblökü' ye' mik bua'ie.

Etã ie' e' kéka tã siwa' ena di' yöli uñéitö tã iwöklönewã míãne alamië. <sup>27</sup> Ie'pa tkinewa taië tã iñi chakéka:

—¿Yi dör wëm wí? ¡E' ttò dalöieke siwa' tö ena di' tö!

*Jesús tö wépa böi a aknama tso' e'pa bua'wé*

*(Marcos 5.1-20; Lucas 8.26-39)*

† 8:17 Isaías 53.4

<sup>28</sup> Mik Jesús demi batsöri wışhet ká kiè Gadara ee tã wëpa böi a aknama tso', e'pa e' yéttsa pö ké a de ie' ska'. Ie'pa e' wamblörak suluë e' kueki kè yi shkötã' ñalã e' wa. <sup>29</sup> Ie'pa tö ichémi aneule:

—Be' dör Skököl Alà. ¿Iók be' de sa' tsiriuk? ¿Be' debitu sa' we'ikök kam sa' kèwö dō e' yökü?

<sup>30</sup> Ee tsinet köchi iëter taië chkök. <sup>31</sup> Aknamapa tso' taië e'pa kköché Jesús a:

—Be' tö sa' uyekettsã, e' tã kawö mú sa' a e' tiukwã köchi tso' taië jaì a.

<sup>32</sup> Ie' tö iché ie'pa a:

—A' yúshka ee.

Etã aknamapa kos e' yélur wëpa a tã e' tiélur köchi a. E' bet tã köchi kos poneka tunemirak ká spé mik brutolonemi batsöri a tã ee iduolur.

<sup>33</sup> Köchi kkö'nukwakpa tkayalmi. Mik ie'pa de ká kibi ki, etã ie'pa tö i kos tka wëpa a aknamapa bak e'pa tã, e' tté ppéka. <sup>34</sup> Etã ká e' wakpa kos miã Jesús ska'. Mik ie'pa de, etã ie'pa kköché ie' a: “Be' e' yótttsã sa' ká a.”

## 9

### *Jesús tö wëm eköl kraulewã e' bua'wéne*

(*Marcos 2.1-12; Lucas 5.17-26*)

<sup>1</sup> E' ukuöki tã Jesús e' iéka kanò a tã imiãne itò wa demi Cafarnaúm wé ie' serke ee. <sup>2</sup> Etã ee ie'pa wã wëm kraulewã eköl mítser Jesús ska' ka'la ki. Mik Jesús tö isuë tö moki ie'pa erblé ie' mik, etã ie' tö iché wëm kirirke e' a:

—A yami, be' er kuú, i sulu kos wamblébö, e' nuí olone be' ki.

<sup>3</sup> Etã s'wöbla'uk tté dalöiëno wa wakpa wëlepa tö ibikeitseke: “Ï ché ie' tö e' wa ie' tso' Skököl chök suluë.” <sup>4</sup> Erë i bikeitsök ie'pa tso' e' suëwã Jesús tö bet. E' kueki ie' tö ie'pa a ichaké:

—¿I kueki a' tso' íyi sulu bikeitsök? <sup>5</sup> Ye' tö wëm i' bua'wëmine as ishköne, e' tã ¿wes a' tö iklö'wëmi tö ye' kè a inuì olonuk iki? <sup>6</sup> Ye' dör S' ditsö Alà, sù e' tö a' a ikkachè tö ye' wã kawö tã ká i' a nuì olo'yoie.

Etã ie' tö iché wëm kraulewã e' a:

—Be' e' kóka, be' ka'la kóka tã be' yúne be' u a.

<sup>7</sup> Etã ie' e' kékã tã imiãne iu a. <sup>8</sup> Mik e' suë pë' tso' ee e'pa tö, etã ie'pa suane taië. Ie'pa tö isuë tö Skököl tö diché taië mé s' ditsö eköl a, e' kueki ie'pa tö Skököl kikéka taië.

### *Jesús tö Mateo kié ittökataie*

(*Marcos 2.13-17; Lucas 5.27-32*)

<sup>9</sup> E' ukuöki tã Jesús e' yéttsã tã imiã, e' tö wëm suë eköl kiè Mateo,\* e' dör inuköl shtökwak Roma wökirpa a. Ie' tkër ikaneblöke e' wé a. Tã Jesús tö ie' a iché:

—Be' shkó ye' tã ye' ttökataie.

Etã ie' e' kékã tã imiã Jesús tã.

<sup>10</sup> E' ukuöki tã Jesús de ittökatapa tã Mateo u a chkök. Ie'pa tular chkök, e' dalewa inuköl shtökwakpa Roma wökirpa a esepa taië ena pë' sulusipa skà deyalñak e' tulésër chkök Jesús tã. <sup>11</sup> Mik e' suë fariseowakpa tö, etã ie'pa tö Jesús ttökatapa a ichaké:

—¿Iók a' wöbla'ukwak chköke inuköl shtökwakpa ena pë' sulusipa skà tã?

<sup>12</sup> Jesús tö ittse tã ichéitö iarak:

—Wëpa kè kirirku' esepa kè ki s'kapeyökwak kiane. Erë wëpa kirirke, esepa ki ikiane.

<sup>13</sup> Skököl tö iyë' iyëkkuö ki: 'Iyiwak jchëule mè ye' a, ese kè kiane ye' ki. Ye' ki ikiane tö a' ñi saù er siarë wa.'† A' e' yuó tté e' wa. Ye' kè dë'bitu wëpa e' ttsò tö ie'pa ser buaë yësyësë esepa kiök ye' ttökataie; ye' dë'bitu pë' sulusipa kiök ye' ttökataie.

\* 9:9 Mateo: E' dör yëkkuö i' shtökwak. Ie'pa wöblane e' chök wes o'ka ché es, e' kueki ie' kè wã iyëne ye'. † 9:13 Oseas 6.6

*Ì kuęki Jesús ttókatapa kè batsöta'*  
(Marcos 2.18-22; Lucas 5.33-39)

<sup>14</sup> Juan S'wöskuökwak ttókatapa de Jesús ska' ta ichakérakitö ie' a:

—Sa' ena fariseowakpa batsöke taië. ¿Ì kuęki be' ttókatapa kè batsö?

<sup>15</sup> Jesús tö ie'pa iüté:

—Mik s'kiule ulabatsè ese kéwö tkö'uk ta ¿wes ie'pa eriarmi wëm ulabatske e' tso'ia ie'pa ta e' dalewa? Erë ikéwö döraë eta' ie' miratsër ie'pa yöki. E' je' ta ie'pa batsöraë.

<sup>16</sup> “Kè yi tö datsi' kèchke wöyuepawa datsi'tak pa'ali wa. Datsi'tak pa'ali wöklöneka, e' tö datsi' kèchkela shukueęke ta iki jcheeke taië. <sup>17</sup> Nies vino kè terta'ka iyiwak kkuölit yöule ibloie ese kèchke a. Itékasö es, e' ta mik ibacha'nebitu, eta' ikkuölit kèchke jchèemiitö. Es vino ena ikkuölit weirwami éme. E' kuęki vino tekeka ikkuölit pa'ali a, es vino ena ikkuölit kè weirpawa.”

*Jesús tö Jairo alà busi shke'wékane nies alaköl eköl bua'wéneitö*  
(Marcos 5.21-43; Lucas 8.40-56)

<sup>18</sup> Jesús tso'ia ttök, e' dalewa judiowak wökir debitu eköl ie' ska' ta ie' e' tkéwa kuchë ki ta ichéitö:

—Ñiköl ye' alà busi blënewa. Erë be' shkó, be' ulà múka iki ta ishkerdakane.

<sup>19</sup> Jesús e' kéka ta imía ittókatapa ta judiowak wökir itöki. <sup>20-21</sup> E' shua alaköl eköl dewa tsinet Jesús tsi kker. E' du'mi alakölpä duè wa e' ki duas de dabom eyök ki bök (12). Ie' tö ibikeitseke: “Jesús datsi' bata è kéwayö, e' ta ye' buanene.” E' kuęki idatsi' bata kéwaitö.

<sup>22</sup> Erë Jesús wötrée ta isuéitö ta ichéitö ia:

—A alà busi, be' er kuú. Be' erblé ye' mik, e' kuęki be' buanene.

E' wöshä ta ie' buanene buaë.

<sup>23</sup> Mik Jesús de Jairo u a, eta' ie' tö isué tö ma'ma bla'ukwakpa detke s'nu blërketke e' kuęki, nies pè' iuke taië. <sup>24</sup> Ie' tö ie'pa a iché:

—A' e' yólur, busila kè du'wa, ikapöme'r è.

Ie'pa tö Jesús jañeitséka taië, <sup>25</sup> erë ie' tö ie'pa ké e' skökmi bánet. E' ukuöki ta ie' dewa weshke ta busila ulà kló'wéwaitö ta busila e' kéka. <sup>26</sup> E' tté buneka ká e' kos a.

*Wëpa bül kè wöbla wawër e'pa bua'wéne Jesús tö*

<sup>27</sup> Jesús e' yéttsa eë ta wëpa bül kè wöbla wawër mirwa ie' itöki, e'pa arke:

—¿A Jesús, s'blú David bak e' aleri,† sa' saú er siarë wa!

<sup>28</sup> Mik Jesús de u a, eta' ie'pa bül de ie' ska'. Ie' tö ie'pa a ichaké:

—¿A' tö iklö'wé tö ye' a a' buarmine?

Ie'pa tö iüté:

—A kékëpa, tó, sa' tö iklö'wé.

<sup>29</sup> Eta' Jesús tö ie'pa wöbla ké ta ichéitö ie'pa a:

—Wës a' erblöke ye' mik es iwà ordaë.

<sup>30</sup> Eta' ie'pa wöbla buanene. Ta Jesús tö iché ie'pa a:

—Kè a' kàne ichök yi a yës.

<sup>31</sup> Erë ie'pa míyal ta ì wé Jesús tö e' paké ie'pa tö ká e' wakpa ulitane a.

*Wëm kè tto eköl e' bua'wé Jesús tö.*

<sup>32</sup> Wëpa bül wöbla buanene e'pa míyal, e' bet ta pè' welepa wa wëm kè tto, ese debitu eköl Jesús ska', e' a aknama tso'. <sup>33</sup> Mik Jesús tö aknama trë'wëshkar, eta' wëm ttékane buaë. Pè' tso' eë e'pa tkirulune ta ichérakitö:

—Kè yi wa íyi wíse suule Israel aleripa shua.

<sup>34</sup> Erë fariseowakpa tö iché:

—Bé, e' wák diché wa ie' tö ie'pa trë'wéyal.

† 9:27 David aleri: Es ie'pa tö wé pairine'bitu idi' wa s'blúie kitulebak tö idatse e' è kiè. E' wà kiane chè si'kuaie El Mesías.

*Jesús tö pë' sué er siarë wa*

<sup>35</sup> Jesús shköke ká qos tso' Galilea blublu ñies tsitsir e' a. Ie' s'wöbla'weke judiowak ñi dapa'wo wé qos tso' e' a. Ì blúie Skéköl tso' e' tté buaë pakekeitö. Ñies s'kirirke qos, idalërke s'mik qos, e' bua'wekeitö. <sup>36</sup> Ie' tö isué tö ie'pa eriarke siarë, weinetke siarë wes obeja kè kkö'nukwak ta' es, e' kueki ie'pa suéitö er siarë wa. <sup>37</sup> Ie' tö iché ittökatapa a:

—Moki, ye' a ta ie'pa dör wes iyiwö tso'tke wë'iàë shtë es, erë ishtökwakpa kè dör taië. <sup>38</sup> E' kueki a' tö ikió kanè wák a tö ishtökwakpa patkó.

## 10

*Jesús tö ittekölpa tsá e'pa a kawö mé*

(*Marcos 3.13-19; Lucas 6.12-16*)

<sup>1</sup> Jesús tö ittökatapa dabom eyök kí bül (12), e'pa kié e' ska' ta kawö méitö ie'pa a wimblupa sulusi trë'woyal ñies s'kirirke dué ulitane wa esepa bua'wone.

<sup>2</sup> Ie'pa ekkëpa dör ñies Jesús ttekölpa tsá, e'pa kié i' es: kewe dör Simón, e' kié ñies Pedro ena ie' èl kié Andrés; Santiago ena iël kié Juan, ie'pa dör Zebedeo ala'r; <sup>3</sup> Felipe ena Bartolomé; Tomás ena Mateo dör inuköl shtökwak Roma wökirpa a e'; Santiago dör Alfeo alà, ena Tadeo; <sup>4</sup> Simón Celote ena Judas Iscariote tö Jesús wömekettsa aishkuö ta ibolökpa a e'.

*Jesús tö ittökatapa patkëmi s'wöbla'uk*

(*Marcos 6.7-13; Lucas 9.1-6*)

<sup>5</sup> Wëpa dabom eyök kí bül (12), ñe'pa patkëmi Jesús tö ta ipattéitö i' es: “Kè a' minuk pë' kè dör judiowak esepa ká a. Ñies kè a' minuk Samaria. <sup>6</sup> A' yú Israel aleripa ká a, ie'pa dör wes obeja chöwa es. <sup>7</sup> A' yú ipakök tö ì blúie Skéköl tso' e' kèwö dewatke. <sup>8</sup> S'kirirke bua'üne, s' duowa shke'ükane, s'kiri'weke lepra tö, esepa bua'üne as ibatse'rne. Ñies aknamapa yóttsa. E' diché mène a' a éme, e' kueki kè yi ña'war iki.

<sup>9-10</sup> “Kè ì tsarmi. A' kè kawö ta' inuköl tsukmi yës. Ñies sku', datsi' skà, klökkuö, shko kéli ese qos kè tsarmi. Kaneblökwak chkömi ì kanewekeitö e' ské wa, e' kueki kè ì tsarmi.

<sup>11</sup> “Mik a' demi ká tsitsir ö ká blublu a, eta yi tö a' kièwami er bua' wa ese yuló. Mik a' ikué, eta e' è u a a' kapóro a' tso' ee e' dalewa. <sup>12</sup> Mik a' dewa u e' a, eta ie'pa qos serke ee e'pa shke'ü er bua' wa. <sup>13</sup> Ie'pa tö a' kiéwa er bua' wa, e' ta Skéköl er buaë chöraë ie'pa a. Erë ie'pa kè wa a' kinewa er bua' wa, e' ta kè Skéköl er buaë chöpa ie'pa a. <sup>14</sup> U wele wakpa ö ká wele wakpa kè wa a' kinewa buaë ö kè éna a' ttò ttsak, e' ta a' e' yólor u e' a ö ká e' a ta kapo tso' a' klöttö mik e' ppöö iwà kkachoie ie'pa a tö ie'pa dör Skéköl bolökpa. <sup>15</sup> Moki, ye' tö a' a ichè tö aishkuö ta mik a' wöchakirketke a' nuì ki, eta ká e' wakpa wömerdattsä weinuk taië Sodoma ena Gomorra wakpa bak senuk sulué e'pa tsata.

*Jesús ttökatapa weirdaë ie' kueki*

<sup>16</sup> “;Ye' ttò ttsó! Ye' tö a' patkekemi pë' shua wes obejala èmi namu tso' taië, e' shua es. E' kueki a' senú wösh wa wes tkabè es; erë ñies a' senú bèrè wes nuböl es. <sup>17</sup> A' tso' erki. A' miraë ie'pa wa s'shulökwakpa ulà a, ñies a' burdaë siarë judiowak ñi dapa'wo wé a. <sup>18</sup> Ie'pa wa a' miraë duèser s'wökirpa ena s'blúpa wörki ye' tté kueki. Es a' tö ye' tté pakeraë ie'pa a, ñies ká ulitane wakpa a. <sup>19</sup> Mik ie'pa tö a' méttsa s'shulökwakpa ulà a, eta kè a' tkinuk ì chëmi a' tö e' tsatkoie. E' wösha ta Skéköl tö tté eraë a' er a chë ie'pa a. <sup>20</sup> Es kè a' ttöpa a' wák er wa, e' skéie S'yé Wiköl tö tté eraë a' er a chë.

<sup>21</sup> “Mik e' kèwö de, eta welepa tö iël wömerattsä ttèwa, iyé tö ilà wömerattsä, ñies ala'r e' köraká iyé ena imi kkatök as ittowa. <sup>22</sup> Sulitane tö a' sueraë sulué ye' tté kueki. Erë a' isie e' tkéwa darërèë döka bata ekkë, e' tsatkërdaë. <sup>23</sup> Mik ie'pa tö a' we'ikeke ká wele ki, eta a' tkóshkar iyöki, a' yú ká ku'a'ki a. Moki ye' tö a' a ichè tö kam ye' dör S'ditsö Alà e' döne, e' yöki a' kè döpa Israel ké qos a.

<sup>24</sup> “Wé wöblarke e' kè dör iwöbla'ukwak tsata. Ñies kanè méso kè dör iwökir tsata. <sup>25</sup> E' dör wé' wé wöblarke e' a tò idò wes iwöbla'ukwak es. Ñies e' dör wé' kanè méso a tò idò wes iwökir es. U wökir kíerakitö Beelzebú\* je' yita iyamipa cherarakitö sulué!

*Yi yöki se' ké suanuk*

*(Lucas 12.2-7)*

<sup>26</sup> “E' kueki kè a' suanuk ie'pa yöki. Kè ì ku' blèulewà e' kè kkayërpa aishkuö ta, ese kos jcherdane. <sup>27</sup> Ì chéyö a' a akir bèrè, e' chónè sulitane kukua. Ñies ì kos chéyö bèrè asas a' kukuò a, e' chónè aneule sulitane a. <sup>28</sup> Kè a' suanuk yi tò s'tteta'wà esepa yöki. Ie'pa tò s'chkà è ttèwami erè ie'pa kè a' s'wiköl duökwa. E' skéie Skéköl yöki a' suanú. Ie' tò s'chkà ñies s'wiköl ewèwami bö' ké a.

<sup>29</sup> “Dúla böt tuè tottola inuköl etk wöshkila è, erè dúla kè arta'wa iski S'yé kè wà ikéwö mène e' ta. <sup>30</sup> E' yita a' kkö'neraëitö buaè dò a' tsakö bitö tso' shtaoule ie' wa. <sup>31</sup> Ie' a' ta a' tuè taiè tkòka dúla tso' taiè ese tsata. E' kueki kè a' suanuk.

*Wépa kè jaëne Jesús ki*

*(Lucas 12.8-9)*

<sup>32</sup> “Yi e' chò sulitane wörki tò ie' dör ye' ttökata, e' ta ñies ese cheraëyö ye' Yé tso' ká jai a e' wörki tò ie' dör ye' ttökata. <sup>33</sup> Erè yi tò iblé s'malepa wörki tò ie' kè dör ye' ttökata, e' ta ñies ibleraëyö ye' Yé tso' ká jai a e' wörki tò ie' dör ye' ttökata.

*Jesús tté kueki se' ñi blabatsölordaë*

*(Lucas 12.51-53; 14.26-27)*

<sup>34</sup> “Kè a' tò ibikeitsök tò ye' dè'bitu as a' ser bèrè ñita ká i' ki. Ye' kè dè'bitu as a' ser bèrè ñita, e' skéie ye' dè'bitu a' mukka ñippök. <sup>35</sup> Ye' dè'bitu as ilà wëm ñippò iyé ta, as ilà busi ñippò imì ta ena as iyàk ñippò iyàk ta. <sup>36</sup> Es yamipa ekka döraë ñi bolökpaie ye' tté kueki.

<sup>37</sup> “Yi éna iyé ö imì dalër tkòka ie' éna ye' dalër e' tsata, ese kè dòpa ye' ttökataie. Ñies yi éna ilà wëm ö ilà busi e' dalër tkòka ie' éna ye' dalër e' tsata, ese kè dòpa ye' ttökataie. <sup>38</sup> Yi kè e' chò weinuk dò ittèwà krus mik ta iser wes ye' ttökata es, ese kè dòpa ye' ttökataie. <sup>39</sup> Yi e' tsatak ittèwà yöki, ese kè ulà a' sene michoë dòpa. Erè yi e' mettsa ttèwà ye' dalërmik, ese ulà a' sene michoë döraë.

*Wes Skéköl tò iské meraë se' a*

*(Marcos 9.41)*

<sup>40</sup> “Yi tò a' kiéwa er bua' wa, e' dör wes ye' kiéwaitö er bua' wa es. Ñies yi tò ye' kiéwa er bua' wa, e' dör wes yi tò ye' patké' e' kiéwaitö er bua' wa es. <sup>41</sup> Yi tò Skéköl tteköl kiéwa er bua' wa Skéköl tteköl idir e' kueki, e' ta ese a' ì meraë Skéköl tò ittekölpa a, ese merdaë ñies. E' sù yi tò s'ser yësyësë ese kiéwa er bua' wa iserke yësyësë e' kueki, e' ta ese a' ì meraë Skéköl tò s'ser yësyësë esepa a, ese merdaë ñies. <sup>42</sup> Yi isie tò di' kakla è mé ye' ttökata ësela a yè, ye' ttökata idir e' kueki, e' ta mokí ye' tò a' a' ichè tò ese a' iské patordaë buaë.”

## 11

*Juan S'wöskuökwak ttökatapa e'pa de ilè chakök Jesús a*

*(Lucas 7.18-35)*

<sup>1</sup> Mik Jesús tò ittökatapa dabom eyök ki böi (12) e'pa wöbla'wé one, eta ie' mía ká tso' tsinet ese a' s'wöbla'uk ena Skéköl tté buaë e' pakök.

<sup>2</sup> Juan S'wöskuökwak tso' wötèule s'wöto wé a, ee ie' tò ì weke Cristo tò e' tté ttsé. E' kueki ie' tò ittökatapa welepa patké iska'. <sup>3</sup> Ie'pa tò ichaké ia: “¿Be' dör wé pairine'bitu idi' wa s'blúie yeule idatse e' ö yi skà panèia sa' tò?”

\* 10:25 Beelzebú: E' dör bé, e' è kiè Satanás.

<sup>4</sup> Jesús tö ie'pa iüté: “A' yúne Juan ska' ta ì kòs sué a' tö, ì kòs ttsé a' tö, e' pakóne ie' a. <sup>5</sup> Ipakó ie' a tö s'wöbla kè wawër, esepa wöbla wawënene; s'kraulewä kè shko, esepa shkéne; wépa kiri'weke lepra tö, esepa buanene batse'nene; s'kukuò kè watsür, esepa watsënene; s'duowä shkenekane; ñies Skököl ttè buaé e' pakane s'siarëpa a. <sup>6</sup> jYi kè yökj ye' sulune, ayëcha buaé ese!”

<sup>7</sup> Mik ie'pa míyalne, etä Jesús tö Juan tté pakémitke pë' a, ta iché ie'pa a: “Mik a' dë'rö ká sir poë wé kè yi serku' ee Juan sauk, etä jima a' erbikò wëm wése suëmi a' tö? A' kè dë'rö wëm èse, kabikeitsò wì a dià a wes kua'kò wöppè siwä' tö es, ese sauk. <sup>8</sup> A' kè dë'rö wëm ese sauk, e' ta jwëm wése sauk a' dë'rö? A' kè dë'rö wëm e' paiò datsi' bua'buwa wa ese sauk. A' wä ijcher tö wépa e' paiò es esepa serke blu' u a. <sup>9</sup> Erë jwëm wése sauk a' dë'rö? A' dë'rö wëm dör Skököl tteköl ese sauk. Ye' tö a' a ichè tö mokj Juan dör Skököl tteköl, erë ie' kè dör ese è. Ie' dör Skököl tteköl tsata. <sup>10</sup> Skököl yëkkuò kj itso' kitule wé Skököl tö ichè wé pairi'bitütö idi' wa s'blúie e' a:

‘Ye' tso'tke ye' tté pakökwak patkök be' yökj kewe be' ñalé yuök.’\*

Skököl tté pakökwak e' dör Juan. <sup>11</sup> Mokj, ye' tö a' a ichè tö s'ditsö ulitane tso'tke dò ikké ta, e'pa shüa kè yi ku' Juan S'wöskuökwak tsata. Erë ì blúie Skököl tso' e' a wé dör èsela shütë e' dör Juan tsata.

<sup>12</sup> “Mik Juan S'wöskuökwak s'tsá pautmi dò ikké ta, wépa blúie Skököl tso' esepa weirke siarë. Pë' kësik suluë esepa éna ie'pa ewakwa. <sup>13</sup> Kam Juan tö s'pattömi e' yökj Skököl ttekölpa kòs ena Moisés, e'pa tö iyë'bak tö Skököl datse se' blúie. <sup>14</sup> A' éna iklö'wak es, e' ta Juan dör Skököl tteköl kiè Elías yëuletke tö idatskene e'. <sup>15</sup> jA' éna ye' ttò ttsak, e'ma ikukuebló bua'ie!

<sup>16</sup> “jIma a' chëmi ye' tö? jWes a' dör? A' dör wes ttè i' tö ichè es: Ala'rla tso' inuk u itökj. Shabötspa arke taië ta icheke iyamipa a: <sup>17</sup> ‘Sa' tö pulë bla'wé, erë a' kè klötëne; sa' tö s'eriar ttseittsé, erë a' kè iine.’ <sup>18</sup> E' wä dör tö Juan de batsöta', blo' kè yöta', ta a' tö iché tö aknama tso' ie' a. <sup>19</sup> E' ukuökj ta ye' dör S'ditsö Alà, e' de kè batsöta', blo' yetä', ta a' ye' cheke tö ye' chkò taië, ye' blo' yè taië ñies tö ye' dör inuköl shtökwapka ena pë' sulusipa malepa, esepa sini'. A' tö ye' cheke es, erë isuerasö bulebök ta tö wépa serke wes Skököl siwé tö ichè es esepa dör yësyësë.”

*Ká mañat wakpa weirdä siarë  
(Lucas 10.13-15)*

<sup>20</sup> Etä ká wépa kj Jesús tö ì kè or yi a ese o' taië ká malepa tsata, e' wakpa kè er maneone Skököl a. E' kuekj ie' tö ie'pa ché ttè i' wa: <sup>21</sup> “A Corazín wakpa, a Betsaida wakpa, jwëstela ina a' ta! ì kè or yi a ese o' ye' tö taië a' wörkj, erë a' kè er maneone. E' úpa ye' tö Tiro ena Sidón wakpa wörkj, e'ma ká iaiaë ie'pa er mane'o'bak. Ie'pa tö eriane datsi' ajaë ië'kabak, ñies ie'pa e' tkë'kabak muluchka kj iwà kkachoie tö ie'pa er mane'wé Skököl a. <sup>22</sup> E' kuekj ye' tö ichè tö aishkuò ta mik a' wöchakirketke a' nuì kj, etä a' wömerdattsa weinuk taië shütë Tiro ena Sidón wakpa tsata. <sup>23</sup> A Cafarnaúm wakpa, kè a' tö ibikeitsök tö Skököl wä a' mi'mitsër ká jai a. Ie' tö a' patkerami diöshet wé s'wimblu weirke ee. ì kè or yi a ese wéyö taië a' wörkj, erë a' kè er maneone. E' úpa ye' tö Sodoma wakpa suluë wörkj, e'ma ie'pa tso'ia dö ikké ta. <sup>24</sup> E' kuekj ye' tö ichè tö aishkuò ta mik a' wöchakirketke a' nuì kj, etä a' wömerdattsa weinuk taië shütë Sodoma wakpa tsata.”

*A' kòs erbló Jesús mik  
(Lucas 10.21-22)*

\* 11:10 Malaquías 3.1



<sup>25-26</sup> Etā Jesús tō iché: “A ye' Yé, be' dör íyi ulitane tso' ká jai a ena ká i' a e' Kéköl. Ttè buaë blé'wā be' tō pè' wā siwā' jcher iskië ena erbikò taië esepa yöki, erè ikkachébö s'ësepala a. Es be' kī ikiane, e' kueki be' tō iwé es. E' kueki be' kikékayö.”

<sup>27</sup> Jesús tté iYé tā one tā ichéitö pè' tso' ee e'pa a: “Ye' Yé tō íyi ulitane méat ye' ulà a. Ye' dör Skéköl Alà, kè yi wā ijcher moki tō wes ye' dör, e' jcher ye' Yé è wā. Nies kè yi wā ijcher moki tō wes ye' Yé dör, e' jcher ye' è wā. Nies wépa a ye' éna ikkachak esepa wā ijchermi. <sup>28</sup> A' eriarke taië, weirke siarè íyi ulitane dikia wes dali ekkeë dikia s'shtrirwa es. A' shkó ye' ska', etā a' enuraë ye' batamik. <sup>29-30</sup> Ye' ser bèrè, ye' er buaë, e' kueki a' e' tiüwā ye' tté dikia. Ttè wa ye' tō a' wöbla'weke, e' kè dör darërèë, e' kè tō a' we'ikepa wes. E' kueki a' e' wöbla'ú ye' wa tā a' enuraë buaë.”

## 12

### *Jesús ttökatapa tō trigo wöikléé eno diwö a* (Marcos 2.23-28; Lucas 6.1-5)

<sup>1</sup> E' kéwö ska' tā, eno diwö a, Jesús dami trigo shua tā ittökatapa dué bli wā. E' kueki ie'pa tō trigo wöiklérami tā ikatéramirakitö. <sup>2</sup> Mik fariseowakpa tō isué, etā ie'pa tō iché Jesús a:

—Isaú, be' ttökatapa tso' i kè kéwö tā' wè eno diwö a, ese uk.

<sup>3</sup> Ie' tō ie'pa iüté:

—Ì o' David tō ká iaiäé ¿e' kè aritsule a' wā Skéköl yëkkuö kī? Etökicha tā ie' ena iklépa dué bli wā. <sup>4</sup> E' kueki ie' dewā Skéköl wé a tā pan meule Skéköl a e' klö'wéitö tā inéitö. Pan e' kè kéwö tā' nê ie' ena iklépa a, sacerdotepa è a ikéwö tā' nê. Erè a' éna iane tō e' kè dör sulué Skéköl wöa. <sup>5</sup> Nies ¿a' kè wā iaritsule tté dalöieno kit Moisés tō e' kī tō eré sacerdotepa kanéblöke Skéköl wé a eno diwö a, erè e' kè wa ie'pa tō idalösewëku'wā? <sup>6</sup> Ye' tō ichè a' a tō ierö se' dur eköl, e' dör Skéköl wé tsata. <sup>7</sup> Skéköl tō iyè' iyëkkuö kī: 'Iyiwak jchëule mè ye' a, e' kè kiane ye' kī. Ye' kī ikiane tō a' nî saü er siarè wa.\* Ttè e' wā anúpa a' éna mokië, e' ma kè s'kī i nuí tā' ese kè kkatépa a' tō. <sup>8</sup> Ye' dör S'ditsö Alà, e' wā kawö tā' ichök tō i dör buaë ö i dör sulué wè eno diwö a.

### *Jesús tō wëm eköl ulà siulewā e' bua'wéne* (Marcos 3.1-6; Lucas 6.6-11)

<sup>9</sup> E' ukuöki tā Jesús dewā ie'pa nî dapa'wo wé a. <sup>10</sup> Etā ee wëm tkër eköl ulà etk siulewā. Ie'pa éna Jesús kkatak ilè kī e' kueki ie' a ichakérami:

—¿Ima be' tō ibikeitsè? ¿Kawö meule se' a Moisés tté a s'buawéne eno diwö a ö au?

<sup>11</sup> Ie' tō ie'pa iüté:

—A' obeja anemi etö kauk a eno diwö a, e' tā a' miraë iyöktsa. <sup>12</sup> E' yita se' tueta' taië obeja tsata, e' kueki kawö tso' se' a s'kimoie eno diwö a.

<sup>13</sup> Etā ie' tō iché wëm ulà siulewā e' a:

—Be' ulà shulóö.

Tā ie' ulà shuléé tā ibuanene buaë wes iulà iët es. <sup>14</sup> Fariseowakpa e' yéttsa tā ileritsérami “¿wes sö Jesús ttèwami?”

### *Jesús dör Skéköl kanè méso bua'ie e'*

<sup>15</sup> E' jchenewā Jesús wā, e' kueki ie' mia bánet. Taië pè' dami ie' itöki e'pa shua ikirirkerak e'pa kos bua'wéne ie' tō. <sup>16</sup> Ie' tō iché ie'pa a:

—Kè ye' tté pparqa. <sup>17</sup> Ie' tō iché ie'pa a es as iwà tkò wes Skéköl tteköl kiè Isaías tō iyè' es, e' tō iyè' i' es:

<sup>18</sup> Skéköl tō iché: “I' dör ye' kanè méso shukit ye' tō, e' dalër taië ye' éna, ie' wër ye' wa buaë shute.

Ye' Wiköl meraëyö ie' a, tā ie' tō sene yësyësë wà pakeraë ká ulitane wakpa a.

\* 12:7 Oseas 6.6

<sup>19</sup> Ie' serdaë bèrë. Kè yi wöñaktkepa ie' tö.  
Kè ì chepa ie' tö aneule. Kè yi tö ie' ttò ttsepa ñala kī.

<sup>20</sup> S'weirke siarë, esepa kè kī we'ikepa ie' tö,  
Se' kè diché ta'ia esepa kimeraë ie' tö  
dò mik ie' e' alörakà ì sulu kos kī sene yësyësë wa eta.

<sup>21</sup> Ká ulitane wakpa tö ie' è paneraë e' tsatkoie.”†

*Fariseowakpa tö Jesús kkaté*

(Marcos 3.20-30; Lucas 11.14-23; 12.10)

<sup>22</sup> Eta ie'pa wa wëm eköl a aknama tso' ese debitu Jesús ska', e' kè wöbla wawër, kè tto.  
Jesús tö ibua'wéne ta iwöbla wawënene ñies ittékane. <sup>23</sup> Ie'pa kos tkirulune iweblök ta  
iñi chakerak: “¿A' ichè wí dör s'blú bak David, e' aleri?”

<sup>24</sup> Mik ì ché ie'pa tö, e' ttsé fariseowakpa tö, eta ie'pa tö iché: “Beelzebú dör bé, e' diché  
wa ie' tö ie'pa trë'wekeyal.”

<sup>25</sup> Erë ì bikeitseke ie'pa tö e' suéwaitö, e' kuekī ie' tö iché ie'pa a:

“S'lerce ká etkè kī e' ñi blabatsélor ñippök ñita, kè wöklör, e' ta ie'pa wákpa è ñi  
eurawa. Ñies ñi yamipa e' kéka ñippök ñita, kè wöklör, e' ta ie'pa mir wa'k ème. <sup>26</sup> Es  
ñies Satanás mú tö iklépa trë'wéyal, e' ta ie'pa tso' ñippök iwakpa è ta. ¿Wes ì blúie ie' tso'  
e' sermiia? <sup>27</sup> Ye' tö aknamapa trë'úpayal Beelzebú diché wa, e' ta ¿yi diché wa a' klépa  
tö itrë'wëmiyal? Ie'pa kè a itrë'nukyal Beelzebú diché wa, e' kuekī ¿wes a' tö ye' kkatëmi  
tö ye' tö itrë'wekeyal Beelzebú diché wa? A' wák klépa tö iwà kkacheraë tö a' ttè kè dör  
moki. <sup>28</sup> Ye' tö aknamapa trë'wéyal Skëköl Wiköl diché wa, e' ta e' wà kiane ché tö ì blúie  
Skëköl tso', e' kéwö detke a' a.

<sup>29</sup> “¿Wes yi mi'miwa wëm diché taië‡ ese u a ie' íyi ekiblök kam ie' tö iwák maüwa e'  
yöki? Es ème íyi ekiblërmi.

<sup>30</sup> “Yi kè a ye' dör bua', ese dör ye' bolök. Yi kè tö ye' kimè imalepa tsukbitu Skëköl  
ska', ese tö ie'pa po'wekemi.

<sup>31</sup> “E' kuekī ye' tö ichè tö ì sulu kos wambleke a' tö ñies Skëköl ché sulu kos e' nuí  
olo'yèmiitö a' kī. Erë yi tö Wiköl Batse'r ché suluë, e' nuí kè olorpa iki. <sup>32</sup> Ñies yi tö ye'  
dör S'ditsö Alà, e' ché suluë, e' nuí olo'yèmi Skëköl tö iki. Erë yi tö Wiköl Batse'r ché  
suluë e' nuí kè olorpa iki ì ñe ta ñies aishkuö ta.

*Kal buaë ena kal suluë*

(Lucas 6.43-45)

<sup>33</sup> “Kal wërkewa iwö kī. Kal buaë, ese wö dör buaë; kal sulu, ese wö dör sulu. <sup>34</sup> ¿A' dör  
suluë wes tkabè chók es! A' er dör suluë, ¿wes a' ttömi buaë? ì bikeitsekësö, e' è chekesö.

<sup>35</sup> Wëm dör buaë ese serke buaë, ttò yësyësë ie' er dör buaë e' kuekī. Wëm dör suluë,  
ese serke suluë, ttò suluë ie' er dör suluë e' kuekī. <sup>36</sup> Ye' tö a' a ichè tö aishkuö ta mik  
a' wöchakirketke a' nuí kī e' kéwö de, eta ttè sulu ché a' ulitane tö shabatshabat e' kī a'  
wöchakirdaë. <sup>37</sup> A' wakpa ttè wa a' shulirdaë. A' tö ttè buaë cheke, e' ta Skëköl tö icheraë  
tö kè a' kī ì nuí ta'. Erë a' tö ttè sulu cheke, e' ta ie' tö icheraë tö a' kī nuí tso'.”

*Fariseowakpa tö ì kè or yi a ese kié suè*

(Marcos 8.12; Lucas 11.29-32)

<sup>38</sup> Eta fariseowakpa ena s'wöbla'uk ttè dalöiëno wa wakpa welepa tö iché Jesús a:

—Ì kè or yi a ese ú sa' a iwà kkachoie tö moki be' patkë'bitu Skëköl tö.

<sup>39</sup> Ie' tö ie'pa iüté:

—A' dör pë' suluë e' kè tö Skëköl dalöië wes trër wakpa kè tö imaso dalöië es. A' tö ye'  
a ikié tö ì kè or yi a ese uyö iwà kkachoie tö moki Skëköl tö ye' patkë'bitu. Erë ye' tö ilè

† 12:21 Isaiás 42.1-4 ‡ 12:29 Wëm diché taië: E' wà kiane ché Satanás. Jesús dör wé dör ie' íyi ekibleke e'.

weraë etökicha ème iwà kkachoie e' dör wes ibak Jonás dör Skëkök ttekök e' ta es. <sup>40</sup> Ie' sene' nima bërie e' shua doka ká mañat ñië nañeë, es ñies ye' dör S'ditsö Alà, e' serdaë íyök shua ká mañat ñië nañeë. <sup>41</sup> Mik Jonás tò Nínive wakpa paut, eta ie'pa er maneö' Skëkök a. Erë i'ñe ta ye' dur ie e' dör ie' tsata, erë a' kè er mane'ù Skëkök a. E' kueki aishkuö ta mik a' wöchakirketke a' nuì ki, eta Nínive wakpa e' körakä ie' wörki a' kkatök. <sup>42</sup> Aishkuö ta mik a' wöchakirketke a' nuì ki, eta alaköl datse ká bánet diwö tskirke e' o'mik, bak iká blúie, e' e' körakä ie' wörki a' kkatök tò a' dör pè' suluë. Ká iaiaë alaköl e' dè'bitu datse kamië se' blú bak Salomón wa iyi jcher taië e' ttò kittsök. Erë i'ñe ta ye' dur a' shua e' dör Salomón tsata, erë a' kè tò ye' ttò iutè. E' kueki alaköl e' tò a' kkateraë.

*Wimblu sulusi dene wëm a*  
(Lucas 11.24-26)

<sup>43</sup> “Mik wimblu sulusi trëneshtar yile a, eta imía ká sir poë wé kè yi ku' ese ska'. Ie' tso' ká yulök senoie erë kè ie' wa ikune. E' kueki ie' ibikeitsè: <sup>44</sup> ‘Ye' míane wé ye' trëneshtar ee senuk.’ Mik ie' demine wëm e' a, eta ie' tò isué tò wëm dör wes u shuiriule buaë maneneë kè a yi ku' es. <sup>45</sup> Eta ie' mía iyamipa kí yulök doka kul suluë shute ie' tsata ta ie'pa kos de senuk wëm e' a. Wëm e' míane suluë shute kenet tsata. Es iwamblërdaë a' dör pè' sulusipa e'pa ta.”

*Jesús mî ena iëlpa debitu ie' weblök*  
(Marcos 3.31-35; Lucas 8.19-21)

<sup>46</sup> Jesús ttökeia pè' ta e' shua ie' mî ena iëlpa ena ikutapa e'pa iëter u'rki. Ie'pa ttak ie' ta. <sup>47</sup> Yile tò ibiyó ché ie' a:

—Be' mî ena be' ëlpa ena be' kutapa e'pa shkò be' weblök.

<sup>48</sup> Erë Jesús iüté:

—¿Yi dör ye' mî ena ye' ëlpa ena ye' kutapa?

<sup>49</sup> Eta Jesús tò ie' a ittökatapa kkaché ulà wa ta ichéitö:

—Isaú, ie'pa dör wes ye' mî ena ye' ëlpa ena ye' kutapa es. <sup>50</sup> Yi serke wes ye' Yé tso' ká jai a e' ki ikiane es, esepa dör wes ye' ël ena ye' kutà ena ye' mî es.

## 13

*Të kuatkökwak tté*  
(Marcos 4.1-9; Lucas 8.4-8)

<sup>1</sup> E' è diwö wa Jesús e' yéttsa u a mía batsöri kkömik ta ee ie' e' tkéser. <sup>2</sup> Pè' debitu taië ie' ska', e' kueki ie' e' iéka kanò a ta ee ie' e' tkéser ie'pa wöbla'uk. Ie'pa ulitane atë ká sí ki batsöri kkömik. <sup>3</sup> Ie' tò ttè tsakië kleé ie'pa a. E' et dör i' es: “Wëm eköl mía të kuatkök ppé ululu ème\* <sup>4</sup> Mik ie' tso' iwö ppök, eta ditsöwö wele anewa ñala ska' ta dù debitu tò ikatéwa. <sup>5</sup> Ditsöwö wele anewa áklo a wé íyök kè ta' taië ese ska'. Íyök kè ta' taië, e' kueki bet ta itskineka. <sup>6</sup> Erë kè iwí kicha ta' taië, e' kueki mik dîba aneka iki eta isinewa. <sup>7</sup> Ditsöwö wele anewa dika'chka shua. Dika'chka ena ditsöwö talane ñita, erë dika'chka e' aléka iki. <sup>8</sup> Erë ditsöwö wele anewa íyök bua'buakí, e' tskine talane wöne buaë. Wele wöne doka cien eyök (100) elka elka, wele dabom teryök (60), wele dabom mañayök (30). <sup>9</sup> ;A' éna ye' ttò ttsak, e'ma ikukuebló bua'ie!”

*Ì kueki Jesús tò s'wöbla'weke kleaule*  
(Marcos 4.10-12; Lucas 8.9-10)

<sup>10</sup> Eta Jesús ttökatapa debitu ie' ska' ta ichakérakitö ia: “¿Ì kueki be' tò ie'pa wöbla'weke kleaule?” <sup>11</sup> Ie' tò ie'pa iüté: “Ì blúie Skëkök tso' e' tté bléulewa e' kèwö meneat a' a wà jchenoie, erë pè' malepa a kè imeneat es. <sup>12</sup> Yi wa ttè e' jcher ese a imerdaë as ie' wa ikí jcher bua'ie. Erë yi kè éna ianák, ese wa ì jcher bërëbërë e' yerattsane iyöki. <sup>13</sup> Ì weke ye'

\* 13:3 të kuatkök ppé ululu: E' kèwö ska' ta pè' wöblar të kuatkök wö ppélur të kos e' ki.

tö e' suëke ie'pa tö, erë ie'pa kè éna iwà ane. Ì cheke ye' tö e' ttseke ie'pa tö, erë ie'pa kè tö ittseku' er mokì wa, ie'pa kè éna iwà iütak. E' kuëki ye' kapaköke ie'pa ta es. <sup>14-15</sup> Es iwà tköke ie'pa ta wes Skëköl tteköl kiè Isaías tö iyë' es, e' tö iyë' i' es:

'Ká i' wakpa er mía darërë, kè ì dë'waia.

Ie'pa kukuöña wötéwä darërë as kè iwattsër,

ie'pa tö iwöbla tsimiwéwä as kè iwawër.

Ie'pa tö iwé es as ie'pa kè éna iwà ar, as ie'pa kè er mane'ù ye' ska' ta ye' tö ie'pa bua'wë.

E' kuëki ie'pa tö ittseraë je', erë kè ie'pa éna iwà arpa,

ie'pa tö isueraë je', erë kè ie'pa tö iklö'wëpa.†

Es Isaías tö iyë'.

<sup>16</sup> "Erë a' wöbla wawër buaë, a' kukuöña wattsër buaë, e' kuëki ayëcha buaë a'. <sup>17</sup> Moki ye' tö a' a' ichè tö Skëköl ttekölpa taië ena ká iaiaë s'bak ser yësyësë e'pa tö ì sué a' tö ena ì ttsé a' tö e' kkeyë' siarë suè ena ttsè, erë ie'pa kè wä isune ittssène.

*Të kuatkökwak tté e' wà paké Jesús tö*

*(Marcos 4.13-20; Lucas 8.11-15)*

<sup>18</sup> "Ittsó, ì kleéyö të kuatkökwak tté wa, e' wà pakekeyö a' a'. <sup>19</sup> Pë' welepa ta itkömi wes ditsöwö arwa ñala ska' es. Esepa tö ì blúie Skëköl tso' e' tté ttsé, erë ie'pa kè éna iwà ane. Bé de ta tté buaë yéttsa ie'pa er a'. <sup>20</sup> Welepa skà ta itkömi wes ditsöwö arwa áklo a es. Esepa tö Skëköl tté ttsé ta iklö'wérakitö ttsé'ne buaë wa. <sup>21</sup> Erë ie'pa kè wì kicha ta' taië, e' kuëki ie'pa tö iklö'wé ekuölö è. Mik ie'pa weinemitke Skëköl tté kuëki, eta ie'pa anemine bet. <sup>22</sup> Welepa skà ta itkömi wes ditsöwö arwa dika'chka shua es. Esepa tö Skëköl tté ttsé, erë ie'pa tö íyi tso' ká i' kì ese bikeitseke kibiie. Ie'pa er me'rie inuköl kì ena ì tso' ká i' kì tö s'ttsé'wëke buaë ese kì. E' kos tö Skëköl tté kui'wéwä ie'pa er a ta kè idé'ttsa buaë wes ikiane es. <sup>23</sup> Erë welepa skà ta itkömi wes ditsöwö arwa íyök bua'buakì es. Esepa je' tö Skëköl tté ttsé ta iwà ane buaë ie'pa éna ta iwà dettsa buaë wes ikiane es. Ie'pa dör wes íyi kuá wör buaë es wele wöne dökä cien eyök (100), wele dabom teryök (60), wele dabom mañayök (30)."

*Kakö kuä'kì tkëne trigo shua e' tté*

<sup>24</sup> Jesús tö tté skà kleéne ie'pa a i' es: "Ì blúie Skëköl tso' e' ta itköke wes itka wëm eköl tö trigowö kuatké iká a e' ta itka es. <sup>25</sup> Nañewe ie'pa kapolur e' dalewa ibolök debitu eköl kakö dör trigo suë ese wö kuatké trigo shua ta iwák mía. <sup>26</sup> Mik trigo wöne, eta iwënewä tö ñies kakö kuä'kì tso'. <sup>27</sup> Ikanè mésopa mía ta iché kanè wák a: 'A kékëpa, be' tö trigowö bua'buakì kuatké be' ká a ta ¿wes e' a kakö kuä'kì tso'?' <sup>28</sup> Ie' tö ie'pa iüté: 'Ye' bolök wele tö iwamblé ye' kì.' Ie'pa tö ie' a ichaké: '¿Be' kì ikiane tö sa' mi' kakö ñe' yökulur?' <sup>29</sup> Erë ie' tö ie'pa iüté: 'Au, imúat es. A' tö kakö yéttsa e' ta trigo yérttsami ita ñies. <sup>30</sup> Imúat as italar ñitá dò mik itërketke eta. E' wa ye' tö itökwakpa patkeke kakö tök kewe muè eyök eyök ña'wëwa bö' a. E' ukuökì ta ye' tö trigowö tök patkeke blè wé ye' iyiwö blöke e' wé a.'"

*Mostaza wö tté*

*(Marcos 4.30-32; Lucas 13.18-19)*

<sup>31</sup> Ttè skà kleéne Jesús tö ie'pa a i' es: "Ì blúie Skëköl tso' e' dör wes mostaza wö kuatkèsö ká a es. <sup>32</sup> E' wö dör tsirlala iyiwö ulitane dikia. Erë mik italane ta e' dör íyi kuá tsitsir ulitane tsata. E' mía kalie ta dù datse u yuök iulà tsaka."

*Pan wölöwoka tté*

*(Lucas 13.20-21)*

<sup>33</sup> Jesús tö ie'pa a ttè skà kleéne i' es: "Ì blúie Skëköl tso' e' dör wes pan wölöwoka wötué tayë tö harinachka mañayök a es. E' tö harinachka e' kos wölöwéka taië."

† 13:14-15 Isaías 6.9-10

*Jesús tö s'wöbla'wëke kleaule  
(Marcos 4.33-34)*

<sup>34</sup> Ttè e' kòs kleé Jesús tö ie'pa a. Moki ie' kè wà ì pakane ie'pa a kè kleaule. <sup>35</sup> Ie' tö s'wöbla'wé es, e' wa ì yè'bak Skëköl tteköl eköl tö e' wà tka, e' dör i' es:

“Ye' tö s'wöbla'wëraë kleaule.

Ttè tso' blëule ká iaiäë ká i' yöne e'tami,

ese kkacherayö ie'pa a.”<sup>†</sup>

Es Skëköl tteköl tö iyë'.

*Kakö kuä'ki tté e' wà paké Jesús tö*

<sup>36</sup> Eta Jesús e' chéat pë' a ta imía u a. Ittökatapa de ie' ska' ta iché ie' a: “Kakö kuä'ki waklébö, e' wà pakó sa' a.” <sup>37</sup> Ie' tö ie'pa a iché: “Yi tö trigowö kuantké, e' dör ye' dör S'ditsö Alà e'. <sup>38</sup> Të wé ki ikuatkëne e' dör ká i'. Trigowö e' dör wépa blúie Skëköl tso' esepa. Kakö kuä'ki e' dör wépa dör bé icha esepa. <sup>39</sup> Ibolök tö kakö kuä'ki kuantké e' dör bé è. Ilir kèwö e' dör ká i' erkewatke e' kèwö. Itökwakpa e'pa dör Skëköl biyöchökwakpa. <sup>40</sup> Wës ie'pa tö kakö kuä'ki yéttsa uyéwa bö' a, es itköraë ká i' erkewatke eta. <sup>41</sup> E' kèwö ska' ta ye' dör S'ditsö Alà e' döraë íyi ulitane blúie da'äie. Ye' tö ye' biyöchökwakpa patkeraë wépa tö o'ka keke ì sulu wamblok ena wépa e' wamblo sulu esepa kòs shtökka. <sup>42</sup> Ie'pa uyerawarakitö bö' taië a, ee iurarak nies ikà yilitdawarak iweir kueki. <sup>43</sup> Erë s'ser yösyësë, esepa dalöburdaë wës diwö es wé S'yé tso' ie'pa blúie ee. ¡A' éna ye' ttò ttsak, e'ma ikukuebló bua'ie!

*Íyi tuè darërëë blëulewä e' tté*

<sup>44</sup> “Ì blúie Skëköl tso' e' dör wës íyi tuè darërëë ese blëulewä yile ká a es. E' kué wëm eköl tö ta e' tö ie' ttsé'wé buaë. E' kueki ie' tö ibléwane ta imía ta ì kòs tso' iwa, e' watuéttsaitö. E' ské wa ie' tö ká e' tué. Es íyi tuè darërëë e' de ie' ulà a.

*Ákwöla bua'bu tuè darërëë e' tté*

<sup>45</sup> “Nies ì blúie Skëköl tso' e' dör wës ákwöla bua'bu yuleke íyi wataukwak eköl tö tuè es. <sup>46</sup> E' tö ákwöla bua'bu ichók tuè darërëë shute ese kuéwa ta imía ta ì kòs tso' iwa e' watuéttsaitö. E' ské wa ie' tö ákwöla bua'bu e' tuéttsa.

*Kla' tté*

<sup>47</sup> “Nies ì blúie Skëköl tso' e' dör wës kla' uyé wépa welepa tö dayë a es. E' tö nima klö'wé taië tsakië buaë ena suluë. <sup>48</sup> Mik ie'pa tö kla' yéttsa ká sí ki ta ie'pa e' tuléser nima shushtök; ibua'bu iéka kók a ta isulusi uyémi bánet. <sup>49</sup> Es itköraë mik ká i' erkewatke eta. Skëköl biyöchökwakpa bituraë s'shushtök; s'sulusipa michoë bánet, s'ser yösyësë michoë bánet. <sup>50</sup> S'sulusipa kòs uyerawa Skëköl biyöchökwakpa tö bö' taië e' a, ee ie'pa iuraë siarë, kà yilitdawa iweir kueki.”

*Íyi pa'alí ena íyi këchke e' tté*

<sup>51</sup> Jesús tö ittökatapa a ichaké:

—¿Ttè ekké kòs wà ane a' éna?

<sup>52</sup> Ie'pa iüté:

—Tó.

Ie' tö ie'pa a iché:

—E' kueki mik s'wöbla'uk tté dalöiëno wa wakpa ese eköl e' yué buaë ì blúie Skëköl tso' e' tté wa, eta ie' tö s'wöbla'wëmi buaë tté këchke wa nies tté pa'alí wa. Ie' dör wës u wák wa íyi tso' blëule iblo a es. Ese wa ijcher mik ta ikëchke ö ipa'alí kiane yéttsa s'malepa kimoie.

*Nazaret wakpa tö Jesús watéttsa*

<sup>†</sup> 13:35 Salmo 78.2

<sup>53</sup> Mik Jesús ttè kleé one, età imía <sup>54</sup> demi Nazaret, e' dör ie' wák ká. Ee ie' tò s'wöbla'wémitke judiowak ñì dapa'wò wé tso' ee e' a. Wés ie' tò ie'pa wöbla'weke e' tò ie'pa tkiwéwa. Ie'pa tò iché ñì a:

—¿Wé ie' e' yué ttè taië ekké wa? ¿Wés ì kè or yi a ese wé ie' tò buaë? <sup>55</sup> ¿Ie' wí yé kè dör se' íyi yuök kaltak wa e'? ¿Ie' mì kè dör María? ¿Ie' ëlpa kè dör Santiago, José, Simón ena Judas? <sup>56</sup> ¿Ñies ie' kutapa kè serku' se' shua? Età ì kos weke ie' tò ¿wé e' bité ie' wa?

<sup>57</sup> Ie'pa kè éna ie' ttè klö'wak. Erë ie' iché ie'pa a:

—Ká wa'ñe Skëköl tteköl dalöierťa', erë iwák ká kî ena iwák u a ee kè idalöierťa'.

<sup>58</sup> Ie'pa kè erblëne ie' mik, e' kuekî ì kè or yi a ese kè one ie' wa taië ee.

## 14

*Juan S'wöskuökwak kötëwa*  
(Marcos 6.14-29; Lucas 9.7-9)

<sup>1</sup> E' kèwö ska' tã Herodes dör Galilea blú, e' tò Jesús tté ttsé, <sup>2</sup> e' kuekî ie' tò iché ikanè mésopa a: “Wëm ñe' dör Juan S'wöskuökwak shkënekane e'. E' kuekî ie' wa diché tso' ì kè or yi a ese woie.”

<sup>3</sup> Herodes tò Juan klö'ukwã patkë' wötë'waitö s'wöto wé a, e' kuekî ie' tò Jesús ché es. Ie' sene' Herodías tã, e' dör ie' ël kiè Felipe e' alaköl. <sup>4</sup> E' yé' Juan tò ie' a: “Kè be' kawö tã' senuk be' ël alaköl tã.” E' kuekî Herodes tò Juan wötökwã patkë'.

<sup>5</sup> Herodes éna Juan ttakwã erë ie' suane pë' yökî, ie'pa tò iklö'wé tò Juan dör Skëköl tteköl e' kuekî. <sup>6</sup> Erë mik Herodes tò iduéswo kèwö tkö'weke, etã Herodías alà busi e' klötë s'kiule tso' taië e'pa wörkî. E' wër buaë Herodes wa. <sup>7</sup> E' kuekî ie' tò iché ie' a yësyësë Skëköl wörkî: “Mokî ye' tò iché, ì kiè be' tò ye' a, e' meraëyö be' a.” <sup>8</sup> Etã ie' tò iché Herodes a wés imì tò ie' a iyé' es:

—Juan S'wöskuökwak ttökwa patkó tã iwökir mú ye' a kulë' a iwà kkachöie tò mokî ittëwarakitö.

<sup>9</sup> Etã blu' Herodes erianekã taië, erë ie' tò ittë métke s'kiule tso' e'pa kukua, e' kuekî ie' tò ikéwö mé. <sup>10</sup> Ie' tò Juan kuli' tókök patké s'wöto wé a. <sup>11</sup> E' ukuökî tã ie'pa wa iwökir debitu kulë' a mé busi a tã ie' tò imé imì a.

<sup>12</sup> Juan ttökataka de tã inú tsémirakitö wötëwa. E' ukuökî tã ie'pa mía tã ibiyó ché Jesús a.

*Pë' döka mil skeyök e' tié Jesús tö*  
(Marcos 6.30-44; Lucas 9.10-17; Juan 6.1-14)

<sup>13</sup> Mik Jesús tò biyö e' ttsé, etã ie' mía kanò kî ekörla bánet wé kè yi serku' ese ska'. Mik pë' wa ijchenewa tò ie' mía, etã ie'pa míyal itökî batsöri kkömik klö wa. <sup>14</sup> Mik Jesús e' yéttsã kanò a, etã pë' tso' taië ipanuk e' suéitö. Ie'pa suéitö er siarë wa. S'kirirke kos demi ie'pa wa e' bua'wéitö. <sup>15</sup> Ká tuirketke, e' kuekî ittökataka de ie' ska' tã ichéraitö ie' a:

—Ká de tsáli, kè yi serku' íe. Ie'pa yuómi as ie'pa mi' pë' serke tsinet ee ilè tauk ñè.

<sup>16</sup> Ie' tò ie'pa iüté:

—Ie'pa kè kawötã mi'kyal; ie'pa tió a' tò.

<sup>17</sup> Ie'pa tò iüté:

—Pan skël ena nima bötö e' è tso' sa' wa.

<sup>18</sup> Ie' tò iché:

—Itsúbitu ña.

<sup>19</sup> Etã ie' tò pë' ké e' tulöksër iskî ta'tsi kî. E' ukuökî tã ie' tò pan skël ena nima bötö e' klö'wé tã iká sué ká jai a tã wéstela chéitö Skëköl a. Tã pan blatéitö mé ittökataka a as ie'pa tò iwatiö pë' a. <sup>20</sup> Ie'pa ulitane chké de wë'. Ibata atë e' shtéraitö iëne döka kkóla dabom eyök kî böc. <sup>21</sup> Ie'pa chké e'pa döka mil skeyök (5.000) wëpa è, alakölpa ena ala'rla kè shtane.



*Jesús shké di' kí*  
(Marcos 6.45-52; Juan 6.16-21)

<sup>22</sup> E' ukuöki ta Jesús tö iché ittökatapa a: "A' e' ióka kanò a, a' yúshkatke ye' yöki kewe batsöri wishet." Ie' tö iché pè' malepa a: "A' yúne a' u a." <sup>23</sup> E' ukuöki ta ie' mía ekörla kabata a ttök S'yé ta. Mik ká tuine, eta ie' tso'ia kabata a. <sup>24</sup> E' dalewa ittökatapa mirwa batsöri kí demitke elkee. Siwa' bitsirke taië ie'pa kke wöia, e' tö di' uyeke taië tërke kanò mik. <sup>25</sup> Ká ñirketke eta Jesús mía ie'pa ska' shkörami di' kí. <sup>26</sup> Erë mik ie'pa tö isuë tö ie' shkòdatse di' kí, eta e' tö ie'pa tkiwéwa suawé taië ta ianekarak:

—jWimblu datse se' kker!

<sup>27</sup> Erë ie' iché ie'pa a:

—jA' er kuú! Kè a' suanuk, ye' idir.

<sup>28</sup> Eta Pedro tö iché ie' a:

—A Skékëpa, mokí be' idir, e' ta kawö mú ye' a shkök di' kí dö be' ska'.

<sup>29</sup> Eta Jesús tö iüté:

—Be' shkó ye' ska'.

Eta Pedro e' yéttsa kanò a shkémi di' kí dö Jesús ska'. <sup>30</sup> Erë mik ie' isuë tö siwa' bitsirke darërëë, eta ie' suanéka taië ta iwötunewami di' a ta ianeka taië:

—jA Skékëpa, ye' tsatkó!

<sup>31</sup> E' bet ta Jesús tö iklö'wé iulà a ta iché ia:

—jWësua be' erblöke ye' mik bërëbërë! jì kueki be' ibikeitséka bötböt?

<sup>32</sup> Mik ie'pa böl e' iéka kanò a, eta siwa' wöklöne. <sup>33</sup> Ie'pa kos tso' kanò a, e'pa e' tuléser kuché kí Jesús wörki idalöioie ta ichérakitö:

—jMokí be' dör Skököl Alà je'!

*Jesús tö s'kirirkepa bua'wé Genesaret*  
(Marcos 6.53-56)

<sup>34</sup> Itkatsarak batsöri wishet demirak Genesaret. <sup>35</sup> Mik ká e' wakpa tö isuë tö Jesús idir, eta ie'pa tö itté ppéka ká e' kos a. Ie'pa wa s'kirirke mi'ke ie' ska' as ibua'ütö. <sup>36</sup> S'kirirke esepa kköchöke ie' a tö ie'pa a ie' datsi' bata è mú kèwa. Wépa kos tö iké e'pa buanene.

## 15

*Ì tö se' ia'wèmi ñáie*  
(Marcos 7.1-23)

<sup>1</sup> Fariseowakpa ena s'wöbla'uk ttè dalöiëno wa wakpa serke Jerusalén, e'pa welepa debitü Jesús ska'. Ie'pa tö ie' a ichaké:

<sup>2</sup> —jì kueki be' ttökatapa kè tö se' yépa bak e'pa ser e' dalöië? Ie'pa chkò ulà kè paköule.

<sup>3</sup> Ie' tö ie'pa iüté:

—jì kueki Skököl ttè dalöiëno e' dalösewékewa a' tö a' wakpa ser dalöioie? <sup>4</sup> Skököl iyë'at: 'A' yé ena a' mì e'pa dalöió,\* ñies ie' tö iyë'at: 'Yi tö iyé ö imì ché suluë ese wák wömerdattsa ttèwa.'† <sup>5</sup> Erë a' icheke tö se' a iyërmi s'yé a ö s'mì a i' es: 'Ì kos tso' ye' wa a' kimoie, e' meuletke Skököl a‡, e' kueki kè ye' a a' kimenük ì wa'. <sup>6</sup> A' tö icheke tö yi isie e' ché, ese wák kè kawötaiä iyé ö imì kimuk. Es Skököl ttè dalöiëno ñe' dalösewékewa a' tö a' wakpa ser iüté wa. <sup>7</sup> jA' e' ö suluë! Buaë Isaías tö a' yé' mik ie' iyé':

<sup>8</sup> Skököl tö iché: 'Pè' ikképa tö ye' dalöieke kkò è wa, erë ie'pa er tso' kamië ye' yöki.

<sup>9</sup> É ichökle ie'pa mi'ke ye' wé a ye' dalöiök.

Ttè wa ie'pa s'wöbla'weke e' dör s'ditsö ttè dalöiëno è.'§  
Es Isaías tö iyë'at.

\* 15:4 Éxodo 20.12; Deuteronomio 5.16 † 15:4 Éxodo 21.17; Levítico 20.9 ‡ 15:5 meuletke Skököl a: Ie'pa tö iché es erë ie'pa ulà a itso'ia, e' wakanewèmi ie'pa tö wës ie'pa kí ikiane es. § 15:9 Isaías 29.13

<sup>10</sup> E' ukuöki ta ie' tö pë' tso' ee e'pa kié ta ie' iché iarak:

—A' tö ye' ttò tso', iwà anú a' éna. <sup>11</sup> Ì ñeke a' tö ese kè tö a' ia'wepa ñáie Skéköl wöa. Erë ì sulu wambleke a' tö tskirke a' er a ese je' tö a' ia'weraë ñáie.

<sup>12</sup> Eta ittökatapa de ie' ska' ta ie' a ichaké:

—¿Be' wa ijcher tö ì chekebö e' tö fariseowakpa uluwé?

<sup>13</sup> Ie' tö ie'pa iüté:

—Fariseowakpa esepa dör wes íyi kuá kè tkënewa ye' Yé tso' ká jai a e' wa es, e' kueki ie'pa yërdattsa wë. <sup>14</sup> Ie'pa múat es. Ie'pa dör wes s'wöbla kè wawër ese tö o'ka wöbla kè wawër e' ulaiè es, e'pa bö! tköaraë kauk a.

<sup>15</sup> Eta Pedro tö iché ie' a:

—Ttè wakleébö ñe' wà pakó sa' a.

<sup>16</sup> Ie' tö iüté:

—¿Ñies a' kè éna iwà ane? <sup>17</sup> ¿A' kè éna iane tö ì ñekesö ese mi'ke s'ñawi a e' ukuöki ta iwekettsasö? <sup>18</sup> Erë ì sulu tskirke a' er a ese tö a' ia'wëmi ñáie. <sup>19</sup> Ì sulu bikeitseke a' tö, s'ttëwa, senewabak dalösewëwa, trë, akblë, s'kkatë kachë wa ñies ñi chë sulu ese kos tskirke a' er a. <sup>20</sup> Íyi ese tö a' ia'weraë ñáie. Erë a' chkò kè ulà paköule e' kè tö a' ia'wepa ñáie.

*Tayë eköl kè dör judiowak e' erblé Jesús mik  
(Marcos 7.24-30)*

<sup>21</sup> Eta Jesús ena ittökatapa míyal ká kiè Tiro ena Sidón ee. <sup>22</sup> Eta tayë eköl serke ee dör cananwak, e' ardatse taië Jesús itöki:

—A kékëpa be' dör David aleri, ye' saü er siarë wa. Ye' alà busi kirirke taië a aknama tso'.

<sup>23</sup> Erë Jesús kè wa ie' iütëne yës. Eta ittökatapa kköché ie' a:

—Tayë ardatse taië se' itöki, ì kiane ie' ki e' mú ie' a as imi'a.

<sup>24</sup> Ie' tö ie'pa iüté:

—Skéköl tö ye' patkë' Israel aleripa è kímuk. E'pa dör wes obeja chöwa siarë es.

<sup>25</sup> Eta tayë dewa e' tkëwa kuchë ki Jesús wörki ta ichéitö ia:

—¿A kékëpa, ye' kímú!

<sup>26</sup> Jesús iüté:

—Kè idör buaë ala'rla chkè yéttsa mè chichi a.

<sup>27</sup> Tayë tö iché:

—A kékëpa, e' yëne; erë chkè mulé darke iski e' ñeke chichi tö.

<sup>28</sup> Eta Jesús iché ie' a:

—A tayë, be' erblé moki ye' mik, e' kueki ì kiane be' ki e' de be' ulà a.

E' wöshā ta ilà busi buanene.

*S'kirirke ese bua'wëne Jesús tö*

*(Marcos 8.1-10)*

<sup>29</sup> Eta Jesús ena ittökatapa biteyalne batsöri kiè Galilea e' kkömik. Eta ie' tkaka kabata tukir ki ta ee ie' e' tkéser. <sup>30</sup> Ta pë' de taië ie' ska', e'pa wa iduepa de Jesús wörki. Iduepa kè shko, kè wöbla wawër, kè tto, ulà ö klò suluulewa ñies s'kirirke duè ulitane wa ese kos bua'wëitö. <sup>31</sup> Pë' ulitane tso' ee isauk e'pa wökrarulune. Ie'pa tö isuë tö kè s'tto esepa ttékane, s'ulà ena s'klò suluulewa esepa buanene, kè s'shko esepa shkëne, ñies kè s'wöbla wawër, esepa wöbla wawëne. E' kueki ie'pa tso' Israel aleripa Kéköl kikökka taië.

*Wëpa döka mil tkëyök e' tié Jesús tö*

*(Marcos 8.1-10)*

<sup>32</sup> Eta Jesús tö ittökatapa kié ta ichéitö ie'pa a:

—Siarë ye' wa pë' ikkëpa wër. Ie'pa tso' ye' ta e' ki ká de mañatk ta kè ie'pa wa ì ku' ñë. Kè ye' éna ie'pa patkak u a kè chkaule dö' isiwa'arwarak ñala ki.

<sup>33</sup> Eta ittökatapa tö iché ia:

—Erë ká i' a kè yi serku'. ¿Wes sa' tö pan kuëmi taië pë' ekkëpa tioie?

<sup>34</sup> Ie' tö ie'pa a ichaké:

—¿Kos a' wā pan tso'?

Ie'pa iiüté:

—Sa' wā pan tso' kul (7), ñies nima tso' elkela.

<sup>35</sup> Etā ie' tö pē' ké e' tulöksēr įski <sup>36</sup> tā pan kul ena nima e' klö'wéitō tā wéstela chéitō Skéköl a tā iblatéitō mé ittōkatapa a tā ie'pa tö iwatié pē' a. <sup>37</sup> Pē' ulitane chké de wē' tā ibata atē e' iēne dōka kkó kul. <sup>38</sup> Ichkérak e'pa dōka mil tkëyök (4.000) wēpa è, alakölpa ena ala'rla kè shtane. <sup>39</sup> Jesús tö pē' yuémine tā ie' e' iéka kanò a tā imía ká kiè Magdala ee.

## 16

*Fariseowakpa tö ì kè or yi a ese uk ké suè*

*(Marcos 8.11-13; Lucas 12.54-56)*

<sup>1</sup> Fariseowakpa ena saduceowakpa welepa de Jesús ska'. Ie'pa éna ie' tsaiak, e' kueki ie'pa tö ikié ie' a tö ì kè or yi a ese úitō iwà kkachōie tö moki ie' patkē'bitū Skéköl tö.

<sup>2</sup> Erē ie' tö ie'pa iüté: “Tsáli tā a' tö icheke, ‘Ká tanewā mat bule dība ardaē buaē’; <sup>3</sup> bla'mi tā a' icheke, ‘Ká tanewā mat kalī moneka ttsettseē tā kalī yērdaē.’ A' éna iane buaē mik tā dība armi mik tā kalī yērmi, etā ¿wes ì tköke i'ñe tā e' kè wà ar a' éna? <sup>4</sup> A' dör pē' suluē e' kè tö Skéköl dalōiē wes trēr wakpa kè tö imaso dalōiē es. A' ye' a ikié tö ì kè or yi a ese uyō iwà kkachōie tö moki Skéköl tö ye' patkē'bitū. Erē ilè weraëyō etökicha ème iwà kkachōie, e' dör wes Jonás tā ibak es.”

Etā ie' tö ie'pa méat tā imía bánet.

*Fariseowakpa pan wölöwōka e' pakè*

*(Marcos 8.14-21)*

<sup>5</sup> Jesús ena ittōkatapa demi batsöri wışhet, erē ittōkatapa éna ilè chowa tsèmi ñè. <sup>6</sup> Ie' iché ie'pa a:

—Ye' ttò ttsó. A' e' kkö'nú fariseowakpa ena saduceowakpa pan wölöwōka e' yōki.

<sup>7</sup> Ittōkatapa iché ñi a:

—¿Kè se' wā ì dē' ñè!

<sup>8</sup> Ì chök ie'pa tso' e' suéwaitō tā ichéitō ie'pa a:

—¿Ì kueki a' tso' ichök ñi a tö kè se' wā ì dē' ñè? ¿Kam a' erblò ye' mik mokié! <sup>9</sup> ¿Kam a' éna iwà ar? Pan skel wadē'yō wēpa dōka mil skeyök (5.000) ekkē a, ¿e' chowa a' éna? Etā ¿kkó bik ibata kit a' tö? <sup>10</sup> Ñies pan kul wadē'yō wēpa dōka mil tkëyök (4.000) ekkē a, ¿e' chowa a' éna? E' ukuöki tā ¿kkó bik ibata kit a' tö? <sup>11</sup> ¿Wes a' kè éna iane tö ye' kè ku' ì ñekesö ese chök? A' e' kkö'nú fariseowakpa ena saduceowakpa pan wölöwōka ese yōki.

<sup>12</sup> Etā ie'pa éna iane tö Jesús kè ku' pan wölöwōka tso' se' wā ese chök. Ie'pa éna iane tö ttè wa fariseowakpa ena saduceowakpa tö s'wöbla'weke e' chök ie' tso'.

*Pedro tö iché tö Jesús dör wé pairine'bitū idi' wa s'blúie e'*

*(Marcos 8.27-30; Lucas 9.18-21)*

<sup>13</sup> Mik ie'pa de ká kiè Cesarea Filipo, etā Jesús tö ittōkatapa a ichaké:

—Ye' dör S'ditsö Alà, ¿ima e' cheke pē' tö ye' dör yi?

<sup>14</sup> Ie'pa iiüté:

—Welepa tö icheke tö be' dör Juan S'wöskuökwak. Welepa skà tö icheke tö be' dör Skéköl tteköl bak kiè Elías shkenekane e'. Welepa skà tö icheke tö be' dör Skéköl tteköl bak kiè Jeremías ö Skéköl ttekölpa skà bak e' wele.

<sup>15</sup> Ie' tö ie'pa a ichaké:

—Erē ¿ima a' ichè, ye' dör yi?

<sup>16</sup> Simón Pedro tö iiüté:

—Be' dör wé pairine'bitū idi' wa sa' blúie e'. Be' dör Skéköl chök Alà e'.

<sup>17</sup> Jesús iché ie' a:

—A Simón, Jonás alà, ayëcha buaë be' dör. Ì ché be' tö e' kè mène s'ditsö wä be' a, e' mé ye' Yé tso' ká jai a e' tö be' a. <sup>18</sup> E' kuëki ye' be' a ichè tö be' dör Pedro (kiè e' wà kiane ché ák). Be' dör wës ák dör u katabloie es, e' wa ye' ichapa kí döraë taië. Ì kos tso' dò duèwä diché, e' kè e' alòpakä ie'pa ki. <sup>19</sup> Ì blúie Skéköl tso' e' wékkö kköppóo kéwö meke ye' tö be' a. Ye' tö kawö meke be' a ye' tté buaë pakök as Skéköl dò s'tso' taië e' blúie. E' dör wës blu' eköl kanè méso tö blu' wékkö kköppèe as s'döwajä es. Ì kè kéwö mène be' wä ká i' a, ese kè kéwö mène Skéköl wä. Nies Ì kéwö mé be' tö ká i' a, ese kéwö me'bak Skéköl tö.

<sup>20</sup> E' ukuöki tã Jesús kè wä ittökatapa kàne yi a ichök tö ie' dör wé pairine'bitu idi' wa s'blúie e'.

*Jesús e' biyó ché tö ie' tterawä  
(Marcos 8.31-9.1; Lucas 9.22-27)*

<sup>21</sup> E' ukuöki tã Jesús tö itsá ché ittökatapa a:

—Ye' kawötã shkökmi Jerusalén, ee judiowak kuëblupa ena sacerdotepa wökirpa ena s'wöbla'uk ttè dalöiëno wa wakpa tö ye' we'ikeraë taië. Ye' tterawä erë e' ki ká de mañat etã ye' shkerdakane.

<sup>22</sup> Pedro tö ie' kiémi bánet tã iuñemiitö:

—¡A Skékëpa, kè e' char! ¡E' mú kè dör es! ¡Kè e' wamblënuke be' tã!

<sup>23</sup> Erë ie' e' wötrée Pedro kke tã iché:

—¡A Satanás, be' yúshka bánet ye' yöki! Be' tso' ye' wöklö'uk. Be' kè tö iyi suë wës Skéköl tö isueke es; be' tö isueke wës s'ditsö tö isueke es.

<sup>24-25</sup> Ie' tö iché ittökatapa a:

—Yi e' tsatkak ittèwä yöki, ese kè ulà a sene michoë döpa. Erë yi e' mettsã ttèwä ye' dalërmik, ese ulà a idöraë. E' kuëki yi e' yuak ye' ttökataie, ese kè kàne tkinukia e' ki. E' skéie ikawötã e' chök dò ittèwä wötëulewä krus mik ekkë. Es ie' kawötã shkök ye' itöki. <sup>26-27</sup> Ye' dör S'ditsö Alà, e' döraë Skéköl olo tã taië e' a, nies Skéköl biyöchökwakpa tã. Ye' tö sulitane patueraë eköl eköl wës iser es. E' kuëki iyi ulitane tso' ká i' a e' de a' ulà a, erë sene michoë kè dè' a' ulà a, e' tã e' dör ¿iie bua' a' a? Sene michoë kè patorpa Ì wa. <sup>28</sup> Moki ye' tö a' a ichè tö a' tso' íe, e'pa wëlepa tö ye' dör S'ditsö Alà, e' datsë blu'ie e' sueraë kam iblërlur e' yöki.

## 17

*Jesús tö ilo taië e' kkaché ittökatapa a  
(Marcos 9.2-13; Lucas 9.28-30)*

<sup>1</sup> E' ki ká de teröl, etã Jesús wä Pedro ena Santiago ena Juan dör Santiago ël, e'pa mítser e' tã ká bata kãkkeë ese ki. <sup>2</sup> Eë ie'pa wö shaë ie' manenetsã míã kuä'ki, iwö olobune wës diwö es, nies idatsi' manenetsã míã saruruë wöñarke dalölöë. <sup>3</sup> E' bet tã ie'pa tö Skéköl ttekölpa bak ká iaiä kiè Moisés ena Elías e'pa suë kapakök ie' tã. <sup>4</sup> Etã Pedro tö iché ie' a:

—A Skékëpa, buaë se' tso' íe. Be' ki ikiane, e'ma ye' tö úla yuëkä mañatkuela; etkue be' a, etkue Moisés a, etkue Elías a.

<sup>5</sup> Ie' ttökeia e' wöshã tã mochka wöñarke dalölöë ese tö ie'pa kitéwä. Mochka shua ie'pa tö ttö tssé tö ichè: “Së dör ye' alà dalër taië ye' éna, e' wër buaë shutë ye' wa. Ie' ttö iutó.”

<sup>6</sup> Mik e' tssé ittökatapa tö tã ie'pa suanéka taië, e' kuëki ie'pa e' télur wöwakköt. <sup>7</sup> Jesús dewä ie'pa o'mik tã ie' tö ie'pa kéwä tã ichéitö ie'pa a:

—A' e' kókã; kè a' suanuk.

<sup>8</sup> Mik ie'pa tö ká suë, etã ie'pa isué tö kè yi ku'ia, Jesús è dur.

<sup>9</sup> Ie'pa bitëtkene wa'k, etã Jesús tö ie'pa a ichè:

—Ì sué a' tö e' kè pakar yi a dò mik ye' dör S'ditsö Alà, e' ttéwa shkenekane e' ukuöki.

<sup>10</sup> Ie'pa tö ie' a ichaké:

—¿Ì kueki s'wöbla'uk ttè dalöiëno wa wakpa tö icheke tö Elías kawöta dökne kewe wé pairine'bitu idi' wa s'blúie e' yöki?

<sup>11</sup> Ie' tö ie'pa iüté:

—E' yéne tö Elías datsekene kewe. Ie' tö ì kos kaneweketke kewe wé pairine'bitu idi' wa s'blúie e' yöki. <sup>12</sup> Eré ye' tö a' a ichè tö ie' dè'bak, eré ie'pa kè éna iane tö ie' idir. Ie'pa tö iwe'ik siarè wés ie'pa ki ikiane es. Es ñies ie'pa tö ye' dör S'ditsö Alà e' we'ikeraë.

<sup>13</sup> Ie'pa éna iane tö ie' tso' Juan S'wöskuökwak e' chök.

*Duladula eköl tteke aknama tö e' bua'wéne Jesús tö*

*(Marcos 9.14-29; Lucas 9.37-43)*

<sup>14</sup> Mik Jesús ena ittökatapa demine wé pé' daparke taië ie' panuk ee, eta wém de eköl ie' ska' ta ie' e' tkéwa kuché ki Jesús wörki ta ichéitö ia:

<sup>15</sup> —A kéképa, ye' alà saú er siarè wa. Ie' kirirke siarè, wekké alè ta ilineka, mikle ta ie' anerö bö' a, mikle ta di' a. <sup>16</sup> Kam be' dò eta ye' wa idebitu be' ttökatapa a eré ie'pa kè a ibuarne.

<sup>17</sup> Jesús tö iché:

—A pé' kè erblöta' Skéköl mik, a' kè éna ká ane. ¿Mik ye' sermirö a' ta? ¿Kos ye' tö a' dalé'ttsemirö? Kabëla ñe' tsúbitu ña.

<sup>18</sup> Eta ie' tö aknama uñé ta itrè'wéshkar duladula a. E' wösha ta duladula buanene buaë.

<sup>19</sup> E' ukuöki ta ittökatapa tté ie' ta bánet. Ie'pa ie' a ichaké:

—¿Ì kueki sa' kè a aknama e' tréshkar?

<sup>20</sup> Ie' iché ie'pa a:

—A' kè erblöku' Skéköl mik mokië e' kueki. Moki ye' tö a' a ichè tö a' erblópa Skéköl mik tsir mostaza wö dör tsirla ekké, e' ta a' tö ichèmi kabata wì a: 'Be' e' skóttsa yúshka bánet', ta imiraa bánet. A' erblöke moki Skéköl mik, e' ma kè ì dör darèrè a' a wè. <sup>21</sup> \*

*Jesús skà e' biyó ché tö itterawa*

*(Marcos 9.30-32; Lucas 9.43-45)*

<sup>22</sup> Mik Jesús ena ittökatapa ñi dapa'wé Galilea, eta ie' tö ie'pa a ichè:

—Ye' dör S'ditsö Alà, e' wömerdatssa pé' ulà a, <sup>23</sup> ta ye' tterawarakitö, eré e' ki ká de mañat ta ye' shkerdakane.

Ttè e' tö ie' ttökatapa eriawé taië.

*Inuköl shteke Skéköl wé kanéwoie ese patué Jesús tö*

<sup>24</sup> Mik Jesús ena ittökatapa de Cafarnaúm, eta pé' tö inuköl shteke Skéköl wé kanéwoie ie'pa de Pedro ska' ta ie' a ichaké:

—¿Be' wöbla'ukwak tö inuköl patuekesö Skéköl wé kanéwoie e' patueta'?

<sup>25</sup> Pedro tö ie' iüté:

—Tó, ipatueta'.

E' ukuöki ta mik Pedro de weshke, eta Jesús tté ie' ta kewe ta ichéitö ie' a:

—A Simón, ¿ima be' ibikeitsè? ¿Yi ña'weke ká wökirpa tö, iká wakpa ekka ö pé' kua'ki?

<sup>26</sup> Pedro tö iüté:

—Pé' kua'ki.

Jesús tö iché:

—E' yéne, e' kueki ila'r kè kawöta ipatauk. <sup>27</sup> Eré ipataüsö as ie'pa kè ulurka se' ki. E' kueki be' yú batsöri kkömik eta biklö' uyómi di' a. Eta nima tsá kli'wé be' tö e' kkò shuppöö, ee be' tö inuköl kueraë et. E' tsúmi ie'pa patuoie, e' dör wè' se' bö' nu' patuoie.

\* 17:21 Yëkküö kéchke wele tö versículo 21 kí kuötkéka. E' tö iché i' es: Eré aknama ese yërmittsa ikië S'yé a ena batsè e' è wa.

## 18

*Yi dör ibua'ie Skëköl wöq**(Marcos 9.33-37; Lucas 9.46-48)*

<sup>1</sup> E' k<sup>é</sup>wö ska' t<sup>a</sup> Jesús ttök<sup>a</sup>tapa de ie' ska' t<sup>a</sup> ie' a' ichakérakitö:

—Ì blúie Skëköl tso' e' shu<sup>a</sup> ¿yi dör ibua'ie imalepa tsata?

<sup>2</sup> Jesús tö alala kié eköl dués<sup>e</sup>r ie'pa shushaë <sup>3</sup> t<sup>a</sup> ichéitö ie'pa a:

—Mok<sup>i</sup> ye' tö a' a' ichè tö a' kè er mane'ù as a' dò w<sup>e</sup>s alala i' es, e' t<sup>a</sup> a' kè döpa<sup>w</sup>a ì blúie Skëköl tso' e' a. <sup>4</sup> Yi er mane'wé t<sup>a</sup> ie' e' wöéwa w<sup>e</sup>s alala i' es, ese döraë ibua'ie ì blúie Skëköl tso' e' a. <sup>5</sup> Yi tö alala i'se kiéwa ye' ttò wa, ese tö ye' wák kiéwa.

*A' tso' wösh wa ì tö s'ké ì sulu wamblök ese yöki**(Marcos 9.42-48; Lucas 17.1-2)*

<sup>6</sup> “Yi tö ikkëpala erblöke ye' mik, esepa eköl ké ì sulu wamblök, esepa weirdaë taië shute tköka ák wawoie muéwa ikuli' a batrèemi dayë a e' tsata. <sup>7</sup> Ýi tso' taië s'erkiöwoie ì sulu wamblök, e' kuëki wéstela ina ká i' wakpa t<sup>a</sup>. Këkraë ì sulu tso' s'erkiöuk, erë yi tö s'ké ì sulu wamblök, wéstela ina esepa t<sup>a</sup>.

<sup>8</sup> “A' ulà ö a' klò tö a' ké ì sulu wamblök e' t<sup>a</sup> itöö uyómi bánet. A' döwa sene micho a ulà etkè ö klò etkè, e' dör buaë. E' skéie a' uyèwa bö' ñar michoë e' a ulà bötkë ena klò bötkë e' dör suluë. <sup>9</sup> Ñies s'wöbla tö s'ké ì sulu wamblök, e' t<sup>a</sup> iyótt<sup>s</sup>a uyómi bánet. A' döwa sene micho a wöbla ek è wa, e' dör buaë. E' skéie a' uyèwa bö' ñar michoë e' a wöbla böké, e' dör suluë.

*Obeja chowa e' pakè**(Lucas 15.3-7)*

<sup>10-11</sup> “A' e' kkö'nú, ikkëpala kè watarttsa. Ye' tö a' a' ichè tö Skëköl biyöchökwakpa tso' ie'pa kkö'nuk e'pa tso' këkraë ye' Yé tso' ká jai a e' wörki ie'pa tté chök.

<sup>12</sup> “¿Ima a' tö ibikeitsè? Wëm eköl wa obeja tso' döka cien t<sup>a</sup> e' etö chowa, e' t<sup>a</sup> ¿ì wèmi ie' tö? Obeja döka dabom suliyök ki sulitu (99) e' meraat ie' tö kañika t<sup>a</sup> imía obeja chowa e' yulök. <sup>13</sup> Mok<sup>i</sup> ye' tö a' a' ichè tö mik ie' tö ikué, et<sup>a</sup> ie' ttsè'nene buaë tköka imalepa kè ché'wa e' tö ie' ttsè'wè e' tsata. <sup>14</sup> Es Skëköl dör a' Yé tso' ká jai a, e' kè ki ikiane tö ikkëpala chöwa ekla wè'ia.

*Wes se' ké er buanukne ñi ki**(Lucas 17.3)*

<sup>15</sup> “A' yami wèle tö ì sulu wamblé a' ki, e' t<sup>a</sup> a' yú ie' ska' t<sup>a</sup> ì sulu wambléitö e' chó ie' a, e' shuló a' bö<sup>l</sup> è tö. Ie' tö a' ttò iüté, e' t<sup>a</sup> a' er buanene ñi ki. <sup>16</sup> Erë ie' kè wa a' ttò iütène, e' t<sup>a</sup> a' yamipa tsúmi eköl ö bö<sup>l</sup>, ttè ki a' tö ie' kkatè e' ttekölie as ior w<sup>e</sup>s itso' kitule es. E' tö ichè, “Ttè qos shulekesö et<sup>a</sup> ittekölpa kiane bö<sup>l</sup> ö mañal ichoie tö mok<sup>i</sup> idir ö au.” <sup>17</sup> Erë kè ie' wa e'pa ttò ttsène, e' t<sup>a</sup> ichó ye' icha erule e' kukua. Ñies kè iw<sup>a</sup> ie'pa ttò iütène, e' t<sup>a</sup> isaú w<sup>e</sup>s pè' kè tö Skëköl dalòie es ö w<sup>e</sup>s inuköl shtökwakpa Roma wökirpa a e'pa suè es.

<sup>18</sup> “Mok<sup>i</sup> ye' tö a' a' ichè tö ì cheke a' tö tö e' dör suluë ká i' a, ese cheraë Skëköl tö tö e' dör suluë. Ñies ì cheke a' tö tö e' dör buaë ká i' a, ese cheraë Skëköl tö tö e' dör buaë.

<sup>19-20</sup> “Ye' tö ì skà chekene a' a: Wé a' bö<sup>l</sup> ö mañal ñi dapa'wé ye' ttò wa, ee ye' tso' a' t<sup>a</sup>. E' kuëki a' bö<sup>l</sup> er méwa ñikkëë ká i' a ilè kiök ye' Yé tso' ká jai a e' a, e' t<sup>a</sup> imeraëitö a' a.”

<sup>21</sup> Et<sup>a</sup> Pedro dew<sup>a</sup> Jesús ska' t<sup>a</sup> ichakéitö:

—A Skëképa, ¿bitökicha ye' yami tö ì sulu wamblé ye' ki, e' olo'yèmiyö iki? ¿Mok<sup>i</sup> dö kul ekkè?

<sup>22</sup> Ie' iüté:



—Kè ye' tò be' a ichè kul è. Ye' ichè tò be' kawötä inuì olo'yök iki kekraë bitökicha ekkè\*

*Blu' er buaë ché ikanè méso eköl a*

<sup>23</sup> “Í chéyö a' a e' wà pakekeyö ttè i' wa. Ì blúie Skéköl tso' e' dör wës blu' eköl éna nuì shulak ikanè méso pa ta es. <sup>24</sup> Ie' tò ie'pa nuì shulémitke eta' ikanè méso eköl debitu ie'pa wa ie' wörki, e' wa nuì tso' taië shute† <sup>25</sup> Ie' kè a nuì ekkè patörpa, e' kueki blu' tò ie' ena ilaköl ena ila'r ena ì kos tso' iwä e' watauktsa ké inuì ekkè patuoie. <sup>26</sup> Ikanè méso e' tkéwa kuchë ki blu' wörki ta' ikköché taië ie' a: ‘Be' we'ikèyö, ye' panú béré tsir, e' wa ye' tò be' patuëttsa seraa.’ <sup>27</sup> Blu' ie' sué er siarë wa, e' kueki inärke kos e' olo'yéitö iki seraa ta' iémine bèrë.

<sup>28</sup> “Erë mik kanè méso e' míä, eta' ie' tò kanè méso iëköl kué ña'weke ie' tò elkela è‡ Ta' iklö'wéwaitö ikuli' a tuéwa darërëë ta' ichéitö ia: ‘jBe' ñarke ye' ulä a, e' pataúttsa ña!’ <sup>29</sup> Ta' iëköl e' tkéwa kuchë ki ie' wörki ta' ikköché taië: ‘Be' we'ikèyö, ye' panú béré tsir, e' wa yö be' patuëttsa seraa.’ <sup>30</sup> Erë ie' kè wa iëköl kköché e' iütëne. Ie' tò iwötökwa patké s'wötö wé a dò mik inuì patuëttsaitö seraa eta'. <sup>31</sup> Mik kanè méso pa malepa tò ittse, eta' e' tò ie'pa eriauwé taië. E' kueki ie'pa míä blu' ska' ta' ichéka seraa. <sup>32</sup> Eta' blu' tò kanè méso e' kiök patké ta' ichéitö ia: ‘jBe' dör pè' sulué! Ye' tò be' ki be' nuì taië e' olo'ya' seraa be' kköyë' ye' a e' kueki. <sup>33</sup> jÌ kueki be' kè wa be' yami sune er siarë wa wës ye' be' su' es?’ <sup>34</sup> Eta' blu' uluneka taië, e' tò ikanè méso wötökwa patké as iwe'ikò ie'pa tò siarë dò mik inuì patonettsa seraa eta'. <sup>35</sup> Es ñies a' yami tò ì sulu wamblé a' ki e' nuì kè olo'yé a' tò iki er moki wa, e' ta' ye' Yé tso' ká jaì a e' tò a' we'ikeraë siarë.”

## 19

*Se' ñi òwa ese ché Jesús tò*

*(Mateo 5.31-32; Marcos 10.1-12; Lucas 16.18)*

<sup>1</sup> Mik Jesús tò ttè ekkè ché one, eta' ie' e' yéttsa Galilea míä Judea ta' itkattsa Jordán a wishet. <sup>2</sup> Taië pè' dami ie' itöki e'pa shua wépa kirirke esepa kos bua'wéitö.

<sup>3</sup> Eta' fariseowakpa welepa de ie' ska' ta' ie'pa tò ie' a' ichaké itsaioie:

—jWépa a' kawö ta' itayë owa íyi ulitane kueki?

<sup>4</sup> Ie' tò ie'pa iüté:

—Ì tso' kitule Skéköl yëkküö ki, j e' kè sune a' wa? E' tò ichè tò tsawe ta' Skéköl tò se' yö' wëm ena alaköl. <sup>5</sup> Ie' tò iyë': ‘E' kueki wépa kè serpaia iyé ena imì e'pa dapömik, ta' iserdawa alaköl ta'. Ie'pa böl serdaë ñita ta' ie'pa míä wës wák eköl è es.\* Es ikiteat <sup>6</sup> e' kueki ie'pa kè ìä böl, ie'pa yöne wës wák eköl è es. E' kueki wépa batséwa Skéköl tò esepa kè batsökök yi tö.

<sup>7</sup> Eta' ie'pa tò ie' a' ichaké:

—E' dör es, e' ta' jì kueki Moisés tò iyë'at tò wëm tò itayë éwa, ese wák kawötä ñi owa yëkküö muk ia?

<sup>8</sup> Ie' iüté:

—A' er darërë, e' kueki Moisés tò kawö me' a' a' a' tayë ökwa, erë tsawe ta' kè idör es.

<sup>9</sup> Ye' tò a' a' ichè tò yi tò itayë éwa, kè dör itayë trër kueki, ese tò alaköl skà tséwane, e' ta' e' wa isenewabak kewe e' dalösewéwaitö.

<sup>10</sup> Jesús ttökatapa tò iché ie' a':

—E' dör es e' ta' bua' idir sa' a' tò kè sa' alaköl tsüwa.

<sup>11</sup> Ie' tò ie'pa iüté:

\* 18:22 kekraë bitökicha ekkè: Griegoie e' dör dabom kuryök döka kuktökicha (70×7). † 18:24 nuì taië shute: Ttè i' dör inuköl kiè talento e' mil döka dabop. †ñe ta' e' ské dör dólares döka millón döka dabom skeyök (50,000,000)

‡ 18:28 elkela è: Ttè i' dör inuköl kiè denario ese döka cien. \* 19:5 Génesis 2.24 saü.

—Ì ché a' tō e' kè dör sulitane a, e' dör wépa a imène esepa è a. <sup>12</sup> Wépa welepa dör kachir ie'pa wák dē'ka es e' kueki. Welepa skà yueke s'kapeyökwakpa tō kachirie. Iskà tso' esepa serke kachirie ì blúie Skéköl tso' e' kané kueki. Wépa sermi es, esepa senú es.

*Jesús tō ikié S'yé a ala'rla ki*  
(Marcos 10.13-16; Lucas 18.15-17)

<sup>13</sup> Pē' wā ala'rla debitu Jesús ska' as ie' ulà mùka iki ena ikiò S'yé a iki. Erè ittōkatapa tō pē' uñélor. <sup>14</sup> Erè ie' tō iché:

—As ala'rla bitu ye' ska'. Wépa dör wes ie'pa es, esepa blúie Skéköl tso', e' kueki kè iwöklö'waria.

<sup>15</sup> Etā ie' ulà méka ie'pa ki, e' ukuöki tā imía bānet.

*Inuköl blú eköl tō Jesús a ichaké*  
(Marcos 10.17-31; Lucas 18.18-30)

<sup>16</sup> Wēm eköl debitu Jesús ska' tā ie' a ichaké:

—A S'wöbla'ukwak, ¿ì buaë wēmi ye' tō as sene michoë dò ye' ulà a?

<sup>17</sup> Ie' tō iüté:

—¿ì kueki be' tō ye' chaké ì dör buaë ese ki? Skéköl eköl è dör buaë. Be' ki sene michoë kiane, e' tā ttè me'atbak ie' tō dalöieno e' dalöiö.

<sup>18</sup> Ie' tō Jesús a ichaké:

—¿Ttè wéne?

Ie' iüté:

—'Kè a' kawö tā' s'ttökwa, kè a' kawö tā' s'senewabak e' dalöseukwa, kè a' kawö tā' akblök, kè a' kawö tā' s'kkatök kachè wa, <sup>19</sup> a' yé ena a' mì dalöiö, ñies a' malepa dalëritsó wes a' wákpa e' dalër es.†

<sup>20</sup> Duladula tō ie' a iché:

—Ttè e' kos dalöië'bitu ye' tō iaiaë. Etā ¿ì skà kianeia?

<sup>21</sup> Ie' iüté:

—Be' éna ì buaë kos wak seraa, e' tā be' yú tā ì tso' be' wā, e' wataúttsa seraa tā iské múttsa s'siarépa a. E' ukuöki tā be' shkó ye' tā ye' ttökataie. Es tā íyi buaë taië dōraë be' ulà a ká jaì a.

<sup>22</sup> Duladula dör inuköl blú taië, e' kueki mik ie' tō e' ttsé etā ie' erianekā taië tā imíatke.

<sup>23</sup> Etā Jesús tō iché ittōkatapa a:

—Moki ye' tō a' a iché tō inuköl blúpa a darërëe idir dökwa ì blúie Skéköl tso' e' a.

<sup>24</sup> Iskà chèneyö a' a tō inuköl blúpa a dökwa ì blúie Skéköl tso' e' a e' dör darërëe tkòka kameio tkòmi datsi' yuo diké ese wöukla a e' tsatā.

<sup>25</sup> Mik e' ttsé ie'pa tō, etā ie'pa tkinewa taië tā ichéitörak:

—E' dör es e'ma ¿yi tsatkërmi?

<sup>26</sup> Ie'pa webléitö tā ichéitö:

—E' kè onuk s'ditsö a wes, erè Skéköl a íyi ulitane ormi.

<sup>27</sup> Etā Pedro tō iché ia:

—Sa' tō íyi ulitane me'at tā sa' bité be' tā. ¿ì dòmi sa' ulà a e' skéie?

<sup>28</sup> Ie' tō ie'pa iüté:

—Moki ye' tō a' a iché tō mik ká i' manerketkene buaë aishkuö tā, etā ye' dör S'ditsö Alà e' dōraë ká ulitane blúie olo tā' taië. Ñies a' dör ye' ttōkatapa, e'pa e' tulöraser blu' kulé dōka dabom eyök kí böt e' ki, Israel ditséwōpa dōka dabom eyök kí bōl e'pa wëttsuk.

<sup>29</sup> Wépa kos tō iu ö iēlpa ö ikutapa ö iyé ö imi ö ila'r ö iká ese méat ye' tté kueki, e' tā e'pa ulà a iské dōrane taië shutëë, ñies aishkuö tā sene michoë dōraë ie'pa ulà a. <sup>30</sup> Erè i'ñe tā se' taië tso' kewe esepa dōraë bataie ena se' tso' bataie i'ñe tā esepa dōraë keweie.

† 19:19 Éxodo 20.12-16; Deuteronomio 5.16-20; Levítico 19.18

## 20

*Kanè mésopa patuè e' tté*

<sup>1</sup> “Ì blúie Skéköl tso' e' ta itkóke wës itka wëm eköl ta es. E' míã bla'mi kanè mésopa yulök ie' uva tso' tkëule e' kanéuk. <sup>2</sup> Ie' tö iché ie'pa a: ‘Ye' tö a' patueke kos s'patörke ká etk ekkë, e' dör denario etk.’ E' dör buaë ie'pa a ta ie' tö ie'pa patké kaneblök. <sup>3</sup> Diwö de sulitu (9) etã kanè wák míãne kanè mésopa skà yulök etã ee ie' tö isué tö wëpa tulur ñala ska' kè ku' kaneblök. <sup>4</sup> Ie' tö ie'pa a iché: ‘A' yú kaneblök ye' kanè a ta ye' tö a' patueke kos s'patörke mokí ekkë.’ Etã ie'pa míã kaneblök. <sup>5</sup> Diwö de bata a ta ie' míã kanè mésopa skà yulök etã ie' tö ie'pa patké kaneblök. Ñies tsálij diwö de mañat etã ie' míã kanè mésopa skà yulök ta ie'pa patkétö ñies kaneblök. <sup>6</sup> Diwö döketke skel etã ie' míã kanè mésopa skà yulök, ee ie' tö wëpa kué iëter kè ku' kaneblök. Ie' tö ie'pa a ichaké: ‘¿Iók a' iëter ñië íe kè ku' kaneblök?’ <sup>7</sup> Ie'pa tö iüté: ‘Kè yi wa sa' a kanè mène.’ Etã ie' tö ie'pa a iché: ‘A' yú kaneblök ye' a.’

<sup>8</sup> “Mik ká tuine, etã kanè wák tö iché ikanè mésopa pataukwak a: ‘Kanè mésopa kió etã ie'pa pataú. Wëpa debitu bataie, e'pa pataúmi kewe, ta wëpa debitu kewe, e'pa pataú bataie.’ <sup>9</sup> Etã kanè mésopa debitu kaneblök tsálij diwö skel, e'pa patone kewe. Ie'pa kos patone denario et et. <sup>10</sup> Mik kanè mésopa debitu kaneblök kewe, e'pa patörketke etã ie'pa tö ibikeitsé: ‘Sa' patörke aishet sa' malepa tsata.’ <sup>11</sup> Erë ie'pa kos patone denario et et è. <sup>12</sup> E' tö ie'pa kabewéka ta iché kanè wák a: ‘Wëpa ikképa debitu bataie kaneblé bërberla è, e' skéie sa' kaneblé ñië, ña'wé diba tö, ñies shtrine taië. Etã ¿wës be' tö ie'pa patué kos be' tö sa' patué ekkë?’ <sup>13</sup> Erë kanè wák tö ikanè méso eköl iüté: ‘A' yami, ye' kè ku' i sulu wamblök be' ta. Se' tté mé ñi a tö ye' be' patueke denario etk. <sup>14</sup> E' kuëki be' inuköl klö'ú ta be' yúshka. Wëm debitu kaneblök ibataie ese a ye' éna inuköl mak kos ye' tö be' a imé ekkë etã ¿wës ide? <sup>15</sup> Ye' a kawö ta' i wak ye' éna ye' inuköl wa, ese wöie. Ye' tö ilè kakmeke yile a, ¿e' tö be' ukyëweke ye' ki?’

<sup>16</sup> “Es s'tso' bataie esepa döraë keweie ena s'tso' keweie esepa döraë bataie.”

*Jesús e' biyó chéne tö ie' tterawá pë' tö*

(Marcos 10.32-34; Lucas 18.31-34)

<sup>17</sup> Jesús ena ittökatapa dabom eyök kí böi (12), e'pa mirka Jerusalén ta ie' tö ie'pa kié bánet ta ichéitö ia:

<sup>18</sup> —Se' mirka Jerusalén i', etã ee ye' dör S'ditsö Alà, e' merdattsa sacerdotepa wökirpa ena s'wöbla'uk tté dalöiëno wa wakpa ulà a. Ie'pa tö ye' kichateraë. <sup>19</sup> Ye' merattsarakitö pë' kè dör judiowak esepa ulà a. E'pa tö ye' wayueraë pperaë siarë ta ye' tterawarakitö wötëule krus mik. Erë e' kí ká de mañat, etã ye' shkerdakane.

*Santiago ena Juan e'pa mì tö kawö kié Jesús a*

(Marcos 10.35-45)

<sup>20</sup> Santiago ena Juan dör Zebedeo ala'r e'pa mì de ie'pa ta Jesús ska' ta ie' tkéwã kuchë kí iwörki ilè kioie ie' a. <sup>21</sup> Jesús tö ie' a ichaké:

—¿Ì kiane be' ki?

Ie' tö iüté:

—Ye' tö be' a kawö kieké tö mik be' tkënekã s'blúie, etã ye' alà eköl tkówã be' ulà bua'kka, eköl be' ulà bakli'kka s'wëttsuk be' ta.

<sup>22</sup> Ie' iüté:

—Ì kieké a' tö e' kè wã jcher a' wã. ¿Ye' tkã' wayarmi a' a? ¿A' e' ché weinuk wës ye' weirdäe es?

Ie'pa tö iüté:

—Tó, sa' dirmi.

<sup>23</sup> Ie' iché:

—Mokí ye' tkã' wayeraë a' tö, a' weirdäe wës ye' es. Erë e' tköksër ye' ulà bua'kka ö ye' ulà bakli'kka, e' kè kéwö menuk ye' a. E' tso'tke ye' Yé wã klöule yi a imekeitö esepa a.

<sup>24</sup> Mik ttè e' ttséwā ittökātapa malepa dōkā dabom eyök (10) e'pa tö, etā ie'pa uluneka ie'pa böl ñe' ki. <sup>25</sup> Erè ie' tö ie'pa ulitane kié tā iché ia:

—A' wā ijcher tö pè' kè tö Skèköl dalöiè, esepa wökirpa kos e' alökeka ie'pa ki kekraë, ñies iblúpa tö ie'pa patkeke kèsik wa. <sup>26</sup> Erè a' kè kàne e' wamblök es. E' skéie, a' isie e' yuak a' wökirie, ese kawōtā e' wöökwa imalepa dikia diöshet ikanè mésoie. <sup>27</sup> Ñies a' isie e' yuak ibua'ie a' malepa tsatā, ese kawōtā e' muktsā imalepa a kanè mésoie. <sup>28</sup> Ye' dör S'ditsö Alà, e' kè dè'bitū as yi tö ye' kimù. Ye' dè'bitū ie'pa kimuk ena e' muktsā ttèwā pè' tso' taiè e' nuì skéie. E' kuèki a' kawōtā e' wöökwa a' malepa kanè mésoie.

*Wèpa böl wöbla kè wawër e'pa bua'wé Jesús tö*  
(*Marcos 10.46-52; Lucas 18.35-43*)

<sup>29</sup> Jesús ena ittökātapa e' yéttšā Jericó, e'pa itöki pè' mirwā taiè. <sup>30</sup> Etā wèpa böl wöbla kè wawër, e'pa tulur ñalā ska'. Mik ie'pa tö ittšé tö Jesús dami, etā ie'pa tö iché aneule:

—¡A kèkèpa, s'blú David bak e' aleri, sa' saú er siarè wa!

<sup>31</sup> Pè' tö wèpa e' uñeke as ie'pa siwā'blōwā, erè ie'pa kí aneka taiè:

—A kèkèpa, David aleri, sa' saú er siarè wa

<sup>32</sup> Jesús e' duésēr tā wèpa wöbla kè wawër e'pa kiéitö tā ie'pa a ichakéitö:

—¿Ì kiane a' ki?

<sup>33</sup> Ie'pa iüté:

—A kèkèpa, sa' wöbla bua'ú.

<sup>34</sup> Ie' tö ie'pa sué er siarè wa tā ie'pa wöbla kéitö. E' wö shà tā ie'pa wöbla buanene tā imíyal ie' tā.

## 21

*Jesús demi Jerusalén*

(*Marcos 11.1-11; Lucas 19.28-40; Juan 12.12-19*)

<sup>1</sup> Mik Jesús ena ittökātapa demi tsinet Jerusalén, ká kiè Betfagé tso' Olivo kébata a eé, etā ie' tö ittökātapa kié böl <sup>2</sup> tā ichéitö iarak:

—A' yú wì u wène eruleè eé. Mik a' demi eé, etā bet tā a' tö burro alaki kueraë etö moulewā ena ilala dur iq'mik. E' wötsóo tā itsúbitū ña. <sup>3</sup> Yile tö a' a ichaké, e' tā iütó: 'Skèkèpa ki ikiane, e' wa ie' tö imène.'

<sup>4</sup> Itka es as ì yè'atbak Skèköl tteköl tö e' wà tkò es. Ie' tö iyè':

<sup>5</sup> "Ichó Jerusalén wakpa a:

'Ye' ttò ttsó, a' blú datš e' ska' e' tkèulekā burro ki.

Ie' dör pè' bèrè kè e' ttsötā'ka.

Ie' datš burro alala ki, e' dör iyiwak tso' dali oie ese.' ”\*

Es Skèköl tteköl tö iyè'at.

<sup>6</sup> Ittökātapa míyal tā iwérakitö wēs Jesús tö iché ie'pa a es. <sup>7</sup> Ie'pa wā burro alaki ena ilala bitetsēr Jesús a. Ie'pa tö ipaio kikkē mékā burro alala ki tā Jesús e' tkéka iki. <sup>8</sup> Pè' tso' taiè e'pa tö ipaio kikkē shuélor ñalā ki, ñies welepa tö kal kò télor shuélor ñalā ki Jesús ñalé tsoie. <sup>9</sup> Pè' mirwā keweie Jesús yöki ñies itöki, e'pa ulitane arke taiè:

—¡Ie' i' dör se' blú bak David e' aleri, e' kikkōkasö! Ayècha buaë ie' datš Skèköl ttò wa. ¡Skèköl tso' ká jai a e' kikkōkasö!†

<sup>10</sup> Mik ie' dewā Jerusalén, etā e' wakpa aláneka taiè tā ichaké:

—¿Yi dör ie'?

<sup>11</sup> Pè' datš taiè ie' tā, e'pa tö iüté:

—E' dör Jesús. Ie' dör Skèköl tteköl datš Nazaret atē Galilea e'.

*Jesús tö Skèköl wé batse'wé*

(*Marcos 11.15-19; Lucas 19.45-48; Juan 2.13-22*)

\* 21:5 Zacarías 9.9 † 21:9 Salmo 118.26

<sup>12</sup> Età Jesús dewa Skëköl wé a. Età wépa tso' eë íyi tauk ena íyi watauk e'pa kos tré'wéyal ie' tö. Inuköl mane'uk<sup>‡</sup> wakpa mesa trélurkaitö. Nies nuböl wataukwakpa kula' trélurkaitö. <sup>13</sup> Ie' iché ie'pa a:

—Skëköl tö iyé'at iyëkküö kî: 'Ye' u kirdaë tto ye' ta wé',<sup>§</sup> erë a' tö iia'wéka akblo wéie.

<sup>14</sup> Età s'wöbla kè wawër ena kè s'shko bua' esepa debitu Jesús ska' Skëköl wé a ta ie' tö ie'pa bua'wé. <sup>15</sup> Ala'rla tso' eë e'pa tö iché aneule: '¡S'blú bak David, e' aleri kikökasöl' Mik sacerdotepa wökirpa ena s'wöbla'uk ttè dalöiëno wa wakpa tö ì wé Jesús tö e' sué, ena ima ala'rla tö ie' ché e' ttsé, età ie'pa uluneka taië <sup>16</sup> ta ichéitörak Jesús a:

—Ì chök ala'rla tso', ¿e' ttsé be' tö?

Ie' tö ie'pa iüté:

—Tó, e' ttséyo. Erë ima e' ché Skëköl yëkküö tö, wësua e' kè suule a' wa. E' tö iché:

'A Skëköl, ala'rla ena bëbëpala tsu'yökeia, esepa kébö e' kikökka.'\*

<sup>17</sup> Età ie' tö ie'pa méat ta imía ká kiè Betania eë. Eë ie' kapére.

*Higo klò siwéwa Jesús tö*

*(Marcos 11.12-14,20-26)*

<sup>18</sup> Bule es bla'mi ta Jesús michone Jerusalén ta ie' mirwa ñala wa ta ie' dué bli wa. <sup>19</sup> Ie' tö higuera klò ter elka sué ta imía iwö yulök katè. Erë kè iwö ta', ikò è arwa taië. E' kueki ie' tö iché kal e' a:

—¡Kè be' wörpaia yës!

E' wösha ta higuera klò sinewami. <sup>20</sup> Mik e' sué ittökatapa tö, età e' tö ie'pa tkiwéwa taië, e' kueki ie'pa tö ie' a ichaké:

—¿Wes higuera klò sinewa bet?

<sup>21</sup> Ie' tö ie'pa iüté:

—Moki ye' tö a' a iché tö a' erblé Skëköl mik moki, kè ibikeitsule bötböt, e' ta ì wé ye' tö, e' ormi a' a ñies. E' kíie ta a' tö ichèmi kabata wì a: 'Be' e' skóttsa íe anúwa dayë a', e' ta es iwà tköraë. <sup>22</sup> A' erblé Skëköl mik moki, e' ta ì kos kié a' tö ie' a e' wà döraë a' ulà a.

*¿Yi tö kawö mé Jesús a?*

*(Marcos 11.27-33; Lucas 20.1-8)*

<sup>23</sup> E' ukuöki ta Jesús dewa Skëköl wé a, eë ie' tso' s'wöbla'uk. Età sacerdotepa wökirpa ena judiowak kuëblupa de ie' ska' ta ichaké ia:

—¿Yi ttò wa be' tö íyi ikké weke? ¿Yi tö e' kèwö mé be' a?

<sup>24</sup> Ie' iüté:

—Ñies ye' tö a' a ilè chakeke, e' iüté a' tö, e' ta ye' tö a' a icheke tö yi tö ikéwö me' ye' a. <sup>25</sup> ¿Yi tö Juan patké' s'wöskuök? ¿Skëköl tso' ká jai a e' ö s'ditsö?

Ie'pa ñi iütémi ta ichérakitö: "Se' tö ichèmi tö Skëköl tö kawö mé Juan a, e' ta ie' tö se' iütèmi: 'Età ¿ì kueki a' kè wa ie' ttè klöone?' <sup>26</sup> Pè' ulitane tö iklö'wé tö Juan dör Skëköl tteköl. Se' suane ie'pa yöki, e' kueki kè se' a iyënuke tö Juan a kawö me' s'ditsö tö." <sup>27</sup> E' kueki ie'pa tö iüté:

—Kè sa' wa ijcher.

Ie' tö ie'pa a iché:

—Es ñies ye' kè tö a' a ichepa tö yi tö ye' a kawö mé íyi ikké wöie.

*Ala'r böle' tté*

<sup>28</sup> Jesús tö ie'pa a iché:

—Ttè kleekeyö a' a e' ttsó a' tö. Wëm eköl alà dör böle' wépa, e' debitu ilà eköl ska' kewe ta ichéitö ia: 'A alà, be' yú kanëblök i'ñe ye' uva tso' tkëule e' a.' <sup>29</sup> Ilà tö iüté: 'Kè ye' mîne.' Erë e' ukuöki ta ie' tö ibikeitséne kua'ki ta imía. <sup>30</sup> E' ukuöki ta iyé mía ilà iëköl

<sup>‡</sup> 21:12 inuköl mane'uk: Judiowak a inuköl tso' wakanewé Skëköl wé è a, e' tuëkene ie'pa tö inuköl èse wa. <sup>§</sup> 21:13 Isaías 56.7 \* 21:16 Salmo 8.3

ska' tã ichéitö iã: 'Be' yú kanéblök ye' uva tso' tkéule e' a.' Ilà iüté: 'Ékékë ye' mi'ke.' Erë ie' kè mîne.

Etã Jesús tö ie'pa a ichaké:

<sup>31-32</sup> —¿Ima a' tö ibikeitsè? Ala'r bö!l, ¿e' wéne tö iyé ttö iüté?

Ie'pa tö ie' iüté:

—Wéne a ichéitö kéwe e'.

Ie' iché ie'pa a:

—Juan S'wöskuökwak dë'bitu sene yësyësë ñalé kkachök a' a, erë a' kè wã ie' ttè klöone. Erë inuköl shtökwakpa Roma wökirpa a ena alakö!pa sulusipa, esepa tö ie' ttè klö'wé. E' sué a' tö erë kè a' er maneone ie' ttè klö'woie. E' kuëki moki ye' tö a' a ichè tö ie'pa esepa dörawã a' skéie ì blúie Skéköl tso' e' a.

*Uva kanéukwakpa sulusipa e' tté*

*(Marcos 12.1-12; Lucas 20.9-19)*

<sup>33</sup> Iskà kleekeyö a' a, e' ttsó. Kanè wák eköl tö uva kuatké taië tã ikköiéwãitö buaë, kãuk biéitö uva diö tuoie. Ñies úla yuéitö kakkéë uva kkö'noie. E' ukuökí tã ie' tö ipeitéat wëpa welepa a as ie'pa tö ipataù ie' a iwörke e' kak wa. E' ukuökí tã ie' mia ká bánet. <sup>34</sup> Mik uvawö aline tso'tke wë'iãë shtè, etã ie' tö ikanè mésopa welepa patkëmi ie' icha tsuk. <sup>35</sup> Erë kanéukwakpa tö ikanè mésopa klö'wéwã, eköl ppéraitö siarë, eköl ttéwarakitö, eköl shká'wérakitö taië ák wa. <sup>36</sup> Etã kanè wák tö ikanè mésopa skà patkëmine tkòka kuaë ipatké'itö e' tsata. Erë kanéukwakpa tö iwamblë ie'pa tã wës ie'pa tö iwamblë' wëpa dë'rö kuaë e'pa tã es.

<sup>37</sup> “Bata ekkë tã ie' tö iwák alà patkëmi tã ie' ibikeitsé: ‘Ye' alà idir, e' kuëki ie'pa tö idalöieraë.’ <sup>38</sup> Erë mik ie'pa tö ilà sué, etã ie'pa iché ñi a: ‘Ie' wì dör ká i' wak alà, ká i' atdaë ie' ulà a. Ittöwasö etã es se' ulà a ká i' atdaë.’ <sup>39</sup> E' kuëki ie'pa tö iklö'wéwã yéttsa bánet tã ittéwarakitö.”

<sup>40</sup> Etã Jesús tö iché:

—Ye' tö a' a ichaké: ¿Ima a' tö ibikeitsé? Mik kanè wák dene etã ¿ì wëraë ie' tö kanéukwakpa e'pa tã?

<sup>41</sup> Ie'pa tö iüté:

—Ie' tö pë' sulusipa e'pa tteralur er sulu wa tã uva kané meraneitö kanéukwakpa kua'kipa tö ipatuëraë buaë mik ikéwö döke bit ekkë esepa a.

<sup>42</sup> Etã ie' tö iché ie'pa a:

—Ye' tté tso' kitule Skéköl yëkkuö ki, ¿e' kè sune a' wã? E' tö ichè:

‘Ák waté'ttsã u yuökwakpa tö

e' yönene ák bua'buaië.

E' kaneö' Skéköl tö,

tã e' tö s'ttsë'wëke buaë, s'tkinewã iweblök.'†

Es Skéköl yëkkuö tö iyë'at.

<sup>43</sup> E' kuëki yö ichè a' a tö ì blúie Skéköl tso' e' kané mène a' a, erë e' yerattsaitö a' ulà a tã imeraëitö pë' kua'kipa tö iwakanewëraë buaë esepa a. <sup>44</sup> Es yi klastkëne ák e' mik ese parolordaë ena yi ki ák e' anekã ese yalitdawã idikã. <sup>45</sup> Mik sacerdotëpa wökirpa ena fariseowakpa tö ì kleé Jesús tö ñe' ttsé, etã ie'pa tö isuéwã tö ie' tso' ie'pa chök. <sup>46</sup> E' kuëki ie'pa éna ie' klö'wakwã ee. Erë pë' tö iklö'wé tö ie' dör Skéköl tteköl, e' kuëki ie'pa suane pë' yöki tã kè ie'pa wã iklönewã.

## 22

*Blu' alà ulabatske e' tté*

*(Lucas 14.15-24)*

<sup>1</sup> Etã Jesús tö ttè skà kleé ie'pa a i' es: <sup>2</sup> “Î blúie Skéköl tso' e' tã itköke wës itka blu' eköl tã es. E' tö ilà ulabatske e' kéwö tkö'wëke. <sup>3</sup> Ie' tö ikanè mésopa patké wëpa kiule

† 21:42 Salmo 118.22-23



kos e'pa a ichök: 'Blu' alà ulabatske e' diwö de, a' shkó ikéwö tkö'uk.' Erë ie'pa kè shkak. <sup>4</sup> E' ukuöki ta blu' tö ikanè mésopa kua'ki skà patkémí e'pa a ichéitö: 'Ichó wépa kiule kos a tö ye' iyiwak bua'buä e' duotke alinetke, katè è kianeia. E' kuëki a' shkó ye' alà ulabatske e' kéwö tkö'uk.' Etä ie'pa míyal e' chök wépa kiule e'pa a. <sup>5</sup> Erë wépa kiule kos e'pa kè wä blu' ttò iütène. Ie'pa eköl míä ikanè ki, eköl míä íyi watauk <sup>6</sup> ta imalepa tö blu' kanè mésopa klö'wéwä ta iwe'ikérakitö siarë, ñies welepa ttéwarakitö. <sup>7</sup> Etä blu' uluneka taië ie'pa ki ta ie' tö iché iñippökwakpa a: 'A' yú ie'pa kos ttökulur, ñies ie'pa u kos ña'úwa.' <sup>8</sup> E' ukuöki ta ie' tö iché ikanè mésopa a: 'Íyi ulitane tso'tke ye' alà ulabatske e' kéwö tkö'woie, erë wépa kiule e'pa dör pè' suluë, e' kuëki ye' kè tö kawö mepa ie'pa a ye' alà ulabatske e' kéwö tkö'uk.' <sup>9</sup> E' kuëki a' yú bet ñala kibi kos ese ki ta pè' kos sué a' tö e'pa a ishkeñú kawö tkö'uk ye' ta.' <sup>10</sup> Etä ikanè mésopa míyal ñala kos ki ta pè' kos kué ie'pa tö, pè' buä ena pè' suluë, esepa dapa'wéka wé ie'pa tso' ikéwö tkö'uk e' wé a. Es iwé wà iëne taië.

<sup>11</sup> "Erë mik blu' de wépa dapané e'pa sauk, etä wëm eköl suéitö kè e' paiëule wës ikawöta e' paiök ulabatsè kéwö tkö'wo es. <sup>12</sup> E' kuëki blu' tö ie' a iché: 'A yami, ¿wës be' dewä? Be' kè e' paiëule ulabatsè kéwö tkö'wo ese datsi' wa.' Erë wëm e' kè wä blu' iütène yës. <sup>13</sup> Etä blu' tö iché ichkò watiökwakpa a: 'Wëm i' ulä ena iklö moúwä a' tö ta iuyóttsa bänet stui ké a, eë ie' iuraë siarë, ikà blardaë iweir taië e' kuëki.' <sup>14</sup> Ttè e' pakéyo a' a e' wà dör i' es. S'tso' taië kiule as Skököl klö'urakitö iblúie, erë wépa shukitbakitö esepa kè dör taië."

### *S'wökirpa patauk, e' tté*

*(Marcos 12.13-17; Lucas 20.20-26)*

<sup>15</sup> E' ukuöki ta fariseowakpa míyal ta ittérak ñita: "ilè chakòsö Jesús a as ie' tö ilè sulu chò ikkatoie." <sup>16</sup> E' kuëki ie'pa tö iklépa welepa ena Herodes klépa welepa patkémí ie' a ichakök. Ie'pa tö ie' a iché:

—A s'wöbla'ukwak, sa' wä ijcher tö kekraë be' ttò mokië. Be' tö sulitane sueke ñikkëë. Ima pè' tö be' cheke e' kè ki be' tkine. E' kuëki be' tö s'wöbla'weke yësyësë Skököl ñalé tté wa. <sup>17</sup> E' kuëki ichó sa' a, ¿ima be' tö ibikeitsè? Roma wökir kibi patuësö ¿e' dör buäë ö kè idör buäë?

<sup>18</sup> Ie' tö isuwéwä tö ie'pa tso' ie' chakök er sulu wa, e' kuëki ie' iüté i' es:

—A' e' ò suluë, ¿l' kuëki a' tso' ye' ma'uk tsaië? <sup>19</sup> Inuköl tso' a' wä Roma wökir patuoie, e' kkachó ye' a et.

Tä ie'pa wä inuköl wöshki ese debituia et. <sup>20</sup> Etä ie' tö ie'pa a ichaké:

—¿Yi diököl ena yi kiè me'rka iki?

<sup>21</sup> Ie'pa iüté:

—Roma wökir kibi.

Etä ie' tö ie'pa a iché:

—E'ma kos Roma wökir kibi icha, ese mú ie' a, ta kos Skököl icha ese mú ie' a.

<sup>22</sup> Mik ie'pa tö e' ttsé, etä ie'pa tkinewä. Ie'pa tö iméat ta imíyal.

### *¿S'duolur e' shkermikane ö au?*

*(Marcos 12.18-27; Lucas 20.27-40)*

<sup>23</sup> E' è diwö wa, saduceowakpa welepa de Jesús ska'. E' wakpa tö iklö'wé tö s'duowa e'pa kè shkenukkane. Ie'pa tö ie' a ichaké:

<sup>24</sup> —A s'wöbla'ukwak, Moisés tö se' a iyé'at tö wëm blénewä kè alà atë, e' ta ie' èl kawöta ischó tsukwä as ilà kòka iël blénewä, e' a. <sup>25</sup> Etökicha sa' shua wépa bak döka kul ñi èlpa. Ikibi alaköl tséwä, erë iblénewä kè alà atë. E' ukuöki ta ie' itöki iël tö ischó tséwä, <sup>26</sup> erë ñies e' blénewä kè alà atë. Es itka iël skà ta ñies imalepa kos e'pa ta. Ie'pa kul blérulune

kè alà atē yēs. <sup>27</sup> Bata ekkē tā ñies ilaköl blēnewā. <sup>28</sup> Wēpa kul e'pa bak alaköl eköl è tā. Mik s'duowā e'pa shkēnekāne, etā ¿wēne dōmi ie' wēm chókīe?

<sup>29</sup> Ie' tō ie'pa iūtē:

—A' kè wā Skēköl yēkkuō suule, ñies ie' diché kè jcher a' wā, e' kuēkī a' wōā ká chowa.

<sup>30</sup> Mik s'duolur e'pa shkēnekāne, etā wēpa ena alakölpa kè serpawāia ñita. E'pa míyal wēs Skēköl biyöchökwakpa tso' ká jai ā kè sertā'wā ñita es. <sup>31</sup> ¿A' kī kiane jcheno tō moki s'duowā e'pa shkerdakāne? Ì yē' Skēköl tō a' ā iyēkkuō kī ¿e' kè aritsule a' wā? Ie' tō iyē' Moisés ā: <sup>32</sup> 'Ye' dör Abraham, Isaac ena Jacob, e'pa Kēköl.\* Ie' kè dör s'duowā e'pa Kēköl. ¿Ie' dör s'ttsē'ka e'pa Kēköl! E' kuēkī se' wā ijcher tō s'duowā e'pa shkerdakāne.

<sup>33</sup> Mik pē' tō ttē wa Jesús tō s'wōbla'wēke ñe' ttsē, etā ie'pa tkirulune.

*¿Skēköl ttē dalōiēno e' isie dör ikibiie?*

*(Marcos 12.28-34)*

<sup>34</sup> Mik fariseowakpa wā ijchenewā tō Jesús tō saduceowakpa siwā'blōwēwā ttē moki wa, <sup>35</sup> etā ie'pa eköl dör s'wōbla'ukwak ttē dalōiēno wa, e' tō ie' ā ilē chaké itsaioie:

<sup>36</sup> —A S'wōbla'ukwak, Skēköl ttē dalōiēno ¿e' wēne dör ibua'ie imalepa tsatā?

<sup>37</sup> Ie' iūtē:

—'Kēkē dör a' Kēköl, e' dalēritsō a' er kōs wa, a' wák kōs wa ena a' erbikē kōs wa.' <sup>38</sup> Ttē e' dör ibua'ie ttē dalōiēno malepa kōs tsatā. <sup>39</sup> Erē e' itōkī ttē skà tso', e' dör wēs iēt ñe' es, e' tō ichē: 'A' malepa dalēritsō wēs a' wákpa e' dalēr es.' <sup>40</sup> Ttē dalōiēno kōs kitbak Moisés tō ena Skēköl ttekolpa tō yēkkuō kī, e' wōiēnewā ttē böt ñe' è ā.

*¿Wé pairine'bitū idi' wa s'blúie e' dör yi aleri?*

*(Marcos 12.35-37; Lucas 20.41-44)*

<sup>41</sup> Fariseowakpa daparkeia, <sup>42</sup> e' dalewa Jesús tō ie'pa ā ichaké:

—¿Ima a' tō wé pairine'bitū idi' wa s'blúie e' chē, tō yi aleri idir?

Ie'pa ie' iūtē:

—E' dör s'blú bak kiè David e' aleri.

<sup>43</sup> Etā ie' iché ie'pa ā:

—E' dör es, e' tā ¿wēs David tō iki' ie' Kēköl? David tō iyē' Skēköl Wiköl wa i' es:

<sup>44</sup> 'Skēköl tō iché ye' Kēköl ā:

Be' e' tkóser ye' ulā bua'kka dalōiēno taiē,

dō mik ye' tō be' bolökpa mérö be' klò dikia etā.†

<sup>45</sup> Ie' dör David aleri, e' tā ¿wēs e' kiēmi David tō ie' Kēköl?

<sup>46</sup> Kè yi ā ie' iūtēneia yēs. E' ukuökī tā kè yi kēsik dē'kaia ie' ā ì skà chakök.

## 23

*Fariseowakpa ena s'wōbla'uk ttē dalōiēno wa wakpa kkaté Jesús tō*

*(Marcos 12.38-40; Lucas 11.37-54; 20.45-47)*

<sup>1</sup> E' ukuökī tā Jesús tō iché ittōkatapa ā ena s'tso' taiē e' kukua: <sup>2</sup> S'wōbla'uk ttē dalōiēno wa wakpa ena fariseowakpa ā kawō mēne ttē dalōiēno me'atbak Moisés tō e' wā pakök se' ā. <sup>3</sup> E' kuēkī ì kōs dalōiök a' ké ie'pa tō e' dalōiō. Erē ì dalōiök ie'pa tō a' ké ese kè dalōieta' ie'pa wákpa tō. E' kuēkī kè ie'pa wakōwar a' tō. <sup>4</sup> Ie'pa tō ttē dalōiēno taiē darērēē ese meke s'malepa ā wā dalōiē. E' dör wēs dalì ekkeē iè s'kī es, erē ie'pa kè tō iketa'wā iulatska è wa s'kimoie. <sup>5</sup> Ì kōs weke ie'pa tō e' dör s'ditsō è wō wa e' oie tō ie'pa dör pē' buaē. Skēköl ttē wele kitule datsi'tak kī, ese mueke ie'pa tō iwōtsā kī ena iulā kī e' kitkoie. Ñies ie'pa wōbatsō idatsi' kitkōk datsi'tak batsibatsi chalala buaala ese wa. <sup>6</sup> Wé ie'pa kawō tkō'uke ñies ñi dapa'wō wé ā ese ska' kula' tso' skēkēpa dalōiērtā'

\* 22:32 Ye' dör Abraham, Isaac ena Jacob, e'pa Kēköl: Mik ttē e' ché Skēköl tō Moisés ā, etā Abraham, Isaac ena Jacob e'pa blērulunebak ká iaiaē. Wēs ie' tō ichē, e' wā kiane chē tō ie'pa tso' ttsē'ka Skēköl tā. Éxodo 3.6 saú. † 22:44 Salmo 110.1

taië esepa a, ese ki ie'pa wöbatsö e' tköksér. <sup>7</sup> Ñies ie'pa ki ikiar tö pë' tö ie'pa shkë'wë wes kékëpa dalöiërta' taië ese shkë'wë es wé pë' tso' taië e'pa wöwa. Ie'pa wöbatsö tö pë' tö ie'pa kiè 's'wöbla'ukwak'.

<sup>8</sup> “Erë a' ulitane dör ñies è, e' kuëki kè a' ñi kiök 's'wöbla'ukwak.' A' wöbla'ukwak e' dör eköl ème e' kuëki kè a' ñi kiök es. <sup>9</sup> Ñies a' ulitane yé dör eköl ème, e' dör Skëköl tso' ká jai a e'. E' kuëki kè yi kiar ká i' a 'S'yé.' <sup>10</sup> Ñies a' wökir dör eköl ème, e' dör wé pairine'bitü idi' wa s'blúie e'. E' kuëki kè a' ñi kiök 's'wökir.' <sup>11-12</sup> Yi e' ttséka taië, esepa wöardawa; erë yi e' wöéwa diöshet, esepa kikardaka. E' kuëki wé dör ibua'ie a' shua ese kawöta e' wöökwa kanè mésoie imalepa kimuk.

<sup>13-14</sup> “jA s'wöbla'uk ttè dalöiëno wa wakpa, a fariseowakpa, wéstela ina a' ta! jA' e' ò suluë! Ì blúie Skëköl tso' e' wékkö wötekewa a' tö s'malepa yöki as kè ie'pa döwa. A' kè mi'wa, ñies wépa shkakwa esepa wöklö'weke a' tö.

<sup>15</sup> “jA s'wöbla'uk ttè dalöiëno wa wakpa, a fariseowakpa, wéstela ina a' ta! jA' e' ò suluë! A' shköke ká qos ekké ki s'yulök as ie' yuö a' ttökataie. Mik a' ikué, eta iyué a' tö ì sulu wamblökwak taië tkökä a' wákpa tsata. Es ie' weirdaë siarë bö' ké a wes a' es.

<sup>16</sup> “jA' dör wes sulaiökwakpa wöbla kè wawër es! jWéstela ina a' ta! A' icheke: ‘Yi tö ttè mé Skëköl wé wa, ese kè kawöta iütök kröröë. Erë yi tö ttè mé orochka tso' wötëule Skëköl wé mik e' wa, e' ta e' wà kawöta iütè.’ <sup>17</sup> jA' kè er ta! jA' dör wes s'wöbla kè wawër es! jÌ dör ibua'ie, orochka tso' Skëköl wé mik e' ö Skëköl wé tö orochka batse'wé e'? <sup>18</sup> Ñies a' tö icheke: ‘Yi tö ttè mé ka' tso' íyi mokä Skëköl a e' wa, e' ta ese kè kawöta iütök kröröë. Erë yi tö ttè mé íyi me'rka ka' ñe' ki e' wa, e' ta e' wà kawöta iütè.’ <sup>19</sup> jA' dör wes s'wöbla kè wawër es! jÌ dör ibua'ie, íyi me'rka ka' ñe' ki e' ö ka' tö ibatse'wé e'? <sup>20</sup> Yi tö ttè mé ka' ñe' wa, ese kè ku' ttè muk ka' ñe' è wa, ñies ie' tso' ttè muk qos ì tso' iki e' wa. <sup>21</sup> Yi tö ttè mé Skëköl wé wa, ese kè ku' ttè muk Skëköl wé è wa. Ñies ie' tso' ttè muk Skëköl serke ee e' wa. <sup>22</sup> Yi tö ttè mé ká jai wa ese tso' ñies ttè muk Skëköl kulé wa. Ñies itso' ttè muk Skëköl wák tkër ikulé ki e' wa.

<sup>23</sup> “jA s'wöbla'uk ttè dalöiëno wa wakpa, a fariseowakpa, wéstela ina a' ta! jA' e' ò suluë! Käköla tso' iëno chkè a kiè menta ena anís ena comino ese qos tsá meke a' tö Skëköl a. E' dör buaë erë ttè dalöiëno e' bua'ie kè dalöiè a' tö. E' dör sene yësyësë, ena ñi saü er siarë wa ena erblö Skëköl mik mokí kè ilo'yeta'. Ñies e' qos dalöiök a' kawöta. <sup>24</sup> jA' dör wes sulaiökwakpa wöbla kè wawër es! E' dör wes a' tö schö'wak wöppée tá a, erë kameio maléwa a' tö wa'ñe, kè ittse'ne a' wa.

<sup>25</sup> “jA s'wöbla'uk ttè dalöiëno wa wakpa, a fariseowakpa, wéstela ina a' ta! jA' e' ò suluë! A' dör wes a' tka' qos pa skueke a' tö ikikke è es. A' wër buaë erë a' er suluë. A' dör akblökwakpa. A' ki s'yamipa íyi qos kianettsa a' è a. <sup>26</sup> jA fariseowakpa, a' dör wes s'wöbla kè wawër es! Tka' ttö skuöö kewe, es ñies ikikke pa sune.

<sup>27</sup> “jA s'wöbla'uk ttè dalöiëno wa wakpa, a fariseowakpa, wéstela ina a' ta! jA' e' ò suluë! A' dör wes pö pateule saruruë es. Ese wër buaë ikikke, erë ishua s'nu diché tso' taië, e' dör ná suluë. <sup>28</sup> A' dör wes pö ese es, a' e' ò tö a' dör pë' buaë yësyësë, erë a' er dör suluë. A' dör e' ökwakpa.

<sup>29</sup> “jA s'wöbla'uk ttè dalöiëno wa wakpa, a fariseowakpa, wéstela ina a' ta! jA' e' ò suluë! A' tö Skëköl ttekölpa bak ká iaiaë e'pa pö yuekene pa'ali. Ñies ì yué a' tö as s'ser yësyësë bak e'pa kè chöwa a' éna, ese kitkeke a' dör buaë. <sup>30</sup> E' dalewa a' icheke: ‘Sa' tkópa sa' yépa bak ká iaiaë e'pa kéwö ska' ta, e'ma kè sa' wa ie'pa sini'kune Skëköl ttekölpa ttökulur.’ <sup>31</sup> Mik e' cheke a' tö, eta a' e' chökëka tö a' dör wépa tö Skëköl ttekölpa kötulur, e'pa aleripa. <sup>32</sup> Wes a' mir e' wa iwënewa tö ì sulu wamblë'mi a' yépa tö ese kí wambleraë a' tö dö ibataie.

<sup>33</sup> “¡A' dör suluë wes tkabè es, wes tkabè ichók es! ¿Wes a' tkömishkar kè wömerpattsa weinuk bö' ké a? <sup>34</sup> Ittsó, ye' tö Skéköl ttekölpa ena s'pattökwakpa ena s'wöbla'ukwakpa ye' ttè wa, esepa patkeraë a' a. Erë a' tö ie'pa welepa tterawa, welepa skà wöterawa a' tö krus mik ttèwa, welepa skà pperaë siarë a' tö ttsa'bata daloie wa a' ñi dapa'wo wé a. Ie'pa yuleraë a' tö iwe'ikeraë a' tö ká wa'ñe. <sup>35</sup> E' kueki s'ser yësyësë kötulur a' yépa tö mik Abel kötwa Caín tö doka mik Zacarías dör Berequías alá e' kötwa a' yépa tö ká' tso' íyi moká Skéköl a e' ena ie' wé e' shusha, e' nuí kos kierane ie' tö a' a. <sup>36</sup> Mokí ye' tö a' a ichè tö s'ser yësyësë kos kötulur a' yépa tö, e' nuí ki a' ena wépa dör wes a' es esepa weirdaë siarë.

*Jesús eriane Jerusalén wakpa dalërmik*

*(Lucas 13.34-35)*

<sup>37</sup> ¡A Jerusalén wakpa, Skéköl ttekölpa kos ttekewa a' tö kekraë! Ñies ittè pakökwakpa patkeke ie' tö a' a, e'pa ttekewa a' tö ák wa. ¡Wekkë ye' erkië tö ye' mú a' dapa'wè e' ska' wes dakro mitchke tö ila'rla dapa'wè ipik dikia es, erë kè a' ki ikiane yé! <sup>38</sup> Ye' ttò ttsó, Skéköl kè tö a' ká kkö'nepaia. <sup>39</sup> Ye' tö a' a ichè tö i'tami a' kè tö ye' suëpaia dò mik ye' dene eta. E' kèwö ska' ta a' tö ye' cheraë: “¡Ayëcha buaë yi datse Skéköl ttò wa e'!”

## 24

*Jesús tö iché tö Skéköl wé olordawa*

*(Marcos 13.1-2; Lucas 21.5-6)*

<sup>1</sup> Jesús e' yéttsa Skéköl wé a ta imía ta ittökatapa de ie' ska' ta Skéköl wé ena u bua'buas skà tso' ipamik, e' kkaché ie'pa tö ie' a. <sup>2</sup> Erë ie' iché:

—Mokí ye' tö a' a ichè tö u kos tso' bua'buas sué a' tö íe, e' olordawa sèraa, iékwö è kè atpa ñi bata ki.

*¿Ì wa sö isuëmi tö ká i' erkewatke?*

*(Marcos 13.3-23; Lucas 21.7-24; 17.22-24)*

<sup>3</sup> E' ukuöki ta ie'pa míyal kabata kiè Olivo ee. Jesús e' tkéser ta ittökatapa de ie' ska' ta ie' è a ichaké:

—Ichó sa' a ¿mik íyi ekkë wamblërmi? ¿Ì wa sö isuëmi tö be' dotkene, ñies tö ká i' erkewatke?

<sup>4-5</sup> Ie' tö ie'pa iuté:

—Tajë pè' datse e' chök tö ie'pa dör ye'. Icherarakitö: ‘Ye' dör wé pairine'bitu idi' wa s'blúie e', ta pè' kiterarakitö tajë. E' kueki a' tso' wösh wa as kè yi tö a' kitö'ù. <sup>6</sup> Ká tajë wakpa ñippöke tajë wì a dià a e' biyó ttseraë a' tö. E' wake' tköraë erë ká i' erwami e' kianeia. E' kueki kè a' tkinuk e' wa. <sup>7</sup> Ká kuá'ki kuá'ki wakpa ñippöraë ñita. Ñies í tö ká wötí'weraë ká wa'ñe. Ñies ká tseë wakpa tteraë bli tö tajë. <sup>8</sup> Erë íyi ekkë kos dör erpa s'tsá weirketke kam ye' döne e' yöki ese. E' dör wes alaköl alá kurketke ta ikirir es.

<sup>9</sup> “A' merdattsa we'ikè. A' ttelurdaë pè' tö. Sulitane tö a' sueraë suluë ye' tté kueki. <sup>10</sup> E' kèwö ska' ta wépa erblé ye' mik, esepa tajë tö ye' waterattsa. Ie'pa ñi sauraë suluë, ñies welepa tö iëltëpa wömerattsa ibolökpa ulà a. <sup>11</sup> Kachökwakpa e' chò tö ie'pa dör Skéköl ttekölpa esepa doraë tajë. Ie'pa tö s'kitö'weraë tajë. <sup>12</sup> Ì sulu kí wamblërdaë tajë shute, e' kueki s'kibiie kè tö imalepa dalëritsepaia. <sup>13</sup> Erë yi e' tkéwa darërëë doka bata ekkë, esepa tsatkërdaë. <sup>14</sup> Ì blúie Skéköl tso' e' tté buaë pakardaë ká wa'ñe as ká ulitane wakpa wa ijcher, e' ukuöki ta ká i' erdawa.

<sup>15</sup> “Skéköl tteköl bak kiè Daniel, e' tö ikit iyëkkuö ki tö ì sulusi tö ì dör batse'r e' ia'wè ñáie, e' dörawa Skéköl wé a iia'ukka ñáie, (yi tso' yëkkuö i' sauk, e' éna iwà anú). Mik e' sué a' tö, <sup>16</sup> eta wépa serke Judea e'pa tkóyalmi kabata a; <sup>17</sup> yi tso' u bata ki\*

\* 24:17 u bata ki: E' kèwö ska' ta ie'pa u tsabata dör kkuëie, e' ki ie'pa shköke.

ešepa tkóshkar kè dökwaṇe wešhke íyi tsúkmi. <sup>18</sup> Ñies yi tso' kaneblök kañikā ešepa kè dökwaṇe wešhke idatsi' yóktša. <sup>19</sup> E' kəwō ska' ta alakōlpa alá kūrketke ena alakōlpa tsu' muke ilà a jwéstela ina ešepa ta! <sup>20-21</sup> S'ditsō weirdaē taiē šuṭe. Mik ká i' yöne dō ikkē ta kè s'we'ikule ekkē, ñies kè s'weirpa aishkuō ta ekkē. E' kueki ikió Skékōl a aš kè iwamblēr a' ta yuēdiō kėska' ö eno diwō a. <sup>22</sup> E' kəwō kè wōópawa Skékōl tō, e'ma kè yi isie atukia ttsē'ka. Erē e' kəwō wöerawaitō, wépa šuṭitbakitō ešepa dalērmik.

<sup>23-24</sup> “Kachökwaṇpa e' kōrakā e' chök tō ie'pa dör wé pairine'bitu idi' wa s'blúie e' ö Skékōl ttekōl wele. E'pa tō i kè or yi a ese weraē s'kitō'woie tō ie'pa ttè dör mokiē. Dō wépa šuṭit Skékōl tō, ešepa mú kitērmi, e'ma ikitērdaē. E' kueki yile tō a' a icheke: 'Isaú, wé pairine'bitu idi' wa s'blúie e' dur íe', ö 'Isaú, ie' dur wìe', e' ta kè a' tō iklō'war. <sup>25</sup> Ittsó, íyi ekkē biyó chétkeyō a' a keweie. <sup>26</sup> E' kueki mik ie'pa tō icheke a' a: 'Isaú, wé pairine'bitu idi' wa s'blúie e' tso' ká wé kè yi serku' ee', eta' a' kè minuk isaúk. Mik ie'pa tō icheke a' a: 'Isaú, ie' tso' íe blēulewa', eta' kè a' tō iklō'war. <sup>27</sup> Ye' dör S'ditsō Alà, mik e' dene, eta' sulitane tō isueraē wes alá wōñar tō ká olo ppèe ká wa'ñe e' suēsō es. <sup>28</sup> Sulitane wa ijcher tō wé óló daparke taiē, ee ilè nu tēr. Es ñies mik ye' dene, eta' sulitane wa ijcherdaē.

*Jesús dōrane olo ta' taiē*

*(Marcos 13.24-37; Lucas 17.26-30,34-36; 21.25-33)*

<sup>29</sup> “S'weine e' kəwō tka, e' bet diwō wōtuirdawa, ñies si'wō kè wōñarpaia. Bėkwō darolordaē ena i kōs tso' ká jaì a e' wōtirdaē. <sup>30</sup> Eta' sulitane tō íyi sueraē ká jaì a iwà kkachoie tō ye' dör S'ditsō Alà, e' datsene bet. Ká ulitane wakpa suardaē taiē e' yöki, ie'pa iuraē taiē ta bet ie'pa tō isueraē tō ye' datse kashuk a mò a diché ta' taiē olo ta' taiē. <sup>31</sup> Duk blardaē taiē ta ye' biyöchökwakpa patkeramiyō wépa šuṭitbakitō, ešepa dapa'ukka ek tsiní ème. Ie'pa tō iyuleraē ká wa'ñe dō wé ká i' bata erkerō ee ena wé ká jaì bata erkerō ee.

<sup>32</sup> “A' e' wōbla'ú ttè ikkē wa iwà saú higo klō wa: Mik iulatska tso' ulölōla ena erpa iköyök tskirdoka, eta' a' wa ijcher tō duas dewatke tsinet. <sup>33</sup> Es ñies mik a' tō isuē tō íyi ekkē wamblērke, eta' a' wa ijchenú tō ye' datskene, e' diwō dewatke tsinet. <sup>34</sup> Moki ye' tō a' a ichè tō íyi ekkē wamblērdaē wépa dör wes a' es ešepa kam erwa e' yöki. <sup>35</sup> Kashuk ena ká i' erdawa, erē ye' ttè michoē e' kè erpawa yēs.

<sup>36</sup> “Erē e' kəwō e' diwō kè jcher yi wa. Skékōl biyöchökwakpa tso' ká jaì a, e'pa kè wa ijcher, ñies ye' dör Skékōl Alà e' kè wa ijcher. S'yé è wa ijcher.

<sup>37</sup> “Ye' dör S'ditsō Alà, mik e' dene eta' e' kəwō dör wes Noé kėska' es. <sup>38</sup> E' kėska' ta kam di' taiē tkō e' yöki, ie'pa tso' chkök, di'yök, šenukwa wes kekraē es dō mik Noé dewa ikanò bērie e' a eta. <sup>39</sup> Erē ie'pa kè ku' ipanuk yēs eta' di' dettsa taiē ie'pa ki, e' tō ie'pa ulitane ttélur. Es itkōraē mik ye' dör S'ditsō Alà e' dene eta. <sup>40</sup> E' kəwō ska' ta wēm bōl tso' kaneblök ese ekōl mira iwā ta iēkōl atdaē. <sup>41</sup> Alakōlpa bōl tulur ák wawök, ese ekōl mira iwā ta iēkōl atdaē.

<sup>42</sup> “E' kueki a' tso' erki. A' kè wa ijcher tō diwō wekkē a' Kékōl dōrane. <sup>43</sup> A' wa ijcher buaē tō u wák mú wa ijcher tō wekkē akblökwak datse, e'ma kè ikapöpawa iyōki, kè itō kawō mepa yi a dökwa íyi ekiblök. <sup>44</sup> Es ñies ye' dör S'ditsō Alà, e' datskene mik a' kè ku' ye' panuk eta, wes akblökwak es. E' kueki a' tso' erki.

*Kanè méso buaē ena kanè méso suluē e' tté*

*(Lucas 12.41-48)*

<sup>45</sup> “Kanè méso yēsýēsē kabikeitsō buaē, ese merakā iwōkir tō imalepa kuebluie ie'pa tiök kekraē mik kè iku' e' dalewa. <sup>46</sup> Iwōkir dene ta ikuéitō iwakanéuk wes iyēneia es, e' ta ayēcha e' dör buaē ie' a. <sup>47</sup> Moki ye' tō a' a ichè tō kanè méso ese merakaitō ie' wa íyi tso' kōs e' kuebluie. <sup>48</sup> Erē kanè méso ñe' dör suluē tō ibikeitsé tō kè iwōkir dōpane bet.



<sup>49</sup> E' kuëki ie' tö imalepa ppémi. Ñies ie' chkémi, blo' yémi bloblopa ta. <sup>50</sup> Erë idiwö ena ikéwö kè wa ie' ku' ipanuk, eta iwökir dörane <sup>51</sup> ta iwe'ikeraitö siarë wömerattsä weinuk e' ökwakpa ta. Ie'pa iurarak siarë, ikà blardaë iweir kuëki.

## 25

*Busipala dökä dabop e' tté*

<sup>1</sup> “Ï blúie Skéköl tso' e' ta itköraë wes itka ulabatsè a es. Busipala dökä dabop e' e' yélur ibö'wöla wa wëm ulabatsöke, e' ñaletsuk. <sup>2</sup> Busipa skël e'pa dör kabikeitsöta' buaë esepa, erë imalepa skël kè dör es. <sup>3</sup> Wépa kè kabikeitsöta' buaë e'pa wa ibö'wöla è mí, kè wa bö'wö diò kí mîne. <sup>4</sup> Erë wépa kabikeitsöta', e'pa wa ibö'wöla mí, ñies idiö kí mírak iwä. <sup>5</sup> Erë wëm ulabatsöke, e' kè dè' bet, iwötkënekä e' kuëki. E' dalewa busipa shtrine ta ikapolur. <sup>6</sup> Ká shaböts ta ie'pa tö ittse tö iarkerak: ‘ÿWëm ulabatsöke, e' datse! ÿA' yú ñaletsuk!’ <sup>7</sup> Eta busipa kos e' kéka ta ibö'wöla wötskémirakitö. <sup>8</sup> Eta busipa kè kabikeitsöta' e'pa tö iché imalepa a: ‘A' bö'wö diò kakmú sa' a as sa' bö'wöla kè wöitwa.’ <sup>9</sup> Erë ie'pa iüté: ‘Au, sa' tö imé a' a, e' ta kè idöpakä se' ulitane ki. E' kuëki a' yú a' icha taük wé iwatorke ee.’ <sup>10</sup> Eta ie'pa míyal bö'wö diò taük. E' dalewa wëm ulabatsöke e' de, eta wépa wa bö'wö diò kí mí e'pa dewä wëm ulabatsöke e' ta iulabatso wé a ta iwékkö wöténewa. <sup>11</sup> E' ukuöki ta busipa malepa debitu ta ichakeke u'rki: ‘ÿA kékëpa, a kékëpa, ukkö kköppöö sa' a!’ <sup>12</sup> Erë wëm ulabatsöke e' tö ie'pa iüté: ‘Moki ye' tö a' a ichè tö kè ye' wa a' suule.’

<sup>13</sup> “Ye' tö a' a ichè tö a' kè wa ijcher ì kéwö, ì diwö ye' dömine e' kuëki a' tso' erki.

*Inuköl mène wakanewè e' tté*  
(Lucas 19.11-27)

<sup>14</sup> “Ñies ì blúie Skéköl tso' e' ta itköraë wes itka wëm eköl mi'keä kamië ká kuä'ki a ese ta es. Ie' tö ikanè mésopa kié ta iché ie'pa a: ‘Ye' inuköl wakanewé ye' a buaë as ikí klör.’ <sup>15</sup> Ikanè méso eköl a ie' tö inuköl kiè talento\* ese mé mil skël (5.000). Iéköl a ie' imé mil böt (2.000). Eta iskà a ie' tö imé mil et è (1.000). Ie' tö ie'pa a imé kos ie'pa a iwakanewé ekké. E' ukuöki ta ie' mía. <sup>16</sup> Wéne a imène mil skël, e' tö iwakanewé buaë. Ie' tö ikí klö'wé mil dökä skël. <sup>17</sup> Es ñies wéne a imène mil böt, e' tö ikí klö'wé mil dökä böt. <sup>18</sup> Erë wéne a imène mil et, e' mía ta íyök biéitö e' a itö iwökir inuköl wötéwa.

<sup>19</sup> “Ká de taië eta ie'pa wökir dene e' tö ie'pa kié isuöie tö kos ie'pa tö inuköl kí klö'wé. <sup>20</sup> Wéne a imène mil skël, e' de kewe iwökir ska'. Ie' wa inuköl kí debitu mil dökä skël. Ie' iché iwökir a: ‘A kékëpa, be' tö ye' a inuköl me' mil skël, e' kí klö'wéyö mil dökä skël.’ <sup>21</sup> Iwökir tö iché ie' a: ‘E' dör buaë, be' dör kanè méso buaë yësyësë. Inuköl elkela me'yö be' a e' wakanewé be' tö yësyësë. E' kuëki ye' tö íyi skà meraë be' a taië wakanewé. Be' shkówa ttsé'nú buaë ye' ta.’ <sup>22</sup> E' ukuöki ta wéne a imène mil böt e' de ta ichéitö: ‘A kékëpa, be' tö ye' a inuköl me' mil böt, e' kí klö'wéyö mil dökä böt.’ <sup>23</sup> Iwökir tö ie' a iché: ‘E' dör buaë, be' dör kanè méso buaë yësyësë. Inuköl elkela me'yö be' a e' wakanewé be' tö yësyësë. E' kuëki ye' tö íyi skà meraë be' a taië wakanewé. Be' shkówa ttsé'nú buaë ye' ta.’

<sup>24</sup> “Erë kanè méso a imène mil et, mik e' de, eta ie' tö iché iwökir a: ‘A kékëpa, ye' wa ijcher tö be' dör wëm er darërëë ese. Be' tö íyi wösheteke wé kè be' wa ikuatkëne ee. Ñies ì kè dör be' icha ese klö'wékewa be' dör. <sup>25</sup> E' kuëki ye' suane be' yöki dö' ye' tö be' inuköl chöwëwa. E' kuëki be' inuköl blé ye' tö íyök a. I' be' inuköl dene ye' wa be' a.’ <sup>26</sup> Eta iwökir tö iüté: ‘Be' dör kanè méso suluë, bikër taië ese. Be' iché tö ye' tö íyi wösheteke wé kè ye' wa ikuatkëne ee ena ì kè dör ye' icha ese klö'wékewayö, <sup>27</sup> e' ta be' tö ye' inuköl blópa inuköl bló wé a as ee ikí klör. Be' ikaneúpa es, e' ma ye' dene eta ye' inuköl ena ikí

\* 25:15 talento: E' dör ie'pa inuköl kiè denario e' mil teröl (6.000). Denario et e' dör s'kanèblö ká et e' ské ekké.



klöne, e' de ye' ulà a.' 28-29 Età ie' tö iché: 'Wé wà íyi tso' e' a ikí merdaë. Erë wé kè wà ì ku', ì tso' e' wà elkela e' yerattsa iyöki. E' kueki inuköl me'yö ie' a, e' yóttsa ie' ulà a ta imú wé wà itso' doka 10.000 e' a. 30 Età kanè méso suluë i' e' uyóttsa stui ké a, ee pè' suluë iurarak siarë ikà blardaë iweir kueki.'

*Jesús tö ká ulitane wakpa shuleraë*

31 "Ye' dör S'ditsö Alà, e' dörane s'blúie olo ta' tajë ye' biyöchökwakpa qos ta. Mik ye' dene, età ye' e' tkörakā blu' kulé kī ká ulitane wakpa shulök. 32 Ie'pa dapardaë ye' wörki ta ye' tö ie'pa blabatseraë wes iyiwak kkö'nukwak tö obeja ena chibo blabatsè es. 33 S'ser yësyësë esepa dör wes obeja es, ie'pa merawa ye' tö ye' ulà bua'kka. S'ser suluë esepa dör wes chibo es, ie'pa merawa ye' tö ye' ulà bakli'kka. 34-36 Età ye' tö icheraë wépa tso' ye' ulà bua'kka e'pa a: 'Ye' dör a' blú. Ye' yé er bua' ché a' a. Mik ye' du' bli wà, età a' tö ye' dè'; mik ye' bak ersinuk, età a' tö ye' a di' me'; a' kè wà ye' sùule, erë a' tö ye' kiéwà buaë a' u a. Ye' bak datsi' kè ta', età a' tö ye' a datsi' kakme'; ye' bak duök siarë, età a' dè' ye' kimuk; ye' bak wötëulewà s'wöto wé a, età a' dè' ye' sauk. E' kueki a' shkówà ì blúie ye' tso' e' a, e' qos yöulebak a' a kam ká i' yör e' yöki.' 37 Erë s'ser yësyësë e'pa tö ye' a ichakeraë: 'A Skékëpa, sa' kè wà ijcher. ¿Mik sa' tö be' su' tö be' tteke bli tö, e' dè' sa' tö? ¿Mik sa' tö be' su' tö be' tteke ersi tö, e' a di' me' sa' tö? 38 ¿Mik be' dè'bitu sa' u a, kè sùule sa' wà, e' ki'wà buaë sa' tö? ¿Mik sa' tö be' su' datsi' kè ta', e' a datsi' kakme' sa' tö? 39 ¿Mik sa' tö be' su' tö be' duöke ö be' wötëulewà s'wöto wé a, e' sauk sa' dè'?' 40 Età ye' tö ie'pa iuteraë: 'Moki ye' tö a' a ichè tö mik a' tö íyi ekkè buaë o' ye' yamipa siarë ikkëpa a, età e' dör wes a' tö ye' wák a iwè es.'

41-43 "E' ukuöki ta' ye' tö icheraë wépa tso' ye' ulà bakli'kka e'pa a: 'Ye' du' bli wà, erë a' kè wà ye' dène; ye' bak ersinuk, erë a' kè wà ye' a di' mène. Ye' dè' a' ska', kè sùule a' wà, erë a' kè wà ye' kinewà a' u a; ye' bak datsi' kè ta', erë a' kè wà datsi' mène ye' a; ye' bak duök ena wötëulewà s'wöto wé a, erë a' kè dè' ye' sauk. E' kueki a' wömeulettsabak weinuk siarë. A' e' skóttsa ye' yöki. A' yúshka bö' ñar michoë yöule bé ena iklépa we'ikoie e' a.' 44 Erë ie'pa tö ye' a ichakeraë: 'A Skékëpa, e' kè jcher sa' wà. ¿Mik sa' tö be' su' tö be' duöke bli wà? ¿Mik sa' tö be' su' tö be' ersine? ¿Mik be' dè' sa' u a? ¿Mik sa' tö be' su' datsi' kè ta'? ¿Mik sa' tö be' su' duöke ö wötëulewà s'wöto wé a? ¿Mik sa' kè wà be' kimene?' 45 Età ye' tö ie'pa iuteraë: 'Moki ye' tö a' a ichè tö mik a' kè wà íyi ekkè one s'siarëpa ikkëpa a, età e' dör wes kè a' wà ye' wák a ìone es.' 46 S'ser suluë esepa michoë weinuk, erë s'ser yësyësë esepa ser michoë buaë ye' ta."

## 26

*Judiowak wökirpa tö Jesús aleritsé klö'wèwà*

(Marcos 14.1-2; Lucas 22.1-2; Juan 11.45-53)

<sup>1</sup> Mik Jesús tö s'wöbla'wé qos e' one, età ie' tö iché ittökatapa a:

<sup>2</sup> —A' wà ijcher tö böiki se' tö Se' Yépa Yërulune Egipto e' kèwö tkö'weke. E' kèwö ska' ta, ye' dör S'ditsö Alà, e' wömerdattsa ttèwà wötëulewà krus mik.

<sup>3</sup> E' kèwö ska' ta sacerdotepa wökirpa ena judiowak kueblupa ñi dapa'wé sacerdote kibi kiè Caifás, e' u a. <sup>4</sup> Eë ie'pa tö Jesús aleritsé kītō'wè iklō'wōwà ttèwà. <sup>5</sup> Erë ie'pa iché ñi a:

—Kè sō iwamblè Se' Yépa Yërulune Egipto e' kèwö tkö'wekesö e' a as pè' kè shutirka taië.

*Kiö masmas téka alaköl eköl tö Jesús kī*

(Marcos 14.3-9; Juan 12.1-8)

<sup>6</sup> Jesús tso' Betania, Simón kiri'uk lepra bak, e' u a. <sup>7</sup> Ie' tkëriā mesa kī chkök. Età alaköl eköl de ie' ska', e' wà kiö masmas tuè darërëë ese debitu, e' mí ie' wà iukkuö yöule

ák bua'buwa wa ese a. Eta kiò e' tékai<sup>8</sup>tö Jesús wökir ki. <sup>8</sup> Erë mik e' sué ittökäta<sup>8</sup>pa tö, eta ie'pa uluneka<sup>8</sup> ta iché:

—¿Iók kiò se we'ikéwa ie' tö éanas? <sup>9</sup> Iwatormittsa inuköl taië skéie s'siarëpa kimioie.

<sup>10</sup> E' ttsé Jesús tö ta ie' tö iché ie'pa a:

—¿Iók a' tso' alaköl i' tsiriuk? Íyi buaë wéitö ye' a. <sup>11</sup> S'siarëpa tso' kékraë a' shua, erë ye' kè ku' kékraë a' ta. <sup>12</sup> Kiò tékai<sup>12</sup>tö ye' ki ye' kanéwoie kam ye' nu wötërwa e' yöki. <sup>13</sup> Moki ye' a' a ichè tö ká wa'ñe wé Skéköl ttè buaë pakarke, eë ipakardaë ñies tö ie' tö ì buaë o' ye' a. Es e' kè chöpawa yi éna.

*Judas tö Jesús watké*

(*Marcos 14.10-11; Lucas 22.3-6*)

<sup>14</sup> Jesús ttökäta<sup>14</sup>pa dabom eyök kí bö<sup>14</sup>l, e'pa eköl dör Judas Iscariote, e' mia sacerdotepa wökirpa ska' <sup>15</sup> ta ie' tö iché ie'pa a:

—¿Kos a' tö ye' patuëmi Jesús wömottsä a' a?

Eta ie'pa tö inukölchka wöshki mé ie' a dökä dabom mañayök (30). <sup>16</sup> E'tami ie' tö kawö yulémi bua'iewa Jesús wömottsä.

*Jesús tö Judiowak Yépa Yërulune Egipto e' kéwö bata tkö'wé*

(*Marcos 14.12-25; Lucas 22.7-23; Juan 13.21-30; 1 Corintios 11.23-26*)

<sup>17</sup> Kawö kiè Pan Kè Yöule Iwölöwoka Wa\* e' kéwö tsá diwö dewatke. Eta Jesús ttökäta<sup>17</sup>pa de ie' ska' ta ie' a ichaké:

—¿Wé be' ki ikiane tö sa' tö Se' Yépa Yërulune Egipto kéwö tkö'wekesö e' chké kanewé?

<sup>18</sup> Ie' tö ie'pa iüté:

—A' yú Jerusalén, wëm yë' ye' tö a' a e' u a ta ichó ie' a: 'S'wöbla'ukwak be' a ichök ké: Ie' kéwö dökewatke. Ie' datse be' u a kawö tkö'wekesö e' tkö'uk sa' ta.'

<sup>19</sup> Ie'pa tö iwé wes ie' tö ie'pa a iché es ta eë ie'pa tö ichké kanewé.

<sup>20</sup> Mik katuietke, eta ie' tkër mesa ki chkök ittökäta<sup>20</sup>pa dabom eyök kí bö<sup>20</sup>l e'pa ta.

<sup>21</sup> Ie'pa chköke, e' dalewa ie' tö iché ie'pa a:

—Moki ye' tö a' a ichè tö a' eköl tö ye' wömerattsä.

<sup>22</sup> Ie'pa erianeka<sup>22</sup> taië ta ichakémi ie' a eköl eköl:

—A Skékëpa, ¿ye' alè idir?

<sup>23</sup> Ie' tö ie'pa iüté:

—A' tso' ye' ta pan nuuk tka' etkè a ñè, e' eköl ye' wömerattsä. <sup>24</sup> Ye' dör S'ditsö Alà, e' ta itköraë wes itso' kitule Skéköl yëkkuö ki es. Erë wëstela ina yi ye' wömekettsä, e' ta. Buaë idir wëm e' a tö kè ikunúpa.

<sup>25</sup> Eta Judas tö iwömekettsä, e' tö ie' a ichaké:

—A S'wöbla'ukwak, ¿ye' alè idir?

Ie' iüté:

—Be' wák e' chéka.

<sup>26</sup> Ie'pa tso'ia<sup>26</sup> chkök, e' shua pan klö'wéitö ta e' ki wëstela chéitö Skéköl a ta iblatéitö ta iwà tié ie'pa a ta ichéitö:

—Pan se dör ye' chkà, e' ñú a' tö.

<sup>27-28</sup> E' ukuöki ta tka' a vino tso', e' klö'wéitö ta e' ki wëstela chéitö Skéköl a ta iméitö ie'pa a ta ichéitö:

—Vino se dör ye' pé. Ye' tterawa e' pé tërdaë, e' wa ttè pa'ali me' Skéköl tö e' wà de. Ye' ttèwa, e' wa s'tso' taië e'pa nuì olo'yarmi. E' kueki a' ulitane tö ikak yö. <sup>29</sup> Ye' tö a' a ichè tö vino kè yepaiayö dò mik ì blúie ye' Yé tso' e' kéwö de da'aie, eta iska yeraneyö a' ta.

*Pedro tö icheraë tö ie' kè wa Jesús suule*

(*Marcos 14.26-31; Lucas 22.31-34; Juan 13.36-38*)

\* 26:17 Kawö kiè Pan Kè Yöule Iwölöwoka Wa: Kawö e' tkö'weke Israel aleripa dò ká kul, e' diwö tsá kièrakitö Se' Yépa Yërulune Egipto e' kéwö.

<sup>30</sup> Età ie'pa tö Skëköl ttseittsé, e' ukuöki ta ie'pa míyal Olivo kébata a. <sup>31</sup> Jesús tö iché ie'pa a:

—I' nañewe a' ulitane tköyaldaë. A' ye' meraat ekörä. E' dör wes itso' kitule Skëköl yëkkuö ki es, e' tö iché: 'Obeja kkö'nukwak ttewaraëyö ta obeja pordami wì a dià a.†

<sup>32</sup> Erë mik ye' ttéwā shkënekane, e' ukuöki ta ye' miraë Galilea a' yöki kéwe.

<sup>33</sup> Pedro tö ie' a iché:

—Eré ie'pa ulitane be' memiat ekörä, erë ye' kè tö be' mepaat.

<sup>34</sup> Ie' tö iüté:

—Moki ye' iché be' a tö i' nañewe, kam dakro ar, e' yöki be' icheraë mañatökicha tö be' kè wā ye' suule.

<sup>35</sup> Pedro tö ie' a iché:

—Eré ye' ttëmiwarakitö be' ta, erë kè ye' ichepa tö kè ye' wā be' suule.

Età ie'pa ulitane ttöke es ème.

*Jesús tté S'yé ta Getsemaní*

*(Marcos 14.32-42; Lucas 22.39-46)*

<sup>36</sup> E' ukuöki ta Jesús mía ittökatapa ta ká kiè Getsemaní eë. Ie' tö iché ie'pa a:

—A' atë tulur íe, e' dalewa ye' mía wishké ttök S'yé ta.

<sup>37</sup> Età ie' wā Pedro ena Zebedeo ala'r böi, e'pa mítser e' ta. Età ie' erianemi chkenewami taië. <sup>38</sup> Ie' tö iché ie'pa a:

—Ye' eriane taië ttsësquia ye' ttëwamiitö ekkë. A' e' tsúat íe ye' ta, kè a' kapökwa.

<sup>39</sup> Ie' mía wishké ta ie' e' kéutër wöwakköt iski ta ikiéitö Skëköl a i' es: "A yéwö, ì tköraë ye' ta e' dör wes íyi bacha'bachaë yéwasö es. E' mú ulà a ye' yërmittsa, e'ma ye' yóttsa iulà a. Erë kè iwar wes ye' ki ikiane es, iú wes be' ki ikiane es."

<sup>40</sup> E' ukuöki ta ie' dene wé ittökatapa tulur eë ta ie'pa kuéitö kapötulur ta ichéitö Pedro a:

—¿A' kè wā kapèwā wöklöne dò hora ek è ye' ta? <sup>41</sup> Kè a' kapökwa. A' ikió Skëköl a as ì sulu tö a' erkiöweke ese kè e' alòka a' ki. Moki a' éna ì buaë wak, erë a' diché kè dè'ka iwà uk, e' kuëki a' a darërëë idir.

<sup>42</sup> Età ie' skà míane wishké ttökne S'yé ta ta ichéitö: "A yéwö, ì tköraë ye' ta e' mú ulà a ye' yërmittsa, e'ma ye' yóttsa iulà a. Erë iú wes be' ki ikiane es."

<sup>43</sup> Mik ie' dene, età ie'pa kuéneitö kapötulur; ie'pa wöbla surirkewa kapè wā e' kuëki.

<sup>44</sup> Ie' skà míane wishké ttök S'yé ta, i' ta idare mañatökicha. Età itténe wes itté kuaë es.

<sup>45</sup> E' ukuöki ta ie' dene wé ie' tö ittökatapa mañal méat eë ta ie' tö iché ie'pa a:

—¿A' kapötuluria enukeia? Ye' dör S'ditsö Alà, e' diwö dekatke mëttsa pè' sulusipa ulà a. <sup>46</sup> A' e' kóka, yi tö ye' wömekettsa, e' dotke i' ta. Mishka ie' panuk.

*Jesús klö'wéwā ibolökpa tö*

*(Marcos 14.43-50; Lucas 22.47-53; Juan 18.2-11)*

<sup>47</sup> Jesús tso'ia ttök, e' dalewa ittökatapa dabom eyök ki böi (12), e'pa eköl kiè Judas, e' debitu pè' ta taië. E' wakpa debitu tabè ki ena kal wölö ki. Ie'pa patkë'mi sacerdotepa wökirpa ena judiowak kuëblupa tö. <sup>48</sup> Judas dör iwömëttsa e' tö ie'pa a iyé'bak: "Wé shkë'wekeyö wöalattsè wa, e' dör ie', iklö'úwā a' tö." <sup>49</sup> Età ie' de Jesús ska' ta iché ia:

—¿A S'wöbla'ukwak!

Ta iwöalattséwaitö. <sup>50</sup> Jesús tö iché ie' a:

—A yami, ì uk be' de, e' ú.

Età pè' datse Judas ta e'pa de Jesús ska' ta iklö'wéwarakitö.

<sup>51</sup> Età ie'pa iëter eë Jesús ta e'pa eköl tö itabè yéttsa ta e' wa sacerdote kibi e' kané méso kukuöña téttsa. <sup>52</sup> Jesús tö iché ie' a:

† 26:31 Zacarías 13.7

—Wépa ñippöke tabè wa, esepa dörakā tabè kkò a. E' kuëki be' tabè blówane ikkuölit a. <sup>53</sup> ¿Be' kè wā ijcher tö ye' ki ikiane, e'ma ye' tö ikiëmi ye' Yé a ta ie' tö ibiyöchökwakpa tajë döka 70.000 e' patkëmi ye' tsatkök? <sup>54</sup> Erë ye' tö ikié es, e' ta ¿wes Skëköl yëkkuö ki itso' kitule e' wà tkömi? E' tö ichè tö ì suluë tköke ye' ta e' kawöta tkök es.

<sup>55</sup> Etā ie' tö ichaké pë' ekkëpa a:

—¿Ì kuëki a' bite ye' klö'ukwā tabè ki kal wölö ki wes akblökwakpa klö'wëwā es? Këkraë ye' bak e' tkökser Skëköl wé a s'wöbla'uk, erë a' kè wā ye' klönewā. <sup>56</sup> Erë ì tköke i' e' dör as iwà tkò wes Skëköl ttekölpa tö ikitatbak Skëköl yëkkuö ki es.

E' wöshā ta ie' ttökatapa qos tkayalmi tö iméat ekörla.

*Jesús demi ie'pa wā Caifás wörki*

*(Marcos 14.53-65; Lucas 22.54-55,63-71; Juan 18.12-14,19-24)*

<sup>57</sup> Etā pë' tö Jesús klö'wëwā e'pa tö ie' tsémi sacerdote kibi kië Caifás e' u a. Ee s'wöbla'uk ttè dalöiëno wa wakpa ena judiowak kuëblupa qos daparke. <sup>58</sup> Erë Pedro datse ie'pa itöki kamië döttsa sacerdote kibi e' u pamik, ee ie' e' tséat tkër Skëköl wé shkëkipa ta isaük tö ì tkömi.

<sup>59</sup> Etā sacerdotepa wökirpa ena judiowak wökirpa malepa tö ttè yuleke Jesús kkatoie as ie'pa tö iwömüttsā ttëwā. <sup>60</sup> Tajë pë' de ie' kkatök kachè wa, erë kè yi wā ie' kkatëne wé' ie' wömottsā ttëwā. Bata ekkë ta idebitu böi ikkatök kachè wa, <sup>61</sup> e'pa tö iché:

—Wëm se tö iyë' tö ie' a Skëköl wé olorwami, e' yuëkamineitö ká mañat shuā.

<sup>62</sup> Sacerdote kibi e' kéka ta ichaké Jesús a:

—¿Kè be' ie'pa iuteku' yës? ¿Ñe' ie'pa be' kkateke, e' dör ì?

<sup>63</sup> Erë Jesús siwā'blëwā ie'pa yöki. Etā sacerdote kibi tö ichaké ie' a:

—Ichó sa' a yësyësë Skëköl chók e' wörki tö ¿be' dör ie' Alà? ¿Be' dör wé pairine'bitu idi' wa sa' blúie e'?

<sup>64</sup> Ie' iüté:

—Wes be' iché es idir. Ye' tö ichè a' a tö ye' dör S'ditsö Alà, e' sueraë a' tö tkërka Skëköl diché ta' tajë iyi ulitane tsata e' ulà bua'kka dalöiërta' tajë. Ñies ye' datskene kashuk a mò a e' sueraë a' tö.

<sup>65</sup> Etā sacerdote kibi e' datsi' jchéé ikkachoie tö iluneka ta ichéitö:

—Ì ché ie' tö, e' wa ie' tso' Skëköl chök suluë. ¿lie se' ki ikkatökwakpa kí kiarmiia? Ttè suluë chéitö, e' ttsétkesö. <sup>66</sup> ¿Ima a' tö ibikeitsè?

Ie'pa tö iüté:

—Ie' wák iane iwiie, e' kuëki ikawöta ttëwā.

<sup>67</sup> Etā ie'pa wirituöke Jesús wö ki ta itekerakitö tajë. Wëlepa tö ippé iwö ki <sup>68</sup> ta ichérakitö:

—Be' dör wé pairine'bitu idi' wa s'blúie e', e'ma sa' a ichóka ¿yi tö be' ppé?

*Pedro tö iblé tö kè ie' wā Jesús suule*

*(Marcos 14.66-72; Lucas 22.56-62; Juan 18.15-18,25-27)*

<sup>69</sup> Pedro tkëriā sacerdote kibi e' u pamik ta alaköl kanëblöke u e' a, ese de eköl ie' ska' ta ichéitö ia:

—Be' ñies dör Jesús Galilea wak e' klé eköl.

<sup>70</sup> Erë ie' tö iblé sulitane tso' e'pa kukua. Ie' tö iché:

—Ye' kè éna iane tö ì chök be' tso'.

<sup>71</sup> Ie' mía ukkö tkër kañika ee ta alaköl skà tö isuë e' tö iché imalepa a:

—Ie' i' dör Jesús Nazaret wak e' klé eköl.

<sup>72</sup> Etökichane Pedro tö iska ché:

—¿Ye' iché Skëköl wörki tö ye' kè wā wëm e' suule!

<sup>73</sup> E' kuölö ta wépa tso' ee e'pa debitu ie' ska' ta ichéitö:

—Moki be' dör ie'pa éltë wak, be' ttò ie'pa ttò ttsëë.

<sup>74</sup> Etā ie' iché:

—Skëköl wörki yö ichè tö jwëm e' kè sūule ye' wā! Kè idör es, e'ma as ye' kichatër.  
E' wöshäë dakro ane, <sup>75</sup> ta ì ye' Jesús tö ie' a e' anewā ie' éna, e' dör i': 'Kam dakro ar, e' yöki be' tö icheraë mañatökicha tö be' kè wā ye' sūule.' Eta ie' e' yéttsa mía kañika ta ee ie' ié taië siarë.

## 27

*Jesús mítser Pilato wörki**(Marcos 15.1; Lucas 23.1-2; Juan 18.28-32)*

<sup>1</sup> Mik ká ñine, eta sacerdotepa wökirpa ena judiowak kuëblupa kos ñi dapa'wéka ileritsök tö “¿wes sö Jesús ttewami?” <sup>2</sup> Ie'pa wā imítser moulewā mé Pilato a. Pilato tkë'ka Roma wökir kibi tö Israel aleripa ké wökirie.

*Judas e' ttéwa*

<sup>3</sup> Judas tö Jesús wato'ttsabak, mik e' wā ijchenewā tö moki Jesús wömenettsa ttéwa, eta e' tö ie' eriwéne taië. E' kuëki ie' mía sacerdotepa wökirpa ena judiowak kuëblupa ska' ta inuköl mène ie' a mañayök (30), e' méneitö ie'pa a. <sup>4</sup> Ie' iché ie'pa a:

—Ì sulu wambléyö. Wëm kè ki ì sulu nuí ta', ese wöméttsayö ttéwa.

Erë ie'pa tö ie' iüté:

—jE' kè ki sa' tkine! jE' wërke be' wöki!

<sup>5</sup> Eta ie' inuköl e' uyémine Skëköl wé shua ta imía e' kuli' skéka ta, es ie' e' ttéwa.

<sup>6</sup> Eta sacerdotepa wökirpa tö inuköl e' shtéka ta ichéakitö:

—Inuköl i' dör s'kötulewā ské, e' kuëki ñá idir. Kè iiënuwā inuköl tso' Skëköl a iyi kanéwoie ese a.

<sup>7</sup> E' kuëki ie'pa ttè mé ñi a tö ká tauttsasö iwa yuè pöie pè' datse ká bánet blénewā íe, esepa nu blóie. Eta ká kiè Skauchka Yuökwak Ké e' tué ie'pa tö. <sup>8</sup> Ie'pa tö ká e' tué s'kötulewā ese ské wa, e' kuëki dö ikké ta ká e' kiè Ká Tone S'kötulewā Ské Wa. <sup>9</sup> Iyi ekké kos tka wes Skëköl tteköl kiè Jeremías tö iyé'atbak es. Ie' tö iyé': “Israel aleripa tö iské méka inukölchka wöshki doka dabom mañayök (30), ekké klö'wé ie'pa tö, <sup>10</sup> ta e' wa ie'pa tö ká kiè Skauchka Yuökwak Ké e' tué wes Skëköl tö ye' a iyé' es.”\*  
Es Jeremías tö iyé'at.

*Pilato tö Jesús a ichaké**(Marcos 15.2-5; Lucas 23.3-5; Juan 18.33-38)*

<sup>11</sup> Jesús mítser ie'pa wā Pilato dör ká e' wökir e' ska' ta e' tö ie' a ichaké:

—¿Be' dör judiowak blú?

Ie' iüté:

—Tó, wes be' iché, e'ma es idir.

<sup>12</sup> Sacerdotepa wökirpa ena judiowak kuëblupa tö ie' kcateke Pilato a, erë Jesús kè wa ie'pa iüténe yës. <sup>13</sup> E' kuëki Pilato tö ie' a ichaké:

—Ie'pa tö be' kcateke taië ¿e' kè ttséne be' wā?

<sup>14</sup> Erë ie' kè wā iüténe yës, e' tö Pilato tkiwéwā darërëë.

*Jesús métttsa ttéwa Pilato tö**(Marcos 15.6-20; Lucas 23.13-25; Juan 18.38-19.16)*

<sup>15</sup> Judiowak Yépa Yërulune Egipto, e' kéwö wa Pilato wöblar s'wötëulewā s'wöto wé a ese yöktsa eköl émine wé kiane pè' ki e'. <sup>16</sup> E' kéwö ska' ta wëm tso' wötëule eköl kiè Barrabás kkekauleka taië judiowak shua. <sup>17</sup> E' kuëki mik ie'pa e' dapa'wé taië, eta Pilato tö ie'pa a ichaké:

—¿S'wötëulewā wéne kiane a' ki tö ye' tö iyéttsane a' a: Barrabás ö Jesús kiekerakitö wé pairine'bitü idi' wa s'blúie e'?

\* 27:10 Jeremías 19.1-13; 32.6-9

<sup>18</sup> Ie' tö isuéwā tö ukyëne wa sacerdotepa wökirpa tö Jesús me'ttsa ie' ulà a. E' kuëki ie' tö ie'pa a ichaké es.

<sup>19</sup> Ie' tkërkaia s'shulo kulé ki, etā ilaköl tö ichök patké ie' a: “Nañewe ye' tö Jesús kébisuë, e' tö ye' tsiriwétka taië, e' kuëki be' kè e' tiuk wëm ser yësyësë e' ta.”

<sup>20</sup> Erë sacerdotepa wökirpa ena judiowak kuëblupa tö pè' ulitane dakiñé ta ichéraitö: “Ikió Pilato a tö Barrabás ómine erë Jesús ttówa.”

<sup>21</sup> Pilato tö ie'pa a iskà chakéne:

—¿Wëpa böi i', wé kiane a' ki tö ye' tö ièmine?

Ie'pa iiuté:

—¿Barrabás ómine!

<sup>22</sup> Ie' tö ie'pa a ichaké:

—Etā ¿wes Jesús kiekerakitö wé pairine'bitu idi' wa s'blúie e' wèmiyö?

Ie'pa iiuté:

—¿Ittówa wötëulewā krus mik!

<sup>23</sup> Ie' tö ichaké ie'pa a:

—¿ì kuëki? ¿ì sulu wambléitö?

Erë ie'pa kí arke:

—¿Iwötówa krus mik!

<sup>24</sup> Ie' tö isué tö ie' kè a Jesús tsatkënuw wës, pè' kí arkeka taië, e' kuëki ie' tö di' tsuk patké ta iulà skué ie'pa ulitane wörki iwà kkachoie tö ie' kè iane iwiie. Ie' iché:

—Wëm i' patkeraëyö ttëwā erë e' nuí kè ku' ye' ki. E' nuí ardaë a' ulitane ki.

<sup>25</sup> Etā ie'pa ulitane iiuté:

—Sa' ena sa' ala'r kos as e' ki inuí ar.

<sup>26</sup> Etā Barrabás émi ie' tö. E' ukuöki ta ie' tö Jesús ppök patké tsa' bata daloie wa, ta iméttaitö inippökwakpa ulà a wötëwā krus mik.

<sup>27</sup> Etā Pilato ñippökwakpa wā Jesús mítser s'wökirpa wé kiè Pretorio e' pamik ta ee ie'pa tö ñippökwakpa malepa kos kiéttsa dapa'wè ek tsiní Jesús pamik. <sup>28</sup> Ie'pa tö Jesús datsi' yéttsa ta datsi' mat daloshdalosh ese wa ipaiéraitö blu'ie. <sup>29</sup> Ñies dika'kicha yué wöshkiie, e' tkékarakitö iwökir ki blu'ie. Kuaköl wölö méraitö ie' a iulà bua'kka wës blu' es. E' ukuöki ta ie'pa e' tkéwā kuchë ki ie' wörki iwayuoie ta ichéraitö:

—¿Be' dör judiowak blú! ¿Be' kikökka sa' tso'!

<sup>30</sup> Ñies ie'pa wiritué iki taië, ta kuaköl wölö a'tser iulà a, e' yéttсарakitö, e' wa ippéraitö taië iwökir ki. <sup>31</sup> Mik iwayué one, etā datsi' mat daloshdalosh, e' yéttсарakitö ta iwák datsi' iékanerakitö iki ta imítserak iwā wötëwā krus mik.

### *Jesús wötëne krus mik*

*(Marcos 15.21-32; Lucas 23.26-43; Juan 19.17-27)*

<sup>32</sup> Mik ñippökwakpa wā Jesús dami e'pa e' yélur ee, etā wëm eköl kué ie'pa tö ñalā ki kiè Simón, e' dör Cirene wak. Ie' ké ie'pa tö Jesús krus tsukmi.

<sup>33</sup> Mik ie'pa de ká kiè Gólgota ee (Gólgota wà kiane chë s'wökirdiche), <sup>34</sup> etā ie'pa tö vino shutuule kapöli bacha'bachaë wa, ese mé Jesús a yè. Erë mik ie' tö ipattsé, etā ie' kè wā iyanewa.

<sup>35</sup> Mik ie'pa tö iwöté krus mik one, e' ukuöki ta ie'pa iné ñi ma'woie suè tö wes ie'pa tö ie' datsi' blatemi ñi a. <sup>36</sup> E' ukuöki ta ie'pa e' tuluéser ikkö'nuk as kè yi itsatkò. <sup>37</sup> Kaltak ki itso' kitule tö iché: “I' dör Jesús dör judiowak blú e'”, e' batséwarakitö ie' wökir tsaka. E' kit ie'pa tö iwà kkachoie tö ì nuí ki ie' wötënewā krus mik.

<sup>38</sup> Etā ñies wëpa böi akblökwakpa wötëwarakitö krus mik, eköl iulà bua'kka, eköl iulà bakli'kka. <sup>39</sup> Pè' tköke ee e'pa tö icheke sulu, iwökir wötiukerak iwöa, es ichekerakitö:

<sup>40</sup> —¿Be' se tö Skëköl wé tkekettsa, ta ká mañatk è ta be' tö iyuékane! Mokí be' dör Skëköl Alà, e'ma be' e' tsatkó, be' e' ówa krus se mik.



<sup>41</sup> Es ñies sacerdotepa wökirpa ena s'wöbla'uk ttè dalöiëno wa wakpa ena judiowak kuëblupa, e'pa tö ie' wayueke. Ie'pa ñi a ichöke:

<sup>42</sup> —O'kapa tsatkéitö erë ie' wák kè a e' tsatkër. Moki ie' dör Israel aleripa blú, e'ma as ie' e' òwa krus wí mik, e' iarma ta sa' erblömi ie' mik. <sup>43</sup> ¿Ie' kè wa sa' a iyëne tö ie' dör Skëköl Alà? ¿Ie' erblöke Skëköl mik e' ki ikiane, e'ma as e' tö itsatkò!

<sup>44</sup> Dò ñies akblökwakpa böi wötëulewa krus mik ie' o'mik, e'pa tö ie' cheke sulu.

#### *Jesús duowa*

*(Marcos 15.33-41; Lucas 23.44-49; Juan 19.28-30)*

<sup>45</sup> Mik diwö de bata a, eta ká mía ttsetseë ká wa'ñe, dö tsálij diwö de mañat ekkë. <sup>46</sup> E' wösha ta Jesús aneká taië ta ichè: “Elí, Elí, ¿lemá sabactani?” (e' wà kiane chè: A ye' Këköl, a ye' Këköl, ¿iók be' ye' we'ikéttsa?)

<sup>47</sup> Mik welepa tso' ee, e'pa tö ttè e' ttsé ta ichérakitö:

—Wëm wí tso' Skëköl tteköl bak kiè Elías, e' kiök.

<sup>48</sup> Eta ie'pa eköl tunemi tö suiyök nuwéka vino shköshkö wa, e' tkéka kuaköl bata ki ta itkéwa ie' kkò mik as ikuyòitö. <sup>49</sup> Erë imalepa tö iché ie' a:

—Imúat bër, ipanusö suè tö Elías datse itsatkök.

<sup>50</sup> Eta ie' skà anene taië ta iwiköl émiitö. Es iduowa. <sup>51</sup> E' wösha ta Skëköl wé a ie'pa wa datsi' buririë ese shukuar u blatoie e' jchënane kákke döttsa iski. Ñies ká wötí'neká ta ák blublu tskirolone. <sup>52</sup> Eta pö kköburolone ta s'batse'rpa blërulune, esepa taië shkenekane <sup>53</sup> e' yélur ipö a. Ie' du'wa shkenekane, e' ukuökí ta ie'pa de Jerusalén dör ká batse'r ee, ta taië pè' tö ie'pa sué.

<sup>54</sup> Roma ñippökwa eköl dör capitán ena imalepa tso' ie' ta Jesús kkö'nuk, mik e'pa tö ká wötí'ne ena ì qos tka ee e' sué, eta ie'pa tkirulune ta iché ñi a:

—Moki wëm wí dör Skëköl Alà je'.

<sup>55</sup> Ñies alakölpa manetwa Galilea Jesús ta ikimuk, e'pa tso'ñak taië ie' kí sauk kamië.

<sup>56</sup> E'pa eköl dör María Magdala wak, iëköl dör María dör Santiago ena José e'pa mi, iëköl dör Zebedeo ala'r, e'pa mi.

#### *Jesús nu wötëne pö a*

*(Marcos 15.42-47; Lucas 23.50-56; Juan 19.38-42)*

<sup>57</sup> Wëm eköl tso' kiè José Arimatea wak, e' dör inuköl blú, ñies ie' dör Jesús klé eköl. Mik ká tuirketke, <sup>58</sup> eta ie' mía Pilato ska' Jesús nu kiök. Pilato tö imuk ké ie' a. <sup>59</sup> Ie' wa imítser patrëwa datsi' ukuö bua'buwa saruru maneneë ese wa. <sup>60</sup> E' ukuökí ta ie' tö ibléwa ákuk bine pa'alí iwák nu blóie e' a. Ie' tö ák bërre trémi dö pö kkò mik, e' wa iwötéwa. E' ukuökí ta imía. <sup>61</sup> Erë María Magdala wak ena María skà, e'pa atë tulur pö kkò wösha.

#### *Jesús nu blëne e' kkö'né Shkëkipa tö*

<sup>62</sup> E' bule es e' dör eno diwö, eta sacerdotepa wökirpa ena fariseowakpa míyal ñita ttök Pilato ta. <sup>63</sup> Ie'pa iché ia:

—A këképa, sa' éna ianewa tö mik kachökwak e' bak ttsë'ka, eta ie' tö iyë' tö ie' duowa e' ki ká de mañat eta ishkerdakane. <sup>64</sup> E' kuëki sa' tö be' a ikié tö pö kkö'nuk patkó döká ká mañat dö' ittökatapa dö inú ekiblökwa ta i' ukuökí ta ichënerakitö sulitane a tö ishkenekane. E' wérakitö es, e' ta e' dör kachè taië shutë tkòka ikache kewe e' tsata.

<sup>65</sup> Pilato tö iché ie'pa a:

—Se a' wa ñippökwa tso', a' yú ikkö'nuk bua'iewa qos a' a ikkö'narmi ekkë.

<sup>66</sup> Eta ie'pa mía pö a ta iyi batséwarakitö pö kkò mik as kè yi mi'waiä ee. Ie'pa tö ñippökwa méat pö kkö'nuk, eta iwákpa míyal.

#### *Jesús shkenekane*

*(Marcos 16.1-8; Lucas 24.1-12; Juan 20.1-10)*

<sup>1</sup> Eno diwö tka, e' bule es e' dör domingo e' ñirketke ta María Magdala wak ena María skà, e'pa míyal Jesús pö sauk. <sup>2</sup> E' wöshä ta Skëköl biyöchökwak eköl tso' ká jai a e' de, eta í tka darërëe. Ie' míä pö a ta ák bastkër e' tréuitö bänet ta ie' e' tkéser iki. <sup>3</sup> Ie' wöñarke dalölöe wes alá wöñar es, idatsi' damiwa saruruë wes suiyök es. <sup>4</sup> Mik ñippökwakpa tö e' sué, eta ie'pa tkirulune painékarak siwa' arulune suane è wa, atë wes s'duowa es. <sup>5</sup> Eta Skëköl biyöchökwak tö iché alakölpä a:

—Kè a' suanuk. Ye' wa ijcher tö a' tso' Jesús kötwä krus mik, e' nu yulök. <sup>6-7</sup> Erë ye' de a' a ichök tö kè iku' íe, ishkenekane wes ie' tö iyë'atbak es. A' shkó wé ie'pa tö inú me'wa e' tò weblök. E' ukuöki ta a' yú bet ibiyó chök ittökatapa a: 'Ie' shkenekane, e' mir a' yöki kewe Galilea, ee a' tö isueraë.'

*Jesús e' kkaché alakölpä a*

<sup>8</sup> Eta alakölpä míyal shkaläläe. Ie'pa suane erë ñies ie'pa ttsë'ne buaë. Ie'pa tunemirak ibiyó muk Jesús ttökatapa a. <sup>9</sup> E' wöshä ta Jesús de dur ie'pa wörki ta ie'pa shké'wéitö. Ie'pa dewä ie' ska' ta ie'pa e' tuléwa kuchë ki ta iklö paklö'wéwarakitö ta idalöierakitö. <sup>10</sup> Ie' tö iché ie'pa a:

—Kè a' suanuk. A' yú ichök ye' ttökatapa a tö a' yú Galilea ta ee a' tö ye' sueraë.

*Ñippökwakpa patoule kachök*

<sup>11</sup> Alakölpä míyal, e' dalewa ñippökwakpa tso' pö kkö'nuk e'pa welepa míyal Jerusalén ta ì kos tka e' pakéraitö seraq sacerdotepa wökirpa a. <sup>12</sup> Sacerdotepa wökirpa míyal ttök judiowak kueblupa ta. Ie'pa ttè mé ñi a: "Sú sö ñippökwakpa patuë inuköl taië wa as ie'pa ichò wes se' ki ikiane es." <sup>13</sup> Ie'pa tö iché ñippökwakpa a:

—A' ichó tö nañewe a' kapolur e' dalewa Jesús ttökatapa debitu e' wa inú mítser. <sup>14</sup> A' wökir kibi wa ijchenewa, e' ta sa' ttöraë ie' ta a' tsatkoie. Es kè ì tköpa a' ta.

<sup>15</sup> Eta ñippökwakpa tö inuköl e' klö'wé ta ichéraitö wes ie'pa ké ichök es. Dò i'ñe ta kachè e' pakekeia judiowak tö.

*Jesús tö ittökatapa patké ie' ttè pakök ká ulitane wakpa a*

*(Marcos 16.14-18; Lucas 24.36-49; Juan 20.19-23)*

<sup>16</sup> Eta Jesús ttökatapa dabom eyök kí eköl (11), e'pa míyal Galilea kabata a wé ie' tö ie'pa a iyë' ee. <sup>17</sup> Mik ie'pa tö isué, eta ie'pa tö idalöié, erë ie'pa welepa tö ibikeitséka bötböt. <sup>18</sup> Ie' de ie'pa ska' ta ichéitö:

—Skëköl tö ye' tkë'ka íyi ulitane wökirie ká jai a ena ká i' a. <sup>19</sup> E' kuëki a' yú ká ulitane a s'yuök ye' ttökatapaie. Ie'pa wöskuó S'yé ena ye' dör ilà ena Wiköl Batse'r e' ttò wa. <sup>20</sup> Ñies ttè kos wà dalöiök a' ka' ye' tö, e' wa ie'pa wöbla'ú as ñies ie'pa tö iwà dalöiö. Ye' ser michoë a' ta kekraë. Eré ká i' enewatke, erë ye' kè tö a' mepaat a' wakpa è.

## Jesús Tté Buaë Kit San Marcos tö Marcos

Yi tö yëkkuö i' kit e' kiè Marcos. Ñies ie' kiè Juan Marcos. Ie' kè dör Jesús ttekölpa tsá dabom eyök k<sub>1</sub> bö<sub>l</sub> e' pa eköl. Erë wele tö ibikeitsè tö ie' dör Pedro klé. E' kueki pë' taië tö ibikeitsè tö Pedro tö ie' k<sub>1</sub>me' yëkkuö i' shtök. Ñies ie' pa ibikeitsè tö Marcos bak senuk Jerusalén, e' kueki ì o' Jesús tö ena ì yë'itö e' ane buaë ie' éna.

Jesús dör Skëkö<sub>l</sub> alà e' dë'bitu ká i' k<sub>1</sub> e' tö íyi buaë o' taië sulitane a ie' pa wörki. E' kit Marcos tö yëkkuö i' k<sub>1</sub>. Ie' k<sub>1</sub> ikiane tö sulitane wa ijcherwa. Ñies wes Jesús weine taië ena iwötënewa krus mik e' paké ie' tö taië. Jesús weine taië ena idu'wa, e' ukuöki ishkenekane, e' kueki idiché ta' taië tkòka se' bolök Satanás tsata. I'ñe ta' kakraë ie' tso' se' kimoie, e' kiane Marcos k<sub>1</sub> tö se' wa ijcher. E' kueki ie' tö yëkkuö i' kit.

Marcos i' tté tso' kitule Hechos 12.12,25; 13.5,13; 15.36-39 ena 2 Timoteo 4.11 e' k<sub>1</sub>. Eré kè s'wa ijcher yësyësè tö mik ie' tö yëkkuö i' kit, erë se' taië tö ibikeitsè tö ikititö Jesús kune' e' k<sub>1</sub> duas de dabom skeyök (50) ena dabom kuryök (70) e' shu ulat.

### *Juan s'wöskuök tö s'patté*

(Mateo 3.1-12; Lucas 3.1-9,15-17; Juan 1.19-28)

<sup>1</sup> Jesucristo dör Skëkö<sub>l</sub> Alà, e' tté buaë dör i' es.

<sup>2</sup> Ká iaiäe Skëkö<sub>l</sub> tteköl kiè Isaías e' tö ikitat yëkkuö k<sub>1</sub>, e' ichè i' es:

Skëkö<sub>l</sub> tö ichè: “Ye' tso'tke ye' tté pakökwak patkök be' yöki kewe, be' ñalé yuök.\*

<sup>3</sup> Ká sir poë wé kè yi serku' ee ie' ttöraë aneule:

‘A' er mane'ú Skëkö<sub>l</sub> datse e' yöki,

e' dör wes ñala yuèsö yësyësè ie' yöki es.’ †

Es Isaías tö iyë'at.

<sup>4</sup> Es Juan S'wöskuökwak tso' ká sir poë wé kè yi serku' ee, e' tö s'pattémi i' es: “A' er mane'ú Skëkö<sub>l</sub> a as a' nuì olo'yòitö a' k<sub>1</sub> ta' a' e' wöskuólor iwà kkachoie.” <sup>5</sup> Jerusalén wakpa ena ká malepa tso' Judea e' wakpa kos döke ie' ttöke e' ttsök. Ie' pa e' wamblò sulu kos e' chekekarakitö ta' Juan tö iwöskuekelor di' kiè Jordán e' a.

<sup>6</sup> Juan datsi' yöule kameio köyök wa; ikipamo yöule iyiwak kkuölit wa. Ie' chke dör ditski ena bulali. <sup>7</sup> Ttè pakeke ie' tö ie' pa a' i' es: “Ye' itöki idatse eköl, e' dör kékëpa taië ye' tsata, e' kueki ie' klökkuö kicha è kè wötsënanuk ye' siarla e' a. <sup>8</sup> Ye' tö a' wöskueke di' a, erë ie' tö a' ierawa Wiköl Batse' r a.”

### *Juan tö Jesús wöskué*

(Mateo 3.13-17; Lucas 3.21-22)

<sup>9</sup> E' kèwö ska' ta' Jesús e' yéttsa Nazaret atë Galilea ee, e' de Jordán ta' ee Juan tö ie' wöskué. <sup>10</sup> Mik ie' wösune e' e' duékane di' a, e' wösha ta' ie' isué tö ká jai kköbunane ta' Skëkö<sub>l</sub> Wiköl bite' ie' k<sub>1</sub> nuböl sù. <sup>11</sup> Etá ttò ttsëne datse ká jai a, e' tö ichè: “Be' dör ye' alà dalër taië ye' éna, e' wër ye' wa buaë shute.”

### *Satanás tö Jesús erkiöwé ì sulu wamblök*

(Mateo 4.1-11; Lucas 4.1-13)

<sup>12</sup> E' ukuöki ta' Skëkö<sub>l</sub> Wiköl tö Jesús ké shkökmi ká sir poë wé kè yi serku' ee. <sup>13</sup> Ee iyiwak sulusi tso' taië. Ee ie' sené ká dabom tkëyök (40), e' dalewa Satanás tö ie' erkiöwé ì sulu wamblök. Skëkö<sub>l</sub> biyöchökwakpa tö ie' k<sub>1</sub>mé.

### *Jesús tö ie' kanè wawémitke Galilea*

(Mateo 3.1-12; Lucas 3.1-9,15-17; Juan 1.19-28)

\* 1:2 Malaquías 3.1 † 1:3 Isaías 40.3

<sup>14</sup> Juan klö'wéwarakitö wötéwā s'wōto wé a, e' ukuōki tā Jesús míā Galilea Skéköl ttè buaē e' pakök. <sup>15</sup> Ie' s'patteke i' es: “Ì blúie Skéköl tso' e' kēwō dewatke tsinet. E' kueki a' er mane'ú ie' a tā ie' ttè buaē e' klö'ú.”

*Jesús tö nima klö'ukwakpa döka tkël e'pa kié*

*(Mateo 4.18-22; Lucas 5.1-11)*

<sup>16</sup> Mik Jesús shkōrami batsōri kiè Galilea e' kkōmik, etā wēpa bōl suéitō. E'pa dōr Simón ena iël Andrés. Ie'pa dōr nima klö'ukwakpa. Ie'pa tso' ikla' uyōk batsōri a nima klö'woie.

<sup>17</sup> Jesús tö ie'pa a iché:

—A' shkó ye' tā. A' yueraëyō s'ditsō klö'uk ye' a ye' ttökataie.

<sup>18</sup> E' bet tā ie'pa tö ikla' tuléat tā míyal ie' tā.

<sup>19</sup> E' wí'kie Jesús tö Santiago ena iël kiè Juan e'pa sué. Ie'pa dōr Zebedeo ala'r. Ie'pa tulur kanò a ikla' wōyuök. <sup>20</sup> E' wōshā tā Jesús tö ikiémirak e' tā. Etā ie'pa tö iyé méat ikanè mésopa tā kanò shūā tā imíyal Jesús tā.

*Jesús tö aknama tré'wéshkar wēm eköl a*

*(Lucas 4.31-37)*

<sup>21</sup> Ie'pa demi ká kiè Cafarnaúm eē. Eno diwō a Jesús tkawā judiowak ñi dapa'wō wé a tā ie' tö s'wōbla'wémítke. <sup>22</sup> Ie' tö s'wōbla'weke ttè mokī diché tā' taië ese wa. E' kè dōr wēs s'wōbla'uk ttè dalöiëno wa wakpa tö s'wōbla'weke es. E' kueki e' tö wēpa tso' ittsök e'pa tkiwéwā. <sup>23</sup> Etā eē wēm eköl tso' e' a wimblu sulusi tso' e' tö iché aneule:

<sup>24</sup> —A Jesús Nazaret wak, ¿ie be' tso' sa' tsiriük? ¿Be' debitū sa' eukwa? Ye' wā be' suule. Ye' wā ijcher tö be' dōr yi dōr batse'r patkë'bitū Skéköl tö e'.

<sup>25</sup> Jesús tö wimblu e' uñé:

—¿Be' siwā'blówā, be' e' yóttsa wēm sē a!

<sup>26</sup> Wimblu sulusi tö wēm siwā' éwa tā ianekā taië tā ie' yéttsa ia. <sup>27</sup> Sulitane tkinewa iweblök tā iñi chakérak:

—¿Wí dōr i? ¿Ie' s'wōbla'weke ttè pa'alí wa ena diché wa dò wimblupa sulusi kéitō e' yöktsā tā ittō iutérakitō ekkē!

<sup>28</sup> E' bet tā ie' tté bunekā Galilea kōs a.

*Jesús tö Simón yāk bua'wéne*

*(Mateo 8.14-15; Lucas 4.38-39)*

<sup>29</sup> Mik ie'pa e' yélur ñi dapa'wō wé a tā Jesús míā Simón ena Andrés e'pa u a. Santiago ena Juan mí ie' tā. <sup>30</sup> Eē Simón yāk me'r ká' kī kiri'weke duè dalölö tö, e' ché ie'pa tö Jesús a. <sup>31</sup> Etā ie' e' skéwā tā iklö'wéitō iulà a tā ikimé e' tköksēr. E' bet tā duè dalölö ie' éwa tā ie' e' kékā ilè yulök ie'pa a ñè.

*Jesús tö taië s'kirirke esepa bua'wéne*

*(Mateo 8.16-17; Lucas 4.40-41)*

<sup>32</sup> Ká tuine diwō míwatke tā s'kirirke ena wēpa a aknama tso' esepa kōs debiturak iwā Jesús ska'.<sup>†</sup> <sup>33</sup> Ká e' wakpa kōs e' dapa'wékā ukkö a. <sup>34</sup> Etā ie' tö duè ulitane bua'wéne pē' tso' taië e'pa a. Ñies aknamapa taië tré'wéyalitō. Erë aknamapa wā ijcher yi dōr ie', e' kueki ie' kè wā kawō mène ie'pa a ttök.

*Jesús tö Skéköl ttè paké judiowak ñi dapa'wō wé a*

*(Lucas 4.42-44)*

<sup>35</sup> Ká ñirketke ià ttsettseë, tā Jesús e' kékā míā bánet wé kè yi ku' ese ska' ttök S'yé tā. <sup>36</sup> Etā Simón ena iwapiepa míyal ie' yulök. <sup>37</sup> Mik ikuéwarakitō, etā ie'pa ie' a iché:

—Sulitane tso' be' yulök.

<sup>38</sup> Erë ie' tö ie'pa iuté:

<sup>†</sup> 1:32 Diwō e' dōr eno diwō, e' kueki s'kirirke kōs kè dé' ie'pa wā Jesús ska' ñiwe. Ie'pa kè a kawō tā' kaneblök eno diwō a. Ie'pa a tā íyi ö yile tsèmi e' dōr kanè. E' kueki ie'pa tö s'kirirke tsémi Jesús ska' diwō míwatke e' ukuōki, ekkē eno diwō erkerō e' kueki.

—Mishka ká tso' tsinet tsinet ese a. Nies ee ye' ké Skéköl ttè pakök, eseie ye' dë'bitu.  
<sup>39</sup> Es Jesús shkë ká tso' Galilea e' kos a ttè pakök judiowak ñi dapa'wo wé kos a, ñies aknama trë'ukyal.

*Wëm eköl kiri'weke lepra tö e' bua'wéne Jesús tö*

*(Mateo 8.1-4; Lucas 5.12-16)*

<sup>40</sup> Wëm eköl kiri'weke lepra tö, e' e' skéwa Jesús o'mik ta ie' e' tkéwa kuchë ki ta iché ia:

—Be' ki ikiane, e' ta be' a ye' buarmine as ye' batse'rne.

<sup>41</sup> Jesús tö ie' sué er siarë wa ta ikéwaitö ulà wa ta ichè:

—Tó, ye' ki ikiane. Be' dene batse'r.

<sup>42</sup> E' wöshä ta wëm buanene batse'nene. <sup>43-44</sup> E' ukuöki Jesús tö ie' a iché:

—Ye' ttò ttsó, ì tka be' ta e' kè char yi a. Be' yú e' kkachök sacerdote a. Ì muk Moisés tö a' ka' e' batse'woie e' tsúmi mè Skéköl a iwà kkachoie.

<sup>45</sup> Erë wëm míä ta ie' e' kéka ì tka ita e' pakök sulitane a. E' kueki Jesús kè a e' kkayënuwé wé pé' tso' taië ese ska'. Ie' kawöta e' tsukat kañika wé kè pé' ku' ese ska', erë ká wa'ñe wakpa datse ie' ska'.

## 2

*Wëm eköl kraulewa e' bua'wéne Jesús tö*

*(Mateo 9.1-8; Lucas 5.17-26)*

<sup>1</sup> Ká wekkë alè kuöki ta Jesús dene Cafarnaúm. Mik pé' wa ijchenewa tö ie' tkër u a, <sup>2</sup> etä taië ie'pa e' dapa'wé ie' ska' kè chë'kaia weshke, kè chë'kaia ukkò a ekkë. Ie' tso' Skéköl ttè pakök ie'pa a. <sup>3</sup> E' dalewa wëpa döka tkël wa wëm kraulewa kè karka debitu eköl ka'la ki. <sup>4</sup> Erë taië s'tso', e' kueki kè wës ie'pa tkömi weshke Jesús ska'. E' kueki ie' tsäka u tsäbata jchéé\* ie'pa tö ta iduè émirakitö enaë e' a dötsä iski. <sup>5</sup> Mik Jesús tö isué tö mokí ie'pa erblé ie' mik, etä ie' iché ikirirke e' a:

—A alà, ì sulu kos wamblébö, e' nuí olone be' ki.

<sup>6</sup> Erë s'wöbla'uk ttè dalöiëno wa wakpa welepa tulur ee, e'pa ibikeitsè: <sup>7</sup> “¿ì kueki wëm wí ttò es? Skéköl è a se' nuí olo'yarmi. Ì ché ie' tö e' wa ie' tso' Skéköl chök suluë.” <sup>8</sup> Erë ì bikeitsök ie'pa tso' e' suéwa Jesús tö bet. E' kueki ie' tö ie'pa a ichaké:

—¿ì kueki a' tö ibikeitseke es? <sup>9</sup> Ye' tö s'kraulewa dió bua'wëmine as ishköne, e' ta ¿wës a' tö iklö'wëmi tö ye' kè a inuì olonuk iki? <sup>10</sup> Ye' dör S'ditsö Alà, sú e' tö a' a ikkachè tö ye' wa kawö ta' ká i' a nuí olo'yoie.

Etä ie' tö iché wëm kraulewa e' a:

<sup>11</sup> —Be' e' kóka, be' ka'la kóka ta be' yúne u a.

<sup>12</sup> Bet ta ie' e' kéka, ika'la kéka, ta imía sulitane wörki. E' tö ie'pa kos tkiwéwa ta ie'pa tö Skéköl kikéka taië ta ichéraitö:

—Kè se' wa íyi wíse suule yës.

*Jesús tö Leví kié ittökataie*

*(Mateo 9.9-13; Lucas 5.27-32)*

<sup>13</sup> E' ukuöki ta Jesús míane batsöri kkömik ta pé' e' dapa'wéka ie' ska' ta ie' tö ie'pa wöbla'weke. <sup>14</sup> Ie' domitkö ta ie' tö inuköl shtökwak Roma wökirpa a e' sué eköl tkër ikaneblöke e' wé a. E' dör Leví dör Alfeo aladulaköl. Ie' tö iché ia:

—Be' shkó ye' ta ye' ttökataie.

Etä ie' e' kéka ta imía Jesús ta.

<sup>15</sup> E' ukuöki Jesús tso' chkök Leví u a. Pé' shköke tsakië Jesús ta, e' kueki inuköl shtökwakpa ena pé' sulusipa skà tulurñak chkök ie' ena ittökatapa ta. <sup>16</sup> S'wöbla'uk ttè dalöiëno wa wakpa welepa dör fariseowakpa. Mik e'pa wele tö Jesús sué tö ichköke pé' esepa ta, etä ie'pa tö ichaké ittökatapa a:

\* 2:4 u tsäbata jchéé: Ie'pa u tsäbata dör kkuëie, e' ki ie'pa shköke.

—ǂlók a' wöbla'ukwak chköke inuköl shtökwakpa ta ena pë' sulusipa skà ta?

<sup>17</sup> Jesús tö ittsé ta ichéitö iarak:

—Wépa kè kirirku' esepa kè ki s'kapeyökwak kiane, erë wépa kirirke esepa ki ikiane. Ye' kè dë'bitu wépa e' ttsò tö ie'pa serke yësyësë esepa kiök. Ye' dë'bitu pë' sulusipa kiök.

*ǂ kuëki Jesús ttökatapa kè batsöta'*

*(Mateo 9.14-17; Lucas 5.33-39)*

<sup>18</sup> Etökicha ta Juan S'wöskuökwak ttökatapa ena fariseowakpa tso' batsök, eta pë' welepa de Jesús ska' ta ichakéraitö ie' a:

—Juan S'wöskuökwak ttökatapa ena fariseowakpa klépa batsöke. ǂ kuëki be' ttökatapa kè batsö?

<sup>19</sup> Jesús tö ie'pa iüté:

—Mik s'kiule ulabatsè kéwö tkö'uk, eta ǂwes ie'pa batsömi wëm ulabatske e' tso'ia ie'pa ta e' dalewa? Ie' tso'ia ie'pa ta, e' dalewa ie'pa kè batsöpa. <sup>20</sup> Erë ikéwö döraë eta ie' mi'datser ie'pa yöki. E' je' ta ie'pa batsöraë.

<sup>21</sup> “Kè yi tö datsi' këchke wöyuepawa datsi'tak pa'alì wa, datsi'tak pa'alì wöklöneka, e' tö datsi' këchkela shukuëe ta ikì jchèe taië. <sup>22</sup> Nies kè yi tö vino pa'alì tepaka iyiwak kkuölit yöule ibloie ese këchke a. Itékasö es, e' ta mik ibacha'nebitu, eta ikkuölit jchèemiitö. Es vino ena ikkuölit weirwami éme. E' kuëki vino pa'alì tekeka ikkuölit pa'alì a.”

*Jesús ttökatapa tö trigowö butsé eno diwö a*

*(Mateo 12.1-8; Lucas 6.1-5)*

<sup>23</sup> Etökicha ta eno diwö a, Jesús dami trigo shua ta ittökatapa tö trigowö butsémi ishkörami e' dalewa katè. <sup>24</sup> Fariseowakpa tö ie' a ichaké:

—Sa' ttò ttsó, ǂ kuëki be' ttökatapa tso' i kè kéwö ta wè eno diwö a ese uk?

<sup>25</sup> Erë ie' iüté:

—Etökicha ka iaiaë mik David ena iklépa du' bli wa ta kè ie'pa wa i dami ñè, eta i o' ie' tö ǂe' kè aritsule a' wa Skököl yëkkuö ki? <sup>26</sup> Mik Abiatar dör sacerdote kibi, e' kéwö ska' ta David dewa Skököl wé a ta pan meule Skököl a e' ñéitö ta nies iméitö iklépa a ñè. Sacerdotepa è a pan ese kéwö ta' ñè. Erë a' éna iane tö i o' David tö e' kè dör suluë Skököl wöa.

<sup>27</sup> Ie' tö ikì ché:

—Eno diwö meneat s'ditsö kimoie, erë s'ditsö kè yöne eno diwö è batseitsök. <sup>28</sup> E' kuëki ye' dör S'ditsö Alà, e' wa kawö ta' ichoie tö i dör buaë ö i dör suluë wè eno diwö a.

### 3

*Wëm ulà siulewa e' pakè*

*(Mateo 12.9-14; Lucas 6.6-11)*

<sup>1</sup> Jesús skà dewane judiowak ñi dapa'wo wé a, ta ee wëm tkër eköl ulà etk siulewa.

<sup>2</sup> Ie'pa éna ie' kkatàk ilè ki, e' kuëki ie'pa tso' ie' weblök tö wëm ñe' bua'wèmine ie' tö eno diwö a. <sup>3</sup> Ie' tö iché wëm ulà siulewa e' a:

—Be' e' kókà ta be' e' duóser íe sulitane wöshaë.

<sup>4</sup> Ie' tö ie'pa a iché:

—ǂl kéwö ta' se' a wè eno diwö a: i buaë ö i suluë? ǂS'tsätök ö s'ttökwa?

Erë ie'pa siwa'bléwa ie' yöki. <sup>5</sup> Ie' tö ie'pa weblé kësik wa. Ie'pa er darërëe e' tö ie' eriawé. Ie' iché wëm a:

—Be' ulà shulöö.

Ta ie' ulà shulée ta ibuanene. <sup>6</sup> Eta fariseowakpa ponemi, e' bet ta ie'pa ñi dapa'wéka Herodes klépa ta ileritsök Jesús ttowaie.

*Taië pë' tso' batsöri kkömik*



<sup>7</sup> Età Jesús míá ittökátapa tã batsöri kkömik tã taië Galilea wakpa míyal ie' tã. <sup>8</sup> Ñies pë' tso' taië ee datse Jerusalén ena Judea ká malepa a. Ñies ie'pa datse Idumea ena Jordán wishet ena ká wé Tiro ena Sidón ate ee. Ie'pa tö ì kos weke Jesús tö e' tté ttsë' e' kueki ie'pa de iweblök. <sup>9-10</sup> S'kirirke taië bua'wétke Jesús tö, e' kueki imalepa taië e' uyökeka ie' kî ikökwa. E' kueki ie' tö iché ittökátapa a tö kanò tsúbitu tértke dö' ie'pa tö ye' tuèwa darërë.

<sup>11</sup> Mik wépa a wimblupa sulusi tso' esepa tö ie' sué, etã ie'pa e' tulélur kuchë kî ie' wöa tã iarkerak:

—¡Be' dör Skëköl Alà!

<sup>12</sup> Erë ie' tö ie'pa a iché kësik wa:

—¡Kè ye' tté pparka!

*Jesús tö ittekölpa tsá dabom eyök kî böi e'pa shushtë*  
(Mateo 10.1-4; Lucas 6.12-16)

<sup>13</sup> E' ukuöki tã Jesús míá kabata a. Etã wépa kiane ie' kî kiè, e'pa kiéitö tã ibiterak ie' ska'. <sup>14</sup> Ie' tö ie'pa shushtë dabom eyök kî böi shkök ie' tã ena patkëmi ie' tté pakök. E'pa kiè mékãitö ittekölpa tsá. <sup>15</sup> Ie'pa a diché méitö aknama trë'ukyal. <sup>16</sup> Ie'pa kiè i' es: Simón, e' kiè mékãitö Pedro; <sup>17</sup> Santiago ena iël Juan, e'pa dör Zebedeo aladulakölpa, e'pa kiè skà mékãitö Boanerges (kiè e' wà kiane chè “wépa dör wes alá es”); <sup>18</sup> Andrés, Felipe, Bartolomé, Mateo, Tomás ena Santiago dör Alfeo alà; ena Tadeo, Simón Celote, <sup>19</sup> ena Judas Iscariote tö Jesús wömeketsã aishkuö tã ibolökpa a e'.

*Jesús ena Beelzebú*  
(Mateo 12.22-32; Lucas 11.14-23; 12.10)

<sup>20</sup> E' ukuöki tã Jesús dewa u a ittökátapa tã. Etã taië pë' ñi dapa'wékane kè wa ie'pa chko ekkë. <sup>21</sup> Mik Jesús yamipa ekkã wã ijchenewa tö wes ie' tso', etã ie'pa de itsukmi iyërke tö ie' alineka e' kueki.

<sup>22</sup> Ñies s'wöbla'uk tté dalöiëno wa wakpa datse Jerusalén e'pa tö Jesús ché i' es: “Beelzebú dör bé e' tö wëm wí éna ká chöwéwa, e' diché wa ie' tö aknama trë'wekeyal.”

<sup>23</sup> Etã Jesús ikiëttsarak tã ikleítö iarak i' es: “¿Wes Satanás e' trë'ùshkarmi? <sup>24</sup> S'serke ká etkë kî e' ñi blabatsélor ñippök ñita, kè wöklör, e' tã ie'pa wákpa mir wa'k ème. <sup>25</sup> Ñies ñi yamipa e' kéka ñippök ñita, kè wöklör, e' tã ie'pa mir wa'k ème. <sup>26</sup> Es ñies Satanás klépa mú ñi blabatsélor ñippök ñita, e' tã idiché wöarwami tã ierdawarak.

<sup>27</sup> “Kè yi mi'pawã wëm diché taië ese u a ie' íyi ekiblök kam ie' tö iwák maüwa e' yöki. Es ème íyi ekiblërmi.

<sup>28</sup> “Moki ye' tö a' a ichè tö ì sulu kos wambleke a' tö, ñies Skëköl cheke a' tö sulu kos e' nuí olo'yèmiitö a' kî. <sup>29</sup> Erë yi isie tö Wiköl Batse'r ché suluë, ese kè kî inuí olorpa, itso' iki kekraë.”

<sup>30</sup> Ie'pa iyë' tö wimblu sulusi tö ie' éna ká chöwéwa e' kueki Jesús tö e' ché ie'pa a.

*Jesús mì ena iëlpa de iweblök*  
(Mateo 12.46-50; Lucas 8.19-21)

<sup>31</sup> E' ukuöki tã Jesús mì ena iëlpa ena ikutapa e'pa debitu ie' yulök, erë ie'pa kè dë'wa weshke. Ie'pa tö ikiök patké. <sup>32</sup> Pë' tulur ie' pamik e'pa tö iché ia:

—Be' mì ena be' ëlpa ena be' kutapa e'pa shkò be' weblök.

<sup>33</sup> Ie' iiüté:

—¿Yi dör ye' mì ena ye' ëlpa ena ye' kutapa?

<sup>34-35</sup> Wépa tulur ie' pamik e' suéitö èk tã ichéitö:

—Yi isie tö ì kiane Skëköl kî ese wé, ese dör wes ye' ël ena ye' kutà ena ye' mì es. E' kueki ie'pa ikképa dör wes ye' mì ena ye' ëlpa ena ye' kutapa es.

## 4

*Të kuatkökwak tté**(Mateo 13.1-9; Lucas 8.4-8)*

<sup>1</sup> Etökicha ta Jesús s'wöbla'wémitke batsöri kkömik. Pë' dapane taië ipamik, e' kueki ie' e' iéka kanò tkërki tsinet ese etò a. Ee ie' e' tkéser ie'pa wöbla'uk. Ie'pa kos atë batsöri kkömik ie' ttò ttsök. <sup>2</sup> Eë ie' tó ttè tsakjè kleé ie'pa a iwöbla'woie, e' et dör i' es: <sup>3</sup> “A' tó ittso. Etökicha ta wëm eköl míä të kuatkök ppé ululu ème\* <sup>4</sup> Mik ie' tso' iwö ppök, eta ditsöwö wele anewa ñala ska' ta dù debitu tó ikatéwa. <sup>5</sup> Ditsöwö wele anewa áklo a wé íyök kè ta' taië ese ska'. Íyök kè ta' taië, e' kueki bet ta itskine. <sup>6</sup> Erë kè iwí kicha ta' taië, e' kueki mik ðiba aneka iki, eta isinewa. <sup>7</sup> Ditsöwö wele anewa dika'chka shua. Dika'chka ena ditsöwö talane ñita, erë dika'chka e' aléka iki, kè wöne. <sup>8</sup> Erë ditsöwö wele ane íyök bua'buakí ese tskine talane wöne buaë. Wele wöne doka dabom mañayök (30) elka elka, wele dabom teryök (60), wele cien eyök (100).”

<sup>9</sup> Eta ie' tó ie'pa a iché: “¡A' éna ye' ttò ttsak, e'ma ikukuebló bua'ie!”

*Ì kueki Jesús tó s'wöbla'weke kleaule**(Mateo 13.10-17; Lucas 8.9-10)*

<sup>10</sup> Mik Jesús atë dur ekörla, eta ittökatapa dabom eyök kí böi ena iklépa welepa skà de ie' ska' ta ichakérakitö ia:

—Ttè wà kleébö, ¿ima e' wà dör?

<sup>11</sup> Ie' ie'pa iüté:

—“Ì blúie Skököl tso' e' tté bléulewa, e' kéwö meneat a' a iwà jchenoie. Erë pë' tso' taië kè éna ye' tté klö'wak, esepa a ye' ikleeke <sup>12</sup> as ie'pa tó iweblò je', erë kè ie'pa a iwà wër, ñies as ie'pa tó ittso je', erë kè ie'pa a iwà ar as kè ie'pa er mane'ù ta inu kè olor ie'pa kí.”†

*Të kuatkökwak tté e' wà paké Jesús tó**(Mateo 13.18-23; Lucas 8.11-15)*

<sup>13</sup> Eta ie' tó ie'pa a iché: “Ttè kleéyö ñe' wà kè ane a' éna, e' ta ¿wes a' éna imalepa wà armi? <sup>14</sup> Wé tó ditsöwö kuatké, e' dör wé tó Skököl tté pakeke ese. <sup>15</sup> Pë' welepa tso' e'pa ta itkömi wes ditsöwö arwa ñala kí es. Esepa tó Skököl tté ttsé erë bet Satanás de iska' ta Skököl tté yéttsa ier a. <sup>16</sup> Welepa skà ta itkömi wes ditsöwö arwa áklo a es. Esepa tó Skököl tté ttsé ta iklö'wérakitö ttsé'ne buaë wa. <sup>17</sup> Erë ie'pa kè wí kicha ta' taië, e' kueki ie'pa tó iklö'wé ekuölö è. Mik ie'pa weinemitke Skököl tté kueki, eta ie'pa anemine bet. <sup>18</sup> Welepa skà ta itkömi wes ditsöwö arwa dika'chka shua es. Esepa tó Skököl tté ttsé, <sup>19</sup> erë ie'pa tó íyi tso' ká i' kí ese bikeitseke kibiie. Ie'pa er me'rie inuköl kí ena ì skà tso' ká iki tó s'ttsé'weke buaë ese kí. Ese kos tó Skököl tté kui'wéwa ie'pa er a ta kè idé'ttsa buaë wes ikiane es. <sup>20</sup> Erë welepa skà ta itkömi wes ditsöwö arwa íyök bua'buakí es. Esepa tó Skököl tté ttsé ta iklö'wé ta iwà dettsa buaë wes ikiane es. Ie'pa dör wes íyi kuá wör buaë es. Wele wöne doka cien eyök (100), wele dabom teryök (60), wele dabom mañayök (30).”

*Bö'wö tté**(Lucas 8.16-18)*

<sup>21</sup> Eta ie' tó iché iarak: “Kè yi tó bö'wö tskepaka ta ibléwaitö kalkuö dikia ö ka' dikia. E' skéie itkekekaitö kákke ká ñi'woie. <sup>22</sup> Es ñies kè ì ku' bléulewa kè jchenukwa aishkuö ta. Ese kos kkayërdaë. <sup>23</sup> ¡Yi éna ye' ttò ttsak, e'ma ikukuebló bua'ie!”

<sup>24-25</sup> Ñies ichéitö: “Yi e' yuak buaë ye' tté wa, ese a ikí meraëyö as íéna iwà ar buaë. Erë yi kè e' yuak ye' tté wa, ese yöki ì bikeitséitö tó ane ie' éna, ese kos yërdattsane. E'

\* 4:3 të kuatkök ppé ululu: Ie'pa wöblar të kuatkök wö ppélur të kos e' kí. † 4:12 Isaiás 6.9-10

kuęki ì cheke ye' tō a' a e' kukuebló. A' tō iwé es, e' tã a' éna iarmi buaë, ñies Skėköl tō a' kimerae as ikí ar a' éna.”

### Íyi kuatkè tté

<sup>26</sup> Ñies Jesús tō iché: “Ì blúie Skėköl tso' e' tã itkōke wēs itkō iyiwō kuatké wēm eköl tō ese tã es. Ie' tō ikuatké tē kī <sup>27</sup> tã iméat bèrē. Ká bit ekkē ie' kapōkewā nañewe, ñiwe tã ie' tī'rke tã íyi kuatkéitō e' tskine, talane erē ie' kē éna iane tō wēs itskine wēs italane. <sup>28</sup> Íyök è tō itskeke. Kewe ikua tskine, e' ukuōkī tã iwörkuane, e' ukuōkī tã iwōne. <sup>29</sup> Mik ikéwō de shtë, etã wēm míã ishtëkkã.”

### Mostaza wō tté

(Mateo 13.31-32; Lucas 13.18-19)

<sup>30</sup> Ñies Jesús tō iché: “Ì blúie Skėköl tso' ¿wēs e' dör? ¿Ttè wé wa ye' tō ikleèmi? <sup>31</sup> E' dör wēs mostaza wō tkèsö es. E' wō dör tsirlala iyiwō ulitane dikia. <sup>32</sup> Erē mik ikuatkēnewā, etã italar íyi kuá tsitsir ulitane tsata. E' ulà dōkã wī'wië, e' tsakã dù u yuōke.”

<sup>33</sup> Es Jesús tō ie'pa a' ikleé taië wēs ttè i' es dō wé ie'pa éna iane ekkē. <sup>34</sup> Ie' kē wã ì pakane ie'pa a' kē kleaule. Erē iwà kōs pakekeneitō ittōkatapa a' bānet kē kleaule.

### Siwã' taië e' wöklö'wé Jesús tō

(Mateo 8.23-27; Lucas 8.22-25)

<sup>35</sup> E' tsáli mik kã tuine, etã Jesús tō iché ittōkatapa a':

—Mishka batsöri wışhet.

<sup>36</sup> Pē' tso' taië e'pa méarakitō tã ie' iékarak kanò a' Jesús tso' e' a' tã imíyal. Kanò skà mirwã ie'pa tã tseë. <sup>37</sup> E' bet tã siwã' bitsinekã taië tō di' uyéka taië e' tō kanò wã iekeka.

<sup>38</sup> Erē ie' kapōme'r kanò ñak a' wōkir kata kī, eë ittōkatapa ie' tī'wéka tã iché ia:

—¿A s'wōbla'ukwak! ¿Se' duōkelur e' kē kī be' tkine?

<sup>39</sup> Etã ie' e' kēkã tō siwã' uñé tã iché di' a':

—¿Be' e' shtëwã bër!

Etã siwã' wöklöne di' wöklöne míane alamië. <sup>40</sup> Etã ie' tō ittōkatapa a' iché:

—¿Ì kuęki a' suane sekkē? ¿Kam a' erblò ye' mik?

<sup>41</sup> Ie'pa kī tkinewã taië tã ini chakéka:

—¿Yi dör wēm wí? ¿E' ttò dalöieke siwã' tō di' tō!

## 5

### Wimblu sulusi trë'wéyal Jesús tō

(Mateo 8.28-34; Lucas 8.26-29)

<sup>1</sup> Ie'pa demi batsöri wışhet kã kiè Gerasa\* eë. <sup>2</sup> Mik Jesús e' yéttsã kanò a', etã wēm eköl a' wimblu sulusi tso' e' yéttsã de Jesús ska'. <sup>3</sup> Wēm e' serke pō kē a'. Kē imonukwã tabechka kichaie wa ì wa. <sup>4</sup> Tseë imonere iulà a' ena iklö a' tabechka kichaie wa erē ibatséloritō. Kē yi diché tã' wé' iwöklö'woie. <sup>5</sup> Ñië nañeë ie' shkōke pō a' ena kabata a' arke taië, ñies ie' e' shkã'uke ák wa. <sup>6</sup> Erē mik ie' tō Jesús sué kamië, etã ie' tunebitu e' tkésér kuchë kī Jesús wō shaë <sup>7</sup> tã ichéitō ia aneule:

—¿A Jesús, be' dör Skėköl dör íyi ulitane tsata e' Alà! ¿Íók be' de ye' tsiriuk? ¿Ye' kköchöke be' a' Skėköl wörkī tō kē ye' we'ikar!

<sup>8</sup> Jesús tō ie' a' ichétke: “¿A wimblu sulusi, wēm se ówa!” E' kuęki ie' tō iché Jesús a' es.

<sup>9</sup> Etã Jesús tō ie' a' ichaké:

—¿Ima be' kiè?

Ie' iiuté:

—Ye' kiè Taië Wakpa, sa' dör taië e' kuęki.

<sup>10</sup> Etã ikköchöke taië Jesús a': “Kē sa' patkar kamië.” <sup>11</sup> Eë tsinet kabata kuli' a' taië köchi iëter chkök. <sup>12</sup> Etã aknamapa kköché ie' a':

\* 5:1 Gerasa: Yėkuö kėchke wele tō kã e' kiè Gadara ö Gergasa. Mateo 8.28 saú.

—Sa' patkómi köchi a. Kawö mú sa' a e' tiukwá ie'pa a.

<sup>13</sup> Etá ie' tö kawö mé iarak tá wimblupa sulusi e' yélur wëm e' a tá ie' tiéwarak köchi a. Köchi ekképa döká mil böyök ulatök (2.000). Etá köchi poneka tunemirak ká spé mik brutolonemi batsöri a tá eë iduolur.

<sup>14</sup> Köchi kkö'nukwakpa tkayalmi tá itté ppékarakitö ká e' wa'ñe a. Taië pë' de iweblök. <sup>15</sup> Mik ie'pa de Jesús ska' tá wëm a aknama bak e' suérakitö. E' tkër datsi' iéne éna ká anene buaë, e' tö ie'pa suawé. <sup>16</sup> Wépa tö ì tka wëm a aknamapa bak e' tá ena köchi tá e' sué, e'pa tö ipakéne imalepa a. <sup>17</sup> Etá ie'pa kköché Jesús a: “Be' e' yóttsa ká i' a, be' yú bánet.”

<sup>18</sup> Mik Jesús dene kanò a tá wëm a aknama bak, e' kköché ie' a: “Ye' shkakmi be' tá.”

<sup>19</sup> Erë Jesús kè wá ikéwö mène ie' a. Ie' iché ia:

—Be' yúne be' u a be' yamipa ska'. Ì buaë wé Skéköl tö be' a ena wës ie' tö be' sué er siarë wa, e' kos pakó ie'pa a.

<sup>20</sup> Etá wëm mía tá ì wé Jesús tö ie' a e' pakéitö ká tso' Decápolis e' wakpa a. Ie'pa kos tkinewá ittök.

*Jesús tö Jairo alà busi shké'wékane ñies alaköl bua'wéneitö eköl  
(Mateo 9.18-26; Lucas 8.40-56)*

<sup>21</sup> Mik Jesús dene kanò kī batsöri iqshet, etá batsöri kkömik taië pë' e' dapa'wéka ie' ska'. <sup>22</sup> E' dalewa wëm debitu eköl kiè Jairo. E' dör judiowak ñi dapa'wö wé e' wökir eköl. Mik ie' tö Jesús sué, etá ie' e' téwá wöwakköt Jesús wörki <sup>23</sup> tá ikköché taië ie' a:

—Ye' alà busi duökewatke. Be' shkó ulá mukka iki as ibuarne tá iserne.

<sup>24</sup> Etá Jesús mía ie' tá. Taië pë' dami Jesús tá e' tērdami ie' mik. <sup>25</sup> E' shua alaköl dami e' du'mi alakölpa duè wá e' kī duas de dabom eyök kī bök (12). <sup>26</sup> Taië ie' weine s'kapeyökwakpa ulá a ena ì kos tso' ie' wá e' ewéwaitö yës ie'pa kī, erë kè ibuanene, e' skéie imir wa'k ème. <sup>27-28</sup> Ie' wá Jesús tté ttséule e' kuëkī ie' ibikeitsé: “Jesús datsi' bata è kéwayö e' tá ye' buanene.” E' kuëkī ie' e' skéwá Jesús tsī kker pë' shua tá idatsi' kéwaitö. <sup>29</sup> E' bet tá ipé wöklöne tá ie' ittse e' kī tö ibuanene. <sup>30</sup> E' bet Jesús ittse tö ilè tka ie' diché wa, e' kuëkī ie' tö pë' tso' ipamik e' kos sué èk tá ichakéitö ia:

—¿Yi tö ye' datsi' ké?

<sup>31</sup> Ittökatapa tö ie' a iché:

—¿Kè be' wá isune tö taië ie'pa tērdami be' mik? Tá wës be' tö ichaké: “¿Yi tö ye' ké?”

<sup>32</sup> Erë ie' tö wépa tso' ipamik e'pa kī weblé ia isuöie tö yi ie' ké. <sup>33</sup> Alaköl buanene e' painéka taië suane wa. Ì tka ie' tá e' ane ie' éna, e' kuëkī ie' debitu e' tkéwá kuché kī Jesús wörki. Ì kos tka ie' tá e' chékaia yésyësé. <sup>34</sup> Etá Jesús ie' a iché:

—A alà busi, be' erblé ye' mik, e' tö be' bua'wéne. Be' yúne bèrë. Be' buanene.

<sup>35</sup> Ie' ttökeia alaköl tá e' dalewa welepa bite Jairo u a e'pa wá ibiyó de Jairo a tá ichéitörak:

—Be' alà busila blénewatke. ¿Iók s'wöbla'ukwak tsiriwèiabö?

<sup>36</sup> Erë ì cheke ie'pa tö e' kè kī Jesús tkine. Ie' tö Jairo a iché:

—Kè be' tkinuk. Be' erbló ye' mik è.

<sup>37</sup> E' ukuökī tá ie' mía Jairo u a. Pedro ena Santiago ena Santiago èl kiè Juan e'pa è mí ie' wá, kè ie' wá yi skà mène e' tá. <sup>38</sup> Mik ie'pa demi Jairo u a, etá taië pë' dapaneka e' tröke iuke taië siarë. <sup>39</sup> Jesús dewá weshké tá ichéitö ie'pa a:

—¿Ì tso' a' aláuk? ¿Ì kuëkī a' iuke? Busila kè du'wá, ikapöme'r è.

<sup>40</sup> Etá ie'pa tö ie' wayué ena ijañeitsé, erë ie' tö ie'pa ké e' yökulur. Etá alà yé ena imi ena wépa de ie' tá, e'pa è mí ie' wá e' tá úshu a wé alà nu me'rka eë. <sup>41</sup> Ie' tö iulá klö'wéwa tá ichéitö ia:

—Talíta kum. (ttè e' wá kiane chè: “A tayëla, ye' be' a iché, be' e' kóka.”)

<sup>42</sup> E' bet tã busila e' e' duéka shkë'ka tã ishkémi. E' tö ie'pa tkiwéwã tajë. (Tayë e' kî duas tso' dabom eyök kî bök.) <sup>43</sup> Erë Jesús tö ie'pa a iché: “Î tka i' e' kè char yi a.” E' ukuökî tã ie' iché: “Alà sê tió.”

## 6

*Jesús dene Nazaret*

(Mateo 13.53-58; Lucas 4.16-30)

<sup>1</sup> E' ukuökî tã Jesús e' yéttsa ká e' a mía ittökatapa tã iwák ká a. <sup>2</sup> Mik eno diwö de, etã ie' tö s'wöbla'wémítke judiowak ñi dapa'wo wé a. Tajë pë' daparke eë. Mik ie'pa tö ie' ttò ttsé, etã itkirulune tã ñni chakérak:

—¿Wé ie' e' yué ttè tajë wa? ¿Wes ie' ulà de ttè buaë iskië ese ska'? ¿Wes ì kè or yi a ese wéitö? <sup>3</sup> ¿Ie' kè dör kaltak kanéukwak bak kanëblök íerö e'? ¿Ie' kè dör María alà? ¿Ie' kè dör Santiago, José, Judas ena Simón e'pa ël? ¿Ñies ie' kutapa kè serku' se' shua?

E' kuëkî kè ie'pa erblëne ie' mik. <sup>4</sup> Erë ie' tö iché iarak:

—Ká wa'ñe Skëköl tteköl dalöiertä', erë iwák ká kî ena iyamipa shua ena iwák u a ee kè idalöiertä'.

<sup>5</sup> Eë iekkë tã ì kè or yi a ese kè one ie' wã. Ie' ulà méka wëlepa kirirke esepa kî tã ibuanerak, erë e' kè dör tajë. <sup>6</sup> Ká e' wakpa kibiiepa kè erblëne ie' mik, e' tö ie' tkiwéwã.

*Jesús tö ittökatapa patkëmi s'wöbla'uk*

(Mateo 10.5; Lucas 9.1-6)

E' ukuökî tã Jesús mía ká tsitsirpa tso' tsinet ese a s'wöbla'uk. <sup>7</sup> Ie' ttökatapa dabom eyök kî bül e'pa kiéitö tã ipatkémirak bül bül. Ie' kawö mé iarak wimblupa sulusi trë'woyal. <sup>8</sup> Ie' tö iché iarak:

—Kè ì tsarmi, shko kéli e' è tsúmi. Sku' kè tsarmi, chkò kè tsarmi, inuköl kè tsarmi.

<sup>9</sup> Klökkuö ena datsi' iómi, e' è mik a' mi'mi, erë datsi' kî kè tsarmi.

<sup>10</sup> Ñies ie' iché ia:

—Mik a' dewã u wële a, etã a' e' tsúat eë dö mik a' míyal ká bánet ekkë. <sup>11</sup> Ká wële wakpa kè wã a' kinewã buaë ö kè kî a' kapaköke e' kiane ttsè, e' tã a' e' yólur eë tã kapo tso' a' klöttö mik e' ppóö. E' tö ie'pa a ikkacheraë tö ie'pa dör Skëköl bolökpa.

<sup>12</sup> Etã ittökatapa míyal s'pattök i' es: “A' er mane'ú Skëköl a.” <sup>13</sup> Ñies ie'pa tö aknama trë'wéyal tajë. Ñies tajë s'kirirke esepa kî ie'pa tö kiö té tã ibuanenerak.

*Juan S'wöskuökwak kötëwã*

(Mateo 14.1-12; Lucas 9.7-9)

<sup>14</sup> Etã Jesús tté bunekã ká wa'ñe, e' kuëkî itté ttsé ñies blu' kiè Herodes e' tö. Wëlepa tö icheke:

—Jesús dör Juan S'wöskuökwak shkenekane e', e' kuëkî ie' wã diché tso' ì kè or yi a ese wöie.

<sup>15</sup> Wëlepa skà tö icheke:

—Ie' dör Skëköl tteköl bak kiè Elías e' shkenekane.

Wëlepa skà tö icheke:

—Skëköl tteköl idir wes Skëköl ttekölpa ia'chki es.

<sup>16</sup> Erë ttè ekkë ttsé Herodes tö tã ichéitö:

—Ie' dör Juan kuli' tökök patkë' ye' tö e' shkenekane.

<sup>17</sup> Herodes tö iché es ie' tö Juan S'wöskuökwak klö'ukwã patkë' wötëwã s'wöto wé a Herodías kuëkî. Herodías dör Herodes ël kiè Felipe e' alaköl, erë Herodes sene'wã ie' tã.

<sup>18</sup> Erë Juan tö iyë' Herodes a: “Kè be' kawö tã' senuk be' ël alaköl tã. E' wa be' tso' ttè dalöiëno dalöseukwã.”

<sup>19-20</sup> E' kuëkî Herodías ulunekã Juan kî tã ie' kî ikiane ttëwã. Erë Herodes wã ijcher tö Juan dör wëm yësyësë ena batse'r ese, e' dalöiekeitö tajë, e' kuëkî ikkö'nekeitö. Ie' tö Juan kapaköke e' ttseke er bua' wa, erë kè iëna iane ì wëmiitö. Ie' tö Juan dalöieke es,

e' kuɛkɪ Herodías kè a wɛs Juan ɔr. <sup>21</sup> Erë mik Herodes tö iduéswo kéwö tkö'wɛke, etä Herodías isué wɛs iulà dõmi Juan ska'. Herodes tö ikueblupa ena iñippökwakpa wökirpa ena wépa dalöiërta' taië serke Galilea esepa kiéttsa ikéwö tkö'uk. <sup>22</sup> Mik ie'pa tso' ikéwö tkö'uk, etä Herodías alà busi dewa ta iklöté ie'pa wörki. E' wër buaë Herodes ena imalepa tso' chkök ie' ta, e'pa wa, ta ie' iché tayë busi a:

—Ì kiane be' ki e' kió ye' a ta ye' tö be' a imeraë.

<sup>23</sup> Etä ie' tö iché ia ttè moki wa Skököl wörki sulitane kukua:

—Ì kos kiëbö ña, e' mekeyö be' a. Ká kos wökirie ye' tso', e' kió ña ta e' merayö be' a shushaë.

<sup>24</sup> Etä tayë busi mía, ta imì chakéitö:

—¿Ì kièyö?

Ta imì iüté:

—Juan S'wöskuökwak wökir kió ia.

<sup>25</sup> Ie' míane bet blu' tkër ee ta iché ia:

—Ye' ki ikiane tö írö Juan S'wöskuökwak wökir tsúbitu ña kulé' a iwà kkachoie tö moki ittewarakitö.

<sup>26</sup> Etä blu' erianeka taië, erë ie' tö ittè métké s'kiule tso' e'pa kukua, e' kuɛkɪ kè ie' a ionuk wɛs. <sup>27</sup> E' kuɛkɪ bet ie' tö ñippökwak patkémi eköl Juan wökir tsuk. Etä ñippökwak mía s'wöto wé a ta Juan kuli' téé, <sup>28</sup> ta iwökir tsébitu kulé' a méitö tayë busi a, ta tayë busi tö imé imì a.

<sup>29</sup> Mik Juan ttökatapa wa ijchenewa ta ie'pa debitu inú kökka tsémi wötèwa.

*Pë' doka mil skeyök e'pa tié Jesús tö*

*(Mateo 14.13-21; Lucas 9.10-17; Juan 6.1-14)*

<sup>30</sup> Mik Jesús ttekölpa tsá e'pa dene ie' ska', etä ì kos wé ie'pa tö ena ì kos wa ie'pa s'wöbla'wé e' pakéraitö ie' a. <sup>31</sup> Pë' datse taië míyal iské datsene kè wa ie'pa chkoia ekké, e' kuɛkɪ ie' iché ittökatapa a:

—Mishka enuk bánet wé kè yi ku' ese ska'. <sup>32</sup> Etä ie'pa míyal bánet kanò ki wé kè yi serku' ese ska'. <sup>33</sup> Erë ie'pa míyal e' sué pè' tö taië ñies pè' tö isuéwa tö ie'pa e' idir. Etä pè' kos serke ee e'pa míyal tuneule ipanuk wé ie'pa irirke ee demi kewé. <sup>34</sup> Mik Jesús e' yéttsa kanò a, etä pè' tso' taië ipanuk e' suéitö. Ie'pa wër ie' wa wɛs obeja kè kkö'nukwak ta' es, e' kuɛkɪ ie'pa suéitö er siarë wa. Etä ie' e' kéka ie'pa wöbla'uk ttè kua'ki kua'ki taië wa. <sup>35</sup> Ká detke tsáli ta, ittökatapa de ie' ska' ta ichéraitö ie' a:

—Ká de tsáli, kè yi serku' íe. <sup>36</sup> Ie'pa yuómi as ie'pa mi' pè' serke tsinet ena ká tso' tsinet ese ska' ilè tauk ñè.

<sup>37</sup> Erë ie' tö ie'pa iüté:

—Ie'pa tió a' tö.

Ie'pa iüté:

—¿Be' ki kiane tö sa' mi' chkè tauk ie'pa tioie? Chkè ekké tuojie inuköl kiane s'kaneblömi dò ká cien böyök e' ské ekké.

<sup>38</sup> Ie' tö ie'pa a ichaké:

—¿Kos a' wa pan tso'? A' yú iweblök.

Ie'pa dare iweblök ta ichéitö ia:

—Pan tso' skel ena nima bötö.

<sup>39</sup> Etä ie' tö iché ie'pa a:

—Pè' kos kó e' tulöksér ta'tsi ki erule erule.

<sup>40</sup> Etä pè' e' tulésér cien eyök, welepa e' tulésér dabom skeyök. <sup>41</sup> E' ukuöki ta ie' tö pan skel ena nima bötö e' klö'wé ta iká sué ká jai a ta wéstela chéitö Skököl a. E' ukuöki ta ie' tö pan ena nima blaté ta iméitö ittökatapa a as ie'pa tö iwatiö pè' kos a. <sup>42</sup> Ie'pa ulitane chké de wè'. <sup>43</sup> Pan ena nima bata ate e' shtéraitö iène doka kkóla dabom eyök ki bök. <sup>44</sup> Wépa këchkepa chké esepa doka mil skeyök (5.000).



*Jesús shké di' kí*  
(Mateo 14.22-27; Juan 6.16-21)

<sup>45</sup> E' ukuöki ta Jesús tö iché ittökatapa a: "A' e' ióka kanò a, a' yúshkatke ye' yöki kewe batsöri wishet Betsaida kker." Ie' tö iché pè' malepa a: "A' yú a' u a." <sup>46</sup> E' ukuöki ta ie' mía kabata a ttök S'yé ta. <sup>47</sup> Ká tuine ta kanò demi batsöri shushaë. Ie' e' tséat ekörla ká sí kí. <sup>48</sup> Ie' tö isué tö ie'pa kaneblöke darère kanò patkoie siwa' bitsirke ie'pa kke wöia' e' kueki. Ká ñirketke ta ie' mía ie'pa ska' shkörami di' kí. Ie' tkökemitke tsinet ie'pa o'mik. <sup>49-50</sup> Erë mik ie'pa isué tö ie' shkòdatse di' kí, eta' ie'pa ibikeitsé tö wimblu idir, e' tö ie'pa tkiwéwa taië ta ianekararak. Erë bet ta ie' iché ie'pa a:

—¡A' er kuú! ¡Kè a' suanuk! Ye' idir.

<sup>51</sup> Eta' ie' e' iéka kanò a ta siwa' wöklöne. Ie'pa tkirulune taië iweblök. <sup>52</sup> Ie'pa er dör daloie, e' kueki Jesús tö pè' taië dè' pan skel è wa, e' wà kè dè'wa ie'pa er a. E' kueki ie'pa tkirulune taië ekkè.

*Jesús tö s'kirirke bua'wé Genesaret*  
(Mateo 14.34-36)

<sup>53</sup> Itkattsarak batsöri wishet demirak Genesaret ta ee kanò muéwarakitö. <sup>54</sup> Ie'pa e' yélur kanò a ta e' wösha ta pè' tö Jesús suéwa tö ie' idir. <sup>55</sup> Eta' itunerak ká e' wa'ñe ibiyó chök. Mik pè' tö ittse, eta' ie'pa tö s'kirirke tsémi wé ittserakitö tö Jesús tso' ee. <sup>56</sup> Ká wa'ñe wé ie' mir, wé s'tso' taië ö bërèbèrè, eta' pè' tö s'kirikepa tulekeser ñala shaë ta ikköchökerak ie' a tö ie'pa a idatsi' bata è mú kèwa. S'kirirke qos tö iké, esepa buanene.

7

*Ì tö se' ia'wèmi ñáie*  
(Mateo 15.1-20)

<sup>1</sup> Fariseowakpa ena s'wöbla'uk ttè dalöiëno wa wakpa welepa datse Jerusalén e'pa debitu Jesús ska'. <sup>2</sup> Mik ie'pa tö isué tö Jesús ttökatapa welepa chköke ulà kè paköule, eta' e' kí ie'pa tö icheke suluë. <sup>3</sup> (Fariseowakpa ena judiowak malepa qos tö ie'pa yépa bak e' ser klö'wé darère. E' kueki kè ichköta' rak kè ulà paköule wes ie'pa a imeneat es. <sup>4</sup> Mik ie'pa dare chkewö ta'uk, eta' kè ichköta'wa kam iulà pakör e' yöki. Es ie'pa wa iyi ese skà tso' taië dalöiëno. Ñies tka', kulè', ù, ka' ekkèpa qos pakueke ie'pa tö.) <sup>5</sup> E' kueki fariseowakpa ena s'wöbla'uk ttè dalöiëno wa wakpa tö Jesús a ichaké:

—¡Ì kueki be' ttökatapa kè tö se' yépa bak e' ser e' ttè dalöiè? ¡Íók ichkörak ñá ulé wa?

<sup>6</sup> Ie' tö ie'pa iuté:

—Buaë Isaías tö a' e' ò sulu e'pa yè' mik ie' tö iyè':

'Skököl tö ichè: Pè' ikképa tö ye' dalöiè kkò è wa, erë ie'pa er tso' kamië ye' yöki.

<sup>7</sup> É ichökle ie'pa mi'ke ye' wé a ye' dalöiök.

Ttè wa ie'pa s'wöbla'weke e' dör s'ditsö ttè dalöiëno è.\*

Es Isaías tö iyè'at.

<sup>8</sup> A' tö Skököl ttè watéttsa s'ditsö ser e' ttè dalöioie.

<sup>9</sup> Ñies ie' iché iarak:

—Skököl ttè dalöiëno e' méat a' tö bánet a' wákpa ser e' ttè dalöioie. <sup>10</sup> Moisés tö iyè': 'A' yé ena a' mì e'pa dalöiö.'† Ñies ie' tö iyè'at: 'Yi tö iyé ö imì ché suluë ese wák wömerdattsa ttèwa.'‡ <sup>11</sup> Erë a' icheke tö se' a iyèrmi s'yé a ö s'mì a i' es: 'Ì qos tso' ye' wa, e' dör corbán' (e' wà kiane ché tö imeulettsa Skököl a§). E' kueki kè ye' a a' kimenuk ì wa. <sup>12</sup> Ñies a' tö icheke tö yi isie e' ché, ese kè kawötaia iyé ö imì kimuk. <sup>13</sup> Es a' wákpa

\* 7:7 Isaías 29.13 † 7:10 Éxodo 21.17 ‡ 7:10 Levítico 20.9 § 7:11 meuletke Skököl a: Ie'pa tö iché es, erë ie'pa ulà a its'o'ia e' wakanewèmi ie'pa tö wes ie'pa kí ikiane es.

ser e' ttè wa a' tö s'yueke, e' iutè wa a' tö Skëköl ttè dalöiëno e' dalösewëkewa. Ì sulu ese skà wambleke a' tö taië.

<sup>14</sup> E' ukuökì tã ie' tö pë' tso' ee' e'pa kié tã ie' iché iarak:

—A' ulitane tö ye' ttò ttsó, iwà anú a' éna. <sup>15-16</sup> Ì ñeke a' tö e' kè tö a' ia'wëpa ñáie Skëköl wöa. Erë ì sulu wambleke a' tö tskirke a' er a' ese je' tö a' ia'wëraë ñáie.\*

<sup>17</sup> Mik ie' tö pë' méat dewa wëshkë, etã ittökatapa tö ì kleé ie' tö e' wà chaké ie' a. <sup>18</sup> Ie' tö ie'pa iuté:

—¿Ñies a' kè éna iwà ane? ¿A' kè éna iane tö ì kôs ñekewasö e' kè tö s'ia'wëpa ñáie? <sup>19</sup> Ì kôs ñekewasö e' kè mi'ku'wã s'er a, e' mi'kewã s'ñawi a e' ukuökì tã iwekettsasö. E' kuëkì e' kè tö s'ia'wëpa ñáie.

(Ttè e' wa ie' kì ikiane chë tö chkè ulitane dör batse'r.) <sup>20</sup> Ñies ichéitö:

—Ì sulu wambleke a' tö tskirke a' er a' ese je' tö a' ia'wëraë ñáie. <sup>21</sup> Ì sulu bikeitseke a' tö, trë, akblè, s'ttëwã, <sup>22</sup> sënëwãbak dalösewëwã, o'ka íyi kkechë, ì kôs sulu wamblè, s'malepa wöyuè, s'malepa wörieikè, ukyëne, ñì chë suluè, e' ttsëka, ì kôs dör yësyësë ese watëttsã, <sup>23</sup> íyi ese kôs tskirke a' er a' e' tö a' ia'wëraë ñáie.

### *Tayë eköl kè dör judiowak e' erblé Jesús mik*

*(Mateo 15.21-28)*

<sup>24</sup> E' ukuökì tã Jesús míã kã kié Tiro e' kker. Ee' ie' e' tséat yile ska'. Ie' kè kì ikiane tö yi wã ijcherwã tö ie' tso' ee; erë kè ie' a' e' blëne. <sup>25</sup> E' bet busila eköl a' wimblu sulusi tso', e' mì wã ijchenewã tã imía tã ie' tkéwã kuchë kì ie' wörki. <sup>26</sup> Alaköl e' kè dör judiowak, e' dör kã kié Sirofenicia e' wak. Etã ikköché ie' wöa:

—Aknama tso' ye' alà busi a' e' trë'úshkar.

<sup>27</sup> Erë ie' tö iché ia:

—Kè idör buaë ala'rla chkè yëttsã mè chichi a. E' kuëkì as ye' ala'r chkò kewe.

<sup>28</sup> Erë tayë tö ie' iuté:

—A kékëpa, e' yëne; erë s'ala'r chköke e' kamulë darke iski ese ñeke chichi tö.

<sup>29</sup> Jesús tö ie' a' iché:

—Buaë be' iuté, e' kuëkì be' yúne bèrë. Aknama trëneskartke be' alà busila a.

<sup>30</sup> Mik alaköl e' demine u a, etã ilà busila kuéitö kã' kì. Aknama kè ku'ia' ie' a.

### *Wëm eköl kukuò kè wattsër e' bua'wé Jesús tö*

<sup>31</sup> Jesús e' yëttsã Tiro tkami Sidón demi Galilea batsöri Decápolis kker. <sup>32</sup> Ee' pë' wã wëm debitu eköl ie' ska' e' kè kukuò wattsër ena kè tto buaë. Ie'pa tö ikié Jesús a: “be' ulà múkã ikì as ibuarne.” <sup>33</sup> Jesús wã imítser bánet wé kè yi ku' ee, tã iulatska tiéwã wëm kirirke e' kukuökuk bök a' tã iwiri wa iku' kéwã. <sup>34</sup> E' ukuökì tã kã suéitö kã jai a, isiwa' tkékã tã ichéitö wëm a:

“¿Efatá!” (e' wà kiane chë ie'pa ttò wa: “¿Kukuò shubunú!”)

<sup>35</sup> E' bet tã wëm kukuò ena ittò buanene tã ittékã buaë. <sup>36</sup> Jesús tö iché iarak tö kè ichar yi a. Erë kôs e' ché ie' tö ie'pa a, e' tsatã ie'pa tö ikì chekeia. <sup>37</sup> Ie'pa tkirulune taië iweblök, tã ichérakitö, “¿ì kôs wëke ie' tö buaë dò s'kukuò kè wattsër ese bua'wéitö tã iwattsëne buaë, ñies s'me' bua'wéitö tã ittékãne buaë!”

## 8

### *Pë' dökã mil tkëyök e'pa tié Jesús tö*

*(Mateo 15.32-39)*

<sup>1</sup> Etökicha tã pë' e' dapa'wëne taië Jesús ska', e'pa kè wã ì ku' ñè. Tã ie' tö ittökatapa kié tã ichéitö ie'pa a:

\* 7:15-16 Yëkküò këchke wële versículo 16 kí kuötkéka, e' tö ichë: ¿A' éna ye' ttò ttsak, e' ma ikukuebló bua'ie!

<sup>2</sup>—Siarë ye' wa pë' ikkëpa wër. Ie'pa tso' ye' ta e' ki ká de mañatk ta kè ie'pa wa ì ku' ñè.  
<sup>3</sup>Welepa datse kamië. E' kueki dö' ye' tö ipatkéminerak u a kè chkaule ta isiwa'arwamirak ñala ki.

<sup>4</sup>Etä ittökatapa ie' iuté:

—Erë ÿì wa se' tö ie'pa tiëmi ká i'se a wé kè yi serku' ee?

<sup>5</sup>Ie' tö ie'pa a ichaké:

—ÿKos a' wa pan tso'?

Ie'pa iiuté,

—Kul (7).

<sup>6</sup>Etä ie' tö pë' ké e' tulöksër iski ta pan kul klö'wéitö ta wéstela chéitö Skéköl a ta iblatéitö mé ittökatapa a watië pë' a, etä es ie'pa tö iwé. <sup>7</sup>Ñies nima tsirsirla tso'rak iwa elkela e' ki wéstela chéitö Skéköl a ta ittökatapa patkéitö iwatiök. <sup>8</sup>Pë' ulitane chké de wë' ta chkè bata ate e' shtérakitö iëne döka kkó kul. <sup>9</sup>Ichkérak e'pa döka mil tkëyök (4.000) ulatök. E' ukuöki ta Jesús tö ie'pa yuëmine <sup>10</sup>ta ie' e' iéka kanò a ittökatapa ta míyal ká kië Dalmanuta ee.

*Fariseowakpa tö ì kè or yi a ese uk ké suë*

*(Mateo 16.1-4; Lucas 12.54-56)*

<sup>11</sup>Fariseowakpa debitu Jesús ska' ta ittémirak ie' ta kësik wa. Ie'pa éna ie' tsaiak, e' kueki ie'pa tö ie' a ikië tö ì kè or yi a ese wéitö iwà kkachoie tö moki ie' patké'bitu Skéköl tö. <sup>12</sup>Jesús siwa' tkéka iskië ta ichéitö:

—ÿì kueki ì kè or yi a ese kieke a' tö iwà kkachoie tö yi dör ye'? Moki yö a' a ichè tö ese kè kkayërpa a' a.

<sup>13</sup>Etä ie' tö ie'pa méat ta ie' e' iékane kanò a ta imía batsöri wishet.

*Fariseowakpa pan wölöwoka e' pake*

*(Mateo 16.5-12)*

<sup>14</sup>Etä Jesús ttökatapa éna ilè chowa tsëmi ñè. Pan etkè mirak iwa e' ta kanò a. <sup>15</sup>Jesús iché iarak:

—ÿA' tso' wösh wa! A' e' kkö'nú fariseowakpa pan wölöwoka e' yöki. Ñies a' e' kkö'nú Herodes pan wölöwoka e' yöki.

<sup>16</sup>Ittökatapa iché ñi a:

—ÿKè se' wa ì ta' ñè! <sup>17</sup>Jesús wa ijchenewa, ta ie' iché iarak:

—ÿì kueki a' tso' ichök ñi a tö a' kè wa ì ta' ñè? ÿKam a' éna iwà ar? ÿKam a' wa iwà jcherwa? ÿA' er darërè dò ekké? <sup>18</sup>A' wöbla ta' ÿe' kè wawër? A' kukuöña ta' ÿe' kè watsër? ÿA' kè éna ianeia? <sup>19</sup>Mik ye' tö pan skel wadé' wëpa döka mil skeyök (5.000) ekké a, etä ÿkkó bik ibata kit a' tö?

Ie'pa iiuté:

—Dabom eyök ki bök (12).

<sup>20</sup>—Ñies mik ye' tö pan kul (7) wadé' wëpa döka mil tkëyök (4.000) ekké a, etä ÿkkó bik wà ië' a' tö ibata wa?

Ie'pa iiuté:

—Kul (7).

<sup>21</sup>Etä ie' iché iarak:

—ÿKam a' éna iwà ar?

*S'wöbla kè wawër eköl e' bua'wéne Jesús tö*

<sup>22</sup>E' ukuöki ta idemirak Betsaida ta wëm wöbla kè wawër ese debitu eköl pë' wa Jesús a ta ikköchökerak ie' a tö ikó ulà wa as ibuarne. <sup>23</sup>Etä ie' tö iklö'wéwa iulà a ta iyéttsaitö bánet. Eë ie' tö iwöbla bök nuwéka wiri wa ta iulà méka iki ta ichakéitö, “ÿBe' wöbla wawëne?” <sup>24</sup>Etä wëm tö ká weblé ta iché:

—Pë' suekeyö erë ye' wa iwër wësua kal shköke suë.

<sup>25</sup> Etā Jesús ulà mékane iwöbla kī tā wēm tō ká sué krereë tā iwöbla wawënene buaë. Íyi ulitane suéitō buaë. <sup>26</sup> Etā Jesús tō ipatkémine iu a tā iché ia:

—Kè be' mi'ktkō pē' shua.

*Pedro tō iché tō Jesús dör wé pairine'bitū idi' wa s'blúie e'*

*(Mateo 16.13-20; Lucas 9.18-21)*

<sup>27</sup> E' ukuökī tā Jesús ena ittōkatapa míyal ká tso' tseë atē Cesarea Filipino e' a. Ñalā kī Jesús tō ie'pa a ichaké:

—¿Ima pē' tō ichè, ye' dör yi?

<sup>28</sup> Ie'pa iüté:

—Wēlepa tō icheke tō be' dör Juan S'wöskuökwak. Wēlepa skà tō icheke tō be' dör Skéköl tteköl bak kiè Elías shkēnekane e'. Wēlepa skà tō icheke tō be' dör Skéköl ttekölpa skà bak e' wēle.

<sup>29</sup> Ie' tō ie'pa a ichaké:

—Erë ¿ima a' ichè, ye' dör yi?

Pedro tō iüté:

—Be' dör wé pairine'bitū idi' wa sa' blúie e'.

<sup>30</sup> Erë Jesús kè wā ie'pa kàne yi dör ie', e' chök yi a.

*Jesús e' biyó ché tō itterawa*

*(Mateo 16.21-28; Lucas 9.22-27)*

<sup>31</sup> Jesús tō ie'pa a itsá ché:

—Ye' dör S'ditsö Alà, e' weirdaë tajë. Judiowak kuēblupa ena sacerdotepa wökirpa ñies s'wöbla'uk ttè dalöiëno wa wakpa tō ye' waterattsā. Ye' tterawa, erë e' kī ká de mañat etā ye' shkērdakane.

<sup>32</sup> Ttè e' chéitō ie'pa a wöshak. Erë Pedro tō ie' kiémi bánet tā iuñémiitō. <sup>33</sup> Erë Jesús e' wötrée tā ittōkatapa weblé krereë tā Pedro uñéitō i' es:

—¿A Satanás, be' yúshka bánet ye' yöki! Be' kè tō íyi suè wēs Skéköl tō isueke es; be' tō isueke wēs s'ditsö tō isueke es.

<sup>34-35</sup> E' ukuökī tā ie' tō ittōkatapa ena pē' malepa kié e' ska' tā ichéitō:

—Yi e' tsatkak ittèwā yöki, ese kè ulà a sene michoë dòpa. Erë yi e' mettsā ttèwā ye' dalèrmik ena ye' ttè buaë e' dalèrmik, ese ulà a idóraë. E' kuēki yi e' yuak ye' ttökataie, ese kè kàne tkinukia e' kī. E' skéie ie' kawöta e' chök dò ittèwā wötèulewā krus mik ekkë. Es ie' kawöta shkök ye' itöki. <sup>36</sup> Íyi ulitane tso' ká i' a, e' de a' ulà a, erë sene michoë e' kè dè' a' ulà a, e' tā e' dör ¿iie bua' a' a? <sup>37</sup> Sene michoë kè patörpa ì wa. <sup>38</sup> Mik ye' dör S'ditsö Alà, e' dene ye' Yé olo tā', ñies ibiyöchökwakpa batse'r e'pa tā, etā wépa jaëne ye' kī pē' sulusipa kè tō Skéköl dalöiè wēs trër wakpa kè tō imaso dalöiè es esepa wörki, esepa kī ye' jaërdaë ñies.

## 9

<sup>1</sup> Ñies ie' tō iché ie'pa a:

—Mokī ye' tō a' a' ichè tō a' tso' íe, e' wēlepa tō ì blúie Skéköl tso' e' kéwö de diché tā', e' sueraë kam iblèrurur e' yöki.

*Jesús tō ilo tajë e' kkaché ittōkatapa a*

*(Mateo 17.1-13; Lucas 9.28-36)*

<sup>2</sup> Ká teröl ukuökī tā Jesús míā ká bata kakkeë e' kī. Pedro, Santiago ena Juan e'pa mítser iwa e' tā. Etā eē ie'pa wö shaë ie' manenetsā míā kua'kī. <sup>3</sup> Ie' datsi' manenetsā míā dalölöë saruruë, kè yi a ká wa'ñe datsi' sunuk as idöttsā saruruë es. <sup>4</sup> Etā ie'pa tō Skéköl ttekölpa bak ká iaiäë kiè Elías ena Moisés e'pa sué kapakök Jesús tā. <sup>5-6</sup> Ie'pa tkinewā tajë. Pedro kè éna ì aneia chè, e' kuēki ichéitō Jesús a:

—¿A S'wöbla'ukwak, buaë se' tso' íe! Sú sa' tō úla yuèkā mañatkuela, etkue be' a, etkue Moisés a, etkue Elías a. <sup>7</sup> Etā mochka tō ie'pa kítewā tā e' shua ie'pa tō ttò ttsé tō ichè:

“Se dör ye' alà dalër tajë ye' éna, e' ttò ttsó.”<sup>8</sup> E' bet ta ie'pa ká sué ipamik ta ie'pa isué tö kè yi ku'ia, Jesús è dur ie'pa ta.

<sup>9</sup> Ie'pa datskene wöwa'k ta Jesús tö ie'pa a ichè:

—Ì sué a' tö e' kè pakar yi a dò mik ye' dör S'ditsö Alà, e' ttéwa shkenekane e' ukuöki.

<sup>10</sup> E' kueki ie'pa tté iwakpa è ñi ta. Erë ie'pa ñi chaköke: “Ie' ttéwa shkenekane ¿ima e' wà dör?”<sup>11</sup> Ie'pa tö Jesús a ichaké:

—¿Ì kueki s'wöbla'uk ttè dalöiëno wa wakpa tö icheke tö Elías kawöta dökne kewe wé pairine'bitu idi' wa s'blúie e' yöki?

<sup>12</sup> Ie'pa iütérak:

—E' yène tö Elías datse kewe. Ie' tö ì kos kaneweketke kewe wé pairine'bitu idi' wa s'blúie e' yöki. Erë ¿ì kueki Skëköl yëkkuö tö ichè tö S'ditsö Alà, e' weirdaë ena iwatërdattsa?<sup>13</sup> Ye' tö a' a ichè tö Elías dë'bak, etä ie'pa tö iwe'ik siarë wës ie'pa ki ikiane es. E' bak wës ie'pa tté tso' kitule Skëköl yëkkuö ki es.

*Kabëla eköl a aknama tso' e' bua'wéne Jesús tö*

*(Mateo 17.14-21; Lucas 9.37-43)*

<sup>14</sup> Mik idenerak wé ittökatapa malepa tso' ee, etä ie'pa isué tö tajë pë' tso' ipamik. Ñies isuéitörak tö s'wöbla'uk ttè dalöiëno wa wakpa welepa ñi iütöke ie'pa ta.<sup>15</sup> Mik pë' tö Jesús sué, etä iwö krarulune ta itunemirak ishke'uk.<sup>16</sup> Ie' tö ichaké ittökatapa a:

—¿Ì ki a' ñi iütöke?

<sup>17</sup> Wëm eköl tö iché ie'pa a:

—A s'wöbla'ukwak, ie ye' wa ye' aladulaköl debitu be' a. Wimblu sulusi tso' ia e' kueki kè itto.<sup>18</sup> Ká wa'ñe wé ie'pa tso' ee wimblu tö ie'pa éna ká chöwekewa ta ikéure iski ta shuya deka ikkò a, ikà blarke ñi mik ena ikranewa. Be' ttökatapa a ikiéyö tö wimblu e' trë'úshkar erë kè ie'pa a ione.

<sup>19</sup> Jesús tö iüté:

—¿A pë' kè erblöta' Skëköl mik! ¿Mik ye' sermirö a' ta? ¿Kos ye' tö a' dalë'ttsemirö? Kabëla ñe' tsúbitu ña.

<sup>20</sup> Etä ie'pa wa kabëla mítser Jesús ska'. Erë mik wimblu sulusi ñe' tö Jesús sué ta kabëla painuwékaitö tajë anerö iski e' tréka burup burup ta ikkò a shuya deka.<sup>21</sup> Jesús tö kabëla yé a ichaké:

—¿Mik i' wamblënemi ie'pa ta?

Iyé tö iüté:

—Mik ie'pa ià tsirlala e'tami.<sup>22</sup> Tajë wimblu tö ie'pa ma'wé ttéwa. Mikle ta iuyéwaitö bö a ö di' a ittowaie. Sa' saú er siarë wa. Ilè ormi be' a, e'ma sa' kimú.

<sup>23</sup> Jesús tö iüté:

—¿Wës bö ibikeitsëmi tö ye' kè a ionuk? Yi erblöke Skëköl mik, jese a ì kos ormi!

<sup>24</sup> Etä kabëla yé tö iché aneule:

—Ye' erblöke Skëköl mik. ¿Ye' kimú ki erblök imik!

<sup>25</sup> Mik Jesús tö isué tö tajë pë' daparke, etä wimblu sulusi uñéitö i' es:

—A wimblu, kabëla i' tteke be' tö kukuò kè wattsër, kè tto. Ye' tö be' ké e' yóttsa kabëla i' a. Kè be' e' tiukwane ie'pa a.

<sup>26</sup> Wimblu anekä ta kabëla skà éna ká chöwéwaneitö. E' ukuöki ie'pa e' yéttsa ta kabëla ate wës s'duowa es. E' kueki pë' tajë tö ichè tö moki iduowa.<sup>27</sup> Erë Jesús tö iklö'wéwa iulà a ta ikimé e' kökka ta ie'pa e' kéka.

<sup>28</sup> E' ukuöki ta Jesús dewa weshke ta ittökatapa tö ie'pa a ichaké bánet.

—¿Ì kueki sa' kè a wimblu e' trëshkar?

<sup>29</sup> Ie'pa tö ie'pa iüté:

—Wimblu sulusi ese trëshkarmi ikiè S'yé a e' è wa\*

\* 9:29 ikiè S'yé a e' è wa: Yëkkuö këchke wele tö iki kuötkéka i' es: ena batsè wa.

*Jesús skà e' biyó ché tö itterawq*  
(Mateo 17.22-23; Lucas 9.43-45)

<sup>30-31</sup> Jesús ena ittökatapa e' yéttsa ee tkami Galilea. Ie' tso' ie'pa wöbla'uk, e' kueki ie' kè k<sub>i</sub> ikiane tö wé ie'pa tso' e' jcherwa yi wa. Ie' tö iché ie'pa a:

—Ye' dör S'ditsö Alà, e' wömerdattsä pè' ulà a tã ye' tterawarakitö. Erë e' k<sub>i</sub> ká de mañat tã ye' shkerdakane.

<sup>32</sup> Erë ì ché ie' tö, e' wà kè ane ie'pa éna, ñies ie'pa suanerak ichakök.

*Yi dör ibua'ie Skéköl wöq*  
(Mateo 18.1-5; Lucas 9.46-48)

<sup>33</sup> E' ukuök<sub>i</sub> ie'pa demi Cafarnaúm. Mik ie'pa dewa weshke, eta Jesús tö ie'pa a ichaké:  
—¿ì k<sub>i</sub> a' ñi iütöro ñala k<sub>i</sub>?

<sup>34</sup> Erë ñala k<sub>i</sub> ie'pa ñi iütöro tö wé dör ibua'ie imalepa tsata, e' kueki ie'pa siwa'bléwa.  
<sup>35</sup> Eta Jesús e' tkéser tã ie'pa dabom eyök k<sub>i</sub> böi e'pa kiéitö tã ichéitö ia:

—Yi k<sub>i</sub> ikiane tö idö ibua'ie imalepa tsata, e' tã ese kawöta e' wöökwa imalepa dikia ikanè mésoie ikimoie.

<sup>36</sup> E' ukuök<sub>i</sub> tã alala duésoritö eköl ie'pa shushaë tã ikékaitö ulà a tã ichéitö iarak:

<sup>37</sup> —Yi tö alala i'se kiéwa ye' ttò wa, ese tö ye' wák kiéwa. Es ñies yi tö ye' kiéwa, ese kè wa ye' è kinewa, yi tö ye' patké'bitu, e' kiéwaitö ñies.

*Yi kè ku' ñippök se' tã ese tso' buaë se' tã*  
(Mateo 10.42; Lucas 9.49-50)

<sup>38</sup> Juan tö iché Jesús a:

—A s'wöbla'ukwak, wëm sué sa' tö eköl, e' tö aknama tré'wéyal be' ttò wa. Erë ie' kè ku' se' tã, e' kueki sa' tö iché ia tö kè iwaria.

<sup>39-40</sup> Ie' tö ie'pa iüté:

—Yi tö ì kè or yi a ese wé ye' ttò wa, ese kè a ye' yénuk suluë. Yi kè ku' ñippök se' tã, ese tso' se' tã. E' kueki kè iwöklö'war. <sup>41</sup> Yi isie tö di' kakla è mé a' a yè, ye' dör Cristo e' icha a' dör e' kueki, moki ye' tö a' a ichè tö ese a iské patordaë buaë.

*A' tso' wösh wa ì tö s'ké ì sulu wamblök ese yöki*  
(Mateo 18.6-9; Lucas 17.1-2)

<sup>42</sup> “Yi tö ikképala erblöke ye' mik, ese eköl ké ì sulu wamblök, esepa weirdaë taië shute tkökä ák wawoie muéwa ikuli' a batrèemi dayë a e' tsata. <sup>43-44</sup> A' ulà tö a' ké ì sulu wamblök, e' tã itöö. A' döwa sene micho a ulà etkè, e' dör buaë. E' skéie a' döwa bö' ké a ulà bötkè e' dör suluë. Eë bö' kè wöitta'wa. <sup>45-46</sup> A' klò tö a' ké ì sulu wamblök, e' tã itöö. A' döwa sene micho a klò etkè, e' dör buaë. E' skéie a' uyèwa bö' ké a klò bötkè e' dör suluë. <sup>47</sup> A' wöbla tö a' ké ì sulu wamblök, e' tã iyóttsa. A' döwa ì blúie Skéköl tso' e' a wöbla ek è, e' dör buaë. E' skéie a' uyèwa bö' ké a wöbla böké e' dör suluë. <sup>48</sup> E' ké a öña tö s'kateke kekraë kè duöta'wa, ñies bö' wöñarke kè wöitta'wa.

<sup>49</sup> “S'weir e' dör s'paiklè wës iyiwak jchè ña'wè mè Skéköl a ese paiklè dayë wa es. <sup>50</sup> Dayë dör buaë, erë kè ikke tã'ia, e' tã kè ibuarpaiane. Kè a' tö dayë kke chöukwa a' er a. A' senu bèrè ñita.”

## 10

*Se' ñi öwa ese ché Jesús tö*  
(Mateo 19.1-12; Lucas 16.18)

<sup>1</sup> Jesús e' yéttsa Cafarnaúm mía Judea tã itkattsa Jordán a wishet. Eë pè' e' dapa'wéne ie' ska' tã ie' tö ie'pa wöbla'wémitke wës ie' wöblar es. <sup>2</sup> Eta fariseowakpa welepa de ie' ska' tã ie'pa tö ie' a ichaké itsaioie:

—¿Wépa a kawö tã' itayë owa ö au?

<sup>3</sup> Ie' tö ie'pa iüté:



—ǰì uk Moisés tö a' ka' ttè dalöiëno kǰ?

<sup>4</sup> Ie'pa tö ie' iüté:

—Moisés tö ikéwö me' se' a ñi owa yëkkuö muk s'tayë a ta itrë'ukshkar.

<sup>5</sup> Ie' tö ie'pa a iché:

—A' er darërë, e' kuekǰ Moisés tö ttè e' me'at a' a es. <sup>6</sup> Erë mik ká i' yöne, eta kè idir es. Itso' kitule i' es: 'Skëköl tö se' yö' wëm ena alaköl. <sup>7</sup> E' kuekǰ wëpa kè serpaia iyé ena imi e'pa dapömik ta iserdawa alaköl ta. <sup>8</sup> Ie'pa bö serdaë ñita ta ie'pa mia wes wák eköl è es.\* Es ikiteat, e' kuekǰ ie'pa kè ia bö, ie'pa yöne wes wák eköl è es. <sup>9</sup> E' kuekǰ wëpa batséwa Skëköl tö esepa kè batsökök yi tö.

<sup>10</sup> Mik ie'pa dene weshke, eta ittökatapa tö ie' ichaké ttè e' kǰ. <sup>11</sup> Ie' tö ie'pa iüté:

—Wëm tö itayë éwa, ese tö alaköl ské tséwane, e' ta e' wa ie' tö isenewabak kewe e' dalösewéwa. <sup>12</sup> Ñies tayë tö iwëm éwa, ese tö wëm ské tséwane, e' ta e' wa ie' tö isenewabak kewe e' dalösewéwa.

*Jesús tö ikié S'yé a ala'rla kǰ*

*(Mateo 19.13-15; Lucas 18.15-17)*

<sup>13</sup> Eta pé' wa ala'rla debitu as Jesús ulà mùka iki. Erë ittökatapa tö pé' e'pa uñélor.

<sup>14</sup> Mik e' suéitö ta iluneka ta ichéitö ie'pa a:

—As ala'rla bitu ye' ska'. Wëpa dör wes ie'pa es, esepa blúie Skëköl tso', e' kuekǰ kè iwöklö'waria. <sup>15</sup> Mokǰ ye' tö ichè tö yi kè e' wöowa wes alala es ì blúie Skëköl tso' e' kiowa, ese kè döpa.

<sup>16</sup> Eta ie' tö ala'rla paklö'wéwa ta iulà méka iki ta ier buaë ché ia.

*Inuköl blu' eköl e' tö Jesús a ichaké*

*(Mateo 19.16-30; Lucas 18.18-30)*

<sup>17</sup> Mik Jesús shkémítke, eta wëm debitu eköl tuneule, e' tkérö kuchë kǰ ie' wörki, ta ie' a ichakéitö:

—A s'wöbla'ukwak, be' dör buaë, ǰì wëmi ye' tö as sene michoë dò ye' ulà a?

<sup>18</sup> Ie' tö iüté:

—ǰì kuekǰ be' tö ye' kié buaë? Skëköl eköl è dör buaë. <sup>19</sup> Ie' ttè dalöiëno e' jcher be' wa: 'Kè a' kawö ta' s'ttökwa, kè a' kawö ta' s'senewabak dalöseukwa, kè a' kawö ta' akblök, kè a' kawö ta' s'kkatök kachè wa, kè a' kawö ta' s'kitö'uk, a' yé ena a' mi e'pa dalöiö.†

<sup>20</sup> Wëm ie' iüté:

—A s'wöbla'ukwak, ttè e' kos dalöië'bitu ye' tö ye' ia duladula e'tami.

<sup>21</sup> Jesús ie' sué er bua' wa ta ichéitö:

—Íyi etkè kianeia be' a wè, e' dör i': Be' yú ta ì tso' be' wa, e' wataúttsa seraa ta iské múttsa s'siarëpa a. E' ukuökǰ ta be' shkó ye' ta ye' ttökataie. Es ta íyi buaë taië döraë be' ulà a ká jaì a.

<sup>22</sup> Ie' dör inuköl blu' taië, e' kuekǰ mik e' ttséitö, eta iwö éwa iski ta imía eriane taië.

<sup>23</sup> Jesús tö ká sué ipamik ta ichéitö ittökatapa a:

—ǰInuköl blúpa a darërëë idir dökwa ì blúie Skëköl tso' e' a!

<sup>24</sup> Ttè e' tö ittökatapa tkiwéwa, erë ie' tö ie'pa a iskà chéne:

—ǰA ala'r, darërëë idir dökwa ì blúie Skëköl tso' e' a! <sup>25</sup> Inuköl blu'pa a dökwa ì blúie Skëköl tso' e' a, e' dör darërëë tkòka kameio tkòmi datsi' yuo diké ese wöukla a e' tsata.

<sup>26</sup> Mik e' ttsé ie'pa tö, eta ie'pa kǰ tkinewa taië ta ie'pa ñi chaké:

—E' dör es, e'ma ǰyi tsatkërmi?

<sup>27</sup> Ie'pa webléitö ta ichéitö:

—E' kè onuk s'ditsö a wes, erë kè dör es Skëköl a, ie' a íyi ulitane ormi.

<sup>28</sup> Pedro tö ie' a ichémi:

—Sa' tö íyi ulitane me'at ta sa' bitë be' ta.

\* 10:8 Génesis 2.24 † 10:19 Éxodo 20.12-16; Deuteronomio 5.16-20

<sup>29</sup> Jesús iiüté:

—Moki ye' tö a' a ichè tö yi tö iu ö iëlpa ö ikutapa ö imì ö iyé ö ila'r ö iká méat ye' dalërmik ena ye' tté buaë dalërmik, <sup>30</sup> e' ta ká i' kī ese ulà a iské dörane taië döka u cien eyök. Es ñies iëlpa ö ikutapa ö imì ö iyé ö ila'r ö iká ese döraë iulà a döka cien eyök. Erë ñies iweirdaë siarë ye' tté buaë kueki. Erë aishkuö ta sene michoë döraë iulà a. <sup>31</sup> Erë i'ñe ta s'tso' taië keweie esepa döraë bataie, ena s'tso' bataie i'ñe ta esepa döraë keweie.

*Jesús skà e' biyó chéne tö itterawa*

*(Mateo 20.17-19; Lucas 18.31-34)*

<sup>32</sup> Eta ie'pa mirka ñalā kī micho Jerusalén. Jesús shkōrami ittōkatapa yöki kewe. Ittōkatapa mir tkirulewa ena pē' mir ie'pa itōki e'pa suane. Ie' ttōkatapa dabom eyök kī böi, e'pa kiemiitō bānet ta i' tkōraë ie' ta e' pakēmiitō ie'pa a. Ichéitō: <sup>33</sup> “Se' mirka Jerusalén i', eta ee ye' dör S'ditsö Alà, e' merdattsa sacerdotepa wōkirpa ena s'wōbla'uk ttè dalöiëno wa wakpa ulà a. Ie'pa tö ye' kichateraë ta ye' wōmerattsa pē' kè dör judiowak esepa ulà a ttèwa. <sup>34</sup> Ye' wayueraë ie'pa tö, iwiri tuōraë ye' kī, ye' pperarakitō, ena ye' tterawarakitō; erë e' kī ká de mañat eta ye' shkerdakane.”

*Santiago ena Juan tö kawö kié Jesús a*

*(Mateo 20.20-28)*

<sup>35</sup> Santiago ena Juan e'pa dör Zebedeo ala'r e'pa dewa Jesús o'mik ta ichéitō ia:

—A s'wōbla'ukwak, sa' kī ikiane tö i' kieke sa' tö be' a e' mú sa' a.

<sup>36</sup> Ie' tö ichakérak:

—¿I' kiane a' kī?

<sup>37</sup> Ie'pa tö iiüté:

—Mik be' tkēneka s'blúie olo ta' taië, eta kawö mú sa' a e' tkökser be' o'mik, eköl be' ulà bua'kka, eköl be' ulà bakli'kka s'wēttsuk be' ta.

<sup>38</sup> Ie' tö ie'pa iüté:

—A' kè wa ijcher i' kiök a' tso'. ¿Íyi yeraë ye' tö bacha'bachaë, e' yarmi a' a? ¿A' e' ché weinuk wes ye' weirdaë es?

<sup>39</sup> Ie'pa tö iiüté:

—Tó, sa' dirmi.

Ie' tö iché ia:

—Ye' tkā wā yeraë a' tö. A' weirdaë wes ye' es. <sup>40</sup> Erë e' tkökser ye' ulà bua'kka ö ye' ulà bakli'kka, e' kè kēwö menuk ye' a. E' tso'tke klöule yi a imeke esepa a.

<sup>41</sup> Mik ttè e' ttséwa ittōkatapa malepa döka dabom eyök (10) e'pa tö, eta ie'pa uluneka Santiago ena Juan kī. <sup>42</sup> Erë ie' tö ie'pa kié sēraa ta ichéitō:

—A' wa ijcher tö pē' kè tö Skéköl dalöië, esepa wōkirpa kos e' alōkeka ie'pa kī kekraë, ñies iblúpa tö ie'pa patkeke kēsik wa. <sup>43</sup> Erë a' kè kàne e' wamblök es. E' skéie, a' isie e' yuak s'wōkirie, ese kawōta e' wōökwa s'malepa dikia diöshet ikanè mésoie. <sup>44</sup> Ñies a' isie e' yuak ibua'ie s'malepa tsata, ese kawōta e' muktsa s'malepa a kanè mésoie. <sup>45</sup> Ye' dör S'ditsö Alà, e' kè dē'bitu as yi tö ye' kimù, ye' dē'bitu s'kimuk ena e' muktsa ttèwa s'tso' taië e' nuì skéie. E' kueki a' kawōta e' wōökwa s'malepa kanè mésoie.

*Bartimeo bua'wéne Jesús tö*

*(Mateo 20.29-34; Lucas 18.35-43)*

<sup>46</sup> Ie'pa demi Jericó. Mik Jesús e' yökettsatke ittōkatapa ta ena pē' dami taië itōki e'pa ta, eta ee wēm eköl siarë tkēr ñalā ska'. E' dör inuköl kak kiökwak kié Bartimeo dör Timeo alà, e' wōbla kè wawër. <sup>47</sup> Mik ie' ittse tö Jesús Nazaret wak damitkö, eta ie' iché aneule:

—¡A Jesús, s'blú bak David e' aleri, ye' saú er siarë wa!

<sup>48</sup> Taië pē' tö ie' uñeke as isiwa'blōwa, erë ie' kī arkeka:

—¡A David aleri, ye' saú er siarë wa!

<sup>49</sup> Eta Jesús e' duéser ta ichéitō:

—Ie' kióttsa.

Etā wēm wöbla kè wawër, e' kiéttsa ie'pa tō tā ichérakitō ia:

—Be' er kuú. Be' e' kóka. Ie' tso' be' kiök.

<sup>50</sup> Etā wēm tō ipaio kikkē yéttsa ppéumi tā ie' e' kékā bet dewā Jesús ska'. <sup>51</sup> Tā Jesús tō ie' a' ichaké:

—ǰì kiane be' kī tō ye' tō iwè be' a'?

Tā ie' tō iüté:

—A s'wöbla'ukwak, ye' kī ikiane tō ye' wöbla buarne.

<sup>52</sup> Jesús tō iché ia:

—Be' erblé ye' mik, e' wa be' buanene. Be' yúne.

E' wöshā tā ie' wöbla buanene tā imía Jesús tā ñalā wa.

## 11

### *Jesús demi Jerusalén*

(Mateo 21.1-11; Lucas 19.28-40; Juan 12.12-19)

<sup>1</sup> Mik Jesús ena ittökatapa dökemitke Betfagé ena Betania tso' tsinet Jerusalén, Olivo kébata kuli' a' tā eē ie' tō ittökatapa kié bö! <sup>2</sup> tā ichéitō iarak:

—A' yú wì u wëne eruleë eē. Mik a' demi eē, e' bet tā burro pupula moulewa kueraë a' tō etö kè kī yi e' tkëulekā ese. E' wötsóo tā itsúbitu ña. <sup>3</sup> Yile tō a' a' ichakeke: 'ǰì uk a' tso'?', e' tā iütó: 'Skékëpa kī ikiane', e' wa ie' tō imène.

<sup>4</sup> Etā ie'pa míyal tō burro ñe' kué, motër ukkō a' ñalā shaë. Iwötsée ie'pa tō tsèmi.

<sup>5</sup> Etā welepa iëter eē e' tō ichakérak:

—ǰì uk a' tso'? ǰìie a' tō burro se wötsée?

<sup>6</sup> Ittökatapa tō iüté wes Jesús tō iché ia es tā ie'pa tō iébitu. <sup>7</sup> E' ukuöki ittökatapa wa burro bitetser Jesús a. Ie'pa tō ipaio kikkē mékā burro kī tā Jesús e' tkékā iki. <sup>8</sup> Taië pé' tō ipaio kikkē shuélor ñalā kī, iskà tō kal kò tē'lor kañikā tsèmi ese shuélor ñalā kī Jesús ñalé tsoie.

<sup>9</sup> Pé' mirwā keweie Jesús yöki ñies itöki, e'pa ulitane arke taië:

—ǰSkéköl kikkōkasö! Yi datse ie' ttö wa, ayëcha buaë e'. <sup>10</sup> E' datse s'wëttsukne s'blúie wes se' yé David bak es. Ayëcha buaë ie'. ǰSkéköl tso' ká jai a' e' kikkōkasö!\*

<sup>11</sup> Jesús dewā Jerusalén tā imía dewā Skéköl wé a. Ie' tō íyi weblé seraa. Ká tuirketke, e' kueki imía Betania ittökatapa dabom eyök kī bö! e'pa tā.

### *Jesús tō higowö yulé*

(Mateo 21.18-19)

<sup>12</sup> Bule es tā mik ie'pa e' yélur Betania, etā Jesús dué bli wā. <sup>13</sup> Kamië ie' tō higuera klò sué kò arwā buaë. Ie' míā iweblök tō iwö tā'. Erë kè ie' wā iwö kune. Kam iwö kéwö döwā, e' kueki ikò è arwā taië.

<sup>14</sup> Ie' tō iché higo klò a:

—ǰKè yi tō be' wö katepaia!

E' ttsé ittökatapa tō.

### *Jesús tō Skéköl wé batse'wé*

(Mateo 21.12-17; Lucas 19.45-48; Juan 2.13-22)

<sup>15</sup> Ie'pa demi Jerusalén tā Jesús dewā Skéköl wé a. Eē ie' e' kékā wépa tso' íyi tawk ena íyi watauk e'pa tré'ukyal. Inuköl mane'ukwakpa† mesa trélurkaitö. Ñies nuböl wataukwakpa kula' trélurkaitö. <sup>16</sup> Ñies ie' kè tō yi a' kawö mè íyi tsuktkö Skéköl wé shuā. <sup>17</sup> Etā ie' tō s'wöbla'wémitke tā ichéitö:

—Skéköl tō iyë'at iyëkkuö kī: 'Ye' u kirdaë tto ye' tā wé ká ulitane wakpa a, ‡ erë a' tō iia'wéka akblo wéie.

\* 11:10 Salmo 118.25-26 † 11:15 inuköl mane'uk: Judiowak a inuköl tso' wakanewè Skéköl wé è a, e' tuékene ie'pa tō inuköl èse wa. ‡ 11:17 Isaías 56.7

<sup>18</sup> Mik e' ttsé sacerdotepa wökirpa ena s'wöbla'uk ttè dalöiëno wa wakpa tö, etä ie'pa ileritsémi Jesús ttowaie. Ie' tö s'wöbla'weke e' tö pè' kos tkiwéwa, e' kueki judiowak wökirpa suane iyöki. <sup>19</sup> Erë mik ká tuine, etä ie' e' yéttsa Jerusalén ittökatapa ta.

*Higo klò sinewa*  
(Mateo 21.20-22)

<sup>20</sup> Bule es bla'mi ie'pa tkamine higuera klò o'mik, etä ie'pa tö isué tö isinewa dò iwí kicha è. <sup>21</sup> Etä ì bak e' anewa Pedro éna, e' kueki ie' tö Jesús a iché:

—A S'wöbla'ukwak, isaú higuera klò wayé'abö e' sinewa.

<sup>22</sup> Jesús iüté:

—A' erbló Skéköl mik. <sup>23</sup> Moki ye' tö a' a iché tö yi tö iché kabata wì a: 'jBe' e' skóttsa íe anúwa dayé a!' ta iklö'wéitö moki kè ibikeitseká bötböt tö ì chéitö e' wà tköraë, e' ta es iwà tköraë. <sup>24</sup> E' kueki ye' tö a' a iché tö iklö'ú tö ì kié a' tö Skéköl a e' wà detke a' ulà a, etä iwà döraë. <sup>25-26</sup> Nies mik a' tso' ikiök ie' a, etä ilè tté tso' a' wá yile ki, ese nuí olo'yó iki as S'yé tso' ká jai a e' tö a' icha olo'yó a' ki nies.

*¿Yi tö kawö mè Jesús a?*  
(Mateo 21.23-27; Lucas 20.1-8)

<sup>27</sup> E' ukuöki ta ie'pa dene Jerusalén. Jesús shködur Skéköl wé a. Etä sacerdotepa wökirpa ena s'wöbla'uk ttè dalöiëno wa wakpa ena judiowak kuëblupa e'pa de ie' ska' <sup>28</sup> ta ichaké ia:

—¿Yi ttò wa be' tö íyi ikké weke? ¿Yi tö e' kéwö mé be' a?

<sup>29</sup> Ie' tö iüté:

—Nies ye' tö a' a ilè chakeke, e' iüté a' tö, e' ta ye' tö a' a icheke tö yi tö ikéwö me' ye' a. <sup>30</sup> ¿Yi tö Juan patké' s'wöskuök? ¿Skéköl tso' ká jai a e' ö s'ditsö? Ye' iütó.

<sup>31</sup> Ie'pa ñi iütémi ta ichekerakitö: “Sö ichèmi tö Skéköl tö ipatké'bitü, e' ta ie' tö se' a ichèmi: ‘¿Ì kueki a' kè wá ie' ttè klöone?’ ” <sup>32</sup> Pè' ulitane tö iklö'wé tö Juan dör Skéköl tteköl chökle, e' kueki ie'pa suane pè' yöki. E' kueki ie'pa tö icheke ñi a: ‘Kè se' a iyènk tö s'ditsö tö ie' patké.’ <sup>33</sup> E' kueki ie'pa tö iüté:

—Kè sa' wá ijcher.

Ie' tö ie'pa a iché:

—Es nies ye' kè tö a' a ichepa tö yi tö ye' a kawö mé íyi ikké woie.

## 12

*Uva kanéukwakpa sulusipa e' tté*  
(Mateo 21.33-46; Lucas 20.9-19)

<sup>1</sup> Jesús tö ttè kleé ie'pa a i' es: “Wëm eköl tö uva kuantké taië ta ikköiéwaitö buaë, kauk biéitö uva diò tuoie. Nies úla yuéitö kakkeë uva kkö'noie. E' ukuöki ta ie' tö ipeitéat wëpa welepa a as ie'pa tö ipataù ie' a iwörke e' kak wa. E' ukuöki ta ie' mia ká bánet. <sup>2</sup> Mik uva wöline tso'tke wè'iaë shtë, etä ie' tö ikanè méso patkémi eköl ie' icha tsuk. <sup>3</sup> Erë ie'pa tö ikanè méso klö'wéwa ppé taië patkémine ulà wöchka. <sup>4</sup> Etä kanè wák tö ikanè méso skà patkémine eköl, erë e' shká'wé ie'pa tö iwökir ki ta iché suluë. <sup>5</sup> E' ukuöki ta eköl skà patkémine ie' tö ta e' ttéwa ie'pa tö. E' ukuöki ikanè mésopa skà patkémiiitö taië, erë ie'pa tö welepa ppélor welepa ttélur.

<sup>6</sup> “Bata ekké ta iateia eköl è. E' dör iwák alà, e' dalër taië ie' éna. E' patkémiiitö ta ie' ibikeitsè: ‘Ye' alà idir, e' kueki ie'pa tö idalöieraë.’ <sup>7</sup> Erë ie'pa tö iché ñi a: ‘Ká i' atdaë ie' wì ulà a. Ittöwasö, es ká i' döraë se' ulà a.’ <sup>8</sup> E' kueki ie'pa tö iklö'wéwa ttéwa ta inú kéumi ie'pa tö uva ké a bánet.”

<sup>9</sup> Etä Jesús tö ie'pa a chaké:

—¿Ima a' ibikeitsè? ¿Ì weraë kanè wák tö? Ie' mira kanéukwakpa ttökulur ta uva kané meraneitö pè' kuá'ki a.

<sup>10</sup> Ye' tté tso' kitule Skëköl yëkkuö k<sub>i</sub>, ¿e' kè s<sub>u</sub>ne a' w<sub>a</sub>? E' tö ichè:  
 'Ák watéttsa u yuökwakpa tö  
 e' yönene ák bua'buaié.

<sup>11</sup> E' kaneq' Skëköl tö,  
 ta e' tö s'ttsë'weke buaë, s'tkinewa iweblök.\*  
 Es Skëköl yëkkuö tö ichè.

<sup>12</sup> Ie'pa tö isuéw<sub>a</sub> tö kleè e' wa Jesús tö ie'pa ché, e' kuek<sub>i</sub> ie'pa éna iklö'wakw<sub>a</sub>. Erë  
 ie'pa suane pè' yöki, e' kuek<sub>i</sub> ie'pa tö iméat ta iponemi.

*S'wökirpa patauk, e' tté*

*(Mateo 22.15-22; Lucas 20.20-26)*

<sup>13</sup> E' ukuök<sub>i</sub> ta ie'pa tö fariseowakpa welepa ena Herodes klépa welepa patkém<sub>i</sub> Jesús  
 ska'. Ie'pa k<sub>i</sub> ikiane tö ie' tö ilè ché ikkatoie. <sup>14</sup> Ie'pa demi ie' ska' ta ichérakitö ia:

—A s'wöbla'ukwak, sa' w<sub>a</sub> ijcher tö kekraë be' ttò mok<sub>i</sub>. Be' tö sulitane sueke ñikkëë.  
 Ima pè' tö be' cheke e' kè k<sub>i</sub> be' tkine. E' kuek<sub>i</sub> be' tö s'wöbla'weke yësyësë Skëköl ñalé  
 tté wa. Ichó sa' a, Roma wökir kibi patuèsö ¿e' dör buaë ö kè idör buaë?

<sup>15</sup> Erë ie' tö isuéw<sub>a</sub> tö ie'pa e' öke er sulu wa, e' kuek<sub>i</sub> ie' tö iché iarak:

—¿I kuek<sub>i</sub> a' tso' ye' ma'uk tsaiè? Inuköl wöshki tsúbitu ña et suè.

<sup>16</sup> Eta ie'pa tö inuköl wöshki tsémi ie' a et ta ie' tö ichaké ie'pa a:

—¿Yi diököl ena yi kiè me'rka iki?

Ie'pa tö iüté:

—Roma wökir kibi.

<sup>17</sup> Eta ie' tö iché ie'pa a:

—E'ma kos Roma wökir kibi icha, ese mú ie' a, ta kos Skëköl icha ese mú ie' a.

Ie' tö ie'pa iüté es, e' tö ie'pa tkiwéw<sub>a</sub>.

*¿S'duolur e' shkermikane ö au?*

*(Mateo 22.23-33; Lucas 20.27-40)*

<sup>18</sup> Eta saduceowakpa welepa de Jesús ska'. E' wakpa tö iklö'wé tö s'duow<sub>a</sub> e' kè  
 shkënukkane. Ie'pa tö ie' a ichaké:

<sup>19</sup> —A s'wöbla'ukwak, Moisés tö ttè dalöiëno kitat yëkkuö k<sub>i</sub> e' tö ichè i' es: Wëm  
 blënew<sub>a</sub> kè alà atë, e' ta ie' èl kawöt<sub>a</sub> ischó tsukw<sub>a</sub> as ilà kòk<sub>a</sub> iël blënew<sub>a</sub>, e' a. <sup>20</sup> Etökicha  
 wëpa bak döka kul ñi èlpa, ikibi alaköl tséw<sub>a</sub>, erë iblënew<sub>a</sub> kè alà atë. <sup>21</sup> Ie' itök<sub>i</sub> iël tö  
 ischó tséw<sub>a</sub>, erë e' ñies blënew<sub>a</sub> kè alà atë. E' sù iwamblëne iël ta <sup>22</sup> ena imalepa ta. Ie'pa  
 kul blërulune kè alà atë alaköl e' ta. Bata ekkè ta ñies alaköl e' blënew<sub>a</sub>. <sup>23</sup> Wëpa kul e'  
 bak alaköl eköl è ta. Mik s'duow<sub>a</sub> e' shkënekane, eta ¿wéne dòmi ie' wëm chók<sub>i</sub>e?

<sup>24</sup> Ie' tö ie'pa iüté:

—A' kè w<sub>a</sub> Skëköl yëkkuö suule, ñies ie' diché kè jcher a' w<sub>a</sub>, e' kuek<sub>i</sub> a' wöa ká chowa.

<sup>25</sup> Mik s'duolur e' shkënekane, eta wëpa ena alakölpa kè serpaw<sub>a</sub>ia ñita. E'pa míyal wës  
 Skëköl biyöchökwakpa tso' ká jai a kè sert<sub>a</sub>'w<sub>a</sub> ñita es. <sup>26</sup> ¿A' k<sub>i</sub> kiane jchëno tö mok<sub>i</sub>  
 s'duow<sub>a</sub> e'pa shkërdakane? Skëköl ut Moisés ta kal tsir wöñarke bö'ie, e' shua, ¿e' pakè  
 kè aritsule a' w<sub>a</sub> Moisés yëkkuö k<sub>i</sub>? E' kèwö ska' ta Skëköl tö iyè': 'Ye' dör Abraham,  
 Isaac ena Jacob, e'pa Këköl.'† <sup>27</sup> E' wà kiane ché tö ie' kè dör s'duow<sub>a</sub>, e'pa Këköl. ¿Ie' dör  
 s'ttsé'ka, e'pa Këköl! Taië a' wöa ká chowa.

*¿Skëköl ttè dalöiëno e' isie dör ibua'ie?*

*(Mateo 22.23-40)*

<sup>28</sup> Eta s'wöbla'ukwak ttè dalöiëno wa dur eköl ie'pa tso' ñi iütök e' ttsök. Ie' tö ittse tö  
 Jesús tö ie'pa iüté buaë, e' kuek<sub>i</sub> ie' ichaké ia:

\* 12:11 Salmo 118.22-23 † 12:26 Ye' dör Abraham, Isaac ena Jacob, e'pa Këköl: Mik ttè e' yè' Skëköl tö Moisés a,  
 eta Abraham, Isaac ena Jacob e'pa blërulunebak ká iaiaë. Wës ie' tö ichè, e' wà kiane ché tö ie'pa tso' ttsé'ka Skëköl ta.  
 Éxodo 3.6 saú.

—Skëköl ttè dalöiëno, ¿e' wéne dör ibua'ie imalepa tsata?

<sup>29</sup> Ie' iüté:

—Skëköl ttè dalöiëno kibiie imalè tsata e' dör i': 'A Israel aleripa, a' tö ittso'. Këké dör se' Këköl, e' è dör Skëköl. <sup>30</sup> E' dalëritsó a' er kos wa ena a' wák kos wa ena a' erbikè kos wa ena a' diché kos wa.' <sup>31</sup> E' itöki e' dör i': 'A' malepa dalëritsó wes a' wákpa e' dalër es.' Kè ttè ta' dalöiëno tkòka ttè böt e' tsata.

<sup>32</sup> Eta s'wöbla'ukwak ttè dalöiëno wa, e' tö iché ia:

—A s'wöbla'uk, be' iüté buaë. Ì ché be' tö e' dör moki. Skëköl dör eköl ème. Kè e' skà ta. <sup>33</sup> Nies s'kawöta ie' dalëritsök se' er kos wa ena se' kabikeitsò kos wa, ena se' diché kos wa, ñies s'kawöta s'malepa dalëritsök wes se' wák e' dalër es. E' wésö, e' ta e' dör buaë se' a tkòka iyiwak jchëule ña'wè wa'ñe ena iyiwak jchëule skà mèsö Skëköl a e' kos tsata.

<sup>34</sup> Mik ie' isué tö s'wöbla'ukwak ttè dalöiëno wa, e' tö ie' iüté buaë yësyësë, eta ie' tö iché ia:

—Ì blúie Skëköl tso' e' o'mik tsinet be' tso'.

Eta kè yi kësik dë'kaia ie' a ì skà chakök.

*¿Wé pairine'bitu idi' wa s'blúie e' dör yi aleri?*

*(Mateo 22.41-46; Lucas 20.41-44)*

<sup>35</sup> Jesús tso' ie'pa wöbla'uk Skëköl wé a ta ie'pa a ichakéitö:

—¿Wes s'wöbla'uk ttè dalöiëno wa wakpa tö ichèmi tö wé pairine'bitu idi' wa s'blúie, e' dör s'blú bak kiè David e' aleri? <sup>36</sup> Erë David wák tö iyè' Wiköl Batse'r wa i' es: 'Skëköl tö ichè ye' Këköl a:

Be' e' tkóser ye' ulà bua'kka dalöiëno taië,

dò mik ye' tö be' bolökpa mërö be' klò dikia eta. †

<sup>37</sup> Wé pairine'bitu idi' wa s'blúie e' dör David aleri, e' ta ¿wes e' kièmi David tö ie' Këköl?

Eta pè' tso' taië, e'pa tö Jesús ttò ttseke er bua' wa.

*Jesús tö s'wöbla'uk ttè dalöiëno wa wakpa kkaté*

*(Mateo 23.1-36; Lucas 11.37-54; 20.45-47)*

<sup>38</sup> Jesús tö s'wöbla'weke e' shua ie' tö iché: "A' e' kkö'nú s'wöbla'uk ttè dalöiëno wa wakpa yöki. Ie'pa wöbatsö shkök datsi' batsië ese mik wé pè' tso' taië ese ska' as pè' tö ie'pa shké'ù wes këképa dalöiërta' taië es. <sup>39</sup> Nies se' ñi dapa'wo wé a ena wé ie'pa kawö tkö'wekerakitö, ese ska' kula' tso' këképa dalöiërta' esepa a, ese yuleke ie'pa tö e' tkoie.

<sup>40</sup> Ie'pa tö alakölpa schó u yetat'tsa iulà a, eta ittökerak S'yé ta braraë sulitane wöwa idikiñoie tö ie'pa dör pè' buaë yësyësë. Ie'pa weirdaë siarë s'malepa tsata."

*Alaköl siarë tö inuköl mé Skëköl a*

*(Lucas 21.1-4)*

<sup>41</sup> Etökicha ta Jesús tkër kalkuö tso' inuköl ioie mè Skëköl a e' wösha pè' tso' inuköl iök kalkuö a e' sauk. Inuköl blúpa tso' taië esepa tö inuköl ieke taië. <sup>42</sup> E' wöshaë ta alaköl siarë dör schó debitü eköl, e' tö inuköl wöshkila yöule cobre wa tuè tottola ese iéwa böt kalkuö ek a. <sup>43</sup> Jesús tö ittökatapa kié ta ichéitö ia:

—Moki ye' tö a' a' ichè tö alaköl siarëla dör schó wí tö inuköl iéwa kibiie imalepa tö iie kos e' tsata. <sup>44</sup> Ie'pa ulitane tö inuköl kuò atë ese ié, erë ie' siarë, e' tö ie' wa itso' senioie e' kos méttsa. E' kueki ye' tö ie' ché es.

## 13

*Jesús tö iché tö Skëköl wé olordawa*

*(Mateo 24.1-2; Lucas 21.5-6)*

<sup>1</sup> Mik Jesús e' yéttsa Skëköl wé a, eta ittökata eköl tö iché ie' a:

—¿A s'wöbla'uk, isaú! U bua'buä yöule ák bua'buäla wa.

† 12:36 Salmo 110.1



<sup>2</sup> Ie' iiüté:

—U qos tso' bua' buaë sué a' tö íe, e' olordawa seraa, iékwö è kè atpa ñi bata ki.

*¿Ì wa sö isuèmi tò ká i' erkewatke?*

*(Mateo 24.3-28; Lucas 21.7-24; 17.22-24)*

<sup>3</sup> E' ukuöki ta ie' pa míyal kabata kiè Olivo tkërka Skéköl wé wöshaë eë. Jesús e' tkéser ta Pedro, Santiago, Juan ena Andrés e' pa tö ie' a ichaké bánet: <sup>4</sup> “Ichó sa' a: ¿mik íyi ekké wamblërmi? ¿Ì wa sö isuèmi tò iwamblërketke?”

<sup>5-6</sup> Ie' iiüté: “Tajë pè' datse e' chök tö ie' pa dör ye'. Icherarakitö: ‘Ye' dör wé pairine' bitu idi' wa s'blúie e', ta pè' kiterarakitö tajë. E' kueki a' tso' wösh wa as kè yi tö a' kitö'ù.

<sup>7</sup> “Mik a' tö ibiyó ttsé tò ká taië wakpa ñippöke taië wì a dià a, etä e' kè tò a' tkiuk. E' wake' tköraë, erë ká i' erwami e' kianeia. <sup>8</sup> Ká kua'ki kua'ki wakpa ñippöraë ñita. Ñies í tò ká wötí'weraë ká wa'ñe. Ñies ká tseë wakpa tteraë bli tò taië. Íyi ekké dör erpa s'tsá weirketke kam ye' done e' yöki ese. E' dör wes alaköl alà kurketke ta ikirirke es.

<sup>9</sup> “A' e' kkö'nú. A' merdattsa s'shulökwakpa a ta a' burdaë siarë judiowak ñi dapa'wo wé a. Ie' pa tö a' keraë e' duökser shulè s'wökirpa ena s'blúpa wörki ye' tté kueki. Es a' tö ye' tté pakeraë ie' pa a. <sup>10</sup> Erë kam ká i' erwa e' yöki ye' tté buaë e' kawöta pakè ká ulitane wakpa a. <sup>11</sup> Mik a' menettsa tté shulökwakpa a, etä kè a' tkinuk ima a' e' tsatkòmi. Mik e' kéwö de, etä kè a' ttöpa a' wákpa er wa, e' skéie Wiköl Batse'r ttöraë a' wa. E' kueki tté eraë Skéköl tò a' a chè e' chó. <sup>12</sup> Etä welepa tö iël wömerattsa ttèwa, iyé tò ilà wömerattsa, ñies ala'r e' kóraká iyé ena imi kkatök as ittöwa. <sup>13</sup> Sulitane tò a' sueraë suluë ye' tté kueki. Erë yi e' tkéwa darërëë döka bata ekké, esepa tsatkërdaë.

<sup>14</sup> “Íyi sulusi tò ì dör batse'r ia'wè ñáie e' tkërdaká wé kè ikawöta tkèka eë\* (yi tso' yëkkuö i' sauk, e' éna iwà anú). Mik e' sué a' tö, etä wépa serke Judea e' pa tkóyalmi kabata a. <sup>15</sup> Yi tso' u bata ki ese kè dökwane weshke íyi yöktsa, itkóshkarmi. <sup>16</sup> Ñies yi tso' kanëblök kañika ese kè dökwane weshke idatsi' yöktsa. <sup>17</sup> E' kéwö ska' ta alakölpa alà kurketke ena alakölpa tsu' muke ilà a jwéstela ina esepa ta! <sup>18-19</sup> S'ditsö weirdaë tajë shute qos kè s'we'ikule ekké mik ká yö' Skéköl tò dò ikké ta, ñies qos kè s'weirpa aishkuö ta ekké. E' kueki ikió Skéköl a as kè e' wamblër a' ta yuëdiö késka'. <sup>20</sup> E' kéwö kè wöópawa Skéköl tò, e'ma kè yi isie atukia ttsé'ka. Erë e' kéwö wöerawaitö, wépa shukitbakitö esepa dalërmik.

<sup>21-22</sup> “Kachökwakpa e' kóraká e' chök tö ie' pa dör wé pairine' bitu idi' wa s'blúie e' ö ie' pa dör Skéköl tteköl wele. E' pa tö ì kè or yi a ese weraë s'kitö'woie tò ie' pa tté dör mokië. Dò wépa shukit Skéköl tò, esepa kitö'wèmi e' mú kitërmi e'ma. E' kueki yile tò iché a' a: ‘Isaú, wé pairine' bitu idi' wa s'blúie e' dur íe’, ö ‘Isaú, idur wíe’, e' ta kè a' tö iklö'war. <sup>23</sup> ¡A' tso' erki! Íyi ekké biyó chétkeyö a' a keweie.

*Jesús dörane olo ta' tajë*

*(Mateo 24.29-35,42,44; Lucas 21.25-36)*

<sup>24</sup> “Erë s'weine e' kéwö tka, etä diwö wötuirdawa, ñies si'wö kè wöñarpaia. <sup>25</sup> Bëkwö darolordaë ena ì qos tso' ká jai a e' wötirdaë. <sup>26</sup> Etä ye' dör S'ditsö Alà, e' datse mò a diché ta' tajë olo ta' tajë, e' wërdaë. <sup>27</sup> Skéköl biyöchökwakpa patkeramiyö wépa shukitbakyö, esepa dapa'ukka ek tsiní ème. Ie' pa tö iyuleraë ká wa'ñe dò wé ká i' bata erkerö eë ena wé ká jai bata erkerö eë.

<sup>28</sup> “A' e' wöbla'ú tté ikké wa iwà saú higo klò wa: Mik iulatska tso' ulölöla ena erpa iköyök tsirdoka, etä a' wa ijcher tò duas dewatke tsinet. <sup>29</sup> Es ñies mik a' tö isué tò íyi ekké wamblërke, etä a' wa ijchenú tò ye' datskene, e' diwö dewatke tsinet. <sup>30</sup> Moki ye' tò

\* 13:14 Íyi sulusi...tkèka eë: Mateo 24.15 saú.

a' a ichè tö íyi ekkè wamblërdaë wépa dör wes a' es esepa kam erwa e' yöki. <sup>31</sup> Kashük ena ká i' erdawa, erë ye' ttè michoë e' kè erpawa yës.

<sup>32</sup> “Erë e' kèwö e' diwö kè jcher yi wá. Skëköl biyöchökwakpa tso' ká jaì a, e'pa kè wá ijcher, ñies ye' dör Skëköl Alà e' kè wá ijcher. S'yé è wá ijcher.

<sup>33</sup> “A' kè wá ijcher wekkè ta idiwö de, e' kuëki a' tso' erki, a' senú wösh wa. <sup>34</sup> E' dör wes wëm eköl mi'keá kamië ká kuá'ki a es. Ie' tö iché ikanè mésopa a: ‘U kkö'nú ña.’ Etá kanè tuléatitö ie'pa bik ekkè a. Ie' tö iché ie' ká wékkö kkö'nukwak a: ‘Be' tso' wösh wa.’

<sup>35</sup> Es ñies a' tso' erki. A' kè wá ijcher mik ye' dör wes u wák es e' dotkene. Ye' dömbitü ká tuinetke ekkè alè, ká shaböts alè, dakro ane ekkè alè ö ká ñine alè ta. <sup>36</sup> A' tso' wösh wa dö' a' kuëwayö kapè a. <sup>37</sup> Ttè chéyö a' a, e' chekeyö sulitane a: ¡A' tso' wösh wa!”

## 14

*Judiowak wökirpa tö Jesús aleritsé klö'wèwá*

*(Mateo 26.1-5; Lucas 22.1-2; Juan 11.45-53)*

<sup>1</sup> Ká böt è kianeia Judiowak Yépa Yërulune Egipto e' kèwö tkö'woie. Ñies e' kèwö ska' ta Pan Kè Yöule Iwölöwoka Wa e' kèwö tkö'weke judiowak tö. Sacerdotepa wökirpa ena s'wöbla'uk ttè dalöiëno wa wakpa tö Jesús aleritsé kitö'wè iklö'wowa ttèwá. <sup>2</sup> Ie'pa welepa tö iché:

—Kè sö wamblö Se' Yépa Yërulune Egipto e' kèwö a as pè' kè shutirka. E' kuëki ie'pa éna iklö'wakwa ikité wa.

*Jesús klö'ki kiö masmas téka alaköl eköl tö*

*(Mateo 26.6-13; Juan 12.1-8)*

<sup>3</sup> Jesús minea Betania, Simón kiri'uk lepra bak, e' u a. Ie' tkëria mesa ki, e' dalewa alaköl debitü eköl e' wá kiö masmas kiè nardo ese chökle tuè darërë, ese debitü. Kiö e' ukkuö yöule ák kiè alabastro e' wa. Kiö ukkuö kuli' péwaitö ta itéka Jesús wökir ki.

<sup>4</sup> Welepa uluneka ie' ki ta ñi a ichérak:

—¿I' kuëki alaköl tö kiö we'ikéwa? <sup>5</sup> Ituè darërë döka s'kanëblö duas ek ské ekkè. Iwatormittsa s'siarëpa kimoie.

Etá suluë ie'pa tö alaköl e' paké.

<sup>6</sup> Erë Jesús tö iché:

—Imúat bèrë. ¿I' kuëki a' itsiriweke? Íyi buaë kanewé ie' tö ye' a. <sup>7</sup> S'siarëpa tso' kekraë a' shua, etá e'pa kímèmi a' tö mik a' ki ikiane e' ta. Erë ye' kè ku' kekraë a' ta. <sup>8</sup> Ie' tö iwé ye' a kos ie' a ior ekkè. Ie' kiö té ye' ki ye' kanéwoie kam ye' nu wötërwa e' yöki. <sup>9</sup> Moki ye' tö a' a ichè tö ká wa'ñe wé Skëköl ttè buaë pakarke ee ipakardaë ñies tö ie' tö i buaë o' ye' a. Es e' kè chöpawa yi éna.

*Judas tö Jesús wöméttsa*

*(Mateo 26.14-16; Lucas 22.3-6)*

<sup>10</sup> Jesús ttökatapa dabom eyök kí böi, e' eköl dör Judas Iscariote, e' mía sacerdotepa wökirpa ska' ichök tö ye' a Jesús mermittsa a' a. <sup>11</sup> Mik e' ttsé ie'pa tö, etá ittse'nerak buaë ta ikablé ie' a inuköl muk. Etá ie' tö kawö yulémi bua'iewa Jesús wömottsa.

*Jesús bata chkéia ittökatapa ta*

*(Mateo 26.17-29; Lucas 22.7-23; Juan 13.21-30; 1 Corintios 11.23-26)*

<sup>12</sup> Kawö kiè Pan Kè Yöule Iwölöwoka Wa e' kèwö tsá diwö dewatke\* E' diwö wa ie'pa obeja pupula jcheke Judiowak Yépa Yërulune Egipto, e' kèwö tkö'woie. Etá Jesús ttökatapa tö ie' a ichaké:

—¿Wé be' ki kiane tö sa' mi' kawö tkö'wekesö e' chké kanéuk be' a?

<sup>13</sup> Ie' tö iché ie'pa böi a:

\* 14:12 Pan Kè Yöule Iwölöwoka Wa e' kèwö: Kawö e' tkö'weke judiowak tö dö ká kul, e' tsá diwö kièrakitö Se' Yépa Yërulune Egipto e' kèwö.

—A' yú Jerusalén. Mik a' demi eē, eṭa wēm kueraä a' tö eköl, e' wā di' dami skauña a. E' itöki a' yú. <sup>14</sup> Ta u wé a ie' demi e' wák a ichó: 'S'wöbla'ukwak be' chakök ké: ¿Úshu wé a ie' tö kawö tkö'wekesö e' chké ñèmi ie' ttökatapa ta?' <sup>15</sup> Ie' tö úshu bërie tso' kákke tso'tke kaneoule buaë, e' kkacheraë a' a. Eē ichké kaneú se' a.

<sup>16</sup> Eṭa ie'pa böi míyal Jerusalén ta iyi ulitane kuérakitö wēs ie' tö iché es. Eē chkè kanewérakitö kawö tkö'woie.

<sup>17</sup> Mik ká tuine, eṭa ie' debitu ittökatapa dabom eyök kí böi, e'pa ta. <sup>18</sup> Mik ie'pa e' tulésēr chkök, eṭa ie' tö iché ie'pa a:

—Mokí ye' tö a' a ichè tö a' eköl tö ye' wömerattsa. E' wák tso' ye' ta chkök.

<sup>19</sup> Eṭa ie'pa erianekā taië ta ie'pa tö ie' a ichakémi eköl eköl:

—¿Ye' alè idir?

<sup>20</sup> Ie' tö iiuté:

—E' dör a' dabom eyök kí böi tso' ye' ta pan nuuk tka' etkè a ñè, e' eköl. <sup>21</sup> Ye' dör S'ditsö Alà e' ta itköraë wēs itso' kitule Skököl yëkkuö kí es. Erë wéstela ina yi ye' wömekettsa e' ta. ¿Buaë idir wēm e' a tö kè ikunúpa!

<sup>22</sup> Ie'pa tso'ia chkök, e' shua pan klö'wéitö, e' kí wéstela chéitö Skököl a ta iblatéitö watié ie'pa a ta ichéitö:

—Pan sē dör ye' chkà, e' ñú a' tö.

<sup>23</sup> E' ukuöki tka' a vino tso', e' klö'wéitö, e' kí wéstela chéitö Skököl a ta ie'pa ulitane tö tka' e' wayé. <sup>24</sup> Ie' tö iché ie'pa a:

—Vino sē dör ye' pé. Ye' tterawā e' pē' tērdaë taië, e' wa ttè pa'alí me' Skököl tö, e' wà de. E' wa pē' taië tsatkërdaë. <sup>25</sup> Mokí ye' a' a ichè tö vino kè yepaiayö dò mik ì blúie Skököl tso' e' kèwö de eṭa. Mik ide, eṭa iskà yeraneyö a' ta.

*Pedro tö icheraë tö ie' kè wā Jesús suule*

*(Mateo 26.30-35; Lucas 22.31-34; Juan 13.36-38)*

<sup>26</sup> Eṭa ie'pa tö Skököl ttseitssé, e' ukuöki ta ie'pa míyal Olivo kébata a. <sup>27</sup> Jesús tö iché ie'pa a:

—A' ulitane tköyaldä. A' ye' meätäë ekörla. E' dör wēs itso' kitule Skököl yëkkuö kí es, e' tö ichè: 'Obeja kkö'nukwak ttewaraëyö, eṭa obeja pordami wì a dià a.† <sup>28</sup> Erë mik ye' ttéwā shkenekane, e' ukuöki ta ye' miraë Galilea a' yöki kewe.

<sup>29</sup> Pedro tö ie' a iché:

—Eré ie'pa ulitane be' memiat ekörla, erë ye' kè tö be' mepaat.

<sup>30</sup> Ie' iiuté:

—Mokí ye' tö be' a ichè tö i' nañewe, kam dakro skà arne, e' yöki be' tö icheraë mañatökicha tö be' kè wā ye' suule.

<sup>31</sup> Erë Pedro tö ikí ché ia kröröë:

—Eré ye' ttewamirakitö be' ta, erë kè ye' ichepa tö kè ye' wā be' suule.

Eṭa ie'pa ulitane ttöke es ème.

*Jesús tté S'yé ta Getsemaní*

*(Mateo 26.36-46; Lucas 22.39-46)*

<sup>32</sup> E' ukuöki ta ie'pa míyal ká kiè Getsemaní eē. Jesús tö iché ittökatapa a:

—A' atē tulur íe, ye' mía ttök S'yé ta.

<sup>33</sup> Pedro, Santiago ena Juan e'pa mítser iwā e' ta. Eṭa ie' erianemi chkenewami taië.

<sup>34</sup> Ie' tö iché ie'pa a:

—Ye' eriane taië ttseskua ye' ttewamiitö ekkè. A' e' tsúat íe, kè a' kapökwa.

<sup>35</sup> E' ukuöki ie' mía wishke ta ie' e' kéutēr wöwakköt iski ta ikiéitö Skököl a tö ì tköraë ie' ta, e' diwö tköami ie' kí, e' ta itkóú. <sup>36</sup> Ie' ichè: "A yéwöla, iyi ulitane ormi be' a. Ì tköraë ye' ta e' dör wēs iyi bacha'bachaë yèwasö es. E' ulà a ye' yóttsa. Erë kè iwar wēs ye' kí ikiane es, iú wēs be' kí ikiane es."

† 14:27 Zacarías 13.7

<sup>37</sup> E' ukuöki ta ie' dene wé ittökatapa tukur ee ta ie'pa kuéitö kapötulur. Ie' tö iché Pedro a:

—A Simón, ¿be' kapowa? ¿Kè be' wa kapèwa wöklöne dò hora ek è? <sup>38</sup> Kè a' kapökwa. A' ikió Skököl a as ì sulu tö a' erkiöweke ese kè e' alòka a' ki. Moki a' éna ì buae wak, eré a' diché kè dè'ka iwà uk, e' kueki a' a darèrèè idir.

<sup>39</sup> Ie' míane ta ttè Skököl a wes kewé itté es. <sup>40</sup> Mik ie' dene ta ie'pa kuéneitö kapötulur; ie'pa wöbla surirkewa kapè wa e' kueki. Ie'pa kè wa ttè kune ie' iutoie. <sup>41</sup> Ie' skà míane ttök S'yé ta e' dene, i' ta idare mañatökicha, eta ie' tö iché iarak:

—¿A' kapötuluria enukeia? Wè' a' kapowa. Ye' dör S'ditsö Alà, e' diwö dekatke mèttsa pè' sulusipa ulà a. <sup>42</sup> A' e' kòka, yi tö ye' wömekettsa, e' dotke i' ta. Mishka ie' panuk.

*Jesús klö'wéwa ibolökpa tö*

*(Mateo 26.47-56; Lucas 22.47-53; Juan 18.2-11)*

<sup>43</sup> Jesús tso'ia ttök, e' dalewa ittökatapa dabom eyök ki bö, e' eköl kiè Judas, e' debitu pè' ta taiè. E' wakpa debitu tabè ki ena kal wölö ki. Ie'pa patkè'mi sacerdotepa wökirpa ena s'wöbla'uk ttè dalöièno wa wakpa ena judiowak kuéblupa ekkèpa tö. <sup>44</sup> Judas dör iwöméttsa e' tö ie'pa a iyè'bak: “Wé shké'wéyo wöalattsè wa, e' dör ie', iklö'úwa a' tö ta itsúmi kkö'naule buae as kè itköshkar.” <sup>45</sup> Eta ie' e' skéwa Jesús o'mik ta iché ia:

—¿A S'wöbla'ukwak!

Ta iwöalattséwaitö. <sup>46</sup> Eta Jesús klö'wéwa pè' tö.

<sup>47</sup> Eré ie'pa ièter ee, e' eköl tö itabè yéttsa ta e' wa sacerdotepa kibi e' kanè méso kukuöña téttsa. <sup>48</sup> Eta Jesús tö ichaké pè' ekkèpa a:

—¿ì kueki a' bitè ye' klö'ukwa tabè ki kal wölö ki wes akblökwakpa klö'wéwa es? <sup>49</sup> Kèkraè ye' bak a' shua s'wöbla'uk Skököl wé a, eré a' kè wa ye' klöönewa. Eré i' tköke as itkö wes itso' kitule Skököl yèkkuö ki es.

<sup>50</sup> Eta ittökatapa kos tkayalmi tö iméat ekörla. <sup>51</sup> Eré duladula eköl dowá ie' itöki e' patrèwabitü ka' kishuo wa, e' klö'wéwarakitö, <sup>52</sup> eré idatsi' ppéeatitö wak tkashkarmi sume.

*Jesús demi ie'pa wa Judiowak wökir kibipa wörki*

*(Mateo 26.57-68; Lucas 22.54-55,63-71; Juan 18.12-14,19-24)*

<sup>53</sup> Jesús tsémirakitö sacerdotepa kibi ska'. Eta ee sacerdotepa wökirpa malepa ena judiowak kuéblupa ena s'wöbla'uk ttè dalöièno wa wakpa kos daparke. <sup>54</sup> Pedro datse ie'pa itöki kamiè döttsa sacerdotepa kibi u pamik, eta ee ie' e' tséat tker Skököl wé shkékpa ta bö' baiklök.

<sup>55</sup> Eta sacerdotepa wökirpa ena judiowak wökirpa malepa tö ttè yuleke Jesús kkatoie as ie'pa tö iwömüttsa ttèwa, eré kè ie'pa wa ì ttè kune ikkatoie. <sup>56</sup> Taiè pè' de ie' kkatök kachè wa, eré ie'pa ttè kè dè'ttsa ñittsèè. <sup>57</sup> Welepa tö ie' kkatémi kachè wa ta ichérakitö:

<sup>58</sup> —Sa' tö ie' tse'wa ichök tö Skököl wé yö' s'ditsö tö i', e' olo'yerawaitö ta iské, kè yöne s'ditsö wa, ese yuérakaneitö ká mañat shua.

<sup>59</sup> Eré ie'pa ttè kè dè'ttsa ñittsèè.

<sup>60</sup> Eta sacerdotepa kibi e' kéká iyamipa shua, ta Jesús a ichakéitö:

—¿Kè be' ie'pa iuteku' yés? ¿Ñe' ie'pa be' kcateke, e' dör i'?

<sup>61</sup> Eré Jesús siwa'bléwa ie'pa yöki, kè ie' wa ì iütène.

Sacerdotepa kibi ie' skà chaké:

—¿Be' dör wé pairine'bitü idi' wa sa' blúie e'? ¿Be' dör Skököl kikauleka taiè e' Alà?

<sup>62</sup> Jesús ie' iuté:

—Tó, ye' idir. Ye' dör S'ditsö Alà e' sueraè a' tö tkérka Skököl diché ta' íyi ulitane tsata e' ulà bua'kka dalöiértá taiè. Ñies ye' datskene kashuk a mò a e' sueraè a' tö.

<sup>63</sup> Eta sacerdotepa kibi e' datsi' jchéè ikkachoie tö iluneka ta ichéitö:

—¿Iie se' k<sub>i</sub> ikkatökwakpa k<sub>i</sub> kiarmiia? <sup>64</sup> A' ittse tö ie' e' chò tö ie' dör Skököl Alà, e' wa ie' tso' Skököl chök suluë. ¿Wes a' iweke?

Ie'pa ulitane ñi sini'kué tö ie' iane iwiie, e' kueki ikawöta ttèwa.

<sup>65</sup> Ie'pa welepa wirituémi iki ñies iwöbla pabakéwarakitö ta itérakitö ta ichakérakitö:

—Be' dör Skököl tteköl, e'ma sa' a ichóka ¿yi tö be' té?

Etä Skököl wé shkékpa tö ippé iwö k<sub>i</sub> taië.

*Pedro tö iblé tö kè ie' wa Jesús suule*

(Mateo 26.69-75; Lucas 22.56-62; Juan 18.15-18,25-29)

<sup>66</sup> Pedro tkëria iski u pamik, e' dalewa tayëla debitu e' dör sacerdote kibi e' kanè méso eköl. <sup>67</sup> Ie' Pedro sué bö'iklök, ta isuëitö krereë ta ichéitö ia:

—Be' ñies dör Jesús Nazaret wak e' klé eköl.

<sup>68</sup> Pedro tö iblé. Ie' tö iché:

—Kè ye' wa ie' suule. Ye' kè éna iane tö ì chök be' tso'.

Etä ie' e' yéttsa ukkö a. E' wöshaë dakro ane. <sup>69</sup> Kanè méso ñe' tö Pedro suéne ta ie' e' kéka ichök imalepa a:

—Ie' i' dör Jesús klépa e' eköl.

<sup>70</sup> Erë Pedro tö iskà bléne. E' kuölö ta wépa tso' ee ñies e'pa tö iché ie' a:

—Be' dör Galilea wak, e' kueki moki be' dör ie'pa éltë wak.

<sup>71</sup> Ie' tö iché:

—¿Skököl wörki ye' ichè tö wëm chök a' tso' e' kè suule ye' wa! Kè idör es, e'ma as ye' kichatër.

<sup>72</sup> E' wöshaë ta dakro ane etökichane, ta ie' éna ianewa tö Jesús tö ie' a iyë': 'Kam dakro ska arne e' yöki be' icheraë mañatökicha tö be' kè wa ye' suule.' Etä ie' iéka taië.

## 15

*Jesús mítser Pilato wörki*

(Mateo 27.1-2,11-14; Lucas 23.1-5; Juan 18.28-38)

<sup>1</sup> Mik ká ñine, etä sacerdotepa wökirpa ena judiowak kueblupa ena s'wöbla'uk ttè dalöiëno wa wakpa ñi dapa'wéka ta Jesús aleritsétke. Ie'pa wa imítser moulewa mé Pilato a. <sup>2</sup> Pilato tö ichaké ie' a:

—¿Be' dör judiowak blú?

Ie' iüté:

—Tó, wes be' iché, e'ma es idir.

<sup>3</sup> Sacerdotepa wökirpa tö ie' kkaté taië. <sup>4</sup> Etä Pilato tö iskà chakéne:

—Ñekkè ie'pa be' kkaté ¿e' ttsébö? ¿I' kueki e' kè iütébö?

<sup>5</sup> Erë ie' kè wa iüténe, e' tö itkiwéwa darërëë.

*Jesús méttsa ttèwa*

(Mateo 27.15-31; Lucas 23.13-25; Juan 18.38-19.16)

<sup>6</sup> Judiowak Yépa Yërulune Egipto e' kéwö wa Pilato wöblar s'wötëulewa s'wöto wé a ese yöktsa eköl émine wé kié pé' tö e'. <sup>7</sup> Wëm kië Barrabás e' tso' wötëulewa s'wöto wé a imalepa sulusipa ta. Ie'pa wa s'kötulewa mik ie'pa e' ka'ka ñippök romawakpa ta etä.

<sup>8</sup> Ta pé' debitu Pilato ska' e'pa tö ikié ie' a tö iú wes iwöblar es. <sup>9-10</sup> Ie' tö isuéwa tö ukyëne wa sacerdotepa wökirpa tö Jesús me'ttsa ie' ulá a. E' kueki ie' tö ichakérak ia:

—A' judiowak blú ¿e' èmineyö?

<sup>11</sup> Erë sacerdotepa wökirpa tö pé' shutiwékatke as ie'pa tö kiö Pilato a tö Barrabás yóttsa Jesús skéie. <sup>12</sup> Pilato tö ichakéne:

—Etä ¿wes a' k<sub>i</sub> kiane tö ye' tö wëm kië a' tö judiowak blú e' wè?

<sup>13</sup> Ie'pa iüté aneule:

—¿Iwötówa krus mik!

<sup>14</sup> Ie' tö ichaké ie'pa a:

—¿Ì kuekì? ¿Ì sulu wambléitö?

Erë ie'pa kí arke:

—¡Iwötówa krus mik!

<sup>15</sup> Ie' atak buaë ie'pa ta, e' kuekì Barrabás yéttsaitö. Eta Jesús ppök patkémiitö ttsa' bata daloie wa. E' ukuökì ta ie' tö iméttsa wötèwa krus mik.

<sup>16</sup> Eta ñippökwakpa wa Jesús mítser ká e' wökir u kiè Pretorio e' shua wé ulat tso' áie ee. Eë ie'pa tö ñippökwakpa malepa kiéttsa dapa'wè ek tsiní ème. <sup>17</sup> Ie'pa tö datsi' mat daloshdalosh ese iéka Jesús kì blu'ie. Ñies dika'kicha yuérakitö wöshkiie tkékarakitö iwökir kì blu'ie iwayuoie. <sup>18</sup> E' ukuökì ta ie' wayuémirakitö aneule:

—¡Be' dör judiowak blú! ¡Be' kíkókka sa' tso'!

<sup>19</sup> Eta ñippémirakitö taië iwökir kì kuaköl wölö wa ena iwiri tuérak iki ena ie' e' tulésarak kuchë kì iwörkì iwayuök tö sú sa' be' dalöie.

<sup>20</sup> Mik iwayué one, eta datsi' mat daloshdalosh, e' yéttsarakitö ta iwák datsi' iékanerakitö iki ta imítserak iwa wötèwa krus mik.

### *Jesús wötène krus mik*

(Mateo 27.32-44; Lucas 23.26-43; Juan 19.17-27)

<sup>21</sup> Ñippökwakpa tö wëm kiè Simón dör Cirene wak, e' kué ñala kì, e' datse bánet micho Jerusalén. Ie' dör Alejandro ena Rufo yé. Ie' ké ie'pa tö Jesús krus tsukmi.

<sup>22</sup> Ie'pa wa Jesús mítser ká kiè Gólgota ee. (Gólgota e' wà kiane chë s'wökirdiche.)

<sup>23</sup> Eta vino shutuule kapöli kiè mirra e' wa, ese mé Jesús a yè, erë kè ie' wa iyanewa. <sup>24</sup> Eta iwötéraitö krus mik. E' ukuökì ta ie'pa iné ñi ma'woie suè tö wes ie'pa tö Jesús datsi' blatemi ñi a.

<sup>25</sup> Mik ie'pa tö iwotéwa krus mik, eta diwö de sulitu (9). <sup>26</sup> Kaltak tso' e' kì itso' kitule tö ichë: “I' dör judiowak blú e'”, e' dör iwà kkachöie tö ñ nuí kì ie' wötènewa krus mik. <sup>27-28</sup> Ñies wëpa böi akblökwakpa wotéwarakitö krus mik, eköl iulà bua'kka, eköl iulà bakli'kka.

<sup>29</sup> Pë' tköke ee e'pa tö icheke sulu, iwökir wötiukerak iwöa, es ichekerakitö:

—¡Íkëta, be' se tö Skököl wé tkekettsa eta ká mañat è ta be' tö iyuékane! <sup>30</sup> ¡E'ma be' e' tsatkó, be' e' ówa krus se mik!

<sup>31</sup> Es ñies sacerdotepa wökirpa ena s'wöbla'uk ttè dalöiëno wa wakpa tö Jesús wayueke. Ie'pa tö icheke ñi a:

—Q'kapa tsatkéitö erë ie' wák kè a e' tsatkër. <sup>32</sup> Mokì ie' dör wé pairine'bitu idi' wa s'blúie, mokì ie' dör se' Israel aleripa e' blú, e'ma as ie' e' ówa krus wí mik, e' iarma ta se' erblömi ie' mik.

Wépa wötène ie' ta krus mik e'pa tso'ñak ie' chök suluë.

### *Jesús duowa*

(Mateo 27.45-56; Lucas 23.44-49; Juan 19.28-30)

<sup>33</sup> Mik diwö de bata a, eta ká mía ttsettseë ká wa'ñe dò tsáli diwö de mañat ekkë. <sup>34</sup> E' wöshá ta Jesús aneká taië ta iché: “Eloí, Eloí, ¿lemá sabactani?” (e' wà kiane chë: A ye' Këköi, a ye' Këköi, ¿iók be' ye' we'ikéttsa?)

<sup>35</sup> Welepa tso' ee, mik e'pa tö ttè e' ttsé ta ichéraitö:

—¿A' ittsé? Ie' tso' Skököl tteköl bak kiè Elías, e' kiök.

<sup>36</sup> Eta ie'pa eköl tunemi tö suiyök nuwéka vino shköshkö wa e' tkékaitö kuaköl bata kì ta itkéwa ikkò mik as ikuyöitö. Ie'pa tö iché:

—Imuat bër, ipanusö suè tö Elías datse iökwa.

<sup>37</sup> Jesús aneká taië ta isiwa' bata tké. <sup>38</sup> Eta Skököl wé a ie'pa wa datsi' buririë ese shukuar u blatoie e' jchënane kákke döttsa iski. <sup>39</sup> Eta Roma ñippökwakpa eköl dör capitán e' durshkö Jesús wömik. Mik e' tö isué tö wes Jesús duowa, eta ichéitö:

—Mokì, wëm wí dör Skököl Alà je'.



<sup>40</sup> Ñies alakölpa iëter ee ie' k<sub>i</sub> sauk kamië. E' shua eköl dör María Magdala wak. Iëköl dör María e' dör Santiago tsirla ék ena José, e'pa mì. Iëköl dör Salomé. <sup>41</sup> Alakölpa e'pa bak shkök Jesús ta ena ikime' mik ibak Galilea eta. Ñies alakölpa skà tso' taië dë'bitu Jesús ta dò Jerusalén.

*Jesús nu wötëne*

(Mateo 27.57-61; Lucas 23.50-56; Juan 19.38-42)

<sup>42-43</sup> E' diwö dör judiowak a íyi kanéwoie eno diwö yöki. Ká tuirketke\* e' kueki wëm eköl kië José Arimateawak, e' kësik iéwa ta imía Jesús nu kiök Pilato a bléwa. Ie' dör judiowak wökirpa e' eköl dalöiërta' taië ese. Ñies ie' tso' ì blúie Skëköl tso' e' kéwö panuk. <sup>44</sup> Pilato tkinewa tö Jesús duowatke, e' kueki ie' tö icapitán kié chakè tö moki Jesús duowatke. <sup>45</sup> Mik ie' wa ijchenewa, eta ie' tö Jesús nu kéwö mé José a tsëmi. <sup>46</sup> E' ukuöki ta José tö datsi' ukuö bua'buwa saruru ese tué et. Jesús nu éwaitö krus mik, e' patrëwaitö datsi' ñe' wa bléwa ákuk biule s'nu blóie ese a. Eta ákuk kkò wötëwaitö ák bërie wa. <sup>47</sup> Wé Jesús nu menewa e' sué María Magdala wak ena María dör José mì, e'pa tö.

## 16

*Jesús shkenekane*

(Mateo 28.1-10; Lucas 24.1-12; Juan 20.1-10)

<sup>1</sup> Mik eno diwö tka, eta María Magdala wak ena María dör Santiago mì ena Salomé e'pa tö kiò masmas bua'buwa ese tué mí ie'pa wa tèka Jesús nu ki. <sup>2</sup> Eta domingo bla'mi erpa diwö tskine ta ie'pa míyal wé Jesús nu blëne ee. <sup>3</sup> Ie'pa ñi a iché:

—¿Yi tö se' a ák yëmittsa ákuk kkò a?

<sup>4</sup> Erë mik ie'pa tö iweblé, eta ie'pa tö isué tö ák rratune bánet. Ák e' dör bërie. <sup>5</sup> Mik ie'pa dewa ákuk a, eta ie'pa tö isué tö duladula tkër eköl ulà bua'kka, e' datsi' saruruë batsië. Ie'pa tkinewa iyöki. <sup>6</sup> Erë ie' tö iché ie'pa a:

—Kè a' tkinukwa. Ye' éna iane tö a' tso' Jesús Nazaret wak këtëwa krus mik e' nu yulök. Erë kè iku' íe, ie' shkenekane. Wé ie'pa tö ime'wa e' tò webló. <sup>7</sup> A' yú Pedro ena ittökatapa malepa a ibiyó chök tö ie' mitke a' yöki kewe Galilea. Ee a' tö ie' suëraë wës ie' tö a' a iyë' es.

<sup>8</sup> Alakölpa tkinewa painéka taië, e' kueki ie' e' yélur ákuk a tkayalmi. Ie'pa suane, e' kueki kè wa ì yëne yi a.

*María Magdala wak tö Jesús sué*

[ <sup>9</sup> Jesús shkenekane domingo bla'mi, e' ukuöki ta ie' e' kkaché kewe María Magdala wak a, e' a ie' tö aknamapa bak kul (7) e' trëo'yal. <sup>10</sup> Eta alaköl e' mía ibiyó chök wépa bak shkök Jesús ta e'pa a. Ie'pa eriarke iü tular siarë. <sup>11</sup> Erë mik ie'pa ittse tö Jesús shkenekane ñies tö alaköl ñe' tö isué, eta kè ie'pa wa iklöone.

*Jesús ttökatapa böle'pa tö ie' sué*

(Lucas 24.13-35)

<sup>12</sup> E' ukuöki ta ittökatapa böle'pa shkörami micho bánet, eta ñala ki Jesús e' kkaché ie'pa a, erë iwër kuak'ki. <sup>13</sup> Eta ie'pa míyal ibiyó chök imalepa a, erë ñies kè ie'pa wa ittò klöone.

*Jesús tö ittökatapa patké s'wöbla'uk*

(Mateo 28.16-20; Lucas 24.36-49; Juan 20.19-23)

<sup>14</sup> E' ukuöki ta Jesús e' kkaché ittökatapa dabom eyök ki eköl e'pa a. Ie'pa tular chkök e' dalewa ie' de. Wépa tö ie' shkenekane e' sué, e'pa ttò kè klöone ie'pa wa, ie'pa er darëre e' kueki. E' ki ie' tö ie'pa uñélor. <sup>15</sup> Eta ie' iché ie'pa a: “A' yú ká wa'ñe ye' tté buaë e'

\* 15:42-43 Ká tuirketke: Judiowak ttë dalöiëno tö iché tö s'nu kè tsërta'mi eno diwö a. Eno diwö e' tkërkewami Viernes ká tuine ekkë. Ñies kè idör buaë ie'pa a tö s'nu at áie nañewe. E' kueki José Arimateawak éna Jesús nu akwa bléwa bet kam ká tuir e' yöki.

pakök sulitane a. <sup>16</sup> Yi erblé ye' mik tã ie' e' wöskuée esepa tsatkërdaë. Erë yi kè erblène ye' mik esepa kichatërdaë. <sup>17</sup> Wépa erblöke ye' mik esepa tö ì kè or yi a ese weraë iwà kkachoie. Ye' ttò wa ie'pa tö aknamapa trë'werattsã, ñies ie'pa a imeraë ttoie s'ttò kuã'ki kuã'ki wa. <sup>18</sup> Tkabè chók klö'wéwã ie'pa tö ulà wa ö kapöli sulusi yéwarakitö, e' tã kè ie'pa dôpa wes. Ñies ie'pa ulà muraka s'kirirke esepa ki tã ibuardane.”

*Jesús míkane ká jai a*

*(Lucas 24.50-53)*

<sup>19</sup> Mik Skëképa Jesús ttè e' ché one, etã ibutséka míã ká jai a tã ee ie' tkéser Skëköl ulà bua'kka. <sup>20</sup> Etã ittökatapa míyal ká wa'ñe Jesús tté buaë pakök. Skëképa Jesús tö ie'pa kimé, ì kè or yi a ese uk. E' wa ie' tö iwà kkaché tö ie' tté dör moki.]\*

---

\* 16:20 Yëkkuö këchke wele tö 16.9-20 kí kuötkéka. Ttè e' kè ku' yëkkuö këchke bua'ie ese ki.

## Jesús Tté Buaë Kit Lucas tö Lucas

Wëm tö yëkkuö i' kit e' wák kiè Lucas. Ie' tö ikit wëm eköl kiè Teófilo e' a. Welepa tö ibikeitsè tö Teófilo dör romawak eköl ena ie' dör kékëpa taië ese. Lucas tö ie' a yëkkuö i' kit as ì o' Jesús tö ena ì wa s'wöbla'itö e' jcherwä ie' wä yësyësë.

Yëkkuö i' k<sub>i</sub> Lucas tso' ikkachök tö Jesús dë'bitu sulitane tsatkök, Israel aleripa ena pë' ulitane. Jesús kè dë'bitu Israel aleripa è a. Lucas tö ichè tö Jesús kune' ká i' k<sub>i</sub> sulitane kimoie. Nies Lucas k<sub>i</sub> ikiane tö s'wä ijcherwä tö Jesús dë'bitu iYé kkachök se' a.

Ì tso' kitule Colosenses 4.14 ena Filemón 24 ena 2 Timoteo 4.11, e' wa se' wä ijcher tö Lucas bak Pablo wapiöuk. Welepa tö ibikeitsè tö ie' kè dör Israel aleri. Ie' bak kaneblök s'kapeyökwakie. Nies welepa tö ibikeitsè tö ie' tö yëkkuö i' kit ká kiè Roma eë Jesús kune' e' k<sub>i</sub> duas de dabom teryök (60) ena dabom kuryök k<sub>i</sub> sulitu (79) e' shu ulat.

### Ttè tsá kitule

<sup>1-3</sup> A kékëpa taië Teófilo, ì o' Jesús tö sa' shuä mik ibak ká i' k<sub>i</sub> etä, e' paka' sa' a wépa itsá su'bitu dö ibata ekkë e'pa tö. Ie'pa dör Jesús ttè buaë e' kanéukwakpa. Taië sa' malepa imao' shtë yëkkuö k<sub>i</sub>, erë kè idë'ttsä wës ikiane shtë es. E' kueki ye' tö iwä chakéwa bua'iewä itsá dö ibataë. Es ye' isué tö buaë idir shtëmi be' a yëkkuö i' k<sub>i</sub> seraä wës ibak es <sup>4</sup> as be' éna iar tö ttè wa be' wöblane, e' dör moki.

### Juan S'wöskuökwak kurke e' biyó yëne

<sup>5</sup> Mik Herodes bak judiowak blúie etä sacerdote tso' eköl kiè Zacarías. Judiowak sacerdotepa ñi dapa'oule erule erule kaneblök Skéköl wé a. Zacarías dör sacerdotepa erule kiè Abías wakpa e' eköl. Ie' alaköl kiè Elisabet, e' dör nies sacerdotepa ditséwö wës iwëm es. <sup>6</sup> Ie'pa böi serke yësyësë Skéköl wöa. Ie'pa tö Skéköl ttè me'bak dalöieno, e' dalöieke buaë, kè k<sub>i</sub> ì sulu ttè ta'. <sup>7</sup> Erë Elisabet kè döta' aläë. Nies ie'pa böi dör kékëpalatke.

<sup>8</sup> Etökicha ta' mik Zacarías ena imalepa kàne iwakanéuk Skéköl wé a, <sup>9</sup> etä ie'pa iné ilè wa wës ie'pa wöblar es isuöie tö yi kàne shkökwa Skéköl wé shuä iyi masmas ña'uk Skéköl a. Etä idettsä tö Zacarías kawöta shkökwa. <sup>10</sup> Mik ie' tso' Skéköl wé shuä iyi masmas ña'uk, e' dalewa taië s'daparke u'rki ttök S'yé ta'. <sup>11</sup> E' wöshä ta' Skéköl biyöchökwak eköl e' kkachéwa ie' a ka' tso' iyi masmas ña'woie Skéköl a e' ulà bua'kka. <sup>12</sup> Mik ie' tö Skéköl biyöchökwak sué ta' ie' tkinewä suane taië iyöki. <sup>13</sup> Etä biyöchökwak tö iché ie' a:

—A Zacarías, kè be' suanuk. Ì kié be' tö Skéköl a, e' meraëitö be' a. Be' alaköl dör Elisabet, e' döraë aläë, e' wák wëm. Ie' kiè múka a' tö Juan. <sup>14-15</sup> Ie' döraë kékëpa taië Skéköl wöa. E' kueki e' be' ttsë'weraë buaë kaneë. Nies ie' tö taië pë' ttsë'weraë buaë. Ie' kè ì shköshkö yepa. Kam ie' kur etä Wiköl Batse'r döraë ie' k<sub>i</sub> taië. <sup>16</sup> Ie' tö Israel aleripa taië, e' kerane ie'pa Kéköl yulökne. <sup>17</sup> Ie' döraë Skéköl yöki kewe itté pakök. Ie' tö ipakeraë Wiköl Batse'r diché taië e' wa wës Skéköl tteköl kiè Elías bak ká iaiaë es. Ie' ipakeraë as iyé er buarne ila'r k<sub>i</sub> ena ila'r er buarne iyé k<sub>i</sub>. Nies ipakeraëitö as wépa tö Skéköl ttè dalösewéwa, esepa e' wöbla'ü senuk yësyësë. Es ie' tö ie'pa patteraë Skéköl datse e' panoie.

<sup>18</sup> Etä Zacarías tö Skéköl biyöchökwak a ichaké:

—¿Ì wa be' ye' a ikkachëmi tö ttè e' dör moki? Ye' dör kékëpalatke. Nies ye' alaköl dewatke kékëpalatke, ta' ¿wës sa' alala kökamiiä?

<sup>19</sup> Ie' iiüté:

—Ye' dör Gabriel. Ye' kaneblöke Skéköl a. Ie' ye' patké ttè buaë i' chök be' a. <sup>20</sup> Erë be' kè wä ye' ttè klöone, e' kueki be' ttö wöblerdawä kè ttöpaia dö mik be' alà kune etä. Mik ì chéyö be' a e' kèwö de, etä be' ttörane.

<sup>21</sup> E' dalewa ie'pa tso' Zacarías panuk u'rki, e'pa tö ibikeitsé, “¿Ì tö ie' wöklö'wé, e' kè döttsa bet Skököl wé a?” <sup>22</sup> Mik ie' dettsa, eta ie'pa tö isué tö ie' ttò wöblenewa, kè ie' ttoia ta ulà è wa ie' tö iwà kkaché ie'pa a. Eta ie'pa éna iane tö ilè suéitö kabsueie. Es ie' ate me'ie.

<sup>23</sup> Mik ie' kanè one Skököl wé a, eta imíane iu a. <sup>24</sup> E' ukuöki ta ie' alaköl Elisabet duneka. Ie' e' tkéwa iu a dò si' skel, kè dè'ttsa wérö. <sup>25</sup> Ie' tö iché, “Ikképa Skököl tö alà mé ye' a. Es ie' er buaé ché ye' a, ekké ye' jaëne.”

### *Jesús kurke e' biyó yëne*

<sup>26</sup> Elisabet duneka e' ki si' de teröl, eta Skököl tö ibiyöchökwak kiè Gabriel, e' patké Nazaret, ká e' ate Galilea. <sup>27</sup> Ee busi serke eköl kiè María. Ie' kam ser wëm ta, erè ie' ttè meule wëm eköl kiè José e' a senowa ie' ta. José dör blu' bak kiè David e' aleri eköl. <sup>28</sup> Eta Skököl biyöchökwak dewa wé María tker ee, ta ichéitö ie' a:

—¿Is be' shkene? Skököl er buaé ché be' a. Ie' tso'ie be' ta.

<sup>29</sup> Ttè e' tö María tkiwéwa ta ibikeitséitö, “¿Iók ye' shké'wé es?” <sup>30</sup> Eta Skököl biyöchökwak tö iché ie' a:

—A María, Skököl er buaé ché be' a, e' kueki kè be' suanuk. <sup>31</sup> Be' durkaraë, be' alà kurdaë wák dör wëm, ikiè múkabö Jesús. <sup>32</sup> Ie' döraë kéké taië, dalò taië. Ie' kirdaë Skököl dör íyi ulitane tsata, e' Alà. Skököl tö ie' meraka blu'ie wes iyé bak kiè David es <sup>33</sup> as Jacob aleripa wëttsùitö blu'ie kekraë kè erta'wa.

<sup>34</sup> Eta María tö ichaké Skököl biyöchökwak a:

—Kam ye' ser wëm ta, eta ¿wes ì ché be', e' wà tkömi ye' ta?

<sup>35</sup> Skököl biyöchökwak iüté:

—Wiköl Batse'r döraë be' ki, Skököl dör íyi ulitane tsata e' diché ardaë be' ki. E' kueki be' alà kurdaë, e' serdaë Skököl è a. Ie' kirdaë Skököl Alà. <sup>36</sup> Nies be' yami kiè Elisabet kéképalatke cheke tö kè idöta' alàë, e' alà kurdaë. Si' i' wa ta ie' ki ide si' teröl. <sup>37</sup> Ì qos or Skököl a, kè ì ku' darèrè ie' a wè.

<sup>38</sup> Eta María tö iché:

—Ye' dör Skököl kanè méso, as ie' tö iü ye' ta wes be' iché es.

Eta Skököl biyöchökwak mía.

### *María mía Elisabet pakök*

<sup>39</sup> E' ukuöki ta María dali ié ta imía bet Elisabet pakök. Elisabet serke Judea ká dör kabataie ee. <sup>40</sup> Mik ie' dewa Zacarías u a, eta ie' tö Elisabet shké'wé. <sup>41</sup> Mik e' ttsé Elisabet tö, eta ilà wötí'ne taië ie' shua ta Wiköl Batse'r de iki taië. <sup>42</sup> Ie' ttémi darèrèe ta ichéitö María a:

—Skököl er buaé ché be' a alakölpa ulitane tsata. Nies ie' er buaé ché be' alà kurmi e' a. <sup>43</sup> Ye' siarè ¿wes e' a ie' er buaé ché tö ye' Kéképa mì e' de ye' pakök? <sup>44</sup> Mik be' tö ye' shké'wé e' ttsé yö, e' bet ta ye' alà wötí'ne ye' shua ittse'ne buaë e' kueki. <sup>45</sup> Ì yé' Skököl tö be' a, e' klö'wébö tö iwà tköraë, e' kueki ayécha buaë be' dör.

<sup>46-49</sup> María tö iché:

“Ye' dör Skököl kanè méso esela siarè ese è,

erè e' ska' ie' er de.

E' kueki ie' kikekaka ye' tö.

Ie' dör ye' tsatkökwak, e' tö ye' ttsé'weke buaë.

Ie' diché taië íyi ulitane tsata, e' tö ì buaë shuteë wé ye' a.

E' kueki i'tami ye' yërdaë: ¡Ayécha buaë!

¡Skököl dör batse'r!

<sup>50</sup> Wépa tö ie' dalöieke, esepa sueke ie' tö kekraë er siarè wa.

<sup>51</sup> Ì kè or yi a ese wéitö idiché taië wa:

Pè' e' ttsöká taië esepa tö ì bikeitseke wè ese wöklö'wéitö.

<sup>52</sup> Ká wökirpa uyéttsaitö ikulé ki,  
e' skéie s'siarëpa tkékaitö.

<sup>53</sup> Wépa siarë kè wa ì ku' ñè,  
esepa a ì buaë méitö taië.

Erë inuköl blúpa esepa patkémiitö ulà wöchka.

<sup>54</sup> Israel aleripa dör ie' kanè mésopa.

Ká iaiäe ie' tö ie'pa a iyë' tö ie' tö ie'pa sueraë er siarë wa.

Ttè e' kè chë'wa ie' éna.

<sup>55</sup> Es ie' tö iyë'bak Abraham a,

ñies ie' aleripa kôs daia ie' itöki e'pa a.”

Es María tö iché.

<sup>56</sup> María sené Elisabet ska' dò si' mañat ta imíane iu a.

*Juan S'wöskuökwak kune'*

<sup>57</sup> Mik Elisabet alà kúrke e' kèwö de, eta iwà kune wëm. <sup>58</sup> Mik pë' serke tsinet ena iyamipa eka, e'pa ibiyó ttsé tö Elisabet sué Skököl tö er siarë wa, eta ie'pa kôs ttsë'ne buaë wës Elisabet es. <sup>59</sup> Mik ilà kune' e' ki ká de pàköl (8), eta ie'pa debitu ilà tottola kkuölit tërke tsir, e' kèwö tkö'uk wës ie'pa wöblane es iwà kkachoie tö alà e' dör judiowak. Ie'pa éna iyé kiè Zacarías, e' kiè makka iki. <sup>60</sup> Erë imì tö iché:

—Au, ie' kirdaë Juan.

<sup>61</sup> Ie'pa tö iché:

—Kè yi ku' be' yamipa shua kiè es. Eta ì kuëki be' ikiè mekeka es?

<sup>62</sup> Eta ie'pa ulà kkaché ichakoie alà yé a, “¿Ima be' éna ikiè makka?” <sup>63</sup> Eta iyé tö kaltak kié, e' ki ie' tö ishtë tö “ikiè Juan.” E' tö ie'pa kôs tkiwéwa. <sup>64</sup> E' wöshä ta Zacarías ttékane, eta Skököl kikéka ie' tö taië. <sup>65</sup> Pë' serke tsinet, e'pa kôs tkirulune taië. Ñies pë' kôs serke Judea kébata a, e'pa shua itté buneka taië. <sup>66</sup> Ie'pa ulitane tö itté ttsé e'pa tö ibikeitsé: “Alà e' döraë kékëpa taië.” Ie'pa isué tö Skököl tso' ie' ta, e' kuëki ie'pa tö ibikeitsé es.

*Zacarías tö Skököl kikéka*

<sup>67</sup> Eta Wiköl Batse'r de taië Zacarías ki, e' wa ie' ttémi Skököl ttekölie ta ichéitö:

<sup>68</sup> “Skököl dör Israel aleripa Kéköl,

e' de ie' icha kôs tsatök,

e' kuëki ikikökasö taië.

<sup>69</sup> Ie' tö S'tsatökkwak diché taië, e' patké eköl,

e' dör ie' kanè méso bak kiè David e' aleri.

<sup>70</sup> E' dör wës Skököl ttekölpa batse'r

bak ká iaiäe e'pa tö iyë'at es.

<sup>71</sup> Skököl tö iyë'atbak tö ie' tö se' tsatkeräe s'bolökpa ulà a,

ñies wépa éna se' ar suluë esepa kôs yöki.

<sup>72</sup> Ie' tö itté batse'r me' se' yépa bak ká iaiäe e'pa a

tö ie' se' sueraë er siarë wa,

e' kè ska' ie' er chë'wa.

<sup>73</sup> Ie' tö iyë' se' yé bak ká iaiäe kiè Abraham e' a

<sup>74</sup> tö se' tsatkeräitö s'bolökpa ulà a

as se' ser ie' a kè suarta',

<sup>75</sup> ñies as se' ser batse'r ena yësyësë ie' wöa se' tso'ia ttsë'ka e' dalewa.

<sup>76</sup> A ye' bëbéla, mik be' de këchke,

eta be' miraë kewe s'pattök

as se' tö Skököl kiöwa buaë mik ide eta.

E' kuëki be' kirdaë Skököl dör iyi ulitane tsata, e' tteköl.

<sup>77</sup> Israel aleripa a be' tö ttè pakeraë

as ie'pa wa ijcher tö ì sulu wambleke ie'pa tö,  
e' olo'yèmi Skèköl tö ie'pa k<sub>i</sub> itsatkoie.

<sup>78</sup> Skèköl tö se' suëke er siarë wa,  
e' kuëki ie' tö S'tsatkëkwak patkekebitu se' a datse ká jai a  
olo ta' taië wes diwö tskir bla'mi es.

<sup>79</sup> Wépa tso' klöulewa ì sulu ulà a wes s'tso' stui a es,  
wépa tso' iduökewatke e' è k<sub>i</sub>nuk,  
esepe wöa ká ñi'weraë ie' tö as itsatkërdak.  
Ie'pa wëttseraitö sene bèrë ie' ta' e' ñalé k<sub>i</sub>.”

Es Zacarías tö iché.

<sup>80</sup> Juan talane de këchke ta Wiköl Batse'r tso' taië ie' a. Ie' sené ká wé kè yi serku' ee  
dò mik ikéwö de e' kkachoie Skèköl ttekölie Israel aleripa a eta.

## 2

### *Jesús kune' (Mateo 1.18-25)*

<sup>1</sup> Juan kune', e' kéwö ska' ta, Roma wökir kibi kiè Augusto, e' tö ká kos tso' ie' ulà a,  
e' wakpa kiè shtök ké seraa. <sup>2</sup> (Ì dör s'kiè tsá kite mik Cirenio dör ká kiè Siria e' wökir e'  
kéwö ska' ta.) <sup>3</sup> Sulitane kawöta shkökne ká wé iyëpa datse ee e' kiè shtök.

<sup>4-5</sup> José dör David bak Israel blú e' aleri. David kune' Belén ate Judea ee. Erë José serke  
Nazaret ate Galilea ee. E' kuëki ie' mía María ta Belén e' kiè shtök. Ie'pa ttè meuletke ñi  
a senowaie, erë kam ie'pa serwa ñita. María batsò dur. <sup>6</sup> Ie'pa tso' Belén, e' dalewa ie' alà  
kurke, e' diwö de. <sup>7</sup> Wé s'kapökerö, e' wé a, kè ká kuneia ie'pa a kapoie. E' kuëki ie'pa  
míyal iyiwak wé a kapökrö. Eta ee ie' alà tsá kune wák wëm, ipatrëwaitö datsi'tak batsi  
wa mékaitö iyiwak tioie ese kulé' a ka' skéie.

### *Skèköl biyöchökwakpa tö ttè buaë ché obeja kkö'nukwakpa a*

<sup>8</sup> E' nañewe tsinet Belén obeja kkö'nukwakpa tso' iyyiwak kkö'nuk. <sup>9</sup> E' bet ta Skèköl  
biyöchökwak de eköl ie'pa ska' ta Skèköl olo taië e' olo buneka ie'pa pamik, e' yöki ie'pa  
suane taië. <sup>10</sup> Erë Skèköl biyöchökwak tö iché ie'pa a: “Kè a' suanuk, ttè buaë datse ye'  
wa a' a, e' tö pë' ulitane ttsë'weraë buaë. <sup>11</sup> I'ñe a' tsatkëkwak kune David ká a, e' dör  
Skèképa pairine'bitu idi' wa a' blúie e'. <sup>12</sup> A' tö ie' kueraë parratulewa datsi'tak batsi  
wa tär kulé' tso' iyiwak tioie ese a. E' wa a' wa ijcher tö ì ché ye' tö a' a, e' dör moki.”

<sup>13</sup> E' bet ta Skèköl biyöchökwakpa k<sub>i</sub> de taië shute, e' tö Skèköl kikekëka ta ichekerakitö:

<sup>14</sup> “¡Skèköl tso' ká jai a, e' kikökasö!

¡Ñies wépa a Skèköl er buaë chò as esepa ser bèrë ñita ká i' ki!”

<sup>15</sup> Mik Skèköl biyöchökwakpa míyalne ká jai a, eta obeja kkö'nukwakpa tö iché ñi a:  
—Mishka Belén, ì ché Skèköl tö se' a, e' wà sauk.

<sup>16</sup> Eta ie'pa míyal bet, ta María ena José kuërakitö, ta iyëne tö alà àr iyiwak tio kulé a.  
<sup>17</sup> Mik ie'pa isué, eta ì kos ché Skèköl biyöchökwak tö ie'pa a alà e' k<sub>i</sub>, e' pakéne ie'pa tö  
itso'rak ee e'pa a. <sup>18</sup> Mik wépa tö, ì ché obeja kkö'nukwakpa, e' ttsé, eta e'pa kos tkirulune.  
<sup>19</sup> Ttè e' kos bleke María tö ier a ta ie' iwà bikitseke è. <sup>20</sup> Eta obeja kkö'nukwakpa míyalne.  
Ì kos ttsé ie'pa tö, sué ie'pa tö, e' k<sub>i</sub> ie'pa tö Skèköl kikekarami.

### *Alala Jesús tsémi Skèköl wé a*

<sup>21</sup> Mik alala k<sub>i</sub> ká de pàköl (8), eta ie'pa itóttola kkuölit téé tsir ta ikiè mékarakitö Jesús  
wes Skèköl biyöchökwak iyë' María a kam ie' buklurka e' yöki es.



<sup>22</sup> Mik Jesús kune' e' k<sub>i</sub> k<sub>á</sub> de dabom tkéyök (40), et<sub>á</sub> Marí<sub>á</sub> ena José mí<sub>á</sub> e' batse'uk\* wes ttè dalöiëno kit Moisés tö e' tö ichè es. Ie'pa w<sub>á</sub> ilà mí mè Skéköl á Skéköl wé áte Jerusalén e<sub>é</sub>. <sup>23</sup> Skéköl ttè dalöiëno e' k<sub>i</sub> itso' kitule e' tö ichè: “Alaköl alá tsá kune wëm, e' kirdaë batse'r Skéköl á.” E' kuëk<sub>i</sub> ie'pa w<sub>á</sub> ilà mí mè Skéköl á. <sup>24</sup> Nies ie'pa mí<sub>á</sub> iyiwak muk jchè Skéköl á e' batse'woie wes Skéköl ttè dalöiëno tö ichè es: e' dör dù kiè tórtola, et wè'ñe ena et alaki ö nuböl pupula böt.

<sup>25</sup> E' k<sub>é</sub>wö ska' t<sub>á</sub> wëm serke Jerusalén kiè Simeón. Ie' serke yësyësë wes Skéköl k<sub>i</sub> ikiane es. Skéköl tö Israel aleripa tsatkeke e' k<sub>é</sub>wö paneke ie' tö. Wiköl Batse'r tso' ie' á, <sup>26</sup> e' tö ie' á iyë': “be' kè blërpaw<sub>á</sub> kam be' tö wé pairine'bit<sub>u</sub> idi' wa a' blúie patkeraë Skéköl tö e' sa<sub>u</sub> e' yök<sub>i</sub>.” <sup>27</sup> Ie' ittsé Wiköl Batse'r wa tö ie' kawö<sub>tá</sub> shkök Skéköl wé á, e' kuëk<sub>i</sub> ie' mí<sub>á</sub> demi e<sub>é</sub>. E<sub>é</sub> nies José ena Marí<sub>á</sub> demi. Ie'pa w<sub>á</sub> ilala Jesús mí wakanewë wes Moisés ttè dalöiëno tö ichè es. <sup>28</sup> Simeón tö alala k<sub>é</sub>k<sub>á</sub> ulà á t<sub>á</sub> Skéköl k<sub>i</sub>k<sub>é</sub>k<sub>á</sub>itö t<sub>á</sub> ichéitö:

<sup>29</sup> “A Skéköl, ye' dör be' kanè méso,  
ì yè' be' tö ye' á, e' wà suéyö.

E' kuëk<sub>i</sub> ire', ye' duöwami bèrë.

<sup>30</sup> Sa' tsatkökwak patké be' tö e' wà suéiyö ye' wák wöbla wa.

<sup>31</sup> E' patké be' tö k<sub>á</sub> ulitane wakpa á.

<sup>32</sup> Ie' dóraë wes k<sub>á</sub> olo es, pè' kè dör judiowak  
eseпа er ñi'woie as ie'pa éna be' ttè mokië e' wà ár.

Nies Israel aleripa dör be' icha, e'pa k<sub>i</sub>kardak<sub>á</sub> taië ie' batamik.”

Es Simeón tö iché.

<sup>33</sup> Jesús ché Simeón tö Skéköl á, e' tö Jesús mì ena iyé tkiwéw<sub>á</sub>. <sup>34</sup> Ie' tö ikié Skéköl á as e' er buaë chò ie'pa á t<sub>á</sub> ichéitö Marí<sub>á</sub> dör Jesús mì e' á:

—Skéköl ibikeitsbak tö alá i' kuëk<sub>i</sub> se' Israel aleripa taië tsatkërdaë nies e'pa taië weirdaë. Ie' tö Skéköl olo kkacheraë se' á, erë taië pè' tö ie' wateratts<sub>á</sub>. <sup>35</sup> E' tö ì bikeitsekesö e' wà kkacheraë. Be' er á idalërdaë taië wes tabè tièw<sub>á</sub> be' wák er á es.

<sup>36-38</sup> E' wösh<sub>á</sub> t<sub>á</sub> alaköl debitu eköl ie'pa ska' kiè Ana, e' dör Skéköl tteköl. Ie' yé kiè Fanuel, e' dör Aser aleri. Ie' dör kéképalatke. Ie' sene'w<sub>á</sub> mik iià busi et<sub>á</sub>. Ie' sene' wëm e' t<sub>á</sub> duas kul (7) è t<sub>á</sub> iwëm blënew<sub>á</sub>. Ie' schönew<sub>á</sub> e' k<sub>i</sub> duas de dabom paryök k<sub>i</sub> tkél (84). Ie' serkeie Skéköl wé á idalöiök ñië nañeë S'yé t<sub>á</sub> ttè wa ena batsè wa. Ie' tö wéstela chémi Skéköl á alala Jesús kuëk<sub>i</sub>. Nies ipakéitö taië Israel aleripa malepa tso' itsatké panuk esepa á.

#### *José ena Marí<sub>á</sub> míyalne Nazaret*

<sup>39</sup> Mik José ena Marí<sub>á</sub> e'pa tö ì k<sub>os</sub> kanewé wes Skéköl ttè dalöiëno tö ichè es, et<sub>á</sub> ie'pa míyalne Nazaret áte Galilea e<sub>é</sub>, e' dör iwakpa k<sub>á</sub>. <sup>40</sup> Alala talar è, e' tso' buaë, nies ie' yörke buaë, ik<sub>á</sub>bikeitsöke taië t<sub>á</sub> Skéköl er buaë chöke ie' á.

#### *Jesús áte Skéköl wé á*

<sup>41</sup> Duas bit t<sub>á</sub> Jesús mì ena iyé mi'ke Jerusalén Judiowak Yépa Yërulune Egipto e' k<sub>é</sub>wö tkö'uk. <sup>42</sup> Mik Jesús k<sub>i</sub> duas de dabom eyök k<sub>i</sub> bök (12), et<sub>á</sub> ie'pa míyal kawö e' skà tkö'uk wes ie'pa wöblar es. <sup>43</sup> Mik ikéwö tka, et<sub>á</sub> ie'pa míyalne iu á, erë Jesús áte Jerusalén, e' kè jcher imì w<sub>á</sub> iyé w<sub>á</sub>. <sup>44</sup> Ie'pa tö ibikeitsé tö ie' dami iyamipa t<sub>á</sub>. Ie'pa shk<sub>é</sub> k<sub>á</sub> et t<sub>á</sub> ie'pa isué tö Jesús kè ku' ie'pa t<sub>á</sub>. E' kuëk<sub>i</sub> ie'pa iyulémi iyamipa dami taië e'pa shua. <sup>45</sup> Erë ie'pa kè w<sub>á</sub> ie' kune, e' kuëk<sub>i</sub> ie'pa míane Jerusalén iyulökne.

<sup>46</sup> K<sub>á</sub> de böiki es, et<sub>á</sub> ie'pa tö Jesús kué Skéköl wé á. Ie' tkër s'wöbla'uk ttè dalöiëno wa wakpa shua ikittsök ena ichakök. <sup>47</sup> Jesús tö iuteke e' ttsé ie'pa k<sub>os</sub> tö e'pa wökrarulune

\* 2:22 e' batse'uk: E' batse'wè i' e' kè dör wes se' bribriwak e' batse'ù es awá wa ì wa.

ittsök ena isaük tö wes ie' wä iyi jcher taië. <sup>48</sup> Mik imì ena iyé tö ie' sué ee, etä ie'pa tkinewä. Etä imì tö iché ia:

—A alà, ¿iök be' e' wamblé sa' tã es? ¿Iök be' tö be' yé ena ye' eriwé ekké? Sa' be' yulé taië.

<sup>49</sup> Jesús tö ie'pa iüté:

—¿Iök a' ye' yulé taië? ¿Wes a' kè wä ijcher tö a' ye' kuëraë ye' Yé u a?

<sup>50</sup> Erè ì ché ie' tö, e' wà kè ane ie'pa éna.

<sup>51</sup> Etä imíane ie'pa tã Nazaret tã ie' tö ie'pa ttò iuteke buaë kekraë. E' qos bleke imì tö ie' er a. <sup>52</sup> Jesús talarke buaë, ñies ie' kí yörke taië, kabikeitsöke buaë, wër buaë Skëköl wa, ñies s'ditsö wa.

### 3

*Juan S'wöskuökwak*

*(Mateo 3.1-12; Marcos 1.1-8; Juan 1.19-28)*

<sup>1-2</sup> Ká et tã Skëköl tté Juan dör Zacarías alà e' tã wé kè yi serku' ee ipatkoie ittè pakök. E' kéwö ska' tã wëm kiè Tiberio e' dör Roma wökir kibi. Ie' tkënekä ká e' wökirie, e' kí duas de dabom eyök kí skël (15). Ie' dikia ká tsitsirpa wökirpa tso'. E'pa kiè dör i' es: Poncio Pilato dör Judea wökir, Herodes dör Galilea wökir, e' ël kiè Felipe e' dör Iturea ena Traconítide e' wökir ena Lisantias dör Abilinia wökir. E' kéwö ska' tã Anás ena Caifás e'pa dör judiowak sacerdotepa wökirpa. E' kéwö ska' tã Skëköl tté Juan tã ká sir poë wé kè yi serku' ee. <sup>3</sup> Etä Juan mía di' kiè Jordán kkömik pë' serke ee, e'pa a Skëköl tté pakök. Ie' tö iché ie'pa a: “A' er mane'ú Skëköl a as a nuì olo'yòitö a' kí tã a' e' wöskuólor iwà kkachoie.” <sup>4</sup> Isaías dör Skëköl tteköl e' tö Juan tté kit ká iaiaë Skëköl yëkkuö kí, e' tö iché: “Ká sir poë wé kè yi serku', ee yile ttöraë aneule, e' tö icheraë:

‘A' er mane'ú Skëköl datse e' yöki,  
e' dör wes ñalä yuèsö yësyësé ie' yöki es.

<sup>5</sup> Kåblë qos kawöta wà iëka seraa,  
ñies kabata ena kakkuö qos kawöta wè ñikkëë,  
ñalä shkuli'shkuli', e' qos kawöta yëttsa yësyësé,  
ñies ñalä suluë, e' qos kawöta paiklëttsa buaë.

<sup>6</sup> Skëköl tö s'tsatkè, e' suëraë sulitane tö.’ ”\*  
Es Isaías iyè'.

<sup>7</sup> Pë' debitu taië Juan ska' as ie' tö ie'pa wöskuò tã ie' tö ie'pa a iché: “¿A' dör s'kütö'ukwakpa suluë wes tkabè es! ¿Yi tö a' iché tö a' tkömishkar Skëköl tö a' we'ikeraë siarè e' ulä a? <sup>8</sup> A' senú yësyësé, e' wa iwërimiwa tö mokí a' er mane'wétke Skëköl a. Kè a' tö ibikeitsök tö a' dör Abraham aleripa e' è kuëki Skëköl kè tö a' we'ikepa. Ye' tö a' a iché tö Skëköl kí ikiane, e' tã ie' tö ák ikkë yuèmi Abraham aleripaie. <sup>9</sup> Ie' dör wes kal bikökwak es. Ie' tso'tke kal ulitane kè wörtã' ese qos bikökök ña'wëwa bö' a.”

<sup>10</sup> Etä ie'pa tö Juan a ichaké:

—¿E'ma ì wèmi sa' tö?

<sup>11</sup> Ie' tö ie'pa iüté:

—Yi wä datsi' tso' böt, e' etka mú wé kè wä itã' ese a. Es ñies yi wä chkè tso', ese tö chkè kaktú wé kè wä itã' ese a.

<sup>12</sup> Inuköl shtökwakpa Roma wökirpa a, e'pa welepa debitu Juan ska' as ie' tö ie'pa wöskuò, ie'pa tö ie' a ichaké:

—A' s'wöbla'ukwak, ¿ì wèmi sa' tö?

<sup>13</sup> Ie' tö ie'pa iüté:

—Kè a' tö inuköl shtök qos ikawöta shtë e' tsatã.

<sup>14</sup> Ñies ñippökwakpa welepa ie' a ichaké:

\* 3:6 Isaías 40.3-5

—Ñe' ta ʒì wèmi sa' tō?  
Ie' tō ie'pa iuté:

—Kè a' s'pauñuk inuköl yottsaië. Kè a' kachök s'ña'woie. Kos a' patorke, ekkè è klö'ú, ta a' ttsë'nú buaë iwa.

<sup>15</sup> Wé pairine'bitu idi' wa s'blúie e' datske bet, e' wà panuk sulitane tso'. E' kueki ie'pa tso' ibikeitsök tō isalema Juan dör e'. <sup>16</sup> Erë Juan tō iché ie'pa ulitane a: “Moki ye' a' wöskueke di' wa. Erë ye' itöki idatse eköl, e' tō a' ierawa Wiköl Batse'r a ena bö' a. Ie' dör kékëpa taië ye' tsata, e' kueki ie' klökkuö kicha è kè wötsënanuk ye' siarla e' a. <sup>17</sup> Ie' tō se' wöpperaë wes iyiwö wöppè es. Ibua'buä bleraëtö idichakuö a, erë isulusi uyerawaitö bö' kè wöitta'wa e' a.”

<sup>18</sup> Es Juan ie'pa patté ttè ese wa taië. Es ie' tō S'tsatkëkwak ttè buaë e' pakeke ie'pa a. <sup>19</sup> Nies Juan tō Herodes dör Judea wökir, e' uñé. Herodes serke ie' wák èl e' alaköl kiè Herodías e' ta. Nies ie' tō ì sulu skà wamblé taië. E' kueki Juan ie' uñé. <sup>20</sup> Herodes tō ì sulu wamblé taië, erë e' kíie ta ie' tō Juan wötökwä patké s'woto wé a.

*Jesús wösune*

*(Mateo 3.13-17; Marcos 1.9-11)*

<sup>21</sup> Mik Juan bak sulitane wöskuök, eta nies ie' tō Jesús wöskué. Mik Jesús tso'ia ttök S'yé ta, e' dalewa ká jai kköbunane <sup>22</sup> ta Wiköl Batse'r de ie' ki wër nuböl sù. Eta ttö ttsëne ká jai a, e' tō iché:

—Be' dör ye' alà dalër taië ye' éna, e' wër ye' wa buaë shute.

*Jesús yépa bak e'pa kiè*

*(Mateo 1.1-17)*

<sup>23</sup> Mik Jesús ki duas de dabom mañayök (30) ulatök, eta ie' tō Skëköl ttè pakémitke. Ie'pa tō ibikeitsé tō ie' dör José alà. José dör Elí alà†, <sup>24</sup> e' dör Matat alà, e' dör Leví alà, e' dör Melquí alà, e' dör Janai alà, e' dör José alà, <sup>25</sup> e' dör Matatías alà, e' dör Amós alà, e' dör Nahúm alà, e' dör Eslí alà, e' dör Nagai alà, <sup>26</sup> e' dör Máhat alà, e' dör Matatías alà, e' dör Semeí alà, e' dör Josec alà, e' dör Judá alà, <sup>27</sup> e' dör Johanán alà, e' dör Resá alà, e' dör Zorobabel alà, e' dör Salatiel alà, e' dör Nerí alà, <sup>28</sup> e' dör Melquí alà, e' dör Adi alà, e' dör Cosam alà, e' dör Elmadam alà, e' dör Er alà, <sup>29</sup> e' dör Josué alà. e' dör Eliézer alà, e' dör Jorim alà, e' dör Matat alà, <sup>30</sup> e' dör Leví alà, e' dör Simeón alà, e' dör Judá alà, e' dör José alà, e' dör Jonam alà, e' dör Eliaquim alà, <sup>31</sup> e' dör Melea alà, e' dör Mená alà, e' dör Matatá alà, e' dör Natán alà, <sup>32</sup> e' dör David alà, e' dör Jesé alà, e' dör Obed alà, e' dör Booz alà, e' dör Sélah alà, e' dör Nahasón alà, <sup>33</sup> e' dör Aminadab alà, e' dör Admín alà, e' dör Arni alà, e' dör Esrom alà, e' dör Fares alà, e' dör Judá alà, <sup>34</sup> e' dör Jacob alà, e' dör Isaac alà, e' dör Abraham alà, e' dör Térah alà, e' dör Nahor alà, <sup>35</sup> e' dör Serug alà, e' dör Ragau alà, e' dör Péleg alà, e' dör Heber alà, e' dör Sélah alà, <sup>36</sup> e' dör Cainán alà, e' dör Arfaxad alà, e' dör Sem alà, e' dör Noé alà, e' dör Lámeç alà, <sup>37</sup> e' dör Matusalén alà, e' dör Enoc alà, e' dör Jéred alà, e' dör Mahalalel alà, e' dör Cainán alà, <sup>38</sup> e' dör Enós alà, e' dör Set alà, e' dör Adán alà. Adán dör Skëköl alà.

## 4

*Bé tō Jesús erkiöwé*

*(Mateo 4.1-11; Marcos 1.12-13)*

<sup>1</sup> Jesús tso' Jordán di' kkömik, ie' a taië Wiköl Batse'r tso'. E' tō ie' tsémi ká sir poë wé kè yi serku' eë. <sup>2</sup> Eë ie' sené dökä ká dabom tkëyök (40), e' dalewa bé tso' ie' erkiöuk ì sulu wamblök. E' kèwö kos ta ie' kè chkane yës, e' ukuöki ta ie' dué bli wa. <sup>3</sup> Eta bé tō ie' a iché:

—Be' dör Skëköl Alà, e' ma ichó ak se a tō iyönú chkeie.

<sup>4</sup> Jesús tō iuté:

—Skëköl yëkkuö tō ichè: “Kè se' senuk chkè è mik.”\*

† 3:23 Kiè ikképa kos dör wëpa è kiè. \* 4:4 Deuteronomio 8.3

<sup>5</sup> E' ukuöki ta bé tö ie' tsémi kabata kakkeë a, ta ee ká kōs wes ká tkōke ekkē kkachéitō ia bet. <sup>6</sup> Ie' tö iché ia:

—Ká kōs suëbö e' meule ye' ulà a, e' kuëki yi a ye' éna imak, ese a ye' imeke. Ye' be' yuèmi ká kōs e' blúie. Ñies íyi buaë tso', inuköl tso', ì tso' ká ulitane ki, e' kōs wákie be' yuèmi ye' tö. <sup>7</sup> Be' e' tkéwa kuchewö ki ye' wörki ye' dalöiök, e' ta e' kōs döraë be' ulà a.

<sup>8</sup> Erë Jesús ie' iüté:

—Skököl yëkkuö tö ichè: 'Skököl dör a' Këköl, e' è dalöiö; ie' è a a' senú.'† E' kuëki be' e' sköttsa ye' yöki bánet.

<sup>9-11</sup> E' ukuöki ta bé wa imítser Jerusalén ta iduékaitö Skököl wé e' bata ki kakkeë ta ichéitö ia:

—Skököl yëkkuö tö ichè:

'Skököl tö ibiyöchökwakpa patkeraë be' kkö'nuk be' tsatök.

Ie'pa be' klö'weraká iulà a as be' klö kè tērwa ák ki.‡

Es Skököl yëkkuö tö ichè, e' kuëki be' dör Skököl Alà, e' ma be' e' ppöömi döttsa iski.

<sup>12</sup> Erë Jesús iüté:

—Ñies Skököl yëkkuö tö ichè: 'A' kè kawö ta' a' Këköl wötsiriuk.'§

<sup>13</sup> Mik bé kè wa ì skà kune Jesús erkiöwoie, eta ie' iméat dò iëttökicha.

#### *Jesús dene Galilea*

(Mateo 4.12-17; Marcos 1.14-15)

<sup>14</sup> Jesús minea dene Galilea. Këkraë Wiköl Batse'r diché tso' ie' a taië. Ie' tté buneká ká e' kōs a. <sup>15</sup> Judiowak ñi dapa'wo wé kōs tso', e' a ie' tö s'wöbla'weke Skököl ttè wa ta sulitane tö ie' kikekëkë buaë.

#### *Nazaret wakpa tö Jesús uyéttsa iká ki*

(Mateo 13.53-58; Marcos 6.1-6)

<sup>16</sup> Jesús demine Nazaret wé ie' talane ee. Mik judiowak eno diwö de, eta ie' dewa ie'pa ñi dapa'wo wé a wes ie' wöblane es. Eta ee ie' e' duéser Skököl yëkkuö aritsök ie'pa tso' ee, e'pa kukua. <sup>17</sup> Yëkkuö kit Skököl tteköl kiè Isaiás e' tö, e' mé ie'pa tö ie' a suë. Ie' ishuppée ta ikuéitö wé Skököl kanè méso bua'iewa e' tté tso' kitule ee. E' tö ichè i' es:

<sup>18</sup> "Skököl Wiköl tö ye' pairi'bitu idi' wa ttè buaë pakoie s'piarëpa a, e' kuëki ie' tso' ye' a.

Ie' tö ye' patkë'bitu ichök s'tso' klöulewa ì sulu ulà a esepa a tö 'a' yërdattsa.'

Ie' tö ye' patkë'bitu wépa wöbla kè wawër esepa wöbla bua'ukne.

Ie' tö ye' patkë'bitu wépa weirke siarë s'sulusipa ulà a, esepa tsatök.

<sup>19</sup> Ie' tö ye' patkë'bitu ipakök sulitane a tö Skököl er buaë chöke se' a, e' kéwö detke."\*

<sup>20</sup> E' ukuöki ta Jesús tö yëkkuö wötréwane mé judiowak ñi dapa'wo wé e' kimukwak a, ta ie' tkéser iwà pakök. Kōs s'daparke ee e'pa tö ie' suéwa krereë. <sup>21</sup> Eta ie' tö iché ie'pa a:

—Skököl yëkkuö aritsé ye' tö ñe', e' wà tka i' ta.

<sup>22</sup> Ie'pa ulitane tö icheke ie' dör pë' buaë. Ñies ttè bua'buä chekeitö, e' tö sulitane tkiwéwa. Ie'pa tö iché ñi a:

—A'ka, ¿ie' kè dör José alà?

<sup>23</sup> Ie' tö iüté:

—Ye' wa ijcher buaë a' tö ye' cheraë ttè i' wa: 'A s'kapeyökwak, be' wák e' bua'úne.' Ñies a' tö ye' a icheraë: 'Sa' ittsé tö ì kè or yi a ese wé taië be' tö Cafarnaúm, ese ú ñies íe be' wák ká a.'

<sup>24</sup> Ie' tö ikí ché ie'pa a:

—Moki ye' a' a ichè tö Skököl ttekölpa kōs kè dalöiërta' iwakpa ká ki. <sup>25</sup> Moki ye' a' a ichè tö mik Skököl tteköl kiè Elías bak, eta kalí kè yène yës döka duas mañal kí shaböts ta bli bak poë Israel. E' kéwö ska' ta alakölpa schópa tso' taië Israel, <sup>26</sup> erë Skököl kè wa

† 4:8 Deuteronomio 6.13    ‡ 4:9-11 Salmo 91.11-12    § 4:12 Deuteronomio 6.16    \* 4:19 Isaiás 61.1-2

Elías patkéne ie'pa ska' ikimukrak. Ie' tö Elías patké alaköl dör schó eköl serke Sarepta, ká e' ate tsinet Sidón, e' kimuk. <sup>27</sup> Es ñies mik Skéköl tteköl kiè Eliseo e' bak, e' kéwö ska' ta lepra tö s'teke taië Israel. Erë ie'pa kos kè buaone. Wëm kiè Naamán dör ká kiè Siria e' wak, e' è buaone Eliseo tö Skéköl batamik.

<sup>28</sup> Mik ie'pa tö ttè e' ttsé, eta ie'pa kos tso' judiowak ñi dapa'wo wé a, e'pa uluneka taië ie' ki. <sup>29</sup> Ie'pa iëneka ie' ki ta iuyéttarakitö ká e' a bánet. Ká e' tso' kabata kakkeë e' ki, ie'pa wa ie' mitsër dò katte kakkeë e' kkömik batrèemi as iduöwa. <sup>30</sup> Erë ie' tkami ie'pa shua ta imía.

*Wëm eköl a aknama tso' e' bua'wéne Jesús tö  
(Marcos 1.21-28)*

<sup>31</sup> Jesús miá Cafarnaúm, ká e' ate Galilea. Eno diwö bit ekké ta ie' tö s'wöbla'weke judiowak ñi dapa'wo wé a. <sup>32</sup> Ie' tö s'wöbla'weke ttè mokí diché ta' taië ese wa, e' kueki ie'pa tkinewa.

<sup>33</sup> Ká et ta ie'pa ñi dapa'wo wé a wëm dur eköl e' a aknama ö wimblu sulusi tso', ie' tö iché aneule:

<sup>34</sup> —A Jesús Nazaret wak, sa' múat bèrè. ¿Iie be' tso' sa' tsiriuk? ¿Be' debitu sa' eukwa? Ye' wa be' suule. Ye' wa ijcher tö yi be' dör. Be' dör batse'r patké'bitu Skéköl tö e'.

<sup>35</sup> Jesús tö aknama e' uñé:

—¿Be' siwa'blówa, be' e' yóttsa wëm se a!

Eta aknama tö wëm e' érö iski sulitane wörki, ta ie' e' yéttsa ia kè wa wes wëm one.

<sup>36</sup> Sulitane tkinewa iweblök ta ñi chakérak:

—¿Ttè wése dör ñe'? Ttè diché ta' taië e' wa wëm wí wimblupa sulusi ké e' yöktsa ta ie' yélur je'.

<sup>37</sup> Eta Jesús tté buneka taië ká e' kos a.

*Jesús tö Simón yák bua'wéne  
(Mateo 8.14-15; Marcos 1.29-31)*

<sup>38</sup> Jesús e' yéttsa judiowak ñi dapa'wo wé a ta imía Simón u a. Ee Simón yák kiri'weke duè dalölö tö taië. Ie'pa kköché Jesús a tö ibua'úne. <sup>39</sup> Eta Jesús e' wöéwa ie' ki ta duè dalölö uñéitö ta ibuanene. E' bet ta ie' e' kéká ta ilè yulémiitö ie'pa a ñè.

*Jesús tö s'kirirke taië esepa bua'wéne  
(Mateo 8.16-17; Marcos 1.32-34)*

<sup>40</sup> Diwö mi'kewatke ta taië pé' wa iyamipa kiri'weke duè tsakië tö, esepa debitu taië Jesús ska'. Ie' ulà méka ie'pa kirirke kos ki eköl eköl, ta es ie' tö ibua'wenerak seraá.

<sup>41</sup> Ñies e' shua taië s'tso' tteke aknamapa tö. Mik ie' tö ie'pa bua'wéne, eta aknama e' yélur ie'pa a ta aknamapa tö iché ie' a aneule:

—¿Be' dör Skéköl Alà chökke!

Erë ie' tö ie'pa uñé. Ie'pa wa ijcher tö ie' dör wé pairine'bitu idi' wa s'blúie e'. E' kueki kè ie' wa ie'pa kàne ttök.

*Jesús tö Skéköl tté paké judiowak ñi dapa'wo wé kos a  
(Marcos 1.35-39)*

<sup>42</sup> Bule es ká ñine ta Jesús e' yéttsa miá bánet wé kè yi ku' ese ska'. Erë ie'pa tö ie' yulé. Mik ie'pa tö ikué, eta ie'pa tö ima'wé wöklö'wé as kè imi'. <sup>43</sup> Erë ie' tö ie'pa iuté:

—¿I blúie Skéköl tso' e' tté buaë pakök ye' kawöta ñies judiowak serke ká malepa a esepa a, eseie ye' patkéne'bitu.

<sup>44</sup> E' kueki ie' miá tté pakök judiowak ñi dapa'wo wé tso' taië Judea e' a.

*Jesús tö wa nima klöne taië  
(Mateo 4.18-22; Marcos 1.16-20)*

<sup>1</sup> Etökicha t̄a Jesús dur s'wöbla'uk batsöri kiè Genesaret e' kkömik (batsöri e' kiè ñies Galilea). Taië p̄e' dapane ie' ska' Skëköl ttè pakekeitö e' kittsök, e' kè wa ie' shkoia. <sup>2</sup> Nima klö'ukwakpa dene tso' ikla' skuök, e'pa kanò àr bötö, e' sué Jesús tö. <sup>3</sup> T̄a ie' e' iéka kanò etö a, e' dör Simón kanò. Ie' tö ikié Simón a: “Be' we'ikèyö, kanò patkómi béré wöwík.” Ie' e' tkéser kanò a t̄a ie'pa wöbla'wéitö. <sup>4</sup> Mik ie' s'wöbla'wé one, et̄a ie' tö iché Simón a:  
—Kanò patkóumi di' shua t̄a a' tö kla' uyómi nima klö'woie.

<sup>5</sup> Simón tö ie' iuté:

—A s'wöbla'ukwak, nañeë sa' ima'wé, erè kè sa' w̄a iwà klöne yës. Erè be' ttò wa ye' tö kla' uyekene.

<sup>6</sup> Mik ie'pa tö ikla' uyémi t̄a iwà klö'wérakitö taië, e' tö kla' batseeketke. <sup>7</sup> T̄a iulà kkaché iyamipa tso' kanò ètö a e'pa a' shkó sa' kimuk. Iyamipa debitu ie'pa kimuk t̄a kanò bötö wà iéraitö chië, tsir et̄a kanò wöturkewatke di' a. <sup>8</sup> Mik e' sué Simón Pedro tö, et̄a ie' e' tkéw̄a kuchë k̄i Jesús klö' ska' t̄a ichéitö ia:

—A Skëképa, ye' dör p̄e' sulusi, be' e' skótt̄sa ye' yöki!

<sup>9</sup> Nima klöne taië, e' tö Simón Pedro ena iyamipa kos tso' ie' t̄a, e'pa tkiwéw̄a taië, e' kuek̄i ie' tö iché es. <sup>10</sup> Ñies Santiago ena Juan dör Zebedeo ala'r e'pa tkirulune. Ie'pa kanëblöke Simón t̄a nima klö'uk. Et̄a Jesús tö iché Simón a:

—Kè be' suanuk. Be' kè tö nima klö'wepaia. I' t̄ami be' w̄a s'ditsö bituraë ye' ska'.

<sup>11</sup> Et̄a ie'pa tö kanò ikléka, t̄a íyi kos tuléat ie'pa tö eë t̄a imíyal Jesús t̄a.

*Wëm eköl kiri'weke lepra tö e' bua'wéne Jesús tö  
(Mateo 8.1-4; Marcos 1.40-45)*

<sup>12</sup> Etökicha t̄a Jesús tso' Judea ké et a. Et̄a eë wëm debitu eköl kiri'weke lepra\* tö. Mik ie' tö Jesús sué, et̄a ie' wöéwa dò iski t̄a ikköché taië Jesús a:

—A këképa, be' k̄i ikiane, e' t̄a be' a ye' buarmine as ye' batse'rne.

<sup>13</sup> Jesús tö ikéw̄a ulà wa t̄a ichéitö ia:

—Tó, ye' k̄i ikiane. Be' dene batse'r.

E' wösh̄a t̄a ie' buanene, kè k̄i lepra ku'ia. <sup>14</sup> Et̄a Jesús tö ie' a iché:

—Kè ichar yi a. Be' yú e' kkachök sacerdote a. Ì muk Moisés tö a' ka' e' batse'woie, ese tsúmi mè Skëköl a ie'pa a ikkachoie.

<sup>15</sup> Erè Jesús tté t̄inek̄a taië shute. Taië p̄e' döke ie' ska' ie' ttè kittsök, ñies as ie' tö ie'pa bua'üne. <sup>16</sup> Erè taië ie' mi'ke bánet ttök S'yé t̄a wé kè yi ku' ese ska'.

*Jesús tö wëm eköl kraulew̄a e' bua'wéne  
(Mateo 9.1-8; Marcos 2.1-12)*

<sup>17</sup> Etökicha t̄a Jesús tso' s'wöbla'uk t̄a eë fariseowakpa ena s'wöbla'uk ttè dalöiëno wa wakpa tulur Jesús tso' s'wöbla'uk e' kittsök. Ie'pa datse k̄a kos tso' Galilea ñies Judea ena Jerusalén. Jesús w̄a Skëköl diché tso' s'kirirke ese bua'wone. <sup>18</sup> Et̄a wëpa wëlepa debitu e'pa w̄a wëm kraulew̄a debitu eköl k̄a'la k̄i. Ie'pa éna iduè tsakmi u shua wé Jesús dur eë as ie' tö ibua'üne. <sup>19</sup> Erè taië s'tso', e' kuek̄i ie'pa kè a itkòmi wes u shua. E' kuek̄i ie'pa m̄ika u bata k̄i† tö u jchéé t̄a iduè émirakitö énaë dött̄sa iski wé Jesús dur p̄e' tso' taië e' shua eë. <sup>20</sup> Mik Jesús tö isué tö mok̄i ie'pa erblé ie' mik, et̄a ie' tö iché wëm kirirke e' a:

—A yami, ì sulu kos wamblébö, e' nuí olone be' k̄i.

<sup>21</sup> Et̄a s'wöbla'uk ttè dalöiëno wa wakpa ena fariseowakpa tö ibikeitsè: “¿Ima wëm wí erbikò tö ie' dör yi e' tö Skëköl ché suluë es? Skëköl è a se' nuí olo'yarmi.”

<sup>22</sup> Erè ì bikeitsök ie'pa tso' e' suéw̄a Jesús tö bet. E' kuek̄i ie' tö ie'pa a ichaké:

\* 5:12 lepra: E' dör duè s'méwöie ese. Judiowak tö iklö'wé tö duè e' tö yi tteke ese dör ñá. Esepa batseketts̄a bánet kè a kawö t̄a' senuk p̄e' malepa shua. Ñies ie'pa kè a kawö t̄a' shkow̄a Skëköl wé a. † 5:19 u bata k̄i: Ie'pa u kè dör wes se' bribriwak u es. Ie'pa u tsabata dör kkuëie klökata t̄a'.



—ǀ k̄ueki a' ibikeitseke es? <sup>23</sup> Ye' tō wēm i' bua'wēm̄ine aš ishkōne, e' ta ǀwēs a' tō iklō'wēm̄i tō ye' kē a inuì oloyanuk iki? <sup>24</sup> Ye' dör S'ditsö Alà, sù e' tō a' a ikkachè tō ye' wā kawō ta' ká i' a nuì olo'yoie.

Etā ie' tō iché wēm kraulewā e' a:

—Be' e' kókā, be' ka'la kókā ta be' yúne u a.

<sup>25</sup> E' wōshā ta ie' e' kēka sulitane wörki ta ka'la a ie' debitu, e' kékaitō ta imiāne iu a Skéköl k̄ikékaramiitō taiē. <sup>26</sup> Ie'pa wōkrarulune iweblök ta Skéköl k̄ikékarakitō taiē. Ie'pa suane ta ichéitörak:

—ǀ sué se' tō ǀñe, e' kē sūule se' wā yēs.

*Jesús tō Leví kié ittökataie*

*(Mateo 9.9-13; Marcos 2.13-17)*

<sup>27</sup> E' ukuōki ta Jesús míā, e' tō wēm sué eköl kié Leví, e' dör inuköl shtökwak Roma wōkirpa a. Ie' tkēr ikaneblöke e' wé a. Ta Jesús tō ie' a iché:

—Be' shkó ye' ta ye' ttökataie.

<sup>28</sup> Etā Leví e' kēka tō ǀkos méat ta imiā Jesús ta.

<sup>29</sup> E' tsáǀi ta Leví tō ikéwō tkō'wé buaē chkè wa di'yè wa Jesús dalöioie. Inuköl shtökwakpa de taiē. Ñies pē' kuā'kipa de, e'pa tulur chkök Jesús ena ittökatapa ta. <sup>30</sup> Mik fariseowakpa ena s'wōbla'uk ttè dalöiēno wa wakpa tō isué, etā ie'pa tō ichémi Jesús ttökatapa a:

—ǀlók a' chköke di' yöke inuköl shtökwakpa ta ena pē' sulusipa malepa ta?

<sup>31</sup> Jesús tō ie'pa iüté:

—Wépa kē kirirku' esepa kē ki s'kapeyökwak kiane. Erē wépa kirirke esepa ki s'kapeyökwak kiane. <sup>32</sup> Ye' kē dē'bitu wépa e' bikeitsö tō iserke yēsyesē esepa kiök. Ye' dē'bitu pē' sulusipa kiök aš ie'pa er mane'ù.

*ǀ k̄ueki Jesús ttökatapa kē batsötā'*

*(Mateo 9.14-17; Marcos 2.18-22)*

<sup>33</sup> Judiopa wōkirpa welepa tō iché Jesús a:

—Juan S'wōskuökwak ttökatapa batsöke taiē, ttöke S'yé ta taiē, wēs fariseowakpa klépa tō iweke es, erē be' ichapa chköke ena di'yöke kēkraē kē batsötā'.

<sup>34</sup> Jesús tō ie'pa iüté:

—Mik s'kiule ulabatsè kēwō tkō'uk ta ǀwēs ie'pa batsömi wēm ulabatske ese tso'ia ie'pa ta e' dalewa? <sup>35</sup> Erē ikéwō dōraē etā ie' mi'datser ie'pa yöki. E' je' ta ie'pa batsöraē.

<sup>36</sup> Ñies Jesús tō ie'pa wōbla'wé tō judiowak ttè kēchke e' kē shuturpaka ie' ttè pa'alī ta. E' kleítō ttè i' wa:

—Kē yi tō datsi' pa'alī tak teepa batsèwā datsi' kēchke wöyuowaie. Iwésö es, e' ta e' tō datsi' pa'alī we'ikéwa, ñies itak pa'alī kē mēne buaē datsi' kēchke ki. <sup>37</sup> Ñies vino pa'alī kē tērtā'ka iyiwak kkuölit yöule ibloie ese kēchke a. Itékasö es, e' ta mik ibacha'nebitu, etā ikkuölit kēchke jchèemiitō. Es vino ena ikkuölit weirwami éme. <sup>38</sup> E' k̄ueki vino pa'alī tekeka ikkuölit pa'alī a. <sup>39</sup> Yi tō vino bacha'bacha yeke, ese tō ibikeitseke tō e' ya' bua' vino pa'alī tsata. E' k̄ueki ie' kē éna vino pa'alī yakia. Es ñies a' tō ibikeitseke tō ye' ttè pa'alī e' kē dör buaē.

## 6

*Jesús ttökatapa tō trigo wöikléé eno diwö a*

*(Mateo 12.1-8; Marcos 2.23-28)*

<sup>1</sup> Etökicha ta eno diwö a Jesús dami trigo shuā ta ittökatapa tō trigo wöiklérami ta iwösiéitō irikirik ulà wa ta ikatéramirakitō. <sup>2</sup> Etā fariseowakpa welepa tō ie'pa a ichaké:

—ǀ k̄ueki a' tso' ǀ kē kēwō ta' wè eno diwö a ese uk?

<sup>3</sup> Jesús tō ie'pa iüté:

—Ì ɔ' David tò ká iaiäe ɔ'e' kè aritsule a' wá Skéköl yékkuö kǐ? Etökicha tǎ ie' ena iklépa dué bli wa. <sup>4</sup> Ie' dè'wá Skéköl wé a tǎ pan meule Skéköl a e' klö'wéitö ñéitö. Ñies ie' tò iblaté iklépa a tǎ inérakitö. Sacerdotepa è a pan e' kéwö tǎ ñè. Erè a' éna iane tò ì ɔ' David tò ñe' kè dör suluë Skéköl wöa.

<sup>5</sup> Ñies Jesús tò iché ie'pa a:

—Ye' dör S'ditsö Alà, e' wá kawö tǎ' ichoie tò ì dör buaë ö ì dör suluë wè eno diwö a.

*Wëm eköl ulà siulewá e' bua'wéne Jesús tò  
(Mateo 12.9-14; Marcos 3.1-6)*

<sup>6</sup> Eno diwö skà tǎ Jesús dewá judiowak ñi dapa'wo wé a tǎ eé ie' tò s'wöbla'wémitke. Tǎ eé wëm detkër eköl e' ulà bua'kka siulewá. <sup>7</sup> S'wöbla'uk ttè dalöiëno wa wakpa ena fariseowakpa éna ie' kkatak ilè kǐ, e' kuëkǐ ie'pa tso' ie' weblök tò wëm ñe' bua'wèmineitö eno diwö a. <sup>8</sup> Erè ì bikeitseke ie'pa tò, e' suéwá ie' tò, e' kuëkǐ ie' tò iché wëm ulà siulewá e' a:

—Be' e' kóka tǎ be' e' duóser íe sulitane wöshäë.

Eta wëm e' duéser. <sup>9</sup> Jesús tò iché ie'pa a:

—A' chakèyö: ɔ' kèwö tǎ' se' a wè eno diwö a: ì buaë ö ì suluë? ɔ'S'tsátkök ö s'ttökwa?

<sup>10</sup> E' ukuökǐ tǎ ie' tò ie'pa ulitane weblé e' pamik tǎ ichéitö wëm ulà siulewá e' a:

—Be' ulà shulöö.

Tǎ ie' tò iwé es eta iulà buanene. <sup>11</sup> E' tò ie'pa uluwéka taië, tǎ iñi chakérak, ɔ'wes se' tò Jesús wèmi?

*Jesús tò ittekölpa tsá dabom eyök kǐ böi e'pa shushté  
(Mateo 10.1-4; Marcos 3.13-19)*

<sup>12</sup> E' kéwö ska' tǎ Jesús mía kabata a ttök S'yé tǎ, eé ie' tté ie' tǎ nañeë. <sup>13</sup> Mik ká ñine, eta ie' tò ittökatapa kié dapa'wé ie' ta. E' shua ie' tò wépa shushté dabom eyök kǐ böi (12), e'pa kiéitö ittekölpa tsá. <sup>14</sup> Ie'pa kiè i' es: Simón, e' kiè méka Jesús tò Pedro; Andrés dör Simón èl, Santiago, Juan, Felipe, Bartolomé, <sup>15</sup> Mateo, Tomás, Santiago dör Alfeo alà, Simón kine Celote, <sup>16</sup> Judas dör Santiago alà ena Judas Iscariote tò Jesús wömekettsa ibolökpa a e'.

*Jesús tò s'wöbla'wé ñies s'buawéne  
(Mateo 4.23-25)*

<sup>17</sup> Jesús biteatkene kabata a ittekölpa tsá e'pa tǎ, e' e' wöklö'wé kakkue kǐ. Eé iklépa tso' taië ie' panuk. Ñies pè' datse Judea ena Jerusalén, esepa de taië. Ñies pè' de taië datse Tiro ena Sidón. Ká böi e' ate dayë kkömik. <sup>18</sup> Ie'pa ekképa kos debitü Jesús tò s'wöbla'weke e' kǐttsök ñies as ikirkerak e' bua'üneitö. Ñies wépa tteke wimblupa sulusi tò esepa bua'wéitö. <sup>19</sup> Taië diché tso' ie' a e' wa s'kirirke kos e' buanene, e' kuëkǐ sulitane éna ie' kakwa.

*Ì wër buaë Skéköl wa  
(Mateo 5.1-12)*

<sup>20</sup> Jesús tò ittökatapa weblé tǎ ichéitö ie'pa a:

“A' wépa dör siarè kè wá ì tǎ' taië, esepa tso' ì blúie Skéköl tso' e' a, e' kuëkǐ ayëcha buaë a'.

<sup>21</sup> “A' wépa tteke bli tò ká i' a, esepa ttsè'rdaë dò wè', e' kuëkǐ ayëcha buaë a'.

“A' wépa iuke ká i' a, esepa jañurane buaë, e' kuëkǐ ayëcha buaë a'.

<sup>22</sup> “Ayëcha buaë mik pè' éna a' ar suluë, a' wateke, a' cheke suluë, a' cheke tò a' dör pè' sulusipa ye' dör S'ditsö Alà e' tté kuëkǐ. <sup>23</sup> Mik e' tköke a' tǎ, eta kè a' erianuk. E' skéie a' ttsè'nú buaë. Aishkuö tǎ ká jai a ì buaë merdaë a' a iskéie e' kuëkǐ a' ttsè'nú kaneë. Kè a' éna ichökwa tò ká iaiäe ie'pa yépa bak Skéköl ttekölpa we'ikök es.

<sup>24</sup> “Erè wéstela ina a' wá iyi tso' taië ká i' a esepa tǎ, e' ukuökǐ tǎ kè ì skà tǎ'ia a' ttsè'woie buaë.

<sup>25</sup> “Wéstela ina a' wá iyi tso' taië ñè wè' i'ñe tǎ esepa tǎ, e' ukuökǐ tǎ a' tterane bli tò.

“Wěstela ina a' jañuke buaë ká i' a e'pa ta, e' ukuöki ta a' eriardaë, iuraë siarë.

<sup>26</sup> “Wěstela ina a' ta mik sulitane tö a' kikéka, es ie'pa yépa bak ká iaiaë e'pa tö kachökwakpa e' chò tö ie'pa dör Skököl ttekölpa, e'pa kika'ka.

*S'bolökpa ché Jesús tö*  
(Mateo 5.38-48; 7.12)

<sup>27</sup> “Erë a' tso' ye' ttò kittsök, esepa a ye' tö ichè: a' bolökpa dalëritsó. Wépa éna sulu a' ar, esepa a i' buaë ú. <sup>28</sup> Wépa alibchöke a' ki, esepa a a' er buaë chò. Wépa tö a' cheke suluë esepa ki ikió S'yé a tö ikimú. <sup>29</sup> Yi tö a' ppé a' aswö ki, e' ta a' aswö etta mú ia ppé. Yi tö a' paio kikké tsémi, e' ta ñies a' paio mú ia. <sup>30</sup> Yi tö ilè kak kiè a' a, e' ta imú ia. Yi wa a' íyi mítser, e' ta kè a' tö ikiökneia. <sup>31</sup> A' senú s'malepa ta wes a' ki ikiane tö ie'pa ser a' ta es.

<sup>32</sup> “Wépa tö a' dalëritseke, esepa è ské dalëritseke a' tö, e' ta ze' ki Skököl tö wéstela chèmi a' a? ¡Au! Ñies pè' sulusipa tö wépa tö ie'pa dalëritseke, esepa ské dalëritseke. <sup>33</sup> Wépa tö i' buaë weke a' a, esepa è a a' tö iské weke buaë, e' ta ze' ki Skököl tö a' kikékami? ¡Au! Ñies pè' sulusipa tö iweke es. <sup>34</sup> A' tö íyi peiteke, wépa klö'wé a' tö tö imeraneitò, esepa è a, e' ta ze' ki Skököl tö a' kikékami? ¡Au! Ñies pè' sulusipa tö íyi peiteke ñi a, mik ie'pa tö iklö'wé tö imerdane eta. <sup>35</sup> A' bolökpa dalëritsó. I' buaë ú ie'pa a, íyi peitò ie'pa a, kè iské panane. A' tö iweke es, e' ta Skököl tö a' a iské merane buaë. Ie' er buaë chöke s'sulusipa a ena wépa kè tö wéstela cheta' ie' a esepa a. A' tö iweke es, e' ta a' tö ikkacheraë tö mokie a' dör ie' dör íyi ulitane tsata, e' ala'r. <sup>36</sup> S'malepa saú er siarë wa wes S'yé tö a' sueke er siarë wa es.

*Kè se' kàne s'kichatök*  
(Mateo 7.1-5)

<sup>37</sup> “Kè a' s'kichatök, e' ta Skököl kè tö a' kichatepa. Kè a' ichök yi a tö Skököl mú tö be' tsaiò, e' ta Skököl kè tö a' tsaiëpa. I' sulu kos wamblé ie'pa tö a' ki, ese nuí olo'yó ie'pa ki, e' ta a' nuí olo'yeraë Skököl tö a' ki. <sup>38</sup> Kos a' tö i' mé s'malepa a, ekké a' a imerdane. E' kuëki íyi kakmú s'malepa a, eta iské merane Skököl tö a' a. Erë ie' tö imerane a' a taië wes dakö'ukuö wà ièsö chië wötiole buaë ikí wà iè döká ikkò a katötöë tsá tkënettsamitke es.”

<sup>39</sup> Ñies Jesús tö ttè kleé ie'pa a i' es: “¿Wé a' wa isuule tö s'wöbla kè wawër, ese tö eköl wöbla kè wawër ese ulà ièmi? ¿E'pa kè brutarmi bölé kauk a? <sup>40</sup> Wé wöblarke ese kè dör iwöbla'ukwak tsata. Mik iwöblaone, e' je' ta idöraë wes iwöbla'ukwak es.

<sup>41</sup> “Kaltak jchela tsir tso' a' yami wöbla a, ese sué a' tö, erë ¿i' kuëki kaltak bërie tso' a' wák wöbla a, ese kè sune a' wa? <sup>42</sup> ¿Wes a' ichèmi a' yami a: 'A yami, súyö kaltak jchela tsir tso' be' wöbla a, e' yëttsa'? Erë kaltak bërie tso' a' wöbla a, e' kè sune a' wa. ¡A' e' ò suluë! Kaltak bërie tso' a' wöbla a, ese yóttsa kewe, es kaltak jchela tsir tso' a' yami wöbla a, ese wërmi a' a buaë yëttsa.

*Kal buaë ena kal sulusi*  
(Mateo 7.17-20; 12.34-35)

<sup>43</sup> “Kal buaë kè wörtá' kalwö suluie, ñies kal sulusi kè wörtá' kalwö bua'ie. <sup>44</sup> Kal wërkewá iwö ki. Higowö ö uwawö ese kè shteta'sö dika' kicha mik. <sup>45</sup> I' bikeitsekesö, ese è chekesö. E' kuëki wëm dör buaë, ese er dör buaë, e' kuëki ie' serke buaë, ttò yësyësë. Erë wëm dör suluë, ese er dör suluë, e' kuëki ie' serke suluë, ttò suluë.

*U yuökwak böl*  
(Mateo 7.24-27)

<sup>46</sup> “¿I' kuëki a' tö ye' kieke: 'A Sköképa, a Sköképa,' erë kè a' tö ye' ttè iuteku'? <sup>47</sup> Yi datse ye' ska', ta ye' ttò ttseke ta iwà iuteke, súyö a' a ichè tö wes ese dör. <sup>48</sup> Ese dör wes

wëm eköl tö u yué es. E' tö u chkí töbié iskië, ká dör ák è, ese a. Mik di' pone taië, tkami u ki taië, erë u kè minetsër iwä, iyöule buaë e' kueki. <sup>49</sup> Erë yi tö ye' ttò ttsé erë kè iwà iuteku', ese dör wes wëm eköl tö u yué, erë kè wä itöbinewä iskië, tkékaitö jalëjalë íyök è bata ki es. Mik di' pone taië e' tkami u ki, etä u mítsër iwä, kè ì atëia.

## 7

*Jesús tö ñippökwakpa wökir eköl e' kanè méso bua'wéne  
(Mateo 8.5-13; Juan 4.43-54)*

<sup>1</sup> Mik Jesús tö s'wöbla'wé one, etä imía demi Cafarnaúm. <sup>2</sup> Etä eë Roma ñippökwakpa döka cien, e' wökir sërke eköl. E' kanè méso eköl kirinewä taië duökewatke. Iwökir éna ie' dalër taië. <sup>3</sup> Mik ñippökwakpa wökir tö Jesús tté ttsé, etä ie' tö iché judiowak kueblupa welepa a: "A' yú Jesús ska' tã ichó ie' a: 'Be' we'ikè sa' tö, be' shkó ñippökwakpa wökir, e' kanè méso eköl duöke taië, e' bua'ukne.'" <sup>4-5</sup> Mik ie'pa demi Jesús ska' tã ikköcherak taië ie' wöa:

—Ñippökwakpa wökir e' éna se' judiowak dalër taië. Ie' wák tö se' ñi dapa'wo wé e' yuök patké' se' a. E' kueki sa' a tã buaë idir tö be' ie' kimè.

<sup>6</sup> Etä Jesús mía ie'pa tã. Erë mik ie'pa dökemitke ñippökwakpa wökir e' u a, etä ie' tö iyamipa welepa patké ichök Jesús a: "A kékëpa, kè be' e' tsiriük. Be' dör kékë taië, e' döwa ye' u a, e' kè dör ye' siarla e' a. <sup>7</sup> E' kueki ye' kè dë'rö be' ska'. Erë ikéwö è mú tã ye' kanè méso buardane. <sup>8</sup> Ye' wökirpa tã, e'pa ttò iütök ye' kawöta. Ñies ye' dör ñippökwakpa taië e'pa wökir, ie'pa kawöta ye' ttò iütök. Mik ye' tö eköl a icheke, 'Be' yú' tã imí. Eköl a ye' tö icheke, 'Be' dou' tã ide. Ñies ye' tö icheke ye' kanè méso a, 'Íyi ú' tã iwéitö. Ye' iklö'wé tö be' wä kawö tã' íyi ulitane tsata, e' kueki ye' wä ijcher tö be' tö ikéwö mé, e' tã ye' kanè méso buardane."

<sup>9</sup> Mik Jesús tö tté e' ttsé, etä e' tö ie' tkiwéwa. Ie' wötréene tã ichéitö pë' dami ie' itöki e'pa a:

—Ye' ichè a' a tö Israel aleripa qos shua, kè yi kune ye' wä erblök ye' mik wes wëm i' es.

<sup>10</sup> Etä mik ñippökwakpa wökir yamipa dene u a, etä ie'pa tö isué tö ikanè méso kirirke, e' buanene.

*Alaköl eköl schó alà blënewä e' shké'wékane Jesús tö*

<sup>11</sup> E' ukuöki tã Jesús mía ká kiè Naín eë. Ie' dami ittökatapa tã, ñies pë' dami ie'pa tã taië. <sup>12</sup> Mik ie'pa de tsinet ká e' a, etä ie'pa isué tö taië pë' datse, e' wä s'nu datse micho wötëwa. Dëütö e' mì dör schó, ie' alà eköl ème wëm, e' blënewä. Taië ká e' wakpa tö ie' pablerami. <sup>13</sup> Mik Skékëpa Jesús tö isué, etä ie' wa iwër siarè tã ichéitö ia:

—Kè be' iukia.

<sup>14</sup> E' bet tã ie' dewä tsinet ka'la ki s'nu dami e' o'mik tã ka'la kéitö. Wépa wä idami e'pa e' wöklö'wéwa. Jesús tö iché s'nu a:

—A duladula, be' a ye' tö ichè, ¡Be' e' kóka!

<sup>15</sup> E' bet tã s'nu shkenekane e' tkésër tã itté. Etä Jesús tö imé imì a. <sup>16</sup> Qos pë' tso' ie'pa tã e'pa suane taië, Skéköl kikéka ie'pa tö taië tã ichérakitö:

—Skéköl tteköl chók eköl, e' de se' shua.

Ñies ie'pa tö iché:

—Skéköl de se' dör ie' icha esepa kimuk.

<sup>17</sup> Etä ì wé Jesús tö e' tté buneka taië Judea ké qos e' a, ñies ká tso' Judea pamik e' a itté tinea.

*Juan S'wöskuökwak ttökatapa de Jesús ska' ichakök  
(Mateo 11.2-19)*

<sup>18</sup> Juan S'wöskuökwak ttökatapa tö ì qos weke Jesús tö, e' paké Juan tso' s'wöto wé a e' a. E' kueki ie' tö ie'pa böi kié <sup>19</sup> tã ichéitö ie'pa a:

—A' yú Skékëpa Jesús a ichakök tö ¿be' dör wé pairine'bitü idi' wa s'blúie yëule tö idatse e', ö yi skà panèia sa' tö?

<sup>20</sup> Mik ie'pa de Jesús ska' ta ie'pa tö iché ie' a:

—Juan S'wöskuökwak tö sa' patké be' a ichakök tö ¿be' dör wé pairine'bitü idi' wa s'blúie yëule tö idatse e', ö yi skà panèia sa' tö?

<sup>21</sup> E' wöshá ta Jesús tö s'kirirke duè tsakië wa, esepa bua'wé taië. Nies s'tteke wimblupa sulusi tö, ena s'wöbla kè wawër esepa bua'wéitö taië. <sup>22</sup> E' ukuöki ta ie' tö iché Juan ttökatapa bö! a:

—A' yúne Juan ska' ta ì sué a' tö, ì ttsé a' tö, e' kós pakó ie' a. Ichó ie' a tö s'wöbla kè wawër esepa wöbla wawënene; s'kraulewá kè shko esepa shkéne; wépa kiri'weke lepra tö esepa buanene batse'nene; s'kukuò kè watsér esepa watsénene; s'duowá shkenekane; nies Skéköl ttè buaé e' pakane s'siarëpa a. <sup>23</sup> ¿Yi kè yöki ye' sulune, ayëcha buaé ese!

<sup>24</sup> Mik ie'pa míyalne, eta Jesús tö Juan ttè pakémitke pè' a, ta ichéitö ie'pa a: “Mik a' dè'rö ká sir poë wé kè yi serku' ee Juan sauk, eta ¿ima a' erbikò wëm wése suëmi a' tö? A' kè dè'rö wëm èse, kabikeitsò wì a dià a wës kua'kö wöppè siwá' tö es, ese sauk. <sup>25</sup> A' kè dè'rö wëm ese sauk, e' ta ¿wëm wése sauk a' dè'rö? A' kè dè'rö wëm e' paiò datsi' bua'buwa, ese sauk. A' wa ijcher tö wépa e' paiò es ena íyi bua'buwa tso' iwá taië e' ttsé'woie buaé, esepa serke blu' u a. <sup>26</sup> Erë ¿wëm wése sauk a' dè'rö? A' dè'rö wëm dör Skéköl tteköl ese sauk. Ye' tö a' a iché tö moki Juan dör Skéköl tteköl, erë ie' kè dör e' è. Ie' dör Skéköl tteköl ese tsata. <sup>27</sup> Skéköl yëkkuö ki itso' kitule wé Skéköl tö iché wé pairi'bitüitö idi' wa s'blúie e' a, e' tö iché i' es:

‘Ye' tso'tke ye' ttè pakökwak patkök be' yöki kewe be' ñalé yuök.\*

Skéköl ttè pakökwak e' dör Juan. <sup>28</sup> Ye' iché a' a tö s'ditsö ulitane shuá, kè yi ku' Juan tsata. Erë ì blúie Skéköl tso', e' shuá yi dör èsela, ese dör ie' tsata.”

<sup>29</sup> (Mik pè' ulitane nies inuköl shtökwakpa Roma wökirpa a, e'pa tö Jesús s'wöbla'weke e' ttsé, eta ie'pa tö iché tö Skéköl ttè dör yësyësé. Ie'pa dè' as Juan tö ie'pa wöskuò iwá kkachoie tö ie'pa tö Juan ttè klö'wé, e' kueki ie'pa tö iché es. <sup>30</sup> Erë fariseowakpa ena s'wöbla'uk ttè dalöiëno wa wakpa kè wa Juan ttè klöone, e' kueki ie' kè wa ie'pa wösune, es ie'pa tö Skéköl er buaé chöke ie'pa a e' watéttsa.)

<sup>31</sup> Jesús tö iché: “¿Ima a' chëmi ye' tö? ¿Wës a' dör? <sup>32</sup> A' dör wës ttè i' tö iché es: Ala'rla tso' inuk u itöki. Shabötspa arke taië ta iché iyamipa a: ‘Sa' tö pulé bla'wé, erë a' kè klötëne'; sa' tö s'ëriar ttseittsé, erë a' kè iine'.’ <sup>33</sup> E' wà dör tö Juan S'wöskuökwak de batsöta', kè blo' yetá' ta a' tö iché tö aknama tso' ie' a. <sup>34</sup> E' ukuöki ta ye' dör S'ditsö Alà, e' de kè batsöta', blo' yetá', ta a' tö ye' cheke tö ye' chkò taië, blo' yè taië, nies tö ye' dör inuköl shtökwakpa ena pè' sulusipa malepa, esepa sini'. <sup>35</sup> A' tö ye' cheke es erë isuerasö bulebök ta tö wépa serke wës Skéköl siwé tö iché es, esepa dör yësyësé.”

#### *Jesús míá upakök Simón dör fariseowak e' ska'*

<sup>36</sup> Fariseowak eköl kiè Simón, e' tö Jesús kié chkök ie' u a. E' kueki Jesús míá ie' ska' ta ie'pa e' tulésér chkök. <sup>37</sup> Eta alaköl sulusi serke ká e' a, e' wa ijchenewá tö Jesús tso' chkök fariseowak e' u a. Ie' wa kiè masmas de e' ukkuö yöule ák bua'buwa kiè alabastro ese wa.

<sup>38</sup> Ie' de dur Jesús ska', e' iúke Jesús tsikka, iwöriö yënane taië Jesús klò ki, e' pasiwéitö itsá wa, ta Jesús klò wöalattsémitö ta kiè masmas téitö Jesús klò ki. <sup>39</sup> Mik fariseowak tö Jesús kié chkök e' tö alaköl sué, eta ibikeitséitö: “Wëm wí mú dör Skéköl tteköl moki, e'ma ie' éna iarwi alaköl wése tso' ie' kök. Ie' éna iarwami tö e' dör alaköl sulusi.” <sup>40</sup> Jesús iché ie' a:

—A Simón, ilè tso' ye' wa yönoie be' a.

Ie' iiüté:

—A s'wöbla'ukwak, ichó ña.

\* 7:27 Malaquías 3.1

<sup>41</sup> Jesús tö iché:

—Wëm bȫl ñarke inuköl peitökwak ulà a. Eköl ñarke cien skeyök (500), iëkȫl ñarke dabom skeyök (50). <sup>42</sup> Ie'pa bȫl kè a ipator, e' kueki inuköl peitökwak tö inuì olo'yé ie'pa ki. Ye' tö be' a ichakè tö ie'pa bȫl, ¿wéne ék éna inuköl peitökwak dalërmi kibiie?

<sup>43</sup> Ie' iüté:

—Ye' a ta, wéne nuì olone kibiie e' ék.

Jesús tö iché:

—Buaë be' iüté.

<sup>44</sup> Eta Jesús tö alaköl sué ta ichéitö Simón a:

—Alaköl i' saú. Mik ye' dewa be' u a, eta be' kè wa ye' a di' mène ye' klò skuoie, erë alaköl i' tö ye' klò skué iwöriö wa ta ipasiwéitö itsà wa. <sup>45</sup> Be' kè wa ye' shkeone wöalattsè wa wes s'wöblar es. Erë ie' dewa íe, eta ie' tö ye' klò wöalattsémi taië.

<sup>46</sup> Be' kè wa kiò esela, e' tène ye' wökir ki wes s'wöblar es. Erë ie' tö kiò masmas tuë darërëe ese té ye' klò ki. <sup>47</sup> E' kueki ye' ichè be' a tö ie' éna ye' dalër taië e' wa iwënewa tö ì sulu wamblé ie' tö taië, e' nuì olone ie' ki. Erë wépa kè éna ye' dalërta' taië, e' wa iwënewa tö esepa ki inuì olone elkela è.

<sup>48</sup> E' ukuöki ta ie' iché alaköl e' a:

—Ì sulu kos wamblé be' tö e' nuì olone be' ki.

<sup>49</sup> Imalepa kiule chkök ñies tso' ee, e'pa ñi chakerak:

—A' ichè ¿yi ie' dör e' ttò es? Skëkȫl è a se' nuì olo'yarmi.

<sup>50</sup> Erë ie' tö alaköl a iché:

—Be' erblé ye' mik, e' tö be' tsatkée. Be' yúne bèrè.

## 8

### *Alakölpa tö Jesús kímé*

<sup>1</sup> E' ukuöki ta Jesús mía ì blúie Skëkȫl tso' e' tté buaë pakök ká blublu ena ká tsitsir tso' e' a. Ie' ttekölpa tsá dabom eyök kí bȫl, e'pa shköke ie' ta. <sup>2</sup> Ñies alakölpa welepa buaone ie' tö, e'pa shköke ie' ta. E'pa welepa bak weinuk wimblupa sulusi wa, ñies dué wa. Ie'pa eköl, kiè María Magdala wak, e' a aknamapa yë'ttsaitö doka kul. <sup>3</sup> Ñies Juana dör Cuza alaköl, e' shköke ie' ta. Cuza dör Herodes dalì kkö'nukwak. Ñies Susana ena alakölpa malepa taië shköke ie' ta. Ie'pa tö Jesús ena ittökatapa kimeke taië, ì tso' ie'pa wa ese wa.

### *Të kuatkökwak, e' pakè*

*(Mateo 13.1-9; Marcos 4.1-9)*

<sup>4</sup> Pè' e' yélur iká ki debitu taië Jesús ska'. Ie' tö ie'pa a ittè kleé i' es: <sup>5</sup> Wëm mía eköl të kuatkök ta ie' tö iwö ppé ululu të ki\* Mik ie' tso' iwö ppök, eta ditsöwö wele anewa ñala ska' ta pè' dakélor iki, e' tö inatélur, ñies dù debitu tö ikatéwa. <sup>6</sup> Ditsöwö wele anewa áklo a ta e' kuölö ta itskine buaë. Erë ká tsabe kè ta' ee, e' kueki bet ta isinewa. <sup>7</sup> Ditsöwö wele anewa dika'chka shua. Dika'chka ena ditsöwö talane ñita, erë dika'chka e' aléka iki. <sup>8</sup> Erë ditsöwö wele ane íyök bua'buwa ki, ese tskine talane wöne buaë. Iklö wele wöne doka cien eyök (100) elka elka.

Mik Jesús tö iché one, eta ikí chéitö ie'pa a aneule: “¡A' éna ye' ttò ttsak, e' ma ikukuebló bua'ie!”

### *Ì kueki Jesús tö s'wöbla'weke kleaule*

*(Mateo 13.10-17; Marcos 4.10-12)*

<sup>9</sup> Jesús ttökatapa tö ie' a ichaké:

—Ttè waklébö, ¿jima e' wà dör?

\* 8:5 të kuatkök ppé ululu: Ie'pa wöblar të kuatkök wö ppélur të kos e' ki.



<sup>10</sup> Ie' tō iché ie'pa a: “Ì blúie Skéköl tso' e' tté bléulewá, e' kéwö meneat a' a ijchénioie. Eré pé' tso' taië kè éna ye' tté klö'wak, esepa a ye' tō ikleeke as ie'pa tō iweblò je', eré kè ie'pa a iwà wër, ñies as ie'pa tō ittso' je', eré kè ie'pa a iwà ar.†

*Të kuatkökwak tté e' wà paké Jesús tō*

*(Mateo 13.18-23; Marcos 4.13-20)*

<sup>11</sup> “Ttè wakléyö e' wà dör i' es: Skéköl tté pakèsö e' dör wës ditsöwö kuatkèsö es. <sup>12</sup> Pé' welepa tã itkòmi wës itka ditsöwö anewa ñalã ska' ñe' tã itka es. Esepa tō Skéköl tté ttsé, eré bé de ie'pa ska' tã iyéttsaitö ie'pa er a as ie'pa kè tō iklö'ù tã itsatkër. <sup>13</sup> Welepa skà tã itkòmi wës itka ditsöwö anewa áklo a ñe' tã itka es. Esepa tō Skéköl tté ttsé tã iklö'wérakitö ttsé'ne buaë wa eré ekuölö è. Ie'pa kè a e' tkërwa darërëë Skéköl tté a. Mik ie'pa weinemitke ie' tté kueki, etã ie'pa anemine tottola. <sup>14</sup> Welepa skà tã itkòmi wës itka ditsöwö anewa dika'chka shua ñe' tã itka es. Esepa tō Skéköl tté ttsé, eré ie'pa tō íyi tso' ká i' ki e' bikeitseke kibiie. Ie'pa er me'rie inuköl ena ì tso' ká iki tō s'ttsé'weke buaë ese ki. Ese kos tō Skéköl tté kui'wéwã ie'pa er a, tã ie'pa kè sene buaë Skéköl tté a. <sup>15</sup> Eré welepa skà tã itköke wës itka ditsöwö anewa íyök buaë ki ñe' tã itka es. Esepa tō Skéköl tté ttsé tã iklö'wé er buaë wa mokí. Ie'pa tō iiuteke buaë tã iwà dalöiekerakitö kekraë. E' kueki ie'pa tō ì buaë kos ese wé wës Skéköl ki ikiane es.

*Bö'wö tté*

*(Marcos 4.21-25)*

<sup>16</sup> “Mik bö'wö wötskékasö, etã kè sō ipabikepawã, kè sō ipatkepawã kã dikia. E' skéie itkekeka kákke s'yamipa datse esepa wö a ká ñi'woie. <sup>17</sup> Es ñies tté tso' bléulewã ì'ñe tã, ese jcherdawã sulitane wã aishkuö tã. Ì ché ye' tō, e' kè wà ane ie'pa éna ì'ñe tã, eré e' wã ardaë ie'pa éna aishkuö tã.

<sup>18</sup> “Yi e' yuak buaë ye' tté wa, ese a ikí meraëyö as ie' éna iwà ar buaë. Eré yi kè e' yuak ye' tté wa, ì bikeitsé ese tō tō ane iéna, e' kos yërdattsane iyöki. E' kueki ye' tté kukuebló a' tō bua'ie.”

*Jesús mì ena ie' èlpa debitu ie' weblök*

*(Mateo 12.46-50; Marcos 3.31-35)*

<sup>19</sup> Etã Jesús mì ena ièlpa ena ikutapa e'pa debitu ie' weblök. Eré ie' tkër wé pé' tso' taië e' shua, e' kueki ie'pa kè dè'wã ie' ska'. <sup>20</sup> E' biyó ché yile tō ie' a:

—Be' mì ena be' èlpa ena be' kutapa e'pa shkò be' weblök.

<sup>21</sup> Ie' tō iiuté:

—Èkèkè, eré ye' tō a' a ichè tō wépa tō Skéköl tté ttsé tã iwà iütéitö, esepa dör wës ye' mì ena ye' èlpa ena ye' kutapa es.

*Siwã' taië e' wöklö'wé Jesús tō*

*(Mateo 8.23-27; Marcos 4.35-41)*

<sup>22</sup> Etökicha tã Jesús e' iéka kanò a ittökatapa tã, tã ichéitö ie'pa a:

—Mishka batsöri wíshet.

Etã ie'pa míyal. <sup>23</sup> Ie'pa mirwãia tã ie' kapowã kanò a. E' dalewa siwã' batsineka taië tō di' uyéka taië tã kanò a di' iënekami katsirkewatke. <sup>24</sup> E' kueki ie'pa tō iti'wéka tã ichérakitö ia:

—¡A s'wöbla'ukwak! ¡A s'wöbla'ukwak! ¡Se' duölurmi!

Etã ie' e' kéka tã siwã' ena di' yöli uñéitö tã iwöklönewa míane alamië.

<sup>25</sup> E' ukuöki tã ie' tō iché ie'pa a:

—¡Wës a' erblöke ye' mik, e' de?

Eré ie'pa suanéka taië, tkinewa taië tã ñni chakéka:

—¡Yi dör wëm wí? ¡E' ttö dalöié di' tō ena siwã' tō!

† 8:10 Isaías 6.9

*Wëm eköl a aknamapa tso' taië e' bua'wëne Jesús tö  
(Mateo 8.28-34; Marcos 5.1-20)*

<sup>26</sup> E' ukuöki ta ie' pa mía demi ká kiè Gerasa atë batsöri wishet Galilea wöshaë ee. <sup>27</sup> Mik Jesús e' yéttsa de ká sí ki, eta wëm eköl de ie' ska', e' a aknamapa tso'. Ie' dör Gerasa wak. Iaiäe ie' sene'mi sume, kè serku'ia u a, ie' serke pö a. <sup>28</sup> Mik ie' tö Jesús sué, eta ie' aneka taië ta ie' tkéwa kuchë ki. Ie' iché Jesús a:

—A Jesús, be' dör Skököl dör íyi ulitane tsata e' alà. ¿Iók be' de ye' tsiriuk? Ye' múat bèrë. Ye' kköchò taië be' a tö kè ye' we'ikar.

<sup>29</sup> Jesús tö ichétke wimblu sulusi a kewe: “Be' e' yóttsa wëm se a.” E' kueki wimblu tö ie' a iché es. Iaiäe ie' we'ikbitu aknama tö. Kekaë aknama tö ie' wö aliwëke. E' kueki pè' tö ie' muëke iulà a iklö a tabechka daloie wa, erë e' batsélor ie' tö tottola ta aknama tö ie' kí aliwéka patkëmi wé kè yi serku' ese ska'. <sup>30</sup> Eta Jesús tö ie' a ichaké:

—¿Ima be' kiè?

Ie' iüté:

—Ye' kiè Taië Wakpa.

Ie' a aknamapa tso' taië, e' kueki ie' tö iüté es. <sup>31</sup> Ie' pa kköchöke taië Jesús a: “Kè sa' patkarmi kauk taië tso' iskië e' a.” <sup>32</sup> Tsinet kabata kuli' a köchi iëter taië chkök, e' kueki wimblupa kköchöke Jesús a: “Kawö mú sa' a e' tiukwa köchipa jaì a.” Jesús tö ikéwö mé ie' pa a. <sup>33</sup> Eta ie' pa e' yélur wëm a ta ie' tiélur köchipa a. Köchi kos poneka tunemirak ká spé mik brutolonemi batsöri a ta ee iduolur.

<sup>34</sup> Mik köchi kkö'nukwakpa tö isué, eta itkayalmi ta itté ppékarakitö ká e' wa'ne. <sup>35</sup> Pè' de taië iweblök tö ì tka. Mik ie' pa de Jesús ska', eta wëm a aknamapa yërulune taië, e' sué ie' pa tö itkër Jesús wörki datsi' iéne éna ká anene buaë. E' tö ie' pa suawé. <sup>36</sup> Wépa tö ì tka e' sué, e' pa tö ipaké ie' pa a tö wes wëm a aknamapa bak e' buanene. <sup>37</sup> Ká e' wakpa ulitane suane taië, e' kueki ie' pa kköché Jesús a: “Be' e' yóttsa sa' ká a.” Eta Jesús e' iéka kanò a ittökatapa ta ta imiatke. <sup>38</sup> Eta wëm a aknamapa yërulune e' kköché Jesús a: “Ye' shkakmi be' ta.” Erë Jesús tö iüté:

—Au, be' e' tsúat. <sup>39</sup> Be' yúne be' u a ta ì kos wé Skököl tö be' a, e' pakó sulitane a. Ta ie' mía, ta ì kos buaë wé Jesús tö ie' a, e' pakéitö sulitane a.

*Jesús tö Jairo alà busi shké'wékane ñies alaköl bua'wëneitö eköl  
(Mateo 9.18-26; Marcos 5.21-43)*

<sup>40</sup> Mik Jesús dene batsöri iqshet, eta pè' tso' taië ie' panuk, e' kueki ie' pa tö ie' kiéwa ttsë'ne bua' wa. <sup>41</sup> Eta wëm eköl kiè Jairo e' de. Ie' dör judiowak ñi dapa'wo wé e' wökir eköl. Ie' e' téwa wöwakköt Jesús wörki ta ikköchöke taië ie' a: “Mishka bet ye' u a.” <sup>42</sup> Jairo alà dör ekla è wák dör alaköl ki duas tso' dabom eyök ki bök ulatök (12), e' duökewatke.

Jesús miria, e' dalewa taië pè' dami, e' tërdami ie' mik. <sup>43</sup> E' pa shua alaköl dami eköl e' du'mi alakölpa duè wa e' ki duas de dabom eyök ki bök (12). Ì kos tso' ie' wa e' ewéwaitö yës s'kapeyökwak ki, erë kè yi a ibuanene. <sup>44</sup> Ie' dewa tsinet Jesús tsj kker ta idatsi' bata kéwaitö. E' wösha ta ipé wöklöne ta ibuanene buaë. <sup>45</sup> Eta Jesús tö ichaké:

—¿Yi tö ye' ké?

Sulitane tö iché:

—Kè sa' wa be' kàne.

Pedro tö iché ia:

—A s'wöbla'ukwak, pè' tso' taië e' tërdami be' mik.

<sup>46</sup> Erë Jesús tö iché:

—Ye' ittsé tö ilè tka ye' diché wa. E' kueki ye' wa ijcher tö yile tö ye' ké.

<sup>47</sup> Mik alaköl buanene, e' tö isué tö kè ie' a e' blënukia ta ide Jesús ska' painéka taië suane wa. Ie' e' tkéwa kuchë ki Jesús wörki ta ie' e' chéka sulitane kukua tö ì kueki Jesús kéwaitö. Ie' tö iché: “Mik ye' tö be' kéwa, e' wöshaë ta ye' buanene.” <sup>48</sup> Jesús tö iché ia:

—A alà busi, be' erblé ye' mik, e' kueki be' buanene. Be' yúne bèrë.

<sup>49</sup> Ie' ttökeia alaköl ta, e' dalewa eköl bite Jairo u a, e' debitu ta iché Jairo a:

—Be' alà busi blënewatke. S'wöbla'ukwak kè tsiriwaria.

<sup>50</sup> Mik e' ttsé Jesús tö, eta ie' tö iché Jairo a:

—Kè be' tkinuk. Be' erbló ye' mik è, be' alà busila buardane.

<sup>51</sup> Mik ie'pa de Jairo u a, eta Jesús kè wa yi kàne shkökwa wé busila nu me'r ee. Pedro ena Santiago ena Juan ena alà yé ena imì, e'pa è kiéwaitö e' ta. <sup>52</sup> E' dalewa sulitane iuke alárke taië. Erë Jesús tö ie'pa a iché:

—Kè a' iukia. Busila kè du'wa, ikapöme'r è.

<sup>53</sup> Sulitane wa ijcher tö busila duowa, e' kueki ie'pa tö ie' wayuéka jañeitséka taië. <sup>54</sup> Erë Jesús tö busila ulà klö'wéwa, ta iché ie' a:

—¡A tayëla, be' e' kóka!

<sup>55</sup> Eta ishkenekane, e' bet ta ie' e' kéka ta Jesús tö iché ie'pa a:

—Itiö.

<sup>56</sup> Iyé ena imì tkirulune iweblök. Eta Jesús tö iché ie'pa a:

—Ì tka íe, e' kè char yi a.

## 9

### *Jesús tö ittökatapa patké s'wöbla'uk*

*(Mateo 10.5-15; Marcos 6.7-13)*

<sup>1</sup> Jesús tö ittökatapa dabom eyök kí bö! e'pa dapa'wé ta diché méitö ie'pa a aknamapa ulitane trë'woyal. Nies kawö méitö ie'pa a s'kirirke bua'wone. <sup>2</sup> Ipatkéraak ì blúie Skököl tso' e' tté buaë pakök nies s'buaukne. <sup>3</sup> Ta ie' tö iché ie'pa a:

—Mik a' mi'ke, eta kè ì tsarmi. Shko kéli, sku', íyi ñanoie, inuköl, datsi' skà, ese kos kè tsarmi.

<sup>4</sup> Mik yile tö a' a iché a' kapóro, eta a' tso' ká e' a e' dalewa a' kapóro ie' u è a. <sup>5</sup> Eta ká wele wakpa kè wa a' kinewa, e' ta a' e' yólur ká e' a, ta kapo tso' a' klöttö mik, e' ppöö a' tö. E' tö ie'pa a ikkacheraë tö ie'pa dör Skököl bolökpa.

<sup>6</sup> Eta ie'pa míyal judiowak ké tsitsir kos a Skököl tté buaë pakök nies s'kirirke bua'ukne.

### *Herodes tö ibikeitséka taië tö yi dör Jesús*

*(Mateo 14.1-12; Marcos 6.14-29)*

<sup>7-8</sup> Herodes dör Galilea wökir, mik e' tö ì kos weke Jesús tö e' tté ttsé, eta ie' tö ibikeitséka taië tö yi dör Jesús. Welepa tö icheke tö Jesús dör Juan S'wöskuökwak kötewa e' shkenekane. Welepa tö icheke tö ie' dör Skököl tteköl bak kiè Elías e' shkenekane. Welepa tö icheke tö ie' dör Skököl ttekölpa skà bak esepa wele shkenekane. <sup>9</sup> Erë Herodes tö iché:

—Ye' wák tö Juan kuli' tökök patké', e' ta wëm tté ttséyö tso' íyi uk taië s'tkiwè ekké je' dör yi?

E' kueki Herodes éna sulué Jesús suakwa.

### *Pë' döka mil skeyök e'pa tié Jesús tö*

*(Mateo 14.13-21; Marcos 6.30-44; Juan 6.1-14)*

<sup>10</sup> Mik Jesús ttekölpa tsá e'pa dene, eta ì kos wé ie'pa tö, e' pakéne ie'pa tö Jesús a. Eta Jesús tö ie'pa kiémi e' ta dò tsinet ká kiè Betsaida wé kè yi serku' ee. <sup>11</sup> Erë mik pë' malepa wa ijchenewa, eta ie'pa mí itöki ta ie'pa kiéwaitö buaë. ì blúie Skököl tso' e' tté buaë paké ie' tö ie'pa a nies s'kirirke bua'wéneitö.

<sup>12</sup> Mik ká tuirketke, eta Jesús ttökatapa dabom eyök kí bö! (12) e'pa de ie' ska' ta ichéraitö ia:

—Ká i' kí kè ì ku' katanoie ñanoie, e' kueki ie'pa yuómi as ie'pa mi' ká tso' tsinet ena pë' serke tsinet esepa ska' chkè tauk ñè ena kapökrö.

<sup>13</sup> Jesús tö ie'pa a iché:

—Ie'pa tió a' tö.

Ie'pa tö iiüté:

—Sa' wā pan skel ena nima bötö e' è tso'. Kè sa' mine ikí tauk, e' ta' tso' sa' wā e' kè dökka ie'pa taië ekképa tioie.

<sup>14</sup> Wēpa tso' eē dōka mil skeyök (5000), e' kuēki ittōkatapa tö iché es. Erë Jesús tö ie'pa a iché:

—A' tö ie'pa kó e' tköksēr iski ek tsiní ek tsiní dabom skeyök (50) dabom skeyök. <sup>15</sup> Es ie'pa tö iwé ta' pē' ulitane e' tkésēr. <sup>16</sup> E' ukuōki ta' ie' tö pan skel ena nima bötö, e' klö'wé ta' iká sué ká ja' a ta' wéstela chéitö Skéköl a. E' ukuōki ta' ie' tö pan ena nima blaté mé ittōkatapa a as ie'pa tö iwatiö pē' a. <sup>17</sup> Mik ie'pa chké de wē', etā ibata ate, e' shtérakitö iēne dōka kkóla dabom eyök ki bök (12).

*Pedro tö iché tö Jesús dör wé pairine'bitū idi' wa s'blúie e' (Mateo 16.13-19; Marcos 8.27-29)*

<sup>18</sup> Etökicha ta' Jesús tso' ittōkatapa è ta'. Ie' tso' S'yé ta' ttök, ta' eē ie' tö ie'pa a ichaké:

—¿Ima pē' tö iché tö ye' dör yi?

<sup>19</sup> Ie'pa tö iiüté:

—Wēlepa tö icheke tö be' dör Juan S'wöskuökwak. Wēlepa skà tö icheke tö be' dör Skéköl tteköl bak kiè Elías e' shkēnekane. Wēlepa skà tö icheke tö be' dör Skéköl ttekölpa bak ká iaiaë e' wēle shkēnekane.

<sup>20</sup> Ie' tö ie'pa a ichaké:

—Erë ¿ima a' iché, ye' dör yi?

Pedro tö iiüté:

—Be' dör wé pairine'bitū idi' wa sa' blúie e'.

*Jesús e' biyó ché tö ie' tterawa (Mateo 16.20-28; Marcos 8.30-9.1)*

<sup>21</sup> Erë Jesús kè wā ie'pa kàne yi a ichök yi dör ie'.

<sup>22</sup> Ñies ie' tö iché:

—Ye' dör S'ditsö Alà, e' weirdaë taië. Judiowak kuēblupa ena sacerdotepa wökirpa ena s'wöbla'uk ttè dalöiēno wa wakpa tö ye' waterattsā. Ye' tterawa, e' ki ká de mañat etā ye' shkērdakane.

<sup>23-24</sup> E' ukuōki ta' ie' tö iché ie'pa ulitane a:

—Yi e' tsatkak ittèwā yōki, ese kè ulà a sene michoë dōpa. Erë yi e' mettsā ttèwā ye' dalërmik, ese ulà a idöraë. E' kuēki yi e' yuak ye' ttökataie, ese kè kàne tkinukia e' ki. E' skéie kekraë ikawōta e' chök dō ittèwā wötèulewā krus mik ekkè. Es ie' kawōta shkök ye' itōki. <sup>25</sup> Ýi ulitane tso' ká i' a, e' de a' ulà a, erë sene michoë kè dē' a' ulà a, e' ta' e' dör ¿iie bua' a' a? <sup>26</sup> Mik ye' dör S'ditsö Alà, e' dene ye' olo wa, ñies ye' Yé olo wa, ñies ibiyöchökwakpa batse'r e'pa olo wa, etā wēpa jaēne ye' ki, esepa ki ye' jaërdaë ñies. <sup>27</sup> Mokī ye' tö a' a iché tö a' tso' íe, e' wēlepa tö ì blúie Skéköl tso' e' sueraë kam iblērulur e' yōki.

*Jesús tö ilo ta' taië e' kkaché ittōkatapa a (Mateo 17.1-8; Marcos 9.2-8)*

<sup>28</sup> E' ki ká de pāköl (8) ulatök, etā Jesús miā kabata a ttök S'yé ta'. Pedro ena Juan ena Santiago e'pa mītsēr iwā e' ta'. <sup>29</sup> Ie' tso' ttök S'yé ta, etā iwö manenetsā miā kuā'ki dalölöë ñies idatsi' miā saruruë wōñarke dalölöë. <sup>30</sup> E' wōshā ta' wēpa de iēter bōl tso' ttök ie' ta'. Ie'pa dör Skéköl ttekölpa bak ká iaiaë kiè Moisés ena Elías e'pa. <sup>31</sup> Ie'pa olo bunekā taië dalölöë. Ie'pa iēter kapakök Jesús ta' wēs ie' tterawa pē' tö Jerusalén as iwā tkò wēs Skéköl ki ikiane es. <sup>32</sup> Pedro ena iyamipa bōl, e'pa tteke kapèwā tö taië. Erë mik ie'pa ti'nekane bua'ie, etā ie'pa tö Jesús olo taië e' sué, ñies wēpa bōl iēter ttök ie' ta' e'pa suérakitö. <sup>33</sup> Mik Moisés ena Elías mitkene, etā Pedro tö iché Jesús a:

—A S'wöbla'ukwak, buaë se' tso' íe. Sú sa' tö úla yuèkà mañatkuela, etkue be' a, etkue Moisés a, etkue Elías a.

Erë ì cheke Pedro tö e' wà kè ane ie' éna. <sup>34</sup> Pedro ttökeia, e' wö shà ta mochka tö ie'pa kitéwa. E' tö ie'pa suawé taië. <sup>35</sup> Mochka shua ie'pa tö ttò ttsé tö ichè: “Se dör ye' alà, e' pairi'bitubak ye' tö idi' wa a' blúie. Ie' ttò iütó.”

<sup>36</sup> Mik ie'pa tö ttè e' ttsé, eta' ie'pa tö isué tö Jesús ate dur ekörla. Erë ì ttsé ie'pa tö, ì sué ie'pa tö, e' blé ie'pa tö ier a, kè ie'pa wà ipakane yi a dò aishkuö ta.

*Duladula eköl tteke aknama tö e' bua'wéne Jesús tö*

*(Mateo 17.14-21; Marcos 9.14-29)*

<sup>37</sup> Bule es ta ie'pa tso' kabata a e'pa biteyal, eta' taië pé' de Jesús ñaletsuk. <sup>38</sup> E' shua wëm tso' eköl, e' tö iché aneule:

—A s'wöbla'ukwak, be' we'ikèyö, ye' aladulaköl saú, e' dör ye' alà eköl è. <sup>39</sup> Mik wimblu sulusi tö ie' éna ká chówéwa, eta' ie' aneká taië, painéka katötöë, ta ikkò a ishuya deka taië. Këkraë ie' we'ikekeitö siarë. Wimblu kè éna ie' akwa. <sup>40</sup> Ye' kköché taië be' ttökatapa a tö wimblu trè'úshkar erë kè ie'pa a ìone.

<sup>41</sup> Jesús tö iché ie'pa ulitane a:

—A' wakpa kè erblöta' Skököl mik, a' kè éna ká ane. ¿Mik ye' sermirö a' ta? ¿Kos ye' tö a' dalë'ttsemirö? Be' alà tsúbitu ña.

<sup>42</sup> Mik duladula de tsinet, eta' aknama tö ie' éna ká chówéwa kéu iski ta ipainéka taië. Erë Jesús tö wimblu sulusi uñé trè'wëshkar ta duladula bua'wéneitö méneitö iyé a. <sup>43</sup> Ì buaë wé Skököl tö idiché taië wa e' tö ie'pa ulitane tkiwéwa.

*Jesús skà e' biyó chéne tö itterawa*

*(Mateo 17.22-23; Marcos 9.30-32)*

Ì buaë wé Jesús tö, e' chekeia ie'pa tö ña a, e' dalewa ie' tö iché ittökatapa a:

<sup>44</sup> —Ì cheke ye' tö a' a, e' ttsó buaë, kè a' éna ichökwa: Ye' dör S'ditsö Alà, e' wömerdatsta pé' ulà a.

<sup>45</sup> Erë ì ché ie' tö e' blëulewa ie'pa yöki, e' kuëki ie'pa kè éna iwà ane. Ñies ie'pa suane ichakök tö ima iwà dör.

*Yi dör ibua'ie Skököl wöq*

*(Mateo 18.1-5; Marcos 9.33-37)*

<sup>46</sup> E' ukuöki ta Jesús ttökatapa ña iütökerak tö ie'pa shua yi dòmi ibua'ie imalepa tsata. <sup>47</sup> Ì bikeitsök ie'pa tso', e' suéwa Jesús tö, e' kuëki ie' tö alala kié eköl duéser ie' o'mik <sup>48</sup> ta ichéitö ie'pa a:

—A' shua yi e' wöéwa imalepa dikia diöshet ese dör ibua'ie. E' kuëki yi tö alala i'se kiéwa ye' ttò wa, ese tö ye' wák kiéwa. Es ñies yi tö ye' kiéwa, ese tö yi tö ye' patkë'bitu, e' kiéwa.

*Yi kè ku' ñippök se' ta ese tö se' bikeitseke er bua' wa*

*(Marcos 9.38-40)*

<sup>49</sup> Juan tö iché Jesús a:

—A s'wöbla'ukwak, wëm sué sa' tö eköl, e' tö aknama trè'wéyal be' ttò wa. Erë ie' kè ku' se' ta, e' kuëki sa' tö iché ia tö kè iwaria.

<sup>50</sup> Jesús tö iiüté:

—Yi kè ku' ñippök se' ta, ese tso' se' ta. E' kuëki kè iwöklö'war.

*Santiago ena Juan e'pa uñé Jesús tö*

<sup>51</sup> Jesús mi'kekane ká jai a, e' kéwö dökewatke, eta' Jesús tö ibikeitsé tö ye' mía diché wa Jerusalén, ta imía. <sup>52</sup> Ie' tö wëpa wëlepa patkëmi ie' yöki kewe u yulök kaporöie. Ie'pa mía demi ká tso' etk Samaria ee. <sup>53</sup> Erë Samaria wakpa wà ijcher tö Jesús ena ittökatapa

mi'ke Jerusalén, e' kuëki ie'pa kè wà ikinewa. <sup>54</sup> Mik Jesús ttökatapa kiè Santiago ena Juan e'pa tö isué tö Samaria wakpa kè wà ie'pa kinewa, età ie'pa tö Jesús a iché:

—A Skëkëpa, ¿be' ki ikiane tö sa' tö bö' kiè ká jaì a ie'pa ewowa?

<sup>55</sup> Erë Jesús wötréene ie'pa sauk ta ie'pa uñéitö. <sup>56</sup> E' ukuöki ta ie'pa mía ká skà tso' tsinet ee.

*Wëpa mañal e' yuak Jesús ttökatapaie*

*(Mateo 8.19-22)*

<sup>57</sup> Ie'pa mirwa ñala ki ta wëm eköl tö Jesús a iché:

—A këkëpa, ye' mi'ke be' ta ká wa'ñe wé be' mirö ee.

<sup>58</sup> Jesús tö iiüté:

—Bakli' u ta', ñies dúla u ta', erë ye' dör S'ditsö Alà, e' kè wà u ta' sènoie.

<sup>59</sup> Jesús tö iché wëm eköl skà a:

—Mishka ye' ta.

Erë wëm tö iiüté:

—A këkëpa, kawö mú ña, mik ye' yé blërkewa e' nu wötökwa, e' ukuöki ta ye' mi'ke be' ta.

<sup>60</sup> Jesús tö iiüté:

—Wëpa dör wes s' duulewa es Skëköl wöa, as esepa tö iyamipa nu wötö. Erë be' yú, ì blúie Skëköl tso' e' tté pakök sulitane a.

<sup>61</sup> Wëm eköl skà tö iché Jesús a:

—Ye' e' yuak be' ttökataie, erë kewe kawö mú ña shkoie e' chökät ye' yamipa a.

<sup>62</sup> Jesús tö iiüté:

—Yi e' yué ye' ttökataie ta ì kos méatitö ye' dalërmik, erë ibikeitséneitö taië, età ese kè ki ì blúie Skëköl tso' e' mène.

## 10

*Jesús tö ittökatapa dabom kuryök ki böi (72) e'pa patké*

<sup>1</sup> E' ukuöki ta Skëkëpa Jesús tö ittökatapa skà shushtë döka dabom kuryök ki böi (72) patkëmi ie' yöki kewe böi böi wé ie' mi'ke ese ska'.

<sup>2</sup> Ie' tö iché ie'pa a: “Moki pë' tso' taië e' ki Skëköl ttè buaë kiane ttsè. Esepa dör wes iyiwö tso'tke wë'iäe shtë es, erë ishtökwakpa kè dör taië. E' kuëki a' tö ikió kanè wák a tö ishtökwakpa patkó. <sup>3</sup> A' yú. Ye' tso' a' patkök ye' ttè pakök pë' shua wes obejala èmi namu tso' taië, ese shua es. <sup>4</sup> Inuköl skúla ena dalì skú ena klökkuö skà, ese kos kè tsarmi yës. Ñies yi kué a' tö ñala wa, ese kè ta a' ttök taië. <sup>5</sup> Mik a' dewa yile ska', età kewe ichó ie'pa a tö ‘Skëköl er buaë chò a' a.’ <sup>6</sup> Ie'pa tö a' kiéwa er bua' wa, e' ta Skëköl er buaë chöraë ie'pa a. Erë kè idör es, e' ta Skëköl kè er buaë chòpa ie'pa a. <sup>7</sup> Ie'pa tö a' kiéwa buaë, e' ta a' e' tsúat u e' a. Ttè tso' e' tö iché i' es: ‘Kaneblökwak chkòmi ì kanewëkeitö e' ské wa.’ E' kuëki ì meke ie'pa tö a' a' ñè yè, e' ñú, e' yó. U e' è a' e' tsúat a' tso' ká e' a' e' dalewa. <sup>8</sup> Ká wé a' demi ta ká e' wakpa tö a' kiéwa buaë, e' ta ì mekeitö a' a' ñè e' ñú. <sup>9</sup> Ie'pa duöke, e' ta e'pa bua'úne. Ñies ichó ie'pa a: ‘Ì blúie Skëköl tso' e' kèwö dewatke tsinet a' o'mik.’ <sup>10</sup> Erë ká wele wakpa kè wà a' kinewa, e' ta a' yú ie'pa ñala wa ta ichó ie'pa a: <sup>11</sup> ‘A' kapo tso' sa' klöttö mik, e' ppée sa' tö iwà kkachöie tö a' dör Skëköl bolökpa. Erë a' wà ijchenú tö ì blúie Skëköl tso' e' kèwö dewatke tsinet a' o'mik.’ <sup>12</sup> Ye' tö a' a' iché tö mik Skëköl tö a' chakeketke inuí ki aishkuö ta, età ká e' wakpa weirdäe siarë Sodoma wakpa bak senuk suluë e'pa tsata.

*Ká mañat wakpa weirdäe siarë*

*(Mateo 11.20-24)*

<sup>13</sup> “A Corazín wakpa, a Betsaida wakpa, ¡wéstela ina a' ta! Ì kè or yi a ese wé ye' tö taië a' wörki, erë kè a' er maneone. E' úpa ye' tö Tiro ena Sidón e' wakpa wörki, e'ma ká iaiaë ie'pa er maneobak. Ie'pa tö eriane datsi' ajaë ese ië'kabak, ñies ie'pa e' tkë'kabak



muluchka k<sub>i</sub> iwà kkachoie tö ie'pa er mane'wé Skéköl a. <sup>14</sup> E' kuek<sub>i</sub> ye' tö ichè tö aishkuö ta mik a' wöchakirketke a' nu<sub>i</sub> k<sub>i</sub> e' k<sub>e</sub>wö de, eta a' wömerdattsa weinuk taië shute Tiro ena Sidón wakpa tsata. <sup>15</sup> A Cafarnaúm wakpa, kè a' tö ibikeitsök tö a' mi'mitser ká jai a. Ie' tö a' patkerami diöshet wé s'wimblu weirke ee.”

<sup>16</sup> Eta Jesús tö iché ittökatapa a: “Yi tö a' ttò ttseke ta iutekeitö, ñies ese tö ye' ttò ttseke ta iutekeitö. Yi tö a' wateke, ñies ese tö ye' wateke. Ñies yi tö ye' wateke, ese tö Skéköl tö ye' patkè', e' wateke.”

*Jesús ttökatapa dabom kuryök k<sub>i</sub> böl (72) e'pa dene*

<sup>17</sup> E' ukuök<sub>i</sub> ta Jesús ttökatapa dökä dabom kuryök k<sub>i</sub> böl (72) patkè' ie' tö, e'pa dene ttsè'nerak buaë. Ie'pa tö iché ie' a:

—A Skékëpa, aknamapa tö sa' ttò dalöié be' ttò wa.

<sup>18</sup> Ie' tö ie'pa iüté:

—Tó. A' e' aléka Satanás k<sub>i</sub> je'. Ye' isué tö ie' bateshkar ká jai a wes alá wöñar es. <sup>19</sup> Ye' tö a' a diché mé e' aloka tkabè k<sub>i</sub> ena bachè' k<sub>i</sub> ñies e' aloka Satanás diché k<sub>i</sub>. Es kè ì tö a' we'ikepa. <sup>20</sup> Kè a' ttsè'nuk buaë wimblupa sulusi tö a' ttò dalöié, e' è kuek<sub>i</sub>. E' skéie a' kiè tso' kitule ká jai a sene michoë yèkkuö k<sub>i</sub>, e' kuek<sub>i</sub> a' ttsè'nú buaë.

*Jesús ttsè'ne buaë*

*(Mateo 11.25-27; 13.16-17)*

<sup>21</sup> Jesús tso'ia ttök ittökatapa ta, e' shua Wiköl Batse'r tö ie' ttsè'wé buaë shute. Ie' tö iché: “A ye' Yé, be' dör íyi ulitane tso' ká jai a ena ká i' a e' Kéköl. Be' tö ttè ikkè blè'wa pè' wa siwa' jcher iskië ena erbikò taië esepa yöki. Erë ikkachéwäbö s'ësela a. Es be' k<sub>i</sub> ikiane, e' kuek<sub>i</sub> be' iwé es. E' kuek<sub>i</sub> be' kikékayö.”

<sup>22</sup> Jesús tté S'yé ta one ta ichéitö pè' tso' ee e'pa a: “Ye' Yé tö íyi ulitane méat ye' ulà a. Ye' dör Skéköl Alà, kè yi wa ijcher moki tö wes ye' dör, e' jcher ye' Yé è wa. Ñies kè yi wa ijcher moki tö wes ye' Yé dör, e' jcher ye' è wa. Ñies wépa a ye' éna ikkachakwa esepa wa ijchermi.”

<sup>23-24</sup> Eta Jesús wötréene ittökatapa kke ta ichéitö ie'pa è a: “Ye' tö a' a ichè tö Skéköl ttekölpa taië ena blu'pa bak ká iaiaë esepa taië tö, ì sué a' tö, e' kkeyè' siarè suè, erè ie'pa kè wa isune. Ñies ì ttsè a' tö, e' kkeyè' siarè ie'pa tö ttsè, erè ie'pa kè wa ittssène. E' kuek<sub>i</sub> wépa tö ì sué a' tö e' sué, ayècha buaë esepa.”

*Samariawak buaë e' pakè*

<sup>25</sup> Etökicha ta s'wöbla'uk ttè dalöiëno wa ese eköl debitu Jesús ska', e' tö ie' a ichaké itsaioie:

—A s'wöbla'ukwak, ¿ì wèmi ye' tö as sene michoë dò ye' ulà a?

<sup>26</sup> Jesús tö ie' a ichaké ñies:

—¿ì tso' kitule Skéköl yèkkuö k<sub>i</sub>? ¿Ima e' wà dör be' a?

<sup>27</sup> Eta s'wöbla'ukwak tö iüté:

—Skéköl yèkkuö tö iché: ‘Skéköl dalèritsó a' er kos wa, a' wák kos wa, a' diché kos wa, ena a' erbikè kos wa.’ Ñies e' tö iché: ‘A' malepa dalèritsó wes a' wákpa e' dalèr es.’

<sup>28</sup> Jesús tö iché ie' a:

—Be' tö iüté buaë. Be' tö iwé es, e' ta sene michoë döraë be' ulà a.

<sup>29</sup> Erè ie' e' tsatkak ttè e' yöki, e' kuek<sub>i</sub> ie' tö Jesús a ichaké:

—Eta s'yamipa ché Skéköl yèkkuö tö, ¿esepa dör s'yamipa wése?

<sup>30</sup> Eta Jesús tö iüté ttè i' wa:

—Wëm eköl datse Jerusalén, e' micho Jericó, eta ñala wa akblökwakpa tö ie' klö'wéwa. Ì dami iwa kos dò idatsi' e' bléwarakitö. Ie' ppéraitö taië ta imíyal. Ie' méat tär ie'pa tö ñala ska', tsir eta iduowa. <sup>31</sup> Eta judiowak eköl dör sacerdote e' dami ñala e' k<sub>i</sub>. Mik ie' tö wëm tär shka'ule e' sué, eta ie' tkami bánet iyöki. <sup>32</sup> Es ñies judiowak skà eköl dör Leví aleri kaneblöke Skéköl wé a, e' dami ñala e' k<sub>i</sub>. Mik ie' tö wëm tär shka'ule, e' sué,

eta ie' ñies tkami bánet iyöki. <sup>33</sup> Erë samariawakpa kè mik a' wödör, suëke a' tö suluë, esepa eköl dör wëm, e' dami ñala e' ki. Mik ie' tö wëm tär shka'ule e' suë, eta ie' wa iwër siarë. <sup>34</sup> Ie' de iska', ta wé ishka'ne e' paskuéitö vino wa, paikléitö kiò wa, ta ipatréwaitö datsi'tak wa. E' ukuöki ta ie' tö itkéka iwák burro ki tsémi wé s'kaporö ese wé a, ta ee ie' tö ikkö'néia ipasuéia buaë. <sup>35</sup> Bule es ta samariawak tö s'kaporö wé, e' wák patué inuköl döka s'kaneblo ká böt e' ské ekkë, ta iché ie' a: 'Wëm shka'ule i' kkö'nú ña. Ilè kí tué be' tö ie' a, e' ta e' ki ye' tö be' patuerane mik ye' dene eta.'

<sup>36</sup> Eta Jesús tö ichaké s'wöbla'ukwak a:

—Wëm shka'wé akblökwakpa tö e' suë ie'pa mañal tö, ¿ie'pa wé tö idalëritsé moki wës s'kawöta s'yamipa dalëritsök es?

<sup>37</sup> S'wöbla'ukwak tö iiüté:

—Wé tö isuë er siarë wa e'.

Jesús tö ie' a iché:

—Es be' yú ta iú wës samariawak tö iwé es.

### *Jesús miá Marta ena María ska' upakök*

<sup>38</sup> Jesús ena ittökatapa miyal ñala wa dö Jerusalén, ta ie'pa de ká tsir ese a. Eë alaköl serke eköl kiè Marta, e' tö Jesús kiéwa buaë ie' u a. <sup>39</sup> Marta ël, kiè María, e' e' tkéwa tsinet Jesús ska', ta ì cheke Jesús tö e' ttsök ie' tkër. <sup>40</sup> Erë Marta wa kanè tso' taië iu a kanewë, e' kueki ie' de Jesús ska' ta ichéitö ie' a:

—A Skëképa, ye' ël tö ye' méat ekörla u kanéuk, ¿e' kè ki be' tkine? Ichó ie' a tö ye' kimú.

<sup>41</sup> Erë Jesús tö iiüté:

—A Marta, a Marta, taië be' e' tkiuke kanè tso' taië be' u a e' ki, <sup>42</sup> erë íyi etkë, e' dör ibua'ie, e' shüshté María tö wë. Kè yi tö iyepattsá iulà a.

## 11

### *Jesús tö ittökatapa wöbla'wé ttök S'yé ta*

(Mateo 6.9-15; 7.7-11)

<sup>1</sup> Etökicha ta Jesús tso' ttök S'yé ta. Mik ie' tté one, eta ie' ttökatapa eköl tö ie' a iché:

—A Skëképa, Juan S'wöskuökwak tö ittökatapa wöbla' ttök S'yé ta. Es ñies sa' wöbla'ú ttök S'yé ta.

<sup>2</sup> Jesús tö ie'pa a iché:

—Mik a' ttöke S'yé ta, eta ichó ie' a i' es:

'A Sa' Yé, as be' dalöiò sa' tö ì ulitane tsata.

As be' dö sa' blúie da'aie.

<sup>3</sup> Chkè kiane sa' ki senoie, e' mú sa' a ká bit ekkë.

<sup>4</sup> Sa' malepa kos e' nuì olo'yeta' sa' tö ie'pa ki,

e' kueki sa' nuì olo'yó sa' ki.

Kè sa' marttsá tö ì sulu tö sa' erkiöù.'

<sup>5-6</sup> Ñies ie' tö ie'pa wöbla'wé ttè i' wa:

—Sö ichèmi tö a' wele wa yami tso' eköl, ese ska' a' miá nañewe ká shaböts, ta a' tö iché ie' a: 'A yami, írö ye' yami datse bánet, e' debitu ye' ska', erë ye' kè wa ì ta' mè ie' a. Be' we'ikèyö, pan peitö ña mañat.' <sup>7</sup> Be' yami e' tö a' iütèmi i' es: 'Kè ye' tsiriwar. Ukkö wötënëwatke. Ye' ena ye' ala'r, sa' e' tēwatke kapökwa. Ye' kè e' köpaka ì muk be' a.'

<sup>8</sup> Jesús tö iché ie'pa a tö u wák e' kè e' köpaka chkè muk a' a, a' dör iyami e' è kueki. Erë a' tö ikié kröröë, kè wöklör ekkë, e' ta ie' e' köraká ta ì kos kiane a' ki, e' meraëitö a' a, a' tö ie' a ikié kröröë e' kueki. <sup>9-10</sup> "Wépa tö íyi kié Skëköl a, esepa a imeraëitö. Wépa tö íyi yulé ie' ska' esepa tö ikuëraë. Wépa tö ie' chaké, esepa kierawaitö weshké. E' kueki ì kiane a' ki e' kió ie' a, eta ie' tö a' a imeraë; e' yuló ie' ska', eta a' tö ikuëraë; ie' chakó, eta ie' tö a' kierawá weshké.

11 “Kè alà yé wéne tö tkabè mepa ilà a nima kiéitö e' skéie. 12 Nies kè a' wéne tö bachè' mepa ilà a dakro siä' kiéitö e' skéie. 13 A' dör pè' suluë erë e' tö íyi buaë meke a' alà a. jE' yitā buaë S'yé tso' ká jaì a e' tö Wiköl Batse'r meraë yi tö ie' a ikié ese a!”

*Judiowak tö Jesús kkaté*

(Mateo 12.22-30; Marcos 3.20-27)

14 Etökicha ta Jesús tso' aknama trè'ukshkar wëm eköl a. Aknama tö wëm e' ttò wöblëo'wā. Mik aknama mīā, etā wëm ttékane buaë. Wépa kōs tö isuë, e'pa tkirulune iweblök. 15 Erë ie'pa wēlepa tö iché: “Beelzebú dör bé, e' diché wa ie' tö ie'pa trè'wēkeyal.”

16 Ie'pa wēlepa skà éna Jesús tsaiak, e' kuëki ie'pa tö ikié ie' a tö ì kè or yi a ese úitö iwà kkachoie tö mokì ie' patkè'bitū Skéköl tö. 17 Erë ì bikeitseke ie'pa tö, e' suéwā ie' tö, e' kuëki ie' tö ie'pa a iché:

“S'serke ká etkè ki, e' ñi blabatsélor ta ñippöke iwakpa è ñita, kè wöklör, e' ta ie'pa wákpa è ñi eukewa kè diché ta'ia. Nies ñi yamipa è e' kéka ñippök ñita, kè wöklör, e' ta ie'pa sulunewā mīā siarë. 18 Es ñies Satanás mú tö aknamapa trè'wéyal, e' ta ie' tso' ñippök iwakpa è ta. ¿Wes ì blúie ie' tso' e' sermiia? A' icheke tö aknamapa trè'wéyal ye' tö Beelzebú diché wa, e' kuëki e' ché ye' tö. 19 Ye' tö itrè'úpaya Beelzebú diché wa, e' ma ¿yi diché wa a' klépa tö itrè'wèyalmi? Ie'pa kè a itrè'nukyal Beelzebú diché wa. E' kuëki ¿wes a' tö ye' kkatèmi tö ye' tö itrè'wēkeyal Beelzebú diché wa? A' wakpa klépa tö iwà kkacheraë tö a' ttè kè dör mokì. 20 Aknamapa trè'wéyalyö Skéköl diché wa, e' ta e' wa kiane yënoie tö ì blúie Skéköl tso', e' kéwö dewatke a' a.

21 “Mik wëm diché taië tö iu kkö'neke buaë tabè wa, ì wa, etā ie' íyi kōs tso' blëule buaë. 22 Erë mik wëm skà datse diché ta' taië shute ie' tsata, ñippök ie' ta, etā e' e' aléka iki ta íyi mik ierblöke e' tsatkoie ena ì skà kōs tso' ie' wā, e' yéttsa seraa iyöki, ta ikakmémiitö iyamipa a.\*

23 “Yi kè dör ye' sini', ese dör ye' bolök. Yi kè tö ye' kimè obeja kkö'nuk buaë, ese tö obeja po'wékemi.

*Aknama dene wëm a*

(Mateo 12.43-45)

24 “Mik wimblu sulusi trèneshkar yile a, etā imīā ká sir poë wé kè yi ku' ese ska'. Ie' tso' ká yulök senioie, erë kè ie' wā ikune. E' kuëki ie' ibikeitsé: ‘Ye' mīāne wé ye' trèneshkar ee senuk.’ 25 Mik ie' demine wëm e' a, etā ie' tö isuë tö wëm dör wes u shüiriule buaë maneneë es. 26 Etā ie' mīā iyamipa kí yulök döka kul suluë shute ie' tsata ta ie'pa kōs de senuk wëm e' a. Wëm e' mīāne suluë shute kenet tsata.”

*Ayëcha buaë e' dör yi*

27 Jesús tso' ttök, etā alaköl eköl dur ee, e' tö iché aneule:

—jAlaköl tö be' tsöq', be' talao', ayëcha buaë e'!

28 Erë ie' iüté:

—jAyëcha buaë shute, wépa tö Skéköl ttè ttsé ta idalöiekerakitö esepa!

*Wépa dör pè' suluë esepa kè tö Jesús tté klö'weta'*

(Mateo 12.38-42; Marcos 8.12)

29 Ie'pa kí ñi dapa'wé Jesús pamik, etā ie' tö iché ie'pa a: “A' dör pè' suluë. A' tö ye' a ikieke tö ì kè or yi a ese uyö iwà kkachoie tö mokì Skéköl tö ye' patkè'bitū. Erë ye' tö ilè weraë etökicha ème iwà kkachoie, e' dör wes Jonás ta ibak es. 30 ì bak Jonás ta e' tö iwà kkayè' Nínive wakpa a tö Skéköl tö ie' patkè'bitū ie'pa pattök. Es ñies, ye' dör S'ditsö Alà, e' tö iwà kkacheraë a' a tö mokì Skéköl tö ye' patkè'bitū. 31 Aishkuö ta mik

\* 11:22 Ttè i' wa kiane chë tö Jesús e' aléka Satanás ki, e' kuëki ie' tö aknamapa trè'wēkeyal.

a' wöchakirketke a' nuì k<sub>i</sub>, età alaköl datse ká bānet diwö tskirke e' o'mik† bak iká blúie, e' e' kōrakā Skēköl wōrk<sub>i</sub> a' kkatök tō a' dör pē' suluē. Ká iaiāē ie' dē'bitū datse kamiē shute se' blú bak kiē Salomón wā íyi jcher taiē, e' ttò kittsök. Erē i'ñe tā ye' dur a' shuā, e' dör Salomón tsata, erē a' kē tō ye' ttò iutē. E' kuek<sub>i</sub> alaköl e' tō a' kkatēraē. <sup>32</sup> Mik Jonás tō Nínive wakpa paut, e' tō ie'pa er maneottsa Skēköl a, erē i'ñe tā ye' dur íerō, e' dör Jonás tsata, erē a' kē er mane'ù Skēköl a. E' kuek<sub>i</sub> aishkuō tā mik a' wöchakirketke a' nuì k<sub>i</sub>, età Nínive wakpa e' kōrakā Skēköl wōrk<sub>i</sub> a' kkatök.

*Se' wöbla buaē ena se' wöbla suluē*  
(Mateo 5.15; 6.22-23)

<sup>33</sup> “Kē yi tō bö'wö tskepaka tā ibléwaitō ö ipatkéwaitō kalkuō dikia. E' skéie se' tō itkekeka kákkē se' yamipa datse e'pa wō a ká ñi'woie. <sup>34</sup> Se' wöbla dör wes bö'wö es se' chkà kōs a. E' kuek<sub>i</sub> se' wöbla dör buaē, e' tā se' chkà kōs e' a ká olo tā' buaē. E' dör wes se' er dör buaē es, ì kōs yēsyesē buaē, ese k<sub>i</sub> se' er me'rie. Erē se' wöbla dör suluē, e' tā se' chkà kōs e' tso' stui a. E' dör wes se' er suluē es, ì kōs suluē, ese k<sub>i</sub> se' er me'rie. <sup>35</sup> A' e' kkō'nú buaē as a' kē e' kītō'ù tō a' wöbla wawēr buaē, erē kē iwawēr buaē. <sup>36</sup> A' wöbla dör buaē, e' tā ì kōs buaē, ese wēr buaē a' wa. E' dör wes a' serke wé bö'wö ñarke kekraē ee es, kē ku' stui a.”

*Wéstela ina fariseowakpa ena s'wöbla'uk ttē dalöiēno wa wakpa tā*  
(Mateo 23.1-36; Marcos 12.38-40; Lucas 20.45-47)

<sup>37</sup> Mik Jesús ttē one, età fariseowak eköl tō ie' kiémi chkök iu a. Età ie' míā demi ee e' tkéser mesa kulé k<sub>i</sub>. <sup>38</sup> Erē fariseowak e' tō isuē tō kē ie' wā iulà pakōne wes ie'pa wöblar es, e' tō ie' tsiriwéka. <sup>39</sup> E' kuek<sub>i</sub> Jesús tō iché ie' a:

—A fariseowakpa, A' dör wes a' tkā' kōs pa skueke a' tō ikikkē è es. A' wēr buaē, erē a' er suluē. A' dör akblökwakpa. A' k<sub>i</sub> s'yamipa íyi kōs e' kianettsa a' è a. <sup>40</sup> ¡A' kē éna ì ane yēs! ¿A' kē wā ijcher tō Skēköl tō se' chkà yō', e' è tō se' er yō'? <sup>41</sup> S'siarēpa kimú a' íyi wa, età ì kōs atdaē maneneē a' a.

<sup>42</sup> ¡A fariseowakpa, wéstela ina a' tā! Kākōla tso' iēno chkē a kiē menta ena ruda ena iskà tso', ese kōs tsá meke a' tō Skēköl a. Erē a' kē serku' yēsyesē s'malepa tā. A' kē tō Skēköl dalëritseta', e' uk a' kawōtā ñies.

<sup>43</sup> ¡A fariseowakpa, wéstela ina a' tā! Kula' tso' a' ñi dapa'wō wé a kēkēpa dalöiërta' esepa a, ese k<sub>i</sub> a' wöbatsö e' tköksēr. A' k<sub>i</sub> ikiar tō a' shké'wē wes kēkēpa taiē shké'wē es, wé pē' tso' taiē, e'pa wōwa.

<sup>44</sup> ¡Wéstela ina a' tā! A' dör wes pō tso' kē jcher yi wā e' bata k<sub>i</sub> s'shkōrami es. Ishu dör ñá taiē alar suluē, e' kē alar ttsēne s'wā.

<sup>45</sup> S'wöbla'ukwak ttē dalöiēno wa, ese tso' eköl ee, e' tō iché Jesús a:

—A s'wöbla'ukwak, mik be' tō e' ché fariseowakpa a, età ñies be' tso' sa' chök suluē.

<sup>46</sup> Jesús tō iituté:

—¡A s'wöbla'uk ttē dalöiēno wa wakpa, wéstela ina a' tā ñies! A' ttē dalöiēno taiē darērēē, ese meke a' tō s'malepa a wà dalöiē wes dali ekkeē iè s'k<sub>i</sub> es, erē a' ulatska è kē tietā'wā a' tō ie'pa kimoie.

<sup>47</sup> “¡Wéstela ina a' tā! A' tō Skēköl ttekölpa bak ká iaiāē e'pa pō yuekene pa'alí, erē a' yépa tō ie'pa kötulur. <sup>48</sup> Es a' tso' iwà kkachök tō ì wamblé' a' yépa tō, e' dör buaē a' a. A' yépa tō ie'pa kötulur, tā i'ñe tā a' tō ie'pa pō yuekene buaē.

<sup>49</sup> “E' kuek<sub>i</sub> Skēköl wā íyi jcher taiē, e' tō iyē'atbak: ‘Ye' tō ye' ttekölpa ena ye' ttē pakökwakpa patkeraē Israel aleripa a, età e'pa welepa tterawā ie'pa tō, ñies welepa skā we'ikeraē ie'pa tō.’ <sup>50</sup> Skēköl ttekölpa taiē kötulur a' yépa tō. Mik ká i' yōne kuaē, <sup>51</sup> età Abel kötwa Caín tō. E' itök<sub>i</sub> a' yépa bak tō Skēköl ttekölpa taiē kötmi. Ibata kötwarakitō e' dör Zacarías. E' kötwa ie'pa tō ká' tso' íyi mokā Skēköl a e' ena iwé e' shushā. Skēköl

† 11:31 diwö tskirke e' o'mik: Si'kuaie ttē e' dör sur. Kē se' wā ijcher tō ima e' chëmisö bua'ie se' ttò wa.

ttekölpa kōs kötulurbak a' yépa tö, e' nuí kierané ie' tö a' ena wépa dör a' es, e'pa a. Moki ye' tö a' a ichè tö Skéköl ttekölpa kōs kötulur a' yépa bak e'pa tö, e' nuí kuéki a' ena wépa dör wēs a' es, esepa weirdaë siarë.

<sup>52</sup> “A s'wöbla'uk ttè dalöiëno wa wakpa, wéstela ina a' ta! A' wa Skéköl yékkuö tso', e' dör wēs ukkö yottsā tso' es as se' wa ijcher tö wēs Skéköl dör. Erë e' kkëuk a' tso' a' malepa yöki. A' kè wa ijcher moki tö wēs Skéköl dör, ñies wépa ki e' kiane jchenoie, esepa wöklö'weke a' tö as ie'pa kè wa ijcher.”

<sup>53</sup> Eta Jesús e' yétsa u e' a. S'wöbla'uk ttè dalöiëno wa wakpa ena fariseowakpa uluneka taië ie' ki. Ie'pa tö ie' chakémi taië ttè darërëë wa. <sup>54</sup> Ie'pa éna ie' klö'wakwa ittè ki ikkatoie.

## 12

### *A' e' kkö'nú fariseowakpa yöki*

*(Mateo 10.26-27)*

<sup>1-3</sup> Eta pë' dapane taië Jesús ska' dōka miles, e'pa tērke ñi mik taië. Jesús tö ichémi ittōkatapa a kewe: “A' e' kkö'nú fariseowakpa pan wölōwōka yöki. E' wà kiane chè tö a' e' kkö'nú wēs ie'pa sēr e' yöki. Ie'pa e' wamblō suluë, erë ie' òrak tö ie'pa dör buaë s'malepa tsata. Kè ì ku' blëulewā ese kè kkayērpawā aishkuö tā. Ese kōs jcherdane. Ì cheke a' tö bikeitsè a' tö tö kè ittsène, ese ttserane sulitane tö. Ì kōs cheke a' tö asas ukkö wötëulewā shūa, ese yērdane aneule sulitane kukua. E' kuéki a' e' kkö'nú as a' kè e' ò wēs ie'pa es.

### *Yi yöki s'kawōta suanuk*

*(Mateo 10.28-31)*

<sup>4</sup> “A ye' yamipa, kè a' suanuk yi tö s'tteta'wa esepa yöki. Ie'pa tö s'ttēwa, erë e' ukuöki tā kè wēs ie'pa a se' onukia. <sup>5</sup> Erë sūyö a' a ichè tö yi yöki a' ké suanuk. A' suanú Skéköl yöki. Ie' tö a' ttēwami, e' ukuöki tā ie' wa diché tā' a' uyowā bö' ké a. Ye' tö iskà chène a' a, a' suanú ie' yöki.

<sup>6</sup> “Dúla skēl tuè tottola, inuköl böt wōshkila è, erë ie'pa kè ska' Skéköl er chōtā'wa. <sup>7</sup> Ñies a' kè ska' ie' er chōpawa. Dò a' tsakö bitö tso' shtaoule ie' wa. Ie' a tā a' tuè taië tkōka dúla tso' taië ese tsata, e' kuéki kè a' suanuk.

### *Wépa kè jaëne Jesús ki*

*(Mateo 10.32-33; 10.19-20)*

<sup>8</sup> “Yi e' chō sulitane wörki tö ie' dör ye' dör S'ditsö Alà, e' ttökata, e' tā ese cheraëyö Skéköl biyöchōkwakpa wörki tö ie' dör ye' ttökata. <sup>9</sup> Erë yi tö iblé sulitane wörki tö ie' kè dör ye' ttökata, e' tā ñies ibleraëyö Skéköl biyöchōkwakpa wörki tö ie' kè dör ye' ttökata.

<sup>10</sup> “Yi tö, ye' dör S'ditsö Alà, e' ché suluë, e' nuí olo'yèmi Skéköl tö iki. Erë yi tö Wiköl Batse'r ché suluë, e' kè ki inuì olorpa.

<sup>11</sup> “Mik pë' tö a' klö'wéwā tsémi kkatè ye' ttè kuéki judiowak ñi dapa'wo wé a ö s'shulōkwakpa wörki ö s'wōkirpa wörki, eta kè a' tkinuk tö ì chémi a' dör e' tsatkoie.

<sup>12</sup> E' wōshā tā Wiköl Batse'r tö ttè eraë a' a chè ie'pa a.”

### *Inuköl blú eköl e' er me'rie inuköl è ki*

<sup>13</sup> Pë' dapane taië e' eköl tö Jesús a iché:

—A s'wöbla'ukwak, ichó ye' èl a tö sa' yé iyi ukuö ate kōs e' blatöö, ye' icha mú ye' a.

<sup>14</sup> Jesús tö iuté:

—A wēm, ye' kè dör a' iyi shulōkwak, ñies ye' kè dör a' iyi blatōkwak.

<sup>15</sup> Ñies Jesús tö iché:

—Sene chók e' kè dōku' s'ulà a iyi tso' s'wā taië ese wa. E' kuéki a' e' kkö'nú iyi kkechè taië ese kōs yöki.

<sup>16</sup> Età Jesús tò ttè kleé ie'pa i' es: “Wëm eköl dör inuköl blú taië, e' tò íyi wöwé taië shute iká kī. <sup>17</sup> Ie' tò ibikeitsè: ‘Ye' íyi wöne taië ¿wes e' wèmi ye' tò? Kè ichè'kaia iwé a.’ <sup>18</sup> Età ie' tò ichè: ‘Ye' éna iane tò wes ye' tò iwèmi. Súyö iwé tkèttsa ské yuèkane pa'alī, bérie shute, e' a ye' iyiwö kōs ena ì kōs tso' ye' wā e' blekeyö. <sup>19</sup> E' ukuökī tā ie' tò ibikeitsè: íyi tso' taië ye' wā blëule, e' mik ye' sermi dò duas taië. E' kueki sú ye' enū, chkò, di'yò, ttsè'r buaë.’ <sup>20</sup> Erë Skëköl tò iché ie' a: ‘Be' kukuò darërëë, bërë nañewe be' duöwaraë, etā ì kōs tso' be' wā blëule, e' atē pè' kua'kī ulà a.’ ” <sup>21</sup> Età Jesús tò iché: “Es itkōraë wé tò íyi blé taië iwák a ká i' a, erë kè serku' wes Skëköl kī ikiane es, ese wák dör siarë Skëköl a.”

*Kè a' tkinuk ì kī*  
(Mateo 6.25-34)

<sup>22</sup> E' ukuökī tā Jesús tò iché ittōkatapa a: “Ye' tò a' a ichè: Kè a' tkinuk ì kiane a' kī senoie, chkeie, datsi'ie, ìie, ese kōs kī. <sup>23</sup> S'tso' ttsè'ka e' kè dör chkök ème, ñies s'chkà kè dör datsi' è ioie. <sup>24</sup> Dù saú a' tò. Ie'pa kè tò ì kuatketā' ì wōshtetā' kè tò chkè bletā', erë Skëköl tò ie'pa tieke. E' yitā ie' a ta a' tuè taië dù kōs tsata. <sup>25</sup> A' tkirke taië e' kī, e' kè tò a' a kawö kī mepa senoie ekuölö è. <sup>26</sup> E' dör tottola erë kè a' a ior. ¿Wes a' tkirke íyi malè kī?

<sup>27</sup> “A' tò ma'ma wörkua bua'buāala ese saú wes italar, kè kaneblötā', kè datsi' yueta'. Eré blu' bak kiè Salomón, e' wā íyi ulitane bua'buāë bak taië, erë ye' tò a' a ichè tò ie' datsi' bua'buā, e' kè wër buaë wes ma'ma wër es. <sup>28</sup> Kākō suésö i'ñe, bule tā iñanewa, erë Skëköl tò ikītkeke buāala iwörkua wa. Ie' tò kākō kītkeke es, je' yitā ie' tò a' kianeia erblò buāë ie' mik, e' paieraë! <sup>29</sup> E' kueki kè a' er mukwā chkè kī, di'yè kī, ese kōs kè kī a' tkinuk. <sup>30</sup> Pè' kè tò Skëköl dalöie esepa tkirke taië íyi kōs ekkè kī. Erë ì kōs kiane a' kī e' jchertke a' Yé wā. <sup>31</sup> E' skéie ì kōs blúie Skëköl tso' e' kī a' er mú keweie. A' tò iwé es, e' tā ñies íyi ñekkè dōraë a' ulà a.”

*Íyi buāë bleke ká jai a*  
(Mateo 6.19-21)

<sup>32</sup> “A ye' obejapala, kè a' suanuk ì yöki. A' kè dör taië, erë S'yé er buāë chöke a' a. Ie' tò a' shushté as ì blúie ie' tso' e' dò a' ulà a ie' tā ñitā. <sup>33</sup> Ì tso' a' wā, e' wataúttā tā iské mú s'siarëpa a. Ì dör buāë Skëköl a, e' ú, etā es a' a íyi bua'buā blërdaë ká jai a wes inuköl blèsö, ì kè nurta'wā, ese a es. Eē akblökwakpa kè a iekiblënu, ñies powak kè a ikatanukwā. <sup>34</sup> Wé a' íyi bua'buā tso' eē a' er me'rie ñies, e' kueki a' íyi bló ká jai a.”

*A' tso' erkī Jesús datsene e' panuk*

<sup>35-36</sup> “A' tso' erkī wes kanè mésopa tò iwökir tso' ulabatsè kèwö tkö'uk datsene, ese panè es. Ie'pa tso'tke ie' panuk datsi' iënetke ikanewoie, ibö'wö tskékatke buaë. Mik iwökir de tā ichaké ukkö a, etā bet tā ie'pa ukkö ppée ie' a. <sup>37</sup> Wépa kué iwökir tò ttsè'ka ie' panuk mik ide etā, ayëcha buā esepa. Mokī ye' tò a' a ichè tò ie' e' paiöraë wes chkè watiökwak es tā ikanè mésopa keraëitö e' tköksér kula' kī tā ie'pa tieräëitö chkè buāë wa. <sup>38</sup> Kanè mésopa kué iwökir tò ttsè'ka ie' panuk ká shaböts alè ö ká ñirketke alè etā, ayëcha buāë esepa. <sup>39</sup> Erë a' éna ianú tò u wák mú wā ijcher tò wekkè akblökwak datse, e'ma ie' kè tò kawö mepa yi a dökwa ífy ekiblök. <sup>40</sup> Es ñies ye' dör S'ditsö Alà, e' datsene mik a' kè ku' ye' panuk etā, wes akblökwak es. E' kueki a' tso' erkī.”

*Kanè mésopa bōl eköl dör buāë, eköl dör suluë*  
(Mateo 24.45-51)

<sup>41</sup> Pedro tò Jesús a ichaké:

—A Skëkëpa, ttè wakleébö ¿e' dör sa' è a ö sulitane a?



<sup>42</sup> Ie' iūtú: “Kanè méso yēsýēsē kabikeitsò buaë, ese mekeka iwökir tö imalepa kuebluie ie'pa tiök kekraë mik kè iku' e' dalewa. <sup>43</sup> Iwökir dene ta ikuëitö iuk wes iyëneia es, e' ta ayëcha e' dör buaë ie' a. <sup>44</sup> Moki ye' tö a' a ichè tö kanè méso e' merakaitö, ie' wa iyi tso' kos, e' kuebluie. <sup>45</sup> Erë kanè méso ñe' erbikò tö 'ye' wökir kè döpane bet.' E' kueki ie' tö imalepa wëpa ena alakölpa ppëmi darërëë. Ñies ie' chkémi, di'yëmi taië ena ie' ttëmi blo' wa. <sup>46</sup> Erë idiwö ena ikéwö kè wa ie' ku' ipanuk, eta iwökir dörane ta iwe'ikeraitö siarë wömerattsa weinuk wes pë' kè erblöta' Skëköl mik esepa es.

<sup>47</sup> “Kanè méso wé wa ì kiane iwökir ki, ese jcher buaë, erë ie' kè wa ì one yës, kè tö ittò dalöië, ese we'ikeraë iwökir tö siarë. <sup>48</sup> Erë kanè méso wé kè wa ijcher ta e' tö ì suluë wamblé, e' ta ese we'ikeraë iwökir tö erë kè taië. Wëpa a imène taië kanebloie Skëköl a, esepa a ikieraëitö taië. E' sù wëpa a imène taië shutë, esepa a ikieraëitö taië shutë. Kos se' a imène e' mik se' a ichakirdaë.

*Jesús tté kueki se' ñi blabatsöraë*

*(Mateo 10.34-36)*

<sup>49</sup> “Ye' dë'bitü ká i' a s'aláuk wes bö' taië wöbatska ese tö s'aláwë es, e' mú wöbatskatke. <sup>50</sup> Erë kewe ta ye' weirdaë siarë, e' kawöta dalë'ttsëyö, e' tö ye' eriaweke taië dò mik itka eta. <sup>51</sup> ¿A' ibikeitsé tö ye' dë'bitü ká i' a as a' ser bèrë ñita? Ye' ichè, au. E' skéie ye' dë'bitü a' blabatsök. <sup>52</sup> I' ta iñak tkënewamitke, se' serke skel ñita, e' ñi blabatsöraë ye' tté kueki, böi ñippöraë mañal ta, mañal ñippöraë böi ta. <sup>53</sup> Iyé ñippöraë ilà wëbie ta ena ilà ñippöraë iyé ta; imi ñippöraë ilà busi ta ena ilà ñippöraë imi ta; yàk ñippöraë iyàk ta.”

*Ì weke Jesús tö e' wà kè ane ie'pa éna*

*(Mateo 16.1-4; Marcos 8.11-13)*

<sup>54</sup> Ñies Jesús tö ie'pa a iché: “Mik a' isué tö kalí moneka diwö mi'ke e' éka, eta a' tö icheke 'kalí yërdaë', eta moki iwà yërdaë. <sup>55</sup> Mik a' ittse tö siwa' datse ká sir poë e' éka, eta a' tö icheke 'diba ardaë', eta moki iwà ane. <sup>56</sup> ¿A' e' ò suluë! A' éna iane mik kalí yërmi, mik diba armi, erë ì uk ye' tso' iwà kkachöie tö yi dör ye', ¿wes kè e' wà ane a' éna? ¿A' kè wa ì jcher taië wes a' ibikeitseke es!”

*A' ñi shuló*

*(Mateo 5.25-26)*

<sup>57</sup> “¿Ì kueki a' kè a' ibikeits tö ì dör buaë, ì dör suluë Skëköl a? <sup>58</sup> Yile tö a' kkaté nuì kueki e' wa a' mí s'shulök wé a, e' ta ima'ú shulë ie' ta ñalá ki as ie' kè tö a' wömuttsa s'shulökwak ulà a we'ikè. A' kè tö iwè es, e' ta s'shulökwak tö a' wömerattsa s'shkëkupa ulà a ta e'pa tö a' wöterawa s'wöto wé a. <sup>59</sup> Ye' tö a' a ichè tö kè a' döpattsa dò mik a' tö nuì e' patuëttsa seraa eta. E' kueki a' er mane'ú Skëköl a kam iwà dò a' ki e' yöki.”

## 13

*S'kawöta er mane'uk Skëköl a*

<sup>1</sup> E' è kéwö ta pë' welepa tso' ee, e'pa tö iché Jesús a tö Galilea wakpa wëpa welepa tso' iyiwak jchök mè Skëköl a iwé a. E' dalewa Pilato tö ie'pa ttökulur patké ta ipé shutuéka iyiwak jchëne e' pé ta.

<sup>2</sup> Jesús tö iché ie'pa a: “¿Ima a' erbikò? ¿Galilea wakpa kötulur ñe'pa dör pë' sulusipa tkòka imalepa tsata, e' kueki ie'pa weine es? <sup>3</sup> Ye' tö iché au, kè idör es. Erë a' kè er mane'ù, e' ta ñies a' wákpa kos duölurdaë. <sup>4</sup> Ñies u tso' Jerusalén kiè Siloé, e' yöule kakkeë ák wa, mik e' anebitu aneka ie'pa ki, eta ie'pa duo döka dabom eyök ki pàköl (18). ¿Ima a' erbikò? ¿Ie'pa duolur ñe'pa ki inuì tso' tkòka Jerusalén wakpa malepa tsata? <sup>5</sup> Ye' tö a' a iché au, kè idör es. Erë a' kè er mane'ù Skëköl a, e' ta ñies a' duölurdaë.”

*Higuera klò tté wà pakè Jesús tö*

<sup>6</sup> Jesús tō ttè kleé ie'pa a' i' es: “Wēm eköl wā kal kiè higuera tso' tkēule elka idali shuā. Ie' mía iwō yulök, erë kè iwō tā' yēs. <sup>7</sup> E' kuēki ichéitō idali kkō'nukwak a: ‘I' tā duas mañal, ye' de kekraë higuera wō yulök, erë kè iwō tā'. E' kuēki itóobō as kè iku' àr éanas.’ <sup>8</sup> Erë idali kkō'nukwak tō iché: ‘A kēkēpa, as iariā duas ek. Súyō iwì paiklè kapöli tkēka iki. <sup>9</sup> E' wa sō isué tō duas ètō tā iwörmi e'ma buaë idir. Erë kè iwōne, e' tā iteerasō.’ ”

*Alaköl eköl wököulewā e' bua'wēne Jesús tō*

<sup>10</sup> Eno diwō et a Jesús tso' s'wöbla'uk Skéköl ttè wa ñi dapa'wo wé etkue a. <sup>11</sup> Etā ee alaköl tso' eköl tteke wimblu sulusi tō wököulewā. Ie' kirirke es, e' kī duas de dabom eyök kī pāköl (18). Kè ie' a e' wödurkā yēsyesē. <sup>12</sup> Mik Jesús tō isué, etā ikiéitō e' ska' tā ichéitō ia:

—A tayë, be' buanene. Duè tō be' kiri'weke, e' ulā a be' tkashkar.

<sup>13</sup> Etā ie' ulā mékā iki tā iwödunekane yēsyesē tā Skéköl kīkékamiitō taië. <sup>14</sup> Erë Jesús tō alaköl bua'wēne eno diwō a, e' kuēki judiowak ñi dapa'wo wé e' wökir ulunekā iki taië. E' kuēki ie' tō iché pē' dapane ee e'pa a:

—Domingo etō shuā ká tso' kul. Ká teröl dör se' a kanebloie. Ká teröl shuā a' shkó íe bua'wēne. Kè a' kine eno diwō a bua'wēne.

<sup>15</sup> Jesús tō iché ie' a:

—¡A' e' ò suluë! Eno diwō a a' ulitane tō a' iyiwak wöttseeke tā itsekemi di' yök. <sup>16</sup> Tayë i' dör Abraham aleri, e' tso' klöulewā Satanás ulā a dōkā duas dabom eyök kī pāköl (18) wēs iyiwak moulewā es. Eré i'ñe dör eno diwō, erë ¿wēs a' kè kī ikiane tō iwöttseyö aknama yöki?

<sup>17</sup> Mik Jesús tō e' ché, etā ibolökpa jaenekā taië. Erë pē' malepa ttsē'nerak buaë, ì buaë kos wé Jesús tō e' kuēki.

*Mostaza wō tté*

(Mateo 13.31; Marcos 4.30-32)

<sup>18</sup> Ñies Jesús tō iché: “Ì blúie Skéköl tso' ¿wēs e' dör? ¿Ttè wé wa yö ikleèmi? <sup>19</sup> E' dör wēs mostaza wō tkéwā wēm eköl tō íyök a es. Mostaza wō dör tsirlala, erë itskine talane bérie kalie, ese ulā tsakā dù u yuöke.”

*Pan wölöwōkā tté*

(Mateo 13.33)

<sup>20</sup> Ñies Jesús tō iché: “Ì blúie Skéköl tso' ¿ttè wé wa yö ikleèmi? <sup>21</sup> E' dör wēs pan wölöwōkā wötué tayë tō harinachka mañayök a es. E' tō harinachka, e' kos wölöwéka taië.”

*Ukkö tsitsir*

(Mateo 7.13-14,21-23)

<sup>22</sup> Jesús dami Jerusalén ñalé wa, etā ee ká tso' tseë, ká blublu ena ká tsitsir, e' wakpa wöbla'weke Jesús tō. <sup>23</sup> Etā yile tō ie' a ichaké:

—A kēkēpa ¿yēne tō kè yi tsatkërpa taië?

Ie' iuté:

<sup>24</sup> —Tsatkè wékkö dör tsir. Taië pē' tō ima'weraë shkōkwaiā, erë kè ie'pa döpawā. E' kuēki a' e' diché ió shkōkwaiā. <sup>25</sup> Mik u wák e' kékā tō ukkö wötéwā, etā a' tso' u'rki, e'pa tō ie' kieke ukkö a. A' tō ichakeke: ‘A kēkēpa, be' ukkö kköppöö sa' a.’ Erë ie' tō a' iüteraë: ‘Kè ye' wā a' suule.’ <sup>26</sup> Etā a' tō icheraë ie' a: ‘Sa' chka' be' tā. Sa' di'ya' be' tā. Be' tō sa' wöblao' sa' ká a.’ <sup>27</sup> Erë ie' tō a' iüteraë: ‘Kè ye' wā a' suule. A' dör ì sulu wamblökwakpa, a' yúshka bánet ye' yöki.’ <sup>28</sup> Mik a' tō Abraham, Isaac, Jacob ena Skéköl ttekölpā kos e'pa sué ì blúie Skéköl tso' e' a, erë a' uyanettsā bánet, etā a' iüraë siarë a' kà yilitdawā weine kuēki. <sup>29</sup> S'ditsö datse ká wa'ñe, esepa döraë chkök buaë ì blúie Skéköl tso' e' a. <sup>30</sup> Es se' welepa kè dalöiërta' ká i' a, esepa dalöiërdaë taië aishkuö tā. E' sù se' welepa dalöiërta' taië ká i' a, esepa atdaë ibataie aishkuö tā.

*Jesús eriane Jerusalén wakpa dalërmik  
(Mateo 23.37-39)*

<sup>31</sup> E' wöshā tā fariseowakpa welepa de Jesús ska' tā ichéitörak ia:

—Herodes éna be' ttakwa, e' kuëki be' yúshka ká bánet.

<sup>32</sup> Jesús tò ie'pa iüté:

—A' yú tā ichó s'kitö'ukwak ñe' a: 'I'ñe ena bule ye' tso' aknamapa trë'ukyal, ñies s'buawukne, böiki tā ye' kanè ene.' <sup>33</sup> Ye' mitke i'ñe, e' shkõmi bule böiki tkörö Jerusalén wé ie'pa wöblane Skëköl ttekölpa bak e'pa ttökulur ee, e' kuëki ye' kè ttepawā íe.

<sup>34</sup> ¡A Jerusalén wakpa, Skëköl ttekölpa kos ttekewā a' tö kekraë! ¡Ñies ittè pakökwakpa patkeke ie' tö a' a, e'pa ttekewā a' tö ák wa! ¡Wëkkë ye' erkiè tö ye' mú a' dapa'wè e' ska' wes dakro mitchke tö ila'rla dapa'wè ipik dikia es, erè kè a' ki ikiane yës! <sup>35</sup> Ye' ttò ttsó, Skëköl kè tö a' ká kkö'nepaia. Ye' tö a' a ichè tö a' kè tö ye' suepaia dö mik ye' dene etā. E' kèwö ska' tā a' tö ye' cheraë: '¡Ayëcha buaë yi datse Skëköl ttò wa e'!

## 14

*Wëm eköl iënekā taië e' buawé Jesús tò*

<sup>1</sup> Etökicha tā eno diwö a Jesús míā chkök fariseowakpa wökir eköl, e' u a. Etā ee fariseowakpa welepa tso' iweblök krereë ikkatoie ilè ki. <sup>2</sup> Etā wëm eköl kirirke iënekā taië, e' de dur Jesús wörki. <sup>3</sup> Etā Jesús tò ichaké s'wöbla'uk ttè dalöiëno wa wakpa a ena fariseowakpa a:

—¿Kawö tā' se' a s'buawukne eno diwö a?

<sup>4</sup> Erè ie'pa kè wā ie' iütëne yës. Etā Jesús tò wëm e' klö'wé tā ibua'wéitö tā ichéitö ia: 'Be' yúshka.' <sup>5</sup> Etā ie' tö iché fariseowakpa a:

—A' alà ö a' baka anemi di' biule uk a eno diwö a, e' tā bet a' míā iyöktsa.

<sup>6</sup> Ie'pa kè a ie' iütëne yës.

*Skawöta e' ökwa s'malepa yöki*

<sup>7</sup> Jesús isué tò pë' shkeñeule chkök, e'pa welepa tò kula' tso' kékëpa dalöiërta' taië, esepa a ese shushtë e' tkoie. E' kuëki ie' tò ie'pa patté i' es:

<sup>8</sup> —Mik yile tö a' wele shkeñé ulabatsè kèwö tkö'uk, etā kè a' e' tköksër kula' tso' kékëpa taië a ese kulé ki. Isalema kékëpa dalöiërta' taië a' tsatā ese de, <sup>9</sup> etā yi tö a' shkeñé, e' tö ichè a' a: 'Be' we'ikèyö, kula' se mú kékëpa i' a e' tkoie.' Etā a' jaërkami taië, miraë e' tköksër kula' tso' se' ësepa a ese ki. <sup>10</sup> E' skéie, mik yi tö a' shkeñé, etā a' e' tkóser kula' tso' se' ësepa a ese kulé ki. Es mik yi tö a' shkeñé, e' de a' ska', etā ie' tö ichè be' a: 'A yami, be' yú e' tköksër kula' tso' kékëpa a, ese kulé ki.' Es pë' kos tso' ee, e'pa tö a' dalöieraë wes kékëpa taië es. <sup>11</sup> Yi e' ttsökā taië, ese ardawa diöshet, erè yi e' wöéwa, ese kikardaka taië.

<sup>12</sup> Wëm tò ie' shkeñé chkök, e' a Jesús tò iché ñies:

—Mik be' tò pë' shkeñeke chkök be' ska' ö di'yök be' ska', etā be' sini'pa ena be' ëlpa ena be' yamipa malepa ena inuköl blúpa serke tsinet be' pamik, esepa kos kè shkeñar. Ie'pa tö be' shkeñëmine, etā es be' ulā a iské detke. <sup>13</sup> E' skéie mik be' kawö tkö'uke, etā s'siarëpa ena s'yulépa ena s'klò bachiulewā ena s'wöbla kè wawër, esepa shkeñú. <sup>14</sup> Ie'pa kè a iské menukne be' a. Erè mik s'ser yësyesë, esepa duowā shkenekā aishkuö tā, etā Skëköl tò be' a iské meraë, e' tò be' ttsë'weraë buaë.

*Kèwö taië e' tkö'wé  
(Mateo 22.1-10)*

<sup>15</sup> Wëm eköl tkër chkök mesa ki ie'pa tā, mik e' tò ì ché Jesús tò e' ttsé, etā ie' tò iché ia:

—Wépa kawö tkö'weraë buaë aishkuö tā ì blúie Skëköl tso' e' a, ayëcha buaë esepa.

<sup>16</sup> Jesús tò ie' a iché:

—Wëm eköl tö kawö tkö'weke taië ta ie' tö taië pë' shkeñé. <sup>17</sup> Mik ikawö tkö'uke e' diwö de, eta ie' tö iché ikanè méso a: 'Se' kawö tkö'uke, e' tso'tke kaneoule e' kuëki be' yú s'kiule kos e'pa a ichök tö a' shkó kawö tkö'uk.' <sup>18</sup> Erë ie'pa ulitane tö iché kanè méso a: 'Wéstela be' ta, erë sa' wötkërke taië, kè sa' dòpa.' Itsá tö iché ie' a: 'Erpa ye' tö ká tué e' sauk ye' mi'ke, e' kuëki ye' kè dòpa. Ye' kköchò be' a tö e' olo'yó ye' ki.' <sup>19</sup> Iská tö iché: 'Baka wë'ñie tuéyö kanebloie dabop, e' wà ma'uk ye' mi'ke, e' kuëki ye' kè dòpa. Ye' kköchò be' a tö e' olo'yó ye' ki.' <sup>20</sup> Iëköl tö iché: 'Írö ye' ulabatséwa, e' kuëki kè ye' dòpa.' <sup>21</sup> Ikanè méso biteane iwökir ska' ta ì kos ché ie'pa tö ie' a e' chéne ie' tö. Eta u wák uluneka taië ta ichéitö ia: 'Be' yú bet ñala kibi ki, ñies ñala malepa ki, ta s'siarëpa ena s'yulépa ena s'wöbla kè wawër ena s'klò bachiulewa, esepa tsúbitu ie kawö tkö'uk ye' ta.' <sup>22</sup> Béré ta kanè méso dene, e' tö iché iwökir a: 'A kékëpa, ì uk be' tö ye' patké, e' wétke ye' tö, erë be' u kam wà iër.' <sup>23</sup> Eta iwökir tö iché ie' a: 'Be' skà yúne u tso' bänet ese ñalé kos wa, eta pë' kó shkökwa ye' u a as iwà iërka. <sup>24</sup> Ye' tö ichè tö wépa shkeña' ye' tö kewe, e'pa kè wéne kawö tkö'upa ye' ta.'

*Jesús ttökataie sene e' dör darë*

*(Mateo 10.37-38)*

<sup>25</sup> Taië pë' mir Jesús itöki ta ie' e' wötrée ta ichéitö ie'pa a: <sup>26</sup> "Yi senak ye' ttökataie, erë kè iéna ye' dalër iyé, imi, ilaköl, ila'r, iëlpa, iikutapa tsata, ñies iwák tsata, e' ta ese kè dòpa ye' ttökataie. <sup>27</sup> Yi kè e' chò weinuk dò ittèwa krus mik ta iser wes ye' ttökata es, ese kè dòpa ye' ttökataie. <sup>28</sup> Ichösö tö a' wele éna u yuak bërie. Kewe ie' e' tkökeser ibikeitsök tö kos u e' tué isuöie tö inuköl dömika ö kè idòpaka iyuoie. <sup>29</sup> Erë ie' kè wa ibikeitse kewe, e' ta ie' tö ichí tuléwa ta inuköl kè ta'ia iyuoie. Sulitane tö isuëmi, e'pa tö ie' wayueraë. <sup>30</sup> Ie'pa tö ichèmi: 'Wëm wí u yuémi, erë kè ie' a iyöneia.' <sup>31</sup> Ñies ká blu' wele wa ijcher tö ká kua'ki blu' datse ñippök ie' ta, e' ta ie' e' tköraser ibikeitsök kewe: 'Ye' wa ñippökwakpa tso' döka 10.000. Ye' bolök wa ñippökwakpa tso' döka 20.000. ¿Ye' e' alömika iki ö kè ye' e' alòpaka iki?' <sup>32</sup> Ie' isué tö ie' kè e' alòpaka ibolök ki, e' ta kam ibolök dò tsinet, e' yöki ie' tö ibiyöchökwakpa patkeraë ibolök a ichök tö '¿wes sö ishulèmi as se' ser bèrè ñita?' <sup>33</sup> E' kuëki yi senak ye' ttökataie ese tö iwà bikeitsó kewe. Es a' kè e' chò ì kos tso' a' wa e' mukat, e' ta kè a' dòpa ye' ttökataie.

*Dayë kè kke ta'ia*

*(Mateo 5.13; Marcos 9.50)*

<sup>34</sup> "Dayë dör buaë, erë kè ikke ta'ia, e' ta kè ibuarpaiane. <sup>35</sup> Kè ibua'ia íyök kapeyoie. Kè ibua'ia iie. E' dör buaë kèumi è. ¿Yi éna ye' ttò ttsak, e' ma ikukuebló bua'ie!"

## 15

*Obeja kkö'nukwak e' tté*

*(Mateo 18.10-14)*

<sup>1</sup> Këkraë inuköl shtökwakpa Roma wökirpa a, esepa döke taië Jesús ska' ikittsök. Ñies pë' malepa cheke fariseowakpa tö tö e'pa dör pë' sulusipa, esepa döke taië Jesús ttöke e' kittsök. <sup>2</sup> Fariseowakpa ena s'wöbla'uk tté dalöiëno wa wakpa tö Jesús chémi suluë ñi a. Ie'pa tö iché:

—Ie' tö pë' sulusipa suëke buaë, ñies esepa ta ie' chköke.

<sup>3</sup> E' kuëki tté kleé ie' tö ie'pa a i' es: <sup>4</sup> "A' isie wa obeja tso' döka cien, e' etö chowa, e' ta a' tö imalepa döka dabom suliyök ki sulitu (99), e' meraat iké a ta a' miraë ichowa e' yulök dò wé a' tö ikué ee. <sup>5</sup> Mik a' tö ikué, eta a' ttsë'rdaë buaë ta a' tö ikeraka pperaka kuli' ki. <sup>6</sup> Mik a' dene iu a, eta a' yamipa ena pë' serke a' o'mik, e'pa kiera a' tö a' u a ta a' tö icheraë ie'pa a: 'Ye' obeja ché'wa, e' kuéneyö. A' ttsë'nú buaë ye' ta.' <sup>7</sup> Es ñies ye' tö a' a' ichè tö mik pë' sulusi eköl, ese er mane'wé Skököl a, eta e' tö Skököl tso' ká jai a,

e' ttsë'wé buaë shütë tkòkà imalepa dökà dabom suliyök kí sulitu (99) e' bikeitsò tö ie'pa dör yësyësë, kè kawöta er mane'uk, esepa tsata.

*Inuköl chowa, e' tté*

<sup>8</sup> “Ñies alaköl wà inuköl tso' dökà dabop, e' chowa etk, e' ta ie' tö bö'wö tskéka iushkléttsa ta iyulé bua'iewa ta iwà kuéitö. <sup>9</sup> E' ukuöki ta ie' tö iyamipa ena pë' serke iö'mik e'pa kié iu a ta ichéitö ie'pa a: 'ja' ttsë'nú buaë ye' ta! Ye' inuköl chë'wa, e' kuéneyö, e' kueki e' kéwö tkö'üsö ñita.' <sup>10</sup> Es ñies ye' tö a' a ichè tö mik pë' sulusi eköl er mane'wé Skéköl a, eta e' tö Skéköl biyöchökwakpa ttsë'weke buaë shütë.”

*Alà e' wamblò sulué e' nuí olo'yé iyé tö iki, e' tté*

<sup>11</sup> Ñies Jesús tö ikleé ie'pa a tté i' wa: “Kékëpa eköl alà dör bö' wëpa. <sup>12</sup> Ilà tsirla tö iché iyé a: 'A yéwö, ì mekeat be' tö ye' a mik be' duökewatke eta, e' mútke be' tö ye' a.' Eta iyé iyi kos, e' blabatséitö méitö ila'r bö' a eköl eköl kos ikawöta imuk ia ekkë. <sup>13</sup> Ká kè bak taië, eta ì kos méitö ilà tsirla a, e' watuéttsa ilà tö, e' ské klö'wéitö ta imía ká kuá'ki. Ee ie' tö ie' inuköl kos we'ikéwa iyi sulu è ki. <sup>14</sup> Mik ie' inuköl enewa, eta bli ane taië ká e' ki, e' kueki ie' ttémitke bli tö. <sup>15</sup> Ee ta ie' mía kanè yulök ká e' wakpa eköl ska'. Eta wëm e' tö ie' a kanè mé köchi tiök. <sup>16</sup> Ie' duéwa bli wà sulué. Köchi chkè kè ñano se' a ese ñakwa ie' éna, erè kè yi tö ie' a imè. <sup>17</sup> Bata ekkë ta ie' tö ibikeitsé: 'j'íók ye' e' tötkër bli wà íe? Wëkkë ye' yé u a kanè mésopa tso', e'pa wà chkè tso' taië. <sup>18</sup> Ye' míane ye' yé ska', ta ye' tö icheraé ie' a: A yéwö, ye' tö ì sulu wamblé Skéköl ki, ñies be' ki. <sup>19</sup> Ye' jaëne taië. Ye' kiök be' alà, e' kè dör ye' siarla e' a. E' skéie ye' saú wës be' kanè mésopa suekebö es.' <sup>20</sup> Eta ie' e' kéká mía iyé ska'.

“Mik idökemitke iyé ska', eta iyé wö de iska' ta idoia kamië ta ie' wa iwër siarë. Ie' tunemi ñaletsuk ta ipaklö'wéwaitö iwöalattséitö. <sup>21</sup> Eta ilà tö iché ie' a: 'A yéwö, ye' tö ì sulu wamblé Skéköl ki ñies be' ki. Ye' jaëne taië. Ye' kiök be' alà, e' kè dör ye' siarla e' a.' <sup>22</sup> Erè iyé tö iché ikanè mésopa a: 'Datsi' bua'ie yuló ióka ie' ki bet, ta ula'tsio iówa ta klökkuö ióka iki. <sup>23</sup> Baka pupula bua'ie yuló ta ittöwa. Ye' alà dene e' kéwö tkö'wëkesö. <sup>24</sup> Ye' alà i' dene, e' dör wës ie' du'wa e' shkenekane es. Ye' alà minea ye' yöki kè tté ttsëneia ye' wà, e' dene e' kueki ikéwö tkö'üsö.' Eta ie'pa tö ikéwö tkö'wémi taië.

<sup>25</sup> “E' dalewa ilà kibi tso' kaneblök kañika. Mik ie' datse e' de tsinet u a, eta ie' tö ittsé tö iyamipa alárkerak taië blarkerak, klötöke taië. <sup>26</sup> Eta ie' tö kanè méso kié eköl ta ichakéitö: 'j'ì kéwö tkö'weke a' tö ekkë?' <sup>27</sup> Eta kanè méso tö ie' iuté: 'Be' èl dene, e' kueki be' yé tö sa' patké baka pupula bua'ie ttökwa be' èl dene buaë, kè wës ie' dë', e' kéwö tkö'woie.' <sup>28</sup> Erè e' tö ilà kibi uluwéka taië. Ie' kè shkakwa weshke. E' kueki iyé e' yéttsa u'rkí ta iwöpablé taië ta iché ie' a: 'Be' shkówa sa' ta, kè be' ulunuk.' <sup>29</sup> Erè ie' tö iyé iuté: 'Ye' kaneblé'mi be' a e' ki duas de taië. Ye' kè wà be' ttò dalöseoulewa yës. Erè chibola è kè meule be' wà ye' a katano ye' sini'pa ta. <sup>30</sup> Erè i'ñe ta be' alà e' dene. Ie' tö be' inuköl we'ikwa alakölpa sulusipa ta eta be' tö baka bua'ie ttökwa patké ie' dene e' kéwö tkö'woie.' ”

<sup>31</sup> “Iyé tö ie' iuté: 'A alala, be' tkëria ye' ta kekraë. Ì kos tso' ye' wà e' dör be' icha. <sup>32</sup> Erè be' èl dene buaë, e' dör wës ie' du'wa e' shkenekane es. Ie' minea ye' yöki kè tté ttsënene ye' wà, e' dene, e' kueki s'kawöta e' kéwö tkö'uk chkè wa, di'yè wa, ttsë'ne bua' wa.' ”

16

*Inuköl blú iyi kueblu e' erbikò buaë, e' tté*

<sup>1</sup> Ñies Jesús tö tté kleé ittökatapa a i' es: “Wëm bak eköl kaneblöke inuköl blú a iyi kuebluie. Etökicha ta pë' wëlepa tö ie' kkaté iwökir a tö ie' tso' iwökir inuköl we'ikökwa. <sup>2</sup> Iwökir tö ie' kié ta iché ia: 'Ye' wà ijchenewa tö be' tso' ye' inuköl we'ikök. Be' kè a kanè



ta'ia. Ye' be' trë'wëkeshkar. E' yöki ì kos kanewé be' tö, e' yëkkuö kkachó ye' a.' <sup>3</sup> Ie' ibikeitsé: 'Ye' wökir tö ye' trë'wëkeshkar, ¿wes ye' e' ùmi? Kè ye' diché ta'ia kanè darërë woie ena ye' jaëne inuköl kakkiök. <sup>4</sup> Ye' éna ianetke tö wes ye' e' ùmi mik ye' trë'neshkar eta as yile tö ye' kkö'nù.' <sup>5</sup> Eta ie' tö pë' kos ña'weke iwökir tö e'pa kiéttsa eköl eköl. Mik e' tsá de, eta e' a ie' tö ichaké: '¿Kos be' ñarke ye' wökir ulà a?' <sup>6</sup> E' tö iüté: 'Ye' ñarke ie' ulà a kiò döká galon cien (100) ekké.' Ie' iché ia: 'I' be' yëkkuö. Be' e' tkóser bet ta yëkkuö se ki be' ñarke se, e' mane'úttsa ta ishtóka tö be' ñarke galon döká dabom skeyök è (50).' <sup>7</sup> E' ukuöki ta ie' tö ichaké iëköl ñarke a: '¿Ñe be', kos be' ñarke ye' wökir ulà a?' E' tö iüté: 'Ye' ñarke trigowö döká sacco cien (100) ekké.' Ie' tö iché ia: 'I' be' yëkkuö. Se ki be' tö imane'úttsa ta ishtó iki sacco döká dabom paryök è (80).' <sup>8</sup> Mik ì wambléitö, e' jchenewa iwökir wa ta ibikeitséitö: 'Ye' íyi kueblu kè wa ikanè one yësyësë, erë ie' kabikeitso buaë e' kimoie. E' è kueki ikikekayö.' ”

Jesús tö ichéne: “Es ñies yö ichè tö wépa kè tö Skëköl dalöiè esepa kabikeitsò buaë e' kimoie tkòka wépa dör ie' olo ta' taië e' icha esepa tsata. <sup>9</sup> E' kueki yö ichè a' a tö inuköl kè dör ibua'ie. E' wa s'malepa kímú as ie'pa tö Skëköl dalöiö. A' tö iwé es e' ta aishkuö ta ie'pa tö a' kierawa buaë weshke seno wé yöbië e' a.

<sup>10</sup> “Yi tö kanè tsitsir weke yësyësë, ñies ese tö kanè taië wëmi es. Erë yi kè tö kanè tsitsir wëku' yësyësë, ñies ese kè tö kanè taië wëpa yësyësë. <sup>11</sup> E' kueki inuköl kè wakanewè a' tö yësyësë, e' ta ¿yi erblömi a' mik ì tuéta' chökke, ese wakanéwoie? <sup>12</sup> Ñies a' kè tö o'ka icha wakanewè yësyësë, e' ta ¿yi tö a' icha mëmi a' a wakanewè?

<sup>13</sup> “Wé klöulewa kanè mésoie, ese kawöta iwökir è ttò dalöiök. Iwökirpa chópa bö, e'ma ie' kawöta eköl è dalöiök ena iëköl watöktsa. Es a' kè a er menukwa Skëköl ki ena inuköl ki ñita.”

<sup>14</sup> Ì ché Jesús tö e' ttsé serea fariseowakpa tö. Ie'pa éna inuköl dalër taië, e' kueki ie'pa tö iwayué. <sup>15</sup> Ie' tö iché ie'pa a: “A' e' ò sulitane wörki tö a' dör pë' buaë yësyësë, erë a' er sùule buaë Skëköl wa. Ì kikekëka s'ditsö tö taië, ese wër suluë ie' wa.

#### *Ì kos kitule Skëköl yëkkuö ki e' wà tköraë*

<sup>16</sup> “Ì kit Moisés ena Skëköl ttekölpa tö yëkkuö ki, e' wa s'wöblaqnebitu dò mik Juan S'wöskuökwak dé'bitu eta. Erë e' itöki ta ì blúie Skëköl tso' e' tté buaë pakarke ta sulitane tso' ima'uk darërëë diché wa dökwa e' a.

<sup>17</sup> “Ká jai ena ká i' erta'wa. Erë Skëköl yëkkuö kitule, e' kè erta'wa yës, e' wà tköraë serea döwa ttè bataë.

#### *Se' ñi òwa ese ché Jesús tö*

*(Mateo 19.1-12; Marcos 10.1-12)*

<sup>18</sup> “Wëm tö itayë éwa ese tö tayë skà tséwane, e' ta e' wa ie' tö isenewabak kewe e' dalösewéwa. Ñies tayë a'wa iwëm tö, ese tséwane wëm o'ka tö, e' ta e' wa ie' tö tayë e' senewabak kewe e' dalösewéwa.

#### *Inuköl blú ena Lázaro, e' tté*

<sup>19</sup> “Inuköl blú bak eköl e' e' paiò datsi' bua'buwa è wa. Kekraë ie' chköke, di' yöke buaë. <sup>20</sup> Ñies s'siarë bak eköl kiè Lázaro, e' e' tkókeser blu' e' u wékkö a. Ie' pa dör smewö ème. <sup>21</sup> Ie' éna blu' chkè po darke, e' ñakwa suluë. Chichi döke ie' smewö pakuyök. <sup>22</sup> Ká et ta ie' siarla blénewa, ta Skëköl biyöchökwakpa tö ie' wimblu tsémi ká jai a chkök Abraham ta. Ñies inuköl blú ñe' blénewa ta inú wötënewa.

<sup>23</sup> “Eta ie' tso' weinuk siarë wé s'wimblu weirke ee ta iwökéka ta Abraham suéitö kamië ká bánet, e' batsi' a Lázaro tkër. <sup>24</sup> Eta ie' ar taië Abraham wöa ta ichéitö: '¡A kékëpa Abraham, ye' saú er siarë wa! Ye' weirke taië bö' i' a. Be' we'ikèyö, Lázaro patkó iulatska bata nuukka di' a ta ipatkó ye' ku' nuukka as ipaser.' <sup>25</sup> Erë Abraham tö iüté: 'Be' éna ianú tö mik be' bak ttsé'ka, eta íyi buaë kos bak be' wa. E' skéie Lázaro bak weinuk siarë.



Erë i'ñe tã ie' wöpablène buaë, e' skéie be' weirkene siarë. <sup>26</sup> Kíie tã, káblë iskië e' tso' se' shushaë. E' kueki sa' shkak a' ska', esepa kè dõpa a' ska'. Ñies a' shkak sa' ska', esepa kè dõpa sa' ska'.

<sup>27</sup> “Inuköl blú tö iché: ‘A yéwö Abraham, ye' kköchò be' a, Lázaro patkó ye' yé u a <sup>28</sup> ye' ëlpa dõka skël, e'pa pattök as ie'pa kè dõ ká i' a wé s'weirke siarë ee.’ <sup>29</sup> Abraham tö iché ie' a: ‘Ï kit Moisés ena Skëköl ttekölpa malepa e'pa tö yëkkuö ki, e' tso' ie'pa wa, jas ttè e' iutò ie'pa tö!’ <sup>30</sup> Blu' tö iüté: ‘A yéwö Abraham, e' kè dör wë'. Erë se' duowa eköl shkënekane ese tö ie'pa patté, e' tã ie'pa er mane'uraë.’ <sup>31</sup> Erë Abraham tö iché ia: ‘Ttè kit Moisés ena Skëköl ttekölpa e'pa tö, e' kè iütëne ie'pa wa, e' tã s'du'wa shkënekane ese mía ie'pa pattök, e' tã ñies ie'pa kè tö ie' ttò iütëpa.’ ”

## 17

*A' tso' wösh wa ì tö ské ì sulu wamblök ese yöki  
(Mateo 18.6-7,21-22; Marcos 9.42)*

<sup>1</sup> Jesús tö iché ittökatapa a: “Këkraë se' erkiöörke ì sulu wamblök; jërë yi tö se' erkiöwëke, esepa tö inuí suëraë! <sup>2</sup> Yi tö ikkëpala erblöke ye' mik, esepa eköl ké ì sulu wamblök, esepa weirdaë siarë shütë tkòka ák wawoie muëwa ikuli' a batrèemi dayë a e' tsata. <sup>3</sup> ¡A' tso' wösh wa!

“A' yami tö ì sulu wamblé a' ki, e' tã iuñú. Ie' er mane'wéne, e' tã inuí olo'yó iki. <sup>4</sup> Eré ká etkè a ie' tö ì sulu wamblé a' ki dõka kuktökicha (7), erë ie' iché dõka kuktökicha: ‘ye' er mane'wéne,’ e' tã ilo'yó iki.”

*S'kí erblò Skëköl mik*

<sup>5</sup> Etã Skëkëpa Jesús ttekölpa tsá e'pa tö ie' a iché:

—Sa' kimú kí erblök Skëköl mik.

<sup>6</sup> Ie' tö ie'pa iüté:

—A' erblópa Skëköl mik tsir wës mostaza wö dör tsirla ekkë, e'ma a' tö ichèmi kal bërie i' a: ‘Be' e' yóttsa íe e' tkówa dayë a', tã iyërdattsa.

*Wës s'kawöta kaneblök Skëköl a*

<sup>7</sup> “Ichösö tö a' wële wa kanè méso tso' eköl, e' mía të tök alè ö a' iyiwak kk'ö'nuk alè. Mik idene u a, etã a' kè tö ichëpa ie' a: ‘Weshke, be' e' tkóser chkök, ye' tö be' tieke.’ <sup>8</sup> A' kè tö ichëpa ia es. E' skéie a' tö ichëra ie' a: ‘Be' datsi' mane'ú, be' uló ye' a tã ye' tió. Ye' panú, ye' chké one, ye' di' yane one, e' wa be' mi' chkök.’ <sup>9</sup> Ie' tö iwé wës a' tö ie' ké iük es, e' ki a' kè tö wëstela chëpa ia. <sup>10</sup> Es ñies mik ì uk Skëköl tö se' ké, ese wësö seraä, etã ichösö ie' a i' es: ‘Ï uk sa' kàne, e' è wé sa' tö. Sa' dör kanè mésopa ësepala è.’ ”

*Wëpa dabop kiri'wëke lepra tö e'pa bua'wéne Jesús tö*

<sup>11</sup> Jesús michoë Jerusalén, e' damitkö Samaria ena Galilea. <sup>12</sup> Mik ie' dökemitke ká tsitsirla a tã ee wëpa dõka dabop kiri'wëke lepra tö, e'pa e' yéttsa iëter kamië <sup>13</sup> tã iarkerak Jesús tsaka:

—¡A Jesús, a s'wöbla'ukwak, sa' saú er siarë wa!

<sup>14</sup> Mik ie' tö ie'pa sué, etã ichéitö ie'pa a:

—A' yú e' kkachök sacerdotëpa a as sulitane wa ijcher tö a' buanene. Ie'pa mirwaja ñala ki e' dalewa ie'pa buanene. <sup>15</sup> Mik ie'pa eköl tö isué tö ibuanene, etã ibiteane Jesús ska' Skëköl kikökka taië aneule. <sup>16</sup> Ie' e' tkéwa kuchë ki iwö méwa íyök ki Jesús klò ska' wëstela chök. Wëm e' dör Samaria wak. <sup>17</sup> Jesús tö iché ia:

—¿A' buanene e' kè dör dabop? ¿Wé be' malepa sulitu (9)? <sup>18</sup> Wëm dör ká kuá'ki wak ¿e' è biteane Skëköl kikökka?

<sup>19</sup> Ie' tö iché wëm a:

—Be' e' kókã be' yúshkane. Be' erblé ye' mik, e' tö be' bua'wéne.

Ì blúie Skéköl tso', wés e' kékwo dör  
(Mateo 24.23-28,36-41)

<sup>20</sup> Fariseowakpa tö ichaké Jesús a:

—Ì blúie Skéköl tso', ¿mik e' kékwo datse?

Ie' tö ie'pa iüté:

—Ì blúie Skéköl tso' e' kékwo dör íyi suèmi sulitane tö ese. <sup>21</sup> Itso'tke a' shua, e' kueki kékwo yi a iyërpa, 'Íe itso', ö 'Wíe itso'.

<sup>22</sup> Ta ichéitö ittökatapa a:

—Ikékwo dórae mik a' tö ibikeitserae: 'Jesús dör S'ditsö Alà, e' mú dò i' ta s'blúie. E' diwö et è kkechekeso suè.' A' tö bikeitserae es, eré a' kékwo tö isuepa kam ye' done e' yöki.

<sup>23</sup> Welepa tö icherae: 'Íe ie' de', ö 'Diàe ie' de'; eré kékwo a' minuk isauk, kékwo a' minuk itöki.

<sup>24</sup> Ye' dör S'ditsö Alà, mik e' dene, eta sulitane tso' ká wa'ñe e'pa tö isuerae wés alá wöñar tö ká olo ppèe ká wa'ñe e' suèsö es. <sup>25</sup> Eré e' yöki kewé ye' kawöta weinuk taië ye' bolökpa ulà a, ie'pa tö ye' wateratsta. <sup>26</sup> Ye' dör S'ditsö Alà, mik e' dene, eta e' kékwo dórae wés

Noé késka' es. <sup>27</sup> E' kékwo ska' ta ie'pa tso' chkök, di'yök, senukwa wés kekrae es dò mik Noé dewa ikanò bérie e' a eta. E' bet ta di' detsta taië ie'pa ki, e' tö ie'pa ulitane ttélur.

<sup>28</sup> Es ñies iwamblène wém bak kiè Lot, e' kékwo ska' ta. Sodoma wakpa tso' chkök, di'yök, ie'pa tso' íyi tauk ena íyi watauk, ie'pa tso' íyi kuatkök ena u yuök wés kekrae es. <sup>29</sup> Eré mik Lot e' yéttsa Sodoma, eta azufre datse ká jai a wöñarke bö'ie, ese yéne ká e' ki wés kali es, e' tö ie'pa kos ttélur. <sup>30</sup> Es itkörae mik ye' dör S'ditsö Alà, e' dene eta.

<sup>31</sup> "Mik e' kékwo de, eta yi tso' u bata ki, ese kékwo dökwané weshke íyi tsukmi. Ñies yi tso' kaneblök kañika, ese kékwo dökwané weshke. <sup>32</sup> Ì bak Lot alaköl ta\* e' ska' a' er anu. Ie' yönane dayé wösiie, ie' éna íyi dalér taië e' kueki. <sup>33</sup> Yi e' tsatkak ittewa yöki, ese ulà a sene michoë kékwo döpa aishkuö ta. Eré yi e' metsta ttewa ye' dalérmik, ese ulà a sene michoë dórae aishkuö ta.

<sup>34</sup> "Ye' tö a' a ichè tö e' nañewe se' böl kapöke ka' etkè ki, ta eköl mira iwa ta iéköl atdaë. <sup>35-36</sup> Alakölpa böl tulur ak wawök ñita ta eköl mira iwa ta iéköl atdaë.†

<sup>37</sup> Jesús ttökatapa tö ie' a ichaké:

—A Skéképa, ¿wé e' wamblérmi?

Jesús tö ie'pa iüté ttè i' wa:

—Sulitane wa ijcher tö wé öló daparke taië, ee ilè nu tër. Es ilè suerae a' tö iwà kkachöie tö wé iwamblérmi.

## 18

*Alaköl dör schó ena s'shulökwak eköl, e' tté*

<sup>1</sup> Jesús éna ikkachak ittökatapa a tö s'kawöta ikiök S'yé a kekrae kékwo shtrirta'wa, e' kleitö ie'pa a i' es: <sup>2</sup> "Ká et ki s'shulökwak eköl tso', e' kékwo suarta' Skéköl yöki, ñies ie' kékwo tö yi dalöieta'. <sup>3</sup> Ká e' a ñies alaköl dör schó tso' eköl, e' ñippöke ibolök ta. Kekrae ie' mía s'shulökwak ñe' ska' ta ichekeitö ia: 'Ye' kimú. Ye' bolök tö ye' we'ikeke, e' shuló ye' a'. <sup>4</sup> E' tka ká taië eré s'shulökwak kékwo wa iüténe. Bata ekké ta s'shulökwak tö ibikeitsé: 'Alaköl schó i' tso' ye' tsiriuk ñie. Eré ye' kékwo suarta' Skéköl yöki, ñies kékwo tö yi dalöieta', <sup>5</sup> eré ie' tté shuleraeyö as kékwo idöia ye' shtriuk taië ttè e' wa.' "

<sup>6</sup> Skéképa tö iki ché: "Ì ché s'shulökwak sulué ñe' tö e' bikeitsó buae. <sup>7</sup> Wépa shukitulebak Skéköl wa, tso' ie' a ikiök ñie nañeé, ¿esepa kékwo tsatkepaítö? ¿Ie' tö ie'pa kerae ipanuk? <sup>8</sup> Ye' ichè, au. Ie'pa tsatkeraitö bet, kékwo dör ká taië. Eré ye' dör S'ditsö Alà, mik e' dene, eta s'erblöke Skéköl mik, ¿esepa kuèmiyö ká i' a?

*Fariseowak ena inuköl shtökwak Roma wökirpa a, e' tté.*

\* 17:32 Génesis 19.26 saú. † 17:35-36 Yékuö kékwo wele tö versículo 36 kí kuötkéka. E' tö ichè i' es: Wépa böl tso' kaneblök të a, eköl mitsér ta iéköl ate.

<sup>9</sup> Pë' tso' Jesús ttò kǐttsök, e'pa welepa e' bikeitsò tö ie'pa serke yësyësë Skëköl wöa, erë ie'pa wöska sulu s'malepa wër. Esepa a ie' tö ttè kleé i' es: <sup>10</sup> “Wëpa bøl mía Skëköl wé a ttök S'yé ta. Eköl dör fariseowak, eköl dör inuköl shtökwak Roma wökirpa a. <sup>11</sup> fariseowak ttödur S'yé ta, ie' iché i' es: ‘A Skëköl, wëstela chekeyö be' a tö ye' kè dör suluë wës s'malepa es. Ie'pa dör akblökwakpa ena pë' sulusipa ena s'senewabak e' dalöseukwa wakpa. Nies ye' kè dör suluë wës inuköl shtökwak dur wí es. <sup>12</sup> Domingo bit ta ye' batsöke ká böt ká böt këkraë. Nies ì qos de ye' ulà a, e' blatekeyö dökä dabop, e' tsá eyök mekeyö be' a.’ <sup>13</sup> Erë inuköl shtökwak e' dur bánet, ie' eriane taië, ie' wö è kè kanekä ká jaì sauk, ie' batsí' è töke iulà wa ie' eriane taië kuëki. Ie' tö iché: ‘¡A Skëköl, ye' dör pë' sulusi, ye' saú er siarë wa!’

<sup>14</sup> Jesús tö ichéne: Ye' tö a' a iché tö yi e' ttsökä taië ese wöardawa, erë yi e' wöewa ese kǐkardakä taië. E' kuëki inuköl shtökwak ñe' míane iu a klö'wé Skëköl tö wës pë' buaë yësyësë es. Erë fariseowak kè minene es.

*Jesús tö ikié S'yé a ala'rla kǐ*

*(Mateo 19.13-15; Marcos 10.13-16)*

<sup>15</sup> Pë' wä ala'rla debitu Jesús ska' as ie' ulà mùkä iki. Erë mik e' sué ittökatapa tö, eta ie'pa tö pë' uñélor. <sup>16</sup> Erë ie' tö ittökatapa kié ta ichéitö:

—As ala'rla bitu ye' ska'. Wëpa dör wës ie'pa es, eseпа blúie Skëköl tso', e' kuëki kè iwöklö'wariä. <sup>17</sup> Mokǐ ye' tö iché tö yi kè e' wöowa wës alala es, ì blúie Skëköl tso' e' kiowa, ese kè döpaiaia.

*Inuköl blú eköl tö Jesús a ichaké*

*(Mateo 19.16-30; Marcos 10.17-31)*

<sup>18</sup> Judiowak wökir eköl tö Jesús a ichaké:

—A S'wöbla'ukwak, be' dör buaë, ¿ì wèmi ye' tö as sene michoë dò ye' ulà a?

<sup>19</sup> Ie' tö iüté:

—¿ì kuëki be' ye' kié buaë? Skëköl eköl è dör buaë. <sup>20</sup> Ttè me'atbak ie' tö dalöiëno, e' jcher be' wä buaë. E' tö iché: ‘Kè a' kawö ta' s'senewabak dalöseukwa, kè a' kawö ta' s'ttökwä, kè a' kawö ta' akblök, kè a' kawö ta' s'kkatök kachè wa, a' yé ena a' mì dalöió.’\*

<sup>21</sup> Wëm e' tö ie' a iché:

—Ttè e' qos dalöië'bitu ye' tö, ye' ià duladula eta.

<sup>22</sup> Ie' tö ttè e' ttsé ta' ie' iüté:

—Íyi etkè kianeia be' a wè, e' dör i': ì tso' be' wä, e' wataútsa seraa ta' iské múttsa s'siarëpa a. E' ukuökǐ ta' be' shkó ye' ta' ye' ttökataie. Es ta' íyi buaë taië döraë be' ulà a ká jaì a.

<sup>23</sup> Erë wëm e' dör inuköl blú taië e' kuëki mik ie' tö e' ttsé, eta ie' erianekä taië. <sup>24</sup> Jesús tö isué tö ieriane ta' ichéitö ia:

—¡Inuköl blúpa a darërëë idir dökwa ì blúie Skëköl tso' e' a! <sup>25</sup> Esepa a dökä ee, e' dör darërëë tkökä kameio tkömi datsi' yuo diké ese wöukla a e' tsata.

<sup>26</sup> Wëpa tso' ittsök e'pa tö ichaké Jesús a:

—E' dör es, e'ma ¿yi tsatkërmi?

<sup>27</sup> Ie' tö ie'pa iüté:

—Ì kè or s'ditsö a, ese ormi Skëköl a buaë.

<sup>28</sup> Eta Pedro tö ie' a iché:

—Ittsó, sa' íyi qos me'at sa' tö ta' sa' bitë be' ta.

<sup>29</sup> Ie' tö iché ie' a:

—Mokǐ ye' tö a' a iché tö yi isie tö iu ö ilaköl ö iëlpa ö iyé ö imì ö ila'r, e' méat ì blúie Skëköl tso' e' dalërmik, <sup>30</sup> ese ulà a iské dörane taië shute ká i' a, nies aishkuö ta' sene michoë döraë iulà a.

\* 18:20 Éxodo 20.12-16; Deuteronomio 5.16-20

*Jesús skà e' biyó ché tö itterawá*  
(Mateo 20.17-19; Marcos 10.32-34)

<sup>31</sup> Jesús tö ittökatapa dabom eyök kí bö! (12), e'pa kiemi bānet tā ichéitö ie'pa a: “Se' mirka Jerusalén i', etā eē ì kōs kitat Skéköl ttekölpa tö yékkuö kī e' wà tkōraë, ye' dör S'ditsö Alà, e' tā. <sup>32</sup> Ie'pa tö ye' wömerattsa pē' kē dör judiowak esepa ulà a. E'pa tö ye' wayueraë, cheraë suluë, iwiri tuörarak ye' kī. <sup>33</sup> Ie'pa tö ye' pperaë, ye' tterawá; erë e' kī ká de mañat etā ye' shkerdakane.

<sup>34</sup> Erë ì ché ie' tö ittökatapa a, e' wà blēulewá ie'pa yöki, e' kueki ie'pa kē a iwà ane.

*Wēm eköl wöbla kē wawēr tso' Jericó e' bua'wēne Jesús tö*  
(Mateo 20.29-34; Marcos 10.46-52)

<sup>35</sup> Mik Jesús demi tsinet Jericó, etā eē wēm tkēr eköl ñalā ska' inuköl kak kiök. Ie' wöbla kē wawēr. <sup>36</sup> Mik ie' tö ittse tö pē' dami taië ñalā kī, etā ie' tö ichaké tö ¿ì wamblērke? <sup>37</sup> Ie'pa tö iché ie' a tö Jesús Nazaret wak dami ñalā kī. <sup>38</sup> E' kueki ie' tö iché aneule:

—¡A Jesús, s'blú David bak e' aleri, ye' saú er siarë wa!

<sup>39</sup> Pē' dami Jesús yöki kewe, e' tö wēm e' uñeke as isiwa'blòwa. Erë ie' tö ikí ché aneule:  
—¡A David aleri, ye' saú er siarë wa!

<sup>40</sup> Jesús e' duésar tā itsuk patkéitö. Mik ide, etā Jesús tö ie' a ichaké:

<sup>41</sup> —¿ì kiane be' kī tö ye' tö iwē be' a?

Ie' iüté:

—A kēkēpa, ye' kī ikiane tö ye' wöbla buarne.

<sup>42</sup> Jesús tö ie' a iché:

—¡Be' erblé ye' mik, e' wa be' buanene!

<sup>43</sup> E' wōshā tā ie' wöbla buanene tā imía Jesús tā e' tö Skéköl kīkekarami taië. Nies wépa kōs tö isué e'pa tö Skéköl kīkekarami taië.

## 19

*Jesús ena Zaqueo, e' pakè*

<sup>1</sup> Jesús de Jericó, e' shkōdur eē. <sup>2</sup> Eē wēm eköl serke kiè Zaqueo, e' dör inuköl shtökwakpa Roma wōkirpa a, e'pa wōkir. Ie' dör inuköl blú taië. <sup>3</sup> Ie' kī Jesús kiane suë, erë ie' dör tsirlala iskīla, taië pē' tso', e' kueki ie' kē wō dē'ka Jesús sauk. <sup>4</sup> E' kueki ie' tunemi wé Jesús tkökemi eē tkakā kal ulà a ipanuk suë. <sup>5</sup> Mik Jesús dökemitke kal e' dikīa, etā iwökéka tā iché Zaqueo a:

—A Zaqueo, be' e' ówa bet. I'ñe ye' mi'ke be' ska' kapökrö.

<sup>6</sup> Zaqueo e' éwa bet tā Jesús kiéwāitö iu a ttsē'ne buaë. <sup>7</sup> Mik pē' ulitane tö isué, etā ie'pa tö Jesús ché suluë. Ie'pa tö iché ñi a: “¿Iók ie' mi'ke pē' sulusi u a?” <sup>8</sup> Zaqueo e' duéka tā iché Skékēpa Jesús a:

—A kēkēpa, ye' ttò ttsó. Ì kōs tso' ye' wā, e' shāböts meraëyö s'siarëpa a. Nies yile íyi ekiblëyö, e' tā e' mekeneyö ie' a dōka tkëtökicha.

<sup>9</sup> Jesús tö iché ie' a:

—Be' dör Abraham aleri, erë be' erblé Skéköl mik mokī wēs Abraham es, e' kueki i'ñe tā be' de Abraham alà chókíe. E' kueki i'ñe be' tsatkēne, nies wépa tso' be' u a erblé Skéköl mik e'pa tsatkēne. <sup>10</sup> Ye' dör S'ditsö Alà, e' dē'bitu, wépa chē'ulur ì sulu ulà a esepa yulök tsatkè.

*Inuköl mène wakanewè, e' tté*

<sup>11</sup> Jesús dökemitke Jerusalén. Pē' tso' ie' ttò kīttsök, e'pa tö ibikeitsé tö mik ie' de Jerusalén etā ì blúie Skéköl tso' e' kéwö dewatke da'áie. E' kueki ie' tö ie'pa a ikleé i' es:

<sup>12</sup> “Wēm tso' eköl dör blu' ditséwö, e' mía kamië ká kuá'kī a iblú kibi ska' as e' tö ie' tkòka blu'ie, wé ie' bite eē. E' ukuöki tā ibitukeane. <sup>13</sup> Kam ie' mi', etā ie' tö ie' kané mésopa kié dabop, e'pa a ie' tö inuköl mé taië ñikkēë eköl eköl a. Ie' tö iché ie'pa a: ‘A tö inuköl sē wakanéú dō mik ye' dōne etā, isuöie kōs a' tö ikí klö'wèmi.’ <sup>14</sup> Erë pē' serke ie'

kaska', e'pa éna ie' ar suluë. E' kuëki ie'pa welepa patkérakitö blu' kibi ska' ichök: 'Sa' kè kî ie' kiane sa' blúie, e' kuëki kè itkarka.'

<sup>15</sup> "Erë blu' kibi tö ie' tkéka blu'ie ta' ie' míane wé ibitë eë. Mik ie' dene, eta' ie' tö ikanè mésopa dabop, wépa a' ie' tö inuköl me'at, e'pa kiök patké isuoie tö kos inuköl kí klö'wérakitö. <sup>16</sup> Itsá debitu tö iché iblú a: 'A kékëpa, be' inuköl wakanewéyö, e' kí klö'wéyö döká dabobtökicha.' <sup>17</sup> Blu' tö ie' iüté: 'E' dör buaë. Be' dör kanè méso buaë. Ì elkela wakanewébö yësyësë, e' kuëki ye' tö be' tkekeká ká dabop, e' wökirie.' <sup>18</sup> Iská debitu tö iché: 'A kékëpa, be' inuköl wakanewéyö, e' kí klö'wéyö döká skëtökicha.' <sup>19</sup> Nies blu' tö ie' iüté: 'Ye' tö be' tkekeká ká skël, e' wökirie.'

<sup>20</sup> "Erë iëköl debitu, e' tö iblú a' iché: 'A kékëpa, i' be' inuköl. Ye' tö ipatréwa tsamo a' ta' ibléyö. <sup>21</sup> Be' dör wëm er darërëë ese. Ì kè dör be' icha ese klö'wekewabö. Nies be' tö íyi wöshteke wé kè be' wa' ikuatkëne eë. Ye' suane be' yöki, e' kuëki ye' tö be' inuköl blé.' <sup>22</sup> Eta' blu' tö ie' a' iché: 'Be' dör kanè méso sulusi ese. Ye' tö be' kichaterattsá be' wák ttë wa. Be' tö iché tö ye' dör wëm er darërëë ese. Be' tö iché tö ì kè dör ye' icha ese klö'wekewayö, nies tö ye' tö íyi wöshteke wé kè ye' wa' ikuatkëne eë. <sup>23</sup> E' dör es, e' ta' çì kuëki be' kè wa' ye' inuköl bléne inuköl bló wé a' as eë ikí klör? Be' tö iúpa es, e' ma mik ye' dene, eta' ye' inuköl ena ikí klöne e' de ye' ulà a.' <sup>24</sup> Eta' blu' tö iché itso'rak eë, e'pa a: 'Inuköl yóttsa ie' ulà a, ta' imú wé wa' itso' dabop, e' a.' <sup>25</sup> Erë ie'pa tö blu' a' iché: 'A kékëpa, erë çì kuëki be' tö ie' a' ikí meke, ie' wa' itso'tke dabop?' <sup>26</sup> Ie' tö ie'pa iüté: 'Ye' tö a' a' iché tö wé wa' íyi tso', ese a' ikí merdaë. Erë wé kè wa' ì ku', ì tso' ese wa' elkela, e' yerattsá iyöki. <sup>27</sup> Wépa kè kî ye' kiane blu'ie, e'pa dör ye' bolökpa; ie'pa tsúbitu íe' ta' ittólur ye' wörki.' "

### Jesús demi Jerusalén

(Mateo 21.1-11; Marcos 11.1-11; Juan 12.12-19)

<sup>28</sup> Jesús ttë paké one, eta' ie' mirkaia Jerusalén ñalé kî. <sup>29</sup> Mik idökemitke tsinet Betfagé ena Betania ate kabata kiè Olivo kébata e' kuli' a, eta' ie' tö ittökatapa böi kié <sup>30</sup> ta' ichéitö iarak:

—A' yú kewe, u tso' se' wöshaë e' a, eta' eë burro kueraë a' tö etö moule kè kî yi e' tkëuleká ese. E' wötsöö ta' itsúbitu ña. <sup>31</sup> Yile tö a' a' ichaké: çìie a' tö iwötseeke? e' ta' iütó: Skékëpa kî ikiane.

<sup>32</sup> Ittökatapa míyal ta' ikuérakitö wës Jesús tö iché ie'pa a' es. <sup>33</sup> Ie'pa tso' burro wötsöök ta' burro wakpa debitu ta' ichakéitö:

—çìie a' tö burro së wötseeke?

<sup>34</sup> Ie'pa tö iüté:

—Skékëpa Jesús kî ikiane e' kuëki.

<sup>35</sup> Eta' ittökatapa wa' burro bitetser Jesús a. Ie'pa tö ipaio kíkë méka burro kî, ta' Jesús kimerakitö e' tkökka iki. <sup>36</sup> Jesús mirkaia Jerusalén ñalé kî, eë pë' tso' taië, e'pa tö paio kíkë shuélor ñalá kî kewe Jesús yöki. <sup>37</sup> Ie'pa mirwa Olivo kébata kuli' a' wó wa'k. Iklépa tso' taië, e'pa anemi ttsë'ne buaë wa. Skéköl kíkëkarakitö taië. Ì kè or yi a' ese o' Jesús tö taië ie'pa wörki, e' kuëki Skéköl kíkëkarakitö.

<sup>38</sup> Ie'pa tö iché:

—Ayëcha buaë s'blú i' datse Skéköl ttö wa! Skéköl tso' ká ja' a' olo ta' taië as e' ta' se' ser bèrë. Ie' kikökasö.\*

<sup>39</sup> Pë' shua fariseowakpa welepa tso', e'pa tö iché Jesús a:

—Be' klépa uñú.

<sup>40</sup> Erë ie' tö ie'pa iüté:

—Ye' tö iché a' a' tö ie'pa siwa'bléwa, e' ta' ák tö ye' kikeraká aneule.

\* 19:38 Salmo 118.26

<sup>41</sup> Mik ie' de tsinet Jerusalén, etä ie' ikí sué tã ie' ié idalërmik. <sup>42</sup> Ie' tö ibikeitsé: ¡A' mú wã ijcher i'ñe tö wes a' sermi bèrè Skëköl tã! Erë e' tso' blëule a' yöki, e' kueki a' kè a isurpa. <sup>43</sup> Kawö sulu döraë a' ki. A' bolökpa döraë, e'pa tö a' ká köierawa shkit as a' kè tköyal. Ie'pa miraë ñippök a' tã. <sup>44</sup> Ie'pa tö a' ká ena a' wakpa kos ewerawa. A' u kos olordawa, e' éki kè atpa ñi bata ki. Skëköl de a' tsatök, e' këwö de a' ki erë iwattétsa a' tö. E' kueki e' kos tköraë a' tã.

*Jesús tö Skëköl wé batse'wé*

*(Mateo 21.12-17; Marcos 11.15-19; Juan 2.13-22)*

<sup>45</sup> E' ukuöki tã Jesús de Skëköl wé a, tã ie' tö íyi wataukwakpa trë'wéyalmi, <sup>46</sup> tã ichéitö ie'pa a:

—Skëköl tö iyë' iyëkkuö ki: 'Ye' u dör tto ye' tã wé', erë a' tö iia'wëka akblo wéie.

<sup>47</sup> Këkraë Jesús tö s'wöbla'weke Skëköl wé a. Sacerdotepa wökirpa ena s'wöbla'uk ttè dalöiëno wa wakpa ñies judiowak wökirpa malepa, e'pa tö ileritsekerak Jesús ttowaie.

<sup>48</sup> Erë judiowak malepa ulitane tö ie' ttöke e' kittseke er bua' wa, e' kueki ibolökpa kè ulà dë'wã ittökwa.

## 20

*¿Yi tö kawö mé Jesús a?*

*(Mateo 21.12-17; Marcos 11.27-33)*

<sup>1</sup> Etökicha tã Jesús tso' s'wöbla'uk ena Skëköl ttè buaë e' pakök Skëköl wé a tã ee sacerdotepa wökirpa ena s'wöbla'uk ttè dalöiëno wa wakpa ena judiowak kueblupa e'pa de. <sup>2</sup> Ie'pa tö ichaké ie' a:

—¿Yi ttò wa be' tö íyi ikkë weke? ¿Yi tö e' këwö mé be' a?

<sup>3-4</sup> Ie' iüté:

—Ñies ye' tö a' a ilè chakeke: ¿Yi tö Juan patkë' s'wöskuök? ¿Skëköl tso' ká jai a e' ö s'ditsö? Ye' iütó.

<sup>5</sup> Etã ie'pa ichémi ñi a: “Se' tö ichémi tö Skëköl tö Juan patkë', e' tã ie' tö se' iütëmi: '¿Ì kueki a' kè wã ie' ttè klöone?’ <sup>6</sup> Ñies pë' ulitane tö iklö'wé tö mokië Juan dör Skëköl tteköl, e' kueki kè se' a iyënuke tö ipatkë' s'ditsö tö. Se' tö iché es, e' tã ie'pa tö se' ttëwami ák wa.” <sup>7</sup> E' kueki ie'pa tö iüté:

—Kè sa' wã ijcher tö yi tö Juan patkë' s'wöskuök.

<sup>8</sup> Ie' tö ie'pa a iché:

—Es ñies ye' kè tö a' a ichepa yi tö ye' a kawö mé íyi ikkë wöie.

*Uva kanéukwakpa sulusipa, e' tté*

*(Mateo 21.33-44; Marcos 12.1-11)*

<sup>9</sup> E' ukuöki tã Jesús ttémi pë' tã tã ttè kleitö i' es: “Wëm eköl tö uva kuatké taië. Ie' tö ipeitëat wëpa wëlepa a as ie'pa tö ipataù ie' a iwörke e' kak wa. E' ukuöki tã ie' mía ká kuá'ki dò ká taië. <sup>10</sup> Mik uva wöline tso'tke wë'iäë shtë, etã ie' tö ikanè méso patkémi eköl ie' icha tsuk. Erë kanéukwakpa tö ikanè méso klö'wëwã, ppé siarë, tã ipatkémine ulà wöchka. <sup>11</sup> Etã iwák tö ikanè méso skà patkémine eköl. Ñies e' ché ie'pa tö suluë, ppé siarë, tã ipatkémine ulà wöchka. <sup>12</sup> Ikanè méso skà patkémine ie' tö eköl, etã ñies e' shká'wërakitö taië, tã itrë'wëshkar.

<sup>13</sup> “Bata ekkë tã iwák tö iché: '¿Ì wëmi ye' tö? Ye' alà dalër taië ye' éna, e' patkerami ye' tö. Isalema ie'pa tö ie' dalöiëmi.’ <sup>14</sup> Erë mik kanè mésopa tö kanè wák alà sué, etã ie'pa tö iché ñi a: 'Ie' wì dör ká i' wak alà, e' a ká i' atdaë. E' kueki ittöwasö, etã es ká i' atdaë se' ulà a.’ <sup>15</sup> E' kueki ie'pa tö iklö'wëwã yétsa bánet tã ittëwarakitö.

“Ye' tö a' a ichakè: ¿Ima a' ibikeitsé? ¿Ì wëraë kanè wák tö? <sup>16</sup> Yö iché tö ie' miraë tã kanéukwakpa tteratulur, tã uva kané meraneitö pë' kuá'ki a.”

Mik e' ttsé judiopa wökirpa tö, etã ie'pa tö iché:

—E' mú kè wamblër es.



<sup>17</sup> Erë ie' tö ie'pa sué krereë, tã ichéitö:

—¿Wes a' tö ibikeitsèmi tö e' kè tkòpa a' ta? Skèköl yèkkuö tö ye' ché i' es:  
‘Ák watè'ttsa u yuökwakpa tö,

e' yönene ák bua'buaié.’\* <sup>18</sup> Yi klastkène ák e' mik ese parolordaë ena yi k<sub>i</sub> ák e' aneka  
ese yalitdawa idik<sub>i</sub>.

<sup>19</sup> Ie'pa tö isuéwa tö kleè e' wa Jesús tö ie'pa ché. E' kuèk<sub>i</sub> ie'pa éna ie' klö'wakwa eë,  
erë ie'pa suane pè' yöki.

*S'wökirpa patuè, e' tté*

*(Mateo 22.15-22; Marcos 12.13-17)*

<sup>20</sup> E' kuèk<sub>i</sub> ie'pa tso' Jesús weblök isuöie tö ì k<sub>i</sub> ikkatèrmi. Ie'pa tö wèpa wèlepa patké  
ie' chakök ittò yoktsa, e' wa ikkatè Roma wökirpa a as e'pa tö iklö'ùwa. Wèpa e'pa e' ò tö  
ie'pa dör pè' buaë yèsyèsè ese. <sup>21</sup> Ie'pa tö ie' a ichaké:

—A s'wöbla'ukwak, sa' wa ijcher tö ì cheke be' tö ena ttè wa be' tö s'wöbla'weke, e'  
dör moki. Be' a sulitane dör ñies ème. Be' tö s'wöbla'weke yèsyèsè Skèköl ñalé tté wa.

<sup>22</sup> ¿Ima be' tö ibikeitsè? Roma wökir kibi patuèsö ¿e' dör buaë ö kè idör buaë?

<sup>23</sup> Ie' wa ijcher tö ie'pa tso' ie' chakök er sulu wa, e' kuèk<sub>i</sub> ie' iüté i' es:

<sup>24</sup> —Inuköl tso' a' wa Roma wökir patuöie, e' kkachó ye' a et. ¿Yi diököl ena yi kiè  
me'rka iki?

Ie'pa tö iüté:

—Roma wökir kibi.

<sup>25</sup> Ie' iché ie'pa a:

—E'ma kos Roma wökir kibi icha, ese mú ie' a. Tã kos Skèköl icha, ese mú ie' a. <sup>26</sup> Ì kos  
ché ie' tö sulitane wörki, e' a ie'pa kè wa ì k<sub>i</sub>ne ie' kkatoie. Ie' tö ie'pa iüté es, e' tö ie'pa  
tkiwéwa. E' kuèk<sub>i</sub> ie'pa siwa'blélur iyöki.

*¿S'duolur e'pa shkermikane ö au?*

*(Mateo 22.23-33; Marcos 12.18-27)*

<sup>27</sup> E' ukuöki tã saduceowakpa wèlepa debitu Jesús ska'. E' wakpa tö iklö'wé tö s'duowa  
e' kè shkenukkane. Ie'pa tö ie' a ichaké:

<sup>28</sup> —A s'wöbla'ukwak, Moisés tö ttè dalöièno kitat yèkkuö k<sub>i</sub> se' a, e' tö iché i' es: Wëm  
blènewa kè alà atè, e' tã ie' èl kawöta ischó tsukwa as ilà kòka ièl blènewa e' a. <sup>29</sup> Etökicha  
wèpa bak döka kul ñi èlpa. Ikibi alaköl tséwa, erë iblènewa kè alà atè. <sup>30</sup> E' ukuöki tã ie'  
itöki ièl tö ischó tséwa, erë ñies e' blènewa kè alà atè. <sup>31</sup> Es itka ièl skà tã ñies imalepa  
kos e'pa tã. Ie'pa kul blèrulune kè alà atè yès. <sup>32</sup> Bata ekkè tã ñies alaköl e' blènewa.  
<sup>33</sup> Wèpa kul e'pa bak alaköl eköl è tã. Mik s'duowa e'pa shkenekane, etã ¿wéne dòmi ie'  
wëm chókie?

<sup>34</sup> Ie' tö ie'pa iüté:

—S'tso'ia ká i' a tã wèpa ena alakölpa ñi tsukewa. <sup>35</sup> Erë aishkuö tã wèpa k<sub>i</sub> sene michoë  
mène, esepa shkerdakane tã eë wèpa ena alakölpa kè serpawaiã ñita. <sup>36</sup> Ie'pa ser michoë  
kè duöta'wa wes Skèköl biyöchökwakpa kè duöta'wa es. Skèköl tö ie'pa shkeo'kane, e'  
kuèk<sub>i</sub> ie'pa döraë ie' ala'rie. E' kuèk<sub>i</sub> ie'pa kè serpawaiã ñita. <sup>37</sup> Ñies Moisés wák tö se' a  
ikkayè' tö s'duowa e'pa shkerdakane. Kal tsir wöñarke bö'ie e' paka'itö, eë ie' tö iyè' tö  
Skèköl dör Abraham, Isaac ena Jacob, e'pa Kèköl.† Es isuésö tö ie'pa tso'ia ttsé'ka Skèköl  
a. <sup>38</sup> E' wà kiane ché tö s'tso' ttsé'ka ena s'duowa, e'pa kos tso' ttsé'ka Skèköl a kekraë. E'  
kuèk<sub>i</sub> ie' kè dör s'duowa e' Kèköl. Ie' dör s'ttsé'ka e' Kèköl.

<sup>39</sup> Etã s'wöbla'uk ttè dalöièno wa wakpa wèlepa tö iché ie' a:

—A s'wöbla'ukwak, ì ché be' tö, e' chébö buaë yèsyèsè.

<sup>40</sup> Etã saduceowakpa kè kèsik dè'kaiã ie' a ì skà chakök.

\* 20:17 Salmo 118.22 † 20:37 Skèköl dör Abraham, Isaac ena Jacob, e'pa Kèköl: E' ché Skèköl tö ie'pa blèrulunebak  
ká iaiã e' ukuöki.

*¿Wé pairine'bitu idi' wa s'blúie e' dör yi aleri?*

*(Mateo 22.41-46; Marcos 12.35-37)*

<sup>41</sup> Jesús tö ie'pa a ichaké:

—¿Wes ie'pa tö ichèmi tö wé pairine'bitu idi' wa s'blúie, e' dör s'blú bak kiè David e' aleri? <sup>42</sup> Erë David wák tö ie' yé'at yékkuö kiè Salmos e' k<sub>i</sub>. Ie' tö iyé'at i' es:

‘Skéköl tö iché ye' Kéköl a:

Be' e' tkóser ye' ulà bua'kka dalöiëno taië

<sup>43</sup> dò mik ye' tö be' bolökpa mérö be' klò dik<sub>i</sub>a et<sub>a</sub>.<sup>‡</sup>

<sup>44</sup> Es se' isué tö wé pairine'bitu idi' wa s'blúie, e' kié David wák tö ie' Kéköl, e' t<sub>a</sub> ¿wes ie' dör David aleri?

*Jesús tö s'wöbla'uk ttè dalöiëno wa wakpa kkaté*

*(Mateo 23.1-36; Marcos 12.38-40; Lucas 11.37-54)*

<sup>45</sup> Sulitane tso' Jesús ttöke e' k<sub>i</sub>ttök, et<sub>a</sub> ie' tö iché ittökatapa a: <sup>46</sup> “A' e' kkö'nú s'wöbla'uk ttè dalöiëno wa wakpa yöki. Ie'pa wöbatsö shkök datsi' batsië ese mik wé pè' tso' taië ese ska' as pè' tö ie'pa shke'ù wes kékëpa dalöiërta' taië es. Nies se' ñi dapa'wo wé a ena wé ie'pa kawö tkö'wëkerakitö, ese ska' kula' tso' kékëpa dalöiërta' esepa a, ese yuleke ie'pa tö e' tkoie. <sup>47</sup> Ie'pa tö alakölpa schó u yekettsa iulà a t<sub>a</sub> iwökatekerakitö ittökerak S'yé t<sub>a</sub> braraë e' wa. Ie'pa weirdaë siarë s'malepa tsata.

## 21

*Alaköl eköl siarë e' tö inuköl mé Skéköl a*

*(Marcos 12.41-44)*

<sup>1</sup> Jesús tso'ia Skéköl wé a, et<sub>a</sub> ie' tso' inuköl blúpa tso' inuköl iök kalkuö tso' iioie mè Skéköl a ese a e'pa sauk. <sup>2</sup> Nies ie' tö alaköl eköl siarëla dör schó e' sué inuköl wöshkila yöule cobre\* wa ese böt iökwa. <sup>3</sup> Et<sub>a</sub> Jesús tö iché:

—Mok<sub>i</sub> ye' tö a' a ichè tö alaköl w<sub>i</sub> siarëla dör schó e' tö inuköl iéwa kibiie imalepa kos tsata. <sup>4</sup> Ie'pa ulitane tö inuköl kuò at<sub>e</sub> ese ié, erë ie' siarë, e' tö ie' w<sub>a</sub> itso' s<sub>e</sub>noie e' kos métt<sub>s</sub>a. E' kuëki ye' tö ie' ché es.

*Jesús tö iché tö Skéköl wé olordawa*

*(Mateo 24.1-2; Marcos 13.1-2)*

<sup>5</sup> Et<sub>a</sub> Jesús ttökatapa welepa tso' ichök tö Skéköl wé wër buaala, k<sub>i</sub>tkëule taië ák bua'buwa wa ena íyi bua'buwa kakmeule Skéköl a taië, ese wa. Jesús tö iché:

<sup>6</sup> —Ikéwö döraë et<sub>a</sub> ì kos sué a' tö i', e' olordawa s<sub>e</sub>raa, iékwö è kè at<sub>p</sub>a ñi bata k<sub>i</sub>.

<sup>7</sup> Et<sub>a</sub> ittökatapa tö ichaké:

—A s'wöbla'ukwak, ¿mik e' wamblërmi? ¿ì wa sö isuèmi tö iwamblërketke?

<sup>8</sup> Ie' iiuté: “Taië pè' datse e' chök tö ie'pa dör ye'. Icherarakitö: ‘Ye' dör wé pairine'bitu idi' wa s'blúie e'’. Nies icherarakitö tö s'erkewa e' k<sub>e</sub>wö detke. Erë kè a' minuk esepa itök<sub>i</sub>. Pè' k<sub>i</sub>terarakitö taië. E' kuëki a' tso' wösh wa as kè yi tö a' k<sub>i</sub>tö'ù. <sup>9</sup> Mik a' tö biyó ttsé tö ká wele wakpa ñippöke taië ká ku<sub>a</sub>'k<sub>i</sub> wakpa t<sub>a</sub>, et<sub>a</sub> e' kè tö a' tkiuk. Nies mik a' tö ibiyó ttsé tö pè' ñippöke taië iké wakpa wökirpa t<sub>a</sub>, et<sub>a</sub> e' kè tö a' tkiuk. Ese wamblërdaë kam ye' döne e' yöki, erë ká i' erwa e' kam k<sub>e</sub>wö döwa.”

<sup>10</sup> Ie' tö ie'pa a ik<sub>i</sub> ché ia: “Ká ku<sub>a</sub>'k<sub>i</sub> ku<sub>a</sub>'k<sub>i</sub> wakpa ñippöraë ñita. <sup>11</sup> Nies í tö ká wöt<sub>i</sub>'weraë taië. Nies ká ku<sub>a</sub>'k<sub>i</sub> ku<sub>a</sub>'k<sub>i</sub> k<sub>i</sub> bli tö ena duè tö pè' tteraë taië. Ká jai a íyi sueraësö taië suluë iwà kkachöie, e' tö ie'pa tkiweraë taië.

<sup>12</sup> Kam e' k<sub>e</sub>wö tkö, e' yöki ie'pa tö a' klö'w<sub>e</sub>rawa, we'ikeraë siarë. A' miraë ie'pa w<sub>a</sub> se' ñi dapa'wo wé a shulè, ñies a' wötërdawa s'wöto wé a. Ie'pa w<sub>a</sub> a' miraë duéser s'blúpa ena s'wökirpa wörk<sub>i</sub> ye' ttè kuëki. <sup>13</sup> Erë es ñies a' tö ye' tté pakeraë ie'pa a. <sup>14</sup> Et<sub>a</sub> kè a'

<sup>‡</sup> 20:43 Salmo 110.1 \* 21:2 cobre: E' dör tabechka èse kè tuët<sub>a</sub>' darërë wes orochka ena inukölchka es.

tkinuk tö ima a' e' tsatkömi. <sup>15</sup> Ye' tö ttè eraë a' a e' tsatkoie buaë, e' kuëki kè a' tkinuk e' ki. A' bolökpa kè a iwöklönuk, ñies ie'pa kè a iyënuuk tö e' dör kachè. <sup>16</sup> A yé, a' mì, a' èlpa, a' yamipa malepa, a' sini'pa, e'pa welepa tö a' wömerattsä a' bolökpa ulà a. Ie'pa tö a' welepa tterawä. <sup>17</sup> Sulitane tö a' suëraë suluë ye' ttè kuëki. <sup>18</sup> Erë kè a' tkinuk, a' kè weirpa kekraë, a' döraë buaë ká jai a aishkuö ta. <sup>19</sup> A' e' tkéwä darërë döka bata ekkè, e' ta a' tsatkërdaë.

<sup>20</sup> Mik a' isuë tö ká kua'ki ñippökwapka iëne taië Jerusalén kköiëule e' pamik shkit ñippök Jerusalén wakpa ta, eta a' éna ianú tö Jerusalén erdawa bet. <sup>21-22</sup> Mik e' kéwö de, eta wépa serke Judea e'pa tkóyalmi kabata a. Skéköl tö Jerusalén wakpa we'ikeraë taië siarë. E' kuëki wépa serke Jerusalén, e'pa e' yólur. Ñies wépa tso' kañika, esepa kè kinewane ee. E' kos tköraë wes itso' kitule Skéköl yëkkuö ki es. <sup>23</sup> Kawö suluë döraë ká i' ki, iwakpa we'ikeraë siarë Skéköl tö. E' kuëki e' kéwö ska' ta jwëstela ina alakölpa alà kurketke ena alakölpa tsu' muke ilà a esepa ta! <sup>24</sup> Judiowak welepa tterawä tabè wa; welepa tserdami klöulewä ká wa'ñe. Eta pè' kè dör judiowak, esepa tö Jerusalén klö'werawä wes iwákpa icha es, dö mik Skéköl tö ikéwö mé ie'pa a ekkè.

### *Jesús dörane olo ta' taië*

*(Mateo 24.29-35; Marcos 13.24-37)*

<sup>25</sup> “Diwö a, si'wö a ena bëkwö a iyi wërdaë taië suluë iwà kkachoie tö ká i' erkewatke. Ñies ká i' ki dayë blardaë taië ena iyöli busdakä taië, ese yöki ká ulitane wakpa suardaë taië, kè ie'pa a e' onukia wes. <sup>26</sup> Ì sulu tköraë ká i' ki, ese yöki ie'pa suardaë taië, isiwa' ardararak suane è wa. Ì kos tso' ká jai a e' wötirdaë. <sup>27</sup> Eta ye' dör S'ditsö Alà, e' datse mò a diché ta' taië olo ta' taië, e' wërdaë. <sup>28</sup> Mik iyi ikké suë a' tö, eta bet ta a' tsatkërketke, e' kuëki a' er kuú, a' wö kóka siwa' ki.”

<sup>29</sup> Ñies ie' tö ie'pa a ikleé ttè i' wa: “Kal kiè higuera ö kal ulitane, e' bikeitsó. <sup>30</sup> Mik a' isuë tö erpa kal kò shlörketke, eta a' wa ijcher tö duas dewatke tsinet. <sup>31</sup> Es ñies mik a' tö isuë tö iyi ekkè wamblërke, eta a' wa ijchenú tö ì blúie Skéköl tso', e' kéwö dewatke tsinet.

<sup>32</sup> “Moki ye' tö a' a ichè tö iyi ekkè wamblërdaë wépa dör wes a' es esepa kam erwa e' yöki. <sup>33</sup> Kashuk ena ká i' erdawa, erë ye' ttè michoë e' kè erpawa yës.

<sup>34</sup> “A' e' kkö'nú! Kè a' e' muktsä ì sulu ulà a. Kè a' e' ttökkä blo' wa. Kè a' er mukwä ì tso' ká i' a, e' è ki. E' kos tö a' er darë'werawä Skéköl ki. A' e' kkö'nú as ye' datskene, e' kéwö kè tö a' klö'ü <sup>35</sup> wes iyiwak klör sho' a es. Kawö e' döraë sulitane serke ká wa'ñe e'pa ki, e' kuëki a' e' kkö'nú e' yöki. <sup>36</sup> A' senú wösh wa. A' ikió S'yé a kekraë as iyi suluë kéwö datse, e' kè dö a' ki. Ñies ikió ie' a kekraë as a' e' duöser buaë ye' wörki mik Ye' dör S'ditsö Alà, e' datskene sulitane shülök eta.”

<sup>37</sup> Niwe ta Jesús tö s'wöbla'weke Skéköl wé a, nañewe ta ie' míä kabata kiè Olivo e' a. <sup>38</sup> Bla'mi sulitane mi'ke Skéköl wé a Jesús tö s'wöbla'weke e' kittsök.

## 22

### *Judas ena judiowak kuëblupa tö Jesús aleritsé klö'wëwä*

*(Mateo 26.1-5,14-16; Marcos 14.1-2,10-11; Juan 11.45-53)*

<sup>1</sup> Judiowak Yépa Yërulune Egipto, e' kéwö tkö'wekerakitö, e' dökewatke tsinet, ese kéwö ska' ta judiowak wöblar pan kè yöule iwölöwoka wa ese ñuk. <sup>2</sup> Sacerdotepa wökirpa ena s'wöbla'uk ttè dalöiëno wa wakpa suane pè' yöki, e' kuëki ie'pa tso' ikéwö yulök Jesús ttowa.

<sup>3</sup> Eta Satanás tkawä Judas er a. Judas e' kiè ñies Iscariote. Ie' dör Jesús ttökatapa dabom eyök kí bö! e' eköl. <sup>4</sup> Ie' míä ttök sacerdotepa wökirpa ta ena Skéköl wé shkëkipa wökirpa ta. Wes ie' tö Jesús mëttsami ie'pa ulà a e' chéitö ie'pa a. <sup>5</sup> E' tö ie'pa ttsë'wérak buaë ta ikablé ie' a inuköl muk. <sup>6</sup> E' dör buaë ie' a. E' kuëki ie' tö kawö yulémi iwömottsä mik kè yi ku' taië Jesús ta e' dalewa.

*Judiowak Yépa Yërulune Egipto e' k'ewö tkö'wé Jesús tö ittökatapa ta  
(Mateo 26.17-29; Marcos 14.12-25; Juan 13.21-30)*

<sup>7</sup> Etä Pan Kè Yöule Iwölöwoka Wa e' k'ewö tsá de. E' diwö a judiowak tö obeja pupula jcheke Ie'pa Yépa Yërulune Egipto, e' k'ewö tkö'woie. <sup>8</sup> Jesús tö Pedro ena Juan kié, ta iché ie'pa a:

—A' yú kawö tkö'wekesö, e' chké kanéuk.

<sup>9</sup> Ie'pa ie' a ichaké:

—¿Wé be' ki ikiane tö sa' mi' ikaneuk?

<sup>10</sup> Ie' iüté:

—Mik a' de Jerusalén, etä ee wëm kueraë a' tö eköl, e' wa di' dami skauña a. E' itöki a' yú dò u wé a ie' demi ee. <sup>11</sup> U e' wák a ichó: 'S'wöbla'ukwak be' chakök ké: ¿Úshu wé a ie' tö kawö tkö'wekesö e' chké ñèmi ie' ttökatapa ta?' <sup>12</sup> Ie' tö a' a úshu bërie tso' kákke, kaneuletke buaë, e' kkacheraë. Eë ichké kanéu se' a.

<sup>13</sup> Etä ie'pa mía ta íyi ulitane kuérakitö wes ie' tö iché es. Eë chkè kanewérakitö kawö tkö'woie.

<sup>14</sup> Mik ichköketke e' diwö de, etä ie' e' tkéser chkök mesa o'mik ittekölpa tsá e'pa ta. <sup>15-16</sup> Ie' tö iché ie'pa a:

—Ye' tö a' a ichè tö kawö i' kè tkö'wepaiayö a' ta dò mik iwà tka mik ì blúie Skököl tso' e' k'ewö de etä. E' kueki suluë ye' éna ikéwö bata tkö'wakiä a' ta kam ye' ttöwa ie'pa tö e' yöki.

<sup>17</sup> Etä tka' klö'wéitö, ta wéstela chéitö Skököl a, ta ichéitö ie'pa a:

—Íkè, a' itsá yó eköl eköl. <sup>18</sup> Ye' a' a ichè tö vino kè yepaiayö dò mik ì blúie Skököl tso' e' k'ewö de etä.

<sup>19</sup> E' ukuöki ta pan klö'wéitö, ta wéstela chéitö Skököl a ta iblatéitö wà tié ie'pa a ta ichéitö:

—Pan se' dör ye' chkà wömeulettsa ttèwa a' skéie e'. A' tö inú kekraë as a' er arne ye' ska'.

<sup>20</sup> Es ñies mik ie'pa chké one, etä tka' klö'wéitö ta ichéitö:

—Vino i' dör ye' pé. Ye' tterawa e' pé tërdaë a' tsatkoie. E' wa ttè pa'ali me' Skököl tö, e' wà de. <sup>21</sup> Erë yi ye' wömekettsa, e' tkër ye' ta mesa i' o'mik. <sup>22</sup> Ye' dör S'ditsö Alà, e' ta itköraë wes isuletëneatbak es, erë jwéstela ina yi ye' wömekettsa, e' ta!

<sup>23</sup> Etä ie'pa ñi chakémitke: "A' ichè, ¿yi ie' wömekettsa?"

*¿Yi dör kékëpa taië Skököl a?*

<sup>24</sup> Jesús ttökatapa ñi iütéka tö ie'pa wé ék dör kékëpa taië imalepa tsata. <sup>25</sup> Jesús tö iché ie'pa a: "Pè' kè tö Skököl dalöie, esepa blúpa e' alòka ie'pa ki kekraë, erë ie'pa e' chò tö ie'pa dör imalepa kimukwakpa buaë. <sup>26</sup> Erë e' kè dör es a' ta. E' skéie yi dör kékëpa taië imalepa tsata a' shua, ese kawöta e' ökwa se' ëselaie. Ñies a' wökir kawöta e' ökwa wes kanè méso es. <sup>27</sup> E'ma ¿yi dör kékëpa taië? ¿Itkër chkök mesa o'mik ese ö wé tso' chkè watiök ese? Tó, itkër mesa o'mik ese dör kékëpa taië. Erë ye' tso' a' shua wes kanè méso tso' chkè watiök es.

<sup>28</sup> "Kos ye' weirke e' a' a' tso' ye' ta ye' wapie. <sup>29</sup> E' kueki ye' tö a' tkekeka blu'paie, wes ye' Yé tö ye' tké'ka blu'ie es. <sup>30</sup> Aishkuö ta ì blúie ye' tso' e' a' e' tulöraser chkök di'yök buaë ye' ta. Ñies a' e' tulöraser blu' kulé ki, Israel ditséwöpa doka dabom eyök kí böl (12), e'pa wëttsuk."

*Pedro tö icheraë tö ie' kè wa Jesús suule  
(Mateo 26.31-35; Marcos 14.27-31; Juan 13.36-38)*

<sup>31</sup> Ñies Skökëpa Jesús tö iché:

—A Simón, a Simón, jye' ttò ttsó! Satanás tö a' k'ewö kié ma'wè. Ie' tö a' ulitane wöpperaë darërëë wes iyiwö wöppè es. <sup>32</sup> Erë ye' ikiétke Skököl a as be' erblò ye' mik

e' kè olo'yöbö. Mik be' erbléne buaë ye' mik, etä ye' ttökatapa malepa kimú as ie'pa e' tkòwä darërëë ye' mik.

<sup>33</sup> Simón tö ie' a iché:

—A Skékëpa, ye' e' chétke wötënukwä be' ta s'wöto wé a dö ttèwä be' ta.

<sup>34</sup> Ie' iüté:

—A Pedro, ye' ichè be' a tö ì'ñe kam dakro ar, e' yöki be' icheraë mañatökicha tö be' kè wä ye' suule.

*Jesús weirketke e' kéwö dökewätke*

<sup>35</sup> E' ukuöki ta Jesús tö ittökatapa a ichaké:

—Mik ye' tö a' patkë'mi Skëköl ttè pakök inuköl kè ta', chkewö kè ta', klökkuö kè ta', etä ÿi kianeia a' ki?

Ie'pa tö iüté:

—Kè ì kianeia sa' ki.

<sup>36</sup> Ie' tö iché ie'pa a:

—E' skéie, ì'ñe ta, ye' tö a' a ichè tö a' wé wä inuköl ta', e' tsúmi; a' wé wä chkewö ta', e' tsúmi; a' wé kè wä tabè ta' e' tsatkoie, etä a' paio wataúttsa ta e' ské wa tabè taúttsa.

<sup>37</sup> Ye' tté qos tso' kitule Skëköl yëkkuö ki, e' wä tköraë wës itso' kitule es, e' tö ichè: 'Ie'pa tö ye' we'iké wës pë' sulusi we'iké es.\* Ttè e' wä tköketke i' ta, e' kuëki a' tö iú wës ye' tö a' a ichè es.

<sup>38</sup> Ie'pa tö iché ie' a:

—A Skékëpa, íe tabè tso' böt.

Ie' tö ie'pa iüté:

—Wë' idir, ÿkè a' ttökia!

*Jesús tté S'yé ta Getsemani*

(Mateo 26.36-46; Marcos 14.32-42)

<sup>39</sup> E' ukuöki ta Jesús mía Olivo kébata a wës iwöblar es, etä ittökatapa míyal ie' ta. <sup>40</sup> Mik ie'pa demi wé ie'pa mirö ee, etä ie' iché ie'pa a:

—A ikió Skëköl a as ì sulu tö a' erkiöweke e' kè e' alòka a' ki.

<sup>41</sup> Ie' mía bánet ie'pa yöki dö qos ák uyëmisö ekkë, ee ie' e' tkéser kuchë ki ta itté S'yé ta i' es: <sup>42</sup> “A yéwö, ì tköraë ye' ta, e' dör wës íyi bacha'bachaë yèwasö es. Be' ki ikiane, e'ma be' ye' yóttsa e' ulà a. Erè kè iwar wës ye' ki ikiane es, iú wës be' ki ikiane es.”

<sup>43</sup> [E' wösha ta Skëköl biyöchökwak de eköl ie' ska' idiché kí iök. <sup>44</sup> Ie' eriane taië, e' shua ie' ttémitke S'yé ta taninië, ta ipaali wër s'pé es e' yërke taië darke íyök ki.]†

<sup>45</sup> Mik ie' tté one, etä idene ittökatapa ska' ta ie'pa kuëitö kapötulur. Ie'pa shtrinewa eriar è wä, e' kuëki ie'pa kapolur. <sup>46</sup> Ie' tö ie'pa a ichaké:

—ÿlók a' kapötulur? A' e' kóka, a' ikió Skëköl a as ì sulu tö a' erkiöweke e' kè e' alòka a' ki.

*Jesús klö'wéwä ibolökpa tö*

(Mateo 26.47-56; Marcos 14.43-50; Juan 18.2-11)

<sup>47</sup> Jesús tso'ia ttök e' dalewa taië pë' de. Ie' ttökatapa dabom eyök kí bö, e' eköl kiè Judas e' debitu ie'pa wëttsë. Ie' dewä Jesús ska' ishke'uk wöalattse wa. <sup>48</sup> Erè Jesús tö ie' a iché:

—A Judas, ÿwöalattse wa be' tö ye' dör S'ditsö Alà, e' wömekettsa?

<sup>49</sup> Mik Jesús ttökatapa tso' ie' ta, e'pa tö isué tö ie' klörkewätke, etä ie'pa tö ie' a ichaké:

—A Skékëpa, ÿtabè yëttsa sa' tö ie'pa ki?

<sup>50</sup> Etä ie'pa eköl tö sacerdote kibi, e' kanè méso eköl kuköña ulà bua'kka téttsa. <sup>51</sup> Jesús tö iché:

—Imúat; wë' idir.

\* 22:37 Isaías 53.12 † 22:44 Ttè i' kè ku' yëkkuö këchke wele ki.

Etā ie' tō kanè méso kukuõña kéwā tā ibua'wéneitō. <sup>52</sup> E' ukuõki tā sacerdotepa wõkirpa ena Skëköl wé shkëkipa wõkirpa ena judiowak kuëblupa debitu ie' tsukmi, e'pa a ie' iché:

—ÿl kuëki a' bite ye' ñalé ki tabè ki kal wölö ki ye' klö'ukwā wës akblökwakpa klö'wèwā es? <sup>53</sup> Këkraë ye' bak a' shūa Skëköl wé a, erë a' kè wā ye' klöõnewā. Erë i' tā a' a ikéwö de ye' klö'wowāie. Ñies bé a ikéwö de ì sulu wamblak ie' éna e' wambloie.

*Pedro tō iblé tō kè ie' wā Jesús suule*

*(Mateo 26.57-58,69-75; Marcos 14.53-54,66-72; Juan 18.12-18,25-27)*

<sup>54</sup> Etā ie'pa tō Jesús klö'wéwā tsémi sacerdotepa kibi, e' u a. Pedro dami ie' itõki kamië. <sup>55</sup> Etā ee pè' welepa tō bö' batséka upa shūshāë baiklè, etā Pedro e' tkésër ie'pa tā. <sup>56</sup> Etā alaköl eköl dör kanè méso, e' tō Pedro sué bö' kkò a tā isuéwā krereë tā ichéitō:

—Ñies ie' wí dör Jesús klé.

<sup>57</sup> Erë Pedro tō iblé. Ie' tō iché:

—A tayë, ye' kè wā wëm e' suule.

<sup>58</sup> E' ukuõki kukuie tā wëm eköl tō Pedro sué ñies tā ichéitō:

—Be' ñies dör Jesús klépa eköl.

Erë Pedro tō iüté:

—A wëm, kè ye' dör ie'pa eköl.

<sup>59</sup> E' ukuõki hora de et tā iskà tō iché:

—Wëm sè dör Galilea wak e' kuëki mokí ie' dör Jesús klé eköl.

<sup>60</sup> Pedro tō iché:

—A wëm, ì cheke be' ye' a, e' kè jcher ye' wā.

Pedro ttõkeia e' wõshā tā dakro ane. <sup>61</sup> Etā Skëképa Jesús wötrée, tā Pedro suéitō ék. Etā Pedro éna ianewā tō ttè i' yé' Jesús tō ye' a: “ÿñe kam dakro ar, e' yõki be' tō icheraë mañatõkicha tō be' kè wā ye' suule.” <sup>62</sup> Etā Pedro e' yéttsā kañikā tā iie siarë.

*Jesús wayué ie'pa tō*

*(Mateo 26.67-68; Marcos 14.65)*

<sup>63</sup> Wëpa ulà a Jesús tso' klöulewā, e'pa tō ie' wayué suluë, ippé taië. <sup>64</sup> Ñies ie'pa tō iwöbla pamuwā datsi'tak wa, etā ie'pa tso' ippök, e' dalewa ie'pa tō ie' a ichakeke:

—Be' dör Skëköl tteköl, e'ma sa' a ichókā ÿyi tō be' ppé?

<sup>65</sup> Etā ie'pa tō ie' skà cheke suluë ttè ulitane wa kua'ki kua'ki.

*Jesús mítser ie'pa wā judiowak kuëblupa wõrki*

*(Mateo 26.59-66; Marcos 14.55-64; Juan 18.19-24)*

<sup>66</sup> Mik ká ñine, etā judiowak kuëblupa ena sacerdotepa wõkirpa ena s'wöbla'uk ttè dalöiëno wa wakpa tō Jesús tsémi wé judiowak wõkir kibipa ñi dapa'uke ee. Tā ie'pa tō ie' a ichaké:

<sup>67</sup> —Ichó sa' a ÿmoki be' dör wé pairine'bitu idi' wa s'blúie e' ö au?

Ie' tō ie'pa iüté:

—Ye' tō ichèmi tó, erë kè a' tō ye' ttò klö'wëpa. <sup>68</sup> Ñies ye' tō a' a ilè chakèmi, e' tā a' kè tō ye' iütëpa. <sup>69</sup> Erë ye' dör S'ditsö Alà, i' ukuõki tā ye' e' tköraser Skëköl diché dör íyi ulitane tsatā, e' ulà bua'kka dalöiërta' taië.

<sup>70</sup> Ie'pa ulitane tō ie' a ichaké:

—ÿE'ma be' e' chò tō be' dör Skëköl Alà?

Jesús tō ie'pa iüté:

—Tó, wës a' tō iché es idir.

<sup>71</sup> Etā ie'pa iché:

—ÿlie se' ki ikkatõkwakpa kí kiarmiia? Ì ché ie' tō, e' ttsé se' wákpa tō.



## 23

*Jesús mítsger Pilato wörki**(Mateo 27.1-2,11-14; Marcos 15.1-5; Juan 18.28-38)*

<sup>1</sup> Etä ie'pa ulitane e' kéka ta Jesús tsémirakitö Pilato ska' as ishulöitö. Pilato dör ká e' wökir patké' Roma wökir kibi tö. <sup>2</sup> Ie'pa tö Jesús kkatémi Pilato a ta ichérakitö:

—Sa' wa ijcher tö wëm i' tö taië sa' judiowak mekeka ñippök s'wökirpa ta. Ie' iché tö sa' kè kawötä inuköl patauk Roma wökir kibi a. Nies ie' iché tö ie' dör wé pairine'bitu idi' wa s'blúie e'. Ie' e' chò tö ie' dör sa' judiowak blú.

<sup>3</sup> Pilato tö ichaké ie' a:

—¿Be' dör judiowak blú?

Ie' iüté:

—Tó, wes be' iché, e'ma es idir.

<sup>4</sup> Etä Pilato tö iché sacerdotepa wökirpa a ena pë' tso' eë, e'pa a ñies:

—Ye' kè wa ì nuí kune wëm i' kî.

<sup>5</sup> Erë ie'pa tö ikí kcateke aneule ta ichekerakitö:

—Ttè wa ie' tö s'wöbla'weke, e' tö sa' wakpa mekeka ñippök ñita. Ie' tö itsá paka'bitu Galilea, ì ñe ta ide íe Judea.

*Pilato tö Jesús patkémi Herodes ska'*

<sup>6</sup> Mik e' ttsé Pilato tö, etä ichakéitö: ¿wëm i' dör Galilea wak? <sup>7</sup> Mik ie' wa ijchenewa tö Jesús dör Galilea wak, etä ie' tö ipatkémi Herodes ska' as e' tö ishulö, e' dör Galilea wökir e' kuëki. E' kèwö ska' ta ie' tso' Jerusalén. <sup>8</sup> Mik ie' tö Jesús sué, etä e' tö ie' ttsé'wé buaë. Bànet ie' éna isuak. Ie' wa itté jchenewa tö, ì kè or yi a ese wekeitö, e' wà paneke ie' tö suë. <sup>9</sup> Ie' tö Jesús chaké taië, erë Jesús kè wa ie' iütëne yës. <sup>10</sup> Nies sacerdotepa wökirpa ena s'wöbla'uk ttè dalöiëno wa wakpa tso'ñak eë. Ie'pa tö Jesús kcateke taië ie' a. <sup>11</sup> Ie' ena ñippökwakpa, e'pa tö Jesús sué suluë, ta ie'pa tö datsi' bua'buá, blu' datsi' sù, ese iéka ikí iwayuoie. E' ukuöki ta ie' tö ipatkémine Pilato ska'. <sup>12</sup> Herodes ena Pilato dör ñi bolökpa, erë e' diwö shà ta ie'pa er buanene ñi kî.

*Jesús méttsa ttèwa**(Mateo 27.15-26; Marcos 15.6-15; Juan 18.39-19.16)*

<sup>13</sup> Sacerdotepa wökirpa ena judiowak wökirpa malepa ena judiowak taië, e'pa kiéttsa Pilato tö e' dapa'uk ek tsiní ème. <sup>14</sup> Ie' tö ie'pa a iché:

—A' wa wëm i' de ye' ska' kkatè. A' tö iché tö ie' tö a' wakpa mekeka ñippök sa' ta. Erë ye' tö ie' a ichaké a' wörki, etä ì kî a' tö ie' kkaté, e' kè nuí kune ye' wa ie' kî yës. <sup>15</sup> Nies Herodes kè wa ì nuí kune ie' kî, e' kuëki ie' tö ipatkébitune ye' ska'. E' kuëki a' tö isué tö ie' kè wa ì sulu nuí kî ittèwami ese wamblène. <sup>16-17</sup> Súyö ippök patkè tsa'bata daloie wa iwe'ikoie bërëbërë, e' ukuöki ta ye' tö ie' ekemine.\*

<sup>18</sup> Erë ie'pa ulitane anemi ñikkëë:

—¿Jesús ttówa ta Barrabás ómine sa' a!

<sup>19</sup> Barrabás e' tö iyamipa dapao'ka ñippök ká e' wökirpa ta, ñies ie' wa s'kötulewa. E' kuëki ie' tso' wötëulewa s'wöto wé a. <sup>20</sup> Pilato éna Jesús akmine, e' kuëki ie' tö iskà chéne Jesús tsatkoie. <sup>21</sup> Erë ie'pa kî arkeka taië:

—¿Iwötówa krus mik! ¿Iwötówa krus mik!

<sup>22</sup> Pilato tö iskà chéne ie'pa a, i' ta ide mañatökicha:

—¿Ì kuëki? ¿Ì sulu wambléitö? Ye' kè wa ì sulu kune ie' wömottsä ttèwa. Súyö ippök patkè tsa'bata daloie wa iwe'ikoie, e' ukuöki ta ye' tö ie' ekemine.

<sup>23</sup> Erë ie'pa kî arkeka taië shüte: “¿Iwötówa krus mik!” Bata ekké ta Pilato tö ie'pa ttè iüté. <sup>24</sup> Ie' tö iwé wes ie'pa kî ikiane es. <sup>25</sup> Es wëm tso' wötëulewa ñippè s'wökirpa ta

\* 23:16-17 Yëkkuö kèchke wele tö kuötkéka. E' tö iché i' es: Pilato wöblar s'wötëulewa e' ökmi eköl mik judiowak tso' Ie'pa Yépa Yërulune Egipto e' kèwö tkö'uk etä.

kuęki, ñies s'ttèwạ kuęki, e' émine Pilato tö. Eta Jesús ttökwa patkëitö wes judiowak ki ikiane es.

*Jesús wötëne krus mik*

(Mateo 27.32-44; Marcos 15.21-32; Juan 10.17-27)

<sup>26</sup> Mik Roma shkëkipa wạ Jesús dami, e'pa tö isué tö ie' kè ki krus dè'kaia, eta ie'pa tö wëm eköl kiè Simón e' klö'wéwạ tạ iké krus ppökka tsëmi Jesús itöki. Wëm e' dör Cirene wak. Ie' tso' bänet, erpa e' de Jerusalén.

<sup>27</sup> Taië pë' mirwạ Jesús itöki. E'pa shụa alakölpa tso' taië iuramirak taië ie' iëitsök. <sup>28-29</sup> Jesús wotrëene ie'pa sauk tạ ichéitö:

—A Jerusalén alékölpa, kawö suluë döraë a' ki, e' kuęki kè a' iuk ye' iëitsök. E' skéie a' wákpa e' iëitsó, ñies a' ala'r iëitsó. Aishkuö tạ iyërdaë: 'Ayëcha buaë alakölpa kọs kè döta' aläë. Ayëcha buaë alakölpa kọs kè alà tạ.' <sup>30-31</sup> Ye' dör wes kal pa'alì es e' weirke i' es, e' tạ ùi kè wamblërpa a' dör wes kal sí es, e'pa tạ? E' kuęki e' kèwö ska' tạ iyërdaë kabata a: 'Be' anúka sa' ki as sa' duòwạ wötëulewạ iyök a.'†

<sup>32</sup> Ñies wëpa bøl dör pë' sulusipa e'pa mirwarak iwạ Jesús tạ wötèwạ krus mik. <sup>33</sup> Mik ie'pa demirak ká kiè S'wökirdiche ee, eta ie'pa tö Jesús woté krus mik. Ñies wëpa bøl sulusipa wotérakitö, eköl iulà bua'kka, eköl baklì'kka. <sup>34</sup> [Jesús tö iché: "A yéwö, ì wambleke ie'pa tö ye' tạ, e' kè ane ie'pa éna, e' kuęki e' nuí olo'yó ie'pa ki."‡]

Eta Roma shkëkipa iné ñi ma'woie suè tö wes ie'pa tö Jesús datsi' blatemi ñi a. <sup>35</sup> Pë' iëter Jesús sauk. Dö judiowak wökirpa tso' ie' wayuök suluë, ie'pa tö icheke:

—Moki ie' dör wé pairine'bitụ idi' wa s'blúie shükít Skéköl tö e' e'ma as iwák e' tsatkó wes o'kapa tsatkéitö es.

<sup>36</sup> Ñies Roma shkëkipa tö ie' wayué. Ie'pa de tsinet ie' ska' tạ blo' shköshkö wátké ie'pa tö ie' a. <sup>37</sup> Ie'pa iché:

—iMoki be' dör judiowak blú, e'ma be' wák e' tsatkó!

<sup>38</sup> Kaltak ki itso' kitule tö iché: "I' dör judiowak blú e'", e' batsulewạ Jesús tsaka.

<sup>39</sup> Eta wëm eköl àr wötëulewạ ikrus mik Jesús o'mik, e' tso' ie' chök suluë. Ichéitö ia:

—iMoki be' dör wé pairine'bitụ idi' wa s'blúie e', e'ma be' e' tsatkó, ñies sa' tsatkó!

<sup>40</sup> Erë iëköl tso' wötëulewạ ie' o'mik, e' tö iëköl uñé tạ ichéitö:

—Be' wömenettsạ ttèwạ wes ie' es, erë wësua be' kè suar tạ' Skéköl yöki. <sup>41</sup> Moki se' weirke se' wák kuęki, se' nuí kuęki. Erë ie' kè wạ ì sulu wamblène yës.

<sup>42</sup> E' ukuöki tạ ie' tö iché Jesús a:

—A Jesús, mik be' detkene s'blúie, eta kè be' éna ye' chökwa.

<sup>43</sup> Ie' tö iüté:

—Moki ye' tö be' a iché tö i'ñe be' dörawạ ká buaala tso' ká jai a e' a ye' tạ.

*Jesús duowạ*

(Mateo 27.45-46; Marcos 15.33-41; Juan 19.28-30)

<sup>44</sup> Mik diwö de bata a, eta ká mia ttsettseë ká wa'ñe, dö tsáli diwö de mañat ekkë.

<sup>45</sup> Diwö kè dalöbuneia, eta Skéköl wé a ie'pa wạ datsi' buririë ese shükvar u blatoie, e' jchënane shushaë. <sup>46</sup> Eta Jesús tö iché aneule:

—A yéwö, ye' wiköl méat be' ulà a.

E' chéitö tạ isiwa' bata tké.

<sup>47</sup> Roma ñippökwa eköl dör capitán, mik e' tö isué, eta Skéköl kikékaitö tạ ichéitö:

—Moki, wëm wí sene' yësyësë.

<sup>48</sup> Pë' daparke taië isauk, mik e'pa tö isué tö wes Jesús blënewạ, eta ie'pa erianeka taië tạ es imíyalnerak iu a. <sup>49</sup> Erë wëpa wạ Jesús suule buaë ena alakölpa manetwạ ie' tạ Galilea, e'pa kọs iëter ie' kí sauk erë kamië.

† 23:30-31 Oseas 10.8 ‡ 23:34 Ttè tso' iwakyöule i' es...e' shụa, e' kè ku' yëkkuö kèchke wele ki.

*Jesús nu wötëne**(Mateo 27.57-61; Marcos 15.42-47; Juan 19.38-42)*

<sup>50-51</sup> Wëm tso' eköl kiè José, e' dör ká kiè Arimatea e' wak. Arimatea aṭe Judea. Ie' dör wëm buaë yësyësë. Ñies ì blúie Skëköl tso' e' këwö panuk ie' tso'. Ie' dör judiowak wökirpa e' eköl, erë ie' tö ibikeitsé tö wës imalepa tö Jesús wé e' dör suluë. <sup>52</sup> Ie' mía Pilato ska', eṭa Jesús nu kiéitö. <sup>53</sup> Ie' tö Jesús nu yéttsa krus mik éwa iski ṭa ipatréwaitö datsi' ukuö bua' bua saruru ese wa. E' ukuökṭi ṭa ie' tö Jesús nu bléwa ákuk bine pa'alí s'nu blóie ese a. <sup>54</sup> Ká tuirketke eṭa eno diwö batsetsekemitke, e' kuëki ie' kawöṭa Jesús nu wötökwa bet.

<sup>55</sup> Eṭa alakölpa manetwa Jesús ṭa Galilea, e' pa mirwañak isaṭuk tö wé Jesús nu mekewa. Ie' pa tö isué tö wës ie' nu blëne ákuk a. <sup>56</sup> Mik ie' pa dene u a, eṭa kiö masmas tso' të s'nu ki, ese kanewérakitö. Ie' pa tö eno diwö batseitsé wës Skëköl ttë dalöiëno tö ichë es.

## 24

*Jesús shkënekane**(Mateo 28.1-10; Marcos 16.1-8; Juan 20.1-10)*

<sup>1</sup> Erë domingo ká ñirketke, eṭa alakölpa míane Jesús pö a kiö masmas kanewétke ie' pa tö, e' mí ie' pa wa të Jesús nu ki. <sup>2</sup> Mik ie' pa de, eṭa ie' pa tö isué tö ák bërie bastkër pö kkò a, e' rratune bánet. <sup>3</sup> Erë mik ie' pa dewa ákuk a, eṭa ie' pa tö isué tö Jesús nu kè ku'. <sup>4</sup> Ie' pa tso'ia ibikeitsök tö wëk Jesús nu mí, e' bet ṭa ie' pa tö isué tö wëpa böi de iëṭer ie' pa o' mik, e' pa datsi' wöñarke dalölöë. <sup>5</sup> E' tö alakölpa suawéka taië ṭa iwö éwarak dò iski. Erë wëpa e' pa tö iché ie' pa a:

—¿Íók a' tö ie' tso' ttsë'ka, e' yuleke s'nupa shua? <sup>6</sup> Ie' kè ku' íe, ishkenekane. Ì yë'bakitö a' a mik ibak Galilea eṭa, e' anú a' éna. <sup>7</sup> Ie' tö a' a iyë'bak tö ie' dör S'ditsö Alà, e' wömerdattsa pë' sulusipa ulà a ṭa iwötërdawa krus mik, e' ki ká de mañat eṭa ishkerdakane. <sup>8</sup> Eṭa ì yë' Jesús tö, e' anewane ie' pa éna.

<sup>9-10</sup> Alakölpa dare Jesús pö a, e' pa kiè María Magdala wak ena Juana ena María dör Santiago mì. Ñies alakölpa skà tso'ñak ie' pa ṭa. Ì sué ie' pa tö pö a, e' pakéne Jesús ttekölpa tsá dabom eyök ki eköl (11) e' pa a, ñies imalepa a. <sup>11</sup> Erë ì paké alakölpa tö e' kè wà ṭa' ie' pa a, e' kuëki ie' pa kè wa iklöone. <sup>12</sup> Erë Pedro tunemi pö a isaṭuk. Mik ie' demi ṭa ie' tö isué ákuk shua, eṭa datsi' wa Jesús nu parratewa, e' è tkëṭer. Eṭa ie' biteane u a, e' tö ibikeitsëro tö ¿wëk imí?

*Jesús ttökatapa böi tö ie' suéne Emaús ñalé ki**(Marcos 16.12-13)*

<sup>13</sup> E' diwö wa Jesús ttökatapa böi e' yéttsa Jerusalén michoë ká kiè Emaús ee. E' ñalé dör kamië kilómetro döka dabom eyök ki et (11), e' ulatök. <sup>14</sup> Ì tka Jesús ṭa Jerusalén, e' kōs pakerami ie' pa tö ñi a. <sup>15</sup> Ie' pa kapakörami ñita, eṭa Jesús tö ie' pa kué eṭa ishkémi ie' pa ṭa. <sup>16</sup> Ie' pa tö isué, erë ie' pa kè a ikkayënewa tö yi idir.

<sup>17</sup> Jesús tö ie' pa a ichaké:

—¿Ì pakerami a' tö?

Eṭa ie' pa e' wöklö'wé iëṭer. Ie' pa eriarke taië e' wënewa iwö ki. <sup>18</sup> Ie' pa eköl kiè Cleofás, e' tö Jesús iüté:

—Wësua se' kōs dë'rö Jerusalén kawö tkö'uk e' shua be' è kè wa ijcher tö ì bak ee chki bökli.

<sup>19</sup> Ie' tö ie' pa a ichaké:

—¿Ì bak?

Ie' pa iüté:

—Ì bak wëm kiè Jesús dör Nazaret wak e' ṭa e'. Ie' dör Skëköl tteköl buaë, diché ṭa' taië Skëköl wöa. Ì kè or yi a ese wé ie' tö taië sulitane wörki. Ñies s'wöbla'wëitö ttë buaë moki wa. <sup>20-21</sup> Sa' tö ie' pana' tö isalema Skëköl tö ie' patkë' se' dör Israel aleripa e' tsatkök. Erë

sacerdotepa wökirpa ena s'wökirpa malepa, e'pa tö ie' wöméttsa ttèwä wötëulewä krus mik. E' k<sub>i</sub>ie ta, ì k<sub>os</sub> wamblène, e' k<sub>i</sub> k<sub>a</sub> de mañat etä ÿì panemiä sa' tö? <sup>22</sup> Ñies alakölpa welepa tso' sa' ska', e'pa tö sa' tkiwéwä. I'ñie bla'mi ie'pa dare Jesús pö a <sup>23</sup> erë ie' nu kè ku' ee. Ie'pa tö sa' a iché tö Skéköl biyöchökwakpa de ie'pa ska', ta ichéitö ie'pa a tö Jesús tso'ne ttsé'ka. <sup>24</sup> E' ukuök<sub>i</sub> ta sa' wakpa welepa dare isauk ta ie'pa tö ikué wes alakölpa tö iché es, erë ie'pa kè wä Jesús sune.

<sup>25</sup> Etä Jesús tö iché ie'pa a:

—A' kuköña darërë. A' kè wöblar bet. Ì k<sub>os</sub> ye'atbak Skéköl ttekölpa tö e' kè klöne a' wä bet. <sup>26</sup> Skéköl yëkkuö tö iché tö wé pairine'bitu idi' wa s'blúie e' kawöta weinuk es kam ie' dö sulitane wökirie olo ta' taië e' yöki.

<sup>27</sup> Etä ie' wák tté tso' kitule Skéköl yëkkuö k<sub>i</sub>, e' k<sub>os</sub> wä pakémiitö ie'pa a. Kewe ì kit Moisés tö, e' wä pakéitö. E' ukuök<sub>i</sub> ta ì kit Skéköl ttekölpa k<sub>os</sub> e'pa tö, e' wä pakéitö ie'pa bül a.

<sup>28</sup> Mik ie'pa demi wé ie'pa mírö ee, etä iwër tö Jesús k<sub>i</sub> mi'keia ñala k<sub>i</sub>, <sup>29</sup> erë ie'pa tö ie' kiémi kröröë kapökrö ie'pa ska'. Ie'pa tö iché ia:

—Ká tuirketke, e' kuëki be' e' tsuat sa' ska' kapökrö.

E' kuëki ie' dewa ie'pa ta weshke. <sup>30</sup> Mik ie'pa e' tuléwä mesa o'mik chkök, etä ie' tö pan klö'wé ulä a ta wéstela chéitö Skéköl a ta iblatéitö méitö ie'pa a. <sup>31</sup> E' wö shä ta ie'pa tö isuéwä tö Jesús idir; erë bet ta ie' kè ku'ia ie'pa ta. <sup>32</sup> Etä ie'pa tö iché ñi a:

—Wëe', mik ie' kapaköratse se' ta ñala wa, Skéköl yëkkuö wä pakeratseitö, e' tö se' ttsé'wé buaë ichök.

<sup>33</sup> E' wöshä ta ie'pa e' yéttsa míyalne Jerusalén. Mik ie'pa demi ee, etä ie'pa tö Jesús ttökatapa tsá döka dabom eyök k<sub>i</sub> eköl (11) ena imalepa, e'pa kué ee ñita. <sup>34</sup> E' a ie'pa iché:

—Mok<sub>i</sub> Skékëpa Jesús shkenekane. Ie' e' kkaché Simón a.

<sup>35</sup> Etä wëpa bül tö ì k<sub>os</sub> tka ie'pa ta ñala wa e' paké imalepa a. Ñies wes ie'pa tö Jesús suéwä, mik ie' tö pan blaté etä, e' pakéitörak.

*Jesús e' kkaché ittökatapa a*

*(Mateo 28.16-20; Marcos 16.14-18; Juan 20.19-23)*

<sup>36</sup> Ie'pa tso'ia ipakök, etä Jesús de dur ie'pa shüa, e' tö ie'pa shke'wé ttè i' wa:

—As a' kawö tkò buaë.

<sup>37</sup> Ie'pa tkirulune tö ibikeitsé tö ie'pa tso' s'wimblu sauk. <sup>38</sup> Erë Jesús tö iché ie'pa a:

—ÿì kuëki a' tkirulune? ÿì kuëki a' ibikeitsè bötböt? <sup>39</sup> Ye' ulä k<sub>i</sub> itö saü. Ye' klö k<sub>i</sub> itö saü. Ye' kó, e' wa a' isueraë tö ye' kè dör wimblu. S'wimblu kè chkà ta', kè dichéwö ta', erë a' isué tö ye' chkà ta' ye' dichéwö ta'.

<sup>40</sup> E' chök ie' tso' ie'pa a, ta ie' tö iulä ena iklö kkaché ie'pa a. <sup>41</sup> Ie'pa iëteriaä ttsé'nerak buaë tkirulune taië, e' kuëki darërë ie'pa a iklöo' tö mok<sub>i</sub> idir. E' kuëki Jesús tö ie'pa a ichaké:

—ÿì tso' a' wä ñè? <sup>42</sup> Etä ie'pa tö nima katuule bö' a, e' mé ia. <sup>43</sup> Ta ie' tö ikaté ie'pa wörki. <sup>44</sup> Etä ie' tö iché ie'pa a:

—Ì tka ye' ta, e' ye' ye' tö a' a, mik ye' bak a' ta etä. Ye' tö a' a iyë' tö ye' tté k<sub>os</sub> kit Moisés ena Skéköl ttekölpa tö yëkkuö k<sub>i</sub> ñies Salmos yëkkuö k<sub>i</sub>, e' k<sub>os</sub> kawöta wä tkök.

<sup>45</sup> Etä ie' tö ie'pa er ñi'wé as ì ché Skéköl yëkkuö tö, e' wä ar ie'pa éna. <sup>46</sup> Ta ichéitö ie'pa a:

—Itso' kitule Skéköl yëkkuö k<sub>i</sub> i' es: wé pairine'bitu idi' wa a' blúie e' kawöta ttèwä, mik e' k<sub>i</sub> k<sub>a</sub> de mañat etä ishkerdakane. <sup>47</sup> Ñies tö iché i' es: Tté buaë pakardaë ye' ttö wa Jerusalén wakpa a kewe, e' itök<sub>i</sub> ipakardaë k<sub>a</sub> ulitane wakpa a. Tté buaë e' dör tö wëpa er mane'wé Skéköl a, esepa k<sub>i</sub> ie' tö ì sulu wamblérakitö e' nuí olo'yeraë. <sup>48</sup> Ì k<sub>os</sub> tka ye' ta, e' sué a' tö, e' pakök a' kawöta sulitane a. <sup>49</sup> Ye' yé kablë' Wiköl Batse'r muk a' a, e' patkeraë ye' tö a' a. Ie' datse k<sub>a</sub> jai a, e' döraë a' k<sub>i</sub> idiché taië wa, e' panú íe Jerusalén.

*Jesús míane ká jai a*  
(Marcos 16.19-20)

<sup>50</sup> E' ukuöki tá Jesús wá ittökatapa mítser tsinet Betania. Ee Jesús ulà kéka tá ie' er buaë ché ie'pa a. <sup>51</sup> Ie' tso'ia ie'pa a er buaë chök tá ie' butséka mí ká jai a ie'pa wörki. <sup>52</sup> Ie'pa tö ie' dalöié taië, e' ukuöki tá ie'pa míane Jerusalén ttsë'nerak buaë. <sup>53</sup> Këkraë ie'pa tso' Skëköl kíkókka iwé a.

## Jesús Tté Buaë Kit Juan tö Juan

Yëkkuö i' kit Juan tö e' dör Jesús ttökatapa dabom eyök kí böi e' eköl. Yëkkuö i' kí Juan tö Jesús ttökata eköl tté cheke (13.23; 19.26; 20.2,21; 7.7, 20, 24). E' kiëtö “Jesús ttökata dalër taië iéna e'.” Ibikeitsèsö tö Juan wák tso' e' chök es. Ie' dör Israel aleri. Ie' ena iël Santiago e'pa ki' Jesús tö ittökataie. Ie'pa bak kaneblok nima kli'uk. Ie'pa bak senuk batsöri taië me'r Galilea e' o'mik tsinet. Iklö'wésö tö yëkkuö i' kit ie' tö Jesús kune' e' kí duas de dabom paryök ena suliyök e' shü ulat (80-90 DC).

Ie'pa tö ibikeitsè tö ie' tö ikit Israel aleripa bak senuk bánet Israel esepa a. Juan 20.31 ee ie' tö se' a ikkachè tö iie ie' tö yëkkuö i' kit. E' tö ichè i' es: yëkkuö i' kitule as a' tö iklö'ù tö Jesús dör Skëköi Alà pairine'bitü idi' wa s'blúie e'. Nies ikitule as sene michoë dò a' ulà a' a' erblò ie' mik e' wa. Es Juan tö ikit. Yëkkuö i' kí ie' tö se' a ikkachè bua'iewa tö Skëköi dör Jesús Yé.

Mik Juan wötënewa s'wöto wé a dayë nane kiè Patmos ee eta ie' dewatke kékëlaie. Mik ie' bak ee, eta Jesús tö ie' ka' yëkkuö kiè Apocalipsis e' shtök. Nies ie' tö yëkkuö tsitsirla skà kit dökã mañat.

### Skëköi Ttò yöne s'ditsöie

<sup>1</sup> Tsawe ta eköl kiè Skëköi Ttò e' tso'tke. Ie' tso' Skëköi ta, nies ie' dör Skëköi. <sup>2</sup> Kenet ie' tso'tke Skëköi ta. <sup>3</sup> Skëköi tö iyi ulitane yö' ie' ta ñita. Kè ì ku' ká i' kí, e' kè yöneñak ie' wa. <sup>4</sup> Ie' dör sene michoë e' wák. Ie' dör wes bö'wö es, e' tö se' er ñi'weke. <sup>5</sup> Bö'wö ñe' tö se' er sulué tso' wes stui a es e' ñi'wemir. Kè ì sulu e' alòpaka iki.

<sup>6</sup> Wëm eköl patkë'bitü Skëköi tö e' kiè Juan. <sup>7</sup> E' dë'bitü yi dör bö'wö ñe' ttekölie itté pakök as sultane erblò imik Juan tö itté pakeke e' wa. <sup>8</sup> Ie' wák kè dör bö'wö ñe', erë ie' dë'bitü itté pakök.

<sup>9</sup> Yi dör bö'wö ñe' e' dör bö'wö chökle datse ká jai a sultane er ñi'woie e'. <sup>10</sup> Ká i' kos yö' Skëköi tö ie' ta ñita, erë mik idë'bitü ká i' a, eta ká i' wakpa kè éna iane tö yi dör ie'. <sup>11</sup> Ie' dë'bitü iwák ká a ena iwák ditséwopa a, erë e'pa kè wa ikinewa. <sup>12</sup> Erë wépa tö ikiéwa ta ierblé imik, esepa a kawö méitö as idörak Skëköi ala'rie. <sup>13</sup> Ie'pa de Skëköi ala'rie, erë e' kè dör wes se' ala'r kurke yé wa mi wa es. Ie'pa de Skëköi ala'rie ie' wák er wa.

<sup>14</sup> Wé kiè Skëköi Ttò ñe' yöne s'ditsöie ta isene' sa' shüa. Ie' dör Skëköi Alà eköl è e'. Ie' wa Skëköi er buaë chò se' a ena wes Skëköi dör moki, e' kos kkayëne se' a. E' su' sa' tö. <sup>15</sup> Juan tö ie' tté paka' ta ichéitö aneule: “Wëm i' yé'yö a' a mik ye' iché tö wëm eköl daia ye' ukuöki s'pattök ye' skéie, e' tso'tke ká iaiaë ye' yöki, e' kuëki ie' dör buaë ichökle ye' tsata.”

<sup>16-18</sup> Skëköi tté dalöiëno e' mène Moisés wa. Erë kos Skëköi er buaë chò se' a ena wes ie' dör moki e' jchënewa sa' wa Jesucristo wa. Kè yi wa Skëköi sùle iwöbla wa, erë ilà eköl è tkërie iyé ta, e' dör nies Skëköi, e' tö iyé kkaché se' a. E' kuëki ie' dör er buaë chökwak. Ie' er buaë kí ché se' a taië shüte.

### Juan dör S'wöskuökwak e' tö Jesucristo tté paké (Mateo 3.11-12; Marcos 1.7-8; Lucas 3.15-17)

<sup>19</sup> Judiowak wökirpa tö sacerdotepa ena Leví aleripa, e'pa welepa patké Juan ska' ichakök: “¿Yi dör be'? ¿Be' dör wé pairine'bitü idi' wa s'blúie e'?” <sup>20</sup> Juan kè wa iblène. Ie' tö ie'pa iuté yësyësé:

—Ye' kè dör wé pairine'bitü idi' wa s'blúie e'.

<sup>21</sup> Ie'pa tö iskà chaké:

—E'ma ¿be' dör yi? ¿Be' dör Skëköi tteköl bak kiè Elías e'?

Juan tö ie'pa iuté:



—Au, ye' kè dör ie'.

Ie'pa tö iska chaké:

—¿Be' dör Skëköl tö iyë'at tö itteköl skà datse e'?

Età Juan tö iüté:

—Au, ye' kè dör ie'.

<sup>22</sup> Età ie'pa tö iska chaké ia:

—E'ma, ¿be' dör yi? Sa' ki ikiane jchenowà yësyësë chène yi tö sa' patké e'pa a. E' kueki ichö sa' a tö ¿yi dör be'?

<sup>23</sup> Juan tö ie'pa iüté:

—Ye' dör wé yë' Skëköl tteköl Isaías tö e'. Ie' tö iyë': 'Ká sir poë wé kè yi serku' ee yile ttöraë aneule, e' tö icheraë: A' er mane'ú Skëköl datse e' yöki. E' dör wes ñala yuësö yësyësë ie' yöki es.\*

<sup>24</sup> Età wépa patké fariseowakpa tö ttök Juan ta, <sup>25</sup> e'pa tö ie' a iska chaké:

—Be' kè dör wé pairine'bitu idi' wa s'blúie e', be' kè dör Elías, be' kè dör Skëköl tteköl ñe', e'ma ¿i kueki be' tö s'wöskueke?

<sup>26</sup> Ie' tö iüté:

—Ye' s'wöskueke di' a, erë eköl dur a' shuà kè ijcher a' wà tö yi idir, <sup>27</sup> e' döraë ye' ukuöki kanëblök ye' skéie. Ie' dör kékë tajë ye' tsata, e' kueki ie' klökkuö kicha è kè wötsënanuk ye' siarla e' a.

<sup>28</sup> E' qos tka Betania. Ká e' atë di' kiè Jordán e' wishet. Eë Juan tso' s'wöskuök.

#### *Jesús dör Skëköl obeja jchëne e'.*

<sup>29</sup> Bule es ta Juan tö Jesús sué tö idatse ie' ska' ta ichéitö: "Isaú. Wì idatse e' dör Skëköl obeja pupula patkébitu jchë ì sulu wambleke sulitane tö e' nuí olo'yoie e'. <sup>30</sup> Ie' wì paka' ye' tö a' a mik ye' tö iyë': 'Eköl doia ye' ukuöki, e' tso'tke ká iaiaë ye' yöki, e' kueki ie' dör buaë ichökle ye' tsata.' <sup>31</sup> Ye' wák kè wà ijcher bua'iewà tö yi dör ie', erë ye' tö s'wöskueke as Israel aleripa wà ijcherwà tö yi dör ie'."

<sup>32</sup> Nies Juan tö iché: "Ye' isué tö Wiköl Batse'r datse ká jaì a nubölie, e' atë ie' a. <sup>33</sup> E' yöki ye' kè wà ijcher tö yi idir, erë Skëköl tö ye' patké' s'wöskuök di' a, e' tö ye' a iyë': 'Yi ki Wiköl batse'r de atë ie' a, e' dör wé tö a' iekewà Wiköl Batse'r a e' wák.' <sup>34</sup> E' sué ye' tö, e' kueki ye' tö iché a' a tö ie' dör Skëköl Alà ichökle."

#### *Jesús ttökatapa tsá*

<sup>35</sup> Bule es ta Juan durne eë ta ie' ta ittökatapa de böi. <sup>36</sup> Mik Juan tö isué tö Jesús damia e' wa, età ie' tö iché ie'pa a:

—¿Wëm wì dör Skëköl obeja pupula patkébitu jchë se' skéie e'!

<sup>37</sup> Ì ché Juan tö, e' ttsé Juan ttökatapa böi tö, età e'pa míyal Jesús itöki. <sup>38</sup> Jesús e' wötréene ta isué tö idatserak ie' itöki ta ichakéitö:

—¿ì kiane a' ki'?

Ie'pa tö iüté:

—A Rabí (judioie ttè e' wà kiane chë s'wöbla'ukwak), ¿wé be' serke?

<sup>39</sup> Età ie' tö ie'pa iüté:

—A' shkó isaük.

Età ie'pa míyal ie' ta, ta wé ie' serke, e' sué ie'pa tö. Mik ie'pa mía ie' ta età diwö detke tkël. Ie'pa e' tséat ie' ska' dò katuirketke ekkë.

<sup>40</sup> Ittökatapa böi tö Juan ttö ttsé' ta imineyal Jesús itöki, e' eköl kiè Andrés, e' dör Simón Pedro ël. <sup>41</sup> E' ukuöki bet ta Andrés tö iël Simón e' kué ta ichéitö ia:

—Wé pairine'bitu idi' wa s'blúie, e' kué sa' tö. ("Wé pairine'bitu idi' wa s'blúie" e' kiè judioie "Mesías" ena griegoie ikiè "Cristo".)

<sup>42</sup> E' ukuöki ta Andrés wà Simón mítser wé Jesús tso' eë. Mik Jesús tö Simón sué, età ie' tö iché ia:

\* 1:23 Isaías 40.3

—Be' dör Simón, Juan alà, erë be' kirdaë Cefas (griegoie s'kiè Pedro, e' wà kiane chè ák.)

*Felipe ena Natanael e'pa kié Jesús tö ittökatapaie*

<sup>43</sup> Bule es ta Jesús tö ibikeitsé tö “ye' mi'keá Galilea.” Kam ie' mi' e' yöki ta ie' tö Felipe kué ta ichéitö ia:

—Be' shkó ye' ta ye' ttökataie.

<sup>44</sup> Felipe dör ká kiè Betsaida e' wak. Andrés ena Pedro e'pa serke ñies Betsaida. <sup>45</sup> Felipe tö Natanael kué ta ichéitö ia:

—Wé pairine'bitü idi' wa s'blúie kit Moisés ena Skököl ttekölpa tö yëkkuö ki, e' wák kué sa' tö. Ie' dör Jesús, José serke Nazaret, e' alà.

<sup>46</sup> Natanael tö iché:

—¿Ì buaë döttsami Nazaret?

Felipe tö iché ia:

—Be' shkó sa' ta, ta iwà saú.

<sup>47</sup> Mik Jesús tö isué tö Natanael datse ta ichéitö:

—Wëm wí e' je' dör Israel aleri bua'ie. Ie' kè kachöta'.

<sup>48</sup> Natanael tö ie' a ichaké:

—¿Ì be' a ichök tö ye' dör es?

Ie' tö iüté:

—Ye' kè ku' dur ee, erë kam Felipe tö be' kiö, e' yöki ye' tö be' su' higuera klò dikia.

<sup>49</sup> Natanael tö iché ie' a:

—A S'wöbla'ukwak, ¿Be' dör Skököl Alà ichók! ¿Be' dör Israel aleripa blú ichók!

<sup>50</sup> Jesús tö ie' iüté:

—Ye' be' a iché tö “ye' be' su' higuera klò dikia,” ¿e' è kueki be' erblé ye' mik? Erë e' tsata be' tö ikí sueraia.

<sup>51</sup> Ñies ie' tö iché:

—Moki ye' tö a' a iché tö ká jaì sueraë a' tö áie ta a' isueraë tö ye' dör S'ditsö Alà e' dör weş klökata† es shkokaie ká jaì a, e' ki Skököl biyöchökwakpa shköke wo'k wa'k.

## 2

*Ulabatsè kéwö tkö'weke Caná*

<sup>1</sup> Böiki es ta ulabatsè Caná atë Galilea ee, ee Jesús mì tso'. <sup>2</sup> Ñies Jesús ena ittökatapa kiule, e'pa de ulabatsè e' kéwö tkö'uk. <sup>3</sup> Mik ie'pa vino enewa, eta Jesús mì tö iché ie' a:

—Vino enewa.

<sup>4</sup> Jesús tö ie' a iché:

—¿Íók be' tö e' ché ye' a? Kam ye' kéwö dò iwà kkachoie tö yi dör ye'.

<sup>5</sup> Eta imì tö iché íyi watiökwakpa a:

—Ì qos chekeitö a' a, e' ú a' tö es.

<sup>6</sup> Ee skaü tso' teröl (6) judiowak e' batse'ukerak Skököl a, e' dí dapa'woie. Skaü ek è a di' choká galon döká dabom böyök (20) ö dabom mañayök (30) ekké. <sup>7</sup> Jesús tö iché watiökwakpa a:

—Skaü ikképa wà ióká chié di' wa.

Ta watiökwakpa tö iwà iékarak es. <sup>8</sup> Eta Jesús tö iché iarak:

—I' ta itsá yóttsa elkela ta itsúmi ikéwö tkö'uk wökir a pattsé.

Es ie'pa tö iwé. <sup>9</sup> Eta iwökir tö di' yöne vinoie e' pattsé. Ie' kè wa ijcher tö wé vino e' datse (erë watiökwakpa tö di' yéttsa, e'pa è wa ijcher tö wé idatse.) E' kueki ie' tö wëm ulabatske, e' kié <sup>10</sup> ta ichéitö ia:

—Sulitane wöblane vino bua'iewa, ese watiök kewe. Mik s'kiulepa tö iyé taië, eta vino èse watieke. Erë be' tö vino bua'ie blé, ikké erpa be' tö iwatieke.

† 1:51 Génesis 28.11 saú.

<sup>11</sup> I' wé Jesús tó Caná atē Galilea ee, e' dör ì kè or yi a ese tsá o' ie' tó. E' wa ie' tó ilo taië, e' kkaché ie'pa a, ta ittökatapa erblé ie' mik.

<sup>12</sup> E' ukuöki ta ie' mía imì ta, iëlpa ta, ñies ittökatapa ta, ká kiè Cafarnaúm ee. Ee ie'pa e' tséat ká böt ká mañat ekkè alè.

*Jesús tó Skököl wé batse'wé*

*(Mateo 21.12-13; Marcos 11.15-18; Lucas 19.45-46)*

<sup>13</sup> Judiowak Yépa Yërulune Egipto e' kèwö tkö'wè dökewatke tsinet, e' kuëki Jesús mía Jerusalén kawö e' tkö'uk. <sup>14</sup> Mik ie' de Skököl wé pamik, eta ie' tó obeja ena bakala pupula ena nuböl ese wataukwakpa kué. Ñies inuköl mane'ukwakpa\* kuéitö tuldak imesa o'mik. <sup>15</sup> Ta ie' tó tsa' tréwa, e' wa ie' tó iyi wataukwakpa kos tré'wéyal iobeja ibakala tso' kos e' ta. Ñies inuköl mane'ukwakpa inuköl tuléttsaitö ta imesa trélurka. <sup>16</sup> Ie' tó iché nuböl wataukwakpa a:

—Íyi i' yólur sera! ¡Kè ye' Yé u klö'warwa a' iyi watuöie!

<sup>17</sup> E' ukuöki ta ittökatapa éna ianewa tó Skököl yëkkuö tó iché: “Be' u dalër taië ye' éna, e' tsatkeräe ye' tó dò ye' duòwa ekkè.”

<sup>18</sup> Judiowak wökirpa tó ichaké Jesús a:

—Ì kè or yi a ¿e' wése wèmi be' tó sa' a iwà kkachöie tó be' wa kawö ta' iyi ikkè woie?

<sup>19</sup> Ie' tó iiuté:

—U i' tkéttsa a' tó, e' ta böiki es ta ye' tó iyuékane.

<sup>20</sup> Ie'pa tó iché ia:

—U i' kané dör duas dabom tkéyök kí teröl (46), eta ¿wes iyuékami be' tó ká mañatk è?

<sup>21</sup> Erë u cheke ie' tó, e' dör iwák e' chöke. <sup>22</sup> E' kuëki mik ie' shkënekane, eta ittökatapa éna ianewa tó ie' tó iyè' es. E' kuëki ie'pa tó Skököl yëkkuö ena ì yè' Jesús tó e' klö'wé.

*Jesús wa sulitane er suule buaë*

<sup>23</sup> Mik Jesús tso' Jerusalén Judiowak Yépa Yërulune Egipto e' kèwö tkö'uk, eta ì kè or yi a ese weke ie' tó taië. E' kuëki taië pè' erblé ie' mik. <sup>24</sup> Erë ie' wa ie'pa er suule buaë, e' kuëki kè ie' erblène ie'pa mik. <sup>25</sup> Ie' wák wa ijcher buaë wes sulitane er dör. E' kuëki kè yi a ì yènuke ie' a tó wes se' er dör.

### 3

*Jesús ena Nicodemo tté ñita*

<sup>1</sup> Wém tso' eköl kiè Nicodemo, e' dör judiowak wökirpa eköl. Ie' dör fariseowak. <sup>2</sup> Ká et nañewe ie' de Jesús ska' ta ichéitö ia:

—A S'wöbla'ukwak, ì kè or yi a ese weke be' tó. Skököl kè kúpa be' ta, e'ma kè be' a ì onuk. E' kuëki sa' wa ijcher tó ie' tó be' patké' sa' wöbla'uk.

<sup>3</sup> Jesús tó iché ia:

—Mokí ye' be' a iché tó yi kè skà kunene etökichane, ese kè döpa wa ì blúie Skököl tso' e' a.

<sup>4</sup> Nicodemo tó ie' a ichaké:

—Mik s'de këchke, eta ¿wes s'kürmine etökichane? ¿Wes s'mi'miwañe s'mì shua, e' kürmi etökichane?

<sup>5</sup> Jesús tó iiuté:

—Mokí ye' be' a iché tó yi kè kune di' wa ena Skököl Wiköl wa, ese kè döpa wa ì blúie Skököl tso' e' a. <sup>6</sup> S'kune s'mì wa s'yé wa ese ser wes s'ditsö ser es, erë yi kune Skököl Wiköl wa, ese ser wes Skököl ser es. <sup>7</sup> Ye' tó be' a iché tó be' kawöta kunukne etökichane. ¿Wes e' tó be' tkiwemi? <sup>8</sup> Ì wakaneweke Skököl Wiköl tó se' a, e' dör wes siwa' bitsirke ká wa'ñe es. E' blar ttsésö, erë wé idatse ena wé imíró e' kè jcher s'wa. Es itköke sulitane

\* 2:14 inuköl mane'ukwakpa: Inuköl tso' Skököl wé a, e' dör kuá'ki, kè dör inuköl tso' judiowak wa iyi tuöie bánet ese. E' kuëki yi tó iyi tuöke ee, ese kawöta ie'pa inuköl mane'uk inuköl ñe'se wa.

kunene Skëköl Wiköl wa e'pa ta. Se' wa ijcher tö ie'pa kunene Skëköl Wiköl wa, erë kè se' wa ijcher wes iwà tköke.

<sup>9</sup> Nicodemo tö iskà chaké:

—¿E' ma ima iwà dör?

<sup>10</sup> Eta Jesús tö iiuté:

Be' dör s'wöbla'ukwak dalöier'ta' taië Israel aleripa shua ese, erë ¿wes be' kè wa íyi ikkë jcher? <sup>11</sup> Mokí ye' tö be' a ichè tö ì jcher sa' wa, e' cheke sa' tö a' a, ñies ì sué sa' tö, e' pakeke sa' tö, erë a' kè éna sa' ttò klö'wak yës. <sup>12</sup> Íyi tso' ká i' kí, ese wa ye' tö ikleeke a' a, erë e' kè klö'wè a' tö. Ye' mú tö ipakè íyi tso' ká jai a ese wa kè kleaule, e' ma ¿wes e' klö'wèmi a' tö?

<sup>13</sup> “Kè yi mine'ka ká jai a ese dene ká i' a. Erë ye' dör S'ditsö Alà, e' datse ká jai a, e' kueki íyi tso' ee e' jcher s'eraa ye' wa buaë. <sup>14</sup> Mik Israel aleripa bak ká wé kè yi serku', ese ké a, eta Moisés tö tabechka yué tkabè diökölíe,\* e' batséwaitö kalka mik ta itkéka. Es ñies, ye' dör S'ditsö Alà, e' kawöta tkèka kal mik <sup>15</sup> as wépa erblé ye' mik, esepa ulà dò sene michoë e' ska'.” Es Jesús tö iché Nicodemo a.

### *Skëköl éna sulitane dalër*

<sup>16</sup> Skëköl éna ká ulitane wakpa dalër taië. E' kueki ie' alà eköl è, e' me'ttsaitö ttèwa se' skéie, as yi erblé imik esepa kè duòwa aishkuö ta, e' skéie sene michoë dò iulà a. <sup>17</sup> Skëköl kè wa ilà patkéne ká i' a se' kichatöksa. E' skéie ipatké'itö se' tsatkök.

<sup>18</sup> “Yi erblé Skëköl Alà mik, ese kè kichatène. Erë yi kè erblène imik, ese kè erblène Skëköl Alà eköl è e' mik, e' kueki ikichaténetsatke. <sup>19</sup> Skëköl Alà dé'bitü ká i' a, e' dör wes bö'wö es se' er ñi'woie. Erë s'tso' ì sulu wamblök, esepa dör wes s'tso' stui a es, e' wa ie'pa wöbatsö bua'ie. Ie'pa kè kí ie' kiane. E' kueki wépa kè erblène ie' mik, esepa kichaténétke. <sup>20</sup> Wépa tö ì sulu wambleke, esepa éna suluë Skëköl Alà ar. Ie'pa kè kí Skëköl Alà ttè kiane ttsè as ì sulu wamblekerakitö, ese wà kè kkayërwa. E' dör wes s'tso' stui a kè shkakwa bö'wö olo ska' es. <sup>21</sup> Erë wépa serke wes Skëköl ttè mokí tö ichè es, esepa kí Skëköl Alà kiar buaë. Ie'pa dewa buaë Skëköl Alà dör wes bö'wö es e' ska' iwà kkachoie tö ì weke ie'pa tö, e' wekerakitö Skëköl batamik.”

### *Juan S'wöskuökwak tö iché tö Jesús dör ie' tsatq*

<sup>22</sup> E' ukuöki ta Jesús mía Judea ittökatapa ta. Ee ie' e' tséat ká taië ie'pa ta s'wöskuök. <sup>23</sup> Ñies Juan tso' s'wöskuök ká kiè Enón ee, ee di' tso' taië e' kueki. Ká e' até tsinet Salim. Pè' döke ie' ska' ta ie' tö ie'pa wöskueke. <sup>24</sup> (Íyi ikkë kaneone kam ie' wötërwa s'wöto wé a, e' yöki.)

<sup>25</sup> Erë ie' ttökatapa welepa ñi iütémi judiowak eköl ta, ie'pa e' batse'uke di' wa, e' tté kí. <sup>26</sup> E' kueki ie'pa míyal Juan ska' ta ichéitö ia:

—A S'wöbla'ukwak, wëm dé' be' ska' Jordán di' wishet yé' be' tö, e' wák tso' s'wöskuök ta sulitane mi'ke ie' ta. ¿E' kè tö be' tsiriwè?

<sup>27</sup> Juan tö iiuté:

—Au, e' kè tö ye' tsiriwè. Skëköl kè wa se' a ikéwö mène, e' ta kè se' a ì onuk yës. <sup>28</sup> Ye' tö iyé' tö 'ye' kè dör wé pairine'bitü idi' wa s'blúie e', erë ye' patkéne'bitü ie' yöki keweie, e' ttsé' a' wákpa tö buaë. <sup>29</sup> Mik ulabatske, eta alaköl dör iwëm icha. Eta iwëm sini' tso' ee, ese tö wëm ttò ttsé, eta e' tö ie' ttsé'wé buaë. Ye' dör wes wëm sini' es. E' kueki ye' ttsé'ne buaë i'ñe tö sulitane mi'ke Jesús ta. <sup>30</sup> Ie' kawöta kikéka taië ye' tsata, e' skéie ye' kè e' wöökwa diöshet.

### *Jesús datse ká jai a*

\* 3:14 Moisés tö tabechka yué tkabè diökölíe: Israel aleripa ukyéne Skëköl kí éna Moisés kí. E' nuñie Skëköl tö tkabè patké' ie'pa ttökulur. Erë Skëköl tö iyé' Moisés a tö tabechka yuó tkabè diökölíe ta ibatsówa kalka mik as wépa duökewatke esepa isaü ta ibuarne. Números 21.4-9 saú.

<sup>31</sup> Yi datse ká jai a, e' dör sulitane tsata. Wépa tso' ká i' ki, esepa dör ká i' wakpa, i' tso' ká i' ki, ese è cheke ie'pa tö. Erë yi datse ká jai a e' dör sulitane tsata. <sup>32</sup> Ì sùule ie' wá ena ì ttsëule ie' wá ká jai a ese pakekeitö, erë pë' kibiiëpa kè wá ie' ttè klöone. <sup>33-34</sup> Yi patkë'bitü Skëköl tö e' a Skëköl Wiköl mène taië shute, e' kueki ie' tö Skëköl ttò pakekene. E' kueki wépa tö ie' ttè klö'wé, e' wa esepa tso' ichök tö Skëköl ttè dör mokjë. <sup>35</sup> S'yé éna ilà dalër taië, e' kueki íyi ulitane méatitö iulà a. <sup>36</sup> Wé erblé Skëköl Alà mik, ese ser michoë. Erë wé kè tö Skëköl Alà ttò iutè, ese kè ulà dõpa sene michoë ska'. E' skéie Skëköl kësik me'rie iki.

## 4

*Jesús ttè alaköl eköl ta Samaria*

<sup>1-3</sup> Fariseowakpa tö ittsé tö Jesús klépa kí iërke ena s'wösurkerak taië Juan tö s'wöskué e' tsata. (Erë Jesús wák kè wá s'wösune, ittökatapa tö s'wöskué.) Mik ì cheke ie'pa tö e' ittsé Jesús tö, eta ie' e' yéttsa Judea míane Galilea.

<sup>4</sup> Erë ie' ittsé tö ie' kawöta shkótkö Samaria. <sup>5</sup> Ie' ena ittökatapa de ká ate Samaria kiè Sicar ee. Ee tsinet ká me' Jacob tö ilà José a, e' ate. <sup>6</sup> Di' bi' Jacob tö ká iaiaë e' tso' ee. Ee Jesús demi ta ishtrinewa. Ie' e' tkéser di' biule e' kkömik eta diwö dökette bata a. <sup>7-8</sup> Jesús ttökatapa míyal Sicar chkewö taük ñè. E' dalewa alaköl eköl dör Samaria wak, e' debütü di' tsuk ta Jesús tö iché ia:

—A tayë, be' we'ikèyö, di' kakmú ña yè.

<sup>9</sup> Ie' tkinewa ta iiütéitö:

—Be' dör judiowak, ye' dör Samaria wak. ¿Wes be' tö ye' a di' kieke? (Judiowak ena Samaria wakpa kè wö dör ñi mik, kè dötawá ñi ska', e' kueki alaköl tö iiüté es.)

<sup>10</sup> Jesús tö iiüté:

—Ì meke Skëköl tö se' a éme ena yi dör ye', e' jchenúpa be' wá, e'ma be' tö ye' a di' kieraë ta di' tö sene meke sia ese meraëyö be' a.

<sup>11</sup> Alaköl e' tö Jesús a iché:

—A kékëpa, be' kè wá tka' ku' di' i' yottsá, ñies di' i' tso' iskië. ¿Wé be' tö di' e' kuëmi mè ye' a? <sup>12</sup> ¿Ima be' tö ibikeitsè? Se' yé bak dör Jacob, e' tö di' i' me'at sa' a. Di' i' ya' ie' wák tö ena ila'r tö ñies iyyiwak. ¿Be' tö ibikeitsè tö be' dör ie' tsata?

<sup>13</sup> Jesús tö ie' iüté:

—Wépa tö di' i' yé esepa er sirdane. <sup>14</sup> Erë wépa tö di' meke ye' tö e' yé, esepa kè er sirpaiane yës. Di' e' dör ie'pa er a wes di' tskirke wötuò taië es, e' tö sene michoë meraë ie'pa a.

<sup>15</sup> Eta alaköl tö iché ia:

—A kékëpa, di' e' mú ye' a as kè ye' er siria, ñies as kè ye' döia di' watsuk ie.

<sup>16</sup> Jesús tö iché ia:

—Be' yú, be' wëm kiök ta be' kiéne.

<sup>17</sup> Eta alaköl tö iiüté:

—Ye' kè wëm ta'.

Jesús tö iché ia:

—Buaë be' iché tö kè be' wëm ta'. <sup>18</sup> Be' ulabatsule sketökicha ta i'ñe ta be' wá itso', e' kè ta' be' ulabatsule. Ì ché be' tö, e' dör mokj.

<sup>19</sup> Eta alaköl tö iché ie' a:

—A kékëpa, ye' tö isué tö wësua be' dör Skëköl tteköl. <sup>20</sup> Sa' dör Samaria wakpa, e' kékëpa bak ká iaiaë, e'pa tö Skëköl dalöie e' wakaneo' kabata i' ki. Erë a' judiowak tö icheke tö s'kawöta e' kanéuk Jerusalén è.

<sup>21</sup> Eta Jesús tö iüté:

—A tayë, ye' ttò klö'ú. Kawö döraë ta Skëköl dalöie e' wakaneo'ordaë ká wa'ñe, kè dör kabata i' è ki ö Jerusalén è a. <sup>22</sup> A' tö Skëköl dalöieke, erë e' kè jcher a' wá buaë. Erë

s'tsatkër tté e' datse sa' dör judiowak ditséwö wa, e' kueki sa' wá ie' jcher buaë. <sup>23</sup> S'yé dalöiökwakpa chökle, esepa tö ie' dalöieraë mokië iWiköl wa. E' kέwö döketke, moki idetke i' ta. <sup>24</sup> Skéköl dör wiköl, kè wërta'wá, e' kueki wépa tö ie' dalöieke esepa ké idalöiök mokië wes ie' ki kiane es iWiköl wa.

<sup>25</sup> Etá alaköl tö iché:

—Ye' wá ijcher tö wé pairine'bitü idi' wa s'blúie e' datse (e' kiè “Cristo” griegoie ena “Mesías” hebreoie). Mik ie' de etá ie' tö íyi ulitane wà pakeraë se' a.

<sup>26</sup> Jesús tö ie' a iché:

—E'ma e' dör ye' tso' ttök be' ta e'.

<sup>27</sup> E' wöshá ta ittökatapa debitune. E'pa tö Jesús sué kapakök alaköl ta, e' tö ie'pa tkiwéwá taië. Erë kè yi kèsik dè'ka ichakök ie' a tö “¿ì kiane be' ki?” ö “¿iök be' tso' kapakök alaköl se' ta?” <sup>28</sup> Etá alaköl tö iskaü méat tkër ee ta imíane wé iu tso'rak ee, ta ichéitö e' wakpa a:

<sup>29</sup> —Mishka wém dur eköl e' sauk. Ì sulu kos wamblé'yö, e' chéitö ye' a seraa. ¿Ie' alè dör wé pairine'bitü idi' wa s'blúie e'?

<sup>30</sup> Etá ká e' wakpa biteyal Jesús weblök. <sup>31</sup> E' dalewa Jesús ttökatapa tö iché ia:

—A S'wöbla'ukwak, be' chkó.

<sup>32</sup> Erë Jesús tö ie'pa a iché:

—Ye' wá chkè tso', e' kè sùule a' wá.

<sup>33</sup> Ie'pa ñi chakérak:

—¿Yile wá chkè debitü ie' a ñè?

<sup>34</sup> Erë Jesús tö ie'pa a iché:

—Ye' chkè dör, yi tö ye' patké', e' ttò iütök ena kanè me'itö ye' a, e' eukwa seraa. <sup>35</sup> A' wá ttè tso' e' tö iché: ‘Kawö kianeia si' tkèl etá iyiwö tso'tke shtë’; erë ye' tö a' a iché tö pè' datse taië e'pa webló. Ie'pa dör wes iyiwö alinetke tso'tke wé'iaë ténuk es. Ie'pa tso'tke erblök ye' mik. <sup>36</sup> Wépa tö ie'pa kimeke erblök ye' mik, esepa dör wes iyiwö shtëkwakpa es, e' ské döraë ie'pa ulà a. Ñies wépa shteke ie'pa tö, esepa ulà a sene michoë döraë. Es wépa dör wes íyi kuatkökwakpa es ena wépa dör wes iyiwö shtëkwakpa es, esepa ttsè'rdaë buaë ñita. <sup>37</sup> Pè' tö icheke: ‘wele tö ikuatkeke, skà tö iwöshteke.’ Ttè e' dör moki. <sup>38</sup> Ye' tö a' patké'mi iyiwö shtëk wé a' kè wá ikuatkéule ee. Eë o'ka kaneblé', erë iwà de buaë a' ulà a.

<sup>39</sup> Alaköl e' tö ipaké Samaria wakpa a: “Ì sulu kos wamblé'yö, e' chéitö ye' a seraa.” E' kueki Samaria wakpa taië serke ká e' a, e'pa erblé Jesús mik. <sup>40</sup> Etá mik Samaria wakpa de Jesús ska', etá ie'pa kköché ie' a ta ichérakitö ia:

—Be' e' tsúat sa' ta.

Ie' e' tséat ie'pa ta ká böt. <sup>41</sup> Ie' kapaköke ie'pa ta, e' kueki ie'pa kí dapane taië erblök ie' mik. <sup>42</sup> Etá ichérakitö alaköl a:

—Sa' erblé ie' mik e' kè dör be' tö sa' a iché, e' è kueki. I'ñe ta' sa' wákpa tö ittò ttsé, e' kueki sa' tö iklö'wé tö moki ie' dör sulitane tsatkökwak.

*Jesús tö blu' kanè kuëblu eköl e' alà bua'wéne  
(Mateo 8.5-13; Lucas 7.1-10)*

<sup>43</sup> Böiki es ta Jesús e' yéttsá Samaria e' michone Galilea. <sup>44</sup> Ie' tö iyé': Skéköl tteköl kè dalöiërta' iwák ká ki. <sup>45</sup> Mik ie' demi Galilea etá ká e' wakpa tö ikiéwá er bua' wa. Mik ie'pa dè'rö Jerusalén Judiowak Yépa Yérulune Egipto e' kέwö tkö'uk, etá ì kos buaë o' Jesús tö, e' su' ie'pa tö. E' kueki ie'pa tö ikiéwá er bua' wa.

<sup>46</sup> Jesús dene Caná até Galilea wé ie' tö di' yö' vinoie ee. Ká e' blú kanè kuëblu eköl tso' Cafarnaúm, e' alà kirinewá taië. <sup>47</sup> Mik ie' wá ijchenewá tö Jesús tso' Judea, e' dene Galilea, etá ie' mía Jesús ska' ta ikköché ia:

—Mishka Cafarnaúm ye' alà duökewatke e' bua'ukne.

<sup>48</sup> Ie' tö iüté:



—Wësua ì kè or yi a ese kè one ye' wà a' a iwà kkachöie tö yi dör ye', e' ta kè a' erblöpa ye' mik.

<sup>49</sup> Erë blu' kanè kuëblu tö iché ia:

—A këkëpa, mishka bet kam ye' alà duòwà e' dalewa.

<sup>50</sup> Jesús tö iché ia:

—Be' yúne be' u a. Be' alà serdaia.

Ie' tö Jesús ttò kl'wé mokië ta ie' míane iu a. <sup>51</sup> Kam idömine u a, eta ikanè mésopa tö ikué ñala kī ta ie'pa tö ie' a iché:

—Be' alà buanene.

<sup>52</sup> Ie' tö ie'pa a ichaké:

—¿Diwö wekké ye' alà buanémine?

Ie'pa tö iüté:

—Chkì diwö bata rrate ekké.

<sup>53</sup> Iyé éna iane tö diwö ekké Jesús tö iyë' ie' a tö be' alà serdaia. E' kuëkī ie' ena iyamipa kos e'pa erblé imik.

<sup>54</sup> Jesús tso' Galilea, i' ta, ì kè or yi a ese wéitö bötökicha ee.

## 5

### *Jesús tö wëm kraulewà bua'wéne*

<sup>1</sup> E' ukuöki ta judiowak tso' kawö tkö'uk Jerusalén, ee Jesús mía. <sup>2</sup> Jerusalén di'dape kuoie me'r ukkö kiè Obeja Ukkö e' o' mik tsinet. Di'dape e' kiè hebreoie Betsata, e' kkömik úla tso' skel. <sup>3-4</sup> Úla ekké a taië s'kirirke esepa tso'. E'pa welepa kè wöbla wawër, welepa kè shko, welepa kraulewà. Ie'pa tso' ipanuk tö as di' wötir.\* <sup>5</sup> Ie'pa shua wëm tär eköl kraulewà. Ie' kirinemi e' kī duas de dabom mañayök kī pāköl (38). <sup>6</sup> Jesús tö isuë tär ee. Ie' wà ijchenewà tö ká iaiaë ikirinemi. Eta ie' tö wëm kraulewà e' a ichaké:

—¿Be' kī ikiane tö be' buarne?

<sup>7</sup> Eta ikirirke tö ie' iüté:

—A këkëpa, kè yi ku' ye' kimuk e' iowà di' a mik iwötirke eta. Bitökicha ye' e' iakwa, eta yile e' iéwatke ye' yökī kewe.

<sup>8</sup> Jesús tö ie' a iché:

—Be' e' kókā, be' ka'la kókā ta be' shkómi.

<sup>9</sup> E' bet ta wëm buanene ikā'la kékaitö ta ishkémi ekkā. Erë e' diwö dör judiowak eno diwö. <sup>10</sup> E' kuëkī judiowak wökirpa tö iché wëm buanene e' a:

—I'ñe dör eno diwö, e' kuëkī be' kè a kawö ta' ka' se tsukmi i'ñe.

<sup>11</sup> Ie' tö ie'pa iüté:

—Yi tö ye' bua'wéne, e' tö ye' a iché: 'Be' ka' shtóka ta be' shkómi.'

<sup>12</sup> Eta ie'pa tö ie' a ichaké:

—¿Yi tö be' a iché tö 'be' ka' shtóka ta be' shkómi'?

<sup>13</sup> Jesús mía pë' tso' taië e' shua, kè wëneia, e' kuëkī wëm buanene e' kè wà ijcher yi tö ie' bua'wéne. <sup>14</sup> E' ukuöki ta Jesús tö ie' kué Skököl wé a ta ichéitö ia:

—Ye' ttò ttsó. Be' buanene, e' kuëkī ì sulu kè wamblaria dö' ì sulu kī döbitune be' kī.

<sup>15</sup> Eta wëm e' mía judiowak wökirpa ska' ta ichéitö, 'Jesús tö ye' bua'wéne.' <sup>16</sup> Jesús tö ì kè or yi a ese wé eno diwö a, e' kuëkī judiowak wökirpa tö ie' suémitke suluë. <sup>17</sup> Erë ie' tö iché ie'pa a:

—Ye' yé kanëblöke kekraë, es ñies ye' kanëblöke.

<sup>18</sup> Ttè e' tö judiowak wökirpa kī uluwéka, éna ie' ttakwa ème. Ie'pa kè ulune ie' kī, ie' tö eno diwö dalösewéwa, e' è kuëkī. Erë ie' icheke tö Skököl dör ie' yé, es ie' e' chò tö ñies ie' dör Skököl, e' tö ie'pa kī uluwé taië ie' kī.

\* <sup>5:3-4</sup> Ttè i' kè ku' Juan yëkuö këchke kibipa e' kī. E' tö iché i' es: Mikle ta mikle ta Skököl biyöchökwak eköl e' ökewa di' wötiuk. Di' wötirke eta yi miwà di' a kewe, e' buanene. Kè itkine tö duè wése tö ie' tteke. E' kuëkī s'kirirke tso' ipanuk tö as di' wötir.

*Skëköl tö ilà a diché taië mé*

<sup>19</sup> Jesús tö iché ie'pa a: “Mokí ye' tö a' a ichè tö ye' dör Skëköl Alà, e' kè a ì onuk ye' wák er wa. Ì kos weke ye' Yé tö, e' sué ye' tö, e' è weke ye' tö. Ì weke ye' Yé tö, e' kos weke ye' tö. <sup>20</sup> S'yé éna ye' dör ie' Alà e' dalër taië, e' kuëki ì kos wekeitö, e' kkachekeitö ye' a. Nies ilè kí kkacheraëitö taië ye' a, e' tö a' tkiwërawa taië. <sup>21</sup> S'yé tö s'duulewä e' shkëwëta'kane ta sene mekeneitö ie'pa a. E' sué ye' dör ie' Alà, e' tö sene meke wëpa a ye' ki ikiane mè esepa a. <sup>22</sup> Nies S'yé kè tö yi shuletä' ichoie tö yi kichatërdaë ö yi ser michoë, e' këwö méitö ye' a as ye' tö s'shulö. <sup>23</sup> Ie' tö iwé es as sulitane tö ye' dalöiö wës ie'pa tö ie' dalöieke es. Wëpa kè wä ye' dalöiëne, ñies esepa kè wä S'yé tö ye' patkë'bitu e' dalöiëne.

<sup>24</sup> “Mokí ye' tö a' a ichè tö wëpa tö ye' ttè iuteke ena ierblökerak yi tö ye' patkë'bitu, e' mik, esepa ulà a sene michoë detke. Ie'pa kè kichatërpattsä. Ie'pa kè ku'ia wës s'duulewä es, ie'pa ulà detke sene chökle ska'. <sup>25-26</sup> Ye' Yé dör sene mukwak ñies ye' dör sene mukwak, e' këwö me' ie' tö ye' a e' kuëki. Wëpa kè wä sene michoë ku', esepa dör wës s'duulewä es Skëköl a. Kawö döraë ta ie'pa tö ye' dör Skëköl Alà e' ttò ttseraë. Wëpa tö ye' ttò ttsé ta iklö'wëitö mokí, esepa ser michoë. Mokí ye' tö a' a ichè tö e' këwö datse, ñies e' de i' ta. <sup>27</sup> Nies ye' dör S'ditsö Alà, e' kuëki ie' tö kawö mé ye' a sulitane shuloie. <sup>28-29</sup> Kawö datse aishkuö ta, ta s'duulewä kos tö ye' ttò ttseraë ta ie' yörattsarak pö a. Wëpa tö ì buaë o', esepa shkerdakane sene michoë a. Erë wëpa tö ì sulu wamblë', esepa shkerdakane kichatënoie. Ttè e' kè tö a' tkiükwa.

*Wës se' wä ijcher tö Jesús tté dör mokíë*

<sup>30</sup> “Kè ye' a ì onuk ye' wák er wa. Ye' kè ki ì kiane wë ye' wák er wa. E' skéie ì kiane wë Skëköl tö ye' patkë'bitu, e' ki, ese wekeyö. E' kuëki ye' tö s'shuleke wës ye' Yé tö ye' a icheke es. E' kuëki ye' tö s'shuleke yësyësë. <sup>31</sup> Ye' wák e' chöpa tö ye' ttò dör mokí, e'ma e' kè wä ta'. <sup>32</sup> Erë itso' eköl e' tö ye' tté cheke, e' dör Skëköl. Ye' wä ijcher tö ima ie' tö ye' tté cheke, e' wä ta'. <sup>33</sup> A' tö ye' chakök patkë' Juan a ta ie' tö ye' tté yé', e' dör mokíë ñies. <sup>34</sup> Erë s'ditsö tö ye' tté cheke, e' kè ska' ye' tkine. Erë ì yé' Juan tö, e' chéyö a' a as a' tsatkër e' è kuëki. <sup>35</sup> A' a Juan dör wës bö'wö wöñarke olo burke es. Kuaë a' tö ie' tté klö'wé buaë ttsë'ne bua' wa, erë ekuölö è. <sup>36</sup> Erë ì skä tso', e' tö ye' tté cheke buaë, ì yé' Juan tö, e' tsata. E' dör, ì kè or yi a ese wekeyö taië wës ye' Yé tö ye' patkë' iük es. E' tö sulitane a ikkacheke tö mokí ye' Yé tö ye' patkë'bitu. <sup>37</sup> Nies ye' Yé tö ye' patkë'bitu, e' tö ye' tté cheke, erë a' kè wä ie' ttò ttsëule, ñies a' kè wä ie' suule. <sup>38</sup> Ie' tö ye' patkë'bitu, erë a' kè erblëne ye' mik. E' kuëki a' kè tö ye' tté klö'wëta' mokí a' er a. <sup>39</sup> A' tö ibikeitseke tö Skëköl yëkkuö tö ichèmi tö wës sene michoë dömi a' ulà a, e' kuëki a' tö isuëkewä bua'iewä. Erë yëkkuö e' tö ye' tté cheke. <sup>40</sup> Erë a' kè erblak ye' mik as sene michoë dö a' ulà a.

<sup>41</sup> “S'ditsö tö ye' kikëka, e' kè ska' ye' tkine. <sup>42</sup> Erë ye' wä a' suule buaë tö wës a' dör. Ye' wä ijcher tö kè a' éna Skëköl dalër. <sup>43</sup> Ye' dë'bitu ye' Yé ttò wa, erë kè a' wä ye' kinewä. Erë o'ka bitúpa iwák ttò wa, e'ma e' kiéwä a' tö buaë. <sup>44</sup> A' wakpa ñi kikökeka, e' wa a' wöbatsö bua'ie. Erë a' kè ki ikiane tö Skëköl eköl è, e' tö a' kiköka, e' ta wës a' erblömi ye' mik? <sup>45-46</sup> Moisés tö ye' tté kitat yëkkuö ki, e' kuëki mokí a' tö ie' tté klö'wé, e'ma ñies a' tö ye' tté klö'wëmi. E' kuëki kè a' ibikeitsök tö ye' tö a' kkatèmi ye' Yé a. Ì kit Moisés tö ká iaiaë e' mik a' erblöke, e' je' tö a' kkateraë. <sup>47</sup> Erë ì kitbak ie' tö, e' kè klöne a' wä, e'ma wës ì cheke ye' tö, e' klö'wëmi a' tö?”

## 6

*Pë' doka mil skeyök e'pa tié Jesús tö*

*(Mateo 14.13-21; Marcos 6.30-44; Lucas 9.10-17)*

<sup>1</sup> E' ukuöki ta Jesús mía batsöri kiè Galilea e' wishet. Batsöri e' kiè ñies Tiberias. <sup>2</sup> Ì kè or yi a ese weke ie' tö taië. Ie' tö s'kirirke esepa bua'wéne, e' sué pé' tö, e' kueki taië pé' mir ie' itöki. <sup>3</sup> Ie' mía ittökatapa ta kabata a ta ee ie' e' tkéser ie'pa ta. <sup>4</sup> Judiowak Yépa Yérolune Egipto e' kéwö dökewatke tsinet tkö'wë. <sup>5</sup> Mik ie' tö isué tö pé' de taië ie' itöki, eta ichéitö Felipe a:

—¿Wé se' mi'mi íyi tauk pé' kos ikképa a ñè?

<sup>6</sup> E' chéitö Felipe a isuöie tö ima Felipe tö ie' iutèmi. Erë ie' wák wa ijcher buaë tö ì wèmi ie' tö.

<sup>7</sup> Felipe tö iiuté:

—S'kaneblömi dò ká cien böyök, erë e' ské kè dör wë' íyi tuöie mè ie'pa a elke elke.

<sup>8</sup> Ittökata eköl kiè Andrés dör Simón Pedro ël, e' tö iché ia:

<sup>9</sup> —Íe duladula tso' eköl, e' wa pan yöule cebada wa tso' skël ena nima bötö; erë e' kè döpaka s'tso' taië e' ki.

<sup>10</sup> Jesús tö iiuté:

—Ichó ie'pa ulitane a tö a' e' tulúser iski.

(Ká e' a taië ta'tsi tso'.) Eta pé' ulitane e' tuléser. Ee wépa è doka mil skeyök (5.000).

<sup>11</sup> Jesús tö pan klö'wé ta wéstela chéitö Skéköl a. E' ukuöki ta iblatéitö méitö ittökatapa a as iwatiörakitö. Ñies iwéitö nima ta es. Eta ie'pa tö iñé kos ie'pa ki ikiane ekké. <sup>12</sup> Mik ie'pa chké de wë' eta Jesús tö iché ittökatapa a:

—Ibata ate e' shtó as kè iweirwa.

<sup>13</sup> Eta ittökatapa tö pan yöule cebada wa doka skël, e' bata ate, e' shté iène doka kkóla dabom eyök ki bök (12). <sup>14</sup> Mik pé' isué tö, ì kè or yi a ese wé Jesús tö, eta ie'pa iché:

—Moki wëm wì dör Skéköl tteköl cheke ká iaiaë tö idatse e'.

<sup>15</sup> Erë Jesús wa ijchenewa tö ie'pa wa ie' mi'ketsér diché wa tkèka blu'ie, e' kueki ie' míane kabata a e' tsukat ekörla.

*Jesús shké di' kí*

*(Mateo 14.22-27; Marcos 6.45-52)*

<sup>16</sup> Mik ká turketke, eta Jesús ttökatapa biteyalne dò batsöri a. <sup>17</sup> Jesús ichétke ie'pa a tö kè ye' panar. Ká ttsenewatke eta Jesús kam döne, e' kueki ie'pa e' iékarak kanò a ta imichorak batsöri wishet dò Cafarnaúm. <sup>18</sup> E' wösha ta siwa' bitsineka taië, e' tö di' uyeke taië. <sup>19</sup> Mik ishkérak dò kilómetro skël ö teröl e' ulatök, eta ie'pa isué tö Jesús shköratse ie'pa kker di' ki. E' tö ie'pa suawé. <sup>20</sup> Ie' iché ie'pa a:

—¿Kè a' suanuk! Ye' idir.

<sup>21</sup> Ie'pa ttsé'ne buaë ie' ikiökwa kanò a, e' wösha ta idemirak wé imi'kerak ee.

*Pë' tö Jesús yuleke*

<sup>22</sup> Bule es ta, pé' ate batsöri wishet, e'pa wa ijchenewa tö Jesús ttökatapa mineyal kanò àr ee etö è, e' ki, erë Jesús kè minea ittökatapa ta. <sup>23</sup> Eta kanò skà datse tseë Tiberias, e' irine tsinetkla wé ie'pa pan ña' mik Jesús wéstela yé' Skéköl a pan ki eta ee. <sup>24</sup> Mik pé' isué tö ie' ena ittökatapa kè ku'ia, eta ie'pa e' iéka kanò demi taië ese ki ta imíyal Cafarnaúm iyulök.

*Jesús dör chkè tö sene michoë meke e'*

<sup>25</sup> Mik pé' demi batsöri wishet, eta ie'pa tö Jesús kué ta ie' a ichakérakitö:

—A S'wöbla'ukwak, ¿mik be' dë'bitü íe'?

<sup>26</sup> Ie' iiuté:

—Moki ye' tö a' a ichè tö a' kè ku' ye' yulök, ì kè or yi a ese wéyö, e' wà ane a' éna e' kueki. A' tö chkè ña' taië, e' è kueki a' tso' ye' yulök. <sup>27</sup> Kè a' kaneblök chkè erta'wa ese

skéie. A' kanebλό chké kè erta'wa tö sene michoë meke a' a, ese skéie. Chké e' meraë ye' dör S'ditsö Alà e' tö, ye' Yé dör Skéköl e' tö ikéwö me' ye' a e' kuëki.

<sup>28</sup> Ie'pa tö ie' a ichaké:

—¿Ì wèmi sa' tö as ì kiane Skéköl kī ese ù sa' tö?

<sup>29</sup> Ie' tö iüté:

—Skéköl tö ye' patké' e' kī ikiane tö a' erblò ye' mik. E' è kiane ie' kī.

<sup>30</sup> Ie'pa tö iché ie' a:

—Ì kè or yi a ¿e' wése wèmi be' tö as sa' tö isaù ta sa' erblò be' mik? ¿Ì wèmi be' tö?

<sup>31</sup> Se' yépa bak ká iaiaë e'pa tö ì kiè maná e' ña' ká sir poë wé kè yi serku' ee. E' tso' kitule Skéköl yëkkuö kī wé ichè: 'Moisés tö ie'pa dè' chké datse ká jaì a e' wa.'

<sup>32</sup> Jesús tö ie'pa iüté:

—Mokī ye' tö a' a ichè tö Moisés kè wa chké datse ká jaì a e' mène a' yépa bak e'pa a. Ye' yé tö chké e' me' ie'pa a. Erè chké chökle datse ká jaì a e' watkeke ie' tö a' a. <sup>33</sup> Chké chökle meke Skéköl tö, e' dör yi datse eköl ká jaì a tö sene michoë mèmi sulitane a e'.

<sup>34</sup> Ie'pa tö Jesús a iché:

—A kèkèpa, chké e' mú sa' a kekraë.

<sup>35</sup> Ie' tö ie'pa a iché:

—Ye' dör chké tö sene michoë meke e'. Yi bituke ye' ska' ena ierblöke ye' mik, ese kè tepaia bli tö, ñies ese kè ersirpaia. <sup>36</sup> Erè e' dör wes ye' tö a' a ichétke tö eré a' wa ye' suule a' wöbla wa, erè a' kè erblöku' ye' mik. <sup>37</sup> Wépa me' ye' Yé tö ye' a, esepa kos bituraë ye' ska' ta wépa bituke ye' ska', esepa kè watepattsayö. <sup>38</sup> Ye' datse ká jaì a, e' kè dè'bitu ì kiane ye' wák kī e' uk. Ye' dè'bitu ì kiane yi tö ye' patké' e' kī e' uk. <sup>39</sup> Yi tö ye' patké', e' kī ikiane tö wépa kos me'itö ye' a, esepa kè wéne we'iköyö. E' kuëki ie'pa kè watepattsayö. E' skéie ie' kī ikiane tö ie'pa kos shké'wëkaneyö aishkuö ta mik ká i' enewa e' kèwö ska'. <sup>40</sup> Ye' Yé kī ikiane tö wépa tö ye' sué ena erblé ye' mik, esepa kos ser michoë kekraë. Ie'pa shké'werakaneyö aishkuö ta mik ká i' enewa e' kèwö ska'.

<sup>41</sup> Jesús tö ichétke: "Ye' dör chké datse ká jaì a e'." E' kuëki ie'pa ukyënemi ie' kī suluë.

<sup>42</sup> Ie'pa tö iché:

—¿I' kè dör Jesús dör José alà e'? Iyé ena imì suule se' wa buaë. ¿Wes ie' tö ichèmi tö ie' datse ká jaì a?

<sup>43</sup> Ie' tö ie'pa iüté:

—Kè a' ukyënukia ye' ta. <sup>44</sup> Kè yi bitupa ye' ska', ye' Yé tö ye' patké', e' kè wa idè' e'ma. Wépa bité ye' Yé wa, e'pa shké'werakaneyö mik ká i' erkewatke eta. <sup>45</sup> Skéköl yëkkuö kitule ittekölpa wa e' tö ichè: 'Skéköl tö ie'pa kos wöbla'weraë.' Es wépa tö ye' Yé ttò ttseta', ñies e' wöblauta' ie' wa, esepa kos bituraë ye' ska'.

<sup>46</sup> "Kè yi wa Skéköl suule. Erè ye' dè'bitu ie' ska', e' kuëki ye' è wa ie' suule. <sup>47</sup> Mokī ye' tö ichè a' a tö wépa erblé ye' mik, esepa ser michoë kekraë. <sup>48</sup> Ye' dör chké tö sene michoë meke e'. <sup>49</sup> A' yépa bak ká iaiaë, e'pa tö chké kiè maná e' ña' ká wé kè yi serku' ese ska', erè ie'pa durulune. <sup>50</sup> Erè chké datse ká jaì a, e' cheke ye' tö a' a. Wépa tö chké e' ñé, e'pa kè duòpawa. <sup>51</sup> Erè chké tö sene michoë meke datse ká jaì a, e' dör ye'. Wépa tö chké e' ñé, e'pa ser michoë. Chké meraëyö ie'pa a, e' dör ye' wák chká, e' merattsayö ttèwa as ká ulitane wakpa isiepa erblé ye' mik, esepa ser michoë."

<sup>52</sup> Eta ie'pa ñi iütémi:

—¿Wes ie' tö ichká mèmi se' a katè?

<sup>53</sup> Ie' tö ie'pa iüté:

—Mokī ye' tö a' a ichè tö a' kè tö ye' dör S'ditsö Alà, e' chká katè, e' pé yè, e' ta sene michoë kè dòpa a' ulà a. <sup>54-55</sup> Ye' chká e' dör chké chökle, ye' pé, e' dör di'yè chökle. E' kuëki wépa tö ye' chká katé, ye' pé yé, esepa ulà a sene michoë detke. Aishkuö ta mik ká i' erkewatke, eta ie'pa shké'werakaneyö. <sup>56</sup> Wépa tö ye' chká katé, ye' pé yé, esepa bàtse

buaë ye' mik. Ñies ye' båtse buaë ie'pa mik. <sup>57</sup> Ye' yé tö ye' patkë' e' serke iwák mik. Ie' mik ye' serke. Es ñies wépa tö ye' chkà katé esepa serke ye' mik. <sup>58</sup> Chkè dë'bitu ká jai a, e' chök ye' tso' a' a. Chkè e' kè dör wes chkè kiè maná ña' a' yépa bak ká iaiäë e'pa tö e' es. Ie'pa tö ñña' erë ie'pa durulune. Erë wépa tö chkè cheke ye' tö a' a e' ñé, esepa ser michoë.

<sup>59</sup> Ttè e' wa Jesús tö ie'pa wöbla'wé judiowak ñi dapa'wo wé tso' Cafarnaúm e' a.

*Jesús ttè batamik se' ser michoë*

<sup>60</sup> Pë' shköke taië Jesús ta, e'pa tö ttè ñe' ttsé ta ichéraitö:

—Ttè e' dör darërë. ¿Yi tö iklö'wèmi?

<sup>61</sup> Ima ie'pa tso' ichök e' suéwaitö. E' kueki ie' tö ie'pa a ichaké:

—¿Ttè e' kueki a' éna ye' wataktsa? <sup>62</sup> Ye' dör S'ditsö Alà, e' míkane ká jai a wé ye' datse ee, e' mú sué a' tö, e' ma e' je' ta ¿a' erblömi ye' mik? <sup>63</sup> Wiköl Batse'r tö sene michoë meke sia. Ì weke s'ditsö tö, ese kè dör iie bua'. Ttè wa a' pattekeyö e' wà datse Wiköl Batse'r wa. Ttè e' klö'wé a' tö, e' ta a' ser michoë. <sup>64</sup> Erë a' welepa kè erblöku' ye' mik.

Wépa kè erblöku' ie' mik ena yi tö ie' mekettsa e' jchertke ie' wà kewe, e' kueki ie' tö ichè es. <sup>65</sup> Ie' tö ikí ché:

—E' kueki ye' tö a' a ichè tö kè yi bitúpa ye' ska', ye' Yé kè wà imène e' ta.

<sup>66</sup> E' ukuöki ta taië pë' shköke Jesús ta, e' kibiiepa tö iméat, kè shkòia ie' ta. <sup>67</sup> Eta Jesús tö ittökatapa dabom eyök kí böl (12), e'pa a ichaké:

—¿A' shkakmi ñies ye' yöki?

<sup>68</sup> Eta Simón Pedro tö iüté:

—A Skékëpa, ¿yi ta sa' mi'mi? Be' ttè è wa sa' ser michoë. <sup>69</sup> Sa' erblétke be' mik. Sa' wa ijcher mokië tö be' dör yi dör batse'r patkë'bitu Skéköl tö e'.

<sup>70</sup> Jesús tö ie'pa iüté:

—A' dabom eyök kí böl (12), e' shukit ye' tö, erë a' eköl dör bé icha.

<sup>71</sup> Mik Jesús tö e' ché eta Judas chéitö. E' dör Simón Iscariote e' alà. Ie' dör Jesús ttökatapa dabom eyök kí böl (12) e' eköl erë ie' tö Jesús wömekettsa.

7

*Jesús ëlpa kè erblène ie' mik*

<sup>1</sup> E' ukuöki ta Jesús shköke Galilea. Judiowak wökirpa éna ie' ttakwa, e' kueki ie' kè shkak Judea. <sup>2</sup> Erë judiowak tö kawö tkö'weke kiekerakitö Úla Kéwö, e' kéwö tkö'wekerakitö Judea, e' dewatke tsinet. <sup>3</sup> E' kueki Jesús ëlpa tö ie' a iché:

—Kè be' e' tsukat íe. Be' yú Judea as ì kè or yi a ese weke be' tö, e' wà saü be' ttökatapa serke ee e'pa tö. <sup>4</sup> Yi ki ikiane tö s'malepa tö ikikëka taië, ese tö íyi kos wé sulitane wörki. Moki ì kè or yi a ese ormi be' a, e' ta iú sulitane wörki.

<sup>5</sup> Jesús ëlpa kè erblène ie' mik, e' kueki ie'pa tö iwayué es. <sup>6</sup> Ie' tö iché ie'pa a:

—Kam ye' kéwö döka, erë a' kawö kos ese dör buaë. <sup>7</sup> Wépa kè tö Skéköl dalöie esepa kè a' sunuk suluë. Erë ye' tso' ie'pa a ichök tö ì wambleke ie'pa tö, ese dör suluë. E' kueki ie'pa éna ye' ar suluë. <sup>8</sup> A' yúshka Úla kéwö tkö'wekerakitö e' a. Ye' kéwö kam döka, e' kueki kam ye' mi'.

<sup>9</sup> E' chéitö ta ie' e' tséat Galilea.

*Jesús mía Jerusalén Úla kéwö tkö'uk*

<sup>10</sup> Jesús ëlpa míyal, e' ukuöki ta ñies ie' mía. Erë ie' mía bèrë, kè e' kkayëule. <sup>11</sup> Kéwö tkö'weke, e' shua judiowak wökirpa tso' ie' yulök. Ie'pa tö ichaké:

—¿Wé ie' tso'?

<sup>12</sup> Pë' dapane taië ee, e'pa tö Jesús cheke ñi a bër ñi kukuö a. Welepa tso' ichök: “Jesús dör buaë.” Erë welepa tso' ichök: “Ie' kè dör buaë. Ie' tö se' kiteke.”

<sup>13</sup> Erë ie'pa suane judiowak wökirpa yöki, e' kueki ie'pa kè ttöku' darërë.

<sup>14</sup> Mik ikéwö tkö'wékerakitö, e' döketke shaböts, etä Jesús dewä Skéköl wé a ta ie' tö s'wöbla'wémi. <sup>15</sup> Etä judiowak wökirpa tkirulune iweblök ikittsök ta ichérakitö:

—Ie' kè yöule ¿wes e' wa ttè jcher taië?

<sup>16</sup> Jesús tö iiuté:

—Ttè wa a' wöbla'weke ye' tö, e' kè dör ye' wák ttè, e' dör Skéköl tö ye' patkè' e' ttè. <sup>17</sup> Yi e' chétke ì kiane Skéköl kī e' wà uk, ese wa ijcherdaë tö ttè wa s'wöbla'wekeyö, e' dör Skéköl ttè. Ie' kè tö ibikeitsepa tö e' dör ye' wák ttè è. <sup>18</sup> Yi ttöke iwák er wa, ese kī ikiane tö pè' tö ie' kīkèka. Erè wé kī ikiane tö yi tö ipatkè' e' kīkarka, ese ttò mokī kè kachöta'.

<sup>19</sup> “Sulitane wa ijcher tö Moisés tö Skéköl ttè dalöiëno e' méat se' a. Erè a' ulitane kè tö iwà dalöië. ¿Ì kuekī a' kī ye' kiane ttèwa?”

<sup>20</sup> Etä pè' tso' taië eë, e'pa tö iiuté:

—Be' a aknama tso'. ¿Yi éna be' ttakwa?

<sup>21</sup> Ie' tö ie'pa a iché:

—Ì kè or yi a ese wé ye' tö etökicha eno diwö a, e' tö a' ulitane tkiwéwa. <sup>22</sup> Moisés tö ttè dalöiëno me'at a' a' a' ala'r wëpa kos wakyuöö itóttola kkuölitla tée tsir e' wa ká de kī pàköl (8) etä. (Ñermata se' wa ijcher tö ttè e' kè mène Moisés wa, imène a' yépa bak ká iaiaë Moisés yöki e'pa a.) Nies Skéköl yëkkuö tö ichè tö kè a' kawö ta' kanëblök eno diwö a. Erè mik ká de ala'rla kī pàköl, e' ane eno diwö a, etä a' tö a' ala'rla wakyueta' eno diwö a. <sup>23</sup> A' a' kawö ta' alala wakyuök eno diwö a Moisés ttè dalöioie, e' ta ¿wes a' ulurmi ye' kī, ye' tö wëm eköl bua'wéne wa'ñe eno diwö a e' kī? <sup>24</sup> Kè s'kkatar is iwër e' è wa. E' skéie itò yuló yësyësë.

#### *Jesús dör wé pairine'bitu idi' wa s'blúie e'*

<sup>25</sup> Jerusalén wakpa wëlepa tö ichaké:

—¿Wëm wí kè yuleku' s'wökirpa tö ttèwa? <sup>26</sup> Isau, wí idur ttök sulitane wörki etä ie'pa kè tö ì chè ie' a yës. ¿A' iché, s'wökirpa tö iklö'wé tö mokī ie' dör wé pairine'bitu idi' wa s'blúie e'? <sup>27</sup> Erè se' wa ijcher buaë tö wé ie' datse. E' skéie mik wé pairine'bitu idi' wa s'blúie e' datse, etä kè yi wa ijcherpa tö wé idatse.

<sup>28</sup> Jesús tso' s'wöbla'uk Skéköl wé a. Mik e' tö ttè e' ttsé, etä ichéitö aneule:

—A' ibikeitseke tö a' wa ye' suule buaë. A' ibikeitseke tö a' wa ijcher buaë tö wé ye' datse. Erè ye' kè dè'bitu ye' wák er wa. Yi tö ye' patkè'bitu e' mik s'erblömi, ie' kè suule a' wa. <sup>29</sup> Erè ye' datse ie' ska', e' kuekī ye' wa ie' suule buaë. Ie' tö ye' patkè'bitu.

<sup>30</sup> Ie'pa tö ima'wé klö'wèwa, erè kam ie' kèwö döka, e' kuekī kè yi ulà dè'wa iska'. <sup>31</sup> Erè taië pè' erblé ie' mik e'pa tö iché:

—Kè yi skà a' ì kè or yi ese onuk tkòka Jesús tö iwé e' tsata. Ie' wake' dör wé pairine'bitu idi' wa s'blúie e'.

#### *Fariseowakpa éna Jesús klö'wakwa*

<sup>32</sup> Jesús cheke pè' tö bèrè ñi kukuö a, mik e' ttsé fariseowakpa tö, etä ie'pa ena sacerdotëpa wökirpa, e'pa tö Skéköl wé shkëkīpa patké iklö'ukwa. <sup>33</sup> Jesús tö iché:

—Ye' tso'ia a' ta bërbër ème ta ye' míane yi tö ye' patkè'bitu e' ska'. <sup>34</sup> A' tö ye' yuleraë, erè a' kè tö ye' kuepa. A' kè döpakā wé ye' mīrö eë, e' kuekī a' kè tö ye' kuepaia.

<sup>35</sup> Ta judiowak wökirpa ñi chaké:

—¿Wé ie' wí mi'keā, e' kè kuepa se' tö? ¿A' ichè imi'keā wé judiowak mineyal senuk ká kuā'kī wakpa shūā ese ska' pè' kè dör judiowak, esepa wöbla'uk? <sup>36</sup> Ie' tö iché: 'A' tö ye' yuleraë, erè a' kè ye' kuepa. A' kè döpakā wé ye' mīrö eë, e' kuekī a' kè tö ye' kuepaia.' ¿Ima e' wà kiane chè?

*Se' er a ituöraë taië wes di' klòka tuò es*



<sup>37</sup> Ikéwö tkö'weke judiowak tö, e' kéwö bata e' dör ibua'ie, e' kéwö Jesús e' kéka ta ichéitö aneule:

—Wépa ersine, esepa shkó ye' ska' di'yök. <sup>38</sup> Wépa erblé ye' mik, esepa ta itköraë wes Skéköl yékkuö tö ichè es, e' tö ichè: “Ie'pa er a ituöraë taië wes di' klòka tuò es.”

<sup>39</sup> Mik Jesús tö di' klòka ché, etä ie' tso' Skéköl Wiköl merdaë wépa erblé ie' mik esepa a, e' chök. Erë e' kéwö ska' ta kam Jesús mi'kane iyé ska' olo ta' taië, e' kueki kam Skéköl Wiköl mer.

*Judiowak ttè chilineka Jesús batamik*

<sup>40</sup> Wépa tö ttè e' ttsé, e'pa welepa tö iché:

—Moki wëm wí dör Skéköl tteköl datse e'.

<sup>41</sup> Welepa skà tö icheke:

—Ie' dör wé pairine'bitu idi' wa s'blúie e'.

Erë welepa skà tö icheke:

—Au, kè idör e'. Wé pairine'bitu idi' wa s'blúie e' kè bitupa Galilea. <sup>42</sup> Skéköl yékkuö tö ichè tö ibituraë se' blú bak David e' ditséwö wa, ñies ibituraë Belén wé David bak senuk ee.

<sup>43</sup> Es ie'pa ttè chilineka Jesús batamik. <sup>44</sup> Ie'pa welepa éna iklö'wakwa, erë kè yi ulà dè'wa ie' ska'.

*Judiowak wökirpa kè erbléne Jesús mik*

<sup>45</sup> Skéköl wé shkékpa dè'bitu Jesús klö'ukwa, e'pa dene fariseowakpa ena sacerdotepa wökirpa ska', etä e'pa tö ichakérak ishkékpa a:

—¿I kueki a' kè wa Jesús dè'?

<sup>46</sup> Ishkékpa tö iüté:

—¿Sa' kè wa yi ttséule ttök wes wëm e' ttò es!

<sup>47</sup> Fariseowakpa tö iché ie'pa a:

—¿Ñies a' e' mettsa kitö'wè? <sup>48</sup> ¿Ima a' ibikeitsè tö s'wökirpa ö fariseowakpa e'pa wele erblé ie' mik? <sup>49</sup> Pè' esepa kè wa Moisés ttè dalöiëno suule, esepa e' mukettsa kitö'wè. Erë ie'pa kichatënettsatke.

<sup>50</sup> Erë fariseowak eköl kiè Nicodemo dè'rö Jesús sauk nañewe, e' tö iché ie'pa a:

<sup>51</sup> —Ttè mène se' a dalöiëno, e' tö ichè kè se' kawö ta' yi wömuksa we'iké kam itò yulöttsasö buaë e' yökí. Es se' wa ijcher tö ì sulu wambléitö ö kè iwá iwambléne.

<sup>52</sup> Ie'pa tö ie' iüté:

—¿Wësua ñies be' dör Galilea wak! Skéköl yékkuö saú bua'ie, etä be' isueraë tö Skéköl tteköl kè karpaka yës Galilea.

*Alaköl eköl tö isenewabak dalösewéwa*

<sup>53</sup> [Etä ie'pa ulitane míane iu a.

## 8

<sup>1</sup> Erë Jesús mía Olivo kébata a. <sup>2</sup> Bule es bla'mi ie' dene Skéköl wé a ta pé' ulitane debitu ie' ska'. Ie' e' tkéser ie'pa wöbla'uk.

<sup>3</sup> S'wöbla'uk ttè dalöiëno wa wakpa ena fariseowakpa de ie' ska'. Ie'pa wa alaköl eköl kunewa isenewabak dalöseukwa e' debitu. Ie'pa tö iké e' duöksér sulitane wörki. <sup>4</sup> Ie'pa tö iché Jesús a:

—A s'wöbla'ukwak, alaköl i' kunewa isenewabak dalöseukwa. <sup>5</sup> Ttè dalöiëno me'at Moisés tö se' a, e' tö se' ké alaköl i'se ttökwa ak wa. ¿Ima e' ché be' tö?

<sup>6</sup> Ie'pa tö Jesús a ichaké ima'woie tö ima ie' tö iütèmi ikkatoie. Erë Jesús e' wöéwa iski ta iulatska wa ishtémiitö iski wes iyi shtèsö yékkuö ki es. <sup>7</sup> Ie'pa tö iki chaké ia. Ie' wöduéka ta ichéitö:

—A' wé kè wa ì sulu wambléule yës, ese tö ák tsá uyó ie' ki.

<sup>8</sup> Etā Jesús e' wöéwane iski ta ishtémineitö iski. <sup>9</sup> Mik ie'pa tö ttè e' ttsé, etā ì sulu wambleke ie'pa tö, ese ane ie'pa éna ta imíyal eköl eköl. Ikékëpa míyal kewe, e' itöki iduladulapa. Bata ekkë ta alaköl è atë dur Jesús wörki. <sup>10</sup> Etā Jesús e' wöduékane ta ie' a ichakéitö:

—A tayë, ¿wé ie'pa? ¿Yi atë be' kkatök?

<sup>11</sup> Ie' tö iiüté:

—A kékëpa, kè yi atë.

Jesús tö iché iā:

—Ye' ñies kè tö be' kkatè. Be' yúshka. Kè ì sulu skà wamblaria.]\*

*Jesús dör wes ká olo es sulitane a*

<sup>12</sup> Etā Jesús tö iskà chéne pè' a:

—Ye' dör ká ulitane wakpa a wes ká olo es. Wépa e' yué ye' ttökataie, esepa ser michoë ká olo e' a. Ie'pa kè serpaia wes s'shkò stui a es.

<sup>13</sup> Fariseowakpa tö iché ie' a:

—Be' wák tso' e' tté chök, e' kuëki be' ttò kè wà ta'.

<sup>14</sup> Ie' tö ie'pa iüté:

—E' yène tö ye' e' tté chöke, erë ima ye' e' chöke e' wà ta'. Ye' wā ijcher wé ye' datse, ñies wé ye' michoë, erë e' kè jcher a' wā. E' kuëki ima ye' e' chò e' wà ta'. <sup>15</sup> A' tö ye' bikeitseke wes a' wakpa kabikeitsò es, e' kuëki a' tö ye' kcateke tö ye' dör kachökwak. Erë ye' kè tö yi bikeitsetā' es. Ye' kè dē'bitu yi shulök, ye' dē'bitu s'tsatkök. <sup>16</sup> Erë mik ye' tö s'shulè, etā ye' kè tö s'shuleta' ekörla, e' kuëki ye' tö s'shuleraë yësyësë. Ye' yé tö ye' patkè, e' tso' ye' ta' s'shulök. <sup>17</sup> Ttè dalöiëno tö ichè tö s'ditsö böi tso' ittekölie, e'pa tö iché ñikkëë, e' ta' ie'pa ttè wà ta'. <sup>18</sup> Es e', ye' dör ye' wák tteköl. Ñies ye' Yé tö ye' patkè, e' dör ye' tteköl. E' kuëki ye' ttekölpa dör böi.

<sup>19</sup> Ie'pa tö ie' a ichaké:

—¿Wé be' yé tso'?

Ie' iiüté:

—A' kè wā ye' suule, ñies a' kè wā ye' Yé suule. A' mú wā ye' suule, e'ma ñies a' wā ye' Yé suule.

<sup>20</sup> Ttè ikké ché Jesús tö itso' s'wöbla'uk e' dalewa. Ie' tkër s'wöbla'uk Skököl wé a wé kalkuö tso' inuköl ioie mè Skököl a ee. Erë kam ie' kèwö dökā, e' kuëki kè yi wā iklönewa.

*A' kè döpa wé ye' mörö ee*

<sup>21</sup> Jesús tö iskà ché ie'pa a:

—Ye' mia ta' a' tö ye' yuleraë, erë a' duöralur ì sulu qos wambleke a' tö e' a. E' kuëki kè a' döpakā wé ye' mörö ee.

<sup>22</sup> Etā judiowak wökirpa tö iché:

—Ie' iché tö sa' kè döpakā wé ie' mörö ee. Ie' e' ttökewā alè, e' kuëki ie' iché es.

<sup>23</sup> Ie' tö ie'pa a iché:

—A' dör ká i' wakpa è, erë ye' dör ká jai wak. A' dör ká íe wakpa, erë ye' kè dör ká íe wak. <sup>24</sup> E' kuëki ye' tö a' a ichè tö 'a' duöralur ì sulu qos wambleke a' tö e' a. A' kè wā iklöne tö ye' dör yi yé'bitu ye' tö a' a e', e' ta' a' duöralur ì sulu qos wambleke a' tö ese a.

<sup>25</sup> Etā ie'pa tö ie' a ichaké:

—¿Yi be' dör?

Ie' tö iiüté:

—Ye' dör yi yé'bitu ye' tö a' a kuaë e'. <sup>26</sup> Taië ye' wā ttè tso' a' kkatoie. Erë ì qos cheke ye' tö sulitane a e' ttséule ye' wā yi tö ye' patkè e' kkò a. Ie' ttè dör mokië.

<sup>27</sup> Erë ie'pa kè éna iwà ane tö ie' tso' iyé dör Skököl, e' chök. <sup>28</sup> E' kuëki ie' tö iché ie'pa a:

\* 8:11 Isalema ttè i' kè ku' yëkuö këchke kit Juan tö. E' ukuöki ta' yile skà tö ime'ka iki.

—S'ditsö Alà, e' dör ye'. Mik a' tö ye' batséka krus mik, etä a' tö isuëraë tö yi dör ye'. Ye' kè tö ì wèpa ye' wák er wa. Ì cheke ye' Yé tö ye' a tö ichó, e' è chekeyö. <sup>29</sup> Yi tö ye' patkè' e' tso' ye' ta. Ì wër buaë ie' wa, e' è wekeyö, e' kuëki kè ie' wä ye' meuleat ekörla.

<sup>30</sup> Mik e' ché Jesús tö, etä taië pè' erblé ie' mik.

*Se' yënettsa ì sulu ulà a Jesús batamik*

<sup>31</sup> Jesús tö iché judiowak erblé ie' mik, e'pa a:

—A' serke këkraë ye' ttè dikia, e' je' ta a' dör ye' ttökatapa chökle. <sup>32</sup> A' wä Skëköl ttè mokì e' jcherdaë buaë ta e' tö a' yerattsä, ì ulà a a' klöulewä e' yöki.

<sup>33</sup> Ie'pa tö ie' iüté:

—Sa' dör Abraham aleripa. Sa' kè klöulewä ì ulà a. ¿Wes be' tö ichèmi tö sa' yërdattsä?

<sup>34</sup> Ie' tö ie'pa iüté:

—Mokì ye' tö a' a' ichè tö wépa tö ì sulu wambleke, esepa tso' klöulewä sene sulu ulà a.

<sup>35</sup> Eré s'klöulewä kanè mésoie ese serke iwökir ska', eré kè idör iwökir yami ekka. Iwökir alà e' dör iyami ekka këkraë. <sup>36</sup> Ye' dör Skëköl Alà. Ye' tö a' yéttä sene sulu ulà a, e' ta mokì a' yënettsä. <sup>37</sup> Ye' wä ijcher tö a' dör Abraham aleripa, eré a' kè tö ye' ttè klö'wè, e' kuëki a' ki ye' kiane ttèwä. <sup>38</sup> Ì kkacheke ye' Yé tö ye' a, ese cheke ye' tö a' a. Es ñies a' tö iwambleke wes a' yé tö a' a' ikkacheke es.

<sup>39</sup> Ie'pa tö iüté:

—Sa' yé bak ká iaiä e' dör Abraham.

Eré ie' tö ie'pa a' iché:

—A' mú dör Abraham aleripa, e'ma a' sermi wes ie' sene' es. <sup>40</sup> Ye' tö ttè mokì ché a' a' wes Skëköl tö ye' a' ikkache es. E' è wéyö, eré a' ki ye' kiane ttèwä. Ese kè wamblène Abraham wä. <sup>41</sup> A' e' wamblò wes a' yé e' wamblò es.

Ie'pa tö ie' a' iché:

—¿Sa' kè dör ñalä alé! ¿Sa' yé dör eköl è e' dör Skëköl!

<sup>42</sup> Ie' tö ie'pa a' iché:

—Ye' datse Skëköl ska', e' tso' ie. Ye' kè dè' ye' wák er wa. Ie' tö ye' patkè'. E' kuëki mokì ie' chópa a' yé, e'ma ye' dalërmi a' éna. <sup>43</sup> ¿Ì kuëki a' kè éna ye' ttè wä ane? A' kè ki ye' ttè kiane klö'wè, e' kuëki a' kè éna ye' ttè wä ane. <sup>44</sup> A' yé dör bé. A' dör ie' ala'r. A' dör ie' icha ta a' e' wamblò wes ie' ki ikiane es. Këkraë ie' dör s'ttökwak. Ie' ttò kos e' dör kachè wöchka, e' kuëki Skëköl ttò mokì, e' kè wa ie' wöbatsö. Ie' dör kachökwak, ie' wák dër es, e' kuëki ie' kachò taië. Ie' dör kachè këköl. <sup>45</sup> Eré ye' tö ttè mokì ché a' a, e' kuëki a' kè tö ye' ttè klö'wè. <sup>46</sup> ¿A' wé tö ikkachèmi tö ye' tö ì sulu wamblé? Ye' tö ttè mokì cheke a' a, e' ta ¿ì kuëki a' kè tö ye' ttè klö'wè? <sup>47</sup> Yi dör Skëköl icha, ese tö ie' ttè ttsè er bua' wa. Eré a' kè dör ie' icha, e' kuëki a' kè éna ie' ttè ttsak.

*Abraham kam kur e' yöki Jesús tso'tke*

<sup>48</sup> Etä judiowak kè erblène Jesús mik, e'pa tö iché ie' a:

—Mik sa' iché tö be' dör Samaria wak suluë, e' a' aknama tso', etä sa' tö iché yësyësë.

<sup>49</sup> Jesús tö ie'pa iüté:

—Au, kè ye' a' aknama ku'. Ye' tö ye' Yé dalöieke, eré a' kè tö ye' dalöiè. <sup>50</sup> Ye' kè ku' ì yulök ye' wák a' e' kikoka. Eré itso' eköl, e' ki ikiane tö a' tö ye' kikëka. E' dör s'shulökwak.

<sup>51</sup> Mokì ye' tö a' a' ichè tö yi tö ye' ttè iuteke mokìë, ese kè duòpawä.

<sup>52</sup> Ie'pa tö iché ie' a:

—¿Ñe je' sa' tö iklö'wé mokì tö be' a' aknama tso'. Abraham ena Skëköl ttekölpa kos durulune. ¿Wes be' tö iché tö yi tö be' ttè iuteke, esepa kè duòpawä? <sup>53</sup> ¿Ima be' erbikò tö be' dör se' yé Abraham e' tsatä? Ie' blènewä ñies Skëköl ttekölpa kos blèrulune. ¿Ima be' erbikò tö be' dör yi?

<sup>54</sup> Ie' tö ie'pa iüté:

—Ye' wák e' kíkokeka, e'ma e' kè dör ìe bua'. Erë ye' Yé tö ye' kikekeka, e' wák cheke a' tö tö e' dör a' Këköl. <sup>55</sup> Erë a' kè wä ie' sùule. Ye' je' wä isùule. Ye' ichópa tö ye' kè wä ie' sùule, e'ma ye' kachò suluë wës a' es. Mokí ye' wä isùule. Ie' ttè iutekeyö. <sup>56</sup> Abraham dör a' yé bak ká iaiaë e' tö ye' datse, e' kèwö sueraë, e' kueki ie' ttsë'ne buaë. Ie' tö isu' ta e' tö ie' ttsëo' buaë.

<sup>57</sup> Ie'pa tö ie' a' iché:

—Kam be' ki duas dò dabom skeyök (50), eta ¿wës be' ichèmi tö be' wä Abraham sùule?

<sup>58</sup> Jesús tö ie'pa iuté:

—Mokí ye' tö a' a' ichè tö ye' tso'tke Abraham bak ká iaiaë e' yöki kewe.

<sup>59</sup> Eta ie'pa tö ák kl'wé taië Jesús toie. Erë Jesús e' bléwä ie'pa shüa e' yéttsa Skëköl wé a'.

## 9

*Jesús tö s'küne eköl wöbla kè wawër e' bua'wéne*

<sup>1</sup> Jesús shkórami e' tö wëm küne' wöbla kè wawër ese sué eköl. <sup>2</sup> Eta ittökatapa tö ie' a' ichaké:

—A S'wöbla'ukwak, ¿yi tö ì sulu wamblë', e' nuí kueki wëm i' küne' wöbla kè wawër, ie' wák ö iyé ö imì?

<sup>3</sup> Ie' tö ie'pa iuté:

—Kè idör tö ie' ö iyé ö imì tö ì sulu wamblë' e' nuí kueki. Ie' küne' es as Skëköl diché taië e' wawër iki. <sup>4</sup> Yi tö ye' patkë', e' kanè kawöta wè se' tö kawö ta'ia se' a' e' dalewa. E' dör wës se' kaneblò ñiwe es. Se' blënewa eta kè se' a' ì kaneoneia. E' dör wës katuine s'ki es, kè se' a' kaneblënukia. <sup>5</sup> Ye' tso'ia ká i' ki, e' dalewa ye' dör wës ká olo es sultane er ñi'woie.

<sup>6</sup> Ie' tö iché one ta ie' wiritué íyök ki, e' wa ie' tö dóchka yué. Ta wëm kè wöbla wawër e' wöbla ki dóchka e' tiéitö. <sup>7</sup> Ta ichéitö ie' a':

—Be' yú wöskuök di'dape kiè Siloé eë. (Siloé e' wà kiane chè: “patkëule”).

Wëm wöbla kè wawër e' mía ta iwöskuée ta iwöbla wawënene buaë ta imía iu a. <sup>8</sup> Pë' serke ie' o'mik ena pë' wä ie' sùule inuköl kak kiök e'pa ñi chaké:

—¿Wëm wí kè dör wëm e' tkökeser inuköl kak kiök e'?

<sup>9</sup> Welepa tö iché:

—Tó, ie' idir.

Erë welepa skà tö iché:

—Au, kè dör ie' eré ie' sù idir.

Erë je' wák tö iché:

—Tó, ye' je' idir.

<sup>10</sup> Eta ie'pa tö ie' a' ichaké:

—¿Wës i' ta be' wöbla wawënene?

<sup>11</sup> Ie' tö ie'pa iuté:

—Wëm kiè Jesús e' tö dóchka yué, e' tiéitö ye' wöbla ki ta ichéitö ña: ‘Be' yú wöskuök di'dape kiè Siloé e' a.’ Eta ye' mía wöskuée ta ye' wöbla wawënene.

<sup>12</sup> Eta ie'pa tö ie' a' ichaké:

—¿Wé wëm e'?

Ie' tö ie'pa iuté:

—Kè ye' wä ijcher.

*Wëm wöbla buanene e' kí chaké taië fariseowakpa tö*

<sup>13-14</sup> Mik Jesús tö dóchka yué ena wëm wöbla kè wawër e' bua'wéneitö, e' kèwö dör eno diwö. E' kueki wëm buanene e' tsémirakitö fariseowakpa ska'. <sup>15</sup> E'pa tö ie' a' ichaké:

—¿Wës be' wöbla buanene?

Ie' tö ie'pa iuté:

—Wëm eköl tö dóchka tié ye' wöbla kī tā ye' wöskuée tā ye' wöbla buanene.

<sup>16</sup> Ie'pa welepa tö iché:

—Wëm wé tö e' wé e' kè wā eno diwö dalöiëne, e' kuëki e' wák kè patkëne Skëköl wā. Erë welepa skà tö iché:

—Ie' chópa pë' sulusi, e'ma ¿wes ì kè or yi a ese ormi ie' a?  
Es ie'pa ttè chilineka.

<sup>17</sup> Ie'pa tö iskà chakéne wëm buanene e' a:

—Ie' tö be' wöbla bua'wéne, ¿ima e' wák bikeitsè be' tö?

Ie' tö ie'pa iüté:

—Ye' a tā ie' dör Skëköl tteköl.

<sup>18</sup> Erë ie'pa kè éna iklö'wák tö ie' bak wöbla kè wawër tā iwasuétö. E' kuëki ie'pa tö imì ena iyé tsuk patké <sup>19</sup> tā ie'pa a ichaké:

—¿Wëm i' dör a' alà? A' iché tö ie' kune' wöbla kè wawër, e' tā ¿wes i'ñe tā iwöbla wasuétö?

<sup>20</sup> Iyé ena imì tö iché ie'pa a:

—Sa' wā ijcher buaë tö ie' dör sa' alà. Ñies sa' wā ijcher tö ikune wöbla kè wawër.

<sup>21</sup> Erë wes i'ñe tā ie' wöbla buanene e' kè ijcher sa' wā. Ñies kè sa' wā ijcher yi tö ie' wöbla bua'wéne. E' chakó ie' wák a. Ie' detke këchke. ¿Ie' wák tö ichèmi a' a! <sup>22</sup> Iyé ena imì e'pa suane judiowak wökirpa yöki, e' kuëki ie'pa tö iché es. Judiowak wökirpa tö iyé'bak ñi a tö wépa iklö'wé tö Jesús dör wé pairine'bitü idi' wa s'blúie e', e' tā esepa yekelur ie'pa tö ie'pa ñi dapa'wö wé a, kè kièwajia yés. <sup>23</sup> E' kuëki iyé ena imì tö iché: “Ie' detke këchke. Ie' wák tö ichèmi a' a.”

<sup>24</sup> Etā ie'pa tö wëm buanene, e' skà kiéne tā ie' a ichaké:

—Be' ttó mokjë Skëköl wörki. Sa' wā ijcher tö wëm tö be' bua'wéne, e' dör pë' sulusi.

<sup>25</sup> Wëm tö iüté:

—Kè ye' wā ijcher tö wëm e' dör pë' sulusi ö au. Erë ye' wā ijcher buaë tö ye' bak wöbla kè wawër, erë i'ñe tā ye' tö iwasué. E' è jcher ye' wā.

<sup>26</sup> Ie'pa tö iskà chakéne ie' a:

—¿Wes be' wéitö? ¿Wes ie' tö be' wöbla bua'wéne?

<sup>27</sup> Ie' tö ie'pa iüté:

—E' chétkeyö a' a, erë a' kè éna itt sak. ¿Ie a' kī ikiane tö ye' tö iskà ché? Wësua ñies a' e' yuak ie' kléie.

<sup>28</sup> Ie'pa tö ie' ché suluë tā ichérakitö ia:

—Be' dör wëm e' ttökata, erë sa' dör Moisés ttökatapa. <sup>29</sup> Sa' wā ijcher tö Skëköl ut Moisés tā, erë wëm e', kè jcher sa' wā wé ie' datse.

<sup>30</sup> Ie' tö ie'pa iüté:

—¿I ché a' tö, e' tö ye' wökrawéwā! Ie' tö ye' wöbla bua'wéne tā ¿wes a' kè wā ijcher wé ie' datse? <sup>31</sup> Se' wā ijcher tö pë' sulusipa ttò kè iüteta' Skëköl tö. Erë wépa tö Skëköl dalöieke ena iserke wes ie' kī ikiane es esepa è ttò iüteke ie' tö. <sup>32</sup> Ká i' tsá yöne e'tami kè yi wā ittseüle tö se' kune wöbla kè wawër esepa wöbla buarta'ne. <sup>33</sup> Ie' kè patkópa Skëköl tö, e'ma kè ì orpa ie' a.

<sup>34</sup> Ie'pa tö iüté:

—Be' kune', be' talane ì sulu è a. ¿Wes be' kësik deka sa' wöbla'uk?

Etā ie'pa tö itrè'wëshkar.

*Wëm wöbla buanene e' erblé Jesús mik*

<sup>35</sup> Jesús ittse tö wëm wöbla buanene e' trè'wëshkar ie'pa tö Skëköl wé a. Mik ie' tö ikué tā ie' a ichakéitö:

—¿Be' erblé S'ditsö Alà mik?

<sup>36</sup> Ie' tö iüté:

—A këkëpa, ichó ña yi idir as ye' erblò imik.

<sup>37</sup> Jesús tò iüté:

—Be' wá isuulebak; e' dör ye' tso' ttök be' ta e'.

<sup>38</sup> Etá ie' e' tkéwá kuchë kī idalöiök ta iché ia:

—A Skëkëpa, be' mik ye' erblé.

<sup>39</sup> E' ukuökī ta Jesús tò iché:

—Ye' dë'bitū ká i' a s'shulök as wépa dör wes s'wöbla kè wawër es esepa wöbla wawër. Ñies ye' dë'bitū wépa e' chò tò iwöbla wawër buaë esepa mukat wes iwöbla kè wawër es.

<sup>40</sup> Mik fariseowakpa wélepa tso' ie' ska', e'pa tò ttè e' ttsé, etá ichérakitö ia:

—¿Ima be' sa' bikeitsè? ¿Sa' dör wes s'wöbla kè wawër es?

<sup>41</sup> Ie' tò ie'pa iüté:

—A' mú wöbla kè wawër, e'ma ì sulu nuí kè ku' a' kī. Erë a' tò icheke tò a' wöbla wawër, e' kuëkī a' kī ì sulu nuí tso'ia.

## 10

### *Obeja kkö'nukwak e' tté*

<sup>1</sup> Etá Jesús tò iché: “Mokī ye' a' a ichè tò obeja ekiblökwakpa, esepa kè shkötä'wá wé obeja tso' wötëule, e' wékkö chökle a. E' skéie ie'pa shkökewá bánet. Esepa dör akblökwakpa. <sup>2</sup> Erë wé shkökewá obeja wékkö chökle a, ese dör obeja kkö'nukwak chökle. <sup>3</sup> Obeja wékkö kkö'nukwak, ese tò obeja wékkö kköppeeke obeja kkö'nukwak a ta e' tò iobeja kieke ikiè wa etö etö. Obeja tò ie' ttò ttséwá buaë, ta ie' tò iyekelur wé itso'rak wötëule ee. <sup>4</sup> Obeja tò ie' ttò ttséwá buaë, e' kuëkī mik ie' tò iyélur seraa, etá imi'kerak ie' itöki. <sup>5</sup> Yi kè suule ie'pa wá, ese kè tòie ie'pa tò. Ie'pa kè wá ese ttò ttséule, e' kuëkī ie'pa poneka iyöki.”

<sup>6</sup> Ttè e' pakè Jesús tò judiowak a, erë ie'pa kè éna iwà ane.

### *Jesús dör wes obeja kkö'nukwak buaë es*

<sup>7</sup> Ie' tò iskà ché ie'pa a: “Mokī ye' tò a' a ichè tò ye' wák dör wes obeja wötëule ese wékkö es. <sup>8</sup> Pë' dë'bitū ye' yöki kewe s'wöbla'uk kache tté wa, esepa dör wes obeja ekiblökwakpa es, ie'pa dör pë' suluë. Erë wépa dör wes ye' obeja es, esepa kè wá ie'pa ttò ttséne. <sup>9</sup> Ye' dör wes obeja wékkö es, wépa shkökewá ye' wa, esepa tsatkërdaë. Ie'pa döraë wes obeja shkökewá dökettsane chkök kkö'naule buaë ese es.

<sup>10</sup> “Obeja ekiblökwakpa datse iekiblök ena ittökulur ie'ukwa, e' è wamblök esepa datse. Erë ye' dë'bitū ká i' a sene bua'ie muk a' a, e' dör sene michoë chökle. <sup>11</sup> Ye' dör wes obeja kkö'nukwak buaë es, e' e' murattsá ttèwá iobeja tsatkoie. <sup>12</sup> Erë wé kaneblöke inuköl dalërmik, ese kè dör ikkö'nukwak chökle. Ie' kè dör obeja wák, e' kuëkī mik chichi kañiru datse, etá ie' tò obeja méat ta itkashkar ta chichi kañiru tò obeja ttèwá ta imalepa poneka. <sup>13</sup> Wëm e' kè tkine obeja kī. Ie' tkirke inuköl è kī, e' kuëkī itkashkar.

<sup>14-15</sup> “Ye' wák dör wes obeja kkö'nukwak buaë es. Ye' Yé wá ye' suule buaë, es ñies ye' wá ie' suule. Wépa dör ye' icha e'pa dör wes ye' obeja es, ie'pa suule ye' wá buaë, ñies ie'pa wá ye' suule. Ye' e' murattsá ttèwá ie'pa tsatkoie. <sup>16</sup> Ñies ye' wá ye' icha skà tso' bánet, esepa dör ye' obejapa ñies, erë ie'pa kè dör a' ditséwö. Ie'pa döraë ye' wá ye' ska' ta ie'pa tò ye' ttò iüteraë ta iërdawarak ye' icha tso' íe e'pa ta ñita echka ème. Ye' è döraë ie'pa qos e' kkö'nukwakie.

<sup>17</sup> “Ye' e' murattsá ttèwá e' shkerdakane, e' kuëkī ye' Yé éna ye' dalër taië. <sup>18</sup> Kè yi a ye' duökwa. Ye' e' murattsá ttèwá ye' wák er wa. Ye' a kawö mène e' mottsá ttèwá ena shkenokane wes ye' Yé tò ye' patkè iwà uk es.”

<sup>19</sup> Mik judiowak tò ttè e' ttsé, etá ie'pa ttè chiliwékane. <sup>20</sup> Ie'pa kibiiepa tò icheke:

—¿Ie' dör alije! ¿Ie' a aknama tso'! ¿Ie' a' tò ittò ttseke?

<sup>21</sup> Erë imalepa tò icheke:



—ÿi a aknama tso', ese kè ttò es! Aknama kè a s'wöbla buanukne.

*Judiowak kè erblène Jesús mik e'pa tö iwatéttsa*

<sup>22</sup> Tskiri kèwö de, eta Jerusalén wakpa tso' Skèköl wé batse'one ká iaiäe, e' kèwö tkö'uk.

<sup>23</sup> E' shua Jesús shkòdur Skèköl wé ùle kiè Salomón ùle e' a. <sup>24</sup> Eta judiowak kè erblène Jesús mik, esepa iènewa ie' pamik taiè ta ie'pa tö ie' a ichaké:

—ÿkos sa' tö be' ttè panemirö? Iwà chó sa' a yèsyèsè tö be' dör wé pairine'bitu idi' wa s'blúie e' ö kè be' dör e'.

<sup>25</sup> Ie' tö ie'pa iüté:

—Ye' tö ichétke a' a, erè a' kè erblène ye' mik. ì kè or yi a ese wéyö ye' Yé ttò wa. E' tö ikkaché buaè sulitane a tö yi dör ye'. <sup>26</sup> Erè a' kè dör ye' obeja, e' kuèki a' kè erblöku' ye' mik. <sup>27</sup> Ye' obeja tö ye' ttò ttseke. Ye' wa ie'pa suule buaè ena ie'pa datse ye' itöki. <sup>28</sup> Sene michoè mekeyö ie'pa a ta ie'pa kè duòpawa aishkuö ta. Ie'pa kè yèrpattsaia yi a ye' ulà a. <sup>29</sup> Ye' Yé tö ie'pa me' ye' a e' dör íyi ulitane tsata. E' kuèki kè yi a ie'pa yèrpattsa ie' ulà a. <sup>30</sup> Ie' ena ye', sa' dör eköl è.

<sup>31</sup> Eta judiowak kè erblène Jesús mik, e'pa tö ák skà klö'wéne taiè ie' toie. <sup>32</sup> Ie' tö ie'pa a iché:

—Ye' Yé batamik íyi buaè wé ye' tö taiè a' wörki ÿe' wé kuèki a' ki ye' kiane ttèwa ák wa?

<sup>33</sup> Ie'pa tö iüté:

—Sa' kè éna be' ttakwa íyi buaè wé be' tö ese kuèki. Sa' éna be' ttakwa be' tö Skèköl ché suluè e' kuèki. Be' dör s'ditsö è, erè be' e' chó tö be' dör Skèköl.

<sup>34-36</sup> Ie' iüté:

—ÿWes a' tö ye' kcateke ttè e' ki? ÿA' kè éna iane tö ká iaiäe Skèköl tö iyè' a' shulökwakpa bak e'pa a: “a' dör kèkölpa?”\* Ttè e' tso' kitule Skèköl yèkkuö ki. Se' wa ijcher tö yèkkuö e' dör moki kekraè. Ie'pa wépa a Skèköl tö ittè me'bak s'shulök, esepa ki' ie' tö kèkölpa, e' yita ye' kirmi buaè ie' alà. E' wà dör tö ie' wák tö ye' klöq' ta ye' patkè'bituitö ká i' a. ÿWes a' ichèmi tö ye' tö ie' ché suluè mik ye' iché tö ye' dör ie' alà eta? <sup>37</sup> ì kiane ye' Yé ki tö ye' tö iwè, e' mú kè uk ye' ku', e'ma kè a' erblök ye' mik. <sup>38</sup> A' kè erblöku' ye' mik, erè ì wèkeyö, e' mik a' erbló as a' wa ijcher moki tö ye' Yé ena ye' sa' dör eköl è.

<sup>39</sup> Judiowak tö Jesús skà ma'wé klö'wèwa, erè ie' tkashkar ie'pa yöki.

<sup>40</sup> E' ukuöki ta Jesús míane Jordán wishet wé Juan bak s'wöskuök ee. Ee ie' e' tséat.

<sup>41</sup> Taiè pè' de ie' ska' ta ichekerakitö:

—Juan kè wa, ì kè or yi a ese one, erè wém i' paka' Juan tö kos e' dör moki.

<sup>42</sup> Eta taiè pè' tso' ká e' a, e'pa erblé Jesús mik.

## 11

*Lázaro blènewa*

<sup>1</sup> Wém tso' eköl duöke kiè Lázaro serke Betania. Ee María ena ièl kiè Marta e'pa serke.

<sup>2</sup> María e' dör Lázaro kutà tö Skèképa Jesús klö ki kiè masmas tè'ka ta ipasio'waitö itsakö wa e'. <sup>3</sup> Ie' ena Marta e'pa tö Jesús a ichök patké:

—A Skèképa, Lázaro dalër taiè be' éna, e' duöke.

<sup>4</sup> Mik Jesús tö ittésè ta ichéitö:

—Duè e' kè e' alòpaka iki da'a. E' dör buaè Skèköl olo kkachoie, nies ye' dör ie' Alà e' olo kkachoie.

<sup>5</sup> Marta ena ièl ena Lázaro, e'pa dalër taiè Jesús éna. <sup>6</sup> Erè mik ie' ittésè tö Lázaro duöke, eta ie' kè mìnè iska'. Ie' e' tséatia dò ká böt wé itso' ee. <sup>7</sup> E' ukuöki ta ie' iché ittökatapa a:

\* 10:34-36 kèkölpa: Si'kuaie ttè e' dör dioses.

—Mishkane Judea.

<sup>8</sup> Ie'pa tö iché ie' a:

—A S'wöbla'ukwak, i' kukuie se' dë'rö ee, ta judiowak ki be' kiane ttëwä ák wa. ¿Wes ee be' shkakne?

<sup>9</sup> Ie' tö ie'pa a iché:

—Kè a' tkinuk e' ki. Kam ye' kéwö doka, e' kuëki kè ì tkòpa ye' ta. E' dör wes ttè i' tö iché es: Ká ñiwe a diwö tso' doka dabom eyök ki böt (12). Ñiwe ta ká olo buaë, e' kuëki se' shköke ñiwe, e' ta kè se' klastkërpawä. <sup>10</sup> Erë s'shköke ká ttsetse a, e' ta se' klastkërdaë. Ye' tso'ia shkök wes s'shköke ñiwe es, e' kuëki kè ì tkòpa ye' ta.

<sup>11</sup> E' ukuöki ta ie' tö ichéne:

—Se' yami Lázaro kapowä, erë ye' mi'ke ishke'ukkane.

<sup>12</sup> Eta ittökatapa tö iché ie' a:

—A Skëkëpa, ie' kapowä, e' ta ibuarmine.

<sup>13</sup> Ie' tö Lázaro blënewä e' ché ie'pa a es. Erë ittökatapa tö ibikeitsé tö é ikapowä. <sup>14</sup> E' kuëki ie' tö ie'pa a iché yësyëse:

—Lázaro blënewä. <sup>15</sup> Erë a' kuëki ye' ttsë'ne buaë tö ye' kè ku' ee as a' erblö ye' mik. Mishka isauk.

<sup>16</sup> Eta Tomás (e' kiè ñies Dídimó) e' tö iché imalepa a:

—Mishka as se' ttöwä ie'pa tö Jesús ta.

*Jesús dör s'duulewä ese shke'ukkane wak.*

<sup>17</sup> Mik Jesús demi Betania, eta Lázaro nu wötënewä, e' ki ká de tkël. <sup>18</sup> Betania ate tsinet Jerusalén o' mik kilómetro mañat ekkë. <sup>19</sup> Marta ena María akë blënewä, e' kuëki taië judiowak dë'bitü ie'pa pablök. <sup>20</sup> Mik Marta wä ijchenewä tö Jesús döketke ta imía iñaletsuk, erë María ate u a. <sup>21</sup> Ie' tö iché Jesús a:

—A Skëkëpa, be' chópa tkër íe, e'ma ye' akë kè blënewä. <sup>22</sup> Ie' blënewatke, erë ye' wä ijcher tö ì kié be' tö Skëköl a, e' meraëitö be' a.

<sup>23</sup> Ie' tö ie' a iché:

—Be' akë blënewä e' shkerdakane.

<sup>24</sup> Marta tö iché ia:

—Ye' wä ijcher tö ie' shkerdakane aishkuö ta mik ká i' erkewatke eta.

<sup>25</sup> Jesús tö iché ie' a:

—Ye' dör s'duulewä e' shke'ukkane wak. Ye' dör sene michoë e' mukwak. Yi erblé ye' mik eré iblënewatke, erë ishkerdakane ta iser michoë. <sup>26</sup> Yi serke ye' mik erblöke ye' mik, ese kè duöpawä aishkuö ta. ¿E' klö'wé be' tö?

<sup>27</sup> Marta tö iüté:

—A Skëkëpa, iklö'wëyö. Ye' tö iklö'wé tö be' dör Skëköl Alà, be' dör wé pairine'bitü idi' wa s'blüie cheke ká iaiaë tö idatse ká i' ki e'.

*Jesús íe wé Lázaro nu blëne ee*

<sup>28</sup> Marta tö ttè e' ché one, ta imía iël María kiök, ta iché ie' kukuö a:

—S'wöbla'ukwak detke. Ie' tö be' kié.

<sup>29</sup> Mik e' ttsé María tö, eta bet ie' e' kékä mía Jesús sauk. <sup>30</sup> Jesús tso'ia wé ie' tté Marta ta ee. Kam ie' döwä wé ie'pa serke ee. <sup>31</sup> Mik wépa tso' María u a ipablök, e'pa tö isué tö ie' e' kékä mía bet, eta ie'pa mía itöki. Ie'pa ibikeitsé tö ie' mía iük idëütö nu blëne ee.

<sup>32</sup> Mik María demi Jesús ska', eta ie' e' tkéwä kuchë ki iklö ska' ta ichéitö ie' a:

—A Skëkëpa, be' chópa tkër íe, e'ma ye' akë kè blënewä.

<sup>33</sup> Mik Jesús tö isué tö María iuke ena wépa debitu ie' ta e'pa iukeñak, eta e' tö ie' chkwéwä taië shütë. <sup>34</sup> Ie' tö ie'pa a ichaké:

—¿Wé a' tö inú blë'wä?

Ie'pa tö iüté:

—A Skëkëpa, be' shkó isauk.

<sup>35</sup> Eta Jesús íe. <sup>36</sup> Ie'pa tö iché:

—Isaú. Ie' éna Lázaro dalër taië.

<sup>37</sup> Erë ie'pa welepa tö iché:

—Ie' tö wëm wöbla kè wawër, e' buaq'ne ta ¿ì kuekì ie' kè wa ì one as Lázaro kè blërwa?

*Jesús tö Lázaro shké'wékane*

<sup>38</sup> Eta Jesús skà erianeka ta idemi wé Lázaro nu blène ee. E' dör ákuk bërie. Ák bërie bastkër, e' wa ákuk wötëulewa. <sup>39</sup> Jesús tö iché:

—Ák bastkër ákuk kkò mik, e' skóttsa bánet.

Marta dör dëütö kutà e' tö iché:

—A Skëkëpa, ká detke tkël inú kì, e' kuekì suluë inú alanewatke.

<sup>40</sup> Ie' tö iüté:

—Ye' tö be' a ichétke tö be' erblé ye' mik, e' ta mokì be' tö Skëköl olo taië e' suëraë.

<sup>41</sup> Eta ie'pa tö ák skéu bánet ta Jesús wökéka ká jaì a ta ichéitö:

—A yéwö, ì kiéyö be' a e' ttsébö. E' kuekì wëstela chekeyö be' a. <sup>42</sup> Ye' wa ijcher tö kërkaë ì kiekeyö be' a, e' ttsekebö. Erë ikiéyö be' a pë' tso' taië íe, e'pa kukua as ie'pa tö iklö'ù tö mokì be' ye' patké'.

<sup>43</sup> E' chéitö one ta ie' iché aneule:

—A Lázaro, ¿be' e' yóttsa see!

<sup>44</sup> Eta Lázaro blënewa e' dettsa ttsé'ka. Ie' ulà, ie' klò parratulewa datsi'tak wa. Nies iwö parratulewa datsi'tak wa. Jesús tö iché iarak:

—Iparratulewa datsi'tak wa, e' wötsóö as imi'a.

*Judiowak tö Jesús ileritsé klö'wëwa*

*(Mateo 26.1-5; Marcos 14.1-2; Lucas 22.1-2)*

<sup>45</sup> Judiowak dë'bitu María wapiöuk, e'pa tö ì wé Jesús tö e' sué, e' kuekì ie'pa taië erblé ie' mik. <sup>46</sup> Erë ie'pa welepa mía, ì wéitö, e' chök fariseowakpa a. <sup>47</sup> Eta fariseowakpa ena sacerdotepa wökirpa, e'pa tö judiowak wökirpa kié ta ñni dapa'wéka ta ichéraitö ñi a:

—¿Wes se' tö Jesús wëmi? Ì kè or yi a ese wëkeitö taië. <sup>48</sup> Se' tö ie' méat es, e' ta sulitane erblöraë ie' mik ta itkërdaka se' blúie. E' mú ttsé Roma wökirpa tö, e'ma ie'pa bituraë ta Skëköl wé tskerawarakitö, ñies se' judiowak ewërawarakitö.

<sup>49</sup> Erë ie'pa shua wëm tso' eköl kiè Caifás, e' dör sacerdote kibi duas e' wa. Ie' tö iché ie'pa a:

—A' kè wa ì jcher yës. <sup>50</sup> Ttsësquia a' kè éna iane tö wëm eköl è duòwa se' judiowak skéie, e' dör bua'ie se' kos erwa e' skéie.

<sup>51</sup> Erë e' kè yëne Caifás wa iwák er wa. Ie' dör sacerdote kibi duas e' wa, e' kuekì Skëköl tö ie' ké ichök es ittekölie. Ie' tö iché Skëköl ttekölie tö Jesús tterawa judiowak ulitane skéie. <sup>52</sup> Kè idör judiowak è skéie, ñies itterawa Skëköl ala'r ulitane serke ká wa'ñe e'pa skéie as ie'pa dò judiowak ta ñita wes wakpa etökicha è es. <sup>53</sup> E' diwö ta judiowak wökirpa tö kawö mé ñi a Jesús ttowa.

<sup>54</sup> E' kuekì ie' kè shkòia sulitane wösha judiowak shua. Ie' e' yéttsa mía ká kiè Efraín ee. Ká e' atë ká sir poë wé kè yi serku' ese ska' tsinet. Ee ie' e' tséat ittökatapa ta.

<sup>55</sup> Judiowak Yépa Yërulune Egipto e' këwö dökewatke tsinet tkö'wë. Judiowak serke bánet e'pa taië dökemitke Jerusalén e' batse'ukne ikawö tkö'uke e' yöki wes ie'pa wöblar es. <sup>56</sup> Ie'pa tso'ie Jesús yulök. Ie'pa ñi chakökerak Skëköl wé a:

—¿Ima a' tö iché, Jesús dòmi kawö tkö'uk ö kè idöpa?

<sup>57</sup> Fariseowakpa ena sacerdotepa wökirpa, e'pa tö iché sulitane a tö yi wa ijcher tö wé Jesús tso', e' ta ibiyó chó sa' a iklö'wowa.

<sup>1</sup> Kawö kianeia teröl Judiowak Yépa Yërulune Egipto e' kèwö tkö'woie ta Jesús mía Betania wé Lázaro serke ee. Lázaro du'wa e' shkeo'kane ie' tö e' ska' ie' mía. <sup>2</sup> Ee ie'pa ulérak, chkérak buaë Jesús kikoka. Marta tso' iwatiök. Lázaro tkër ie'pa shua mesa ki chkök Jesús ta. <sup>3</sup> Eta María wa kiö masmas kiè nardo chökke tuè darërè, ese debitu litro shaböts, e' téitö Jesús klò ki. E' ukuöki ta ipasiwéwaitö itsakö wa. Kiö e' tö úshu kos alappöwéka buaë jamamaë. <sup>4</sup> Eta Jesús ttökata eköl kiè Judas Iscariote tö iwömekettsa e' tö iché:

<sup>5</sup> —Kiö masmas se tuè kanè duas ek ské ekké. ¿I kuéki kè iwatonettsa s'siarépa kimoie?

<sup>6</sup> Erë e' kè yëne ie' wa, ie' éna s'siarpa dalër taië e' kuéki. Ie' dör akblökwak, e' kuéki ie' tö iché es. Ie' dör Jesús ttökatapa inuköl blökwak, e' kak ekibleke ie' tö iwák a. <sup>7</sup> Jesús tö iché ia:

—Imuat. Kiö e' bleke të se' nu ki, erë ité ie' tö ye' ki kam ye' ttöwa e' yöki. <sup>8</sup> S'siarépa tso' kekraë a' shua as a' tö ikimù, erë ye' kè ku' kekraë a' ta.

#### *Sacerdotepa wökirpa ki Lázaro kiane ttèwa*

<sup>9</sup> Taië judiowak wa ijchenewa tö Jesús tso' Betania ta imíyal ee, kè dör Jesús è sauk. Ñies ie'pa ki Lázaro shkeo'kaneitö e' kiane suè. <sup>10-11</sup> Lázaro batamik taië ie'pa erblé Jesús mik, ta sacerdotepa wökirpa ttè kè iutèia ie'pa tö. E' kuéki sacerdotepa wökirpa tö ibikeitsétke Lázaro ttowa ñies.

#### *Jesús demi Jerusalén*

*(Mateo 21.1-11; Marcos 11.1-11; Lucas 19.28-40)*

<sup>12</sup> Taië pè' de Jerusalén Judiowak Yépa Yërulune Egipto e' kèwö tkö'uk. Bule es ta ie'pa wa ijchenewa tö Jesús datse ñies Jerusalén. <sup>13</sup> E' kuéki ie'pa sí kò télor tsémi shuélor ie' datse e' ñalé ki idalöioie ta imíyal ñaletsuk. Ie'pa tö iché aneule:

—¿Skököl kikokaösö! ¡Ayécha buaë se' Israel aleripa blú datse Skököl ttò wa e'!\*

<sup>14</sup> Eta Jesús tö burro pupula kué etö, e' ki ie' e' tkéka wes ikitule Skököl yëkkuö ki es, e' tö iché:

<sup>15</sup> A Sión wakpa, kè a' suanuk.

Isaú, a' blú datse

e' tkéuleka burro pupula ki.†

Es Skököl yëkkuö tö ichè.

<sup>16</sup> Ima Jesús tté tso' kitule Skököl yëkkuö ki e' wà tka ie' ta. Erë e' kèwö ska' ta ie' ttökatapa kè éna iwà ane tö Skököl yëkkuö kitule ká iaiaë e' tö Jesús tté pakeke. Erë ie' mikane ká jai a olo ta' taië, e' ukuöki ta ie'pa éna iwà ane tö i kos wé pè' tö ie' ta, e' tso'tke kitule Skököl yëkkuö ki.

<sup>17</sup> Wépa tso' mik Jesús tö Lázaro shkeo'kane eta, e'pa tö ttè e' pakeke imalepa a. <sup>18</sup> E' kuéki pè' wa taië ttè e' jchenewa, e' kuéki imíyal Jesús ñaletsuk. <sup>19</sup> Erë fariseowakpa tö iché ñi a:

—¿Isaú, sulitane mi'ke Jesús è itökí! ¡Se' tsaiëne buaë!

#### *Griegowak welepa tö Jesús yulé*

<sup>20</sup> Pè' mìnè Jerusalén Judiowak Yépa Yërulune Egipto e' kèwö tkö'uk, e' shua griegowak welepa tso'ñak. <sup>21</sup> Griegowak e'pa debitu Felipe ska'. Felipe dör ká kiè Betsaida e' wak. Ká e' atè Galilea. Ie'pa kköché taië:

—A kéképa Felipe, sa' ki Jesús kiane suè.

<sup>22</sup> Eta Felipe mía ichök Andrés a ta ie'pa böi míyal ichök Jesús a. <sup>23</sup> Jesús tö iché ie'pa a:

—Ye' dör S'ditsö Alà, e' olo taië e' kkayërkette. <sup>24</sup> Mokí ye' tö a' a ichè tö iyiwö etkla kè tkènewa iyök a, e' ta iaatdaë ekörla, kè wö ta'. Erë iyiwö etkla tkènewa iyök a, ese shölöne ta iwödaló duowa, e' ta itskine wördaë taië. <sup>25</sup> Wé e' dalër taië kè duakwa, ese weirdaë

\* 12:13 Salmo 118.25 † 12:15 Zacarías 9.9

aishkuö ta. Erë wé e' mettsa ttèwà ká i' a, ese tsatkërdaë ser michoë. <sup>26</sup> Yi kaneblak ye' a, ese kawöta shkök ye' ta; wé ye' tso' ee ye' kanè mésopa tso' ñies. Yi kaneblöke ye' a, ese kikeraka ye' Yé tö.

*Jesús ttekewatke, e' ché ie' tö*

<sup>27</sup> “Ye' ittsé i' ta, taië ye' eriane. ¿Ì chèmiyö? ¿Yö ichèmi ye' Yé a: ‘A yéwö, ye' tsatköö ì tköketke ye' ta e' yöki’? Au, e' kè chepayö. ¿Ye' wák e' dè'bitu ttèwà! <sup>28</sup> A yéwö, be' olo taië e' kkachó as be' kíkarka.”

Età ká jai a ttò ttsène e' tö iché: “Ye' olo taië e' kkachétkeyö be' ki, ta iska kkacheraneyö.”

<sup>29</sup> Pë' tso' ittsök ee, e'pa tö iché tö alá blane, erë welepa tö iché:

—Skököl biyöchökwak wele tté ie' ta.

<sup>30</sup> Jesús tö iché ie'pa a:

—Ttò ttsé a' tö, e' kè dör ye' a, e' dör a' kimoie. <sup>31</sup> Ká i' wakpa shulè kéwö detke. Bé dör ká i' wakpa wökir, e' uyardattsá i' ta. <sup>32</sup> Mik ye' wötènewà krus mik e' tkèneká, eta ye' wá sulitane bituraë ye' ska'.

<sup>33</sup> Es ie' tö wés itterawá e' ché. <sup>34</sup> Pë' tö iüté:

—Se' wá ijcher tö Skököl yékkuö ki ikitule tö wé pairine'bitu idi' wa s'blúie e' ser michoë. ¿Wés be' tö iché tö S'ditsö Alà, e' kawöta tkèkà krus mik? S'ditsö Alà ¿e' dör yi?

<sup>35</sup> Jesús tö iché ie'pa a:

—Yi shköke stui a, ese kè wá ijcher wé imíró. Ye' dör wés ká olo es, erë ye' tso'ia a' shua ekuölö è. E' kueki a' shkó ye' olo a as kè stui tö a' kùwá. <sup>36</sup> Ye' dör wés ká olo es, e' tso'ia a' shua. Ye' mik a' erbló as a' dò ye' ichaie.

E' ché one Jesús tö ta imía e' bléwá ie'pa yöki.

*Ì kueki judiowak kè erblö Jesús mik*

<sup>37</sup> Ì kè or yi a ese wé Jesús tö taië judiowak wörki, erë ie'pa kè erblène ie' mik. <sup>38</sup> E' kos wamblène wés Skököl tteköl Isaías e' tö ikit Skököl yékkuö ki es, e' tö iché:

“A Skököl, ttè paka' sa' tö wësua kè yi wá iklöne.

Be' diché taië e' kkayë' be' tö ie'pa a, erë ie'pa kè wá sa' ttò iütène.”<sup>‡</sup>

<sup>39</sup> Es ie'pa kè a Skököl ttè klör. Ñies Isaías ikitat tö ì kueki ie'pa kè wá Skököl ttè klöone. E' tö iché:

<sup>40</sup> “Ie'pa er darërëe, kè éna Skököl ttè klö'wak yës.

E' kueki ie'pa wöa Skököl tö ká chöwéwa.

Ie' tö ie'pa méat wés s'wöbla kè wawër es.

Ie' tö ie'pa er darë'wéwá as ie'pa kè éna iwà ar.

Skököl tö iché tö ye' tö iwé es

as ie'pa kè er mane'ù ye' a ta ie'pa bua'wèneyö.”<sup>§</sup>

<sup>41</sup> Isaías tö Jesús olo taië e' su' ena ie' tö Jesús cheke, e' kueki ie' tö iché es.

<sup>42</sup> Erë taië judiowak wökirpa erblé Jesús mik. Erë ie'pa suane fariseowakpa yöki, e' kueki kè ie'pa ichéka sulitane kukua. Ie'pa kè ki ikiane tö fariseowakpa tö ie'pa trë'wèshkar ie'pa ñi dapa'wo wé a. <sup>43</sup> S'ditsö tö ie'pa kíkèkèka e' wa ie'pa wöbatsö bua'ie, Skököl tö ie'pa kíkèkèka e' skéie.

*Ì ché Jesús tö e' wa se' kichatërdaë*

<sup>44</sup> Jesús tö iché aneule: “Wépa erblé ye' mik, esepa kè erblène ye' è mik. Ie'pa erblé ye' Yé tö ye' patkè' e' mik ñies. <sup>45</sup> Wépa tö ye' sué, esepa tö ye' Yé tö ye' patkè' e' sué ñies.

<sup>46</sup> Ye' dör wés ká olo es. Ye' dè'bitu ká i' a as wépa erblé ye' mik, esepa kè ku'ia wés s'tso' stui a es. <sup>47</sup> Wépa tö ye' ttò ttsé, erë kè iwá iwà iütène, esepa kè kichatepa ye' wák tö. Ye'

<sup>‡</sup> 12:38 Isaías 53.1    <sup>§</sup> 12:40 Isaías 6.10

kè dè'bitu ká i' a s'ditsö kichatök. Ye' dè'bitu s'ditsö tsatök. <sup>48</sup> Wépa tö ye' watekettsa, kè tö ye' ttò dalöiè, esepa kkatökwak tso'tke, e' tö ie'pa kichaterattsä. Ttè yè'bak ye' tö, e' kè klöne ie'pa wä, e' kuëki mik ká i' erkewatke, etä ie'pa kichatërdattsä. <sup>49</sup> Ye' kè wä ì yëule ye' wák er wa. Ì cheke ye' tö, e' chekeyö wes ye' Yé tö ye' patkë'bitu, e' tö ye' patkë' ichök es. E' kuëki ye' ttò dör mokië. <sup>50</sup> Ye' wä ijcher tö ì ché ie' tö e' tö sene michoë mé. Es ì chekeyö, e' chekeyö wes ye' Yé tö ye' ké ichök es.”

## 13

### *Jesús tö ittökatapa klò skué*

<sup>1</sup> Judiowak Yépa Yërulune Egipto e' kèwö dökewatke bule es. Jesús wä ijcher tö ie' tö ká i' mekeattke ta imichone iyé ska', e' kèwö dewatke. Wépa dör ie' icha tso' ká i' a, e'pa dalër kekraë ie' éna. Es ie'pa dalër michoë ie' éna kekraë.

<sup>2</sup> Jesús ena ittökatapa tso' chkök nañewe. Ie'pa eköl kiè Judas, e' dör Simón Iscariote e' alà. Bé tö ie' këtke ibikeitsök Jesús wömútsa. <sup>3</sup> Erë Jesús wä ijcher tö iyé tö ì kos kèwö mé iulà a. Ñies ie' wä ijcher tö ie' dè'bitu Skëköl ska' e' mitkene eë. <sup>4</sup> Es ie' e' kéka wé ie'pa tso' chkök eë, ta ipaio kikkë yéttsaitö ta datsi' ukuö e' pasiwoie, ese muéwaitö e' kipa mik. <sup>5</sup> E' ukuöki ta di' téitö kulé' a ta ie' tö ittökatapa klò skuémi. Datsi' ukuö tso' iwä moule e' kipa mik, e' wa ittökatapa klò pasiwéitö.

<sup>6</sup> Mik Jesús mi' Simón Pedro klò skuök, etä e' tö ie' a iché:

—A Skëképa, be' dör sa' wöbla'ukwak. ¿Wes e' tö ye' klò skuémi?

<sup>7</sup> Jesús tö iiuté:

—Ì uk ye' tso' e' wà kè ane be' éna i'ñe, erë i' ukuöki ta be' éna iwà ardaë.

<sup>8</sup> Etä Pedro tö iché ie' a:

—¿Kè ye' tö kawö mepa be' a as be' tö ye' klò skuè!

Jesús tö iiuté:

—Ye' kè tö be' klò skuè, e' ta be' kè döpaia ye' ttökataie.

<sup>9</sup> Simón Pedro tö iché ia:

—A Skëképa, e' dör es e'ma ye' klò skuó. ¿Ñies ye' ulà ena ye' wökir e' kos skuó!

<sup>10</sup> Erë Jesús tö iiuté:

—Yi kuétke ñiköl pa sunetke maneneë, ese kè kawöta kuöwëne, iklò è kiane skuè. A' kibiepa tso'tke maneneë, erë eköl dur a' shua, e' kè dör manene.

<sup>11</sup> Ie' wä ijcher tö yi tö iwömekettsa, e' kuëki ie' tö iché: “eköl dur a' shua, e' kè dör manene.”

<sup>12</sup> Jesús tö ittökatapa klò skué one ta ipaio kikkë iékaneitö ta imía e' tkéserne mesa o'mik ta ichéitö:

—¿Ì wé ye' tö a' a, e' wà ane a' éna? <sup>13</sup> A' tö ye' kiè S'wöbla'ukwak ö Skëképa, es je' idir, ye' dör e'. <sup>14</sup> Ye' dör a' wöbla'ukwak, ye' dör a' kékëpa, erë ye' e' wöéwa dò diöshet a' klò skuök wes kanè méso es. E' yita a' ké e' wöökwa dò diöshet ñi yöki ñi kimuk. <sup>15</sup> Ì wé ye' tö a' wörki, e' wà kkachéyö a' a as a' tö iwakaneù es. <sup>16</sup> Moki ye' tö a' a iché tö kanè mésopa kos, esepa kè dör iwökirpa tsata. Ñies yi patkéule, ese kè dör yi tö ipatké ese tsata. <sup>17</sup> Ttè e' wà ane a' éna ta iwawé a' tö es, e' ta ayëcha e' dör buaë a' a.

<sup>18</sup> “Kè ye' ku' a' ulitane chök. Ye' tö a' shukitbak, e' kuëki ye' wä ijcher buaë wes a' dör. Erë Skëköl yëkkuö tö iché: ‘wépa chköke ye' ta, e' isie alè eköl miáne ye' bolökie.’ Ttè e' kawöta wä tkök es. <sup>19</sup> E' ché ye' tö a' a kam iwà tkò e' yöki. Es mik iwà tka, etä a' tö iklö'weraë moki tö Skëköl tö ye' patkë'bitu. <sup>20</sup> Moki ye' tö a' a iché tö yi tö yi patkekeyö, ese kiekewa er bua' wa, ese tö ye' kiekewa er bua' wa. Ñies yi tö ye' kiekewa er bua' wa, ese tö yi tö ye' patkë'bitu e' kiekewa er bua' wa.”



*Jesús tö iché Judas tö ye' wömerattsä*

(Mateo 26.20-25; Marcos 14.17-21; Lucas 22.21-23)

<sup>21</sup> Jesús tö iché one tä ichkenewä tä ichéitö ittökatapa a yësyësë:

—Mok*i* ye' tö a' a ichè tö a' eköl tö ye' wömerattsä.

<sup>22</sup> Ittökatapa ñi suéka. Ie'pa kè wä ijcher tö yi chök ie' tso'. <sup>23</sup> Ie'pa eköl dalër taië Jesús éna, e' tkër iö'mik tsinet ie'pa chköke e' dalewa. <sup>24</sup> Ie' a Simón Pedro ulà kkaché tö ichakó tö cheke Jesús tö. <sup>25</sup> Ie' k*i* e' skéwä tsinet Jesús skà tä ichakéitö iä:

—A Skékëpa, ¿yi idir?

<sup>26</sup> Jesús tö iiüté:

—Ye' tö pan takla nuwëke üdiö a, tä yi a yö imé e' idir.

E' bet tä ie' tö pan takla nuwéka tä iméitö Judas dör Simón Iscariote alà e' a. <sup>27</sup> Judas tö pan takla ñé tä bet Satanás tkawä ie' er a. Jesús tö iché iä:

—Ì weke be' tö e' ú bet.

<sup>28</sup> Erë ie'pa tso' chkök mesa o'mik, e'pa kè éna iane ì kuëki Jesús tö iché es. <sup>29</sup> Judas dör inuköl blökwak, e' kuëki Jesús ttökatapa welepa tö ibikeitsé tö Jesús tö Judas ké ilè taük ikawö tkö'wekerakitö e' a ö ilè kakkuk s'siarëpa a.

<sup>30</sup> Es Judas tö pan ñé tä imía. Mik imía, etä ká detke nañewe.

*Jesús tö ttè dalöiëno pa'ali mé ittökatapa a*

<sup>31</sup> Judas mía e' ukuöki tä Jesús tö iché:

—Ye' dör S'ditsö Alà e'. I'ñe ye' olo wërdaë, ñies Skököl wák olo wërdaë ye' ki. <sup>32</sup> Skököl olo wërdaë ye' ki, e' tä ie' wák tö ye' olo kkacheraë sulitane wörki, e' weraëitö bet. <sup>33</sup> A ala'r, kè ye' serpaia a tä ká taië. A' tö ye' yuleraë, erë ì yé'bak ye' tö judiowak wökirpa a, e' cheke ye' tö a' a ñies: a' kè döpa wé ye' mi'ke eë. <sup>34</sup> Ye' tö ttè pa'ali meke a' a dalöië, e' dör i': a' ñi dalëritsó. A' kawöta ñi dalëritsök wes ye' tö a' dalëritseke es. <sup>35</sup> A' ñi dalëritsöke es, e' tä sulitane wä ijcherdaë tö a' dör ye' ttökatapa.

*Pedro icheraë tö ie' kè wä Jesús suule*

(Mateo 26.31-35; Marcos 14.27-31; Lucas 22.31-34)

<sup>36</sup> Simón Pedro tö ichaké Jesús a:

—A Skékëpa, ¿wé be' mi'ke?

Ie' tö iiüté:

—Kè be' döpami ye' itöki wé ye' mi'ke eë, erë aishkuö tä be' dòmi ye' itöki.

<sup>37</sup> Pedro tö iché ie' a:

—A Skékëpa, ¿ì kuëki ye' kè mi'pa be' itöki i' tä? ¿Ye' e' chétke duökwä be' tsatkök!

<sup>38</sup> Jesús tö iiüté:

—¿Mok*i* be' e' chétke duökwä ye' tsatkök? Ye' be' a ichè yësyësë tö kam dakro ar, e' yöki bö icheraë mañatökicha tö be' kè wä ye' suule.

## 14

*Shkowä Skököl ska' e' ñalé dör Jesús*

<sup>1</sup> E' ukuöki tä Jesús tö iché ittökatapa a:

“Kè a' tkinuk. A' erbló Skököl mik. Ñies a' erbló ye' mik. <sup>2</sup> Ye' yé u blatëule taië. Ye' mi'ke iwakanéuk kewé a' yöki. E' kè chópa es, e'ma kè ye' wä iyëne. <sup>3</sup> Ye' mía tä mik iwakaneone, etä ye' datskene a' tsukmi as a' mi' senuk wé ye' tkër eë. <sup>4</sup> Wé ye' mi'ke e' ñalé suule a' wä buaë.”

<sup>5</sup> Tomás tö ie' a ichaké:

—A Skékëpa, kè sa' wä ijcher wé be' mi'ke tä ¿wes sa' a ñalé armi?

<sup>6</sup> Ie' tö iiüté:

—Ye' dör ñalä e'. Ì dör mok*i*ë ena sene michoë e' dör ye'. Kè yi döpa S'yé ska', e' kè dör ye' wa e' tä. <sup>7</sup> A' wä ye' suule mok*i*ë, e' tä es a' wä ye' Yé suule. I' tämi a' wä ie' suule, mok*i*ë isuétke a' tö.

<sup>8</sup> Felipe tö iché iā:

—A Skëkëpa, S'yé kkachó sa' a ta e' è dör wë'.

<sup>9</sup> Jesús tö iüté:

—A Felipe, ká taië ye' sené a' ta, ¿wes kè be' wa ye' suule? Yi tö ye' sué, ese tö S'yé sué ñies. ¿Wes be' ichèmi, 'S'yé kkachó sa' a'? <sup>10</sup> A Felipe, ¿be' kè wā iklöone tö ye' ena S'yé, sa' böi dör eköl è? Ì chekeyö a' a, e' kè chekü' ye' wā ye' wák er wa. Ì kōs kanewekeyö, e' kaneweke S'yé serke ye' a e' tö. <sup>11</sup> Iklö'ú tö ye' ena S'yé sa' böi dör eköl è. Ì chekeyö a' a, e' kè klö'wè a' tö, e' ta iklö'ú ì kè or yi a, ese wéyö e' wa. <sup>12</sup> Moki ye' tö a' a iché tö wépa erblé ye' mik, esepa tö ì wéke ye' tö, e' weraë ñies. Erë ye' mi'ke S'yé skà e' kueki ì oule ye' wā, ese weraë ie'pa tö, ye' wā ioule e' tsata. <sup>13</sup> Ì kōs kieke a' tö ye' ttò wa, e' weraëyö as S'yé olo taië e' kkayër ye' dör ilà e' wa. <sup>14</sup> Ì kōs kieke a' tö ye' a, e' weraëyö.

### *Jesús kablé Wiköl Batse'r patkök*

<sup>15</sup> “A' éna ye' dalër, e' ma ye' ttè dalöiëno e' dalöieraë a' tö. <sup>16</sup> Ye' tö ikieraë S'yé a ta ie' tö iskà patkeraë eköl a' kimuk, e' dör Sulaiökwak, ie' tso'ie a' ta kekraë. <sup>17</sup> Ie' dör Skëköl Wiköl. Ie' tö S'yé ttò moki e' kkacheraë a' a. Wépa kè tö Skëköl dalöië esepa kè a iWiköl wënuke ena ie'pa kè wā isuule, e' kueki ie'pa kè a ikinukwā e' kimoie. Erë a' wā ie' suule. Ie' serke a' ta, ñies ie' serdaë a' er a.

<sup>18</sup> “Ye' kè tö a' mepaat s'jchu'rlaie. Ye' datskene a' ska'. <sup>19</sup> Kukur ta wépa kè dör ye' icha esepa kè tö ye' suepaia. Erë a' tö ye' suerane. Ye' duowa shkenekane, e' batamik sene michoë doraë a' ulà a. <sup>20</sup> Mik e' kéwö de, eta a' wā ijcherdaë tö ye' ena S'yé sa' böi dör eköl è. Ñies a' wā ijcherdaë tö a' ena ye', se' dör wes wák eköl è es. <sup>21</sup> Wépa tö ye' ttè dalöiëno klö'wéke ta iwà iüteke, esepa éna ye' dalër. Wépa éna ye' dalër, esepa dalërdaë ye' Yé éna. Ñies ye' éna ie'pa dalërdaë ena ye' e' kkachöraë ie'pa a.

<sup>22</sup> Eta eköl skà kië Judas, kè dör Judas Iscariote, e' tö ie' a ichaké:

—A Skëkëpa, ¿wes be' e' kkachömi sa' a, erë be' kè e' kkachöpa sulitane a?

<sup>23</sup> Ie' iüté:

—Wépa éna ye' dalër, esepa tö ye' ttè iüteraë. Ie'pa dalëritseraë ye' Yé tö. Ie' ena ye', sa' doraë ie'pa ska' senuk ie'pa ta. <sup>24</sup> Wépa kè éna ye' dalër, esepa kè tö ye' ttè iütepa. Ttè chekeyö a' a, e' kè dör ye' wák ttè, e' dör Skëköl tö ye' patkë', e' ttè.

<sup>25</sup> “I' kōs chekeyö a' a, e' chekeyö ye' tso'ia a' ta e' dalewa. <sup>26</sup> Erë Sulaiökwak, e' dör Wiköl Batse'r, e' patkeraë Skëköl tö a' a ye' ttò wa. Ì kōs yé' ye' tö a' a, e' wa ie' tö a' wöbla'weraë as a' éna iarne.

<sup>27</sup> “Sene bèrë méatyö a' a, e' datse ye' wā. E' dör ichók kè dör wes sene bèrë cheke wépa kè tö Skëköl dalöië esepa tö es. E' kueki kè a' tkinuk, kè a' suanuk. <sup>28</sup> A' wā ittseüle tö ye' tö a' a iché tö 'ye' mi'ke erë ye' datskene a' ska'.' A' éna ye' dalër moki, e' ta a' ttsë'rdaë buaë tö ye' mi'ke S'yé ska', e' dör ye' tsata e' kueki. <sup>29</sup> I' ta ye' tö ichétke a' a kam iwà tkö e' yöki as mik iwà tka, eta a' erblö ye' mik.

<sup>30</sup> “Bé dör ká i' wökir, e' datsetke bet, e' kueki ye' kè a' kawö ta'ia ttök a' ta taië. Ie' kè diché ta' e' aloka ye' ki yës. <sup>31</sup> Erë ye' tö iwé wes ye' Yé tö ye' ka' iuk es as sulitane tö isau tö ye' Yé dalër ye' éna.

“Se' e' yölur íe, mishkatke.

## 15

### *Jesús dör wes uva kicha es*

<sup>1</sup> “Ye' dör uva kicha chökle, e' kaneweke ye' Yé tö. <sup>2</sup> Iulà wé kè wör, ese télor ye' Yé tö. Iulà wör ta' kōs, ese paikléloritö buaë maneneë as ikí wör taië. <sup>3</sup> A' pairiuletke maneneë ttè wa ye' tö a' wöbla'wé e' wa. <sup>4</sup> A' senú ye' ta' ñita, eta ye' serdaë a' ta' ñita. Mik ulà kè

ku'ia iwí mik, eta kè iwöria. Kè iwönuk iwák è mik. Es ñies a' kè ku' ye' mik, eta kè a' wörpa.

<sup>5</sup> “Ye' dör uva kicha. A' dör iulà. A' kè ku' ye' mik, eta kè ì onuk a' a yës. E' kueki wépa serke ye' mik, ñies ye' serke e'pa a, esepa wörke taië. <sup>6</sup> Wépa kè serku' ye' mik, esepa tērdattsā kéu bānet tā isinewā wes uva kicha ulà sir es. Iulà ese shtekeka uyèwā bö' a tā iñanewa.

<sup>7</sup> “A' serke ye' mik, ñies ye' ttè tso'ie a' er a, e' tā ì kos kiane a' ki, e' kió Skéköl a tā imeraëitö a' a. <sup>8</sup> Mik ì kiane Skéköl ki, ese wé a' tö, eta e' dör wes uva wör es. E' tö ye' Yé kikekeka taië. E' wa iwēnewā tö mokī a' dör ye' ttōkatapa. <sup>9</sup> Ye' éna a' dalēr wes ye' Yé éna ye' dalēr es. A' senú kekraë ye' mik as ye' tö a' dalërītsò kekraë. <sup>10</sup> Ye' ttè dalöiëno e' dalöieke a' tö, e' tā ye' tö a' dalërītsè michoë. E' dör wes ye' tö ye' Yé ttè dalöiëno e' dalöieke tā ie' tö ye' dalërītsè michoë es.

<sup>11</sup> “I' kos chekeyö a' a as a' ttsè'r buaë wes ye' es. Ye' ki ikiane tö a' ttsè'r buaë shütē. <sup>12</sup> Ye' ttè dalöiëno e' dör i': a' ñi dalërītsó wes ye' tö a' dalëritseke es. <sup>13</sup> Se' e' mettsā duökwa yile dalēr se' éna, e' skéie, e' tā kè se' éna yi dalëruk e' tsāta. <sup>14</sup> Ì uk ye' tö a' ké, ese weke a' tö, e' tā a' dör ye' sini'pa. <sup>15</sup> Ì bikeitseke ì kaneweke kanè wökir tö, ese kè jcher ikanè méso wā. Iwökir kè tö ipaketa' ie' a. Erë ì kos yé' ye' Yé tö ye' a, e' chéneyö a' a, e' kueki a' kè kièiyö ye' kanè mésopa, a' kiekeyö ye' sini'pa. <sup>16</sup> A' kè wā ye' shukite, e' skéie ye' tö a' shukit. Ye' tö a' patkeke as a' mi' wönuk buaë wes uva ulà es, erë iwö ese tso'ie kekraë. Es ì kos kié a' tö ye' Yé a ye' ttò wa e' meraëitö a' a. <sup>17</sup> Ye' ttè dalöiëno dör i': a' ñi dalërītsó.

#### *Pë' kè erblëne Jesús mik esepa tö Jesús ttōkatapa sueraë suluë*

<sup>18</sup> “Wépa kè tö Skéköl dalöie esepa tö a' suëke suluë, e' tā a' éna ianú tö ie'pa tö ye' su'bak suluë a' yöki kewe. <sup>19</sup> A' chópa wes ie'pa es, e' ma ie'pa tö a' dalërītsèmi wes ie'pa ñi dalēr es. Erë ye' tö a' shukit ie'pa shua, e' kueki i'ñe tā a' kè dör wes ie'pa es. E' kueki ie'pa éna suluë a' ar. <sup>20</sup> Ye' tö iyè'bak a' a tö 'ikanè méso kè dör iwökir tsāta, e' anú a' éna. Ie'pa tö ye' we'iké siarë, e' tā ie'pa tö a' we'ikeraë siarë. Ie'pa tö ye' ttò dalöié, e' tā ñies ie'pa tö a' ttò dalöieraë. <sup>21</sup> A' dör ye' ichapa. Ie'pa kè wā ye' Yé tö ye' patkë' e' suule. E' kueki ì kos suluë wambleraë ie'pa tö a' ki.

<sup>22</sup> “Ye' kè dōpa ká i' a, ye' kè ttè pakópa ie'pa a, e' ma ie'pa kè ki ì sulu nuí tā'. Erë i'ñe tā ie'pa kè tkōpashkar inuí ulà a. <sup>23</sup> Wépa tö ye' suëke suluë, esepa tö ye' Yé suëke suluë ñies. <sup>24</sup> Ì kè or yi a ese kè úpayö ie'pa wörki, e' ma ie'pa kè ki ì nuí tā'. Erë ie'pa tö isu'bak erë ie'pa tö ye' sué suluë, ñies ye' Yé sué suluë ie'pa tö. <sup>25</sup> Erë itka es as ì tso' kitule Skéköl yëkkuö ki, e' wà tkò es, e' tö ichè: 'Ie'pa tö ye' sué suluë kè wà tā!.'\*

<sup>26</sup> “Ye' tö Sulaiökwak tso' ye' Yé ska', e' patkeraë a' a, e' dör Skéköl Wiköl. Ie' dör Skéköl ttò mokī chökwa. Mik ie' de, eta ie' tö ye' tté cheraë. <sup>27</sup> A' manetwā ye' tā kuaë, e' kueki a' tö ye' tté cheraë ñies.

## 16

<sup>1</sup> Ttè e' kos chéyö a' a as a' erblö ye' mik e' kè olo'yò a' tö. <sup>2</sup> Ie'pa tö a' uyerattsā se' ñi dapa'wo wé a. Mokī kawö dökewatke tā yile tö a' ttéwā, e' tā e' tö ibikeitseraë tö es ie' tso' Skéköl kanè uk. <sup>3</sup> Ie'pa kè wā ye' ena ye' Yé suule mokī, e' kueki ie'pa e' wamblö es. <sup>4</sup> Erë ttè e' chéyö a' a as mik ikéwö de, eta a' éna iar.

#### *Ì weke Wiköl Batse'r tö, e' pakè*

Ye' tso'ia a' tā, e' kueki kuaë ttè e' kè yëne ye' wā a' a. <sup>5</sup> Erë i'ñe tā ye' mitkene, ye' Yé tö ye' patkë', e' ska'. Erë a' kè tö ye' a ichakè tö '¿Wé be' mi'ke?' <sup>6</sup> E' skéie a' erianeka taië,

\* 15:25 Salmos 35.19; 64.4

ì ché ye' tò a' a e' kueki. <sup>7</sup> Mokië ye' tò a' a ichè tò buaë idir a' a tò ye' mía. Ye' kè mìnè, e' ma Sulaiökwak kè dõpa a' a. E' kueki ye' tò a' a ichè tò buaë idir a' a tò ye' mía. Ye' mía, e' ta ye' tò Sulaiökwak patkeraë a' a. <sup>8</sup> Mik ie' de, etä ie' tò ikkacheraë wépa kè tò Skëköl dalöiè esepa a' a tò ie'pa e' wamblò sulu. Nies ie' tò ikkacheraë ie'pa a' a tò ye' eköl è dör yësyësë Skëköl wöa. Nies ie' tò ikkacheraë ie'pa a' a tò ie'pa kichatërdaë aishkuö ta. <sup>9</sup> Ie'pa kè erblöku' ye' mik, e' kueki ie'pa dör ì sulu wamblökwakpa. <sup>10</sup> Ye' mi'kene ye' Yé ska', e' kueki kè ye' suepaia a' a. E' wa ikkayëne ie'pa a' a tò ye' eköl è dör yësyësë Skëköl wöa. <sup>11</sup> Bé dör ká i' wakpa wökir e' kichatënetke, e' wa ikkayëne tò nies ie'pa kichatërdaë.

<sup>12</sup> “Tajë ye' wä íyi tso'ia chè a' a, erë i' ta kè a' a iwà anuk. <sup>13</sup> Erë mik Skëköl Wiköl ttò mokië e' de, etä ie' kè ttõpa iwák er wa. Ì ttseke ie' tò Skëköl ska', ese cherane ie' tò a' a. E' kueki ie' tò a' wöbla'weraë ttè moki kos ese wa. Ì tköraë aishkuö ta, ese cheraëitö a' a. <sup>14</sup> Ì tso' ye' er a, ese cheraneitö a' a. Es ie' tò ye' kikeraka. <sup>15</sup> Ì kos tso' ye' Yé er a, nies e' tso' ye' er a. E' kueki ye' tò a' a iché tò, ì tso' ye' er a, ese cherane Wiköl Batse'r tò a' a.

*Ittökatapa eriane e' manerdattsane ttsë'rdane buaë*

<sup>16</sup> “Bërbër setcha, etä kè a' a tò ye' suepaia. Erë e' ukuöki setcha, etä a' a tò ye' suèmine.”

<sup>17</sup> Ie' ttökatapa welepa ñi chaké:

—Ie' tò iché, ‘Bërbër setcha etä a' a kè tò ye' suepaia. Erë ekuölö ta a' a tò ye' suèmine.’ ¿Ì cheke ie' tò es? ¿Ima iwà dör? Nies ie' tò iché tò ‘Ye' mi'ke ye' Yé ska’.’ <sup>18</sup> Ie' iché ‘Bërbër setcha’ ¿ima e' wà kiane chè? ¿ì ché ie' tò, e' wà kè ane se' éna!”

<sup>19</sup> Jesús wä ijcher tò ie'pa éna ie' chakak, e' kueki ie' tò iché ie'pa a:

—Ye' tò ichè a' a: ‘Bërbër setcha, etä a' a kè tò ye' suepaia. Erë e' ukuöki setcha, etä a' a tò ye' suèmine.’ ¿E' wà chakeke a' a tò ñi a? <sup>20</sup> Moki yö ichè a' a tò a' iuraë kköchöraë siarë, erë wépa kè tò Skëköl dalöiè esepa ttsë'rdaë buaë. Erë a' eriaradaë, erë e' manerdattsane ttsë'rdane buaë. <sup>21</sup> Mik alaköl alà kurketke, etä ieriane tajë, ikirine e' kéwö de, e' kueki. Erë mik ilà kune, etä ittse'nene buaë. Ie' alà kune e' tò ie' ttsë'weke buaë. E' kueki ikirine weine siarë e' chowa ie' éna. <sup>22</sup> E' sù i'ñe ta a' eriarke siarë, erë se' ñi saurane, e' tò a' ttsë'werane buaë shute. Ttsë'ne buaë e' kè yënuksa yi a' a' er a.

<sup>23</sup> “Mik e' kéwö de, etä kè ì kiepaia a' a tò ye' a. Moki ye' tò a' a ichè tò ì kos kié a' a tò ye' Yé a ye' ttò wa, e' meraëitö a' a. <sup>24</sup> Ikkë ta a' kè wä ì kiule Skëköl a ye' ttò wa, erë i' ta ikiómitke ie' a, ikió ie' a kekraë etä imerdaë a' a as a' ttsë'r buaë shute.

*Jesús e' alékatke pë' kè erblène ie' mik esepa ki*

<sup>25</sup> “Ì kos chéyö a' a, e' chéyö ttè kleaule wa. Erë kawö döraë etä kè ye' tò ichèia a' a es. Ye' tò ye' Yé ttè pakeraë a' a wes idör es kè kleaule. <sup>26</sup> Mik e' kéwö de, etä ì kiane a' ki e' kieraë a' wákpa tò ye' Yé a ye' ttò wa. E' wà kiane chè tò kè ikianukia tò ye' tò ì kos kiane a' ki e' kiò ye' Yé a. Ie' wák éna a' dalër taië, e' kueki ì kiane a' ki, ese kièmi a' wákpa tò ie' a ye' ttò wa. <sup>27</sup> Ie' éna a' dalër, e' kueki a' wákpa tò ikièmi ie' a. A' éna ye' dalër, nies a' tò iklö'weke tò ye' dë'bitu ie' ska', e' kueki ie' éna a' dalër. <sup>28</sup> Ye' datse ie' ska' e' dë' ká i' a, i'ñe ta ye' mitkene ie' ska’.”

<sup>29</sup> Ittökatapa tò iché ie' a:

—Ì ta be' tso' ichök sa' a wes idör es kè kleaule. Be' kè ku' ichökia ttè kleaule wa. <sup>30</sup> Ire' sa' wä ijcher tò be' wä íyi kos e' jcher. Dò ì chakak sa' éna be' a, e' jchertke be' wä. E' kueki sa' tò iklö'wé tò be' datse Skëköl ska'.

<sup>31</sup> Jesús tò iiüté:

—¿Ire' a' tò iklö'wé? <sup>32</sup> A' tò ye' meraat ekörla. A' michone eköl eköl a' u a. Kawö e' datse, e' detke i' ta. Erë moki ye' kè ku' ekörla. Ye' Yé tso' ye' ta. <sup>33</sup> E' kos chéyö a' a as a' ser bèrë a' batsulewä ye' mik e' wa. Ká i' ki a' weirdaë siarë. Erë a' er kuú, jye' e' ali'kabak ì sulu diché ki!

## 17

*Jesús ikié S'yé a ittökatapa ki*

<sup>1</sup> Ttè ekkè ché Jesús tö one ta iká sué ká jaì a ta ichéitö: “A Yéwöla, ye' kékö detke. Ye' dör be' alà, e' olo kkachó as be' olo kkayër sulitane a ye' wa. <sup>2</sup> S'ditsö ulitane kékö me' be' tö ye' a as sene michoë mù ye' tö, wépa kos me' be' tö ye' a, esepa a. <sup>3</sup> Sene michoë e' dör tö ie'pa bats buaë be' dör Skéköl chökke eköl è e' mik, ñies ye' dör Jesucristo patké' be' tö e' mik.

<sup>4</sup> “Kanè me' be' tö ye' a wè ká i' a, e' wétkeyö. E' wa ye' tö be' olo kkayë'bitu. <sup>5</sup> E' kueki i' ta, a yéwöla, ye' tö be' a ikiè tö mik ye' dene be' ska', eta ye' olo kkachó, wes be' tö ye' olo kkayë' mik ye' bak be' ta kam ká i' yör e' yöki eta es.

<sup>6</sup> “Wépa shukitbak be' tö ká i' wakpa shua mè ye' a, e'pa a ye' tö ikkaché tö be' dör yi. Be' ichapa idir, e'pa me' be' tö ye' a. Ie'pa tö be' ttè iuteke. <sup>7</sup> I'ñe ta ie'pa wa ijcher tö ì kos wéyö, ñies ì kos chéyö, e' me' be' tö ye' a. <sup>8</sup> Ttè me' be' tö ye' a pakè, e' pakéyö ie'pa a, ta ie'pa tö iklö'wé. Ie'pa wa ijcher tö mokì ye' datse be' ska' patké' be' tö.

<sup>9</sup> “Ye' tso' be' a ikiök ie'pa ki. Ye' kè ku' ikiök wépa kè tö be' dalöieta' esepa ki. Ye' tso' ikiök wépa me' be' tö ye' a esepa ki, ie'pa dör be' icha e' kueki. <sup>10</sup> Wépa kos dör ye' icha, esepa dör be' icha. Ñies be' icha kos esepa dör ye' icha. Ie'pa wa ye' olo taië e' kkayëne.

<sup>11</sup> “Kè ye' serpaia taië ká i' ki. Ye' mitkene senuk be' ska'. Erë ie'pa ate ká i' ki. A Yéwöla batse'r, be' dalò taië, be' diché taië me' be' ye' a, e' wa ie'pa kkö'nú as ie'pa ser ñita wes wák eköl è es wes be' ena ye' es. <sup>12</sup> Mik ye' tso'ia ká i' a ie'pa ta, eta ye' tö ie'pa kkö'né tsatké diché me'bö ña e' wa. Ie'pa kos tsatkéyö. Wé wömenettsabak weinuk, e' è e' yé'ttsa sa' shua. Ie' è weinewa as iwà tkò wes be' yëkkuö tö ichè es.

<sup>13</sup> “Író ye' mitke be' ska', erë ttè i' chekeyö, ye' tso'ia ká i' a e' dalewa, as ie'pa ttsë'r buaë mokìe wes ye' es. <sup>14</sup> Be' ttè yé'yö ie'pa a, erë wépa kè tö be' dalöie esepa tö ie'pa suëke suluë. Ye' kè dör wes ká i' wakpa es, e' sù ye' ttökatapa kè dör wes ie'pa es. E' kueki ká i' wakpa tö ie'pa suëke suluë. <sup>15</sup> Ye' kè ku' ikiök be' a tö ie'pa yó'ttsa ká i' ki. Ye' tso' be' a ikiök tö ie'pa bló bé yöki. <sup>16</sup> Ye' kè dör wépa kè tö be' dalöie esepa eköl, ñies ye' ttökatapa kè dör ie'pa es. <sup>17</sup> Ie'pa klö'úbö be' wák è a be' ttè wa. Be' ttè dör mokì. <sup>18</sup> Ye' tso' ie'pa patkók ká i' wakpa shua, wes be' tö ye' patké' ká i' wakpa shua es. <sup>19</sup> Es ye' e' mù'ttsa be' a as ie'pa e' mù'ttsa mokì be' a ñies.

<sup>20</sup> “Ye' kè ku' ikiök be' a ie'pa è ki. Erë wépa erblömi ye' mik ie'pa ikképa ttò batamik, ñies esepa ki ye' tso' be' a ikiök. <sup>21</sup> Ye' tö be' a ikiè as ie'pa dò wes wák eköl è es. Be' ena ye', se' dör wák eköl è. Es ye' tö be' a ikiè tö ie'pa dò wes wák eköl è es se' ta wes se' dör eköl è es, as ká i' wakpa tö iklö'ù mokì tö be' tö ye' patké'. <sup>22</sup> Diché me' be' tö ye' a, e' mé ye' tö ie'pa a as ie'pa dò wes wák eköl è es, wes be' ena ye', se' dör eköl è es. <sup>23</sup> Ye' bàtse buaë ie'pa mik, ñies be' bàtse buaë ye' mik. Es idir as ie'pa dò mokìe wes wák eköl è es. E' dör es, e' ta ká i' wakpa wa ijcherdaë tö be' tö ye' patké'. Ñies ie'pa wa ijcherdaë tö be' éna ye' ttökatapa dalër taië wes be' éna ye' dalër es.

<sup>24</sup> “A yéwö, be' tö ie'pa me' ye' a. Ye' ki ikiane tö aishkuö ta ie'pa dömi ye' ta, wé ye' tso' ee, as ie'pa tö olo me' be' tö ye' a, e' saù. Kam ká i' yör, eta wake' be' éna ye' dalër taië, e' kueki olo e' me'bak be' tö ye' a. <sup>25</sup> A Yéwö, be' dör yësyësë. Wépa kè tö be' dalöie esepa kè wa be' suule, erë ye' wa be' suule. Ñies ie'pa ikképa wa ijcher tö be' tö ye' patké'bitu. <sup>26</sup> Ye' tö ie'pa a ikkayë' tö be' dör yi, e' kkachekeiyö ie'pa a as ie'pa ñi dalëritsò wes be' tö ye' dalëritseke es, ñies as ye' dò senuk ie'pa er a.”

## 18

*Judiowak tö Jesús klö'wéwa*

(Mateo 26.47-56; Marcos 14.43-50; Lucas 22.47-53)

<sup>1</sup> Jesús tté S'yé tã one, tã imía ittökatapa tã di'la kiè Cedrón, e' wışhet. Ie'pa de wé kal klò tso' tkëule ee. <sup>2</sup> Ee Jesús krá ñi dapa'uk ittökatapa tã, e' kueki Judas tö ie' wömekettsa, e' wã ká e' suule buaë. <sup>3</sup> E' itöki Judas demi ee Roma ñippökwakpa tã taië. Ñies Skököl wé, e' shkëkipa de ie' tã. E'pa patké judiowak sacerdotepa wökirpa ena fariseowakpa tö. Ie'pa de Judas tã bö'wö ki ena kuatak sí wöñarke taië ese ki, ñies tabè damirak iwã taië. <sup>4</sup> Ì wamblërketke ie' tã, e' kos jcher buaë ie' wã, e' kueki ie' dettsa tã ichaké ie'pa a:

—¿Yi yuleke a' tö?

<sup>5</sup> Ie'pa iiüté:

—Jesús Nazaret wak, e' yuleke sa' tö.

Jesús tö iché:

—Ye' idir.

Judas tö ie' wömekettsa, e' tso' ñippökwakpa tã. <sup>6</sup> Mik Jesús tö iché: “Ye' idir”, e' wösha tã ie' skéurak tsikka tã ianerörak iski. <sup>7</sup> Jesús tö iskà chaké ie'pa a:

—¿Yi yuleke a' tö?

Ie'pa tö iiüté:

—Jesús Nazaret wak.

<sup>8</sup> Jesús tö iskà iüté:

—Ye' tö ichétke a' a tö ye' idir. A' ye' yuleke, e'ma wépa tso' ye' tã, e'pa múat bër.

<sup>9</sup> Ie' tö iché es as ttè yé'itö iyé a, e' wã tkò. Ie' tö iyé': “wépa mé be' tö ye' a, esepa kè weinuk yës.” <sup>10</sup> Etã Simón Pedro wã tabè shkò, e' yéttsaitö tã sacerdoté kibi kanè méso, e' kukuõña ulà bua'kka téttsa, e' kiè Malco. <sup>11</sup> Jesús tö iché Pedro a:

—Be' tabè blówane ikkuölit a. Ye' Yé tö íyi bacha'bacha i' mé ye' a, e' tã ¿wes e' kè yepawayö?

#### *Jesús mítser Anás wörki*

(Mateo 26.57-58; Marcos 14.53-54; Lucas 22.54)

<sup>12</sup> Etã Roma ñippökwakpa ena iwökir kibi ena Skököl wé shkëkipa tö Jesús klò'wéwa muéwa iulà a. <sup>13</sup> Tã itsémirakitö kewe Anás u a. Anás dör Caifás nuaki. Duas e' wa Caifás dör judiowak sacerdoté kibi. <sup>14</sup> Caifás e' tö iyé' judiowak wökirpa a tö buaë idir ie'pa a tö wëm eköl è ttèwã ie'pa ulitane skéie.

#### *Pedro iblé tö kè ie' wã Jesús suule*

(Mateo 26.69-70; Marcos 14.66-68; Lucas 22.55-57)

<sup>15</sup> Simón Pedro ena Jesús ttökata skà eköl, e'pa böl mirwã Jesús itöki. Ittökata tso' Pedro wapieie, e' suule buaë sacerdoté kibi wã, e' kueki ie' dewã buaë Jesús tã sacerdoté kibi upa a. <sup>16</sup> Erë Pedro atë dur u'rkí ukkò tkër kañika ee. Etã ittökata suule sacerdoté kibi wã, e' biteane ttök tayë tso' ukkò kkö'nuk e' tã as Pedro döwã. Etã es Pedro dewã. <sup>17</sup> Etã tayë dur ukkò kkö'nuk, e' tö Pedro a ichaké:

—¿Yéne be' dör wëm klönewã e' klé?

Ie' tö iiüté:

—Au, ye' kè dör iklé.

<sup>18</sup> Ká dör seseë, e' kueki sacerdoté kanè mésopa ena Skököl wé shkëkipa tö bö' batséka baiklè. Ee Pedro de bö' baiklök ñies ie'pa tã.

#### *Sacerdoté kibi tö Jesús chaké*

(Mateo 26.59-66; Marcos 14.55-64; Lucas 22.66-71)

<sup>19</sup> Anás bak sacerdoté kibi e' tö Jesús chaké ittökatapa ki ena ttè wa ie' s'wöbla'weke, e' ki. <sup>20</sup> Jesús tö iiüté:

—Kekraë ye' tté sulitane kukua. Kekraë ye' tö s'wöbla'wé se' ñi dapa'wo wé kos a ena Skököl wé a wé sulitane ñi dapa'uke ee. Kè ye' wã ì yëule akir. <sup>21</sup> ¿Íók be' tö ye' chaké? Ì chéyö e' jcher wépa wã ye' ttsëule ichök, esepa wã. Ie'pa a ichakó.

<sup>22</sup> Mik e' ché Jesús tö, etã Skököl wé shkëkipa eköl tö ie' ppé iwö ki iulatö wa tã iché ia:

—¿Wes be' tö sacerdoté kibi iütèmi es?



<sup>23</sup> Jesús tö iiüté:

—Ì chéyö, e' dör suluë, e' ma ichó wé isulune. Erë ì ché ye' tö e' dör moki, e' ta ¿ì ki be' tö ye' ppé?

<sup>24</sup> E' ukuöki ta Anás tö Jesús patkemi moule Caifás ska', e' dör judiowak sacerdote kibi.

*Pedro tö ibléne tö kè ie' wa Jesús suule*

*(Mateo 26.71-75; Marcos 14.69-72; Lucas 22.58-62)*

<sup>25</sup> E' dalewa Pedro duria bö' baiklök ta ichakéraitö:

—¿Yëne be' dör wëm klönewa e' klé eköl?

Ie' iiüté:

—Au, ye' kè dör ie' klé.

<sup>26</sup> E' ukuöki ta sacerdote kibi kanè méso kukuöña tēja' Pedro tö, e' yami eköl tö ie' a iché:

—Ye' tö be' sué ie' ta, kal klò tso' tkéule ee.

<sup>27</sup> Pedro tö iskà bléne ta e' wösha ta dakro ane.

*Jesús mítser Pilato wörki*

*(Mateo 27.1-2,11-14; Marcos 15.1-5; Lucas 23.1-5)*

<sup>28</sup> Bla'mi, diwö tskirketke, eta Jesús yétsarakitö Caifás u a tsèmi judiowak wökir kiè Pilato, e' ska'. E' kè dör judiowak. Ie' tkéuleka Roma wakpa wa judiowak wökirie. Ee ie'pa tö Jesús tsémi. Judiowak éna Ie'pa Yépa Yërulune Egipto e' kéwö tkö'wak, e' kueki ie'pa kè e' ia'wakka. Ie'pa a ta shkëwa yi kè dör judiowak ese u a e' dör ñá, e' kueki ie'pa kè dë'wa Pilato u a. <sup>29</sup> E' kueki ie' dettsa ie'pa ta ttök, ta ie'pa a ichakéitö:

—¿Ì ki a' tö wëm e' kcateke?

<sup>30</sup> Ie'pa tö iiüté:

—Wëm e' kè tö íyi sulu wamblöpa, e' ma sa' kè wa ie' mène be' ulà a.

<sup>31</sup> Ie' tö ie'pa a iché:

—Itsúmine ta ishuló wes a' wakpa ttè dalöiëno e' tö ichè es.

Erë judiowak wökirpa tö iché:

—Kè sa' a kawö mène s'ttökwa.

<sup>32</sup> Mik e' ché ie'pa tö es, eta e' wa Jesús tö wes ie' duörawa e' yë', e' wà tka.\* <sup>33</sup> Pilato míane weshke ta Jesús kiéitö ta ichakéitö:

—¿Be' dör judiowak blú?

<sup>34</sup> Jesús tö iché ie' a:

—¿E' chaké be' tö be' wák er wa, ö yile tö ye' ché be' a e' kueki?

<sup>35</sup> Pilato tö iiüté:

—¿Ttsëskua ta ye' dör judiowak? Be' wák ditséwöpa ena sacerdote wökir kibipa, e' pa wa be' debitu ye' a shulè. ¿Ì sulu wamblébö?

<sup>36</sup> Jesús tö iiüté:

—Moki ye' dör blu', erë ì blúie ye' tso' e' kè dë'ka ká i' ki. Imú dör es, e' ma ye' ttökatapa ñippömi as judiowak wökirpa kè tö ye' klö'wëwa. Erë ì blúie ye' tso' e' kè dë'ka ká i' ki.

<sup>37</sup> Eta Pilato tö ie' a ichaké:

—¿E' ma moki be' dör blu'?

Jesús tö iiüté:

—Tó, wes be' iché e' ma es idir. Ye' dör blu'. Ye' kune' ká i' a ttè moki e' choie, e' kueki ye' dë'bitu. Wépa éna ttè moki dalër esepa kos tö ye' ttè iüteraë.

<sup>38</sup> Pilato tö ie' a ichaké:

—¿Ì dör ttè moki?

*Pilato tö iché tö Jesús ttówa*

*(Mateo 27.15-31; Marcos 15.6-20; Lucas 23.13-25)*

Pilato tö ichaké one ta ie' skà dettsa ttök judiowak ta, ta ichéitö ie'pa a:

\* 18:32 Juan 3.14 ena 12.32 saú.

—Ye' kè wà ì sulu kune Jesús kī. <sup>39</sup> Erë a' wöblanewatke tö mik A' Yépa Yërulune Egipto e' kèwö tkö'weke, età s'wötëule e' yekettsà èmine ye' tö eköl. ¿A' kī ikiane tö a' blú e' èmiyö?

<sup>40</sup> Ie'pa tö iiüté aneule:

—¡Ie' kè wöttsaar! ¡Barrabás wöttsoö sa' a!  
(Barrabás e' dör akblökwak.)

## 19

<sup>1</sup> Età Pilato tö Jesús ppök patké tsa' bata daloie wa. <sup>2</sup> Roma ñippökwakpa tö dika'kicha yué wöshkie tà itkékarakitö Jesús wökir kī blu'ie. Ñies ie'pa tö datsi' daloshdalosh ese iéka ikī blu'ie iwayuoie. <sup>3</sup> E' ukuökī tà idewarak tsinet ie' o'mik tà iché ia:

—¡Be' dör judiowak blú! ¡Be' mú kawö tkò buaë!

Taië ie'pa tö ippé iwö kī.

<sup>4</sup> Pilato dettsane tà iskà ché judiowak a:

—Isaú, ye' míá itsukbitu as a' wà ijcher tö ye' kè wà ttè kune ie' kkatoie.

<sup>5</sup> Età Jesús dettsà dika'kicha yöule wöshkie, e' tkëulekà iwökir kī tà ipaiëule blu' datsi' daloshdalosh ese wa. Pilato tö iché:

—I' dör wëm e'. A' tö isaú.

<sup>6</sup> Mik sacerdotepa wökirpa ena Skëköl wé shkëkipa tö Jesús sué, età ie'pa tö iché aneule:

—¡Iwötówa krus mik! ¡Iwötówa krus mik!

Pilato tö iché ie'pa a:

—Ye' kè wà ì ttè kune ie' kī, e' kuekī itsúmine, iwötówa a' wákpa tö krus mik.

<sup>7</sup> Judiowak wökirpa tö iché ie' a:

—Sa' wà ttè dalöiëno tso', e' tö ichè ie' kawöta ttèwa, ie' e' yé' tö ie' dör Skëköl Alà e' kuekī.

<sup>8</sup> Mik e' ttsé Pilato tö, età ie' kī suane taië. <sup>9</sup> Ie' míane u shua tà Jesús a ichakéitö:

—¿Wé be' datse?

Erë Jesús kè wà iiütëne yës. <sup>10</sup> Pilato tö iché ie' a:

—¿Lók be' kè ttò ye' tã? ¿Be' kè wà ijcher tö ye' a kawö tso' be' wötowa krus mik ö be' omine?

<sup>11</sup> Jesús tö iiüté:

—Skëköl kè wà kawö meule be' a, e'ma be' kè a wës ye' onuk. E' kuekī wépa tö ye' me'ttsa be' ulà a, e'pa kī inuí tso' be' tsata.

<sup>12</sup> Età Pilato tö ibikeitséka taië tö wës ie' a Jesús armimine, erë judiowak tö iché ie' a aneule:

—Be' ie' émine, e' tã be' míá romawak wökir kibi e' bolökie. Wé e' chò tö ie' dör blu', ese dör se' wökir kibi e' bolök.

<sup>13</sup> Mik e' ttsé Pilato tö, età Jesús tsuk patkéitö u'rkī. E' ukuökī tã ie' e' tkéser s'shulo kulé kī. E' atë uitö kī kiè hebreoie Gabatá eë (e' wà kiane ché uitö yöule ák wa). <sup>14</sup> E' dör Judiowak Yépa Yërulune Egipto e' kèwö tkö'weke e' chkì es, diwö detke bata a ekké. Età Pilato tö iché ie'pa a:

—¡I' dör a' blú!

<sup>15</sup> Erë ie'pa tö iché aneule:

—¡Ittówa! ¡Ittówa! ¡Iwötówa krus mik!

Pilato tö ie'pa a iché:

¿Ima a' ibikeitsè tö ye' tö a' blú ttèwami?

Sacerdotepa wökirpa tö iiüté:

—Sa' blú eköl è, e' dör romawak wökir kibi.

<sup>16</sup> Età ie' tö iwé Jesús tã wës ie'pa kī ikiane es. Ie' tö iméttsa ñippökwakpa ulà a wötèwa krus mik tã ie'pa wà imítser.

*Jesús wötéwarakitö krus mik**(Mateo 27.32-44; Marcos 15.21-32; Lucas 23.26-43)*

<sup>17</sup> Etä Jesús e' yéttsa Jerusalén, krus kueramiitö michoë ká kiè S'wökirdiche ee (ká e' kiè hebreoie Gólgota). <sup>18</sup> Ee ie'pa tö iwöté krus mik. Nies wëpa böl sulusipa wötëne krus mik wi'kë iö'kë, Jesús atë ie'pa shushäë. <sup>19</sup> Pilato tö ishtök patké kaltak ki, e' batséwarakitö Jesús krus mik. Ikitule e' tö ichè: “I' dör Jesús Nazaret wak dör judiowak blú e'.” <sup>20</sup> Wé ie' wötéwarakitö krus mik, e' atë Jerusalén tsinet, e' kuëki taië judiowak tö ikitule e' sué. Ikitule ttè mañatökicha wa: hebreoie, latinie ena griegoie. <sup>21</sup> E' kuëki judiowak sacerdotepa wökirpa tö iché Pilato a:

—Kè ishtar tö ie' dör judiowak blú. Ishtó tö ie' e' chò tö ie' dör judiowak blú.

<sup>22</sup> Erë Pilato tö iiüté:

—Ì shtétke ye' tö, e' shtétkeyö, iméattkeyö es.

<sup>23</sup> Roma ñippökwakpa tö Jesús wötéwar krus mik, e' ukuöki ta ie'pa tö idatsi' blatélor ie'pa tkël a. Erë Jesús datsi' batsië e' atë. Datsi' e' yöule alabo, <sup>24</sup> e' kuëki ie'pa tö iché ñi a:

—Kè se' tö ijchëlor. Mishka inuk ákwöla wa isuöie tö yi ulà a iatmi.

Es itka wës itso' kitule Skëköl yëkkuö ki es, e' tö ichè: “Ye' datsi' blabatsélor ie'pa tö ñi a, ta inérak ákwöla wa isuöie tö yi ulà a ye' datsi' batsië e' atmi.”\* Es Roma ñippökwakpa tö iwé.

<sup>25</sup> Krus o'mik Jesús mì ena imila ena María dör Cleofás alaköl ena María Magdala wak e'pa iëter. <sup>26</sup> Mik Jesús tö imì ena ittökata dalër taië ie' éna, e'pa sué iëter ee, etä ichéitö imì a:

—A tayë, së be' alà dur.

<sup>27</sup> Etä ie' tö iché ttökata ñe' a:

—Së be' mì dur.

Es ittökata ñe' wä Jesús mì mítser kkö'nè ie' u a.

*Jesús duowa**(Mateo 27.45-56; Marcos 15.33-41; Lucas 23.44-49)*

<sup>28</sup> Jesús wä ijcher buaë tö ì uk ie' dë'bitu, e' wakaneone. Nies ttè kitule Skëköl yëkkuö ki, as e' wà tkò, e' kuëki ie' tö iché: —Ye' er sine.

<sup>29</sup> Etä ee tkä' tkër, e' a vino shköshköë tso'. E' wa ie'pa tö suiyök nuwéka, ta itkéka kal kiè hisopo, ese ulatska ki, ta itkéwa ie' kkò a. <sup>30</sup> Ie' tö ikuyé ta ichéitö:

—Ì kos uk ye' dë'bitu, e' wakaneonetke.

E' ukuöki ta ie' e' wöéwa ta iwiköl émiitö, es iduowa.

*Jesús nu tkéraitö ichane a kuaböt wa*

<sup>31</sup> Kawö e' wa, judiowak e' katablöke Ie'pa Yépa Yërulune Egipto e' kéwö tkö'wëkerakitö bule es, e' yöki. Bule es e' dör eno diwö. Erë eno diwö e' batseitseke taië shutë ie'pa tö, e' kuëki ie'pa wökirpa kè ki ikiane tö pë' wötëulewä krus mik, esepa nu mëat dò bule es. E' kuëki ie'pa tö ikié Pilato a tö itu' puklor patkó as iduölor bet ta inú öwarakitö iski wötëwä. <sup>32</sup> Etä Roma ñippökwakpa mía, ta wëm kewe e' tu' péwä, e' ukuöki ta ñies iëköl wötënewä Jesús ta krus mik, e' tu' péwä. <sup>33</sup> Erë mik ie'pa de Jesús ska', etä ie'pa tö isué tö iduowatke. E' kuëki ie'pa kè wä itu' panewä.

<sup>34</sup> Erë ñippökwak eköl, e' tö Jesús nu àr e' tké kuaböt wa ichane a ta pé ena di' dettsa. <sup>35</sup> E' kos tka, e' sué ye' tö ye' wák wöbla wa, e' chök ye' tso' a' a. Ì chekeyö, e' dör mokì. Ye' wä ijcher tö e' dör mokì. Ipakekeyö a' a as a' erblò ie' mik. <sup>36</sup> E' kos tka as ì tso' kitule Skëköl yëkkuö ki e' wà tkò, e' tö ichè: “Ie' diché kè parpawä yës.”† <sup>37</sup> Ikitule skà tö iché: “Ie' tkëule kuaböt wa, e' suëraë ie'pa tö.”‡

\* 19:24 Salmo 22.18 † 19:36 Salmo 34.20 ‡ 19:37 Zacarías 12.10

*Jesús nu wötéwə ie'pa tö pö a*

(Mateo 27.57-61; Marcos 15.42-47; Lucas 23.50-56)

<sup>38</sup> E' ukuöki ta wëm de eköl kiè José Arimatea wak, e' dör Jesús klé eköl, erë ie' suane judiowak wökirpa yöki, e' kueki ie' dör iklé eköl kè jcher yi wa ese. Ie' tö Pilato a kawö kié Jesús nu tsukmi blè. Pilato tö ie' a ikéwö mé, etä ie' mía ta Jesús nu mítser iwä. <sup>39</sup> Nicodemo dë'rö ttök Jesús ta nañewe, e' wák debitu José ta. Kapöli tso' s'nu patioie as kè inurwa bet, e' debitu Nicodemo wa dò kilo dabom mañayök (30) ekkè. Kapöli e' shutule kiò masmas kiè mirra ena áloe ese wa. <sup>40</sup> Ie'pa böi tö Jesús nu patréwə datsi'tak batsjé bua'buə saruru nuulekə kapöli e' wa wës judiowak wöblar es. <sup>41</sup> Wé Jesús du'wa krus mik, eë tsinet kal klò tso' tkëule. E' a ákuk tso' biule et s'nu blóie, erë kam s'nu blëria. <sup>42</sup> Pö e' atë tsinet wé Jesús dunewə eë, ñies judiowak eno diwö döketke, e' kueki ie'pa tö Jesús nu blé eë.

## 20

*Jesús shkenekane*

(Mateo 28.1-10; Marcos 16.1-8; Lucas 24.1-12)

<sup>1</sup> Eno diwö, e' bule es bla'mi, ká ià ttsettseë ta María Magdala wak mía wé Jesús nu blène eë. Ie' tö isué tö ák wa ákuk kkò wötëule, e' sinettsa bánet. <sup>2</sup> Ie' tunemi bet wé Simón Pedro ena Jesús ttökata skà tso' eë. Ittökata e' dalëritsök ie' bak tajë. Ta ichéitö ie'pa a:

—jYile wa Skëképa nu minetsër! jKè sa' wa ijcher tö wës ie'pa tö iwé!

<sup>3</sup> Ie'pa míyal pö a. <sup>4</sup> Ie'pa böi tunemirak, erë Jesús ttökata ñe' tunemi bet Pedro tsata, e' kueki ie' demi kewe pö a. <sup>5</sup> Eë ie' e' wöewa ta iká sué ákuk shüa. Jesús nu kè ku'. Ie' tö datsi' wa Jesús nu parratewə e' è sué, erë kè ie' minewə ákuk a iweblök. <sup>6</sup> Ie' itöki Simón Pedro debitu míwa ákuk a ta ñies e' è suéitö. <sup>7</sup> Ñies datsi'tak wa Jesús wökir monewə, e' suéitö wörrat tër bánet. <sup>8</sup> Jesús ttökata de kewe, e' míwañak ákuk a ta isuéitö ta iklò wéitö tö mokí Jesús shkenekane. <sup>9</sup> Kam ie'pa éna iwə arwə tö Jesús kawöta shkenukkane wës ikitule Skëköi yëkkuö ki es. <sup>10</sup> E' ukuöki ta ittökata böi míyalne wé ikapökerö eë.

*María tö Jesús sué shkëulekane*

(Marcos 16.9-11)

<sup>11</sup> María iü dur ákuk kkò a. Ie' iukeia ta ie' e' wöewa ká sauk ákuk a. <sup>12</sup> Etä Skëköi biyöchökwakpa suéitö böi idatsi' saruruë, e'pa tulur wé Jesús nu bak tër eë. Eköl tkër wé iwökir bak tër eë, iëköi tkër wé iklò bak tër eë. <sup>13</sup> Ie'pa tö María a ichaké:

—A tayë, jì iëitseke be' tö?

Ie' tö ie'pa iuté:

—Ye' Këképa nu minetsër yile wa. Kè ye' wa ijcher tö wës ie'pa tö iwé.

<sup>14</sup> E' wöshə ta María wötrée ta eë Jesús dur. Ie' tö isué erë ie' kè wa isunewə tö Jesús idir. <sup>15</sup> Jesús tö ie' a ichaké:

—A tayë, jì iëitseke be' tö? jYi yuleke be' tö?

María tö ibikeitsé tö eë idur e' dör kal klò tso' tkëule, e' kanéukwak, e' kueki ie' tö iché ie' a:

—A këképa, be' wa iminetsër, e' ta ichó ña wé be' tö iblé, as ye' mi' itsuk.

<sup>16</sup> Etä Jesús tö iché ie' a:

—jA María!

Ta María e' wötrée ta ichéitö ie' a hebreoie:

—jRabuni! (e' wə kiane chè: “S'wöbla'ukwak”)

<sup>17</sup> Jesús tö iché ie' a:

—Ye' ówa. Kam ye' mi'ka ye' Yé ska', e' kueki kè ye' wöklö'waria. Erë be' yú ichök ye' ttökata a tö ye' mi'kekane ye' Yé ska', e' dör a' Yé ñies. Ie' dör ye' Këköi, a' Këköi ñies.

<sup>18</sup> Etā María Magdala wak mía Jesús ttókatapa ska', tā ichéitō: “Ye' tō Skékēpa sué.” Nies ì kōs ché Jesús tō ie' a, e' pakéneitō Jesús ttókatapa a.

*Jesús e' kkaché ittókatapa a*

(Mateo 28.16-20; Marcos 16.14-18; Lucas 24.36-49)

<sup>19</sup> Eno diwō, e' bule es nañewe tā Jesús ttókatapa tulur ñitā u etkue è a. Ie'pa suane judiowak wókirpa yókí, e' kuékí ie'pa u wékkō wöté'tkēr darērē. Erē e' bet tā ie'pa tō isué tō Jesús de dur ie'pa shuā. Ie' tō ie'pa shke'wé ttē i' wa:

—¡A' senú bèrè!

<sup>20</sup> Mik e' ché one tā ie' tō iulà ena ichane shka'ule, e' itò kkaché ie'pa a. Etā ittókatapa ttsē'ne buaé tō Skékēpa suéne ie'pa tō ttsē'ka. <sup>21</sup> Ie' tō iskà ché ie'pa a:

—¡A' senú bèrè! Wēs ye' Yé tō ye' patké'bitū ká i' a ie' ttē pakök, es ye' tō a' patkémi ye' ttē pakök.

<sup>22</sup> Ie' tō ie'pa wöiké siwā' wa tā ichéitō ie'pa a:

—Wiköl Batsē'r kiówa buaé a' tō a' er a. <sup>23</sup> Yi kī íyi sulu nuí tso', ese olo'yé a' tō, e' tā ñies Skéköl tō ilo'yeraé iki. Yi kī íyi sulu nuí tso', ese kè olo'yane a' wā, e' tā ñies Skéköl kè tō ilo'yepa iki.

*Tomás tō Jesús suéne ttsē'ka*

<sup>24</sup> Jesús ttókatapa dabom eyök kī böi (12), e' eköl kiè Tomás, e' kiè ñies Dídimō. Ie' kè ku' imalepa tā mik Jesús dē'dur ie'pa shuā etā.

<sup>25</sup> E' kueki ie'pa tō iché ie' a:

—Sa' tō Skékēpa sué.

Erē Tomás tō ie'pa a iché:

—Ye' kè wā iulà shka'ule clavo wa, e' itò sune, ye' kè wā ye' wák ulatska patkēnewā itò a, ye' kè wā ye' ulà patkēnewā ichane shka'ule e' a, e' ma ye' kè tō yi ttē klö'wepa yēs.

<sup>26</sup> Ká de pàköl, etā Jesús ttókatapa skà iēnene iu a, etā Tomás tso'ñak ie'pa tā. U wékkō wöté'tkēr, erē Jesús skà dedurne ie'pa shuā, tā ichéitō ie'pa a:

—¡A' senú bèrè!

<sup>27</sup> E' ukuökí tā ichéitō Tomás a:

—Be' ulatska patkówa ye' ulà shka'ule a, etā isaú. Be' ulà patkówa ye' chane shka'ule e' a. Kè ibikeitsariā bötböt. ¡Iklö'ú!

<sup>28</sup> Etā Tomás tō iiuté:

—¡Be' dör ye' Blú! ¡Be' dör ye' Kéköl!

<sup>29</sup> Jesús tō iché ie' a:

—Be' ye' sué, e' kuékí be' erblé ye' mik. Erē wépa erblé ye' mik, eré kè iwā ye' sune, ¡ayēcha buaé esepa!

*Yēkkuö i' wà dör i' es*

<sup>30</sup> Ì kè or yi a ese o' tajē Jesús tō ittókatapa wörki ikkachoie tō yi dör ie', ese kibiie kè kitule yēkkuö i' kī. <sup>31</sup> Erē yēkkuö i' shtekeyö as a' tō iklö'ù tō Jesús dör Skéköl Alà pairine'bitū idi' wa s'blúie e'. Nies ishtekeyö as sene michoë dò a' ulà a, a' erblò ie' mik e' wa.

## 21

*Ittókatapa kul tō Jesús suéne ttsē'ka*

<sup>1</sup> E' ukuökí tā Jesús e' kkachéne ittókatapa a batsöri kiè Tiberias, e' kkömik. E' paké dör i' es: <sup>2</sup> Ittókatapa ñi dapa'wé ee, e'pa dör Simón Pedro, Tomás (e' kiè ñies Dídimō), Natanael (e' dör ká kiè Caná atē Galilea e' wak), Zebedeo ala'r böi tso'ñak, ñies Jesús ttókatapa skà böi tso'ñak. <sup>3</sup> Simón Pedro tō iché ie'pa a:

—Ye' mía nima klö'uk kla' wa.

Ie'pa tō iiuté:

—Sa' mi'keñak be' ta.

Etā ie'pa míyal ta ie' iékarak kanò a. Erë e' nañewe ie'pa kè wā nima klöone yës. <sup>4</sup> Mik ká ñirketke, etā Jesús demi batsöri kkömik, erë ittökatapa kè wā ijcher tö ie' idir. <sup>5</sup> Ie' tö ie'pa a ichaké:

—A wëpa, ¿a' nima klöne?

Ie'pa tö iiuté:

—Au, kè sa' wā iklöne yës.

<sup>6</sup> Etā ie' iché:

—A' kla' uyó ulà bua'kka kke, etā nima klördaë.

Etā ie'pa tö iuyé ta iwà klöne taië, kè dë'kaia ie'pa ki. <sup>7</sup> Etā ittökata dalër taië ie' éna, e' tö iché Pedro a:

—¡Skëképa Jesús idir!

Mik Simón Pedro tö ittsé tö Skëképa Jesús idir, etā bet idatsi' iékanéitö, ie' dur kiparuó è mik kaneblök e' kueki. Etā ie' e' ppée di' a ulaiklémi dömi Jesús ska'. <sup>8</sup> Jesús ttökatapa malepa wā kanò datse batsöri kkömik, kla' wà deka chië, e' kueratse enaena. Ie'pa tso' kukuie batsöri kkò a, cien metro ekkë, e' kueki ie'pa tö kla' kueratse. <sup>9</sup> Mik ie'pa e' yéttsa kanò a, etā ie'pa tö isué bö' ñarke, e' ki nima me'r etö. Ñies pan tso'. <sup>10</sup> Etā Jesús tö iché:

—Nima klö'wé a' tö, e' wele tsúbitu.

<sup>11</sup> Simón Pedro e' iéka kanò a ta ikla' wà deka chië nima blublu è wa, e' yéttsaitö ká sí ki. Nima döka cien eyök kí dabom skeyök kí mañatö (153). Nima e' dör taië, erë ikla' kè butsolone. <sup>12</sup> Jesús tö ie'pa a iché:

—A' shkó chkök.

Ie'pa wā ijcher tö Skëképa Jesús idir, e' kueki ie'pa kè wā ie' a ichakine tö ¿be' dör yi?

<sup>13</sup> E' ukuöki ta ie' mía bö' kkömik ta pan ena nima klö'wéitö blaté méitö ittökatapa a.

<sup>14</sup> I' ta mañatökicha Jesús e' kkachéne ittökatapa a ishkenekane e' ukuöki.

#### *Jesús tté Pedro ta*

<sup>15</sup> Ie'pa chké one ta Jesús tö ichaké Simón Pedro a:

—A Simón, Juan alà, ¿be' éna ye' dalëne, ye' ttökatapa malepa éna ye' dalër, e' tsata?

Pedro tö iiuté:

—A Këképa, be' wā ijcher tö be' dalëne ye' éna.

Jesús tö iché ia:

—E'ma wëpa dör ye' icha, esepa kkö'nú ña buaë wes obeja kkö'nukwakpa tö iobejala kkö'neke buaë es.

<sup>16</sup> Jesús tö iskà chakéne:

—A Simón, Juan alà, ¿be' éna ye' dalëne?

Pedro tö ie' a iché:

—A Skëképa, be' wā ijcher tö be' dalëne ye' éna.

Jesús tö iché:

—E'ma wëpa dör ye' icha, esepa kkö'nú ña buaë wes obeja kkö'nukwakpa tö iobejala kkö'neke buaë es.

<sup>17</sup> Jesús tö Pedro a iskà chakéne i' ta ide mañatökicha.

—A Simón, Juan alà, ¿be' éna ye' dalëne?

Jesús tö Pedro a ichaké mañatökicha, e' kueki Pedro erianeka. Ie' tö Jesús iuté:

—A Skëképa, ì kos jcher be' wā. Be' wā ijcher tö be' dalëne ye' éna.

Jesús tö ie' a iché:

—E'ma wëpa dör ye' icha, esepa kkö'nú ña buaë wes obeja kkö'nukwakpa tö iobejala kkö'neke buaë es. <sup>18</sup> Mokí ye' tö be' a ichè tö mik be' bak duladula, etā be' wák e' paiöke ena be' mi'ke wé be' wák shkak ee. Erë mik be' dewā wö'kela siarëla, etā be' ulà shülöraë ta o'ka tö be' ki datsi' ieraë ta be' tseramiitö wé be' kè shkak ee.

<sup>19</sup> Ttè e' wa Jesús tö iwaché Pedro a tö wes ie' duörawā, e' wa ie' tö Skëkök kikeraka. E' ukuöki ta Jesús tö iché ia:



—Be' e' tkówā darërë ye' ttökataie kēkraë.

*Ittökata dalër taië Jesús éna, e' pakè*

<sup>20</sup> Pedro e' wötrée tö isué tö Jesús ttökata dalër taië ie' éna, e' datse ie'pa itöki. Mik Jesús ttökatapa bata chka' ie' ta, eta ittökata e' e' tkésër tkër Jesús o'mik ta ie' a ichakéitö, “A Skëképa, ¿yi tö be' wömerattsä?” <sup>21</sup> Mik Pedro tö isué Jesús ttökata e' datse ie'pa itöki, eta ie' tö Jesús a ichaké:

—A Skëképa, be' ttökata datse se' itöki ¿ì tkòmi e' ta?

<sup>22</sup> Ie' tö iiüté:

—Ye' ki ikiane tö ie' at ttsé'ka dò mik ye' döne ekkë, e' ta ¿wës e' de be' yöki? Be' e' tkówā darërë ye' ttökataie kēkraë.

<sup>23</sup> Ttè e' kueki Jesús ttökata e' tté tìnekā iyamipa shuā, tö kè iduòpawā. Erë Jesús kè wā iyëne tö kè iduòpawā. É ie' tö iché: “Ye' ki ikiane tö ie' at ttsé'ka dò mik ye' döne ekkë, e' ta ¿wës e' de be' yöki?”

<sup>24</sup> Jesús ttökata e' tso' ttè i' pakök a' a, e' tso' ttè i' shtök yëkkuö i' ki. Sa' wā ijcher tö ttè i' dör mokië.

<sup>25</sup> Jesús tö ì skà o' taië, e' kos shtópa yëkkuö ki, e' ma ye' iklö'wé tö yëkkuö kitule e' kos kè chöpakā ká i' a.

## Ì ɔ' Jesús ttekölpa tsá e'pa tö e' pakè

### Hechos

Yëkkuö i' dör yëkkuö skà kit Lucas tö Teófilo a e', i' ta ide böt. Itsá kite ie' a e' dör ì ɔ' Skëképa Jesús tö e' pakè. Ie' mine'ka ká jài a e' ukuöki ta ì kí ɔ' ie' tö ká i' ki ittekölpa tsá e'pa wa Wiköl Batse'r batamik, e' pakè Lucas tö yëkkuö i' ki.

Kam Jesús mi'kane ká jài a e' yöki ie' tö ittekölpa tsá e'pa patké ttè i' wa: Mik Wiköl Batse'r de a' ki, etä ie' tö diché meraë a' a ye' ttè pakoie. A' miraë ipakök s'tso' kos Jerusalén e'pa a. Nies ipakeraë a' tö s'tso' Judea ká malepa a ena Samaria ena ká wa'ñe dò wé íyök erkerö ee. E' tso' kitule yëkkuö i' ki 1.8 ee. E' ukuöki ta ì ɔ' Skëköl tö Pedro wa Jerusalén ena Judea ká malepa ena Samaria e' tté tso' kitule yëkkuö i' ki.

E' ukuöki ta Pablo tö Jesús tté buaë paka' ká taië wakpa a e' tté kit Lucas tö yëkkuö i' ki. Yëkkuö i' wa Lucas tö se' a ikkachè tö Jesús dör sulitane tsatkökwak.

Lucas bak s'kapeyökwakie. Iekkè ta ká kos wé Pablo dë'rö ee Lucas mir ie' ta. E' kueki Lucas tö isu' iwák wöbla wa tö wes Skëköl kaneblë' Pablo wa. E' tté tso' kitule yëkkuö i' ki.

#### Skëköl tö iWiköl patkeraë

<sup>1-2</sup> A këkë Teófilo, ì ɔ' Jesús tö ena ì wa s'wöbla ɔ'itö kuaë dò mik imineka ká jài a, e' kos paka' ye' tö be' a yëkkuö tsá kityö e' ki. Kam ie' mi'kane ká jài a, e' yöki ì kiane ie' ki tö ittekölpa tsá shukitbakitö, e'pa tö iwè, e' uk ie'pa kèitö Wiköl Batse'r wa. <sup>3</sup> Ie' kötewa shkenekane, e' ukuöki ta ie' wák e' kkayëne taië ie'pa a döka ká dabom tkëyök (40) ekkë. Es ie' tö ie'pa a ikkaché tö moki ie' tso'ne ttsë'ka. Nies ie' tö ì blúie Skëköl tso' e' tté pakè ie'pa a. <sup>4</sup> Ká et ta ie' tso' ittekölpa tsá e'pa ta, ta ichéitö iarak:

—A' kè kàne e' yöksa Jerusalén. Ye' Yé kablë' iWiköl patkök a' a yë' ye' tö a' a, e' panú dò mik ide etä. <sup>5</sup> Juan tö s'wösuk di' a, erë ká kè tköpa taië ta Skëköl tö a' ierawa iWiköl Batse'r a.

#### Jesús mineka ká jài a

<sup>6</sup> Mik Jesús ttekölpa tsá ñi dapa'wéka ie' ta, etä e'pa tö ie' a ichaké:

—A Skëképa, ¿i' ta be' tö se' wakpa tkekekane se' Israel aleripa, e' wökirpaie?\*

<sup>7</sup> Ie' tö iiuté:

—E' kèwö kè mène a' a jchenoie. E' kèwö tso' ye' Yé wa klöuletke. <sup>8</sup> Erë mik Wiköl Batse'r de a' ki, etä ie' tö diché meraë a' a ye' tté pakoie. A' miraë ipakök s'tso' kos Jerusalén e'pa a. Nies ipakeraë a' tö s'tso' Judea ká malepa a ena Samaria ena ká wa'ñe dò wé íyök erkerö ee e'pa a.

<sup>9</sup> Mik ie' tö e' ché one, etä ibutséka mía ká jài a ie'pa wörki ta ichowa mò shua kè wër ta'ia. <sup>10</sup> Ie'pa tso' ká sauk ká jài a krereë tö wes imichoka, e' dalewa bet wëpa bül datsi' saruruë de iëter ie'pa ɔ'mik. <sup>11</sup> E'pa tö iché iarak:

—A Galilea wakpa ¿iók a' iëteria ká sauk ká jài a? Jesús bak a' shua e' mítser Skëköl wa. Wes a' tö isuë tö imía ká jài a, e' suë idörane ká i' ki.

#### Matías atë Judas skéie

<sup>12</sup> Etä Jesús ttekölpa tsá e'pa tso' Olivo kébata a, ie'pa biteane Jerusalén. E' ñalé dör wekkè ulat kawö mène judiowak a shkoie eno diwö a ekkë.† <sup>13</sup> Mik ie'pa dene Jerusalén ta ie'pa tkaka u etkuö ki wé ikapökerak ee. Ee itso'rak Pedro, Juan, Santiago, Andrés, Felipe, Tomás, Bartolomé, Mateo, Santiago Alfeo alà, Simón Celote, nies Judas Santiago

\* <sup>1:6</sup> Israel aleripa e' wökirpaie: Jesús ttekölpa tso'ia ibikeitsök tö ie' e' tkökeka Israel aleripa blúie ie'pa ká ki ta ie'pa tkekeka ie' kayupaie. † <sup>1:12</sup> shkoie eno diwö a ekkë: E' dör kilómetro etk ulatök.

alà. <sup>14</sup> Ie'pa ulitane ñi dapa'uke kekraë ttök S'yé ta. Alakölpa welepa ena María, Jesús mi, ena Jesús elpa, e'pa tso'ñak ie'pa ta ttök S'yé ta.

<sup>15</sup> Jesús mik erblökwakpa e' dapa'uke e'pa döka cien eyök ki dabom böyök ekkë ulatök (120). E' kəwö ska' ta Pedro e' kəka ie'pa wörki ta ichéitö: <sup>16</sup> “A yamipa, ima Judas yé' Wiköl Batse'r tö se' blú bak David e' wa, e' wà tka wes itso' kitule Skököl yëkkuö ki es. Judas wa pë' míne Jesús klö'ukwa. <sup>17</sup> Ta ie' bak Jesús kléie wes se' es, ie' bak kaneblök Jesús ta wes se' es. <sup>18</sup> (Ie' tö ì sulu wamblé', e' ské wa ie' tö ká tué et. E' ukuöki ta ie' anebitü wöwakköt ñawi tskinewa ta ñattse yerulune. <sup>19</sup> Mik Jerusalén wakpa tö ttè e' ttsé, eta ká e' kiè mèkarakitö iwákpa ttè wa Hacéldama e' wà kiane ché S'pé Ké). <sup>20</sup> Es itso' kitule Skököl yëkkuö kiè Salmo e' ki e' tö iché i' es:

‘As ie' u weir

ñies as kè yi seriä e' a.’<sup>‡</sup>

Ñies ichéitö:

‘Q'ka múka iskie ie' kanè méat e' kanéukne.’”<sup>§</sup>

Es itso' kitule Skököl yëkkuö ki.

<sup>21</sup> “Wëpa tso' íe e'pa manetwa se' ta kekraë Jesús bakia se' shua eta. <sup>22</sup> Mik Juan tö Jesús wösuk e' kos ta ie'pa tso'ñak se' ta dö mik Jesús minea ká jaì a eta. Se' kawöta wëpa ekkëpa shushtök eköl se' kúie as itö Jesús shkenekane, e' ttè pakò se' ta.”

<sup>23</sup> Es ie'pa tö wëpa shushté bö. Eköl kiè José, e' kiè Justo ñies. E' kkabata dör Barsabás. Iëköl kiè Matías. <sup>24</sup> Eta ie'pa tö ikié S'yé a i' es: “A Skököl, be' wa sulitane er suule buaë. E' kuëki ikkachó sa' a wéne shushté be' tö <sup>25</sup> as iat Jesús ttekölpa tsá e' kúie Judas skéie. Judas e' wamblé sulu, e' kuëki ie' tö kanè e' méat ta imía weinuk wé ikawöta weinuk ee.”

<sup>26</sup> Eta ie'pa iné isuoie tö wëpa bö shushtétke ie'pa tö e' wéne kiè dömittsa. Eta Matías kiè dettsa. Es ie' atë Jesús ttekölpa tsá e' kúie imalepa döka dabom eyök ki eköl (11) e'pa ta.

## 2

### *Wiköl Batse'r de Jesús mik erblökwakpa ki*

<sup>1</sup> Mik Pentecostés kəwö\* de, eta Jesús mik erblökwakpa kos tso' dapaule ek tsini ème. <sup>2</sup> E' bet ta ká jaì a ì blane taië wes siwa' darërëë es, e' blane u shu kos a wé ie'pa tso' ee. <sup>3</sup> Eta ie'pa tö isué tö idebitü taië ku'ie bö' wörkua suë, e' ane ie'pa ulitane ki et et. <sup>4</sup> Eta ie'pa a Wiköl Batse'r iënewa ta eköl eköl ttémi ká bānet wakpa ttò wa kuä'ki kuä'ki wes Wiköl Batse'r tö ie'pa ké ttök es.

<sup>5</sup> E' kəwö ska' ta judiowak tö Skököl dalöieta' datse ká ulitane ki, esepa tso' taië Jerusalén. <sup>6</sup> Mik ie'pa tö Jesús mik erblökwakpa aláneka taië e' ttsé, eta ie'pa e' dapa'wéka ikí ttsök bua'ie. Ie'pa tö ittse eköl eköl iwákpa ttò wa kuä'ki kuä'ki es. E' kuëki ie'pa tkinewa taië. <sup>7</sup> Ie'pa wökranewa ta ichérakitö ñi a:

—¿A'ka ie'pa kè dör Galilea wakpa tso' ttök? <sup>8</sup> ¿Wes se' ulitane tso' ittök tö ie'pa ttöke se' ulitane ttò kuä'ki kuä'ki wa? <sup>9</sup> Íe se' shua se' tso' datse Partia, Media, Elam, Mesopotamia, Judea, Capadocia, Ponto, Asia, <sup>10</sup> Frigia, Panfilia, Egipto ena ká tso' Libia atë tsinet Cirene kke. Ñies pë' datse Roma serke íe esepa tso' íe. <sup>11</sup> Se' welepa dör judiowak chökle. Welepa kè dör es, esepa e' yö'bak judiowakie. Ñies se' tso' íe datse Creta ena Arabia. Erë ì kos kaneo' Skököl tö buaë e' chök ie'pa tso' e' ane buaë se' éna se' wákpa ttò kuä'ki kuä'ki e' wa.

<sup>‡</sup> 1:20 Salmo 69.25    <sup>§</sup> 1:20 Salmo 109.8    \* 2:1 Pentecostés kəwö: Pentecostés wà kiane ché Ká Dabom Skeyök kəwö. Judiowak tö Ie'pa Yépa Yerulune Egipto e' kəwö tkö'wé one, e' ki ká de dabom skeyök, eta kawö skà tkö'weke ie'pa tö e' kiekerakitö Pentecostés. Ñies e' kəwö kièrakitö Iyiwö Shtök Kəwö. Kawö e' dör wéstela choie Skököl a iyiwö kite e' ki. Éxodo 23.16 saú.

<sup>12</sup> E' kueki ie'pa ulitane wökrarulune taië ikittsök. Ie'pa wöa ká chowa. Ie'pa ñi chakérak:

—Íyi ikké, ¿ima e' wà kiane chè?

<sup>13</sup> Erë welepa tö Jesús mik erblökwakpa wayué sulu ta ichérakitö:

—Ie'pa tteke blo' tö.

*Pedro tö ttè paké*

<sup>14</sup> Eta Pedro e' duéka shkë'ka Jesús ttekölpa tsá malepa döka dabom eyök ki eköl (11), e'pa ta. Ie' tö iché sulitane a aneule: “A yamipa judiowak, ñies a' ulitane serke Jerusalén. Íyi ikké e' wà pakekeyö a' a. Ye' ttò ttsó buaë a' tö. <sup>15</sup> Sa' kè tteku' blo' tö wes a' tö ibikeitsè es. Erpa diwö de sulitu (9) bla'mi, diwö ikké kè yi e' ttötä'ka blo' wa. <sup>16</sup> Erë ì tköke sa' ta, e' dör wes Skököl tteköl kiè Joel, e' tö iyë'atbak es. Ie' tö iyë'at i' es:

<sup>17</sup> ‘Skököl tö ichè tö mik ká i' erkewatke, eta ye' tö ye' Wiköl patkeraë sulitane ki.

E' kueki a' ala'r, wëpa ena alakölpa, ekkëpa kos ttöraë wes ye' ttekölpa es.

A duladulapa a ilè kkayërdaë kabsueie ie'pa kè ku' kapökwa e' dalewa.

Ñies a' kékëpa a ilè kkayërdaë kabsuè a.

<sup>18</sup> Ñies e' kèwö ska' ta ye' Wiköl patkeraëyo ye' kanè mésopa ki, wëpa ena alakölpa.

Es ie'pa tö ye' ttè pakerane imalepa a.

<sup>19</sup> Ká jai a ye' tö íyi taië suluë kkacheraë, kè sùule a' wa ese.

Ká i' ki ñies íyi kkacheraëyo as a' isaù:

s'pé sueraë a' tö, bö' sueraë a' tö, shkle taië sueraë a' tö ñies.

<sup>20</sup> Diwö ttserdawa. Si'wö iardawa batsë wes s'pé es.

E' kos tköraë kam Skököl kèwö dò e' yöki.

Kawö e' dör buaë shute, e' olo ta' taië.

<sup>21</sup> E' kèwö ska' ta yi kos tö e' tsatkè kiè Skököl a, esepa ulitane tsatkërdaë.' †

Es Joel tö iyë'at.

<sup>22</sup> “A Israel aleripa, ye' ttò ttsó. A' wa ijcher tö mik Jesús Nazaret wak sene' ká i' ki, eta ì kè or yi a ese wéitö taië se' shua Skököl batamik kkayënoie. Es Skököl tö se' a ikkaché tö ie' tö ipatké'. <sup>23</sup> Erë Jesús menettsa a' a klö'wëwa wes Skököl tö isuletë'atbak kuaë es, ñies wes ie' ki ikiane es. A' tö wëpa sulusipa ké ie' ttökwa wötëulewa krus mik. <sup>24</sup> Ie' weine siarë ie' kötëwa, erë Skököl tö ie' shkeo'kane. Duëwa kè a ie' wöklöne yës. <sup>25</sup> E' kueki ká iaiä blu' David ut Skököl ta ima Jesús ttömi e' yë'itö i' es:

‘Ye' wa ijcher tö kekraë be' tso' ye' ta.

Be' tso' ye' ta ye' ulà bua'kka ye' kimuk,

e' kueki kè ì a ye' orpa wes.

<sup>26-27</sup> E' kueki ye' ttsé'r buaë,

ye' ttsò kaneë.

Be' kè tö ye' mepaat pö a,

e' kueki ye' enuraë iwà panuk bèrë.

Ye' dör be' kanè méso batse'r e',

e' kueki be' kè tö imepaat as ye' nurwa.

<sup>28</sup> Be' tö sene michoë ñalé e' kkayë' ye' a.

Ye' tso' be' wörki, e' kueki be' tö ye' ttsé'weraë buaë.' ‡

Es David tö iyë'at.

† 2:21 Joel 2.28-32 ‡ 2:28 Salmo 16.8-11

<sup>29</sup> “A yamipa, ye' tō icheke a' a yēsyesē. Se' blú kēkē David bak ká iaiāē, e' du'wabak ta inú wötēnewa. Ie' pō tso'ia dō ikkē ta iē. <sup>30</sup> Erē David bak Skēkōl ttekōlie. E' kuēki ie' wa ijcher tō Skēkōl kablē' ie' a iwák ttō wa ttē i' wa: ‘Ye' tō be' aleri tkerakā ekōl blu'ie wēs be' es.’ <sup>31</sup> E' jcher David wa, e' kuēki ie' tō Cristo shkenekane e' yē'. Ie' tō iyē' tō inú kē atuk pō a, kē inurpawa. <sup>32</sup> Es iwà tka. Skēkōl tō Jesús shkeo'kane, e' sué sa' ulitane tō sa' wákpa wōbla wa. <sup>33</sup> Skēkōl tō ie' tsēmikā ta itkékaitō iulà bua'kka dalöiërta' taiē. Ie' Yé tō iWikōl mé ie' a wēs ikablē' imuk es. E' ukuōki ta ie' tō iWikōl Batse'r patké sa' ki. E' sué a' tō, e' ttsé a' tō enia. <sup>34</sup> Erē David kē mine'ka ká jai a wēs Jesús es. Ie' wák tō iyē'at: ‘Skēkōl tō ichē ye' Kēkōl a:

Be' e' tkókā ye' ulà bua'kka,

<sup>35</sup> e' dalewa ye' tō be' bolōkpa merarō be' klō dikia. §  
Es David tō iyē'.

<sup>36</sup> “A Israel aleripa ulitane. Ijchenú buaē a' wa tō ye' tso' Jesús chök. E' kötwā a' tō wötēulewā krus mik, erē e' wák tkéka Skēkōl tō se' wōkirie ñies se' blúie.”

<sup>37</sup> Mik ie'pa tō ttē e' ttsé, etā ie'pa erianekā taiē. Ie'pa tō Pedro ena imalepa a ichaké:  
—A yamipa, ¿wēs sa' e' ùmi?

<sup>38</sup> Ie' tō iüté:

—A' er mane'ú Skēkōl a ta a' e' wōskuōō ekōl ekōl Jesucristo ttō wa as a' nuì olo'yar a' ki. A' tō iwé es, e' ta Skēkōl tō iWikōl Batse'r meraē a' a. <sup>39</sup> Kablē e' dör a' a ena a' aleripa ulitane a ena sulitane serke ká kamiē, esepa a ñies. Kablē e' dör wépa kōs kieke Kēkē dör Se' Kēkōl e' tō esepa a.

<sup>40</sup> Es ttē e' wa ena ttē skà taiē wa Pedro tō iché iarak darērēē, ipatté taiē ta ichéitō iarak:

—A' e' tsatkó ì tkōraē pē' sulusipa ta e' yöki.

<sup>41</sup> Es wépa tō ì ché Pedro tō, e' klō'wé, e'pa wōskuérakitō. E' diwō Skēkēpa Jesús icha erule e' kí iēne taiē dōkā mil mañayōk ulatōk (3000). <sup>42</sup> Etā ie'pa e' ché ttē wa Jesús ttekōlpa tsá e'pa tō s'wōbla'weke, e' ttsök kekraē er bua' wa. Ñies ie'pa e' ché ñi kimuk ì tso' ie'pa wa e' wa. Ñies kekraē ie'pa e' dapa'uke pan ñuk Jesús kōtewā e' kēwō tkō'woie. Ñies ie'pa e' ché ttök S'yé ta.

*Wēs Jesús mik erblōkwakpa tsá e'pa ser*

<sup>43</sup> Etā ì kē or yi a ese weke taiē Jesús ttekōlpa tsá e'pa tō Skēkōl batamik. E' tō pē' ulitane wōkrawé taiē. <sup>44</sup> Wépa erblé Jesús mik e'pa kōs serke wēs wák ekōl è es. Ì tso' ie'pa wa ese kakmekerakitō ñi a. <sup>45</sup> Es iyi tso' ie'pa wa, ká ò ilè skà, ese watuēke ie'pa tō ta iské blatekerakitō imalepa kimè kiane esepa a. <sup>46</sup> Diwō bit ta ie'pa ulitane e' dapa'ukerak Skēkōl wé a. Ñies u a u a ie'pa chkōke ñita er bua' wa ttsē'rdak buaē. Jesús kōtewā e' kēwō tkō'weke pan ñè wa ñita. <sup>47</sup> Skēkōl kikekēka ie'pa tō. Sulitane wa ie'pa wēr buaē. Ká bit ekkē Skēkōl tō s'tsatkeke taiē, e' kuēki ie'pa kí daparke taiē.

### 3

*Pedro tō s'kraulewā ekōl e' bua'wéne*

<sup>1</sup> Ká et tsáli diwō de mañat ta Pedro ena Juan míyal ttök Skēkōl ta iwé a. Diwō e' dör ttoie ie' ta. <sup>2</sup> Etā eē wēm tkēr ekōl kune' klō kraulewā. E' datse iyamipa wa itkekeser kekraē Skēkōl wé wékkō kiè Wékkō Buaala e' a as inukōl kak kiōitō sulitane dōkewā eē esepa a. <sup>3</sup> Mik ie' tō Pedro ena Juan dōkewatke e' sué, etā inukōl kak kiōitō ie'pa a. <sup>4</sup> Etā ie'pa tō ie' suéwā krereē iwō ki ta Pedro tō iché ia:

—Sa' saú.

<sup>5</sup> Etā ie' tō ie'pa sué ta ibikeitséitō tō ilè kakmekeitō ye' a. <sup>6</sup> Erē Pedro tō iché ia:

—Kè ye' wa inukōl ta'. Kè ye' wa oro ta'. Erē ì tso' ye' wa e' mekeyō be' a. Jesucristo Nazaret wak e' ttō wa, be' e' kókā ta be' shkó.

<sup>7</sup> Etā Pedro tö iklö'wéwā iulā bua'kka tā ibatséka. E' wöshā tā iklö a idiché iēne <sup>8</sup> tā itunekā e' duékaie tā ishkémi wī'kē iō'kē. E' ukuōki tā imíwā Skéköl wé a Pedro ena Juan tā iwák klò wa. Ie' turkeka, es Skéköl kikekaramiitö. <sup>9</sup> Etā pē' tso' kos e'pa tö isué tö ishkōrami tā Skéköl kikekaramiitö. <sup>10</sup> Ie'pa tö ie' suéwā tö ie' dör wēm e' tkōke inuköl kak kiök Skéköl wé wékkö kiē Wékkö Buaala e' a e'. E' tö ie'pa tkiwéwā taiē. Ie'pa wōkranewā iweblök.

#### *Pedro tö s'patté Skéköl wé a*

<sup>11</sup> Skéköl wé e' ùle kiē Salomón ùle, ee wēm buanene e' tso'ia Pedro ena Juan paklò'uk. E' dalewa pē' kos datse tuneule wé ie'pa tso' ee tā ie'pa tkinewā taiē isaük. <sup>12</sup> Mik e' sué Pedro tö, etā ie' tö ie'pa a iché: “A Israel aleripa ¿ì kueki a' tkirke? ¿ì kueki a' tso' sa' saük krereē wēsua sa' wák tö wēm i' bua'wēne shkōwēne sa' wák diché wa ö sa' serke yēsyesē Skéköl a e' kueki?” <sup>13</sup> Erē Skéköl dör Abraham, Isaac, Jacob ena se' yépa malepa bak ká iaiaē, e'pa Kéköl, e' tö ie' kanè méso kiē Jesús, e' kikéka iyi ulitane tsata, e' dör yi me'ttsa ttewā a' tö e'. Ie' wat'e'ttsa a' tö Pilato wörki erē e' tö ibikeitsbak iökshka. <sup>14</sup> Jesús dör batse'r ena yēsyesē warma a' tö iki' tö e' yóttsa. Erē e' skéie a' tö pē' suluē e' yöktsa ka'. <sup>15</sup> Es sene mukwak e' kötwā a' tö, erē ishkeo'kane Skéköl tö. E' kos su' sa' tö sa' wöbla wa. <sup>16</sup> Wēm i' kraulewā e' suule a' wā buaē. Ie' diché iēnene sa' erblöke Jesús mik e' wa. Jesús mik erblē, e' tö wēm i' bua'wēne buaē a' wörki.

<sup>17</sup> “A yamipa, ye' wā ijcher tö mik a' ena a' wōkirpa tö Jesús kötwā, etā a' kē wā ijcher moki tö ì wamblök a' tso'. <sup>18</sup> Erē ì yē'atbak Skéköl tö ittekölpa ulitane kkò wa tö wé pairine'bitu idi' wa s'blúie e' kawöta ttewā es, e' wawé Skéköl tö es. <sup>19</sup> E' kueki ì sulu watóttsa. A' er mane'ú Skéköl a as a' nuì olo'yöitö a' ki. <sup>20</sup> Etā es ie' tö a' er pablaraē tā Jesús pairi'bitu idi' wa s'blúie e' patkeraneitö se' a. <sup>21</sup> Erē i' tā ie' kawöta senuk ká jaì a dò mik Skéköl tö ì kos yuēne buaē wes kenet es etā. Es Skéköl tö iyē'bak ká iaiaē ittekölpa batse'r e'pa wa. <sup>22</sup> Moisés tö Jesús yē' se' yépa bak ká iaiaē, e'pa a i' es: ‘A shua Skéköl tö itteköl keraka eköl wes ye' es. E' ttò kos dalöiö a' tö. <sup>23</sup> Wépa kē wā ie' ttò dalöiēne, esepa ulitane skerattsa se' wakpa yöki bānet, ie'pa erdawa seraq.\* Es Moisés tö iyē'at.

<sup>24</sup> “Es ñies Samuel ena Skéköl ttekölpa malepa dē'bitu ie' itöki, e'pa kos tö ì tkōke kawö ikkē tā, e' yē'atbak. <sup>25</sup> ì uk Skéköl kablē' ká iaiaē ittekölpa wa, e' wā döraē se' ulā a. Ñies ttē me'atbakitö se' yépa bak ká iaiaē e'pa a, e' wā döraē se' ulā a. Ie' tö iyē'atbak Abraham a i' es: ‘Be' aleripa batamik ye' er buaē chōraē ká ulitane wakpa a.’ <sup>26</sup> E' kueki mik ie' tö ilā Jesús shke'wékane, etā ipatkéitö se' a kewe se' a er buaē choie as se' ser sulu ese olo'yösö eköl eköl.”

## 4

#### *Pedro ena Juan e' tsatké judiowak wōkirpa wörki*

<sup>1</sup> Etā Pedro ena Juan tso'ia s'pattök, e' shua sacerdotepa biteshka Skéköl wé shkēkpa wōkir tā ena saduceowakpa tā. <sup>2</sup> Pedro ena Juan tso' s'wöbla'uk tö Jesús kötwā e' shkenekane. E' wa iwā kkachéitö tö s'duowā e'pa shkerdakane. E' tö sacerdotepa ena ie'pa malepa uluwéka taiē. <sup>3</sup> Ie'pa tö Pedro ena Juan klò'wéwā. Ká detke tsáli, e' kueki iméarakitö s'wöto wé a dö bule es. <sup>4</sup> Erē wépa tso' Pedro ttò ttsök, e'pa shua taiē ie'pa tö Jesús tté buaē klò'wé. Es Jesús mik erblökwakpa wépa è esepa deka mil skeyök e' ulatök (5000).

<sup>5</sup> Bule es tā judiowak wōkirpa ena ikueblupa ena s'wöbla'uk ttē dalöiēno wa wakpa e' dapa'wéka Jerusalén. <sup>6</sup> Ñies sacerdote kibi kiē Anás e' tso'. Ñies Caifás, Juan, Alejandro ena imalepa dör sacerdote kibi e' ditséwö e'pa kos tso'. <sup>7</sup> Ie'pa tö Pedro ena Juan tsük patké tā iduésarak ie'pa wörki tā iwā chakérakitö:

—¿Yi diché wa, yi ttò wa wēm klò kraulewā e' bua'wēne a' tö?

<sup>8</sup> Etā Pedro a Wiköl Batse'r iēnewā taiē tā iütéitö:

\* 3:23 Deuteronomio 18.15,18-19



—A s'wökirpa, a s'kuëblupa. <sup>9</sup> Sa' tö s'kirirke e' kime' er bua' wa, e' chaké a' tö sa' a. A' ki ikiane jchenuk tö wes ibuanene. <sup>10</sup> I'ñe ta sa' tö ichè a' wörki, ñies Israel aleripa ulitane e'pa wörki tö wëm i' buanene sulitane wörki Jesucristo Nazaret wak e' ttò wa. E' wák kötwa a' tö krus mik erè Skëköl tö ishkeo'kane. <sup>11</sup> Skëköl yëkkuö ki itso' kitule: “Ák watë'ttsa u yuökwakpa tö, e' yönene ák bua'buaië.”\* Ák e' dör Jesucristo chè. <sup>12</sup> Ie' dör S'tsatkëkwak. Skëköl kè wa yi skà patkëule ká i' ki s'tsatkoie. E' kuëki Jesucristo eköl è wa s'tsatkërmi.

<sup>13</sup> Mik iwökirpa tö isué tö Pedro ena Juan dör skle siarla, kè wöblaule yëkkuö wa erè ittöke buaë kè suane, etá ie'pa tkinewa. Ie'pa éna ianewa tö ie'pa bak shkök Jesús ta ittökatapaie. <sup>14</sup> Wëm buanene e' dur Pedro ena Juan ta, e' kuëki ie'pa kè a iyënuke tö e' dör kache. <sup>15</sup> Etá ipatkémirakitö u'rki ta ie'pa ate ileritsök. <sup>16</sup> Ie'pa iché ñi a:

—¿Wes sö wëpa i' wëmi? Kos Jerusalén wakpa wa ijcher tö ì kè or yi a ese wé ie'pa tö etk. E' kè yënuke se' a tö e' dör kache. <sup>17</sup> Erè ipauñusö as i'tami Jesús tté i' kè pakòia ie'pa tö yi a, es kè itté bunukka ká wa'ñe.

<sup>18</sup> Etá ikiérakitö ta iché iarak:

—Kè a' kawö ta'ia Jesús tté pakök yi a. Ñies a' kè kawö ta'ia yi wöbla'uk tté e' wa.

<sup>19</sup> Erè Pedro ena Juan tö iutérak:

—A' wákpa tö ibikeitsó tö Skëköl wöa yi ttò dalöie dör buaë sa' a, a' ttò ö ie' ttò. <sup>20</sup> Erè ì su' sa' tö ena ì ttsé' sa' tö, e' pakeraë sa' tö kekraë sulitane a.

<sup>21</sup> Etá iwökirpa tö ie'pa kí pauñé darërëe ta iémirakitö. Wëm kraulewa buanene e' kuëki pè' kos tso' Skëköl kikökka. E' kuëki iwökirpa kè ulà dè'wa Pedro ena Juan we'ikök. <sup>22</sup> Wëm buanene Skëköl diché wa e' ki duas tso' dabom tkëyök (40) kíta.

#### *Jesús mik erblökwakpa tö ikié Skëköl a*

<sup>23</sup> Etá Pedro ena Juan émirakitö ta imiyal wé imalepa tso' ee. Ì kos yé' sacerdotepa wökirpa ena judiowak kueblupa e'pa tö e' pakérakitö imalepa a seraa. <sup>24</sup> Mik e' ttsé ie'pa tö, etá ie'pa ulitane kköché ñita Skëköl a i' es: “A Skëköl, ká jai ena ká i' ena dayë ena ì kos tso' iki, e' yö' be' tö. <sup>25</sup> Ká iaiäe be' tö sa' kékëpa David dör be' kanè méso, e' ka' ttök Wiköl Batse'r wa. Ie' tö iyë' i' es:

‘¿Íók ká malepa wakpa uluneka taië troka taië Skëköl ki?

¿Íók ie'pa ileritseke ñippök ie' ta? Kè e' wamblënuke ie'pa a.

<sup>26</sup> Ká wökirpa ena blu'pa e'pa ulitane ñippakka ie' ta.

Ie'pa ileritseke ñippök ie' ta ena wé pairi'bituitö idi' wa s'blúie e' ta.’†

Es David tö iyë'.

<sup>27</sup> “Tté e' dör mokië. Iwà sué sa' tö tö s'wökirpa kiè Herodes ena Poncio Pilato, e'pa ñi dapa'wéka ká i' a Israel aleripa ta ena pè' kè dör Israel aleripa esepa ta ñita Jesús we'ikök. Ie' dör be' kanè méso batse'r pairi'bitu be' tö idi' wa s'blúie e'. <sup>28</sup> Es ì kos wé ie'pa tö ie' ta e' wé ie'pa tö wes be' tö isuletë'atbak es. <sup>29</sup> A Skëköl, e' kuëki ie'pa tso' sa' pauñuk darërëe, e' ttsó. Sa' dör be' kanè mésopa e'pa a diché kí mú Jesús tté pakoie kè suane. <sup>30</sup> Be' diché kkachó. S'kirirke bua'úne, ì kè or yi a ese ú iwà kkachöie, ñies íyi ese ú taië Jesús dör be' kanè méso batse'r e' ttò wa.”

<sup>31</sup> Mik ie'pa tö ikié one, etá wé ie'pa tso' e' ké wötí'ne. Etá ie'pa ulitane a Wiköl Batse'r iënewa ta ie'pa tö Skëköl tté paké kè suane.

#### *Jesús mik erblökwakpa ñi kime*

<sup>32</sup> Jesús mik erblökwakpa dör taië. Ie'pa kabikeitsöke ñikkëe, ulitane er ttsé'r ñittsëe. Kè yi tö icheku' tö ie'pa íyi e' dör ie'pa è icha, e' skéie e' dör ie'pa icha ñikkëe. <sup>33</sup> Jesús ttekölpa tsá e'pa tö Jesús shkenekane, e' tté kí pakeke diché taië wa. Skëköl tö ie'pa kos kimeke taië. <sup>34-35</sup> Yi wa ká tso' ö ilè skà tso'rak iwà, ese watuekerakitö ta iské mekerakitö

\* 4:11 Salmo 118.22 † 4:26 Salmo 2.1-2

Jesús ttekölpa tsá e'pa a blatè wépa dör siarè esepa a wes e'pa kiane kimè eköl eköl es. E' kueki kè yi weirku' siarè ie'pa shua. <sup>36</sup> Ie'pa shua wëm tso' eköl dör Leví aleri datse ká kiè Chipre, e' kiè José. Jesús ttekölpa tsá tö ikiè méka Bernabé (e' kiane yéno s'pablökwak). <sup>37</sup> Wëm e' wa ká tso'. E' watuétitö ta iské méitö Jesús ttekölpa tsá a as ie'pa tö s'siarëpa kimù iwa.

## 5

### *Ì sulu wamblé Ananías ena Safira e'pa tö e' pakè*

<sup>1</sup> Erè wëm bak eköl kiè Ananías, e' tayè kiè Safira. E'pa tö ká watuéttsa. <sup>2</sup> Eta wëm e' tö iká ské tsá yétttsa iwákpa a ta iëyök méitö Jesús ttekölpa tsá a wes ká ské seraa es. E' jcher ilaköl wa seraa. <sup>3</sup> Eta Pedro tö iché ie' a:

—A Ananías, ¿iök be' e' mettsa Satanás a kitö'wè ta be' kéitö kachök Wiköl Batse'r a? Ká watuébö e' ské kak tséatbö. <sup>4</sup> Kam be' tö iwataüttsa eta be' icha idir. Ta be' tö iwatuéttsa, eta iské dör be' icha. ¿iök be' ibikeitsé wamblé es? Be' kè kayène s'ditsö a. Be' kaché Skéköl a.

<sup>5</sup> Mik e' tse Ananías tö eta ianewa duowaie. Eta ie'pa kos wa ijchënewa, e'pa suane taië. <sup>6</sup> Eta duladulapa welepa debitü ta inü patrëwarakitö tsémi blëwa.

<sup>7</sup> Hora tka mañat e' ulatök, eta Ananías tayè dewa Pedro ska'. Wes iwëm de e' kè jcher ie' wa. <sup>8</sup> Ta Pedro tö ie' a ichaké:

—Ichó ña. ¿Moki a' tö ká watué kos a' tö iché ekké?

Safira tö iüté:

—Tó, ekké je'.

<sup>9</sup> Pedro tö iché ia: ¿iök a' tö kawö mé ñi a Skéköl Wiköl wötsiriük? Wépa wa be' wëm nu mí blëwa, se e' wakpa doyalne ta írö ie'pa wa be' nu michoë blëwa ñies.

<sup>10</sup> E' bet ta Safira anewa ta iduowa Pedro klò ska'. Mik duladulapa dewa ta Safira nu tär ta ie'pa wa inü mítser blëwa iwëm o'mik. <sup>11</sup> Eta Skékëpa Jesús icha erule ulitane ena sulitane wa ijchënewa, e'pa suanerak taië.

### *Ì kè or yi a ese wé taië Jesús ttekölpa tsá tö*

<sup>12</sup> Jesús ttekölpa tsá e'pa tö ì kè or yi a, ese weke taië pè' shua iwà kkachoie. Jesús mik erblökwakpa ulitane e' dapa'uke Salomón üle a. <sup>13</sup> Pè' èltëpa tö ie'pa dalöieta' erè kè diché dè'ka e' tiükwa ie'pa shua. <sup>14</sup> Erè wépa erblé Jesús mik, wépa ena alakölpa, esepa kí iërkerak taië këkraë. <sup>15</sup> Pè' tö s'kirirke tsémirak katà shuelur ñala kkömik as Pedro tkò ta ilo mú ar esepa wele ki as ibuarne. <sup>16</sup> Ñies ká tso' kos Jerusalén pamik, e' wakpa de taië s'kirirke wëttsë. Ñies wimblupa sulusi s'tteke esepa wëttsë. Eta e'pa ulitane buanene seraa.

### *Jesús ttekölpa tsá wötënewa s'wöto wé a*

<sup>17</sup> Eta sacerdote kibi ena iklépa kiè saduceowakpa, e'pa ukyëneká taië Jesús ttekölpa tsá e'pa ki. <sup>18</sup> E' kueki iklö'wëwarakitö wötëwa s'wöto wé a. <sup>19</sup> Erè nañewe ta Skéköl biyöchökwak eköl tö s'wöto wékkö ppée ta iyétttsarak ta iché ia: <sup>20</sup> “A' yüne Skéköl wé a. Eë a' e' duóka sene pa'ali Jesús ta, e' tté pakök sulitane a.” <sup>21</sup> Bule es bla'mi ta idewarak Skéköl wé a ta ie' kékarak s'wöbla'uk wes ie'pa a iyène es.

Eta sacerdote kibi ena iklépa tö Israel aleripa wökirpa ulitane kiétttsa e' dapa'ukka ie'pa ta. Eta Jesús ttekölpa tsá e'pa tsuk patkérakitö. <sup>22</sup> Erè mik ishkëkipa demirak s'wöto wé a, eta kè iwà ikunerak. Ta idebiturak ibiyó mukne <sup>23</sup> ta ichéraitö:

—Sa' tö s'wöto wékkö kué wötëule buaë. Ñies shkëkipa tso'rak iwékkö kkö'nuk. Erè mik sa' tö iwékkö ppée, eta kè sa' wa yi kune eë.

<sup>24</sup> Mik Skéköl wé shkëkipa wökir ena sacerdote wökir kibipa, e'pa tö ttè e' tse eta ie'pa éna ká chowa ta ñni chakérak: “¿Wes iwà dötttsami?” <sup>25</sup> E' ukuöki ta bet eköl de ibiyó muk ta iché iarak:

—Wëpa wötë'wà a' tö s'wöto wé a, e'pa tso'ne Skëköl wé a s'wöbla'uk.

<sup>26</sup> Età shkëkipa wökir mía iyulök ishëkipa ta. Iklö'wëwarak erë ie'pa suane dö' pë' tö s'tè ák wa, e' kueki ie'pa kè wà iweineia. <sup>27</sup> Mik ideminerak età itsémirakitö judiowak wökirpa wörki. Età sacerdote kibi tö iché ie'pa a:

<sup>28</sup> —Sa' tö a' a iyë' etkëme tö wëm e' tté kè pakar yës. Età ¿ì wamblé a' tö? A' tö Jerusalén wakpa ulitane wöbla'weke tté e' wa. Ñies a' tso' ichök tö wëm e' kötëwà, e' nuí tkënewà sa' mik.

<sup>29</sup> Erë Pedro ena Jesús ttekölpa tsá malepa tö iütérak:

—Sa' kawöta Skëköl ttò dalöiök s'ditsö ttò tsata. <sup>30</sup> A' tö Jesús ttökwa ka' wötëulewà krus mik. Erë se' wakpa bak iaiaë e' Këköl e' wák tö Jesús shkeo'kane. <sup>31</sup> Skëköl tö ibatsékami e' ska' tkëser iulà bua'kka s'wökirie ena s'tsatkëkwakie as Israel aleripa er mane'ù ta ie'pa ki ie'pa nuì olo'yarmi. <sup>32</sup> Íyi ikkë kos su' sa' tö e' pakök sa' tso' a' a. Ñies Wiköl Batse'r mène wëpa tö Skëköl ttò dalöieke esepa a, e' tso' a' a ipakök.

<sup>33</sup> Mik ie'pa tö e' ttsé età ie'pa uluneka taië Jesús ttekölpa tsá e'pa ki. Ie'pa éna ittakulur. <sup>34</sup> Erë ie'pa shua wëm tso' eköl e' dör fariseowak kië Gamaliel. Ie' dör s'wöbla'uk tté dalöiëno wa wakpa ese eköl. Sulitane tö ie' dalöieke taië. Ie' e' duéka ta iché: “Jesús klépa yólur kañika ekuölö.” Età ie'pa tö iyélur.

<sup>35</sup> E' ukuöki ta ichéitö imalepa a:

—A yamipa Israel aleripa. A' isaú bua'ie tö ì weke a' tö wëpa wikkëpa ta. <sup>36</sup> A' éna ianú tö barbane wëm kië Teudas e' e' ka'ka ichök tö e' dör wëm taië ese. Wëpa döka cien tkëyök (400) e'pa e' yué ie' klépaie. Ie' du'wà kötulewà ta iklépa pone'mi wì a dià a. Es ilone'. <sup>37</sup> E' ukuöki ta mik s'wökirpa s'kië shtök patkë', e' këwö ska' ta wëm skà eköl kië Judas Galilea wak e' e' ka'ka. Pë' welepa e' yué ie' klépaie. Erë ñies ie' kötëwà ta iklépa pone'mi sërää wì a dià a ta eë ilone'. <sup>38</sup> E' kueki ye' tö iché a' a tö wëpa wí múat bèrë. Kè ì sulu wamblar ie'pa ta. Ì aleritseke ie'pa tö ena ì weke ie'pa tö e' dör tté ësë, e' ta bet ta kè ita'ia. <sup>39</sup> Erë Skëköl tté idir, e' ta kè a' e' alòpaka iki. A' isaú buaë dö' a' tso' ñippök Skëköl ta.

Ie'pa tö Gamaliel ttò iuté. <sup>40</sup> Ie'pa tö Jesús ttekölpa tsá e'pa tsuk patkéne ta ippök patkérakitö ta iché iarak: “Kè a' a kawö ta'ia Jesús tté pakök.” E' ukuöki ta iémirakitö. <sup>41</sup> Es Jesús ttekölpa tsá e'pa e' yélur judiowak wökirpa wé a. Skëköl tö ie'pa mé weinuk Jesús tté kueki, e' tö ie'pa ttsë'wé buaë. <sup>42</sup> Es kekraë ká bit ekkë Skëköl wé a ñies u a u a ie'pa tö s'wöbla'weke s'patteke Jesús dör wé pairine'bitu idi' wa s'blúie e' tté buaë wa.

## 6

### *Wëpa kul shushtérakitö Jesús ttekölpa tsá kimoie*

<sup>1</sup> E' këwö ska' ta Jesús ttökatapa kí daparke taië e'pa dör judiowak. Ie'pa welepa ttöke griegoie, esepa tö imalepa ttöke iwakpaie e'pa cheke suluë. Ie'pa tö icheke:

—Mik chkè blatërke kekraë, età sa' tayëpa schó, esepa kè a imène kos imalepa ttöke judioie esepa a imène ekkë.

<sup>2</sup> E' kueki Jesús ttekölpa tsá dabom eyök kí böl (12), e'pa tö Jesús ttökatapa ulitane kië e' dapa'uk ta ichéitörak:

—A yamipa, kè idör buaë sa' a s'wöbla'weke sa' tö Skëköl tté wa e' kané mukat íyi watioie e' è kueki. <sup>3</sup> E' kueki a' shua wëpa yuló kul as kanè e' ù ie'pa tö. Wëpa suule sulitane wà tö ie'pa a Wiköl Batse'r tso' taië ena ikabikeitsö buaë, esepa shushtó ta sa' tö ie'pa mekekà kanè ñe' uk. <sup>4</sup> Età sa' e' ché kekraë ttök Skëköl ta ena s'wöbla'uk ie' tté wa.

<sup>5</sup> E' wër buaë ie'pa ulitane wa. Ie'pa tö Esteban shushté. E' erblé buaë Skëköl mik ñies ie' a Wiköl Batse'r tso' taië. Ñies Felipe, Prócoro, Nicanor, Timón, Pármenas ena Nicolás e'pa shushté ie'pa tö. Nicolás dör Antioquía wak, e' e' yö'bak judiowakie. <sup>6</sup> Età itsémirakitö wé Jesús ttekölpa tsá e'pa tso' eë. Età ie'pa ulà méka wëpa ñekkëpa ki ta ie'pa tö ikié S'yé a tö ikimú.

<sup>7</sup> Es Skëköl ttè kí pakanemi taië. Ñies Jesús ttökatapa kí daparke taië Jerusalén. Ñies judiowak sacerdotepa taië tö ttè mik se' erblöke e' wà klö'wé.

#### *Esteban klönewa*

<sup>8</sup> Eta Skëköl er buaë ché Esteban a taië ta diché méitö ia taië. E' wa ì kè or yi a ese wekeitö taië pè' shua iwà kkachoie tö Jesús ttè dör moki. <sup>9</sup> Erë wëpa welepa tö Esteban chémi suluë. Ie'pa welepa dör judiowak ñi dapa'wo wé kiè Kanè Mésopa Auleshka Esepa Wé e' wakpa. (Ie'pa bak klöulewa kanëblök erë iyërulunëbak.) Ñies judiowak welepa tso' datse Cirene, Alejandría, Cilicia ena Asia, e'pa kos wöñarke Esteban ki. <sup>10</sup> Erë Wiköl Batse'r tö Esteban a ttè mé ttoie buaë, e' kueki ie'pa kè a e' alirka ie' ki. <sup>11</sup> E' kueki ie'pa tö wëpa welepa patué kachök: "Sa' ittse tö Esteban tso' Moisés ena Skëköl chök suluë." <sup>12</sup> E' wa ie'pa tö pè' uluwéka taië Esteban ki. Ñies judiowak kuëblupa ena s'wöbla'uk ttè dalöiëno wa wakpa uluwékarakitö Esteban ki. E' kueki ie'pa de Esteban ska' ta iklö'wëwarakitö tsémirakitö judiowak wökirpa ska'. <sup>13</sup> Ñies wëpa yulérakitö kachöie, e'pa tö iché:

—Këkraë wëm wí tö Skëköl wé dör batse'r i' ena Moisés ttè dalöiëno e' cheke suluë. <sup>14</sup> Ñies sa' tö ie' tse ichök tö Jesús Nazaret wak e' tö Skëköl wé tskerawa ena sene me'at Moisés tö se' a e' mane'wekettsaitö.

<sup>15</sup> Eta judiowak wökirpa kos tulur ee, e'pa tö isuë tö Esteban wö wër dalölöë wes Skëköl biyöchökwak wö wër es.

## 7

#### *Esteban e' tsatké*

<sup>1</sup> Sacerdote kibi, e' tö Esteban a ichaké:

—Ì ki be' kkatërke je' dör moki?

<sup>2</sup> Ie' iüté: "A yamipa, a yépa, ye' ttö tso. Mik se' këkëpa Abraham bak iaiaë Mesopotamia, kam imi' senuk Harán, eta ee se' Këköl olo ta' taië, e' e' kkayë' ie' a. <sup>3</sup> Eta ichéitö ia: 'Be' ká ena be' yamipa, e' múat ta be' yúshka senuk, ká kkachekeyö be' a ee.' <sup>4</sup> Es Abraham e' yé'ttsa Caldea ate Mesopotamia ee, ta imía senuk Harán. Iyë blënewa e' ukuöki ta Skëköl tö ie' patké' senuk ie, wé se' serke i'ne ta ee. <sup>5</sup> Kuaë Skëköl kè wa ká i' mène ie' a yës, elkela wé'ia è kè ie' a imène. Erë e' kéwö ska' ta ie' kè ala'r ta', erë Skëköl kablé' ie' a ttè i' wa: 'Ká i' meraëyö be' aleripa a be' blënewa e' ukuöki ta.' <sup>6</sup> Ñies Skëköl tö iché ie' a: 'Be' aleripa serdaë ká kua'ki ki wes ká kua'ki wakpa es. Ee ie'pa klördawa kanè mésoie kè patueta' ese. Iweirdarak siarë döka duas cien tkëyök (400).' <sup>7</sup> Erë Skëköl tö iché ia: 'Ká wé wakpa tö ie'pa we'ikera, esepa ské we'ikerayö siarë. E' ukuöki ta ie'pa e' yörattsa ká e' a as ye' dalöiörakitö ká i' ki.' <sup>8</sup> Eta Skëköl tö iché ia: 'A' ala'r wëpa kurke kos esepa tottola kkuölitla töö tsir. E' ú këkraë iwà kkachoie tö ye' tö ttè me' be' a.' E' kueki mik ie' alà kiè Isaac ki ká de pàköl, eta itöttola kkuölitla tééitö tsir. Es ñies Isaac tö iwé ilà Jacob\* ta. E' sù Jacob tö iwé ila'rla dabom eyök kí böl (12), e'pa ta. Ie'pa dör se' dör Israel aleripa ditséwöpa dabom eyök kí böl e' yépa tsá.

<sup>9</sup> "Erë se' yépa tsá, e'pa ukyëne iël tsirla kiè José e' ta. E' kueki ie'pa tö iwato'ttsa ta yi tö itué e' wa imítser Egipto. Erë Skëköl tso' ie' ta. <sup>10</sup> Ie' tö itsatké këkraë kos iweirke e' shua. Ñies kabikeitsè buaë méitö ia. Ñies ie' tö Faraón ké isauk er bua' wa (Egipto wakpa tö iblúpa kos kiè Faraón). E' kueki Faraón tö ie' tkéka Egipto íyi kos e' wökirie ñies ie' wák u wökirie.

<sup>11</sup> "E' ukuöki ta ketba aneká Egipto ena Canaán, e' kos a. E' wakpa weine siarë. Se' yépa tsá kè wa ì kune ñnanoie katanoie. <sup>12</sup> Erë mik Jacob wa ijchenewa tö iyiwö tso' Egipto, eta ie' tö ila'r dör se' yépa tsá, e'pa patkémi iyiwö taük ee, e' dör ie'pa tsá dë'rö. <sup>13</sup> Mik ie'pa ská dë'rö eta José tö ie'pa a iché: 'ye' dör a' èl.' Es Faraón wa ijchenewa tö yi ditséwö José dör. <sup>14</sup> E' ukuöki ta ie' tö iyé Jacob ena iyamipa kos tsuk patké as idöbitu Egipto. E'pa

\* 7:8 Jacob: E' kiè ñies Israel.

dōka dabom kuryök kī skel (75). <sup>15</sup> Es Jacob minea senuk Egipto. Ee iblënewa. Ee ie' ala'r dör se' yépa tsá, e'pa blërulune ñies. <sup>16</sup> Ie'pa nu minene Siquem wötéwa iwakpa pō a. Ká e' wato' Hamor ala'r tō Abraham a pōie.

<sup>17</sup> “Erë Skëköl kablë' Abraham a ttë i' wa: ‘Be' aleripa yerattsane ye' tō Egipto.’ Mik e' kèwō dökewatke, eta se' yépa kī alōne taië. <sup>18</sup> E' kèwō ska' tã Egipto blú ské tkëneka, e' kè wã José pakè jcher. <sup>19</sup> Blu' e' tō se' yépa kītō'wé we'iké siarë. Ie' tō ie'pa ké kësik wa ila'rla wëpa kune erpa esepa kos watöktsã as iduölur. <sup>20</sup> E' kèwō ska' tã Moisés kune', e' dör buaala shute. Iyé ena imi tō ikkō'né u a dōka sí mañat. <sup>21</sup> E' ukuöki tã ie'pa kawōta iwatöktsã as iduōwa erë Egipto blú alà busi tō ikuéwa tsémi u a tala'wè wes iwák alà es. <sup>22</sup> Es Moisés yöne taië íyi jcher Egipto wakpa wã, kos e' wa. Ittò è kī ittšenewa, ñies ì wekeitō e' è kī iwënewa tō ie' dör wëm taië ese.

<sup>23</sup> “Mik ie' kī duas de dabom tkëyök, (40) eta ibikeitséitō: ‘Ye' mía ye' yamipa dör Israel aleripa e' weblök.’ <sup>24</sup> Eta ie' isué tō egiptowak eköl tso' Israel aleri eköl we'ikök. E' kueki ie' mishka itsatkök tã egiptowak ttëwaitō iskéie. <sup>25</sup> Ie' ibikeitsé tō iyamipa Israel aleripa éna iarmpi tō Skëköl tō ie' patké ie'pa tsatkök. Erë kè iwà ane ie'pa éna. <sup>26</sup> Bule es tã ie' tō Israel aleripa kué bōl ñippök. Ie' kī ikiane tō ie'pa mú er buarne ñi kī, e' kueki ichéitō iarak: ‘A' dör ñi yamipa. ¿Iók a' ñi we'ikò?’ <sup>27</sup> Eta eköl tō iyami we'ikeke, e' tō Moisés patkéumi tã ichéitō ia: ‘¿Yi tō be' tkéka sa' wökirie sa' shulökwakie?’ <sup>28</sup> ¿Be' éna ye' ttakwa wes chki be' tō egiptowak kötwa es?’ <sup>29</sup> E' ttséwa Moisés tō tã itkashkar ká bánet kiè Madián ee. Ee isenë wes ká kuã'kī wak es. Ee ila'rla kéka bōl.

<sup>30</sup> “Ee ie' sené dò duas dabom tkëyök (40). Ká etã Skëköl biyöchökwak eköl e' kkaché ie' a Sinaí kébata a tsinet ká sir poë wé kè yi serku' ese ska'. Ie' e' kkaché ia kal tsir wõnarke bö'ie e' shua. <sup>31</sup> Moisés wökranewa iweblök. Erë mik ie' e' skéwa isauk bua'iewa tã Skëköl ttò ttséitō, e' tō iché ia: <sup>32</sup> ‘Ye' dör be' yépa bak iaiaë kiè Abraham, Isaac ena Jacob e'pa Këköl.’ Eta Moisés painéka taië suane kueki. Ie' kè diché dë'kaia isauk. <sup>33</sup> Eta Skëköl tō iché ia: ‘Wé be' dur, e' ké dör batse'r, e' kueki be' klökkuö yóttã. <sup>34</sup> Moki ye' isué tō wépa dör ye' icha tso' Egipto e'pa weirke. Ie'pa kköchöke e' ttséyö. E' kueki ye' dë'ttsã ie'pa tsatkök. E' kueki ittso': Ye' tō be' patkerami Egipto.’

<sup>35</sup> “Israel aleripa tō iyë' Moisés a: ‘¿Yi tō be' tkéka sa' wökirie sa' shulökwakie?’ Erë ie'pa tō ie' watë'ttsã, erë Skëköl tō patké' ie'pa wökirie ena ie'pa tsatkökwakie. E' bak mik Skëköl biyöchökwak e' kkayë'wa ie' a kal tsitsirla shua eta. <sup>36</sup> Es Moisés tō se' yépa yë'ttsã Egipto a. Egipto ena dayë kiè Dayë Mat ee ie' tō ì kè or yi a ese wé taië. Ñies e' wéitō duas dabom tkëyök ekké ká sir poë wé kè yi serku' ee. <sup>37</sup> Ie' wák tō iché ie'pa a: ‘Skëköl tō itteköl keraka eköl a' shua wes ye' es.’ <sup>38</sup> Mik Israel aleripa tso'rak echkaie ká sir poë wé kè yi serku' ee, eta Moisés tso' ie'pa shua. Ñies Skëköl biyöchökwak tté ie' tã Sinaí kébata a. Skëköl ttë tō sene meke siã e' yöne ie' a ee, e' pakéne ie' tō se' a.

<sup>39</sup> “Erë se' yépa kè wã ie' ttë dalöiene'. Ie'pa tō ie' ttë watë'ttsã. Ie'pa shkakne Egipto. <sup>40</sup> E' kueki ie'pa tō iché Aarón a: ‘Moisés tō se' yë'ttsã Egipto a. Kè sa' wã ijcher ì tka ie' tã. E' kueki íyi diököl yuó se' a böt mañat dalöie skëkölie as e' mi' se' wëttsuk.’ <sup>41</sup> Es ie'pa tō baka pupula diököl yué dalöie. Tã iyiwak jcherakitō mè baka diököl a idalöioie. Ie'pa tō e' kèwō tkö'wé taië, baka diököl yuérakitō iwákpa ulà wa, e' dalöioie. <sup>42</sup> E' kueki Skëköl e' skéttã ie'pa yöki. Ie' tō ie'pa méat as bëkwö dalöiorakitō ie' skéie. Es Skëköl ttekölpa tō ikit iyëkküö kī. Ie'pa tō ichè:

‘A Israel aleripa,

mik a' sene' ká sir poë wé kè yi serku' ee duas dabom tkëyök (40) ekké, eta a' tō iyiwak jché' erë e' kè dör ye' dalöioie.

<sup>43</sup> Wé dalöieke pë' tō skëkölie kiè Moloc, e' diököl wéla dami a' wã.

Ñies wé dalöieke pë' tō skëkölie kiè Refán e' diököl bëkwöie, e' dami a' wã. E' kos diököl yué a' wákpa tō, esepa dami a' wã dalöie.



E' kuëki ye' tö a' patkeraë kamië weinuk siarë Babilonia wi'kie.†  
Es ikiteat.

<sup>44</sup> “Es mik se' yépa bak senuk ká sir poë wé kè yi serku' ee, eta ie'pa wa datsi'kuö dami e' shukuëkear Skëköl wéie. E' a ie' bak e' kkachök ie'pa a. U e' yöne wes ie' tö Moisés ka' iyuök es, wes ie' tö ikkayë' ia es. <sup>45</sup> E' ukuöki ta u e' méat se' yépa bak e'pa tö ileripa a. Mik ie'pa demi Josué ta pë' kua'ki wakpa ká klö'ukwa, eta u e' mirwarak iwa. Skëköl tö pë' kua'ki wakpa uyéttsa ie'pa yöki. E' ukuöki ká taië ta David tkëneka blu'ie. E' kéwö ska' ta u yöne iaiaë datsi'kuö wa, e' tso'ia. <sup>46</sup> David wër buaë Skëköl wa ta ie' a David tö kawö kié ie' dalöio wé yuoie Israel aleripa a. <sup>47</sup> Erë David alà kiè Salomón, e' tö Skëköl wé e' yué. <sup>48</sup> Erë Skëköl dör íyi ulitane tsata e' kè ser u yué s'ditsö tö ese a. Es itteköl eköl tö iyë'at, e' tö ichè:

<sup>49-50</sup> ‘Skëköl tö ichè:

Ká jai e' dör ye' e' tkoie.

ká i' dör ye' klò tkoser.

Ye' wák tö íyi kos yö',

e' kuëki ¿wes a' tö u yuëmi ye' a?

¿Wes a' tö ká mèmi ye' a enoie?‡

Es ikiteat.

<sup>51</sup> “Erë a' kè tö Skëköl dalöieta'. A' er darërë. A' kukuöña darërëë. Këkraë Wiköl Batse'r wöklö'wè a' tö. A' dör wes a' yépa bak ká iaiaë es. <sup>52</sup> Ie'pa tö Skëköl ttekölpa kos we'ik. Es ñies ittekölpa bak ichök tö yi dör Yësyësë Chökle e' datse, e'pa kötulur ie'pa tö. I'ñe ta yi dör Yësyësë Chökle ñe' detke, erë iwatuéttsa a' tö ttèwa. <sup>53</sup> A' ulà a Skëköl ttè dalöiëno dë' ibiyöchökwakpa wa. Erë a' kè tö idalöië.”

#### *Esteban ttéwa ie'pa tö*

<sup>54</sup> Mik iwökirpa tö ì pakè Esteban tö e' ttsé, eta ie'pa uluneka iki taië. Ie'pa kà wötéwa ulune è kueki. <sup>55</sup> Erë Esteban ki Wiköl Batse'r kí de taië ta iwö kéka ká jai a ta Skëköl olo taië e' suéitö. Ñies ie' tö Jesús sué dur Skëköl ulà bua'kka. <sup>56</sup> Ie' tö iché:

—¿Isaú! Ye' tso' isaúk tö ká jai wékkö àr áie. Ñies Jesús dör S'ditsö Alà e' saúk ye' tso' tö idur Skëköl ulà bua'kka.

<sup>57</sup> Erë ie'pa e' kukuöña wötéwa as kè iwattsër. Eta ianekarak taië ta imishkarak seraa Esteban ki. <sup>58</sup> Ta iyéttsarakitö Jerusalén a mítser u'rkí ee, ta ie'pa tö ie' témi ák wa ittowaie. Esteban kkatökwakpa tso' itök, e'pa datsi' me'itörak duladula kiè Saulo e' a blè.

<sup>59</sup> Ie'pa tso' Esteban tök ák wa, e' dalewa ie' tö ikié Skëköl a i' es: “A Skëképa Jesús, ye' wiköl tsúmi be' ska'.” <sup>60</sup> E' ukuöki ta ie' e' tkéwa kuchë ki ta ianeka taië: “A Skëképa, ì sulu wamblök itso'rak, e' nuí olo'yó ie'pa ki.”

Mik e' chéitö ta iduowa.

## 8

<sup>1</sup> Esteban ttéwa ie'pa tö e' tö Saulo ttsé'wé buaë.

#### *Saulo tö Jesús mik erblökwakpa we'ikémitke*

E' diwö shà ta Skëképa Jesús icha erule tso' Jerusalén e'pa we'ikémitke pë' tö. Ie'pa kos tkayalmi dò Judea ena Samaria. Erë Jesús ttekölpa tsá e'pa kè mineyal. <sup>2</sup> Wëpa wëlepa tö Skëköl dalöieke taië, esepa tö Esteban nu bléwa ta ie' ieitséraitö taië. <sup>3</sup> Erë Saulo tö Skëképa Jesús icha erule e'pa we'ikémi siarë. Ie' mirwa u a u a ie'pa yöktsa kuulemi patkëmi wötéwa s'wöto wé a wëpa ena alakölpa ñies.

#### *Jesús tté pakane Samaria wakpa a*

<sup>4</sup> Erë wëpa bakyalmi Jerusalén, e'pa tö Jesús tté buaë pakémir ká wa'ñe wé imirwarak ee. <sup>5</sup> Es Felipe mía Samaria. Eë ie' tö wé pairine'bitu idi' wa s'blúie e' tté pakémi ká e'

† 7:43 Amós 5.25-27 ‡ 7:49-50 Isaías 66.1-2



wakpa a. <sup>6</sup> Mik ie'pa tö ie' ttöke e' ttsé ñies ì kè or yi a ese wekeitö, e' suérakitö etä ie'pa tö ittò kittseke bua'iewa. <sup>7</sup> Es pè' a wimblupa sulusi tso', esepa bua'wéneitö taië. Wimblupa sulusi yêrulune arkekarak taië. Es ñies s'kraulewa taië ena s'bachiulewa taië, esepa buanene buaë. <sup>8</sup> E' kueki ká e' wakpa kos ttsé'ne buaë.

<sup>9</sup> Etä ká e' a wëm tso' eköl kiè Simón. Ie' kaneblë'mi iaiäë wës awá es. E' wa ie' tö Samaria wakpa kitë' taië. Es ie' e' kkeö tö ie' dör imalepa tsata. <sup>10</sup> Ká e' wakpa ulitane, siarëpa ñies inuköl blúpa, e'pa tö ie' ttò klöo' buaë. Ie'pa tö iyë': "Skéköl kiè Diché Taië, e' e' yué Simónie."

<sup>11</sup> Bànet ie' tö ie'pa kitë'bitü ikanè wa. E' kueki ie'pa tö ie' ttò iütë' buaë. <sup>12</sup> Erë mik Felipe tö ì blúie Skéköl tso' e' tté buaë paké ñies Jesucristo tté buaë paké, etä ie'pa tö iklö'wé ta ie' wöskuélör wëpa ena alakölpa. <sup>13</sup> Ñies Simón wák erblé Jesús mik ta iwöskué. Ie' michoë Felipe ta kekraë. Es ie' isué tö ì kè or yi a ese weke Felipe tö taië, e' tö ie' tkiwéwa.

<sup>14</sup> Mik Jesús ttekölpa tsá tso' Jerusalén, e'pa wa ijchenewa tö Samaria wakpa tö Skéköl tté klö'wé, etä ie'pa tö Pedro ena Juan patkémi ee. <sup>15</sup> Mik idemirak, etä ikiérakitö S'yé a Samaria wakpa tö iklö'wé, e'pa ki as Wiköl Batse'r dō ie'pa ki. <sup>16</sup> Kam Wiköl Batse'r döbitü ie'pa ulitane ki. Ie'pa wösuule Skékëpa Jesús ttö wa, e' è o' ie'pa tö. <sup>17</sup> E' kueki Pedro ena Juan ulà méka ie'pa ki ta Wiköl Batse'r de ie'pa ki.

<sup>18</sup> Simón tö isué tö mik Jesús ttekölpa tsá ulà méka ie'pa ki etä Wiköl Batse'r debitü iki. E' kueki ie' tö inuköl watké Pedro ena Juan a, <sup>19</sup> ta ie' tö iché iarak:

—A' wa diché tso' se, e' mú ye' a as yi ki ye' ulà méka ta ese ki Wiköl Batse'r döbitü wës a' tö iweke es.

<sup>20</sup> Pedro tö iüté:

—Be' tö ibikeitsè tö ì kakmè Skéköl tö e' tormi inuköl wa, e' kueki be' inuköl weinú kekraë be' wák ta. <sup>21</sup> Be' er kè dör yësyësè Skéköl wöa, e' kueki diché i' kè menuk be' a. <sup>22</sup> Be' er mane'ú ì sulu wamblekebö i', e' yöki. Skéköl a ikió as ì bikeitsébö suluë isalema e' núí olo'yemiitö be' ki. <sup>23</sup> Ye' tö isué tö be' er dör suluë kësik ème. E' wa be' wák kos tso' klöulewa.

<sup>24</sup> Simón tö iüté:

—Skéköl a ikió as ì kos ché a' tö e' kè tkò ye' ta.

<sup>25</sup> Etä ì o' Skéköl tö ie'pa ta e' tté paké Pedro ena Juan tö. Ñies s'pattéraitö Skékëpa Jesús tté wa. E' ukuöki ta ie'pa míyalne Jerusalén. Ta ñala wa Samaria shua ká tso' taië, e' wakpa a ie'pa tö Jesús tté buaë pakerami wës imirdak es.

#### *Felipe tö Etiópía wák eköl wöbla'wé*

<sup>26</sup> E' ukuöki ta Skéköl biyöchökwak eköl tö iché Felipe a: "Be' yúshka dayë ñak kke Jerusalén ñalé wa dō Gaza." Ñala e' tkökemi ká sir poë wé kè yi serku' e' kke. <sup>27</sup> Etä Felipe mía ta ñala e' ki wëm kuéitö eköl, e' dör Etiópía wak. Ie' dör iká wökirpa e' eköl. Ie' dör alaköl tso' Etiópía blúie, e' inuköl blök wökir. Ie' dare Jerusalén Skéköl dalöiök. <sup>28</sup> Ie' mirwane ikaska' karreta ki, e' a itkër yëkkuö kit Skéköl tteköl kiè Isaías tö, e' sauk.

<sup>29</sup> Etä Wiköl Batse'r tö iché Felipe a: "Be' yú, be' e' skówa karreta se o'mik." <sup>30</sup> Mik Felipe e' skéwa karreta o'mik, etä ie' tö ittés tö Etiópía wak tö Skéköl yëkkuö kit Isaías tö, e' aritserami. Felipe tö ie' a ichaké:

—Yëkkuö se aritseke be' tö ¿e' wà ane be' éna?

<sup>31</sup> Ie' tö iüté:

—Kè yi ku' ye' wöbla'uk ta ¿wës ye' a iwà armi?

Ie' tö Felipe kié e' tkökka ie' o'mik. <sup>32</sup> Ie' tö iaritserami wé ichéitö: "Ie' dör wës obeja urula tsèmi ttèwa es.

Wës obeja pupula kè arta' mik iköyök tërke etä, es ñies kè ie' wa ì yëne.

<sup>33</sup> Ie'pa tö ijaëwé siarë ta ikichatëttsarakitö,

erë ì k<sub>i</sub> ikichatënettsa e' kè dör mok<sub>i</sub>.  
 Ie' ttéwarakitö as kè iseria ká i' k<sub>i</sub>,  
 e' kuek<sub>i</sub> kè ie' alà ate.”\*

<sup>34</sup> Etiopía wak tö Felipe a ichaké:

—Be' we'ikèyö, ichó ña, ¿yi cheke Skëköl tteköl Isaías tö ttè i' wa? ¿Ie' wák e' chöke ö o'ka chekeitö?

<sup>35</sup> Eta ttè aritsékeitö, e' wa Felipe tö ie' a Jesús tté buaë pakémi. <sup>36-37</sup> Es ittöramirak ñala wa ta ee di' kuérakitö. Eta Etiopía wak tö iché Felipe a:

—Íe di' tso'. ¿Ì kuek<sub>i</sub> be' kè tö ye' wöskuè?†

<sup>38</sup> Eta Etiopía wak tö iché karreta ñakökwak a tö karreta wöklö'úwa. Ta ie'pa e' éwa ta imíyal bölë di' a. Ee Felipe tö Etiopía wak wöskuée. <sup>39</sup> Mik ie' yélune di' a eta Skëköl Wiköl tö Felipe batsékami bet ká bánet a, Etiopía wak kè wa isuneia yës, erë imía ttsë'ne buaë kaneë. <sup>40</sup> Eta Felipe tö isué tö ie' demi dur ká kiè Azoto ee. Eta ie' mía Jesús tté buaë pakök ká tso' ñala k<sub>i</sub> ese wakpa a dömi Cesarea.

## 9

### *Saulo er mane'wé Jesús a*

<sup>1-2</sup> E' dalewa Saulo tso'ia Skëképa ttökatapa pauñuk ttèwa. E' kuek<sub>i</sub> ie' mía sacerdote kibi ska' yëkkuö kiök shkowäie judiowak ñi dapa'wo wé tso' Damasco ee. Yëkkuö e' k<sub>i</sub> kawö mène ia s'tso' ttè kiè Jesús dör Ñala Pa'alí e' dikia esepa yulök klö'wowa tsëmi Jerusalén, kè tkine tö alakölpä ö wëpa idir. <sup>3</sup> Erë mik Saulo dökemitke tsinet Damasco e' bet ibiteshka ká jai a bö'wöie e' olo bune taië ipamik. <sup>4</sup> Ta ie' anere iski. Eta ttò ttséitö tö iché ia: “A Saulo, a Saulo, ¿iök be' tö ye' we'ikeke?”

<sup>5</sup> Saulo tö ie' a ichaké: “A Skëképa, ¿be' dör yi?” Eta iütéitö: “Ye' dör Jesús we'ikeke be' tö e'. <sup>6</sup> Erë be' e' kóka. Be' yú Damasco. Ee be' a iyërmi tö ì uk be' ké.”

<sup>7</sup> Eta Saulo wapiepa tkirulune taië. Ie'pa tö yile ttò ttsé, erë kè ie'pa wa yi sune. <sup>8</sup> E' ukuök<sub>i</sub> ta Saulo e' kékä ta iwöbla shuppée, erë kè iwawër. E' kuek<sub>i</sub> itsémirakitö ulà iërüle dö Damasco. <sup>9</sup> Ee ie' sené ká mañat kè wöbla wawëne, kè wa ì ñane, kè wa ì yane yës.

<sup>10</sup> Jesús ttökata eköl kiè Ananías serke Damasco e' a Skëképa Jesús e' kkachéwa kabsueie ta iché ia: “¡A Ananías!” Ie' iüté: “A Skëképa Jesús, ichó ña.”

<sup>11</sup> Skëképa tö iché ia: “Be' yú ñala kiè Yësyesë e' k<sub>i</sub> dö Judas u a. Ee wëm tso' kiè Saulo datse Tarso, e' yuló. Ie' tso' ttök S'yé ta. <sup>12</sup> Ie' tö isué kabsueie tö wëm kiè Ananías dewa ie' ska' iulà méka ik<sub>i</sub> as iwöbla wawërne, e' dör be'.”

<sup>13</sup> Ie' iüté: “A Skëképa Jesús, erë ye' a iyëule taië ie'pa wa tö wëm e' tö be' icha batse'r tso' Jerusalén e'pa we'ikeke siarë. <sup>14</sup> I'ñe ta e' de íe. Sacerdotepa wökirpa tö kawö mé ie' a as wépa tö be' a e' tsatké kié esepa kos klö'uluritö.”

<sup>15</sup> Erë Skëképa Jesús tö iché ia: “Be' yú. Ye' tö wëm e' shukitbak as ie' tö ye' tté pakö pë' kè dör Israel aleripa esepa a ena iblúpa a ñies Israel aleripa a. <sup>16</sup> Ye' wák tö ikkacheraë ie' a tö ie' kawöta weinuk ye' tté kuek<sub>i</sub>.”

<sup>17</sup> Eta Ananías demi Saulo ska' ta iulà méka ik<sub>i</sub> ta iché ia:

—A yami Saulo, Skëképa Jesús e' kkayé'wa be' a ñala k<sub>i</sub> be' dë'bitu e' wa, e' tö ye' patké as be' wöbla wawërne ñies as Wiköl Batse'r iërwa be' a.

<sup>18</sup> E' bet ta ì tso' Saulo wöbla mik nima kkuö sù, e' darolone ta iwöbla wawënene. Eta ie' e' kékä ta imía ta ie' e' wöskuée. <sup>19</sup> E' ukuök<sub>i</sub> ta ichkéne ta idiché iënene. Eta ie' e' tséat Jesús ttökatapa welepa tso' Damasco e'pa ta ká elke ulatök.

### *Saulo tö Jesús tté paké Damasco*

\* 8:33 Isaías 53.7-8 † 8:36-37 Yëkkuö kitule ká iaiäë keweie imalepa yöki esepa kè wa 8.37 kiteka. Ttè e' tö iché: Felipe tö ie' a iché: —Be' tö ttè i' klö'wé mokjë e' ta be' wösurmi. Eta wëm tö iüté: —Ye' tö iklö'wé tö Jesucristo dör Skëköl Alà e'.

<sup>20</sup> E' ukuöki ta bet Saulo tö Jesús tté pakémi judiowak a ie'pa ñi dapa'wo wé kos a. Ie'pa a ichekeitö tö Jesús dör Skököl Alà chökle. <sup>21</sup> Wépa kos tö ie' ttò ttsé, e'pa wökrarulune ittök ta ñi chakérak:

—¿Ie' wí kè dör wépa tö e' tsatkè kié Jesús a tso' Jerusalén esepa we'ik siarë? ¿Kè ie' wëbi wí dë'bitu ie'pa esepa tso' íe e'pa klö'ukwä wömëttsa sacerdotepa wökirpa ulà a?

<sup>22</sup> Erë Saulo tö Jesús tté pakéwaie kíta kíta, kè suane. Ie' tö ikkaché judiowak serke Damasco e'pa a tö mokí Jesús dör wé pairine'bitu idi' wa s'blúie e'. Ttè e' wa ie'pa siwa'blöwélur ie' tö.

#### *Saulo tkashkar judiowak yöki*

<sup>23</sup> Ká taië ukuöki ta judiowak tté ñita Saulo ttowa. <sup>24</sup> Erë e' jchenewä ie' wä. Ñië nañeë ie'pa tso' ipanuk ttéwä ká wékkö dökettsa ese ska'. <sup>25</sup> Erë nañewe iklépa tö ie' iéka kkó blublu a ta iíemi ká tso' kköiëule shkit kakkéë e' mik enaena. Es ie' tkashkar.

#### *Saulo dene Jerusalén*

<sup>26</sup> Mik ie' demi Jerusalén, eta ie' dapa'wak Jesús ttókatapa ta. Erë ie'pa kè wä iklöne tö mokí ie' erblé Jesús mik. Ie'pa suane iyöki. <sup>27</sup> Erë Bernabé wä ie' mítser kkaché Jesús ttekölpa tsá e'pa a. Bernabé tö ipaké ie'pa a tö Saulo tö Sköképa Jesús su' ñalá kí ta ee itté ie' ta. Ñies ichéitö tö Saulo kapakétke Damasco Jesús ttò wa kè suane. <sup>28</sup> Es Saulo e' tséat Jerusalén dami Jesús ttekölpa tsá e'pa ta. Kékraë ie' tö Sköképa Jesús tté pakeke kè suane. <sup>29</sup> Ñies ie' tö itté pakeke judiowak ttöke griegoie esepa a. Erë ie'pa ñi iütéka taië ie' ta. E' kuéki ie'pa tö ima'wé ttéwä. <sup>30</sup> Mik e' jchenewä iyamipa wä, eta ie'pa wä imítser Cesarea, ee ta ipatkémi dö Tarso.

<sup>31</sup> E' ukuöki ta Sköképa Jesús icha erule erule kos tso' Judea ena Galilea ena Samaria e'pa atene bèrë, kè yi tö ie'pa we'ikèia. Ie'pa yörke buaë Skököl tté dikia. Ñies ie'pa tö Skököl dalöieke taië. Wiköl Batse'r tö ie'pa kimeke as ikí iërdak taië kékraë.

#### *Eneas buanene*

<sup>32</sup> Pedro shköke ká wa'ñe ie'pa kos pakök wé ie'pa tso' ese ska'. Eta ide ñies ká kié Lida s'batse'rpa serke ee e'pa pakök. <sup>33</sup> Eta ee wëm eköl kuéitö kié Eneas e' kraulewä me'r ká kí e' kí duas de paköl (8). <sup>34</sup> Pedro tö iché ia:

—Jesucristo tö be' bua'wéne. Be' e' kóka ta be' ka' pashuó.

E' bet ta ie' e' kéka. <sup>35</sup> E' ukuöki ta pë' tso' Lida ena Sarón, e'pa ulitane tö ie' sué. E' kuéki ie'pa er mane'wé Sköképa Jesús a.

#### *Dorcas shkenekane*

<sup>36</sup> E' kéwö ska' ta ká kié Jope ee alaköl serke eköl dör Jesús ttökata, e' kié Tabitá (griegoie ikié e' dör Dorcas\*). Kékraë ie' bak ì buaë uk ena s'siarépa kímuk. <sup>37</sup> Ká e' ulatök ta ie' kirinewä ta iduowa. Inú pasunetke ta iméka úshu kákke ese a. <sup>38</sup> Jope ate Lida o'mik wé Pedro tso' ee. Jesús ttókatapa serke Jope, e'pa wä ijcher tö ie' tso' Lida, e' kuéki ie'pa tö wépa patké böi ichök ie' a: “Be' shkó bet Jope.”

<sup>39</sup> Es ie' mía ie'pa ta. Mik idemirak, eta ie' tsémi u shua wé Dorcas nu me'r ee. Alakölpa schó† kos iuke taië. E'pa iënewä ie' pamik. Eta ie'pa tö paio ena datsi' yö' Dorcas tö mik ibak ttsé'ka eta, e' kkaché Pedro a. <sup>40</sup> Eta Pedro tö ie'pa ké e' yökulur ta ie' e' tkéwä kuché kí ta itté S'yé ta. E' ukuöki ta ie' tö inú sué ta iché:

—A Tabitá, be' e' kóka.

Eta ie' wöbla shuppée. Mik Pedro suéitö eta ie' e' tkéser. <sup>41</sup> Pedro tö iklö'wéwä iulà a duéka. E' ukuöki ta ie' tö alakölpa schó ena s'batse'r malepa kié ta Tabitá kkachéitö ie'pa a ttsé'ka. <sup>42</sup> E' jchenewä Jope wakpa kos wä ta ie'pa taië erblé Sköképa Jesús mik. <sup>43</sup> Ta Pedro e' tséat taië Jope wëm kié Simón e' ska'. Wëm e' dör iyiwak kkuölit kanéukwak.

\* 9:36 Dorcas: S'kié e' wà kiane chè suli. † 9:39 schó: E' dör alakölpa wëm bléulewä kam serwane ese.

## 10

*Pedro tö Jesús tté buaë paké Cornelio a*

<sup>1</sup> Ká kiè Cesarea eë wëm serke eköl kiè Cornelio, e' dör Roma ñippökwakpa eruleë kiè Italiano e' capitán. <sup>2</sup> Ie' kè dör judiowak erë ie' dör wëm yësyësë Skëköl wöa. Ie' ena iyamipa ekka, e'pa tö Skëköl dalöieke taië. Ñies ie' tö inuköl kakmeke taië judiowak kimoie. Këkraë ie' ttöke Skëköl ta. <sup>3</sup> Ká et tsálij ta diwö de mañat, eta ie' tö isuë buaë kabsueie tö Skëköl biyöchökwak eköl dewa wé ie' tso' eë ta ichéitö ia: “A Cornelio.” <sup>4</sup> Ie' tkinewa ta Skëköl biyöchökwak suéwaitö krereë ta ie' tö iché ia: “A këkë, ¿ì kiane be' kì?” Eta Skëköl biyöchökwak tö ie' iuté: “Be' ttöke Skëköl ta ena s'siarëpa kimeke, e' wër buaë ie' wa. <sup>5</sup> E' kuëki yile patkómi Jope. Eë wëm tso' kiè Simón, kiè ñies Pedro e' kiök patkó. <sup>6</sup> Ie' tso' wëm eköl kiè ñies Simón dör iyiwak kkuölit kanéukwak, e' ska', ie' u me'r dayë kkömik.”

<sup>7</sup> Mik Skëköl biyöchökwak ttè one Cornelio ta e' mía eta Cornelio tö ikanè mésopa kié bül ena ñippökwak kiéitö eköl ñies. Ñippökwak e' tö Skëköl dalöieke taië. Ie' dör Cornelio kímukwak bua'ie. <sup>8</sup> Cornelio tö ì kos tka ie' ta e' paké ie'pa a. E' ukuökì ta ie'pa patkémittö dö Jope.

<sup>9</sup> Bule es diwö de bata a ta Cornelio kanè mésopa dami ñala wa döketke tsinet Jope. E' dalewa Pedro tkaka u bata kì ttök Skëköl ta. <sup>10</sup> Pedro dué bli wa erë ulirkeia ie' a, e' dalewa isuëitö kabsueie. <sup>11</sup> Ie' tö isuë tö ká jai kköbunane ta datsi' ukuö bérie suë iklöulewa ibata tkël a, e' bitewa dö jski. <sup>12</sup> Datsi' ukuö e' shua iyiwak klöka, e' sköke ibatsi' kì ena dù dör ñá judiowak a esepa tkërki tsakjë. <sup>13</sup> Eta ie' tö ttö ttsé ta ichéitö ia: “A Pedro, be' e' kóka. Iyiwak se ttö ta ikató.”

<sup>14</sup> Erë ie' tö iuté: “Au. A Skëköl, iyiwak dör ñá ese kè kataule ye' wa yës.” <sup>15</sup> Ta ttö e' tö ichéne Pedro a: “Ì batse'wétke Skëköl tö e' kè kiaria ñá.”

<sup>16</sup> E' tka mañatökicha ta datsi' ukuö mikane ká jai a. <sup>17</sup> Pedro tso'ia ibikeitsök taië ì suéyö kabsueie ¿ima e' wà kiane chë? E' wöshaë ta wëpa patkë' Cornelio tö, e'pa tö Simón u kué ta iëter Simón ukkö a. <sup>18</sup> Ie'pa tö ichaké: “¿Ië wëm kiè Simón kiekerakitö ñies Pedro, e' tso'?”

<sup>19</sup> Pedro tso'ia ì suéitö kabsueie e' bikeitsök, eta Wiköl Batse'r tö iché ia: “Ittsó. Wëpa mañal tso' be' yulök. <sup>20</sup> Be' e' ówa ta be' yú ie'pa ta. Kè ibikeitsar bötböt. Ye' tö ie'pa patkébitu be' tsukmi.”

<sup>21</sup> Eta Pedro e' éwa ta iché ie'pa a:

—Yi yuleke a' tö, e' dör ye'. ¿Ì dör iwà?

<sup>22</sup> Ie'pa iuté:

—Wëm kiè Cornelio dör Roma ñippökwakpa capitán eköl, e' tö sa' patkë' be' yulök. Ie' dör wëm yësyësë. Skëköl dalöiekeitö taië. Judiowak ulitane kì ie' kiar taië. Skëköl biyöchökwak batse'r e' eköl tö iyë' ie' a: “Pedro kió as ie' bitu be' u a. Ì kos cheke ie' tö be' a, e' ttsó.”

<sup>23</sup> Eta Pedro tö ie'pa kiéwa weshké. Eë ie'pa kapére. Bule es ta ie' mía ie'pa ta. Ñies s'yamipa serke Jope e'pa wëlepa mía ie' wapieie. <sup>24</sup> Bökkì es ta idemirak Cesarea. Eë Cornelio tö iyamipa ena pë' suule iwa buaë e'pa ki' e' dapa'ukka Pedro ttö ttsök. E'pa kos de ie' panuk. <sup>25</sup> Mik ie' de Cornelio u a eta Cornelio dettsa ishke'uk ta ie' e' tkéwa kuchë kì ie' wöshaë idalöioie. <sup>26</sup> Erë ie' tö iké e' duökka ta iché ia:

—Be' e' duóka. Ye' dör s'ditsö ñies wës be' es.

<sup>27</sup> Pedro ttöramiia Cornelio ta eta idewarak weshké ta ie' isuë tö taië pë' dapanewa. <sup>28</sup> Ie' tö iché ie'pa a:

—A' wa ijcher tö sa' judiowak kè a kawö ta' pë' kè dör judiowak esepa pakök ena shkök pë' esepa ta. Erë Skëköl tö ikkaché ye' a tö kè ye' kawö ta'ia ichök tö yile dör ñá. <sup>29</sup> E' kuëki mik ye' kine, e' bet ta ye' bitea, kè wa ì chakine. Ye' tö a' a ichakè ¿iök a' tö ye' kié?

<sup>30</sup> Cornelio tö iuté:

—Tkali ikëkkë tã ye' tkër ttök Skëköl tã ye' u a wes ye' wöblar ká bit ekkë diwö de mañat etã. E' bet tã wëm eköl de dur ye' wörki, e' datsi' dör dalölöë. <sup>31</sup> E' tö ye' a iché: 'A Cornelio, be' ttöke Skëköl tã e' ttsé ie' tö. Be' tö s'siarëpa kimeke e' wër buaë ie' wa. <sup>32</sup> Yile patkómi Jope Simón kiè ñies Pedro, e' kiökbitu. Ie' tso' wëm skà kiè Simón dör iyiwak kkuölit kanéukwak e' u a. E' u me'r dayë kkömik.' <sup>33</sup> E' bet tã ye' tö be' tsuk patké tã be' debitu er bua' wa. Es sa' ulitane e' dapa'wé íe Skëköl wöã ì chök ie' tö be' ké sa' a e' ttsök.

*Pedro tö Skëköl ttë buaë paké Cornelio ska'*

<sup>34</sup> Etã Pedro ttëmi tã ichéitö ie'pa a:

—Íñe tã ye' éna íane tö moki sulitane dör ñies ème Skëköl a. <sup>35</sup> E' kueki ká wa'ñe wépa tö ie' dalöieke tã iserke yësyësë esepa kiar ie' ki. <sup>36</sup> Ie' er buarmine se' ki Jesucristo dör sulitane Këköl e' batamik, e' ttë buaë pakane sa' dör Israel aleripa e'pa a. E' jcher a' wa. <sup>37</sup> Ñies ì bak judiowak ké kos a e' jcher buaë a' wa. Juan tö iyë' tö s'kawötã e' wöskuök. E' ukuöki tã Jesús tö s'pattëmi Galilea. <sup>38</sup> Ñies a' wa ijcher buaë tö Skëköl tö iWiköl Batse'r patké Jesús Nazaret wak e' ki idiché taië. Ie' shkë kekraë pé' ulitane shua íyi buaë kanéuk. Ñies s'we'ikeke bé tö esepa bua'wéneitö Skëköl tso' ie' tã e' kueki. <sup>39</sup> Ì wé ie' tö Jerusalén ena judiowak ká malepa a, e' kos sué sa' tö. E' ukuöki tã ittëwarakitö wötëulewã krus mik. <sup>40</sup> Erë e' ki ká de mañat tã Skëköl tö ishke'wékane tã ikkachéitö sa' a. <sup>41</sup> Ie' kè e' kkayëne sulitane a. Sa' è a ie' e' kkaché. Skëköl tö sa' shukitbak as sa' tö Jesús saù sa' wák wöbla wa. Ie' shkënekane e' ukuöki tã sa' chké sa' di'yé ie' tã. <sup>42</sup> Ie' tö sa' patké ittë buaë pakök sulitane a ñies ichök iarak tö ie' tkéka Skëköl tö s'ttsë'ka ena s'duulewã, e'pa shulökwakie. <sup>43</sup> Ká íaiã Skëköl ttekölpa ulitane tö Jesús paka'atbak tã iyë'atraitö tö yi erblé ie' mik esepa nuì olordaë ie'pa ki ie' batamik.

*Pë' kè dör judiowak esepa ki Wiköl Batse'r de*

<sup>44</sup> Pedro tso'ia ipakök ie'pa a tã e' shua Wiköl Batse'r debitu ie'pa kos tso' ie' ttö kittsök, e'pa ki. <sup>45-46</sup> Etã Jesús mik erblökwakpa dör judiowak dë'bitu Pedro tã e'pa tö isué tö wes Wiköl Batse'r debitu pé' kè dör judiowak, esepa ki ñies. Ie'pa tö ittse' tö ittökerak ttö kua'ki kua'ki wa. Ñies Skëköl kikökka itso'rak. E' tö ie'pa tkiwéwã. <sup>47</sup> Etã Pedro tö iché:

—Wiköl Batse'r debitu ie'pa ki wes sa' ki itsá dë'bitu es. E' kueki kè yi a iwöklönuk tö kè ie'pa wöskuar di' a.

<sup>48</sup> Ie' tö ikérak e' wöskuök Jesucristo ttö wa. E' ukuöki tã ie'pa tö ie' a ikié taië: "Be' e' tsuat sa' tã ká böt mañat."

## 11

*Pedro tö Cornelio ttë paké Jerusalén*

<sup>1</sup> Jesús ttekölpa tsá ena s'yamipa malepa tso' Judea, e'pa tö ittse' tö pé' kè dör judiowak, ñies esepa tö Skëköl ttë klö'wé. <sup>2</sup> Mik Pedro dene Jerusalén, etã Jesús mik erblökwakpa dör judiowak, esepa wëlepa tö ie' ché suluë. <sup>3</sup> Ie'pa tö ie' a ichaké:

—Ílók be' dare pé' kè dör judiowak esepa pakök ena chkök ie'pa tã?

<sup>4</sup> Ie' tö ì kos tka e' paké ie'pa a seraa tã iché ía:

<sup>5</sup> —Ye' bak Jope tã ye' ttöke Skëköl tã, e' shua ye' tö ì sué kabsueie. Ì suéyo e' dör datsi' ukuö bërie sué klöulewã ibata tkël a. E' bitewã ká jai a dò wé ye' tso' ee. <sup>6</sup> Etã ye' tö isué bua'iewã isuöie tö ì tso' ishua. Ye' tö iyiwak klöka, iyiwak kañiru, iyiwak e' sköke ibatsi' ki ena dù, esepa sué. <sup>7</sup> Etã ye' tö ttö ttsé e' tö iché ye' a: 'A Pedro, be' e' kókã. Iyiwak se' ttö tã ikató.' <sup>8</sup> Ye' íiuté: 'Au. A Skëköl, ye' kè wã iyiwak dör ñá ese kataule yës.' <sup>9</sup> Tã ttö datse ká jai a, e' tö ichéne ye' a: 'Í batse'wétke Skëköl tö ese kè kiariã ñá.' <sup>10</sup> E' tka mañatökicha tã imíkane sekka ká jai a. <sup>11</sup> E' wöshã tã, wëpa mañal patküule datse Cesarea ye' yulök, e'pa debitu wé ye' tkër e' wé a. <sup>12</sup> Wiköl Batse'r tö ye' a iché: 'Kè ibikeitsar bötböt. Be'



yú ie'pa ta. Nies s'yamipa teröl i' dare ye' ta. Sa' kos dewa Cornelio u a. <sup>13</sup> Ie' tö sa' a ipaké tö wes ie' tö Skököl biyöchökwak sué dur eköl ie' u a. E' tö iché ia: 'Yile patkómi dò Jope ee wëm tso' kiè Simón, e' kiè nies Pedro, e' kióbity. <sup>14</sup> Ie' tö icheraë be' a wes be' ena be' yamipa kos e'pa tsatkërmi.' <sup>15</sup> Mik ye' tö Jesús tté pakémi ie'pa a, eta Wiköl Batse'r debity ie'pa ki wes idë'bitu sa' ki kuaë es. <sup>16</sup> Eta ì ye' Skökëpa Jesús tö ye' a, e' ane ye' éna. Ie' tö ye' a iyë': 'Juan tö s'wöskué di' a, erë a' iërdawa Wiköl Batse'r a.' <sup>17</sup> Iwënewa tö Skököl tö iWiköl mé ie'pa a wes imenebak se' a kuaë mik se' erblë' Skökëpa Jesucristo mik eta es. E' kuëki ye' dör yi Skököl wöklö'woie?

<sup>18</sup> Mik ì ché Pedro tö e' ttsé ie'pa tö, eta isiwä'bléwarak ta Skököl kikékarakitö. Ie'pa tö iché:

—E' wa se' wa ijcher tö pé' kè dör judiowak, esepa a nies Skököl tö imé as ie'pa er mane'ù ie' a senoië michoë.

#### *Skökëpa Jesús icha eruleë tso' Antioquia e' pakè*

<sup>19</sup> Esteban kötwarakitö e' ukuöki ta Jesús mik erblökwakpa we'ikémitke taië pé' tö. E' yöki ie'pa welepa tkayal. Welepa míyal dò Fenicia. Welepa míyal dò Chipre. Iskà mírak dò Antioquia. Ká ekkëpa a ie'pa tö Jesús tté buaë pakeke judiowak è a. <sup>20</sup> Erë Jesús mik erblökwakpa datse Chipre ena Cirene, ese welepa míyal Antioquia. Eë Skökëpa Jesús tté buaë pakéarakitö pé' kè dör judiowak esepa a. <sup>21</sup> Eta Skökëpa tö ie'pa kímé taië. E' kuëki taië ká e' wakpa erblë Skökëpa Jesús mik ta ier mane'wérak ie' a.

<sup>22</sup> Mik Skökëpa Jesús icha erule tso' Jerusalén, e'pa tö tté e' ttsé, eta Bernabé patkémirakitö tkörö Antioquia. <sup>23</sup> Mik ie' demi, eta ie' tö isué wes Skököl er buaë ché ie'pa a. E' tö ie' ttsé'wé buaë. Ie' tö ie'pa kí patté as ie'pa e' tköwa darërë kekraë ier kos wa ie'pa erblö Skökëpa mik e' a. <sup>24</sup> Ie' dör wëm yësyësë. Ie' a taië Wiköl Batse'r tso'. Ie' tö Jesús bikeitseke bua'iewa. Es taië pé' kí de erblök Skökëpa mik.

<sup>25</sup> E' ukuöki ta ie' mía Tarso Saulo yulök. <sup>26</sup> Mik ikuëitö, eta itsémi Antioquia e' ta. Eë ie' tséarak duas ek. Ie'pa e' dapa'uke Skökëpa Jesús icha erule e'pa ta. Ká e' wakpa taië wöbla'wekerakitö. Ká e' a Jesús ttökatapa tsá kine Cristo wakpa.

<sup>27</sup> E' kéwö ska' ta Skököl ttekölpa welepa tso' Jerusalén míyal Antioquia. <sup>28</sup> E'pa shua eköl kiè Agabo, e' e' duéka ta ichéitö Wiköl Batse'r wa tö bli datse ká wa'ne ki. E' debity mik Claudio bak Roma wökir kibi e' kéwö ska'. <sup>29</sup> Eta Jesús ttökatapa tso' Antioquia e'pa tö iché ñi a: "Mishka inuköl shtök patkè se' yamipa serke Judea, e'pa kimoie kos se' a imer ekké." <sup>30</sup> Es ie'pa tö iwé. Eta ipatkémirakitö Bernabé ena Saulo ulà a as ie'pa tö imü Skökëpa Jesús icha wökir kibipa tso' Judea e'pa ulà a.

## 12

#### *Pedro wötéwarakitö s'wöto wé a*

<sup>1</sup> E' kéwö ska' ta blu' kiè Herodes, e' tö Skökëpa Jesús icha welepa klö'wéwa we'iké. <sup>2</sup> Ie' tö Santiago dör Juan ël, e' ttökwa patké tabè wa. <sup>3</sup> Mik ie' isué tö e' wër buaë judiowak wa, eta ie' tö Pedro klö'ukwa patké. E' wéitö mik judiowak tö Pan Kè Yöule Iwölöwoka Wa e' kéwö tkö'wekerakitö eta. <sup>4</sup> Mik Pedro klönewa, eta Herodes tö iwötéwa s'wöto wé a. Eë ñippökwakpa döka dabom eyök ki teröl (16) e'pa tö ikkö'neke tkël tkël. E'pa mane'weke tkël tkël kukur kukur. Herodes tö ibikeitsé tö kawö tkö'wekerakitö, e' ukuöki ta iyekettsaneyö shulë sulitane wöa. <sup>5</sup> E' dalewa Pedro tso' s'wöto wé a. Erë Skökëpa Jesús icha erule e'pa tso' ikiök Skököl a darërë ie' ki kekraë.

#### *Skököl biyöchökwak tö Pedro yéttsa s'wöto wé a*

<sup>6</sup> Herodes tö Pedro yekettsa shulë, e' nañewe Pedro kapötër ñippökwakpa böl shusha moulewa tabechka kichaie bötö wa. Nies ñippökwakpa böl tso' s'wöto wé ukkö kkö'nuk. <sup>7</sup> E' bet Skököl biyöchökwak de dur ie' ska' ta bö'wö olo buneka dalölöë s'wöto wé a. Eta ikéwaitö ichane a as iti'rka ta iché ia: "jBe' e' kóka bet!" E' bet ta imoulewa tabechka kichaie wa e' wöyerulune. <sup>8</sup> Eta Skököl biyöchökwak tö iché ia: "Be' datsi' ióka, be'



klökkuo ióka.” Tā ie' tō iwé es. Skéköl biyöchökwak ikí ché ia: “Be' paio kíkkuo ióka tā be' shkó ye' itöki.”

<sup>9</sup> Etā Pedro mía itöki, erë ie' kè éna iane tō ì weke Skéköl biyöchökwak tō e' dör moki. Ie' tō ibikeitsè tō ie' tso' kabsauk. <sup>10</sup> Etā ie'pa tkami wé ñippökwakpa iëter ukkò kkö'nuk ee. E' ukuöki tā wé ñippökwakpa skà iëter ee itkamirak ñies. Mik ie'pa demi ukkò kibi a yöule tabechka wa atē ñala kke, etā e' kköbunane er wa. Etā ie'pa deyal u'rkí shkémirak ekuölö tā Skéköl biyöchökwak tō iméat eköl.

<sup>11</sup> Ekkè tā ie' éna iane tō ì suéitö e' dör moki. Ie' ibikeitsè: “I'ñe tā yö isué tō moki Skéköl tō ibiyöchökwak patké ye' tsatkök Herodes ulà a ena ì kos wamblak judiowak éna ye' ki, e' ulà a ñies.”

<sup>12</sup> Mik ie' éna ianewa bua'iewa tā imía María u a. María dör Juan mì. Juan kiè ñies Marcos. Eë ie'pa daparke taië ttök Skéköl tā. <sup>13</sup> Mik Pedro de dur ukkò a ie'pa chakök, etā busi eköl dör kanè méso kiè Rode e' mía iweblök tō yi idir. <sup>14</sup> Mik ie' ttò ttséwa Rode tō, etā ittse'neka buaë kè deia ukkò ppöök tā itunemine weshke ichök tō Pedro de dur ukkò a. <sup>15</sup> Ie'pa tō iché ia:

—¡Be' alíneka!

Erë ie' iuté:

—Moki ye' ttöke.

Ie'pa ie' a iché:

—Au, e' kè dör ie'. E' dör Skéköl biyöchökwak patkéule ikkò'nuk e'.

<sup>16</sup> E' dalewa Pedro tso'ia ichakök ukkò a. Mik ukkò kköppéerakitö, etā isuérakitö tō ie' e' idir tā itkinewarak taië. <sup>17</sup> Erë ie' tō ikkaché ulà wa tō a' siwa'bló. E' ukuöki tā ie' tō ipaké ie'pa a tō wes Skéköl tō iyéttsa s'wöto wé a tā ichéitö:

—Ttè e' pakó Santiago a ena s'yamipa malepa a.

E' ukuöki tā ie' e' yéttsa mía bánet.

<sup>18</sup> Mik ká ñine etā s'wöto wé a ñippökwakpa shutíneka taië Pedro kè ku' e' kueki. <sup>19</sup> Herodes tō Pedro yulök patké. Erë mik ie'pa kè wā ikune, etā ie' tō inuí tkéwa iñippökwakpa mik tā ie' tō ie'pa ttökwa patké.

E' ukuöki tā ie' e' yéttsa Judea mía senuk Cesarea.

### *Herodes du'wa*

<sup>20</sup> E' kéwö ska' tā blu' Herodes ulurke taië Tiro ena Sidón wakpa ki. E' kueki ie'pa kawö mé ñi a shkowaie ie' ska' ttök ie' tā. Ie'pa tō wëm kiè Blasto e' pablè'bak as ie' mi' ie'pa ttekölíe ttök Herodes tā. Ie' kanéblöke Herodes a iu kuebluie. Ie' ttò wa ie'pa tō kawö kiè Herodes a tō ie'pa múat bèrè, ie'pa tō chkewö tueke Herodes ká a e' kueki.

<sup>21</sup> Ká et tā Herodes tō ie'pa kiéttsa. Mik e' kéwö de, etā ie' tō blu' datsí iéka tā ie' e' tkéka s'shulo kulé tso' iwé a e' ki tā ee ikapaké ie'pa tā. <sup>22</sup> Ie'pa tō Herodes ché aneule i' es: “¡Ittöke i', e' kè dör s'ditsö, e' dör kéköl wele ttöke!” <sup>23</sup> E' ttsër buaë ie' kukua tā ie' e' kíkéka taië, kè wā Skéköl kikaneka. E' kueki e' wöshäe tā Skéköl biyöchökwak eköl tō duè méka iki. Ie' katéwa öña tō tā iduowa.

<sup>24</sup> E' dalewa tā Skéköl ttè pakarke ème ká wa'ñe.

<sup>25</sup> Mik Bernabé ena Saulo e'pa tō ì uk ie'pa dè' Jerusalén e' wawé one, etā ie'pa míyalne Antioquia. Ie'pa wā Juan kiè ñies Marcos, e' mitsernak.

## 13

### *Wiköl Batse'r tō Bernabé ena Saulo patké Jesús tté buaë pakök*

<sup>1</sup> Skéképa Jesús icha erule tso' Antioquia, e'pa shua Skéköl ttekölpa ena s'wöbla'ukwakpa tso'rak ee. E'pa dör Bernabé ena Simón (Simón e' kiè ñies Dalo'riwak), ena Lucio dör Cirene wak, ena Menahem (Menahem e' talane Galílea blú kiè Herodes e' tā ñita), ñies Saulo tso'ñak. <sup>2</sup> Ká et tā ie'pa tso' Skéköl dalöiök batsè wa tā e' shua Wiköl

Batse'r tö iché ie'pa a: “Kanè kuà'kì tso' ye' wà Bernabé ena Saulo a. Ie'pa shüshtétkeyö iwakanéwoie e' kuèkì ie'pa böl yóttsa ye' a kanè e' woie.”

<sup>3</sup> Ie'pa batsé ena tté S'yé ta one, ta iulà mékarak ie'pa böl kì e' dalewa ikié S'yé a iki. E' ukuöki ta ipatkémirakitö iwakanéuk.

*Bernabé ena Saulo tö Jesús tté paké Chipre wakpa a*

<sup>4</sup> Es Bernabé ena Saulo míyal Seleucia patküle Wiköl Batse'r wà. Ta ee ie'pa e' iéka kanò a míyal ká kiè Chipre ee. <sup>5</sup> Idemirak Chipre wé kanò irirke ee, e' ké kiè Salamina. Mik idemirak ee, eta ie'pa tö Skéköl tté pakémi judiowak a ñni dapa'wo wé kos a. Juan mirwà ie'pa ta ie'pa kimuk. <sup>6-8</sup> Chipre kos a itkarak demirak ká kiè Pafos ee. Ee ie'pa tö judiowak kué eköl kiè Barjesús (e' kiè griegoie Elimas). E' dör ie'pa awá eköl. Ie' e' chò tö ie' dör Skéköl tteköl. Ie' yé'arie kekraë ká e' wökir kiè Sergio Paulo, e' ska'. Sergio Paulo kabikeitsò buaë, ie' kì Skéköl tté kiane ttsè. E' kuèkì ie' tö Bernabé ena Saulo tsük patké. Eré awá ñe' kè kì ikiane tö Sergio Paulo tö tté mik se' erblöke e' klö'wè. E' kuèkì ie' tö Bernabé ena Saulo ma'wé wöklö'wè. <sup>9</sup> Eta Saulo, e' kiè ñies Pablo, e' kì Wiköl Batse'r debitu taië. Eta Elimas suéwaitö krereë <sup>10</sup> ta iché ia:

—Be' kachò. Be' e' wamblò suluë. Be' dör wes bé es. Sene yësyësë kos, e' bolök be' dör. ¿Kos be' tö Skéköl ñalé yësyësë e' shkuli'wèmirö? <sup>11</sup> I' ta Skéköl tö be' we'ikeraë. Be' wöbla kè wawërpaia. Ká tköraë taië be' kì ta be' kè tö diwö olo suëpaia.

E' bet ta Elimas wöa ká mía ttsettseë, iwöbla kè wawëneia, e' kuèkì yile yulekeitö as tö iulaiò. <sup>12</sup> Mik ká e' wökir tö e' sué, eta ie' erblé Jesús mik. Ie' wökranewà wes Skékëpa tté dör e' kittsök.

*Pablo ena Bernabé tö Jesús tté paké Antioquia ate Pisidia ee*

<sup>13</sup> Pablo ena ishköwapa e' iékarak kanò a Pafos ta imíyal Perge ate Panfilia ee. Eta Juan tö ie'pa méat ee, ta imíane Jerusalén. <sup>14</sup> E' ukuöki ta imíyal Antioquia ate Pisidia ee. Eta ee judiowak eno diwö ta ie'pa dewa judiowak ñi dapa'wo wé a e' tuléser. <sup>15</sup> Eta wele tö ì kit Moisés ena Skéköl ttekölpa tö yëkkuö kì, e' aritsé dò ekuölö. E' ukuöki ta ñi dapa'wo wé wökirpa tö ichök patké Pablo ena Bernabé a:

—A yamipa, a' wà ilè tso' sa' pattoie, e' ta sa' pattó.

<sup>16</sup> Eta Pablo e' kékà ta ikkaché ulà wa tö a' siwà'bló ta ichéitö:

—A Israel aleripa ñies ká kuà'kì wakpa tö Skéköl dalöieta', a' tö ye' ttò ttsó. <sup>17</sup> Skéköl dör Israel aleripa e' Kéköl, kuaë e' tö se' bak ká iaiaë, e'pa shukitbak iwák a. Ie'pa sene' Egipto wes ká kuà'kì wakpa es. Ee ie' tö ie'pa kimé taië alöne taië. E' ukuöki ta ie' tö ie'pa yéttsa ká e' kì idiché wa. <sup>18</sup> Ie' tö ie'pa dalé'ttsé ká sir poë wé kè yi serku' e' a dökà duas dabom tkëyök (40). <sup>19</sup> Pè' ditséwöpa dökà kul bak senuk Canaán e'pa eo'waitö ká mè se' yépa bak ká iaiaë, e'pa a. <sup>20</sup> E' kos kì duas bak cien tkëyök kì dabom skeyök (450) ekkë.

“E' ukuöki ta Skéköl tö ie'pa shü kékà eköl eköl imalepa wëttsoie dò itteköl Samuel e' kéwö ska'. <sup>21</sup> E' ukuöki ta ie'pa tö Samuel a blu' kié eköl. Es Skéköl tö Saúl méka ie'pa blúie, e' dör Quis aladulaköl. Ie' dör Benjamín ditséwö. Saúl sené ie'pa blúie dökà duas dabom tkëyök (40). <sup>22</sup> E' ukuöki ta Skéköl tö Saúl uyéttsa ta David mékaitö blu'ie iskéie. David ché Skéköl tö i' es: ‘Ye' tö David dör Jesé alà, e' sué. Ie' wër buaë ye' wa, ie' erbikò wes ye' erbikò es. Ì kiane ye' kì wè, e' wakaneweraëitö.’ <sup>23</sup> David aleri eköl dör Jesús, e' patké Skéköl tö se' dör Israel aleripa e'pa tsatkök wes ie' kablé' es. <sup>24</sup> Eré kam Jesús döbitu e' yöki Juan S'wöskuökwak tö se' Israel aleripa ulitane patté tö se' kawöta er mane'uk Skéköl a. Ñies se' kawöta e' wöskuöklor di' a. <sup>25</sup> Mik Juan kanè erkewatke ta ie' tö iché: ‘Wëm datse eköl e' kinuk a' tso', e' kè dör ye'. Ie' datseia ye' itöki. Ie' dör ye' tsata, e' kuèkì ie' klökkuö kicha è kè wötsënanuk ye' siarla e' a.’

<sup>26</sup> “A s'yamipa, Abraham aleripa, ñies a' wépa kè dör ie' aleripa eré Skéköl dalöieta' esepa, se' ulitane a s'tsatkè tté e' patkënetke. <sup>27</sup> Jerusalén wakpa ena iwökirpa e'pa kè wà ijcher tö Jesús dör S'tsatkökwak. Ñies eno diwö bit ta ie'pa tö ie' tté kitule yëkkuö kì

Skëköl ttekölpa wā, e' aritseke, erë e' kè wà ane ie'pa éna. Mik ie'pa tö Jesús wöméttsa ttèwā etā e' wa ie'pa tö ie' tté tso' kitule Skëköl yëkkuö kī e' wà tkö'wé. <sup>28</sup> Ie'pa kè wā ì sulu kune ikī ittowā erë ikkatéraitö Pilato a as ittökwa patkòitö krus mik. <sup>29</sup> Es Jesús ttéwarakitö. Mik ie'pa tö ì kōs kitule Skëköl yëkkuö kī, e' wawé one, etā inú éwarakitö krus mik tā iwötéwarakitö pō a. <sup>30</sup> Erë Skëköl tö ie' shkë'wékane. <sup>31</sup> E' ukuökī tā ie' e' kkachéne ká taië wépa manetwā ie' wapie Galilea dō Jerusalén, e'pa a. I'ñe tā e'pa kōs dör ie' ttekölpa judiowak ulitane wörkī.

<sup>32</sup> “Es sa' tso' ttè buaë i' pakök a' a. E' dör ì uk Skëköl kablë' sa' yépa bak ká iaiaë e'pa a <sup>33</sup> e' wà tka sa' dör ie'pa aleripa e' wörkī. Itka mik Skëköl tö Jesús shkë'wékane etā. Itka wēs itso' kitule Salmo böt kī es wé ichéitö: ‘Be' dör ye' alà. I'ñe yö ikkachétke tö ye' dör be' yé.’\* <sup>34</sup> Nies Jesús yé'at Skëköl tö iyëkkuö kī: ‘Wēs ye' tö ye' ttè yësyësë batse'r taië e' me' David a tö ye' er buaë chöraë ie' a, es ye' er buaë chöraë be' a.’† E' wà dör tö Skëköl tö ie' shkë'werane as kè ichkà nurwā. <sup>35</sup> E' kuekī nies itso' kitule: ‘Be' kanè méso batse'r, e' kè mepaatbō as ichkà nurwā.’‡ <sup>36</sup> Es David, se' blú bak iaiaë, e' tö imalepa bak e' kèwō ska', e'pa wëttsé wēs Skëköl tö iyë'ia es. E' ukuökī tā idu'wā tā itöbinewā iyëpa pō a tā inunewā. <sup>37</sup> Erë wé shkë'kane Skëköl tö e' chkà kè nune'wā. <sup>38</sup> A yamipa, a' wā ijchenú tö se' nuì olo'yarmi se' kī Jesús batamik, e' ttè pakeke sa' tö a' a. <sup>39</sup> Ttè méat Moisés tö dalöiëno, e' kè a se' nuì olonuk. Erë wépa erblé Jesús mik esepa nuì olordaë ie'pa kī. <sup>40</sup> A' tso' erkī as a' kè tā itkō wēs Skëköl ttekölpa tö ikit es wé Skëköl tö ichè:

<sup>41</sup> ‘A ye' wayuökwakpa, ye' ttò ttsó.

Ì weraëyö a' kèwō ska' tā, e' dör taië kè klöonuk a' a ekkë.

Eré a' a ipakarmi erë kè a' tö iklö'wepa.

E' kuekī a' tkinú. A' enúwa.’”§

<sup>42</sup> Etā Pablo ena Bernabé e' yélur ñi dapa'wo wé a. Etā pè' tö iché ie'pa a a' kiéne ttè ekkëpa skà pakökne sa' a eno diwö étö wa. <sup>43</sup> Mik ie' dapa'wérak e' one, etā judiowak, nies pè' e' yué judiowakie esepa taië míyal Pablo ena Bernabé tā. Pablo ena Bernabé tö ie'pa patté tö a' e' tkówa darërë Skëköl er buaë chöke se' a e' a.

<sup>44</sup> Eno diwö étö wa etā ká e' wakpa iekkë tā idettsarak sēraa Skëköl ttè kīttsök. <sup>45</sup> Erë mik judiowak tö isuë tö pè' dapane taië Pablo ttò kīttsök, etā ie'pa yökī isulune tā ie' kékarak ichök tö ì cheke ie' tö e' dör kache. Ie'pa tö ie' ché suluë. <sup>46</sup> Erë ie' ena Bernabé kè suane tā iché iarak:

—Sa' kawöta a' dör judiowak e'pa pattoie kewe Skëköl ttè wa, erë a' kè wā iklöne. Wēsua a' ibikeitseke tö sene michoë kè mène a' kī. E' kuekī sa' míyal ipakök pè' kè dör judiowak esepa a. <sup>47</sup> Es Skëköl tö sa' patké. Ie' yëkkuö tö ichè:

‘Be' tkékayö wēs bö'wö wöñar stui a es.

Es ye' tö be' patkeraë ká ulitane wakpa pattök,

Ie'pa tsatkè e' ttè pakeraëbö ká wa'ñe dō wé ká i' erkerö ee.’\*

<sup>48</sup> Mik pè' kè dör judiowak e'pa tö ttè e' ttsé etā ie'pa ttsënekarak buaë. Ie'pa e' kékarak Skëképa Jesús tté kikökka. Wépa kōs suletëneat senuk michoë, esepa erblé Jesús mik. <sup>49</sup> Es Skëképa Jesús tté pakane ká e' wa'ñe a. <sup>50</sup> Erë alakölpa dalöiërta' taië ká e' kī esepa tö judiowak ttè dalöieke buaë, nies wépa dalöiërta' taië ká e' kī, esepa shutiwéka judiowak tö as Pablo ena Bernabé we'ikòraitö as ie' yötttsarak ká e' kī. <sup>51</sup> Etā Pablo ena Bernabé tö iklö po ppée ikkachoie ie'pa a tö ie'pa kī inuí ane tā míyal Iconio. <sup>52</sup> Erë Jesús ttökatapa atē e'pa ttsë'ne buaë nies ie'pa a Wiköl Batse'r tso' taië.

## 14

### *Pablo ena Bernabé tö Jesús tté paké Iconio wakpa a*

\* 13:33 Salmo 2.7 † 13:34 Isaías 55.3 ‡ 13:35 Salmo 16.10 § 13:41 Habacuc 1.5 \* 13:47 Isaías 49.6

<sup>1</sup> Mik Pablo ena Bernabé demi Iconio, etá ie'pa dewa judiowak ñi dapa'wo wé a wes ie'pa wöblar es. Ie'pa tö Jesús tté paké buaë. Es judiowak ñies pë' kè dör judiowak, esepa taië erblé Jesús mik. <sup>2</sup> Erë judiowak kè erbléne imik, e'pa tö pë' kè dör judiowak, esepa shutiwéka ena iluwéka taië s'yamipa ki as iwe'ikörakitö. <sup>3</sup> Erë Pablo ena Bernabé e' tséat ká taië ee. Ie'pa tö Skëképa tté pakeke kè suane. Skëköl tö diché mé ie'pa a ì kè or yi a ese wöie iwà kkachöie tö ie' er buaë chöke siá e' tté dör moki. <sup>4</sup> Erë ká e' wakpa ñi blabatsélor, shabötspa wa judiowak tté wër buaë, shabötspa wa Jesús ttekölpa tsá e'pa tté wër buaë. <sup>5</sup> Judiowak ena pë' kè dör judiowak, e'pa tö kawö mé ñi a iwökirpa ta Pablo ena Bernabé we'ikoie, të ák wa ittowaie. <sup>6-7</sup> Erë mik Pablo ena Bernabé, e'pa wa ijchenewa, etá ie'pa tkayalmi dòmi ká kiè Licaonia ee. Ká kiè Listra ena ká kiè Derbe atë ee. Ká e' wa'ñe ie'pa tö Jesús tté buaë paké.

*Pablo tëne ák wa ittowaie ká kiè Listra ee*

<sup>8-9</sup> Etá wëm tso' eköl Listra, e' kune' klö bachiulewa. Ie' kè shko. Ie' tkër Pablo ttöke e' ttsök. Pablo tö isuéwa krereë. Ie' wa ijcher tö wë' ierblé Jesús mik as ibuarne. <sup>10</sup> Etá ie' tö iché ia aneule:

—jBe' e' kóka, be' e' duóka!

Etá wëm e' kéká tuneká tsut ta ishkémi. <sup>11</sup> Mik pë' tö, ì wé Pablo tö e' sué, etá ie'pa tö ichémi aneule ie'pa Licaonia ttö wa:

—jWépa dalöiekesö skëkölie e'pa dettsa se' shua s'ditsöie!

<sup>12</sup> Pablo kapaké kibiie, e' kueki ie'pa tö ie' klö'wé ie'pa kéköl kiè Hermes e' skéie. Bernabé klö'wérakitö ie'pa kéköl kiè Zeus e' skéie.\* <sup>13</sup> Zeus wé merka ká e' ñalé ukuö o'mik tsinet. Zeus sacerdote wa baka wë'ñe ena ma'ma wörkua debitu taië. Ie' ena pë' ulitane éna baka wë'ñe jchak mè Pablo ena Bernabé a idalöioie ikékölpaie. <sup>14</sup> Erë mik Bernabé ena Pablo wa ijchenewa, etá ie'pa e' datsi' jchéé ikkachöie tö e' dör suluë ie'pa a. Ta ie'pa mia pë' shua ta ichérakitö aneule:

<sup>15</sup> —A kéképa, jì uk a' tso'? Sa' dör s'ditsö wes a' es. Sa' debitu tté buaë pakök a' a as a' tö íyi ikké kè wà ta' ese kos watöttsa ta a' er mane'ù Skëköl chók e' a. Ie' tö ká jai ena ká i' ena dayë ena ì kos tso' iki e' yö'at. <sup>16</sup> Ká iaiaë dò ikké ta sulitane serke wes iwák ki ikiane es, e' dalë'ttsé'bitu Skëköl tö. <sup>17</sup> Eré e' dör es, erë ie' dör buaë se' ta kekraë, e' wa ie' tö iwà kkaché siá tö ie' dör Skëköl chók. Ie' tö kalì patkeke a' a. Ie' tö iyiwö weke a' a. Ie' tö chkè meke a' a ñanoie a' ttsé'woie buaë.

<sup>18</sup> Eré ie'pa tö ì kos ché iarak, erë iekkë ta baka wë'ñe jchéraitö Pablo ena Bernabé dalöioie wes Zeus ena Hermes es.

<sup>19</sup> E' shà ta judiowak welepa datse Antioquia ena Iconio, e'pa debitu ta Listra wakpa dakiñérakitö Pablo ttökwa. Iklö'wéwarakitö ta itérakitö taië ák wa. Ibikeitsérakitö tö iduowa, e' kueki ie'pa tö ikuémi méat tër Listra ké kkò a wi'kie. <sup>20</sup> Erë mik Jesús ttökatapa malepa e' dapa'wéka ipamik, etá ie' e' kéká miáne Listra. E' bule es ta ie' mia Bernabé ta dò ká kiè Derbe ee.

<sup>21</sup> Ie'pa demi Derbe ta Jesús tté buaë pakérakitö ká e' wakpa a. Taië ie'pa e' yué Jesús ttökataie. E' ukuöki ta ie'pa debitu Listra ena Iconio ena Antioquia. <sup>22</sup> Ká ekké kos a ie'pa tö Jesús ttökatapa er diché ié ena ipablérakitö as ie' tköwarak darerëë tté mik se' erblöke e' a. Ie'pa tö iché iarak: “Se' wake' weirdaë ká i' ki dowäie aishkuö ta ì blúie Skëköl tso' e' a.” <sup>23</sup> Ñies ká kos e' ki ie'pa tö wëpa shushté kanëblök Skëképa Jesús icha erule erule e'pa wökirpaie. E'pa ki ie'pa ikié S'yé a ena batsé, e' ukuöki ta iméarakitö Skëképa mik ie'pa erblöke e' ulà a.

*Pablo ena Bernabé dene Antioquia atë Siria ee*

\* 14:12 Zeus ena Hermes: E'pa dalöiök griegowak bak skëkölie ká iaiaë. Ie'pa a Zeus dör skëköl bua'ie imalepa tsata. Ie'pa tö iklö'wé tö Hermes dör Zeus tteköl. Romawak tö Zeus kiè méka Júpiter ena Hermes kiè mékarakitö Mercurio.

<sup>24</sup> E' ukuöki ta Pablo ena Bernabé tkami ká kiè Pisidia demirak Panfilia. <sup>25</sup> Ie'pa tö Jesús tté buaë paké ká kiè Perge e' wakpa a. E' ukuöki ta ie'pa míã ká kiè Atalía ee. <sup>26</sup> Ee ta ie'pa e' iéka kanò a míãne Antioquía iyamipa tö ie'pa patkè'mi Jesús tté pakök e'pa ska'. Ee iyamipa tö ie'pa me' Skëköl er buaë chöke se' a e' ulà a ì kanéuk ie'pa dare e' woie. <sup>27</sup> Mik ie'pa demine Antioquía, eta Skëkëpa Jesús icha erule e' dapa'wékarakitö. Ta ì kos wé Skëköl tö ie'pa ta, ñies wes ie' tö ikkayè' pè' kè dör judiowak, esepa a tö ie'pa erblömi ie' mik wes judiowak es, e' kos pakérakitö iyamipa a. <sup>28</sup> Eta ie'pa e' tséat ká taië Jesús ttökatapa tso' Antioquía, e'pa ta.

## 15

*Skëkëpa Jesús icha e'pa wökir kibipa ñi dapa'wé Jerusalén*

<sup>1</sup> E' kéwö ta, wëpa wëlepa e' yéttsa Judea demi Antioquía. Ie'pa tö s'yamipa wöbla'wémi ttè i' wa: "A' wëpa kos kawöta tottola kkuölit tée tsir wes Moisés ikitat es. E' kè kaneone a' wa, e' ta kè a' tsatkërpa." <sup>2</sup> E' kuëki Pablo ena Bernabé ñi iütéka darërëe ie'pa ta. E' kuëki iyamipa tö Pablo ena Bernabé ena wëlepa skà, e'pa shushtë as imi'yal Jerusalén ttè ñe' shulök Skëkëpa Jesús icha wökir kibipa ena Jesús ttekölpa tsá, e'pa ta.

<sup>3</sup> Es Skëkëpa Jesús icha erule tso' Antioquía, e'pa tö Pablo ena imalepa patkëmi Jerusalén. Ie'pa tkami Fenicia ena Samaria. Eta ipakeramirakitö iyamipa a tö wes pè' kè dör judiowak, esepa er mane'wé Skëköl a. Ttè e' tö ie'pa ttsë'wé buaë.

<sup>4</sup> Mik Pablo ena Bernabé demirak Jerusalén, eta ee Skëkëpa Jesús icha erulee e'pa kos ena iwökirpa ena Jesús ttekölpa tsá, e'pa tö ie'pa kiéwa buaë. Eta ì kos o' Skëköl tö ie'pa wa e' pakérakitö imalepa a. <sup>5</sup> Erë Jesús mik erblökwakpa dör fariseowakpa, esepa wëlepa e' kéka ta ichéitörak:

—S'yamipa kè dör judiowak esepa wëpa kawöta itóttola kkuölit tée tsir. Ñies ie'pa a ikawöta chè tö Moisés ttè kitulebak e' dalöiök ie'pa kawöta.

<sup>6</sup> Eta Skëkëpa Jesús icha wökir kibipa ena Jesús ttekölpa tsá, e'pa ñi dapa'wéka ttè e' bibeitsök bua'iewa. <sup>7</sup> Ie'pa tö ipaké taië, e' ukuöki ta Pedro e' kéka ta ichéitö:

—A yamipa, a' wa ijcher tö ká iaiäe Skëköl tö ye' shukitbak a' shua Jesús tté buaë pakök, pè' kè dör judiowak, esepa a as ie'pa erblö imik. <sup>8</sup> Ie' wa se' er suule buaë, ie' tö Wiköl Batse'r mé ie'pa a wes se' a ime'itö es. Es ie' tö se' a ikkaché tö ñies ie' tö ie'pa klö'wé ie' ichaie. <sup>9</sup> Ie' tö ie'pa er paiklé ie'pa erblé Jesús mik e' wa. Es se' wa ijcher tö ie'pa ena se' dör ñies ème ie' wöa. <sup>10</sup> A' tö ie'pa ké Moisés ttè darërëe e' dalöiök, erë e' kè dalöiëne' se' a, ñies se' bak ká iaiäe e'pa kè a idalöiëne'. I'ñe ta çiók a' tso' Skëköl wönatkök es? <sup>11</sup> E' kè dör es. Se' tö iklö'wé tö se' tsatkëne Skëkëpa Jesús er buaë chöke sia e' è wa. E' suë ie'pa tsatkëne ñies.

<sup>12</sup> E' ukuöki ta ie'pa ulitane siwa' blélur tso' Bernabé ena Pablo e'pa kapaköke e' ttsök. Ie'pa tso' ipakök tö wes ì kè or yi a ese wérakitö Skëköl batamik pè' kè dör judiowak, esepa shua Skëköl diché kkachöie. <sup>13</sup> Ie'pa kapaké one eta Santiago tö iché:

—A yamipa, ye' ttò ttsó. <sup>14</sup> Simón tö se' a ipaké wes Skëköl tö, pè' kè dör judiowak, esepa tsá kimé er bua' wa as ie'pa wëlepa dò ie' wák ichaie. <sup>15</sup> Ñies e' sini'kué Skëköl ttekölpa bak ká iaiäe e'pa tö. Ie'pa tö iyè':

<sup>16</sup> Skëköl tö ichè: 'Aishkuö ta ye' datsene.

Eta David jchúlipa kerakayö iwák suë.

Ie'pa dörane diché ta' taië wes iaiäe es

<sup>17</sup> as pè' malepa kè dör judiowak dör ye' icha esepa tö ye' yulò.

<sup>18</sup> Es ye' tö ttè i' chétke.

Ká iaiäe ttè i' me'atbakyö a' a.\*

\* 15:18 Amós 9.11-12



<sup>19</sup> “Ttè i' kuëki ye' ibikeitsè tò, pè' kè dör judiowak er mane'wé Skëköl a, esepa kè tsiriük s'kàne judiowak ser ese wa. <sup>20-21</sup> E' kuëki yëkkuö patkömisö ie'pa a e' ki ichösö tò iyi meule iyi diököl tso' dalöie skëkölise ese a, ese kè kar, ese kè katar. Nies ie'pa kè kàne trënuK. Iyiwak ttéwä kuli' siulekà ese chkà kè katar nies ipé kè katar. Ká iaiäè ttè i' pakanemi ká wa'ñe se' ñi dapa'wö wé a eno diwö bit ekkè. E' kuëki iyi ekkè è shtömisö ie'pa a.”

*Yëkkuö patkëne s'yamipa kè dör judiowak, esepa a*

<sup>22</sup> Skëkëpa Jesús icha eruleë e'pa kos ena iwökir kibipa ena Jesús ttekölpa tsá, e'pa wa iwër buaë tò wëpa wëlepa shushtë ie'pa shüa as imi'rak Pablo ena Bernabé ta dömi Antioquía. Es ie'pa tò Judas kiè nies Barsabás ena Silas, e'pa shushtë. Wëpa e'pa dalöiekie taië s'yamipa ulitane tò. <sup>23</sup> Eta yëkkuö shtë iwökirpa tò e' mé ie'pa a as iwä imi'rak. Yëkkuö e' tò iché i' es:

“Sa' dör Skëkëpa Jesús icha eruleë e'pa wökir kibipa ena Jesús ttekölpa tsá, sa' dör a' yamipa. Sa' tso' yëkkuö i' shtök a' dör sa' yamipa erè kè dör judiowak serke Antioquía ena Siria ena Cilicia e'pa a. A' shkë'wémi sa' tò. <sup>24</sup> Sa' wä ijchënewä tò sa' yamipa wëlepa e' yé'ttsa sa' shüa, e'pa dë'mi a' ska'. Ie'pa tò a' tsiriö' iwákpa ttè wa. E' tò taië a' wökir tsiriwëkä. Kè sa' wä kawö mène ie'pa a a' wöbla'wöie ì wa. <sup>25</sup> E' kuëki sa' ulitane wa iwër buaë wëpa wëlepa shushtëk sa' shüa as imi' a' saük Bernabé ena Pablo ta. Sa' yami e'pa dalër taië sa' éna. <sup>26</sup> Ie'pa e' me'ttsa weinuk taië. Ie'pa kè suane ttéwä Skëkëpa Jesucristo tté kuëki. <sup>27</sup> Sa' tò Judas ena Silas patkëmi ttök a' ta. Ie'pa tò ipakeraë a' wöshäë yësyësë wës yëkkuö i' ki ikitule es. <sup>28-29</sup> Buaë idir Wiköl Batse'r a, nies sa' a, tò a' kè kawötä judiowak ser e' blök sëräa. I' è blök a' ké: Chkè meule iyi diököl tso' dalöie ese a, e' kè katar. Nies ipé kè katar ena iyiwak ttéwä kuli' siulekà ese chkà kè katar. Kè a' kàne trënuK. Ýi ekkè è kawötä blè a' tò. A' tò iwé es, e' ta e' dör buaë. Skëköl tò a' kimè.”

<sup>30</sup> Eta ie'pa e' chéat ta imíyal Antioquía. Mik ie'pa demi eë ta ie'pa iyamipa dapa'wëkä, e'pa a yëkkuö mirdak iwä e' méitö. <sup>31</sup> Mik iyamipa tò yëkkuö aritsé, eta e' tò ie'pa er pablé taië, e' kuëki ittsé'nerak buaë. <sup>32</sup> Judas ena Silas, e'pa dör Skëköl ttekölpa nies, e' kuëki ie'pa tò iyamipa patté taië. E' tò iyamipa er pablé taië, ikimé taië. <sup>33-34</sup> Ie'pa sené eë kukuie. Mik ie'pa mitkene itò wane eta iyamipa tò iché iarak a' shkó wöbla wa. <sup>35</sup> Erè Pablo ena Bernabé e' tséat Antioquía. Ie'pa ena imalepa taië e'pa tso'rak Skëkëpa Jesús tté buaë pakök. Nies ttè e' wa s'wöbla'ük ie'pa tso'.

*Pablo ena Bernabé kè kaneblöku'ia ñitq*

<sup>36</sup> Kawö tka taië, e' ukuöki ta Pablo tò iché Bernabé a:

—Mishkane etökichane ká kos ki se' bak Skëkëpa Jesús tté pakök e' ane s'yamipa saük tò is ie'pa tso'.

<sup>37</sup> Bernabé ki Juan kiane tsèmi ie'pa ta. Juan e' kiè nies Marcos. <sup>38</sup> Erè Marcos tò ie'pa me'at ká kiè Panfilia eë. Ie' kè kaneblëneia ie'pa ta. E' kuëki Pablo kè éna ie' tsakmi ie'pa ta. <sup>39</sup> Ìni iutérak darërëè erè kè ishuline. E' kuëki ie'pa ñi blabatsélor. Bernabé wä Marcos mítser e' ta ta ie'pa míyal kanò ki dò Chipre. <sup>40</sup> Pablo tò wëm kiè Silas e' kiémi e' wapie. Iyamipa tò ie'pa méat Skëköl er buaë chò sia e' ulà a. Eta ie'pa e' yé'ttsa eë <sup>41</sup> tkamirak Siria ena Cilicia. Ie'pa tso' Skëkëpa Jesús icha erule erule tso' ká e' ki e'pa diché kí iök Jesús ttè wa.



<sup>1</sup> E' ukuöki ta Pablo ena Silas demi Derbe ta imíyal Lистра. Ee wëm kiè Timoteo e' serke, ie' dör Jesús ttökata. Ie' mì dör judiowak e' dör Jesús ttökata ñies. Erë iyé dör griegowak. <sup>2</sup> S'yamipa serke Lистра ena Iconio, e' pa tö icheke tö Timoteo dör pë' buaë. <sup>3</sup> Pablo ki ie' kiane tsèmi e' wapie. Erë judiowak serke ká e' ki e' pa ulitane wa ijcher tö Timoteo yé e' dör griegowak. E' kueki Pablo tö ie' ké itóttola kkuölit tök tsir as judiowak kè ulurka iki. <sup>4</sup> Ká kos wé ie' pa dami ee ì uk patké' Skékëpa icha erule tso' Jerusalén e' pa wökirpa ena Jesús ttekölpa tsá e' pa tö, e' wà paké ie' pa tö s'yamipa ulitane a. <sup>5</sup> Es Skékëpa Jesús icha erule erule e' pa kos diché kí iëne Jesús tté a. Ñies pë' kí iërke taië kekraë.

*Pablo tö wëm dör Macedonia wak e' sué kabsueie*

<sup>6</sup> Eta Wiköl Batse'r kè wa kawö mène ie' pa a Jesús tté buaë pakök ká kiè Asia ee. E' kueki ie' pa tkami ká kiè Frigia ena Galacia <sup>7</sup> demi ká kiè Misia e' kköröwa ee. Eta ie' pa tö ima'wé shkökwa ká kiè Bitinia e' a, erë Jesús Wiköl kè wa kawö mène ie' pa a. <sup>8</sup> E' kueki ie' pa tkami yësyësë Misia kker demi ká kiè Tróade dayë kkò a wé kanò irirke ee. <sup>9</sup> Eta nañewe Pablo tö ì sué kabsueie. Ie' tö wëm sué eköl, e' dör ká kiè Macedonia e' wak. E' dur shkë'ka ta ikköché ia: “Be' shkótkö Macedonia sa' kimuk.” <sup>10</sup> Pablo tö e' sué one ta bet sa' dali iémi mitke Macedonia. Sa' wa ijcher buaë tö Skéköl ki ikiane tö sa' tö Jesús tté buaë paké ká e' ki.

*Alaköl kiè Lidia e' erblé Jesús mik*

<sup>11</sup> Eta sa' e' iéka kanò a Tróade, míyal yësyësë ká kiè Samotracia ee. Bule es ta sa' demi ká kiè Neápolis ee. <sup>12</sup> Ee ta sa' míyal klò ki dò ká kiè Filipos ee. Ká e' a romawak tso' taië. E' dör ká bua' bua ate Macedonia. Ee sa' sené ká tkël ká skel ulatök. <sup>13</sup> Judiowak eno diwö ta sa' e' yélur míyal di' kkömik wé sa' tö ibikeitsè isalema judiowak wa ká tso' ttoie Skéköl ta ee. Mik sa' tö ikué, eta ee sa' e' tulésër Jesús tté buaë pakök alakölpa ñi dapa'wéka e' pa a. <sup>14</sup> Ie' pa eköl kiè Lidia, e' dör ká kiè Tiatira e' wak. Ie' dör datsi' bua' bua daloshdalosh ese wataukwak. Ie' tö Skéköl dalöieke taië. Skékëpa tö ie' er ñi'wé as Pablo ttöke kos e' klö'ütö mokië. <sup>15</sup> Eta ie' e' wöskué iyamipa tso' ie' u a e' pa ta. E' ukuöki ta ie' tö sa' a iché kröröe:

—A' ibikeitsè tö mokië ye' dör Jesús mik erblökwak, e' ta a' klönúia ye' ska'.

Es ie' tö sa' ké klönukia ie' ska'.

*Pablo ena Silas wötënewa s'wöto wé a Filipos*

<sup>16</sup> Ká et ta sa' mirwane wé s'ttöke S'yé ta ee. Sa' mirwaja ta pë' busi kuéwa sa' tö eköl, e' a wimblu sulusi tso' eköl, e' wa íyi tötkekeitö. Wëpa wëlepa tö ie' to'ttsa ie' pa a kanëblök íyi tötök, e' ské klö'weke ie' pa tö taië e' a. <sup>17</sup> Busi e' shkëmi Pablo ena sa' itöki. Ie' ardatse:

—Wëpa ikkëpa dör Skéköl íyi ulitane tsata e' kanè mésopa. Ie' pa tö s'tsatkè ñalé e' tté pakeke a' a.

<sup>18</sup> E' wambléitö ká taië, bata ekké ta Pablo uluneka taië. Ie' e' wötréene ta ichéitö wimblu sulusi tso' busi a e' a:

—Jesucristo ttò wa ye' tö be' a iché be' e' yóttsa ie' a.

E' wöshäë ta wimblu sulusi e' yéttsa ia.

<sup>19</sup> Mik busi wökirpa tö isué tö inuköl kè dë'ia ie' pa ulà a busi batamik, eta ie' pa tö Pablo ena Silas klö'wéwa tsémirak wé tté shulökwakpa tso' ee. <sup>20</sup> Ie' pa tö ikkatérak tté shulökwakpa a ta ichérakitö:

—Wëpa ikkëpa dör judiowak. Taië ie' pa tso' sa' shutiuk. <sup>21</sup> Sa' dör romawak, e' kueki kè sa' a kawö mène ie' pa tö s'wöbla'weke sene wa e' klö'uk ena e' wà uk.

<sup>22</sup> Eta ká e' wakpa bitëshka Pablo ena Silas ki. Eta ishulökwakpa tö idatsi' yöktsa ké iki ta ippök ké darërëë kal wa. <sup>23</sup> Ibunerak siarë wötëwarakitö s'wöto wé a. Ta ichérakitö s'wöto wé wökir a tö ikkö'nú bua'iewa as kè itköyal. <sup>24</sup> Mik ie' a kawö e' mène, eta ie'

tö Pablo ena Silas wötéwā iwé wötëulewā bua'iewā, ese a. Ie' tö ie'pa klò tiéwā kaltak wöbiule s'klò wötowā ese a. Es iméarakitö.

<sup>25</sup> Ká de ká shaböts etā Pablo ena Silas tso' ttök Skököl tā ena ittseittsök. Imalepa tso' ittsök. <sup>26</sup> E' wösha tā í tka darërëë. S'wöto wé wöppéitö darërëë. E' wöshaë tā ukkö ulitane kköburo lone. Ì kōs wa ie'pa tso' moulewā, e' wötsërolone. <sup>27</sup> S'wöto wé wökir tī'nekā. Mik ie' isué tö ukkö kōs tso' áie tā ibikeitséitö s'tso' wötëule e' kōs tkayal. E' kueki itabè kuéttsaitö e' ttowaie. <sup>28</sup> Erë Pablo anekā:

—Kè be' e' ttökwa! Sa' tso'ia ulitane.

<sup>29</sup> Etā s'wöto wé wökir tö bö'wö kié tā itunewā Pablo ena Silas ska'. Eë ie' e' tkéwā kuchë kī ie'pa wōā painékā suane taië. <sup>30</sup> Etā ie' tö ie'pa yéttsa u'rkī tā ie'pa a ichaké:

—A kékëpa, çì uk ye' kawōtä e' tsatkoie?

<sup>31</sup> Ie'pa ie' iuté:

—Skékëpa Jesús mik be' erbló etā be' tsatkërdaë ñies be' yamipa tsatkërmi es.

<sup>32</sup> Etā ie'pa tö Skékëpa tté paké ie' a ena iyamipa kōs tso' iu a, e'pa a. <sup>33</sup> Etā e' nañewe ulatök s'wöto wé wökir tö ie'pa tsémi e' tā. Ie'pa shka'ule taië e' kapeyéitö. Etā ie' ena iyamipa kōs e' wöskuélor. <sup>34</sup> E' ukuökī tā ie' tö itsémirak iu a tā itiérakitö. Ie' ena iyamipa e'pa erblé Skököl mik, e' kueki ie'pa kōs ttsë'ne buaë.

<sup>35</sup> Ká ñine tā ishulökwakpa tö ishkékīpa patkémi ichök s'wöto wé wökir a tö Pablo ena Silas ómine. <sup>36</sup> S'wöto wé wökir tö iché Pablo a:

—Sa' shulökwakpa tö ye' a kawō mé a' ökmine. E' kueki a' yüne bèrë.

<sup>37</sup> Erë Pablo tö iché ia:

—Sa' dör romawak\* Ie'pa tö sa' buk sulitane wöshaë kam sa' shulir e' yöki. Sa' wötë'waitö s'wöto wé a. I'ñe tā ie'pa kī sa' kiane èmine akir. Ie'pa kè a kawō tā iwoie es. As ie'pa wákpa bitū sa' ökmine.

<sup>38</sup> Etā shkékīpa tö tté e' chéne ishulökwakpa a. Mik ie'pa ittsé tö Pablo ena Silas dör romawak, etā taië ie'pa suane. <sup>39</sup> Etā ie'pa míyal Pablo ena Silas ska' tā ichérakitö:

—Ì sulu wamblé sa' tö a' kī e' olo'yó sa' kī.

Etā iémine tā ikköchéarak ia: “A' e' yölor sa' ká kī.” <sup>40</sup> Etā Pablo ena Silas yénettsa s'wöto wé a míyal Lidia u a iyamipa weblök. Ie'pa pablérakitö etā imíyal.

## 17

### *Tesalónica wakpa tsirinekā Jesús tté kueki*

<sup>1</sup> Pablo ena Silas tkami ká kiè Anfípolis ena ká kiè Apolonia demirak ká kiè Tesalónica wé judiowak wā ñi dapa'wō wé tso' eë. <sup>2</sup> Etā Pablo dewā e' wé a eno diwō wa wes ie' wöblar es. Eë ie' kapaké ie'pa tā Skököl yëkkuō wa eno diwō mañat. <sup>3</sup> Ie' tö ikkaché ie'pa a tö itso' kitule Skököl yëkkuō kī tö wé pairine'bitū idi' wa s'blúie e' tterawā tā ishkerdakane. Ie' tö iché ie'pa a:

—Jesús pakök ye' tso' a' a, e' wák dör wé pairine'bitū idi' wa s'blúie e'.

<sup>4</sup> Judiowak welepa erblé Jesús mik, tā ie'pa de Pablo ena Silas kíie. Ñies griegowak tö Skököl dalöieke wës judiowak es, esepa taië erblé Jesús mik ena alakölpa dalöiërta' esepa taië erblé imik ñies. <sup>5</sup> Erë e' tö judiowak malepa uluwéka taië. Etā wëpa sulusipa tso' éme ñalā kī, esepa kíerakitö pë' dapa'uk taië, e'pa kī uluwérakitö tā imíyal kësik wa pë' malepa uluukka. Etā itkawarak kësik wa Jasón u a Pablo ena Silas yulök yéttsa mè imalepa ulurke taië e'pa ulā a. <sup>6</sup> Erë kè iwā ikunerak eë. E' kueki Jasón ena iyamipa welepa e'pa kuémirakitö ká e' wökirpa wōā tā ichéitörak aneule:

—Wëpa ikképa tö ká ulitane wakpa tsirió', e'pa de íe ñies. <sup>7</sup> Jasón tö ie'pa kiéwā iu a. Ie'pa ulitane tso' ichök tö se' blú kibi dör kuá'kī, e' kiè Jesús. Ie'pa tö sa' blú kibi e' tté dalöšewéwā.

\* 16:37 Romawak: Pablo ditséwö dör judiowak erë ie' yami bak e' wele e' yö' romawakie, e' kueki ñies ie' dör romawak.

<sup>8</sup> Mik pë' ulitane ena iwökirpa tö ttè e' ttsé, etä ie'pa shutineka tajë. <sup>9</sup> Erë Jasón ena iyamipa kërakitö inuköl mukat iwà kkachöie tö ie'pa datskene ishulök ta iéminerakitö.

*Pablo ena Silas tö Jesús tté paké Berea wakpa a*

<sup>10</sup> Ká tuinetke etä bet iyamipa tso' Tesalónica e'pa tö Pablo ena Silas patkëmi ká kiè Berea ee. Ie'pa demi Berea etä imíyal judiowak ñi dapa'wo wé a. <sup>11</sup> Judiowak e'pa er dör buaë judiowak tso' Tesalónica e'pa tsata. Ie'pa tö Jesús tté kí ttsé er bua' wa. Kekraë ie'pa tö Skëköl yëkkuö suëkewa bua'iewa isuöie tö ì ché Pablo tö e' yëne ö kè iyëne. <sup>12</sup> Es tajë ie'pa erblé Jesús mik. Ñies tajë griegowak erblé imik alakölpa dalöierťa' ena wëpa ñies. <sup>13</sup> Erë mik judiowak serke Tesalónica e'pa wa ijchenewa tö Pablo tso' ñies Berea Skëköl ttè pakök, etä imíyal ee. Ie'pa tö Berea wakpa dapa'wëmi shutiwëmi Pablo ki. <sup>14</sup> Erë s'yamipa tso' Berea, e'pa tö Pablo ké e' yöktsa ta ipatkëmi dayë kkömik. Erë Silas ena Timoteo e' tséat Berea. <sup>15</sup> Wëpa wa Pablo mirwa, e'pa wa imí dò ká kiè Atenas ee. E' ukuöki ta ie'pa biteyalne. Pablo tö ie'pa ka' ichök Silas ena Timoteo a tö “a' kié bet.”

*Pablo tö Jesús tté paké Atenas wakpa a*

<sup>16</sup> Pablo tso' Silas ena Timoteo kinuk Atenas, e' dalewa ie' tö isué tö ká e' wakpa wa iyi diököl tso' dalöie, ese tso' tajë. E' tö ie' tsiriwëka tajë. <sup>17</sup> E' kueki judiowak ñi dapa'wo wé a ie' kapaköke judiowak ta ena pë' kè dör judiowak erë Skëköl dalöieta' esepa ta. Ñies ie' kapaköke kekraë Atenas wakpa ta wé ie'pa döke tajë iyi tauk ee. <sup>18</sup> Ñies ie'pa wöbla'ukwakpa welepa kiekerakitö epicúreo wakpa\* ena estoico wakpa†, e'pa ñi iutëmi Pablo ta. Ie'pa welepa tö ie' cheke i' es:

— Ì kabeweke s'ñeñe dió tö?

Ie'pa welepa skà tö icheke:

— Ttsësquia e' dör këkölpä tsakië dalöieke ká bár wakpa tö e'pa tté pakökwak.

Pablo tso' Jesús kötëwa shkenëkane e' tté buaë pakök e' kueki ie'pa tö ie' ché es. <sup>19</sup> E' kueki ie' tsëmirakitö wé ie'pa e' dapa'uke ttè tsakië pakarke ese ttsök ee. Ká e' kiè Areópago. Ta ichakérakitö:

— Ttè pa'alí pakeke be' tö, ¿e' pakëmibö sa' a? <sup>20</sup> Ttè pakeke be' tö, e' kè ttsëule sa' wa, e' kueki e' kiane jchenukwa sa' ki ¿ima e' wà dör?

<sup>21</sup> Atenas wakpa qos ena ká ku'ki wakpa serke Atenas, e'pa ulitane tö ttè pa'alí ttseke ese è pakeke ñi a kekraë.

<sup>22</sup> Etä Pablo e' duëka ie'pa shua Areópago wé a ta ichéitö:

“A Atenas wakpa, ì qos suéyö, e' wa ye' wa ijcher tö a' tö këkölpä tsakië dalöieke. <sup>23</sup> Mik ye' tkami a' ká shua, etä wé a' tö këkölpä ñe' dalöieke ese ké suéyö tajë. E' shua ye' tö ka' tso' idalöioie ese kué et e' ki its' kitule i' es: ‘Skëköl eköl kè jcher se' wa tö yi idir, e' dalöioie’. Ie' dalöieke a' tö, erë a' kè wa ijcher tö yi idir. Skëköl e' pakeke ye' tö a' a.

<sup>24</sup> “Ie' tö ká ulitane ena iyi ulitane tso' iki e' yö'at. Ie' dör ká jai ena ká i' e' qos wák. Ie' kè serku' Skëköl wé yöule s'ditsö wa ese a. <sup>25</sup> Sulitane serke ie' mik. Ñies iyi ulitane kiane se' ki senoie, e' mekeitö se' a kekraë. E' kueki ie' kè ki ikiar tö se' ie' kimè ì wa.

<sup>26</sup> “Wëm eköl è wa ie' tö se' ditsöwö ulitane alöwë. Ie' tö se' ké senuk ká wa'ñe. Mik ie' tö ká i' yö', etä ie' tö se' katatë'atbak tö mik se' sermi, wé se' sermi ditséwö wa ditséwö wa. <sup>27</sup> Ie' tö se' katatë'at es as se' tö ima'ù yulè isalema sö ikuëmi. Erë moki ie' kè ku' kamië se' yöki. <sup>28</sup> E' dör wës yile tö iché es, e' tö iché: ‘Skëköl mik se' serke se' shköke, ie' wa se' tso.’ Ñies e' dör wës a' wákpa ttsököl eköl tö iyë'at es, e' tö iché: ‘Sulitane dör Skëköl aleripa.’ <sup>29</sup> Se' dör Skëköl ditséwö, e' kueki kè se' kane ibikeitsök tö ie' dör wës iyi diököl yöule se' wa orochka wa ö inukölchka wa ö ákchka wa es. E' qos yuésö wës se' ibikeitsè es wës se' wákpa a iyör es. Erë Skëköl kè dör es. <sup>30</sup> Iaiäë ta kè se' wa ijcher tö

\* 17:18 epicúreo wakpa: E' wakpa tö iklö'wé tö s'ser e' wà bua'ie dör ttsë'ne buaë. Ttè e' wa s'wöbla'weke ie'pa tö. † 17:18 estoico wakpa: E' wakpa tö iklö'wé tö s'ser e' wà bua'ie dör se' e' kkö'nù ì sulu qos e' yöki. Ttè e' wa s'wöbla'weke ie'pa tö.

wes ie' dör, e' kuëki e' nuí tköo'atbak ie' tö ie'pa ki. Erë i'ñe ta ie' tso' ichök ká ulitane wakpa a tö a' kawöta er mane'uk. <sup>31</sup> Skëköl tö idiwö me'atbak wekkë alë ta ie' tö sulitane shuleraë yësyësë wëm eköl tkë'kaitö e' wa. Wëm e' kötewa erë ishkeo'kane Skëköl tö, e' wa ie' tö iwà kkaché sulitane a tö mokië wëm ñe' tkë'kaitö.”

<sup>32</sup> Erë mik Atenas wakpa tö ittsé tö Pablo tö s'du'wa shkenekane e' ché, eta ie'pa welepa tö ie' wayué, erë welepa skà tö iché:

—Ì pakeke be' tö, e' skà ttsëmi sa' tö iëtökichane.

<sup>33</sup> Eta Pablo mía. <sup>34</sup> Erë wëpa welepa míyal Pablo ta, ta e'pa erblé Jesús mik. Ie'pa e' shua Dionisio tso'ñak, e' dör Areópago wökirpa eköl. Ñies alaköl eköl kië Dámaris ena pë' skà tso'ñak ishua.

## 18

### *Pablo mía Corinto*

<sup>1</sup> E' ukuöki ta Pablo e' yëttsa Atenas mía Corinto. <sup>2</sup> Eë wëm kuëwaitö eköl dör judiowak kië Áquila, e' dör ká kië Ponto e' wak. Ie' alaköl kië Priscila. Ie'pa bak senuk Roma atë Italia eë. Ie'pa dë'bitu erpa Corinto. Ká tso' tseë romawak ttë dikia e' wökir kibi kië Claudio, ie' tö judiowak kos serke Roma e' yökulur patké. E' kuëki Áquila ena ilaköl e' yë'lur Roma demi Corinto. Pablo mía ie'pa pakök. <sup>3</sup> Ie' kanë dör ie'pa kanë ese è, e' kuëki ie' e' tséat ie'pa ta kanëblök. Kanë e' dör iyiwak kkuölit yueke üie tsëmi ese kanë. <sup>4</sup> Eno diwö bit ekkë Pablo mi'ke judiowak ñi dapa'wo wé a. Eë ie' tö Jesús ttë pakeke ie'pa ulitane a. Ie' tö judiowak ena pë' kè dör judiowak e'pa ulitane pableke as ie'pa erblö Jesús mik.

<sup>5</sup> Mik Silas ena Timoteo tso' Macedonia, e'pa demirak Corinto, eta Pablo kè kanëblënea Áquila ta. E' skéie ie' e' mé Jesús ttë buaë e' è pakök kekraë. Ñies ie' tö judiowak pablë kekraë tö Jesús dör wé pairine'bitu idi' wa s'blúie e'. <sup>6</sup> Erë ie'pa wötkëmi Pablo ta ta iché suluë. E' kuëki ie' datsi' wöppée iwà kkachoie tö ie' kè ki inuí ku' ta iché iarak:

—A' weirdaë siarë, e' wiie a' wákpa iane. E' kè wëneia ye' wöki. I'tami ye' mía pë' kè dör judiowak esepa pattök.

<sup>7</sup> Eta Pablo e' yëttsa judiowak ñi dapa'wo wé a mía wëm kië Ticio Justo, e' u a senuk. Wëm e' tö Skëköl dalöieke taië. Ie' serke judiowak ñi dapa'wo wé o'mik. <sup>8</sup> Wëm kië Crispo, e' dör judiowak ñi dapa'wo wé, e' wökir. Ie' erblé Skëképa Jesús mik iyamipa kos e' ta. Es ñies taië Corinto wakpa tö Jesús ttë ttsé ta ierblé rak imik ta ie' wöskuélor. <sup>9</sup> Ká et nañewe Skëképa Jesús tö Pablo a iché kabsueie: “Kè be' suanuk. Ye' ttë kí pakó kekraë. Kè be' siwa'blök. <sup>10</sup> Ye' tso' be' ta. Kè yi a ì sulu wamblënik be' ki yës. Ye' wa pë' tso' taië ká i' ki.” <sup>11</sup> Es Pablo atë duas ek ki shaböts Corinto ie'pa wöbla'uk Skëköl ttë wa.

<sup>12</sup> Mik Galión bak Acaya wökirie, eta judiowak serke Corinto e'pa ñi dapa'wëka Pablo naméie ie' tsëmi ttë shulo wé a. <sup>13</sup> Ie'pa tö Pablo kkaté Galión a ta iché ia:

—Wëm i' tso' sa' pablök tö Skëköl dalöiö sa' tö, erë kè dör wes ttë dalöiëno meneat sa' a e' tö iché es.

<sup>14</sup> Pablo ttëmitke ta Galión tö iché judiowak a:

—Moki ì sulu wamblöpaitö, e'ma ye' tö a' ttö ttsëmi. <sup>15</sup> Erë a' tso' ñi wöñatkök ttë ki ena wëpa welepa kië ki, ena a' wákpa ttë dalöiëno e' ki, e' kuëki e' shuló a' wákpa tö. Ye' kè tö ttë ese shulè.

<sup>16</sup> Eta Galión tö ie'pa uyëttsa ttë shulo wé a. <sup>17</sup> Eta pë' tso' taië e'pa tö wëm kië Sóstenes dör judiowak ñi dapa'wo wé wökir, e' klö'wëwa ppérakitö ttë shulo wé wöshaë. Erë e' ki Galión kè tkine yës.

### *Pablo dene Antioquia*

<sup>18</sup> Pablo e' tséatia taië Corinto. E' ukuöki ta ie' e' chéat iyamipa a ta imía ká kië Cencreas wé kanò irirke eë. Eta eë ie' e' iéka kanò mi'ke Siria ese a. Áquila ena Priscila mitke ie' ta

ñies. Kam ie' e' iòkà kanò a, età ie' tsà téé manene. E' wéitò ittè me'itò Skéköl a e' blóie wes iyè'itò es. <sup>19-21</sup> Mik ie'pa demi ká kiè Éfeso ee, età Pablo míã judiowak ñi dapa'wo wé a Jesús tté buaë pakök judiowak ñi dapa'uke ee, e'pa a. Ie'pa tò iché ia taië: “Be' e' tsúatia sa' ta.” Erë kè ie' e' tsakat. Ie' e' chéat ie'pa a ta ichéitò: “Skéköl kī ikiane, e' ma ye' skà dörane a' pakök.” Áquila ena Priscila e' tséat senuk Éfeso.

E' ukuökī ta Pablo e' iéka kanò a ta imía. <sup>22</sup> Mik idemi Cesarea ta imía Jerusalén Skékēpa Jesús icha erule e'pa shke'uk. E' ukuökī ta imía Antioquia. <sup>23</sup> Ee ie' sené ekuölö. E' ukuökī ta iskà míane Galacia ena Frigia, ká e' kos a Jesús ttókatapa er diché kī iök.

#### *Apolo tö Jesús tté paké Éfeso wakpa a*

<sup>24</sup> E' kéwö ska' ta wém eköl kiè Apolo dör judiowak, e' de Éfeso. Ie' datse ká kiè Alejandría ee. Ie' dör wém ttò buaë ese. Ie' wā Skéköl yëkkuö sūule buaë. <sup>25</sup> Ie' yöule buaë Skéköl ñalé tté wa. Ie' tò s'wöbla'weke kaneë yësyësé Jesús tté wa. Erë ie' kè wā Jesús tté jcher seraa. Ie' wā Juan S'wöskuökwak, e' ttè è sūule. <sup>26</sup> Ie' ttémi judiowak ñi dapa'wo wé a, kè suane. Età mik Priscila ena Áquila tò ie' kapaköke e' ttsé, età ikiémirakitö iu a. Ta ee ie'pa tò ie' kī wöbla'wé buaë Skéköl ñalé tté wa. <sup>27-28</sup> E' ukuökī ta ie' shkak ká kiè Acaya ee. E' kueki iyamipa serke Éfeso, e'pa tò ie' kimé. Yëkkuö shtérakitö Jesús ttókatapa tso' Acaya, e'pa a as ie'pa tò ie' kiöwā buaë. Mik ie' demi Acaya ta wépa erblé'bak Jesús mik Skéköl er buaë ché ie'pa a e' kueki, esepa kimé taië ie' tò. Ie' e' alöke judiowak ki ie' tté wa sulitane wörki. Ie' tò ie'pa siwā'blöweke. Ie' tò ikkacheke yësyësé Skéköl yëkkuö wa tö mokī Jesús dör wé pairine'bitū idi' wa s'blúie e'. Es ie' tò iyamipa kimé.

## 19

#### *Pablo tö Jesús tté buaë paké Éfeso wakpa a*

<sup>1</sup> Apolo tso'ia Corinto e' dalewa Pablo tkami kabata wa demi Éfeso. Ee ie' tò Jesús ttókatapa welepa kué. <sup>2</sup> Ie' tò ie'pa a ichaké:

Mik a' erblé' Jesús mik età ¿Wiköl Bats'e'r dē' a' kī?

Ie'pa tò iiüté:

—Kè sa' wā ittseüle tö Wiköl Bats'e'r tso'.

<sup>3</sup> Pablo tö ie'pa a ichaké:

—Età ¿wöskuè wése wa a' wösune?

Ie'pa iiüté:

—Juan s'wöskuè e' wa.

<sup>4</sup> Ie' tò iché iarak:

—Wépa er mane'wé Skéköl a, esepa wösuk Juan tö. Erë ie' tò iyé' ie'pa a tò wém datse ie' itökī e' mik ie'pa ké erblök.

<sup>5</sup> Ttè e' ttsérakitö ta iwöskuélor Skékēpa Jesús ttò wa. <sup>6</sup> Pablo ulà méka ie'pa kī ta Wiköl Bats'e'r debitū ie'pa kī ta ie'pa ttémi ttò kuā'kī kuā'kī wa. Ñies ñ mé Skéköl tò ie'pa a ché, e' ché ie'pa tò. <sup>7</sup> Seraa ie'pa dökā dabom eyök kī böl (12) wépa.

<sup>8</sup> Si' mañat Pablo shkére judiowak ñi dapa'wo wé a, ee Jesús tté pakéitö kè suane. Ie' tò ie'pa pableke taië as ie'pa e' tiüwā ñ blúie Skéköl tso' e' tté dikia. <sup>9</sup> Erë ie'pa welepa wökir darërëe, e' kueki ie'pa kè wā ttè e' klöne. Ie'pa tò Jesús dör se' ñalā e' tté ché sulué sulitane kukua. Età Pablo e' skéttsa ie'pa yöki. Wépa detke Jesús ttókatapaie e'pa tsémi e' ta dò wé wém kiè Tirano e' wā u tso' s'wöbla'woie ee. Ee Jesús tté pakeke Pablo tò kekraë. <sup>10</sup> Es iwéitö dò duas bök. Sulitane serke Asia, judiowak ena pē' kè dör judiowak, e'pa tò Skékēpa Jesús tté ttsé. <sup>11-12</sup> ñ kè or yi a ese wé Skéköl tò kibiie Pablo wa tkòka imalepa tsata dò tsamo ena datsi' döne ie' mik ese mi'kerak iwā wépa kirirke esepa ska' ta ibuanene ta wimblupa sulusi e' yélur ie'pa a.



<sup>13</sup> Erë judiowak welepa shkörami ñalā kī wimblupa sulusi yökulur pē' a. E'pa tö iché 'ima'üsö Skëképa Jesús ttò wa.' Ie'pa ichémi wimblupa sulusi a i' es: "¡A' e' yólur Jesús pakeke Pablo tö, e' ttò wa!"

<sup>14</sup> Es wëm kiè Esceva e' ala'r dökā kul e'pa tö ima'wémi ñies. Esceva dör judiowak sacerdotepa wökirpa e' eköl. <sup>15</sup> Erë etökicha tā wimblu sulusi tö ie'pa iüté: "Yi dör Jesús e' jcher ye' wā. Ñies yi dör Pablo e' jcher ye' wā. Erë ¿a' dör yi?"

<sup>16</sup> E' wöshāë wëm a wimblu sulusi tso', e' unekā ie'pa kī. Ie' e' alékā ie'pa kī idiché taië wa. Ie'pa ppéitö siarë. Ie'pa e' yélur tkayal sume shkā'ule taië. <sup>17</sup> Éfeso wakpa kōs, judiowak ena kè judiowak, e'pa wā ijchenewā. Taië ie'pa suane. Es Skëképa Jesús tté kí bunekā taië.

<sup>18</sup> Taië pē' erblé Jesús mik esepa debitū ì kōs wamblë'rakitö suluë e' chökka sulitane kukua. <sup>19</sup> E'pa shuā taië ie'pa awápa tso'ñak. E'pa kōs wā iyëkkuö tso'rak iwā wakanewë, ese debitū tā ñña'wéwa sulitane wöshāë. Ie'pa tö iyéttsā kōs yëkkuö e' ské dör tā idettsā inuköl taië. E' dör ie'pa inuköl dökā 50.000 ekkë. <sup>20</sup> Es Skëképa Jesús tté kí bunekā taië. Sulitane tö isuë tö ttè e' diché tā' taië.

<sup>21</sup> E' ukuökī tā Pablo ibikeitsé: "Ye' mi'ke ká kiè Macedonia ena Acaya e' wakpa pakök. E' ukuökī tā ye' michoë dò Jerusalén. Eë tā ye' kawötā shkök dò Roma ñies."

<sup>22</sup> E' ukuökī tā ie' kimukwakpa bōl, Timoteo ena Erasto, e'pa patkémittö dò Macedonia, e' dalewa ie' atēiā Asia ekuölö.

#### *Éfeso wakpa shutineka taië*

<sup>23</sup> E' kēwö ska' Éfeso wakpa shutineka taië Jesús dör Se' ñalā e' tté kuekī. <sup>24</sup> Wëm tso' eköl kiè Demetrio e' dör íyi diököl yuök inukölchka wa e' sté. E' tö Éfeso wakpa Këköl kiè Artemisa wak dör alakölie, e' wé diököl yueke inukölchka wa. Kanè e' wa ie' ena ikanè mésopa inuköl klö'uke taië. <sup>25</sup> Ikanè mésopa dapa'wékaitö imalepa kanëblöke kanè ese è a e'pa tā, tā ichéitö: "A këképa, a' wā ijcher tö kanè i' wa se' inuköl klö'uke. <sup>26</sup> Erë a' isuë, a' ittse tö Pablo e' tso' ichök tö íyi diököl yuekesö dalöie skëkölie, e' kè dör skëköl mokī. Taië pē' tö ttè e' klö'wétke íé Éfeso ñies Asia kōs e' a. <sup>27</sup> E' dör suluë. E' tö se' kanè sulu'wëmiwā. Ñies Artemisa, se' këköl taië, e' wé dalösewëwamittö. Se' këköl taië dalöiërta' taië Asia ena ká wa'ñe, e' dalösewewaraitö."

<sup>28</sup> Mik ttè e' ttsérakitö, etā ilunekarak taië. Etā iānekarak: "Artemisa dör Éfeso wakpa këköl, e' dör këköl taië."

<sup>29</sup> Etā Éfeso wakpa kōs aláneka taië. Wëpa datse bōl Macedonia. Eköl kiè Gayo iëköl kiè Aristarco, e'pa dör Pablo wapiepa, e'pa tso'ñak eë. Éfeso wakpa tö ie'pa bōl klö'wéwā kuémi dò wé ie'pa ñi dapa'uke e' wé a. <sup>30</sup> Etā Pablo shkakwa eë ttök ie'pa tā, erë Jesús ttökatapa malepa kè wā ianemi. <sup>31</sup> Ñies Asia wökirpa welepa éna Pablo dalër taië, e'pa tö ttè patké Pablo a: "Kè be' minukwā eë." <sup>32</sup> E' dalewa Éfeso wakpa daparke e'pa shutineka taië. Ie'pa arkekarak taië. Ikibiiepa kè éna iwā ane iók ie' dapa'wérak. E' kuekī eköltëpa arke kuā'kī, iëköltëpa arke kuā'kī. <sup>33</sup> Etā judiowak tö wëm kiè Alejandro e' tsémi patkéule duéser sulitane wörkī, e' kuekī pē' welepa tö ibikeitsé tö ie' wökī iwërke. Etā ie' tö ikkaché ulā wa tö "A' siwā'bló. Ye' ttöke judiowak tsatkoie." <sup>34</sup> Erë mik ie'pa wā ijchenewā tö ie' dör judiowak, etā ie'pa skā e' kékane anuk: "Artemisa dör Éfeso këköl. E' dör këköl taië." Es ie'pa arkerak dò hora böt.

<sup>35</sup> E' ukuökī tā ká wökirpa yëkkuö shtökwak, e' tö pē' ké siwā'blökwa. Ie' tö iché ie'pa a: "A Éfeso wakpa, ká ulitane wakpa wā ijcher tö se' dör Éfeso wakpa e'pa dör se' këköl taië Artemisa e' wé kkö'nukwakpa, ñies ie' diököl anebitū ká ja' a, e' kkö'nukwakpa. <sup>36</sup> Kè yi a iyërpa tö kè idör es. E' kuekī a' siwā'blólur. Kè ì wamblar kè bikeitsule buaë. <sup>37</sup> Wëpa i' debitū a' wā, e'pa kè wā ì blëulewā se' këköl wé a. Ie'pa kè wā se' këköl yëule suluë. <sup>38</sup> E' kuekī Demetrio ena ikanè mésopa, ie'pa éna yile kkatak, e' tā as imi'rak ikkatök ttè shulökwakpa a ena s'wökirpa a. E'pa tso' kanëblök ttè shulo wé a. Eë ie' tsatkömirak



ñi wöshäë. <sup>39</sup> Erë ì skà kianeia a' k<sub>i</sub> yënoie, e' t<sub>a</sub> e' choie a' kawöta mik se' daparke wës ikanewëkesö es eta. <sup>40</sup> Ì tka íerö i'ñe, e' k<sub>i</sub> s'wökirpa tö se' kkatëmi. Kè iwà t<sub>a</sub>' mokië, e' kuek<sub>i</sub> ie'pa tö se' kkaté iki, e' t<sub>a</sub> kè se' a e' tsatkënuuk iyöki." <sup>41</sup> Ie' tté one t<sub>a</sub> ichéitö ie'pa a, "A' yúshka."

## 20

### *Pablo míq Macedonia ena Grecia*

<sup>1</sup> Éfeso wakpa shutineka, e' olone t<sub>a</sub> Pablo tö Jesús ttökatapa kiéttsa pattè. E' ukuöki t<sub>a</sub> ie' e' chéat ie'pa a t<sub>a</sub> imía Macedonia. <sup>2</sup> Ie' tkami ká e' wa'ñe iyamipa pattök, e' tö ie'pa er kuwé taië. E' ukuöki t<sub>a</sub> ie' míq Grecia. <sup>3</sup> Eë ie' sené si' mañat. Ie' tso'tke kanò klö'uk shkomi dò Siria, e' shua t<sub>a</sub> ie' wa' ijchenewa tö judiowak ileritsétke ie' ttowa. E' kuek<sub>i</sub> ie' míqane klò wa tkamine Macedonia. <sup>4</sup> Ie' wapiepa dör kul. Eköl kiè Sópatro, e' dör Berea wak, iyé kiè Pirro. Iëköl kiè Aristarco. Iëköl kiè Segundo, e' dör Tesalónica wak. Iëköl kiè Gayo, e' dör Derbe wak. Iëköl kiè Timoteo. Ñies wëpa bül dör Asia wakpa, e'pa kiè Tíquico ena Tróximo. <sup>5</sup> Wëpa ekkëpa míq kewe sa' yöki sa' kinuk ká kiè Tróade eë. <sup>6</sup> Pan Kè Yöule Iwölöwoka Wa e' kèwö tka, eta sa' e' yélur Filipos míq kanò k<sub>i</sub> dò Tróade. Ká skel ukuöki t<sub>a</sub> sa' demi Tróade, eta ie'pa kué sa' tö eë. Eë sa' e' tséat ká kul.

### *Pablo tö tté bata paké Skëképa Jesús icha erule tso' Tróade, e'pa a*

<sup>7</sup> Eno diwö tuinetke t<sub>a</sub> sa' e' dapa'wéka ñita Jesús kötewa e' kèwö tkö'uk. Pablo tso' iyamipa t<sub>a</sub> kapakök. Ie' kawöta e' yöktsa bule es, e' kuek<sub>i</sub> ie' kapaké dò ká shaböts. <sup>8</sup> Sa' dapaneka u kakkeë e' a. Taië bö'wö tso' wötskiuleka eë. <sup>9</sup> Duladula tkër eköl ukkö tsitsir k<sub>i</sub>, e' kiè Eutico. Pablo tso' kapakök taië e' dalewa Eutico shtrinewatke kapakwatke. Bata ekkë t<sub>a</sub> ikapowa t<sub>a</sub> ibrutanemi döttsa iski. Eta ikéka ie'pa tö erë iduowäie. <sup>10</sup> Eta Pablo dur kákke, e' e' éwa t<sub>a</sub> ie' e' méka duladula bata k<sub>i</sub>, ipaklö'wéwaitö t<sub>a</sub> ichéitö:

—Kè a' tkinukia. Itso' ttsë'ka.

<sup>11</sup> E' ukuöki t<sub>a</sub> Pablo tkakane kákke t<sub>a</sub> Jesús kötewa e' kèwö tkö'wéitö ie'pa t<sub>a</sub>. Eta ie' kapakéia dò ká ñine ekkë t<sub>a</sub> imía. <sup>12</sup> Eta duladula tsémirakitö ttsë'ka iu a. E' tö ie'pa ulitane kí ttsë'wéka buaë.

### *Pablo e' yétsa Tróade míq Mileto*

<sup>13</sup> Sa' míyal kewe Pablo yöki kanò k<sub>i</sub> dò ká kiè Aso eë. Pablo wák shkak klò wa dò eë, e' kuek<sub>i</sub> sa' kawö me'attke ie' t<sub>a</sub> ñi kinuk eë. <sup>14</sup> Mik sa' tö ie' kué, eta ie' e' iéka sa' t<sub>a</sub> kanò k<sub>i</sub> t<sub>a</sub> sa' míyal ká kiè Mitilene eë. <sup>15</sup> T<sub>a</sub> sa' michoë. Bule es t<sub>a</sub> sa' tkami ká kiè Quío, e' wöshäë. E' bule es t<sub>a</sub> sa' demi wé kanò irirke kiè Samos eë. E' bule es t<sub>a</sub> sa' míq Mileto. <sup>16</sup> Pablo shkakmi bet dò Jerusalén Pentecostés kèwö tkö'uk, e' kuek<sub>i</sub> sa' mineyal es. Pablo kè e' wöklö'wak taië Asia, e' kuek<sub>i</sub> ie' kè dë' Éfeso.

### *Pablo kapaké Skëképa Jesús icha erule tso' Éfeso e' wökirpa t<sub>a</sub>*

<sup>17</sup> Pablo tso' Mileto e' tö Skëképa Jesús icha erule tso' Éfeso e' wökirpa tsuk patké ñi dapa'uk ie' t<sub>a</sub>. <sup>18</sup> Mik idebiturak, eta Pablo tö iché iarak:

—Wës ye' sené a' shua ye' tsá dë'bitu Asia e'tami, e' jcher buaë a' wa. <sup>19</sup> Eré judiowak ileritseke ye' tsaiök e' ye' rreweke taië, erë kekraë ye' e' wöawa diöshet t<sub>a</sub> Skëképa Jesús kanè uk ye' bak a' shua ië wa ì wa. <sup>20</sup> Ñies a' wa' ijcher tö tté buaë a' kimoie, ese kè blënewa ye' wa yës a' yöki. Ese wa ye' bak a' wöbla'uk sulitane wörki, ñies u a u a. <sup>21</sup> Ye' bak ichök wö yësyëse wa judiowak a ena pë' kè dör judiowak esepa a: 'A' ké er mane'uk Skëköl a. A' ké erblök Skëképa Jesús mik mokië.' <sup>22</sup> Ì'ñe ye' mitke Jerusalén. Ye' ittse tö es Wiköl Batse'r k<sub>i</sub> ikiane. Kè ye' wa' ijcher wës ye' wémirakitö eë. <sup>23</sup> Ká wa'ñe wé ye' dë'ule eë Wiköl Batse'r tö ye' a icheke: 'be' wötërdaë, be' weirdaë siarë,' e' è jcher ye' wa. <sup>24</sup> Ye' a t<sub>a</sub> ye' ttëwa ö ye' tso' ttsë'ka, kè e' k<sub>i</sub> ye' tkine. Kanè me' ye' a Skëképa Jesús tö, e' è ewakwa ye' éna er bua' wa. Kanè e' dör Skëköl er buaë chöke sia, e' tté buaë pakök.

<sup>25</sup> Ì blúie Skéköl tso' e' tté pakéyö a' a. I'ñe ye' wá ijcher buaë tö a' ulitane kè tö ye' suepaiane. <sup>26</sup> E' kuëki i'ñe ta yö ichè a' a mokië tö a' wépa kè tsatkéne, e' ta kè ye' iane iwiie. <sup>27</sup> Ì kiane kanewè Skéköl ki, e' tté pakéyö a' a se. Kè ye' wá tté wéne blénewa yés a' yöki. <sup>28</sup> E' kuëki a' e' kkö'nú. Ñies Wiköl Batse'r tö a' tké'ka Skéköl ichapa erule e'pa wókirpaie ikkö'nukrak, e' kuëki ie'pa kkö'nú buaë a' tö. Ie'pa to'ttsa Skéköl tö iwák pé wa. <sup>29</sup> Ye' wá ijcher tö mik ye' mía e' ukuöki ta pé' döraë s'yamipa eukwa wes chichi sulusi tö iyiwak ewèwa es. <sup>30</sup> Ñies a' shua welepa e' köraká s'wöbla'uk kache tté wa as s'yamipa erblé Jesús mik e'pa mi' ie'pa è itöki. <sup>31</sup> A' tso' erki. A' éna ianú tö duas mañal, ñiwe nañewe, kekraë ye' bak a' ulitane pattök eköl eköl iè wa ì wa.

<sup>32</sup> Es ye' tö a' méat Skéköl ulà a. Ñies a' méatyö Skéköl er buaë chöke se' a e' tté a. Ie' wá diché ta' a' er diché kí ioie. Ñies ie' wá diché ta' ì kos buaë moie a' a wes ikablé' imuk ie' icha batse'r esepa a es. <sup>33</sup> Kè ye' wá yi inuköl ena yi datsi' kkeyëule yés. <sup>34</sup> Eré a' wá ijcher buaë tö ye' kè bak senuk yi ulà mik. E' skéie ye' kaneblé' ye' wák ulà i' wa e' kkö'noie. Ñies e' wa ye' tö ye' wapiepa kimé. <sup>35</sup> Es ye' bak a' wöbla'uk kekraë tö s'kawöta kaneblök darërëe wépa kè a kaneblér, esepa kimoié. Kè se' éna ichökwa tö Skéképa Jesús wák tö iyé': "Se' tö ikakmé e' dör ibua'ie se' a, kè dör ikaktsè."

<sup>36</sup> Mik Pablo tté one, eta' ie' e' tkéwa kuché ki ta itté Skéköl ta ie'pa ulitane ta. <sup>37</sup> Ie'pa ulitane tso' e' chökät Pablo a iuke taië ta ie'pa tö ipaklö'wémi iwöalattsémi. <sup>38</sup> Pablo tö ichétke ie'pa a: "A' kè tö ye' suepaiane." E' tö ie'pa eriawé taië. E' ukuöki ta ie'pa mía iñalemuk dò wé kanò irirke eë.

## 21

### *Pablo mía Jerusalén*

<sup>1</sup> Mik sa' tö sa' yamipa méat, eta' sa' e' iéka kanò a. Sa' míyal yësyësè ká kiè Cos eë. E' bule es ta sa' míyal ká kiè Rodas eë ta sa' míyal ká kiè Pátara eë. <sup>2</sup> Eta' sa' tö kanò kué Pátara mi'ke ká kiè Fenicia, e' a sa' e' iéka ta sa' míyal. <sup>3</sup> Sa' tkami ta sa' tö ká kiè Chipre e' sué, e' até ulà bakli'kka. Eta' sa' mir dò Siria. Dalì mir kanò a e' mekeat Tiro, e' kuëki sa' demi eë. <sup>4</sup> Eta' Jesús mik erblökwapka serke eë, e'pa yulé sa' tö ta ikué sa' tö. Sa' sené ká kul ie'pa ska'. Ie'pa tö iché Pablo a Skéköl Wiköl wa: "Be' mú kè mi' Jerusalén." <sup>5</sup> Eré ká kul tka sa' ki eta' sa' e' yéttane. Ie'pa kos, ilakölpa ena ila'r, e' yéttsa ie'pa ká a míyal sa' ñalemuk dòmi dayé kkömik. Eë sa' e' tuléwa kuché ki ttök Skéköl ta. <sup>6</sup> E' ukuöki ta sa' e' chéat ie'pa a ta sa' e' iéka kanò a. Eta' ie'pa míyalne iu a.

<sup>7</sup> Sa' e' yéttsa Tiro demi ká kiè Tolemaida eë. Sa' tö s'yamipa serke eë e'pa shké'wé. Sa' e' tséat ie'pa ska' ká et. <sup>8</sup> E' bule es ta sa' e' yéttane demi klò wa Cesarea. Eë sa' mí Felipe dör Jesús tté buaë pakökwak e' u a. Ie' dör wépa kul shukitulebak Jesús ttekölpa tsá e'pa kimuk, e' eköl. Ie' ska' sa' e' tséat. <sup>9</sup> Ie' ala'r busipa döka tkél kam iserdak wépa ta. Ie'pa kos dör Skéköl ttekölpa. <sup>10</sup> Sa' sené ie' ska' elkeë eta' wém debitu eköl datse Judea, e' kiè Agabo. Ie' dör Skéköl tteköl. <sup>11</sup> Ie' dewa sa' o'mik ta Pablo kipamo klò'wéwaitö. Ta e' wa ie' e' muéwa iklö a ena iulà a ta ichéitö:

—Wiköl Batse'r tö ichè: "I' es judiowak tö kipamo i' wák, e' muerawa Jerusalén. Ta imerattsa ie'pa tö pé' kè dör judiowak, esepa ulà a."

<sup>12</sup> Mik sa' tö tté e' ttsé, eta' sa' ena Cesarea wakpa tso'ñak sa' ta, e'pa ulitane kköché taië Pablo a: "Kè be' minuk Jerusalén." <sup>13</sup> Eré Pablo tö iüté:

—¿Ì kuëki a' iuke? E' tso' ye' eriauk taië. Ye' e' méttatke monukwa, ñies ttéwa Skéképa Jesús tté kuëki Jerusalén.

<sup>14</sup> Ie' kè wa sa' ttò iüténe, e' kuëki kè sa' wá ì kí yéne ia. Sa' iché:

—As Skéképa tö iü wes ie' ki ikiane es.

<sup>15</sup> E' ukuöki ta sa' dalì ié míyal Jerusalén. <sup>16</sup> Jesús ttökatapa tso' Cesarea, e'pa welepa míyal sa' ta. Ie'pa wa sa' mítser wém kiè Mnasón, e' u a kapökrö. Wém e' datse ká kiè Chipre eë. Ie' dör wépa tsá erblé' Jesús mik esepa eköl.

*Pablo míq Santiago pakök*

<sup>17</sup> Mik sa' deka Jerusalén, eta s'yamipa tso' ee, e'pa tö sa' kiéwa buaë, ittse'nerak buaë. <sup>18</sup> E' bule es ta Pablo míq sa' ta Santiago pakök. Nies Skëképa Jesús icha e'pa wökir kibipa tso'ñak Santiago ska' seraä. <sup>19</sup> Ie' tö ie'pa shké'wé ta ì kos wéitö Skëköl batamik, pé' kè dör judiowak, esepa shua, e' pakéitö ie'pa a yësyësë. <sup>20</sup> Mik e' ttsé ie'pa tö, eta Skëköl kikékarakitö taië. Ie'pa tö iché ia:

—A yami Pablo, be' isué buaë tö *ie* judiowak döka miles e'pa erblétke Jesús mik. Ie'pa ulitane *e'* mettsa da'a Moisés ttè dalöiëno e' tsatök. <sup>21</sup> Ie'pa a iyëno tö be' tö judiowak tso' ká kuä'ki kuä'ki ki, esepa wöbla'weke tö ttè e' olo'yó. Nies ichekerakitö tö be' tö icheke tö ila'r kurke wëpa, esepa tottola kkuölit kè tar. Nies ichekerakitö tö be' tö s'wöbla'weke tö se' judiowak ser e' kè dalöiaria. <sup>22</sup> Ie'pa ulitane wa ijcherdawa tö be' dë'bitu. E' kueki ÿ wëmi be' tö ie'pa siwa'blöwowa? <sup>23</sup> Ì cheke sa' tö be' a e' ú. *Ie* sa' shua wëpa tso' tkël kawö me'bak Skëköl a, e' orketke. <sup>24</sup> E'pa tsúmi *e'* ta, ta be' *e'* batse'ú ie'pa ta. Kos e' patuë e' pataúbö as ie'pa tsà tòttsa manene iwà kkachöie tö kawö me' ie'pa tö Skëköl a e' one. Be' tö iwé es, e' ta judiowak ulitane isueraë tö ì kos ki pé' tso' be' chök suluë e' dör kache. Ie'pa tö isuëmi tö Moisés ttè dalöiëno e' dalöieta' be' tö nies. <sup>25</sup> Erë s'yamipa kè dör judiowak, esepa a ì bikeitsé sa' tö e' kitmibak sa' tö yëkkuö ki. E' ki sa' tö ie'pa a iyë' tö ie'pa kè kàne chkè meule íyi diököl tso' dalöie ese a ese katök. Iyiwak pé kè katar. Iyiwak ttéwa kuli' siuleka ese chkà kè katar. Nies ie'pa kè kàne trënu.

*Pablo klö'wéwarakitö Skëköl wé pamik*

<sup>26</sup> Es Pablo *e'* yétsa wëpa tkël, e'pa ta. E' bule es ta ie' *e'* batse'wé ie'pa ta. E' ukuöki ta ie'pa tkawa Skëköl wé a. Ee Pablo tö ibiyó ché tö mik ta ie'pa batse'ne e' diwö ene ta ie'pa íyi meke Skëköl a iwakpa bil ekkë.

<sup>27</sup> Kawö kul shua ie'pa tso' batse'ne e' erkewatke eta judiowak welepa datse Asia, e'pa tö Pablo sué Skëköl wé a. Ie'pa tö imalepa shutiwéka ta imishkarak Pablo ki iklö'wéwarakitö. <sup>28</sup> Ie'pa anekarak: “A yamipa, sa' kimú. Wëm i' shköke ká wa'ñe s'wöbla'uk tö se' judiowak ser, e' kè dör buaë. Ie' icherami tö Moisés ttè dalöiëno ena Skëköl wé i' kè dör buaë. I'ñe ta pé' kè dör judiowak esepa welepa debitu ie' wa *ie* Skëköl wé a. E' tö ká i' dör batse'r e' ia'wéka.”

<sup>29</sup> Wëm kië Trófimo e' su' ie'pa tö Jerusalén ie' dör Éfeso wak. Ie'pa tö ibikeitsé tö Pablo wa imí Skëköl wé a, e' kueki ie'pa tö iché es.

<sup>30</sup> Ká e' wakpa kos shutineka debitu tuneule. Ta Pablo klö'wéwarakitö kuëmi u'rki. E' bet Skëköl wé wékkö ulitane wotéwarakitö. <sup>31</sup> Ie'pa tö ittekewatke eta ttè de Roma ñippökwakpa eruleë e' comandante a tö Jerusalén wakpa ulitane shutineka taië. <sup>32</sup> Eta ie' tö ñippökwakpa dapa'wé ikayuapa ta, eta itunemirak wé pé' daparke ee. Mik pé' tö ñippökwakpa ena icomandante sué, eta ie'pa tö Pablo méat, kè ippèia. <sup>33</sup> Eta comandante debitu, e' tö Pablo klö'wéwa ta imaukwa ké tabechka kichaie bötö wa. E' ukuöki ta ie'pa a ichakéitö: “I' dör yi? ÿ wambléitö?” <sup>34</sup> Erë welepa tö iché kuä'ki aneule, ieltëpa iché kuä'ki aneule. Taië ie'pa arkerak kuä'ki kuä'ki, e' wa kè ishulir, e' kueki ie' tö itsukmi ké ñippökwakpa wé a. <sup>35</sup> Pé' éna ie' klö'wakwa késik wa, e' kueki mik idemirak ñippökwakpa wé klékata ki, eta ñippökwakpa tö Pablo batsékami. <sup>36</sup> Pé' kos arke Pablo itöki: “Ittöwa!”

*Pablo e' tsatké judiowak wörki*

<sup>37</sup> Mik Pablo dökewatke ñippökwakpa wé a eta ie' tö comandante a iché:

—Kawö mú ña ttök be' ta.

Eta comandante tö iüté:

—Ye' kè wa ijcher tö be' ttö griegoie. <sup>38</sup> E'ma be' kè dör Egipto wak dë'bitu eköl *e'* ka'ka ñippök sa' ta e'. Ie' míq ká wé kè yi ku' ee s'ttökwä wakpa ta döka mil tkëyök (4000).

<sup>39</sup> Eta ie' tö iché ia:

—Au, ye' dör judiowak kune Tarso, ká e' dör ká kibi atē Cilicia. Kawö mú ye' a ttoie ie'pa ta.

<sup>40</sup> Etā comandante tö kawö mé ia. Etā ie' dur shkë'ka ñippökwakpa wé klékata kī ta iulà kkaché pē' tso' taiē, e'pa a tö a' siwa'blólur. Mik isiwa'bléwarak, etā ie' tté ie'pa ta hebreoie. Tā ichéitō iarak:

## 22

<sup>1</sup> “A yamipa, a kékēpa, ye' e' tsatköke, e' ttsó.”

<sup>2</sup> Mik ie'pa tö ittés tö Pablo ttöke ie'pa ta iwákpa ttò wa, etā ie'pa kí siwa'blélur. Ie' tö iché:

<sup>3</sup> “Ye' dör ñies judiowak wes a' es. Ye' kune' Tarso atē Cilicia ee. Erē ye' talane íe Jerusalén. Gamaliel tö ye' yö' yēsēsē wes se' ttè dalöieno kiteat iaiäe e' tö ichè es. Kékraē ye' tso'ie Skéköl dalöiök ye' er kos wa kos a' ulitane tö idalöieke i'ñe ekkē. <sup>4</sup> Mik se' wépa tö Jesús dör Se' ñalā e' tté klö'wé, etā esepa tötiük ye' bak ttèwa, klö'wèwa, wötèwa s'wöto wé a. Kè ye' tkine tö wëm idir ö alaköl idir. <sup>5</sup> Ñies sacerdote kibi ena s'kueblupa ulitane, e'pa tö a' a ichèmi tö e' dör mokiē. Ie'pa tö ye' a yèkkuö me' tsèmi s'yamipa tso' Damasco e'pa a. Yèkkuö e' tö kawö me' ye' a Jesús mik erblökwakpa esepa tsöbitu dö Jerusalén we'ikè.

<sup>6</sup> “Erē ye' miriā ñalā kī. Diwö de bata a ta ye' dökemitke Damasco tsinet, e' bet ta ì biteshka ká jai a bö'wöie e' olo bune taiē ye' pamik. <sup>7</sup> Eē ye' anere iski. Etā ittò ttséyö tö iché ña: ‘A Saulo, a Saulo žiök be' tö ye' we'ikeke?’ <sup>8</sup> Etā ichakéyö: ‘A Skékēpa, žbe' dör yi?’ Etā ie' tö iüté: ‘Ye' dör Jesús Nazaret wak, e' we'ikeke be' tö.’ <sup>9</sup> Itso'rak ye' ta, e'pa tö bö'wö sué, erē ì yēne ye' a, e' wà kè ane ie'pa éna. <sup>10</sup> Etā ye' tö ie' a ichaké: ‘A Skékēpa Jesús, žì wèmiyö?’ Tā ie' tö iché ye' a: ‘Be' e' kóka. Be' yú Damasco. Eē ì kos wèmi be' tö, e' yërdaē be' a.’ <sup>11</sup> Bö'wö olo tö ye' wöbla batuwéwa, e' kueki ye' wapiepa tö ye' ulà iémirak dö Damasco.

<sup>12</sup> “Eē wëm tso' eköl kiè Ananías, e' tö Skéköl dalöieke taiē. Moisés ttè dalöieno kitule e' dalöiekeitö yēsēsē. Judiowak kos serke Damasco e'pa tö icheke tö ie' dör wëm buaē. <sup>13</sup> Ie' debitū ye' ska' ta ye' a iché: ‘A yami Saulo, be' wöbla buanú.’ E' wöshaē ta ye' wöbla buanene iwawēnene Ananías suéyö iwa. <sup>14</sup> E' ukuökī ta ie' tö ye' a iché: ‘Skéköl dalöiök se' yépa bak ká iaiäe, e' tö be' shukitātbak as ì kiane wè ie' kī e' jcher be' wa. Ñies be' shukititö as yi dör Yēsēsē e' saübö ena ie' wák ttò ttsöbö. <sup>15</sup> Be' döraē ie' ttekölie. ì kos su' be' tö, ì kos ttsé' be' tö, e' cheraébö sulitane a. <sup>16</sup> I' ta kè bö ipanukiā. Be' e' kóka. Be' e' wöskuó. Skéköl a ikió as ì sulu kos wamblébö e' nuí olo'yòitö be' kī.’

<sup>17</sup> “Mik ye' dene Jerusalén etā, ye' mīā ttök Skéköl ta iwé a, ee ye' tö ì sué kabsueie. <sup>18</sup> Skékēpa Jesús suéyö ta ichéitö ña: ‘Be' tö ye' tté pakèmi judiowak a, e' kè klö'wepa ie'pa tö. E' kueki be' e' yóttsa bet Jerusalén.’ <sup>19</sup> Etā ye' iché ia: ‘A Skékēpa, ie'pa wákpa wa ijcher tö ye' bak ie'pa ñi dapa'wo wé kos a, be' mik erblökwakpa, esepa yulök ppè, wötèwa s'wöto wé a. <sup>20</sup> Mik Esteban dör be' kanè méso bak be' tté pakök, e' kötwa ie'pa tö, etā ye' tso' ee. E' wēne buaē ye' wa. E' dalewa ye' tso' ie'pa datsi' kkö'nuk.’ <sup>21</sup> Erē ie' tö ye' a iché: ‘Be' shkómitke ñalā kī. Ye' be' patkeke kamiē pē' kè dör judiowak esepa a.’”

### *Pablo atē comandante ulà a*

<sup>22</sup> Pablo ttöke e' ttsök ie'pa tso' buaē, erē mik pē' kè dör judiowak e' aritséitö, etā ie'pa ñi kēka anuk darērē: “jWëm ese kè kawöta senukia! jIttöwasö!” <sup>23</sup> Ie'pa arkekarak taiē, ta idatsi' wöti'wekerakitö kashuk a, ñies ká po uyekerakitö kashuk a kèsik wa. <sup>24</sup> E' kueki comandante tö Pablo tsukmi ké weshke ñippökwakpa wé a ta ippök ké as itö ichökā ì kueki pē' wöñarke ie' kī taiē. <sup>25</sup> Erē mik ie'pa tö Pablo muéwatke ppè tsa'bata daloie wa, etā ie' tö capitán dur ee, e' a ichaké:

—jA' a kawö mène wépa dör romawak esepa ppök kam ishulir e' yöki?

<sup>26</sup> Mik e' ttsé capitán dur ee e' tö, etá imía icomandante a ibiyó chök tá iché ia:

—¿Wes be' iwèmi? Wëm e' dör romawak.

<sup>27</sup> Etá comandante debitu Pablo ska' tá ie' tö ie' a ichaké:

—¿Moki be' dör romawak?

Pablo iüté:

—Tó, es idir.

<sup>28</sup> Etá comandante tö iché:

—Ñies ye' dör romawak, e' pato'yö inuköl taië wa.

Tá Pablo iüté:

—Erë ye' dör romawak ye' kune' es e' kueki.

<sup>29</sup> Mik ittserakitö, etá ippökwakpa tö Pablo méat bèrë. Mik comandante wa ijchenewa tö Pablo dör romawak, etá ie' suane tö iók ie' tö imaükwa patké'.

*Pablo e' tsatké judiowak wökirpa wörki*

<sup>30</sup> Comandante ki ikiane jchenowa mokië tö ì ki Pablo kcateke judiowak tö. E' kueki bule es tá ie' tö sacerdotepa wökirpa ena judiowak wökir malepa ké e' dapa'ukka. E' ukuöki tá ie' tö Pablo wötsöök patké tá iyétsaitö tsémi duéser ie'pa wörki.

## 23

<sup>1</sup> Etá Pablo tö ie'pa suéwa krereë iwö ki tá iché iarak:

—A yamipa, ikké ye' senére, etá ye' er kè wa ye' kkatëne ì ki Skököl wöa.

<sup>2</sup> Etá sacerdote kibi kië Ananías, e' tö, itso'rak Pablo o'mik, e'pa ké Pablo ppök ikkö ki.

<sup>3</sup> Erë Pablo tö iüté:

—¿Be' dör e' ökwak, e' pperaë Skököl tö! Së be' tkër ye' shulök Moisés ttë dalöiëno e' wa. Erë ¿iök ye' ppök kébö? E' wa ttë ñe' dalösewéwa be' tö.

<sup>4</sup> Itso'rak ee, e'pa tö iché Pablo a:

—¿Be' tso' Skököl sacerdote kibi e' chök suluë!

<sup>5</sup> Pablo tö iché:

—A yamipa, ye' kè wa ijcher tö ie' dör sacerdote kibi. Skököl yëkkuö tö iché: 'Yi tso' s'wökirie, ese kè char suluë.'

<sup>6</sup> Mik Pablo wa ijchenewa tö iwökirpa shabötspa dör saduceowakpa, shabötspa dör fariseowakpa, etá ie' tö ie'pa a iché aneule:

—A yamipa, ye' dör fariseowak. Ñies ye' yépa kos dör fariseowakpa. S'duowa shkerkane, e' wà panekeyö kröröë, e' ki a' tso' ye' kkatök.

<sup>7</sup> Mik Pablo tö ttë e' ché, etá fariseowakpa ena saduceowakpa e'pa wöñanemi ñi ki. Etá ie'pa ñi blabatsélor. <sup>8</sup> Saduceowakpa tö icheke tö s'duowa kè shkerta'kane. Ñies ichekerakitö tö Skököl biyöchökwakpa kè tá', wimblupa sulusi kè tá'. Erë fariseowakpa tö iyi ekké kos klö'wé tö itso'. E' kueki ie'pa ñi blabatsélor. <sup>9</sup> Ie'pa ulitane arkerak taië. Fariseowakpa dör s'wöbla'uk ttë dalöiëno wa wakpa welepa e' kéka tá ichéraitö:

—Wëm i' kè wa ì sulu wamblëne. Isalema wimblu ö Skököl biyöchökwak wele utule ie' ta.

<sup>10</sup> Erë ie'pa kí shutirkeká taië késik wa, e' kueki comandante suane dö' Pablo ttëwarakitö. E' kueki inippökwakpa tsuk patkéitö Pablo yottsá ee tsémi ñippökwakpa wé a.

<sup>11</sup> E' nañewe tá Sköképa Jesús debitu e' tö Pablo a iché: “Be' er kuú. Wes be' tö ye' ttë paké íe Jerusalén es ñies be' kawöta ipakök Roma.”

*Judiowak kawö mé ñi a Pablo ttökwá*

<sup>12</sup> E' bule es tá judiowak welepa tö kawö mé ñi a Pablo ttökwá. Ie'pa tö ittë mé Skököl a ttë i' wa: “Kè sa' chköpa, kè sa' di' yöpa dö mik Pablo ttëwa sa' tö etá.” <sup>13</sup> Wëpa tö ittë mé es, e'pa döka dabom tkëyök (40). <sup>14</sup> Etá ie'pa míyal sacerdotepa wökirpa ena judiowak kueblupa, e'pa ska' tá iché iarak:



—Sa' tö ttè me' Skèköl a tö kè sa' chkòpa, Pablo kam ttòwà sa' tö e' yöki. E' kè wà one sa' wà, e' ta as Skèköl tö sa' we'ikò. <sup>15</sup> E' kueki a' ena s'wökirpa malepa, a' ichó comandante a tö Pablo tsúbitu bule. A' e' ó tö a' ki ie' kiane chakè bua'iewà ishuloie. E' dalewa sa' tso'tke ikinuk ñalà ki ttèwà kam idò a' ska' e' yöki.

<sup>16</sup> Erë Pablo nauyö wà ijchenewà ta imía ñippökwakpa wé a ta ibiyó méitö Pablo a. <sup>17</sup> Età Pablo tö capitán kié eköl ta iché ia:

—Duladula i' tsúmi comandante ska'. Ie' wà ilè tso' yënoie ie' a.

<sup>18</sup> Età capitán e' tö itsémi comandante ska' ta iché ia:

—Pablo tso' wötëule, e' tö ye' kié ta ikköché ye' a tö duladula i' tsúmi be' ska'. Ie' wà ilè tso' yënoie be' a.

<sup>19</sup> Età comandante tö iklö'wéwà iulà a ta itsémi bánet. Ee ie' a ichakéitö:

—¿Ì cheke be' tö ye' a?

<sup>20</sup> Ie' tö iché ia:

—Juduiwak kawö métké ñi a be' a ichök tö bulepa Pablo tsúmi wé juduiwak wökirpa e' dapa'uke ee. Ie'pa e' öke tö Pablo ttè kiane shulè bua'ie ie'pa ki. <sup>21</sup> Erë ie'pa ttè kè klö'war. Juduiwak wëpa dökà dabom tkëyök (40) kīta, e'pa tso' blëule Pablo panuk. Ie'pa kablë' Skèköl a ttè i' wa: “Kè sa' chkòpa, kè sa' di' yöpa dò mik sa' tö Pablo ttèwà età.” Ie'pa tso'tke, ima be' icheke, e' è panuk.

<sup>22</sup> Età comandante tö ipatkémine ta iché ia: “Kè yi a ichar tö e' ché be' tö ye' a.”

#### *Pablo patkëmi Judea wökir kié Félix e' ska'*

<sup>23</sup> Età comandante tö ikimukwakpa kié böi ta ichéitö ie'pa a: “Ñippökwakpa mi'ke klò wa esepa klö'ú dökà cien böyök (200). Ñies ñippökwakpa mi'ke kabaio ki esepa shtó dökà dabom kuryök (70). Ñies ñippökwakpa wà kët mi'ke esepa klö'ú dökà cien böyök (200). Katuine de sulitu (9:00 pm) età e'pa kos dapa'ú as imi'rak Cesarea.” <sup>24</sup> Ñies ichéitö: “Kabaio yuló Pablo tsomi. Itsúmi kkö'nú buaë dòmi s'wökir Félix ska'.” <sup>25</sup> Ie'pa ta comandante tö yëkkuö patkëmi mè Félix a. Ikitule yëkkuö ki e' tö iché i' es:

<sup>26</sup> “A Félix, s'wökir kibi. Ye' dör Claudio Lisias. Yëkkuö i' shtéyö be' a. Be' shké'wéyö.

<sup>27</sup> Juduiwak wökirpa tö wëm i' klö'wà iminerak ittökwa. Erë mik ye' wà ijchenewà tö ie' dör romawak, età ye' mía ye' ñippökwakpa ta ta itsatkée sa' tö. <sup>28</sup> Ye' ki ikiane jchenukwà tö i' ki ie'pa tö ikkateke. E' kueki itsémiyö juduiwak wökirpa wörki. <sup>29</sup> Ie'pa tö ikkaté ie'pa ttè dalöiëno kitule, ese ki. Erë kè ye' wà i' sulu kune ie' ki ittowaie ö iwötoie s'wöto wé a. <sup>30</sup> Erë ye' wà ijchenewà tö juduiwak welepa kawö mé ñi a ittowaie, e' kueki ye' tö ipatkébitu be' a. Ñies ye' tö ichétke ikkatökwakpa a tö i' ki ie'pa éna ikkatak, e' chó be' wöshäë.”

<sup>31</sup> Età ñippökwakpa wà Pablo mítser nañewe wës ie'pa a ikéwö mène es. Ie'pa demi ká kié Antípatris ee. <sup>32</sup> Bule es ta ñippökwakpa dami klò wa, e' èltëpa biteane ñippökwakpa wé a. Età ieltëpa dami kabaio ki, e'pa wà Pablo mítser. <sup>33</sup> Mik ie'pa demirak Cesarea ee, età ie'pa tö yëkkuö mé iwökir kibi a. Ñies Pablo méitörak ia. <sup>34</sup> Iwökir kibi tö yëkkuö sué one età ie' tö Pablo a ichaké: “¿Wé be' datse?” Mik ie' wà ijchenewà tö idatse Cilicia, <sup>35</sup> età iché ia:

—Mik be' kkatökwakpa debitu età be' ttè ttseraëyö.

Età ie' tö Pablo wötökwa patké s'wöto wé tso' u bërie yö' blu' Herodes tö ká e' wökirpa a e' a. Ee iwötëwarakitö.



<sup>1</sup> Ká de skel etá sacerdote kibi kiè Ananías, e' demi Cesarea judiowak kueblupa welepa ta Pablo kkatök. Nies wëm eköl kiè Tértulo, e' de ie'pa wa ie'pa ttekölíe Pablo kkatök Félix a. <sup>2</sup> Mik Pablo debitü etá Tértulo tö ikkatémi. Ie' tö Félix a iché:

A kéképa s'wökir kibi, be' ttè dikia ká taië sa' serke bèrë ñita. Be' erbikò buaë, e' wa be' tö sa' wakpa kímé taië. E' kueki sa' tö wéstela chë be' a. <sup>3</sup> A Félix, kéképa taië, be' tö sa' kimeke taië, e' kueki kekraë ká ulitane ki sa' tö wéstela chë taië be' a. <sup>4</sup> Kè ye' éna be' kawö chöwák taië, erë be' we'ikèyö, sa' ttò ttsó bërber è er bua' wa. <sup>5</sup> Sa' wa ijchenewa tö wëm i' dör pë' suluë. Ie' shköke ká wa'ñe judiowak shutiuk ñi ki as iñi blabatsölor. Ie' dör Jesús Nazaret wak e' klépa eruleë e' wökir eköl. <sup>6-7</sup> Nies ie' éna Skököl wé ia'wakka ñáie. E' kueki sa' tö iklö'wéwa. <sup>8</sup> Be' wák a ie' chakirmi, es be' wa ijchermi tö i' ki sa' tö ikkateke, e' dör mokië.

<sup>9</sup> Judiowak tso' ee, e'pa ulitane tö Pablo kkateke ñittsë. <sup>10</sup> Etá Félix tö ie' a kawö mé toie ta ie' tö iché:

—Ye' wa ijcher tö ká iaiaë be' dör ká i' wakpa ttè shulökwak. E' kueki ye' ttsë'ne buaë e' tsatkök be' wörki. <sup>11</sup> Be' wák wa ijchermi tö ye' dë'röká Jerusalén Skököl dalöiök, e' ki ká detke dabom eyök ki böt (12). <sup>12</sup> Ie'pa kè wa ye' kune yi ta ñi chök. Ie'pa kè wa ye' sune pë' shutiukka Skököl wé a, nies judiowak ñi dapa'wo wé malepa a, nies Jerusalén kos a. <sup>13</sup> I' kos ki ie'pa tö ye' kkateke, e' kè yërpa ie'pa a yësyësë be' a. <sup>14</sup> Erë ye' tö be' a iché tö Jesús dör ñala chökke, e' tté wa ye' tso' sa' yépa bak ká iaiaë e'pa Kököl dalöiök. Ie'pa tö iché tö ttè e' kè dör buaë. Erë nies i' kos kitatbak yëkkuö ki Moisés ena Skököl ttekölpa tö, e' klö'wé ye' tö. <sup>15</sup> Nies ye' erblöke Skököl mik wes ie'pa es tö se' yësyësë ena se' suluë duowa e' shkerdakane. <sup>16</sup> E' kueki kekraë ye' e' chöke senuk buaë Skököl wöa ena sulitane wöa as kè ye' er tö ye' kkatö i' ki.

<sup>17</sup> “Ye' mine sené duas taië kè dë'ia ie, e' ukuöki ta ye' dene ie ye' wakpa shua inuköl kakmuk s'siarépa a. Nies ye' dene íyi muk Skököl a idalöioie. <sup>18</sup> E' kanéuk ye' tso' Skököl wé a e' dalewa ye' sué ie'pa tö. Ye' e' batsé'wétke wes sa' ttè kitule tö iché es. Eë pë' kè ku' taië. Kè yi shutineka. <sup>19</sup> Erë judiowak welepa datse Asia, e'pa tso' ee. E'pa éna ye' kkatok ilè ki, e' ta warma ie'pa kawöta shkökrö ie ye' kkatök. <sup>20</sup> Ie'pa kè shkacrö, e' ta as ie' itso'rak e'pa tö iché tö i' sulu kué ie'pa tö ye' ki mik ye' dë' e' tsatkök judiowak wökirpa wörki etá. <sup>21</sup> Erë mik ye' bak ie'pa wörki, etá ttè i' è yé' ye' tö aneule: ‘S' duowa e' shkerkane e' klö'wéyö, e' ki a' tso' ye' kkatök i' ñe.’ ”

<sup>22</sup> Jesús dör ñala chökke e' ttè jchertke buaë Félix wa. E' kueki mik i' ché Pablo tö, e' ttséitö ta ie' kè ki ttè i' kianeia ttsè. Ie' iché ie'pa a:

—Mik comandante kiè Lisias, e' de, e' wa ye' tö a' ttè shulè.

<sup>23</sup> Etá Félix tö capitán eköl ké Pablo wötökwane s'wöto wé a, erë ichéitö ia:

—Ikkö'nú er bua' wa wes kè s'wötëule es. Kawö mú ie' a as iyamipa bitü ikané uk.

<sup>24</sup> Bökki es ta Félix debitüne ilaköl kiè Drusila e' ta. E' dör judiowak. Félix tö Pablo tsuk patké. Pablo tö s'kawöta erblök Jesucristo è mik e' wà paké Félix a. E' ttsök ie' tso'. <sup>25</sup> Erë mik Pablo tö sene yësyësë ena e' kkö'nè sene sulu yöki ena s'shulir aishkuö ta e' wà paké, etá e' tö Félix tkiwéwa. Ie' tö iché Pablo a:

—Be' yúne. Mik ye' kawö kune e' wa ye' tö be' kiène.

<sup>26</sup> Nies Félix tö ipaneke tö Pablo mú tö inuköl watkè ia iomine bër, e' kueki ie' tö Pablo kiekerö kekraë ttök ie' ta. <sup>27</sup> Es itka dò duas bök. E' ukuöki ta Félix kè kaneblöia s'wökirie. Ie' skéie wëm kiè Porcio Festo, e' de s'wökirie. Félix atak buaë judiowak ta, e' kueki Pablo méatitö wötëule s'wöto wé a.

\* 24:6-7 Yëkkuö kitule ká iaiaë welepa tö ttè i' kí méká ttè i' wa: Sa' ki ikiane shulè wes sa' ttè dalöieno tö iché es. 7 Erë shkékípa wökir kibi kiè Lisias, e' debitü ta iyétsa sa' ulá a kësik wa. 8 Ie' tö sa' a iché tö Pablo kkatökwakpa kawöta ikkatök be' wörki.

## 25

*Pablo e' tsatké Festo wörki*

<sup>1</sup> Festo demi Cesarea kanablök s'wökirie e' k<sub>i</sub> ká de mañat ta imía Jerusalén. <sup>2</sup> Ee ta sacerdotepa wökirpa ena judiowak wëpa kibipa, e'pa tö Pablo kkaté Festo a. <sup>3</sup> Ie'pa tö ikié ie' a: "Sa' kímú er bua' wa. Kawö mú Pablo tsöbitu íe Jerusalén." E' dör Pablo ttowa ñala k<sub>i</sub>. <sup>4</sup> Erë Festo tö iiuté:

—Pablo tso' Cesarea wötëulewá s'wöto wé a. Ee ye' mi'ke kukuie. <sup>5</sup> Ì sulu wamblé ie' tö, e' ta as a' wökirpa mi' ye' ta Cesarea ie' kkatök ee.

<sup>6</sup> Festo sené Jerusalén ká pàköl (8) ká dabom (10) e' ulatök ta imíane Cesarea. E' bule es ta ie' e' tkéka ikula' k<sub>i</sub> ttè shulo wé a. Eta Pablo tsuk patkéitö shulè. <sup>7</sup> Mik Pablo dewa, eta judiowak datse Festo ta Jerusalén, e'pa dewa ie' o'mik ta ikkaté iyi sulué taië ese k<sub>i</sub>. Erë ie'pa kè a iwöklönuk yës tö e' dör moki. <sup>8</sup> E' ukuöki ta Pablo tté e' tsatkoie. Ie' tö iché ia:

—Ye' kè wá ì sulu wamblène yës judiowak ttè dalöieno k<sub>i</sub>, ñies Skököl wé k<sub>i</sub>, ñies Roma wökir kibi e' ta. Ekképa kè yëule ye' wá sulué.

<sup>9</sup> Erë Festo atak buaë judiowak ta, e' kueki ie' tö Pablo a ichaké:

—¿Be' shkak Jerusalén as ye' tö be' shulò ee?

<sup>10</sup> Ie' tö iiuté:

—Au. Ye' tso'tke Roma wökir kibi e' ttè shulo wé a. Íe a' kawöta ye' shulök. Be' wá ijcher buaë tö ye' kè wá ì sulu wambléule judiowak ta. <sup>11</sup> Erë ilè sulu wambléyo, ese kué a' tö, e' k<sub>i</sub> ye' kawöta ttèwá, e' ta ye' ttówá. Erë ì kos k<sub>i</sub> ie'pa tö ye' kcateke, e' kè yëne, e' ta kè yi kawöta ye' muktsa ie'pa ulá a. E' kueki ye' tö ikié tö Roma wökir kibi as e' wák tö ye' shulò\*

<sup>12</sup> Eta Festo tté ipattökwakpa ta eta ichéitö Pablo a:

—Buaë be' ikiétke tö Roma wökir kibi tö be' shulò. E' kueki ye' tö be' patkekemi Roma as ie' be' shulò.

*Festo tö Pablo tté paké blu' Agripa a*

<sup>13</sup> Ká tka wekké alè e' ukuöki ta blu' kiè Agripa e' demi Cesarea ikutà kiè Berenice e' ta Festo tkëneká ká wökirie e' kèwö tkö'uk. <sup>14</sup> Ie'pa e' tséat ká taië. E' dalewa Festo tö ì tköke Pablo ta e' paké blu' Agripa a: Ie' tö iché ia:

—Íe wëm tso' eköl méat Félix tö wötëule s'wöto wé a. <sup>15</sup> Mik ye' bak Jerusalén, eta sacerdotepa wökirpa ena judiowak kueblupa, e'pa debitu wëm e' kkatök ye' a. Ye' a ikiérakitö as ye' iwömüttsa ttèwá. <sup>16</sup> Ye' tö ie'pa iuté tö romawak wökirpa kè yi tteta'wá, kam ie' tsatkö ikkatökwakpa ta ñi wöshaë e' yöki. <sup>17</sup> E' kueki mik ie'pa debitu íe, eta kè ye' kawö chöone. E' bule es ta ye' e' tkéka ye' kula' k<sub>i</sub> ttè shulo wé a ta wëm e' tsuk patkéyo.

<sup>18</sup> Erë mik ikkatökwakpa debitu, eta ie'pa kè wá ikkatëne iyi sulu k<sub>i</sub> wes ye' ibikeits es. <sup>19</sup> Ie'pa tö ikkaté wes ie'pa Skököl dalöieke ese k<sub>i</sub>. Ñies wëm kötëwá kiè Jesús, e' ché Pablo tö tö itso' ttsë'ka, ese è k<sub>i</sub> ie'pa tö ikkaté. <sup>20</sup> Ye' kè wá ijcher wes yö ttè e' wè, e' kueki ye' tö Pablo a ichaké: "¿Be' shkak Jerusalén as ee be' shulir ttè i' k<sub>i</sub>?" <sup>21</sup> Erë ie' ikié tö as se' wökir kibi tö ishulò. E' kueki ye' tö ikéwö mé tö as itkër wötëule dò mik ye' tö ipatkekemi eta.

<sup>22</sup> Eta Agripa tö iché Festo a:

—Ye' éna wëm e' ttò ttsak ñies.

Ta Festo tö iiuté:

—Bule bö ittseraë.

<sup>23</sup> Bule es ta Agripa ena Berenice, e'pa debitu, tkawá u a shkörami wes kéké taië es. Ñippökwakpa wökirpa ena ká e' kéképa dalöier'ta' taië, esepa debitu ie'pa ta ñies. Eta Festo tö Pablo tsuk patké <sup>24</sup> ta ichéitö:

\* 25:11 Pablo dör romawak e' kueki ie' a kawö ta' ikiök Roma wökir kibi a tö e' tö ishulò. Roma wökirpa tsitsir kè a iwöklönuk.

—A blu' Agripa ena këképa ulitane tso' *íe* se' ta, *íe* wëm dur eköl kiè Pablo. Judiowak kòs tò ie' kcateke ye' a Jerusalén ñies *íe* Cesarea. Ie'pa kè shtrirta'wa ye' a ikiök aneule tò ikéwö múttsa ttèwa. <sup>25</sup> Erë ye' a ta ie' kè wa ì wamblène ì ki yö ittökwa ipatkèmi. Erë ie' wák tò ikié as Roma wökir kibi tò ishulò. E' kueki ye' tò ibikeitsbak patkèmi ee. <sup>26</sup> Erë kè ì kune ye' wa shtëmi yëkkuö ki mèmi s'wökir kibi a ikkatoie. A Agripa, e' kueki ye' wa idebitu a' wörki, bua'ie be' wörki, as be' ichakò. Ima be' ichè, e' ukuöki ta iyëkkuö shtëmiyö. <sup>27</sup> ¿Wes ye' tò yi patkemimi shulè kè wayëule tò ì ki ikkatërke?

## 26

*Pablo e' tsatké blu' Agripa wörki*

<sup>1</sup> E' ukuöki ta Agripa tò Pablo a iché:

—Be' ttó e' tsatkoie.

Etá Pablo ulà kéka ta ittémítke i' es: <sup>2-3</sup> “A blu' taië Agripa. Se' judiowak ser, e' jcher buaë be' wa. Ñies ttè i' ki sa' ñi chöke, e' jcher buaë be' wa. E' kueki i'ñe ta ye' ttsè'ne buaë e' tsatkök be' wörki ì kòs ki judiowak tò ye' kcateke, e' yöki. Es ikiéyö be' a tò ye' ttò ttsó enaë.

<sup>4</sup> “Se' wakpa kòs wa ijcher buaë tò wes ye' ser ye' kaska' ena Jerusalén mik ye' bak duladula eta. <sup>5</sup> Ñies ie'pa wa ijcher buaë tò këkraë ye' dör fariseowak. Ese wakpa e' tiuke Skéköl ttè dikia yësyësë se' wakpa malepa tsata. Ie'pa ki ikiane, e' ta ie'pa tò ichèmi tò moki ye' dör fariseowak. <sup>6</sup> Skéköl kablè' se' yépa bak ká iaiaë e'pa a tò s'duowa e' shkerdakane, e' wà panekeyö moki, e' ki ie'pa tso' ye' kkatök i'ñe ta. <sup>7</sup> Se' dör Israel aleripa e' ditséwöpa döká dabom eyök ki böi (12), e'pa tò iwà paneke ñies er moki wa. E' kueki ie'pa tò Skéköl dalöie e' wakanewekerakitö ñie nañeë këkraë. A blu' Agripa, s'duowa shkerdakane, e' panekeyö wes se' wakpa malepa es, e' ta ¿i ki ie'pa tso' ye' kkatök? <sup>8</sup> ¿i kueki a' ibikeitseke tò s'duowa e' kè shkenukkane Skéköl a?

<sup>9</sup> “Ye' wák bak ibikeitsök tò ye' kawöta ì kòs or ye' a e' uk Jesús Nazaret wak e' tté wökl'woie. <sup>10</sup> Es ye' tò iwamblè' Jerusalén. Sacerdotepa wökirpa tò ye' a kawö me' iwamblöie. S'batse'rpa taië wötè'wa ye' tò s'wöto wé a. Kè dör e' è, ñies mik ie'pa ttekerakitö, eta ye' a ta e' dör buaë. <sup>11</sup> Taië ie'pa we'ikyö se' ñi dapa'wo wé ulitane a ie'pa koie ie'pa erblò Jesús mik e' olo'yök. Ye' kësik blè' ie'pa ki taië. Ye' tò ie'pa töte'ró tkörö ká bár ki we'ikè.

<sup>12</sup> “Sacerdotepa wökirpa tò ye' a kawö me' ena ye' patkè' ese wamblök Damasco, e' wakanéuk ye' mirwa. <sup>13</sup> Erë, a blu', ñala ki dibata a ta ká jai a ye' tò ì sué bö'woie e' tkòka diwö olo tsata. Bö'wö e' olo bune ye' pamik ena imirwarak ye' ta e'pa pamik ñies. <sup>14</sup> Sa' kòs anere iski ta ittò ttséyö e' tò iché ña hebreoie: ‘A Saulo, a Saulo, ¿iök be' ye' we'ikeke? Ì sulu wamblekebö ye' ki e' wa be' wák e' mukettsa we'ikè wes iyiwak kè shkak ppèsö kal wa es.’ <sup>15</sup> Ye' tò ie' a ichaké: ‘A Skéképa, ¿be' dör yi?’ Ie' ye' iuté: ‘Ye' dör Jesús, e' we'ikekebö. <sup>16</sup> Erë be' e' duóka. Ye' e' kkaché be' a be' patkoie kaneblök ye' a. Ì kòs suébö i'ñe ena ì kòs kkacheraëyö be' a, e' pakerabö sulitane a. <sup>17</sup> Ye' tò be' patkeraë be' yamipa a ena pè' kè dör judiowak esepa a. Ye' tò be' tsatkeraë ie'pa ulà a. <sup>18</sup> Ye' tò be' patkeraë ie'pa wöa ká ñi'uk as ishkòrak Skéköl ta ká ñi a, kè ku'ia klöulewa stui a Satanás ulà a; ñies as inu' olo'yardak iki as idörak Skéköl icha batse'r e'pa kije ierblérak ye' mik e' wa.’

<sup>19</sup> “A blu' Agripa, ì yène ña ká jai a e' wawéyö. <sup>20</sup> Jesús tté buaë tsá pakéyö Damasco wakpa a, e' ukuöki ta yö ipaké Jerusalén wakpa a ñies ká malè tso' Judea e' kòs wakpa a. Ñies ipakéyö pè' kè dör judiowak esepa a. Ye' tò ie'pa kòs patté: “A' er mane'ú Skéköl a. A' senú buaë yësyësë ikkachoie tò moki a' er mane'wétke ie' a.” <sup>21</sup> E' kueki se' yamipa judiowak e'pa tò ye' klög'wa Skéköl wé a ttèwa. <sup>22</sup> Erë dò ikké ta Skéköl tò ye' kimé, e' kueki ye' tso'ia ie' tté pakök sulitane a, s'dalöiërta' taië esepa a, ñies se' esepa a. Ì

yë'atbak Skëköl ttekölpa ena Moisés, e'pa tö tö itköraë, e' è pakekeyö. Kè ye' wä ttè kuä'kì pakane. <sup>23</sup> Ie'pa tö iyë'at tö wé pairine'bitü idi' wa s'blúie e' kawötä ttèwä. E' ukuöki ta ie' shkerdakane keweie sulitane yöki, ta s'tsatko tté pakeraëitö judiowak a ena ká ulitane wakpa a. Ttè e' dör wes bö'wö es se' er ñi'woie.”

*Pablo tö Agripa shkeñé erblök Jesús mik*

<sup>24</sup> Es Pablo e' tsatköke e' shüa Festo tö iché ie' a aneule:

—¡A Pablo, be' alínekä! Be' e' yué yëkkuö wa taië, e' tö be' aliwéka.

<sup>25</sup> Erë ie' iüté:

—A këkëpa Festo. Ye' kè alínekä. Ì chéyö e' kè dör alípa ttè, e' dör ttè moki. <sup>26</sup> Se blu' Agripa tkër. Ie' wä ttè ikkë suule buaë. E' kueki kè ye' tkine ttök ie' wörki. Ýi ikkë kos kè wamblène blëulewä. E' kueki ye' wä ijcher tö ie' wä ýi ikkë jcher buaë. <sup>27</sup> A blu' taië Agripa, ye' wä ijcher buaë tö be' tö ì yë'atbak Skëköl ttekölpa tö, e' klö'wé.

<sup>28</sup> Agripa tö iüté:

—Kè be' ibikeitsök tö be' ye' kèmi e' mane'uk Cristo kléie i' ta.

<sup>29</sup> Pablo tö iché:

—I' ta ö i' ukuöki ta, erë Skëköl mú ki ikiar tö be' ena a' kos tso' i'ñe ye' ttö ttsök, e'pa mú dör wes ye' es, erë kè moulewä tabechka kicha wa wes ye' es.

<sup>30-31</sup> Etä blu' ena s'wökir kibi ena Berenice ena kos itulur ee, e'pa ulitane e' kéka míyal bánet ttök ñita Pablo tté ki. Ie'pa tö iché ñi a:

—Wëm i' kè wä ì sulu wamblène ì ki ittewasö, warma kè ie' kawötä wötewä.

<sup>32</sup> Etä Agripa tö iché Festo a:

—Wëm i' kè tö ichópa: 'ye' patkómi Roma wökir kibi a shulè', e'ma sö iëmimi.

## 27

*Pablo patkémirakitö Roma*

<sup>1</sup> Mik ie'pa tö ibikeitsétke tö sa' patkekemi Italia, etä Pablo ena pè' skà tso' wötëule, e'pa méraakitö wëm eköl kiè Julio e' ulä a. Wëm e' dör ñippökwakpa eruleë kiè Emperador Icha, e' capitán. <sup>2</sup> Etä sa' e' iéka kanò a. Kanò e' datse ká kiè Adramitio ee michoë Asia wé kanò irirke dayë kkömik ese a. Wëm kiè Aristarco, e' tso'ñak sa' ta ñies. Ie' datse Tesalónica atë Macedonia ee. <sup>3</sup> Bule es ta sa' demi Sidón. Julio tö Pablo sué er bua' wa. Ie' tö iémi s'yamipa serke ee, e'pa pakök as ì kiane ie' ki e' mù ie'pa tö ie' a. <sup>4</sup> Sa' e' yéttsa Sidón mir wöwí, erë siwä' bitsirke darërëë wöiá. E' kueki sa' míyal dayë nane kiè Chipre e' kke wé siwä' kè bitsirku' taië e' ëkä. <sup>5</sup> Sa' tkami Cilicia ena Panfilia demi Mira atë Licia ee.

<sup>6</sup> Etä ee capitán tö kanò datse Alejandría, e' kué etö. E' mi'ke Italia. Ee sa' e' mane'wé kanò e' étö a ta sa' míyal. <sup>7</sup> Siwä' kueki sa' mirwä kanò ki enaë, kanè taië wa. Ká böt ö ká mañat alè etä sa' demi ká kiè Cnido wöshaë. Siwä' bitsirkeia sa' kke, e' kueki sa' tkami Salmona wöshaë ta sa' tkami dayë nane kiè Creta e' wíshet. <sup>8</sup> Sa' mí kanò ki dayë kkò è wa kanè taië wa. Etä sa' demi ká kiè Buenos Puertos (kiè e' wà kiane chè wé kanò irirke buaë), e' atë tsinet ká kiè Lasea ee.

<sup>9</sup> Sa' ki kawö chó taië ta yuëdiö dewatke. E' késka' ta kè se' a shkanukia dayë ki dö' ì sulu tkò s'ta. E' kueki Pablo tö ipattérak:

<sup>10</sup> —A këkëpa, yö isué tö se' mirwä i' etä ì sulu tkömi. Kanò i' ena dalì i', e' weirwami, ñies dö' se' wákpa duölor.

<sup>11</sup> Erë capitán kè wä Pablo ttö iütëne. Ie' tö kanò wák ena kanò ñakökwakpa wökir, e'pa ttö iüté. <sup>12</sup> Wé ie'pa kanò irine e' kè dör buaë yuëdiö tkö'woie. E' kueki kanò wakpa kibiiepa tö ibikeitseke tö se' mú dömi Fenice yuëdiö tkö'uk ee, e' dör bua'ie. Ká e' atë dayë nane kiè Creta ee. Ee dayë atë noroeste ena sudoeste.

*Siwä' bitsirke taië dayë ki*

<sup>13</sup> Età siwà' datse sur kke, e' bitsinemitke bërëbërë. Ie'pa tö ibikeitsè tö se' tkömimi, e' kuëki ie'pa e' yéttsa míyal Creta dayë kkò è mik kanò kî. <sup>14</sup> E' ukuökî bet tã sèrkè bitsineka taië datse nordeste kke, e' tërke kanò mik. <sup>15</sup> E' tö kanò uyémi. Sa' kè a kanò wöklönea siwà' kke. E' kuëki sa' tö iémi as siwà' wã imítser sa' tã. <sup>16</sup> Sa' tkami dayë nane tsitsir kiè Cauda, e' tsikka, wé kè siwà' bitsirku' darërë shutë ee. Sa' kaneblé darërë, e' wa sa' tö kanóla tso' s'tsatkoie e' muéwã buaë as kè imi'a dayë a. <sup>17</sup> E' ukuökî tã ie'pa tö kanò kibi ètò kî payuéwã buaë tsa' wa. Ie'pa suane dö' kanò tkërka tsa'wö tso' taië kiè Sirte, e' kî. E' kuëki ie'pa tö datsi' ukuö tso' kanò shköwoie, e' iéwã dayë a kanò wöklö'woie as imi' enaë. Tã ie'pa tö iémi as siwà' wã imi'. <sup>18</sup> Bule es tã siwà' bitsirkeia taië, e' kuëki ie'pa tö dali damirak iwã kanò a, e' tuléttsami dayë a. <sup>19</sup> Böiki es tã ie'pa tö íyi taië tso' kanò shköwoie, e' kibiie tuléttsã dayë a iwákpa ulà wa. <sup>20</sup> Ká tka taië etã diwö kè wëneia bëkwö kè wëneia. Sèrkè taië tërkeia sa' kî. E' kuëki sa' tö ibikeitsé tö sa' duölurdaë, kè sa' tsatkërpaia.

<sup>21</sup> Sa' tka ká taië kè chkaule. E' kuëki Pablo e' kéka ie'pa tso' kos e' shua tã ichéitö:

—A kékëpa, a' tö ye' ttò ttsópa, e'ma kè se' e' yënetsã Creta ena ì sulu tka se' tã, e' kè bak se' tã. Nies kè se' íyi weinewa. <sup>22</sup> Erë ì'ñe tã a' er kuú. Kè yi duòpawã. Erë kanò è weirwami. <sup>23</sup> Enia nañewe Skëköl dör ye' blú dalöieke ye' tö, e' tö ibiyöchökwak patké ye' ska', <sup>24</sup> e' tö ye' a iché: 'A Pablo, kè be' suanukia. Be' kawöta shkökrö Roma wökir kibi e' ska'. Skëköl er buaë ché be' a. E' kuëki pè' kos tso' be' tã kanò a, e'pa tsatkeraëitö.' <sup>25</sup> A kékëpa, e' kuëki a' er kuú. Ye' erblöke Skëköl mik. Ye' wã ijcher buaë tö ì kos tköraë wes Skëköl biyöchökwak tö ye' a iché es. <sup>26</sup> Erë siwà' tö se' patkeraë dò ká wele dayë kkömik.

<sup>27</sup> Dayë kiè Adriático e' kî sa' dami siwà' wã wi'kè io'kè. E' kî ká de domingo bötö e' nañewe ká shaböts etã kanò ñakökwakpa éna iane tö sa' döketke ká sí kî. <sup>28</sup> Ie'pa tö dayë shu ma'wé tö wekkè idir döttsã iski tã ide metro döka dabom mañayök kî teröl (36). E' ukuökî tã wi'kie iskà ma'wënerakitö tã ide metro dabom böyök kî kul (27). <sup>29</sup> Ie'pa suane dö' ák tso' blubluë ese mik kanò tër, e' kuëki tabechka tso' kanò wöklö'woie e' émirakitö tkël kanò ñakka dayë shua. Tã ikiérakitö Skëköl a tö sa' kimú ká ñirke e' dalewa. <sup>30</sup> Erë kanò ñakökwakpa tö ibikeitsé: se' tköyalmi as se' e' tsatkò. E' kuëki ie'pa tö kanóla éwami dayë a. Ie'pa e' é tö ie'pa mí tabechka tso' kanò wöklö'woie, e' ökmi kanò wökka dayë shua. <sup>31</sup> Erë ì weke ie'pa tö e' biyó ché Pablo tö ñippökwakpa a ena capitán a. Ie' tö iché:

—Ie'pa tkayal, e' tã a' kè tsatkërpa.

<sup>32</sup> Etã ñippökwakpa tö kanóla e' ttsé télor tã iémirak dayë a.

<sup>33</sup> Ká ñirketke etã Pablo tö ie'pa ulitane a iché:

—Ilè nú. A' tso' ipanuk tö ì tkömi, e' kî domingo de bötö e' dalewa kè ì ñane a' wã yës.

<sup>34</sup> A' keyö ilè ñuk. A' e' tsatkak, e' tã a' kawöta ilè ñuk. Kè a' weirpa yës. <sup>35</sup> Pablo tté one, etã pan klö'wéitö et, tã wëstela chéitö Skëköl a. Sulitane wörki iblatéitö tã ie' wák tö itsá ñé. <sup>36</sup> Etã e' tö imalepa erkiöwé tã ichékerak ñies. <sup>37</sup> Sa' döka cien böyök kî dabom kuryök kî teröl (276) sëraa. <sup>38</sup> Ie'pa chké one kos ie'pa kî kiane ekké tã dali ëyök atë e' tuléttsarakitö dayë a as kanò at öböbla. Dali e' dör trigowö.

### Kanò jchënane

<sup>39</sup> Ká ñine tã kanò ñakökwakpa kè wã dayë kkò suule. Erë ie'pa tö isué tö tsa'wö buaë ulat tër kanò ikloka. E' kuëki ie'pa tö ibikeitsétke tö kanò ma'üsö klëka ee. <sup>40</sup> Etã íyi tso' kanò wöklö'woie, e' ttsé télor ie'pa tö émi dayë a. Etã kaltak tso' kanò ñakoie, e' wöttsélor ie'pa tö. E' ukuökî tã datsi'kuö skékarakitö kanò wökka tã idökemitke dayë kkömik. <sup>41</sup> Erë tsa'wö tkërka dayë dikia, e' kî kanò tkëne kuj. Tã kanò wökka bunewa tsa'wö a, kè yënetsãia. E' dalewa dayë tërke kanò ñakka e' tö kanò tskélor taië.

<sup>42</sup> Wépa mir klöulewã e'pa kiane ñippökwakpa kî ttélur as kè itköyal ùkule. <sup>43</sup> Erë capitán éna Pablo tsatkak, e' kuëki ie' kè wã ikéwö mène ittökulur. Ie' tö iché: "Wépa



ukuo, e'pa e' ppólur kewe dayë a as e'pa döttsa ká sí ki. <sup>44</sup> As imalepa mi' kanò tak ki." Es sa' ulitane dettsa ká sí ki buaë.

## 28

### *Pablo sené si' mañat ká kiè Malta ee*

<sup>1</sup> Mik sa' dettsa eta sa' wa ijchenewa tö ká e' kiè Malta. <sup>2</sup> Ká e' wakpa tö sa' kiéwa buaë seraa. Kase suluë ena kali yerke, e' kuëki bö' batsékarakitö taië ta sa' kiérakitö bö' baiklök. <sup>3</sup> Eta Pablo tö bö' ulatska shtë, e' tuleke bö' a. E' wöshaë ta tkabè sulusi e' yéttsa bö'ba yöki, e' tö Pablo kuéwa iulà kkue a, kè èwa. <sup>4</sup> Mik ká e' wakpa tö isuë tö tkabè moar Pablo ulà mik, eta ichérakitö ñi a: "Wëm i' wa s'kötulewa alè. Eré dayë a itsatkëne, erë s'shulökwak tso' ká jai a e' kè wa kawö mène ia as iser."

<sup>5</sup> Eré Pablo ulà wöppé ta tkabè anewa bö' a. Kè wes Pablo dë'. <sup>6</sup> Wekkë Pablo iërkeka ö wekkë Pablo duömiwa etkëme, e' panuk ie'pa tso' seraa. Erë ie'pa tö ipané taië. Mik ie'pa tö isuë tö kè ì bak ie' ta, eta ie'pa ibikeitséne kuä'ki. Ie'pa tö ichémi tö Pablo dör këköl wele.

<sup>7</sup> Eë tsinet ká tso', e' dör Malta wökir kibi kiè Publio, e' icha. Ie' tö sa' kiéwa ena sa' suë buaë dö ká mañat. <sup>8</sup> Ta Publio yé, e' duöke duè dalölö wa ena ishütërke taië. E' ie' teme'r. Eta Pablo mía iweblök ta ie' tö ikié S'yé a ta iulà méka iki ta ibua'wéneitö. <sup>9</sup> E' ukuöki ta imalepa kirirke tso' ká e' a, e'pa qos debitu ta ibuanerak ñies. <sup>10</sup> E' kuëki ká e' wakpa tö íyi kákmé sa' a taië. Mik sa' mitkene kanò ki ta ì qos kiane sa' ki shkoie, e' kákmé ie'pa tö sa' a.

### *Pablo demi Roma*

<sup>11</sup> Sa' sené ká e' a si' mañat ta sa' e' iéne kanò iëtö a. Eë kanò e' tö yuëdiö tköo'. E' datse Alejandría. Kanò e' kiè ie'pa këkölpa dalöiekerakitö dör klö e'pa kiè wa. <sup>12</sup> Sa' míyal kanò e' ki ká kiè Siracusa ee. Eë sa' sené ká mañat. <sup>13</sup> E' ukuöki ta sa' míyal ká kiè Regio ee. E' bule es ta sa' e' yélur Regio a. Siwa' bitsirke buaë datse sur kke, e' wa ká böt ta sa' demi Pozzuoli wé kanò irirke ee. <sup>14</sup> Eë sa' tö s'yamipa welepa kué. Ie'pa tö sa' ké e' tsukat ie'pa ta domingo etö. Bata ekkë ta sa' demi Roma. <sup>15</sup> S'yamipa tso' Roma, e'pa wa ijchertke tö sa' datse. E' kuëki ie'pa de sa' ñaletsuk dö wé dalì wé tso' taië kiekerakitö Apio ee. Ñies ie'pa skà de sa' ñaletsuk ká kiè S'kaporö Wé Mañat ee. Mik Pablo tö ie'pa suë ta wéstela chéitö Skëköl a ta ittse'neka buaë. <sup>16</sup> Mik sa' demi Roma, eta Roma wökirpa tö ie' ké senuk u etkue a ekörla, erë ishkeki méarakitö eköl Pablo kkö'nuk.

### *Pablo tö Jesús tté paké Roma*

<sup>17</sup> Pablo demi Roma, e' ki ká de mañat, eta ie' tö judiowak wökirpa tso' Roma, e'pa kiök patkè. Mik ie'pa e' dapa'wéka ie' ska' ta ie' tö iché iarak:

—A yamipa judiowak, kè ye' wa ì sulu wamblène se' wakpa ki. Ñies kè ye' wa ì sulu wamblène se' yépa bak ká iaiaë e'pa sene e' ki. Erë ye' tso' Jerusalén e' me'ttsarakitö Roma wakpa ulà a. <sup>18</sup> Roma wakpa tö ye' ichaké iskië, erë kè ie'pa wa ì sulu kune ye' ki ye' ttowaie. E' kuëki ie'pa éna ye' akmi. <sup>19</sup> Erë judiowak kè ki ikiane tö ye' émi ie'pa tö. E' kuëki ye' kawötä ikiök tö ye' patkó Roma wökir kibi a as ie' tö ye' shülö. Erë ye' kè wa ì ta' se' judiowak kkatoie. <sup>20</sup> Ì paneke se' dör Israel aleripa e'pa tö, e' kuëki ye' tkër íe moule. Ñies e' kuëki ye' tö a' kiök patké a' suöie ena ttoie a' ta.

<sup>21</sup> Ie'pa tö iché ia:

—Judea wakpa kè wa yëkkuö patkéule sa' a be' choie yës. Ñies sa' yamipa datse Judea, e'pa kè wa ì sulu yéule sa' a be' ki. <sup>22</sup> Sa' wa ijcher tö tté pa'ali i' pakè be' tö e' cheke suluë sulitane tö ká wa'ñe. E' kuëki sa' ki ikiane ttsè tö jima be' tö ibikeitseke?

<sup>23</sup> Ie'pa tö kawö skà mé ñi a kapakoie. Mik e' kéwö de, eta ie'pa dapaneka taië Pablo ska'. Ie' tö ì blúie Skëköl tso' e' tté paké bla'mi dö tsáli. Ì kit Moisés ena Skëköl ttekölpa tö yëkkuö ki e' wa ie' tö ie'pa pablé taië as ie'pa tö iklö'ù tö Jesús dör wé pairine'bitü idi'



wa s'blúie e'. <sup>24</sup> Ie'pa welepa tö ttè paké Pablo tö, e' klö'wé. Erë welepa kè wä iklöone.

<sup>25</sup> Ie'pa kè wä ibikeitse ñikkëë, e' kueki imítkerak erë Pablo tö ttè i' bata ché iarak:

—Ì yë' Wiköl Batse'r tö a' yépa bak iaiäë, e'pa a, itteköl bak kiè Isafas e' wa, e' dör moki. Skëköl tö iché ia:

<sup>26</sup> 'Be' yú tã ichó ká i' wakpa a.

A' tö ittseraë je', erë kè a' éna iwà anak.

A' tö iwebleraë je', erë kè a' tö isuepa.

<sup>27</sup> Es ie'pa dör, ie'pa wökir suluë, e' kueki.

Ie'pa tö ikukuò wötéwä as kè iwattsër.

Ie'pa tö iwöbla tsimiwéwä as kè iwawër.

Ie'pa kè éna iwà anak.

Ie'pa kè shkakne ye' ska' as ye' tö ibua'üne.\*

Es Isafas tö iyë'at. <sup>28-29</sup> A' wä ijchenú tö i' ukuöki tã Skëköl tö s'tsatkè e' tté tso'tke pakè pë' kè dör judiowak esepa a. Ie'pa e' tö iklö'weraë.

<sup>30</sup> Pablo e' tséat duas bök wa'ñe wé u patuekeitö ee. Sulitane mi'ke ie' weblök tã ee ie' tö ikiéwä. <sup>31</sup> Ie' tso'ie ì blúie Skëköl tso' e' tté pakök ena s'wöbla'uk Skëképa Jesucristo tté wa. Kè yi wä ie' wöklöone. Kè yi wä ie' tsirione yës.

---

\* 28:27 Isafas 6.9-10

## Yëkkuö kit Pablo tö Roma wakpa a Romanos

Yi tö yëkkuö i' kit, e' wák kiè Pablo. Wëlepa tö ibikeitsè tö yëkkuö i' kit ie' tö etä ie' wák tso' Corinto. Ie' tö ikit duas dabom skeyök kī kul (57) Cristo kune'bak e' ukuöki tā. Ie' ikkeyë' taië shkökmi Jesús mik erblökwakpa tso' Roma e'pa pakök. Erë kè ie' a kawö kune shkoie. E' kueki ie' tö yëkkuö i' kit patkëmi ie'pa a as ie'pa wā ijcher tö ì o' Jesús tö ie'pa dalërmik. Ie'pa kibiiepa kè dör Israel aleripa erë Israel aleripa erblé Cristo mik esepa e' ië'wā ie'pa tā. Israel aleripa erblé Cristo mik esepa tö ibikeitsè tö ie'pa klöo'bak Skëköl tö keweie e' kueki ie'pa dör ibua'ie pë' kè dör ie'pa ditsëwö esepa tsata. E' kueki ie'pa kè ñi sini'kune.

E' kueki Pablo kī ikiane kkachè ie'pa a yëkkuö i' kī tö sulitane dör ñies è Skëköl wöa. Israel aleri ö kè idör ileri e' dör ñies ème. Kewe Pablo tö ie'pa a ikkaché tö sulitane tö Skëköl watë'ttsa e' kueki e' nuí tso' sulitane kī. E' ukuöki tā ie' tö ie'pa a ikkaché tö Jesús tté buaë e' è wa Skëköl tö se' tsatkëmi ñikkëë, Israel aleripa ena kè idör ileripa esepa ñies. E' kkaché ie' tö ie'pa a. Ñies Pablo tö ikkaché tö erblé Jesús mik e' wa Skëköl tö se' klö'wëmi wës pë' buaë yësyësë es. Israel aleripa tö ibikeitsè tö Moisés tté dalöiëno e' dalöië wa Skëköl tö se' klö'wëmi wës pë' buaë yësyësë es. Erë Pablo tö ie'pa a iché tö e' kè dör es. Se' kè a ì onuk Skëköl ttsë'woie buaë as se' tsatköitö. Erë Jesús mik erblé e' wa ie' tö se' tsatkeke. Es Pablo tö ichè yëkkuö i' kī.

### Shkë'wè

<sup>1</sup> Ye' dör Pablo. Ye' dör Cristo Jesús kanè méso klöule ie' ttekölpa tsá e' ekölie. Ñies ye' klöule tté buaë kkayë' Skëköl tö e' pakök.

<sup>2</sup> Ká iaiäë Skëköl kablë' tö tté buaë ñe' kkayërdaë, e' kit ittekölpa tö iyëkkuö batse'r e' kī. <sup>3</sup> Tté buaë ñe', e' dör ilä Skëkëpa Jesucristo e' tté. S'ditsö wa tā ie' dör Israel blú bak kiè David e' aleri. <sup>4</sup> Erë mik ishkenekane, etä e' wa ikkayëne Wiköl Batse'r wa tö ñies ie' dör Skëköl Alä diché tā' taië e'.

<sup>5</sup> Ie' batamik Skëköl er buaë ché ye' a. Ie' ye' tkë'ka kaneblök Jesucristo a ittekölpa tsá e'pa ekölie as ká wa'ñe pë' kè dör judiowak esepa kur ie' ttö iütök erblé ie' mik e' wa. <sup>6</sup> Ñies a' tso' ie'pa shua. A' klöule Jesucristo ichaie. <sup>7</sup> Ye' tso' yëkkuö i' shtök a' dalër taië Skëköl éna serke Roma e'pa a. A' klöule ie' wā s'batse'rupa kīie. S'yé dör Skëköl ena Skëkëpa Jesucristo as e'pa er buaë chò ena sene bèrè mù a' a.

### Pablo wëstela ché Skëköl a

<sup>8</sup> Kewe ye' iché tö a' erblé Jesús mik e' tté bunekā ká wa'ñe. E' kueki wëstela chekeyö Skëköl a Jesucristo ttö wa a' ulitane kī. <sup>9</sup> Skëköl a ye' kaneblöke ye' er kos wa ie' alä tté buaë e' pakök, e' wák wā ijcher tö kekraë ye' er arke a' ska'. <sup>10</sup> Kekraë ie' a ikiekeyö tö ie' kī ikiane, e'ma as bata ekkë tā ie' kawö mù ye' a shkoie a' pakök. <sup>11</sup> Sulu ye' éna a' suak. Ye' éna a' kīmak as a' er diché kī iër buaë Skëköl Wiköl wa. <sup>12</sup> E' wā dör tö se' erblöke Jesús mik eköl eköl, e' wa se' ñi er diché iò buaë.

<sup>13</sup> A yamipa, ye' kī ikiane tö a' wā ijcher tö taië ye' ileritsé shkoie a' pakök, erë dò ikkë tā ye' wötkërke. Ye' kī ikiane tö kanè me' Skëköl tö ye' a e' wā döttsa buaë a' shua wës ká malepa wakpa shua idë'ttsa es. <sup>14</sup> Ye' ittse tö ye' kī kanè tso'ia Jesús tté buaë pakök sulitane a. Kè ye' tkine tö s'dalöiër tā' taië ese idir ö s'ësepa idir ö s'yöule ö kè s'yöule idir. <sup>15</sup> E' kueki ñies ye' shkak Roma Jesús tté buaë pakök a' wakpa shua.

### Jesús tté buaë dör Skëköl diché taië s'tsatkoie e'

<sup>16-17</sup> Jesús tté buaë e' wa Skëköl a wëpa kos tö iklö'wé esepa tsatkërmi. E' kueki ye' kè jaëne tté e' kī. Tté e' pakane judiowak a kewe, e' itökī pë' kè dör judiowak esepa a. Tté

e' tö ikkachè se' a tö wës Skëköl tö se' klö'wèmi wës pë' buaë yësyësë es. Se' klö'wéitö es se' erblé Jesús mik e' wa. E' è wa ie' tö se' klö'wèmi es. E' dör wës itso' kitule Skëköl yëkkuö k<sub>i</sub> es, e' tö ichè: “Yi dör yësyësë ierblö Skëköl mik e' batamik, ese serdaë.”\*

*Sulitane k<sub>i</sub> ì sulu nu<sub>i</sub> tso' Skëköl wöa*

<sup>18</sup> Skëköl tso' ká jaì a, e' tso' wépa tö ì sulu wambleta' ena kè ser yësyësë esepa we'ikök. E' wa ie' tso' ikësik kkachök. Ì sulu kôs wambleke ie'pa tö, ese tö ie' ttè moki e' wöklö'weke. <sup>19</sup> Kôs s'éna iane tö wës ie' dör, e' kkayë' ie' wák tö ie'pa a, e' kuëki buaë ie'pa wä ijcher. <sup>20</sup> Kewe ta' ie' tö ká i' yö'at, e'tami sulitane wä ijcher tö wës ie' dör. Ie' kè wërta' erè ì kôs yö'itö e' wa iwënewä buaë tö ie' dör Skëköl, ñies tö ie' diché kè erta'wa. E' kuëki kè ie'pa a iyënuke tö kè sa' wä ijcher. <sup>21</sup> Eré ie'pa wä ijcher buaë tö ie' tso'tke, erè ie'pa kè wä ikikanekä wës ikawöta' kikëka es. Ñies ie'pa kè wä wëstela yëne ie' a. E' skéie ì bikeitseke ie'pa tö ese kè wä ta'. Ie'pa erbiköke kôs ese dör sulu ème. <sup>22</sup> Ie'pa e' chò tö ie'pa wä iyi kôs ese jcher buaë, ñermata ie'pa ianewä kè kabikeitsöta'. <sup>23</sup> Ie' olo ta' taië kè erta'wa, e' kè dalöiëne' ie'pa wä. E' skéie ie'pa tö s'duöta'wä ese diököl dalöieke. Dö kal ö ák yöule dùie ö bakaie ö talokie ese dalöiekerakitö ie' skéie.

<sup>24</sup> E' kuëki Skëköl tö ie'pa émi e' ia'ukkä sene sulusi wa wës ie'pa k<sub>i</sub> ikiane es. Es ie'pa ñi dalösewéwä iyi s'jaëwè taië ese wa. <sup>25</sup> Ie' ttè mokië e' olo'yérakitö, e' skéie kache ttè è klö'wekerakitö. İyi yö'at ie' tö ese è dalöiekerakitö skëköl, kè dör ie' wák dalöie. Ie' è k<sub>i</sub> kikëka mène buaë këkraë. Es e' idir.

<sup>26</sup> E' kuëki Skëköl tö ie'pa émi e' ya'uk wës ie'pa er sulu k<sub>i</sub> ikiane es. Dö alakölpa e' mane'wéttsä kè senakia wëpa ta' wës imeneat es. Ie'pa senéka ñita iwakpa è. <sup>27</sup> Es ñies wëpa kè senakia alakölpa ta'. Ie'pa e' mane'wéttsä. Suluë ie'pa éna senakka iwakpa è ñita. E' dör jaë taië. Ie'pa e' ya'u sulu es, e' nu<sub>i</sub> k<sub>i</sub> iwakpa weirke siarë wës ikiane we'ikè es.

<sup>28</sup> Ie'pa kè éna Skëköl bikeitsak, e' kuëki ie' tö ie'pa émi ì suluë e' è bikeitsök as ì kè wamblök s'kàne ese wamblörakitö. <sup>29</sup> Es ie'pa er sulunewä da'äie. Ì sulu kôs e' wambleke ie'pa tö taië. Ie'pa wöttsérke taië. Ie'pa e' wamblöke suluë. Ie'pa ukyërke imalepa ta'. Ie'pa s'ttekwä ena ñi wöñakköke suluë ena s'kitö'weke taië. Këkraë ie'pa er me'rie ì sulu è k<sub>i</sub>. Ie'pa biyöblöke ñi k<sub>i</sub>. <sup>30</sup> Ie'pa tö s'malepa cheke suluë. Sulu ie'pa éna Skëköl ar. Ie'pa e' kkeökekä taië e' ttsökekä taië ena kè tkirku' imalepa k<sub>i</sub>. İyi sulusi bikeitseke ie'pa wákpa tö, ese wamblekerakitö. Ie'pa kè tö imi ena iyé ttò dalöieta'. <sup>31</sup> Ì dör buaë e' kè ane ie'pa éna. Ì uk ie'pa kablé e' kè wawëta'itö. Ie'pa kè éna yi dalërta'. Kè yi suëta' er siarë wa. <sup>32</sup> Eré ie'pa wä ijcher buaë tö Skëköl ttè dalöiëno tö ichè tö wépa tö iyi ekkè wambleke esepa k<sub>i</sub> duëwä kiane, erè ie'pa tö iwamblekeia. E' k<sub>i</sub>ie ta' ie'pa wa buaë iwër tö s'malepa tö iwamblè.

## 2

*Skëköl tö sulitane shüleraë ñikkë*

<sup>1</sup> A' isie\* tö pë' chéyö ñe'sepa kichatekettsä, esepa kè a ì yënuke e' tsatkoie Skëköl wörki. Ì sulu kôs wambleke ie'pa tö ese wambleke a' tö ñies. E' kuëki mik a' tö ie'pa kichatéttsä, eta e' wa a' wákpa tso' e' kichatöktsä. E' kuëki kè a' a e' tsatkënuke. <sup>2</sup> Se' wä ijcher tö Skëköl tö s'shulè yësyësë, e' tö se' e' wamblö sulu es esepa kôs kichaterattsä. <sup>3</sup> A' tö ì sulu wamblé wës wépa kichatéttsä a' tö es, e' ta' wës a' ibikeitsèmi tö Skëköl kè tö a' kichatepattsä ñies? <sup>4</sup> A' tö ibikeitseke es, e' ta' e' wa ie' er buaë se' ta', e' watöktsä a' tso'. Ie' tö se' anewekeia taië, ie' kè tö se' we'ikè bet. Ie' er buaë a' ta', e' tö a' dalé'ttsekeia buaë, e' wa ie' tso' a' ulaiök as a' er mane'ù ie' a, e' kè jcher a' wä? <sup>5</sup> Erè a' er darërèè. A' kè éna

\* 1:16-17 Habacuc 2.4 \* 2:1 Versículo i' a Pablo ttökemi judiowak ta. E' wënewä bua'ie verículo 12 ena itöki itso' e' k<sub>i</sub>.

er mane'wak ie' a, e' nuí kǐ a' tso' Skéköl kësik e' kǐ kiök e' kǐ. Mik ie' s'shuleraë e' k'éwö de eta ie' tö s'shuleraë yësyësë. <sup>6-11</sup> Sulitane dör ñies ème ie' a, e' kuekǐ ie' tö iské meraë eköl eköl a wes s'ser es. Wépa e' chöke kekraë ì buaë uk, tso' ilo ena ikikèka ena sene michoë yulök, esepa ulà a sene michoë döraë. Erë wépa tkirke iwák è kǐ, e' wamblò sulu, kè tö ie' ttè mokǐ dalöië, esepa we'ikeraëitö kësik wa da'a. Wépa e' wamblò suluë esepa kos weirdaë siarë kewe judiowak e' ukuökǐ ta sulitane, e' dalërdarak imik taië. Erë wépa serke yësyësë esepa kos a ilo ena ikikèka ena sene bèrë e' merdaë taië kewe judiowak a e' ukuökǐ ta sulitane a.

<sup>12</sup> Pë' kè dör judiowak esepa kè ku' Moisés ttè dalöiëno e' dikia. Ie'pa tö ì sulu wamblé, e' ta iweirdaë siarë erë ie'pa kè shulirpa ttè ñe' wa. Erë judiowak tso' ttè e' dikia, e'pa tö ì suluë wamblé e' ta ttè e' wa ie'pa shulirdaë. <sup>13</sup> Wépa tö ttè dalöiëno e' ttsé, e' è kuekǐ ie'pa kè klò'wépa Skéköl tö wes pë' buaë yësyësë es. E' skéie wépa tö ttè e' wà dalöië esepa klò'weraëitö es. <sup>14-15</sup> Pë' kè dör judiowak esepa kè wà Skéköl ttè dalöiëno kit Moisés tö yëkkuö kǐ e' jcher. Erë mik ie'pa tö ttè ñe' wà dalöië iwákpa wà ijcher e' kuekǐ, eta e' wa iwënewa tö ttè dalöiëno tso' ie'pa er a. Ttè e' dikia ie'pa tso'. Ttè e' è wa ie'pa er tö ie'pa a icheke tö ì dör buaë ì dör suluë. Ttè e' wa mikle ta ie'pa er tö ie'pa kcateke, mikle ta ie'pa tsatkeke. Ttè e' wa ie'pa shulirdaë. <sup>16</sup> E' tköraë aishkuö ta mik Skéköl tö ì kos tso' blëulewa se' er a e' shuleraë Cristo Jesús batamik eta, wes ttè buaë pakekeyö e' tö ichè es.

<sup>17</sup> Erë a' wépa dör judiowak, esepa erblöke Moisés ttè dalöiëno e' mik. A' e' ttsòka tö a' dör Skéköl icha. <sup>18</sup> Ì kiane ie' kǐ ese jcher buaë a' wà. A' yöule buaë ie' ttè wa, e' kuekǐ ì dör ibua'ie e' shukitmi a' a wë. <sup>19</sup> A' ibikeitseke tö o'ka pautmi a' a buaë. E' dör wes s'wöbla kè wawër esepa ulaië es ö wes se' tso' stui a esepa a bö'wö kkachè es. <sup>20</sup> A' wà ttè dalöiëno tso', e' dör ttè mokǐ ena íyi jcher taië e' tté. E' kuekǐ a' ibikeitseke tö a' a se' kam yör esepa yörmi ena wépa kè wà ì jcher esepa wöblarmi. <sup>21</sup> E' dör es, e' ta ¿wes a' kè e' wöbla'ù? A' tö s'patteke tö kè s'kàne akblök ta ¿wes a' akblöke? <sup>22</sup> A' icheke tö kè s'kawöta s'senewabak dalöseukwa ta ¿wes a' tö idalöseweke? Íyi diököl tso' dalöië e' ar suluë a' éna ta ¿wes íyi tso' iwé a' e' ekibleke a' tö? <sup>23</sup> Ttè dalöiëno meneat a' a, e' wa a' e' ttsòka taië ta ¿wes a' kè tö idalöië? E' wa a' tö ie' dalösewéwa. <sup>24</sup> Wëe' Skéköl yëkkuö tö ichè: “Pë' kè dör judiowak, esepa tö Skéköl cheke suluë a' ukuömik.”†

<sup>25</sup> Mokǐ wépa tö Moisés ttè dalöiëno e' iuteke, esepa a itóttola kkuölit tëule tsir e' dör buaë. Erë yi kè tö iiutè, esepa a kè idör ìie bua', e' dör wes kè s'wakyöule es. <sup>26-29</sup> ¿Wépa dör judiowak chökle? E' kè dör iditséwö è wa. E' kè dör iwakyöule iyese alè kǐ e' wa. Judiowak chökle e' dör wépa er yësyësë Skéköl wöa esepa, e' dör wes ie'pa wakyöule ier a es. E' kè onuk ttè dalöiëno e' a. E' ormi Wiköl Batse'r è a. Esepa wër buaë Skéköl wa, kè dör s'ditsö wa. E' kuekǐ pë' kè dör judiowak, kè wakyöule, kè wà Moisés ttè dalöiëno e' ku', esepa tö idalöië buaë, e' ta ie'pa sueraë Skéköl tö wes judiowak wakyöule es eré kè iwakyöule mokǐ. Pë' tö ttè dalöiëno e' dalöië, eré kè iwakyöule ichkà kǐ, esepa tö judiowak kè tö iiutè esepa kkatéraë ikǐ aishkuö ta, eré iwakyöule ena ttè dalöiëno tso' iwa.

### 3

<sup>1</sup> Yile tö ichakèmi: “E' dör es, e' ta ¿iie bua' idir tö se' dör judiowak? Se' tottola kkuölit tëule tsir ¿iie bua' e' dör?” <sup>2</sup> Ye' iiutè tö e' dör buaë shute ena iwà dör taië. Ihua'ie dör tö Skéköl tö ittè me'atbak judiowak ulà a. <sup>3</sup> Yëne tö ie'pa wépa tö ttè ñe' dalösewéwa, erë e' è kuekǐ ¿ichèmisö tö Skéköl kè ttò mokǐ? <sup>4</sup> Au, kè idör es. Eré sulitane kachömi suluë, erë ie' ttò mokǐ kekraë. E' dör wes itso' kitule ie' yëkkuö kǐ es, e' tö ie' chè i' es: “Sulitane isueraë tö be' ttò mokǐ.

Be' ttè shulirmi, e' ta be' e' alörakà be' kkatökwakpa kǐ.”\*

† 2:24 Isaiás 52.5; Ezequiel 36.22 \* 3:4 Salmo 51.4

Es Skëköl yëkkuö tö ichè.

<sup>5</sup> Pë' welepa kè wà ijcher yësyësë, esepa tö icheke tö s'ser suluë, e' wa ikí wënewa bua'ie tö Skëköl dör yësyësë sulitane tsata. E' kuëki ie'pa tö icheke tö e' nuí kî s'we'ikéitö, e' kè dör yësyësë. ¿Es idir? <sup>6</sup> Au, kè idör es. Skëköl chópa kè dör yësyësë, e'ma ¿wes ie' a sulitane shulirmi yësyësë?

<sup>7</sup> Es yile tö ichakëmi: “Ye' kache wa Skëköl ttò mokië e' kîkarkeka taië, e' ta ¿ì kuëki e' nuí kî ye' kkatekeiaitö?” <sup>8</sup> E' chópa es, e'ma sö ichèmi tö “ì sulu kî wamblösö as e' wa ì buaë kî dò taië.” Welepa tö icheke tö ttè ese wa ye' tö s'wöbla'weke. Ie'pa éna ye' wöakwa, e' kuëki ie'pa tö ye' cheke sulu es. Erë ie'pa esepa kichatëttsa kiane.

*Kè yi dör yësyësë Skëköl wöa*

<sup>9</sup> E'ma ¿ì chëmisö? Sa' dör judiowak ¿esepa dör buaë sulitane tsata? Au, kè idör es. Ikkachétkeyö a' a tö sulitane, judiowak ena wépa kè dör judiowak, esepa kos tso' sene sulu dikia. <sup>10</sup> E' dör wes itso' kitule Skëköl yëkkuö kî es, e' tö ichè:

“¿Kè yi ku' eköl wë'ia dör yësyësë Skëköl wöa!

<sup>11</sup> Ì dör buaë Skëköl a ese kè ane yi éna yës.

Kè yi ku' Skëköl yulök.

<sup>12</sup> Sulitane tsj tröuke ie' yöki;

Ie'pa er sulunewa suluë.

Kè yi ku' eköl wë'ia ì buaë ese uk.†

<sup>13</sup> Ie'pa ttò suluë, e' dör wes s'nu kélkuö kköppèe alar suluë es.

Ie'pa kkò kî s'kitö'wè me'rie.‡

Ie'pa kapakò e' dör wes tkabè ichók kapöli es.§

<sup>14</sup> Ie'pa tso'ie alibchök s'malepa kî kësik wa.\*

<sup>15</sup> Ie'pa er me'rie s'ttèwa è kî.

<sup>16</sup> Wé ie'pa dami ee s'we'ikè ena s'eriawè siarè ese mekearakitö.

<sup>17</sup> Sene bèrè ñalé e' kè suule ie'pa wa.†

<sup>18</sup> Skëköl dalöie e' kè eri ta' ie'pa wa yës.”‡

Es Skëköl yëkkuö tö ichè.

<sup>19</sup> Se' wa ijcher tö ì kos chë Skëköl ttè dalöiëno tö, e' chëtö wépa tso' idikia, esepa a. Ttè e' wa sulitane siwa'blöwekewa Skëköl tö. Ñies ttè e' tö ikkacheke tö sulitane kî nuí tso' ie' wöa. <sup>20</sup> Ttè dalöiëno e' dör ikkachoie se' a tö se' dör ì sulu wamblökwakpa. E' kuëki kè yi a iyënuka: “ttè dalöiëno iutéyo sera, e' kuëki Skëköl kawöta ichök tö ye' dör pë' buaë yësyësë.”

*Wes Skëköl tö se' klö'wëmi wes pë' buaë yësyësë es*

*(3.21-31)*

<sup>21-23</sup> Erë ì'ne ta Skëköl tö se' a ikkachétke tö wes ie' tö se' klö'wëmi wes pë' buaë yësyësë es. E' kè dör ttè dalöiëno iutésö e' wa. E' dör se' erblé Jesucristo mik e' wa. Wépa kos erblé ie' mik, esepa klö'wé Skëköl tö wes pë' buaë yësyësë es. Ñies Skëköl yëkkuö kos e' tö isini'kué tö moki idir. Sulitane dör ì sulu wamblökwak. Kè se' serku' buaë yësyësë wes Skëköl olo ta' taië e' ser es. E' kuëki sulitane dör ñies ie' wöa. <sup>24</sup> Erë Cristo Jesús tö se' yë'ttsa ì sulu ulà a. E' wa Skëköl tö se' klö'wé wes pë' buaë yësyësë es. E' kè kî se' ñarku', e' dör éme. Es ie' er buaë ché se' a. <sup>25</sup> Ie' tö Jesucristo me'ttsa ttèwa se' skéie e' pé tène taië se' nuí olo'yoie. E' de se' ulà a se' erblé Jesús mik e' wa. E' wa ie' tö ikkaché tö ie' dör yësyësë. Ká iaiaë ie' tö sene suluë dalé'ttsé'bitu énaë. <sup>26</sup> E' kéwö ska' ta' ie' kè wà se' weine wes s'kawöta weinuk es. Erë se' nuí patone Jesucristo weine e' wa. E' wa Skëköl

† 3:12 Salmo 14.1-3; 53.1-3 ‡ 3:13 Salmo 5.9 § 3:13 Salmo 140.3 \* 3:14 Salmo 10.7 † 3:17 Isaías 59.7-8

‡ 3:18 Salmo 36.1

tso' ikkachök ì'ñe tã tö ie' dör yësyësë. Ñies ie' tso' ikkachök tö wës ie' tö wépa erblé Jesús mik esepa klö'wèmi wës pë' buaë yësyësë es.

<sup>27</sup> E' dör es, e' tã çì wa se' e' ttsòkami Skèköl wöa? ;Kè ì wa! Se' erblé Jesús mik, e' kuëki ie' tö se' klö'wé wës pë' buaë yësyësë es. Kè idör ttè dalöiëno iütèsö e' kuëki. E' kuëki kè se' a e' ttsënukkã ì wa yës. <sup>28</sup> Es se' tö ibata chéat tö Skèköl tö se' klö'wé wës pë' buaë yësyësë es se' erblé Jesús mik e' kuëki. Kè idör ttè dalöiëno e' iütèsö e' kuëki.

<sup>29</sup> Erë ;Skèköl dör judiowak è Kèköl? ;Ie' kè dör pë' malepa Kèköl? Tó, ie' dör pë' kè dör judiowak esepa Kèköl ñies. <sup>30</sup> Ie' dör eköl ème. Wépa erblé Jesús mik esepa klö'wéitö wës pë' buaë yësyësë es. Kè ie' tkine tö judiowak idir ö kè idir judiowak. <sup>31</sup> Se' tsatkèrmi se' erblé Jesús mik e' wa, etã çsö ichèmi tö Moisés ttè dalöiëno e' kè diché tã'ia? ;Au, e' kè dör es! E' skéie se' tö ikí ché moki tö idiché tso'ia iwák es.

#### 4

##### *Abraham erblé Skèköl mik*

<sup>1</sup> Etã sa' judiowak yé bak kiè Abraham, çìma e' chèmiso? ;Ì jchenewa ie' wã erblé Skèköl mik e' wa? <sup>2-3</sup> Skèköl tö Abraham klö'úpa wës pë' buaë yësyësë es ì buaë wéitö e' kuëki, e' ma buaë ie' a e' ttsèrmikã. Erë Skèköl yèkkuö tö ichè: “Abraham erblé Skèköl mik, e' kuëki iklö'wéitö wës pë' buaë yësyësë es.”\* E' kuëki ie' kè a e' ttsënukkã yës Skèköl wöa. <sup>4</sup> E' dör wës s'kaneblétke ese patuè es, e' kè dör kakmeule. E' dör ikanebletke e' ské. <sup>5</sup> Erë yile erblé Skèköl tö s'sulusipa klö'wèmi wës pë' buaë yësyësë es e' mik, e' tã ese klö'weraë Skèköl tö es, eré kè iwã ì buaë one e' tsatkoie. <sup>6</sup> Ñies e' sini'ku' David tö. Ie' iché tö ayècha buaë wé klö'wé Skèköl tö wës pë' buaë yësyësë es, kè dör ì buaë wéitö e' kuëki. <sup>7</sup> Ie' tö iyè':

“Wépa kì inuì olo'yé Skèköl tö ena itköwée iki, jayècha buaë esepa!

<sup>8</sup> Wépa kè chakepaia Skèköl tö inuì kì, jayècha buaë esepa!”†

Es itso' kitule.

<sup>9</sup> Ye' ichakè tö wépa yé David tö ayècha buaë çesepa dör wépa wakyöule itóttola kkuölit tëule tsir e' wa esepa è? Au. Ñies ie' pa dör wépa kè wakyöule esepa. Ye' ichétke tö Abraham erblé Skèköl mik, e' kuëki iklö'itö wës pë' buaë yësyësë es. <sup>10</sup> Erë çmik Skèköl tö iklö' es? ;E' dör iwakyöne e' ukuöki ö e' yöki? Kè idör e' ukuöki, e' dör e' yöki. <sup>11</sup> Ie' tö iklö'wé es ierblé imik e' kuëki. E' ukuöki tã ie' kéitö e' wakyuök iwã kkachöie tö iklö'wéitö wës pë' buaë yësyësë es. Es ie' de wépa erblé Skèköl mik eré kè iwakyöule, esepa kos yé tsaweie. Es ie' pa kos klö'wé Skèköl tö wës pë' buaë yësyësë es. <sup>12</sup> Ñies ie' dör wépa wakyöule ena ierblö Skèköl mik wës ie' es kam iwakyuö e' yöki, esepa kos yé.

##### *Skèköl tö ttè me' Abraham a*

<sup>13</sup> Skèköl kablé' Abraham a ttè i' wa: “Ye' tö ká ulitane meraë be' a ena be' aleripa a.” Erë ie' kè wã imène Abraham a ttè dalöiëno e' iütè wa. Iméitö ia ierblé imik e' wa. E' wa Abraham klöne wës pë' buaë yësyësë es. <sup>14-15</sup> Mik Skèköl ttè dalöiëno dalösewéwasö, etã e' nuí kì se' we'ikeraëitö. Erë ttè ñe' kè kunúpa, e' ma kè ì tã' dalösewèwa. E' kuëki ì uk Skèköl kablé' Abraham a e' wã mú dò wépa tö ttè dalöiëno e' wã iütè esepa a, e' ma erblé Skèköl mik ena ie' kablé' Abraham a e' kè dör iie bua'.

<sup>16</sup> E' kuëki ì uk Skèköl kablé' Abraham a, e' wawéitö éme wës íyi kakmeule es ie' erblé imik e' wa. Ie' tö iwé es er buaë choie sulitane a as iwã dò Abraham aleripa ulitane ulã a. E' wã dör tö ì yène Abraham a, e' kè dör wépa tso' ttè dalöiëno dikia esepa è a. Ñies e' dör wépa kos erblé Skèköl mik wës Abraham es esepa a. Es Abraham de se' ulitane erblé Skèköl mik esepa yéie. <sup>17</sup> E' dör wës itso' kitule Skèköl yèkkuö kì es. E' kì Skèköl tö iché Abraham a: “Ye' tö be' tkéka ká taië wakpa yéie.”‡ Skèköl dör s'duowa shké'ukkanewak

\* 4:2-3 Génesis 15.6 † 4:8 Salmo 32.1-2 ‡ 4:17 Génesis 17.5



e'. ì kè ku' e' yuèmiitö ittö è wa. Skëköl e' mik Abraham erblé.

<sup>18</sup> Ì yè' Skëköl tö Abraham a wësua kè iwà tkòpa suë. Erë Abraham tö iklö'wé mokië ta iwà panéitö. E' kuëki ie' de ká ku'a'ki taië e' wakpa yéie wës ie' a iyënebak es. Skëköl tö ie' a iyè': "Be' aleripa alördaë taië." § <sup>19</sup> Tsir etä ie' ki duas de cien eyök (100). Ie' wa ijcher tö ie' ena ilaköl Sara dewatke kékëpa alula kè döpaia aläë. Erë erblé Skëköl mik e' kè olo'yane ie' wa yës. <sup>20</sup> Ie' kè wa ibikeitseka bötböt. Skëköl kablé' ie' a e' kè bikeitse ie' wa tö kè iwà tkòpa. E' skéie ie' kí erblé Skëköl mik ta ikikékaitö. <sup>21</sup> Ie' tö iklö'wé mokië tö Skëköl wa diché tso' ì uk ie' kablé' ese woie. <sup>22</sup> E' kuëki Skëköl tö iklö'wé wës pè' buaë yësyësë es.

<sup>23</sup> "Skëköl tö iklö'wé wës pè' buaë yësyësë es." Ttè e' kè kiteat yëkkuö ki Abraham è a. <sup>24</sup> Nies ikiteat se' a. Skëköl tö Skëkëpa Jesús shkeo'kane e' mik se' erblé, e' ta nies ie' tö se' klö'weraë wës pè' buaë yësyësë es. <sup>25</sup> Jesús wömenettsa ttèwä se' nuì ki, e' ukuöki ta ishkeo'kaneitö as se' klör wës pè' buaë yësyësë es.

## 5

### *Skëköl er buanene se' ki*

<sup>1</sup> Se' erblé Jesucristo mik e' wa Skëköl tö se' klö'wé wës pè' buaë yësyësë es. E' kuëki i'ñe ta ie' er buanene se' ki Skëkëpa Jesucristo batamik. <sup>2</sup> Jesucristo batamik ie' er buaë ché se' a, se' erblé ie' mik e' wa. Ie' er buaë chò se' a, e' a se' e' tkéwa darërë. Se' wa ijcher tö se' dörami ie' ska' olo ta' taië ie' ta ñita. E' wà paneke se' tö kröröë, e' tö se' ttsé'weke buaë. <sup>3</sup> Erë kè dör e' è, nies se' ttsé'rke buaë mik se' weirke etä. E' wà dör tö se' wa ijcher tö mik se' weirke, etä e' tö se' kí diché ieke idalé'ttsök er bua' wa. <sup>4</sup> Ì kos dalé'ttsésö er bua' wa e' wër buaë Skëköl wa. Se' wër buaë ie' wa, e' ta e' tö se' ké iwà kí panuk kröröë. E' kuëki se' ttsé'rke buaë se' weirke e' shua. <sup>5</sup> Wiköl Batse'r mène se' a e' tö se' a ikkacheke tö Skëköl éna se' dalër taië, e' kuëki ipanè ñe' e' kè tö se' eriwëpa.

<sup>6</sup> Mik Skëköl tö ikéwö me' e' de, etä Cristo kótëwä se' nuì skéie se' tso'ia kè a e' tsatkër e' dalewa. <sup>7</sup> Darërë idir se' a e' muktsa ttèwä o'ka skéie, eré imú dör pè' buaë yësyësë ese. Isalema yile e' mumittsa ttèwä pè' buaë shute ese skéie. <sup>8</sup> Erë Cristo e' me'ttsa ttèwä se' skéie, se' bakiä e' wamblök suluë e' dalewa. E' tö se' a ikkacheke tö kos Skëköl éna se' dalër. <sup>9</sup> Ie' kótëwä ipé tène taië e' wa Skëköl tö se' klö'wé wës pè' buaë yësyësë es. E' yita buaë ie' wa se' tsatkërdaë Skëköl kësik yöki. <sup>10</sup> Mik se' bak Skëköl bolökpaie, etä ie' wák tö ier bua'wéne se' ki ilà ttèwä e' batamik. Erë i'ñe ta ie' er buanene se' ki, e' yita buaë se' tsatkërdaë Cristo tso'ne ttsé'ka e' diché wa. <sup>11</sup> Erë kè dör e' è. Skëkëpa Jesucristo batamik Skëköl er buanene se' ki, e' kuëki se' ttsé'rke buaë ie' batamik.

### *Adán ena Cristo*

<sup>12</sup> Wëm tsá yöne kiè Adán, e' wa sene sulu tsá dë'bitu ká i' a. Ie' dör sulitane yéie. E' kuëki mik ie' tö ì sulu tsá wamblé', etä e' dör wës sulitane tö iwamblé' ie' ta ñita es. E' tö sulitane wöme'ttsa ì sulu wamblök ena e' nuì ki duökwa. E' kuëki duèwä de sulitane ki. <sup>13</sup> Kam ttè dalöiëno mer Moisés a, e' yöki ì sulu wamblënemibak je'. Erë e' kéwö ska' ta ttè dalöiëno kè ta', e' kuëki kè yi kkatëne inuì ki. <sup>14</sup> Erë Adán kéwö ska' dò Moisés kéwö ska' sulitane blërke. Nies wépa kè wa Skëköl ttò dalöseonewä wës Adán es, esepa blërulune. Ie' dör wëm eköl doia ie' itöki e' klíla.

<sup>15</sup> Ì sulu wamblé' Adán tö ena ì buaë o' Skëköl tö se' a e' dör ku'a'ki. Adán tö ì sulu wamblé', e' kuëki taië s'blërulune. Erë wëm eköl skà, e' dör Jesucristo, e' batamik Skëköl er buaë ché se' a éme kè tuè ta'. E' dör buaë ichökle, e' wa s'tsatkërke taië. <sup>16</sup> Adán tö ì sulu wamblé' etökicha ème, e' nuì ki sulitane kichatë'ttsa Skëköl tö. Erë Skëköl er buaë ché se' a, e' kuëki ie' tö se' klö'wé wës pè' buaë yësyësë es, eré se' tö ì sulu wamblé' taië. E' kuëki ì buaë o' ie' tö se' a, e' kè dör wës ì sulu wamblé' Adán tö es. <sup>17</sup> Es wëm eköl è tö ì sulu wamblé', e' wa duèwä e' aléka sulitane ki. E' yita ì o' Jesucristo tö, e' wa wépa a

Skëköl er buaë ché klö'wéitö wës pë' buaë yësyësë es, esepa kôs ulà a sene pa'ali döraë ta ie'pa e' alörakä ie' ta ñita. E' dör taië tkòkà ì wamblé Adán tö e' tsata.

<sup>18</sup> Ì sulu wamblé Adán tö etökicha, e' wa sulitane kichatënettsa. Erë ì yësyësë wé Jesucristo tö etökicha, e' wa sulitane klörmi wës pë' buaë yësyësë es as iser michoë.

<sup>19</sup> Adán tö Skëköl ttò tsá dalöseö'wä e' wa sulitane wömenettsa ì sulu wamblök. Erë Jesucristo tö Skëköl ttò dalöië, e' wa se' taië klördaë wës pë' buaë yësyësë es.

<sup>20</sup> Skëköl tö ttè dalöiëno mé se' a as ì sulu wamblekesö kôs e' jcherwä se' wä yësyësë tö e' dör suluë. Erë mik ijchenewä se' wä, etä se' éna iwà armi bua'ie tö kôs Skëköl er buaë ché se' a. E' dör taië ì sulu kôs wamblekesö e' tsata. <sup>21</sup> Mik se' bak klöulewä duëwä ulà a, etä sene sulu e' ali'kä se' ki. Erë Skëköl er buaë ché se' a, e' dikia se' tso' i'ñe ta wës se' bak kuaë sene sulu dikia es. Ie' er buaë ché se' a Skëképa Jesucristo batamik, e' wa se' klö'wéitö wës pë' buaë yësyësë es ta sene michoë méitö se' a.

## 6

*Se' dör wës s'duulewä es sene sulu yöki*

<sup>1</sup> E' dör es e'ma ¿ima sö ichèmi? ¿ì sulu kí wamblèiasö as Skëköl er buaë kí chò se' a taië shütë? <sup>2</sup> Au, e' kè dör es. Se' dör wës s'duulewä es sene sulu yöki. ¿Wës ì sulu wamblèmiiasö? <sup>3</sup> ¿A' kè wä ijcher tö se' wösune e' tö iwà kkacheke tö se' batsulewä Cristo Jesús mik? E' dör wës se' ttëwãñak ie' ta es. <sup>4</sup> Se' wösune e' wà kiane ché tö se' töbinewä ie' ta. E' dör es as se' serne kuä'ki wës Cristo shkenekane S'yé olo ta' taië e' wa e' ser es.

<sup>5</sup> Se' batsulewä ie' mik ie' dunewä eerö, es ñies se' shkerdakane wës ie' shkenekane es. <sup>6-7</sup> Se' wä ijcher tö s'duulewä kè ku'ia ì sulu wamblök. Es ñies wës se' dör kuaë e' dunewä Cristo ta wötëulewä krus mik. E' tka es as s'wák dër suluë e' diché erwa ta s'tkòshkar sene sulu ulà a kè ku'ia klöulewä. <sup>8-9</sup> Se' wä ijcher tö Cristo shkenekane, e' kueki ie' kè duöpawane. Duewä kè e' alòpakaiä ie' ki. E' kueki se' duulewatke ie' ta, e' ta se' tö iklö'wé mokië tö se' serdane ie' ta. <sup>10</sup> Mik ie' kötwa, etä ikötwa etökicha ème se' nuì ki, kè iskä duöpawaiane. Erë ishkenekane serkene Skëköl a. <sup>11</sup> Es ñies a' e' ttsó mokië tö a' duulewä sene sulu yöki, erë a' tso' ttsë'ka senoie yësyësë Skëköl a a' batsulewä Cristo Jesús mik e' wa.

<sup>12</sup> E' kueki kè a' kawö mukia sene sulu a as kè ie' alòkà a' ki ta ì sulu kôs wamblak a' éna ese wamblè a' tö. <sup>13</sup> Kè a' e' muktsaiä sene sulu ulà a as e' kè tö a' klö'ùwä ì sulu wamblöie. E' skéie a' e' múttsa Skëköl a wës s'duulewä shkenekane es. A' e' múttsa wa'ñe Skëköl a senuk yësyësë. <sup>14</sup> A' kè ku'ia Moisés ttè dalöiëno dikia. A' tso' Skëköl er buaë chöke se' a e' dikia. E' kueki a' e' múttsa senuk yësyësë ta es sene sulu kè e' alòpaka a' ki.

*Skawötä senuk buaë yësyësë Skëköl a*

<sup>15</sup> E' dör es, e' ta ¿ima sö ichèmi? Se' kè ku'ia ttè dalöiëno e' dikia. Se' tso' Skëköl er buaë chò se' a e' dikia. E'ma e' kueki ¿ì sulu wamblösö? Au, kè idör es. <sup>16</sup> A' wä ijcher buaë tö yi ttò iütokesö, ese ulà a se' tso' klöulewä wës s'klöulewä kanè mésoie tso' iwökir ulà a es. Es sene sulu ttò iütokesö, e' ta e' ulà a se' tso' klöulewä wës kanè méso es ta e' nuì ki se' duöralur weir michoë. Erë Skëköl ttò iütokesö, e' ta e' ulà a se' tso' ta e' wa se' serdaë yësyësë. <sup>17</sup> A' bak klöulewä sene sulu ulà a wës kanè méso es. Erë wéstela Skëköl a tö i'ñe ta ttè buaë pakane a' a e' iuté a' tö er moki wa. <sup>18</sup> Es a' yülettsatke sene sulu ulà a ta i'ñe ta a' de sene yësyësë e' ulà a. <sup>19</sup> (A' iä katötö Skëköl ttè a, e' kueki ttè i' kleekeyö a' a kanè méso ttè wa.) Kenet a' e' me'ttsa e' ia'ukka sene sulusi wa ena ì sulu è kí wamblök. Erë e' sù i'ñe ta a' e' múttsa senuk yësyësë as a' ser batse'r.

<sup>20</sup> Mik a' bakia klöulewä sene sulu ulà a, etä kè a' tkine sene yësyësë ki. <sup>21</sup> E' wa ¿ì bua' dè' a' ulà a? E' ulà a a' mine duökulur weir michoë. I'ñe ta ì sulu wamblè' a' tö ese tö a' jaëwéne. <sup>22</sup> Erë a' yënettsa sene sulu ulà a. A' de Skëköl kanè mésopaie. E' ulà a a' serke

batse'r, e' bata dör sene michoë. <sup>23</sup> Ì sulu wamblekesö ese skéie s'duörawa. Erë wépa batsulewa Skékëpa Cristo Jesús mik, esepa a sene michoë meraë Skéköl tö éme.

## 7

*Se' du'ulur ttè dalöiëno yöki*

<sup>1</sup> A yamipa, Moisés ttè dalöiëno, e' sulu buaë a' wa. A' wa ijcher tö ttè e' dikia s'tso', s'tso'ia ttsë'ka e' dalewa. <sup>2</sup> E' dör wes alaköl senewabak es. Ese kè kawöta iwëm ökwa iwëm tso'ia ttsë'ka e' dalewa. Erë mik iwëm blënewa, eta e' tté olone ie' ki. <sup>3</sup> Alaköl ese sené wëm o'ka ta iwëm chökke tso'ia ttsë'ka e' dalewa, e' ta ttè e' dalösewéwaitö. Erë iwëm chökke blënewa, e' ta ie' kè ku'ia ttè e' dikia. Ie' a serwamine buaë wëm skà ta, e' kè dör trë.

<sup>4</sup> A yamipa, es idör se' a ñies. Se' batsulewa Cristo mik, e' kuëki se' du'ulur ie' ta ttè dalöiëno e' yöki. Ñies se' shkenekane ie' ta as se' ser wes Skéköl wa iwër buaë es.

<sup>5</sup> Mik se' bak senuk s'wák dër sulu e' dikia, eta ttè dalöiëno tö se' wörieikeke ì sulu kí wamblök. E' ulà a se' mine duökukur. <sup>6</sup> Se' bak klöulewa ttè dalöiëno e' dikia, erë i'ñe ta se' durulune ttè e' yöki. Se' yënettsa ttè e' ulà a as se' kanablö Skéköl a ku'a'ki sene pa'ali mé iWiköl tö se' a e' wa. E' kè dör wes se' bak kanablök ie' a ttè dalöiëno kitule yëkkü ki e' iütè wa es.

*Sene sulu ta ñippök*

<sup>7</sup> Es idir, e'ma jima sö ichèmi? Moisés ttè dalöiëno kitule je' dör suluë? Au, kè idör es. Ttè e' kè kunúpa, e'ma ye' kè wa ijcher tö ì dör suluë. Ttè e' kè tö ichópa: “Kè a' kawö ta' o'ka íyi kkechök,” e'ma ye' kè wa ijcher tö e' dör suluë. <sup>8</sup> Erë ttè dalöiëno kè kunúpa, e'ma sene sulu kè diché ta'. E' kuëki ttè dalöiëno e' wa sene sulu tö ye' erkiöwéka ì sulu tsakië wamblök. <sup>9</sup> Ká iaiaë kam ye' wa ttè dalöiëno jcherwa, e' yöki ye' ttsë'ne' buaë. Erë mik ye' wa ttè e' jchenewa, eta sene sulu tso' ye' a e' diché iëne ta ye' éna ianewa tö ye' dör ì sulu wamblökwak <sup>10-11</sup> kichatëuletsa. Ttè dalöiëno batamik sene sulu tö ye' kitö'wé as ì sulu wamblöyö, ese tö ye' kichatéttsa. Es ttè e' tö warma sene michoë mèmi ye' a, e' skéie ye' kichatéttsaitö.

<sup>12</sup> Es Moisés ttè dalöiëno e' dör buaë, e' dör yësyësë, e' dör batse'r. <sup>13</sup> Eta je' yëne tö ttè buaë e' tö ye' kichatéttsa? Au, kè idör es. Ttè buaë e' batamik, ì sulu wamblekeyö, ese tö ye' kichatéttsa. Ttè dalöiëno e' tö se' a ikkacheke mokië tö ì sulu wamblekesö, ese dör suluë ichök. Es ttè dalöiëno dör buaë, e' wa sö isuëmi tö mokië ì sulu wamblekesö ese dör sulu éme.

<sup>14</sup> Se' wa ijcher tö ttè dalöiëno e' dör Skéköl wák ttè. Erë ye' dör siarë kè diché ta' klöulewa sene sulu ulà a ikanè mésoie. <sup>15</sup> Ì wamblekeyö ese kè ane ye' wák éna. Ì buaë wak ye' éna ese kè wèyö. Erë ì ar suluë ye' éna, ese wamblekeyö. <sup>16</sup> Ì kè wamblak ye' éna ese wambléyö, e' ta e' wa ye' icheke tö ttè dalöiëno e' dör buaë. <sup>17-18</sup> Ì buaë wak ye' éna, ese kè or ye' a, e' wa ye' wa ijcher tö ì dör buaë e' kè ku' ye' er a. Sö ichöma kè ì bua' ku' ye' wák dër sulu e' a. Es idir e' kuëki ye' kè tö ì sulu wamblaku' ye' wák er wa. Sene sulu tso' ye' er a, e' tö ye' ké iwamblök. <sup>19</sup> Ì buaë wak ye' éna, ese kè wèyö. Ñies ì sulu kè wamblak ye' éna, ese wamblekeyö. <sup>20</sup> Es ì sulu kè wamblak ye' éna, ese wambléyö, e' ta e' kè dör tö ye' tö iwambleke ye' wák er wa. E' dör tö sene sulu tso' ye' éna, e' tö ye' keke iwamblök.

<sup>21</sup> Es ye' éna iane tö eré ì buaë wak ye' éna erë ye' a sene sulu tkër. <sup>22</sup> Ttè dalöiëno me'at Skéköl tö, e' wa ye' wöbatsö taië. <sup>23</sup> Erë ilè skà tso' ye' a, e' ttséyö tö e' tso' ì buaë wak ye' éna ese wöklö'uk. E' dör sene sulu tso' ye' er a e', e' ulà a ye' tso' klöulewa.

<sup>24</sup> Ye' dör siarëla. Ì sulu tso' ye' er a, e' tö ye' kichatéttsa. E' yöki jyi tö ye' tsatkëmi?  
<sup>25</sup> Skéköl tö ye' tsatké Skékëpa Jesucristo batamik. E' kuëki wéstela chéyö ia.

Es ye' éna ttè dalöiëno me'at Skëköl tö e' è iütak. Erë ye' wák dër suluë, e' tö ye' ké ì sulu wamblök.

## 8

*Se' sermi buaë yësyësë Skëköl Wiköl wa*

<sup>1-2</sup> Cristo Jesús batamik Skëköl Wiköl tö sene michoë meke se' a, e' tö ye' yéttsa sene sulu ena duëwä e' ulä a. E' kuëki i'ñe ta wépa batsulewä Cristo Jesús mik, esepa kè kichatëpa Skëköl tö yës. <sup>3</sup> Ì kè onuk Moisés ttè dalöiëno a, e' wé Skëköl tö. Se' wák dër sulu e' kè tö se' kè ttè dalöiëno iütök buaë, e' kuëki e' kè a se' tsatkënuke. Erë Skëköl tö iwák alä patkë'bitu s'ditsöie ttëwä se' skéie se' nuì patuöie. Es ie' tö sene sulu tso' se' er a e' kichatë'ttsa. <sup>4</sup> E' wé ie' tö as se' klö'uitö wës pë' buaë yësyësë es wës ttè dalöiëno yësyësë e' tö se' a ikië es. Se' klöne es, esepa serke wës Skëköl Wiköl kî ikiane es. Ie'pa kè serku'ia wës s'wák dër sulu kî ikiane es.

<sup>5</sup> Wépa serke wës s'wák dër sulu kî ikiane es, esepa er me'rie ì kiane e' kî ese è kî. Erë wépa serke wës Skëköl Wiköl kî ikiane es, esepa er me'rie ì kiane e' kî ese è kî. <sup>6</sup> Ì kiane s'wák dër sulu kî, ese kî se' er me'rie, e' ta e' bata dör se' duöwä. Erë se' er me'rie ì kiane Skëköl Wiköl kî, ese kî, e' ta e' bata dör sene michoë, ñies sene bèrë Skëköl ta e'. <sup>7</sup> Erë wépa er me'rie ì kiane s'wák dër sulu kî, ese kî, esepa kè tö Skëköl ttè dalöiëno e' dalöië, mokî ie'pa kè a idalöier. E' kuëki ie'pa dör Skëköl bolökpa. <sup>8</sup> Wépa serke wës s'wák dër sulu kî ikiane es, esepa kè a ì onuk wër buaë Skëköl wa.

<sup>9</sup> Erë Skëköl Wiköl tso' se' a, e' ta se' kè ku'ia s'wák dër sulu ulä a. E' skéie se' tso' Skëköl Wiköl ulä a. Yi kè a Cristo Wiköl ku', ese kè dör ie' icha. <sup>10</sup> Erë Skëköl tö se' klö'wé wës pë' buaë yësyësë es, e' kuëki Cristo tso' se' a. E' dör es, e' ta eré s'chkà nurdawä se' nuì kuëki, erë se' wiköl ser michoë. <sup>11</sup> Skëköl tö Cristo Jesús shke'kane, e' Wiköl tso' se' a, e' ta aishkuö ta ie' tö se' nu shke'werakä iWiköl tso' se' a e' wa.

<sup>12</sup> A yamipa, e' kuëki kè se' kàne senukiä wës s'wák dër sulu kî ikiane es. <sup>13</sup> Se' serke es, e' ta se' duörawä. Erë se' e' aléka iki Skëköl Wiköl wa, e' ta se' ser michoë.

<sup>14</sup> Wépa wëttsëke Skëköl Wiköl tö, esepa dör Skëköl ala'r. <sup>15</sup> Skëköl kè wä iWiköl mène se' a se' klö'wöwä kësik wa as se' suarne. E' skéie iWiköl wa se' de ie' ala'rie. Ie' Wiköl wa ie' a ichëmisö: “A yéwöla.” <sup>16</sup> Ñies ie' Wiköl tö se' ké ittsök se' er a tö se' dör ie' ala'r. <sup>17</sup> Es se' dör ie' ala'r. Se' weirke Cristo ta ñita, e' je' ta ñies se' kirdawä buaë ie' ta ñita ie' olo ta' taië e' ska'. Aishkuö ta ì kos tso' blëule Skëköl wä mè se' a, e' döraë se' ulä a Cristo ta ñita.

*Ì tso' se' a aishkuö ta e' dör buaë chökle*

<sup>18</sup> Ye' a ta ie' olo taië e' a se' dörañak aishkuö ta, e' dör buaë shutë. E' o'mik ta se' weirke kos ká i' kî e' kè dör ì. <sup>19</sup> Aishkuö ta ikkayërdaë wöshaë tö se' dör Skëköl ala'r. E' kèwö paneke kröröë íyi ulitane yö'at Skëköl tö ese tö. <sup>20</sup> Íyi ulitane yö'at Skëköl tö ese kos sulunewä. Ì kos yöule e' kè wák e' suluonewä. Erë Skëköl wák tö iwöme'ttsa es. Erë ibua'wëneraëitö aishkuö ta. <sup>21</sup> Ie' wák tö iyë'at: “Aishkuö ta íyi kos yö'at ye' tö e' yerattsaneyö iweirke taië e' ulä a as itsatkënar ena ilókarka taië ye' olo wa ye' ala'r ta ñita.” E' kuëki íyi ulitane yö'atitö e' tso' kawö e' panuk kröröë. <sup>22</sup> Se' wä ijcher tö dò ikkë ta íyi ulitane yö'atitö e' rrerkeiä ena iweirkeiä wës alaköl alä kurketke weir es. <sup>23</sup> Erë kè e' è rrerku' kawö e' panuk. Ñies se' a Skëköl Wiköl menetke wës íyi tsá kakkè sia es, e'pa rrerkeiä kawö e' panekesö e' dalewa. E' kèwö ska' ta Skëköl tö se' tseratkö da'a ila'rie, ta se' chkà mane'werattsaneitö buaë kè duöta'wäia. <sup>24</sup> Se' tsatkëne erë se' tsatkërkette da'aie e' panekesö. Ì tso'tke s'wä ese kè paneku'sö. E' kuëki mik se' tö iché tö e' kèwö panekesö, etä e' wä kiane chë tö kam sö isaü. <sup>25</sup> Erë ì kam saüsö ese panekesö, e' ta se' kawöta ipanuk bèrë s'weirke kos e' dalë'ttsè wa.

<sup>26</sup> Es ñies se' kè diché ta', e' kueki Skëköl Wiköl tö se' kimeke. Kè se' wöblar buaë ttök Skëköl ta' wes se' ké ttök ita' es. Erë ie' wák Wiköl tso' se' tté chök ie' a taië kköchè wa ena ttè kè yër sia' ese wa. <sup>27</sup> Ie' wa se' er suule buaë. Ie' Wiköl tö ikieke ie' ichapa batse'r ki wes ie' ki ikiane es. E' kueki i' cheke i'Wiköl tö ie' a e' ane buaë ie' éna.

*Se' e' aléka íyi ulitane ki Cristo batamik*

<sup>28</sup> Se' wa ijcher tö wépa éna Skëköl dalër, ñies iklö'bakitö wes ie' wák tö ibikeitsbak es, esepa ta' i' kos tköke, e' a ie' ulà ter ie'pa kimoie as idöttsa buaë wes ie' ki kiane es. <sup>29</sup> Wépa shukitbakitö e'pa bikeitsbakitö tö idöraë wes ie' Alà es as ie' Alà dò ie'pa taië e' shua wes ikok es. <sup>30</sup> Wépa bikeitsbakitö e'pa kiéitö ñies. Wépa kiéitö e'pa klö'wéitö wes pé' buaë yësyësë es. Wépa klö'wéitö es, esepa döraë ie' ta' ñita' ilo taië e' a.

<sup>31</sup> E' dör es, e' ta' kè i' kianeia' chë. Skëköl tso' se' ta, e' ta' i' e' alömika se' ki? <sup>32</sup> Ie' kè wa iwák Alà kkëone, e' me'ttsaitö ttèwa se' ulitane skéie je' yita' i' kos meraéitö se' a ilà ta' ñita! <sup>33</sup> i' Yi tö wépa shukitbak Skëköl tö esepa kkatëmi? Kè yi. Ie' wák tö ie'pa klö'wétke wes pé' buaë yësyësë es. <sup>34</sup> i' Yi a ie'pa kichatërmi? Kè yi. Cristo Jesús kötwa se' skéie, e' kíie ta' ishkenekane tkër Skëköl ulà bua'kka se' tté chök. <sup>35</sup> i' I' tö se' yëttsami Cristo éna se' dalër taië e' ulà a? i' Se' weir taië alè? i' I' darërëe alè? i' Se' weir Jesús tté batamik alè? i' Se' duöke bli wa alè? i' Kè se' datsi' ta' alè? i' Ilè tkò se' ta' alè? i' S'ttèwa alè? Au. Kè i' a se' yèrpattsa ie' ulà a. <sup>36</sup> E' dör wes Skëköl yëkkuö tö ichè es, e' tö ichè: Be' dalërmik wëkkë alè ta' sa' tterawa pé' tö.

Sa' sueke ie'pa dör wes obeja tsëmi ttèwa es.\*

Es Skëköl yëkkuö tö ichè.

<sup>37</sup> Erë e' shua se' dör e' alökwakpa tsata, Cristo éna se' dalër taië e' batamik. <sup>38</sup> E' kueki ye' wa ijcher buaë tö kè i' tö se' yepattsa Skëköl éna se' dalër taië e' ulà a. Duewa, sene, ie' biyöchökwakpa, íyi wökir kè wërta'wa, i' tköke se' ta' i' ñe ta, i' tkömi se' ta' aishkuö ta, i' skà tso' diché ta', <sup>39</sup> i' kos tso' ká ja' a, i' kos tso' ká diöshet, ekkë kos ena i' skà yö'atitö, e' kos kè a se' yèrpattsa ie' éna se' dalër taië e' ulà a. Ie' éna se' dalër taië, e' kkachéitö se' a Skëképa Cristo Jesús e' wa.

## 9

*Skëköl tö Israel aleripa shukitbak ie' ala'rie*

<sup>1</sup> I' cheke ye' tö a' a e' dör mokië. Ye' dör Cristo icha, kè ye' kachò. Ñies Wiköl Batse'r wa ye' er tö ye' a' icheke tö e' dör mokië. <sup>2-3</sup> Moki ye' chkenewa siarë, taië ye' eriarke kekraë ye' wák ditséwöpa kueki. Ye' wák mú kichaté Skëköl tö yëttsa Cristo ulà a as ie'pa tsatkër ye' skéie. <sup>4</sup> E'pa dör Israel aleripa. Ká iaiaë Skëköl tö ie'pa tse'tkö ie' ala'rie. Ie'pa a ie' tö ilo taië e' kkayë'. Ie' ena ie'pa ttè me' ñi a tsakië ñies ittè dalöiëno e' me'itö ie'pa a. Wes íyi wakanewë ie' dalöioie e' wa ie'pa wöbla'itö. Ñies ie' kablë' ie'pa a er buaë chök. <sup>5</sup> Ie'pa dör sa' yépa bak ká iaiaë dalöiërta' taië, e'pa aleripa. Ñies wé pairine'bitü idi' wa s'blúie e' kune' ie'pa ditséwö wa, e' dör Skëköl dör íyi ulitane tsata kíkärkeka' kekraë e'. Es e' idir.

<sup>6</sup> Kè ye' ku' ichök tö Skëköl kablë' er buaë chök ie'pa a e' kè wà bak. E' kè dör es. E' dör tö kè ie'pa sera' dör Israel aleripa chökle Skëköl a. <sup>7</sup> Ñies Abraham aleripa, e'pa kibiiepa kè dör ie' aleripa chökle Skëköl a. Skëköl tö iyë' ie' a: "Be' aleripa chökle, e'pa döraë Isaac wa."\* <sup>8</sup> E' wà kiane chë tö kè yi dör Skëköl ala'r s'ditséwö wa. E' skéie wépa tö i' uk Skëköl kablë' e' klö'wé wes Abraham tö iklö'wé es, esepa è dör Abraham aleripa chökle Skëköl a. <sup>9</sup> Skëköl kablë' ie' a ttè i' wa: "Kawö ikké ta' duas iëk ye' dörane ta' be' alaköl Sara alà ta'tke."† E' klö'wé Abraham tö.

\* 8:36 Salmo 44.22 \* 9:7 Génesis 21.12 † 9:9 Génesis 18.10,14



<sup>10</sup> Erë kè dör e' è. Sara alà kune' ñe' dör sa' yé bak ká iaiäe kiè Isaac e'. Ie' alà ka'ka itayë Rebeca ta' e'pa dör klò wakpa wëm. <sup>11-13</sup> Erë kam ie'pa kur, kam ie'pa tò ì buaë ù ò ì sulu wamblò, e' yökì Skèköl tò iyè' Rebeca a: “Ikibi ék döraë itsirla kanè mésoie.”<sup>‡</sup> E' dör wes iskà tso' kitule Skèköl yèkkuò kì es, e' kì ie' tò ichè: “Jacob dalène ye' éna, erë Esau watéttsayö.”<sup>§</sup> Es iatetke tò wéne shushtak ie' wák éna, ese shushtéitò as iwà döttsa wes ie' kì ikiane es. Kè dör ì wésö ese kuekì.

<sup>14</sup> Es idir, e' ta' çsò ichèmi tò Skèköl kè dör yësyësë? Au, kè idör es. <sup>15</sup> Ie' tò iyè' Moisés a: “Wé a ye' er buaë chak, ese a ye' er buaë chöraë. Ñies wé suak ye' éna er siarë wa, ese suerayö er siarë wa.”<sup>\*</sup> <sup>16</sup> E' kuekì ie' kè er buaë chò se' a, se' kì ikiane ò ì wèkesö e' kuekì. Erë wépa suëke ie' tò er siarë wa, esepa a ie' er buaë chöraë. <sup>17</sup> E' dör wes itso' kitule Skèköl yèkkuò kì es. E' kì Skèköl tò iché Egipto blú a: “Ye' tò be' tkéka ká i' blúie, e' wà ta' ye' wa. E' dör ye' diché kkachoie be' wa as yi dör ye' e' tté pakar ká wa'ñe.”<sup>†</sup> <sup>18</sup> Es yi suak Skèköl éna er siarë wa, ese sueraëitò er siarë wa. Ñies yi er darë'wakwa ie' éna, ese er darë'werawa ie' tò.

<sup>19</sup> Erë isalema a' wele tò ye' a ichèmi: “Mokì tò ì kiane wè Skèköl kì ese kè wöklönuk yi a çwes ie' tò se' chakèmi se' nuì kì?” <sup>20</sup> Erë ye' iütèmi: A wëm çima be' erbikò be' dör yi, e' tò Skèköl iütè er sulu wa? Skaü kè tò ichepa iyuökwak a: “çì kuekì be' tò ye' yué i' es?” <sup>21</sup> Skaü yuökwak e' a iyörmi wes ie' éna iyuak es. Skaüchka e' è yörmi skaü bua'buaié ena skaü éseie ñies.

<sup>22</sup> Es ñies Skèköl tò iwèmi wes ie' kì ikiane es. Ie' éna ie' kësik ena ie' diché kkachak ì sulu wamblökwakpa wömeuletsa weinuk esepa ewèwa wa, e' ta' e' wèmi ie' tò. Erë e'pa kos dalè'ttsekeia ie' tò bèrè énaë <sup>23</sup> as ie' olo taië shutëë e' kkachòitò se' shukitbakitò e'pa a. Ká iaiäe ie' tò se' shukitbak suè er siarë wa ñies se' klöo'bakitò as se' dö ie' ska' olo ta' taië ie' ta' ñita. <sup>24</sup> Es judiowak ena pè' kè dör judiowak, e'pa shua ie' tò se' klöo'bak ie' wák a. <sup>25</sup> E' dör wes Oseas tò ikit iyèkkuò kì es. E' kì Skèköl tò ichè:

“Wépa kè dör ye' icha, esepa kieraëyö ye' icha.

Wépa kè dalër ye' éna, esepa a icheraëyö: ‘ye' éna a' dalër.’<sup>‡</sup>

<sup>26</sup> Ñies ká wé kì ye' tò iyè': ‘a' kè dör ye' icha’

ká e' è kì ye' icherane: ‘Ye' dör Skèköl chók e' ala'r a' dör.’”<sup>§</sup>

<sup>27-28</sup> Isaías tò Israel aleripa yè' i' es:

“Ká wa'ñe wépa wömeuletsa kichatënik

e' wakaneweraë Skèköl tò bet kè wötkënik yës.

E' kuekì eré Israel aleripa dör taië wes dayë tséwö es,

erë ie'pa welepa è tsatkërdaë, kè dör taië.”<sup>\*</sup>

<sup>29</sup> E' dör wes Isaías tò iyè' es. Ie' iché:

“Skèköl diché ta' iyi ulitane tsata, e' kè tò se' aleripa múpaat,

e'ma se' enewa seraä wes Sodoma ena Gomorra wakpa enewa es.”<sup>†</sup>

### *Jesús tté buaë e' dör Israel aleripa a ñies*

<sup>30</sup> Es sö isué tò pè' kè dör Israel aleripa, kè ku' sene yësyësë e' yulök, esepa klö'wé Skèköl tò wes pè' buaë yësyësë es ie'pa erblé Jesús mik e' wa. <sup>31</sup> E' skéie Israel aleripa kì ikiane tò Skèköl tò ie'pa klö'wè wes pè' buaë yësyësë es tté dalöiëno e' dalöiè wa, erë e' kè ska' ie'pa ulà dè'. <sup>32</sup> çì kuekì e' kè dè' ie'pa ulà a? Ie'pa kè erbléne Jesús mik e' kuekì. Ie'pa erblé ì buaë wëkerakitò e' mik. E' kuekì ie'pa tëne Jesús mik wes s'klastkër ák mik es. <sup>33</sup> E' dör wes itso' kitule Skèköl yèkkuò kì es, e' tò ichè:

“Ye' ttò ttsó. Ák tké'atyö et Sión,

e' mik pè' klastkërdaë, ák e' tò ie'pa eröraë iski.

‡ 9:11-13 Génesis 25.23 § 9:11-13 Malaquías 1.2-3 \* 9:15 Éxodo 33.19 † 9:17 Éxodo 9.16 ‡ 9:25 Oseas 2.23 § 9:26 Oseas 1.10 \* 9:27-28 Isaías 10.22-23 † 9:29 Isaías 1.9



Erë wépa erblé ák e' mik, esepa kè eriarpa.”‡  
Es Skèköl yèkkuö tö ichè. Ák e' tö Jesús chè.

## 10

<sup>1</sup> A yamipa, Israel aleripa mú tsatkër e' kkechekeyö tajë ye' er a, e' kiekeyö Skèköl a.  
<sup>2</sup> Ye' ichè tö moki ie'pa kanerlak darërë Skèköl a. Erë ie' ttè mokië e' wà kè ane ie'pa éna buaë. <sup>3</sup> Ie'pa kè éna iane tö ie' tö s'klö'weke wes pë' buaë yësyësë es s'erblé Jesús mik e' wa. Ttè e' watéttsa ie'pa tö. Ie'pa atak buaë yësyësë ie' wöa ie'pa serke es e' wa. <sup>4</sup> Erë Moisés ttè dalöiëno e' wà dör Cristo kkachè. E' kueki mik ie' de, etä ttè e' wà de. E' kueki wépa erblé ie' mik esepa ulitane klö'weraë Skèköl tö wes pë' buaë yësyësë es.

<sup>5</sup> Se' wër yësyësë Skèköl wa sene yësyësë wa, e' yë' Moisés tö i' es: “Yi tö ttè dalöiëno e' dalöié yësyësë sëraa, ese sër michoë ttè e' wa.”\* <sup>6</sup> Erë se' wër yësyësë Skèköl wa se' erblé Jesús mik, e' yë' Moisés tö i' es: “Kè a' tö ibikeitsar tö ¿yi mi'mi ká jai a?” —E' dör wes se' mú mi' Cristo yulök as ibitune ká i' ki.— <sup>7</sup> “Ñies ¿yi mi'mi ká dià kaska?” —E' dör wes se' mú mi' Cristo yulök as ishkerkane s'duulewä tso' esepa shua.— <sup>8</sup> Erë ttè e' tö ichè: “Ttè buaë e' tso' tsinet se' ska' ena se' kkò a ena se' er a.”† Ttè buaë e' dör as a' erblö Jesús mik, e' ttè pakeke sa' tö. <sup>9-10</sup> Se' er a ttè e' klö'wésö as Skèköl tö se' klö'ù wes pë' buaë yësyësë es. Ñies s'wák kkò wa ichésö tö Jesús dör Skèképa eköl è e' as se' tsatkër. E' kueki iché a' tö a' wák kkò wa tö Jesús dör Skèképa eköl è e', ñies iklö'wé a' tö a' er a tö Skèköl tö ishkeo'kane, e' ta a' tsatkërdaë.

<sup>11</sup> Skèköl yèkkuö tö ichè: “Yi erblé ie' mik esepa kè eriarpa.”‡ <sup>12</sup> Skèképa ñe' è dör sulitane Kèköl. Judiowak ena wépa kè dör judiowak, esepa kos Kèköl ie' dör. E' kueki ie'pa dör ñikkëe ie' wöa. Wépa kköchöke ie' a as ie'pa tsatkòitö, esepa a ie' er buaë chò tajë. <sup>13</sup> E' dör wes Skèköl yèkkuö tö ichè es, e' tö ichè: “Yi kos tö e' tsatkè kié Skèköl a, esepa ulitane tsatkërdaë.”§ <sup>14</sup> Erë kè s'erblène ie' mik, e' ta ¿wes s'kköchömi ie' a? Ñies kè s'wä ie' ttè ttsëule, e' ta ¿wes s'erblömi ie' mik? Ñies kè yi wä ie' ttè pakane sia, e' ta ¿wes ittsemisö? <sup>15</sup> Ñies ie' ttè pakökwakpa kè patkëne yi wä, e' ta ¿wes e'pa dòmi ie' ttè pakök sia? E' dör wes Skèköl yèkkuö tö ichè es, e' tö ichè: “Wépa wä ttè buaë datse sia, esepa de e' dör buaë shute.”\*

<sup>16</sup> Erë kè sulitane wä ttè buaë e' klöne. Es Isaías tö iyë'bak: “A Skèköl, ttè paka' sa' tö wësua kè yi wä e' klöne.”† <sup>17</sup> Es sö isuë tö se' erblé Skèköl mik, e' datse ie' ttè ttsésö, e' wa. Ttè e' dör Cristo ttè.

<sup>18</sup> Erë ye' ichakè: ¿A' ichè, kè iwarak ttè e' ttsëule? Erë ye' e' iütöne tö, ie'pa wä ittseule je'. E' dör wes Skèköl yèkkuö tö ichè es wé ichèitö:

“Skèköl ttè pakökwakpa, e'pa tka ká wa'ñe,

Ttè i' de dò wé ká i' erkerö ee.”‡

Es Skèköl yèkkuö tö ichè.

<sup>19</sup> Ye' iskà chakène: ¿A' ichè Israel aleripa kam éna iwà ar? E' iütë' Moisés tö mik ie' tö iyë' ie'pa a tö Skèköl tö iyë' i' es:

“Ye' tö a' keraë sbinukka pë' kè dör ì, esepa wa.

Ye' tö a' keraë ulunukka pë' kè éna ì ane, esepa ki.”§

<sup>20</sup> E' ukuöki ta Isaías diché dë'ka ichök tö Skèköl tö pë' kè dör Israel aleripa esepa yë' i' es:

“Wépa kè ku' ye' payulök, esepa tö ye' kué.

Wépa kè ku' ye' chakök, esepa a ye' e' kkaché.”\*

<sup>21</sup> Ñies Isaías tö iskà yë' tö Skèköl tö Israel aleripa yë' i' es:

“Ie'pa tö ye' ttò dalösewéwä ñippöke ye' ta,

‡ 9:33 Isaías 8.14; 28.16 \* 10:5 Levítico 18.5 † 10:8 Deuteronomio 30.14 ‡ 10:11 Isaías 28.16 § 10:13 Joel 2.32 \* 10:15 Isaías 52.7 † 10:16 Isaías 53.1 ‡ 10:18 Salmo 19.4 § 10:19 Deuteronomio 32.21 \* 10:20 Isaías 65.1

ešepa a kekraë ye' tö ikimè watkè.”†  
Es Skëköl yëkkuö tö ichè.

## 11

### *Skëköl er buaë chöraë Israel aleripa a*

<sup>1</sup> I' ta ye' ichakè: ¿A' ichè, Israel aleripa watéttsa Skëköl tö seraa? Au, kè idör es. Ye' wák dör Israel aleri eköl. Ye' dör Abraham aleri eköl Benjamín ditséwö wa. <sup>2</sup> Kuaë Skëköl tö Israel aleripa shukitbak iwák ichaie. Kè ie'pa watëulettsa ie' wa. Elías tté tso' kitule Skëköl yëkkuö kī wé Israel aleripa kkatè'kaitö Skëköl a, ¿e' kè jcher a' wa? Ie' iché Skëköl a: <sup>3</sup> “A Skëköl, ie'pa tö be' ttekölpa malepa kos ttélur. Nies ka' tso' íyi moka be' a, e' kos tkéttsarakitö. Ye' è atéat ttsé'ka erë ye' ttakwa ie'pa éna ñies.”\* <sup>4</sup> Erë Skëköl tö ie' iüté: “Wëpa dökā mil kuryök (7.000) e'pa kè e' tkëulewa kuchë kī Baal dalöioie ekkëpa tso'ia ye' wa.”† <sup>5</sup> Es ñies i'ñe ta Israel aleripa tso' taië, erë e' shua wëpa a Skëköl er buaë yë' ta ishukititö, ešepa kè dör taië. <sup>6</sup> Ie'pa shukititö ie' er buaë ché ie'pa a e' kueki, e' ta e' wà kiane ché tö e' kè dör i buaë wé ie'pa tö e' kueki. Ichópa es, e'ma kè ie' er bua' yëne.

<sup>7</sup> E' kueki sö isué tö Israel aleripa bak tsatkè yulök, e' kè dè' ie'pa ulitane ulà a. Erë ie'pa welepa shukit Skëköl tö, e'pa ulà a ide, erë imalepa er darërulune. <sup>8</sup> E' dör wës Skëköl yëkkuö tö ichè es. E' ichè: “Skëköl tö ie'pa ké er chöukwa ie' ska'. E' dör wës ie'pa wöbla ta', erë kè iwawër es. E' dör wës ie'pa kuköña ta' erë kè iwattsër. Dò i'ñe ta' ie'pa dör es.”‡  
<sup>9</sup> Es ñies David tö ie'pa yë' i' es:

“Mik ie'pa tso' kawö tkö'uk kaneë, eta as eë ibolökpa tö iklö'ùwa kësik wa as ie'pa klastkër ta' iweirdak.

<sup>10</sup> Iwöbla mú kè wawëria.

Itsiwö mú körwa dalì ekkeë dikia kekraë.”§

### *Pë' kè dör Israel aleripa ešepa tsatkërdaë*

<sup>11</sup> I' ta ye' ichakè: A' ichè Israel aleripa tö Jesús waté'ttsa ¿e' wà kiane ché tö ie'pa kè tsatkërpa? Au, e' kè dör es. E' skéie i' sulu wamblé ie'pa tö ñe' batamik pë' malepa tsatkërmi. E' tka es as ie'pa sibirka pë' malepa kī ta ierkindak erblök Jesús mik. <sup>12</sup> I' sulu wamblé' ie'pa tö, e' batamik pë' malepa a Skëköl er buaë ché taië ká wa'ñe. E' yita buaë sulitane a ie' er buaë kī chöraë taië shute mik judiowak taië erblé Jesús mik eta.

<sup>13</sup> Erë a' kè dör judiowak, ešepa a ye' tö ilè cheke. Skëköl tö ye' a kanè i' me' Jesús ttekölíe pë' kè dör judiowak ešepa a ttè pakök. Kanè e' dalër taië ye' éna. <sup>14</sup> Isalema kanè e' wa ye' tö ye' wák ditséwöpa welepa mú ukyëwëka ta' ie'pa ñies erblömi Jesús mik as itsatkër. <sup>15</sup> Ie'pa watéttsa Skëköl tö e' batamik ie' ena ká wa'ñe wakpa malepa er buarmine ñi kī. E' yita mik ie' tö ie'pa skà kiéwane buaë, eta e' dör buaë shute. E' dör buaë wës s'duulewa e' shkenekane es. <sup>16</sup> Harinachka tsá meule Skëköl a\* e' dör batse'r, e' ta iëyök dör batse'r ñies. Nies kal wikicha dör batse'r, e' ta kal e' kos dör batse'r ñies. Es judiowak yépa tsá dör Skëköl icha, e' kueki ileripa dör ie' icha ñies.

<sup>17</sup> Skëköl tö judiowak watéttsa, e' dör wës kal uru kiè olivo e' ulà téé es. Pë' kè dör judiowak ešepa dör wës olivo klò kañiru ulà tkéwa olivo uru ulà tēule ese skéie es. E' batamik i'ñe ta' a' serke buaë olivo klò uru e' wì mik. <sup>18</sup> E' kueki olivo uru ulà tēule, e' kè kī a' e' ttsökka. Erë a' e' ttsakka, e' ta a' éna ianú tö ulà serke iwí mik; iwí kè serku' iulà mik.

<sup>19</sup> Isalema a' ichèmi: “E' yëne erë iulà uru tērolone as sa' tkërwane iskéie.” <sup>20</sup> E' yëne erë ie'pa tērolone ie'pa kè erblène Jesús mik e' kueki. Erë a' erblé Jesús mik, e' è kueki

† 10:21 Isaías 65.2 \* 11:3 1 Reyes 19.10,14 † 11:4 1 Reyes 19.18 ‡ 11:8 Deuteronomio 29.4; Isaías 29.10

§ 11:10 Salmo 69.22-23 \* 11:16 Harinachka tsá meule Skëköl a: Pablo tso' ichök tö judiowak dör wës harinachka es. Harinachka tsá e' dör wës judiowak yépa tsá Abraham ena Isaac ena Jacob es. Harinachka iëyök e' dör wës ileripa datse itöki es.

a' tkëulewà olivo klò uru mik. E' kueki kè a' e' ttsökka. Warma a' kawötà Skëköl dalöiök. <sup>21</sup> Ie' kè wà kal chók e' ulà meneat, e' yitá kè ie' tó a' mepaat. <sup>22</sup> A' éna íanú tó wés Skëköl dör. Ie' er buaë chòmi se' a, erë ñies ie' a s'kichatërmi. Wépa anemi ì sulu a, esepa kichaterattsaitö. Erë ie' er buaë ché a' a. A' erblökeia ie' mik, e' ma buaë idir. Erë a' kè serku'ia es, e' ta a' tãrdattsá ñies. <sup>23</sup> Judiowak kè erblène Jesús mik. Erë e' kè wamblëia ie' pa tó ta ierblé imik, e' ta Skëköl wà diché tso' ie' pa tkowane iwákpa kéli mik, e' kueki itkërdawarak. <sup>24</sup> E' wà dör i' es: a' kè dör judiowak, e' pa dör wés olivo kañiru ulà tëule tkëulewà olivo uru mik es. Eré e' kè weta'sö es, erë es Skëköl tó iwé a' a. E' yitá buaë judiowak dör wés ulà chók es, esepa tkërwanine buaë iwákpa kéli mik.

### *Israel aleripa tsatkërdaë taië*

<sup>25-26</sup> A yamipa, kenet ta ttè tso' blëule, ese chekeyö a' a. Ye' ki ikiane tó ttè e' jcherwà a' wà as a' kè e' ttsökà tó a' wà íyi jcher Israel aleripa tsatá. Ttè blëule e' dör i': í'ñe ta Israel aleripa kibiiepa er darërulune dò mik pè' malepa shukitbak Skëköl tó e' kos tsatkëne eta. E' ukuöki ta ie' pa kos tsatkërdaë wés Skëköl yëkkuö tó ichè es, e' tó ichè:

“S'tsatkökwa datse Sión,  
e' tó sene sulu kos yerattsá Jacob aleripa shüa.

<sup>27</sup> Ttè e' meraëyö ie' pa a  
mik ie' pa nuì olo'yéyö ie' pa ki eta.”†  
Es Skëköl yëkkuö tó ichè.

<sup>28-29</sup> Mik Skëköl tó s'shushtë er buaë choie sia, eta e' kè mane'wepaitö. Israel aleripa tó Jesús tté buaë watéttsá, e' kueki í'ñe ta ie' pa dör Skëköl bolökpa. Erë ká iaiaë ie' pa yépa bak e' pa shukititö er buaë choie ie' pa a. E' kueki ie' pa aleripa dalërkeia ie' éna. E' tka es ie' pa ta as a' tsatkër. <sup>30-32</sup> Sulitane tó ie' ttè dalösewéwá, e' nuí ulà a se' tso' klöulewá. E' me'atbakitö es as ie' a sulitane sur er siarë wa ñikkëë. E' kueki kenet a' tó ie' dalösewéwá, erë í'ñe ta a' suéitö er siarë wa, ie' pa tó ie' dalösewéwá e' kueki. Es ñies í'ñe ta ie' pa tó ie' dalösewékewá, erë e' dör as a' saùitö er siarë wa, ñies as ie' pa saùneitö er siarë wa.

<sup>33</sup> Skëköl er buaë ché taië shüte se' a. Ie' wà íyi ulitane jcher buaë sulitane tsatá. Ie' kabikeitsò taië iskië. Ì bikeitseke ie' tó ese kè wà pakanuk yi a. Ì wekeitö ese kè anuk yi éna. <sup>34-36</sup> Ì kos e' wì dör ie'. Ì kos tso' ie' batamik. Ì kos tso' ie' wák a. E' kueki Skëköl yëkkuö tó ichè:

“Skëköl erbikò e' kè jcher yi wa.

Kè yi a ie' pautuk.

Kè yi a ì menuk ie' a keweie

as ie' tó iské mune ia.”

¡Skëköl kikökasö kekraë! ¡Es e' idir!

## 12

### *Wés se' kawötá senuk Skëköl ala'rie*

<sup>1</sup> A yamipa, Skëköl er buaë ché se' a taië, e' kueki ye' kköchò a' a tó a' e' múttsá eköl eköl ie' a kekraë wés ì batse'r meule ie' a wër buaë ie' wa es. Es se' tó ie' dalöie e' wakanewëmi mokië. <sup>2</sup> Kè a' senukia wés wépa kè tó ie' dalöie esepa ser es. E' skéie a' erbikè mane'útttsá pa'alí ta e' wa a' sermi buaë yësyësë. Es ì kiane ie' ki ese jchermi buaë a' wà wawë. E' wà dör ì dör buaë, ì wër buaë ie' wa ena ì dör yësyësë ese.

<sup>3</sup> Ie' er buaë ché ye' a, e' kueki ie' tó kanè me' ye' a Jesús ttekölie. E' wa ye' tó a' kos a ichè tó kè a' e' bikeitsökka tkòka kos s'ké e' bikeitsök e' tsatá. E' skéie se' e' bikeitsò yësyësë kos Skëköl tó imé se' a erbloie ie' mik ekkë. <sup>4</sup> E' dör wés se' dör es. Se' wöbla ta', ulà ta' ena s'yese skà tso' taië kuá'ki kuá'ki, erë e' kos wöieulewá ñita s'wák eköl è a. <sup>5</sup> E'

† 11:27 Isafás 59.20-21; 27.9

sù se' erblöke Cristo mik esepa dör tajë kua'ki kua'ki, erë se' kos dör wes wák eköl è es, se' kos batsulewà ie' mik e' wa.

<sup>6</sup> Es Skëköl tö imé se' a kua'ki kua'ki ñi kimoie wes ie' ki ikiane es. E' kueki wépa a iméitö ttoie ittekölie, esepa ttó es, ie'pa erblö Skëköl mik e' wa. <sup>7</sup> Wépa a imé Skëköl tö s'kimoie, esepa tö s'kimú. Wépa a iméitö s'wöbla'woie Skëköl ttè wa, esepa s'wöbla'ú. <sup>8</sup> Wépa a imène s'er diché ioie, esepa tö s'er diché ió. Wépa a imène íyi kakmoie, esepa ikakmú er bua' wa kè dör ì skéie. Wépa a imène s'wëttsöie, esepa s'wëttsú kaneë. Wépa a imène s'malepa suoie er siarë wa, esepa tö iwà ú ttsé'ne buaë wa.

*Jesús mik erblökwakpa ñi dalër*

<sup>9</sup> A' ñi dalëritsó er mokí wa. Sene sulu kos e' watóttsa. E' skéie sene yësyësë kos e' a' senú kekraë. <sup>10</sup> A' ñi dalëritsó wes ñi elpa ñi dalër es. A' ñi dalöió tajë.

<sup>11</sup> Ì kos weke a' tö, e' ú kaneë. Kè a' bikënuK. Skëköl kanè ú ttsé'ne buaë meke iWiköl tö se' a' e' wa.

<sup>12</sup> Ì buaë panekesö, e' kueki a' senú ttsé'ne bua' wa. A' weirke e' dalé'ttsó er bua' wa. A' ttó S'yé ta kekraë.

<sup>13</sup> S'batse'rpa malepa weirke ki ilè kiane, esepa kimú. Yi de a' pakök, ese kiówa er bua' wa.

<sup>14</sup> Wépa tö a' we'ikeke Jesús tté kueki, kè esepa ki alibchök, e' skéie er buaë chó iarak.

<sup>15</sup> Wépa ttsé'rke buaë, esepa ta a' ttsé'nú buaë. Wépa iúke, esepa ta a' iú.

<sup>16</sup> A' senú bèrë ñita. Kè a' e' ttsökka s'malepa tsata. E' skéie a' e' batsó se' èsepala ta buaë. Kè a' e' bikeitsökka tö a' wa íyi jcher tajë.

<sup>17</sup> Yi tö ì sulu wamblé a' ki, e' ta kè iské wamblarne. Ì kos dör buaë yësyësë sulitane a ese ú. <sup>18</sup> A' senú bèrë sulitane ta kos a' dirmi ekkë. <sup>19</sup> A yamipa dalër ye' éna, kè ì sulu ské wamblarne yi ki. E' skéie imúat Skëköl kësik ulà a. Ie' tö ichè iyëkkuö ki i' es: "Ye' è wöki iské wërke wè. Yi tö ì sulu wamblé, e' ské wërayö iki."\* <sup>20</sup> Ñies ichè: "A' bolökpa dué bli wa, e' ta itió. Ie' er sine, e' ta di' mú ia yè. A' iwé es, e' ta ie'pa jaërdaë."† <sup>21</sup> Kè sene sulu kar e' alökka a' ki. E' skéie a' e' alökka sene sulu ki sene yësyësë wa.

## 13

<sup>1</sup> Sulitane kawöta ká wökirpa ttè dalöiök. Skëköl tö kawö me' ie'pa a s'wëttsöie. Itso'rak kos e'pa tkë'ka ie' tö. <sup>2</sup> E' kueki wépa kè tö ie'pa dalöie, esepa ñippöke wépa tkë'ka ie' tö esepa ta. Ese wakpa weirdaë iulà a. <sup>3-4</sup> S'wökirpa kè tkëneka s'ser yësyësë esepa we'ikök as isuardak. Ie'pa dör Skëköl kanè mésopa a' kimoie. Ie'pa tso' s'ser suluë esepa we'ikoie. Esepa je' kawöta suanuk. A' senak kè suar ta' s'wökirpa yöki, e' ta a' senú yësyësë ta ie'pa tö a' kikeraka. Erë wépa serke suluë, esepa je' kawöta suanuk. Kè é ichök ie'pa a kawö mène s'we'ikoie. Ie'pa tso' kaneblök Skëköl a s'ser sulu we'ikoie wes kawö meneat ie'pa a es.

<sup>5</sup> E' kueki se' kawöta ie'pa ttè iütök, e' kè dör as kè itö s'we'ikò e' è kueki. E' dör tö se' er tö se' a icheke tö e' dör buaë yësyësë e' kueki. <sup>6</sup> E' kueki ñies inuköl patauk ie'pa tö se' keke ese patuëkesö. Ie'pa dör Skëköl kanè mésopa kaneblöke ie' a s'wökirpaie. E' dör ie'pa kanè, e' kueki ie'pa patuë e' dör buaë. <sup>7</sup> E' kueki imusö ie'pa a eköl eköl wes s'kawöta imuk es. Ilè kawöta patuë etä ipataú. Wépa kawöta dalöie esepa dalöió.

<sup>8</sup> A' wa nuì tso' kos e' pataú. Erë nuì tso'ia se' ki kekraë, e' dör ñi dalëritsè, e' kè patonuktsa se' a. S'malepa dalëritsekesö, e' ta e' wa ttè dalöiëno me'at Moisés tö e' wa kos dalöiësö. <sup>9</sup> Ttè e' tö ichè: "Kè a' kawö ta' s'senewabak dalöseukwa; kè a' kawö ta' s'ttökwa, kè a' kawö ta' akblök; kè a' kawö ta' o'ka íyi kkechök."\* Ttè e' ena imalepa kos e' wöiënewa ttè etkè a, e' dör i': "A' malepa dalëritsó wes a' wákpa e' dalër es."† <sup>10</sup> S'malepa

\* 12:19 Deuteronomio 32.35 † 12:20 Proverbios 25.21-22 \* 13:9 Éxodo 20.13-17 † 13:9 Levítico 19.18

dalëritsekësö, e' tã kè ì sulu wamblepasö yi tã. Es ttè dalöiëno kôs e' dalöiekesö mokïë yësyësë.

<sup>11</sup> A' senú es. S'tsatkè kèwö kï dewatke tsinet se' erblë' Jesús mik kuaë e' tsatã. E' kèwö a se' tso' i'ñe tã, e' anú a' éna. E' kueki kè a' senukia wës s'kapötër nañewe es. <sup>12</sup> Sene sulu kèwö erkewatke tã se' tsatkeke e' kèwö dökewatke wës kã ñirketke s'ki es. E' kueki kè se' e' wamblöia suluë wës pë' tso'ia stui a e' wamblö es. E' skéie se' senú yësyësë, e' dör wës s'ser kã ñí a es. Se' e' duöser ñippök sene sulu tã wës ñippökwakpa es. <sup>13</sup> Se' senú buaë yësyësë wës s'ser kã ñí a es. Kè se' kàne e' wamblökiã bloblopa es. Kè se' kàne trë nuk, e' ya'uk sulu. Kè se' kàne ñippök. Kè se' kàne ukyë nuk s'malëpa tã. <sup>14</sup> E' skéie a' senú buaë yësyësë wës Skëképa Jesucristo kï kiane es. Kè a' tó ibikeitsök tó wës a' a s'wák dër sulu e' wöpatërmi.

## 14

### *Kè a' ñi bikeitsök suluë*

<sup>1</sup> Wëpa erblöke Jesús mik, erë kam ierblö bua'ie, esepa kiówa er bua' wa. Ttè bikeitseke a' tó kua'ki kua'ki ese kè kï a' ñi iütök. <sup>2</sup> A' wëlepa tó ibikeitseke tó Jesús mik erblökwakpa a iyi ulitane katarmi. Erë a' wëlepa skà kam erblö bua'ie Jesús mik, esepa tó iklö'wé tó iyiwak chkà kè katar. <sup>3</sup> Wëpa tó iyi ulitane katé, esepa kè kàne wëpa kè ikatè esepa chök iki. Ñies wëpa kè ikatè, esepa kè kàne wëpa tó ikatè esepa chök iki, Skëköl tó ie'pa klö'bak ie' ichaie e' kueki. <sup>4</sup> Se' dör Skëképa Cristo kanè mésopa. Wës se' wër ie' wa eköl eköl, e' wërke ie' wák wöki. Ie' a se' kimermi as se' wër buaë ie' wa, e' kueki se' wërdaë ie' wa buaë. E' kueki ¿wës s'yamipa chëmisö suluë?

<sup>5</sup> Ñies se' shüa wëlepa tso' tó ibikeitseke tó s'kawötã diwö wële batseitsök imalëpa tsatã. Erë iëltëpa tó ibikeitseke tó diwö ulitane dör ñies ème. Se' kawötã wã ijchenuk eköl eköl tó ì klö'wésö e' dör yësyësë. <sup>6</sup> Wëpa tó iklö'wé tó s'kawötã diwö wële batseitsök bua'iewã, esepa tó batseitseke Skëképa Cristo dalöioie. Ñies wëpa tó iyi ulitane katé esepa tó ikateke Skëképa Cristo dalöioie tã wëstela chekeitö Skëköl a iki. Wëpa kè tó iyiwak chkà katëia, esepa tó ilo'yé Skëképa Cristo dalöioie tã wëstela chekerakitö Skëköl a ñikerakitö e' kï.

<sup>7</sup> Se' dör Skëképa Cristo icha, e'pa tso' ttsë'ka ö e'pa duowa e' dör ie' dalöioie, kè idör se' wák dalöioie. <sup>8</sup> Mik se' tso'ia ttsë'ka, etã se' serke ie' a. Mik se' duowa, etã se' duowa ie' a. Se' tso' ttsë'ka ö se' duowa, erë se' dör ie' icha. <sup>9</sup> Ie' kötëwã e' shkenekane as ie' dö s'durulune ena s'tso' ttsë'ka e'pa kôs Këkölie.

<sup>10</sup> Se' ulitane döraë Skëköl tkër s'shulo kulé kï e' wörki. E' kueki ¿iök a' ñi chö ö ñi saü suluë? <sup>11</sup> Skëköl tó ichè iyëkkuö kï i' es:

“Ye' wák ser wa yö ichè:

Sulitane e' tulörawã kuchë kï ye' wörki.

Sulitane tó ye' kïkerakã.”\*

Es Skëköl yëkkuö tó ichè. <sup>12</sup> Es sö isuë tó wës se' serke e' kï Skëköl tó se' chakerane eköl eköl.

<sup>13</sup> E' kueki kè se' kàne ñi chökia suluë. E' skéie a' e' tkówa darërë ì tó s'yamipa wöklö'wëmi ö ì tó iëmime sene sulu a, ese kè war. <sup>14</sup> Ye' wã ijcher buaë tó kè chkè wéne tó s'ia'wëpa ñaie Skëköl wöã. Ye' erblöke Skëképa Jesús mik, e' wa ye' iklö'wé yësyësë tó es idir. Erë wëpa tó iklö'wé tó chkè wële tó s'ia'wëmi ñaie, e' tã es idir esepa a. <sup>15</sup> E' kueki a' tó s'yami wële siawëwã ì kateke a' tó e' batamik, e' tã e' kè dalëritseku'ia a' tó. Ñies ie' skéie Cristo kötëwã, e' kè sulu'warwã ì kateke a' tó e' batamik. <sup>16-18</sup> Ì blúie Skëköl tso' e' wà kè dör chkè ena di'yè. E' wà dör sene yësyësë ena sene bèrë ena ttsë'ne buaë Wiköl Batse'r wa. Yi tó Cristo kanè wëke es, ese wër buaë Skëköl wa ñies sulitane wa. E' kueki ì tó a' yamipa kèmi a' chök suluë ì dör buaë a' a e' kï, ese kè war.

\* 14:11 Isaías 45.23

<sup>19</sup> Es ì kòs tò se' kimeke senuk bèrè ñita ena ñi diché iök Skëköl a, ese ùsö. <sup>20</sup> Ì buaë wétke Skëköl tò a' er a, e' kè sulu'warwa chkè è kueki. Moki chkè ena di'yè kòs dör batse'r. Erë sulu idir tò s'yamipa armine sene sulu a se' ukuömik ì katésö ì yésö ese wa. <sup>21</sup> Buaë idir tò iyiwak chkà mú kè katésö ö blo' mú kè yésö ö ì kòs mú kè wésö. Erë kè idör buaë tò s'yamipa armine se' ukuömik. <sup>22</sup> İma a' ttè i' bikeitsè e' bló a' er a Skëköl è a. Wépa tò ì wër buaë ie'pa wa ese wé ta ittsé tò kè iki ì nuí ku', jayëcha buaë esepa! <sup>23</sup> Erë yi tò ì katé ta ibikeitsékaitö bötböt dö' ye' tso' ì sulu wamblök, e' ta e' nuí tso' iki. Ie' kè wa iklöne moki tò buaë idir, e' kueki e' dör suluë ie' a. Ì kòs wésö e' kè one se' wa yësyësë wës iklö'wésö es, e' ta e' dör suluë se' a.

## 15

*S'kawöta s'malepa kimuk*

<sup>1</sup> Se' wépa erblöke buaë Cristo mik, esepa ké wépa kam erblö buaë tso'ia katötö esepa sauk wës se' wák katörwa es. Kè se' kàne ì tò se' wák ttsé'weke buaë ese è bikeitsök. <sup>2</sup> Se' kòs ké ì tò s'malepa ttsé'wèmi buaë ese bikeitsök eköl eköl ikimoie ena idiché ioie buaë Skëköl a. <sup>3</sup> Cristo wák kè wa ì tò ie' ttsé'weke buaë ese è bikeitse. E' skéie ie' ta itka wës Skëköl yëkkuö tò ichè es, e' tò ichè: “A Skëköl, wépa tò be' cheke suluë esepa tò ye' cheke suluë ñies.”\* <sup>4</sup> Ì kòs kite ká iaiaë Skëköl yëkkuö ki, e' kite s'wöbla'woie as se' e' tkòwa darërë ena as se' er pablö. E' wa ì buaë panekesö e' kè olo'yepasö. <sup>5</sup> Skëköl tò se' ké e' tkökwa darërë ñies se' er pablekitö. As ie' tò a' kimù senuk bèrè ñita wës Cristo Jesús ser es. <sup>6</sup> A' serke es, e' ta Skëköl dör Skëképa Jesucristo Yé e' kikeraka a' ulitane tò sekka ñita.

<sup>7</sup> Es a' ñi kiöwa er bua' wa wës Cristo tò a' ki'wa es as sulitane tò Skëköl kikòka. <sup>8</sup> Moki ye' ichè a' a' tò Cristo dë'bitu judiowak kimuk ikkachoie ie'pa a' tò ì uk Skëköl kablè' sa' yépa bak ká iaiaë e'pa a, e' wawéitö. <sup>9</sup> Ñies idë'bitu as pè' kè dör judiowak, esepa tò Skëköl kikòka ie'pa suéitö er siarè wa e' kueki. E' dör wës Skëköl yëkkuö tò ichè es wé ichèitö: “E' kueki ye' tò be' kikeraka pè' kè dör judiowak esepa ulitane shua. Ye' ttsöraë be' kikokaie buaë.”†

<sup>10</sup> Ñies itso' kitule i' es:

“jA' kè dör judiowak esepa ttsé'nú buaë wépa dör Skëköl icha esepa ta ñita!”‡

<sup>11</sup> Ñies ichéitö:

“jA pè' kè dör judiowak Skëköl kikòka!

jA ká ulitane wakpa, Skëköl kikòka!”§

<sup>12</sup> Ñies Isaías tò ikitat iyëkkuö ki i' es:

“Jesé aleri eköl döraë se' shua,  
e' tkërdaka ká ulitane wakpa wëttsöie.

Pè' kè dör judiowak esepa tò ie' è paneraë e' tsatkoie.”\*

Es itso' kitule.

<sup>13</sup> Ì buaë kòs doia se' a e' panekesö kröröe e' wì dör Skëköl. As e' tò ttsé'ne buaë ena sene bèrè mù a' kòs erblé ie' mik e'pa a. As ie' tò a' kimù iwà kí panuk buaë Wiköl Batse'r diché batamik.

<sup>14</sup> A yamipa, moki ye' iklö'wé tò a' serke buaë yësyësë. Ñies ye' iklö'wé tò a' wa iyi jcher taië. A' a' ñi pautmi buaë. <sup>15</sup> Erë yëkkuö i' ki ye' er deka a' pattök wöshaë ttè wésele wa as kè a' éna ichöwa. Skëköl er buaë ché ye' a e' wa kanè me'itö ye' a, e' kueki ye' a kawö ta' a' pattoie es. <sup>16</sup> Ye' dör Cristo Jesús kanè méso ie' tté buaë kkeyé' Skëköl tò se' a e' pakoie pè' kè dör judiowak esepa moie Skëköl a batse'oule Wiköl Batse'r wa. E' dör wës iyi mè sacerdotepa tò Skëköl dalöioie wër buaë ie' wa es.

\* 15:3 Salmo 69.9 † 15:9 2 Samuel 22.50; Salmo 18.49 ‡ 15:10 Deuteronomio 32.43 § 15:11 Salmo 117.1

\* 15:12 Isaías 11.10



<sup>17</sup> Ye' batsulewā Cristo Jesús mik, e' kuëki ye' kaneblöke Skëköl a e' tö ye' ttsë'weke buaë. <sup>18</sup> Ye' kè er dë'ka kabenukka ì kè one Cristo wā ye' wa ese ki. Ie' batamik ye' tö pë' kè dör judiowak esepa ulaié Skëköl ttë iütök. E' wé ye' tö ipakè wa ena iwakanewè wa <sup>19</sup> ena Skëköl Wiköl diché wa. Ñies ì kè or yi a ese wéyö taië ie'pa wörki ikkachoie tö ì chéyö e' dör moki. Es kanè mène ye' a Cristo tté buaë pakoie e' wawétkeyö ká tso' kos Jerusalén dò Iliria e' shuā. <sup>20</sup> Këkraë ye' e' mukettsā tté buaë e' pakök wé kè yi tö Cristo dalöieta' ese ska'. Ye' iwé es as ye' kè dör wës yi tö u yuéka u chkí tulu'wabak o'ka tö ese ki es. <sup>21</sup> E' skéie ye' éna iwāk wës Skëköl yëkkuö tö iché es, e' tö iché:  
 “Wépa a ie' tté kè pakaule, esepa a ká ardaë;  
 Wépa kè wā ie' tté ttsëule, esepa éna iardaë.”†

### *Pablo shkak Roma*

<sup>22</sup> Këkraë ye' shkak a' weblök, erë kanè i' tö ye' wöklö'weke. <sup>23</sup> Erë ì ñe tā ye' kaneone ká ikkëpa ki. Bānet ye' tö a' kkeyë'mi pakè, <sup>24</sup> e' kuëki ye' mú tkömi Roma a' pakök mik ye' mi'ke España etā. Eré ye' kè a kawö kunuk taië a' ska' senuk, erë ye' ttsë'rmi buaë. E' ukuöki tā a' mú ye' kimè as ye' dò España. <sup>25</sup> Erë ì ñe tā ye' mitke Jerusalén s'batse'r malepa serke eë e'pa kimuk. <sup>26</sup> E' dör tö s'yamipa serke Macedonia ena Acaya e'pa tö inuköl kitbak iwákpa er wa patkëmi s'batse'rpa dör siarë tso' Jerusalén e'pa kimoie. <sup>27</sup> E' wé ie'pa tö iwákpa er wa, erë moki ie'pa ki inuí tso'. E' kuëki buaë idir tö ie'pa tö judiowak kimè. E' dör tö ì buaë de judiowak ulā a Cristo wa, e' de ie'pa ulā a ñies judiowak wa. E' kuëki buaë idir tö ì tso' ie'pa wā e' kakmè s'yamipa dör judiowak esepa a. <sup>28</sup> Es mik ye' tö inuköl kitule kos ie'pa a e' mé ie'pa ulā a, etā ye' mía España e' tkökemi a' pakök. <sup>29</sup> Ye' wā ijcher tö mik ye' demi a' ska', etā se' ñi er diché iöraë buaë Cristo er buaë chò sia e' kos wa.

<sup>30</sup> A yamipa, Skëkëpa Jesucristo ttò wa, ñies se' ñi dalëritsöke Skëköl Wiköl wa, e' wa ye' kköchò a' a tö a' e' chó darërë ye' tā ñitā kanè mène ye' a e' wā uk. E' wëmi a' tö, a' tö Skëköl a ikiè ye' ki e' wa. <sup>31</sup> Ikió ie' a as ie' tö ye' tsatkò Judea wakpa kè tö Jesús tté iütè esepa yöki. Ñies ikió ie' a tö ì kos mi'ke ye' wā s'batse'rpa tso' Jerusalén e'pa kimoie as ie'pa tö e' tsü er bua' wa. <sup>32</sup> Es ikió ie' a as ye' dòmi a' ska' ttsë'ne buaë wa enuk a' pakekeyö e' dalewa, es ie' ki ikiane e'ma. <sup>33</sup> Ie' dör sene bèrë mukwak as e' tö a' wapiöü. Es e' idir.

## 16

### *Roma wakpa shké'wémi Pablo tö*

<sup>1</sup> Tayë eköl kiè Febe dör s'yami, e' tté chekeyö a' a. Ie' dör Skëkëpa Jesús icha erule tso' Cenreas e' kimukwak eköl. <sup>2</sup> Ie' kiówā buaë Skëkëpa Jesús ttò wa wës s'batse'rpa ñi kiówā es. Ie' tö s'yamipa taië e'pa kimé, ñies ye' wāk kiméitö. E' kuëki mik ie' ki ilè kiane etā ie' kimú.

<sup>3</sup> Prisca ena Áquila e'pa shké'ú ña. Ie'pa bak kaneblök ye' tā Cristo Jesús kanè a. <sup>4</sup> Ie'pa e' me'ttsā ye' tsatkök, kè tkine tö dö' ittèwā. Wëstela chekeyö ie'pa a, erë kè dör ye' è. Skëkëpa Jesús icha erule erule kos kè dör judiowak, e'pa tö wëstela cheke ie'pa a ñies. <sup>5</sup> Ñies Skëkëpa icha erule daparke Prisca ena Áquila u a, e'pa shké'ú ña. Ñies ye' yami dalër taië ye' éna kiè Epéneto, e' shké'ú ña. Ie' dör s'tsá erblë' Cristo mik Asia e'. <sup>6</sup> María shké'ú ña. Ie' kaneblé taië a' a. <sup>7</sup> Wépa böi kiè Andrónico ena Junias, e'pa shké'ú ña. Ie'pa dör judiowak wës ye' es. Ie'pa bak wötëule s'wöto wé a ye' tā. Ie'pa dör Jesús ttekölpa kkeaulekā buaë imalepa wā. Ie'pa erblë' Cristo mik ye' yöki kewe.

<sup>8</sup> Ampliato shké'ú ña. Ie' dör ye' yami Skëkëpa Jesús ttò wa, e' dalër taië ye' éna. <sup>9</sup> Urbano shké'ú ña. Ñies ie' kaneblöke Cristo a wës sa' es. Ñies Estaquis shké'ú ña. Ie' dalër taië ye' éna. <sup>10</sup> Apeles shké'ú ña. Ie' wër buaë Cristo wa. Ñies wépa dör Aristóbulo

† 15:21 Isaías 52.15

icha, e'pa shke'ú ña. <sup>11</sup> Herodión, e' shke'ú ña. Ie' dör judiowak wës ye' es. Ñies wépa dör Narciso icha erblé Skéképa mik e'pa shke'ú ña. <sup>12</sup> Tayépa kiè Trifena ena Trifosa shke'ú ña. Ie'pa kanablöke Skéköl a. Ñies tayé dalër se' éna kiè Pérside e' shke'ú ña. Ie' kanablöke taië Skéköl a. <sup>13</sup> Rufo shke'ú ña, e' dör Jesús mik erblökwak buaë sūule sulitane wā. Ñies ie' mì e' shke'ú ña. Ie' dör wës ye' wák mì es. <sup>14</sup> Asíncrito, Flegonte, Hermes, Patrobas, Hermas ena s'yamipa kōs tso' ie'pa tā, e'pa kōs shke'ú ña. <sup>15</sup> Ñies Filólogo, Julia, Nereo ena ikutà, Olimpas ena s'batse'r malepa tso' ie'pa tā, e'pa kōs shke'ú ña.

<sup>16</sup> A' ñi shke'ú ñi dalër wa. Cristo icha erule erule e' kōs tō a' shke'wémi.

<sup>17</sup> A yamipa, ye' kköchō a' a tō wépa éna se' blabatsak ena se' akmine sene sulu a, esepa yōki a' e' kkō'nú. Ie'pa se' a icheke tō ttè wa se' wöblaule kewe e' kè dör mokie. Esepa yōki a' e' skó. <sup>18</sup> Ie'pa kè ku' Skéképa Cristo kanèuk. E' skéie ie'pa tso' iwákpa è kanèuk. Se' kam éna iar buaë esepa dakinekerakitō ttè ttsër buaë ese wa. E' kueki esepa yōki a' e' skó. <sup>19</sup> Sulitane wā ijcher tō Skéköl ttè mokie e' dalöieke a' tō buaë. E' tō ye' tts'ewe buaë. Ye' ki ikiane tō a' mú wöblar ttè buaë yësyësë wa wawè. Erè a' mú kè e' wöbla'ü kache ttè wa i sulu wambloie. <sup>20</sup> A' serke es, e' tā betka Skéköl dör sene bèrè mukwak, e' tō Satanás shtowerawā a' klò dikia. As Skéképa Jesús er buaë chō a' a.

<sup>21</sup> Ye' yami Skéképa Jesús kanè a' kiè Timoteo e' tō a' shke'wémi. Ñies Lucio ena Jasón ena Sosípatro, e'pa tō a' shke'wémi. Ie'pa dör judiowak wës ye' es.

<sup>22</sup> Ye' dör Tercio, e' tso' Pablo ttōke e' shtök yëkkuō i' ki. Ñies ye' tō a' shke'wémi Skéképa ttō wa. I' tā i cheke Pablo tō e' shtekeneyō.

<sup>23-24</sup> Gayo tō a' shke'wémi, e' u a ye' serke. Eë Skéképa Jesús icha erule tso' ká i' ki e'pa daparke. Erasto tō a' shke'wémi. Ie' dör ká i' inuköl kueblu. Ñies s'yami kiè Cuarto, e' tō a' shke'wémi.

*Pablo tō Skéköl kikéka*

<sup>25</sup> ¡Skéköl kikōkasó! Ie' a a' kimermi e' tkōkwā darërè Jesucristo ttè buaë pakekeyō e' a. Ká iaiaë ttè buaë e' blèule se' yōki. <sup>26</sup> Erè i'ñe tā ikkayënēwā se' a i' kit Skéköl ttekōlpa tō yëkkuō ki e' wa. Skéköl yöbië e' tō ie'pa ka' ishtök. Ttè buaë ñe' kkayënēwā as ká ulitane wakpa erblō imik tā iwà iutō.

<sup>27</sup> Skéköl e' dör Skéköl eköl ème e'. Ie' erbikō taië sulitane tsata. ¡As e' kikarka kekraë Jesucristo wa! Es e' idir.

## Yëkkuö tsá kit Pablo tö Corinto wakpa a 1 Corintios

Mik Pablo bak kanëblök Éfeso etá ie' tö yëkkuö i' kit Jesús mik erblökwakpa serke Corinto e'pa a. Pablo kèwö ska' ta Corinto dör Grecia ká bua'ie. Pë' bak senuk iki doka 650.000. E'pa shua 400.000 klöulewá kanëblök é. Pablo wák tö tsawe Corinto wakpa a Jesús tté buaë paka'. E' tté tso' kitule Hechos 18.1-17 e' ki.

Alaköl eköl kiè Cloe e' yami wele de Pablo pakök ie' tso' Éfeso ee. E' tö ie' a iyè' tö Jesús mik erblökwakpa tso' Corinto e'pa ñippöke taië ena welepa tso' íyi sulusi wamblök taië, e' kueki ie' tö yëkkuö i' kit. Nies ie' tö ikit ilè chaki' ie'pa tö ie' a e' iutoie ie'pa kimoie ena ipattoie.

Kam Corinto wakpa erblö Jesús mik etá ie'pa tö íyi taië dalöieke Skëköl skéie, e' dör kabene et. Ì dalöieke ie'pa tö e' a ie'pa tö iyiwak jcheke e' chkà katekerakitö iyamipa ta ì dalöiekerakitö e' dalöioie. E' cheke Pablo tö yëkkuö i' ki.

Ñies ì dalöieke ie'pa tö e' wé kos a alakölpá sulusi datse ta wëpa serkerak ita. Erë mik wëpa ñekkëpa erblé' Jesús mik etá ie'pa kè éna iane tö wes ie'pa ké senuk. E' kueki Pablo tö ikkaché tö wes wëpa alaköl ta' ena alaköl kè ta' e'pa kawöta senuk.

Kíie ta pë' wele bak ñi dapa'uk Jesús mik erblökwakpa ta, e'pa tö ie'pa wöbla'weke kache tté wa. Ese ché Pablo tö yëkkuö i' ki.

### Shke'wè

<sup>1</sup> Ye' dör Pablo. Skëköl tö ye' klöo'bak iwák er wa Cristo Jesús ttekölpa tsá, e'pa ekölie. S'yami kiè Sóstenes tso' ye' ta. <sup>2</sup> A' dör Skëköl icha erule serke Corinto, e'pa a sa' tso' yëkkuö i' shtök. A' batse'oule a' batsulewá Cristo Jesús mik e' wa. A' klöo' Skëköl tö ie' icha batse'rpaie wëpa kos tso' ká wa'ñe tö e' tsatkè kié Skëkëpa Jesucristo a e'pa ta ñita. Jesucristo dör ie'pa ena se', e' Këköl. <sup>3</sup> Skëköl dör S'yé ena Skëkëpa Jesucristo, as e'pa er buaë chò ena sene bèrè mù a' a.

### Pablo tö wëstela ché Skëköl a

<sup>4</sup> Skëköl er buaë ché taië a' a Cristo Jesús batamik, e' kueki ye' tso' wëstela chök ie' a kekraë. <sup>5</sup> A' batsulewá Cristo mik, e' wa ì kos kiane a' ki wakanewè Skëköl a, e' mène a' a taië. Skëköl tö ieri mé a' a iwà pakoie buaë, ñies iwà jchenowá buaë. <sup>6</sup> E' wa iwënewá a' shua tö moki a' tö Cristo tté klö'wé buaë. <sup>7</sup> Es ì kos kiane a' ki kanëbloie Skëköl a, ese métké ie' tö a' a iWiköl wa. E' wakanewëke a' tö a' tso' Skëkëpa Jesucristo datskene e' panuk, e' dalewa. <sup>8</sup> Nies ie' tö a' kimeräe buaë as a' e' tköwá darërèe ie' mik dò bata ekké. Es a' kè ki ì nuí ta' ie' wöa mik Skëkëpa Jesucristo datskene e' kèwö ska'. <sup>9</sup> Skëköl ttò mokië e' tö a' klöo'bak as a' ser batsulewá ie' alà Jesucristo dör Skëkëpa e' mik.

### Jesús mik erblökwakpa ñi blabatsélor

<sup>10</sup> A yamipa, ye' tö a' a ichè Skëkëpa Jesucristo ttò wa tö a' kos erbikó ñikkëe. Kè a' ñi blabatsök. A' senú buaë ñita. A' kabikeitsó ñikkëe wes wák eköl è es. <sup>11</sup> A yamipa, tayë kiè Cloe, e' yamipa welepa tö ibiyó ché ye' a tö a' tso' ñippök tté ki. E' kueki ye' tso' a' a ichök es. <sup>12</sup> Ie'pa tö ye' a' iché tö a' kos ñippöke ñita i' es: A' welepa tö icheke: "Ye' dör Pablo klé." Welepa skà tö icheke: "Ye' dör Apolo klé." Iëkölpá tö icheke: "Ye' dör Cefas\* klé." A' skà tö icheke: "Ye' dör Cristo klé." <sup>13</sup> ¿Ima a' ibikeitsè tö Cristo tso' blabatsule? Au, kè idör es. ¿Ye' kötewá krus mik a' skéie? Au. ¿A' wösune ye' ttò wa? Au. <sup>14</sup> Wëstela chekeyö Skëköl a tö ye' kè wa a' wösune taië. Wëpa kiè Crispo ena Gayo, e'pa è wösuk ye' tö. <sup>15</sup> Kè yi a iyënuk tö ye' tö a' wösuk ye' ttò wa. <sup>16</sup> Ye' éna ianewá i' ta tö ñies ye' tö wëm kiè Estéfanos e' wösuk ena ie' yamipa ekká. Kè ye' éna iane tö yi skà wösuk ye' tö.

\* 1:12 Cefas: E' è kiè ñies Pedro.

<sup>17</sup> Cristo kè wà ye' patkène s'wöskuök, ie' tö ye' patké ie' tté buaë pakök. Ye' kè tö ttè e' paketa' ttè iskië wa wes s'yöule taië esepa kapakò es. Ye' tö ipakeke ttè wöshakla wa as Cristo kötewà krus mik e' tté diché kè chöwa.

*Skököl diché taië ena ie' siwé iskië, e' wà dör Cristo*

<sup>18</sup> Wépa weirdaë aishkuö ta, esepa a Cristo kötewà krus mik, e' tté dör alipa ttèie. Erë se' tsatkërke, esepa a Skököl diché taië, e' tté idir. <sup>19</sup> E' dör wes itso' kitule Skököl yëkkuö kī es, e' tö ichè:

“Skököl tö ichè: Wépa wà siwà' jcher iskië,

esepa meraatyö wes kè wà ì jcher es.

Wépa kabikeitsö taië,

esepa éna ká chöwerawayö.”†

Es Skököl yëkkuö tö ichè.

<sup>20</sup> Es idir e' kueki s'ditsö wà siwà' jcher iskië, ¿wes esepa de? S'wöbla'uk ttè dalöiëno wa wakpa, ¿wes esepa de? Wépa a s'ditsö íyi tté wà pakar ñi a buaë ¿wes esepa de? Skököl a ta siwà' iskië jcher s'ditsö wà, e' kè wà ta', e' dör wes alipa ttè es. <sup>21</sup> Tté e' wà dör i' es: Skököl wà íyi jcher iskië, e' kueki ie' kè wà imeneat tö se' tsatkër ì jcher s'ditsö wà iskië ese wa. E' skéie ie' tö ime'at tö wépa erblé Cristo mik itté pakarke e' wa, esepa è tsatkërdaë eré ittsër alipa ttèie.

<sup>22</sup> Ì kè or yi a ese kiane suè judiowak kī ttè klö'woie. Griegowak tö siwà' iskië ese yuleke taië. <sup>23</sup> Erë Cristo kötewà krus mik, e' tté pakeke sa' tö. Tté e' sulune judiowak yöki. Pè' kè dör judiowak, esepa a ta e' dör alipa ttè. <sup>24</sup> Erë wépa kos klö'bak Skököl tö iwák a, judiowak ö pé' kè dör judiowak, esepa a Cristo dör Skököl diché taië ena ie' siwé iskië e'. <sup>25</sup> Ì wé ie' tö e' wër wes ì wè aliwakpa tö es. Ñermata ie' wà siwà' jcher iskië tkòka sulitane tsata. Iwër wësua tö ie' kè diché ta', ñermata ie' diché ta' taië tkòka sulitane tsata.

<sup>26</sup> A yamipa, mik Skököl tö a' klö'bak, eta ¿wes a' dör? E' anú a' éna. Ká i' wakpa a ta a' kibiiepa kè wà siwà' iskië jcher. A' kibiiepa kè ttò dalöiërta'. A' kibiiepa kè dör kéképa taië ese ditséwö. <sup>27</sup> Erë wépa cheke ká i' wakpa tö tö kè iwà ì jcher, esepa shukit Skököl tö wöbla wa, wépa wà siwà' jcher iskië, esepa jaëwoie. Wépa kè dör kéképa taië ká i' wakpa a, esepa shukit ie' tö wöbla wa, wépa dör kéképa taië, esepa jaëwoie. <sup>28</sup> Wépa watëulettsa, wépa bikeitseke ká i' wakpa tö tö kè idör ìie bua', wépa kè dör ì, esepa shukit ie' tö, wépa dalöiërta' taië ká i' kī, esepa wöowaie diöshet. <sup>29</sup> Es kè yi a e' ttsënuukka Skököl wörki. <sup>30</sup> Erë Skököl wák tö a' bätswa Cristo Jesús mik. Cristo batamik ie' tö se' ké siwà' moki jchenukwà iskië. Ñies Cristo batamik ie' tö se' klö'wé wes pé' buaë yësyésé es, ñies se' de ie' wák ichaie bats'e'r yënettsa sene sulu ulà a. <sup>31</sup> E' kueki s'kawöta senuk wes Skököl yëkkuö tö ichè es, e' tö ichè: “Yi e' ttsakka as ese e' ttsòka ì wé Skököl tö ese wa.”‡

## 2

*Cristo kötewà wötëulewà krus mik, e' tté paké Pablo tö*

<sup>1</sup> A yamipa, mik ye' dè' kewe Skököl tté buaë pakök a' a, eta kè ye' wà iwà pakane siwà' iskië ese wa wes a' wakpa yöule taië esepa tö s'wöbla'weke es. <sup>2</sup> Mik ye' bak a' shua, eta ye' kè kī ì bár tté kianeia. Ye' ibikeitsétke Jesucristo kötewà wötëulewà krus mik e' tté è pakök. <sup>3</sup> Mik ye' dè'bitu a' ska', eta ye' tsè'rke alabèbè kè diché ta' taië, ye' suarke taië painuke taië. <sup>4</sup> Ye' tö Skököl tté buaë e' paké a' a, erë kè ye' wà ipakane siwà' iskië s'ditsö a ese wa a' dakiñoie. E' skéie ì pakéyo a' a, e' wà kkaché a' a Skököl Wiköl tö idiché wa tö mokië idir. <sup>5</sup> Skököl tö iwé es as a' kè erblò siwà' iskië ese mik, e' skéie as a' erblò ie' diché mik.

*Se' wà Skököl siwé jcher iWiköl wa*

† 1:19 Isaías 29.14 ‡ 1:31 Jeremías 9.24

<sup>6</sup> Erë wépa tkëulewatke darërë Cristo mik, esepa je' éna iane tò ttè pakeke sa' tò, e' dör siwa' iskië chökle. Erë e' kè dör s'ditsö ena iwökirpa siwa' ese; esepa diché erkewatke. <sup>7</sup> Siwa' pakeke sa' tò, e' dör Skëköl siwa' bak blëulewa s'ditsö yöki e'. Ká iaiaë kam ká i' yör, e' yöki ie' tò ibikeitsbak tò sene michoë olo ta' taië, e' meraëitö se' a ie' siwa' wa. <sup>8</sup> Siwa' e' kè ane s'ditsö wökirpa éna. Ie'pa éna ianúpa, e'ma ie'pa kè wa Skëképa Jesús olo ta' taië e' kötewa. <sup>9</sup> Erë e' dör wes itso' kitule Skëköl yëkkuö kī es, e' tò ichè:

“Í buaë kè sūule yi wa,

ì buaë kè ttsëule yi wa,

ì buaë kè bikeitsule yi wa,

ese tso' Skëköl wa mè wépa éna ie' dalër esepa a.”\*

<sup>10</sup> Erë e' kos wà kkachéitö se' a iWiköl wa. Iwiköl tò ýi ulitane shuyulekettsa sekka dò Skëköl erbikò iskië eseë.

<sup>11</sup> Se' wiköl tso' se' a, e' è wa ijcher ì tso' se' er a. Es ñies Skëköl Wiköl è wa ijcher ì tso' ie' er a. <sup>12</sup> Ie' tò iWiköl mé se' a, e' kuëki kè se' kabikeitsöia wes s'ditsö kabikeitsö es. Ie' tò iWiköl mé se' a as ì buaë kos méitö se' a er bua' wa e' wà ar se' éna. <sup>13</sup> E' kuëki kè sa' tò s'wöbla'weku' ká i' a siwa' tso' ese wa. S'wöbla'weke sa' tò ttè kkaché Skëköl Wiköl tò sa' a e' wa. Es sa' tò Skëköl Wiköl ýi e' wà pakeke ttè méitö sa' a ese wa.

<sup>14</sup> Wépa kè a Skëköl Wiköl ku', esepa a ie' ýi e' dör alipa ýi, e' kuëki ie'pa kè kī ikiane. Ñies ie'pa kè éna iwà ar, ttè e' wà arke se' éna Skëköl Wiköl è wa e' kuëki. <sup>15</sup> Erë wépa a Skëköl Wiköl tso', esepa éna ie' ýi ulitane wà armi buaë. Erë ì weke ie' tò ie'pa a e' kè wà anuk yi éna. <sup>16</sup> E' dör wes itso' kitule Skëköl yëkkuö kī es, e' tò ichè: “Skëköl erbikò e' kè jcher yi wa. Kè yi a ie' pautuk.”† Erë se' éltëpa wa Cristo erbikè tso'.

### 3

#### *Se' kos dör Skëköl kanè mésopa*

<sup>1</sup> A yamipa, mik ye' bak a' shua, eta ye' kè a kapakar a' ta wes s'wëttseke Skëköl Wiköl tò esepa ta kapakè es. E' skéie ye' kawöta kapakök a' ta wes ye' kunúpa kapakök s'tso'ia s'wák dër sulu dikia ö ala'r tsitsirla kè yöule buaë Cristo ttè wa esepa ta kapakè es. <sup>2</sup> Ttè wa ye' tò a' wöbla' e' dör tottola wes tsu'diö mè ala'rla a es, kam a' a chkè darërë katar e' kuëki. ¿Erë ikkè ta kam a' a chkè darërë katar, <sup>3</sup> a' serkeia wes s'wák dër sulu kī ikiane es e' kuëki! A' ñippöke, a' ukyërke ñi kī taië, e' wà kiane chè tò a' seria wes s'wák dër sulu kī ikiane es, wes pè' kè a Wiköl Batse'r ku' es. <sup>4</sup> A' welepa tò icheke: “ye' dör Pablo klé.” A' welepa skà tò icheke: “ye' dör Apolo klé.” A' ttökeia es, e' wa iwënewa tò a' dör wes pè' kè a Wiköl Batse'r ku' es.

<sup>5</sup> Eta ichó ye' a tò ¿Apolo dör yi? ¿Pablo dör yi? Sa' dör Skëköl kanè mésopa è. Sa' tò Jesús ttè buaë paka' a' a, e' batamik a' de erblök Jesús mik. Kanè me' ie' tò sa' böi a kuä'kī kuä'kī, e' wakanewé sa' tò. <sup>6</sup> Jesús ttè buaë e' tsá tkéyö a' er a, wes ýi kuantkè es. Apolo tò ikk'óné as italar, erë Skëköl wák tò iwà tala'weke. <sup>7</sup> Yi tò ýi kuantkeke, ñies yi tò ikk'öneke, esepa kè dör ì. Skëköl tò iwà tala'weke, e' dör ibua'ie. <sup>8</sup> Yi tò ýi kuantkeke, ñies yi tò ikk'öneke, esepa dör ñies ème ie' a. Ie' tò iské meraë ie'pa a eköl eköl wes iwakanewekerakitö es. <sup>9</sup> A' dör wes ie' tē es, e' a sa' böi kanëblöke ie' a. Ñies a' dör wes u yörike ie' a es. <sup>10-11</sup> Ie' er buaë ché ye' a, e' wa ime'itö ye' a ichkí tkökwa wes u yuökwak bua'buwa es. E' ukuökī ta u yuökwakpa skà de ikī yuökmi. U yörike Skëköl a e' chkí tkënewatke e' dör eköl è, e' dör Jesucristo. Kè yi a ichkí kuä'kī tkënewane. E' kuëki se' ulitane eköl eköl kawöta e' kkö'nuk buaë tò wes iwà kī yuekemisö. <sup>12</sup> Se' tò iwà yuèmi orochka wa, inukölchka wa ena ák bua'buwa wa ö iwà yuèmisö kaltak wa, kakö wa ena kuaköl wa. <sup>13</sup> Mik Jesucristo datskene, eta iwërdaë tò is iwà yuésö. E' kèwö ska' ta se' kanè ma'ordaë bö' wa isuöie tò is idir. <sup>14</sup> U chkí tulunewa, e' kī se' tò iwà yué, e' ta e' kè

\* 2:9 Isaías 64.4 † 2:16 Isaías 40.13

ñanewā bö' a ta esepa a iské merdaë. <sup>15</sup> Erë ì yuésö e' ñanewā, e' ta kanè e' weirdawa. Erë esepa tsatkërdaë bö' yöki, erë kè ì atë ie' pa ulà a wës s'tkòshkar u ñarkewa yöki es.

<sup>16</sup> ¿A' kè wā ijcher tö a' wákpa dör Skököl wé, ie' Wiköl serke a' shuā e' kuëki? <sup>17</sup> Ie' wé dör batse'r, e' dör a' wákpa. E' kuëki e' olo'yéwā yi isie tö, e' ta ese olo'yerawā ie' tö.

<sup>18</sup> Kè a' e' kitö'ukia. A' wēlepa e' bikeitsö tö a' wā siwā' iskië jcher wës s'ditsö tö ibikeitseke es, e' ta esepa kawötā e' ökwa aliie as siwā' moki jcherwā iwā. <sup>19</sup> Ì dör siwā' iskië s'ditsö a, ese dör alipa ttè Skököl a. E' dör wës ie' yëkkuö tö ichè es: “Wépa wā siwā' iskië jcher taië, esepa klö'wērawā Skököl tö iwákpa erbikò s'dakiñoie e' wa wës iyiwak klö'wēwasö sho' wa es.” <sup>20</sup> Ñies ichéitö i' es: “Skököl wā ijcher buaë tö ì tso' ká i' a, ese siwé jchermi s'wā taië, e' kè dör iie bua'.” <sup>21-23</sup> Erë a' dör Cristo icha ena Cristo dör Skököl icha. E' wà kiane chè tö íyi ulitane mé Skököl tö a' a' kimoie. Ye' ena Apolo ena Pedro, e' pa tso' a' kímuk. E' kíie ta ì kos tköke i' ñe ta, ñies aishkuö ta, s'ser ena s'duòwā, ekkè kos tso' a' kímuk. E' kuëki kè a' kàne s'ditsö wēle kkeökka taië tö e' dör ibua'ie as s'mi' ikléie.

#### 4

##### *Jesucristo ttekölpa tsá, e' pa kanè*

<sup>1</sup> Sa' bikeitsö tö sa' dör Cristo kanè mésopa. Skököl ttè bak blëulewā e' wà pakè wërke sa' wöki wës íyi kuëblu es. <sup>2</sup> Íyi kuëblu kawötā iwakanéuk yësyësë wës iwökir tö iuk patké es. <sup>3</sup> Es idir, e' kuëki ima a' tö ö yile skà tö is ye' kanëblöke Cristo a' e' bikeitseke, e' kè ki ye' tkine. E' kíie ta ima ye' wák tö ye' kanè bikeitseke, e' kè ki ye' tkine. <sup>4</sup> Ye' er kè wā ye' kkatëne, erë kè e' wa yö ichepa tö kè ì sulu ku' ye' ki. Skëképa Jesucristo tö ye' shuleraë, ima e' tö ye' bikeitseke, e' è ki ye' tkirke. <sup>5</sup> Mik ie' dene etā sulitane shuleraëitö. Ì kos tso' blëulewā se' er a, ñies ì dalërmik se' serke, ese kos kkacheraëitö wöshak sulitane wörki. E' kèwö ska' ta se' kos kanëblöke buaë ie' a, e' pa kikerakā ie' tö. E' kuëki kè s'kkatar, kam s'shulir kèwö dökā e' yöki.

<sup>6</sup> A yamipa, ye' tö ye' wák ena Apolo ché a' a' kimoie as e' wa a' tö iwā saü tö kè a' kàne ì tso' kitule Skököl yëkkuö ki chétkeyö ñe' dalöseukwā. Kè a' kàne e' ttsòkā taië sa' eköl wa ena sa' eköl wöökwa diöshët. <sup>7</sup> ¿Wës a' tö ichèmi tö a' dör s'malepa tsatā? Ì kos tso' a' wā, ì buaë eri ta' a' wā, wës a' kabikeitsö, e' kos me' Skököl tö a' a. ¿Iók a' e' ttsòkā taië tö wësua íyi kos e' dë'bitū a' wákpa wā, a' wákpa er wa?

<sup>8</sup> Wësua a' ibikeitseke tö Skököl siwā' jcher taië a' wā, e' dör wë', kè ì kí kianeia a' ki. A' e' ttsö tö a' s'wëttsémitke blu'paie, erë kam sa' dökā ekkè. Moki a' mú s'wëttsémitke blu'paie, e' ma sa' detke a' ta ñita s'wëttsuk. <sup>9</sup> Erë ye' a ta, wësua sa' dör Jesús ttekölpa tsá e' pa méat Skököl tö s'ditsö malepa bataie. Ye' ittse tö ká ulitane wakpa ñies Skököl biyöchökwakpa ulitane e' pa tso' sa' weirke e' weblök. Sa' dör wës s'bolökpa tö s'klö'wéwā tsèmi sulitane wörki ttèwā es. <sup>10</sup> Cristo tté kuëki sa' wër aliie, erë a' e' bikeitsö tö a' wā siwā' iskië jcher buaë a' batsulewā Cristo mik e' kuëki. Iyërke tö sa' kè diché ta', erë a' diché ta' taië. A' dalöiërta' taië, erë sa' kè dalöiërta'. <sup>11</sup> Dò ikkè ta sa' tekeia bli tö ersir tö; kè sa' datsi' ta' buaë; pè' tö sa' we'ikeke siarë; sa' wákpa kè wā u ta' senoie; <sup>12</sup> sa' kanëblöke darërëe sa' wák ulà wa dò sa' shtrinewā da'a ekkè. Mik pè' alibchöke sa' ki, etā e' pa a sa' er buaë chöke. Mik ie' pa tö sa' we'ikeke, etā e' dalé'ttseke sa' tö er bua' wa. <sup>13</sup> Mik pè' tö sa' cheke suluë, etā e' iutekene sa' tö ttè bua' wa. Dò ikkè ta ká i' wakpa wa sulu sa' wër. Ie' pa a sa' dör wës ushña uyanettsā u'rki es.

<sup>14</sup> Ye' kè wā ttè i' kite a' a' jaëwoie, é ye' tso' a' pattök wës iyé éna ila'r dalër ese pattëitö es. <sup>15</sup> Cristo Jesús tté buaë paka' ye' tö a' a' kewe, e' wa a' batsewā ie' mik. E' kuëki moki ye' dör wës a' yé es. A' mú wā s'wöbla'ukwakpa Cristo tté wa tso' dökā 10.000, erë ye' eköl è dör wës a' yé es. <sup>16</sup> E' kuëki ye' tö a' pattè tö a' senú wës ye' serke es. <sup>17</sup> E' kuëki



ye' tö Timoteo patkémi a' ska'. Ie' dör wes ye' wák alá es Skékëpa wa. Ie' dör ye' ttökata yësyësë dalër taië ye' éna. Wes ye' dör Cristo Jesús mik erblökwak e' ser, e' ttë wa ye' tö ie' icha kos tso' erule erule ká wa'ñe, e'pa wöbla'weke. Ttë e' ska' Timoteo tö a' er erane.

<sup>18</sup> A' wëlepa e' ttséka taië tö ibikeitseke tö ye' kè döpa a' ska'. <sup>19</sup> Erë Skékëpa kī ikiane, e' ta ye' mi'ke a' pakök bet. Mik ye' de eta ye' tö isuëraë tö a' wépa e' ttséka taië, esepa wā Skéköl diché ta' ö ie'pa kabërke è. <sup>20</sup> Ì blúie Skéköl tso' e' wà wënewā idiché taië e' kī, kè dör ttë è wa. <sup>21</sup> ¿Ì kiane a' kī? ¿A' kī ikiane tö ye' dò kësik wa a' uñuk? ö ¿a' kī ikiane tö ye' dò a' ska' er bua' wa, a' dalëritsè wa?

## 5

### *Sene sulu watòttsasö*

<sup>1</sup> Ye' itté ttsé tö a' shuā wëm tso' eköl e' trërke suluë tkòka pë' kè tö Skéköl dalöie, esepa tsata. Ie' wā iyé alaköl tso'. <sup>2</sup> Ì sulu e' tköke a' shuā, erë e' wa a' e' ttsökekaiā taië. E' skéie ¿wes e' kè wā a' jaëne? ¿Wes e' kè wā a' eriane? Warma wëm ñe' uya'ttsabak a' tö a' shuā. <sup>3-4</sup> Eré ye' wák kè ku' a' ta, erë ye' ttöke wes ye' wák tso' a' ta es. Wëm ñe' shulétke ye' tö Skékëpa Jesús ttö wa wes ye' wák tso' a' ta es. Mik a' ñi dapa'uke eta ee ye' tso'ñak a' ta Wiköl Batse'r wa. Ñies Skékëpa Jesucristo diché tso' a' ta. <sup>5</sup> E' wöshā ta wëm ñe' wömútsa a' tö Satanás ulā a' as iwák dër suluë e' wöklör ta iwák tsatkër mik Skékëpa datskene e' kéwö ska'.

<sup>6</sup> A' e' ttsòka taië sene sulu wa, e' kè dör buaë. ¿Kè a' wā ijcher tö pan wölöwoka elkela tö harinachka kos wölöwéka? <sup>7</sup> Sene sulu e' dör wes pan wölöwoka kèchke\* es, e' tö a' sulu'wekewā. E' kuëki ese kos uyótsa a' shuā. Es a' döraë buaë yësyësë kè a' ì sulu ta'ia wes pan yöule kè a' iwölöwoka iëne es. Cristo kötewā se' nuì skéie. Ie' dör wes obeja jcheke Judiowak Yépa Yërulune Egipto, e' kéwö tkö'woie es. E' kuëki ñermata a' batse'oule Skéköl wōa Cristo batamik. <sup>8</sup> Es kè se' kàne Cristo kötewā se' skéie, e' kéwö tkö'uk pan yöule iwölöwoka wa ese wa. Itkö'üsö pan kè yöule iwölöwoka wa ese wa. E' wà kiane chë tö itkö'üsö kékraë sene mokī yësyësë ese wa. Kè se' kàne itkö'uk sene sulu tö s'sulu'wekewā ese wa.

<sup>9</sup> Yëkkuö iët patké' ye' tö a' a, e' kī ye' iyë' tö a' kè kàne e' batsök trër wakpa ta. <sup>10</sup> Erë pë' kè tö Skéköl dalöie dör trër wakpa ö íyi kkechök taië ese wakpa ö akblökwakpa ö íyi diököl dalöiökwakpa, esepa kè chök ye' ku' a' a. Esepa chópa ye' tö, e'ma a' kawöta duökwa as kè a' e' batsò esepa ta. <sup>11</sup> Wépa yë' ye' tö a' a yëkkuö kī, esepa dör wépa e' chò tö ie'pa erblöke Jesús mik esepa. Erë ie'pa dör trënukwakpa ö íyi kkechök taië wakpa ö íyi diököl dalöiökwakpa ö s'chök suluë wakpa ö bloblopa ö akblökwakpa. Kè a' e' batsök esepa ta, ñies kè a' chkök esepa ta. <sup>12-13</sup> Wépa kè dör Skékëpa Jesús icha ¿wes esepa shulëmi ye' tö? Skéköl wák tö ie'pa shuleraë. Erë wépa dör Skékëpa icha ñi dapa'uke a' ta, esepa kawöta shulè a' tö. E' kuëki a' tö iú wes itso' kitule Skéköl yëkkuö kī es, e' tö ichè: “Yi tö ì sulu wamblé, e' uyótsa a' shuā.”

## 6

### *A' ñippöke e' shuló a' wákpa tö*

<sup>1</sup> Mik a' wële tö ì sulu wamblé iyami eköl kī, eta ¿wes ese mi'ke ie' wā kkatè s'shulökwakpa kè tö Skéköl dalöie, esepa ska'? ¿Iók e' kè shulè a' wákpa dör batse'r e'pa tö? <sup>2</sup> ¿A' kè wā ijcher tö se' batse'r, e'pa tö ká i' wakpa shuleraë aishkuö ta? E' dör es, e' ta ¿wes ì'ñe ta íyi tsitsirla ese è kè shulir a' a? <sup>3</sup> ¿A' kè wā ijcher tö ñies Skéköl biyöchökwakpa shuleraësö? Ie'pa shuleraësö, e' ta ¿wes a' kè a' ñippè tso' ká i' kī ese

\* 5:7 pan wölöwoka kèchke: Judiowak wöblar pan wölöwoka tso' ie'pa u a' e' kos uyótsa Ie'pa Yépa Yërulune Egipto e' kéwö tkö'weketke ie'pa tö e' yöki.

shulir? <sup>4</sup> E' kueki a' welepa ñippöke ñita, e' ta ¿wes ese mi'ke a' wa shulè pè' bānet ska'? <sup>5</sup> I' chéyö a' jaewoie. Yi a a' shulirmi ¿ese kè ku' a' shuā da'a? <sup>6</sup> Erë e' skéie a' mi'ke ñi kkatök s'shulökwakpa kè erblöta' Jesús mik esepa ska'.

<sup>7</sup> A' ñi kkatöke s'shulökwakpa ska', e' è wa iwënewā tö sene sulu e' alékatke a' ki. Idalé'ttsök bèrè ¿e' kè dör ibua'ie? ¿As itö se' íyi ekiblò! <sup>8</sup> Erë e' skéie a' wákpa tö ì sulu ñe' wambleke ñi ta dò s'yamipa erblöke Cristo mik esepa íyi ekibleke a' tö.

<sup>9</sup> ¿A' kè wa ijcher tö wépa dör ì sulu wamblökwakpa, esepa kè dòpa ì blúie Skéköl tso' e' a? Kè a' e' kitö'uk. Wépa dör trënukwakpa, wépa dör íyi diököl dalöiökwakpa, s'senewābak dalöseukwā wakpa, wépa trër wépa ta, alakölpa trër alakölpa ta, esepa kos kè dòpa ì blúie Skéköl tso' e' a. <sup>10</sup> Ñies wépa dör akblökwakpa, wépa dör íyi kkechök tajë wakpa, bloblopa, s'chök suluë wakpa, esepa kos kè dòpa ì blúie Skéköl tso' e' a. <sup>11</sup> A' welepa bak senuk íyi ekkè wamblök, erë Skéköl tö a' paköa'bak, a' batseo'bak, a' klöo'bak wes pè' buaë yësyësë es iWiköl wa Skékëpa Jesucristo ttö wa.

### *Skéköl kè wa se' tsatkëne as se' tö ì sulu wamblöia*

<sup>12</sup> A' welepa tö icheke: “se' wa kawö tso', ì kos kiane wè se' ki, ese woie.” Erë ye' ichè tö kè ì ulitane dör buaë se' a wè. Ye' wa kawö ta' ì ulitane woie, erë kè ye' e' mùpattsa as ilè e' alökā ye' ki. <sup>13-14</sup> A' welepa tö icheke: “chkè dör s'ñawi a, ñies s'ñawi dör chkè a.” E' yëne erë aishkuö ta' íyi böt ñe' ewerawa Skéköl tö. Erë s'chkà kè dör trënoie. Skéköl tö s'chkà shke'werakāne aishkuö ta' idiché tajë wa wes ie' tö Skékëpa Jesús shkeo'kane es. E' kueki s'chkà kè meneat trënoie wes a' tö ibikeitseke es, imeneat ì buaë woie Skékëpa a, ñies ie' tö s'chkà kkö'neke.

<sup>15</sup> ¿A' kè wa ijcher tö se' batsulewā Cristo mik, e' kueki se' chkà dör etkè ie' chkà ta? E' dör es, e' ta ¿wes se' tö s'chkà dör Cristo icha e' ia'wëmika senukka alaköl sulusi ta' ese wa? ¿Kè se' kane e' ia'ukka yës! <sup>16</sup> ¿A' kè wa ijcher tö mik yi sené alaköl sulusi ta, e' ta ie'pa bøl míā wes wák eköl è es? E' dör wes itso' kitule Skéköl yëkkuö ki es. E' tö wëm ena ilaköl e' ché i' es: “Ie'pa bøl serdaë ñita ta' ie'pa míā wes wák eköl è es.”\* <sup>17</sup> Erë yi batsulewā Skékëpa Jesús mik, ese dör wes wák eköl è es ie' ta.

<sup>18</sup> E' kueki a' tkóshkar trë yöki. Sene sulu skà kos, e' kè tö s'chkà dalösewèwā wes trë es. Mik se' trërke, etā s'chkà dör Cristo icha, e' méttasö o'ka kè dör Cristo icha, ese a. E' wa s'wák chkà dalösewéwasö. <sup>19-20</sup> ¿A' kè wa ijcher tö a' chkà dör Wiköl Batse'r e' wé? Skéköl tö iWiköl mé a' a, e' tso' a' a. Ie' tö a' to'ttsābak, e' ské dör darërë. A' kè dör a' wákpa icha, a' dör ie' icha. E' kueki a' ké senuk yësyësë as ie' kikarka.

## 7

### *Se' serwā ñita e' pakè*

<sup>1</sup> Ì chaki' a' tö ye' a yëkkuö ki, e' wà iuteke ye' tö i'ñe. A' tö ye' a ichaki' tö ¿buaë idör tö se' kè serwā alakölpa ta? <sup>2</sup> Erë ye' ichè a' a tö tajë trë tso', e' yöki a' kos maso tsúwā eköl eköl. <sup>3</sup> A' wépa kos kawöta senuk ilaköl ta, es ñies a' alakölpa kos kawöta senuk iwëm ta. <sup>4</sup> Alaköl chkà kè meneat ie' wák è a, e' meneat ñies iwëm a. Es ñies iwëm chkà kè meneat ie' wák è a, e' meneat ñies ilaköl a. <sup>5</sup> Ie'pa kè kane ichkà kkëuk ñi yöki. Erë ie'pa kawö mé ñi a e' batsöktsā ñi yöki ekuölö è ttoie S'yé ta, e' ta e' è dalewa kè ie'pa ñi köpawā. Mik ká e' tka, etā ie'pa ñi kówāne dö' Satanás tö ie'pa erkiöwè trënuke, kè ie'pa diché dë'ka e' kkö'nuk e' kueki. <sup>6</sup> Erë ye' kè ku' a' a ichök tö a' kawöta ñi batsöktsā ñi yöki es, a' ki ikiane, e' ta a' tö iwëmi es. <sup>7</sup> Ye' a ta sulitane mú dör wes ye' es, kè alaköl ta'. Erë Skéköl tö imé sulitane a kuā'ki kuā'ki ñi kimoie.

\* 6:16 Génesis 2.24

<sup>8</sup> A' wépa tso'ia ekörla ñies a' wépa dör schó, esepa a ye' ichè tö buaë idör tö ie'pa mú ser kekraë ekörla wes ye' es. <sup>9</sup> Erë ie'pa kè e' kkö'nuku' trë yöki, e' ta ie'pa mú maso yulòne senowäie. S'serwä e' dör bua'ie maso kkechekesö ñië e' tsata.

<sup>10</sup> A' wépa senewabak, esepa a ye' tö ttè dalöiëno i' meke: a' kè kàne ñi ökwa. Ttè e' kè dör ye' ttè, e' mé Skëképa Jesús tö se' a. Alakölpa kè kàne iwëm ökwa. <sup>11</sup> Erë ie' tö iéwä, e' ta ie' kè kàne senukwä wëm o'ka ta, ie' kawötä senuk ekörla kè wëm ta'. Ie' kè senak es, e' ta ie' ké er bua'ukne iwëm ki. Ñies wépa alaköl ta', esepa kè kàne ilaköl ökwa.

<sup>12-14</sup> A' malepa senewabak, erë e' maso kè erblöta' Jesús mik, esepa a ttè dalöiëno kè meneat Skëképa Jesús wä. Erë esepa a ye' ichè tö a' masopa kè arwa. Iwëm kè erblöta' Jesús mik, isalema e' tsatkërmi ilaköl olomik. Ñies alaköl kè erblöta' Jesús mik, isalema e' tsatkërmi iwëm olomik. Ie'pa ñi éwa, e' ta ie'pa ala'r dör wes pè' kè erblöta' Jesús mik esepa ala'r es, ie'pa tsatkè e' dör darërë. Erë iyé ena imì serke ñita, kè ñi anewa, e' ta isalema ie'pa tsatkërmi iyé ö imì olomik. E' kuëki ye' ichè tö a' maso senakia a' ta, e' ta kè iarwa. <sup>15</sup> Erë a' maso kè erblöta' Jesús mik, e' éna a' akwa kró wa, e' ta kè iwöklö'war a' kè klöulewä iulä a. Erë Skëköl tö se' klöo'bak senuk bèrë ñita. <sup>16</sup> E' kuëki ibua'ie dör tö a' sermiia bèrë ñita. A wëm çì tö be' a' ichök tö be' alaköl kè tsatkërpa be' olomik? A alaköl çì tö be' a' ichök tö be' wëm kè tsatkërpa be' olomik?

<sup>17</sup> E' dör wes ttè wa ye' tö Skëképa Jesús icha erule erule e'pa ulitane wöbla'weke ká wa'ñe es. Ye' tö ie'pa a' ichè tö wes a' ku' Skëköl tö mik a' klöo'itö iwák a' eta, es a' atú bër. Ie' tö ieri mé a' a' seno eköl eköl es. <sup>18</sup> Wépa tottola kkuölit tëule tsir, mik ie'pa klöo' Skëköl tö iwák a' eta, esepa kè kàne e' mane'ukne wes. Es ñies wépa kè wakyöule es, mik Skëköl tö ie'pa klöo' eta, esepa kè kàne e' wakyuök. <sup>19</sup> Se' wakyöule ö kè se' wakyöule e' ska' Skëköl kè tkine yës. Ie' ttè dalöiëno, e' dalöiekesö, e' je' ki ie' tkirke. <sup>20</sup> A' kos e' tsuat wes a' dör mik ie' tö a' klöo' iwák a' eta es. <sup>21</sup> Mik ie' tö a' klöo', eta ç'a' klöulewä kanè mésoie? e' ta kè a' tkinuk e' ki. Erë a' a' kawö tso'ia e' yöktsa e' ulä a, e' ta a' e' yóttsa. <sup>22</sup> Mik ie' tö a' klöo', eta a' klöulewä kanè mésoie, e' ta e' yé'ttsa ie' tö sene sulu ulä a kanebloie Skëképa Jesús a. Es ñies mik Skëköl tö a' klöo', eta a' kè dör kanè méso ñe'se, e' ta e' klöo' Cristo tö ie' wák kanè mésopaie. E' kuëki a' klöulewä kanè mésoie, e' ta kè a' tkinuk e' ki. <sup>23</sup> Skëköl tö a' to'ttsabak, e' kuëki kè a' e' tiukne yile skà ttè dikia. <sup>24</sup> A yamipa, wes a' ku' Skëköl tö mik a' klöo'itö eta, es a' atú bër. A' senú buaë yësyësé ie' a, sene me'itö a' a' e' a.

<sup>25</sup> Ima a' tö ye' chaki' yëkkuö ki wépa tso'ia ekörla, esepa ki, e' iuteke ye' tö i'ñe. Ee ttè kè mène ye' a' Skëképa Jesús wä. Erë ima ibikeitsëyö, e' chekeyö a' a. Skëköl ye' sué er siarë wa e' wa ieri méitö ye' a' iwä jchenowä buaë. E' kuëki i' chekeyö e' mik a' erblömi. <sup>26</sup> I'ñe ta se' serke kawö darërë a, e' kuëki ye' a' ta buaë idir tö se' kos e' tsuat wes s'tso' es. <sup>27</sup> Wëm senewabak, ese kè tö ilaköl ökwa. Wëm duria ekörla, ese tayë kè yular. <sup>28</sup> Erë wëm senéwä, e' ta buaë idir. E' wa ie' kè wä i' sulu wamblëne. Ñies alaköl kam serwä, ese senéwä, e' ta e' dör buaë. E' wa ie' kè wä i' sulu wamblëne. Erë wépa senewabak, esepa we'ikëmi ká i' ki s'weirke ese tö tkökä wépa kè senewabak esepa tsata. E' yöki ye' éna a' tsatkak, e' è kuëki ye' ichè tö buaë idir tö a' ser ekörla.

<sup>29-31</sup> A yamipa, ye' ichè tö kè se' a' kawö ta'ia taië. Wes ká i' dör i'ñe ta e' erkewatke. E' kuëki i'ñe ta ena kekraë kè se' kàne senukia er me'rie i' tso' ká i' ki ese ki. Se' senewabak, esepa kè er mukwä e' ki. Se' iuke siarë, esepa kè er mukwä e' ki. Ñies se' ttsërke buaë, esepa kè er mukwä e' ki. Se' tö i' tuë ta', esepa kè er mukwä i' tso'rak iwä ese ki. Se' serke buaë i' tso' ká i' ki ese mik, esepa kè er mukwä ese ki.

<sup>32</sup> Ye' ki ikiane tö a' mú ttsër buaë, kè tkir i' ki. Wépa serke ekörla, esepa wä kawö tso' kibiie Skëköl iyi sauk ena i' wër buaë ie' wa ese uk. <sup>33</sup> Erë wépa senewabak, esepa

kawöta ì tso' ká i' k<sub>i</sub> ese sauk as iwër buaë itayë wa. <sup>34</sup> Es ie'pa k<sub>i</sub> íyi böt kané tso'. Es ñies alakölpa dör schó ena busipa wëm kè ta', esepa wa kawö tso' kibiie Skëköl íyi sauk. Ie'pa e' mumittsa senuk batse'r. Erë alakölpa senewabak, esepa kawöta ì tso' ká i' k<sub>i</sub> ese sauk as iwër buaë iwëm wa. <sup>35</sup> Ttè ekkè chéyö a' kimoie, kè dör a' wöklö'woie. Ye' k<sub>i</sub> ikiane tö a' ser buaë yësyësë Skëköl è a, kè wötkeku' ì tö.

<sup>36</sup> Wëpa ttè meuletke tayë a senukwa, esepa wele tö ibikeitsè: “Tayë duéswö detke senowa, ñies ye' kè a seneia ekörla. Bua' idir ye' a senukwa ie' ta”, e' ta esepa a ye' ichè tö a' senakwa, e' ta a' senúwa, e' kè dör suluë. A' senúwa. <sup>37</sup> Erë wëpa ttè meuletke tayë a senukwa, erë esepa kè éna senakwaia, e' ta esepa a ye' ichè tö e' dör buaë tö a' kè serwa. Erë a' kawöta ibikeitsökwa bua'iewa kewe tö a' wákpa er wa a' kè senakwa. Ñies a' kawöta isauk buaë tö kè yi ku' a' a ichök tö kè a' senukwa. A' tö ibikeitsétke tö a' senak ekörla kekraë, e' ta bua' idir tö a' kè serwa. <sup>38</sup> Es ye' tö ichè tö wépa senéwa, esepa tö iwé buaë. Erë wépa kè sene'wa, esepa tö iwé bua'ie.

<sup>39</sup> Alaköl senewabak, e' kawöta senuk iwëm è ta dö mik iwëm blënewa eta. Iwëm blënewa e' ta ie' serwamine wëm o'ka ta. Erë ie' kawöta senukwa wëm erblé Skëképa mik ese è ta. <sup>40</sup> Erë ye' ichè tö bua' idir ie' a tö ie' mú ser ekörla, kè senewane. E' tö ie' ttsé'weraë buaë shute. Ye' tö iklö'wé tö ye' a Skëköl Wiköl tso' ñies, e' kuëki ye' tö a' a ichè es.

## 8

### *Iyiwak jchëule íyi diököl tso' dalöiè ese a, e' pakè*

<sup>1</sup> Chkè meule íyi diököl tso' dalöiè ese a, ese k<sub>i</sub> a' tö ye' a ichaki' yëkkuö k<sub>i</sub>, e' iutekeyö ì'ñe.

Ima a' tö íyi diököl ñe'se ché, e' dör moki e' jcher se' wa. Erë kè a' éna ichökwa tö se' wa íyi jcher, e' tö se' kèmi e' ttsökka taië s'malepa k<sub>i</sub>. Erë s'malepa dalëritsekesö, e' tö ie'pa diché k<sub>i</sub> ieraë. <sup>2</sup> Yi e' bikeitsö tö ie' wa íyi jchertke taië, e' wa iwënewa tö kam ie' wa ijcher wes ikawöta jchenuk es. <sup>3</sup> Erë yi tö Skëköl dalëritseke, ese mik ie' bätse buaë.

<sup>4</sup> Chkè meule íyi diököl tso' dalöiè ese a ese katèsö, e' k<sub>i</sub> a' tö ye' a ichaki'. Se' wa ijcher buaë tö íyi diököl ñe'se wák kè ta', e' kuëki kè idör ìie bua'. Skëköl chökle, e' dör eköl è. <sup>5</sup> Pè' kè tö Skëköl dalöiè, esepa tö iklö'wé tö ì dalöiekerakitö, esepa tso' taië serke ká jaì a ö ká i' a. Esepa kíerakitö këköl ö skëképa. Moki esepa tso', <sup>6</sup> erë Skëköl dalöieke se' tö, e' dör Skëköl eköl ème e'. Ie' dör S'yé. Ie' dör íyi ulitane wì, ñies se' tso' ie' è a. Ñies Skëképa dör eköl è, e' dör Jesucristo. Íyi ulitane tso' ie' mik, ñies se' tso' ie' mik.

<sup>7</sup> Erë kè s'yamipa ulitane éna iwà ane buaë tö íyi diököl tso' dalöiè, ese kos kè wà ta'. Ie'pa bak íyi diököl ñe'se dalöiök, e' kuëki e' tso'ia ie'pa er a dö ikké ta. Mik ie'pa tö chkè meule íyi diököl a, ese katé, eta e' k<sub>i</sub> ier tö ikkaté. Ie'pa diché kè dë'ka ierbikò es, ese wöklö'woie. E' kuëki ie'pa tö ittsé tö iianekane ñáie. <sup>8</sup> Se' bats Skëköl mik e' kè dör chkè wa. ì katekesö ö ì kè katèsö e' kè a se' onuk buaë ö suluë ie' wöa. <sup>9</sup> E' jcher a' wa, e' kuëki a' tö iklö'wé tö chkè kos katèmi a' tö. E' yëne, erë a' e' kkö'nú as kè a' ukuömik s'yamipa kam éna iwà ar buaë, esepa ardöne sene sulu a. <sup>10</sup> Ichösö tö be' éna iane buaë, e' mia e' tkéser chkè meule íyi diököl a, ese katök iwé a. Erë e' dalewa s'yami kam éna iwà ar buaë ese eköl tö be' sué chkök ta e' tö ie' erkiöwéka ta imía ta ikatéitö ñies. <sup>11</sup> Be' tö iwé es, e' ta e' wa be' tö se' yami, kè diché dë'ka wé', e' émine sene sulu a ta isulurdawa be' ukuömik. Ie' dör s'yami, ñies Cristo e' mettsa ttëwa ie' skéie. Be' tö iwé es, e' ta be' tö ì sulu wamblé s'yami k<sub>i</sub>. <sup>12</sup> Se' tö s'yamipa kam éna iwà ar buaë, esepa k<sub>i</sub> ì sulu wamblé es, e' ta ñies se' tso' ì sulu wamblök Cristo k<sub>i</sub>. <sup>13</sup> E' kuëki ye' ichè tö s'yami wele armine sene sulu a ye' ukuömik, iyiwak chkà katéyö e' kuëki, e' ta kè ye' tö ikatepaiane.

## 9

*Pablo tö ikanè tsatké*

<sup>1</sup> ¿Wes a' tö ibikeitsèmi tö ye' kè a kawö ta' ì woie wes ye' ki ikiane es? Wësua a' tö ibikeitseke tö ye' kè dör Jesús ttekölpa tsá e'pa eköl. Erë ye' tö Skëképa Jesús sü' ye' wák wöbla wa, e' kuëki moki ye' dör ie'pa eköl. A' dör ye' kaneblöke Skëképa a e' wà. <sup>2</sup> A' wakpa ki iwënewa tö moki ye' dör Jesús ttekölpa tsá e'pa eköl. Q'kapa tö ichèmi tö ye' kè dör es, erë e' kè yënuke a' a.

<sup>3</sup> Wépa tö ye' ché es, esepa yöki ye' e' tsatköke i' es. <sup>4</sup> ¿Wes a' ibikeitsèmi tö wépa wöbla'wëkeyö, esepa kè kawöta ye' kimuk inuköl wa chkoie di' yoie? <sup>5</sup> Nies jima a' ibikeitsè tö ye' kè a kawö ta' senukwa tayë erblöke Jesús mik ese ta tsèmi e' ta wes Jesús ttekölpa malepa ena Jesús ëlpa ena Pedro e'pa tö iwëke es? <sup>6</sup> ¿Ima a' ibikeitsè tö ye' ena Bernabé, sa' böle è kawöta kaneblök sa' wákpa ulà wa e' kkö'noie? <sup>7</sup> ¿Wé a' wa isuule tö ñippökwakpa mi'ke, erë iwákpa e' kkö'nukè ichkè wa idi'yè wa? ¿Wé a' wa isuule tö iyiwö tkèsö, erë kè sö iwà katepa? ¿Wé a' wa isuule tö yi tso' chibo kkö'nuk, erë ese kè tö chibo tsu'diö yepa? <sup>8-9</sup> Ì chök ye' tso' a' a, e' kè bikeitse s'ditsö è wa, ñies itso' kitule Moisés ttè dalöiëno ki, e' tö ichè i' es: “Baka wë'ñe tso' kanebloie trigo wöttsoie, e' kè kawö ta' kkö'pauwë itso' kaneblök e' dalewa as trigowö katöitö.” ¿Ima a' ibikeitsè? ¿Ttè dalöiëno e' me'at Skëköl tö baka wë'ñe è kkö'noie? <sup>10</sup> Au, ie' tö ime'at se' a' ñies. Wépa tö iyiwö tkeke ena wépa tö ishteke, esepa tö iwakanewëke ie'pa tö iwö kak paneke e' kuëki. <sup>11</sup> Es ñies sa' tö Wiköl Batse'r íyi tsá paka' a' a, e' dör wes iyiwö tkèsö es, e' kuëki kè idör suluë tö a' tö sa' kimù ì tso' a' wa ese wa, e' dör wes iyiwö shtekesö es. <sup>12</sup> A' wöbla'ukwakpa skà e' kkö'nuk a' kawöta, e' yitá buaë a' kawöta sa' kkö'nuk.

Erë e' wà kè kine sa' wa a' a. Mik sa' bak a' ska', etá sa' kè wa a' íyi kàne e' kkö'noie. Sa' kaneblé' sa' wákpa ulà wa e' kkö'noie. E' dör darërè sa' a, erë e' kos dalé'ttsé' sa' tö as kè ì tö a' wöklö'ù Cristo tté buaë e' klö'uk. <sup>13</sup> A' wa ijcher tö wépa kaneblöke Skëköl wé tso' Jerusalén e' a, esepa serke ì kanewëke ie'pa tö ese mik. E' wà dò tö iyiwak jcheke ie'pa tö ka' tso' imoka Skëköl a e' ki, ese chkà kak tsekeat ie'pa tö katè. <sup>14</sup> Es ñies Skëképa Jesús tö iyé'at tö wépa kaneblöke ie' a ittè buaë pakök, esepa serdaë kanè e' mik. <sup>15</sup> Erë ye' kè wa íyi ikkè kine a' a yës. Nies ye' kè ku' i' chök a' a as a' tö ye' a imù. Ye' tö Jesús tté buaë pakeke éme, e' tö ye' ttsé'wëke buaë shütë. E' kè yepattsa yi tö ye' ulà a. Ye' a ta buaë idir tö ye' duöwa, erë ye' kè tö a' ulà a ì klö'wëpa.

<sup>16</sup> Erë ye' patküle Jesús tté buaë pakök, e' kuëki e' wa ye' kè a e' ttsënukká yës. Ye' kawöta iwà pakök. Ye' kè tö ipakè, e' ta jwëstela ina ye' ta! <sup>17</sup> Ipakópayö ye' wák er wa, e'ma ye' wa kawö ta' s'ña'woie iki. Erë kanè e' me'at Skëköl tö ye' ulà a, e' kuëki ye' kawöta ipakök. <sup>18</sup> E' dör es e'ma jì dör iské ye' a? Ye' ttsé'ne buaë ipakök éme e' dör iské ye' a. E' wà kiane ché tö eré ye' wa kawö ta' senuk ye' kanè e' wa, erë e' kè ki ye' s'ña'wëku' yës. E' tö ye' ttsé'wëke buaë shütë.

<sup>19</sup> Eré ye' kè dör yi kanè méso, erë ye' e' mettsá sulitane kanè mésoie as kos ie'pa erblömi Jesús mik, ekképa dò erblök imik. <sup>20</sup> Mik ye' tso' judiowak shua, etá ye' serke wes sa' judiowak ser Moisés ttè dalöiëno dikia es as ie'pa erblö Jesús mik. Eré ye' kè ku'ia Moisés ttè dalöiëno e' dikia, erë mik ye' tso' ie'pa shua, etá idalöiekeyö as ie'pa erblö Jesús mik. <sup>21</sup> Es ñies mik ye' tso' pè' kè dör judiowak esepa shua, etá ye' serke wes ie'pa ser es as ie'pa erblö Jesús mik. (Erë kè ì sulu wambleku'yö. E' wà dör tö eré ye' kè ku'ia Moisés ttè dalöiëno e' dikia, erë ye' tso'ia Skëköl ttè dalöiëno e' dikia, ye' tso' Cristo ttè dikia e' kuëki.) <sup>22</sup> Mik ye' tso' s'yamipa kam éna Jesús tté wà ar buaë, esepa shua, etá ye' serke wes ie'pa ser es, as ye' a ie'pa kimer as ie'pa éna iwà ar buaë. Es mik ye' tso' pè'



shuà età ye' serke wës ie'pa es as wës alé ie'pa welepa tsatkër. <sup>23</sup> Ì kòs wekeyö e' dör Jesús tté buaë kí shkōwoie as iwà dōñak ye' ulà a.

<sup>24</sup> A' wà ijcher tö mik se' turke tseë isuoie tö wé e' alömi, età iturkerak seraa, erë eköl è e' alömi, ese ulà a iské dōraë. E' sù a' senú Skököl a buaë as iské dō a' ulà a wës wé e' alé ese ulà a iské de es. <sup>25</sup> Tunukwakpa ulitane e' kkö'nuke, e' yuöke kekraë e' aloka imalepa ki. Ì kòs tö ie'pa wöklö'wëmi, e' olo'yeke ie'pa tö. E' kòs weke ie'pa tö as kal kò yuekerakitö wöshkiie\* tkèkà iwökir ki, ese dō ie'pa ulà a ië' alérak e' skéie. Iské e' chklörta'wà, erë se' iyuleke, e' dör yöbië kè chklörta'wà. <sup>26</sup> Ye' serke Skököl a wës yi tur e' aloka ese es, kè dör wës tunukwak turke éanas ese es. Ye' kè dör wës ñippökwa tö iulà tsiní uyeke é siwà' ki, kè wà ta' ese es. <sup>27</sup> Ye' e' wöklö'uke darërë, ye' chkà kekeyö kësik wa as tö iù wës Skököl ki ikiane es. E' wekeyö es dō' ye' s'patté taië Skökëpa tté wa, erë ye' wák kè ulà a iské dō.

## 10

### *Kè a' minuk iyi diököl dalöie ese wé a*

<sup>1</sup> A yamipa, ye' kè ki ikiane tö a' éna ichòwa tö ì bak se' yamipa bak ká iaiäë Moisés kèwö ska' e'pa ta. Ie'pa kòs wëttse' Skököl tö mò àr taië e' wa. Ñies Skököl diché wa ie'pa kòs baktsa klò wa dayë kiè Dayë Mat, e' shuà kè nune'ka dayë wà. <sup>2</sup> E' dör wës ie'pa wösunerak mò a ena dayë a es iwà kkachoie tö ie'pa batsulewà Moisés mik. <sup>3</sup> Es ñies chkè mé Skököl wák tö ie'pa a, e' è ñé ie'pa ulitane tö. <sup>4</sup> Ñies di' mé ie' wák tö ie'pa a, e' è yé ie'pa ulitane tö. Di' e' dōwëttsaitö ákkuö a. Ákkuö e' tö Cristo wà ché, e' mir ie'pa ta kekraë ikimukrak. <sup>5</sup> Erë ie'pa kibiiepa kè wër Skököl wa buaë. E' kuëki ie'pa kibiiepa durulune, nu atë tkëter ká wa'ñe ká sir poë e' ki.

<sup>6</sup> E' kòs tka ie'pa ta se' a iwà kkachoie tö kè se' kàne ì sulu kkechök wës ie'pa tö ikkeyë' es. <sup>7</sup> Se' kè kàne iyi diököl dalöiök wës ie'pa welepa tö idalöie' es. Ì wamblë' ie'pa tö e' tso' kitule Skököl yëkkuö ki. E' tö ichè: "Ie'pa e' tuléwà chkök di'yök taië buaë iyi diököl dalöioie. E' ukuöki ta ie' kékarak klötök trënuke ì sulu wamblök taië e' ttsé'wōkarak buaë."\* <sup>8</sup> Kè se' kàne trënuke wës ie'pa welepa trënerak es, e' nuí ki ie'pa taië e'pa durulune ká etkè a dōka 23,000. <sup>9</sup> Kè se' kàne Cristo wōñatkök ì sulu wa wës ie'pa welepa iwōñatkë' es, e' nuí ki ie'pa kōtulur tkabè wa. <sup>10</sup> Kè se' kàne kköchökka Skököl wō wës ie'pa welepa kköyë'ka es, e' nuí ki S'ttökulurwak tö ie'pa kōtulur.

<sup>11</sup> İyi ekkè kòs tka s'yamipa bak ká iaiäë, e'pa ta iwà kkachoie se' a tö se' kè kàne ì sulu wamblök wës ie'pa es. E' kòs kiteat Skököl yëkkuö ki se' serke i'ñe ta ká i' erkewatke e' kèwö ska', esepa a ikkachoie tö wépa tö Skököl watéttsa, esepa weirdaë inuí ki.

<sup>12</sup> A' welepa e' bikeitsò tö "ye' e' tkéwà darërë Jesús mik, kè ye' arpamine ì sulu a." Ese wakpa kawōta senuk erkí as kè iarmine ì sulu a. <sup>13</sup> Se' erkirke ì sulu wamblök, ese kòs tköke sulitane ta. Erë Skököl ttò mokijë, ie' kè tö se' mepattsa tö ì sulu tö se' erkiöwè taië shütë kè se' a iwöklör ekkè. Mik se' erkiöweke ì sulu tö, età ie' tö se' a ikkacheraë wës se' tköshkarmi iulà a as se' a iwöklör.

<sup>14</sup> A yamipa, a' dalër taië ye' éna, iyi diököl tso' dalöie ese kòs yöki a' tköshkar bānet. <sup>15</sup> A' kabikeitsò buaë, e' kuëki ì chekeyö a' a, e' bikeitsó ta a' isuëraë tö mokijë idir. <sup>16</sup> Mik se' ñi dapa'uke Cristo kōtewà e' kèwö tkö'uk, età wëstela chèsö Skököl a vino yekesö ñita tka' etkè a e' ki. Vino ñe' tö ie' pé tène taië s'tsatkoie e' wà ché. E' wa se' kòs tso' batsulewà ie' mik. Ñies pan etö è blatekesö ñi a e' ñekesö ñita. E' tö ie' chkà wà ché. E' wa se' kòs tso' batsulewà ie' mik. <sup>17</sup> Se' dör taië, e' kòs tö pan etö è e' ñeke, e' kuëki se' kòs dör wës wák eköl è es.

\* 9:25 kal kò yöle wöshkiie: E' merke tunukwakpa e' alé esepa a, e' kkecheke ie'pa tö taië. Wé ki itkënekà ese wák dalöiërta' taië. \* 10:7 Éxodo 32.6



<sup>18</sup> Ì weke Israel aleripa tö e' wà bikeitsó. Mik ie'pa tö iyiwak jcheke ka' tso' imoka Skëköl a e' ki, etä wëpa tö ese chkà kak kateke, esepa kos tso' ie' dalöiök ñita. Es ñies a' mi'ke íyi diököl dalöio wé a, ta chké meule íyi diököl a, ese kak katé a' tö, e' ta a' tso' idalöiök ie'pa ta ñita. <sup>19</sup> E' wa ye' kè ku' ichök tö íyi diököl ese ena chké meule ia ese diché ta'. <sup>20</sup> Au, kè idör es. Ye' tso' ichök tö pè' kè tö Skëköl dalöie esepa tö iyiwak jcheke mè íyi diököl a, ñermata e' meule aknamapa a, kè meule Skëköl ichök e' a. Ye' kè ki ikiane tö a' e' tiü aknamapa íyi shüa yës. <sup>21</sup> A' kè a Skëképa Jesús tká' ena aknamapa tká' e' wà yanuk ñita. A' kè a Skëképa chké ena aknamapa chké katanuk ñita. <sup>22</sup> Iwésö es, e' ta s'tso' Skëképa tsiriuk as isibirka s'ki. Ie' uluneka s'ki, e' ta ¿wes e' dalé'ttsërmi sia?

### Ì kos ú Skëköl è kikoka

<sup>23</sup> A' welepa tö icheke tö “se' wà kawö tso', ì kos kiane se' ki wè, ese woie.” E' yène erè kè ì ulitane e' dör buaë se' a wè. Ì kos kiane se' ki wè, e' wèmisö, erè kè ì ulitane a s'yamipa er diché iënu. <sup>24</sup> Se' kè kàne tkinuk se' wák è ki. Ñies s'kawöta tkinuk s'malepa ki.

<sup>25-26</sup> Skëköl yëkkuö tö ichè: “Ká i' ena íyi kos tso' iki, e' dör Skëköl icha.”† E' kueki iyiwak chkà watorke iwé a, ese kos katèmisö. Kè iwà chakar tö imeule íyi diököl a ö au as s'er kè tö s'kkatò iki.

<sup>27</sup> Yi kè erblöta' Jesús mik, ese eköl tö a' wele kié chkök ie' ta, ta a' shkak, e' ta a' yú. Ì kos wà a' dène e' kató bèrè kè ichakar as a' er kè tö a' kkatò iki. <sup>28</sup> Erè o'ka tö a' a iché: “Iyiwak chkà se meule íyi diököl a”, e' ta kè ikatar ie' dalërmik, ñies erbikè dalërmik. <sup>29</sup> Ye' tso' ie' erbikè chök, ye' kè ku' a' erbikè chök.

Ye' a kawö ta' iyiwak chkà ulitane katök, ¿wes e' kè katepayö, imène sulu o'ka ki e' è kueki? <sup>30</sup> Ì kateke ye' tö, ese ki ye' tö wèstela cheke Skëköl a, e' ta ¿wes e' sulummi o'ka yöki? ¿Wes e' ki ie' tö ye' chëmi sulué?

<sup>31</sup> E' kueki ì kos yekesö, ñekesö, ñies ì kos wekesö, e' üsö as Skëköl kikarka. <sup>32</sup> A' senú wösh wa as kè yi wöklör a' ukuömik. Judiowak idir ö kè idör judiowak ö wëpa dör Skëköl icha ese idir, ese kos kè wöklö'war. <sup>33</sup> A' senú wes ye' serke es. Ye' wák e' ché senuk kekraë as e' wër buaë sulitane wa. Ye' kè tkirku' ye' wák ki. Ye' tkirke sulitane ki ie'pa kimoie as itsatkërdak.

## 11

<sup>1</sup> A' senú wes ye' serke es. Ye' serke wes Cristo ser es.

### Wes alakölpä kawöta e' uk mik se' ñi dapa'uke eta

<sup>2</sup> Kekraë a' er arke ye' ska'. Ñies ì kos wa ye' tö a' wöblao', e' wekeia a' tö. E' kueki ye' tso' a' kikökka. <sup>3</sup> Erè ye' ki ikiane tö a' wa ijcher tö Cristo dör wëpa dör ie' icha esepa kos wökir. Ñies wëm dör alaköl wökir. Ñies Skëköl dör Cristo wökir. <sup>4</sup> Mik a' ñi dapa'uke ttök Skëköl ta, etä a' wëpa welepa ttöke ie' ta ö ilè chekerakitö ie' ttekölie ta iwökir pabakekewaitö, e' ta e' wa yi dör iwökir e' dalösewekewaitö. <sup>5</sup> E' skéie kè dör es alakölpä a. Ie'pa ttöke Skëköl ta ö ilè chekerakitö ie' ttekölie, kè wökir pabakulewa, e' ta e' wa ie'pa tö yi dör iwökir e' dalösewéwa. Ie'pa dör wes alakölpä tsà tò dabebe esepa es. <sup>6</sup> Alaköl wele kè éna iwökir pabakakwa, e' ta ese mú tö itsà tèe wes wëm es. Erè e' dör jaë taië ie' a. E' kueki buaë idir ie' a tö iwökir pabaköwa. <sup>7-9</sup> Skëköl tö wëm yö' wes ie' wák es, e' kueki wes ie' dör e' wërke wëm ki. E' kueki wëpa kè kàne iwökir pabakökwa mik ittöke ie' ta e' dalewa. Erè alaköl dé'ka wëm wa, e' kè dör tö wëm dé'ka alaköl wa. Ñies alaköl yöne wëm kueki ikimoie, e' kè dör tö wëm yöne alaköl kueki. E' kueki wes wëm dör e' wërke alaköl ki. <sup>10</sup> E' kueki alakölpä ké e' wà kkachök iwökir pabakëwa wa. Ñies ie'pa ké e' uk Skëköl biyöchökwakpa kueki. <sup>11</sup> Erè alakölpä ena wëpa batsulewa Skëképa

† 10:25-26 Salmo 24.1

mik esepa kè meneat ulawa ulawa ñi yöki. E' skéie imeneat ñi kimuk ñi dalöiök. <sup>12</sup> Moki tö alaköl tsá dë'ka wëm tsá wa. Erë ñies e' ukuöki ta wëpa ulitane kurke alaköl wa. Erë se' kos ena íyi kos, e' dë'ka Skököl wa.

<sup>13</sup> A' wakpa tö ibikeitsó. ¿Buaë idir tö alakölpa ttöke Skököl ta wökir kè pabakule? <sup>14</sup> Sulitane wa ijcher tö iwake' meneatbak tö wëm tsà batsì, e' dör jaë. <sup>15</sup> Erë alaköl tsà batsì, e' mène ie' a iwökir pabakoie, e' kuëki e' mène buaë ie' ki ikikoka. <sup>16</sup> Yile kè wa ye' sini'kune, e' ta ese éna íanu tö se' dör Skököl icha erule erule ñi dapa'uke ká wa'ñe, e'pa kos wöblar tö alakölpa ttöke Skököl ta wökir pabakulewa.

### *Wes se' ké Sköképa kötëwa e' këwö tkö'uk*

<sup>17</sup> Ì cheke ye' tö a' a' i' ta, e' kè ki ye' a' a' peñanuk. Mik a' ñi dapa'uke, eta e' wà dettsa suluë ichök ì buaë tsata. <sup>18</sup> Keweie yö ichè tö ye' wa ibiyó jcher tö mik a' ñi dapa'uke, eta a' ñi blabatsélor. Wele ta ye' iklö'wé tö e' dör moki. <sup>19</sup> Moki e' dör buaë tö a' ñi blabatsò as iwërwa a' shua tö a' wëpa wër moki Skököl wa buaë. <sup>20-21</sup> Mik a' ñi dapa'uke Sköképa kötëwa e' këwö tkö'woie chkè wa di'yè wa, eta a' wákpa tö a' chkè ñéwa kè wa iyamipa kè wa ì ta' esepa bikeitse. Bataie ta a' wëlepa atë kè chkaule wëlepa e' ttéka taië blo' wa. E' wa ì ché a' tö tö ikëwö tkö'weke a' tö e' dalösewëwa a' tö. <sup>22</sup> Wësua a' kè u ta' chkoie di'yoie. Wësua se' dör Skököl icha e'pa dalösewëkëwa a' tö. Wësua a' éna s'yamipa dör siarë, esepa jaëwakka. ¿Ì chëmiyö a' a' íyi ekkë kuëki? ¿A' ki ikiane tö ye' tö a' peñè iki? Au, ye' kè tö iwëpa.

<sup>23</sup> Sköképa Jesús tté meneat ye' a' paka'neyö a' a, e' dör i' es: Nañewe kam ie' merttsa, e' yöki ie' tö pan klö'wé. <sup>24</sup> E' ki wëstela chéitö Skököl a. E' ukuöki ta iblatéitö ta iché: “Pan i' dör ye' chkà merdattsa a' tsatkoie e'. I' ú kekraë as a' er arne ye' ska'.” <sup>25</sup> Es ñies mik ie'pa chké one ta tka' a' vino tkër, e' klö'wéitö ta iché: “Vino i' dör ye' pé. Ye' tterawa e' pé tërdaë, e' wa tté pa'alí me' Skököl tö, e' wà de. Bitökicha a' tö iyeke, eta a' er anú ye' ska'.” <sup>26</sup> Es bitökicha a' tö pan ñe' ñé ena vino ñe' yé, e' wa a' tso' ichök tö ie' kötëwa se' skéie. Es a' tö ichè michoë dö mik ie' datskene eta.

<sup>27</sup> E' kuëki yi isie tö pan ñe' ñé ena vino ñe' yé, erë kè iserku' wes kawö tkö'weke ñe' wà kiane ché es, e' ta esepa tso' Sköképa chkà ena ipé dalöseukwa. <sup>28-29</sup> Inésö ena iyésö, erë s'yamipa malepa dör wes wák eköl è es se' ta Sköképa batamik, esepa dalösewëwasö, e' ta Skököl wö kiekésö e' ki. E' kuëki se' kos eköl eköl kawöta e' sauk kewe tö is s'tso', e' ukuöki ta pan nú ena vino yö. <sup>30</sup> Erë a' kè ku' iwà dalöiök es. E' kuëki a' taië kirirke ianewa alabëbë, ñies a' wëlepa duolur. <sup>31</sup> Se' e' sué buaë, e' ma Sköképa kè tö se' shulepa. <sup>32</sup> Erë ie' tö se' shuleke, e' ta e' dör se' kimoie as se' kè kichatër aishkuö ta wëpa kè tö ie' dalöieta' esepa ta ñita. <sup>33</sup> A' yamipa, mik a' ñi dapa'uke chkök ñita Sköképa kötëwa e' këwö tkö'woie, eta a' ñi panú. <sup>34</sup> A' wëpa dué bli wa, e' ta esepa chkóbitu iwák u a' as a' kè tö Skököl wö kiò e' ki a' ñi dapa'uke chkök ñita e' wa. Íyi malè kianeia shulè, ese shulekeyö mik ye' dene a' ska' eta.

## 12

### *Ì merke Wiköl Batse'r wa e' pakè*

<sup>1</sup> A' yamipa, i' ta ye' tö ì merke Wiköl Batse'r wa se' a' e' tté pakeke a' a. Ye' ki ikiane tö a' éna tté e' wà ar buaë. <sup>2</sup> A' wa ijcher buaë tö kenet ta kam a' tö Skököl dalöiö, e' yöki a' bak e' muktsa wëtsè wes alè íyi diököl kè ttò ta', ese dalöiök. <sup>3</sup> E' kuëki i' ñe ta ye' ki ikiane tö a' wa ijcher tö wëpa ttöke Skököl Wiköl wa, esepa kè tö ichepa: “Jesús mú kichatër!” E' sù wëpa kè ttöku' Wiköl Batse'r wa, esepa kè tö ichepa moki: “Jesús dör sulitane Kököl!”

<sup>4</sup> Ì mène se' a' ñi kimoie ese dör kua'ki kua'ki, erë e' wì dör Skököl Wiköl eköl è. <sup>5</sup> E' sù kanè tso' se' wa s'kimoie ese dör kua'ki kua'ki, erë e' wì dör Sköképa Jesús eköl è. <sup>6</sup> E' sù ì wëkesö ese wà dökettsa kua'ki kua'ki, erë e' wì dör Skököl eköl è, e' tö iwakaneweke se'

a as iwà döttsa wes ie' k<sub>i</sub> ikiane es. <sup>7</sup> Se' k<sub>os</sub> eköl eköl a imène Skëköl Wiköl wa s'malepa kimoie. <sup>8</sup> Welepa a imerke Skëköl Wiköl wa Skëköl siwé iskië e' pakoie. Welepa skà a Wiköl e' è wa imerke ttè blëule ese wà pakoie. <sup>9</sup> Welepa skà a imerke Wiköl e' è wa erbloie Skëköl mik bua'ie. Welepa skà a imerke Wiköl e' è wa s'duöke ese bua'wone. <sup>10</sup> Welepa skà a imerke i kè or yi a ese woie. Welepa skà a imerke ttoie Skëköl ttekölie. Welepa skà a imerke isuöie tö yile kapaköke ese dör Skëköl ttè moki ö au. Welepa skà a imerke ttoie ttò kuä'k<sub>i</sub> kuä'k<sub>i</sub> wa. Welepa skà a imerke wépa ttöke ttò kuä'k<sub>i</sub> kuä'k<sub>i</sub> wa, ese wà pakone. <sup>11</sup> Erë ekkè k<sub>os</sub> dör Skëköl Wiköl eköl è e' kanè. Ie' tö imeke se' k<sub>os</sub> a eköl eköl wes ie' k<sub>i</sub> ikiane es. <sup>12-13</sup> Se' dör Cristo icha e'pa dör wes wák eköl è es. Se' ulà ta', klò ta' ena se' yese skà tso' taië, erë e' k<sub>os</sub> wöiëulewà etkëme. Es ñies se' dör kuä'k<sub>i</sub> kuä'k<sub>i</sub>. Se' welepa dör judiowak, se' welepa skà kè dör judiowak, se' welepa klöulewà kanè mésoie, se' welepa skà kè dör es. Erë se' k<sub>os</sub> iënewà Skëköl Wiköl a, e' è a se' k<sub>os</sub> tso'. E' wa se' de wes wák eköl è es Cristo ta' ñita.

<sup>14</sup> S'chkà kè dör etkëme, iyese tso' taië kuä'k<sub>i</sub> kuä'k<sub>i</sub>. <sup>15</sup> Ichösö tö s'klò mú tö ichè: “Ye' kè dör ulà, e' kuëk<sub>i</sub> ye' kè ku' chkà mik.” Ie' tö ichèmi es, erë ie' tso' chkà mik. <sup>16</sup> S'kukuöña mú tö ichè: “Ye' kè dör wöbla, e' kuëk<sub>i</sub> ye' kè ku' chkà mik.” Ie' tö ichèmi es, erë ie' tso' chkà mik. <sup>17</sup> S'chkà k<sub>os</sub> e' mú dör wöbla è, e'ma ¿wes i ttsëmisö? S'chkà k<sub>os</sub> e' mú dör kukuöña è, e'ma ¿i wa íyi alar ttsëmisö? <sup>18</sup> Erë Skëköl kè wà se' chkà yöne es. Ie' tö i k<sub>os</sub> tso' s'chkà mik, e' méat wé ie' k<sub>i</sub> ikiane méat ee as ikaneblò buaë ñita. <sup>19</sup> Es s'chkà ulitane mú dör wöbla è ö kukuöña è, e'ma s'chkà kè dör moki. <sup>20</sup> Erë kè idör es. S'yese tso' taië.

<sup>21</sup> E' kuëk<sub>i</sub> s'wöbla kè a iyënuke s'ulà a: “Be' kè dör iie bua' ye' a.” Es ñies s'wökir kè a iyënuke s'klò a: “Be' kè dör iie bua' ye' a.” <sup>22</sup> E' skéie, s'chkà wésele bikeitsekese tö kè ia i or buaë, e' kè ta' etä kè se' serpa. <sup>23</sup> S'chkà wésele k<sub>i</sub> se' jaërke, kè kkayër ta', ese paiekesö buaë datsi' wa kkö'neke buaë. <sup>24</sup> Erë s'chkà wésele kè k<sub>i</sub> se' jaërku', e' kè paieku'sö datsi' wa. S'chkà wésele bikeitsekese tö kè idör buaë chökle, ese kkö'nekesö bua'ie. Es Skëköl tö s'chkà tulu'wà. <sup>25</sup> Ie' tö iwé es as s'chkà kè ñi blabatsö e' skéie ñi kkö'nurak buaë ñikkë. <sup>26</sup> Se' yese alè dalène s'mik, e' ta' s'chkà k<sub>os</sub> e' tö ittsé. Ñies se' yese alè peñarke buaë, e' ta' s'chkà k<sub>os</sub> e' ttsë'ne buaë.

<sup>27</sup> A' k<sub>os</sub> eköl eköl tso' batsulewà Cristo mik wes wák eköl è es. <sup>28</sup> Se' dör Skëképa Jesús icha e'pa shüa Skëköl tö se' tkë'ka kanè kuä'k<sub>i</sub> kuä'k<sub>i</sub> uk. Kewe ie' tö Jesús ttekölpa tsá, e'pa tkë'ka. E' ukuök<sub>i</sub> ta' ittekölpa malepa tkëneka. E' ukuök<sub>i</sub> ta' s'wöbla'ukwakpa ittè wa esepa tkëneka. E' ukuök<sub>i</sub> ta' i kè or yi a ese ukwakpa tkëneka, ñies s'duöke ese bua'ukwakpa ena s'kimukwakpa ena s'wëttsukwakpa esepa tkëneka. Ñies wépa ttöke ttò kuä'k<sub>i</sub> kuä'k<sub>i</sub> wa, esepa tkëneka. <sup>29</sup> Se' ulitane kè dör Jesús ttekölpa tsá. Se' ulitane kè dör Skëköl ttekölpa. Se' ulitane kè dör s'wöbla'ukwakpa. Se' ulitane kè dör i kè or yi a ese ukwakpa. <sup>30</sup> Se' ulitane kè dör s'duöke ese bua'ukwakpa. Se' ulitane kè ttöpa ttò kuä'k<sub>i</sub> kuä'k<sub>i</sub> wa. I chekerakitö ttò kuä'k<sub>i</sub> kuä'k<sub>i</sub> wa, ese wà kè pakanukne se' ulitane a. <sup>31</sup> Erë i merke se' a Wiköl Batse'r wa, e' bua'ie yuló a' dör poë.

*Se' ñi dalëritsö e' dör ñalä bua'ie*

Erë ñalä bua'ie shütë, e' kkachekeyö a' a i' ta.

## 13

<sup>1</sup> S'ttò kuä'k<sub>i</sub> kuä'k<sub>i</sub> dò Skëköl biyöchökwakpa ttò e' k<sub>os</sub> mú yër ye' a, erë s'malepa kè dalër ye' éna, e' ta' ye' dör wes tabechka ppésö ese blar es ö wes panakkuö ppésö ese blar es kè wà ta'. <sup>2</sup> Ye' mú ttò Skëköl ttekölie, ñies ie' siwé blëule e' k<sub>os</sub> mú ar ye' éna ñies íyi k<sub>os</sub> mú jcher ye' wà ñies ye' mú erblö Skëköl mik taië dò kabata skéu ekkè, erë s'malepa kè dalër ye' éna, e' ta' ye' kè dör i. <sup>3</sup> I k<sub>os</sub> tso' ye' wà e' mú mëttsayö s'siarëpa a, ñies ye'

wák mú e' mùttsa we'ikè siarè Skèköl ttè kueki e' ttsoka\*, erè s'malepa kè dalër ye' éna, e' ta e' kè dör iie bua' ye' a.

<sup>4</sup> Se' ñi dalëritsoke, e' ta ì kòs dalë'ttsekese bërè, ñies se' er buaë chöke s'malepa a. Se' ñi dalëritsoke, e' ta kè se' ukyërta' ñi ki, kè se' e' ttsöta'ka s'malepa ki, kè se' e' bikeitsöta'ka tö se' dör pè' taië. <sup>5</sup> Se' ñi dalëritsoke, e' ta kè s'malepa suèsö er sulu wa, kè se' er muta'wa se' wák è ki, kè se' ulurta'ka bet, ì sulu wamblërke se' ta, e' ta ese nuí olo'yekesö. <sup>6</sup> Se' ñi dalëritsoke, e' ta ì sulu wamblërke ese kè tö se' ttsé'wepa buaë. E' skéie mik s'malepa serke wes ttè moki tö ichè es, e' ta ese je' tö se' ttsé'weke buaë. <sup>7</sup> Se' ñi dalëritsoke, e' ta ì kòs dalë'ttsekese, se' erblò michoë Skèköl mik, ì buaë yè' Skèköl tö se' a ese kòs wà panekesö kröröë, ì kòs wöklö'wekesö.

<sup>8</sup> Se' ñi dalëritsoke e' kè erta'wa. I'ñe ta imerke ttoie Skèköl ttekölie, erè aishkuö ta e' kè merpaia es. I'ñe ta imerke ttoie ttò kuä'ki kuä'ki wa, erè aishkuö ta e' kè ku'ia. I'ñe ta imerke íyi blèule ese jchenoie Wiköl Batse'r wa, erè aishkuö ta e' erdawa. <sup>9</sup> E' wà dör tö ì mène se' a jchenoie i'ñe ta ese kè dör Skèköl íyi wa'ñe, e' dör ikakla è. Ñies ì chekesö Skèköl ttekölie, ese kè dör seraa. <sup>10</sup> Ese kòs erdawa mik ì dör ibua'ie e' de seraa eta.

<sup>11</sup> E' dör i' es: Mik ye' ià alala, eta ye' ttöke wes alala es, ye' erbiköke wes alala es, íyi sukeyö wes alala es. Erè mik ye' kibineone, eta ye' kè dör alala, e' kueki ye' kè seriä wes alala es. <sup>12</sup> I'ñe ta se' wa Skèköl jcher wes íyi olo suèsö wösuö nula wa es. Erè aishkuö ta isuerasö ñi wöshaë. I'ñe ta ie' kak jcher ye' wa, erè aishkuö ta ijcherdawa ye' wa buaë wes ie' wa ye' jcher buaë es.

<sup>13</sup> I'ñe ta se' erblöke Skèköl mik. Ñies ì yè'atbakitö, ese wà panekesö kröröë. Ñies se' ñi dalëritsoke. Íyi mañat ekkè wawekesö i'ñe ta, erè ibua'ie dör se' ñi dalëritsö.

## 14

### *Imène ttoie ttò kuä'ki kuä'ki wa, e' pakè*

<sup>1</sup> A' e' chó ñi dalëritsök buaë. Ñies ì merke se' a Wiköl Batse'r wa ñi kimoie ese yuló poë. Erè ttök Skèköl ttekölie e' yuló bua'ie imalepa tsata. <sup>2</sup> E' wà dör tö yi a imène ttoie ttò kuä'ki wa ese kè ttöku' imalepa ta, ittöke Skèköl è ta. Kè yi skà éna ittöke e' anak. Erè ttè blèulewa ese chekeitö Skèköl Wiköl wa. <sup>3</sup> Erè yi a imène ttoie Skèköl ttekölie, ese ttöke imalepa ta ie'pa er diché kí ioie, ie'pa pattoie ena ie'pa er pabloie. <sup>4</sup> Yi ttöke ttò kuä'ki wa Wiköl Batse'r wa, ese tö iwák è er diché kí ieke. Erè yi ttöke Skèköl ttekölie, ese tö Skèképa Jesús icha malepa er diché kí ieke. <sup>5</sup> Ye' ki ikiane tö a' ulitane mú a imer ttoie ttò kuä'ki kuä'ki wa. Erè a' mú ttò Skèköl ttekölpaie, e' dör ibua'ie ttök ttò kuä'ki kuä'ki wa ese tsata. Erè a' ttöke ttò kuä'ki kuä'ki wa ta yile tö iwà pakène imalepa a as ie'pa er diché kí ier, e' ta e' dör buaë wes yi ttöke Skèköl ttekölie ese es.

<sup>6</sup> A yamipa, e' wà pakekeyö a' a' i' es. Ichösö tö ye' de, e' ttöke a' ta ttò kuä'ki wa, e' ta ¿e' tö a' kimèmi? Au, e' kè dör iie bua'. Erè ilè kkayëne ye' a ese chéneyö a' a' ö ilè jcher ye' wa ese pakéneyö ö ilè chéyö Skèköl ttekölie ö a' wöbla'wéyö ttè wésele wa ese kòs chéyö a' wákpa ttò wa, e' ta e' je' tö a' kimèmi buaë. <sup>7</sup> E' dör wes ma'ma tso' blarta' pulè sù ö ma'ma kicha ta' sù ese blar es. Kè iblane wes ikawöta bla'wè es, e' ta ¿i se' a ichök tö ì bla'wekerakitö? <sup>8</sup> Ñies duk bla'weke ñippökwakpa kioie ñippök ibolökpa ta, e' kè blane wes ibla'weke es, e' ta ñippökwakpa kè bitúpa ñippök. <sup>9</sup> E' sù a' ta itköke. A' ttöke ttò kuä'ki kuä'ki wa, e' ta ¿wes e' wà armi yi éna? A' ttöke é, wes yi ttò ekörla ese es. <sup>10</sup> S'ttò daklilië, e' tso' taië ká i' a, ese kòs wà ane iwákpa éna. <sup>11</sup> Erè wele ttöke iwákpa ttò wa, kè wà ane ye' éna, e' ttséyö, e' ta ie' dör ká kuä'ki wak ye' a, ñies ye' dör ká kuä'ki wak ie' a.

\* 13:3 ye' wák mú e' mùttsa we'ikè siarè: Yèkkuö kèchke wele tö ichè: ye' mú e' mùttsa ña'wèwa

<sup>12</sup> Ì meke Skëköl tō se' a iWiköl wa, ese kōs yuleke a' tō poë. E' kuëki yö ichè a' a, e' wése tō se' malepa dör Skëképa icha e'pa er diché kí ieke, ese kōs yuló bua'iewa.

<sup>13</sup> E' kuëki yi ttōke ttō kuä'ki wa ese wák tō ikió Skëköl a as imütö ie' a iwà pakone imalepa a. <sup>14</sup> Ichösö tō ye' tso' ttök Skëköl ta ttō kuä'ki wa, e' ta mokí ye' tso' ttök ie' ta, erë iwà kè ane ye' wák éna. <sup>15</sup> ¿Wes ye' iwèmi? Ye' iweke i' es: ye' ttōke Skëköl ta ttō kuä'ki wa, ñies ye' ttōke ie' ta ttō ane ye' éna ese wa. E' sù ye' ttsöke ie' kíkokaie ttō kuä'ki wa, erë ñies ye' ttsöke ttō ane ye' éna ese wa. <sup>16</sup> Ichösö tō a' wele tso' wéstela chök Skëköl a ttō kuä'ki wa a' malepa kukua, erë iwà kè ane a' éna, e' ta ¿wes a' ichèmi, “Es e' idir”? <sup>17</sup> Mokí ie' tō wéstela ché buaë Skëköl a, erë e' kè wä a' er diché kí iëne. <sup>18</sup> Ye' ttōke ttō kuä'ki wa taië a' tsata, e' ki ye' tō wéstela cheke Skëköl a. <sup>19</sup> Erë mik se' ñi dapa'uke, eta eë ye' a ta ye' kapaköke ttè böt mañat wà ane se' éna ese wa, e' dör buaë ye' kapaköke ttè taië ttō kuä'ki wa dōka 10.000 kè ane ye' éna e' skéie.

<sup>20</sup> A yamipa, kè a' kabikeitsökiä wes ala'rla es. A' kabikeitsó wes s'kibinetke es. Erë buaë idir tō sene sulu yöki a' kabikeitsò wes ala'rla es. <sup>21</sup> Skëköl tō ichè iyëkkuó ki i' es: “Eré ye' ttöraë ká i' wakpa ta s'ttō kuä'ki kuä'ki wa ena ká kuä'ki kuä'ki wakpa wa, erë ie'pa kè tō ye' ttō iütepa.” <sup>22</sup> E' wa isuésö tō s'ttōke ttō kuä'ki wa e' dör ilè kkachöie wépa kè erblöta' Jesús mik esepa a, kè idör se' erblö Jesús mik esepa a. Erë se' ttōke Skëköl ttekölíe e' je' dör se' erblö ie' mik esepa a. <sup>23</sup> E' wà dör i' es: A' ñi dapa'uke e' kōs tso' ttök ttō kuä'ki kuä'ki kè ane ye' éna ese wa, e' wöshä pè' kè yöne Jesús ttè wa kè erblöta' ie' mik, esepa dewa a' shua, e' ta ie'pa tō ibikeitseraë tō a' dör aliie. <sup>24</sup> Erë e' skéie a' ulitane ttōke Skëköl ttekölíe wà ane sulitane éna ta pè' kè erblöta' Jesús mik kè yöne ie' ttè wa esepa dewa, e' ta ie'pa éna iardaë tō nuì tso' ie'pa ki ta ie'pa e' shulöraë. <sup>25</sup> Ì tso' blëule ie'pa er a, ese yëneka sulitane kukua ta ie'pa e' tköralur kuchè ki Skëköl dalöioie ta icheraëraakitö, “Mokí Skëköl tso' a' ta.”

#### *A' ñi dapa'ü bèrè kè chiliwarka*

<sup>26</sup> A yamipa, ttè ikkè kōs bata dör i' es: Mik a' ñi dapa'uke, eta a' ulitane wä ilè bitumi eköl eköl s'malepa er diché ioie. A' wele wä Salmo bitumi ttsoie. A' wele skà wä ttè tso' s'wöbla'woie. A' wele skà wä ttè kkaché Skëköl tō ese tso' chè. A' wele wä ilè skà tso' chè ttō kuä'ki wa. A' wele wä ì yöne ttō kuä'ki wa, e' wà pakè tso'ne. E' kōs ü ñi er diché ioie. <sup>27</sup> A' wépa ttōke ttō kuä'ki kuä'ki wa, e' ta buaë idir tō bül è ttō, isalema mañal, erë e' dör wè'. Ñies esepa kawöta ttök eköl eköl. Ñies ì chekerakitö e' wà pakökne yile kawöta. <sup>28</sup> Erë kè ye' ku' iwà pakökne, e' ta ie'pa kawöta siwä'blökwä. As ie'pa ttō Skëköl ta ttō kuä'ki wa bānet ekörla. <sup>29</sup> Es ñies wépa a imène ttoie Skëköl ttekölíe, esepa ttó bül ö mañal, e' ukuöki ta a' malepa tō iwà bikeitsó isuöie tō mokí idir ö au. <sup>30</sup> Erë a' wele ttōke Skëköl ttekölíe, e' dalewa a' wele skà tkër eë, ese a Skëköl tō ittè é ñies, e' ta wé tso' ttök ese siwä'bló as iëköl tō icha chö. <sup>31</sup> Es a' ulitane ttömi Skëköl ttekölíe eköl eköl as a' ulitane wöblar ena a' ulitane a diché kí iër. <sup>32-33</sup> Skëköl dör sene bèrè mukwak e' kè chilirta'ka. E' kuëki ie' ki ikiane tō se' ñi dapa'ü bèrè, kè chilirta'ka wes s'batse'rpa erule erule ñi dapa'uke ká wa'ñe es. E' kuëki wépa a imène ttoie Skëköl ttekölípaie, esepa a e' wöklörmi as ittö eköl eköl.

<sup>34</sup> Mik a' ñi dapa'uke, eta alakölpa kōs ké siwä'blökwä. Ie'pa kè kàne ttök, e' skéie ie'pa ké ittsök bèrè wes Skëköl ttè dalöiëno tō ichè es. <sup>35</sup> Ie'pa ttōke mik a' ñi dapa'uke, e' dalewa e' dör jaë. E' kuëki ie'pa éna ilè chakak, e' ta as ichakörakitö iwëm a iu a.

<sup>36</sup> ¿Ima a' ibikeitsè? ¿Skëköl ttè de a' batamik? ¿A' è ulà a ide? Au. ¡A' e' kité! <sup>37</sup> Yi e' bikeitsò tō ie' dör Skëköl tteköl ö Wiköl Batse'r tō ie' ké ichök, e' ta ese kawöta ichök tō ì shteke ye' tō a' a e' dör ì uk se' patkè' Skëképa Jesús tō e'. <sup>38</sup> Erë ye' tō ttè i' watéttsa, ese watërdattsa.



<sup>39</sup> A yamipa, es ye' tō a' a ichè tō ttök Skëköl ttekölíe, e' yuló poë. Ñies wépa ttöke ttō kuá'kí wa, esepa kè wöklö'war. <sup>40</sup> Erë íyi kōs ese ú a' tō buaë yësyësë, kè chiliwarka.

## 15

*Cristo shkenekane, e' pakè*

<sup>1</sup> A yamipa, Jesús tté buaë paka' ye' tō a' a, e' skà pakekeneyö a' a i' ta as e' ska' a' er döne. Ttè ñe' klö'bak a' tō, e' a a' tso' tkëulewá darërëë. <sup>2</sup> A' e' tkëwá michoë ttè buaë ñe' a yësyësë wës ye' tō a' a iwà paka' es, e' ta e' wa a' tsatkëne. Kè idör es, e' ta é ichók a' erblé imik.

<sup>3</sup> Ttè meneat ye' a, e' è paka'neyö a' a. E' bua'ie dör i' es: Cristo kōtewá se' nuì kī wës itso' kitule Skëköl yëkkuö kī es. <sup>4</sup> Ñies ie' wötënewá pö a, e' kī ká de mañat, etá ishkenekane wës itso' kitule Skëköl yëkkuö kī es. <sup>5</sup> Ñies ie' kkaché Cefas a. E' ukuökí ta ie' kkaché ittekölpa tsá dabom eyök kī böi (12), e'pa a. <sup>6</sup> E' ukuökí ta ie' kkaché s'yamipa dōka cien skeyök (500) kīta, e'pa a mik iñi dapa'wé ek tsíní ème etá. Ie'pa ekkëpa welepa blërulunetke, erë ikibiiepa dobyërkeia. <sup>7</sup> E' ukuökí ta ie' e' kkaché Santiago a. E' ukuökí ta ie' e' kkaché ittekölpa kōs a.

<sup>8</sup> Bata ekkë ta ie' e' kkaché ye' a. Ye' dör ittekölpa tsá e'pa yulé, erë ñies ie' e' kkaché ye' a. <sup>9</sup> Skëköl icha, e'pa we'ikök ye' bak. E' kuëkí ye' dör ittekölpa malepa dikia diöshet. Ye' kiök ie'pa eköl, e' kè dör ye' siarla e' a. <sup>10</sup> Erë Skëköl er buaë ché ye' a, e' kuëkí ye' dör ie'pa eköl. Ie' er buaë ché ye' a e' kè dör éme. E' wakanewéyö taië ie'pa malepa tsata. Ñermata kè dör tō ye' wák tō iwakanewé. Iwakanewéyö Skëköl er buaë chò ye' a e' batamik. <sup>11</sup> Erë Jesús tté buaë, e' dör etkëme, e' paka' sa' tō a' a, e' mik a' erblé. Ye' tō ipakè ö ie'pa tō ipakè, e' kè dè' wës.

*Se' duulewá shkerdakane*

<sup>12</sup> Sa' tō ipakeke tō Cristo kōtewá, e' shkenekane. Erë a' welepa tō icheke tō s'duulewá kè shkerta'kane. ¿Wës e' chëmi ie'pa tō? <sup>13</sup> S'duulewá kè shkerta'kane, e'ma Cristo kè shkenekane. <sup>14</sup> Ie' kè shkenúpakane, e'ma é ye' tō ie' tté buaë pakeke. Ñies é a' erblöke ie' mik. <sup>15</sup> Sa' tō ipakeke tō Skëköl tō ie' shkeo'kane, erë s'duulewá kè shkerta'kane, e'ma ie' kè shkenekane. E' mú dör es, e'ma ttè pakeke sa' tō Skëköl ttò wa e' dör kache. <sup>16</sup> S'duulewá kè shkerta'kane, e'ma Cristo kè shkenekane. <sup>17</sup> Ie' kè shkenúpakane, e'ma é a' erblöke ie' mik. Se' tso'ia se' nuì ulá a. <sup>18</sup> Ñies e' mú dör es, e'ma wépa erblé' ie' mik blërulune, esepa tso'tke weinuk. <sup>19</sup> Se' tō Cristo paneke, e' kè wà tkópa aishkuö ta, e'ma se' dör siarë chökke s'malepa dikia.

<sup>20</sup> ¡Erë mokí Cristo shkenekane! Ie' dör se' shkerkane e'pa tsá, e' kuëkí se' wá ijcher tō ñies se' shkerdakane. <sup>21</sup> E' wà dör i' es: Wëm eköl wa s'duòwá e' ali'ka sulitane kī. E' sù wëm skà eköl wa s'duulewá shkerdakane. <sup>22</sup> Sulitane dè'ka Adán wa, e' kuëkí sulitane wömenettsá duökwa wës ie' es. Erë se' batsulewá Cristo mik e'pa kōs shkerdakane wës ie' shkenekane es. <sup>23</sup> Erë e' kōs mir wës ikawōta minuk es. Cristo shkenekane kewe. E' itökí mik idene, etá se' dör ie' icha, e'pa kōs shkerdakane. <sup>24</sup> Etá ká i' erdawa. E' kèwö ska' ta Cristo e' alóraká íyi wökir, íyi wák, íyi kéköl wá diché ta' ese kōs kī. Ì kōs blu'ie ie' tso' e' merattsaitö Skëköl dör S'yé e' ulá a. <sup>25</sup> Erë i'ñe ta ie' tso'ia íyi kōs wëttsuk blu'ie dò mik ibolökpa kōs menewá ie' klò dikia etá. <sup>26</sup> Ie' bolök bata, e' dör s'duòwá, e' kī ie' e' alóraká bataie. <sup>27</sup> E' dör wës itso' kitule Skëköl yëkkuö kī es, e' tō ichè: “Íyi ulitane menewá ie' klò dikia.” Erë se' éna iane tō mik iyëne “íyi ulitane” etá Skëköl kè ku' e' shua, ie' wák tō ì kōs mérö Cristo klò dikia e' kuëkí. <sup>28</sup> Erë mik íyi ulitane mérötke Skëköl tō Cristo dör ilá e' klò dikia, etá ñies Cristo e' murattsá iyé ulá a as íyi ulitane dò ie' dikia.



<sup>29</sup> S'duulewā kè shkerta'kane, e'ma wépa wösune s'duulewā skéie\* ¿iök e' wekerakitö? S'duulewā kè shkerta'kane, e'ma ¿iök ie'pa wösune esepa skéie? <sup>30</sup> S'duulewā kè shkerta'kane, e'ma ¿iök se' e' mùmi weinuk kekraë ttè e' pakök? <sup>31</sup> A yamipa, ká bit ta ye' kī idalò me'rie ttsëskua ye' ttèmiwā yile tö. E' dör moki wës a' tso' batsulewā Skëkëpa Cristo Jesús mik, e' tö ye' ttsë'weke buaë e' dör moki es. <sup>32</sup> Íe Éfeso ye' bolökpa tso' ñippök ye' ta wës iyiwak sulusi es. Kè se' shkerta'kane, e'ma ¿iök e' dalè'ttsekeyö? E' kè dör iie bua' ye' a. Moki tö s'duulewā kè shkerta'kane, e'ma iüsö wës welepa tö icheke es. E' dör i' es: “Bulepa s'duöralur, e' kueki i'ñe se' chkò, se' di'yò buaë kaneë.”

<sup>33</sup> Kè a' e' muktsa e' kītö'uk es. E' dör wës yile tö iyë' es, e' dör i' es. “S'yamipa e' wamblò sulu esepa tö s'ser yësyësë esepa sulu'wekewa.” <sup>34</sup> A' erbikóne buaë yësyësë. Ì sulu kè wamblaria a' tö. A' welepa kè bàtse Skëköl mik yës. E' chéyö a' a' jaëwoka.

### *Se' duulewā shkërdakane ¿is e' chkà dör?*

<sup>35</sup> Isalema a' welepa tö ichakèmi: “Se' duowa, ¿wës e' shkermikane? ¿Is e' chkà dör?” <sup>36</sup> ¿ì chaké a' tö wës kè s'kabikeitsö ese ì chakè es! Iyiwö tkèsö, e' kè dè'kane, ikuala deka ta iwö dalola nunéwa. <sup>37</sup> Mik se' tö trigo wö tkéwa, etā kè se' wā itkëne kuáie. Se' tö iwö dalola tké. <sup>38</sup> E' ukuökī ta ikua deka wës Skëköl ime'atbak es. E' sù iyiwö ulitane döraka iwakmik iwakmik wës imeneat es.

<sup>39</sup> S'ditsö ena iyiwak klòka ena dù ena nima e' wák dör kuā'kī kuā'kī ñies ichkà dör kuā'kī kuā'kī. <sup>40</sup> Ñies ì meneat ká jai a ena ì meneat ká i' a e' dör kuā'kī kuā'kī. E' kos dör buaala, erë iwër kuā'kī kuā'kī. <sup>41</sup> Diwö si'wö bëkwö e' kos dalöburke kuā'kī kuā'kī. Ñies bëkwö kos e' wák dalöburke ek ek kuā'kī kuā'kī.

<sup>42</sup> Mik se' shkënekane, etā se' manenettsatke wës iyiwö tkëne e' manerttsa es. Se' chkà i' nurta'wā, erë mik ishkenekane, etā kè inurpawāia. <sup>43</sup> S'chkà i' dör ësela, erë ishkerdakane olo ta' taië. S'chkà i' kè diché ta', erë ishkerdakane diché ta' taië. <sup>44</sup> S'chkà i' dör buaë senoie i'ñe ta, erë mik ishkenekane, etā imanenettsa senoie buaë aishkuö ta Wiköl Batse'r ta. <sup>45</sup> E' dör wës Skëköl yëkkuö tö ichè es, e' tö ichè: “Wëm tsá kiè Adán, e' yöne se'ie ttsë'ka.”† Erë wëm skà de eköl Adán es, e' dör Cristo, e' yöne sene michoë mukwak. <sup>46</sup> Erë s'chkà senoie aishkuö ta, e' kè mène Skëköl wā se' a kewe. S'chkà i' me'itö se' a kewe. E' itökī chkà senoie aishkuö ta Wiköl Batse'r ta ese merdaë se' a. <sup>47</sup> Wëm tsá yöne íyök wa, e' kueki e' dör ká i' wak. Erë wëm skà de Adán es, e' datse ká jai a. <sup>48</sup> Wépa dör ká i' wakpa, esepa dör wës wëm tsá yöne íyök wa ñe' es. Erë wépa dör Skëköl tso' ká jai a e' icha esepa dör wës wëm datse eë es. <sup>49</sup> Se' tö wëm datse ká jai a e' kītseraë wës wëm yöne íyök wa ñe' kītse'sö es.

<sup>50</sup> A yamipa, ye' tö a' a ichè tö se' chkà i' duöta'wā nurta'wā e' kè döpwā ì blúie Skëköl tso' e' a. <sup>51-52</sup> Ye' ttò ttsó. Ttè bak blëulewā ese chekeyö a' a i' ta: Kè se' ulitane duöpawā erë mik Skëköl duk blane iwà kkachoie tö kawö i' enewatke etā se' kos maneordattsā bet wës s'wöbla tsimiü es. Mik duk ñe' blane, etā s'duulewā kos shkërdaka, kè duöpawāia. Ñies se' tso'ia ttsë'ka, e' chkà maneordattsā. <sup>53</sup> Se' chkà i' nurta'wā, e' maneordattsā chkà kè nurta'wā ese wa. Se' chkà i' duöta'wā, e' maneordattsā chkà kè duöta'wā, ese wa. <sup>54</sup> Mik se' chkà i' manenettsā kè duöpawāia, kè nurpawāia, etā ì tso' kitule Skëköl yëkkuö kī, e' wà de, e' tö ichè: “Duewā kī Skëköl e' aléka.‡ <sup>55</sup> A Duewā, ¿wé be' diché taië e'? ¿Wé be' e' alò taië e'? Be' kirëbata tso' se' rrewoie taië, ¿wé e' i' ta?”§ <sup>56</sup> Se' ser sulu kueki duëwā tö se' rreweke ena sene sulu diché iëne ttè dalöiëno wa. <sup>57</sup> Erë se' nuì olo'yane se' kī Skëkëpa Jesucristo batamik, e' kueki kè se' suaneia s'duöwā yökī. E' kueki kekraë wëstela chekesö Skëköl a.

\* 15:29 s'wösune s'duulewā skéie: E' dör ì uk ie'pa welepa wöblar es. Kè iyëne Skëköl wā tö iü es. † 15:45 Génesis 2.7 ‡ 15:54 Isaías 25.8 § 15:55 Oseas 13.14

<sup>58</sup> E' kuëki, a yamipa dalër ye' éna, a' e' tkówa darërë këkraë Skëképa ttè a, kè a' e' sköktsa bánet. A' wä ijcher tö ì qos kanewé a' tö ie' a, e' kè weirpa éme. E' kuëki a' kí kanabló buaë këkraë ie' a.

## 16

### *Inuköl shteke s'siarëpa kimoie, e' pakè*

<sup>1</sup> Inuköl shteke a' tö s'batse'rpa serke Jerusalén e'pa kimoie, e' pakeke ye' tö a' a' i' ta. Inuköl shtó wes ye' tö iyë' Skëképa icha erule erule tso' Galacia, e'pa a es. <sup>2</sup> Domingo bit ta a' wakpa bik ekkè tö a' inuköl shta'ú tö qos a' ulà a ide. Eta qos a' a imermi, e' bló bánet. A' tö iwé es, eta mik ye' de a' ska', eta kè a' kawöta inuköl shtök, a' wä itso'tke blëule e' kuëki. <sup>3</sup> Mik ye' de a' ska', eta wëpa shushtétke a' tö patkëmi Jerusalén inuköl ñe' muk, e'pa tté choie yëkkuö shtekemiyö e' mi'ke ie'pa wä. Es ye' tö ie'pa patkeke Jerusalén. <sup>4</sup> A' ibikeitsé tö buaë idir tö ye' mi'ñak ie'pa ta, e' ta ye' mi'mi.

### *Pablo tö ishkak e' aleritsé*

<sup>5</sup> Ye' kawöta minuk Macedonia, e' ukuökj ta ye' mi'ke a' ska'. <sup>6</sup> Isalema ye' e' tsukeat a' ska' si' et si' böt ulatök ö isalema ye' e' tsümüat dò yuëdiö tka ekkè. Es a' a ye' kimermi ì kiane ye' ki shkoie ese wa as ye' mi' buaë wé ye' mi'mirö eë. <sup>7</sup> Ye' kè shkak a' pakök shkaule. Ye' mú ser a' ska' ká taië, Skëképa ki ikiane e'ma. <sup>8</sup> Erë ye' e' tsukeat íe Éfeso dò Pentecostés kéwö tka ekkè. <sup>9</sup> Íe buaë ye' a kawö kune Jesús tté buaë pakoie. Ye' bolökpa tso' taië, erë ñies taië pë' éna Jesús tté buaë ttsak. E' kuëki kè ye' e' yaktsa i' ta íe.

<sup>10</sup> Timoteo kanëblöke Skëképa a wes ye' es, e' kuëki ie' de a' ska', e' ta ikiówa buaë. <sup>11</sup> Kè yi kàne ie' dalöseukwa. E' skéie ie' kímú as ie' döne bèrë ye' ska'. Ye' tso', ie' ena s'yamipa urke ie' ta, e'pa panuk.

<sup>12</sup> Ye' tö s'yami Apolo e' cheke a' a' i' ta. Ye' kköyë' ie' a taië tö ie' yúñak s'yamipa mi'ke a' pakök e'pa ta. Ie' kè shkak i' ta, erë wëkkè alè ta ie' a kawö kurmi, eta ie' mi'mi.

### *Pablo tö ie'pa bata patté*

<sup>13</sup> A' senú erki. A' e' tkówa darërë a' erblöke Jesús mik e' a. A' e' tkówa wëbla suë, kè a' suanuk. A' erbló darërë ie' mik. <sup>14</sup> Ì wëke a' tö qos ese ú ñi dalëritsè wa.

<sup>15</sup> A yamipa, a' wä ijcher tö Estéfnas ena iyamipa e'pa dör Acaya wakpa tsá erblë' Jesús mik e'pa. Ie'pa e' ché buaë s'batse'r malepa kímuk. <sup>16</sup> Ye' tö a' a ikië taië tö ie'pa esepa ttò dalöió er bua' wa. Ñies yi isie tso'ñak kanëblök Skëképa kanè a esepa ttò dalöió.

<sup>17</sup> Ye' ttsë'ne buaë tö Estéfnas ena Fortunato ena Acaico e'pa de ye' ska'. Ie'pa tso' ye' kímuk taië a' kè ku' e' skéie. <sup>18</sup> Ie'pa tö ye' er pablé wes a' er pablérakitö es. Buaë idir ie'pa esepa kikökka.

### *Pablo e' chéat*

<sup>19</sup> Skëképa Jesús icha erule erule qos tso' Asia, e'pa tö a' shké'wémi. Áquila ena Prisca ena Skëképa icha ñi dapa'uke ie'pa u a, e'pa tö shkéne patké taië a' a Skëképa ttò wa.

<sup>20</sup> S'yamipa qos tso' íe, e'pa tö a' shké'wémi. A' ñi shké'ú ñi dalër wa.

<sup>21</sup> Ye' dör Pablo e' tö shkéne i' shté ye' wák ulà wa.

<sup>22</sup> Yi kè éna Skëképa dalër, e' ta as ese kichatër. ¡A Skëképa, be' shkóne bet!

<sup>23</sup> As Skëképa Jesús er buaë chò a' a.

<sup>24</sup> Ye' éna a' dalër Cristo Jesús batamik. Es e' idir.

## Yëkkuö skà kit Pablo tö Corinto wakpa a, i' ta ide böt 2 Corintios

Mik Pablo bak kaneblök Macedonia etä ie' tö yëkkuö skà kit Jesús mik erblökwakpa serke Corinto ena ipamik e'pa a. Wëm kiè Tito e' kaneblöke Pablo ta Jesús tté pakök. Ie' tso' Corinto, mik ie' dene Pablo ska' etä ie' tö Jesús mik erblökwakpa tso' Corinto e'pa kabërke ñita e' paké Pablo a. E' kuëki Pablo tö yëkkuö i' kit. Ì tköke Corinto wakpa ta e' dör i': Welepa e' chò tö ie'pa dör Jesús ttekölpa erë kè idör moki. Esepa dè'mi Corinto ta Jesús mik erblökwakpa tö iki'warak buaë. Ie'pa ñekkëpa tö s'wöbla'weke kache tté wa. Ie'pa e' ù tö ie'pa dör buaë Pablo tsata. Ie'pa tö icheke tö Pablo dör siarë kè dör kékëpa taië. Es ie'pa tso' Jesús mik erblökwakpa kitö'uk. Pablo éna Jesús mik erblökwakpa dalër taië e' kè kiane ie' ki tö imi'yal ñala sulusi ki kachökwakpa itöki. E' kuëki ie' tö yëkkuö i' kit ie'pa a as ie'pa tso' ttsë'ka kachökwakpa yöki ena er bua' wa ì kkayëne ie'pa a e' dalöiök. Nies ie' tö ie'pa a iché tö ie' dör Jesús tteköl moki.

E' kúie ta kam ie' tö yëkkuö i' shtò etä ie' tö inuköl ki' ie'pa a Jesús mik erblökwakpa siarëpa tso' Jerusalén e'pa kimoie. S'kitö'ukwakpa tö iyë' tö Pablo tö inuköl e' tseketkö iwák a, erë ie' tö iché tö e' kè dör es. Ie' mi'ke betka Jerusalén pakök e' kuëki Jesús mik erblökwakpa tso' Corinto e'pa kawöta inuköl ki' shtök tsèmi Jerusalén.

### *Shke'wè*

<sup>1</sup> Ye' dör Pablo. Skököl wák er wa ye' dör Cristo Jesús ttekölpa tsá e'pa eköl. S'yami kiè Timoteo, e' tso' ye' ta íe. Sa' tso' yëkkuö i' shtök a' dör Skököl icha erule serke Corinto, e'pa a. Nies sa' tso' yëkkuö i' shtök s'batse'r malepa serke ká malepa ate Acaya, e'pa ulitane a. <sup>2</sup> Skököl dör S'yé ena Skökëpa Jesucristo as e'pa er buaë chò ena sene bèrè mù a' a.

### *Pablo weirke e' shua Skököl kikékaitö*

<sup>3</sup> Skököl dör Skökëpa Jesucristo yé, e' kikökasö taië. Ie' dör S'yé e' tö se' sueke er siarë wa ena se' er pableke kekraë. <sup>4</sup> Sa' weirke kos Cristo tté kuëki, e' shua sa' er pableke Skököl tö as s'malepa weirke esepa er pablò sa' tö wes ie' tö sa' er pableke es. <sup>5</sup> Cristo weine taië, e' ukuö miria sa' ki taië. Erë nies ie' batamik sa' er pablërke taië shute. <sup>6</sup> Sa' weine es, etä e' dör a' er pabloie, a' tsatkoie. Nies Skököl tö sa' er pablé, etä nies e' dör a' er pabloie as a' weirke wes sa' es ese dalé'ttsò a' tö er bua' wa. <sup>7</sup> Sa' wa ijcher tö a' weirke wes sa' es, erë nies a' er pablërke wes sa' er pablërke es. E' kuëki sa' wa ijcher buaë tö a' kè tö sa' eriwepa.

<sup>8</sup> A yamipa, sa' ki ikiane tö a' wa ijcher tö sa' weine Asia e' dör darërè sa' a. Sa' diché kè dè'ka iwöklö'woie. Sa' ibikeits tö kè sa' döpattsa ttsé'ka. <sup>9</sup> Sa' e' ttsé' wes s'wömenettsa ttèwa es. Erë e' wamblène sa' ta as kè sa' erblò sa' wákpa mik, e' skéie as sa' erblò Skököl tö s'shke'wëkane e' wák mik. <sup>10-11</sup> Sa' ttekelur ñe' e' ulà a ie' tö sa' tsatké'ttsa ena sa' tsatkeraëitö. Ie' dapömik sa' moneka darërè. A' sa' kímé S'yé a ikiök sa' ki, e'ma ie' tö sa' tsatké michoë. A' taië tö iwé es, e' ta ie' tö sa' kimerä e' ki wéstela cheraë ie' a se' taië tö.

### *Ì kuëki Pablo kè dè' Corinto*

<sup>12</sup> Sa' er kè tö sa' kkatè ì ki, e' tö sa' ttsé'weke buaë. Kekraë Skököl tö sa' a imè seno yësyësé e' batseitsök buaë er moki wa sulitane wö wa ena bua'ie a' wö wa. Sa' ser es, e' kè dör siwa' iski tso' ká i' a ese wa, e' dör Skököl er buaë chò se' a e' wa. <sup>13-14</sup> Yëkkuö kos kitmi sa' tö a' a, e' wà kè dör ttè blëulewa ese, iaritsmi a' a ena iwà armi a' éna. Eré wes sa' dör e' kè ane a' éna bua'ie, erë ye' ipaneke tö wekkè alè ta a' éna iaräe seraä. E' dör

es, e' tã mik Skëkëpa Jesús datskene, etã e' këwö ska' a' e' ttsörakã buaë sa' wa wës sa' e' ttsörakã buaë a' wa es.

<sup>15</sup> Ye' ibikeitsé tö a' e' ttséka ye' wa buaë, e' kueki warma ye' ibikeitsé tö ye' mi' a' pakök bötökicha as a' ttsë'r buaë bötökicha. <sup>16</sup> Ye' ibikeitsé tö mik ye' mi'ke Macedonia, etã warma ye' tkökemi a' pakök. Ye' datskene, e' tã ye' damitköne a' pakök. Es a' a ye' kimermi shkoie Judea. <sup>17</sup> Erë kè ye' wã ìone es. Ye' dë' a' pakök etökicha è, e' kueki za' ibikeitsé tö ye' kè wã iwà bikeitse buaë kewe? ¿A' ibikeitsé tö ye' ttò bötöt wës s'ditsö èse es? <sup>18</sup> Erë Skëköl ttò mokië, e' ttò wa ye' ichè a' a tö ye' kè ttò a' tã bötöt. <sup>19</sup> E' wã dör tö Jesucristo dör Skëköl Alà, e' kè ttò bötöt, ie' ttò etkëme. Ie' tté buaë paka' ye' ena Silvano ena Timoteo, e'pa tö a' a. <sup>20</sup> Ì kos uk Skëköl kablë', e' wëitö Cristo wa. E' kueki mik se' ñi dapa'uke Skëköl kikökka, etã se' tö icheke: “Es e' idir” Cristo Jesús ttò wa. <sup>21</sup> Yi tö a' ena sa' kkö'neke as se' turlie Cristo mik, e' dör Skëköl. Ie' tö se' shukitbak iwák a. <sup>22</sup> Ie' tö se' er wakyué ie' wák a. Nies iWiköl méitö se' a wës íyi tsá patuésö es ikkachoie tö se' tsatkeraitö da'a.

<sup>23</sup> Ie' wã ye' sũule buaë e' wöwa ye' ichè a' a tö kam ye' döne Corinto warma wës ye' ibikeitsé es, e' wã dör tö kè ye' éna a' kí eriawak. <sup>24</sup> Sa' wã ijcher tö a' erblöke buaë Jesús mik, e' wa a' tkënewã darërë. E' kueki sa' tso' a' kimuk er bua' wa as a' ttsë'r buaë. Kè sa' ku' a' patkök kësik wa a' erblöke e' iütök.

## 2

<sup>1</sup> E' kueki ye' ibikeits tö ye' kè shkakne a' pakök a' eriawoie. <sup>2</sup> A' è tö ye' ttsë'wëmi buaë. Erë a' eriawëyö, e' tã zyí tö ye' ttsë'wëmi buaë? <sup>3</sup> Warma a' ye' ttsë'wë buaë, e' kueki yëkkuö iët kitmiyö a' a e' ki a' pautyö darërë as a' e' shulò, etã es a' kè tö ye' eriawëpa. Ye' iklöo' yësyësè tö a' ulitane ttsë'rdaë buaë ye' tã ñita. <sup>4</sup> Mik ye' tö yëkkuö ñe' kit, etã ye' eriane siarë, ye' chkenewã taië dö ye' iëttsaie ekkë. Erë kè ye' wã ikite a' eriawoie. E' skéie ye' ikitmi as a' éna iar tö a' dalër taië ye' éna.

### *Yi tö ì sulu wamblë' e' nuí olo'yé Pablo tö*

<sup>5</sup> Wëm tö kabene tski'ka a' shuã ì sulu wambléitö e' wa, e' kè wã ye' è eriaone. Isalema ye' tso' ikí kuötkökka, erë ye' ichè tö wës alè ie' tö a' ulitane eriawé. <sup>6</sup> Kos a' kibiiepa tö ie' ki inuí métkë e' dör wë'. <sup>7</sup> Ì ñe tã a' tö inuí olo'yó ikí tã ikimú as kè ieriar taië kè er pablëneia ekkë. <sup>8</sup> E' kueki ye' kköchò a' a taië tö ikkachóne ie' a tö moki a' éna ie' dalër. <sup>9</sup> Yëkkuö ñe' kitmiyö a' a isuöie tö ye' ttò iüté a' tö sërãã ö au. <sup>10</sup> Yi isie nuí olo'yé a' tö ikí, ñies ese ki ye' tö ilo'yëke. Moki yö ichè Cristo wöwa ena a' dalërmik tö ilè nuí tso' kiane olo'yè, e' tã e' olo'yétkeyö <sup>11</sup> as Satanás kè e' alòka se' ki. Wës ie' éna se' sulu'wakwa, e' ane se' éna buaë.

### *Tito kè dë' Tróade*

<sup>12</sup> Mik ye' de ká kiè Tróade Cristo tté buaë pakök eë, etã ye' isué tö Skëkëpa tö ye' a ñalã yuétke buaë itté pakoie. <sup>13</sup> Erë s'yami Tito wã a' biyó done ye' a, e' kè kune ye' wa wës ikablë' es. E' tö ye' tkiwé kabikeitséka taië. E' kueki ye' e' chéat Tróade wakpa a tã ye' miã Macedonia ie' yulök.

### *Íyi ulitane ki se' e' alökami Cristo wa*

<sup>14</sup> Erë wëstela Skëköl a! Këkraë ie' tö sa' wëttseke e' aloka íyi ulitane ki Cristo tã ñita. Sa' wa ie' tö Cristo tté buaë pakeke kã wa'ñe, e' dör wës kiò masmas alabur es. <sup>15</sup> Sa' tö Cristo tté pakeke, e' dör wës íyi alar masmas ña'wë Cristo tö Skëköl a ikikoka es. Sa' dör wës kiò masmas alar es. Erë wëpa tsatkërke ena wëpa kè tsatkërku' esepa böltëpa wöã ilär kuã'ki kuã'ki. <sup>16</sup> Wëpa kè tsatkërku' esepa a tté pakeke sa' tö e' dör wës s'nu alar es, e' wa ie'pa duöralur e' kueki. Erë wëpa tsatkërke esepa a e' dör wës íyi alar buaë es, e' wa sene michoë döraë ie'pa ulã a e' kueki. ¿Yi dirmi ttè i' wakanéuk? <sup>17</sup> Taië pë' tö Skëköl tté

pakeke inuköl è klö'woie, erë sa' kè dör es. Ie' tö sa' patké ipakök, e' kueki sa' tö ipakeke er moki wa ie' wöwa Cristo dalërmik.

### 3

#### *Skököl ttè pa'alì e' wakanéukwakpa sa' dör*

<sup>1</sup> ¿Ima a' ibikeitsè tö sa' wákpa e' tté chöke a' a? ¿Ima a' ibikeitsè tö sa' ki yëkkuö kiane sa' tté choie a' a ö a' tö yëkkuö mèmi sa' a sa' tté choie wës wële tö iweke es? Yëkkuö ese kè kiane sa' ki. <sup>2</sup> A' wakpa dör wës sa' tté choie yëkkuö es. E' kitule sa' er a suule ena aritsule sulitane wa. <sup>3</sup> Iwënewa wöshak tö a' dör wës yëkkuö kitmi Cristo tö patkéne sa' ulà a es. Yëkkuö e' kè kitule tinta wa, e' skéie ikitule Skököl ichökle e' Wiköl wa. E' kè kitule ákkue ki wës ttè dalöiëno kite ákkue ki es. E' skéie ikitule a' er a.

<sup>4</sup> Sa' erblöke Skököl mik Cristo batamik, e' è kueki sa' tö a' ché es. <sup>5</sup> Sa' kè a iyënuke tö kanè wé sa' tö a' shua, e' dör sa' wákpa diché wa. Skököl tö sa' a ieri mé iwakanéwoie. <sup>6</sup> Ie' tö sa' a ieri mé ie' ttè pa'alì mène se' a e' wakanéuk. Ttè e' kè datse ttè dalöiëno mène ká iaiä e' wa. E' skéie idatse Skököl Wiköl wa. Ttè dalöiëno ñe' tö s'kichtatä'ttsa erë Skököl Wiköl tö sene michoë meke se' a.

<sup>7</sup> Ttè dalöiëno këchke kitule ákkue ki, e' mène ká iaiä Israel aleripa a. Mik ttè e' tsá mène, etä Skököl olo bune taië. E' klöne Moisés wö ki dalölöe dö imalepa kè wö dë'wa ie' wö sauk ekkë. Erë dalò e' chowamine enaena. Ttè ñe' mène olo ta' taië ikkachoie tö e' dör ttè dalò ta' taië ese. <sup>8</sup> E' yitā Skököl Wiköl kanè e' olo tkòka taië ttè ñe' tsatā! <sup>9</sup> E' wà dör tö ttè tö s'kichtatä'ttsa ñe' mène dalò ta' taië, je' yitā ttè wa Skököl tö s'klö'wemi wës pë' buaë yësyësë es e' pakè olo ta' taië shute tkòka ttè tsá mène e' tsatā! <sup>10</sup> Moki ttè pa'alì e' olo ta' taië shute, e' o' mik ttè iët olo kè dör i. <sup>11</sup> Ttè kè dör yöbië e' de olo ta' taië, je' yitā ttè dör yöbië e' olo ta' taië shute!

<sup>12</sup> Ttè e' wà paneke sa' tö kröröe, e' kueki sa' tö iwà pakeke sulitane kukua kè suarta'. <sup>13</sup> Sa' kè tö iweku' wës Moisés tö iq' es. E' wö pabakéwa datsi'tak wa as Israel aleripa kè tö isaü tö ie' wö dalò bune e' chowamine seraq. <sup>14</sup> Erë ie'pa er darë'newa, kè éna iwà ane. Ie'pa er pabakulewa wës Moisés wö pabakwa es. Es ñies i'ñe ta' ie'pa aleripa er pabakulewa mik ie'pa tso' ttè këchke mène iyëpa bak e'pa a e' aritsök etä. Ie'pa er pabakulewa e' sirmittsa erblè Cristo mik, e' è wa. E' kueki ie'pa icha kam sirttsa. <sup>15</sup> Dö ikkë ta, mik ie'pa tö yëkkuö kit Moisés tö e' aritseke, etä ie'pa er tso'ia pabakulewa. <sup>16</sup> Erë mik se' er mane'wé Skökëpa a, etä se' er pabakulewa, e' sinettsa. <sup>17</sup> Skökëpa e' dör Skököl Wiköl. Wé e' tso', etä ee se' yënettsa ttè dalöiëno ulà a. <sup>18</sup> Es se' dör wës s'wö kè pabakulewa es, esepa kos ki Cristo olo wërke buaë wës wösuq es. Se' maner michoë as se' dö wës Skökëpa olo ta' taië es. E' kos wakaneweke Skököl Wiköl tö.

### 4

#### *Sa' dör Jesucristo ttekölpa tsá*

<sup>1</sup> Skököl tö sa' sué er siarë wa, e' batamik kanè i' méitö sa' a. E' kueki kè sa' e' chkeuwa. <sup>2</sup> E' skéie kè sa' tö iwakaneweku' blëule wës i' dör jaë ese es. Sa' kè ku' s'kitö'uk. Sa' kè ku' Skököl ttè shutuökka kache tté wa. E' skéie ttè moki pakeke sa' tö yësyësë Skököl wöa as sulitane wa ijcher tö i' ché sa' tö, etä es idir. <sup>3</sup> Erë Jesús tté buaë pakeke sa' tö, e' pabakulewa, e' ta' ipabakulewa wëpa kichatërke esepa è yöki. <sup>4</sup> Ie'pa kè erblöta' Cristo mik. Bé dör ká i' kèköl, e' tö ie'pa er pabakéwa da'äie as kè ie'pa éna Cristo dör Skököl wák sué olo ta' taië e' tté buaë wà ar. <sup>5</sup> Sa' kè tö sa' wákpa tté pakeku'. Sa' tö Jesucristo dör Skökëpa, e' tté pakeke. Sa' e' chò tö sa' dör wës a' kanè mésopa es a' kimioie Jesús dalërmik. <sup>6</sup> Mik Skököl tö ká i' yö', etä ie' iyë': “ká ñinú,” etä ká ñine. Ie' wák tö se' er ñi'wé as ie' olo taië burke Jesucristo wö ki, e' ar se' éna. E' kueki sa' tö ie' tté buaë e' pakeke sulitane a.



*Se' weirke ká i' kǐ, e' dör bērbēr è*

<sup>7</sup> Jesús tté buaë, e' dör wēs íyi bua' bua ské darērē es, e' meneat sa' a wakanewè. Erë sa' kè diché tǎ'. Sa' dör tottola wēs skau es. E' dör iwà kkachoie tō diché wa sa' tō iwakanewēke e' meke Skéköl tō sa' a, e' kè dör sa' diché. <sup>8</sup> Eré kabene tso' sa' kǐ taië kekraë, erë e' kè e' alineka sa' kǐ. Eré sa' kè wǎ ijcher wēs sa' e' ùmi, erë kè sa' e' òwa e' yōkǐ. <sup>9</sup> Eré sa' bolökpa tō sa' tōtieke, erë Skéköl kè wǎ sa' meneat. Eré sa' dettsa iski, erë sa' e' kökekane. <sup>10-11</sup> Se' tso'ia ttsë'ka ká i' a, e' dalewa sa' chöke sa' bolökpa ulà a sa' ttekelur Jesús tté kuëkǐ wēs ie' kötwarakitō es. Sa' weirke es as iwēr wǎ sa' kǐ tō moki ie' shkenekane, e' tso' sa' tǎ. <sup>12</sup> Duewǎ dalò me'rie sa' kǐ, es sa' weirke a' dalërmik as sene michoë dō a' ulà a. <sup>13</sup> Itso' kitule Skéköl yëkkuö kǐ wé yile tō iyë': "Ye' erblé imik e' kuëkǐ ye' iché."\* Es ñies sa' erblöke Skéköl mik wēs yi ñe' es, e' kuëkǐ sa' tō ie' tté pakeke. <sup>14</sup> Sa' wǎ ijcher tō ie' tō Skékëpa Jesús shkeo'kane ñies ie' tō sa' shke'werakane wēs Jesús shkeo'kaneitō es, sa' batsulewǎ Jesús mik e' kuëkǐ. Aishkuö tǎ ie' wǎ sa' miraë a' tǎ ñita wé ie' tso' eë. <sup>15</sup> Sa' weirke kos e' dör a' kimoie as se' taië tō wéstela chò Skéköl a' ier buaë ché se' taië a' e' kuëkǐ. E' wa ie' kǐkardaka taië. <sup>16</sup> E' kuëkǐ sa' kè e' chkeu wǎ. Eré sa' chkà mir wa'k è, erë sa' er diché kǐ iërke kǐta kǐta ká bit ekkè. <sup>17-18</sup> Ì kos suekesö s'wöbla wa ese erta' wa. Erë ì kos kè wërta' ese dör yöbië. E' kuëkǐ kè sa' er menewǎ ì suekesö ese kǐ. E' skéie sa' er me'rie ì kè wërta' ese kǐ. E' kuëkǐ sa' weirke siarë, e' kè dör taië sa' a, e' dör ekuölö è. E' wà dör tō e' wa ì dör buaë, olo tǎ' taië yöbië, e' dōraë sa' ulà a taië shute tkòka kos sa' weine e' tsata.

5

<sup>1</sup> S'chkà dör wēs úla es, e' dör buaë sēnoie ká i' kǐ è. Se' wǎ ijcher tō mik se' úla i' panane, etǎ u yöbië tso'tke Skéköl wǎ se' a ká jai a. E' dör se' chkà pa'alǐ ser michoë yöule ie' wǎ e'. <sup>2</sup> E' kuëkǐ moki ká i' kǐ se' rrerke. S'chkà pa'alǐ merke se' a aishkuö tǎ ká jai a, e' kkecheke se' tō poë. Se' éna s'chkà i' mane'waktke s'chkà pa'alǐ wa wēs datsǐ mane'wēsö es. <sup>3</sup> E' kiane se' kǐ as se' wiköl kè at aishkuö tǎ kè chkà tǎ' wēs se' sume es. <sup>4</sup> Se' tso'ia se' úla i' a etǎ se' kköchöke se' serke chkeulewǎ wēs dalǐ ekkë e' dikǐa es. Kè dör tō se' duakulurtke sēnoie chkà kè tǎ'. E' skéie se' éna s'chkà i' mane'waktke chkà pa'alǐ ñe' wa as ì duöta' wǎ ese manerttsane ì ser michoë ese wa. <sup>5</sup> Skéköl wák tō se' kanewétke maneonuk ñe' es. Ie' tō iWiköl mé se' a wēs íyi tsá patuësö es iwà kkachoie tō iwà dōraë se' ulà a wake'.

<sup>6</sup> E' kuëkǐ kè se' tkirkǐ ì kǐ, eré se' wǎ ijcher tō se' tso' kamië Skékëpa yöki, se' tso'ia ttsë'ka ká i' a e' dalewa. <sup>7</sup> Ì ñe' tǎ ie' kè sunuk se' a, erë se' serke se' erblé ie' mik e' wa. <sup>8</sup> Kè se' tkirkǐ ì kǐ. Se' a tǎ s'chkà i' mú mèatsö, e' tǎ es se' mía senuk ie' ska', e' dör ibua'ie. <sup>9-10</sup> Se' ulitane kawöta dökwa Cristo tkër s'shulo kulé kǐ e' wörki. Ee ì kos wé se' tō ká i' kǐ, buaë ena suluë, ese kkayërdaë tǎ e' ské meraëitō se' a eköl eköl. E' kuëkǐ se' tso'ia ttsë'ka ö se' mía ie' tǎ, erë kekraë se' e' chöke senuk yösyësë as ie' wa iwēr buaë.

*Skéköl er buarne se' kǐ e' pakè*

<sup>11</sup> Sa' tō Skékëpa dalöieke taië, e' kuëkǐ sa' e' chöke darērē s'malepa pablök as ñies ie'pa tō ie' dalöiö. Skéköl wǎ ijcher buaë tō sa' er yösyësë, e' mú jcher a' wǎ ñies. <sup>12</sup> Sa' kè skà ku'ne e' tté chök a' a. E' skéie sa' tso' a' a kawö skà mukne e' ttsòka sa' wa. E' wa a' tō sa' tsatkëmi wépa tō sa' cheke suluë, esepa yöki. Ie'pa esepa e' ttsòka taië is imalepa wa iwēr ese wa, kè dör is ie'pa er dör Skéköl wöa ese wa. <sup>13</sup> Sa' wër alǐie, e' tǎ e' dör Skéköl dalërmik. Kè sa' wër es, e' tǎ e' dör a' kimoie. <sup>14</sup> Sa' éna iane tō Cristo éna se' dalër taië, e' tō sa' ké senuk ie' a. Sa' éna iane tō ie' eköl è kötwǎ sulitane skéie, e' wà kiane ché tō e' dör wēs sulitane kötwǎ es. <sup>15</sup> Ie' kötwǎ sulitane skéie as se' tso'ia ttsë'ka esepa kè seria wēs se' kǐ ikiane es, e' skéie as se' ser wēs ie' kötwǎ shkenekane se' skéie e' kǐ ikiane es.

\* 4:13 Salmo 116.10



<sup>16</sup> E' kuëki kè sa' ku'ia s'malepa bikeitsök wës ká i' wakpa tö ibikeitseke es. Kenet sa' tö Cristo bikeits es. Sa' ibikeits tö ie' dör se' èse è. Erë i'ñe ta sa' kè tö ie' bikeitseku'ia es. <sup>17</sup> E' kuëki yi batsulewä Cristo mik, esepa er maneonettsa yöne pa'ali. Wës ie'pa bak senuk e' kè ku'ia, e' skéie isenémine pa'ali. <sup>18</sup> E' kos wé Skéköl tö. Ie' er buanene se' ki Cristo batamik. Nies ttè buaë pakè e' kané me'itö sa' a. <sup>19</sup> Ttè buaë ñe' dör i' es: Skéköl er buarmine ká ulitane wakpa ki Cristo batamik kè ie'pa wöchakeku' inuü ki. Nies ie' tö ttè buaë e' me' sa' a wà pakè sulitane a. <sup>20</sup> Sa' dör Cristo ttekölpa. E' dör wës Skéköl wák kköchöke a' a sa' wa es. E' kuëki sa' kköchöke a' a Cristo ttò wa tö a' er bua'üne Skéköl a. <sup>21</sup> Cristo kè wä ì sulu wamblène yës, erë Skéköl tö ie' su' wës ì sulu wamblökwa es se' skéie. Ie' tö iwé es as se' batsulewä Cristo mik e'pa saütö wës iwák dör yösyësé es.

## 6

<sup>1</sup> Sa' kaneblöke Skéköl ta ñita, e' kuëki sa' kköchöke a' a tö ie' er buaë ché a' a, e' kè tsar é. <sup>2</sup> E' wà dör tö ie' tö ichè iyëkkuö ki i' es:

“Mik ye' er buaë chò be' a e' kéwö de,  
eta be' kköchöke e' ttséyö.  
Mik be' tsatkè e' kéwö de,  
eta be' kiméyö.”\*

Ye' ttò ttsó: Skéköl er buaë chò a' a, e' kéwö detke. Ie' tö a' tsatkè e' kéwö de i'ñe.

<sup>3</sup> Sa' e' kkö'nuke buaë këkraë sulitane wörki as kè yi tö Skékëpa Jesús watöttsa sa' ukuömik. E' kè dör es, e' ta sa' kaneblöke Skéköl a e' yërmi suluë. <sup>4-5</sup> E' skéie ì ulitane wa sa' tö ikkacheke tö mokì sa' dör Skéköl kanè mésopa. Mikle ta sa' weirke, mikle ta sa' kè wä ì ta, mikle ta kawö darërè tköke sa' ta. Mikle ta sa' burke siarë, sa' wötërke, pè' iërkeka taië sa' ki. Sa' kaneblöke darërëe taië shute, wöñirke taië, tteke bli tö. Erë e' kos dalè'ttseke sa' tö bèrè. <sup>6</sup> Nies sa' tö ikkacheke sa' ser batse'r ena ì jcher se' wä e' wa. Ì kos paneke sa' tö bèrè er bua' wa. Sa' er buaë chöke s'malepa a. E' kos wa sa' tö ikkacheke tö mokì sa' dör Skéköl kanè mésopa. Iwënewä tö Wiköl Batse'r tso' sa' ta. S'malepa dalëritseke sa' tö er mokì wa. <sup>7</sup> Ttè mokì pakeke sa' tö. Ì kos weke sa' tö diché meke Skéköl tö sa' a e' wa. Sa' serke yösyësé, e' dör sa' a wës tabè tso' ñippökwa pa wä ñippoie ena e' tsatkoie es. <sup>8</sup> Mikle ta sa' dalöiërke, mikle ta kè sa' dalöiërku'. Mikle ta sa' kikekeka buaë, mikle ta sa' cheke suluë. Sa' ttò mokì, erë mikle ta sa' sueke kachökwa paie. <sup>9</sup> Ie'pa wa sa' suule buaë, erë ie'pa tö sa' sueke wës ie'pa kè wä sa' suule es. Wësua sa' duökelurtke, erë sa' tso'ia ttsé'ka. Ie'pa tö sa' we'ikè siarë, erë kè itö sa' ttélur. <sup>10</sup> Sa' eriarke taië, erë sa' ttsé'rke buaë këkraë. Wësua sa' dör siarëpa, inuköl kè ta', erë Skéköl ttè wa sa' tö s'blu'weke taië. Wësua sa' kè wä ì ta', ñermata ì ulitane tso' sa' wä.

<sup>11</sup> A Corinto wakpa, sa' ttöke a' ta yösyësé. A' dalër taië sa' éna. <sup>12</sup> E' kè blène sa' wa a' yöki, erë a' je' tö iblé sa' yöki. <sup>13</sup> E' kuëki ye' kköchöke a' a wës alà a iyé kköchò es, sa' bikeitsó er bua' wa wës sa' tö a' bikeitseke es.

### *A' e' batsóttsa ì sulu kos e' yöki*

<sup>14</sup> Kè a' e' batsök wépa kè erblöta' Jesús mik esepa ta. ¿Wës sene yösyësé batsmi sene sulu ta? ¿Wës ká ttsettse ena ká ní a e' shuirirmika ñita? <sup>15</sup> ¿Wës Cristo ena bé sermi bèrè ñita? Yi erblöta' Jesús mik ena yi kè erblöta' imik ¿wës esepa batsmi ñi mik? <sup>16</sup> Se' dör wës Skéköl ichök e' wé mokì es. E' kuëki ¿wës e' ñi sini'kumi íyi diököl tso' dalöie es ta? E' yè' Skéköl tö i' es:

“Ye' serdaë ie'pa shua,  
Ye' shkóraë ie'pa ta ñita;

\* 6:2 Isaías 49.8

Ye' döraë ie'pa Këköl  
ena ie'pa döraë Ye' icha.”†

<sup>17</sup> E' kueki ñies Skëköl tö iyë':

“A' e' yöttsa, a' e' sköttsa bánet pë' kè tö ye' dalöië esepa yöki.

Ì qos dör ñá ese kè kar  
e' ta Ye' tö a' kierawa buaë.

<sup>18</sup> A' serke es, e' ta Ye' döraë a' yéie  
ena Ye' tö a' klö'weraë Ye' ala'rie.

Ye' dör Skëköl diché ta' taië íyi ulitane tsata,  
e' wák tö ichè es.”‡

## 7

<sup>1</sup> A yamipa dalër taië ye' éna, es se' a Skëköl kablë' e' kueki se' e' paiklò sene sulusi qos tö se' er ena se' chkà ia'wëmi, e' yöki. Se' e' chò senuk batse'r kekraë, ie' dalöië taië e' wa.

*Pablo ttsë'wé buaë Corinto wakpa tö.*

<sup>2</sup> Sa' bikeitsó er bua' wa! Kè sa' wa ì sulu wamblëne yi ta. Kè sa' wa yi weine yës. Kè sa' wa yi kitëne kache tté wa. <sup>3</sup> A' dalër taië sa' éna, e' kueki kè ye' ku' ttè i' chök a' kkatoie. Ye' tö a' a iyë'baktke kuaë tö sa' tö a' bikeitsè michoë dò sa' duolur ekkë. <sup>4</sup> Ye' erblöke buaë a' mik. A' wa ye' e' ttséka taië. Sa' weirke qos e' shua ye' er kunene buaë. Ye' ttsë'ne buaë shute.

<sup>5</sup> Sa' de Macedonia ta kè sa' wa kawö kune enoie. E' skéie kabene kí de taië sa' ki. Taië sa' tsiriwé sa' bolökpa tö. Ñies sa' suane taië. <sup>6</sup> Erë Skëköl tö s'er pableke, e' tö sa' er pablé s'yami Tito de sa' ska' e' wa. <sup>7</sup> Kè dör tö ie' de e' è kueki. Ñies wes a' tö ie' er kuwé e' biyó tö sa' er pablé taië. Ie' tö sa' a iché tö suluë a' éna ye' suak. Ñies ie' iché tö ì wamblé a' tö sulu, e' tö a' eriwé taië ta ì ñe ta a' tso'ne ye' tsatkök. Ttè e' tö ye' kí ttsë'wé buaë.

<sup>8</sup> Yëkküö patkë'miyö a' a, eré e' tö a' eriwé, eré kè ye' tkine tö iók ye' tö ipatkë'mi. Tsawe ta ye' ttsë'wéitö sulu, eré ì ñe ta kè ye' ttsërku'ia es. Moki yëkküö e' tö a' eriwé, eré e' dör ekuölö è. <sup>9</sup> Ì ñe ta ye' ttsë'ne buaë. E' kè dör tö ye' tö a' eriao' e' kueki. E' dör tö a' eriane es, e' tö a' er mane'wéne Skëköl a. A' eriane wes Skëköl kí ikiane es, e' kueki sa' kè wa a' suluone yës. <sup>10</sup> Mik se' eriane wes ie' kí ikiane es, eta e' dör se' er mane'woie ie' a as se' tsatkër. E' kueki kè se' kàne ttsë'nuk suluë se' eriar ese ki. Eré se' eriar èse, kè mène Skëköl wa, ese tö duèwa tskeke. <sup>11</sup> A' eriane wes Skëköl kí ikiane es, e' saú, jiwà dettsa buaë! E' wà bikeitsó. E' batamik a' er téwa darërè ta a' ñi kékarak wëm tö ì sulu wamblé a' shua, e' shulök. E' wa a' tö ikkaché tö a' kè ku' ì sulu e' a. Iwënewa tö a' e' tuléwaie darërè. Ì sulu e' tö a' uluwé a' suawéitö. Iwënewa tö a' éna ye' dalëne taië. Iwënewa tö a' tso'tke ì sulu shulök. E' qos wa iwënewa tö moki a' kè ku'ñak ì sulu ñe' a. <sup>12</sup> Ye' kè wa yëkküö ñe' kitëmi a' a wëm tö ì sulu wamblé' ñe' kkatoie. Ñies ye' kè wa ikitëmi yi ta iwambléitö e' tsatkoie. E' skéie ye' tö ikitmi as a' wákpa éna iar buaë Skëköl wöa tö moki a' tö sa' bikeitseke taië. <sup>13</sup> Ì wé a' tö, e' tö sa' er kí kuwéne buaë.

E' kúie ta a' tö Tito er kuwé taië. Ie' ttsë'ne buaë e' tö sa' kí ttsë'wé buaë. <sup>14</sup> A' kika'kayö ie' a ta a' kè wa ye' jaëone. Kekraë sa' ttò moki a' ta, ñies ima sa' e' ttséka a' wa Tito kukua, e' suéitö tö e' dör moki. <sup>15</sup> A' tö ie' kiéwa suane wa painè wa ena a' tso'tke ie' ttò dalöiök, mik e' ska' ie' er ane eta e' tö ie' ké a' kí dalëritsök taië. <sup>16</sup> Ye' erblömi a' mik e' tö ye' ttsë'weke buaë.

## 8

*Se' er buaë chò siarëpa kimoie*

† 6:16 Levítico 26.12; Jeremías 32.38 ‡ 6:18 2 Samuel 7.14; Isafas 52.11; Ezequiel 20.34,41

<sup>1</sup> A yamipa, sa' éna a' a ipakak tö wes Skëköl er buaë ché Skëképa icha erule erule ñi dapa'uke Macedonia kos a, e'pa a. <sup>2</sup> Ie'pa weine siarë iyi ulitane ulà a, erë e' shua ie'pa ttsë'rke buaë. Ie'pa dör siarë, kè ì ta' taië, erë ie'pa tö inuköl kakmé er bua' wa. Wësua ie'pa dör inuköl blúpa. <sup>3</sup> Ye' tö a' a ichè tö ie'pa imé kos ie'pa a imermi, e' tsatá iwákpa er wa. <sup>4</sup> Ie'pa kköché taië sa' a tö ñies kawö mú sa' a s'batse'r malepa serke Jerusalén, e'pa kimoie inuköl wa. <sup>5</sup> Ie'pa tö imé taië shute, sa' kè wá ibikeitse tö ie'pa a imermi ekkë. Kewe ie'pa wákpa e' mé Skëképa a, e' ukuöki ta' ie'pa e' ché sa' a wes Skëköl ki kiane es. <sup>6</sup> E' kuëki sa' tö ikié Tito a tö ie' mi'ne a' ska' inuköl tsá kititö a' shu a e' bata shtöktsa s'siarëpa kimoie. <sup>7</sup> Ì kos weke Skëköl a e' weke a' tö taië. A' erblò buaë Jesús mik. A' tö ttè pakè buaë. A' wá iyi jcher taië. Sulu a' éna s'malepa kimak. Sa' dalër taië a' éna. E' sù sa' ki kiane tö ñies a' er buaë chò taië s'siarëpa a.

<sup>8</sup> Ye' kè ku' ichök a' a patkoie. E' skéie ye' éna isuak tö mokí a' éna s'malepa dalër wes s'yamipa tso' Macedonia e'pa éna s'malepa dalër es. <sup>9</sup> A' wá ijchertke buaë tö Skëképa Jesucristo er buaë ché a' a taië. Ie' iyi tso' taië ká jai a, e' me'atitö dè'bitu ká i' a siarëpaie a' dalërmik as a' blur ie' iyi taië wa.

<sup>10</sup> A' tö ibikeits kewe sulitane yöki tö a' éna s'siarëpa kimak. Duas suköt bak e' wa a' tö iwà kímémi kewe. E' kuëki ima ye' tö ibikeitsè, e' chekeyö a' a. <sup>11</sup> Kanè buaë o'mi a' tö, e' eúwa er bua' wa wes tsawe a' tö ibikeits es. Inuköl shtó s'siarëpa kimoie kos a' a ikit ekkë. <sup>12</sup> Ì kè ta' se' wá, ese kè kiekü' Skëköl tö se' a. Erë ì tso' se' wá ese kakmésö er bua' wa kos se' a imer ekkë, e' ta' e' wër buaë ie' wa.

<sup>13</sup> Ye' kè ku' ichök tö a' iyi kakmú eta' a' atne weinuk kè wá ì ta'. E' skéie buaë idir tö a' ñi kimù ñikkë. <sup>14</sup> Ì ñe ta' a' wá iyi tso' taië, e' kuëki buaë idir tö a' tö s'yamipa kè wá ì ta', esepa kimù. Es aishkuö ta' mik a' kè wá ì ta' taië, erë ie'pa wá itso', eta' ie'pa tö a' kímémi. Es a' ulitane ñi kimùmi ñikkë. <sup>15</sup> E' dör wes itso' kitule Skëköl yëkkuö ki es, e' tö ichè: "Wé tö ishtë taië, e' icha kè bata ate. Wé tö ishtë bërëbërë, e' icha deka wé'."\*

#### *Tito ena iwapiëpa*

<sup>16</sup> Skëköl tö Tito erkiöwé a' kimuk wes sa' éna a' kimak es. E' kuëki ye' tö wéstela cheke Skëköl a. <sup>17</sup> Mik sa' tö ikié Tito a tö ie' mi' a' ska' a' kimuk inuköl shtök, eta' ie' éna a' kimak taië, e' kuëki ie' e' ché iwák er wa minuk a' ska'. <sup>18</sup> Tito ta' s'yami ská patkekemi sa' tö eköl. E' tö Jesús ttè buaë pakeke buaë ká wa'ñe. E' kuëki ie' ttè cheke buaë Skëképa Jesús icha erule erule tso' ká wa'ñe e'pa tö. <sup>19</sup> E' kíie ta' ie'pa kos tö ie' shushtë as imi' sa' ta' Jerusalén, inuköl shteke sa' tö e' muk. E' kaneweke sa' tö buaë Skëképa kikoka ena iwà kkachoie tö mokí sa' éna ie'pa kimak. <sup>20-21</sup> Sa' e' chöke iwakanéuk buaë Skëképa wörki ñies sulitane wörki. E' kuëki wëm ñe' mi'ke sa' wá, e' wa kè yi a sa' kkatënu inuköl shteke taië sa' tö e' ki.

<sup>22</sup> Ñies sa' tö s'yami ská patkeke ie'pa böi ta. E' er me'rie kaneblök buaë kekraë. Bànet sa' tö ie' su'bitu, e' kuëki ie' suule buaë sa' wá. Ñies ie' isué tö a' dör pè' buaë, e' kuëki ie' e' ché sa' kimuk kanè i' wa. <sup>23</sup> Tito dör ye' wapie e' kaneblöke ye' ta' a' kimuk. S'yamipa böi ñe' mi'ke ie' ta, e'pa patké Skëképa Jesús icha eruleë tso' ká wa'ñe e'pa tö. Ie'pa wa Cristo kíkarkëka. <sup>24</sup> E' kuëki ikkachó ie'pa a tö ie'pa dalër a' éna as Skëképa icha eruleë tso' ká wa'ñe e'pa kos wá ijcher tö mokí a' tö s'dalëritseta'. Ikkachó ie'pa a tö wëe' sa' e' ttsòka taië a' wa.

## 9

<sup>1-2</sup> Ye' wá ijcher tö s'batse'r malepa serke Jerusalén, e'pa kimak a' éna er bua' wa. E' kuëki inuköl shteke sa' tö ie'pa a, e' ki ye' kè kawöta a' a yëkkuö ská shtökne. Kekraë ye' e' ttsökeká a' ttè pakök Macedonia wakpa a. Ye' iché ie'pa a tö duas suköt bak e' wa a' dör Acaya wakpa, e'pa éna inuköl mak er bua' wa. E' tö ie'pa kibiie erkiöwé. <sup>3</sup> Erë s'yamipa mañal ñe' patkekeyö a' ska' as ye' e' ttsökeká a' wa e' kè dör é. E' skéie ye' ki kiane tö

\* 8:15 Éxodo 16.18

a' wā inuköl tso'tke kitule wà mè è wēs ye' tō a' pakè es. <sup>4</sup> Dö' Macedonia wakpa döbitu ye' tã e'pa tō isuéwã tō kãm a' tō inuköl e' shtò. E' tō sa' jaéweraé taié sa' ikl'wé tō a' tō ishtétke e' kuéki. ¿Wēs e' kè tō a' jaéwepañak? <sup>5</sup> E' è kuéki ye' ibikeitsé tō buaé idir s'yamipa mañal ñe' a' ikiök tō ie'pa mi' ye' yöki kéwe a' kimuk inuköl muk a' kablè' e' shtöktsã. Es inuköl meke a' tō e' tso'tke kitule mik ye' de etã, iwà kkachoie tō a' imeke er bua' wa, kè dör kkè'blè wa.

<sup>6</sup> Ttè i' anú a' éna: “Yi tō ì kuantké elkela, ese ulà a' iwà wördane elkela. Erë yi tō ì kuantké taié, ese ulà a' iwà wördane taié.” <sup>7</sup> A' ulitane eköl eköl tō imú kōs a' ibikeitsé mè ekkè. Wépa tō imeke ttsé'ne bua' wa esepa dalër Skéköl éna, e' kuéki kè imar er sulu wa ö diché wa. <sup>8</sup> Kè a' tkinuk. Skéköl er bua' kí chòmi a' a' taié as ì kōs kiane a' kí senoie ese dò a' ulà a' wè' kékraé. Nies ie' tō ikí mèmi a' a' taié shüté as a' ulà a' idò taié ì buaé kōs e' wöie. <sup>9</sup> E' dör wēs itso' kitule Skéköl yékkuö kí es. E' tō, yi tō ì meke er bua' wa, ese ché i' es:

“Ie' tō ikakme' taié er bua' wa s'siarépa a;

Ì buaé wéitö e' ska' Skéköl er arke kékraé.”\*

Es Skéköl yékkuö tō ichè. <sup>10</sup> Skéköl tō iwö meke kuantké ena chkè mekeitö se' a' ñè, ñies e' è tō ì kōs kiane se' kí s'kimoie, ese kí meraëitö a' a' taié as a' tō ì buaé ese kí ù taié. <sup>11</sup> Kékraé ie' tō a' a' íyi kí meraé buaé wè' as a' tō s'malepa kimù buaé kékraé. Ie' tō iweraé es as wéstela yër taié ie' a' inuköl mèmi a' tō sa' ulà a' e' kí. <sup>12</sup> Es ì meke a' tō i' Skéköl dalöioie, e' wa s'batse'r malepa kimè kiane, esepa ulà a' ì kiane ie'pa kí ese döraé. E' kíie tã ie'pa tō wéstela cheraé taié ie' a' ttsé'ne bua' wa. <sup>13</sup> Ì buaé wéke a' tō ie'pa kimoie, e' wa iwërdawã tō mokí a' tso' Cristo tté buaé cheke a' tō tō mokí idir e' wà iütök. Nies iwërdawã tō a' tō ie'pa ena sulitane kimeke taié er bua' wa. E' kōs kuéki ie'pa tō Skéköl kíkerakã taié. <sup>14</sup> E' kíie tã ie' er buaé ché a' a' taié shüté, e' kuéki ie'pa tō ikieraé ie' a' a' kí a' dalëritsè taié e' wa. <sup>15</sup> Wéstela chösö Skéköl a' ilà méitö se' a' e' kí, e' dör buaé shüté kè se' a' iyënukekè.

## 10

### *Pablo tō kanè me' Skéköl tō ie' a, e' tsatké*

<sup>1-2</sup> Ye' dör Pablo, e' wák kköchöke a' a' bèrè er bua' wa wēs Cristo es tō ye' ttò ttsó. A' wélepa tō sa' cheke tō sa' kaneblöke e' kè dör Skéköl a, e' dör sa' wákpa a wēs s'ditsö malepa es. Ie'pa icheke tō mik ye' tso' a' ska', etã ye' kësik kè tã' a' uñoie. Erë mik ye' tso' yékkuö shtök kã bánet, e' je' tã ye' kësik deka. Erë e' kè yène. Ye' kësik tã' yi isie tso' ye' chök ese uñoie darërëé. E' kuéki ye' kköchöke a' a' tō a' e' shuló as kè ye' kawötã a' uñuk darërëé mik ye' de a' ska' etã. <sup>3</sup> Mokí sa' dör s'ditsö wēs sulitane es, erë kè sa' ñippökü wēs s'ditsö ñippöke es. <sup>4</sup> Ì tso' sa' wã e' alokã ì sulu kí, e' kè dör wēs ì tso' s'ditsö wã e' alokã ibolökpa kí es. E' skéie e' dör ì meke Skéköl tō sa' a' diché tã' taié e' alokã ì sulu diché kí ese. E' wa sa' tō kache ttè ewékewa. <sup>5</sup> Nies ttè kōs pakarke e' ttsèkã wa s'wöklö'wöie as kè s'wã Skéköl jcher, ese chöwékewa sa' tō. Erbikè kōs klö'wékewã sa' tō mekerö Cristo klò dikia as itö ittò iütö. <sup>6</sup> Mik a' de sa' ttò iütök buaé, etã sa' tso'tke wépa kè éna iütak, esepa kōs we'ikök.

<sup>7</sup> A' tō pé' sueke ikiké è, e' kè dör buaé. A' wélepa e' bikeitsò tō e'pa è dör Cristo icha, e' tã as esepa tō ibikeitsöne. Nies sa' dör Cristo icha wēs ie'pa es. <sup>8</sup> Skéköl tō ye' a' ikéwö me' a' wöbla'wöie. Isalema e' wa ye' e' ttsökã taié shüté. Erë e' kéwö mène ye' a' a' er diché kí ioie, kè dör a' sulu'wöie. E' kuéki kè ye' jaéne e' ttsökã ikéwö mène ye' a' e' wa. <sup>9</sup> Kè a' tō ibikeitsar tō ye' éna a' tkiwak yékkuö shtekeyö a' a' e' wa. <sup>10</sup> Wélepa tō icheke: “Yékkuö kōs kitbitu Pablo tō se' a, e' kí ie' tō se' uñébitu darërè ttsèskua ie' kësik deka buaé se' uñuk. Erë mik itso' se' ska' etã ikësik kè tã' yès. Wēs ie' kapakò e' kè wa yi wã ie' dalöiëne.” <sup>11</sup> Wépa tō icheke es, esepa wã ijchenú tō mik sa' demi a' ska' etã ì kit sa' tō yékkuö kí kã bánet, e' waweraé sa' tō.

\* 9:9 Salmo 112.9

<sup>12</sup> Ie'pa esepa ñi kikökeka taië. Kè sa' diché dè'ka e' chök tö sa' dör buaë wes ie'pa e' chò es. Ie'pa wákpa tö itské ier wa tö ì dör buaë wè. Wes ie'pa wakpa serke e' wéwa ie'pa ñi saù. ¡E' kueki ie'pa dör me'ukuöie! <sup>13</sup> Kanè me' Skököl tö sa' a, e' è wa sa' a e' ttsèrmika. Kè sa' a e' ttsènuuka ì skà wa. Kanè mène sa' a ñies e' wà dör a'. <sup>14</sup> E' kueki kè sa' ku' e' ttsökka taië shütë. Sa' kè dõpa kewe kanèblök a' shua, e' ma é sa' e' ttsòka. Erë sa' tö Cristo tté buaë e' paka' a' a tsawe. <sup>15</sup> Ñies sa' kè e' ttsòka o'ka kanè wa, e' kèwö kè mène Skököl wa sa' a e' kueki. E' skéie sa' ki ikiane tö sa' kanè a' shua e' mú kí iër buaë wes a' kí erblò mir Skökèpa mik es. Erë kè sa' kanèblõpa kos sa' a ikéwö mène e' tsata. <sup>16</sup> Ñies Jesús tté buaë e' kí pakak sa' éna a' serke ee ká bänet tso' diwö mi'kewa e' kke ee. Erë kè sa' éna ipakak ká wé o'ka tso' ipakök ee as kè sa' e' ttsòka o'ka kanè wa.

<sup>17-18</sup> Wépa e' ttséka taië, esepa kè wër buaë Skököl wa. Erë wépa kikéka ie' wák tö, esepa je' wër buaë ie' wa. Wée' itso' kitule iyëkkuö ki i' es: "Yi e' tsakka as ese e' ttsòka ì wé Skököl tö ese wa."\*

## 11

### *Pablo tö s'kitö'ukwakpa ché*

<sup>1</sup> Ye' ttöke aliwakpaie erë a' mú tö ye' dalè'ttsèia bërber è. A' we'ikèyö, ye' ttò kí ttsó ekuölö è. <sup>2</sup> Ye' éna a' dalër taië. Ye' éna a' kkö'nak wes Skököl tö se' kkö'neke es. Ye' ki ikiane tö a' e' tkòwa kekraë darèrèé Jesús è a. E' dör wes ye' tö a' mé senukwa wëm eköl è ta es as a' dò wes busi batse'r dò imaso ulà a es. A' maso e' dör Cristo. <sup>3</sup> I'ñe ta a' tso' tkèulewa buaë darèrèé Cristo è a, erë ye' suane dö' a' e' müttsa e' kitö'uk wes Eva kitö'oka Satanás e' a' tkaèie e' tö kache wa es. Ye' suane dö' a' er tso' buaë etkème Cristo è a, e' watè a' tö. <sup>4</sup> Welepa de a' ska' Jesús tté pakök, erë kè idör imoki wes sa' tö ipakeke es. Erë e' ttseke a' tö buaë. Wiköl tté pakeke ie'pa tö, e' kè dör Wiköl Batse'r dè'wa a' er a e'. Ttè buaë pakeke ie'pa tö, e' kè dör imoki wes sa' tö ipaka' a' a es. Erë esepa kiekewa a' tö buaë. E' kueki ye' suane dö' a' erblò Cristo mik, e' olo'yène a' tö. <sup>5</sup> Ie'pa de a' ska' sa' itöki e' chök tö ie'pa dör Jesús ttekölpa tsá bua'iewa, erë ye' kè e' ttsè'ne ie'pa dikia diöshet yës. <sup>6</sup> Isalema ye' kè a' ipakar buaë wes ie'pa icha pakò es. Erë tté pakeke ye' tö e' wà jcher buaë ye' wa. E' wà kkayè'bitu sa' tö a' a taië iyi ulitane shua.

<sup>7</sup> Mik ye' tö Skököl tté buaë e' paka' a' a, eta ye' kè wa a' ña'one e' ki yës. E' kueki isalema a' tö ibikeitsé tö tté pakeke ye' tö a' a, e' kè dör buaë. Erë es ye' e' wöéwa diöshet as a' dalöier. ¿Ima a' tö ibikeitsè? ¿I wéyö es e' dör sulué? <sup>8</sup> Skökèpa icha erule erule ñi dapa'uke ká bänet, e' dapömik ye' moneka kanèbloie éme a' shua. E' dör wes ie'pa iyi ekiblèyö a' kimoie es. <sup>9</sup> Mik ye' sene a' a' shua, eta ilè kiane ye' ki senioie, e' ta ye' kè wa a' tsirione ese wa. Erë s'yamipa datse Macedonia, e'pa wa ì kos kiane ye' ki e' de ye' a. Es ye' kè wa ì kine a' a, ñies kè yö ì kiepa. <sup>10</sup> Ye' e' ttsò es e' kè yènuksa ye' ulà a a' dör Acaya wakpa e' kos a. E' dör moki wes Cristo tso' ye' a e' dör moki es. <sup>11</sup> Ye' ttò es, ¿e' dör tö ye' kè éna a' dalër? Au, e' kè dör es. ¡Skököl wák wa ijcher buaë tö ye' éna a' dalër!

<sup>12</sup> Ye' kanèblöraë a' shua wes ye' io'bitu es as ie'pa ñe' kè e' ttsòka tö ie'pa kanèblöke wes sa' es. <sup>13</sup> Ie'pa kè dör Jesús ttekölpa tsá moki esepa. Ie'pa dör s'kitö'ukwakpa. Ie'pa e' ò tö ie'pa dör Cristo ttekölpa tsá moki, erë e' kè dör es. <sup>14</sup> E' kè dör ì kè suule se' wa ese. Satanás wák e' ò tö ie'pa dör Skököl biyöchökwak olo ta' taië ese. <sup>15</sup> E' kueki kè se' tkine tö ie' kanè mésopa e' ò tö ie'pa tso' sene yësyesè e' tsatkök. Bata ekkè ta' ie'pa ulà a iské döraë wes ie' wamblörak es.

### *Pablo weine ie' dör Cristo tteköl e' kueki*

\* 10:17-18 Jeremías 9.24



<sup>16</sup> Ye' tō iskà chène a' a, kè a' tō ye' bikeitsök tō ye' dör alije. Erë a' welepa tō ye' bikeitsè es, etā kawō mú ña bērbēr è e' ttsokā wēs aliwak es. <sup>17</sup> Ye' e' ttsōkeka, e' tte kè mène Skēkēpa Jesús wā ye' a. Ye' wāk tō icheke alije. <sup>18</sup> Taiē itso' rak e' ttsōkka iwākpa iyi wa, es ñies ye' e' ttsōkeka wēs ie'pa es. <sup>19</sup> ¡Aj! A' dör iyi jcher taiē ese wakpa. Erë s'kukuò darērē esepa dalè'ttseke a' dör er bua' wa. <sup>20</sup> Wēpa de a' ska' a' klö'ukwā wēs ie'pa icha es, esepa kiekewā buaë a' tō. Ie'pa de a' kitö'uk a' iyi yottsā a' ulà a. Ie'pa e' ttsōke taiē a' kī, a' ppeke a' wō kī, a' cheke erë ie'pa kiéwā a' tō er bua' wa. <sup>21</sup> ¡Aj! ¡Ye' wāk e' jaèune mik ye' ichè tō sa' diché kè dē'ka a' sauk es etā!

Ie'pa diché deka e' ttsokā taiē, e' ta ñies ye' diché deka e' ttsokā. Ye' wāk a ta ye' ttò es, e' dör wēs aliwakpa ttò es. <sup>22</sup> Ie'pa dör hebreowak, e' wa ie'pa e' ttsōkeka taiē. Erë ñies ye' dör ie'pa ditséwō. Ie'pa e' chò tō ie'pa dör Israel aleripa, erë ñies ye' dör Israel aleri. Ie'pa e' ttsōkeka taiē tō ie'pa dör Abraham aleripa. Ñies ye' dör Abraham aleri. <sup>23</sup> Ie'pa e' chò tō ie'pa dör Cristo kanè mésopa. Es ye' dör ñies, erë ye' dör ikanè méso bua'ie ie'pa tsata. Ye' ttò es e' dör wēs aliwak ttò es, erë Cristo a kaneblè e' wa ye' e' aléka taiē ie'pa kī. Ye' wötēule s'wōto wé a taiē ie'pa tsata. Ye' buule tsa'bata daloie ese wa taiē shute ie'pa tsata. Taiē ye' bakshkar ye' duòwā e' ulà a. <sup>24</sup> Sketökicha judiowak tō ye' buk tsa'bata wa. Bitökicha ie'pa tō ye' ppé, etā ie'pa tō ye' ppé dò dabom tkëyök tsá yēnettsā et ekké\* <sup>25</sup> Mañatökicha romawak tō ye' buk kal wa. Etökicha ye' tē'rakitō ák wa ye' ttowā. Mañatökicha kanò kī ye' mirwā, e' wötunewā dayē a. E' shua etökicha ye' bak àr kaltakla kī dayē kī ká et ñiē nañeē. <sup>26</sup> Ye' shké taiē, e' shua di' taiē ena akblökwakpa tō ye' tkiwé siarē. Ye' wāk ditséwōpa ena o'kapa, e'pa tō ye' we'ikeke, e' dalò taiē e' shua ye' shké. Wé pē' serke taiē ena wé pē' kè serku' taiē, ñies dayē kī, ese ska' ye' shké wōsh wa. Ñies wépa e' ò tō ie'pa dör Jesús mik erblökwakpa, esepa dalò mène taiē ye' kī. <sup>27</sup> Ye' kaneblé taiē darērēē. Ye' wōñine taiē, ye' bli dalè'ttsē' taiē, ye' ersi dalè'ttsē' taiē. Mikle ta ye' kè wā ì kune ñanoie, tteke kase tō taiē, kè datsi' ta' wē' e' patroie.

<sup>28</sup> E' kī skà tso', e' dör tō Skēkēpa Jesús icha erule erule, e'pa kos bikeitseyö kekraë tō is ie'pa mir. <sup>29</sup> Mik ie'pa welepa diché kè dē'kaia buaë e' tkowā darērē Jesús mik, etā ye' mik e' dalène. Mik yile tō ie'pa kè ì sulu wamblök, etā e' tō ye' uluwé suluë. <sup>30</sup> Ye' mú e' ttsakka, e'ma ì tō ikkacheke tō ye' kè diché ta' ese wa ye' e' ttsòmika. <sup>31</sup> Skëköl dör Skēkēpa Jesús Yé ena ikëköl kīkarka kekraë, e' wā ijcher tō ye' kè ku' kachök. <sup>32-33</sup> Mik ye' bak Damasco, etā ká e' wökir kaneblöke iblú kiè Aretas e' a, e' tō ishkëkīpa patké ye' klö'ukwā ká e' kköiëule shkit kakkëë, e' wékkö a. Erë s'yamīpa welepa tō ye' iéka kkó a ta tsa' wa ye' émi enaena iwékkö tsitsir tso' ese a dötsā iski. Es ye' tkashkar ie' yöki.

## 12

### *Ì kkaché Skēkēpa tō Pablo a kabsueie*

<sup>1</sup> Kè dör ñie bua', erë ye' kawōtā kī e' ttsōkkaia e' tsatkoie. Ì kkaché Skēkēpa Jesús tō ye' a kabsueie e' pakekeyö a' a i' ta. <sup>2</sup> Wēm sūule ye' wa eköl dör Cristo ttökata, e' minetser ká jai a, e' kī duas de dabom eyök kī tkël (14). Ye' kè wā ijcher tō ie' mine'ka chkaë ö wikölie, e' jcher Skëköl è wā. <sup>3-4</sup> Wēm e' sūule ye' wā, e' minetser ká jai a e' dör ká buaala ee. Eë ttè kè yēnuk se' a ena kè se' a ikéwō mène chē, ese ttséitö. Iskà chekeneyö a' a tō ye' kè wā ijcher tō imine'ka chkaë ö wikölie, e' jcher Skëköl è wā. <sup>5</sup> Wēm ese kīkëmīka ye' tō, erë ye' wāk kè e' kīkōpaka. Erë ye' diché kè ta' e' è wa ye' e' kīkōmīka. <sup>6</sup> Ye' mú e' ttsakka, e'ma ye' a e' ttsërmīka ttè mokī wa, e' kuëkī e' kè dör suluë. Erë kè ye' e' ttsötā'ka as kè yi ibikeitsò tō wēs ye' wēr ena wēs ye' ttò e' tsata ye' dör. <sup>7</sup> İyi taiē buaë kkayēne

\* 11:24 dabom tkëyök tsá yēnettsā et: E' kéwō ska' ta judiowak ttè dalöiëno tō ichè tō kè kawō ta' s'ppök döka dabom tkëyök tsata. Ie'pa wöblane pē' sulusipa ppök döka dabom mañayök kī sulitu as kè itkōka dabom tkëyök tsata.



ye' a ká jai a, ñe' kueki ilè mène ye' a ye' wöowaie as kè ye' e' ttsòka ì buaë su'yö e' wa. E' dör wes dika' tkërwa ye' chkà a es, e' wa ye' rreweke Satanás tö kekraë. <sup>8</sup> Mañatökicha ye' kköyë' Skëkëpa a tö iyóttsa ye' a. <sup>9</sup> Erë ie' ye' iuté: “Mik be' diché kè ta', etä e' ki Ye' diché wënëwa bua'iewa. E' kueki ye' er buaë chò be' a, e' è dör wë' be' a.” E' kueki buaë idir ye' a e' ttsökka ye' diché kè ta' e' wa as Cristo diché taië e' wërwa bua'iewa ye' ki. <sup>10</sup> Mik ye' ttsë'r tö ye' diché kè ta', e' je' ta ye' diché ta' taië. E' kueki mik ye' diché kè ta', mik ye' yërke suluë, mik ye' kè wa ì ta', mik ye' we'ikeke siarë pë' tö, mik ye' kawö tköke suluë, mik ese kos tköke ye' ta' Cristo dalërmik, etä ye' ttsë'ne buaë.

<sup>11</sup> Erë ye' kè dör yi, erë wëpa cheke a' tö tö e'pa dör Jesús ttekölpa tsá bua'iewa, e'pa kè dör ye' tsata. A' tö ye' tsatköpa ie'pa yöki erë e' kè one a' wa. E' kueki a' tö ye' ké e' ttsökka taië wes aliwak es. <sup>12</sup> Mik ye' bak senuk a' shua, etä ye' weine kos e' dalë'ttséyö bèrë er bua' wa. Ñies ì kè or yi a ese wéyö taië a' wörki Skëköl diché taië wa s'tkiwè ekkë. E' wa iwënëwa tö mokí ye' dör Jesús ttekölpa tsá, e'pa eköl. <sup>13</sup> Ye' kè wa a' kàne ye' kanëuk. E' è wa a' wöanëwa Skëkëpa icha erule erule malepa e' dikia diöshet. A' we'ikèyö, e' nuí olo'yó ye' ki.

### *Pablo kablé ie'pa pakök*

<sup>14</sup> Ye' tso'tke shkök a' pakök. I' ta ide mañatökicha. I' ètökicha wes kekraë kè ye' e' maupaka a' mik as a' tö ye' kkö'nù. Ye' kè tkirku' a' íyi ki, ye' tkirke a' wákpa ki. A' dör wes ye' ala'r es. Ila'r kè kawöta iyé kkö'nuk, e' skéie iyé kawöta ila'r kkö'nuk. <sup>15</sup> E' kueki ye' e' chétke ì kos tso' ye' wa e' eukwa er bua' wa a' kimoie dò ye' wákë. Ye' tö a' dalëritseke kíta kíta, etä a' éna ye' dalër ¿e' mir wa'k è?

<sup>16</sup> A' ye' sini'kué buaë tö mik ye' bak a' ska', etä ye' kè e' moneka a' mik. Erë a' wëlepa tö icheke tö ye' tö a' kitö'wé a' inuköl klö'woie akir. <sup>17</sup> ¿Ima a' erbikò tö wëpa patkë'yö a' ska', e'pa wa ye' tö a' kitö'wé? <sup>18</sup> Ye' kköyë' taië Tito a' tö ie' mi' a' ska', etä s'yami skà eköl patkë'miyö ie' ta. ¿Tito tö a' kitö'? Au, ie' sene buaë yësyësë a' shua wes ye' es. Sa' böl sené a' shua ñi suë.

<sup>19</sup> Isalema a' tso'ia ibikeitsök tö sa' e' tsatköke a' yöki. E' kè dör es. Ñermata sa' tso' ttök Skëköl wörki wes s'batsulewa Cristo mik esepa ttö es. A yamipa dalër ye' éna, ì kos weke sa' tö e' dör a' er diché kí ioie. <sup>20</sup> Mokí ye' suane dö' mik ye' de a' ska', etä ye' kè tö a' suë wes ye' ki a' kiane suë es. Ñies ye' suane dö' a' kè tö ye' suë wes a' ki ye' kiane suë es. Ye' suane dö' ye' ikué tö a' ñippöke, a' ukyërke ñi ki, a' ulurke ñi ki, a' er me'rie a' wákpa è ki, a' biyöblöke ñi ki, a' ñi chöke suluë, a' e' ttsökeka taië, a' ñi chiliuke. <sup>21</sup> Ñies ye' suane dö' mik ye' dene a' ska' etä Skëköl tö ye' jaëwè a' kueki. Dö' a' taië kè er maneone. Dö' a' e' ia'ukekaia sene sulusi wa. Dö' a' tso'ia trënuke ena a' tso'ia ì sulu skà kukuëña a' wa e' a. E' dör es, e' ta Skëköl tö ye' iuwëraë siarë a' wa.

## 13

<sup>1</sup> I' ta mañatökicha ye' mi'ke a' pakök. Ì tso' a' wa shulè, e' shuleraësö wes itso' kitule Skëköl yëkkuö ki es, e' tö ichè: “Ttè kos shulekesö etä ittekölpa kiane böl ö mañal ichoie tö mokí idir ö au.” <sup>2</sup> Mik ye' bata dë'rö a' ska', etä wëpa tö ì sulu wamblé, e'pa a' ye' iyë' tö a' kawöta ilo'yök. I' ñe ta ye' kè ku' a' ska', erë ye' tö iskà chekene ekkëpa a' ena a' malepa tso' ì sulu wamblök, esepa a' tö mik ye' dene, etä a' shuleraëyö darërëë. <sup>3</sup> A' ichè tö a' ki ikiane suë tö mokí ye' ttöke Cristo diché wa. Mik ye' de a' ska', etä a' isueraë tö es idir. Cristo diché ta' taië, e' tso' iwakanéuk a' shua, ie' kè dör wes se' kè diché ta' es. <sup>4</sup> Mokí ie' kötëwa wötëulewa krus mik wes se' kè diché ta' es, erë ie' serkene Skëköl diché taië e' wa. Es ñies sa' batsulewa ie' mik, e' kueki wësua sa' kè diché ta', erë Skëköl diché wa sa' serdaë a' kimoie.

<sup>5</sup> A' wakpa e' saú tö moki a' erblöke Jesucristo mik. A' ibikeitsó buaë. ¿A' kè wā ijcher tö ie' tso' a' er a? E' kè dör es, e' ta e' wà kiane chè tö a' kè dör ie' icha. <sup>6</sup> A' mú wōa iwēne tö sa' kaneblē' a' shua e' wà dettsa buaë. <sup>7</sup> Sa' tso' ikiök Skököl a tö a' kè tö ì sulu wamblökiā. Sa' kè ku' e' kiök as iwēr tö ye' kaneblē' a' shua e' wà dettsa buaë. E' skéie sa' ki ikiane tö a' ser buaë yësyësë wës Skököl ki ikiane es, eré welepa wa iwēr tö sa' kaneblē' e' kè wà dēttsa buaë. <sup>8</sup> Mik a' serke buaë wës Skököl ttè moki tö ichè es, etā e' ki kè sa' a ì yë nuk. E' skéie e' kikekēka taiē sa' tö. <sup>9</sup> Sa' kè diché ta', eré mik a' e' tkëulewā darërē Skökēpa ttè a, etā e' tö sa' ttsē'wēke buaë. Sa' tö ikiè michoë Skököl a tö a' mú dō senuk buaë yësyësë kekraë wës ie' ki ikiane es. <sup>10</sup> Mik ye' de a' ska', etā kawō mēne ye' a a' ki, e' kè wà shulak ye' éna darërē kēsik wa. Skökēpa Jesús tö e' kēwō me' ye' a, se' er diché ioie, e' kè dör se' sulu'woie. E' kuēki ye' tso' yēkkuō i' shtök a' a kam ye' dō a' ska' e' yöki as ì kos tso' shulè, e' shulò a' tö kam ye' dō e' yöki.

*Pablo e' chéat*

<sup>11</sup> A yamipa, bataie yō ichè tö a' ttsē'nú buaë. A' e' chó senuk yësyësë. A' er kuú. A' kabikeitsó ñikkēē. A' senu bère ñita. A' serke es, e' ta Skököl dör dalëritsökwak ena sene bère mukwak, e' serdaë a' ta kekraë.

<sup>12</sup> A' ñi shke'ú ñi dalëritsè wa. S'batse'rpa kos tö a' shke'wémi.

<sup>13-14</sup> As Skökēpa Jesucristo er buaë chò a' a. As Skököl tö a' a ikkachò tö a' dalër taiē ie' éna. Ñies as Wiköl Batse'r tö a' kò senuk wës wák eköl è es.

## Yëkkuö kit Pablo tö Galacia wakpa a Gálatas

Pablo tö yëkkuö i' kit Jesús mik erblökwakpa tso' ká kiè Galacia e' shuá ká wa'ñe e'pa a ikimoie. Iekkëta ie'pa kos e' kè dör Israel aleripa. E' kueki kam ie'pa erblö Jesús mik eta ie'pa kè tö Moisés ttè dalöiëno e' dalöiè. Mik Pablo dë'rö Jesús ttè buaè kkachök ie'pa a eta ie' tö ie'pa a iché tö kè se' tsatkërpa Moisés ttè dalöiëno e' dalöiè wa.

Erë mik ie' mineane eta Israel aleripa shuá pë' demi e' ò tö ie'pa dör Jesús mik erblökwakpa. E'pa tö ie'pa wöbla'weke sulu ikitöwoie. Ie'pa tö iché tö se' kè tsatkërpa Jesús mik erblè e' è wa. E' kueki ñies se' kawöta Moisés ttè dalöiök. Ì sulu e' wöklö'woie Pablo tö yëkkuö i' kit. Jesús mik erblökwakpa tö s'wöbla'uk kache tté wa, e'pa ki'wa buaè, e' kueki Pablo tö yëkkuö i' kit as ie'pa tso' tse'ka iyöki ena ie'pa shulir er bua' wa. S'wöbla'uk kache tté wa e'pa tö icheke tö Pablo kè dör Jesús tteköl chökle ie' kè wa Moisés ttè e' dalöiëne e' kueki.

Pablo tö iché Jesús mik erblökwakpa a tö Jesús wák tö ie' klöq' kaneblök ittekölie. Ñies ie' tö iché tö Jesús mik erblè e' è wa Skököl tö se' klö'wëmi wes pë' buaè yësyësè es. Kè dör Moisés ttè dalöiè wa Skököl tö se' tsatkeke. E' skéie ie' er buaè ché se' a e' wa ie' tö se' tsatkeke sènoie ie' a iWiköl wa. E' kkacheke Pablo tö yëkkuö i' ki.

### *Shke'wè*

<sup>1</sup> Ye' dör Pablo. Ye' dör Jesús ttekölpa tsá, e'pa eköl. Ye' kè kine s'ditsö wa ñies ye' kè patkëne s'ditsö wa. E' skéie Skököl dör S'yé tö Jesús shkeq'kane, e' ena Jesucristo, e'pa tö ye' patkè' ie' ttè buaè pakök. <sup>2</sup> Ye' tso' yëkkuö i' shtök Skökëpa Jesús icha erule erule kos tso' Galacia e'pa a. Ye' ena s'yamipa kos tso' ye' ta ie, e'pa tö a' kos shke'wëmi. <sup>3</sup> Skököl dör S'yé ena Skökëpa Jesucristo, as e'pa er buaè chò ena sene bèrè mù a' a. <sup>4</sup> Jesucristo e' me'ttsa ttèwa se' nuì skéie wes Skököl dör S'yé e' ki ikiane es. E' o' ie' tö se' yottsá sene sulu kos tso' ká i' a e' ulà a. <sup>5</sup> ¡Ie' kikökasö kekraè! Es idir.

### *Jesús ttè buaè, e' dör etkëme*

<sup>6</sup> Ye' tö a' me'at, e' itöki bet ta, Skököl olo'yé a' tö. Ie' tö se' klöq'bak. Ie' er buaè ché taiè se' a Cristo batamik. Erë ie' olo'yé a' tö. E' skéie a' tso'ne ttè ku'a'ki klö'uk. E' tö ye' tkiwéwa eriwéka taiè. Welepa tö icheke tö ttè e' dör Jesús ttè buaè, <sup>7</sup> erë e' kè dör es. Jesús ttè buaè moki, e' dör etkëme. Pë' welepa de a' wökir a ká chöukwa ttè ku'a'ki wa. Ie'pa tö Cristo ttè buaè, e' kí kuötkéka. Es ie'pa tö ie' ttè buaè moki e' shkuli'weke. <sup>8</sup> Erë ye' tö a' a ichè tö yi tö ttè ku'a'ki pakeke a' a Jesús ttéie, kè dör wes sa' tö a' a ipaka' kuaè es, e' ta as ese wák kichatër. Kè ye' tkine tö ye' wák alè tö ipakè ö Skököl biyöchökwak wele datse ká jai a, ese tö ttè ku'a'ki pakè a' a, as esepa kichatër. <sup>9</sup> Ye' tö a' a iska chène: Yi tö ttè ku'a'ki pakè a' a Jesús ttéie, kè dör ie' ttè buaè paka' sa' tö a' a e', kè dör ttè klöq' a' tö kewe e', e' ta as ese wák kichatër. <sup>10</sup> ¿Ima a' ibikeitsè? Ye' ttöke es, ¿e' wa ye' atak buaè Skököl ta ö s'ditsö ta? Ye' mú atak buaè s'ditsö ta, e'ma ye' kè dör Cristo kanè méso moki.

### *Jesús ttè buaè, e' kè dë'bitu s'ditsö wa*

<sup>11</sup> A yamipa, a' wa ijchenú tö Jesús ttè buaè pakekeyö, e' kè dë'bitu s'ditsö wa. <sup>12</sup> Ttè e' kè yène yi wa ye' a, kè yi wa ye' wöblane iwa, e' skéie Jesucristo wák tö ikkayè' ye' a.

<sup>13</sup> Wes ye' bak senuk judiowak ttè dikia, e' ttsëule a' wa buaè. Ye' bak Skököl icha e'pa we'ikök siarè töiök kësik wa. Ye' éna ie'pa ewakwa seraa. <sup>14</sup> Mik ye' bak judiowak ttè dikia, eta ye' tö sa' yépa bak e' ser kos iuté buaè yësyësè, iwakpa bak kos ye' ta e' këska', e'pa taiè tsata. <sup>15-16</sup> Erë Skököl er buaè ché ye' a taiè, e' kueki ie' tö ye' shukitbak iwák a,

kam ye' kur e' yöki. Ie' tö ye' klöq'bak kanablök ie' a. Mik ie' éna ilà kkachak ye' a, eta ie' tö ye' a ikkaché as ye' tö ilà tté buaé e' pakò pé' kè dör judiowak esepa a. Mik ie' tö ilà kkaché ye' a, eta ye' kè dè' s'ditsö ska' e' yuök. <sup>17</sup> Nies ye' kè dè' Jerusalén, wépa dör Jesús ttekölpa tsá ye' yöki kewe, e'pa ska' e' yuök ie'pa tté wa. E' skéie bet ye' mía Arabia, e' ukuöki ta ye' dene Damasco.

<sup>18</sup> Duas de mañal, e' ukuöki ta ye' mía Jerusalén Pedro, kè süule ye' wa, e' sauk. Erè kè ye' sene ie' ska' ká taië, domingo bötö è. <sup>19</sup> Nies Santiago dör Skéképa Jesús él, e' suéyö. Erè kè ye' wa Jesús ttekölpa tsá, e'pa malepa sune. <sup>20</sup> Moki ye' tö a' a ichè Skéköl wörki tö i' shtekyö yékkuö i' ki, e' dör moki.

<sup>21</sup> E' ukuöki ta ye' mía bánet Siria ena Cilicia. <sup>22</sup> E' kéwö ska' ta Cristo icha erule erule tso' Judea, e'pa wa ye' tté jcher, erè ie'pa kè wa ye' süule. <sup>23</sup> Ie'pa tö ittésé: "Pablo bak se' we'ikök, tté mik se' erblöke e' olo'yakwa ie' éna, erè i'ñe ta ie' tso'ne ipakök." <sup>24</sup> E' kuéki ie'pa tö Skéköl kikéka taië ye' kuéki.

## 2

<sup>1</sup> Duas de dabom eyök kí tkél (14), e' ukuöki ta ye' skà míane Bernabé ta Jerusalén. Nies Tito mía ye' ta. <sup>2</sup> Skéköl tö ye' a ikkayé' tö ye' kawöta shkök Jerusalén ttök Skéképa Jesús icha kos e'pa wökirpa ta, e' kuéki ye' mía. Se' ulitane wa ie'pa süule tö ie'pa dör se' wökirpa. Mik ye' de Jerusalén, eta tté buaé pakekeyö pé' kè dör judiowak esepa a, e' wa pakéneyö se' wökirpa ulitane e'pa è a bánet isuöie tö iyéne ö kè iyéne. Ye' kè ki ikiane tö yi tö ichè tö Jesús kanè kos o'bituyö, e' dör é.

<sup>3</sup> Ie'pa tö iché tö tté pakekeyö, e' dör buaé yesyésé, kè i' skà kianeia. Tito mirwa ye' ta, e' dör griegowak, e' kuéki ie' tottola kè kkuölit tëule tsir wes judiowak wöblar es. Erè ie'pa kè wa ie' kàne itóttola kkuölit tök tsir. <sup>4</sup> Erè pé' welepa tso' ee e' chò tö ie'pa dör Jesús mik erblökwakpa, erè kè idör es. Ie'pa kè ichópa tö Tito tottola kawöta kkuölit tëe tsir, e'ma s'wökirpa kè wa i' yéne. Pé' esepa tso' se' shua se' weblök bër tö wes se' ser buaé, ttsé'r buaé Cristo Jesús tté a. Ie'pa a ta kè idör buaé tö kè se' tö judiowak tté dalöiëno e' iütèia. Ie'pa ki ikiane tö se' klörwane tté ñe' ulà a. <sup>5</sup> Sa' ki ikiane tö Jesús tté buaé mokjë, e' è klö'ü a' tö kekraë. E' kuéki sa' kè wa ie'pa tté iütène yës.

<sup>6</sup> Se' wökirpa kiësö skéképa taië, e'pa iché tö tté pakekeyö e' dör buaé. Ie'pa kè wa ikí kuötkéne yës. (Skéköl a ta se' ulitane dör nies ème, e' kuéki é yö ichè tö ie'pa dör kéképa taië ö kè idör es, e' kè ki ye' tkine.) <sup>7</sup> Ie'pa éna iane tö Skéköl tö kanè me'at ye' ulà a Jesús tté buaé pakök, pé' kè dör judiowak, esepa a, wes ie' tö kanè me'at Pedro ulà a ipakök judiowak a es. <sup>8</sup> Skéköl tö Pedro patkè' Jesús tté buaé pakök judiowak a, e' è tö ye' patkè' ipakök pé' kè dör judiowak esepa a. <sup>9</sup> Santiago ena Pedro ena Juan, e'pa süule se' ulitane wa tö ie'pa dör se' wökirpa kibiie. Ie'pa éna iane tö Skéköl er buaé yé' ye' a kanè i' wa. E' kuéki ie'pa ulà mé ye' a ena Bernabé a iwà kkachoie tö ie'pa tö sa' klö'wé ie'pa kíie. Ie'pa éna iane tö Skéköl tö sa' patkè' Jesús tté buaé pakök pé' kè dör judiowak esepa a, erè ie'pa patkè'itö ipakök judiowak a. Es buaé idir ie'pa a. <sup>10</sup> Ýyi etkè kié ie'pa tö sa' a, e' dör tö s'yamipa siarëpa serke Jerusalén, esepa kimè sa' tö. E' wawekeyö kekraë er bua' wa.

### *Pedro uñé Pablo tö Antioquía*

<sup>11-12</sup> Erè e' ukuöki ta mik Pedro demi Antioquía sa' pakök, eta kewe ie' chköke buaé Jesús mik erblökwakpa kè dör judiowak, esepa ta. Erè s'yamipa dör judiowak datse Jerusalén, patkè' Santiago tö, e'pa de. E'pa tö iklö'wé tö s'yamipa kè dör judiowak, esepa kawöta itóttola kkuölit tök tsir. Nies ie'pa tö iklö'wé tö esepa kawöta senuk wes judiowak ser es. Pedro suane ie'pa yöki, e' kuéki mik ie'pa de, eta ie' e' batséttsa wépa kè dör judiowak, esepa yöki. Ie' kè chköia ie'pa ta ñita. <sup>13</sup> Nies judiowak malepa tö Pedro e'

a' ñe' es, e' wambléñak dò Bernabéë. <sup>14</sup> E' kuęki, mik ye' isué tö Pedro kè ku' iwà iütök yęsyęsę węs Jesús tté buaë moki tö ichè es, etā ye' tö ie' a iché sulitane kukua: “Be' tso' e' ök. Be' dör judiowak, erë be' kè serku' węs judiowak ser es. ¿Iók be' tö, pë' kè dör judiowak, esepa keke senuk węs judiowak ser es? <sup>15</sup> Se' böł dör judiowak se' ditséwö wa. Se' kè dör pë' sulusipa kè tö Skéköl dalöië esepa. <sup>16</sup> Erë se' wā ijcher tö Skéköl kè tö se' klö'wepa węs pë' buaë yęsyęsę es, Moisés tté dalöiëno e' iütësö e' batamik. Se' wā ijcher tö se' erblé Jesucristo mik, e' kuęki ie' tö se' klö'wé węs pë' buaë yęsyęsę es. Ie' ichè tö ie' kè tö se' klö'wepa węs pë' buaë yęsyęsę es, tté dalöiëno e' iütësö e' batamik. E' kuęki se' böł erblétke Jesucristo mik as Skéköl tö se' klö'ù węs pë' buaë yęsyęsę es. E' kè dör tö Moisés tté dalöiëno, e' iütësö buaë e' batamik.” Es ye' tö iché Pedro a.

<sup>17</sup> E' ukuöki ta ye' tö ie'pa ulitane a iché: “Se' erblöke Cristo mik, e' batamik Skéköl tö se' klö' węs pë' buaë yęsyęsę es, e' wā paneke se' tö. Es se' kè erblöku'ia Moisés tté dalöiëno e' mik. E' kuęki judiowak tö se' chëmi tö se' dör ì sulu wamblökwakpa węs pë' kè dör judiowak es. E' kuęki ¿sö ichëmi tö Cristo tö se' ké ì sulu wamblök? Au, kè idör es. <sup>18</sup> Se' éna iane tö Skéköl kè tö se' tsatkepa tté dalöiëno e' batamik. E' kuęki se' kè erblëneia tté e' mik e' tsatkoie. Erë se' erblëne tté dalöiëno e' mik e' tsatkoie, e' ta e' je' tö se' a ikkacheraë tö moki se' dör ì sulu wamblökwakpa, se' kè a iwà iütënuک sęraa e' kuęki. <sup>19</sup> Mik ye' bak erblök Moisés tté dalöiëno e' mik e' tsatkoie, etā ye' éna iane tö ye' kè a tté e' iütënuک yęsyęsę węs s'kawöta iütök es. E' kuęki ye' éna iane tö nu' tso' ye' ki, e' ki Skéköl tö ye' kichaterattsā. E' kuęki i'ñe ta ye' kè erblöia tté dalöiëno e' mik e' tsatkoie. Ye' a ta e' dör węs ye' du'wā tté dalöiëno e' yöki es. I'ñe ta ye' erblöke Cristo è mik as ye' ser yęsyęsę Skéköl a. Cristo kötewā krus mik ye' skéie ye' nu' patuoie, <sup>20</sup> e' kuęki e' dör węs ye' kötewā ie' ta krus mik es. I'ñe ta e' dör węs kè ye' serku'ia es, erë Cristo serke ye' er a iWiköl wa. Ie' tö ye' dalëritsë, ie' e' mettsā ttëwā ye' skéie. E' è mik ye' erblöke, e' mik ye' serke ká i' ki. <sup>21</sup> Es Skéköl er buaë ché ye' a, e' kè watepa ye' tö yës. Erë sene yęsyęsę mú dò se' ulā a tté dalöiëno e' iütë wa, e' ma e' wā kiane chë tö Cristo kötewā éme, kè wā ta'.” Es ye' tö iché Jesús mik erblökwakpa tso' Antioquía, e' pa a.

### 3

#### *Skéköl tö iWiköl mé se' a, se' erblö Jesucristo mik, e' batamik*

<sup>1</sup> ¿A Galacia wakpa, wësua a' kè kabikeitsöta'! ¿Yi alibché a' ki, e' tö a' wöliwëka taië es? Jesucristo kötewā krus mik se' skéie, e' tté wa sa' tö a' wöbla' buaë yęsyęsę, e' wā ane buaë a' éna kuaë. Etā ¿wes tté e' olo'yakne a' éna? <sup>2</sup> I' chakeke ye' tö a' a, e' iütö: ¿I batamik Skéköl Wiköl dë' a' ki? ¿E' dör Moisés tté dalöiëno e' iüté a' tö e' batamik? Au, kè idör es. Ie' dë' a' ki mik a' tö Jesucristo tté buaë e' ttsë' ta a' erblë' imik etā. <sup>3</sup> ¿A' kè kabikeitsöta'! Kuaë Skéköl tö se' yué ie' ala'rie iWiköl wa, erë ¿wes a' tö ibikeitsë i'ñe ta' tö se' kawöta Moisés tté dalöiëno e' iütök se' wákpa diché wa as se' at buaë yęsyęsę ie' wöa? <sup>4</sup> Es idör, e' ta éme se' weine taië Jesús tté buaë kuęki. ¿Ayëcha, e' kè weinewa éme! <sup>5</sup> Ye' tö iskà chakéne a' a: ¿Skéköl tö iWiköl me' se' a, ñies ì kè or yi a ese o'itö a' shua, e' dör Moisés tté dalöiëno e' iütësö, e' batamik? Au, kè idör es. E' qos o' Skéköl tö, se' tö Jesucristo tté buaë e' ttsë' ta se' erblë' imik e' kuęki.

#### *Abraham erblé Skéköl mik, e' kuęki Skéköl tö ie' klö'wé węs pë' buaë yęsyęsę es*

<sup>6</sup> Es ibak ñies sa' yé bak kië Abraham e' ta. Skéköl yëkkuö tö ichè: Abraham erblé Skéköl mik, e' kuęki iklö'wëitö węs pë' buaë yęsyęsę es. <sup>7</sup> E' kuęki a' wā ijchenú tö wépa erblö Skéköl mik, esepa dör Abraham aleripa chók. <sup>8</sup> Ká iaiä Skéköl ibikeitsbak tö mik pë' kè dör judiowak, esepa erblé ie' mik, etā ie' tö ie'pa klö'weraë węs pë' buaë yęsyęsę es. E' kuęki tté buaë e' tso' kitule ie' yëkkuö ki wé ie' tö iyë' Abraham a i' es: “Be' batamik

ye' er buaë chöraë ká ulitane wakpa a.”\* 9 Es se' isué tö wépa kos erblöke ie' mik wes Abraham es, esepa kos a ie' er buaë chöraë wes ie' er buaë yé' Abraham a es. Esepa è a ie' er buaë chöraë.

10 Skëköl yëkkuö tö ichè i' es: “Wépa kè tö ì kos tso' kitule ttè dalöiëno yëkkuö k<sub>i</sub> e' wà dalöieku' yësyësë, esepa kos kichateraë Skëköl tö.”† Erè kè yi tö iwà iutepa es, e' kuek<sub>i</sub> se' wà ijcher tö wépa erblé ttè dalöiëno mik e' tsatkoie, esepa kos kichateraëitö. 11 Nies ie' yëkkuö tö ichè i' es: “Yi dör yësyësë ierblö Skëköl mik e' batamik, ese serdaë.”‡ Es se' wà ijcher tö kè yi tsatkënuK Moisés ttè dalöiëno iutè wa. 12 Nies Skëköl yëkkuö tö ichè i' es: “Yi tö ttè dalöiëno e' dalöié yësyësë seraä, ese ser michoë ttè e' wa.”§ Ttè e' tö se' a ikkachè tö ttè dalöiëno, e' tö se' kè idalöiök seraä. Erè se' erblö Cristo mik, e' kè dör es, e' k<sub>i</sub> erblé è kiane ie' mik. E' kuek<sub>i</sub> ttè e' kè shutunukka Moisés ttè dalöiëno e' wa, e' dör ttè kuä'k<sub>i</sub> e' kuek<sub>i</sub>.

13 Skëköl yëkkuö tö ichè: “Yi ttéwä kichatkëule kal mik, e' wa iwënewä tö ese kichatëttsä Skëköl tö.”\* Es Cristo kötewä krus mik, e' wà kiane chè tö ikichatëttsä Skëköl tö. Erè ikichatënettsä se' skéie, Skëköl ttè dalöiëno e' dalösewéwasö e' nu<sub>i</sub> k<sub>i</sub>. Es Cristo tö se' yé'ttsä se' nu<sub>i</sub> ulä a. 14 Es ibak ie' ta as Skëköl kablè' er buaë chök Abraham a, e' wà dò nies pé' kè dör judiowak esepa ulä a Cristo Jesús batamik. E' dör tö Skëköl kablè' iWiköl muk se' a, se' erblö Cristo mik, e' batamik.

*Skëköl er buaë ché se' a, e' kè dè' ttè dalöiëno e' batamik*

15 A yamipa, se' a ta mik se' tö se' ttè mé ñi a, e' shtésö yëkkuö k<sub>i</sub> ta s'kiè shtésö iki, eta ttè e' kè maneorpattsane yës, kè ik<sub>i</sub> kuötkërpakaia yës. 16 Es ì uk Skëköl kablè' Abraham a ena ileri eköl a, e' dör. Skëköl yëkkuö tö Abraham ditséwö eköl è e' cheke, kè dör seraä. Abraham ditséwö chekeitö e' dör Cristo. 17 Ì chök ye' tso' e' dör i': Skëköl tö ittè me'tke Abraham a ta ikkachéitö ia tö mok<sub>i</sub> iwawëraëitö. E' ukuök<sub>i</sub> ta duas tka döka cien tkëyök k<sub>i</sub> dabom mañayök (430) ta ie' tö ittè dalöiëno me' Moisés a as Israel aleripa tö idalöiö. E' wa isuésö tö ttè mène Abraham a, e' mène ia kewe, ttè dalöiëno mène Moisés a e' yöki. E' kuek<sub>i</sub> ttè dalöiëno mène Moisés a, e' kè a ì uk Skëköl kablè' Abraham a, e' wöitukwä. 18 Ì uk Skëköl kablè' se' a, e' wà döpa se' ulä a, Moisés ttè dalöiëno e' iütésö e' batamik, e'ma e' kè dè'ttsä se' a wes ì kablëule es. Erè Skëköl kablè' Abraham a imuk éme.

19 E' dör es, e' ta ¿i kuek<sub>i</sub> Skëköl tö ittè dalöiëno me' Israel aleripa a? Ie' kablè' Abraham a, e' ukuök<sub>i</sub> ta ittè dalöiëno méitö ie'pa a ì sulu wamblekerakitö, e' wà kkachöie dö mik Abraham aleri eköl yëne ie' a, e' de eta, e' dör Cristo. Ttè dalöiëno e' me' Skëköl biyöchökwakpa tö Israel aleripa a Moisés dör itteköl e' wa. 20 Erè Skëköl wák kablè' Abraham a, e' kè dör itteköl wele wa. E' kuek<sub>i</sub> se' wà ijcher tö ttè e' dör kibiie, ttè dalöiëno mène Moisés a e' tsata.

*¿Ì kuek<sub>i</sub> Skëköl tö ittè dalöiëno me' Israel aleripa a?*

21 E' dör es, e' ta ¿e' wà kiane chè tö ttè dalöiëno, e' kè ñi sini'kune Skëköl kablè' Abraham a e' ta? ¡Au, kè idör es! Ttè dalöiëno tö sene michoë múpa se' a, e'ma se' dòmi buaë yësyësë Skëköl wörki ttè ñe' dalöiësö e' wa. 22 Erè e' kè dör es. Skëköl yëkkuö tö ichè tö s'ditsö kos klöulewä sene sulu ulä a, kè se' a e' tsatkënuK. E' dör es as Skëköl kablè', e' wà dò se' ulä a, se' erblö Jesucristo mik e' wa.

23 Kam Cristo döbitu s'tsatkök se' erblö ie' mik e' wa, e' yöki se' bak klöulewä ttè dalöiëno dikia wes s'wötewä s'wöto wé a es. Erè se' kè a e' yënuksä ttè e' dikia dö mik Cristo dè'bitu ikkachök se' a tö s'kawöta erblök ie' mik e' tsatkoie eta. 24 Nies ichëmisö tö Skëköl tö se' méwä ttè dalöiëno dikia s'kkö'noie dö mik Cristo de eta. E' dör wes alä yé tö yi yulè ilä kkö'noie es. Skëköl tö iwé es as ie' tö se' klö'ù wes pé' buaë yësyësë es, se'

\* 3:8 Génesis 12.3 † 3:10 Deuteronomio 27.26 ‡ 3:11 Habacuc 2.4 § 3:12 Levítico 18.5 \* 3:13 Deuteronomio 21.23



erblò Cristo mik e' wa. <sup>25</sup> I'ñe ta se' erblò Jesucristo tté buaë e' mik, e' kueki ttè dalöiëno kè ku'ia se' kkö'nuk wes alà kkö'nukwak es. <sup>26</sup> A' kos dör Skököl ala'r, a' erblé Cristo Jesús mik e' wa. <sup>27</sup> A' wépa kos wösune iwà kkachöie tö a' erblé Cristo mik, esepa ki Cristo ser iëne wes se' datsi' iò es. E' kueki a' serke buaë wes Cristo ser es. <sup>28</sup> Se' kos batsulewà Cristo Jesús mik, e' kueki se' dör wes wák eköl è es. E' kueki se' dör judiowak ö se' kè dör es, se' klöulewà kanè mésoie ö se' kè dör es, se' dör wëm ö se' dör alaköl, e' kè dè' wes Skököl a. <sup>29</sup> Se' dör Cristo icha, e' ta se' dör Abraham aleripa chók. Nies i uk Skököl kablè' Abraham a e' wà döraë se' ulà a.

## 4

*Se' kè ku'ia Moisés ttè dalöiëno e' dikia*

<sup>1-2</sup> Ye' tö ikleeke a' a ttè i' wa: Ichösö tö pè' eköl dör inuköl blu' taië e' blënewà. Ie' iyi kos méatitö ilà ulà a. Erë ie' alà ià tsirlala, kè a ikaneonuk. E' kueki o'ka tso'ne ie' kkö'nuk, ie' wëttsuk. Ie' kawöta ie'pa ttè iütök dò mik wekkè iyé tö ikéwö me'at ekkè. Eré ie' dör iyé blënewà e' dali kos e' wák, erë kam ikéwö dò e' yöki ie' dör wes s'klöulewà kanè mésoie tso' iu a es. Erë mik iyé blënewà e' tö ikéwö me'at e' deka, eta iyé dali kos döraë iulà a. <sup>3</sup> E' sù sa' judiowak bak wes alala ñe' es. Kam Skököl tö ilà patkò e' yöki sa' bakia klöulewà ttè èse tso' ká i' a ese dikia idalöiök. <sup>4</sup> Erë mik kawö bikeitsitö e' de, eta ie' tö ilà patké ká i' ki, e' kune' s'ditsöie sene' Moisés ttè dalöiëno e' dikia. <sup>5</sup> Ilà debitu sa' bak klöulewà ttè e' ulà a, e'pa yöktsa as sa' dò Skököl ala'rie. <sup>6</sup> A' erblé Cristo mik, e' kueki a' dör Skököl ala'r ñies wes sa' es. E' kueki ie' tö ilà Wiköl patké senuk se' er a, e' wa se' kköchöke buaë Skököl ska', ie' wa se' tö icheke buaë Skököl a: “¡A yéwöla!” <sup>7</sup> Es se' kè ku'ia wes s'klöulewà kanè mésoie es. E' skéie se' detke Skököl ala'rie, e' kueki i kos tso' ie' wà e' dör se' icha ñies.

<sup>8</sup> Kenet ta a' kè e' batsöta' ie' mik, e' kéwö ska' ta a' bak klöulewà skökölpa dalöiök a' bak esepa ulà a. Nermata ie'pa kè dör Skököl ichökle e'. <sup>9</sup> Erë i'ñe ta a' batsë buaë Skököl chók e' mik —ö ichémisö bua'ie tö ie' batsë buaë a' mik— ¿wes i'ñe ta a' e' maktsane ttè èse kos e' ane? Ttè ekképa kè a se' tsatkënu. Ttè e' kè dör iie bua' se' a. Kè se' senukne ttè èse dikia. <sup>10</sup> Judiowak tö idiwö tkö'weke, isi'wö tkö'weke, ikéwö tkö'weke ñies iduéswö tkö'weke. ¿Iók se' tö e' wakaneweke es? <sup>11</sup> Ye' suane dö' kanè kos wéyö a' shua, e' weirwa é.

*Kenet ta Galacia wakpa tö Pablo kiéwà buaë*

<sup>12</sup> A yamipa, ye' dör judiowak erë ye' kè serku'ia judiowak ttè dikia. ¿Wes i'ñe ta a' e' tiakwà ttè e' dikia? E' kè war a' tö es. Ye' kköchö a' a tö a' senú wes ye' es. Mik ye' bak a' ska' kuaë, eta a' kè wà i sulu wamblëne ye' ta. <sup>13</sup> Mik ye' tö Jesús tté buaë tsá paka' a' a, eta ye' kirirke taië, e' kueki ye' e' tséat a' ska'. <sup>14</sup> Ye' kirirke, e' dör darërë a' a, erë e' kueki a' kè wà ye' watënettsa. E' skéie a' tö ye' sué buaë wes Skököl biyöchökwak sué es. A' tö ye' kiéwà buaë wes Cristo Jesús kiéwà a' tö es. <sup>15</sup> A' ttsë'ne buaë ye' ta kuaë, ¿wes e' de i'ñe ta? Ye' ichè tö a' wák wöbla mú yërttsa a' a tkèwà ye' icha skéie, e' ma a' tö io' es. Es a' kikékayö. <sup>16</sup> Erë i'ñe ta wësua a' ye' sué a' bolökíe, ttè mokí chéyö a' a e' è kueki.

<sup>17</sup> Pè' tso' a' wöbla'uk judiowak ttè wa, e'pa tö iché tö ie'pa ki a' kiar taië, erë e' kè dör er bua' wa. Ie'pa ki kiane tö a' tö sa' watöttsa ta es a' mi' ie'pa è ttè iütök. <sup>18</sup> Ie'pa tö a' saúpa, a' kimúpa er bua' wa mik ye' tso' a' ta ö ye' kè ku' a' ta, e' ma buaë idir ye' a. Erë ie'pa tso' a' wöbla'uk ttè kè dör mokí ese wa. E' kueki ye' yöki isulune. <sup>19</sup> A ye' ala'r, ye' skà weirke taië a' dalërmik wes alaköl alà kurke weir es dò mik a' de senuk wes Cristo ser es eta. <sup>20</sup> I' ta ye' mú dò a' ska' ttök bua'ie a' ta as a' isaù tö a' dalër taië ye' éna. I' wambleke a' tö es, e' tö ye' tkiéwà suawé taië.

*Agar ena Sara, e' pakè*

<sup>21</sup> A' wēlepa senak judiowak ttè dikia, erë ì tso' kitule Moisés yēkkuö kī, ¿e' jcher a' wā?  
<sup>22</sup> E' tò ichè tò Abraham ala'r böl. Eköl kune' alaköl kiè Agar, e' ta. E' kiè Ismael. Agar dör Abraham alaköl kiè Sara e' kanè méso toulettsa ese. Iëköl kune Sara ta. E' kiè Isaac. Sara kè dör yi kanè méso. <sup>23</sup> Kanè méso ñe' alà kune' wes se' èsepa kur es. Erë Sara kè dōta' alàë, e' alà kune' mik idetke kēkēpalatke etā, wes Skēköl kablē' Abraham a es. <sup>24-25</sup> E' tò ilè kleeke se' a. Alakölpa böl ñe' tò ttè mène böt e' wà chē. Agar bak kanè méso e' tò ttè dalöiëno mène Israel aleripa a Sinaí kēbata aṭe Arabia, e' wà chē. E' wà dör tò Israel aleripa erblé ttè dalöiëno e' mik e' tsatkoie. E' dör wes ie'pa tso' klöulewā ttè e' dikia wes kanè méso tso' klöulewā iwökir ulà a es. E' kuēki wēpa kos tso' klöulewā ttè dalöiëno e' ulà a, esepa dör wes Agar ala'r es. Ñies Sinaí kēbata, e' tò Jerusalén tso' ká i' kī i' ñe ta e' wà chē. Eē judiowak serke. Ie'pa tso' klöulewā Moisés ttè dalöiëno dikia wes kanè méso es. <sup>26</sup> Erë Sara alà kune' e' tò ttè mène Abraham a, e' wà chē. Se' kè ku' klöulewā Moisés ttè dikia, e' kuēki se' dör wes Sara alà es. Se' dör Jerusalén èt tso' ká jai a e' wakpa. <sup>27</sup> E' dör wes itso' kitule Skēköl yēkkuö kī es, e' tò ichè i' es:

A alaköl, be' kè dōta' alàë,  
 is alala kur, e' kī alakölpa weir, e' kè ttsëule be' wā.  
 Erë be' dōraë alàë taië  
 tkòka alaköl dōta' alàë e' tsata.  
 E' kuēki be' ttsë'nú buaë.  
 Be' anú taië ttsë'ne bua' wa.\*  
 Es Skēköl yēkkuö tò ichè.

<sup>28</sup> A yamipa, se' dör wes Isaac es. Isaac kune' wes Skēköl kablē' Abraham a es. Es ñies se' erblé Cristo mik, esepa de Skēköl ala'rie wes ie' kablē' es. <sup>29</sup> Agar alà kune' wes s'ditsö kur es, erë Isaac kune' Skēköl Wiköl batamik. E' kēwö ska' ta Agar alà tò Isaac we'ik taië. E' sù i' ñe ta wēpa tso' klöulewā Moisés ttè dikia, esepa tso' se' dör Skēköl ala'r, esepa we'ikök. <sup>30</sup> Erë Skēköl yēkkuö tò ichè i' es: "Iyé íyi tso' mè alaköl kè dör kanè méso, e' alà a, e' kè kawö ta' blatè alaköl dör kanè méso e' alà a. E' kuēki iyuóshkar alàë."† <sup>31</sup> E' kuēki, a yamipa, se' kè dör wes alaköl dör kanè méso e' ala'r es. Se' dör wes alaköl kè dör kanè méso, e' ala'r es.

## 5

### *Se' yēnettsa ttè dalöiëno dikia*

<sup>1</sup> Cristo tò se' yē'ttsa Moisés ttè dalöiëno e' yöki as se' kè ku'ia klöulewā ttè e' ulà a. E' kuēki se' e' tkōwā darërë erblök Cristo è mik. Kè se' e' tiukwane ttè dalöiëno dikia wes s'klöulewā kanè mésoie es.

<sup>2</sup> A' tò ye' ttò ttsó. Ye' dör Pablo. Ye' wák tò ichè a' a tò a' wēpa e' mettsa itóttola kkuölit tök tsir wes judiowak wöblar es e' tsatkoie, e' ta Cristo kè tò a' kimepa yēs. <sup>3</sup> Ye' tò iskà chène wēpa ulitane e' mettsa itóttola kkuölit tök tsir, esepa a tò ie'pa kawōta Moisés ttè dalöiëno e' wà dalöiök seraa. <sup>4</sup> A' ulitane éna ttè dalöiëno, e' iutak as a' dò yēsyesē Skēköl wōa, esepa kos e' batséttsa bánet Cristo yöki. Es Skēköl er buaë ché se' a Cristo batamik, e' watéttsa ie'pa tò seraa. <sup>5</sup> Erë se' erblöke Cristo mik, esepa wā ijcher Skēköl Wiköl wa tò ie' tò se' kló'weraë wes pē' buaë yēsyesē es, se' erblé Cristo mik, e' batamik. E' wà panekesö ttsë'ne bua' wa. <sup>6</sup> Se' batsulewā Cristo Jesús mik, e' ta yi tottola kkuölit tëule tsir ö kè itëule e' kè ska' Skēköl tkine. Se' erblö Cristo è mik, e' tò se' kè ñi dalërītsök, e' dör ibua'ie.

<sup>7</sup> Kuaë ta a' mir buaë. ¿Yi tò a' wöklö'wé as a' kè tò ttè mokī iutò? <sup>8</sup> E' kè dör Skēköl tò se' klö'bak iwák a e'. <sup>9</sup> A' taië e'pa sulu'wērawā ttè suluë elkela è tò wes pan wölöwoka elkela tò harinachka kos wölöwekeka es. <sup>10</sup> Erë ye' erblöke Skēkēpa Jesús mik tò a' kè

\* 4:27 Isaías 54.1,2 † 4:30 Génesis 21.10

mi'pa ttè sulu e' itöki. Wé tso' a' tsiriuk ttè ese wa, e' we'ikera Skéköl tö. Kè ki ie' tkine tö yi idir.

<sup>11</sup> Erë a yamipa, ye' mú tso'ia ipakök tö wépa kawöta itóttola kkuölit tök tsir, e'ma gi kuëki judiowak tö ye' we'ikekeia taië? Ye' tö ttè e' pakópaia, e'ma ie'pa kè ulurku' ye' ki mik ipakekeyö tö Cristo kötewä krus mik se' skéie eta. <sup>12</sup> Erë wépa tso' a' wökir a ká chöukwa ttè ese wa, jeseпа mú e' biöttsaie i' ta!

### *Ni dalëritsè*

<sup>13</sup> A yamipa, Skéköl tö se' klöo'bak as se' kè seriä ttè dalöiëno dikia. Erë e' kè dör i sulu wambloie wes s'wák dër sulu ki ikiane es. E' skéie se' ni kimù, ni dalëritsè kuëki. <sup>14</sup> Moisés ttè dalöiëno kos e' wöiënewä ttè etkè a, e' tö ichè: "A' malepa dalëritsö wes a' wákpa e' dalër es."\* <sup>15</sup> A' e' kkö'nú. A' ni saukeia suluë, a' nippökeia taië wes iyiwak sulusi es, e' ta a' wákpa è ni eura.

### *Sene Wiköl Batse'r wa*

<sup>16</sup> Es ye' tö a' a ichè tö se' senù Skéköl Wiköl wa. Se' serke es, e' ta i sulu kiane s'wák dër sulu e' ki wamblè, ese kè wamblapasö. <sup>17</sup> I kiar s'wák dër sulu e' ki, ese kè kiar Skéköl Wiköl ki. Nies i kiar Skéköl Wiköl ki, ese kè kiar s'wák dër suluë e' ki. S'wák dër suluë ena Skéköl Wiköl e'pa ni wöklö'uke, e' kuëki i kiar se' ki wè ese kè or se' a. <sup>18</sup> Erë Skéköl Wiköl tö se' wëttsëke, e' ta se' kè ku'ia ttè dalöiëno dikia.

<sup>19</sup> Wépa tso' iwák dër sulu e' iutök, e' wërwa wöshak. Esepa trër ena e' ia'uke sene sulusi wa. Iyi sulu ese skà kakuetéwarakitö darërë. <sup>20</sup> Ie'pa tö iyi diököl dalöieke. Ie'pa dör alibchökwakpa. Ie'pa ni saü suluë, ni wöñatkò nië, nippò taië, ukyër ni ki. Ie'pa ulurka bet. Ie'pa e' ttsökä imalepa tsata. Ie'pa dör s'blabatsökwakpa. Wépa e' batsöke ie'pa mik, e'pa è ta ie'pa ser buaë. <sup>21</sup> Ie'pa kè wöbatsö tö i kiane ie'pa ki, ese tso' s'malepa wa. Ie'pa e' ttöke blo' wa, e' kuëki i sulu ki wamblekerakitö taië. E' sü iyi skà suluë wambleke ie'pa tö. Ye' tö a' a ichekene wes ye' tö iyë'bak es tö wépa serke es, eseпа kè döpa i blúie Skéköl tso' e' a.

<sup>22</sup> Erë mik se' serke Skéköl Wiköl wa, eta se' ni dalëritsöke, se' ttsë'rke buaë, se' serke bèrë, i kos dalë'ttsekösö er bua' wa, se' ni saü er bua' wa, se' er buaë chò s'malepa a, se' ttò moki, <sup>23</sup> kè se' e' ttsökä taië, se' e' kkö'nü buaë. Se' serke es, e' ta ttè dalöiëno kos, e' kè dalöseonewä se' wa. <sup>24</sup> Se' wák dër suluë, nies i kos suluë wamblak se' éna, ese kos watéttsä se' dör Cristo Jesús icha e'pa tö. E' dör wes se' tö ese kos ttéwä wötëulewä krus mik es.

<sup>25</sup> Se' serke Skéköl Wiköl mik, e' kuëki se' e' mù as ie' tö se' wëttsü. <sup>26</sup> Kè se' e' ttsökä taië, kè se' ni tsiriuk, kè se' ukyënuK ni ki.

## 6

### *Se' kawöta ni kimuk*

<sup>1</sup> A yamipa, a' wele anemine i sulu wamblè a, e' ta a' serke Wiköl Batse'r wa, eseпа ké ie' kimuk er bua' wa as ie' e' kökane. Erë a' e' kkö'nü dö' i sulu tö a' erkiöwè ta a' armi i sulu wamblè a wes ie' es. <sup>2</sup> A' welepa kawö tköke suluë, e' ta a' ni kimú. A' tö iwé es, e' ta a' serke wes Cristo ttè dalöiëno tö ichè es. <sup>3</sup> A' wele e' bikeitsö tö buaë idir imalepa tsata, ñermata kè dör i, e' ta ie' kitö'uke.

<sup>4-5</sup> Is se' ser buaë ö suluë ese wërke se' wöki eköl eköl. E' kuëki se' ulitane ké e' sauk tö is se' ser, e' wa se' e' kkö'nü. Se' serke buaë yësyësë, e' ta se' ttsë'rdaë buaë se' wák a. Erë kè se' kane e' kkö'nuk wes s'malepa serke es.

<sup>6</sup> I buaë kos tso' a' wa ese kaku' wépa tö a' wöbla'weke Skéköl ttè wa eseпа a.

<sup>7</sup> Kè se' e' kitö'uk tö se' a Skéköl wayörmi kè nu' ta'. I kuatkésö buaë ö suluë, e' wa wöwëranesö. <sup>8</sup> I sulu kiane s'wák dër suluë e' ki wamblè, ese wamblésö, e' ta e' wà dörane

\* 5:14 Levítico 19.18

s'k<sub>i</sub> t<sub>a</sub> se' weir michoë. Erë ì buaë kiane Skëköl Wiköl k<sub>i</sub> wè ese wésö, e' t<sub>a</sub> e' wà dörane s'k<sub>i</sub> t<sub>a</sub> sene michoë döraë se' ulà a. <sup>9</sup> ì buaë w<sub>e</sub>kesö k<sub>e</sub>kraë, kè ilo'yeta', e' t<sub>a</sub> aishkuö t<sub>a</sub> mik ikéwö de, et<sub>a</sub> iské döraë se' ulà a. E' kuëk<sub>i</sub> kè se' shtrinuk ì buaë uk k<sub>e</sub>kraë. <sup>10</sup> E' kuëk<sub>i</sub> mik se' a ì buaë ormi, et<sub>a</sub> iùsö sulitane a, bua'iewa s'yamipa erblöke Cristo mik, esepa a.

*Pablo e' chéat*

<sup>11</sup> Ttè bata i' shtök ye' tso' ye' wák ulà wa. A' isaú tö ikite bérie, es a' w<sub>a</sub> ijchermi tö mok<sub>i</sub> ye' tso' ishtök. <sup>12</sup> Wépa tö a' keke a' wépa tottola kkuölit tök tsir, e'pa tö iweke es as ie'pa at buaë judiowak malepa t<sub>a</sub>. Ie'pa tö ichópa tö se' tsatkërke, Cristo kötew<sub>a</sub> krus mik se' skéie, e' batamik, e'ma judiowak tö ie'pa we'ikera siarë. <sup>13</sup> Erë ie'pa wákpa tottola kkuölit tëule, e'pa kè tö Moisés ttè dalöiëno e' iutè sera<sub>a</sub>. Ie'pa tö a' keke a' tottola kkuölit tök tsir e' ttsok<sub>a</sub> iwákpa a tö ie'pa tö a' ké e' wakyuök w<sub>e</sub>s judiowak es. <sup>14</sup> Erë ye' i', e' kè e' ttsöpak<sub>a</sub> ì ulitane k<sub>i</sub>. Skëképa Jesucristo kötew<sub>a</sub> krus mik, e' è kikekekayö. E' batamik ì sulu k<sub>os</sub> tso' ká i' a ese dunewabak ye' a, ñies ese a ye' dunewabak. <sup>15</sup> S'tottola kkuölit tëule tsir ö kè tëule, e' kè k<sub>i</sub> Skëköl tkine. Ie' tö se' er mane'wé pa'al<sub>i</sub> iWiköl wa, e' è kiar ie' k<sub>i</sub>. <sup>16</sup> Wépa k<sub>os</sub> serke w<sub>e</sub>s ttè i' tö ichè es, as esepa a ie' tö sene bèrè mù ena isaú er siarë wa. Esepa dör ie' ala'r chók, esepa dör Israel aleripa chók ie' a.

<sup>17</sup> Ye' weine k<sub>os</sub> Jesús tté kuëk<sub>i</sub>, e' tö tso' ye' w<sub>a</sub> ye' chkà k<sub>i</sub>. E' wa ye' tö iwà kkacheke tö ye' dör ie' kanè méso mok<sub>i</sub>. E' kuëk<sub>i</sub> i'tami kè yi tö ye' tsiriwari<sub>a</sub> ttè e' k<sub>i</sub>.

<sup>18</sup> A yamipa, as Skëképa Jesucristo er buaë chò a' ulitane a. Es e' idir.

## Yëkkuö kit Pablo tö Éfeso wakpa a Efesios

Pablo tö yëkkuö i' kit mik ie' bak Roma wötëulewā s'wöto wé a Jesús tté buaë pakè kuëki e' ta. Ì bak ie' ta e' tso' kitule yëkkuö Hechos 28.17-31 e' ki. Pablo tö yëkkuö i' kit Jesús mik erblökwakpa tso' Éfeso ena ipamik e'pa a. E' kèwö ska' ta Éfeso dör ká bua'ie ena eë taië u tso' ì dalöieke ie'pa tö Skëköl skéie e' dalöioie. E' bua'ie dör ie'pa kéköl eköl kiè Artemisa e' dalöioie (Hechos 19.23-31). Mik Pablo shka' Jesús tté buaë pakök, etā ie' dè'mi Éfeso (Hechos 18.18-21). Erë eë ie' sené bërber è ta imineā. E' ukuöki ta iskà mineane ta isené eë duas mañal Skëköl tté kkachök. E' tso' kitule Hechos 19 ki.

Jesús mik erblökwakpa kè wā kabene ku' taië. E' kuëki Pablo kè wā ì kite taië e' ki. E' skéie ì buaë tsakië o' Skëköl tö se' a, ier buaë yè' sia e' batamik, e' ki ie' tö ikit kibiie. Ie' tö ichè tö e' kuëki se' kawötā senuk Skëköl kikokaie. E' kit ie' tö yëkkuö i' ki.

Jesucristo wa Skëköl tö se' ulitane tsatké' Israel aleripa ena pè' ulitane, ñies e'pa er bua'wéitö ñi ki.

### *Shke'wè*

<sup>1</sup> Ye' dör Pablo. Skëköl wák er wa ye' dör Jesús ttekölpa tsá, e'pa eköl. Ye' tso' yëkkuö i' shtök s'batse'rpa e' tkëulewā darèrè Cristo Jesús mik serke Éfeso, e'pa a. <sup>2</sup> Skëköl dör S'yé ena Skëképa Jesucristo as e'pa er buaë chò ena sene bèrè mù a' a.

### *Skëköl tö se' tsatké Jesucristo batamik*

<sup>3</sup> Skëköl dör Skëképa Jesucristo yé, e' kikökasö taië. Se' batsulewā Cristo mik, e' kuëki Skëköl er buaë ché se' a ì kos buaë tso' ie' wā ká jai a e' wa. <sup>4</sup> Kam ie' tö ká i' yuò, e' yöki se' shukitbakitö as se' dò batse'r, kè ki ì sulu ta' yès ie' wōā, se' batsulewā Cristo mik e' batamik. Ie' éna se' dalër taië, <sup>5</sup> e' kuëki ie' tö ibikeitsbak tö se' tseratköitö ila'rie Jesucristo batamik, e' kiane ie' wák ki, ñies e' tö ie' ttsé'weke buaë. <sup>6</sup> Ie' tö iwé es as se' tö ie' kiköka michoë ie' er buaë ché se' a taië shütē e' kuëki. E' kos wé ie' tö ilà dalër taië ie' éna, e' batamik. <sup>7-8</sup> Cristo kötewā se' skéie, ie' pé tene, e' wa se' yënettsā sene sulu ulā a ena se' nuì olo'yé Skëköl tö se' ki. E' wa se' isué tö ie' er buaë ché taië shütē se' a. Ñies ie' tö erbikè buaë mé se' a as ì weke ie' tö e' wā ar se' a. <sup>9</sup> Ì bikeitsbak ie' tö wè, e' wawéitö ì o' Cristo tö e' batamik. Kuaë ta' ibl'wáitö sulitane yöki, erë iwā kkachéitö se' a. <sup>10</sup> Ie' ibikeitsbak tö mik ikéwö de, etā ie' tö Cristo tkerakā íyi ulitane tso' ká jai a ena ká i' a e' wökirie.

<sup>11</sup> Ì kos weke Skëköl tö, e' weke ie' tö iwák er wa wēs ie' ki ikiane es, wēs ie' tö ibikeitseke es. Es sa' dör judiowak e'pa shukitbak ie' tö as sa' dò ie' ichaie, sa' batsulewā Cristo mik e' batamik wēs ie' tö ibikeitsbak es. <sup>12</sup> Ie' tö iwé es as sa' erblé' kewe Cristo mik e'pa tö ie' olo taië e' kiköka. <sup>13</sup> Es a' ñies, mik a' tö s'tsatkè tté buaë moki e' ttsé ta' a' erblé imik, etā a' bàtsewā Cristo mik ena Wiköl Batse'r muk ikablè' e' méitö a' a iwā kkachoie tö a' dör ie' icha. <sup>14</sup> Wiköl Batse'r tso' se' a, e' dör iwā kkachoie tö ì kos yé' Skëköl tö tö imeke, se' dör ie' icha, e'pa a aishkuö ta, e' meraéitö se' a. E' kuëki se' wā ijcher tö ie' tö se' tsatkeraë da'a. E' kuëki ie' olo ta' taië, e' kikökasö.

### *Pablo tté Skëköl ta' Éfeso wakpa ki*

<sup>15</sup> E' kuëki, mik ye' tö a' tté ttsé tö a' erblöke mokië Skëképa Jesús mik, ñies mik ye' ittsé tö s'batse'r malepa kos dalëritseke a' tö taië, <sup>16</sup> e'tami wéstela yè'miyö Skëköl a' a' dalërmik kekraë mik ye' ttöke ie' ta etā. <sup>17</sup> Ie' dör Skëképa Jesucristo e' Kéköl. Ie' dör S'yé olo ta' taië e'. Ie' a' ye' tso'ie ikiök tö ie' tö a' kímè iWiköl wa as ie' íyi wā ar buaë a' éna, ñies as a' wā ijcher bua'iewā tö yi dör ie'. <sup>18</sup> Ie' tö se' klöq' ikablè' se' a e' wā panuk kröröë. E' tso' ie' wā mè se' dör ie' icha batse'rpa esepa a. Ye' tso'ie ie' a' ikiök tö a' er ñi'úitö as kos kablè' ñe' bua' dör ena olo dör e' wā ar a' éna. <sup>19</sup> Ie' diché ta' taië íyi ulitane

tsata. Ì kòs ormi ie' a. Idiché e' wa ie' tso' se' erblöke Cristo mik, e'pa kimuk. Ye' tso'ie ikiök ie' a tã a' er ñi'úitö as e' kòs wà ar bua'ie a' éna. Diché e' dör taië shute, <sup>20</sup> e' wa Cristo kötewã, e' shkeo'kãne ie' tö. Diché e' wa ie' tö Cristo tkéka ká jai a iulã bua'kka íyi ulitane wökirie. <sup>21</sup> Ee Cristo tkërka diché ta' taië íyi wökir, íyi wák, íyi kéköl wã diché ta', ese kòs tsata. Ie' tkënekã íyi ulitane tsata. Ie' dör ì kòs tso' i'ñie ta' ena aishkuö ta' e' tsata. <sup>22</sup> Skéköl tö ì kòs méwã ie' klò dikia. Ñies ie' tö iméka se' dör ie' icha e'pa kòs wökirie. <sup>23</sup> Se' dör wës Cristo wák chká es, ta' ie' dör wës s'wökir es. Ie' tö se' wëttseke ì kòs kiane ie' kî wè ká i' kî, e' uk. Ie' tso' ká wa'ñe, kè ì a' ie' wöklönuk.

## 2

### *Skéköl er buaë ché se' a se' tsatkoie*

<sup>1</sup> Kam a' erblö Cristo mik, e' yöki a' bak e' wamblök suluë, e' kueki a' bak wës s' duulewã es Skéköl a. <sup>2</sup> E' kèwö ska' ta' a' bak senuk suluë wës wépa kè tö Skéköl dalöie esepa ser es. Wimblu sulusi dör ì sulu kòs tso' ká i' a' e' wökir e' ttò iütök a' bak. Ie' tso' Skéköl ttè dalöseukwã wakpa esepa wörieikök. <sup>3</sup> Se' kòs bak senuk wës ie'pa es. Ì sulu kòs kiane s'wák dër suluë e' kî wamblè, ese wamblök se' bak. Se' erbikè sulu, e' è wã wamblök se' bak s'wák ttsë'woie buaë. Se' bak wömeulettsã weinuk Skéköl ulã a' wës pè' malepa es. <sup>4-5</sup> Se' bak duulewã se' nuì kî, erë Skéköl tö se' suë er siarë wa taië. Ie' tö se' dalëritsé taië. E' kueki ie' tö sene michoë mé se' a. E' dör wës ie' tö se' shke'wékane Cristo ta' es. Ie' er buaë ché se' a taië, e' kueki se' tsatkëne. <sup>6</sup> Se' batsulewã Cristo Jesús mik, e' kueki e' dör wës Skéköl tö se' shke'wékane Cristo ta' ñita es. Ñies ie' tö se' tkéka Cristo ta' ñita ká jai a. <sup>7</sup> E' kòs wé ie' tö es iwã kkachoie aishkuö ta' tö kòs ie' er buaë ché se' a ì wé Cristo Jesús tö se' dalërmik e' batamik. E' dör taië shute kè wöet ta' ekkè. <sup>8-9</sup> Skéköl er buaë ché a' a, e' batamik a' tsatkëne, a' erblöke Jesucristo mik e' kueki. E' kè dör ì buaë wé a' tö ie' wörkî ese skéie. Ie' tö a' a imé éme wës íyi kalmè es. Ie' tö iwé es as kè yi e' ttsòka tö ie' tsatkée ì buaë wéitö ese batamik. <sup>10</sup> Ie' tö se' er mane'wé pa'alî se' batsulewã Cristo Jesús mik e' batamik. Ie' tö iwé es as se' tö ì buaë kòs ese ù. E' kòs bikeitsbakitö as se' ser wës ie' kî ikiane es.

### *Judiowak ena wépa kè dör es, esepa de wës wák eköl è es Cristo batamik*

<sup>11</sup> A' wépa kè dör judiowak, kè a' éna ichökwa tö wës a' bak kam a' erblö Cristo mik e' yöki. Judiowak wépa kòs esepa tottola kkuölit tëule tsir iwã kkachoie tö ie'pa dör Skéköl icha. Pè' kè dör judiowak, esepa kiè ie'pa tö tottola kkuölit kè tëule ese wakpa. Es ie'pa tö a' cheke suluë. Ie'pa a' a' dör ñá. <sup>12</sup> A' éna ianú tö a' bak e' butsulettsã bánet Cristo yöki. A' kè bak Israel aleripa shua. Ì uk Skéköl kablè' ie'pa a' ena ttè mène ie'pa a' tsakië e' shua a' kè bak. A' bak senuk ká i' a' Skéköl chók kè ta', kè a' ì paneta'. <sup>13</sup> Erë i'ñie ta' a' batsulewã Jesucristo mik. E' kueki a' dewã Skéköl ska' buaë, Cristo Jesús kötewã a' skéie, ie' pé tène a' tsatkoie, e' batamik.

<sup>14</sup> Cristo tö judiowak ena pè' kè dör judiowak, esepa er bua'wé ñi kî. Se' bak ñi bolökpaie, erë Cristo tö se' er bua'wé ñi kî. Ie' tö se' wöiéwã ká etkè wakpaie. Ì tö se' wé ñi bolökpaie ese shulé ie' tö ikötewã krus mik se' skéie e' wa. <sup>15</sup> Ttè me'atbak Skéköl tö judiowak a' dalöiëno, e' tö se' me'kã ñi bolökpaie. Erë Cristo kötewã se' skéie e' kueki ttè e' kòs kè diché ta'ia. Skéköl tö iwé es as sa' dör judiowak ena a' kè dör judiowak, e'pa dò ñi yamipaië batsulewã Cristo mik wës wák eköl è es. Es ie' tö se' er bua'wé ñi kî. <sup>16</sup> Ì tö se' wé ñi bolökpaie, ese shulé Cristo tö. Ie' kötewã krus mik se' skéie, e' wa ie' tö Skéköl er bua'wé judiowak kî ena pè' kè dör judiowak esepa kî. Es se' de wës wák eköl è es Skéköl a. <sup>17</sup> Sene bèrë Skéköl ta, e' ttè buaë pakök Cristo de, pè' kè dör judiowak e' butsulettsã bánet Skéköl yöki, esepa a, ñies judiowak kè e' butsulettsã bánet esepa a. <sup>18</sup> Cristo batamik se' kòs döwami buaë S'yé ska', iWiköl dör eköl è, e' wa. <sup>19</sup> E' kueki i'ñie ta' a' kè dör wës ká kuã'kî wakpa es. A' de s'batse'rpa kîie. Ñies a' de Skéköl ala'rie.



<sup>20</sup> Se' dör wēs u es. Jesús ttekölpa tsá ena Skéköl ttekölpa, e'pa dör wēs u kukulēwō es. Jesucristo wák dör wēs u chkí es. <sup>21</sup> Cristo dör u wöklö'ukwak. Se' kōs dör u e' yese alē. Cristo batamik u e' yörmir dō ide u etkue batse'r Skékēpa a ekkē. <sup>22</sup> Se' batsulewā Cristo mik, ñies se' batsulewā ñi mik, es se' kōs dō wēs Skéköl wé es, e' a Skéköl serke iWiköl wa.

## 3

*Pablo klöne Cristo tté pakök pē' kè dör judiowak esepa a*

<sup>1</sup> Ye' wák tso' wötēulewā s'wōto wé a Cristo Jesús tté pakē kuēkī a' kè dör judiowak esepa kimoie. Skéköl er buaë ché a' a taiē, e' kuēkī ie' a ye' tso' ikiök a' kī. <sup>2</sup> Ye' wā ijcher tō a' wā ittšēule tō Skéköl er buaë ché ye' a, e' kuēkī ie' tō kanè i' me' ye' a Jesús tté pakök a' kè dör judiowak esepa a. <sup>3</sup> Ibikeitsbak Skéköl tō wè, e' blē'waitō erē iwà kkayē'itō ye' a. E' wā shtétke ye' tō a' a yēkkuō i' kī böt mañat. <sup>4</sup> Yēkkuō i' sué a' tō, etā a' éna iwà armi tō Cristo tté blēulewā se' yōkī kuaë, e' wā ane ye' éna buaë. <sup>5</sup> Ibikeitsbak Skéköl tō wè Cristo batamik, e' blēulewā kuaë. Erē i'ñe tā ie' tō iwà kkaché iWiköl wa sa' dör Cristo ttekölpa tsá e'pa a, ñies Skéköl ttekölpa batse'r e'pa a. <sup>6</sup> Ttè e' blēulewā se' yōkī kuaë, e' wā dör i' es: A' kè dör judiowak, esepa kieke Skéköl tō Jesús tté buaë e' wa as ì kōs tso' ie' wā mè sa' a, e' mùitō a' a ñies, as a' dōñak sa' tā ñita wēs wák eköl è es, as ì kōs muk Skéköl kablē' sa' a e' dō a' ulà a' ñies, a' batsulewā Cristo Jesús mik e' kuēkī. <sup>7</sup> Skéköl er buaë ché ye' a, e' kuēkī ie' diché wa ie' tō ye' me'ka ttè buaë ñe' wakanéuk.

<sup>8</sup> S'batse'rpa kōs, e' sulula ye' dör. Erē Skéköl er buaë ché ye' a, ie' tō ye' shushté Cristo tté buaë e' pakök pē' kè dör judiowak esepa a. Ì tso' Skéköl wā ie'pa a Cristo batamik, e' dör buaë shūte, kè se' a iwà bikeitsuk ekkē. <sup>9</sup> Ñies ì bikeitsbak Skéköl tō wè Cristo wa, e' wā pakök sulitane a' ie' tō ye' patké. Ttè e' bak blēulewā ká iaiäe, ie' dör íyi ulitane yuökwak e' wā. <sup>10</sup> Ie' kè wā ikkayēne yi a ká iaiäe tā, ie' tso' se' dör Skékēpa Jesús icha e'pa panuk e' kuēkī. Se' wa ie' tō iwà kkaché i'ñe tā íyi wōkir ena íyi wák tso' kè wërta'wā ese kōs a' as ie'pa éna iar tō ie' siwā' dör iskiē tsakiē íyi ulitane tsata. <sup>11</sup> E' kōs wé ie' tō Cristo Jesús dör Skékēpa e' wa, wēs ie' tō iwà yōbiē e' bikeitsbak es. <sup>12</sup> Se' batsulewā Cristo mik, se' erblōke ie' mik, e' kuēkī se' dömiwā buaë ttök ie' tā kè suarta', kè wöklör ì a. <sup>13</sup> Ye' weirke kōs a' dalērmik, e' wa a' ké e' ttsökka. E' kuēkī ye' tō a' a ichè tō kè a' e' siäukwā.

*Pablo tténe Skéköl tā Éfeso wakpa kī*

<sup>14</sup> Íyi ekkē kōs kuēkī ye' e' tkéwā kuchē kī S'yé wörki ttök ie' tā. <sup>15</sup> Ì kōs dör ttsē'ka ká jai a' ena ká i' a, e' tso' ie' è batamik. <sup>16</sup> Ie' olo tā' taiē shūte, e' a ye' tō ikieke tō ie' tō a' er diché iō iWiköl wa. <sup>17</sup> Ñies ye' tō ikieke ie' a tō Cristo mú ser a' er a, a' erblōke ie' mik e' kuēkī. Ye' tō ie' a ikieke tō a' e' tkōwā darērēē ñi dalēritsök ñies Skéköl dalēritsök. <sup>18</sup> Ye' tō ikieke ie' a es as a' ena s'batse'r malepa, e'pa kōs éna iwà ar tō kōs Cristo éna se' dalēr, e' dör taiē, shoë, batsjē, kakkeë, iskiē, kè enukwa. <sup>19</sup> Ye' kī ikiane tō a' éna iwà anù buaë tō kōs Cristo éna se' dalēr, e' tkōka kōs se' kabikeitsō e' tsata. Es ye' kī ikiane as a' ser buaë yēsyesē, kabikeitsō buaë mokiē wēs Skéköl wák es.

<sup>20</sup> Skéköl diché tā' taiē, e' tso' iwakanéuk se' er a. Ie' tō ì buaë wēmi se' a, ì kōs kiekēsō ena ì kōs bikeitsekēsō e' tsata, e' kuēkī ie' kīkōkasō. <sup>21</sup> As Skéköl kīkōka se' dör Skékēpa Jesús icha e'pa tō. Ñies ikīkōkasō Cristo Jesús kuēkī kekraë. Es e' idir.

## 4

*Se' dör wēs ñi yamipa es Wiköl Batse'r wa*

<sup>1</sup> Ye' tso' wötēulewā Skékēpa Jesús tté kuēkī. Skéköl er buaë ché a' a taiē Cristo batamik, e' kuēkī ye' kköchò a' a tō a' senú buaë yēsyesē wēs Skéköl tō a' klōo'bak senuk es. <sup>2</sup> A' e' wōowa bèrē, a' senú buaë ñita kè kēsik wa. A' ñi dalēritsō, ñies a' ñi dalē'ttsó

er bua' wa. <sup>3</sup> A' kòs dör wēs ñi yamipa es Skèköl Wiköl wa. A' e' chó darërë as a' kè ñi blabatsòlor ñi yöki. A' senú bèrë ñita. <sup>4</sup> Se' kòs dör wēs wák eköl è es. Skèköl Wiköl tso' se' ta e' dör eköl è. Skèköl tò se' kòs klöo' as se' ser michoë ie' ta, e' wà paneke se' kòs tò ñita ttsë'ne buaë wa. <sup>5</sup> Se' Kèköl dör eköl è, ttè mik se' erblöke e' dör etkè. S'wöskuè etkè a se' ulitane wösune. <sup>6</sup> Skèköl dör eköl è, e' dör se' ulitane yé. Ie' dör se' ulitane wökir. Ie' tso' iwakanéuk se' ulitane wa, ñies ie' tso' se' ulitane ta.

<sup>7</sup> Se' kòs dör wēs wák eköl è es, erë Cristo tò imé se' a eköl eköl kanebloie ie' a kuä'ki kuä'ki wēs ie' ki ikiane es. <sup>8</sup> E' dör wēs itso' kitule Skèköl yèkkuö ki es, e' tò ichè:

“Mik ie' e' aléka ibolökpa ki

eta ie' míkane ká jai a.

Ibolökpa klö'wéwaitö tajë, e'pa mítser iwä e' ta,

ñies ì buaë méitö iwakpa a.”\*

Es Skèköl yèkkuö tò ichè.

<sup>9</sup> Wé ichéitö tò “ie' míkane kákke”, eta jima e' wà dör? E' wà dör tò ie' dè'rö kewe ká dià kaska'. <sup>10</sup> E' wà kiane ché tò ie' dè'rö ká dià kaska', e' è mine'kane ká jai a iyi ulitane tsata ká kòs wà ioie ie' olo tajë e' wa.

<sup>11</sup> Cristo tò diché mé se' a eköl eköl kanebloie ie' a. Se' welepa shushtë ie' tò kaneblok ie' a ittekölpa tsáie. Se' welepa skà shushtë ie' tò Skèköl ttekölpaie. Se' welepa skà shushtë ie' tò ittè buaë pakökwakpaie. Se' welepa skà shushtë ie' tò ittè klö'ukwakpa wökirpaie ena s'wöbla'ukwakpaie ittè wa. <sup>12</sup> Esepa kanè dör s'batse'r malepa kòs wöbla'uk kaneblok buaë ie' a ena ñi kimuk buaë. Se' serke wēs ie' ki ikiane es, e' ta se' kòs dör wēs Cristo chkà es, e'pa er diché kí iërdaë Cristo tté a. <sup>13</sup> Es se' kòs döraë erblök ñikkëé Jesús dör Skèköl Alà, e' mik. Ñies se' kòs wä ijcherdaë ñikkëé se' er a tò wēs ie' dör. Se' döraë wēs wëm kibineone es. Se' serdaë buaë yësyësë wēs Cristo es. <sup>14</sup> Es se' kè döpaia wēs alala es kitër tottola ttè ulitane wa. Esepa dör wēs dichawö ppé siwa' tò es. S'wöbla'ukwakpa kache tté wa, e'pa erbikö tajë, ie'pa tò ttè pa'ali yuëmi s'kitö'woie. Mik se' kibine Cristo tté a, eta esepe kè kitöonukia yi a. <sup>15</sup> Kè se' e' muktsa kitö'wè kache tté wa. E' skéie ttè moki, ese chekesö ñi a se' ñi dalëritsö e' kuëki. Se' tò iwé es, eta se' diché iërke buaë Cristo dör s'wökir, e' tté kòs a. <sup>16</sup> Cristo batamik se' kòs dör wēs s'chkà es. S'chkà a s'dichéwö tso', s'kicha tso' ena s'yese skà tso' tsakië, e' kòs tso' iëulewä buaë ñikkëé, kanebloke buaë ñikkëé ñita. Es se' dör tajë, e'pa kanebloke Cristo a eköl eköl kanè dör kuä'ki kuä'ki, erë Cristo batamik se' dör wēs chkà etkè es, iëulewä buaë ñita, kanebloke buaë ñita. Es se' mir buaë, ñi kí diché iöke buaë ñikkëé ñi dalër wa.

*Kè se' senukia wēs pè' kè tò Skèköl dalöie es*

<sup>17</sup> Skèkëpa Jesucristo ttö wa ye' tò a' a ichè tò kè se' seriä wēs pè' kè tò Skèköl dalöie ser es. Ì kòs bikeitseke ie'pa tò, e' wà kè dör iie bua'. <sup>18</sup> Ie'pa erbikè tsenewatke. Skèköl ttè moki, e' wà kè ane ie'pa éna yës. Ie'pa er darërëë, e' kuëki sene moki meke Skèköl tò se' a, e' kè dè' ie'pa ulà a. <sup>19</sup> Ie'pa er burinewä. Ie'pa e' mettsa ì sulu kukuétökwa darërëë. Ie'pa e' ia'uke sene sulusi wa, kè e' wöklö'uta' yës.

<sup>20</sup> Erë Cristo ttè kè wa se' wöblane senuk es. <sup>21</sup> Moki a' tò ie' ttè ttsé, a' e' yuë ie' ttè moki wa. <sup>22</sup> E' kuëki se' bak senuk suluë, ese kòs olo'yösö. Ñies se' wák dër suluë, e' olo'yösö. E' tò se' kitö'weke ì sulu wamblök. Se' tò iüté es, e' ta se' er sulurdawä. <sup>23</sup> Erë se' erbiköne kuä'ki buaë yësyësë. <sup>24</sup> Skèköl tò se' wák dër suluë, e' mane'wëttsa pa'ali wēs ie' wák es, e' kuëki se' senü yësyësë ena batse'r wēs ttè moki tò ichè es.

<sup>25</sup> E' kuëki a' kè kachökia ñi ki. Se' kòs dör wēs wák eköl è es, e' kuëki ì cheke a' tò ñi a, e' chó ttè moki wa.

<sup>26</sup> A' ulune, e' ta kè iwà wamblar. A' er buanúne kam katuirwä e' yöki. <sup>27</sup> Kè kawö mar bé a as ie' tò a' kò ì sulu wamblök.

\* 4:8 Salmo 68.18

<sup>28</sup> Yi bak akblök, e' kè akblökiä. E' skéie ese kanebló iwák ulà wa as iulà a iwà dò tā ikakmèitö s'siarëpa a.

<sup>29</sup> Ttè sulusi kè chariä. E' skéie a' tö ttè buaë ese è chó s'malepa kukua as ie'pa kí er tòwä Skëköl mik darërëë. Es a' tö ie'pa kimèmi buaë mik ie'pa ki ikiane eta. <sup>30</sup> Skëköl tö iWiköl me' se' a iwà kkachoie tö se' dör ie' icha. Es se' wä ijcher moki tö Skëköl tö se' bleraë buaë dò mik se' tsatkërdattsa aishkuö tā, e' kèwö ska' tā. E' kuëki kè ì sulu wamblariä as Wiköl Batse'r kè eriar. <sup>31</sup> Kè a' kësik blökiä ñi ki. Kè a' ñi saukiä suluë. Kè a' ulunukiä ñi ki. Kè a' wöñanukiä ñi ki. Kè a' ñi chökiä suluë. Ese kos olo'yó. <sup>32</sup> E' skéie ì buaë è ú ñi a. A' ñi saú er siarë wa. Ì sulu wambleke a' tö ñi ki, ese nuí olo'yó ñi ki wes a' nuí olo'yé Skëköl tö a' ki Cristo batamik es.

## 5

<sup>1</sup> A' dör Skëköl ala'r dalër taië ie' éna, e' kuëki a' senú buaë yësyësë wes ie' ser es. <sup>2</sup> A' ñi dalëritsó kekraë wes Cristo tö se' dalëritsé es. Ie' e' mettsa ttèwä se' skéie. E' wër buaë Skëköl wa wes íyi mekesö ie' a ala'r buaë masmas es. <sup>3</sup> A' senú wes s'batse'rpa ké senuk es. Kè a' kàne trënu. Kè a' kàne e' ia'ukka sene sulusi wa. Kè a' kàne íyi kkechök. Íyi ese yöki a' e' kkö'nú bua'iewä as kè yi tö a' kkatò iki. <sup>4</sup> Ttè sulusi kos, ttè kè wä tā kos, ttè tsuleie kulúie kos, ese kè char. E' skéie Skëköl è kikóka. <sup>5</sup> A' wä ijchenú buaë tö wépa trërke ena wépa tö íyi sulusi wambleke, ñies wépa tö íyi kkecheke (e' dör wes íyi diököl dalöie skëkölíe es), esepa kos kè döpa ì blúie Cristo ena Skëköl e'pa tso' e' a.

### *Sene buaë yësyësë*

<sup>6</sup> Íyi sulu ekkë kos kuëki wépa tö Skëköl ttè dalösewéwä, esepa ki Skëköl kësik ardaë. E' kuëki kè a' e' muktsa yi a kitö'wè ttè kè wä tā ese wa. <sup>7</sup> Kè a' e' tiuk ie'pa esepa tā, a' e' skó ie'pa yöki bánet. <sup>8</sup> A' bak senuk suluë, e' dör wes a' bak senuk ká ttsettseë a es. Erë ì'ñe tā a' tso' batsulewä Skëképa Jesús mik, e' dör wes a' serke ká ñi a es. E' kuëki a' senú wes s' ser ká ñi a es. <sup>9</sup> S' serke wes ká ñi a es, esepa er buaë, ser yësyësë ena ttò mokië. <sup>10</sup> A' e' chó e' wöbla'uk ì wër buaë Skëképa wa ese wa. <sup>11-12</sup> Ì sulu wambleke wépa ser wes ká ttsettseë a es, esepa tö, ese kè dör ìie bua'. Ì sulu wambleke ie'pa tö akirie, ese pakè tö s'jaëwè ekkë. E' kuëki kè ì sulu wamblariä yës wes ie'pa es. E' skéie ì buaë kí ú kekraë. E' tö ie'pa a ikkachèmi tö ì wambleke ie'pa tö e' dör suluë. <sup>13-14</sup> Erë ká ñiwe tö íyi ulitane kkachèwä buaë míä ñiweie. E' kuëki mik ì sulu wambleke ie'pa tö e' kkachésö ie'pa a, e' tā ie'pa wépa éna iarmi tö e' dör suluë tā ier mane'umi tā imíä ser buaë wes ká ñiwe wakpa es. E' kuëki ttè tö ichè i' es:

“A' dör wes s'kapötkëter es, esepa ti'nú,  
a' dör wes s'duulewä es, esepa shkenúkane,  
eta Cristo tö a' er ñi'weraë.”

<sup>15</sup> E' kuëki a' ser kkö'nú a' tö. Kè a' senukiä wes wépa kè er tā' esepa ser es. E' skéie a' senú yësyësë. <sup>16</sup> Taië pé' tö íyi sulu wambleke ì'ñe tā, e' kuëki ì buaë ormi se' a, e' tā iüsö kos se' a iormi ekkë. <sup>17</sup> Kè a' senuk wes kè se' erbiökötä' buaë es. Erë ì kiane Skëképa Jesús ki tö se' tö iwè, ese wä anú a' éna. <sup>18</sup> Kè a' e' ttökkaia blo' wa yës. E' tö s'sulu'wekewä da'a. E' skéie a' senú buaë yësyësë kekraë Wiköl Batse'r diché wa. <sup>19</sup> Mik a' ñi dapa'uke, eta a' ttsó ñita Salmo wa ena Skëköl ttsé wa, ñies ttsé meke iWiköl tö a' a ese wa. A' ttsó Skëköl a ikikokäie a' er kos wa. <sup>20</sup> Wéstela chó kekraë Skëköl dör S'yé e' a Skëképa Jesucristo ttò wa.

### *Wes se' ké senuk ñita*

<sup>21</sup> Cristo dalöieike a' tö, e' kuëki a' ñi dalöiö. <sup>22</sup> Alakölpa ké iwépa dalöiök wes ie'pa tö Skëképa dalöieike es. <sup>23</sup> Alaköl wëm dör ie' wökir wes Cristo dör ie' ichapa wökir es. Ie' dör ie'pa tsatkökwa. Ie'pa dör wes ie' chkà es. <sup>24</sup> E' kuëki alakölpa ké iwépa dalöiök ì kos a wes wépa dör Cristo icha esepa tö ie' dalöieike es.

<sup>25</sup> A wëpa, a' alakölpa dalëritsó wës Cristo tö se' dör ie' icha esepa dalëritseke es. Ie' e' mettsa ttëwä se' skéie. <sup>26</sup> Ie' tö iwé es se' batse'woie. Ie' tö se' paiklé ittè wa as se' dò maneneë Skëköl wöa. E' wà suëkesö mik se' wösune eta. <sup>27</sup> Ie' tö iwé es as se' dò ie' wák wörki batse'r, kè kī ì sulu ta' yës, olo ta' taië wës alaköl ulabatsöketke es, ese paiëule buaë, kè iauleka, idatsi' kè wökliouleka. <sup>28-30</sup> Es ñies wëpa ké ilakölpa dalëritsök wës ie'pa e' dalëritsò es. Kè yi e' sauta' suluë. E' skéie se' e' kkö'nù buaë, e' tiò buaë. E' kueki wëm tö ilaköl dalëritseke, e' wa ie' wák e' dalëritsò. Es ñies se' dör Cristo icha, e'pa dör wës ie' chkà es, e' kueki ie' tö se' kkö'neke buaë. <sup>31</sup> Itso' kitule Skëköl yëkkuö kī i' es: “Wëm kè serpaia iyé ena imi e'pa dapömik, e' skéie iserdawä ilaköl ta. Ie'pa böi serdaë ñita ta ie'pa mia wës wák eköl è es.”\* <sup>32</sup> Ttè e' dör taië iskië, kè se' éna iwà ar bet. Erë ye' a ta, ttè e' tso' Cristo ena se' dör ie' ichapa e'pa chök. <sup>33</sup> Erë ñies ttè e' tso' se' a ichök tö wëpa kos ké ilakölpa dalëritsök wës iwákpa e' dalëritsò es. Ñies alakölpa kos ké iwëpa dalöiök.

## 6

<sup>1</sup> A ala'rla, a' yé ena a' mī, e'pa ttò dalöiö Skëképa Jesús dalërmik, e' dör buaë yësyëë e' kueki. <sup>2-3</sup> Ttè dalöiëno me'atbak Skëköl tö e' et tö ichè: “A' yé ena a' mī e'pa dalöiö. A' tö iwé es, e' ta a' kawö tköraë buaë ena a' serdaë ká taië ká i' kī.”\* Ttè e' dör ttè dalöiëno tsá kablé se' a ilè uk iütè skéie e'.

<sup>4</sup> A' dör ala'rla yéwöpa ena imiwöpa, kè a' tö a' ala'r uluukka. E' skéie ie'pa tala'ú buaë, ie'pa shuló er bua' wa. Ñies ie'pa wöbla'ú Skëképa Jesús ttè wa.

<sup>5</sup> A' klöulewä kanè mésoie, a' wökirpa tso' ká i' kī, e'pa ttò iütó er mokī wa. Ie'pa dalöiö suane wa painè wa. A' kanebló ie'pa a buaë wës a' chópa kaneblök Cristo a es. <sup>6</sup> A' kanebló buaë ie'pa a këkraë, kè dör mik ie'pa tö a' suëke e' è ta ie'pa wökatoie tö a' dör kanè mésopa buaë ese. Mokī a' dör Cristo kanè mésopa, e' kueki a' kanebló ie'pa a kaneë wës Skëköl kī ikiane es. <sup>7</sup> A' kanebló ie'pa a kaneë wës Skëképa Jesús wák a s'kaneblò es, kè dör wës s'kaneblò s'ditsö a es. <sup>8</sup> A' wä ijcher tö wëpa tso' klöulewä kanè mésoie ena wëpa kè dör es, esepa kos a Skëképa Jesús tö iské meraë eköl eköl wës ì buaë wésö es.

<sup>9</sup> A' dör kanè wökirpa, a' kanè mésopa dalöiö ñies. Kè ie'pa pauñar. A' éna ianú tö a' ena ie'pa, e'pa kos wökir dör Skëköl tso' ká jai a e'. Se' kos kawötä ie' ttè dalöiök. Se' dör kanè wökirpa ö se' dör kanè mésopa ësepa, esepa kos dör ñies ème ie' a.

### *Se' e' tsatkò bé yöki*

<sup>10</sup> A yamipa, ibataie ta ye' tö a' a icheke tö a' e' diché ió këkraë a' batsulewä Skëképa Jesús ta e' wa, ñies ie' diché taië e' wa. <sup>11</sup> Ì kos mé Skëköl tö a' a e' tsatkoie ì sulu yöki, e' dör wës ì kos tso' ñippökwakpa wä e' tsatkoie es. E' ió a' tö as a' e' tsatkò, e' wa a' e' tkówa darërè bé éna se' kītö'wak e' yöki. <sup>12</sup> Kè se' ñippöku' s'ditsö ta. E' skéie se' ñippöke íyi sulusi diché ta' kè wërta'wä esepa ta. E'pa dör íyi wökir ena íyi wák tso' ì sulu kos tso' s'pamik wës stui a es ese wëttsuk. <sup>13</sup> E' kueki ì kos mé Skëköl tö a' a e' tsatkoie, e' ió a' tö, e' klö'ú as mik ì sulu datse a' erkiök ì sulu wamblök, eta a' a iwöklör. A' tö iwé es këkraë, e' ta a' e' alöraka ì sulu kī ta a' a e' tkërdawä darërè mokjè.

<sup>14</sup> E' kueki a' tso' erki ñippök ì sulu ta. Skëköl ttè mokī e' klö'ú a' tö, e' dör wës ñippökwakpa kipamo es. A' senú yësyëë Skëköl a, e' tö a' kimeräë wës íyi daloie ieke ñippökwakpa tö ibatsi' kī e' tsatkoie es. <sup>15</sup> Skëköl tö a' er bua'wéne ie' kī Cristo batamik, e' ttè buaë klö'wé a' tö, e' dör a' a wës ñippökwakpa klökkuö iökä as kè ikulirttsa es. <sup>16</sup> Ñies a' erblö këkraë Skëképa Jesús mik, e' dör wës ì tso' klöule ñippökwakpa wä iulà a shoë e' tsatkoie es. E' wa a' tö ì sulu kos patkeke bé tö a' kī ese kos wöklö'weraë. E' dör wës kuaböt wönarke bö'ie uyeke ñippökwakpa kī, e' wöklö'weke wöshteke ì tso' ie'pa wä iulà a e' wa es. <sup>17</sup> Skëköl tö a' tsatkeraë, e' bikeitsó a' tö këkraë, e' dör wës íyi daloie tkekeka

\* 5:31 Génesis 2.24 \* 6:2-3 Deuteronomio 5.16

ñippökwakpa tö iwökir ki e' tsatkoie es. Ñies a' er múwā ie' ttè ki, e' dör wēs ie' Wiköl tabè es. <sup>18</sup> Ì kōs ā tā ikió ie' ā tö ie' tö a' kimè. Ie' tā a' ttó kekraë iWiköl wa, kè ilo'yar yēs. Ñies ie' ā ikió s'batse'r malepa kōs ki. <sup>19</sup> Ñies ikió ie' ā tö ye' ā ttè mèitō wà pakè ās ye' tö Jesús tté buaë blëulewā kā iaiaë, e' wà pakò kè suarta'. <sup>20</sup> Ye' patkëule ttè buaë e' pakök, erë ì'ñe tā ye' tso' wötëulewā s'wöto wé ā ttè e' kuek*i*. A' ikió Skëköl ā ye' ki ās ye' tö iwà pakò buaë kè suarta'.

*Pablo e' chéat*

<sup>21-22</sup> Ye' ki ikiane tö a' wā ijcher tö is ye' tso' ena ì weke ye' tö. E' kuek*i* ye' tö yëkkuö i' patkeke Tíquico ulà ā. Ie' dör s'yami dalër taië sa' éna. Ie' dör Skëképa Jesús kanè méso yësyësé ese. Ie' tö a' ā ichèmi tö is ye' tso'. Ñies ie' tö a' er diché ièmi.

<sup>23</sup> Skëköl dör S'yé ena Skëképa Jesucristo ās e'pa tö sene bèrè mù s'yamipa kōs ā. Ñies ās Skëköl tö ie'pa kimù ñì dalëritsök buaë. Ñies ās ie'pa erblò Skëköl mik kekraë. <sup>24</sup> Ās Skëköl er buaë chò wépa éna Skëképa Jesucristo dalër kekraë kè manerta'ttsā esepa kōs ā.

## Yëkkuö kit Pablo tö Filipos wakpa a Filipenses

Mik Pablo tö yëkkuö i' kit, etä ie' tso' Roma wötëulewā s'wöto wé a Jesús tté buaë pakè kuëkī. E' tso' kitule Hechos 28.14-31 e' kī. E' yökī mik Pablo dë'rö Filipos Silas ena Timoteo e'pa tā Jesús tté buaë pakök, etä taië pë' erblë' Jesús mik (Hechos 16.11-40). Mik Jesús mik erblökwakpa wā ijchēnewā tö Pablo tso' wötëulewā, etä ie'pa tö inuköl ena ilè skà patkë'mi Epafrodito ulà a ikimoie. E' kī wëstela ché Pablo tö yëkkuö i' kī.

Filipos wakpa weirke Jesús mik erblë e' kuëkī. E' kuëkī Pablo tö ie'pa a ikkaché tö eré ie' weirke, eré ie' ttsë'rke buaë. Ie' tö ie'pa a iché tö ie'pa ké senuk wës Jesús sené es. Ie' e' wöawa diöshet s'malepa kimoie. Es se' kawöta senuk ñi kimoie.

E' kīe tā ie' tö ie'pa a ibiyó ché tö Israel aleripa welepa tso' s'wöbla'uk suluë. E' yökī ie'pa kawöta e' kkö'nuk. Ie'pa ñekkëpa s'wöbla'weke tö kè se' tsatkërpa erblë Jesús mik e' è wa. Eré Pablo tö iché tö e' kè idör es.

### *Shkë'wè*

<sup>1</sup> Ye' dör Pablo. Ñies Timoteo tso' ye' tā íe. Sa' dör Cristo Jesús kanè mésopa. Ye' tso' yëkkuö i' shtök a' dör batse'r batsulewā Cristo Jesús mik serke Filipos e'pa a, ñies a' wökirpa ena ie'pa kīmwakpa e'pa kos a. <sup>2</sup> Skëköl dör S'yé ena Skëkëpa Jesucristo as e'pa er buaë chö a' a ena sene bèrè mù a' a.

### *Pablo tö wëstela ché Skëköl a Filipos wakpa dalërmik*

<sup>3</sup> Bitökicha ye' er ane a' ska', etä ye' tö wëstela cheke Skëköl a' a' dalërmik. <sup>4</sup> Këkraë mik ye' tö ikieke Skëköl a' a' kī, etä ye' ttsë'ne buaë. <sup>5</sup> Kuaë dò ikkë tā, buaë a' tö ye' kīmeke Jesús tté buaë pakè e' kané wa. E' kuëkī ye' ttsë'ne buaë a' dalërmik. <sup>6</sup> Ye' wā ijchër buaë tö ì buaë tsá tkéwāmitke Skëköl tö a' er a, e' wā kī weraëitö buaë dò mik Jesucristo döne etä. <sup>7</sup> A' dalër taië ye' éna, e' kuëkī e' dör buaë tö ye' tö a' bikeitsè es. Këkraë a' er tso' ye' ska'. Eré ye' tso' wötëule s'wöto wé a Jesús tté buaë kuëkī, eré a' er tso' ye' ska'. Ñies mik ye' kè ku' wötëule tso' Jesús tté buaë tsatkök ena ichök tö e' dör moki, etä a' er tso' ye' ska'. Skëköl er buaë ché ye' a' e' kuëkī kanè méitö ye' a Jesús tté buaë pakök. Kanè e' a' a' ulitane tso' ye' tā ñita. E' kuëkī buaë idir tö ye' tö a' bikeitsè es. <sup>8</sup> Skëköl wā ijchër buaë tö kos ye' éna a' dalër wës Cristo Jesús éna a' dalër es. <sup>9</sup> Ye' tö Skëköl a' ikieke tö a' kī ñi dalëritsò taië. Ñies ye' tö ie' a' ikieke tö as a' kī erbikö yësyësé ena a' kī éna ká ar buaë <sup>10</sup> as ì dör ibua'ie ese shushtò a' tö wè këkraë. Es a' sermi batse'r, kè kī ì nuí tā' dò mik Cristo döne etä. <sup>11</sup> Es Jesucristo batamik a' sermi yësyësé, e' wërdaë buaë wës kal bua'buā wör buaë ese wër es. E' dör es, etä Skëköl dalöierdaë buaë ikikardakā taië a' batamik.

### *Pablo tso' wötëule eré Jesús tté buaë kī pakarke*

<sup>12</sup> A yamipa, ye' kī ikiane tö a' wā ijchër tö ì sulu tköke ye' tā, moki e' kè wā Jesús tté buaë wöklöne. E' skéie ikī pakarke taië. <sup>13</sup> Shkëkīpa kos tso' íe ká i' wökir kibi u a, ñies imalepa kos tso' íe, e'pa wā ijchër tö ye' tso' wötëule Cristo tté kuëkī. <sup>14</sup> Ñies ye' tso' wötëulewā moulewā, e' tö taië s'yamipa tso' ká i' a, e'pa kī erkiöwé ttè pakök kè suarta'ia, ie'pa kī erblöke Skëkëpa mik e' wa.

<sup>15</sup> Moki s'yamipa welepa ukyërke ye' kī, ie'pa wötköke ye' kī, e' kuëkī ie'pa tö Cristo tté pakeke. Eré welepa tö ipakeke er moki wa. <sup>16</sup> Ie'pa éna ye' dalër taië, ñies ie'pa wā ijchër buaë tö ye' tso' wötëulewā íe, e' dör Jesús tté buaë tsatkoie. E' kuëkī ie'pa tö Cristo tté pakeke. <sup>17</sup> Eré welepa skà tso' e' è bikeitsök, esepa tö ipakeke, eré e' kè dör er moki wa. Ie'pa éna ye' kī we'ikak ye' tso' s'wöto wé a' e' dalewa. <sup>18</sup> Eré ipakarke er sulu wa ö er moki wa, e' kè dë' wës ye' a. Ibuā'ie dör tö Cristo tté buaë e' pakarke, e' tö ye' ttsë'weke buaë.



Etā ye' kī ttsē'rdaē buaē. <sup>19</sup> E' wà dör tō ye' wā ijcher tō ye' yērdattsane e' kieke a' tō Skëköl a' e' batamik, ñies Jesucristo Wiköl tso' ye' kimuk e' batamik. <sup>20</sup> Moki yō iklö'wé tō ye' kè jaēnukka Cristo kī s'shulökwakpa wörki. Ye' wā ijcher tō mik ye' e' tsatköke ie'pa wörki, etā ye' ttöraē ie'pa tā kè suane wes kekraē ye' tō Cristo tté pakeke es as ie' kikarka taiē ye' wa. Ye' serkeiā ö ye' ttèwā e' wa Cristo kīkarkeka. <sup>21</sup> Ye' a' tā, ye' serkeiā, e' dör Cristo kīkōkka. Erē ye' blēnewā, e' tā ye' e' alé. <sup>22</sup> Ye' serkeiā ká i' a, etā es ye' kanēblōmiiā Cristo a' tā e' wà kī dörattsā buaē. Ye' wák kè wā ijcher tō wéne dör ibua'ie. <sup>23</sup> Darērē ishukit ye' a. Sulu ye' shkakmitke Cristo ska', e' dör ibua'ie ichökle. <sup>24</sup> Erē a' a' buaē idir tō ye' serkeiā a' kīmoie. <sup>25</sup> Ye' wā ijcher buaē tō e' dör moki, e' kuēki ye' wā ijcher tō ye' serkeiā ká i' a' a' kīmoie as a' kī ttsē'r buaē ttè mik se' erblöke e' a. <sup>26</sup> Ñies ye' serkeiā ká i' a' e' dör as a' tō Cristo Jesús kīkōka taiē mik a' tō isuē tō ie' wā ye' dene a' ska' etā.

### *Sene wes Cristo kī ikiane es*

<sup>27</sup> I'buā'ie dör tō a' senú yēsüesē wes Cristo tté buaē tō ichè es. Ye' de a' ska' ö ye' kè dē' a' ska', erē ye' kī ikiane tō a' ser es as ye' tō a' tté ttsò tō a' er méwā ñitā ñikkēē. Ñies as ye' tō ittso tō a' e' tkéwā darērēē ñitā Jesús tté buaē mik se' erblöke e' tsatkök. <sup>28-29</sup> Skëköl er buaē ché se' a, e' kuēki ie' tō kawö mé se' a erblök Cristo mik ñies weinuk idalērmik. E' kuēki kè a' suanuk se' bolökpa yōki. Ie'pa tō se' we'ikeke, e' dalē'ttsésö er bua' wa, e' tā e' tō ikkacheke ie'pa a' tō ie'pa weirdaē siarē aishkuö tā, erē se' tsatkērdaē. E' kos dör Skëköl kanè. <sup>30</sup> I'ñe tā a' weirke wes a' tō isu' tō ye' weine mik a' tā ye' bak etā es. Ñies i'ñe tā a' tō ittse tō ye' tso'ia' weinuk.

## 2

### *Se' ké e' wöökwa diöshet wes Cristo e' wöawa es*

<sup>1</sup> Cristo tō a' er kuēke. Ie' éna a' dalér taiē e' tō a' er pableke. A' batsulewā ñi mik Skëköl Wiköl wa. Ñies a' ñi saü er bua' wa, er siarē wa. <sup>2</sup> E' kuēki ye' tō a' a' ikiē taiē tō a' er múwā ñitā ñikkēē. A' ñi dalērītsó ñikkēē. A' erbikó ñikkēē Skëköl a. A' senú buaē ñitā ñikkēē, e' wa a' tō ye' ttsē'ú buaē. <sup>3</sup> Kè ì wā wötkoie ñitā. Kè ì wā e' ttsokā ñi kī. E' skéie a' e' wöowa bèrē. Ibikeitsó tō s'malepa dör buaē a' tsata. <sup>4</sup> Kè a' e' tkiuk a' wákpa íyi è kī. A' ké s'malepa kī tkinuk ikimè wa isuè wa.

<sup>5</sup> Se' erbikò wes Cristo Jesús erbikò es, e' dör i' es:

<sup>6</sup> Ie' wák dör Skëköl je',

erē ie' kè tkine e' kī tō iwák dör Skëköl.

<sup>7</sup> E' kos méatitö iwák er wa,

ie' de ká i' a' yöne s'ditsöie wes kanè méso es.

Ie' kune' s'ditsöie.

<sup>8</sup> Mik ie' bak ká i' a, etā ì kos kiane Skëköl kī e' iutè'itö seraa dō ie' e' me'ttsā ttèwā wötèulewā krus mik wes pè' sulusi es.

Ekkè ie' e' wöa'wa.

<sup>9-11</sup> E' kuēki Skëköl tō ie' tkéka íyi ulitane tsata.

Ñies ikiē mékaitö Këköl íyi ulitane tsata.

Ie' tō iwé es as ì kos tso' ká jai a, ena ká i' a' ena ká diöshet e'pa kos e' tulòwā kuchè kī Jesús wörki idalöioie,

ñies as sulitane tō ichōka tō Jesucristo dör Skëköl,

Skëköl dör S'yé e' kīkōka taiē.

### *Sene yēsüesē pè' sulusipa shūa*

<sup>12</sup> A ye' yamipa dalér taiē ye' éna, Cristo tō Skëköl ttè iuté buaē, e' kuēki ye' tō a' a' ichè tō a' tsatkéne e' wà ú suane wa painè wa. Mik ye' bak a' ska' etā kekraē a' tō Skëköl ttè iuté

buaë, erë i'ñe ta ye' kè ku' a' ta, etā ikí iutó bua'iewa. <sup>13</sup> Skëköl wák tö a' erkiöwé ì kiane ie' ki wè ese woie. Ñies ie' tö idiché mé a' a iwakanéwoie. E' kuëki a' tö iwakanewëmi buaë.

<sup>14</sup> Ì kos weke a' tö, e' ú bèrë, kè dör kabene wa, kè dör ukyëne wa. <sup>15</sup> Iú es as kè ì sulu tté kur a' ki. Es a' sermi pé' sulusipa shua yësyësë kè ki ì nuí ta' wës Skëköl ala'r es. Ie'pa shua a' dör wës bëkwö wõñar ká ttsettse a es. <sup>16</sup> Jesús tö sene michoë mè se' a, e' tté wà pakó ie'pa a. A' tö iwakanewé es, e' ta ye' ttsë'rdaë buaë mik Cristo dene etā. Es ye' tö isueraë tö ye' kanëblé darërë e' kè weine é. <sup>17</sup> A' erblöke Jesús mik, a' tö Skëköl tté iuteke buaë. Ñies a' e' mettsa weinuk ie' tté kuëki. E' dör wës iyiwak jchè sacerdote tö mè Skëköl a es. Isalema ie'pa tö ye' ttèwami Jesús tté kuëki. E' wà tka ye' ta, e' ta ye' döraë wës vino tekettsa iyiwak jchène mè Skëköl a e' ki es. Ie'pa tö ye' ttèwami, erë ye' ttsë'r buaë a' ta ñita. <sup>18</sup> Es ñies a' ttsë'nú buaë ye' ta ñita.

#### *Timoteo*

<sup>19</sup> Skëképa Jesús ttò wa ye' mú tö Timoteo patkëmi bet a' ska'. Ie' tö a' a ye' biyó meraë buaë, e' tö a' ttsë'weraë buaë. Ñies ie' wā a' biyó döraë ye' a as ye' ttsë'r buaë. <sup>20</sup> Kè yi skà ku' ye' ta tkirke a' ki mokí wës ie' es. <sup>21</sup> Imalepa tkirke ì kiane ie'pa wákpa ki, ese è ki, kè tkirta' ì kiane Jesucristo ki ese ki. <sup>22</sup> Erë a' wā ijcher tö Timoteo tö ikkayë'bak tö ie' dör Jesús kanë méso buaë. Ie' kanëblëule buaë ye' ta Jesús tté buaë pakók wës ye' wák ala es. <sup>23</sup> E' kuëki mik ye' wā ijchertke tö wës ye' dõmi íe, etā ye' mú tö Timoteo patkëmi a' ska'. <sup>24</sup> Ñies ye' erblöke Skëképa mik tö ye' dõmine a' ska' kukuie.

#### *Epafrodito*

<sup>25</sup> Ñies ye' tö ibikeitsè tö ye' kawõtā s'yami Epafrodito patkõkmine a' ska'. Ie' dör wës ye' èl es. Ie' kanëblöke buaë ye' ta. Ie' tö Jesús tté tsatkeke buaë ye' ta. A' tö ie' patkë'bitu ye' kimuk a' skéie.

<sup>26</sup> Ie' ki a' kiane suë kröröë. Mik ie' wā ijchënewā tö a' tö ibiyó ttsë' tö ie' duöke, etā e' tö ie' eriwéka taië. <sup>27</sup> Mokí ie' kirinebak. Tsir etā ie' blënewā, erë Skëköl tö isuë er siarë wa, e' kuëki ie' buanene. Es Skëköl tö ye' suë er siarë wa ñies. Epafrodito duópawā, e'ma ye' kí eriane taië. <sup>28</sup> E' kuëki sulu ye' éna ipatkakmi bet a' ska' as a' ttsë'rne buaë isaunkne, ñies as ye' kè kí eriarā. <sup>29-30</sup> A' tö ie' kiówā ttsë'ne bua' wa wës Jesús mik erblökwakpa ñi kiówā es. Tsir etā ie' blënewā Cristo kanë wè kuëki. Wës a' kè a ye' kimer, e' kuëki ie' tö ye' kimé a' skéie. Eë iekkë ta ie' blënewā. E' kuëki se' esepa dalöiö.

### 3

#### *Cristo dör buaë ichökle ì ulitane tsqta*

<sup>1</sup> A yamipa, e' kúie ta ye' tö ichè a' a tö a' ttsë'nú buaë Skëképa Jesús batamik. Ì kitbak ye' tö yëkuö ki a' a, e' skà shtekeneyö a' a i' ta. Ye' kè shtrine iskà chökne a' a. E' dör buaë a' a a' tsatkoie wépa éna a' kitó'wak esepa yöki. <sup>2</sup> A' e' kkö'nú pé' sulusipa datse wës chichi sulusipa es esepa yöki. Ie'pa e' wamblörak suluë. Ie'pa icheke tö wépa tottola kkuölit tëule tsir wës Moisés tö ikitat es, esepa è dör Skëköl ala'r chökle. Ie'pa éna a' er sulu'wakwā tté ese wa. E' kuëki a' e' kkö'nú esepa yöki. <sup>3</sup> E' kè dör wës ie'pa tö ichè es. Se' tö Skëköl dalöieke iWiköl batamik, esepa je' dör Skëköl ala'r chökle. Kè se' erblöku' se' wákpa mik e' tsatkoie. E' skéie se' erblöke ì o' Cristo Jesús tö e' mik, e' wa se' e' tsökeka taië. <sup>4</sup> Yile e' ttsòka tö itsatkërmi iwák batamik, e' ta ye' e' ttsòkami taië e' tsata. <sup>5</sup> Mik ye' ki ká deka paköl (8) etā ye' tottola kkuölit tëne tsir wës Moisés tö ime'at es. Ye' dör Israel aleripa e' eköl. Ye' dör Benjamín ditséwö. Ye' dör hebreo ditséwö chökle. Ye' bak fariseowakie e' kuëki Moisés tté kitule dalöiëno e' dalöiök ye' bak buaë wës fariseowakpa es. <sup>6</sup> E' kéwö ska' ta ye' bak tté e' tsatkök darërë dõ Skëképa Jesús icha esepa we'ikök siarë. Sene yësyësë kiekë tté ñe' tö se' a e' wà iutëule ye' wā seraā, kè ki ì sulu tté ta' yës. <sup>7</sup> Ye' bak ibikeitsök tö iyi ekkëpa kos e' dör buaë ye' a e' tsatkoie, erë i'ñe ta ye' éna iane tö

e' kōs kè dör ìie bua' ye' a. E' kueki e' kōs kè wà tã'ia ye' a Cristo dalërmik. <sup>8</sup> E' kïe tã, Cristo Jesús dör ye' Këköl, e' mik ye' bàtse buaë, moki e' dör buaë ye' a íyi ulitane tsãta. Ie' dalërmik íyi malè kōs watëttsayö, e' dör ushñaie ye' a as ye' ulà dō ie' ska' <sup>9</sup> ena ye' båtswa ie' mik da'ãie. Es Skëköl tō ye' klō'wé wēs pē' buaë yësyësë es ie' wörki, e' kè dör Moisés ttè dalöiëno e' dalöiëyö buaë e' kueki. E' skéie ie' tō ye' klō'wé wēs pē' buaë yësyësë es ye' erblé Cristo mik e' kueki. E' wà dör tō mik ye' erblé Cristo mik etã, e' kueki Skëköl tō iché tō ye' dör pē' buaë yësyësë ie' a. Nies ie' tō ye' kímé senuk yësyësë ie' a. <sup>10</sup> Ye' kī e' batsak Cristo mik bua'iewa. Ie' kötwa pē' tō e' shkeo'kane Skëköl tō ie' diché taië wa, e' diché kiane ye' kī ye' er a. Ye' e' chak weinuk ie' dalërmik wēs ie' weine ye' dalërmik es. Ye' e' chak ttëwa ie' dalërmik wēs ie' kötëwa ye' dalërmik es. <sup>11</sup> Ye' senak es as Skëköl tō ye' shke'ùkane aishkuö tã.

#### *Kam se' ser yësyësë wēs Cristo es*

<sup>12</sup> Ye' kè tō icheku' tō e' kōs wëtkeyö. Ye' kè tō icheku' tō ye' dekatke ser yësyësë wēs Cristo Jesús ser es. Erë ie' tō ye' klö'bak as ye' dō wēs ie' es. E' kueki ye' e' tkéwa darërëë as ye' dō wēs ie' es. <sup>13</sup> A yamipa, ye' kè ibikeitsè tō íyi ekkë kōs detke ye' ulà a. Ì o' ye' tō, ese kè bikitseku'iaiyö. E' skéie ì tso' Skëköl wã ye' a aishkuö tã, ese è yuleke ye' tō darërëë. <sup>14</sup> Ye' e' tkéwa darërëë kekraë dō mik ye' demi ká jài a etã as iské dō ye' ulà a. E' dör sene michoë Skëköl tã. E' tso' ie' wã bil yi klöule ie' wã Cristo Jesús batamik esepa a. <sup>15</sup> Se' ulitane erblö buaë Cristo mik, esepa kawõtã ibikeitsök ñe' es. A' welepa tō ilè bikitseke kuã'ki etã Skëköl tō a' er ñi'werane. <sup>16</sup> Erë ibua'ie dör tō se' ulitane ké senuk yësyësë kōs se' a ikkayëne eköl eköl ekkë.

#### *Se' dör ká jài wakpa*

<sup>17</sup> A yamipa, a' senu wēs ye' serke es. Nies wépa serke wēs sa' serke es esepa webló tã a' senu es. <sup>18</sup> Ye' tō a' a iyë' taië tō pē' tso' e' chò tō ie'pa erblöke Jesús mik, erë ie'pa serke wēs Cristo kötëwa krus mik e' bolökpa es. E' skà chëneyö a' a i' tã ië wa. <sup>19</sup> Ie'pa ekkëpa michoë ewëwa. Ì kiane ie'pa kī ese dör ie'pa këköl. Warma ì tō ie'pa ké jaënuk taië, ese wa ie'pa e' ttsökeka. Ie'pa er me'rie ì tso' ká i' a ese è kī. <sup>20</sup> Erë se' dör ká jài wakpa. Skëképa Jesucristo dör S'tsãtkökwak tso' ká jài a, e' datskene, e' paneke se' tō kröröë. <sup>21</sup> Ie' wã diché tso' taië e' aloka íyi ulitane kī. Idiché wa ie' tō se' chkà nurta'wa e' mane'werattsa as idò wēs ie' wák chkà olo tã' taië es.

## 4

<sup>1</sup> A yamipa, a' e' tkówa darërë Skëképa Jesús a kekraë. Suluë ye' éna a' suakne, a' dalër taië ye' éna. A' tō ye' ttsë'weke buaë. A' dör wēs ye' kaneblöke Skëköl a' e' ské es.

#### *Evodia ena Síntique*

<sup>2</sup> A Evodia ena Síntique, a' bøl dör Skëképa Jesús icha, e' kueki ye' kköchò a' a tō a' erbikó ñikkëë. <sup>3</sup> Eköl tso' a' shua, e' dör ye' kímukwak buaë, e' a ye' ikiè tō alakölpa e'pa kímú er buanukne ñi kī. Ie'pa bak kaneblök buaë ye' tã Jesús ttè buaë pakè wa. Ie'pa ena Clemente ena imalepa bak kaneblök darërëë ye' tã, e'pa kiè kōs tso'tke kitule sene michoë yëkkuö kī.

#### *A' ttsë'nú buaë kekraë*

<sup>4</sup> A' ttsë'nú buaë kekraë a' dör Skëképa Jesús icha e' kueki. Ye' tō iskà chëne a' a tō a' ttsë'nú buaë. <sup>5</sup> Sulitane saü er bua' wa kekraë. Skëképa Jesús datskene bet.

<sup>6</sup> Kè ì tō a' eriauk, e' skéie ì kiane a' kī, ese kōs mú Skëköl ulà a, ie' a ikiè wa ena kköchè wa. Nies wëstela chò ia. <sup>7</sup> A' tō iwé es, e' tã sene bèrë meke ie' tō e' meraëitö a' a. E' dör taië iskië kè se' éna iwà ar ekkë. E' tō a' er ena a' erbikè kk'neraë Cristo Jesús batamik.

<sup>8</sup> A yamipa, ibataie ta ye' tö a' a icheke tö ì kos dör mokië, ì kos dalöier'ta', ì kos dör yësyësë, ì kos dör batse'r, ì kos dör buaala, ì kos kikauleka buaë, íyi ese kos ki a' er múwa kekraë. ì kos dör buaë ena ì kos kíkarkata', ese bikeitsó kekraë.

<sup>9</sup> ì kos wa ye' tö a' wöblaö', ttè kos yë' ye' tö a' a, e' ttsé' a' tö. Wes ye' serke, e' su' a' tö. A' senú es, e' ta Skéköl dör sene bèrë mukwak, e' tso' a' ta' kekraë.

*Pablo tö ie'pa a wëstela ché*

<sup>10</sup> Ye' ttsé'ne buaë tö bata ekkë ta a' er dene ye' ska'. ì patké a' tö ye' a, e' wà de ye' ulà a, e' tö ye' ké wëstela chök Skékëpa Jesús a. Ye' éna iane tö moki a' kè er chë'wa ye' ska', erë a' kè ulà dë' wes ipatkoie ye' a. <sup>11</sup> Ye' kè ku' e' chök a' a ilè kí kianeia ye' ki e' kueki. Ye' wöblanewatke ttsé'nuk buaë ì kos tköke ye' ta e' a. <sup>12</sup> Ye' wöblanewatke senuk mik ye' wa íyi tso' taië etä, ñies mik ye' kè wa íyi ta' yës etä. Ye' wöblanewatke ì kos tköke ye' ta e' dalé'ttsök. Íyi tso' ye' wa ñè ö íyi kè ta' ye' wa ñè, erë ye' ttsé'rke buaë. ì tso' ye' wa taië ö ì kè ta' ye' wa yës, erë ye' ttsé'rke buaë. <sup>13</sup> Íyi kos dalé'ttsërmi ye' a buaë Cristo batamik, e' tö ye' a diché meke e' kueki. <sup>14</sup> Erë buaë idir tö a' tö ye' kimé ye' weirke taië e' shua.

<sup>15</sup> A yamipa, a' wa ijcher buaë tö mik a' tö Jesús tté buaë e' tsá ttsé', e' këwö ska' ta ye' e' yé'ttsa Macedonia ta a' erule serke Filipos e'pa è tö ye' kimé inuköl wa. Kè imalepa skà wa ye' kimène wes a' es. <sup>16</sup> E' kíie ta mik ye' bak Tesalónica, etä a' tö íyi patké' ye' a e' kimoie bötökichakkë. <sup>17</sup> Ye' kè ku' ì kakmeke a' tö ye' a e' è bikeitsök. ì buaë kí merke a' a ká jaì a ì kakmé a' tö ye' a e' skéie, ese bikeitsök ye' tso' bua'ie. <sup>18</sup> A' wa ijchenú tö ì kos patké' a' tö ye' a, e' dë' ye' ulà a, e' kueki taië ye' wa itso'. E' kíie ta ì ipatké' a' tö Epafrodito ulà a, e' kos ta ye' wa itso' taië shute. ì wé a' tö e' wër buaë Skéköl wa wes íyi meule ie' a ala'r buaë masmas es. Ese kiar ie' ki. <sup>19</sup> E' kueki ye' Kéköl tö ì kos kiane a' ki senoie ie' a ese meraë a' a ì tso' ie' wa buaë taië shuteë e' wa Cristo Jesús batamik. <sup>20</sup> Skéköl dör S'yé, e' kíkókasö taië kekraë! Es e' idir.

*Pablo e' chéat*

<sup>21</sup> Jesucristo icha batse'r e'pa kos shké'ú ye' a. Ñies s'yamipa tso' ye' ta, e'pa tö a' shké'wémi. <sup>22</sup> Ñies s'batse'rpa serke íe, e'pa kos tö a' shké'wémi. Sa' shua wépa kaneblöke Roma wökir kibi a, e'pa tö a' shké'wémi bua'iewa.

<sup>23</sup> As Skékëpa Jesucristo er buaë chò a' a.

## Yëkkuö kit Pablo tö Colosas wakpa a Colosenses

Mik Pablo tö yëkkuö i' kit etä ie' tso'ia wötëulewä Roma s'wöto wé a. Wes ì bak ie' ta e' tso' kitule Hechos 28.17-31 e' ki. Pablo wák kè wä Jesús tté buaë pakane Colosas. Wëm eköl kiè Epafra, e' tö Colosas wakpa a ipaka'. E' ukuöki ie' dè'rö Pablo weblök s'wöto wé a ta ie' tö Pablo a ipaké tö Colosas wakpa shua kabene tso' taië.

Epafra tö ie' a ipaké tö pë' wele tso' s'wöbla'uk Jesús tté wa erë kè dör yësyësë. Pë' ñe'pa tö s'wöbla'weke tö Skëköl kè wä íyi qos yöne Cristo wa. Ñies ie'pa tö icheke tö Jesús kè dör kékëpa taië ese. E' skéie Jesús mik erblökwakpa kawöta tkinuk bua'ie ì ki Israel aleripa tkirke ese ki, es ie'pa tö s'wöbla'weke.

E' kuëki Pablo tö yëkkuö i' kit ñippoie ie'pa ñekkëpa ta Jesús tté buaë tsatkoie. Ie' tö ichè tö Jesús è a se' tsatkërmi. E' kuëki Skëköl tö ie' tkë'ka sulitane ena íyi ulitane tsata. Ñies ie' ichè tö ì kkacheke pë' esepa tö e' kè dör iie bua' ena e' kè a se' tsatkënuke. E' kíie ta ie' tö ikkaché tö wes se' kawöta senuk Skëköl wörki.

### *Shkë'wè*

<sup>1</sup> Ye' dör Pablo. Skëköl wák er wa ye' dör Jesucristo ttekölpa tsá, e'pa eköl. Ñies s'yami Timoteo e' tso' ye' ta íe. <sup>2</sup> Ye' tso' yëkkuö i' shtök a' dör batse'r serke Colosas e'pa a. A' dör s'yamipa e' tkëulewä darërë Cristo mik. Skëköl dör S'yé as e' er buaë chò ena sene bèrë mù a' a.

### *Pablo tö wëstela ché Skëköl a ie'pa dalërmik*

<sup>3</sup> Këkraë mik sa' tö ikieke Skëköl a a' ki, etä sa' tö wëstela cheke ie' dör Skëkëpa Jesucristo Yé e' a a' dalërmik. <sup>4</sup> Sa' tö a' tté ttsé tö a' tso'ia erblök buaë Cristo Jesús mik. Ñies sa' tö ittse tö a' tö s'batse'r malepa qos dalëritseke buaë. E' kuëki sa' tso' wëstela chök ie' a a' dalërmik. <sup>5</sup> Mik Jesús tté buaë mokië e' dè' a' ska' kuaë, etä a' tö ittse' tö Skëköl wä ì buaë tso' blëule a' a, e' tso' a' panuk ká jai a. E' wä paneke a' tö kröröë, e' kuëki a' erblöke Cristo mik ena a' ñi dalëritsöke buaë këkraë. <sup>6</sup> Ttè buaë e' pakarke taië ká wa'ñe, e' klö'weke pë' tö taië. E' tö ie'pa er mane'weke as iser buaë yësyësë. Es ñies ibak a' ta kuaë mik a' tö ittse' ta iklöo'mi moki tö Skëköl er buaë ché se' a Cristo batamik. Kuaë dè' ì ñe ta tté e' wakaneorkear buaë a' shua. <sup>7</sup> Ttè e' paka' Epafra tö a' a, ie' dalër taië se' éna. Ie' dör Cristo kanè méso wes sa' es. Ie' dör Cristo kanè méso yësyësë a' kimoie. <sup>8</sup> Ie' wä a' tté de sa' ska' tö a' tö sa' dalëritseke taië Skëköl Wiköl wa.

<sup>9</sup> E' kuëki mik sa' tö a' tté ttsé' kuaë, etä sa' utmi S'yé ta a' ki. E' kè olo'yeta' sa' tö dè' ikké ta. Sa' tö ikiear Skëköl a tö ie' Wiköl tö a' er ñi'ú kabikeitsoie buaë, as ì kiane ie' ki tö a' iwè e' wä ar buaë a' éna. <sup>10</sup> E' ane buaë a' éna, e' ta a' serdaë buaë yësyësë wes wépa dör Skëkëpa Jesús icha, esepa ké senuk es. A' serke es, e' ta ì qos weke a' tö, e' wër buaë ie' wa. Ì buaë qos weraë a' tö taië wes kal wör taië buaë es. Ñies wes Skëköl dör, e' wä kí ar michoë a' éna buaë. <sup>11-12</sup> Sa' tö ikieke S'yé a tö ie' tö a' er diché iò, ie' olo taië, ie' diché taië, e' wa. Es idir, e' ta a' weirke qos e' dalë'ttsërmi a' a er bua' wa. Ñies ì qos wé S'yé tö a' a, e' ki wëstela cheraë a' tö ie' a ttsë'ne bua' wa. Ì tso' ie' wä mè se' dör ie' icha batse'rpa e'pa a ilo bur taië e' a, e' yök a' yuétkeitö as idò a' ulà a ñies. <sup>13</sup> Ie' tö se' yéttsa ì sulu qos dör wes stui es, ese ulà a ta se' tsémiitö wépa blúie ilà dalër íéna e' tso' esepa kíie. <sup>14</sup> E' batamik se' tsatkéitö ena se' nuì olo'yéitö se' ki.

### *Skëköl er buanene se' ki Cristo batamik*

<sup>15</sup> Skëköl kè wërta'wä, erë Cristo wa ie' e' kkayë' s'ditsö a. Kam íyi ulitane yör, e' yöki Cristo tso'tke. Ie' dör íyi ulitane qos e' tsata. <sup>16</sup> Ì qos tso' ká jai a ena ká i' a, e' yö' Skëköl tö Cristo ta ñita. Ì wërta'wä, ñies ì kè wërta'wä íyi wökirie ena íyi kékölie ena íyi wákie

wà diché tã' ese kôs yö' ie' tō Cristo tã ena Cristo kíkoka. <sup>17</sup> Kam íyi ulitane yö, e' yöki Cristo tso'tke. Íyi ulitane yöne ie' tã ñita tã i'ñe tã e' kôs kicha a'tser ie' wa. <sup>18</sup> Ñies se' dör ie' icha, e'pa wökir ie' dör. Se' dör wes Cristo wák chkà es, etã ie' dör wes s'wökir es. Ie' kötewã, e' shkenekane se' tsáie as ie' dō íyi ulitane tsata. E' kuëki ie' dör se' sene michoë, e' wì kicha bua'ie. <sup>19</sup> Wes Skëköl dör, e' kôs wënewã Cristo kî, es Skëköl tō ibikeitsbak. <sup>20</sup> Ñies ie' tō ibikeitsbak tō íyi ulitane tso' kã jai a ena kã i' a ena kã wa'ñe e' dörane ie' ulà a Cristo batamik. Es ie' tō se' er bua'wëne ie' wák kî Cristo kötewã krus mik, ipé tene taië se' nuì skéie e' wa.

<sup>21</sup> Kenet se' bak ì sulu wamblök ena ì sulu bikeitsök, e' kuëki se' bak Skëköl bolökpa siulettsã bánet ie' yöki. <sup>22</sup> Erë ie' tō se' er bua'ne ie' kî Cristo kötewã se' nuì skéie e' wa as se' döwã ie' wörki batse'r, kè kî ì sulu tã, kè kî ì nuì tã'. <sup>23</sup> Erë se' kawöta e' tkökwa darërëë kekraë se' erblò Cristo mik e' a. Ttè buaë ttsé' a' tō wã paneke a' tō e' kè olo'yar, e' tã iwà döraë a' ulà a. Ttè buaë e' pakane sulitane a kã wa'ñe ñies ye' tso'ñak ipakök.

### *Kanè mène Pablo a*

<sup>24</sup> Eré ye' weirke a' dalërmik, erë ye' ttsé'rke buaë. Cristo weine ie' icha dalërmik. Ie'pa dör wes ie' chkà es, e' kuëki ie'pa weirke e' dör wes ie' wák tso'ia weinuk es. E' kuëki ye' weirke kôs a' dalërmik, e' dalé'ttsök ye' tso'. Es ye' tso'ñak weinuk Cristo tã. E' tō ye' ttsé'weke buaë. <sup>25</sup> Skëköl tō kanè mé ye' a Skëképa Jesús icha e'pa kanéuk. Ie' tō ye' patké ie' tté buaë kôs e' pakök a' a. <sup>26</sup> Se' bak kã iaiãë, e'pa yöki tté buaë e' bak blëulewã, erë i'ñe tã ikkayëne ie' icha batse'rpa a. <sup>27</sup> Ie' tō ibikeitsbak tō tté e' kkacheraë ie'pa a. Ttè e' dör buaë shutëë, e' wa ie' er buaë chömi pë' kôs kè dör judiowak esepa a. Ttè buaë blëulewã, e' dör tō Cristo tso' se' er a, e' batamik se' dörañak Skëköl olo tã' taië, e' ska'. E' wã paneke se' tō krörë.

<sup>28</sup> E' kuëki sa' tō Cristo tté pakeke sulitane a. E' wa sa' tō sulitane patteke wöbla'weke kabikeitsè buaë yösyësè wa as sa' tō ie'pa kôs mù Skëköl ulà a yöuletke buaë batsulewã Cristo tã ñita. <sup>29</sup> E' kuëki ye' e' tkéwã darërëë kanëblök diché taië meke Cristo tō ye' a, e' kôs wa.

## 2

<sup>1</sup> Ye' kî ikiane tō a' wã ijcher tō ye' tso' kanëblök darërëë a' dalërmik kè shtrirtã'wã. Ñies ye' tso' kanëblök s'yamipa serke Laodicea e'pa dalërmik ena s'yamipa malepa kè wã ye' suule, e'pa kôs dalërmik. <sup>2</sup> Ye' kanëblöke darërëë ie'pa dalërmik as ie'pa er diché kí iër buaë, ñies as ie'pa kí ñi dalëritsò taië wes s'yamipa ekka ñi dalëritsò es. E' dör es, e' tã tté buaë blëulewã Skëköl wã kuaë, e' wã kôs ardaë ie'pa éna buaë. Ttè buaë e' dör Cristo wák. <sup>3</sup> Skëköl erbiò kôs, ena Skëköl wã íyi jcher kôs, e' tso' Cristo a blëule wes íyi bua'buã tuë darërë blësö es. <sup>4</sup> Ye' tō a' a ichè es as kè yi tō a' kitö'ù tté ttsër buaë, erë kè dör tté moki, ese wa. <sup>5</sup> Ye' wák kè ku' a' tã, erë e' dör wes ye' wák tso' a' tã es. Ye' wã ijcher tō a' e' tkéwã darërë ñikkëë a' erblò Cristo mik e' a wes wák eköl è es. E' tō ye' ttsé'weke buaë.

### *Sene pa'ali Cristo a*

<sup>6</sup> A' tō Jesucristo klö'wétke e' këkölie, e' kuëki a' senú wes ie' kî ikiane es. <sup>7</sup> A' e' tkówã darërëë ie' mik wes kal wì kicha klörwã es. A' talanú ie' mik wes kal talar iwí mik es. A' kí erblò ie' mik kekraë wes a' wöblaone es. Wëstela mú kekraë ie' a.

<sup>8</sup> A' tso' erkí as kè yi tō a' kitö'ù tté kè wã tã' ese wa. Ttè e' ttsër buaë erë iwà kè dör moki, ese dör s'ditsö tté è. Ttè ese kôs pakane'bitu kã iaiãë, e' dör tté èse tso' kã i' kî ese kè idör Cristo tté. <sup>9</sup> Cristo dör s'ditsö erë wes Skëköl dör, e' kôs wënewã ie' kî. <sup>10</sup> A' batsulewã ie' mik, e' kuëki kè ì skà kianeia a' kî Skëköl wörki. Íyi wökir wã diché tã' kè wërta'wã ese kôs tsata ie' dör. E' kuëki kè a' e' kitö'uk tté kuã'ki wa.

<sup>11</sup> A' batsulewã Cristo mik, e' tō a' wák dër suluë yéttã. Es ie' tō a' wakyué a' er a iwã kkachoie tō a' dör ie' icha. E' dör wes sa' judiowak wöblar iwëpa tottola kkuölitla ttök tsir



es iwà kkachöie tö ie'pa dör Skëköl icha. <sup>12</sup> A' tö iklö'wé mokí tö Cristo shkeo'kane Skëköl tö idiché taië wa. E' kueki mik a' wösune, eta' e' dör wes a' wötënewa ena a' shkenekane Cristo ta' es. <sup>13</sup> Kenet ta' a' dör ì sulu wamblökwakpa, e' kèwö ska' ta' a' kè dör Skëköl icha, e' kueki a' dör wes s'duulewa es ie' a. Erë ie' tö a' shkeo'kane, sene mokí méitö a' a' Cristo ta' ñita. Sene sulu e' nuí kos olo'yéitö a' ki. <sup>14</sup> Ie' ttè dalöiëno, e' dalöseo'wa se' tö, e' nuí kos e' ki se' kkatëne. E' dör wes se' nuí kos tso' kitule yëkkuö ki es. Erë ie' tö e' nuí kos patuéttsa Cristo kötëwa e' batamik. E' dör wes ie' tö se' nuí yëkkuö wötë'wa krus mik Cristo ta' ñita es. <sup>15</sup> Cristo batamik ie' tö iyi wökir ena iyi wák wa diché ta' kè wërta'wa esepa diché yé'lur. Ie' e' ali'ka ie'pa ki ta' ijaëo'itö wes s'klöulewa ñippè shua jaewë sulitane wörki yi e' aléka iki e' tö es.

### *Ì tso' ká jai a ese ki a' er múwa*

<sup>16</sup> E' kueki kè yi kar a' kkatök chkè ki di'yè ki. Ñies kawö tkö'weke judiowak tö duas bit ena si' pa'alí bit ena eno diwö bit ekkè, ese kè tkö'wè a' tö e' kè ki yi kar a' kkatök. <sup>17</sup> E' kos me'atbak Skëköl tö ie'pa a iwà kkachöie tö ì wëraë Cristo tö mik ide eta. Erë Cristo dë'bak. Es ttè e' kos wà tka. E' kueki ttè dalöiëno këchke ese kè dalöiaria. <sup>18</sup> Wépa e' ò tö ie'pa dör pë' buaë ser bèrë, esepa tö Skëköl biyöchökwakpa dalöieke. Ñies ie'pa e' chö tö Skëköl tö iyi kkacheke ie'pa a kabsueie. E' wa ie'pa e' ttsökeka taië. Erë ie'pa ttè kè wà ta', e' dör iwákpa kabikeitsö è. Kè a' e' muktsa e' kitö'uk ie'pa esepa ttè wa. <sup>19</sup> Ie'pa esepa kè ku'ia e' batsökwa Cristo dör s'wökir e' mik. Cristo dör wes s'wökir es, eta se' dör wes ie' chkà es. Se' wöbla ta', se' kukuöña ta' ena s'yese skà tso' taië kua'ki kua'ki, e' kos iëulewa buaë ñikkè ta' ikaneblöke buaë ñita. Erë iwökir kè ta' eta s'chkà kos e' kè dör ñie bua'. Es se' dör Cristo ta' ñies. Se' batsulewa Cristo ta, e' ta se' kos ser buaë ñita, ñi tsatköke buaë wes s'chkà etkè es. E' dör es, e' ta se' er diché kí iërdaë buaë wes Skëköl ki ikiane es.

<sup>20</sup> A' duulewabak Cristo ta' ñita ttè èse tso' ká i' a ese kos yöki. A' kè ku'ia idikia. ¿Wes a' tö iütekeia? Ttè ese dör i' es: <sup>21</sup> Chkè se kè kar; chkè wí kè katar, kè ñar; chkè dió kè kar. <sup>22</sup> Ì kos dör ñá cheke ttè ese tö, e' erta'wa. Mik ichké one, di'yé one, eta kè ita'ia. Ttè ese kos e' dör ttè dalöiëno me' s'ditsö tö ese è. <sup>23</sup> Kuaë ta' ittèsö tö ttè ese dör mokí, wà ta'. Wépa tso' ttè ese iütök, esepa wër wësua ie'pa tö Skëköl dalöieke buaë mokíë. Ie'pa e' ò taië, suèsö tö wësua mokí idir. Ie'pa wák e' we'iköke taië. E' kueki iwër tö ttè ese dör buaë, erë kè idör es. Ttè ese kè a' ì wamblak s'wák dër sulué éna ese wöklönuk yës.

## 3

<sup>1</sup> Se' shkeulekane Cristo ta' ñita, e' kueki ì kos tso' ká jai a, e' ki se' er múwa. Eë Cristo tkër Skëköl ulà bua'kka dalöiërta' taië. <sup>2-4</sup> Se' duulewa Cristo ta' ñita. Se' sene mokíë e' tso' blëule Skëköl wa Cristo ta' ñita, e' kueki kam ikkayërwa da'aie. Cristo dör sene mokí se' a. Mik ie' dene ká i' a, eta ikkayërdaë sulitane a. Se' kkayërdaë ie' ta' ñita olo ta' taië. E' kueki se' er múwa kekraë ì tso' ká jai a ese ki. Kè se' er mukwa, ì tso' ká i' a, ese ki.

### *Wépa dör Cristo icha, esepa serke wes ie' ki ikiane es*

<sup>5</sup> E' kueki, ì sulu tso' ká ì a tö se' erkiöweke, ese kos olo'yó a' tö. Trë kos, sene sulusi kos, s'er me'rie trë ki, s'erbikò sulusi kos, ese olo'yó a' tö. Ñies iyi kkeché taië, e' olo'yó a' tö (e' dör wes iyi diököl dalöie skëkölíe es). <sup>6</sup> İyi ekkè kos kueki, wépa kè tö Skëköl ttè iüteta', esepa ki Skëköl kësik ardaë. <sup>7</sup> A' bak senuk ì sulu kos ese diché dikia. <sup>8</sup> Erë i'ñe ta' a' kawöta' ì sulu skà tso' kos e' olo'yök. Ulune, kësik, ñi wamblò sulu, ese kos olo'yó a' tö. Kè a' ñi chökia suluë. Kè a' tö ttè sulusi chökia. <sup>9</sup> A' wák dër suluë ena wes e' ser, e' olo'ya' a' tö, e' kueki kè a' kachök ñita. <sup>10</sup> A' wák dër suluë, e' maneonebak sene pa'alí wa. Skëköl tö a' er yuëne pa'alí. Ie' tö a' er mane'wè michoë kekraë as a' er dò wes ie' wák er es. E' uk ie' tso' as a' dò ie' sini'pa chökíe. <sup>11</sup> Se' dör Cristo icha, e' shua s'tso' dör

judiowak ena s'tso' kè dör judiowak. Se' shuà s'tso' datse ká bánet, ñies s'tso' kè yöule tajë esepa. Se' shuà s'tso' klöulewà kanè mésoie ese ena s'tso' kè dör es. E' kos kè dè' wes se' a. Cristo batamik se' kos dör ñikkëë. Ie' dör íyi ulitane tsata, ñies ie' tso' se' kos er a.

<sup>12</sup> Skëköl tó a' shukitbak iwák a. A' batse'itó ena a' dalër tajë ie' éna. E' kueki a' ñi saú er siarë wa, er bua' wa. A' e' ówa diöshet ñi yöki. A' senú bèrë. Íyi kos panú a' tó enaë.

<sup>13</sup> A' ñi dalë'ttsó er bua' wa. Yile tó ì sulu wamblé a' ta, eta e' nuí olo'yó a' tó iki. A' nuí olo'yó a' tó ñi ki wes Skëképa tó a' nuí olo'yé es. <sup>14</sup> Íyi ulitane ekkë tsata, a' ñi dalëritsó kekraë, e' dör iwí bua'ie. A' ñi dalëritsöke es, e' ta a' serdaë buaë ñita wes wák eköl è es.

<sup>15</sup> Mokí Skëköl tó a' klö'bak senuk bèrë ñita wes wák eköl è es. E' kueki a' e' mú as Cristo tó a' wëttsü senuk bèrë ñita kekraë. Ñies wëstela chó a' tó ie' a kekraë.

<sup>16</sup> Cristo ttè bló a' tó a' er a kekraë. A' ñi wöbla'ú iwa, a' ñi pattó iwa erbikè buaë kos meke Skëköl tó a' a, ese wa. Wëstela chó a' tó kekraë Skëköl a a' er a Salmo wa ena Skëköl ttsé wa ena ttsè meke Wiköl Batse'r tó se' a ese wa. <sup>17</sup> Ì kos weke a' tó, ñies ì kos cheke a' tó, e' kos ú ena ichó Skëképa Jesús ttò wa. Kekraë wëstela chó a' tó Skëköl dör S'yé e' a Cristo batamik.

#### *Wes se' ké senuk ñita*

<sup>18</sup> A alakölpa wëm ta', a' wëm ttò dalöiío wes Skëképa mik erblökwakpa kawöta iuk es.

<sup>19</sup> A wëpa, a' alaköl dalëritsó, kè kësik blök iki.

<sup>20</sup> A ala'r, a' yé ena a' mì, e'pa ttò dalöiío, e' wër buaë Skëképa wa e' kueki. <sup>21</sup> A iyëpa, kè a' tó a' ala'r uluwarka é ichökle as ie'pa kè eriar tajë shute.

<sup>22</sup> A' klöulewà kanè mésoie, a' wökirpa ttò dalöiío kekraë. A' kanebló buaë ie'pa a kekraë, kè dör tó mik ie'pa tó a' sueke e' è ta ie'pa wökatoie. E' skéie a' kanebló ie'pa a er mokí wa, Skëképa dalöieke a' tó e' kueki. <sup>23-24</sup> Ñermata a' dör Cristo kanè mésopa, ie' dör a' wökir mokí. A' kaneblöke buaë ká i' a a' wökirpa a, e' ta e' ské meraë Cristo tó a' a aishkuö ta. E' kueki ì kos weke a' tó e' ú kaneë wes a' tso' iuk Skëképa wák a es, kè dör wes s'ditsó a iwè es. <sup>25</sup> Erë Skëköl a sulitane dör ñies ème, e' kueki wëpa tó ì sulu wambleke, ese nuí ki ie' tó ie'pa we'ikeraë aishkuö ta.

## 4

<sup>1</sup> A' wëpa wà kanè mésopa tso', esepa tó ie'pa saú er bua' wa yösyësë. A' éna ianú tó a' wà wökir tso' ñies, e' dör Skëképa tso' ká jaí a e'.

#### *Se' e' chò ttök Skëköl ta*

<sup>2</sup> A' e' chó ttök Skëköl ta kekraë, kè ilo'yar. Mik a' ttöke ie' ta, eta e' è wà bikeitsó, ñies wëstela chó ie' a. <sup>3</sup> Ye' tso' wötëule íe s'wöto wé a Cristo ttè buaë blëulewà kuaë, e' paké kueki. E' kueki ikió Skëköl a tó ie' tó sa' kimú Cristo tté kí pakök buaë ká wa'ñe as kè ì tó sa' wöklö'ù. <sup>4</sup> Ikió Skëköl a tó ye' mú ipakè buaë yösyësë wes ye' kawöta ipakök es as sulitane éna iwà ar buaë.

<sup>5</sup> Mik a' tso' pë' kè dör Jesús mik erblökwakpa, esepa ta, eta a' senú buaë wes Skëköl ala'r ké senuk es. Kè a' kawö chöyuk é. Kawö yóttsa kapakök ie'pa ta. Cristo tté buaë pakó ie'pa a. <sup>6</sup> A' ké ttök ie'pa ta ttè bua' buaë wa as ie'pa tó a' ttò ttsò er bua' wa. A' tso' erki ì kos chakeke ie'pa tó a' a eköl eköl, e' iütök yösyësë.

#### *Pablo e' chéat*

<sup>7</sup> Tíquico tó ye' biyó cheraë a' a. Ie' dör s'yami dalër tajë sa' éna ese. Ie' dör ye' kimukwak yösyësë ese. Ie' dör Skëképa Jesucristo kanè méso ye' ta. <sup>8</sup> E' kueki ye' tso' ie' patkök a' ska' as ie' tó a' a ichò tó is sa' tso', ñies as a' er kuütö. <sup>9</sup> Ie' ta Onésimo mi'ke ñies. Ie' dalër sa' éna, ie' dör s'yami e' tkëulewà darërë ese. Ie' datse a' ká a. Ie'pa böl tó a' a icheraë tó is sa' kawö tköke.

<sup>10</sup> Aristarco tso' wötëule ye' tã s'wöto wé a, e' tö a' shkë'wémi. Ñies Marcos dör Bernabé duö', e' tö a' shkë'wémi. A' a iyënetke tö ie' de a' pakök, etã ikiówa buaë. <sup>11</sup> Jesús kiè ñies Justo, e' tö a' shkë'wémi. Wépa tso' ye' tã ì blúie Skëköl tso' e' kanè a e'pa shua ie'pa mañal è dör judiowak. Ye' er pablérakitö taië. <sup>12</sup> Epafra dör a' wakpa eköl, e' tö a' shkë'wémi. Ie' dör Cristo Jesús kanè méso. Këkraë ie' kköchöke Skëköl a a' dalërmik tö a' mú e' tkéwa darërëë Cristo ttè a kè ibikeitsè bötböt ena e' meulettsã da'ãie ì kiane Skëköl kï ese woie. <sup>13</sup> Ye' wák tö ie' cheke mokï tö ie' kanëblöke darërëë a' dalërmik, ñies Jesús mik erblökwakpa tso' Laodicea ena Hierápolis, e'pa dalërmik. <sup>14</sup> Lucas tö a' shkë'wémi. Ie' dör s'kapeyökwak dalër taië se' éna. Ñies Demas tö a' shkë'wémi.

<sup>15</sup> S'yamipa serke Laodicea, e'pa shkë'ú sa' a. Ñies Ninfa ena Skëképa icha erule ñi dapa'uke ie' u a, e'pa shkë'ú sa' a. <sup>16</sup> Yëkkuö i' aritsé one a' tö sulitane kukua, e' ukuöki tã ipatkómi a' tö Skëképa icha erule ñi dapa'uke Laodicea, e'pa a as ie'pa tö iaritsò ñies. Ñies yëkkuö patkë' ye' tö Laodicea wakpa a, e' saú mik ide a' ska' eta. <sup>17</sup> Ichó Arquipo a tö Skëképa Jesucristo kanè mène ie' a wè, e' wà ú ie' tö seraã buaë.

<sup>18</sup> Ñies ye' dör Pablo, e' tö shkëne i' shtë ye' wák ulà wa. Kè a' éna ichökwa tö ye' tso' wötëule s'wöto wé a. As Skëköl er buaë chò a' a.

## Yëkkuö Tsá Kit Pablo tö Tesalónica wakpa a

### 1 Thesalonicensis

Pablo tö yëkkuö i' kit duas dabom skeyök ena skeyök k<sub>i</sub> et Jesús k<sub>u</sub>ne'bak e' ukuöki (50-51 AC) e' sh<sub>u</sub> ulat. E' kuëki i' dör yëkkuö tsá kit ie' tö e'. Mik ie' skà dë'rö Tesalónica Skëköl tté buaë e' pakök etá Timoteo ena Silvano e'pa mir ie' ta. Mik Pablo tö Skëköl tté paka' ká e' a, etá taië pë' uluneká ie' k<sub>i</sub>, e' kuëki ie' bakshkarmi dō Atenas. E' ukuöki ie' shkakmine kanëblökne Tesalónica Jesús mik erblökwakpa k<sub>i</sub>muk, erë kè ie' dë'röne. Erë Jesús mik erblökwakpa we'ikeke taië pë' kè dör Jesús mik erblökwakpa esepa tö, e' kuëki Pablo tö Timoteo è patkë'mi yëkkuö i' muk ie'pa a ier diché ioie (Hechos 12.1-14).

Ì kit Pablo tö yëkkuö i' k<sub>i</sub> e' dör i' es: Et: Ie' tö wëstela mé Skëköl a ì buaë o' ie' tö Jesús mik erblökwakpa tso' Tesalónica e'pa a e' k<sub>i</sub>. Ñies Pablo tö ie'pa a ieri mène tö Skëköl tso' ie'pa ta.

Böt: Pablo tö ie'pa a ieri mène tö wës ie' bak senuk ie'pa sh<sub>u</sub>a ena wës ie' tö ie'pa dalërits. Ie' tö ikit es ie'pa er diché ioie senuk Jesús a.

Mañat: Pablo tö ie'pa er diché ié senuk këkraë Jesús a. Ñies ì tköraë Jesús mik erblökwakpa ta mik iblërulune etá, e' paké ie' tö ie'pa a. Ñies ie' tö ikkachè tö wës se' kawöta Jesús datskene e' panuk kröröë.

#### *Shkë'wè*

<sup>1</sup> Ye' dör Pablo. Silvano ena Timoteo tso' ye' ta íe. Sa' tso' yëkkuö i' shtök Skëképa Jesús icha erule serke Tesalónica e'pa a. A' batsulewá Skëköl dör S'yé e' mik, ñies Skëképa Jesucristo mik. As ie'pa er buaë chò ena sene bèrè mù a' a.

#### *Pablo wëstela ché Skëköl a Tesalónica wakpa dalërmik*

<sup>2</sup> Këkraë sa' tö wëstela cheke Skëköl a a' dalërmik. Mik sa' ttöke ie' ta, etá këkraë sa' tö ikieke a' k<sub>i</sub>. <sup>3</sup> Sa' éna iane tö a' erblöke Jesús mik, e' kuëki a' tö ì kōs buaë weke. S'yé dalër taië a' éna, e' kuëki a' kanëblöke darërè ie' a. Skëképa Jesucristo datskene, e' paneke a' tö mokïë, e' kuëki a' e' tkéwá darërè ie' mik. E' kōs kuëki këkraë mik sa' ttöke Skëköl ta, etá sa' tö wëstela cheke ie' dör S'yé e' a a' dalërmik. <sup>4</sup> A yamipa dalër taië Skëköl éna, sa' wá ijcher tö ie' tö a' shukitbak ie' ala'rie. <sup>5</sup> Mik sa' tö Jesús tté buaë paka' a' a, etá kè sa' wá ipakane tté è wa. Ñies Wiköl Batse'r diché e' kkayë' sa' tö a' a. A' tö isué tö ì ché sa' tö, e' ché sa' tö er mokïë wa. A' wá ijcher buaë tö sa' bak senuk yësyésè a' sh<sub>u</sub>a iwà kkachoie tö a' kawöta senuk es.

<sup>6</sup> Es a' dë'bak senuk yësyésè wës sa' ser es, ñies wës Skëképa Jesús ser es. Mik a' tö Jesús tté buaë klöo'bak, etá e' kuëki pë' tö a' we'ik siarë, erë a' tö tté e' klö'wekeia ttsë'ne bua' wa Wiköl Batse'r batamik. <sup>7</sup> E' wa a' tö iwà kkaché Jesús mik erblökwakpa serke Macedonia ena Acaya, e'pa kōs a' tö wës s'kawöta senuk Skëköl a. <sup>8</sup> A' batamik Skëképa Jesús tté buneká Macedonia ena Acaya. Ká wa'ñe, wé ye' mirwá, ee pë' kōs wá ijcher tö a' erblöke Skëköl mik. E' kuëki kè ì ku'ia ché yi a' tté e' k<sub>i</sub>. <sup>9</sup> Sulitane tö sa' a' icheke tö a' tö sa' ki'wá buaë. Ñies ie'pa tö icheke tö íyi diököl tso' dalöiè, ese kōs watéttsá a' tö kanëbloie Skëköl chökle eköl è e' a. <sup>10</sup> Ñies ie'pa tö icheke sa' a' tö a' tso' Jesús datse ká jai a, e' panuk er mokï wa. Ie' dör Skëköl Alà. Ie' kōtewá, erë Skëköl tö ie' shkeo'kane. Ie' tö se' tsatkée, se' weirdaë siarë aishkuö ta, e' yöki.

## 2

#### *Ì o' Pablo tö Tesalónica*

<sup>1</sup> A yamipa, a' wá ijcher buaë tö sa' sene' a' sh<sub>u</sub>a, e' wá kè dör éme, e' tö a' k<sub>i</sub>mé buaë.  
<sup>2</sup> A' wá ijcher tö kam sa' dō a' ska' e' yöki Filipos wakpa tö sa' yé' suluë, sa' we'ik siarë.

Ñies a' ká a pë' bak e'pa éna sa' wöklö'wak erë Skëköl tö sa' kime'. Ie' tö diché mé sa' a Jesús tté buaë pakoie a' a. <sup>3</sup> Sa' kè tö s'patteta' kache tté wa ö iyi sulusi dalërmik ö s'kitö'woie. <sup>4</sup> Sa' kè tö s'patteta' es. Skëköl tö sa' er webleke, e' tö sa' shukit. Ie' tö kanè me'at sa' ulà a Jesús tté buaë pakök. E' kueki sa' ipakeke as sa' wër buaë ie' wa, kè dör s'ditsö wa. <sup>5</sup> A' wä ijcher tö sa' kè dë'rö a' ska' a' kikökkä kache tté wa. Kè sa' wä a' pautule inuköl kiane sa' ki e' kueki. Skëköl wä ijcher tö sa' kè wä iwamblëne es. <sup>6</sup> Sa' kè dë'rö a' ska' as a' tö sa' kikökkä ö yi skà tö sa' kikökkä. <sup>7</sup> Sa' dör Cristo ttekölpa tsá, e' kueki sa' wä kawö ta' as a' tö sa' saü buaë, erë e' kè kine sa' wä a' a. Sa' tö a' sué wes alà mì tö ila'rla suè es. <sup>8</sup> Sa' éna a' dalër taië, e' kueki sa' ttsë'ne buaë a' pattök Skëköl tté buaë wa. Kè dör e' è wa, ñies sa' e' mumittsa' weinuk a' dalërmik. <sup>9</sup> A yamipa, a' éna iane tö mik Skëköl tté buaë paka' sa' tö a' a, e' dalewa sa' kaneblë' darërë. Sa' kaneblë' ñië nañeë as sa' kè tö a' ulà panù sa' tioie.

<sup>10</sup> A' wä ijcher, ñies Skëköl wä ijcher, tö sa' sene' batse'r yësyësë kè kī ì sulu tté ta' a' dör Jesús mik erblökwakpa e'pa shüa. <sup>11-12</sup> A' wä ijcher tö sa' tö a' paut, a' er pablë' eköl eköl wes iyé tö iwè iwák ala'r ta' es. Ñies sa' tö a' a iyë' kekraë tö a' senú yësyësë wes Skëköl kī ikiane es. E' tö se' klö'bak as se' dō ì blúie ie' tso' olo ta' taië e' kīie.

<sup>13</sup> Mik sa' tö Skëköl tté paka' a' a, eta a' kè wä itsène wes s'ditsö tté es. E' skéie a' tö itse' wes Skëköl tté moki es, ta' es je' idir. E' kueki kekraë sa' tso' wëstela chök Skëköl a' a' dalërmik. Ie' tté batamik, iwakanewëkeitö a' dör Jesús mik erblökwakpa e'pa er a. <sup>14</sup> A yamipa, a' wakpa ditséwöpa e'pa tö a' we'ik siarë. Es ñies ibak Skëköl icha erule erule erblö Cristo Jesús mik tso' Judea e'pa ta'. Judiowak malepa tö ie'pa we'ik siarë ñies. <sup>15</sup> Judiowak tö iwakpa we'ik Jesús tté kueki, e' wakpa è tö Jesús kötwä wes ká iaiaë ie'pa tö Skëköl ttekölpa kótulurbak es. Ñies ie'pa è tö sa' trëo'yal. ¡Ie'pa kè wër buaë Skëköl wa! ¡Ie'pa kè wödör yi mik! <sup>16</sup> Mik sa' tö Skëköl tté pakeke pë' kè dör judiowak esepa a' as ñies ie'pa tsatkër, eta judiowak ñe'pa tö sa' ma'wé wöklö'wë as kè sa' tö tté e' pakö, erë ie'pa kè ulà dë' iska'. Es ì sulu nuí, e' kī kieke ie'pa tö e' kī taië. Bata ekkë ta' Skëköl tö ie'pa kichatëttsatke.

#### *Pablo shkakne ie'pa weblök*

<sup>17</sup> A yamipa, sa' manétyal, sa' kè ku'ia a' ta' ñita, erë sa' er me'rie a' kī. Sa' manétyal erë bet ta' sa' éna shkakne suluë a' weblökne. <sup>18</sup> Sa' tö ima'wé, ye' wák tö ima'wé tseë erë Satanás tö sa' wöklö'wé. <sup>19</sup> Mik Skëképa Jesús dene, eta çyi tö sa' ttsë'wëmi buaë mokië ie' wöa? ¡E' dör a'! ì buaë paneke sa' tö Jesús wörki a' batamik. A' dë' Skëköl ala'rie, e' tö sa' ttsë'weraë buaë Jesús wörki. <sup>20</sup> Yëne e', a' wa sa' e' ttsökeka, a' tö sa' ttsë'weke buaë.

### 3

#### *Timoteo patkémine Tesalónica wakpa ska'*

<sup>1</sup> Bata ekkë ta', mik sa' kè a idalë'ttsëneia, eta sa' tö ibikeits tö "sa' böl atë íe Atenas <sup>2</sup> ta' s'yami Timoteo e' patkekemi sa' tö a' weblök." Ie' dör Skëköl kanè méso Cristo tté buaë pakök wes sa' es. Sa' tö ie' patkë'mi a' kī muk as a' diché kī iër Jesús tté a' ena a' erblöia mokië imik. <sup>3</sup> Sa' kè kī ikiane tö a' wële eriwè, a' weirke siarë Jesús tté kueki, e' tö. E' tköraë se' ta' wake'. <sup>4</sup> Mik sa' bak a' ska', eta sa' tö a' a iyë' taië tö se' weirdaë pë' kè dör Jesús mik erblökwakpa esepa ulà a. A' wä ijcher buaë tö iwà tka es. <sup>5</sup> E' kueki mik ye' wák kè a idalë'ttsëneia, eta Timoteo patkë'miyö a' tté tsök tö çis a' erblöke Jesús mik e' mir? Ye' suane siarë dö' Satanás tö a' erkiowè ta' a' èmine ta' kos sa' tö a' patté e' weirdawa é.

<sup>6</sup> Erë Timoteo tso' a' ska', írö ie' dene. Ie' wä biyö buaë debitu sa' a. Ie' ichè tö a' erblökeia Cristo mik, ñies a' ñi dalëritsökeia buaë. Kekraë a' tö sa' bikeitseke er bua' wa. A' éna sa' suakne suluë wes sa' éna a' suakne es. <sup>7</sup> A yamipa, a' erblöke Jesús mik buaë, e' tö sa' er pableke taië sa' eriarke kos sa' weirke kos e' shüa. <sup>8</sup> Mik sa' ittsé tö a' e' tkéwa

darërë Skëkëpa mik, etā sa' er dekane. <sup>9</sup> A' tō sa' ttsë'wé buaë ichökle Skëköl wōa. Këkraë sa' tō wëstela cheke ie' a' taië a' ki, erë e' kè dör wë'. <sup>10</sup> Sa' tō ie' a' ikieke taië ñië nañeë as kawō mùitō sa' a' suoie a' kí wöbla'woie as a' kí yör erblök Jesús mik.

#### *Pablo tté Skëköl ta*

<sup>11</sup> Skëköl dör S'yé e' ena Skëkëpa Jesús e'pa a' sa' tō ikieke tō sa' kímú shkoie a' ska'. <sup>12</sup> As Skëkëpa tō a' kò ñi kí dalëritsök taië shutë ñies sulitane dalëritsök wes sa' tō a' dalëritseke es. <sup>13</sup> As ie' tō a' er diché kí iò as a' dō Skëköl dör S'yé e' wörki batse'r, kè kí ì sulu tté ta', mik Skëkëpa Jesús datskene ie' icha batse'rpa ta' etā. Es e' idir.

## 4

#### *Sene wër buaë Skëköl wa ese*

<sup>1</sup> A yamipa, sa' tō a' wöbla' tō a' senú wes Skëköl wa iwër buaë es, e' iuteke buaë a' tō. I' ta' sa' tō a' a' ikieke, sa' tō a' patteke Skëkëpa Jesús ttò wa, tō a' kí senú yësyësë këkraë.

<sup>2</sup> Ì uk a' ka' ye' tō Skëkëpa Jesús ttò wa, e' jcher buaë a' wa. <sup>3</sup> Skëköl kí ikiane tō a' ser batse'r, e' wà kiane chë tō a' e' skóttsa trë kos yöki. <sup>4</sup> A' e' wöbla'ú e' kkö'nuk batse'r dalöiërta'. <sup>5</sup> A' kè kàne senuk wes pë' kè e' batsöta' Skëköl mik es. Ie'pa trër taië wes iwákpa kí ikiane es. <sup>6</sup> A' dör ñi yamipa Jesús ttè wa, e' kuëki kè a' kàne ñi tsiriuk a' alakölpwa wa. A' ñi wamblò es, e' ta' a' ñi dalöseukewa. Sa' tō a' a' iyë'bak tō wépa tō iwambleke es esepa we'ikeraë siarë Skëkëpa Jesús tō. <sup>7</sup> Skëköl kè wā a' klöone e' ia'ukka sene sulusi wa. Ie' tō a' klöo' senuk batse'r ie' a. <sup>8</sup> E' kuëki yi tō ttè i' watéttsa, ese kè wā s'ditsö ttè watënettsa, ie' tō Skëköl tō Wiköl Batse'r mé se' a, e' ttè watéttsa.

<sup>9</sup> Skëköl wák tō a' wöbla'wé ñi dalëritsök, e' kuëki kè ì shteku'ia sa' tō ttè e' kí. <sup>10</sup> A yamipa, e' yëne tō Jesús mik erblökwakpa serke Macedonia, e'pa kos dalër taië a' éna. Erë sa' tō a' kí patteke tō a' kí ñi dalëritsö taië shutë. <sup>11</sup> Ñies a' e' chó senuk bèrë. Pë' kè tsiriwar kanè wa, ttè wa, ì wa. A' wakpa íyi è wà saú wà shuló. A' kanébló a' wákpa ulà wa wes sa' tō a' iyë' es. <sup>12</sup> A' tō iwé es, e' ta' pë' kè erblò Jesús mik, esepa tō a' dalöieraë. Ñies a' tō iwé es, e' ta' ì kos kiane a' kí senoie, e' döraë a' ulà a' as a' kè tō yile ulà panù a' kanéwoie.

#### *Skëkëpa Jesús datskene*

<sup>13</sup> A yamipa, sa' kí ikiane tō a' wā ijcher tō ì tköraë se' blërulunebak esepa ta' as a' kè eriar wes wépa kè ku' ì panuk, esepa eriar es. <sup>14</sup> Se' tō iklö'wé tō Jesús kōtewa shkenekane, e' kuëki ñies se' tō iklö'wé tō wépa batsulewā ie' mik blërulunebak, esepa tserabitū Skëköl tō Jesús ta' mik idatskene etā.

<sup>15</sup> E' kuëki ì kkayë' Skëkëpa tō sa' a' e' chekene sa' tō a' a, e' dör tō mik ie' dene, etā se' dör ie' icha tso' ttsë'ka, esepa kè mìnè se' malepa blënewā, esepa yöki këwe. <sup>16</sup> Mik Skëkëpa wák bitükene ká jai a, etā ittöraë aneule darërë ttersaë sulitane tō. Ñies Skëköl biyöchökwakpa wökir kibi, e' ardaë ta' Skëköl duk bla'weraëitö taië. Etā wépa batsulewā Cristo mik blërulunebak, esepa shkerdakane këwe. <sup>17</sup> E' ukuöki ta' se' tso' ttsë'ka ká i' a, esepa kos busdaka ie'pa ta' ñita' mò a' ta' Skëkëpa Jesús kueraësö kashuk a, etā es se' tso'ie ie' ta' këkraë. <sup>18</sup> E' kuëki a' ñi er diché ió ttè e' wa.

## 5

<sup>1-2</sup> A yamipa, a' wā ijcher buaë tō mik Skëkëpa Jesús datskene, etā kèwö e' datse kè biyó yëule wes akblökwakpa döwa se' u a' nañewe es. Kè yi wā ijcher tō mik idatskene, e' kuëki e' kèwö kè kituk sa' a' yëkkuö kí a' a. <sup>3</sup> Mik sulitane tō iché: "Ire' sulitane serke bèrë ñita, kè paürku'", e' bet ta' ì sulu döraë ká i' kí ta' s'ditsö weirdaë siarë. Ie'pa kè tkòpashkar iulà a' wes tayë alà kurke e' kè tkòpashkar iweir taië e' ulà a' es. <sup>4</sup> Erë a yamipa, a' kè serku'ia ká ttsettse a' wes ie'pa es. E' kuëki e' kèwö kè döpa a' kí wes akblökwakpa döwa



es. <sup>5</sup> A' k<sub>os</sub> s<sub>er</sub>ke y<sub>esy</sub>es<sub>e</sub> Jesús ttè dikia, e' dör w<sub>es</sub> se' s<sub>er</sub>ke ká ñiwe a es. Skékëpa Jesús k<sub>ew</sub>ö, e' tö a' t<sub>ts</sub>é'w<sub>era</sub>ë buaë. Kè se' tö ì sulu wambleku'ia w<sub>es</sub> ká ttsettse wakpa es. <sup>6</sup> E' ku<sub>ek</sub>i kè se' kàne s<sub>enu</sub>k w<sub>es</sub> ie'pa es. Ie'pa dör w<sub>es</sub> se' kapòtulur es, kè ku' ì panuk. Erë se' kawöta s<sub>enu</sub>k wösh wa, kabikeitsöke buaë w<sub>es</sub> s'tso' kkáme es. <sup>7</sup> Wépa kapötkëter, esepa kapötkëter nañewe. Wépa tteke blo' tö, esepa tteke blo' tö nañewe. <sup>8</sup> Erë se' dör w<sub>es</sub> ká ñiwe wakpa es, esepa ké kabikeitsök buaë w<sub>es</sub> s'tso' kkáme es. Se' erblò Jesús mik, ñies se' ñi daléritsò, e' tö se' bleraë w<sub>es</sub> íyi daloie ieke ñippökwakpa tö ibatsi' k<sub>i</sub> kuaböt yöki es. Ñies se' tsatkërdaë, e' panusö kröröë, e' tö se' tsatkeraë w<sub>es</sub> íyi daloie tkekeka ñippökwakpa tö iwökir k<sub>i</sub> e' tsatkoie es. <sup>9</sup> Skéköl kè w<sub>a</sub> se' klöone ie' ala'rie se' we'ikoie. E' skéie se' klöo'bakitö se' tsatkoie Skékëpa Jesucristo batamik. <sup>10</sup> Cristo kötew<sub>a</sub> se' skéie as se' s<sub>er</sub> michoë ie' t<sub>a</sub> ñita. Se' blénewa ö se' tso'ia t<sub>ts</sub>é'ka, e' kè dè' w<sub>es</sub> ie' a mik ie' datskene et<sub>a</sub>. <sup>11</sup> E' ku<sub>ek</sub>i a' ñi er pabló, a' ñi diché ió, ttè ikkè wa w<sub>es</sub> a' tso' iwà uk es.

*Pablo tö ie'pa k<sub>i</sub> patté*

<sup>12</sup> A yamipa, wépa tso' kaneblök darërë a' wökirpaie Skékëpa Jesús ttè a, esepa tö a' kkö'neke, a' patteke as a' s<sub>er</sub> buaë y<sub>esy</sub>es<sub>e</sub> Skéköl a. E' ku<sub>ek</sub>i sa' tö a' a ikieke tö ie'pa dalöió. <sup>13</sup> Ie'pa dalöió taië. Ie'pa daléritsó ie'pa kanè ku<sub>ek</sub>i. A' s<sub>enu</sub> bèrë ñita.

<sup>14</sup> Ñies sa' tö a' patté tö a' wépa bikëne, kè éna kaneblak, esepa uñú. Wépa eriarke, esepa er pabló. Wépa kè ku' tkëulew<sub>a</sub> darërë erblök Jesús mik, esepa kimú. Sulitane dalé'ttsó er bua' wa.

<sup>15</sup> A' e' kkö'nú. Mik yi tö ì sulu wamblé a' k<sub>i</sub>, et<sub>a</sub> kè a' tö ì sulu wamblökne ie' k<sub>i</sub> iskéie. E' skéie a' e' chö kekraë er buaë chök ñi a ena sulitane a.

<sup>16</sup> A' t<sub>ts</sub>é'nú buaë kekraë. <sup>17</sup> A' ttó me'rie Skéköl t<sub>a</sub>. <sup>18</sup> Ì k<sub>os</sub> k<sub>i</sub> wéstela chö Skéköl a. A' dör Cristo Jesús icha, e' ku<sub>ek</sub>i Skéköl k<sub>i</sub> ikiane tö a' s<sub>er</sub> es.

<sup>19</sup> Ì weke Skéköl Wiköl tö a' shua, e' kè wöklö'war. <sup>20</sup> Ttè Skéköl ttekölie, ese kè watarttsa. <sup>21</sup> Iwà k<sub>os</sub> bikeitsó bua'iew<sub>a</sub>. Wé dör buaë ese bló. <sup>22</sup> Ì sulu k<sub>os</sub>, ese yöki a' e' skóttsa.

<sup>23</sup> Skéköl dör sene bèrë mukwak, as e' tö a' kimù s<sub>enu</sub>k batse'r. Ñies as ie' tö a' chkà, a' er, a' wiköl, a' wák wa'ñe kkö'nù kè k<sub>i</sub> ì sulu tté t<sub>a</sub>' y<sub>es</sub> dò mik Skékëpa Jesucristo datskene et<sub>a</sub>. <sup>24</sup> Yi tö a' klöo'bak, e' ttò mokjë. Ie' tö ese k<sub>os</sub> wawëraë.

*Pablo e' chéat*

<sup>25</sup> A yamipa, a' tö ikió Skéköl a sa' k<sub>i</sub>.

<sup>26</sup> S'yamipa k<sub>os</sub> shkë'ú sa' a ñi dalër wa.

<sup>27</sup> Ye' tö a' ké Skékëpa Jesús ttò wa yëkkuö i' sauk s'yamipa k<sub>os</sub> a.

<sup>28</sup> As Skékëpa Jesucristo er buaë chö a' a.

## Yëkkuö Skà Kit Pablo tö Tesalónica wakpa a, i' ta ide böt 2 Tesalonicenses

Mik Pablo bak Corinto etä ie' tö yëkkuö i' kit Jesús mik erblökwakpa tso' Tesalónica e'pa a. I' dör yëkkuö skà kit ie' tö ie'pa a, i' ta ide böt. S'wöbla'ukwakpa wele tö ichè tö Jesús skà dë'röbakne e' kueki kè s'kawöta kaneblök. Jesús mik erblökwakpa welepa tö e' klöo', e' kueki ie'pa kè kaneblöia chke yuloie. E' kueki Pablo tö Jesucristo skà datskene e' paké ie'pa a.

Pablo éna ie'pa a ichak yësyësé tö Jesús kam döne e' kueki ie' tö yëkkuö i' kit. Ie' tö ie'pa a iché tö Jesucristo datsketkene e' yöki wëm döraë eköl sulitane kitö'uk. E' kaneblöraë Satanás diché wa. Nies ie' tö ie'pa a iché tö mik Jesús dene etä pë' kos kè erblène ie' mik e' we'ikeraë Skököl tö.

Erë kam Jesús döne etä ie' mik erblökwakpa kawöta senuk yësyësé ena ie'pa kawöta kaneblök e' kkö'noie. Es Pablo tö ie'pa a iché.

### Shke'wè

<sup>1</sup> Ye' dör Pablo. Silvano ena Timoteo tso' ye' ta ie. Sa' tso' yëkkuö i' shtök Skökëpa Jesús icha erule serke Tesalónica e'pa a. A' batsulewa Skököl dör S'yé ena Skökëpa Jesucristo e'pa mik. <sup>2</sup> As ie'pa er buaë chò ena sene bèrè mù a' a.

### Mik Jesús dene, etä pë' suluë we'ikeraëitö

<sup>3</sup> A yamipa, kekraë sa' kawöta wëstela chök Skököl a a' dalërmik. A' erblöke Jesús mik, e' kī mir buaë. E' sū a' ñi dalëritsöke, e' kī mir buaë. E' tö sa' ké wëstela chök Skököl a. <sup>4</sup> Sa' tö a' tté ppëka buaë Skököl icha eruleë kos e'pa shua. Eré a' weirke siarë s'bolökpa ulà a, a' töierke siarë Jesús tté kueki, eré a' e' tkéwa darërë, a' erblökeia Jesús mik buaë, e' kueki sa' tö a' kikéka. <sup>5</sup> E' kos wa iwënewa tö Skököl tö s'shulè yësyësé. Ie' dör se' blú, e' tté kueki a' weirke. E' wa iwënewa tö ie' tö ibikeitseke tö a' je' didir i blúie ie' tso' e' kīe.

<sup>6</sup> Skököl tö s'shuleke yësyësé kekraë, e' kueki buaë idir tö wépa tö a' we'ikeke esepa we'ikeraë ie' tö siarë. <sup>7</sup> Ta a' weirke siarë e'pa enuraë sa' ta ñita. E' kos tköraë mik Skökëpa Jesús datskene ie' biyöchökwakpa diché ta' taië e'pa ta ena bö'wö ñarke taië e' shua etä. <sup>8</sup> Wépa kè e' batsöta' Skököl mik, kè wa Skökëpa Jesús tté buaë e' iütëne, esepa kos we'ikök ie' datse. <sup>9</sup> Ie'pa weir michoë siarë busdatta banet Skököl diché ta' taië olo ta' taië, e' yöki. <sup>10</sup> E' kos tköraë mik Skökëpa Jesús datskene etä. E' kéwö ta' ie' icha batse'rpa kos tö ie' kikeraka. Se' erblé ie' mik, esepa kos tö ie' dalöieraë. A' tö tté yé sa' tö a' a, e' klö'wé e' kueki a' tso'ñak e'pa shua.

<sup>11</sup> E' kueki sa' tö Skököl a ikieke kekraë a' ki. Sa' tö ikieke ie' a as ie' tö a' saü tö a' serke yësyësé wes ie' tö a' klöo'bak senuk es. Nies sa' tö ikië ie' a tö ie' tö a' kimù i buaë kos kiane wè a' ki e' wà uk buaë ie' diché wa. E' kos wak a' éna a' erblöke Jesús mik e' kueki.

<sup>12</sup> Sa' tö ikieke es as Skökëpa Jesús kīkarka a' batamik, ñies as Skököl tö a' kikòka buaë. Ie' ena Skökëpa Jesucristo e'pa er buaë chò a' a, e' kueki ie'pa tö a' kimeraë iwà uk buaë.

## 2

### Wëm Sulusi Ichökle

<sup>1</sup> A yamipa, mik Skökëpa Jesucristo datskene, etä se' busdaka kashuk a ñi dapa'uk ie' ta, e' tté pakeke sa' tö a' a i'ñe. Sa' tö a' a ikieke kröröë tö <sup>2</sup> yile iché tö Skökëpa Jesús datskene, e' kéwö detke, e' ta kè a' e' kitö'uk e' tkiuk tté ese wa. Isalema yile tö a' a icheke tö Wiköl Batse'r tö sa' a ikkaché tö Jesús denetke. Isalema yile tö icheke tö sa' tö ie'pa a iyë' ö sa' tö ikit yëkkuö ki tö Skökëpa Jesús denetke ká i' a. Yile tö iché es, e' ta e' dör kache. <sup>3</sup> Kè a' e' kitö'uk tté ese wa yës. Skökëpa Jesús kam döne e' yöki taië pë' tö Skököl

waterattsä. Ñies wëm sulusi ichökle wömenettsäbak weinuk e' döraë. <sup>4</sup> Ì kōs tso' dalöie skökölíe, ese kè kiarpa ie' kī. Ie' wák e' tsörakā ese kōs tsata. Ie' kī ikiane tö sulitane tö ie' è dalöie. Ie' e' tkörakā Skököl wé kibi a ta ie' chöraë: “ye' dör íyi ulitane kéköl.”

<sup>5</sup> Mik ye' bak a' ska', etā íyi ekkē yē'yö a' a, ye' a ta e' ane a' éna. <sup>6</sup> Ì tö wëm sulusi ñe' wöklö'wekeia as kè idò kam ikéwö dò e' yöki e' jcher a' wā. <sup>7</sup> Erë ì ñe ta Satanás tso'tke iwakanéuk bër akirie as s'ditsö tö Skököl ttè watöttsä. Erë wëm sulusi ñe' kè dòpa dò mik yi tso' iwöklö'uk e' yénettsä etā. <sup>8</sup> Mik iyénettsä, etā wëm sulusi e' döraë sulitane wörki. Erë mik Sköképa Jesús de, etā ie' e' alörakā iki ilo taië wa ta itterawaitö ikkò siwé è wa. <sup>9</sup> Mik wëm sulusi ñe' de (kam Jesús tö ittöwā e' yöki), etā ie' döraë Satanás batamik. Satanás diché wa, ie' tö ì kè or yi a ese kōs weraë s'kitö'woie. <sup>10</sup> Ì sulu kōs wa ie' tö s'wömeuletsä weinuk aishkuö ta esepa kitö'weraë. Ie'pa kè wā Jesús tté moki e' dalëritse e' tsatkoie, e' kueki ie'pa wömeuletsä weinuk. <sup>11</sup> E' kueki Skököl tö ie'pa wömerattsä as ie'pa e' kitö'ù Wëm Suluë Ichökle e' kache wa. <sup>12</sup> Es ie'pa kè tö ttè mokië ñe' klö'wè. E' skéie ie'pa ttsé'r buaë ì sulu wamblök, e' kueki Skököl tö ie'pa wömerattsä weinuk aishkuö ta. Esepa kōs kī inuí döraë.

### *S'yé tö se' shukitbak tsatkè*

<sup>13</sup> Erë, a yamipa, a' dalër taië Sköképa Jesús éna. Tsawe ta Skököl tö a' shukitbak tsatkè iWiköl tö a' batse'wè e' batamik. Ñies a' tsatkéne ttè mokië klö'wè a' tö e' batamik. E' kōs kueki sa' kawöta wéstela chök Skököl a kekraë a' kī. <sup>14</sup> Sa' tö Jesús tté buaë paka' a' a, e' wa Skököl tö a' klö'bak as a' ser michoë Sköképa Jesucristo ta ñita e' olo taië e' a.

<sup>15</sup> A yamipa, e' kueki, ttè wa sa' tö a' yö' mik sa' bak a' shua etā, ñies mik sa' tö yékkuö kit a' a etā, ttè e' kōs bló buaë a' er a, kè ilo'yar. <sup>16</sup> Sköképa Jesucristo ena Skököl dör S'yé, e'pa éna se' dalër taië. Ie'pa er buaë ché se' a, e' tö se' er pablè michoë. Ñies ie'pa kablé' sene michoë muk se' a, e' panuk kröröë se' tso'ie. <sup>17</sup> As ie'pa tö a' er pablö. As ie'pa tö a' er diché kī iò as a' tö ì buaë kōs ù ttè wa ena iwawatke.

## 3

### *S'yé a ikió sa' kī*

<sup>1</sup> A yamipa, bata ekkē ta, a' tö Skököl a ikió sa' kī as Sköképa Jesús tté pakeke sa' tö, e' kī pakar bet ká ulitane wakpa a ta e'pa tö iklö'wè wës a' tö iklö' es. <sup>2</sup> Ñies pè' tso' taië kè erblöku' Jesús mik, e' kueki a' ikió Skököl a tö ie' tö sa' tsatkó pè' sulusi yöki. <sup>3</sup> Erë Sköképa Jesús ttè mokië, ie' tö a' se'weraë tkëulewā darërë ie' mik ta a' tsatkeraëitö ì sulu yöki. <sup>4</sup> Sa' e' mué ie' mik tö ie' tö a' kimeräë. E' kueki sa' wā ijcher tö ì uk a' ké sa' tö, e' wawé a' tö ta a' iwè michoë. <sup>5</sup> As Sköképa tö a' kimù kōs Skököl éna se' dalër e' wā anuk. Ñies as a' kimuitö a' weirke kōs e' dalé'ttsök wës Cristo tö ie' icha dalé'ttsé' es.

### *Se' kawöta kaneblök*

<sup>6</sup> A yamipa, Sköképa Jesucristo ttö wa sa' tö a' a icheke tö s'yamipa welepa bikërke, esepa yöki a' e' skó. Wépa kè tö ttè me'at sa' tö e' iuteku', esepa yöki a' e' skó, kè iitar. <sup>7</sup> A' wā ijcher buaë tö a' kawöta senuk wës sa' bak senuk a' ska' es. A' kè wā sa' sune bikënu. <sup>8</sup> Sa' kè wā yi chkè ñane kè patoule. E' skéie sa' bak kaneblök darërë ñië ñañë shtrine wa ì wa chkoie, di' yoie as sa' kè tö yi tsiriü e' tiè wa e' kanewè wa. <sup>9</sup> Mik sa' bak a' ska' warma a' kawöta sa' sauk, sa' kkö'nuk, erë sa' kè wā ì kine a' a es. Es sa' kaneblé' a' ska' as a' wöblar kaneblök wës sa' tö a' a iwā kkayé' es. <sup>10</sup> Mik sa' bak a' ska', etā ttè i' yé' sa' tö a' a: “Yi kè kaneblak, ese kè tiar.” <sup>11</sup> Sa' tö ittés tö a' welepa bikërke taië. Ie'pa kè kaneblöku' yës, e' skéie wépa kaneblöke esepa tsiriwëkerakitö ñië. <sup>12</sup> Pè' esepa patté sa' tö, ñies ie'pa ké sa' tö Sköképa Jesucristo ttö wa kaneblök darërë bèrë e' kanéwoie.

<sup>13</sup> Erë, a yamipa, kè a' shtrinuk ì buaë uk kèkraë. <sup>14</sup> Ttè shtéyö yèkkuö i' k<sub>i</sub>, e' kè i<sub>u</sub>tè yile tö, e' ta ichó a' malepa a. Ie' yöki a' e' skó as ijaërka ta ier mane'ùne. <sup>15</sup> Erë kè ie' suar suluë wës s'bolök es, e' skéie ipattó er bua' wa wës s'ël es.

*Pablo e' chéat*

<sup>16</sup> Skékëpa Jesús dör sene bèrë mukwak, as e' tö sene bèrë mù a' a kèkraë ì kôs tköke a' ta e' shua. As ie' tkërie a' ulitane ta kèkraë.

<sup>17</sup> Ye' dör Pablo, e' tö shkene i' shté ye' wák ulà wa wës ye' tö ishteke yèkkuö kôs shtéyö ese k<sub>i</sub> es. Es sulitane wa ijcher tö ye' wák tö ishté. <sup>18</sup> As Skékëpa Jesucristo er buaë chò a' ulitane a taië.

## Yëkkuö tsá kit Pablo tö Timoteo a 1 Timoteo

Pablo tö yëkkuö kit mañat Jesús mik erblökwakpa wökirpa a, e' et e' dör itsá kititö Timoteo a e'. Yëkkuö i' dör ie' pattoie wes ie'pa kawöta s'wëttsuk s'wökirpaie.

Timoteo dör Pablo wapiöuk ikanè a. Mik ie' bak duladula etä Pablo tö ie' klöo' kanablök ie' ta. Timoteo bak senuk ká kiè Listra atë Asia ee. Ie' yé dör griegowak ena imì dör Israel aleri. Mik Pablo tö Jesús tté buaë paka' Listra etä Timoteo erblé' Jesús mik. E' ukuöki mik Pablo skà bak Listra etä ie' tö Timoteo shukit kanablök ie' ta (Hechos 16.1-4). E' ukuöki Timoteo kanablé' taië Pablo ta Jesús tté buaë pakök ká kuä'ki kuä'ki a. E' ukuöki ta Timoteo bak Jesús mik erblökwakpa wëttsuk Éfeso. Pablo tö yëkkuö i' kit Timoteo a ie' kimoie wes ie' ké senuk kanablök.

E' kíjeta se' wése ké kanablök Jesús mik erblökwakpa wökirpaie ena e'pa kimukwakpaie, e' kit Pablo tö Timoteo a. Nies Jesús mik erblökwakpa tso' Éfeso e'pa shüa kabene tso' taië. Pë' welepa tö s'wöbla'weke kache tté wa, esepa kí talarke taië, e' ché Pablo tö Timoteo a tö wes ie' kawöta tté ese shülök.

Yëkkuö i' tö se' kimèmi taië i'ñe ta. Yëkkuö i' tö se' a ikkachè tö se' wése kawöta shushtë s'wökirpaie, nies se' wése kawöta shushtë s'wökirpa kimukwakie. E' kíjeta wes s'wökirpa ké kanablök e' tso' kitule yëkkuö tsá kit Pablo tö Timoteo a e' ki.

### *Shké'wè*

<sup>1</sup> Ye' dör Pablo. Ye' dör Cristo Jesús ttekölpa tsá, e'pa eköl. Skéköl dör S'tsatkökwa ena Cristo Jesús mik se' erblöke, e'pa ye' ka' kanè e' wà uk. <sup>2</sup> A Timoteo, ye' tso' yëkkuö i' shtök be' a. Be' dör wes ye' alà chók es tté mik se' erblöke e' wa. Skéköl dör S'yé ena Skékëpa Cristo Jesús, as e'pa er buaë chò be' a ena be' saù er siarè wa nies sene bèrè mù be' a.

### *Se' wöbla'ukwakpa kache tté wa, esepa wöklö'ú*

<sup>3</sup> Mik ye' minea Macedonia, etä ye' kköyè' be' a: “Be' e' tsuat Éfeso pë' welepa tso' ee e'pa a ichó tö kè s'wöbla'war kache tté wa.” <sup>4</sup> Ie'pa kawö chöke taië se' ditséwö bak ká iaiaë e' tté pakè wa. Ttè e' kè erta'wa, e' dör tté èse. Ichó ie'pa a tö kè yi wöbla'waria kache tté ese wa. Ttè ese ki sulu s'ni chò. Ttè ese tö, i weke Skéköl tö se' erblé ie' mik e' wa, ese wöklö'weke.

<sup>5</sup> Ye' ki ikiane tö s'yamipa ni dalëritsò er maneneë wa, erbikè bua' wa. Mik ie'pa ni dalëritsò es, etä e' wa iwënewa tö mokì ie'pa erblöke Jesús mik. E' kuëki ye' tö be' ké s'wöbla'ukwakpa kache tté wa esepa wöklö'uk, kè kar s'wöbla'uk. <sup>6</sup> Ie'pa welepa tö tté mokì méat ta ittémirak biraraë. <sup>7</sup> Ie'pa erkiöke s'wöbla'uk tté dalöiëno wa. Eré ipakekerakitö wes ichópa éna iwà anerak buaë es, eré iwákpa kè éna iwà ane.

<sup>8</sup> Se' wä ijcher tö tté dalöiëno e' dör buaë, eré se' kawöta iwà jchenukwa tö i kuëki imeneat. <sup>9</sup> Se' wä ijcher tö tté dalöiëno, e' kè meneat s'ser yësyësë esepa shuloie. E' skéie imeneat wépa kè senak yësyësë, wépa tö tté dalösewekewa, wépa dör pë' sulusi, wépa e' wamblò sulu, wépa kè tö Skéköl ena ie' siwé dalöiè, wépa tö imì ö iyé ttèwa, wépa dör s'ttökwakpa, <sup>10</sup> wépa trër, wépa serke wépa ta alakölpa skéie, wépa tö s'ditsö ekibleke watuè, wépa dör kachökwakpa, wépa tö s'kkateke kache wa, nies wépa tö i skà kè dör tté yësyësë sini'kuè ese wambleke, esepa kos shuloie tté dalöiëno meneat. <sup>11</sup> Es tté buaë ichökle e' tö se' a ikkacheke. Ttè e' pakè kané me'at Skéköl kikauleka taië, e' tö ye' ulà a.

*Pablo tö wëstela ché Cristo a*

<sup>12</sup> Skëkëpa Cristo Jesús tò ye' er diché ieke. Ie' isuéwā tò ye' ttò mokië, e' kuëki ye' me'kaitö kanëblök ie' a. E' kuëki wëstela chëyö ie' a taië. <sup>13</sup> Ye' bak ie' chök suluë. Ñies ye' bak ie' ttökatapa chök suluë, we'ikök siarë. Erë Skëköl tò ye' sué er siarë wa, kam ye' erblö ie' mik e' kuëki. Ì wamblë' ye' tò ie' tā, e' wà kè ane ye' éna tò e' dör suluë, e' kuëki ie' tò ye' sué er siarë wa. <sup>14</sup> Es Skëkëpa Jesús er buaë ché ye' a taië shutë as ye' erblö ie' mik, ñies as ye' tò s'malepa dalëritsö buaë Cristo Jesús ttò wa.

<sup>15</sup> Cristo Jesús dë'bitü ká i' a pë' sulusipa tsatkök. Ttè e' dör yësyësë je', sulitane ké iklö'ük. Ye' bak e' wamblök suluë sulitane tsatā. <sup>16</sup> Erë Skëköl tò ye' sué er siarë wa, ie' tò ye' tsatkëe sulitane a ikkachoie tò kōs Jesucristo tò se' dalë'ttseke enaë er bua' wa. Ie' tò iwé es as sulitane erblö Jesús mik wës ye' es tā sene michoë dō ie'pa ulā a. <sup>17</sup> Skëköl dör s'blú yöbië, kè duëtā'wā, kè wërta'wā, e' dör eköl ème. ¡As sulitane tò ie' dalöiö taië, ie' küköka taië këkraë!

<sup>18</sup> A Timoteo, be' dör wës ye' alà es, ye' tò be' ké iwakanéük wës Skëköl tteköl tò iyë'bak be' a es. Be' e' tkówā darërë wës ñippökwak bua'buā ñippò es. <sup>19</sup> Be' erblö michoë Jesús mik. Be' erbikö buaë e' wà iutó. Welepa kè wā ierbikö buaë e' wà iutëne, e' kuëki ie'pa erblöke Jesús mik e' olo'yé ie'pa tò. <sup>20</sup> Esepa tso' böi kië Himeneo ena Alejandro. Ie'pa méttšā ye' tò Satanás ulā a as iwötkirdak tò Skëköl kè yërta' suluë.

## 2

### *Skëköl a ikiösö sulitane kī*

<sup>1</sup> A Timoteo, ttè i' cheke ye' tò be' a e' dör ttè bua'ie: Jesús mik erblökwakpa kawöta Skëköl a ikiök sulitane kī këkraë. Ichó ie'pa a tò ie' a ikió tò ie' tò sulitane kimè, ñies wëstela chó ie' a sulitane kī. <sup>2</sup> Ie' a ikió wëpa tso' se' blúpaie se' wökirpaie esepa kōs kī as ie'pa s'wëttsü buaë. Ie'pa tò iwé es, e' tā se' serdaë bèrë buaë Skëköl dalöiök è, kè ñi chöta' suluë. <sup>3</sup> E' dör buaë, ñies iwër buaë Skëköl dör S'tsatkökwak e' wa. <sup>4</sup> Ie' kī ikiane tò sulitane tsatkër. Ñies ie' kī ikiane tò sulitane éna ttè mokië e' wà ar. <sup>5</sup> Ttè e' dör i' es: Skëköl dör eköl ème.

Ñies wëm tso' eköl ème, e' tso' se' ttè chök Skëköl a, e' dör Cristo Jesús.

<sup>6</sup> Ie' wák e' me'ttsabak ttèwā sulitane nuì skéie.

E' bak mik Skëköl tò ikéwö me'wā etā, as sulitane wā ijcher tò moki ie' éna se' tsatkak.

<sup>7</sup> Ttè e' wà pakök Skëköl tò ye' klöo'bak Jesús ttekölpa tsá e'pa ekölie. Ie' tò ye' patkë' pë' kè dör judiowak esepa wöbla'ük ttè moki mik se' erblöke e' wa. Ì ché ye' tò e' dör mokië, e' kè dör kache.

<sup>8</sup> Bitökicha a' ñi dapa'uke ká wa'ñe, etā ye' kī ikiane tò wëpa ttò Skëköl tā er batse'r wa, kè ulune yi kī, kè ñi chöta'. <sup>9</sup> Ñies ye' kī ikiane tò alakölpa e' paiö buaë, kè dör ichkà kkachök. Alakölpa kè kàne íyi tulökkā taië itsà kī. Ñies ie'pa kè kàne e' kītkökkā taië íyi wönarke dalölöë oroie ñie ese wa. Datsi' tuë darërë ese kè iër e' ttsokā taië. <sup>10</sup> E' skéie ie'pa ké e' kītkökkā ì buaë wëkerakitö ese wa wës alakölpa e' chò tò ie' tkëulewā darërë Skëköl ttè a esepa ké senuk es. <sup>11</sup> Ie'pa kawöta s'wöblarke e' kīttök bèrë dalöië wa. <sup>12-14</sup> Skëköl tò Adán yö' kewe, e' ukuökī tā Eva yö'itö. Ñies Adán kè kītëne, Eva kītëne, es ie' tò Skëköl ttè dalöseowā. E' kuëki mik a' ñi dapa'uke Skëköl dalöiök, etā ye' kī ikiane tò alakölpa tulur bèrë. Ye' kè tò kawö mè ie'pa a s'wöbla'ük. Ñies ye' kè tò kawö mè ie'pa a e' alökka wëpa kī. <sup>15</sup> Erë alakölpa tò ila'r kaneweke buaë ena ierblöke Jesús mik ena s'dalëritseke ena isërke batse'r ena ierbiköke buaë yësyësë e' kōs a itkërie, e' tā itsatkërdarak.

## 3

### *Skëkëpa Jesús ichapa erule e'pa wökirpa*



<sup>1</sup> Ttè i' dör yësyësë: Yi éna kanëblak Skëkëpa Jesús ichapa erule e'pa wökirie, e' tã ese éna kanë buaë wãk. <sup>2</sup> E' kuëki esepa ké senuk yësyësë, kè ki ì sulu kuepa yi tò ikkatoie. Esepa ké alaköl tsukwã eköl è, e' dalöiök taië, kè kàne trënuK. Esepa ké e' kkö'nuk buaë, kabikeitsök buaë, ñies senuk yësyësë as idalöiër. Esepa ké s'yamipa datse bänet, esepa kiökwa buaë iu a. Esepa a buaë s'wöblar Skëköl ttè wa. <sup>3</sup> Esepa kè kàne e' ttökka blo' wa. Esepa kè dör kësik tsiriwëta', e' skéie ie' er buaë chò sulitane a tã iserke bèrë. Esepa kè er me'rie inuköl ki. <sup>4</sup> Esepa dör iu wökir buaë. Ñies esepa ala'r wöblane buaë ie' ttò dalöiök, ñies sulitane dalöiök. <sup>5</sup> Esepa kè dör iwák u wökir buaë, e' tã wës idömi Skëköl ichapa erule e'pa wökirie buaë? <sup>6</sup> Wépa míwa erpa Skëköl ttè a, esepa kè menukka s'wökirpaie dö' ie' ttsökã taië tã iwömerttsã weinuk wës bé es. <sup>7</sup> Ñies e' wakpa ké senuk yësyësë as wépa kè dör Skëkëpa Jesús ichapa esepa tò idalöiö. Kè dör es, e' tã ie'pa tò iwayuëmi tã ijaërkami tã iarmine wës bé ki ikiane es.

#### *Skëkëpa Jesús icha wökirpa e'pa kimukwakpa*

<sup>8</sup> Es ñies Skëkëpa Jesús ichapa erule wökirpa e'pa kimukwakpa ké senuk yësyësë as idalöiër. Esepa ké ttök moki. Esepa kè kàne e' ttökka blo' wa. Esepa kè kàne inuköl klö'uk kache wa. <sup>9</sup> Esepa ké e' tkökwa darërë ttè mik se' erblöke kkayëne se' a, e' a erbikè maneneë wa. <sup>10</sup> Wépa merkeka iwökirpa kimukwakpaie, esepa kawöta suë kewe tò is iserdak. Kè iki ì nuí tã', e' tã imerkami kimukwakpaie. <sup>11</sup> Esepa alakölpã ñies ké senuk buaë as idalöiër. E'pa kè kàne biyöblök, kè kàne e' ttökka blo' wa. E'pa ké ì kos uk yësyësë. <sup>12</sup> Wépa kanëblak kimukwakpaie, esepa ké alaköl tsukwã eköl ème, e' dalöiök taië, kè kàne trënuK. Esepa wöblane buaë ila'r wëttsuk ñies ie' dör iwák u wökir buaë. <sup>13</sup> Kimukwakpa tò iwakanewëke buaë, e' tã ie'pa dalöiërdaë, ñies Cristo Jesús tté mik se' erblöke, e' pakeraëitö kè jaëne.

#### *Jesucristo siwé kkayë' Skëköl tò se' a*

<sup>14</sup> Ye' mú mi' bet be' weblök. Ye' tso' yëkkuö i' shtök be' a <sup>15</sup> dö' ye' wöklör etã be' wa ijcher tò wës se' dör Skëköl yamipapie esepa kawöta senuk. Se' dör Skëköl chök e' ichapa, e'pa dör wës u chkí bua'ie es ttè mokië e' tsatkoie iwöklö'woie. <sup>16</sup> Jesucristo siwé e' kkayë' Skëköl tò se' a, ttè e' dör mokië buaë shütëë. Ttè e' dör i' es:

Jesucristo yöne s'ditsöie.

Ie' dör yësyësë e' kkayë' Skëköl Wiköl tò.

Ie' su' Skëköl biyöchökwakpa tò.

Ie' tté buaë e' pakane kã wa'ñie wakpa a.

Ie' mik pë' erblöke kã wa'ñie.

Ie' kinewã buaë kã jai a olo tã' taië ee.

## 4

#### *S'wöbla'ukwakpa kache tté wa*

<sup>1</sup> Skëköl Wiköl tò ichè yësyësë tò mik kã i' erkewatke, etã taië pë' tò ierblö Jesús mik e' waterattsa. E' skéie ttè datse wimblupa tò s'kitö'wëke esepa wã ena aknamapa wã ese klö'wëkerakitö. <sup>2</sup> Pë' e' ò sulu kachò taië erbikè burinewatke esepa iutekerakitö. <sup>3</sup> Pë' ñie'sepa kè tò s'kè senukwa. Ñies ie'pa tò icheke tò chkè wésele kè katar, kè ñar. Erë chkè kos me'atbak Skëköl tò se' a katanoie ñanoie. E' kuëki se' dör Jesús mik erblökwakpa wã ttè mokië e' jcher, e'pa wã kawö ta' chkè ulitane katök ñuk wëstela chekesö ie' a e' wa. <sup>4-5</sup> Ì kos yö' ie' tò e' dör buaë, kè se' kàne iwatöksã. Chkè kos batse'ormi ie' ttè wa ena ie' a ikië wa. E' kuëki ie' a wëstela chésö iki, e' tã inëmisö.

#### *Jesucristo kanë méso buaë*

<sup>6</sup> Ttè ekkè wa be' tō se' yamipa wōbla'wé, e' t̄a be' dōraē Cristo Jesús kanè méso buaē ese. Nies iwēnewa tō be' er diché iērke buaē ttè moki mik se' erblōke e' kōs wa. Ttè e' wà iūtē'bitu be' tō buaē dō ikkè.

<sup>7</sup> Erè kapakè èse, kè wà t̄a', kè tō Skèköl dalöiè, ese kōs kè iutar. E' skéie be' e' paulaú kekraē senuk wēs Skèköl kī ikiane es. <sup>8</sup> Se' e' diché iōke e' pa kē'woie e' dör bērebēre buaē se' a ká i' kī è. Erè sene wēs Skèköl kī ikiane es, e' tō sene buaē shutēè e' meraè se' a ká i' kī nīes aishkuō t̄a. <sup>9</sup> Ttè e' dör yēsyesè, sulitane ké iklō'uk. <sup>10</sup> Se' erblétke Skèköl chók e' mik, e' kuēkī se' dobchōke darērè kaneblök ie' a. Ie' dör sulitane tsatkōkwak, erè bua'iewa ie' dör wēpa erblé ie' mik esepa tsatkōkwak.

<sup>11</sup> Ttè ekkè wa s'yamipa wōbla'ú t̄a ikó iwà iūtök. <sup>12</sup> Kè be' e' muktsa watè be' dör duladula e' kuēkī. E' skéie be' ttò wa, be' ser wa, be' s'dalēritsè wa, be' erblò wa ena be' ser batse'r wa ikkachó s'malepa erblōke Jesús mik esepa a tō wēs se' ké senuk. <sup>13</sup> Kam ye' dō e' yōkī be' e' chó Skèköl yēkkuō aritsök s'yamipa a mik a' nī dapa'uke et̄a. Ie'pa wōbla'ú iwa, ie'pa pattó iwa. <sup>14</sup> Mik Skèkēpa Jesús icha e' wōkirpa ulà me'kabak be' ki, et̄a Skèköl ttekölp̄a tō iyè' be' a tō i me' Wiköl Batse'r tō be' a kanebloie Skèköl a, e' wakaneú ie' a buaē, kè iwe'ikar. <sup>15</sup> Be' e' chó ttè ekkè kōs e' wakanéuk as sulitane tō isaù tō be' kī yörke buaē Cristo ttè wa. <sup>16</sup> Wēs be' ser ena wēs s'wōbla'wēbō e' kkō'nú. Be' tō iwé es kekraē, e' t̄a be' ena wēpa tō be' ttōke e' t̄sè, e'pa kōs tsatkērdaè.

## 5

### *Wēs be' ké senuk Jesús mik erblōkwakpa t̄a*

<sup>1</sup> Wēpa kēkēpatke esepa kè uñar kēsik wa, e' skéie ie'pa pattó er bua' wa wēs s'yéwō es. Duladulapa pattó wēs s'ēlp̄a es. <sup>2</sup> Es nīes alakōlp̄a kēkēpatke, e' pattó wēs s'mì es. Nies busipa pattó wēs s'kutapa es er yēsyesè wa.

<sup>3</sup> Alakōlp̄a schó siarēla, kè w̄a yi t̄a' e' kkō'nuk, esepa dalöiō, esepa kkō'nú. <sup>4</sup> Erè schópa w̄a ala'r t̄a' ö uyökpa t̄a' ö wī'chkepa t̄a' esepa ala'r ö isibayökpa kawōt̄a e' wōbla'uk iwīkēla ö imì atē siarē e' kkō'nuk imipa tō ie'pa kkō'na' e' skéie. E' wēr buaē Skèköl wa. <sup>5</sup> Alakōlp̄a schó kè w̄a yi t̄a' e' kkō'nuk, serke ekōrla, morke Skèköl è mik, ttōke ie' t̄a nīē nañeè, esepa kawōt̄a kīmè. <sup>6</sup> Erè alakōlp̄a schópa e' mettsa ì sulu wamblök e' t̄sè'woie buaē esepa tso' t̄sè'ka, erè Skèköl a ie'pa dör wēs s'duulew̄a es. Esepa kè kawō t̄a' kīmè. <sup>7</sup> Ttè e' wà iūtök s'yamipa kó as kè yi tō ì sulu kù ie'pa kī ikkatoie. <sup>8</sup> Es yi kè tō iyamipa kkō'nè, kè tō iyamipa ekka kkō'nè bua'iewa, ese tō ttè mik se' erblōke e' watéttsa. Ie' dör suluè tkòk̄a pē' kè erblöt̄a' Jesús mik esepa tsat̄a.

<sup>9</sup> Alakōlp̄a schó kī duas de dabom teryök (60) ö kī t̄a, sēnewabak wēm eköl è t̄a, esepa è kiè shtó kīmè. <sup>10</sup> E' kīie t̄a ijcher sulitane w̄a tō ie'pa s'kīmeke buaē, ie'pa ala'r talaq' buaē, ie'pa tō ipakōkwakpa datse bánet esepa ki'w̄a buaē, kè ie'pa tkine kanè èse uk s'batse'r malepa kīmoie, nīes s'weirke esepa kīmeke ie'pa tō, ie'pa e' muke íyi buaē kōs ese uk e' waweke ie'pa tō. Alakōlp̄a schó esepa kiè shtök se' kawōt̄a yēkkuō kī ikīmoie.

<sup>11-12</sup> Erè alakōlp̄a schó kam kī duas dō dabom teryök (60) esepa kiè kè shtar yēkkuō kī, esepa kè kawōt̄a kīmè. Ie'pa tō ichèmi Cristo a tō kè sa' serpawane, erè ie'pa erkiöwéne wēpa tō, e' t̄a ie'pa serdawane. Es ie'pa ttè me' kuaè, e' kè dalöiène ie'pa w̄a, e' t̄a e' nuí atē ie'pa kī. E' kuēkī esepa kiè kè shtar yēkkuō kī as kè itkò ie'pa t̄a es. <sup>13</sup> Nīes a' tō alakōlp̄a schó esepa kīmè et̄a ie'pa bikērdak̄a tajē, michoè upakök u èt u èt biyöblök suluè, e' tiù mir mir s'yamipa tsiriuk, ttè kè yēr t̄a' ese cherami shabatshabat. <sup>14</sup> E' kuēkī alakōlp̄a schó ià busipa, esepa a ye' tō ichè tō a' sēnúwane, a' ala'r kókane, a' wákpa u kaneú. Ie'pa tō iwé es et̄a pē' kè wōbatsö Jesús ttè wa e'pa kè tō se' chepa suluè. <sup>15</sup> Alakōlp̄a schó wēlepa anemibakne Cristo ttè yōkī tso'ne Satanás ttè iūtök, e' kuēkī ye' tō ichè es.

<sup>16</sup> Alaköl isie dör Jesús mik erblökwak, e' yamipa alè dör alakölpa schó, etä ie' ké ie'pa kkö'nuk as kanè e' kè arka Skëképa icha malepa ki. Es imalepa tö alakölpa schó kè wä yi ta' e' kkö'nuk, esepa kkö'nemi.

<sup>17</sup> Skëképa Jesús icha erule erule e'pa wökirpa tö se' wëttseke buaë, esepa kawöta dalöiè taië patuë buaë. Ie'pa wépa e' ché s'pattök s'wöbla'uk Skëköl ttè wa, esepa kawöta pasuë bua'iewa. <sup>18</sup> Skëköl yëkkuö tö ichè: “Baka wë'ne tso' kanebloie trigo wöttsoie, e' kè kawö ta' kkö payuëwä itso' kaneblok e' dalewa as ie' tö trigowö katò.” Nies ichèitö: “Kaneblokwakpa kawöta patuë.” E' kuëki s'wökirpa pasauk buaë se' kawöta.

<sup>19</sup> Yile debitu s'wökirpa eköl kkatök, ese kè iutar. Erë mik idebiturak bül mañal ikkatök ta' iché tö ie'pa tö isuë, etä ttè e' wä chakó tö iyëne ö kè iyëne. <sup>20</sup> S'wökirpa tö ì sulu wamblekeia, kè éna ilo'yak, esepa wöuñu s'yamipa ulitane wörki as imalepa suarka ta' ie'pa kè tö íyi sulu wamblö.

<sup>21</sup> Ye' tö be' a icheke Skëköl wörki nies Jesucristo wörki nies Skëköl biyöchökwakpa shukitule e'pa wörki tö ttè ekképa wä iutó ñikkëe s'wökirpa ulitane ta. Ie'pa saú ñikkëe.

<sup>22</sup> Kè yi marka betbet s'wökirie. Mik be' tö imekeka, etä iwà bikeitsówa buaë kewé. Wëm tö ì sulu wamblé, ese mékabö s'wökirie e' ta' ie'pa tö ichèmi tö be' tso' ie' pabakök. Nies be' sueraë suluë ie'pa tö. Be' e' kkö'nú batse'r ì sulu qos e' yöki.

<sup>23</sup> Be' shü dalër ñië, e' kuëki kè be' kàne di' è yök. Mikle ta' vino yó elkela kapöliie.

<sup>24</sup> Ì sulu wambleke welepa tö ese jcherwä sulitane wä bet, kam ishulir e' yöki. Erë ì sulu skà tso' ese kè jcherwä yi wä dò aishkuö ta' mik ishuline etä. <sup>25</sup> Es nies ì buaë wëkesö ese wërwa bet. Erë kè iwëne bet, e' ta' iwërdaë aishkuö ta, kè iblë nuk. E' kuëki kè yi marka betbet s'wökirie kam iwà bikeitswä buaë e' yöki.

## 6

<sup>1</sup> Wépa tso' klöulewä kanè mésoie, esepa a ichó tö ie'pa kawöta iwökirpa dalöiök er bua' wa as iwökirpa kè tö Skëköl chò suluë, nies as ie'pa kè tö ttè buaë wa se' tö s'wöbla'weke, e' chò suluë. <sup>2</sup> Ie'pa wökirpa dör Jesús mik erblökwakpa, e' ta' ie'pa kè kàne idalöseukwä, ie'pa de ñi yamiie Jesús ttè wa e' kuëki. E' skéie ie'pa ké kaneblok bua'iewa. E' wä dör tö iwökirpa dör nies Jesús mik erblökwakpa. Ie'pa dör ñi yamipa ñi dalër taië. Ttè ekké wa s'wöbla'ú, ichó sulitane a tö iutó.

### *Se' er me'rie inuköl ki, e' dör suluë*

<sup>3</sup> Ttè buaë wa se' wöbla' Skëképa Jesucristo tö, e' tö se' a ikkacheke tö wes seneke yësyësë Skëköl a. Ttè e' wa se' tö s'wöbla'weke. Yile tso' s'wöbla'uk ttè kuä'ki wa, kè dör wes ttè wa se' tö s'wöbla'weke es, <sup>4</sup> e' ta' ie' e' ttsòka taië, erë ie' kè wä ì jcher yës. Ttè kè wä ta, ese è tso' ie'pa er a, e' kabewekerakitö ñië se' tsiriwoie. Wépa tö ie'pa ttè iuteke, esepa ukyërke s'malepa ta, ñi blabatsökëlor, ñi chöke suluë ena ñi bikeitsöke suluë. <sup>5</sup> Këkraë ñi tsiriukerak ttè kuëki. S'wöbla'ukwakpa ttè kuä'ki wa, esepa er me'rie ì sulu è ki. Ttè mokì ese kè ku'ia ie'pa wä. Ie'pa tö ttè kuä'ki pakeke e' blu'woie ème. <sup>6-7</sup> Erë ye' tö a' a ichè tö mik se' kune, etä se' kè wä ì dè'ka. Nies mik se' blënewä, etä kè se' wä ì mìnè yës. E' kuëki se' serke yësyësë wes Skëköl ki ikiane es ena se' ttsë'r buaë, ì tso' se' wä e' è wa, e' ta' e' dör buaë shute se' a inuköl taië tsata. <sup>8</sup> E' kuëki se' wä chkè ta' datsi' ta', e' ta' se' ké ttsë'nuk buaë, e' dör wë' se' a. <sup>9</sup> E' skéie wépa e' blu'wakka taië, esepa erkirke ì sulu wamblök ta' ianemine ì sulu ulà a wes dúla klörwä sho' a es. Ie'pa klöulewä sene sulu a, eré ese tö ie'pa sulu'weke, erë ie'pa tö iwawekeia, bata ekké ta' ie'pa yilitewä idikia weinuk. <sup>10</sup> Inuköl dalër s'éna e' dör ì sulu tsakië e' wì. Welepa tö inuköl kkecheke taië, e' ukuömik ttè mik se' erblöke e' olo'yérakitö ta' iweirke eriarke siarë.

*Pablo tö Timoteo bata patté*

<sup>11</sup> Erë be' dör Skëköl kanè méso buaë. Be' e' skóttsa ì sulu qos ekkë yöki. E' skéie be' e' chó senuk yësyësë wës Skëköl ki ikiane es. Be' erbló Jesús mik këkraë. S'malepa dalëritsó. Be' weirke qos e' dalë'ttsó er bua' wa. S'malepa saú er bua' wa. <sup>12</sup> Be' erblöke Jesús tté buaë e' mik, e' kueki be' e' tkówa darëre ñippök ì sulu datse be' ki e' ta. Mik be' erblë' Jesús mik kuaë, etä e' yë'ka be' tö pë' tso' taië e' kukua. E' kéwö ska' ta Skëköl tö be' klöo'bak senuk michoë ie' ta, tté e' mik be' e' klö'ú darëreë këkraë, kè arwa as iwà dò be' ulà a. <sup>13</sup> Skëköl dör sene mukwak e' wörki, ñies Cristo Jesús e' tsatkë' tté moki wa Poncio Pilato ska', e' wörki ye' tö be' a ichè tö <sup>14</sup> ì uk ye' tö be' ké e' wà iutó yësyësë as kè yi tö ì sulu kù be' ki be' kkatoie dò mik Skëképa Jesucristo datskene olo ta' taië etä. <sup>15</sup> Mik ikéwö de, etä Skëköl tö Jesucristo patkerane kkachè sulitane a.

Skëköl kïkarkeka taië,

e' eköl è dör iyi ulitane tsata.

Ie' dör blu'pa qos e'pa Blú  
ena skëkölpa qos e'pa Këköl.

<sup>16</sup> ¡Ie' eköl è kè duöta'wa!

Ie' serke ie' olo ta' taië e' shua,  
kè yi döpa wa e' ska'.

Kè yi wa ie' suule iwöbla wa,

ñies kè yi a ie' sunukwa.

¡Ie' è kawöta kikëka këkraë!

¡Ie' è diché ta' taië këkraë! ¡Es e' idir!

<sup>17</sup> A Timoteo, inuköl blúpa a ichó tö ie'pa kè kàne e' ttsökka taië. Inuköl erta'wa, chöta'wa e' kueki ichó ie'pa a tö ie'pa kè kàne e' maukka inuköl mik. E' skéie ie'pa a ichó tö a' e' maúka Skëköl è mik. Ie' tö se' a iyi buaë meke taië senoie, se' ttsé'woie buaë.

<sup>18</sup> Ichó ie'pa a tö ì buaë ú taië s'kimioie. A' kè kàne kkë'blök. S'kimú a' inuköl wa er bua' wa. <sup>19</sup> Ie'pa tö iwé es, e' ta iské merane buaë Skëköl tö ie'pa a aishkuö ta. Es sene chökle e' döraë ie'pa ulà a.

### *Pablo e' chéat*

<sup>20</sup> A Timoteo, Skëköl tté buaë mène be' ulà a, e' wakaneú er moki wa. Kapakè kè wà ta', kè dör Skëköl dalöioie, ese qos yöki be' e' skóttsa. Ie'pa wákpa tö iché tö e' dör tté mokië. Ie' chörak tö ie'pa wa iyi jcher taië, erë e' dör kache. <sup>21</sup> Se' welepa tö iché tö tté ese sini'kuérakitö ta tté mik se' erblöke e' olo'yérakitö. E' kueki be' e' skóttsa bánet tté ese qos yöki.

As Skëköl er buaë chò a' ulitane a.

## Yëkkuö skà kit Pablo tö Timoteo a, i' ta ide böt 2 Timoteo

Pablo bak wötëulewà Roma s'wöto wé a, e' yënettsà duas dabom teryök ena teryök kí böt Jesús kune'bak e' ukuöki (60-62 DC) e' ulatök. E' ukuöki ta ie' skà minea Jesús tté buaë pakök i' ta ide tkëtökicha. E' kèwö ska' ie' tö yëkkuö tsá kit Timoteo a ena Tito a. E' ukuöki ta wëm kiè Nero e' yöne Roma blúie età Pablo skà wötënewane s'wöto wé a. Mik ie' tso' wötëule e' dalewa ie' tö yëkkuö i' kit Timoteo a. I' ëtökicha Pablo wötënewa kuä'ki. Kewe ie' bak wötëule iwák u a. I' ëtökicha ie' wötënewa ká suluë ena sësëë ese a. Nies ie' monewà tabechka kicha wa. Ie' wà ijcher tö e' dör ie' kanè bata, e' kuëki yëkkuö i' kit ie' tö Timoteo a. I' es ie' tö ikit. Et: Pablo ittse' tö ie' atë ekörla e' kuëki ie' siánewà. Wëpa kiè Figelo ena Hermógenes dör ie' wapiepa e'pa tö ie' méat. Nies wëm kiè Demas e' ena imalepa skà tö ie' méat. E' kuëki ie' ki ikiane tö Timoteo bitu bet ie' kimuk.

Böt: Jesús mik erblökwakpa we'ikeke siarë Roma blú ñe' tö, e' ki Pablo tkirke tajë. E' kuëki ie' tö Timoteo patté tajë tö ie' kawötä e' tkökwa darërë Jesús tté a. Nies ie' tö Timoteo a ichè tö ie' kawötä Jesús tté buaë e' kí wa s'wöbla'uk. E' kíeta ie' tö Timoteo a ichè tö ie' kawötä e' chöktke weinuk Jesús tté buaë kuëki.

Yëkkuö i' tö se' a ikkachè tö wës se' kawötä senuk Jesús a. Nies se' a ichèitö tö se' kawötä e' chök weinuk Jesús mik erblè kuëki. Wëlepa tö ibikeitsè tö i' dör yëkkuö bata kit Pablo tö e'.

### *Shkë'wè*

<sup>1</sup> Ye' dör Pablo. Skëköl wák er wa ye' dör Cristo Jesús ttekölpa tsá, e'pa eköl. Ie' kablé sene michoë muk wëpa batsulewà Cristo Jesús mik esepa a, e' tté pakök ye' patkë'itö. <sup>2</sup> A Timoteo, ye' tso' yëkkuö i' shtök be' a. Be' dalër tajë ye' éna wës ye' wák alá es. Skëköl dör S'yé ena Skëképa Cristo Jesús, as e'pa er buaë chö be' a ena be' saü er siarë wa nies sene bèrè mù be' a.

### *Pablo wëstela ché Skëköl a Timoteo dalërmik*

<sup>3</sup> Skëköl dalöieke ye' tö erbike maneneë wa wës ye' yépa bak ká iaiaë idalöiök es. Kekraë mik ye' ttöke ie' ta ñië nañeë, età ye' er arke be' ska' ta wëstela chekeyö be' dalërmik. <sup>4</sup> Mik ye' minea, età be' ij' siarë. Mik e' anewa ye' éna, età ttsëskua ye' mù be' suëne as ye' tts'erne buaë. <sup>5</sup> Nies ye' éna iane tö be' erblöke Jesús mik er mokí wa. Ye' wà ijcher buaë tö be' erblöke Skëköl mik wës be' wí'kela Loida ena be' mì Eunice e'pa erblè' imik kewe be' yöki es.

### *Kè be' jaënuK Jesús tté buaë pakök*

<sup>6</sup> E' kuëki ì me' Skëköl tö be' a kanebloie ie' a mik ye' ulà me'ka be' ki età, e' kè olo'yar, e' kí wakaneú bua'iewa. <sup>7</sup> Skëköl kè wà se' a iWiköl mène as se' suar. E' skéie iWiköl tö se' a diché mé senoie yësyësë ie' a, ñi dalëritsoie, nies erbikoie buaë yësyësë. E' kuëki be' kanëbl' Skëköl a kè suarta'. <sup>8</sup> Kè be' jaënuK Skëképa Jesús tté buaë pakök. Nies ye' tso' wötëule Jesús tté pakë kuëki, e' kè ki be' jaënuK. E' skéie ye' tö be' a ichè tö be' e' chö se' weirke Jesús tté kuëki e' dalë'ttsök ye' ta Skëköl diché wa.

<sup>9</sup> Skëköl wák tö se' tsatkë'ttsa

ñies ie' tö se' klöq' senuk batse'r ie' a.

E' kè dör tö se' tö ì buaë wé ie' a e' skéie.

E' dör tö ie' wák tö ibikeitsé es ta iwawéitö,

ie' er buaë chè se' a, e' kuëki.

Kam ká i' yör e' yöki ie' tö ibikeits

tö ie' er buaë chöraë se' a Cristo Jesús batamik.

<sup>10</sup> Cristo Jesús dör S'tsatkökwaK e' dë'rö ká i' a se' a ikkachök tö Skëköl er buaë ché se' a.

Ie' kötewā shkenekane, e' wa ie' tö iwà kkaché  
 tö ie' e' aléka duèwā kī.  
 Ie' tté buaë e' tö se' a ikkacheke  
 tö se' kè duòpawā da'a,  
 e' skéie sene michoë dōraë se' ulà a  
 ie' tté buaë e' batamik.

<sup>11</sup> Ttè buaë e' wà pakök ena s'wöbla'uk iwa Skëköl tö ye' klöo' Jesús ttekölpa tsá e'pa ekölie. <sup>12</sup> E' kueki eré ye' weirke, eré ye' kè jaëne e' kī. Yi mik ye' erblöke, e' mik ye' bàtse buaë, e' dör Jesús. Ye' wā ijcher buaë tö kanè me' Skëköl tö ye' a e' kkö'neraë ie' wák tö dò mik Skëképa Jesús datskene etā. E' kueki ye' kè jaëne weinuk ie' dalërmik.

<sup>13</sup> Ttè yësyësë wa ye' tö be' wöbla' e' wà iutó. Be' e' tkówa darërëë erblök Jesús è mik. Ñies s'malepa dalëritsó Cristo Jesús batamik. <sup>14</sup> Ttè mokië mène be' a, e' wà kkö'nú buaë Wiköl Batse'r tso' se' a e' wa as kè yi tö imane'üttsa.

<sup>15</sup> Be' wā ijcher buaë tö s'yamipa serke Asia, e'pa s'eraa iekkë tã ye' watë'ttsa, e'pa böi kiè Figelo ena Hermógenes. <sup>16</sup> Eré Onesíforo kè jaëne ye' tso' wötëule e' kī. Këkraë ie' tso' ye' er pablök. As Skëképa Jesús tö ie' ena iyamipa saù er siarë wa. <sup>17</sup> Mik ie' de íe Roma, etā ie' tö ye' yulé poë tã ye' wakuéitö. <sup>18</sup> Skëképa Jesús datskene, mik e' kèwö de etā as ie' tö Onesíforo saù er siarë wa. Be' wā ijcher buaë tö wekkë ie' tö se' kime' Éfeso.

## 2

### *Be' weirke Jesús ttè kueki e' dalë'ttsó*

<sup>1</sup> A Timoteo, be' dör ye' aläie, Skëköl er buaë chò se' a Cristo Jesús batamik, e' mik be' e' diché íó. <sup>2</sup> Wépa ttò mokië dirmi buaë s'wöbla'uk esepa yuló tã ì yë'yö s'yamipa taië e' kukua, ttsë' be' tö ese wa ie'pa wöbla'ú as ie'pa tö s'malepa wöbla'ù iwa.

<sup>3</sup> Se' weirke Cristo Jesús ttè kueki, ese dalë'ttsó darërëë wes ñippökwa buaë tö iweirke kos e' dalë'ttseke es. <sup>4</sup> Mik ñippökwa tso' ikanè a, etā ie'pa kè ku' e' tiuk ì ku'a'kī a as iwër buaë iwökir wa. <sup>5</sup> Es ñies wépa inuke esepa kawöta ittë iutök buaë. Kè iwā iutëne, e' tã kè e' alòpaka. <sup>6</sup> Wépa kaneblöke darërë íyi kuatök, esepa ulà a iyiwö tsá dōraë kewe. <sup>7</sup> Ì cheke ye' tö be' a ttè i' wa, e' wà bikeitsó buaë tã Skëképa Jesús tö be' kimerä as be' éna iwà kos ar buaë.

<sup>8</sup> Be' tö Jesucristo bikeitsó me'rie. Ie' dör se' blú bak ká iaiaë kiè David e' aleri. Cristo kötewā shkenekane, e' tté buaë pakeke ye' tö. <sup>9</sup> Ttè buaë e' kueki ye' weirke siarë. Ye' tso' wötëulewā moulewā s'wöto wé a wes pè' sulusipa es. Eré Skëköl ttè e' kè ku' wötëulewā. <sup>10</sup> E' kueki ye' tö ì kos dalë'ttseke wépa shukitbak Skëköl tö esepa kimoie as ie'pa tsatkër ena olo yöbië dò ie'pa ulà a Cristo Jesús batamik.

<sup>11</sup> Ttè i' dör yësyësë:

Se' bàtsewā Cristo kötewā, e' tã ñita,  
 e' tã se' ser michoë ie' tã ñita.

<sup>12</sup> Se' weirke Cristo dalërmik, e' dalë'ttsésö,  
 e' tã ñies se' dōraë s'wökirpaie ie' tã ñita.

Se' tö iché s'malepa a tö se' kè dör Cristo icha,  
 e' tã ñies ie' tö icheraë aishkuö tã tö se' kè dör ie' icha.

<sup>13</sup> Ie' wák kè a e' watë nuk,  
 e' kueki eré se' tö ie' watëmittsa,  
 eré ie' kè tö se' watëpattsa.

### *Be' kanebló as be' wër buaë Skëköl wa*

<sup>14</sup> Be' tö ttè ekkëpa chó ie'pa a as ie'pa er arne iska' këkraë. Ie'pa pattó Skëköl wörki tö a' kè kàne ñi wötkök ñië ttè èse kī. E' kè dör ìie bua'. E' tö wépa tso' ittök esepa



sulu'wekewa. <sup>15</sup> Be' e' chó kaneblök Skëköl a buaë as ie' wa be' wër buaë. S'wöbla'ú yësyësë ttè mokië e' wa, kè shiliwar shilitshilit as be' kè jaërka be' kanè ki. <sup>16</sup> Kapakè kè dör Skëköl dalöioie, kè wà ta', ttè ese kos yöki be' e' skóttsa. Ttè ese tö se' wëttsëmi ì sulu è a, kè tö Skëköl ttè iutëia. <sup>17</sup> Ttè ese tö s'sulu'wëwami wës smewö tö s'katè es. Wëpa böi kiè Himeneo ena Fileto e'pa s'wöbla'weke kache tté wa. <sup>18</sup> Ie'pa tö ttè moki watëttsa. Ie'pa tö s'wöbla'weke kache tté wa. Ie'pa tö icheke tö mik se' wöskuée, etä e' dör wës se' wiköl du'wa shkenekānetke Skëköl a es. E' kueki mik se' duowa, etä se' nu kè shkerpakane aishkuö ta. Ttè e' wa ie'pa tso' welepa er sulu'uk ta kè ierblöiarak Jesús mik. <sup>19</sup> Ie'pa tö s'wöbla'weke kache tté wa, erë Skëköl ttè dör moki e' kè manerta', e' kè wötirta' wës ak blubluë kè wötirta' es. Itso' kitule Skëköl yëkkuö ki, e' tö ichè: “Wépa dör Skëköl icha, esepa suule ie' wa buaë.” Nies e' tö ichè: “Wépa iché tö ie'pa dör Skëköl icha, esepa kawöta ì sulu kos wamblekerakitö e' olo'yök.”

<sup>20</sup> Inuköl blu' u a tka' tso' daklië welepa yöule orochka wa, inukölchka wa, ese dör tka' bua'buwa ikawö tkö'uke buaë ese tkéie. Nies u e' a tka' èse tso' yöule skauchka wa, nies kal yöule tka'ie ese dör tka' èse. <sup>21</sup> Es se' dör. Se' e' kkö'nuke ì sulu ñe' yöki, e' ta se' dòmi wës tka' bua'buwa maneneë es, batse'ule, dör buaë se' Blú a iyi ulitaneie tso'tke ì kos buaë ese woie ie' a.

<sup>22</sup> Ì sulu wamblak duladulapa éna, ese kos yöki be' tkóshkar. E' skéie be' e' chó senuk yësyësë. Be' k' erbló Jesús mik. S'malepa dalëritsó. Nies be' senú bèrè sulitane ta. E' kos yuló s'malepa tö Skëképa chakè er maneneë wa esepa kos ta ñita. <sup>23</sup> Ttè kè wà ta', ese kabewekerakitö, e' kè iutar be' tö. Be' wa ijcher buaë tö ttè ese tö sulu se' kè ñippök. <sup>24</sup> Skëképa Jesús kanè méso kè kawöta e' tiuk ñippè a. E' skéie ese ké senuk bèrè sulitane ta. Ese a s'wöblarmi buaë Skëköl ttè wa, sulitane dalé'ttsekeitö er bua' wa. <sup>25</sup> Wépa kè éna ttè moki iutak, esepa kawöta shulëitö er bua' wa, isalema wekkè alé ta ie'pa er mane'umi Skëköl a ta iyörmine ttè moki wa. <sup>26</sup> Ie'pa er mane'wéne, e' ta es ème ie'pa tkömishkar bé ulá a. Ie' wa ie'pa tso' klöulewa wës dúla klöulewa sho' a es as ie'pa e' wamblö wës ie' ki ikiane es.

### 3

#### *Mik ká i' erkewa, etä s'ditsö e' wamblöraë suluë*

<sup>1</sup> Be' kawöta wa ijchenuk tö mik ká i' erkewatke, etä kawö suluë datse taië s'ki. <sup>2</sup> Pë' wák è e' dalëritsöraë. Ie'pa er murawa inuköl ki. Ie'pa e' ttsöraka taië, kè tkirpa yi skà ki. Ie'pa ñi chöraë suluë. Iyé ena imi, e'pa ttò kè iuteparakitö. Ie'pa er suluë, kè wéstela chepa yi a. Ie'pa kè tö Skëköl dalöiepa. <sup>3</sup> Kè er ttsë'rpa buaë yi ki, kè er buarpane yi ki. Ie'pa biyöblöraë taië. Ì sulu datse ie'pa er a, ese wà wambleraë ie'pa tö. Ie'pa tö s'we'ikeraë siarë. Ì buaë kos sueraë suluë ie'pa tö. <sup>4</sup> İyi sulu wambleraë akirie, iyi wambleraë kè ulé klöule. Ie'pa e' ttsöraka taië shutëë. Skëköl kè dalëritsepaitö, e' skéie ì tso' ká i' a s'ttsë'weke buaë, ese è wa ie'pa wöbatsöraë taië. <sup>5</sup> Ie'pa e' ò tö mokië Skëköl dalöiekerakitö, erë wës ie' wamblörak e' wa iwënewa tö e' dör kache.

Esepa yöki be' e' kkö'nú. <sup>6</sup> Wëpa esepa welepa micho u èt u èt ta iwachekerakitö tö itso' s'pattök, erë e' dör kache. Ie'pa tso' alakölpa kitër tottola esepa dakiñuk. Alakölpa esepa tso' klöulewa ì sulu wamblekerakitö ese ulá a. Ì sulu wa ie'pa wöbatsö, ese tö ie'pa erkiöweke taië. <sup>7</sup> Ie'pa e' yuak ttè kuak'ki wa mirmir kekraë, erë Skëköl ttè moki kè ska' ie'pa er dë'. <sup>8</sup> Ie'pa esepa tö Skëköl ttè moki cheke suluë wës ká iaiaë Janes ena Jambrés tö Moisés yé' suluë Skëköl ttè kueki es. Ie'pa kè a kabikeitsia buaë. Ie'pa kè erblöku'ia mokië Jesús mik. <sup>9</sup> Erë ì wambleke ie'pa tö, ese wà kè ki ká dòpa taië. Bet ta sulitane wa ijcherdawa tö ie'pa ttè e' kè wà ta' wës ibak ká iaiaë Janes ena Jambrés e'pa ta es.

*Pablo tö Timoteo bata patté*

<sup>10</sup> Erë ttè wa ye' s'wöbla'weke e' jcher buaë be' wa. Ñies wes ye' ser, ì kiane ye' kī, wes ye' erblò Jesús mik, wes ye' tò s'dalè'ttseke er bua' wa, wes ye' tò s'dalèritseke, wes ye' weine e' kos dalè'ttsé'yö, e' kos jcher buaë be' wa. <sup>11</sup> Wes ye' yé'bak suluë pè' tò, wes ie'pa tò ye' we'ik siarë Antioquía ena Iconio ena Listra, e' kos suule buaë be' wa. Ye' weinebak taië siarë erë Skëképa Jesús tò ye' tsatké' e' kos yöki. <sup>12</sup> Ttè i' dör moki: yi senak yësyësë wes Cristo Jesús kī ikiane es, esepa kos weirdaë siarë ie' ttè kī. <sup>13</sup> Erë pè' sulusipa ena s'kitö'ukwakpa esepa kī e' wamblöraë suluë shute, s'kitö'uk ena e' kitö'uk.

<sup>14</sup> Erë be' e' tkówa darërëë kekraë ttè wa be' wöblaone e' a. Ttè e' dör moki e' jcher yësyësë be' wa. Wépa tò be' wöbla' iwa e'pa suule bua' be' wa, e' kueki be' e' tkówaia kekraë. <sup>15</sup> Es ñies, mik be' ià alala, etä Skëköl yëkkuö batse'r e' suule be' wa, e' a be' talane. Ttè e' tò be' a ikkachèmi tò Skëköl tò se' tsatkèmi se' erblé Cristo Jesús mik e' batamik. <sup>16</sup> Skëköl yëkkuö kos, e' kitule yësyësë wes ie' wák tò ibikeits es. E' dör buaë se' a s'wöbla'woie, s'wouñoie, s'shuloie, ñies ikkachoie se' a wes seneke yësyësë <sup>17</sup> as wépa dör Skëköl icha, esepa yör buaë da'äie tso'tke ì buaë kos ese uk.

#### 4

<sup>1</sup> Cristo Jesús datskene s'blúie ká i' a olo ta' taië s'blèrulunebak kos ena s'tso' ttsé'ka kos esepa shulök. Ie' wöa ena Skëköl wöa, ye' tò be' a ichè tò be' ké <sup>2</sup> ie' ttè buaë pakök kröröë, be' éna ipakak ö be' kè éna ipakak, erë ipakó kekraë. S'shuló, s'uñú, s'pattó, s'wöbla'ú enaë er bua' wa. <sup>3</sup> Kawö datse etä pè' kè tò Jesús tté moki e' ttsepaia. E' skéie s'wöbla'ukwakpa yuleke ie'pa tò taië ie'pa wöbla'woie ttè wése ttsak ie'pa éna ese è wa. <sup>4</sup> Ttè mokië e' waterattsarakitö ta kapakè èse kos ese klö'werarakitö. <sup>5</sup> Erë be' e' tkówa darërëë. Be' erbikó buaë yësyësë. Kos be' weirke e' dalè'ttsó buaë. Jesús tté buaë pakó. Kanè kos me'at Skëköl tò be' a, e' wakaneú er bua' wa.

<sup>6</sup> Ye' duökewa, e' kéwö dökewatke. Ye' a ta e' dör wes íyi mekesö Skëköl a idalöioie es. <sup>7</sup> Ye' e' tkéwa darërëë kanè me' Skëköl tò ye' a e' a, e' wawéyö buaë, ye' e' batseitsé iwawoie kekraë. <sup>8</sup> E' kueki sene yësyësë ské, e' tso' bléule ye' a. Mik ikéwö de, etä imeraë ye' a Skëképa Jesús dör s'shulökwak yësyësë e' tò. Kè dör ye' è a, ñies e' dör wépa éna ie' dalër taië ena itso'rak ie' datskene olo ta' taië e' panuk esepa kos a.

#### *Pablo ttè bata ché Timoteo q*

<sup>9-11</sup> Demas tò ye' méat, ì tso' ká i' kī e' dalèrmik ta imía Tesalónica. Ñies Crescente mía Galacia ena Tito mía Dalmacia. Lucas è atë ye' ta. E' kueki be' shkó bet ye' weblök, kè be' e' wöklö'uk ì wa. Marcos yuló ta ikióbitu e' ta. Ye' kī ie' kiane e' kimuk ye' kanè wa. <sup>12</sup> Tíquico patkémioyö Éfeso. <sup>13</sup> Be' we'ikèyö, mik be' datse, etä ye' paio kikküö me'atyö Tróade Carpo u a, e' tsúbitu ña. Ñies ye' yëkkuö me'at tseë, e' shua wele tso', e' dör iyiwak kkuölit yöule yëkkuöie, ese kos kiane ye' kī, ttè bua'iewa tso' kitule iki e' kueki, e' kos tsúbitu ña.

<sup>14</sup> Alejandro dör íyi yuökwak tabechka wa, e' e' wamblé suluë ye' ta. Skëképa Jesús tò ie' patueraë wes ie' e' wamblé es. <sup>15</sup> Ttè buaë pakekesö e' ché ie' tò suluë. E' kueki be' e' kkö'nú ie' yöki ñies.

<sup>16</sup> Ye' tsá mine shulè s'wökirpa ska' etä kè ye' dè' ye' kimuk. Sulitane tò ye' méat ekörla. Skëköl mú kè tò ie'pa we'ikè e' kī. <sup>17</sup> Erë Skëképa Jesús tò ye' kimé, ie' tò ye' a idiché mé as ye' tò S'tsatkókwak tté pakò sulitane tso' ee, kè dör judiowak, e'pa kukua. Es Skëképa Jesús tò ye' tsatkée ye' bolökpa éna ye' ttakwa e'pa ulà a. <sup>18</sup> Ñies ie' tò ye' yerattsa ì sulu kos e' ulà a. Ie' tò ye' tserami ká jai a wé ie' tkër s'blúie ee, es ye' tsatkeraëitö. ¡Ie' kikkökasö taië kekraë! Es e' idir.

#### *Pablo e' chéat*

<sup>19</sup> Prisca ena Áquila ena Onesíforo yamipa, e'pa shké'ú ña. <sup>20</sup> Erasto e' tséat Corinto. Trófimo kirirke, e' me'atyö Mileto. <sup>21</sup> Be' mú bitu kam tskiridiö döwa e' yöki. Eubolo, Pudente, Lino, Claudia ena s'yamipa kos tso' íerö e'pa tò be' shké'wémi.

<sup>22</sup> As Skëképa Jesucristo tso'ie be' ta. As Skëköl er buaë chò a' ulitane a taië.

## Yëkkuö kit Pablo tö Tito a Tito

Mik Pablo bak klöulewā Roma e' yënettsa, etā yëkkuö i' kititö Tito a duas dabom teryök kī mañal ena teryök kī skel Jesús kune'bak e' ukuöki (63-65 DC) e' ulatök. S'wā ijcher tö Tito erblé' Jesús mik Pablo ttò wa. E' ukuöki tā ie' kanéblé Pablo ena Timoteo e'pa tā ñita. Mik Pablo tsá bak klöulewā e' yënettsa etā ie' kanéblé Tito tā kánane blublué tso' dayé kiè Mediterráneo e' a e' et kiè Creta ee. E' ukuöki tā Pablo minea bánet tā ie' tö Tito méat e' skéie. Pablo ena Tito bak senuk e' kéwö ska' tā Creta wakpa bak senuk sulué. E' kuéki Pablo tö yëkkuö i' kit Tito a ipattoie tö se' wése kawöta shushtë Jesús mik erblökwakpa wökirpaie ena ikimukwakpaie.

Ñies Pablo tö ie' patté tö wes ie' tö wépa ké kī Jesús tté buaé kiane, esepa wöklö'wèmi. E' kíie tā Pablo tö ie' a ichè tö s'wöbla'ukwakpa kache tté wa esepa döraé s'kitö'uk.

### *Shké'wè*

<sup>1</sup> Ye' dör Pablo. Ye' dör Skököl kanè méso. Ñies ye' dör Jesucristo ttekölpa tsá e'pa eköl. Ie' tö ye' patké' wépa shukitbakitö, esepa kīmuk as ikí erblörak bua'ie ie' mik ena siwā' mokī e' kí wā ar buaé ie'pa éna. <sup>2</sup> Es ie'pa ser michoë aishkuö tā Skököl tā, e' wā paneke ie'pa tö kröröë. Skököl ké kachò tā'. Kam ká i' yör e' yöki ie' kablé' sene michoë muk se' a. <sup>3</sup> Mik kéwö me'bakitö e' de, etā ie' tö Jesucristo tté buaé e' wā kkaché sulitane a. Tté e' wā pakök ye' ka' Skököl dör S'tsatkökwak e' tö. <sup>4</sup> A Tito, ye' tso' yëkkuö i' shtök be' a. Tté mik se' böi erblöke e' wa be' dör wes ye' alà chók es. Skököl dör S'yé ena Jesucristo dör S'tsatkökwak, as e'pa er buaé chò ena sene bèrè mù be' a.

### *Wes Skéképa Jesús ichapa wökirpa ké senuk*

<sup>5</sup> Ye' tö be' méat Creta, kanè kianeia wè, e' eukwa. Ñies ye' tö be' méat ee as be' tö wépa tkòka Skéképa icha wökirpaie wé itso'rak erule erule ee Creta kos a wes ye' tö be' a iyè' es. <sup>6</sup> Wépa serke yësyësë, ké yi tö ì sulu kuépa ie'pa kī ikkatoie, esepa yuló. Esepa ké alaköl tsukwā eköl è, e' dalöiök taië. Esepa ala'r kos ké erblök Jesús mik buaé, ké kkatënuk ì kī. Esepa ala'r ké ie'pa ttò dalöiök buaé. Wépa esepa tkóka be' tö Skéképa Jesús icha erule erule wökirpaie. <sup>7</sup> Skéképa icha erule erule e'pa wökirpa dör wes Skököl kanè kuéblupa es. E' kuéki esepa ké senuk yësyësë, ké yi tö ì sulu kuépa ie'pa kī ikkatoie. Esepa ké e' ttsò tö ie'pa è wā íyi jcher taië sulitane tsata. Esepa ké dör késikie, ké e' ttöta'ka blo' wa. Esepa ké kàne ñippök yi tā. Esepa ké kàne inuköl klö'uk kache wa s'kitö'wè wa. <sup>8</sup> E' skéie ie'pa ké s'yamipa datse ie'pa pakök, esepa kiökwa er bua' wa. Esepa ttsè'r buaé ì buaé kos e' uk. Esepa ké erbikök buaé, senuk yësyësë ena batse'r ena e' kkö'nuk. <sup>9</sup> Jesús tté yësyësë wa ie'pa wöblaoule, e' a ie'pa ké e' tkökwa darërë, ké kàne ilo'yök. Es esepa tö s'malepa kimèmi Jesús tté mokī wa. Ñies wépa tö tté mokī cheke sulué, esepa a ikkayërmi tö wes ie'pa tö ibikeitseke, e' dör sulué.

### *S'wöbla'ukwakpa kache tté wa*

<sup>10</sup> Jesús mik erblökwakpa serke Creta e'pa shuā taië s'tso' ké éna Jesús tté mokī e' iutak. Ie'pa esepa kibiiepa dör judiowak tö s'wöbla'weke tö Jesús mik erblökwakpa kawöta senuk wes judiowak ser es. Tté pakeke ie'pa tö, e' ké wā tā'. Ie'pa tö s'kitö'weke. <sup>11</sup> Ie'pa mir u èt u èt s'wöbla'uk kache tté wa, es ie'pa tö u wákpa welepa tso', e' kos wöa kachöwekewa kache tté wa. Ie'pa tö s'wöbla'weke es inuköl è klö'wojie. E' kuéki ie'pa esepa kawöta wöklö'wè.

<sup>12</sup> Ká iaiaë wëm bak eköl Creta e' wā íyi jcher taië, ie' tö iwakpa yé' i' es: "Creta wakpa kachò taië kekraë. Ie'pa dör wes iyiwak kañiru es, ie'pa bikër taië, chkò taië." <sup>13</sup> Ì yé' ie'

tö, e' yëne, e' kuëki ie'pa uñú darërëë as ie'pa tö ttè mik se' erblöke e' iütò yësyësë. <sup>14</sup> Es ie'pa tö judiowak tö kache ttè pakeke kè wà ta', ese kè iütepaia. Es ñies wépa tö ttè mokië e' watéttsa, esepa ttè dalöiëno kè dalöiepaia ie'pa tö. <sup>15</sup> Wépa er maneneë, esepa a ì kos dör maneneë. Erë wépa er suluë, kè erblò Jesús mik, esepa a kè ì dör maneneë. Ie'pa er ena ie'pa erbikè dör suluë. <sup>16</sup> Ie'pa e' chò tö ie'pa bàtsë buaë Skëköl mik, erë wes iserdak sulu, e' wa iwënewa tö e' dör kache. Ie'pa dör suluë ichók, kè tö Skëköl ttò dalöierak, kè iarak ì buaë or yës.

## 2

### *Wes se' kawöta senuk Skëköl a*

<sup>1</sup> Erë be' ké s'wöbla'uk këkraë Jesucristo ttè moki wa. <sup>2</sup> Wépa këkëpatke, esepa wöbla'ú tö ie'pa ké e' kkö'nuk sene sulu yöki. Ie'pa ké senuk buaë yësyësë as sulitane tö idalöiö. Ie'pa ké erbikök buaë yësyësë. Ie'pa ké e' tkökwa darërëë ttè mik se' erblöke e' a. Ie'pa ké s'dalëritsök mokië ena ì kos dalë'ttsök er bua' wa. <sup>3</sup> Es ñies tayëpa këkëpatke, esepa wöbla'ú senuk Skëköl dalöië a. Ie'pa kè kàne blo' kukueblökwa. Ie'pa kè kàne biyöblök. E' skéie ie'pa ké s'wöbla'uk senuk buaë. <sup>4</sup> Ie'pa ké tayëpa wöbla'uk tö ikawöta imaso ena ila'rla e'pa dalëritsök buaë. <sup>5</sup> Ie'pa ké erbikök yësyësë. Ie'pa ké senuk kè trërta'. Ie'pa ké iu kanéuk buaë. Ñies ie'pa ké iwëm dalöiök buaë as kè yi tö Skëköl ttè chò suluë.

<sup>6</sup> Ñies duladulapa pattó tö ie'pa ké e' kkö'nuk sene suluë kos yöki. <sup>7-8</sup> Be' senu yësyësë ie'pa wörki as ie'pa ser wes be' ser es. Mik be' tso' ie'pa wöbla'uk, eta iwöbla'ú yësyësë er moki wa Skëköl dalöioie, es kè yi a ì sulu yërpa be' ki. Es be' bolökpa kè a ì sulu kunuk be' ki, e' kuëki ie'pa jaërdaka se' ki.

<sup>9</sup> S'tso' klöulewa kanè mésoie, esepa pattó tö ie'pa ké iwökirpa ttò kos e' iütök er bua' wa as iwërdak buaë iwökirpa wa. Ie'pa kè kàne iwökirpa iütök kësik wa. <sup>10</sup> Ie'pa kè kàne iwökirpa íy ekiblök, e' skéie ie'pa ké ì kos wekerakitö e' uk buaë yësyësë iwà kkachöie ì kos wa tö Skëköl dör S'tsatkökwak, e' ttè dör buaë.

<sup>11</sup> Skëköl tö s'tsatkè, e' watkekeitö sulitane a. Es ie' tö se' a iwà kkacheke tö ie' er buaë ché se' a. <sup>12</sup> Mik se' éna iane tö kos Skëköl er buaë ché se' a, eta kè se' éna ì sulu wamblakia wes wépa kè tö ie' dalöië esepa es. Ie'pa er me'rie ì suluë è ki. E' skéie se' erbikak buaë. Se' senak yësyësë ena batse'r ie' a wes ie' ki ikiane es, se' serkeia ká i' ki e' dalewa. <sup>13</sup> Se' tso'ia ká i' ki eta se' tso' Jesucristo datskene olo ta' taië, e' panuk, e' tö se' ttsë'weke buaë. Ie' dör S'tsatkökwak, ie' dör Se' Këköl taië e'. <sup>14</sup> Ie' e' me'ttsa ttèwa se' skéie se' yottsäie ì sulu kos e' ulà a, ñies se' er paikloie manene. Es se' de ie' wák a, es se' er de ì buaë uk këkraë.

<sup>15</sup> A Tito, ttè e' chò ie'pa a, ie'pa pattó, ie'pa uñú diché wa. Es kè yi tö be' watepattsa.

## 3

### *Wes Jesús mik erblökwakpa ulitane kawöta senuk*

<sup>1</sup> A Tito, iskà chöne ie'pa a tö ká wökirpa ena s'shkëkipa, e'pa dalöiö, ie'pa ttè iütó. Ichó ie'pa a tö a' tso' erki ì buaë kos e' woie. <sup>2</sup> Ie'pa kè kàne yi chök suluë; ie'pa ké senuk bèrë, sulitane a er buaë chök. Ie'pa ké sulitane sauk er bua' wa.

<sup>3</sup> Se' bak senuk suluë, kè kabikeitsötá' buaë, kè Skëköl ttè iüteta'. Se' bak senuk kitöoule; se' bak klöulewa ì sulu ulà a. Ì sulu kiane se' ki wamblè, ese è wamblök se' bak. Ì sulu tö se' ttsë'weke buaë, ese è wamblök se' bak. Se' bak senuk ì sulu è a. Se' bak ukyënik ñi ki. Se' sauk suluë s'malepa bak, ñies ie'pa sauk suluë se' bak. <sup>4</sup> Erë Skëköl dör S'tsatkökwak, e' er buaë ché sulitane a, ie' éna se' dalër taië, e' kkachéitö se' a Jesucristo wa. <sup>5</sup> Ie' tö se' tsatké ie' wák er wa, kè dör tö se' serke yësyësë e' kuëki. Ie' se' sué er siarë wa, e' è kuëki ie' tö se' tsatké. Skëköl tö Wiköl Batse'r mé senuk se' a, e' tö se' er paiklé mane'wé yué pa'alí. Sene pa'alí méitö se' a. <sup>6</sup> Skëköl tö iWiköl mé se' a taië Jesucristo

dör S'tsatkōkwak, e' batamik. <sup>7</sup> Skëköl tö se' klö'wé wës pë' buaë yësyësë es ie' wöa, ie' er buaë ché se' a, e' kueki. Ie' tö iwé es as se' ser michoë ie' ta. E' wà paneke se' tö kröröë, ttsë'ne buaë wa. E' kos kueki ie'pa ké senuk buaë yësyësë Skëköl a.

<sup>8</sup> Ttè ikkë dör yësyësë. Ye' ki ikiane tö be' tö ttè ikkë wa s'ki wöbla'wè taië buaë as wépa erblöke Skëköl mik, esepa tso'ie i buaë uk. Íyi ikkë dör buaë sulitane a s'kimoie buaë. <sup>9</sup> Erë be' e' skóttsa ttè tö suluë s'blabatsélor ñi yöki ese kos yöki. Pë' welepa éna s'bak ká iaiaë, esepa ditséwö ese tté pakak kekraë, esepa yöki be' e' skó. Ñies pë' welepa ñi uñuke kësik wa kekraë ttè dalöiëno mène Moisés a e' ki, esepa yöki be' e' skó ñies. Ñi uñè esepa kos kè wà ta', kè dör iie bua', kè a s'kimer i wa. <sup>10</sup> Yi tö Jesús mik erblökwakpa blabatsélor, ese wöuñú darërëë etökicha bötökicha. Kè itö iütè, eta ie' uyóttsa a' shua. <sup>11</sup> Be' wá ijcher buaë tö pë' ese er sulu'wéwa i sulu tö. I sulu wambléitö, ese tö ikichatéttsatke.

*Ttè bata yëne Tito a*

<sup>12</sup> Artemas ö Tíquico, e' eköl patkekeyö be' ska'. Mik ie' de, eta be' kawö yóttsa ta be' shkó kröröë Nicópolis wé ye' tso' ee. Ee ye' tö ibikeitsétke tskiridiö tkö'uk. <sup>13</sup> Zenas dör s'shulökwak ena Apolo, e'pa kimú buaë i kiane ie'pa ki kos e' wa, as imi'rak buaë. <sup>14</sup> Se' icha wöbla'ú buaë i kos buaë e' uk. Ñies ie'pa wöbla'ú s'siarëpa kimuk. Es ie'pa sermi buaë Skëköl wörki.

*Pablo e' chéat*

<sup>15</sup> Ie'pa kos tso' ye' ska', e'pa tö be' shké'wémi. Wépa éna sa' dalër ttè mik se' erblöke e' dalërmik, e'pa shké'ú ña. As Skëköl er buaë chö a' ulitane a.



## Yëkkuö kit Pablo tö Filemón a Filemón

Pablo tö yëkkuö i' kit mik ie' bak Roma s'wöto wé a etā. E' kēwō ska' tā ie' tö yëkkuö kit Éfeso ena Filipos ena Colosas wakpa a. Ie' tö yëkkuö i' kit iklé eköl kiè Filemón e' a. Ie' serke Colosas ee. Ie' tö kanè méso kè patuētā' ese to'ttsā eköl e' kiè Onésimo. E' ukuōki tā Onésimo tö ie' iyi blélur tā ibakshkarmi. E' kēwō ska' tā akblökwakpa ttekelur. E' kueki Onésimo bakshkarmi dò Roma. Ee Pablo tso' wötēulewā Jesús tté buaé pakè kueki. Pablo tö Onésimo a Jesús tté buaé paké tā ierblé Jesús mik. E' kueki ie' shkakmine iwökir Filemón ska' ie' a kēt kēt chökne.

E' kueki Pablo tö yëkkuö i' kit Filemón a as ie' kè ulurka Onésimo ki. Pablo tö iché Filemón a tö Jesús éna ie' dalèr taiè ena ì sulu nuí tso' ie' ki e' olo'ya itō tā iki'wā buaé. Es ñies ie' kawōtā Onésimo ki inuì olo'yök tā ikiökwa wēs iyami ekka es.

S'kiè Onésimo griegoie e' wà kiane chè kanenamé buaé. Erë yëkkuö i' tö ichè tö kam Onésimo tö Jesús tté klö'ù etā ie' kè dör kanenamé buaé. Es Pablo tso' ichök tö Jesús batamik Onésimo dòmi wēs ikiè wà kiane chè es.

### *Shke'wè*

<sup>1</sup> A Filemón, ye' dör Pablo tso' wötēule Cristo Jesús tté pakè kueki, e' tso' yëkkuö i' shtök be' a. Ye' ena s'yami Timoteo, e'pa tö be' shke'wémi. Be' dalèr taiè sa' éna, ñies be' tso' kaneblok Cristo a wēs sa' es. <sup>2</sup> Ñies sa' tö s'yamipa kiè Apia ena Arquipo, e'pa shke'wémi. Arquipo dör Jesucristo tté buaé e' tsatkökwak buaé wēs sa' es. Ñies Skékēpa Jesús icha erule daparke be' u a, e'pa kos shke'wémi sa' tö. <sup>3</sup> Skéköl dör S'yé ena Skékēpa Jesucristo, as e'pa er buaé chò ena sene bèrè mù a' a.

### *Pablo tö wéstela ché S'yé a Filemón ki*

<sup>4-5</sup> Ye' tö be' tté ttsé tö be' erblöke buaé Skékēpa Jesús mik, ñies s'batse'r malepa kos dalèr be' éna. E' kueki mik ye' ttöke Skéköl tā, etā kekraè wéstela chekeyö be' dalèrmik. <sup>6</sup> Ttè mik se' erblöke e' a be' e' tkówa buaé s'yamipa tā ñita. Ye' tso' ikiök Skéköl a tö e' wa ì buaé kos wémisö Cristo dalèrmik, e' ar be' éna. <sup>7</sup> A yami, s'batse'r malepa kos er pableke be' tö buaé, ie'pa dalèr taiè be' éna. E' tö ye' ttsé'weke buaé, ttseskua ye' er dekané.

### *Pablo tö Onésimo tté ché Filemón a*

<sup>8-9</sup> E' kueki ye' tö be' a ikiè er bua' wa tö ì kiekeyö be' a, e' wà ú. Cristo tö ye' a kawó mé be' kök iuk. Erë se' ñi dalèr taiè, e' kueki ye' tö be' a ikieke er bua' wa. Ye' dör Pablo kékēpatke tso' wötēulewā Cristo Jesús tté pakè kueki e'. <sup>10</sup> Ye' be' a ikiè tö Onésimo saüne er bua' wa. Ie' erblé Jesús mik ye' ttò wa íe wé ye' tso' wötēule ee. E' kueki ie' dör wēs ye' alá es.

<sup>11</sup> Kuaé tā ie' bak be' wā toulettsā be' kanè mésoie kè dör ìie bua' be' a, erë ì'ñe tā ie' dör buaé be' a ñies ye' a. <sup>12</sup> Ie' dalèr taiè ye' éna, erë ye' tö ie' patkémine be' a. <sup>13</sup> Ye' a tā imú e' tsūat ye' tā ye' kimoie be' skéie ye' tso'ia wötēulewā Jesús tté buaé pakè kueki e' dalewa. <sup>14</sup> Erë kè ye' éna ì wak kam be' tö ikéwō mù e' yöki. Ye' ki ikiane tö ì weke be' tö, e' übö be' wák er wa, kè dör tö ye' tö be' ké iuk e' kueki. <sup>15</sup> Isalema ie' minea be' yöki ekuölö è as idöne tso' be' tā kekraè. <sup>16</sup> Erë ie' dene e' kè dör kanè mésoie è, ie' dene be' yamiie Jesús tté wa dalèr taiè be' éna, e' dör buaé shutē kanè méso èse tsata. Ie' dalèr taiè ye' éna, erë ie' dör be' kanè méso, ñies ie' dör wēs be' èl es Jesús wa. E' kueki be' kè idalèritsök, ye' tö idalèritseke e' tsata.

<sup>17</sup> Be' tö ye' klö'wé be' yamiie Jesús mik erblé e' wa, e' tā ie' klö'ú wēs ye' wák es. <sup>18</sup> Ie' tö ilè sulu wamblé' ö be' tö ie' ña'weke ilè kueki, etā ye' ña'ú iskéie. <sup>19</sup> Ye' dör Pablo tso' yëkkuö i' shtök ye' wák ulā wa, e' wák tö ie' nuì patuēraè. Kè ye' éna ichak, erë kè be' éna

ichökwa tö ye' ttò wa be' tö Jesús tté klöq', e' kueki be' wa nuì ta'ia ye' a. <sup>20</sup> A yami, be' we'ikèyö, be' mú er buaë chò ye' a Skëkëpa Jesús dalërmik. Ye' er pabló Cristo batamik.

<sup>21</sup> Ye' wa ijcher buaë tö be' tö ye' iüteraë, e' kueki ye' tso' yëkkuö i' shtök be' a. Ye' éna iane buaë tö ì kiéyö be' a, e' tsata be' tö iweraë. <sup>22</sup> Ñies Skëköl mú tö kawö mè ye' a a' pakoie wes a' tso' ie' a ikiök es. E' kueki u yuló ye' a.

*Pablo e' chéat*

<sup>23</sup> Epafras tö be' shke'wémi. Ie' tso' wötëule ye' ta Cristo Jesús tté pakè kueki. <sup>24</sup> Ñies Marcos, Aristarco, Demas ena Lucas, e'pa kaneblöke Skëköl a ye' ta, e'pa tö be' shke'wémi ñies. <sup>25</sup> As Skëkëpa Jesucristo er buaë chò be' a.

## Yëkkuö kitule hebreowak a Hebreos

Yëkkuö i' kite Israel aleripa erblé Jesús mik e'pa a. Ñies ie'pa kiè hebreowak ena judiowak. Kè yi wà ijcher yi tö yëkkuö i' kit. Pè' wele tö ibikeitsè tö Pablo tö ikit. Wele skà tö ichè tö Bernabé tö ikit. Wele tö ichè tö Apolo tö ikit erë kè s'wà ijcher yi tö ikit. Wele tö ibikeitsè tö ikitë Roma wakpa tö Jerusalén suluo'wà e' yöki duas dabom kuryök Jesús kune'bak e' ukuöki (70 D.C.).

Israel aleripa erblé Jesús mik e' kueki e'pa bak weinuk. Ie'pa welepa éna ierblò Jesús mik e' olo'yak ta ishkakne Moisés ttè dikia. E' kueki yëkkuö i' kite ie'pa a ikimorak e' tkökwa darërë Jesús mik. S'kitökwakpa tö ie'pa wöbla'weke tö Jesús kè diché ta' ie'pa kimoie, e' kueki ie'pa kawöta ie'pa erblò imik e' olo'yök. E' kueki yëkkuö i' kite Jesús mik erblökwakpa a Jesús kkachöie ie'pa a i' es: Skököl e' kkaché se' a Jesús wa as se' éna iar buaë. Ká iaiaë ta ie' utbitu se' ta ittekölpa wa ena ibiyöchökwakpa wa ena Moisés wa, erë bataie ta iut se' ta ilà eköl è Jesucristo e' wa.

E' kúie ta ká iaiaë Skököl tö iyé'bak tö ie' kablörane Israel aleripa a. E' wà tka Jesucristo wa e' ché yëkkuö i' tö. Ñies sacerdotepa tö iyiwak jcheke Jerusalén ká bit ekké judiowak nuì olo'yoie. Iyiwak jcherke e' kè diché ta' se' nuì paiklottsà da' aie. E' kueki ie'pa tö ijcheke kekraë erë e' kè dör buaë shutë Skököl wöa. E' kueki Jesucristo kötëwà etökicha è se' nuì paiklottsà, e' je' dör buaë shutë Skököl wöa. E' kueki Jesús dör ibua'ie. E' kueki se' kawöta erblök ie' mik ena ie' è kawöta ttò iutë. I'ñeta ie' tkër Skököl wörki se' tté chök Skököl a. Ie' dör ibua'ie e' kueki Israel aleripa erblé ie' mik e'pa kè kawöta ie' olo'yök. Ie' wa iyé tö ñala yö' se' a doka ikaska'. E' kueki se' kawöta senuk e' meulettsà weinuk erblé Jesús mik e' kueki. Se' tö ie' watéttsa e' ta Skököl tö se' shuleraë wes ie' tö Israel aleripa shuli' es.

### *Skököl ut se' ta ilà wa*

<sup>1</sup> Skököl utbitu taië se' yépa bak ká iaiaë e'pa ta ittekölpa wa. Ie' utbitu ie'pa ta taië kua'ki kua'ki. <sup>2</sup> Erë i'ñe ta, mik ká i' erkewatke e' kéwö ska' ta, ie' tté se' ta iwák alà patké'itö ká i' ki e' wa. Tsawe ta ie' tö íyi ulitane yö' ilà ta ñita. Ñies ie' tö ilà tké'kabak as íyi ulitane dò ie' ulà a aishkuö ta. <sup>3</sup> Skököl Alà dör iyé olo taië e'. Wes Skököl dör e' suë ie' dör. Íyi ulitane kicha a'tser ie' wà ittè diché taië e' wa. Se' nuì paiklétttsaitö e' ukuöki ta ie' tkéka ká jaì a dalöiërta' taië Skököl ulà bua'kka.

### *Skököl Alà olo ta' taië shutë Skököl biyöchökwakpa tsata*

<sup>4</sup> E' wa iwënewa tö Skököl Alà dör Skököl biyöchökwakpa tso' ká jaì a, e'pa kos tsata. Es ñies wes Skököl tö ie' kiè iwák alà, e' dör bua'iewa wes ie' tö ibiyöchökwakpa kiè e' tsata. <sup>5</sup> Skököl yëkkuö ki itso' kitule tö Skököl tö iché ilà a:

“Be' dör ye' alà;

i'ñe yö ikkachétke tö ye' dör be' yé.”\*

Erë ttè e' kè yëule ie' wà ibiyöchökwakpa isie a. Ñies Skököl yëkkuö ki Skököl tö ilà tté ché i' es:

“Ye' tö icheraë tö ye' dör ie' yé,

eta ie' dör ye' alà.”†

Erë Skököl kè wà ibiyöchökwakpa isie tté yëule es. <sup>6</sup> Ñies mik ie' tö ilà eköl ème, e' patketetke ká i' a, eta ie' tö itté yö' i' es:

“Ye' biyöchökwakpa ulitane kawöta ie' dalöiök taië.”‡

\* 1:5 Salmo 2.7 † 1:5 2 Samuel 7.14; 1 Crónicas 17.13 ‡ 1:6 Deuteronomio 32.43

Ttè ekkè kòs kuèkì se' wà ijcher tò Skèköl Alà dör Skèköl biyöchökwakpa ulitane tsata.

<sup>7</sup> Mik Skèköl tò ibiyöchökwakpa tté cheke, eta ie' tò ichè i' es:

“Ye' tò ye' biyöchökwakpa patkeke wes siwa' batsir es,  
e'pa dör ye' kanè mésopa patkekeyö wes bö' wörkua wöñar es.”<sup>§</sup>

<sup>8</sup> Erè ie' tò ilà tté cheke i' es:

“¡A Skèköl, be' tò s'wëttseke s'blúie e' dör yöbiè!

Be' tò s'wëttseke yösyësè.

<sup>9</sup> Sene yösyësè dalër be' éna, erè sene sulu ar suluè be' éna;

e' kuèkì, ye' dör be' Kèköl, e' tò be' klò'wé ta ttsè'ne buaè méyo be' a taiè be' malepa ulitane tsata.”\*

<sup>10</sup> Nies Skèköl tò ilà tté cheke i' es:

“A Kèköl, tsawe ta be' tò ká i' yö',

ñies ká jaì ena ì kòs tso' ikì e' yö' be' wák tò.

<sup>11-12</sup> E' kòs chörawa erdawa wes datsi' nurwa ta ierwa es,

e' kòs manerdattsa wes s'datsi' mane'wè ta iwötrèwa es.

Erè be' tso'tke kenet. Be' kè manerpattsa, be' ser michoè.”†

<sup>13</sup> Skèköl tò iché ilà a i' es:

“Be' e' tkóser ye' ulà bua'kka

dò mik ye' tò be' bolökpa mérö be' klò dikia eta.”‡

Erè Skèköl kè wà ttè e' yöule ibiyöchökwakpa isie a. <sup>14</sup> Skèköl biyöchökwakpa dör wes siwa' es kè wërta'. E'pa kòs kaneblöke Skèköl a. Ie' tò ie'pa patkeke wépa tsatkërdaè, esepa kimuk. E' kuèkì ie' kè wà ttè ese yöule ie'pa isie a.

## 2

### *Skèköl Alà tté buaè e' kawötä dalöie*

<sup>1</sup> Skèköl Alà dör iyi ulitane tsata, e' kuèkì se' ké e' tkökwa darèrè ie' tté buaè moki ttsèule se' wa, e' a as kè se' mi'ne wes kanò èmi di' kì es. <sup>2</sup> Skèköl tò ittè dalöièno, e' me'atbak ibiyöchökwakpa wa se' yépa bak ká iaiaè e'pa a. Wépa kòs kè wà ttè e' dalöiène', e' nuí kì ie'pa weine wes ikawötä weinuk es. <sup>3-4</sup> Es ibak ie'pa ta, erè Skèköl Alà tté buaè, e' è wa se' tsatkèrmi, e' dör ttè bua'iewa ttè ulitane tsata. S'tsatko tté, e' tsá yö' Skèkèpa Jesús wák tò. Wépa tò ttè e' ttsè', e'pa tò iyè'ne se' a ta iwà kkachérakitö tò e' dör ttè moki. Nies ì kè or yi a ese o' Skèköl tò ie'pa wa taiè kuà'kì kuà'kì iwà kkachöie tò ì ché ie'pa tò e' dör moki. Nies Wiköl Batsè'r wa ie' tò imé se' a kanebloie buaè ie' a taiè kuà'kì kuà'kì wes ie' kì ikiane es. E' wa ie' tò iwà kkaché tò ie'pa ttè dör moki. Ttè e' wà kè dalöiène se' wa, e' ta ¿wes se' tkömishkar inuí ulà a?

### *Jesús dè'bitü se' yamiè*

<sup>5</sup> Aishkuö ta ká i' mane'werattsane Skèköl tò buaè pa'ali, e' chök sa' tso'. Skèköl tò ibikeitsbak tò ká pa'ali e' kè merpa ibiyöchökwakpa a as ie'pa dò iwökirpaie. <sup>6</sup> Kè idör es. Ie' tò ibikeitsbak tò imerdaè s'ditsö ulà a. E' dör wes itso' kitule Skèköl yökkuö kì es, e' tò ichè:

“A' Skèköl, ¿S'ditsö dör yi? ¿Iók e' ska' be' er de?

¿Wes ie'pa kì be' tkine?

<sup>7</sup> Eré ekuölö è ie'pa yö' be' tò be' biyöchökwakpa dikia diöshet tsir.

Erè ie'pa yö'bö olo ta' taiè dalöiërta' taiè.

<sup>8</sup> Ie'pa tkè'ka be' tò iyi ulitane yö'bö e' wökirie.”\*

Yökkuö e' ichè tò Skèköl tò se' tkè'ka iyi ulitane yö' ie' tò e' wökirie. “Íyi ulitane” e' wà kiane ché tò kè ì ku', e' kè ku' se' ulà a. Erè i'ñe ta kam se' tò isaüwa es. <sup>9</sup> Erè se' wà

§ 1:7 Salmo 104.4 \* 1:9 Salmo 45.6-7 † 1:11-12 Salmo 102.24-27 ‡ 1:13 Salmo 110.1 \* 2:8 Salmo 8.4-6

ijcher tö ì ché yëkkuö e' tö, e' wà tka Jesús wa. Ie' yöne s'ditsöie, e' wöanewa Skëköl biyöchökwakpa dikia diöshet tsir ekuölö è. Skëköl er buaë ché se' a, e' kueki ie' tö Jesús me'ttsa ttèwà sulitane nuì skéie. Jesús weine siarë kötèwà se' skéie, e' kueki Skëköl tö ie' kika'ka taië, tkë'ka íyi ulitane blúie dalöierťa' taië.

<sup>10</sup> Skëköl dör íyi ulitane wì, e' qos tso' ie' wa ñies ie' a. Ie' kì ikiane tö se' taië dör ie' ala'r esepa dò ie' ta ñita olo ta' taië. E' wawé ie' tö Jesucristo wa. E' kueki buaë idir ie' a tö Jesús weine kötèwà s'tsatkoie. Es ì qos kiane Skëköl kì tö Jesús tö iwè s'tsatkoie, e' wéitö sera.

<sup>11</sup> Jesús ena se' batse'wëkeitö, e'pa Yé dör eköl è, e' dör Skëköl. E' kueki Jesús dör Skëköl Alà, e' kè jaëne ichök tö se' dör ie' èlpa ena ie' kutapa. <sup>12</sup> Es itso' kitule Skëköl yëkkuö kì wé ie' tö ichè Skëköl a i' es:

“A Skëköl, ye' tö be' tté cheraë ye' èlpa ena ye' kutapa a.

Mik ie'pa ñi dapa'uke, eta ye' tö be' kikeraka ttsè wa ie'pa kukua.”†

<sup>13</sup> Ñies iskà tso' kitule Skëköl yëkkuö kì wé Jesús tö iché i' es:

“Ye' erblöraë Skëköl è mik.”‡

Ñies ichéitö:

“Íe ye' dur, wépa me' Skëköl tö ye' a ala'rie, e'pa ta.”§

<sup>14-15</sup> Se' dör Jesús icha. Erë se' dör s'ditsö è. Se' ulitane serkeia ta sulu se' suar s'duòwà yöki, e' wà se' tso' klöulewà. E' kueki Jesús yöne s'ditsöie. Ie' dè'bitu e' muktsa ttèwà se' skéie e' alokaie bé iane s'duòwà wiie e' kì. Es ie' tö se' tsatkée, se' suar s'duòwà yöki, e' ulà a. <sup>16</sup> Iwènewà buaë tö Jesús kè dè'bitu Skëköl biyöchökwakpa kimuk. Ie' dè'bitu se' dör se' yé bak ká iaiaë Abraham, e' aleripa kimuk. <sup>17</sup> E' kueki ie' yöne s'ditsöie wes se' es as ie' dò sacerdote kibiie se' tté chök Skëköl a e' wakanewëkeitö yësyësè. Ie' dör s'ditsö wes se' es, e' kueki ie' tö se' sueke er siarë wa. Ie' wák e' me'ttsa ttèwà se' skéie as se' nuì olo'yar se' kì. <sup>18</sup> Ie' weinebak ñies ie' erkiöone ì sulu wamblök, e' kueki i'ñe ta wépa erkiörke ì sulu wamblök, esepa kimermi buaë ie' a.

### 3

#### *Jesús dör Moisés tsata*

<sup>1</sup> A yamipa, a' batseo' Skëköl tö. Ie' tö a' klöo'ñak as a' dò ie' ichaie. Jesús bikeitsó bua'ie. Se' tö icheketa tö ie' dör Skëköl tteköl bua'ie ena se' sacerdote kibi mik se' erblöke e'. <sup>2</sup> Skëköl tö ie' tkë'ka kaneblök se' sacerdote kibiie e' wakanewéitö yësyësè wes Moisés tö, kanè me' Skëköl tö ie' a, e' wakaneo' yësyësè es. Qos ì kiane wè Skëköl wé a e' o' Moisés tö yësyësè. <sup>3</sup> Erë Jesús dalöierťa' taië tköka Moisés tsata wes u wák dalöier tköka u tsata es. <sup>4</sup> Se' wà ijcher tö u ulitane yué yile tö, erë Skëköl dör íyi ulitane yuökwak. <sup>5</sup> Moki Moisés kaneblè' yësyësè Skëköl wé a ikanè mésoie. Ì o' ie' tö, e' wa ie' tö ì buaë kkachera Skëköl tö aishkuö ta Cristo wa e' klea'. <sup>6</sup> Erë Cristo dör Skëköl wák alà, e' kaneblöke yësyësè se' dör wes Skëköl wé es e'pa wökirie. Ì buaë yé' Cristo tö tö idoiã se' a, e' wà panekesö kröröë ttsé'ne bua' wa kè tö ilo'yè, e' ta moki se' dör Skëköl icha.

#### *A' e' kkö'nú Skëköl kè watarttsa*

<sup>7</sup> E' kueki, ì ché Wiköl Batse'r tö Skëköl yëkkuö kì, e' wà iutó buaë. E' tö ichè i' es:

“Í cheke Skëköl tö e' ttsé a' tö i'ñe ta,

<sup>8</sup> eta kè a' er darè'ukwà iyöki wes a' yépa bak ká iaiaë es.

Ie'pa e' ka'ka e' uk kësik kësik Skëköl wöa.

Ie'pa tö ie' wöñatké' ká sir poë wé kè yi serku' taië e' ké a.

<sup>9</sup> Skëköl tö iché tö duas dökä dabom tkëyök (40),

e' dalewa ye' tö ì kè or yi a ese wé taië ie'pa se'woie, ie'pa kkö'noie,

† 2:12 Salmo 22.22 ‡ 2:13 Isaías 8.17 § 2:13 Isaías 8.18

erë ie'pa tö ye' wõñatkë' taië.

<sup>10</sup> E' kueki ye' uluneka taië ie'pa ki eta ye' tö ie'pa ché i' es:

'Këkraë ie'pa kè ki iklar tö ye' ie'pa wëttsè,

ie'pa kè senak wës ye' ki ikiane es.'

<sup>11</sup> E' kueki ye' uluneka ie'pa ki eta ye' iché

tö ie'pa kè döpaḡa wé warma ie'pa enuḡeke ye' tö ee."\*

<sup>12</sup> A yamipa, a' e' kkö'nú dö' a' isie er sulurḡa ḡa a' kè erblöia Skëköl chók e' mik ḡa a' e' batsöttsa iyöki. <sup>13</sup> E' skéie a' ñi er diché ió këkraë s'tsátkë kéwö tso'ia i'ñe ḡa e' dalewa. A' tö iú es as kè a' isie e' kitö'ù sene sulu wa ḡa a' er darerḡa Skëköl yöki. <sup>14</sup> Se' erblö Cristo mik buaë këkraë dö ibata ekkë wës kuaë es, e' ḡa mokḡ se' tso' ie' ḡa. E' kueki a' ñi er diché ió buaë. <sup>15</sup> Skëköl yëkkuö tö iché i' es:

"Ï cheke Skëköl tö e' ttsé a' tö i'ñe ḡa,

eta kè a' er darë'ukḡa iyöki wës a' yépa bak ká iaiaë es.

Ie'pa e' ka'ka e' uk kësik kësik Skëköl wöa."†

<sup>16</sup> Wépa tö Skëköl ttö ttsé' erë ie'pa e' o' ie' wöa kësik kësik, ¿e' wakpa dör yi? ¿Kè dör ie'pa ulitane yé'ttsa Skëköl tö Egipto Moisés wa, e'pa è? <sup>17</sup> ¿Yi ki Skëköl ulune dö duas dabom tkëyök (40)? ¿Kè dör ie'pa tö ì sulu wamblë' ká sir poë wé kè yi serku' e' a e'pa è? E' nuí ki idurulune. <sup>18</sup> ¿Yi a Skëköl tö ichétke: "A' kè döpaḡa wé warma a' enuḡeke ye' tö ee"? ¿Kè dör ie'pa tö ie' ttè dalöseḡ'wa e'pa è? <sup>19</sup> Es se' tö isué tö ie'pa kè erblëne ie' mik, e' kueki ie'pa kè dë'wa wé warma Skëköl tö ie'pa enuḡeke ee.

#### 4

<sup>1</sup> Ñies Skëköl kablë' se' a tö se' döwami ie' tö se' enuḡeke e' a. E' kueki e' tso'ia e' dalewa se' kawöḡa e' kkö'nuk taië dö' se' wele kè ulà a idö. <sup>2</sup> Se' a Skëköl tté buaë e' pakane wës ie'pa bak ká iaiaë, e'pa a ipakane es. Erë ie'pa kè erblëne imik, e' kueki ttè buaë ttsé' ie'pa tö, e' kè dör ìie bua' ie'pa a. <sup>3</sup> Se' erblé Skëköl mik, e'pa döraḡa ie' tö se' enuḡeke e' a. Erë wépa kè erblöku' ie' mik, esepa ché Skëköl tö iyëkkuö ki i' es:

"Ye' uluneka ie'pa ki eta yö ichétke

ie'pa kè döpaḡa wé warma ie'pa enuḡekeyö ee."\*

Ie' tö iché es, eré ie' kanè enewa mik ká i' yöne one eta. <sup>4</sup> Skëköl tö iyi ulitane yö' dö ká teröl. Ká de kul ḡa ie' eni'. Es itso' kitule wele Skëköl yëkkuö ki. E' tö ichè:

"Ká de kul eta ì kos yö'bituitö e' yöne one, e' kueki diwö e' wa ie' kè kanëblëne."†

E' kueki se' wa ijcher tö mokḡ Skëköl tö se' enuḡeke e' tso'tke. <sup>5</sup> Erë ttè kitule chétkeyö, e' ki Skëköl tö ichè:

"Ie'pa kè döpaḡa wé warma ie'pa enuḡekeyö ee."‡

<sup>6</sup> Es se' wa ijcher tö Skëköl tö se' enuḡeke e' tso'tke se' a. Erë wépa a ttè buaë e' pakane kuaë, e'pa kè dë'wa, ie'pa tö idalöseḡ'wa e' kueki. <sup>7</sup> E' ukuöki ḡa duas tka taië eta Skëköl tö ttè e' è ská pakëne se' a ì kit se' blú bak kiè David e' tö e' wa. Ttè kitule ñe' chétkeyö, e' dör i' es:

"Ï cheke Skëköl tö e' ttsé a' tö i'ñe ḡa,

e' ḡa kè a' er darë'ukḡa iyöki."

Es se' isué tö ikéwö ská mé Skëköl tö se' a as se' döḡa ie' se' enuḡeke e' a, e' kéwö dör i'ñe. <sup>8</sup> Josué tö Israel aleripa enuúpa ie' kéwö ska' ḡa, e'ma Skëköl kè wa ene ská yënene.

<sup>9</sup> E' wà kiane ché tö Skëköl tö se' enuwèmi wës ie' eni' mik ká i' yö'itö eta es, e' tso'ia wépa dör ie' icha esepa a. <sup>10</sup> Wépa dewa Skëköl ene e' a, esepa enuraë wës ie' eni' es. <sup>11</sup> E'

\* 3:11 Salmo 95.7-11 † 3:15 Salmo 95.7-8 \* 4:3 Salmo 95.11 † 4:4 Génesis 2.2 ‡ 4:5 Salmo 95.11



kuəkɪ se' ké e' diché iök shkowā ene e' a as se' kè isie tö ñe'pa kè wā Skëköl ttè iütene e'pa waköy.

<sup>12</sup> Skëköl ttè dör ttsë'ka, diché ta' taië, e' tö iwakanewëke buaë tkòka tabè kà yaule di'dië wɪ'kë iɔ'kë e' tsata. Idökewā buaë dö se' er a, se' wiköl a. Ì kōs dalërmik se' serke tso' blëule se' er a, ena ì kōs bikeitsekös, ese weblekettsaitö tö buaë idir ö sulu idir. <sup>13</sup> Se' e' chörakā Skëköl a. Ie' yöki ì kōs yö'itö e' kè a e' blënukwā. Ì kōs tso' áie ie' wörki. E' kuəkɪ se' e' tkòwā darërë ie' ttè a.

*Jesús dör se' sacerdote kibi buaë shütë*

<sup>14</sup> Se' wā sacerdote kibi tso' eköl, e' dör sacerdotepa ulitane tsata. E' dör Jesús, ie' dör Skëköl Alà. Ie' mineatke tso' ká jai a se' tté chök Skëköl a. E' kuəkɪ se' kawötā e' tkòkwā darërëe ie' ttè buaë klö'wëkesö, e' a. <sup>15</sup> Se' sacerdote kibi e' wa se' wër siarë. Mik ie' bak senuk ká i' ki, etā eré ie' ma'oule ì sulu kōs wamblök wes se' es, eré ie' kè wā ì sulu wamblëne yës. E' kuəkɪ ie' wā ijcher buaë tö is s'ttsër mik se' ma'orke ì sulu wamblök etā. <sup>16</sup> E' kuəkɪ a' shkōwā Skëköl wörki. Mik s'kimè kiane etā ikiösö ie' a, kè suar ta'. Ie' tö se' sueke er siarë wa, e' kuəkɪ ie' tö se' kimeräe er bua' wa.

## 5

<sup>1</sup> Wëpa dör sacerdotepa kibipa e'pa kōs tso' shukitule iwakpa shuā kanebloie imalepa tté chök Skëköl a. Ie'pa kanè dör iyiwak jchëule ena ilè skà merke Skëköl a, ese wakanéuk imalepa nuì olo'yoie. <sup>2</sup> Ie'pa dör wës imalepa es. Ie'pa diché kè dë'ka buaë ì sulu wöklö'woie. Ie'pa weirke siarë wës imalepa weir ì sulu ulà a es. E' kuəkɪ imalepa kè wöblaule íyi buaë wa, arkedö ì sulu a kekraë, esepa wërmi siarë ie'pa wa. <sup>3</sup> Ñies ie'pa wakpa tö ì sulu wamblëta', e' kuəkɪ ie'pa kawötā iyiwak jchök mè Skëköl a ie'pa nuì ki ñies imalepa nuì ki. <sup>4</sup> Kaneblök Skëköl a sacerdote kibiie, e' dör kanè buaë, dalöiertä' taië. Kè yi yörta' sacerdote kibiie iwák er wa. E' shüshteke Skëköl è tö ta' itkéka sacerdote kibiie wës ie' tö Aarón tkë'ka es. <sup>5</sup> E' sù Cristo kè e' tkënekā sacerdote kibiie iwák er wa e' kikoka. E' skéie Skëköl tö iché ie' a:

“Be' dör ye' alà;

ì'ñe ye' tö ikkacheke tö ye' dör be' yé.”\*

<sup>6</sup> Ttè kitule skà tö ichè i' es:

“Be' dör sacerdote kekraë wës Melquisedec ese es.”†

<sup>7</sup> Mik Jesús tso'ia ká i' ki, etā ie' kköyë' Skëköl a taië aneule wɪ'wië ië wa ì wa. Skëköl è a ie' yërmittsa duèwā ulà a, e' kuəkɪ ie' tö iki' Skëköl a tö ye' yóttsa iulà a. Ie' tö Skëköl dalöieke taië, ittè iüteke buaë, e' kuəkɪ ì kiéitö e' iüté Skëköl tö. <sup>8</sup> Eré ie' dör Skëköl Alà, eré ie' weine taië, e' wa ie' éna iane tö wës s'weir Skëköl ttè dalöie kuəkɪ. <sup>9</sup> Mik ì uk ie' patkëne e' wéitö sërāa, etā ie' de S'tsatkōkwakie. Wëpa tö ie' ttè iüteke, esepa kōs tsatke michoë ie' tö. <sup>10</sup> Ñies Skëköl tö ie' tkéka sacerdote kibiie wës Melquisedec ese es.

*A' erblöke Cristo mik, e' kè olo'yar a' tö*

<sup>11</sup> Ttè ese tso'ia sa' wā yëno taië, eré kè a' éna ianuk bet, e' kuəkɪ iwà pakè a' a e' dör darërëe. <sup>12-13</sup> Ká iaiäe a' erblë'mi Cristo mik, ikkë ta' warma a' detke s'wöbla'ukwakpaie. Eré a' skà kianene wöbla'wë Skëköl ttè tsawe tottola ese wa. A' dör wës ala'rla es kè a' chké darërë ñar, tso' tsu' è mik. Kam a' a iwër tö ì dör buaë ì dör suluë. <sup>14</sup> E' skéie chké darërë ese dör s'wöblauetke esepa a. Ie'pa a iwënetke tö ì dör buaë ì dör suluë. E' kuəkɪ ie'pa éna iane mik ta' buaë idir mik ta' sulu idir.

## 6

<sup>1</sup> E' kuəkɪ Cristo tté tsá wa s'wöblane, e' è kè chariā kekraë. E' skéie Cristo tté kí tso' taië, ese wa se' kí e' yuò as se' yör iskië wës se' kibirwā es. Kè se' kàne e' wöbla'ukne Cristo tté tsá jchertke se' wā, ese wa. Se' wā ijchertke tö s'kawötā ì sulu nuì ki s'duöwami, ese kōs

\* 5:5 Salmo 2.7 † 5:6 Salmo 110.4

olo'yök. Se' wā ijchertke tō s'kawōtā erblök Skëköl è mik. <sup>2</sup> S'wöskuè tté ena s'ulà mùka s'yamipa kī ese tté wa se' wöbلاق'netke. S'duulewā shkerdakane ena s'weir michoè ese tté jchertke se' wā. <sup>3</sup> E' kuëkī kè se' e' wöbلاق'ukīā tté ese wa. E' skéie se' kī e' yuò Cristo tté skà tso'ia ese wa. Skëköl tō ikéwō mé se' a, e' tā iwëraësö es.

<sup>4</sup> Wépa wōā ká ñine'bak Cristo tté wa, erë e'pa tō ilo'yé, e' tā wës kawö mermine ie'pa a er mane'ukne? Ì buaë mé Skëköl tō se' a, e' kak ttsëule ie'pa wā. Wiköl Batse'r dë'ñak ie'pa kī. <sup>5</sup> Ie'pa éna iane tō Skëköl tté dör buaë. Skëköl kéwö olo tā taië datske aishkuö tā, e' diché kak suule ie'pa wā. <sup>6</sup> E' kōs ttsëule ie'pa wā, e' watéttsā ie'pa tō, e' tā wës ie'pa dömine e' ska'? E' dör wës ie'pa tso'ne Skëköl Alà ttökwanë wötëwanë krus mik es. Ie'pa tso' ie' wayuök sulitane wö wa. <sup>7</sup> Se' dör wës tē es. Íyi kuatkëne iki, kalī yëne iki buaë, warma e' wà tskirmi buaë wà wörmi buaë wës iwák kī ikiane es. Tē ese a Skëköl er buaë chöraë. <sup>8</sup> Erë tē e' kī dika'chka tskine, kualkö tskine, ì tskine, e' tā e' kè dör ìie bua'. Kukur tā iwayëmarketke ì sulu a tā ñardawā.

<sup>9</sup> A yamipa dalër taië sa' éna, sa' ttöke a' tā es, erë mokī sa' iklö'wëke tō a' shköke buaë s'tsatkè ñalé kī. A' kè dör wës wépa tō Cristo watéttsā esepa es. <sup>10</sup> Skëköl dör yësyësë. A' kanëblöke buaë ie' a. A' tō s'batse'r malepa kīmeke buaë, e' wëkeia a' tō buaë. E' wa iwënewā tō mokī a' éna Skëköl dalër. E' kōs kè ska' ie' er chöpawa. <sup>11</sup> Erë sa' kī ikiane tō a' ulitane tō, ì buaë wëke a' tō, ese kī ù er bua' wa dò ibata ekkë. Es ì buaë kōs panekesö, e' wà döraë a' ulà a da'aie. <sup>12</sup> Sa' kè kī ikiane tō a' bikër. E' skéie sa' kī ikiane tō a' dò wës wépa erblöta' mokī Skëköl mik esepa es. Ì muk Skëköl kablë' se' a, e' wà panekesö enaë, e' wa iwà döraë se' ulà a.

#### *Se' erblömi Skëköl kablë' se' a, e' mik*

<sup>13</sup> Mik Skëköl kablë' Abraham a, etā ie' kè kablëne yi skà ttò wa. Ie' kablë' iwák ttò wa, kè yi ku' ie' tsata e' kuëkī. <sup>14</sup> Ie' tō iyë' Abraham a: “Mokī ye' ichè tō ye' er buaë chöraë be' a taië. Be' aleripa alöwëraëyö taië.”\* <sup>15</sup> Ttè e' wà pané Abraham tō enaë tā Skëköl kablë'ia, e' wà de iulà a. <sup>16</sup> Mokī mik se' tō tté mé yi a, etā imekesö yi dör se' tsata, ese ttò wa. Mik se' tō tté métkë es, etā tté e' kī kè ì skà ku'ia chë. <sup>17</sup> Es ñies Skëköl kī ikiane kkachè wöshak wépa a ikablë' esepa a tō mokī iwà döraë ie'pa ulà a, kè imane'wëpaneitö yës. E' kuëkī ikablë' iwák ttò wa. <sup>18</sup> Es se' éna iane buaë tō Skëköl tō ittè mé se' a iwák ttò wa, e' kè mane'wëpaneitö yës, ie' kè kachöta' e' kuëkī. Ie' tō ittè mé se' a iwák ttò wa tō se' erblöke ie' mik e'pa tsatkeraitö. E' tō se' er pableke buaë. Ttè e' wà paneke se' tō kröröë, e' a se' e' tköwā darërë kekraë. <sup>19-20</sup> Ttè e' wà paneke se' tō, e' tō se' tkéwā darërëë wës tabechka tso' kanò wöklö'woie dayë shūa es. Jesús míkane se' yöki kewe ká jaì a. Ee ie' tso' Skëköl wé kibi e' úshū batse'r taië shütë, e' a. Úshū e' kköiëule àr datsi' buririë shūkuar e' wa, e' etmik ie' tso' se' tté chök kekraë Skëköl wörki. Es ie' de se' sacerdote kibi kekraë wës Melquisedec ese es.

## 7

#### *Jesús dör sacerdote kibi wës Melquisedec ese es*

<sup>1</sup> Melquisedec bak ká kiè Salem e' blúie. Ñies ie' kanëblë' sacerdoteie Skëköl dör íyi ulitane tsata e' a. Abraham e' ali'ka blu'pa skël wā ilayök Lot minetser e'pa kī. Mik Abraham dotkene iu a, etā Melquisedec dettsā ie' ñaletsuk tā ikié Skëköl a as e' er buaë chò ie' a. <sup>2</sup> Ñies dalì kōs dë'ne Abram ulà a ñippè shūa, e' blatéitö döka dabop, e' eyök méitö Melquisedec a. S'kiè Melquisedec, e' wà kiane chë “sene yësyësë e' blú.” Ñies ie' dör ká kiè Salem, e' blú. Salem, e' wà kiane chë “sene bèrë,” e' kuëkī ñies ie' dör sene bèrë blú. <sup>3</sup> Kè se' wā ijcher tō yi dör iyé, yi dör imì, yi dör iditséwö, mik ikune ö mik idu'wā. E' kōs kè ku' kitule Skëköl yëkkuö kī. E' kuëkī se' tō ichèmi tō ie' dör sacerdote kè ertā'wa wës Skëköl Alà es.

\* 6:14 Génesis 22.17

<sup>4</sup> Ibikeitsó buaë, e' tã a' wã ijcherdaë tö Melquisedec dalöierťa' taië sacerdotepa dör Leví aleripa, e'pa kôs tsata. Abraham dör se' yé bak ká iaiäë dalöierťa' taië ese. Nippè shua ibolökpa dalì de ie' ulà a, e' blatéitö dökã dabop, e' eyök tsá méitö Melquisedec a. <sup>5</sup> Leví aleripa yé tsá dör Abraham wes Israel aleripa malepa es. Leví aleripa è meneat sacerdotepaie. Ie'pa dör Israel aleripa malepa yamipa, erë itso' kitule Moisés ttè dalöiëno, e' kî tö Israel aleripa kôs kawöta iíyi kôs blatök dökã dabop, tã e' eyök tsá muk Leví aleripa a. <sup>6</sup> Skëköl kablë' Abraham a tö ie' döraë skëképa taië. Eré Melquisedec kè dör Leví aleri, erë e' a Abraham tö iíyi tsá mé. Nies Melquisedec tö ikië Skëköl a as e' er buaë chò Abraham a. <sup>7</sup> Sulitane wã ijcher tö yi tö e' ché o'ka a, ese wák dör yi a iyëne e' tsata. <sup>8</sup> Israel aleripa tö iíyi tsá meke sacerdotepa duöta'wã esepa a. Erë Skëköl yëkkuö tö Melquisedec chë wes ie' tso'ia tssë'ka es. <sup>9-10</sup> Mik Abraham tö iíyi tsá mé Melquisedec a, etã Leví kam kur. Erë se' tö ichëmi tö Leví aleripa bak tö iíyi tsá mé Melquisedec a Abraham wa, Abraham dör ie'pa yé tsá e' kueki.

<sup>11</sup> Ttè dalöiëno me' Skëköl tö Israel aleripa a Moisés wa, e' ichë tö Leví aleripa è meneat sacerdotepaie Israel aleripa ttè chök Skëköl a as e' tö ie'pa nuì olo'yò. Erë e' mú a nuì olo'yarmi se' kî seraã, e'ma kè sacerdote ské kuã'kî kianeia. E' kueki Skëköl tö sacerdote ské patké. E' kè dör Leví aleripa e' eköl wes Aarón es. Ie' dör sacerdote wes Melquisedec ese es. <sup>12</sup> Sacerdote wésepa ské maneone kuã'kî, e' tã nies ttè dalöiëno tsá e' kawöta mane'wëttsã. <sup>13-14</sup> Sacerdote ské patké' Skëköl tö chëyö a' a, e' dör Skëképa Jesús. E' kè dör Leví aleripa eköl. Sulitane wã ijcher buaë tö ie' dör Judá aleri. Moisés kè wã ì yëule tö Judá aleripa dõmi sacerdoteie. E' kueki kè ie' aleri isie tkëulekã sacerdoteie.

<sup>15</sup> Sacerdote ské tkënekane kuã'kî wes Melquisedec ese es, e' tã se' éna iwã ane tö nies ttè dalöiëno meneat Moisés a e' maneonettsã. <sup>16-17</sup> Skëköl yëkkuö kî itso' kitule tö ie' tö Jesús a iché i' es:

“Be' dör sacerdote kekraë wes Melquisedec ese es.”\*

E' kueki se' wã ijcher tö Jesús kè tkënekã sacerdoteie ie' ditséwö wa wes Moisés ttè kî itso' kitule es. Ie' de sacerdoteie ie' ser michoë, kè duöta'wã, e' diché wa. <sup>18-19</sup> Moisés ttè dalöiëno bak kenet, e' kè a yi onuk buaë yësyësë Skëköl wöã. E' kè diché tã', kè dör ìie bua' ese woie. E' kueki ttè e' maneonettsã. E' skéie ttè pa'ali wã panekesö kröröë e' dör ibua'ie ttè këchke tsata, e' wa se' e' batsowami buaë Skëköl mik kè kî ì sulu nuì tã'ia.

<sup>20</sup> Nies mik Skëköl tö Jesús tkë'kã sacerdoteie, etã ie' kablë'ia iwák ttò wa tö ikaneblö michoë sacerdoteie. Ie' kè kablëne es sacerdotepa dör Leví aleripa, e'pa a. <sup>21</sup> Erë mik ie' tö Jesús tkë'kã sacerdoteie, etã ie' kablë'ia iwák ttò wa ttè i' wa:

“Be' dör sacerdote kekraë.

Ye' kablé be' a ye' wák ttò wa, e' kè olo'yepayö yës.”†

<sup>22</sup> Es Skëköl kablë' Jesús a, e' wa se' wã ijcher mokî tö ttè pa'ali mène se' a, e' dör bua'iewã ttè këchke mène Israel aleripa a e' tsata. Jesús wa se' wã ijcher yësyësë tö iwã suerasö.

<sup>23</sup> Nies sacerdotepa dör Leví aleripa, e'pa duöta'wã, e' kueki ie'pa kè a kaneblëne kekraë. E' kueki ie'pa ské tkëulekã taië. <sup>24</sup> Erë Jesús ser michoë, e' kueki ie' kè skéie yi tkënukkã. <sup>25</sup> Wépa kôs shkökewã Skëköl wörki Jesús batamik, esepa ttè chök ie' tso'ie kekraë Skëköl a, e' kueki ie'pa kôs tsatkërmi ie' a buaë kekraë.

<sup>26</sup> Es se' isuë tö Jesús dör sacerdote kibiie chökle. Ie' dör batse'r. Kè ì sulu ku' ikî, kè iaulekã sene sulusi wa. Ie' butsulettsã pè' sulusipa yöki. Skëköl tö ie' tkëkã ká jai a íyi ulitane tsata. Sacerdote ese kiane se' kî. <sup>27</sup> Ie' kè dör wes sacerdote kibi malepa es. Ká bit tã ie'pa kawöta iyiwak jchök mè Skëköl a ie'pa nuì kueki. E' ukuöki tã iyiwak kî jchekerakitö mè Skëköl a imalepa nuì kueki. Erë e' kôs skéie Jesús e' me'ttsã ttèwã etökicha è se' nuì patuoie, e' kè skà tköpaia. <sup>28</sup> Wépa tkëulekã sacerdotepa kibiie Moisés

\* 7:16-17 Salmo 110.4 † 7:21 Salmo 110.4

ttè wa, mokì e'pa dör wes s'malepa es, kè diché dè'ka e' kkö'nuk buaë yësyësë. Erë Moisés ttè kite, e' ukuökì ta Skëköl kablè' iwák ttò wa tö ie' alà tkërdaka se' sacerdote kibiie, e' dör se' sacerdote kibi yöbië bua'iewa yësyësë e'.

## 8

*Jesús dör ttè pa'alì me' Skëköl tö, e' wakanéukwak*

<sup>1</sup> Ì kos cheratse sa' tö e' wà dör i': Jesús tso' se' wa sacerdote kibiie. Ie' tkër dalöiërta' taië ká jai a Skëköl ulà bua'kka. <sup>2</sup> Ie' dör se' sacerdote kibi. Ie' tso' iwakanéuk Skëköl wé batse'r chökle tso' ká jai a e' a. E' kè yöne s'ditsö wa, e' yö' ie' wák tö.

<sup>3</sup> Sacerdote kibi kos tkëneká iyiwak tso' rak iwa jchè mè Skëköl a ena ì skà mekerakitö, e' wakanéuk imalepa tsatkoie ie'pa nuì ulà a. E' kuekì Jesucristo kawöta ñies ilè muk Skëköl a se' tsatkoie. <sup>4</sup> Erë ie' kè tö ikanewëku' ká i' a, iwakanewëkeitö ká jai a. Moisés ttè dalöiëno tö ichè tö Leví aleripa è tkërkami sacerdoteie. E' kuekì Jesús mú tö iwakanewëke ká i' a, e' ma ie' kè tkënuکا sacerdoteie, ie' kè dör Leví aleri e' kuekì. <sup>5</sup> Ì kanewëke sacerdotepa tö ká i' a, ese dör ibua'ie tso' ká jai a, e' kleeke ie'pa tö ká i' a. E' dör wes ibak Moisés ta es. Mik Moisés tö u yueketke Skëköl a, eta Skëköl tö iché ie' a: “Ittsó, ì kos yuó wes be' a ikkayëne Sinaí kébata a e' suë.” E' kuekì se' wa ijcher tö Skëköl wé kibi tso' ká i' a, e' dör ichökke tso' ká jai a e' klí è. <sup>6</sup> Erë Jesús tkëneká se' sacerdote kibiie, e' wakanewëkeitö buaë sacerdotepa tso' ká i' a e'pa tsata. Ñies ie' batamik ì muk Skëköl kablè' se' a ttè pa'alì wa, e' dör ibua'ie. E' kuekì ttè e' dör buaë shute ttè këchke tsata.

*Ttè tsá mène Israel aleripa a, e' kè dalöta'ia*

<sup>7</sup> Ttè tsá mène Israel aleripa a, e' mú dör wë' as Skëköl tö se' kiöwa buaë, e' ma ttè skà pa'alì kè kianukia. <sup>8</sup> Erë ie' isué tö ie'pa kè wa ttè tsá mène ie'pa a, e' wà iütëne buaë. E' kuekì itso' kitule Skëköl yëkkuö kì e' tö ie'pa chè i' es:

“Skëköl tö ichè: Aishkuö ta kawö döraë,

e' kéwö ska' ta ye' tö ttè pa'alì meraë Israel wakpa a ena Judá wakpa a.

<sup>9</sup> Ttè e' kè dör wes ttè tsá me' ye' tö ie'pa yépa bak ká iaiä e'pa a es.

Ttè e' me'yö ie'pa a mik ie'pa ulaië'yö er bua' wa ibak klöulewa Egipto e' yottsaië eta.

Erë ttè me'yö ie'pa a, e' wà kè iütëne ie'pa wa,

e' kuekì ye' tö ie'pa me'at.

<sup>10</sup> Ñies Skëköl tö ichè:

Ttè pa'alì meraëyö Israel aleripa a aishkuö ta, e' dör i' es:

Ye' ttè dalöiëno e' merdaë ie'pa er a,

ta ie'pa tö iüteraë er bua' wa iwákpa er wa.

Ye' döraë ie'pa Këköl,

ta ie'pa döraë ye' icha.

<sup>11</sup> Ie'pa kos, tsitsirpa dò këkëpa,

e'pa batsdaë ye' mik.

E' kuekì kè ikiarpaia tö yi tö iyamipa ö o'ka wöbla'weia as ibats ye' mik.

<sup>12</sup> Ì sulu kos wamblekerakitö, e' nuì olo'yeraëyö ie'pa kì,

kè ibikeitsepaiayö.”\*

<sup>13</sup> Es Skëköl tö ichè tö ttè pa'alì meraëitö se' a. E' wa ie' tso' ichök tö ttè tsá mène, e' dör këchke wöitëwa. Ì kos ianewatke këchke, e' bet ta kè iku'ia.

## 9

*Cristo dewa Skëköl wé a ká jai a se' tté chök*

<sup>1</sup> Ttè dalöiëno tsá me' Skëköl tö Israel aleripa a, e' a ttè tso' tö wes ie'pa kawöta Skëköl dalöie e' wakanéuk. Ñies ie'pa wa u tso' etkue batse'r ká i' a iwakanéwoie. <sup>2</sup> Ie'pa tö u yö'

\* 8:12 Jeremías 31.31-34

Skëköl dalöie e' wakanéwoie, e' blatérakitö böt. Úshu kewé e' kiè úshu batse'r. Úshu e' a bö'wö taloká tso' et, ñies ká' tso' et, e' kī pan meke Skëköl a, ese me'r. <sup>3</sup> Úshu skà tso' datsi' buririë shukuar, e' etmik, e' kiè úshu batse'r taië shute. <sup>4</sup> Úshu e' a ká' tso' yöule orochka wa íyi masmas ña'woie Skëköl a e'. Ñies kalkuö tkër ek, e' paiëulewá orochka wa. Kalkuö e' shua tká' tso' etk yöule orochka wa. Tká' e' a chkè me' Skëköl tö Israel aleripa a kiè maná, e' kak tso' blëule. Ñies kalkuö ñe' shua Aarón shko kéli përi tskineka, e' tso' blëule. Ñies ishua ák tak tso' böt, e' kī Skëköl tö ittè dalöieno kit. Kalkuö e' kiè Ttè Mène Ñi A Kélkuö. <sup>5</sup> Kalkuö e' bata kī Skëköl biyöchökwak pik tá' kiè kërub, e' diököl tulur böt. E' tö se' a iwà kkacheke tö Skëköl olo tso' ee. Ipik meuleka kalkuö kköshto bata kī, ee Israel aleripa nuì olo'yarke. Erë i' tá íyi ekkè kè wà pakanuktsa ye' a iskië.

<sup>6</sup> Es íyi ulitane bak kaneoule buaë Skëköl wé a, tá sacerdotepa bak shkökwá kékraë úshu batse'r e' a iwakanéuk. <sup>7</sup> Erë sacerdote kibi, e' è a kawö tso' shkowá úshu skà tso' dör batse'r taië shute e' a. Eë ie' döwami etökicha è duas wa duas wa. Mik ie' mi'kewa ee, eta ie' wá iyiwak pé mi'ke mè Skëköl a e' nuì kī, ñies ì sulu wamblé pë' malepa tö kè wà jcher ie'pa wá, ese nuì kī. <sup>8</sup> E' kos wa Wiköl Batse'r tö se' a iwà kkacheke tö úshu batse'r, e' wakaneorkeia, e' dalewa kè sulitane döpwá úshu batse'r taië shute e' a. <sup>9-10</sup> Ì kos kaneweke judiowak sacerdotepa tö ttè dalöieno tsá mène ie'pa a, e' wa, e' dör chkeie, di'yeie, se' batse'weie, ese kos dör s'pa kikkè è batse'woie. E' tö se' kimeke kam ttè manerne e' dalewa è. E' kueki ì meke ie'pa tö Skëköl a idalöie e' wakanéwoie, ñies iyiwak kos jcheke mè ie' a se' nuì kī, ese kos kè a wépa tö ie' dalöieke es, esepa erbikè pairinuk. Ie'pa ittse' tö inuì tso'ia ie'pa kī. Erë ì kos kaneweke ie'pa tö Skëköl wé a, e' tö ttè pa'alí mé Skëköl tö se' a Jesús batamik, e' wà kkacheke ì'ñe tá.

<sup>11</sup> Cristo dé'bitubak. Ie' dör se' sacerdote kibi. Ie' dör ttè buaë pa'alí me' Skëköl tö se' a e' wakanéukwak. Ie' dur iwakanéuk Skëköl wé tso' ká jai a, e' a. Skëköl wé e' kè yöne s'ditsö wá, e' kè dör wes íyi tso' ká i' a es. E' kueki Skëköl wé e' dör buaë shute itso' ká i' a e' tsata. <sup>12</sup> Etökicha ème Cristo dewá Skëköl wé tso' ká jai a e' shu batse'r taië shute, e' a tsatkoie. Ì wé ie' tö ee, e' dör wé', kè ie' mi'pane iskà kanéukne. Mik ie' dewá ee, eta kè ie' wá chibo ö baka pé mine mè Skëköl a se' nuì kī. E' skéie ie' wák kötewá e' pé mí ie' wá. Es ie' tö se' yettsa michoë se' nuì ulá a. <sup>13</sup> Wépa bak ttè kéchke dikia, esepa iane ñá, e' tá chibo pé ö baka wé'ñe pé ese sklippeke sacerdotepa tö ie'pa kī ö isalema baka alaki pupula ña'weke ese muluchka diöbléka di' wa e' sklippekerakitö ie'pa kī. Moki e' tö ie'pa pa kikkè batse'wéne paiklé. <sup>14</sup> Erë e' dör es, e' yitá buaë Cristo pé diché tá' taië iyiwak pé tsata. Skëköl Wiköl yöbië, e' batamik ie' wák e' me'ttsa ttèwá se' skéie wes iyiwak kè kī ì sulu ku' mè Skëköl a ese es. Ie' pé tö se' erbikè paiklèmi ì sulu nuì kī s'duowami ese yöki as se' tö Skëköl chók e' dalöio.

<sup>15</sup> Jesucristo dör ttè pa'alí me' Skëköl tö se' a, e' wakanéukwak. Ì sulu kos wamblé' wépa bak ttè tsá mène e' dikia e'pa tö, e' nuì ulá a ie'pa yënetsa Jesús kötewá krus mik e' batamik. Ñies e' batamik ì buaë yöbië muk Skëköl kablé' wépa klöo'bakitö as idò ie' ichaie esepa a, e' döraë ie'pa ulá a. <sup>16-17</sup> Ye' tö iwà pakè a' a i' es: Kam s'duowá e' yöki s'wöblane ì mekesö s'yamipa a, ese yëkkuö mukat. Yëkkuö e' wà kè merpa, yi tö imé ese tso'ia ttsé'ka e' dalewa. Iwak blënewá, e' è tá imermi. E' kueki s'kawöta isaukwá bua'ie tö yi tö imé, ese wák blënewatke yëkkuö e' wakanéwomi. <sup>18</sup> Es ñies ttè tsá mène, e' mène iyiwak jchëule e' pé tène ese wa. <sup>19</sup> Ttè tsá mène dalöieno, e' wà paka' Moisés tö Israel aleripa kos a. E' ukuöki tá chibo ena baka wé'ñe pé shutuékaitö di' wa. E' sklippéitö yëkkuö kī Skëköl ttè dalöieno tso' kitule e' kī, ñies e' sklippéitö Israel aleripa kos kī kal kiè hisopo e' ulatska mik datsi'tak batsë rratulewá e' wa. <sup>20</sup> E' wekeitö tá icheramiitö i' es: "Pé i' dör iwà kkachoie tö ttè mé Skëköl tö se' a e' tsá kaneonemitke." <sup>21</sup> E' sù Skëköl wé ena ì kos tso'ia Skëköl dalöie e' wakanéwoie, ñies ese kī Moisés tö pé sklippé. <sup>22</sup> Moki



ttè dalöiëno tsá mène, e' wa ta tsir etá íyi ulitane batse'wekene pé wa. Nies e' tö ichè tö iyiwak jchëule ese pé kè tëne, e' ta se' nuì kè olonuk se' kî. <sup>23</sup> Íyi tso' Skëköl wé tso' ká i' a e' a, e' dör ì tso' Skëköl wé tso' ká jaì a, e' klí è. Íyi ekkë kawöta batse'wè iyiwak jchëule mè Skëköl a, ese pé wa. Erë Skëköl wé a íyi tso' ká jaì a, e' kawöta batse'wè ì dör buaë shute iyiwak pé tsata, ese wa.

<sup>24</sup> Ì buaë e' dör Cristo. Ie' kè dë'wa Skëköl wé shu batse'r yöne s'ditsö wa tso' ká i' a, e' a. E' dör ibua'ie tso' ká jaì a, e' klí è. E' skéie ie' de ká jaì a Skëköl wé chökle e' a, ee ie' tso' Skëköl a se' tté chök. <sup>25</sup> Judiowak sacerdotepa kibipa, e'pa kawöta shkökwa Skëköl wé shu batse'r taië shute, e' a iyiwak pé muk Skëköl a se' nuì kî duas bik ekkë etökicha etökicha. Erë Jesús kè dë'wa taië wës ie'pa es. <sup>26</sup> Imú dör es, e'ma ká i' yöne dò ikkë ta, etá ie' kawöta e' muktsa ttèwa duas bit ekkë. Erë e' kè dör es. E' skéie, i'ñe ta mik ká i' erkewatke, etá ie' de e' muktsa ttèwa se' skéie etökicha è se' nuì kos paiklottsä. <sup>27</sup> Sulitane a kawö meneat duökwa etökicha è, e' ukuökî ta se' shulirdaë. <sup>28</sup> Es nies Cristo e' me'ttsa ttèwa etökicha è, se' taië e' nuì paiklottsä. Ie' skà dörane, erë e' kè dör se' nuì shulök. Ie' dörane wépa tso' ie' panuk esepa tsatkök.

## 10

### *Ttè dalöiëno kè a se' nuì pairinuktsa*

<sup>1</sup> Ttè dalöiëno mène ká iaiäe Moisés wa, e' dör ì bua'ie doia se' a Cristo batamik aishkuö ta, e' biyó yöne. E' dör wës ilo es, kè dör iwà chök. E' kuëkî ttè e' kè a wépa dökewa Skëköl ska' iyiwak jchök mè ie' a kekraë duas bik ekkë esepa batse'onuk da'a. <sup>2</sup> Ttè e' mú a ie'pa nuì pairinetttsa moki, e'ma ie'pa er kè tö ie'pa kkatempaia ta ie'pa kè tö iyiwak jchepaia mè Skëköl a. <sup>3</sup> Erë e' kè dör es. E' skéie mik ie'pa tö iyiwak jcheke mè Skëköl a duas bit ekkë, etá e' tö ie'pa er awekene ì sulu wamblekerakitö ese ska'. <sup>4</sup> E' wà dör tö se' nuì kè pairirpattsä baka wëñe pé wa ena chibo pé wa.

<sup>5</sup> E' kuëkî mik Cristo döketke ká i' a, etá ì tso' kitule Skëköl yëkkuö kî, e' chéitö Skëköl a, e' tö ichè i' es:

“Iyiwak jcheke mè be' a ena ilè skà tso' mè be' a,

e' kè kiane be' kî.

Erë be' tö ye' yueketke s'ditsöie chkà ta' diché ta'.

<sup>6</sup> Iyiwak jcheke ña'wè wa'ñe be' a

ena ilè skà tso' mè be' a nuì paikloie,

e' kè wër bua' be' wa.”

<sup>7</sup> E' ukuökî ta Cristo tö iché Skëköl a:

“A Skëköl, i' ye' dur ì kiane be' kî wè e' wöie,

wës ye' tté tso' kitule be' yëkkuö kî es.”\*

<sup>8</sup> Kewe ie' tö iché Skëköl a: “Iyiwak jcheke mè be' a ena ilè skà tso' mè be' a, nies iyiwak jcheke ña'wè wa'ñe be' a nuì paikloie, ese kos kè kiane be' kî, kè iwër bua' be' wa.” Eré ie' tö iché es, erë ese kos yë'atbakitö dalöie Skëköl ttè dalöiëno tso'tke kitule e' kî. <sup>9</sup> E' ukuökî ta ie' tö iché: “A Skëköl, i' ye' dur ì kiane be' kî wè e' wöie.” E' wa se' éna iane tö iyiwak jcheke ie'pa tö tté tsá dikia ese kos skéttsä Skëköl tö iské pa'alî mokane, e' dör Cristo kötewa se' skéie e'. <sup>10</sup> Ì kiane Skëköl kî e' wà o' Jesucristo tö. Ie' wák e' me'ttsa ttèwa se' skéie etökicha è, kè skà tteta'waia. E' kuëkî Skëköl tö se' batseo'.

<sup>11</sup> Kekraë judiowak sacerdotepa tö iwakaneweke. Ká bit ta ie'pa tö iyiwak jcheke mè Skëköl a sene sulu nuì kî. E' è kaneweke ie'pa tö taië kekraë, erë e' kè a nuì pairinuktsä.

<sup>12</sup> Erë Jesucristo e' me'ttsa ttèwa se' nuì skéie etökicha è, kè skà tteta'waia, e' ukuökî ta ká jaì a ie' tkë'ka dalöiërta' taië Skëköl ulà bua'kka. <sup>13</sup> Ee ie' tkër Skëköl e' aléka ibolökpa kos

\* 10:7 Salmo 40.6-8



ki, e' mekerö ie' klò dikia e' panuk. <sup>14</sup> Ie' e' me'ttsa ttèwà se' skéie etökicha è, e' wa wépa dör ie' icha, esepa batse'wéitö buaë ichökle Skëköl a etökicha è, kè batse'wè kianeia.

<sup>15</sup> Ñies Wiköl Batse'r tö ichè tö e' dör moki. Ie' tö iché Skëköl yëkkuö ki i' es:

<sup>16</sup> “Kawö doraë ta ye' tö ttè pa'ali meraë ie'pa a,  
e' tö ichè i' es:

Ye' ttè dalöiëno e' merdaë ie'pa er a,  
eta ie'pa tö iiuteraë er bua' wa iwákpa er wa.

<sup>17</sup> Ie'pa e' wamblö sulu kos,  
kè e' bikeitsepaia ye' tö.”†

<sup>18</sup> Es se' éna iane tö se' nuì olo'yane se' ki, kè se' kawötaia ì skà muk Skëköl a se' nuì ki.

*Se' a kawö mène shkowä Skëköl wörki*

<sup>19</sup> A yamipa, e' kueki i'ñe ta se' döwami buaë Skëköl dör batse'r taië shute e' ska', kè suarta', Jesús kötewä ipé tène taië, e' batamik. <sup>20</sup> Kè yi dötawä Skëköl wörki éanas wes kè yi dè'wä éanas Skëköl wé úshu nanetkëar datsi' buririë wa e' etmik es. Erë Jesús kötewä se' skéie e' ché datsi'ukuö jchënane e' tö. E' wa ñala pa'ali dò Skëköl ska', e' kköyë'ttsa ie' tö se' a, e' dör sene michoë e' ñalé. <sup>21</sup> Jesús dör se' sacerdote taië. Ie' dör se' dör Skëköl icha, e'pa kos wökir. <sup>22</sup> E' kueki se' shkòwä Skëköl wörki er moki wa ena erblè ie' mik yësyësè e' wa. Se' erbikè sulu e' pairiulettsa. Se' batse'ouletke, e' dör wes s'pa skuè buaë manene di' maneneë wa es. <sup>23</sup> Skëköl ttò mokjè. Ì uk ie' kablè' se' a, e' weraëitö. E' wà panekesö kröröë. E' kueki se' e' tkòwä darërè ttè e' a, kè tö ibikeitsè böt böt. <sup>24</sup> A' tö ibikeitsö tö wes a' a ñi kimermi as a' kí ñi daléritsò buaë, ñies as a' tö ì buaë kí ù taië ñi kimoie. <sup>25</sup> Se' ñi dapa'uke, e' kè olo'yar a' tö wes se' welepa wöblane iwamblök es. E' skéie a' er kí diché ió ñita. E' yita mik se' tö isué tö Skëképa Jesús datskene, e' kèwö dökewatke, eta a' er kí diché iërmi ñita.

<sup>26</sup> Ttè mokjè e' jchertke se' wä, erë e' ukuöki ta ì sulu wamblekeiasö wöbla wa, e' ta kè ì ku'ia jchè mè Skëköl a e' nuì olo'yoie se' ki. <sup>27</sup> Iwamblésö es, e' ta s'pauirke shulè wa, e' è tso' se' panuk. E' dör bö' ñarke taië wa Skëköl tö ibolökpa ewerawa e'. <sup>28</sup> Ká iaiäe yi tö ttè dalöiëno me'at Moisés tö, e' dalösewéwä ta ikkatökwakpa dör bül ö mañal, e' ta ese wák ttekewä kè ulé klöule. <sup>29</sup> E' dör es, e' ta wépa tö Skëköl Alà dalösewéwä ¿wes esepa kè weirpa taië shute? Jesús pé wa ttè pa'ali mène se' a e' wakaneone, e' pé tuè taië e' wa ie'pa batse'one, erë isuekerakitö wes se' èse pé es. Ñies Skëköl Wiköl er buaë ché se' a, e' chekerakitö suluë. ¿Wes ie'pa tkömishkar e' nuì ulà a? <sup>30</sup> Skëköl mik se' batse e' tö ichè iyëkkuö ki i' es: “Ye' è wöki iské wërke wè. Yi tö ì sulu wamblé ese ské wërayö iki.”‡ Ñies ichéitö: “Skëköl icha kos esepa shuleraë ie' tö.”§ <sup>31</sup> ;Se' arwa Skëköl chók ulà a weinuk, e' dör siarè ichók!

<sup>32</sup> Erë a' éna ianú tö mik kuaë Skëköl tö a' er ñi o' Jesús tté buaë wa, e' kèwö ska' ta pé' tö a' we'ik siarè Jesús tté buaë kueki. Erë e' kos dalé'ttsé' a' tö er bua' wa. <sup>33</sup> Mikle ta pé' tö a' yé' suluë, ie'pa tö a' we'ik siarè sulitane wörki. Mikle ta a' wák er wa a' e' ché weinuk wépa weirke es esepa ta. <sup>34</sup> Wépa wötène s'wöto wé a' Jesús tté kueki, esepa su' a' tö er siarè wa, ie'pa kime' a' tö. A' wä ijcher tö ì bua'ie kè erta'wa ese tso' taië a' wa ká jaì a, e' kueki mik pé' tö a' íyi kos yé'lur a' yöki, eta e' dalé'ttsé' a' tö ttsé'ne bua' wa. <sup>35</sup> A' kè e' ökwa a' weirke e' yöki, e' ské merdaë a' a taië, e' kueki iwöklö'ú a' tö darërè.

<sup>36</sup> A' weirke e' dalé'ttsök a' kawöta bèrè er bua' wa as a' tö iù wes Skëköl ki ikiane es, ñies as ì buaë muk a' a ie' kablè' e' mùitö. <sup>37</sup> E' dör wes itso' kitule Skëköl yëkkuö ki es, e' tö Cristo tté ché i' es:

“Wé kawöta dök e' datse kukuie,  
e' kè ki kawö tkòpa taië.

† 10:17 Jeremías 31.33,34 ‡ 10:30 Deuteronomio 32.35 § 10:30 Deuteronomio 32.36

<sup>38</sup> Erë wépa dör ye' icha serke yësyësë, esepa erblé buaë ye' mik, e' kuëki ie'pa ser michoë. Erë ie'pa wépa suanéka ta ye' ttè olo'yérakitö, e' ta kè ye' wa ie'pa wërpaia buaë.”\*

Es itso' kitule Skëkököl yëkkuö ki. <sup>39</sup> Erë se' kè dör wes wépa tö Jesús tté buaë e' olo'yé esepa es. Ie'pa weirdaë siarë aishkuö ta. Se' erblöke buaë Jesús mik, e' kuëki se' tsatkërdaë.

## 11

*Se' erblö Skëkököl mik wes këkëpa bak ká iaiaë erblé' imik es*

<sup>1</sup> Erblé Skëkököl mik, e' wà kiane chë tö se' tö iklö'wé mokië tö ì muk ie' kablé' panekesö, e' meraëitö se' a. Eré e' kè wërta' i'ñe ta, erë se' tö iklö'wé yësyësë tö iwà suerasö. <sup>2</sup> Se' yépa bak ká iaiaë, e'pa bak erblök Skëkököl mik, e' kuëki ie'pa yé' ie' tö tö ie'pa dör buaë ie' wöa.

<sup>3</sup> Se' erblöke Skëkököl mik, e' kuëki se' wà ijcher tö ie' tö íyi ulitane yö' iwák ttè wa. E' wà kiane chë tö ì kos wërta' suësö i'ñe ta, e' yöne ì kè wërta', e' è wa.

<sup>4</sup> Abel erblé' Skëkököl mik, e' kuëki ì mé ie' tö Skëkököl a inuì ki, e' dör bua'ie ì mé Caín tö, e' tsata. Abel erblé Skëkököl mik, e' kuëki Skëkököl tö ie' klö'wé wes pé' buaë yësyësë es. Nies ì mé ie' tö Skëkököl a e' wër buaë Skëkököl wa. Ie' blënewabak ká iaiaë, erë ie' erblé Skëkököl mik, e' tté pakarkeia i'ñe ta.

<sup>5</sup> Enoc erblé' Skëkököl mik, e' kuëki ie' kè blënewa. Ie' minetsër ttsë'ka Skëkököl wa, e' kuëki kè yi wà ie' nu kune. Skëkököl yëkkuö ichë tö kam Enoc mi'tser Skëkököl wa, e' yöki ie' wër buaë Skëkököl wa. <sup>6</sup> Yi isie shkawä Skëkököl wörki, ese kawöta iklö'uk tö moki Skëkököl tso'. Nies ie' kawöta iklö'uk tö wépa tö Skëkököl yuleke er moki wa, esepa ulà a iwà döraë. E' kuëki kè se' erblöku' Skëkököl mik, e' ta kè se' a ì onuk wërmi buaë ie' wa.

<sup>7</sup> Noé erblé' Skëkököl mik, e' kuëki mik Skëkököl tö ie' a iché tö ì sulu tköraë ká i' ki kè suule yi wà ese, eta ie' tö ittè iuté. Ie' tö kanö bërie yué etö, e' a ie' ena iyamipa e' è tsatkëne. E' wa ikkayëne tö imalepa ki nuì tso'. Nies sene yësyësë dõmi se' ulà a s'erblé Skëkököl mik e' wa, e' de ie' ulà a.

<sup>8</sup> Abraham erblé' Skëkököl mik, e' kuëki mik e' tö iché ia: “Be' yú ká yë'yö tö imeraë be' a e' a,” eta iütéitö. Eré ie' kè wà ijcher tö ká wé a ie' mîrö, erë bet ta ie' yéttsa iwák ká a. <sup>9</sup> Ie' erblé Skëkököl mik, e' kuëki mik ie' de ká yëne ie' a ee, eta ie' sené wes s'dami shkal ser es. Ie' sené úla yöule datsi'tak wa, ese a. Ie' alà Isaac ena itala Jacob, e'pa nies sené wes ie' es. Nies ie'pa a ká e' muk Skëkököl kablé'. <sup>10</sup> Ká bua'ie kè erta'wa bikeitsbak Skëkököl tö, yö'itö ká jai a, e' wà pané Abraham tö. E' kuëki ie' sene' wes s'dami shkal ser es, e' dalé'ttséitö er bua' wa.

<sup>11</sup> Skëkököl tö iyë' ie' a: be' alà körakä be' alaköl Sara e' ta. Eré ie' dewatke këkëpala aluë, nies Sara wake' kè döta' aläë, erë ie' iklö'wé tö Skëkököl kablé' ie' a e' weraëitö. E' kuëki diché mène ie' a alà koka. <sup>12</sup> Ie' dewatke këkëpala aluë, erë es ie' de aläë. Ilà e' wa ileripa dë'bitu taië kè shtar ekkë wes bëkwö tso' taië ö tsa'wö tso' taië dayë kkömik kè shtar es.

<sup>13</sup> Ie'pa ekkëpa kos erblé' Skëkököl mik, kè ilo'yane ie'pa wà, es ie'pa blërulune. Ká muk Skëkököl kablé' ie'pa a, e' wà kè dë' ie'pa ulà a ie'pa tso'ia ttsë'ka e' dalewa. Erë ie'pa tö iklö'wé tö iwà döraë ie'pa ulà a aishkuö ta. E' dör ie'pa a wes ilo suë kamië es. E' kuëki ie'pa tö iyë' tö ie'pa ser ká i' ki wes ká kuä'ki wakpa dami shkal es. <sup>14</sup> Wépa tö ichë es, e' wa iwënewa tö ie'pa tso'ia ká yulök iwákpa a. <sup>15</sup> Ie'pa mú tso'ia wé ie'pa manete, e' ké bikeitsök, e' ma ie'pa mi'mine buaë ká e' a. <sup>16</sup> Erë ie'pa tö ká bua'ie e' kkecheke, e' dör ká tso' ká jai a. Skëkököl tö ká e' yö'bak ie'pa a, e' kuëki Skëkököl kè jaëne tö ie' kië ie'pa Këkököl.

<sup>17-19</sup> Skëkököl kablé' Abraham a ttè i' wa: “Be' aleripa chökle, e'pa döraë Isaac wa.” Erë e' ukuöki ta ie' tö iché ia: “Isaac ttówa mè ye' a ye' dalöioie.” Ie' ki ikiane suë tö moki Abraham erblöke ie' mik, e' kuëki ie' ima'wé es. Abraham erblé Skëkököl mik, e' kuëki

\* 10:38 Habacuc 2.3-4

mok̄i ie' tō Isaac mekettsa wes Skēkōl tō ie' a iyē' es. Ie' tō ibikeitsé tō ie' tō ilà ttéwa, e' ta Skēkōl a ishkerkamine, e' kuēki ie' tō ittekewa. Erē bata ekkē ta Skēkōl tō ie' wōklō'wé. E' kuēki ichēm̄isō tō e' dōr wes Isaac kōtewa shkenekane es.

<sup>20</sup> Isaac erblē' Skēkōl mik, e' kuēki ie' tō iyē', ila'r Jacob ena Esaú, e'pa a tō aishkuō ta Skēkōl er buaē chōraē ie'pa a.

<sup>21</sup> Jacob erblē' Skēkōl mik, e' kuēki mik ie' blērkewa, e' kēwō dōketke, etā ie' tō iyē' italapa dōr José ala'r e'pa a ekōl ekōl tō Skēkōl er buaē chōraē ie'pa a. Nies Skēkōl dalōiē ie' tō ie' e' duedur ishko kéli mik e' dalewa.

<sup>22</sup> José erblē' Skēkōl mik, e' kuēki mik ie' blērkewatke, etā ie' tō iché tō aishkuō ta Israel aleripa e' yōrattsarak Egipto. Es ie' ichéat tō mik a' e' yéttsa ká i' a etā ye' nu tso' blēule e' tsúmi a' tō blèwa wé a' mīrō ee.

<sup>23</sup> Nies Moisés yé ena imì, e'pa erblē' Skēkōl mik. Mik ie' kune', etā ie'pa tō isué tō alala buaala kune. Egipto blú tō iyē' tō Israel aleripa alala kurke wēpa, e'pa kōs ttekelur. Erē Moisés yé ena imì, e'pa erblē' Skēkōl mik, e' kuēki ie'pa kē suane blu' ttē yōki. Ie'pa tō Moisés blé dōka si' mañat itsatkoie.

<sup>24</sup> Moisés talane Egipto blú duöchkeie dalōiërta' taiē. Erē ie' erblē' Skēkōl mik, e' kuēki mik ie' de kēchke, etā e' kōs watéttsa ie' tō. Ie' kē ki ikiane tō ie' kirwa Egipto blú duöchke.

<sup>25</sup> Ie' a ta weinuk wépa dōr Skēkōl icha, esepa ta, e' dōr buaē tkōka sene sulu tō s'ttsē'weke buaē ekuölō è, ese kōs tsata. <sup>26</sup> Ì buaē dōraē ie' ulà a aishkuō ta iskieie, e' è ki ie' er me'rie. E' kuēki ie' tō bikeitsé tō iweir kōs wé pairine'bitu idi' wa s'blúie e' tté ki, e' dōr buaē shute, íyi bua'buatso' Egipto ese kōs tsata.

<sup>27</sup> Moisés erblē' Skēkōl mik, e' kuēki ie' e' yéttsa Egipto, kē suane Egipto blú ulune yōki. Ie' e' tkéwa darērē Skēkōl kē wërta' e' mik kē ilo'yane ie' wa. <sup>28</sup> Ie' erblē' Skēkōl mik, e' kuēki ie' tō Israel aleripa patké Ie'pa Yépa Yērulune Egipto e' kēwō tkō'uk. Ie' tō ie'pa patké obeja pupula ttōkwa ta ipé sklippök ie'pa ukkō kōs e' mik. Ie'pa tō iwé es as Skēkōl biyöchkwak patké Skēkōl tō s'ttökulur, e' kē mi'wa u a alà wēm tsá kune, esepa kōs ttökulur.

<sup>29</sup> Israel aleripa erblē' Skēkōl mik, e' kuēki ie'pa tkami Dayē Mat shua wes íyök è ki shkē es. Erē mik Egipto wakpa mí ie'pa itōki, etā e'pa ki dayē uneka tō ie'pa kōs ttélur.

<sup>30</sup> Israel aleripa erblē' Skēkōl mik, e' kuēki ie'pa shkē ká kiē Jericó kkōiēule e' pamik dōka ká kul. E' ukuōki ta ká e' kkōiēule kōs, e' tkēnettsa iski. <sup>31</sup> Nies alakōl sulusi kiē Rahab, e' erblē' Skēkōl mik. E' kuēki mik wēpa bōl patké' Josué tō Jericó weblök bër akir, etā e'pa ki'waitō bèrē blē' itsatkoie. E' kuēki ie' kē dunewañak wépa tō Skēkōl ttē dalōsēwéwa esepa ta.

<sup>32</sup> Ye' a ikí yërmi taiē. Gedeón ena Barac ena Sansón ena Jéfté ena David ena Samuel ena Skēkōl ttekolpa kōs, e'pa kōs ttē pakarmi ye' a, erē ye' kē kawō kune i' ta ipakoie sēraa. <sup>33</sup> Ie'pa ena pē' skà erblē' Skēkōl mik wes ie'pa es, e' wa e'pa welepa e' aléka ká kuā'ki kuā'ki wakpa ki. Nies ie'pa welepa ttē dalōiēno e' wakanewé yēsýēsé. Nies Skēkōl kablē' ie'pa a, e' wà de ie'pa ulà a. Ie'pa welepa tō ma'name kkō tsatéwa. <sup>34</sup> Ie'pa welepa kē ki bö' dakaneka. Ie'pa welepa ttekwatke tabè wa, e' tsatkée Skēkōl tō. Ie'pa welepa kē diché ta', erē idiché iēne. Ie'pa welepa ñippé darērē ta ie' aléka ká kuā'ki ñippökwakpa ki. <sup>35</sup> Nies alakōlpa bak erblök Skēkōl mik, e'pa welepa dēütōpa shkenekane menene ie'pa a.

Pē' welepa skà erblē' Skēkōl mik, e'pa klō'wéwa pē' tō ta iwe'ikérakitō taiē siarē dō iduowa ekkē. Erē ie'pa erblē' Skēkōl mik, e' kē watēnettsa ie'pa wa. Ie'pa wa ijcher tō ie'pa shkerdakane aishkuō ta sēnoie buaē shute, e' kuēki ie'pa ekemine áie, e' kē kinewa ie'pa wa. <sup>36</sup> Ie'pa welepa wayōne taiē, bune siarē. Ie'pa welepa skà monewa tabechka yöule tsa'ie ese wa, es iminerak s'wōto wé a. <sup>37</sup> Ie'pa welepa ttélur ák wa. Welepa ttélur jchēulettsa shushaē. Nies welepa ttélur tabè wa. Ie'pa bak shkōk wì a dià a paiēule obeja kkuōlit ö chibo kkuōlit wa. Ie'pa dōr siarē, tōiēne siarē, weine taiē. <sup>38</sup> Ie'pa dōr buaē

shute, kè dör bua' tö ie'pa ser imalepa serke ká i' kī e' shuā. Erë ie'pa bak shkök wì a dià a ká sir poë wé kè yi serku' taië ese ska' ö kabata a. Ie'pa bak senuk siarë ákuk a ö kauk a. <sup>39</sup> Ie'pa ekképa kos erblé' Skéköl mik buaë, e' kueki ie' wa ie'pa wëne buaë. Erë ie' kablé' ie'pa a, e' wà kam mer ie'pa a, <sup>40</sup> ie' tö iskà bikeitséne bua'ie se' batamik e' kueki. Ì buaë meke ie' tö se' a aishkuö ta, e' kiane ie' kī tö ie'pa ena se', e'pa ulà a idò ñita. E' kueki kam idò ie'pa ulà a.

## 12

*A' erbló Skéköl mik wes Jesús es*

<sup>1</sup> A yamipa, se' erblöke Skéköl mik ena se' serke ie' a, e' dör wes s'tur e' aloka as ì merke sia e' dò se' ulà a es. Wépa erblé' Skéköl mik ká iaiaë e'pa durulunebak, e' dör wes ie'pa tune e' ali'kabak es. Ie'pa ekképa dör taië, e' kos erblé' buaë Skéköl mik, e' dör wes ie'pa iëne se' turke e' sauk es, tö is se' mir. E' kueki ì kos tö se' wöklö'weke ese ulà watösö. Ì sulu wamblekesö, ese dör wes tsa' mulitswā s'klò mik es, e' kueki ilo'yösö. Eta se' tunú darërè dò mik se' deka wé se' mi'kerö ee. <sup>2</sup> Se' er mùwā Jesús è kī. Se' erblöke Skéköl mik e' wërke Jesús wöki tsawe dò bataie. Ie' kötewā krus mik, e' dör jaë taië, erë e' kè kī ie' tkine yës. Ie' wā ijcher tö ie' ttsë'rdaë buaë aishkuö ta, e' kueki idalè'ttséitö er bua' wa. Ì ñe ta ie' tkërka dalöiërta' taië Skéköl tkër ikulé kī e' ulà bua'kka.

<sup>3</sup> Pë' sulusipa tö ie' we'ik taië, e' kos dalè'ttséitö. E' bikeitsó buaë as a' kè shtrirwā erblök Skéköl mik ta ilo'yè. <sup>4</sup> Mokī a' tso' ñippök sene sulu ta, e' kueki a' weirke taië, erë kam a' weir dò a' duòwā pé tär taië ekké wes Jesús es. <sup>5-6</sup> Skéköl yëkkuö kī ie' tö a' pattè wes ie' ala'r es, wësua e' chowa a' éna, e' tö iché i' es:

“A ye' alà, wépa kos dalër Skéköl éna, esepa paruekeitö.

Wépa klö'wé ie' tö ila'rie, esepa ñnekeitö.

E' kueki mik ie' tö be' parueke, eta e' kè watöktsa be' tö.

Mik be' ñnekeitö, eta kè be' erianuk.”\*

Es itso' kitule Skéköl yëkkuö kī.

<sup>7</sup> A' weirke kos, e' wa Skéköl tso' a' paruök, e' kueki e' dalè'ttsó er bua' wa. A' parueke e' wà kiane ché tö ie' tö a' sué wes ie' ala'r es. ¿Wé a' wā isuule tö alala kè parueta' iyé tö? <sup>8</sup> Skéköl kè tö a' paruè wes ila'r ulitane es, e' ta e' wà kiane ché tö a' kè dör ie' ala'r chökle, a' dör wes ñala alé es. <sup>9</sup> Mik se' bak ala'rla, eta se' yé tso' ká i' kī, e'pa tö se' parueta' ta ie' dalöie se' tö. E' dör es, e' yita buaë se' kawöta S'yé tso' ká jaì a e' dalöiök taië as sene michoë dò se' ulà a. <sup>10</sup> Se' yé tso' ká i' kī, e'pa tö se' parueta' ekuölö è wes ie'pa wa iwër buaë es. Erë Skéköl tö se' parueke se' kimoie as se' ser batse'r wes ie' es. <sup>11</sup> Mik se' padurke, eta e' kéwö ska' ta kè ittse'r buaë idalène s'mik. Erë s'wöblane iwa, e' ta s'serdaë bèrè yësyësë.

<sup>12</sup> E' kueki a' er diché ióne. A' erblöke Jesús mik, e' kè armi a' tö a' shtrine kueki. <sup>13</sup> A' shkó kekraë ttè yësyësë e' ñalé wa as a' wépa kè erblöku' buaë Jesús mik, shkökeia wes s'klò kranewā shkò es, esepa kè kí ardö, e' skéie ie'pa buarne ta ishkömi buaë.

*Skéköl er buaë ché se' a, e' kè watarttsa*

<sup>14</sup> A' e' mú senuk bèrè sulitane ta. Ñies a' e' mú senuk batse'r wes Skéköl kī ikiane es. Yi isie kè serku' es, ese kè tö Skéképa Jesús suepa. <sup>15</sup> A' ñi kkö'nú buaë as Skéköl er buaë chöke se' a, e' kè watöttsa yi tö. Yi tö iwatéttsa, ese dör a' shuā wes kalkua sulusi tskirka es. Mik ideka, eta imalepa taië sulu'wéwaitö. <sup>16</sup> A' kè kàne trënuke. A' kè kàne ì dör batse'r ese dalöseukwā wes Esaú es. Ie' dör iyé alà tsá, e' kueki iyé íyi kuò meke ie' a. Erë e' watö'ttsa ie' tö iël a chké tka' etkè, e' è skéie. <sup>17</sup> A' wā ijcher tö e' ukuöki ta ie' kī

\* 12:5-6 Proverbios 3.11-12

ikiane tö iyé mú er buaë chò ie' a wes ie'pa wöblar alà wëm tsá kune ese a er buaë chök es. E' kiéitö iyé a iè wa kköchè wa taië, erè kè wes ie' a ionukia, iwake' watënettsa.

<sup>18</sup> I'ñe ta a' kè dökü' Skëköl wörki wes ká iaiaë se' yépa dè'rö ie' ska' es. Mik ie'pa dökewatke Sinaí kébata a, eta ká ttsenewa mia ttsettseë, e' shua bö' taië ñarke kabata ki, siwa' bitsirke darërè, e' kos ttsé ie'pa tö sué ie'pa tö. <sup>19-20</sup> Duk blarke taië ttsé ie'pa tö. Ñies Skëköl ttöke e' ttsé ie'pa tö. Ì ché ie' tö ie'pa a, e' yöki ie'pa suane taië. Ie' iché ie'pa a: “Yi deka kabata i' ki, se' ö iyiwak, ese kawöta ttèwa ak wa.” Ttè e' kè dalé'ttsënik ie'pa a. E' kueki ie'pa kköché taië tö mú kè ittöia ie'pa ta. <sup>21</sup> Moki ì sué ie'pa tö, ì ttsé ie'pa tö e' tö ie'pa suawé taië. Ñies Moisés wák kköchöwéitö ta ichéitö: “¡Taië ye' painéka suane è wa!”

<sup>22</sup> Erè i'ñe ta kè idör es a' a. E' skéie a' detke kabata kè wërta' kiè Sión kébata ee, e' dör Jerusalén tso' ká jaì a e'. Ee Skëköl chök serke. Ee ie' biyöchökwakpa tso' taië, kè shtarata' ekkè, e'pa daparke ie' kikökka. <sup>23</sup> Ee wépa kos de Skëköl alà tsáie esepa tso' ñi dapa'uk ttsé'ne bua' wa. Ie'pa kiè tso' kitule yëkkuö tso' ee e' ki, e'pa shu a' dör. Ee a' detke Skëköl dör sulitane shulökwak, e' wörki. Ñies a' detke pè' bak senuk yësyësë ká i' ki, esepa ta ñita. Ie'pa yuétke Skëköl tö yësyësë, kè ì kianeia ie'pa ki. <sup>24</sup> Ñies a' detke Jesús ska', ie' dör ttè pa'alì me' Skëköl tö se' a, e' kanéukwak. Ie' kötewa ipé tène taië, e' wa se' batse'wé Skëköl tö. Ie' kötewa e' dör s'tsatkoie, e' kè dör wes Abel kötewa, e' nuí ki ièl tsaiëne es.

<sup>25</sup> E' kueki a' e' kkö'nú. Skëköl ttöke a' ta, e' kè watarttsa. Ká iaiaë wépa ta ie' ut ká i' ki, e' waté'ttsa ie'pa tö, e' nuí kè ulà a ie'pa bakyal, e' ta ¿wes se' tköyalmi i'ñe ta ie' ttöke ká jaì a e' ttò waté'ttsasö e' nuí ulà a? <sup>26</sup> Ká iaiaë mik ie' ut ie'pa ta, eta e' tö ká i' wötio' darërè. Erè i'ñe ta ie' ichè: “kawö doraë ta ká i' wötì'weraëyö etökichane, erè kè dör ká i' è, ñies ká jaì kos wötì'weraëyö.”† <sup>27</sup> Mik ie' tö iché es, eta e' wà kiane chè tö iyi kos yö'itö wötirta', ese wötì'weraëitö, skerattsaïtö as ì kè wötirta' kè erta'wa, ese è atne iskéie.

<sup>28-29</sup> Ì blúie Skëköl tso' e' a se' tso', e' kè wötirta' kè erta'wa. E' kueki wéstela chösö ie' a. Ie' dalò ta' taië wes bö' ñar taië es, e' kueki ie' dalöiösö taië suane wa, wes ie' wa iwër buaë es.

## 13

### *Wes Jesús mik erblökwakpa kawöta senuk*

<sup>1</sup> A' ñi dalëritsó buaë kekraë ñi èlpaie, kè ilo'yar.

<sup>2</sup> Yi kè suule a' wa, ese de a' u a, eta ikiöwa buaë. Welepa tö io' es eta Skëköl biyöchökwakpa dè'wa ie'pa u a, erè e' kè ane ie'pa éna. E' kueki kè a' éna ichökwa s'malepa kiökwa buaë a' u a.

<sup>3</sup> S'yamipa tso' wötëule s'wöto wé a, esepa kimú wes a' wákpa tso' wötëule ie'pa ta ñita es. S'yamipa welepa weirke Jesús ttè kueki, eta a' tö ibikeitsó wes a' wákpa weirke es.

<sup>4</sup> S'senewabak e' ttè dalöiö. Wépa tö ttè e' dalösewéwa trè wa ì wa esepa wömerattsa weinuk Skëköl tö. E' kueki kè a' trënik yës. Kè a' tö s'senewabak dalöseukwa.

<sup>5</sup> Kè a' er mukwa inuköl ki yës. Skëköl tö iyë'bak i' es: “Ye' kè tö be' mepaät yës, ye' tö be' kkö'nè michöë.”\* E' kueki ì tso' a' wa, as e' tö a' ttsé'ù buaë. <sup>6</sup> Se' erblöke Skëköl mik, e' kueki kè se' suane ì yöki. Se' tö ichèmi wes itso' kitule Skëköl yëkkuö ki es, e' tö ichè: “Skëköl dör ye' kimukwak,

e' kueki ì wëmi s'ditsö tö ye' ta, e' kè yöki ye' suane.”†

<sup>7</sup> A' wökirpa bak a' wöbla'uk Skëköl ttè wa, e'pa ska' a' er anúne. Wes ie'pa bak senuk kos ena wes ie'pa blënewa, e' bikeitsó buaë ta a' erbló Jesús mik wes ie'pa es. <sup>8</sup> Jesucristo kè manerta'. Wes ie' dör ká iaiaë, es ie' dör i'ñe, ñies es ie' doraë aishkuö ta kekraë. <sup>9</sup> E'

† 12:26 Hageo 2.6 \* 13:5 Deuteronomio 31.6 † 13:6 Salmo 118.6-7

kuęki kè a' e' muktsa e' kītō'uk ttè kuā'ki kōs kè dör Jesús tté mokī ese wa. Ttè dalöiëno wele tö ichè tö chkè wésele kè katar. Ttè ese kōs kè dör iie bua' se' er diché ioie. Wépa tö ttè ese dalöieke, e' kè tö ie'pa kīmpa. Erë Skéköl er buaë chōke se' a, e' je' tö se' er diché ièmi buaë.

<sup>10</sup> Sacerdotepa bak ka' tso' íyi moka Skéköl a e' wakanéuk, e'pa a kawō mène iyiwak ña'wekewa ka' e' kī ese chkà kak katök. Erë se' erblöke Jesús mik, e' dör wes ka' ñe' wakanewekerakitō es, ie' wa se' tsatkërmi. Erë wépa tso'ia erblök ka' ñe' mik, esepa kè a e' tsatkënu. <sup>11</sup> Iyiwak jchök sacerdote kibi bak duas bik ekkè nuì olo'yoie, ese pé tsukmi ie'pa bak Skéköl wé shū batse'r taië shūtę ee. Erë iyiwak ese nu ña'ukwa ie'pa bak ie'pa ká döwa e' wishę. <sup>12</sup> Es ñies Jesús kötewa Jerusalén kköiëule e' wishę se' batse'woie ipé wa. <sup>13</sup> E' kuęki kè se' erblöia judiowak ttè dalöiëno e' mik. Mishka bánet Jesús ta weinuk jaënu wes ie' weine jaëne es. <sup>14</sup> E' wà dör tö ká i' a kè se' wa ká ta' wes Jerusalén es. E' skéie ká yöbië doia aishkuō ta, e' panuk se' tso' kröröë. <sup>15</sup> E' kuęki Skéköl kikōkasō kekraë Jesucristo batamik. E' dör buaë wes iyiwak jchësö mè ie' a idalöioie es. E' kuęki ikikōkasō s'wák kkō wa. <sup>16</sup> Kè a' éna ichökwa i buaë uk ena ñi kīmuk. E' dör buaë ñies wes íyi mekesö Skéköl a es. A' tö iwé es, e' ta' e' wër buaë ie' wa.

<sup>17</sup> A' wōkirpa wōñirke taië a' kkö'nè batamik. Ie'pa éna iane tö e' kī ie'pa chakerane Skéköl tö. E' kuęki ie'pa ttò iutó ena idalöiö. E' ú as ie'pa ttsë'ù buaë ikanè tö, kè kköchökü'. A' kè tö iwé es, e' ta' e' kè dör buaë a' a.

<sup>18</sup> A' tö ikió Skéköl a kekraë sa' kī. Sa' wa ijcher tö sa' er kè tö sa' katekü' i kī. Kekraë sa' e' ché senuk buaë yësyësë. <sup>19</sup> Ñies ye' kköchò a' a tö a' ikió Skéköl a as ie' tö ye' a ikéwö mù tö ye' mi'ne bet a' weblök.

#### *Yëkkuö shtökwak e' chéat*

<sup>20-21</sup> Skéköl dör sene bèrë mukwak e' tö Skékëpa Jesús shkeo'kane. As ie' tö i kōs kiane a' kī senioie wes ie' kī ikiane es, e' mù a' a. Ñies i wër buaë ie' wa as ese kōs uk ie' tö a' kò Jesucristo diché wa. Jesús tö ttè pa'alī yöbië mène se' a, e' kaneo' ie' pé wa. Ie' dör se' kkö'nukwak kibiie. ¡Cristo kikōkasō taië kekraë! Es e' idir.

<sup>22</sup> A yamipa, ttè böt mañat i' shtéyö a' pattoie, e' mú klö'ù a' tö er bua' wa. <sup>23</sup> Ñies ye' kī ikiane tö a' wa ijchenú tö s'yami Timoteo bak wötëule, e' yënettsane. Ie' de bet ye' ska', eta ye' wa ie' mi'ke e' ta' mik ye' mi'ke a' weblök eta.

<sup>24</sup> A' wōkirpa kōs ena s'batse'r malepa kōs shke'ú ña. Ñies s'yamipa dör Italia wakpa tso' ye' ta, e'pa tö a' shke'wémi.

<sup>25</sup> As S'yé er buaë chò a' ulitane a.



## Yëkkuö kit Santiago tö Santiago

Yëkkuö i' kit Santiago tö. Welepa tö ibikeitsè tö ie' dör Jesús ël eköl. Ie' bak senuk Jerusalén ena eë ie' bak Jesús mik erblökwakpa wökirie. Ñies mik Jesús ttekölpa tsá ena Jesús mik erblökwakpa wökirpa malepa e'pa ñi dapaq' Jerusalén Pablo kanè pakoie, etä Santiago tso' iwökirie (Hechos 15 saú). Mateo 13.55,56 tö Jesús ëlpa ena ikutapa e'pa chë.

Israel aleripa erblë' Jesús mik esepa taië bak senuk ká bánet kuá'kí kuá'kí a o'kapaie. E'pa a Santiago tö yëkkuö i' kit. Yëkkuö i' kit ie' tö kabene kuá'kí kuá'kí cheke erë e' yöki ie' tö iché: Mik se' serkeia ká i' kí etä se' weirdaë Jesús mik erblë kuëki, e' wa Skëköl tö se' kimeke senuk yësyësë ie' a. E' kuëki kè se' kàne tkinukwä se' weirke e' wa. Se' ké ttsë'nuk buaë mik s'weirke etä. Es Santiago tö iché.

E' kíie tã ie' tö iché wës se' serke ena ì weke se' tö, e' wa iwënewä tö mokí se' erblöke Jesús mik ö au. Wës se' tö s'malepa suëke e' dör ibua'ie. S'siarëpa kí Skëköl tkirke ena ie' wöä tã sulitane dör ñies. E' kuëki kè se' kàne inuköl blúpa sauk bua'ie s'siarëpa tsata.

E' kíieta Santiago tö iché tö inuköl blúpa tö s'siarëpa watëttsä ena kè ipatuë buaë, esepa kí taië kabene tso' S'yé wöä, e' tö iwe'ikeraë s'siarëpa we'ikè e' nuí kí.

### Shke'wè

<sup>1</sup> Ye' dör Santiago. Ye' dör Skëköl ena Skëképa Jesucristo, e'pa kanè méso eköl. Ye' tso' yëkkuö i' shtök a' dör Skëköl icha\* e'pa a. A' shke'wëmiyö.

### S'weirke kos e' dalë'ttsösö

<sup>2</sup> A ye' yamipa, mik ì sulu tköke a' tã tsakië a' ma'woie, etä a' ibikeitsó: “¡Ayëcha buaë ye' ta!” <sup>3</sup> E' wà dör tö a' wä ijcher tö mik se' erblöke Skëköl mik e' ma'orke, etä e' tö se' kimeke e' tkökwa darërëë. <sup>4</sup> E' kuëki a' e' tkówa darërëë erblök Skëköl mik, kè ilo'yar as a' er kurwä buaë darërëë wës ie' kí ikiane es, kè ì kiarpaia a' kí ie' wöä.

<sup>5</sup> Erë a' welepa kè éna iane tö ì dör bua'ie wè, e' tã ikió Skëköl a tã ie' tö a' kimeräé as a' éna iwà ar buaë. E' kiésö ie' a, e' kè tö ie' tsiriwè. Ie' tö ì buaë meke sulitane a taië kè erta'wa ekkë. E' kuëki ikió ie' a. <sup>6</sup> Erë mik a' tö ilè kié ie' a, etä a' erbló darërëë ie' è mik, kè ibikeitsar bötböt. Yi ibikeitséka bötböt, ese dör wës dayë uyè siwa' tö wì a dià a es, kè merta'wä bèrë. <sup>7-8</sup> Yi dör es, ese erbiköke bötböt kekraë, kè erbikò etkëme. E' kuëki ese kè tö ibikeitsök tö Skëköl tö ì mèmì ie' a.

<sup>9</sup> S'yamipa siarëpa erblöke Jesús mik, esepa ttsë'nú buaë shute, Skëköl tö ie'pa tkéka pë' taië ie' a e' kuëki. <sup>10</sup> Es ñies s'yamipa inuköl blúpa erblöke Jesús mik, esepa ttsë'nú buaë shute, Skëköl tö ie'pa wöéwa diöshet e' kuëki. Ie'pa tã itköraë wës ma'ma wörkua es. <sup>11</sup> Mik diwö deka ba'baë, etä e' tö ma'ma wörkua alabëwéwä anewa, kè wëria buaë wës kuaë es. E' suë itköraë inuköl blúpa tã, ie'pa íyi tso' taië, e' shua iblërdawarak.

<sup>12</sup> Wépa ma'orke e' dalë'ttsekerakitö er bua' wa, ayëcha buaë esepa. Ie'pa dettsä buaë, e' tã sene michoë merdaë ie'pa a iskieie. E' muk Skëköl kablë' wépa éna ie' dalër esepa kos a.

<sup>13</sup> Mik yi erkié ì sulu wamblök, e' tã kè ichar: “Skëköl tö ye' erkiöwé ì sulu wamblök.” Kè yi a Skëköl erkinuk ì sulu wamblök. Ñies Skëköl kè tö yi erkiöwëpa ì sulu wamblök. E' kuëki kè yi kàne ichök: “Skëköl tö ye' erkiöwé ì sulu wamblök.” <sup>14</sup> E' skéie, se' wák dër suluë, e' tö se' erkiöwëke ì sulu wamblök tã sulu se' éna iwamblak. <sup>15</sup> E' ukuöki tã iwawamblésö. E' ukuöki tã se' wöblanewatke ì sulu è wamblök, e' nuí kí s'duörawä.

\* 1:1 a' dör Skëköl icha: Griegoie ttè i' dör: ditséwö dabom eyök kí böi bakyalmi ká wa'ñe.

<sup>16</sup> A yamipa dalër taië ye' éna, kè a' e' kītō'uk. <sup>17</sup> Ì kōs dör buaë yësyësë tso' se' wa, ese meke se' a' S'yé tso' ká jai a, e' tö. Ì kōs dalöburke ká jai a, e' yö' ie' tö. Íyi ekkë kōs e' olo maneorta'ne, erë ie' kè e' mane'uta'ne. Ie' wák dër buaë yësyësë kekraë. <sup>18</sup> Ie' wák er wa, ie' tö ibikeits se' er mane'uk pa'alī ie' ala'rie, se' tö ie' ttè moki klö'wé e' batamik. Ie' tö iwé es as se' dō íyi kōs yö' ie' tö ese tsá bua'ie.

### *Skëköl ttè iütösö*

<sup>19</sup> A yamipa dalër taië ye' éna, ye' ttò ttsó. Mik yile ttöke a' ta, eta ikukuebló bua'ie, kè iütar bet ena kè a' ulunukka bet. <sup>20</sup> Se' ulur e' kè tö se' kè senuk yësyësë Skëköl wörki. <sup>21</sup> E' kuëki e' ya'we kōs ena ì sulu skà tso' taië, ese kōs watóttsa uyóttsa a' tö serea. E' skéie Skëköl ttè tso' se' er a, e' klö'ú, e' wà iütó bèrë er bua' wa. Ttè e' tkëule a' a' wës íyi kuatkèsö es. Ttè e' a' a' tsatkërmi.

<sup>22</sup> Erë kè a' tö Skëköl ttè kīttsar kukuò è wa, iwà iütó mokië. A' kè tö iwè es, e' ta a' e' kītō'uke. <sup>23</sup> Yile tö Skëköl ttè ttsé kukuò è wa, erë kè itö iwà iütè, e' ta ese dör wës wëm e' saü wösu wa es. <sup>24</sup> Ie' e' sué wösu wa ta imía, erë bet iéna ichowa tö ì suéitö iwö ki. Ta jiók ie' e' wö sué? <sup>25</sup> Erë yi er me'rie ttè dalöiëno yësyësë tso' s'yottsä ì sulu ulà a' e' ki, ta e' a' ie' tkökewā darërëe ena iwà iutekeitö buaë, kè ichöta'wa iéna, ese a' Skëköl er buaë chöraë ì kōs wëkeitö e' a.

<sup>26</sup> Yi e' bikeitsò tö ie' dör Skëköl dalöiökwa mokië, erë kè ikkò ki ì sulu blértā'wā chë, e' ta ese e' kītō'uke siarë. Ie' e' bikeitsò tö ie' dör Skëköl dalöiökwa, erë e' dör kache, kè wà ta'. <sup>27</sup> Erë Skëköl dör S'yé, e' wōā wépa tö ie' dalöieke yësyësë, kè ì sulu ta', esepa tö jchu'rlapa ena alakōlpa schōpa weirke siarë, esepa kimeke. Nies ie'pa kè e' ia'uta'ka ì sulu tso' ká i' a' ese wa.

## 2

### *Sulitane dalöiösö ñikkëe*

<sup>1</sup> A yamipa, se' erblöke Skëképa Jesucristo olo ta' taië e' mik, esepa ké sulitane sauk ñikkëe. <sup>2-3</sup> Iwà kkachekeyö a' a' i' es: ichösö tö wëm inuköl blú debitu eköl wé a' ñi dapa'uke ee, paiëule buaë datsi' bua'buwa wa, ñies ula'tsio iéitö dalölöe. E' kiéwā a' tö weshke ta ishke'wé buaë ta iché ia: “be' e' tkóser íe kula' buaë i' ki.” E' wōshā ta s'siarë debitu eköl datsi' nula sulu dó è ta a' tö ichè ie' a: “Be' e' duódur see ö be' e' tkóser iski.” <sup>4</sup> A' tö iwé es, e' ta a' e' wamblò suluë. A' er suluë, e' kuëki a' kè tö s'dalöieta' ñikkëe.

<sup>5</sup> A yamipa dalër taië ye' éna, ye' ttò ttsó: wépa dör siarë ká i' a' esepa shukitbak Skëköl tö as ie'pa dō erblè ie' mik e' blúie. Nies ie'pa shukitbakitö as idörak wépa blúie ie' tso' e' kúie wës ie' kablé' wépa éna ie' dalër esepa a es. <sup>6</sup> Erë ie'pa dalösewékewā a' tö. E' skéie inuköl blúpa sueke a' tö buaë dalöieke taië, erë esepa tö a' we'ikeke siarë. Ie'pa wā a' mi'ke kkatè s'shulökwakpa wörki. <sup>7</sup> A' dör Jesucristo icha erë inuköl blúpa tö ie' cheke suluë. ¿Wës esepa dalöiëmi a' tö s'siarëpa tsata?

<sup>8</sup> Skëköl ttè dalöiëno bua'ie kitule iyëkuö ki, e' tö ichè, “A' malepa dalërītsó wës a' wákpa e' dalër es.”\* Ttè e' wà iüté a' tö moki, e' ta e' dör buaë. <sup>9</sup> Erë a' kè tö sulitane suë ñikkëe, e' ta a' tso' ì sulu wamblök. E' wa a' tso' ttè dalöiëno bua'ie e' dalöseukwā. <sup>10</sup> Yi tö ttè dalöiëno e' dalöieke iekkë ta serea, erë e' et dalösewéwaitö, e' ta e' dör wës ie' tö ttè kōs dalösewéwā es. E' nuí kōs ane ie' ki. <sup>11</sup> E' wà dör tö Skëköl tö iyë: “kè a' kawö ta' s'senewābak dalöseukwā,” ñies e' wák tö iyë: “kè a' kawö ta' s'ttökwa.” Kè se' wā s'senewābak dalöseonewā, erë s'ttéwasö, eta e' wa se' ianewā ttè dalöiëno e' dalöseukwāwak. <sup>12</sup> Ttè e' me'at Skëköl tö se' tsatkoie se' er sulu e' yöki. Ttè e' wa ie' tö s'shuleraë aishkuö ta. E' kuëki a' ttó, a' senú wës ttè e' tö ichè es. <sup>13</sup> Kè sö s'malepa suë er siarë wa, e' ta mik se' shulirketke, eta Skëköl kè tö se' suepa er siarë wa. Erë s'malepa suëkesö er siarë wa, e' ta idörattsa buaë se' a' mik se' shulirketke eta.

\* 2:8 Levítico 19.18

*Ì buaë wésö s'malepa a e' wa iwënewa tö mokì se' erblöke Skëköl mik*

<sup>14</sup> A yamipa, yi e' chò: “ye' erblöke Skëköl mik”, erë ese kè tö ì buaë wëku' s'malepa kimoie iwà kkachoie, e' ta ie' e' chò es, e' kè dör ìie bua'. ¿Wes ie' tsatkërmi? <sup>15</sup> E' wà kkachekeyö a' a i' es: ichòsö tö s'yami eköl, wëm ö alaköl, ese tso' siarë, datsi' kè ta', chkwö kè ta', <sup>16</sup> etä a' wële tö iché ie' a: “Be' shkó wöbla wa, Skëköl be' kimè. Be' e' paió buaë, be' chkó buaë.” A' tö iché ie' a es, erë ì kiane ie' ki e' kè mène a' wa ie' a, e' ta e' wa ¿ì buaë wé a' tö? <sup>17</sup> Es ñies se' e' chò tö se' erblöke Skëköl mik, erë se' kè tö ì buaë wëku' s'malepa a iwà kkachoie, e' ta se' e' chò es, e' kè dör ìie bua'.

<sup>18</sup> A' wële tö ichèmi ye' a: “ye' tsatkërdaë ye' erblöke Skëköl mik e' è batamik.” A' wële skà tö ichèmi ye' a: “ye' tsatkërdaë ì buaë wëkeyö e' è batamik.”

Ye' tö ie'pa iutèmi i' es: S'erblöke Skëköl mik ena ì buaë wëkesö, e' mir ñita. Se' kè wa ì buaë one, e' ta kè se' a iwà kkayënuuk tö se' erblöke Skëköl mik. Erë se' tö ì buaë wëke, e' ta e' wa se' tso' iwà kkachök tö mokì se' erblöke Skëköl mik. <sup>19</sup> Se' e' chò tö iklö'wésö tö Skëköl dör eköl ème, etä e' dör buaë. Erë ñies aknamapa tö iklö'wé es, etä e' tö ie'pa suawëkeka painuwëkeka taië.

<sup>20</sup> Kè a' senuk wes kè se' er ta' es. A' éna iwà anú tö yi e' chò tö ierblöke Skëköl mik, erë kè itö ì buaë wëku', e' ta ie' chò es e' kè dör ìie bua'. <sup>21</sup> Se' yé bak ká iaiäe kiè Abraham, e' tö ilà kiè Isaac, e' méka ka' yö'itö íyi moka Skëköl a e' ki ttëwa ña'wëwa wes Skëköl tö iuk patké' es. Mokì ie' mí e' wà uk erë Skëköl tö iwöklö'wé. Skëköl tö isué tö mokì ie' mí ittò wà iutök. E' kuëki ie' tö iklö'wé wes wëm yësyësë es. ¿E' kè jcher a' wa? <sup>22</sup> Es a' éna iarmi tö mokì ie' erblé Skëköl mik. Ie' tö Skëköl ttò wà iuté, e' tö iwà kkaché tö mokì ie' erblé imik. <sup>23</sup> Es ì tso' kitule Skëköl yëkkuö ki e' wà ane se' éna, e' tö ichè: “Abraham erblé Skëköl mik, e' kuëki iklö'wéitö wes pè' buaë yësyësë es.”† E' kuëki ie' kine Skëköl sini'. <sup>24</sup> Es se' wa ijcher tö Skëköl tö se' klö'wé wes pè' buaë yësyësë es, ì buaë wëkesö iwà kkachoie tö se' erblöke ie' mik ese batamik. E' kè dör tö se' erblöke ie' mik e' è batamik.

<sup>25</sup> Es ñies ibak ká iaiäe alaköl trër taië kiè Rahab, e' ta. Josué tö wëpa patké Jericó weblök tö wes iulà dòmi iska'. Ká e' a e'pa kiéwa Rahab tö buaë ie' u a itsatkoie. E' ukuöki ta ie' tö ñalä kuä'ki kkaché ie'pa a as e' wa itköshkardak. Es ie' tö iwà kkaché tö ie' erblé Skëköl mik. E' batamik Skëköl tö ie' klö'wé wes alaköl yësyësë es.

<sup>26</sup> Mik se' duowa, etä se' wiköl míä ta s'nu è atë. E' sù mik se' e' chò tö se' erblöke Skëköl mik, erë kè ì buaë wëku'sö iwà kkachoie, e' ta se' e' chò es, e' dör wes s'nu es, kè dör ìie bua'.

### 3

*S'kkò paklòüsö as kè sò ì sulu chò*

<sup>1</sup> A yamipa, a' wa ijcher tö sa' wëpa tso' a' wöbla'uk Skëköl ttè wa, esepa chakeraë aishkuö ta Skëköl tö taië s'malepa kè dör s'wöbla'ukwakpa esepa tsata. E' kuëki kè a' e' yuökka s'wöbla'ukwakpaie taië. <sup>2</sup> Sulitane tö ì sulu wamblëta' taië. Erë wé kè tö ì sulu chëta' yës, ese dör buaë yësyësë. Ie' a e' wöklörmi as kè itö ì sulu qos wamblö. <sup>3</sup> Kabaio diché taië, erë ikkò payuekewasö tsa'ukuöla wa ta iwëttsëmisö wes se' ki ikiane es. <sup>4</sup> Ñies kanò blubluë shköke dayë ki, ese bikeitsó. E'pa dör bërie, e' uyëke siwa' tö darërëë, erë ñakoie e' dör tsirlala, e' wa ñakökwa tö ñakeke buaë dò wé ie' ki ikiane tö imi' eë. <sup>5</sup> Es s'kkò dör tsirlala, erë e' a ì taië wamblërmi wes bö'wö tsir tö tē taië ña'wëwa es. <sup>6</sup> S'kkò dör wes bö' es, e' dör ì sulu chók tso' se' a. Se' tso'ia ttsé'ka, e' dalewa e' tö se' wák qos e' sulu'wëkewä kekraë wes bö' s'ña'wë es. Bö' e' datse bö' ké a. <sup>7</sup> Iyiwak ulitane urutërmi se' a. Iyiwak kañiru qos, dù, tkabè, ñies ì tso' dayë a, e' qos urutöoule se' wa. <sup>8</sup> E' skéie kè yi a ikkò paklönuk as kè itö ì sulu chò. S'kkò a ì sulu dökëttsa kekraë, kè wöklör se'

† 2:23 Génesis 15.6

a. E' tō s'sulu'weke wes kapōli sulusi tō s'ttèwā es. <sup>9</sup> S'kkò wa se' tō Skèköl dör S'yé e' kikekēkə e' è wa se' alibchōke s'malepa yō'itō wes ie' wák es e'pa kī. <sup>10</sup> Se' er buaë chōke, se' alibchōke s'kkò e' è wa. A yamipa, kè se' kàne e' wamblök es. <sup>11</sup> ¿Wé a' wā isuule tō di' tum etkè a yēri tskirke ena di' sēsē tskirke? <sup>12</sup> A' wā ijcher buaë tō higo klò kè wōrta' olivoie ö uva kicha kè wōrta' higoie. A yamipa, es ñies di' sēsē ena yēri kè tskirkū' di' tum etkè a.

*Skèköl siwé moki, e' tō se' ké senuk yēsyesē*

<sup>13</sup> A' wēlepa e' bikeitsō tō a' wā siwā' meke Skèköl tō e' jcher taiē iwà ane buaë a' éna, e' tā e' wā kkachó sene yēsyesē e' wa. A' senu kè e' ttsōta'ka wes wépa wā siwā' yēsyesē jcher esepa ser es. <sup>14</sup> Erē a' ukyērkeia ñita, a' kköwērkeia ñita, ese tso'ia a' er sulu'ukwā, e' tā kè a' e' ttsökka tō a' wā siwā' yēsyesē jcher. A' e' ttsōka es, e' tā a' tso' kachök. <sup>15</sup> Siwā' ese kè mēne Skèköl tso' ká jaì a e' wā. E' dör siwā' tskirke ká i' kī s'ditsō er a ese. E' meke se' a bé tō. <sup>16</sup> Mik se' ukyērke kköwērke ñi tā etā ee taiē se' ñi chiliuke, ee ì sulu kos wamblērke. <sup>17</sup> E' skéie, wépa tō Skèköl siwā' datse ká jaì a e' iuteke, esepa serke yēsyesē. Esepa serke bèrē ñita. Ie'pa er buaë ñi kī. Ie'pa tō s'malepa sueke er siarē wa taiē. Ie'pa tō ì buaë weke kekraë sulitane a ñikkēē er mokī wa. <sup>18</sup> Wépa tō s'patteke er bua'ukne ñi kī, esepa dör wes íyi kuatkökwak es. Sene bèrē kuatkeke ie'pa tō tā e' wā dōratssa sene yēsyesēie.

4

*Yi éna sene sulu dalër, ese dör Skèköl bolök*

<sup>1</sup> ¿Ì tō a' ké ñi tsiriuk ñippök ñita? E' dör tō a' éna ì sulu wamblak e' ttsé'woie buaë, ese tso' ñippök, ì buaë tso' a' er a, ese tā. <sup>2</sup> Ilè kkecheke a' tō taiē, erē e' wā kè dò a' ulà a, e' kuēkī a' tso'tke s'ttökwa. Ilè tō a' ukyēweke, erē e' kè dò a' ulà a, e' kuēkī a' ñi tsiriuke ñippöke ñita. Erē ì kiane a' kī, ese kè kiè a' tō Skèköl a, e' kuēkī kè idò a' ulà a. <sup>3</sup> Mik ilè kié a' tō Skèköl a, etā kè a' wā ikine er mokī wa. A' éna iwà we'ikakwa a' wákpa kī e' ttsé'woie buaë. E' kuēkī kè a' ulà a idé'. <sup>4</sup> ¿A' kè tō Skèköl dalöie wes trēr wakpa kè tō imaso dalöie es! ¿A' kè wā ijcher tō ì sulu tso' ká i' a, ese wa se' wōbatsō, e' tā se' mía Skèköl bolökíe? Iskà chekeneyō, yi tō ì sulu tso' ká i' a ese sini'kué, e' tā ese wák mía Skèköl bolökíe. <sup>5</sup> Kè a' tō ibikeitsök tō é Skèköl yèkkuō tō ichè: “Skèköl tō se' wiköl me'at senuk se' er a, e' ulatska tkēnettsa se' kī, e' tō se' sibirtseke taiē.” <sup>6</sup> Erē ì sulu wamblak se' éna ese wöklö'uk Skèköl tō s'kimeke taiē. Es itso' kitule ie' yèkkuō kī wé ichèitō: “Wépa e' ttsōka taiē, esepa wöklö'weke Skèköl tō. Erē wépa e' wöéwa diöshet, esepa a' ie' er buaë chò.”\* <sup>7</sup> E' kuēkī a' e' mú Skèköl ttè dalöiök. Bé kè iutar tā ie' tkörashkar a' yöki. <sup>8</sup> A' e' batsó Skèköl mik tā ie' e' batsōra a' mik. ¿A' pè' sulusipa, sene sulu olo'yó, a' er batse'ú! A' erbikökeia bötböt, e' olo'yó, e' skéie a' erbikó etkēme Skèköl è a. <sup>9</sup> ¿A' erianú, a' kköchó taiē, a' iú siarē! ¿Kè a' jañukia, e' skéie a' iú siarē! ¿Kè a' ttsé'nukia buaë, e' skéie a' erianú! <sup>10</sup> A' e' ówa bèrē Skèköl wōa tā ie' tō a' kikeraka.

*Kè se' ñi chök suluë*

<sup>11</sup> A yamipa, kè a' ñi chök suluë. Yi tō iyami cheke suluë ö iwatekeitō, e' dör wes Skèköl ttè dalöiēno cheke suluë ena iwateke es. Es ese tō idalösewéwā. A' tō iwé es, e' tā a' e' tkéka iwà shulök, kè dör iwà dalöiök. <sup>12</sup> Skèköl eköl è tō ittè dalöiēno me'at se' a. Ie' è dör s'shulökwak. Ie' è a se' tsatkërmi. Ie' è a se' kichatërmi. Etā ¿yi tō a' a kawō mé s'malepa kichatök?

*Kè se' e' ttsökka*

\* 4:6 Proverbios 3.34

<sup>13</sup> Ye' ttò ttsó. A' welepa tö ichèmi i' es: “Buleböc sa' mi'ke ká kuá'ki, etá eē sa' serke duas ek tā sa' kaneblömi taië, inuköl kl'weraë sa' tö taië e' blu'woie.” <sup>14</sup> A' tö ichèmi es, erë ì tkòmi a' tā e' kè ijcher a' wā. A' dör wes mochka es, bla'mi tā sō isué, erë bet tā kè iku'ia. <sup>15</sup> A' kawōtā ichök i' es: “Skököl ki ikiane, e' tā sa' sermiia tā kanè wésele wèmi sa' tö.” <sup>16</sup> Erë a' e' ttsòka taië, e' kueki a' kè tö icheta' es. A' ibikeitseke tö a' serke a' wákpa è mik. Se' e' ttsòka es, e' kos dör suluë. <sup>17</sup> Ì dör buaë wè, ese jcher se' wā, erë kè se' wā ione, e' tā e' dör suluë.

## 5

*Inuköl blúpa pattè*

<sup>1</sup> ¡A inuköl blúpa, ye' ttò ttsó! ¡Skököl tö a' we'ikeraë, e' kèwö döketke a' ki! ¡E' kueki a' iú, a' kköchó taië! <sup>2</sup> Ì bua'buatso' a' wā taië, ese sulunewatke, a' datsi' katétke powak tö. <sup>3</sup> Nies a' orochka, a' inukölchka kos, e' döli tokatke weirketke. Döli e' tö iwà kkacheke tö a' kkè'blö suluë. E' kueki aishkuö tā a' weirdaë bö' ké a. Ká i' erkewatke, erë a' tso'ia iyi blök taië a' wákpa a. <sup>4</sup> A' tö ittso'. Wépa kaneblöke a' a' a' iyiwö shtök, e'pa kè patone a' wā. E' tö ie'pa kköchöweke taië, e' ttsé Skököl diché tā' taië e' tö. <sup>5</sup> Ká i' a' a' wā iyi bua'buatso' taië e' ttsé'woie buaë. Nermata a' dör wes köchi kiéiesö ttèwā es; köchi kè éna iane tö ì sulu datse iki. <sup>6</sup> Pè' ser yësyësë kè a' e' tsatkër a' yöki, esepa kkaté a' tö wöméttsa ttèwā.

*Se' weirke dalé'ttsösö bèrë er bua' wa*

<sup>7</sup> A yamipa, a' weirke kos, e' dalé'ttsö er bua' wa bèrë dò mik Sköképa Jesucristo datskene etá. İyi kuatkökwakpa saú wes ie'pa tö iwörke e' wà paneke bèrë er bua' wa es. Nies ie'pa tö kalì paneke bèrë er bua' wa as iyiwö tskir, talar buaë, wöne taië. <sup>8</sup> Sköképa datskene e' kèwö döketke tsinet, e' kueki e' wà panú bèrë. A' e' tkówa darërë ie' a.

<sup>9</sup> A yamipa, kè a' ñi chök suluë as a' kè we'ikò Skököl tö. Jesucristo dör s'shulökwak, e' döketke tsinet wes yi dökewatke ukkò a es. <sup>10</sup> A yamipa, Skököl ttekölpa bak ká iaiaë, e'pa weine taië, e' dalé'ttsé'rakitö bèrë er bua' wa. E' saú, etá iwà ú es. <sup>11</sup> Se' tö ichè: “Wépa weine siarë, e' dalé'ttsé'rakitö bèrë er bua' wa, ayëcha buaë esepa.” A' wā ittseüle tö ká iaiaë wëm bak eköl kiè Job, e' weine taië, erë ie' tö idalé'ttsé' bèrë er bua' wa. Nies a' wā ijcher tö mik iweine siarë e' tka, etá Skököl er buaë yè' ie' a taië. Skököl er dör buaë, se' wër siarë ie' wa, e' kueki ier buaë yè' Job a taië.

<sup>12</sup> A yamipa, ttè chekeyö i' e' dör ibua'ie: Mik a' tö ì cheke, etá kè ichar: “Ì chéyö e' dör mokì Skököl tö ká jaì ena ká i' yö' e' wöwa” ö yile skà wöwa. A' ttó etkè. Mik a' icheke, “tó”, etá es idir; mik a' icheke, “au”, etá es idir. A' ichó es as kè a' kichatër.

*Ikiösö Skököl a ñi ki*

<sup>13</sup> A' wele weirke eriarke siarë, e' tā ese ttó Skököl tā. A' wele ttsé'rke buaë, e' tā ese tö Skököl kikókā ittse wa. <sup>14</sup> A' wele duöke, e' tā ese tö Sköképa Jesús icha erule e'pa wökirpa tsuk patkó, as e'pa bitu ikiök Skököl a iki ena kiò tök iki Sköképa ttò wa. <sup>15</sup> Ie'pa tö ikié Skököl a erblè imik mokì e' wa, e' tā ibuardane tā Sköképa tö ikerakane. Nies ì sulu nuí tso' iki, e' tā e' olo'yeraëitö iki. <sup>16</sup> E' kueki a' e' kkatóka ñi a tā ikió Skököl a ñi ki as a' buarne. Mik s' ser yësyësë, esepa tö ì kié Skököl a er mokì wa, etá ie' tö iwà iuteraë buaë taië. <sup>17</sup> Skököl tteköl bak ká iaiaë kiè Elías, e' dör s'ditsö wes sulitane es. Erë ie' tö iki' Skököl a er mokì wa tö as kalì kè yër, etá kalì kè yène dò duas mañal kí shaböts. <sup>18</sup> E' ukuökì tā ie' tö ikiéne Skököl a tö as kalì yërne, etá mokì kalì yënene tā iyi kuá kos talane buaë.

*Ì sulu wamblökwakpa kïmusö ilo'yök*

<sup>19</sup> A yamipa, a' wēle tō ttè moki, e' olo'yé, erë a' wēle skà tō ikimé as idöne iiütökne, e' ta e' dör buaë. <sup>20</sup> A' éna ianú tō wépa tō pë' sulusi kimé ì wambléitö e' olo'yök, esepa tō ie' tsatkée ikichatër yöki, ñies inuì taië e' kōs olo'yane iki.



## Yëkkuö tsá kit Pedro tö 1 Pedro

Pedro, kiè ñies Simón, e' tö yëkkuö i' kit. Jesús ttókatapa shuá ie' dör kèkè taië imalepa tsata. Erë mik Jesús klönewa ttèwà età Pedro è tö iyè' tö ie' kè wà Jesús suule. E' ukuöki ta ie' eriane taië ta ie' e' me' Jesús dalöiökne. Kè s'wà ijcher wé ie' bak senuk mik ie' tö yëkkuö i' kit età. Ie' tö iché tö ie' bak senuk Babilonia (1 Pedro 5.13) erë ká bak böt kuá'ki kuá'ki Babilonia. Roma wakpa taië bak senuk suluë Skéköl wöa wes Babilonia wakpa bak senuk es. E' kuëki ie'pa ká kiè ñies Babilonia. E' kuëki pè' taië tö ibikeitsè tö mik Pedro tö yëkkuö i' kit, età ie' tso' Roma.

Ie' tö yëkkuö i' kit Jesús mik erblökwakpa bak senuk ká kuá'ki kuá'ki tso' Asia Menor shua e'pa a. I' ñe ta ká e' kiène Turquía. Ie'pa bak weinuk, e' kuëki Pedro éna ikimak senuk batse'ne kekraë Jesús a mik ie'pa weirke e' dalewa. Ñies ie' tö ie'pa a iché tö Skéköl wák tö ie'pa klöo'bak iwák ichaie, e' kuëki ie'pa tuè taië Skéköl a. E' kuëki ie'pa kè kàne tkinuk iwák è ki. E' skéie ie'pa ké senuk tso'tke e' meulettsa er bua' wa weinuk Jesús dalërmik wes ie' weine ie'pa dalërmik es. Mik ie'pa weirke Jesús kuëki età ie'pa ké ttsè'nuk buaë Wiköl Batse'r tso' mokië ie'pa a e' kuëki. Es Pedro tö iché.

### *Shkè'wè*

<sup>1</sup> Ye' dör Pedro. Ye' dör Jesucristo ttekölpa tsá, e'pa eköl. Ye' tso' yëkkuö i' shtök wépa shukitbak Skéköl tö iwák a mineyal senuk Ponto, Galacia, Capadocia, Asia, ñies Bitinia, esepa a.

<sup>2</sup> Skéköl dör S'yé e' tö se' shukitbak wes ie' tö ibikeitsbak kuaë es. Iwiköl wa ie' tö se' batse' a se' tö Jesucristo ttè iütò, ñies a se' er pairir Jesucristo pé wa se' nuì yöki. As Skéköl er buaë chò ena sene bèrè mù a' a taië.

### *Skéköl kíkòkasö*

<sup>3-4</sup> Skéköl dör Skékèpa Jesucristo yé, e' kíkòkasö taië. Ie' tö se' sué er siarè wa. Jesucristo kötèwà shkenekane, e' batamik ie' tö se' a sene pa'alì mé. Aishkuö ta i buaë kos tso' ie' wà blèule se' a ká jai a, e' dóraë se' ulà a, e' wà panekesö kröröë. E' kos kè nurta'wà, kè sulurta'wà, kè ertà'wa yës. <sup>5</sup> A' erblöke Jesucristo mik, e' kuëki Skéköl tso' a' kkö'nuk ie' diché wa a se' ie' tö a' tsatkè, e' dò a' ulà a. E' tso'tke kkachè sulitane a ká erkewatke età.

<sup>6</sup> Isalema a' kawöta weinuk ekuölö wì sù diò sù Cristo tté kuëki, erë e' dalewa a' ttsè'rke buaë a' wà ijcher tö Skéköl tö a' tsatkeraë aishkuö ta e' kuëki. <sup>7</sup> A' erblö Jesucristo mik, e' ské dör orochka weirtà'wa, e' ské tsata. Se' tö orochka ma'weke bö' wa iwà kkachoe tö mokì oro wöchka idir. I kè dör oro wöchka ese ñarkewa. E' sù a' weirke, e' dör a' ma'woie iwà kkachoe tö mokì a' erblöke Jesucristo mik. A' dettsa buaë, e' ta mik Jesucristo datskene, età Skéköl tö a' tté kerakà, a' kikerakà buaë.

<sup>8-9</sup> A' kè wà Jesucristo suule a' wöbla wa, erë a' éna ie' dalër. I' ñe ta a' kè ku' ie' sauk, erë a' erblöke ie' mik, e' wà tö a' tsatkeraë. E' kuëki a' ttsè'rke buaë shütè, kè ttè ta' iwà choie ekkè.

<sup>10</sup> Ká iaiä Skéköl ttekölpa tö s'tsatkè ñe' bikeits ena itò yulö'ttsarakitö. Ñies i kos meraë Skéköl tö se' a ie' er buaë ché se' a e' dalërmik, e' yè'rakitö. <sup>11</sup> Cristo Wiköl tö ie'pa ka' ijchenuk tö Cristo weirdaë siarè, e' ukuöki ta ilo kardakà taië. Erë kè ie'pa éna iwà ane tö yi idir ö mik ö wes iwà tkòmi. <sup>12</sup> Erë Skéköl tö ie'pa a iwà kkayè' tö ttè e' kè wà tkòpa ie'pa kéwö ska', e' skéie iwà tkóraë se' kéwö ska'. Ttè buaë yé' ie'pa tö, e' dör Jesucristo tté buaë ttsè'bak a' tö e'. Ipakökwakpa tö a' a ipaka' Wiköl Batse'r patkèulebitu ká jai a e' diché wa. Íyi ikkè jchenakwà suluë Skéköl biyöchökwakpa wà.

*Skëköl tö se' kié senuk buaë yësyësë*

<sup>13</sup> E' kueki a' erbikó buaë yësyësë, a' e' kkö'nú, a' tso' erki. Mik Jesucristo datskene, eta Skëköl er buaë ché a' a, e' wà doraë a' ulà a. E' wà panú kröröë, e' ki a' er múwaie kekraë. <sup>14</sup> Skëköl ttè iutó wes ala'rla buaë tö s'ttò iutè es. Kè a' e' muktsane a' bak ì sulu wamblök ese ane wes a' bak kenet kè wà ie' ttè moki jcher es. <sup>15</sup> E' skéie a' senú batse'r kekraë, Skëköl tö a' klöo' e' dör batse'r e' kueki. <sup>16</sup> Skëköl yëkkuö tö ichè i' es: “Skëköl tö ichè: Ye' dör batse'r, e' kueki a' senú batse'r.”\* Es iyë'itö.

<sup>17</sup> Skëköl tö sulitane shuleke yësyësë ñikkëë wes se' serke es, e' kieke a' tö “S'yé”, e' ta a' kawöta ie' dalöiök suane wa a' serkeia ká i' ki e' dalewa. <sup>18</sup> A' wà ijcher tö ie' tö a' yé'ttsa a' ser suluë wes a' yépa bak senuk suluë es, e' nuí ulà a. E' ské kè patone íyi ertá'wa wes orochka ö inukölchka ese wa. <sup>19</sup> E' skéie ipatone Cristo kötewá pé tène taië, e' wa. Ie' pé tuë taië kè tonuk yi a. Ie' dör wes obeja wë'ñe pupula jchë judiowak tö mè Skëköl a es. Obeja e' dör bua'buä kè iki ì sulu ku' yës. E' sù Cristo kè ki ì sulu ta' yës, erë ie' e' me'ttsa ttèwá se' skéie. E' kueki Skëköl dalöiösö kekraë. <sup>20</sup> Kam ká i' yör, e' yöki ie' tö Cristo wöme'ttsabak ttèwá, erë i'ñe ta mik ká i' erkewatke, eta iwà tka a' tsatkoie. <sup>21</sup> Cristo batamik a' erblöke ie' mik. Ie' tö Cristo shkeo'kane s' duulewá shuá ta ilo me'itö ie' a buaë. Ie' tö iö'bak es as a' erblö ie' mik, ñies as ì weraë ie' tö, e' wà panú a' tö.

<sup>22</sup> I'ñe ta ttè moki e' dalöié a' tö, e' batamik a' batse'one ñi dalëritsoie er moki wa. Es a' ki ñi dalëritsó a' er kos wa. <sup>23</sup> A' a sene pa'alj mène, e' dör wes a' kurne erpa etökichane es. Erë e' kè dör wes s'kur erpa s'mì wa s'yé wa es, e' duöta'wá. A' kune' etökichane Skëköl ttè dör ttsë'ka tso' kekraë e' wa. <sup>24</sup> E' dör wes Skëköl yëkkuö tö ichè es, e' tö ichè: “S'ditsö ulitane dör wes kakö es, Ie'pa dör wes ma'ma wörkua es. Kakö sinewá ta iwörkua anewa, <sup>25</sup> erë Skëköl ttè e' tso' kekraë.”†

Ie' ttè e' dör Jesús tté buaë pakane a' a e'.

## 2

<sup>1</sup> E' kueki, sene sulu kos olo'yó. Kè a' kachökia ñi ki. Kè a' e' ökia tö a' dör pë' buaë. Kè ukyënukia. Kè yi charia suluë a' tö. <sup>2-3</sup> Skëképa Jesús er buaë ché se' a, e' kke ttsétke a' tö, e' kueki ie' ttè wák wöchka yuló poë wes alala kune erpa ese tö imi tsu' yulè es as a' er ki diché ier buaë as a' tsatkër.

*Cristo dör wes ák kibi tso' u katabloie es*

<sup>4</sup> A' shkówa Skëképa Jesucristo ska', ie' dör wes ák tso' u yuoie es erë ttsë'ka. E' watë'ttsa s'ditsö tö wes u yuökwakpa tö ák kè dör buaë u yuoie ese kèu es. Erë Skëköl a ta ie' dör wes ák shukitule tuë darërë es. <sup>5</sup> Es ñies se' dör wes ák tso' u yuoie es erë ttsë'ka. Se' wa Wiköl Batse'r tso' iwé yuök. U e' a se' dör wes sacerdotepa batse'r es. Eë se' tö ì wër buaë Skëköl wa ese meke ie' a Jesucristo batamik. Ì wër buaë ie' wa, e' dör tö se' tö ie' dalöiö Wiköl Batse'r wa se' er wa ena se' ser kos e' wa. <sup>6</sup> E' dör wes itso' kitule Skëköl yëkkuö ki es. E' ki Skëköl tö Cristo ché i' es:

“Ittsó. Ye' tö ák kibiie tkéat ye' u katabloie Sión, e' dör ák bua'ie shukitule tuë darërëë ese. Yi erblöke imik, ese kè eriarpa.”\*

<sup>7</sup> Ák e' dör Jesucristo. Se' erblöke ie' mik, esepa kikeraka Skëköl tö. Erë wépa kè erblöku' ie' mik, esepa a ta e' kè dör es. Itköke ie'pa ta wes itso' kitule Skëköl yëkkuö ki es, e' tö ichè:

“Ák watë'ttsa u yuökwakpa tö,

\* 1:16 Levítico 11.44-45 † 1:25 Isaías 40.6-8 \* 2:6 Isaías 28.16

e' yönene ák bua'buaië."†

<sup>8</sup> Ñies e' tö ichè:

"Ák e' mik pè' klastkërdaë,

ie'pa ardarö iski ák e' kuëki."‡

Ie'pa kè wà Jesucristo tté buaë e' iütène, e' kuëki ie'pa weirdaë e' nuí ki. E' dör wës ie'pa klastkër Jesucristo mik es. Skëköl tö ie'pa wöme'ttsabak as itkò ie'pa tã es.

<sup>9</sup> Erë a' kè dör es. Skëköl tö a' shukit as a' dö ie' wák ichaie. Ie' dör a' blú ena a' dör ie' sacerdotepa. A' dör batse'r ie' a. A' bak senuk ì sulu dikia wës s'ser stui a es, erë ie' tö a' yè'ttsa e' ulà a senoie ie' olo buaë taië e' a. Ie' tö iwé es as ì buaë kos wé ie' tö, e' wà pakò a' tö sulitane a. <sup>10</sup> Kenet tã a' kè dör ie' icha, erë i'ñe tã a' dör ie' wák icha. Kenet tã ie' kè wà a' sune er siarë wa, erë i'ñe tã ie' tö a' suëke er siarë wa.

#### *Se' senú wës Skëköl ki ikiane es*

<sup>11</sup> A ye' yamipa dalër taië ye' éna, se' tso' bërberla è ká i' ki wës upakè shkal es. Se' ká bua'ie e' dör ká jaì a. E' kuëki a' wák dër suluë tö a' erkiöweke ì sulu wamblök, e' kè iutar. E' tö a' wökl'öweke as a' kè tö Skëköl ttò iütè. <sup>12</sup> A' senú yësyësë këkraë pè' kè tö Skëköl dalöiè esepa wörki. Erë i'ñe tã ie'pa tö a' kKateke wës a' chópa pè' sulusipa es, erë ie'pa tso' a' serke yësyësë e' wà sauk. E' kuëki aishkuö tã mik Skëköl de s'chakök se' nuí ki, etã ie'pa tö ie' kikerakã wës a' serke e' ki. E' kuëki a' senú buaë yësyësë këkraë.

<sup>13</sup> S'wökirpa kos ttè iütó a' tö Skëképa Jesús batamik. Ká wökir kibi, e' ttè iütó, ie' dör s'wökir kibi ká i' ki e' kuëki. <sup>14</sup> Ñies wépa patkeke ie' tö s'wökirpaie, esepa ttè iütó a' tö. Ie' tö ie'pa patkeke wépa tö ì sulu wambleke esepa we'ikök ena wépa tö ì bua' weke esepa kikökka. <sup>15</sup> Skëköl ki ikiane tö a' tö ì buaë wè, pè' tö ie' ttè watéttsã, kè wà iwà jcher yës, esepa siwa'blöwowaie as ie'pa kè tö a' chöia suluë.

<sup>16</sup> A' senú wës pè' tsatkëulettsa es. A' bak klöulewã ì sulu ulà a, e' yöki a' tsatkë'ttsa Skëköl tö, erë e' kè klö'war a' tö ì sulu wambloie. E' skéie a' senú yësyësë ie' kanè mésopaie. <sup>17</sup> Sulitane dalöiö. S'yamipa malepa dalëritsó. Skëköl dalöiö. Ñies ká wökir kibi, e' ttè dalöiö.

#### *S'weirke kos e' dalë'ttsösö*

<sup>18</sup> A' wépa klöulewã kanè mésoie, esepa tö a' wökirpa ttò iütó. Wépa er buaë tö a' suëke buaë, ñies wépa er suluë tö a' suëke kësik wa, esepa ttò iütó er bua' wa. <sup>19</sup> A' kè ki ì nuí tã', erë a' wökir tö a' we'ikeke éme, e' dalë'ttseke a' tö bèrë, a' er me'rie Skëköl ki e' kuëki, e' tã e' wër buaë ie' wa. E' kuëki a' wökirpa ttò iütó. <sup>20</sup> Se' weirke ì sulu wamblekesö ese nuí ki, ese dalë'ttsésö bèrë, e' tã Skëköl kè tö se' kikepakã yës. Erë se' weirke ì buaë wésö ese kuëki, ese dalë'ttsésö bèrë, e' tã e' je' wër buaë ie' wa. <sup>21</sup> Ie' tö se' klö'bak as se' tö idalë'ttsö es. Cristo weine taië se' dalërmik, e' dalë'ttsë' ie' tö bèrë. Es ie' ki ikiane tö se' tö se' weirke ese dalë'ttsö bèrë wës ie' tö idalë'ttsë' es. <sup>22</sup> Cristo kè wà ì sulu wamblène yës, ie' kè kayëne yës. <sup>23</sup> Mik ie'pa tö ie' yè' suluë iwöshäë, etã ie' kè wà ie'pa yëne sulu. Mik ie'pa tö ie' we'ik taië, etã ie' kè wà yi paüine. E' skéie e' me'atitö, Skëköl tö s'shüleke yësyësë, e' ulà a. <sup>24</sup> Cristo kötëwã wötëulewã krus mik se' nuí kos patuoie as se' ser yësyësë, ñies as ì sulu kè wamblöiasö. Ie' shká'ne ichkã ki taië, e' batamik a' buanene. <sup>25</sup> A' bak wës obeja chöwa es, erë i'ñe tã a' dene Cristo ska'. Ie' dör a' kkö'nukwak buaë, ie' tö a' kkö'neke er bua' wa.

### 3

#### *Wës s'senewabak esepa ké senuk ñita*

† 2:7 Salmo 118.22 ‡ 2:8 Isaías 8.14

<sup>1</sup> A tayëpa, a' wëpa ttò iutó er bua' wa. A' tö iwé es, e' ta a' wëpa welepa kè erblöku' Jesús mik, esepa erblömi alè Jesús mik, a' serke buaë ie'pa ta, e' è batamik, kè wà pakaule ie'pa a. <sup>2</sup> A' wëpa tö isué tö a' serke yësyësë, Skëköl ttè dalöieke mokië, e' tö ie'pa erkiöwëmi erblök Jesús mik. <sup>3</sup> A' tayëpa, ¿moki a' e' ttsakka buaala? e' ta kè a' e' kitkarka tajë a' chkà ki. Kè ì tularka tajë e' ki ena a' tsà ki wöñarke dalölöë oroie iie. Kè a' e' paiökka datsi' tuè darërëë ese wa. Ese kos weirta'wa. <sup>4</sup> E' skéie er buaë ñies sene bèrë, ese wa a' e' kitkó. E' kè weirta'wa ñies e' wër buaë shutë Skëköl wa. <sup>5</sup> Alakölpa bak ká iaiäë tö Skëköl dalöieta', esepa bak e' kitkök es. Ie'pa bak e' maukka Skëköl mik, ñies ie'pa bak iwëpa ttè iutök buaë. <sup>6</sup> Sara tö iwëm Abraham ttè iutë' buaë ta iki'itö këkëpa. A' tö ì buaë weke, kè suarta' ì yöki, e' ta a' dör wës Sara es.

<sup>7</sup> A wëpa alaköl ta', a' senú ita bèrë er bua' wa. Ie'pa diché kè ta' tajë wës se' wëpa es. Ñies ie'pa ulà a sene michoë döraë se' ta ñita Skëköl er buaë ché se' a e' wa. E' kuëki ie'pa dalöiö. Iú es as ì kieke a' tö Skëköl a, ese kè wöklör.

*Jesús mik erblökwakpa ké senuk buaë sulitane ta*

<sup>8</sup> Es bata ekkë ta ye' tö ichè a' ulitane a, a' senú buaë ñita bèrë. A' ñi saú er siarë wa. A' ñi dalëritsó buaë ñi ëlpaie. A' ñi saú er bua' wa. A' e' ówa ñi yöki diöshët. <sup>9</sup> Yi tö ì sulu wamblé a' ki, ese kè ki iské wamblarne. Yi tö a' ché suluë, ese kè ské charne suluë. E' skéie esepa a a' er buaë chöne. Skëköl tö se' klöo'bak er buaë choie se' a, e' kuëki a' er buaë chó s'malepa a. <sup>10-12</sup> E' dör wës Skëköl yëkkuö tö ichè es, e' tö ichè: “Skëköl wöbla me'rie s'ser yësyësë, esepa ki ikkö'nuk.

Ì kieke ie'pa tö ie' a, ese meraëitö ie'pa a.

Erë wëpa e' wamblö sulu, esepa suëkeitö ibolökpaie.

E' kuëki yi ki ikiane tö ikawö tkö buaë ttsëne bua' wa këkraë,

ese wák kawötä e' kkö'nuk as kè itö ì sulu chö,

as kè itö yi kitö'ù.

Ese wák kawötä ì sulu kos olo'yök,

kawötä senuk yësyësë.

Ie' ké e' chök senuk bèrë këkraë sulitane ta.”\*

<sup>13</sup> A' e' tkéwa darërëë senuk yësyësë këkraë, e' ta kè yi a a' sulunukwa da'a. <sup>14</sup> Erë a' serke yësyësë, e' ki a' weirmi alè, e' ta ayëcha e' dör buaë. Kè a' suanuk wëpa tö a' we'ikeke esepa yöki. Kè a' tkinuk ì yöki. <sup>15</sup> E' skéie Cristo dalöiö a' tö e' blúie. Yile tö a' chaké Cristo paneke a' tö kröröë, e' ki, e' ta a' tso'tke erki këkraë iwà iutök. <sup>16</sup> Erë iwà iutó bèrë er bua' wa. A' senú yësyësë as a' er kè tö a' kkatò ì ki. E' dör es, e' ta mik pë' tö a' ché suluë a' dör Cristo mik erblökwakpa e' kuëki, eta e'pa jaërdaka ì ché ie'pa tö e' dör kache e' kuëki.

<sup>17</sup> Se' weirke ì buaë weke se' tö ese ki, Skëköl ki ikiane alè es, e' ta e' dör buaë. Erë se' weirke ì sulu wamblekesö ese ki, e' ta e' dör suluë. <sup>18</sup> Ñies Cristo weine siarë se' nuì patuoie. Ie' kötëwa etökicha ème kè duöta'waja yës. Ie' dör yësyësë, erë ie' e' mettsa ttëwa se' kè dör yësyësë e'pa skéie se' tsomi Skëköl ska'. Moki ie' kötëwa pë' tö, erë ie' shkeo'kane Skëköl tö iWiköl wa. <sup>19</sup> Ñies Wiköl Batse'r wa ie' dë'rö wé wimblupa tso' wötëule eë, ie' e' ali'ka e' chök ie'pa a. <sup>20</sup> Ká iaiäë ie'pa tö Skëköl ttè dalöseo'wa Noé këska'. Noé bak kanò tajë e' yuök, e' dalewa Skëköl tö ipana' enaë tö pë' er manë'ù ie' a, erë ie'pa kè wa igone. E' kuëki Noé ena iyamipa päköl wa'ñe, e'pa è tsatkëne kanò a di' tajë yöki. <sup>21</sup> Di' tajë bakmi Noé këska', e' tö di' a s'wöskueke e' tsatkoie i'ñeta e' klea' se' a. S'wöskuë e' kè dör s'chkà paskuoie. E' skéie iwà kkachekeitö tö se' tso' ikiök Skëköl a tö se' nuì olo'yó s'ki as se' er kè tö s'kkatöia. E' tö se' tsatkeke Jesucristo shkenekane

\* 3:10-12 Salmo 34.12-16

e' batamik. <sup>22</sup> I'ñe tã Jesucristo mine'kãne kã jai a e' tkër Skëköl ulà bua'kka† Skëköl biyöchökwakpa ulitane, ñies ì ulitane tso' s'wökirie wã diché tã' kè wërta'wã esepa kôs tso' ie' klò dikia.

## 4

<sup>1</sup> Cristo weine taië se' skéie, e' kueki a' e' chó a' weirke kôs e' dalë'ttsök er bua' wa wës Cristo es. Yi weine ì buaë wéitö e' kueki, esepa kè éna ì sulu wamblakia. E' kueki a' e' chó weinuk. <sup>2</sup> Wépa dör es, ese wakpa serkeia kã i' a etã kè ie'pa éna ì sulu wamblakia wës s'malepa tö iwamleke es. E' skéie ie'pa senak buaë yësyësë këkraë wës Skëköl kï ikiane es. <sup>3</sup> Kenet tã a' kè wã Skëköl sũule, e' kèwö ska' tã a' bak ì sulu è wamblök taië wës pë' malepa kè wã ie' sũule esepa ser es. A' bak trënuke taië. ì sulu kukuétë'wã darërëë. A' bak e' ttökka blo' wa taië. A' bak ñi dapa'uk blo' yök taië. E' kèwa a' tö ì sulu kï wamleke taië. Ñies íyi diököl tö s'dako'wè ekkë, ese dalöiök a' bak taië skëkölíe. <sup>4</sup> Erë i'ñe tã a' kè mineia pë' kè tö Skëköl dalöie esepa tã ì sulu wamblök wës ie'pa tö iwamleke kè wöklörta' es. E' tö ie'pa tkiwëwã, e' kueki ie'pa tö a' cheke suluë. <sup>5</sup> Skëköl dör s'duulewã ena s'tso'ia ttsë'ka, e'pa kôs shulökwak. Aishkuö tã ì sulu wamblë' ie'pa tö, e' kôs kï ie'pa kawöta e' chökka ie' wörki. <sup>6</sup> Cristo tté buaë e' pakanebak ñies s'durulune esepa a. Ie'pa durulune ì sulu wamblë' ie'pa tö e' kueki, wës Skëköl tö ime'at tö sulitane kawöta duökwa es. Erë Cristo tté buaë e' pakanebak ie'pa a as ie'pa wikölpa ser michoë wës Skëköl ser es.

*Se' ké ñi kïmuk*

<sup>7</sup> Kã i' erkewatke, e' kueki a' tso' erki, a' e' kkö'nú buaë as a' a s'yëyer buaë. <sup>8</sup> Íyi kôs tsata a' ñi dalëritsö a' er kôs wa. A' ñi dalëritsöke es, e' tã wës alë s'yamipa e' wamblö suluë a' kï, ese kè kï a' tkirpa. <sup>9</sup> A' tö s'yamipa kiówa er bua' wa a' u a, kè isuar suluë. <sup>10</sup> Skëköl er buaë ché a' a, e' kueki ie' tö ime' a' a kua'kï kua'kï ñi kïmoie, e' kueblupa a' dör. E' kueki ì mène a' eköl eköl a' s'malepa kïmoie ese wã kaneú. <sup>11</sup> A' welepa a' imène ttè pakök, e' tã esepa kawöta Skëköl ttè è pakök. A' welepa a' imène s'kimuk, e' tã esepa kawöta s'kimuk kôs Skëköl tö e'pa a' diché métke ekkë. ì kôs wëkesö e' üsö buaë as Skëköl kikarka taië Jesucristo batamik. Jesucristo diché tã' taië, olo tã' taië íyi ulitane tsata këkraë. Es e' idir.

*Se' ttsë'nú buaë se' weirke etã*

<sup>12</sup> A yamipa dalër taië ye' éna, mik a' weirke siarë Cristo ttè kueki, etã kè e' kï a' tkinuk. Kè a' tö ibikeitsök tö a' tã itkòmi wës ì kè sũule yi wã tkò s'tã es. <sup>13</sup> E' skéie a' ttsë'nú buaë. Cristo weine kôs e' bata de a' kï ñies, e' kueki a' ttsë'nú buaë. E' tköke a' tã es as a' ttsë'r buaë shütë mik Cristo dene olo tã' taië etã. <sup>14</sup> Ayëcha buaë mik ie'pa tö a' ché suluë Cristo kueki, e' wã dör tö Skëköl Wiköl olo tã' taië e' tso' a' tã. <sup>15</sup> A' weirke s'ttëwã kueki, akblë kueki, ì sulu wamblë kueki ö ulà tië o'ka íyi a' e' kueki, e' je' tã a' jaënú. <sup>16</sup> Erë a' weirke se' dör Cristo icha e' kueki, etã kè e' kï a' jaënuke. E' skéie Skëköl kikóka a' tö ie'pa tö a' kië Cristo icha e' kueki.

<sup>17</sup> Skëköl tö sulitane shuleketke, e' kèwö dökewatke. Erë ie' tö iwák icha shuleraë kewe. Se' weirke i'ñe tã, e' dör sulitane weirdaë e' tsá, e' tã ¿ì kè tköpa wépa kè tö ttè buaë me' Skëköl tö e' dalöieta' esepa tã? <sup>18</sup> E' dör wës itso' kitule Skëköl yëkkuö kï es, e' tö ichè:

“Pë' serke yësyësë, iekkë tã esepa kè tsatkëne,  
e' tã ¿ì kè tköpa pë' sulusipa ena pë' e' wamblö sulu esepa tã?”\*

<sup>19</sup> Wépa mé Skëköl tö weinuk ie' ttè kueki, esepa ké ì buaë wëkerakitö, ese kï uk. Ie' se' yö', ie' ttò mokië, e' kueki se' e' mù bèrë ie' ulà a.

## 5

*Skëkëpa Jesús icha wökirpa esepa patté Pedro tö*

† 3:22 ulà bua'kka: E' kèwö ska' tã yi tkër blu' ulà bua'kka ese wák dalöiërta' taië imalepa tsata. \* 4:18 Proverbios 11.31

<sup>1</sup> I'ñe ye' tö ilè cheke a' dör Skëkëpa Jesús icha wökirpa esepa a. Ñies ye' dör Jesús icha wökir eköl. Cristo weine siarë, e' su'yö ye' wák wöbla wa. Mik ie' datskene, etä ie' olo taië e' kkayërdaë sulitane a, e' a ye' tso'ñak a' ta. E' kuëki ye' tö a' a ichè tö <sup>2</sup> wépa me' Skëköl tö a' ulà a' kkö'nè wës obeja es, esepa kkö'nú buaë, er buaë wa wës ie' ki ikiane es. Kè dör tö a' kè éna iwak, erë a' tö iweke. E' skéie iwakaneú er bua' wa. Ñies kè ie'pa kkö'nar inuköl è dalërmik, e' skéie ikkö'nú er bua' wa ie'pa kimoie. <sup>3</sup> Kè a' tö ie'pa wëttsuk kësik wa. Kè a' e' ttsökka taië ie'pa ki. E' skéie a' senú buaë yësyësë ie'pa wörki as ie'pa ser buaë wës a' ser es. <sup>4</sup> A' tö iwé es, e' ta mik Cristo dör se' ulitane wökir kibi e' datskene, etä iské buaë olo ta' taië, kè sulurta'wä e' meraëitö a' a.

*Jesús icha malepa patté Pedro tö*

<sup>5</sup> A duladulapa, a' kékëpa ttò iütó buaë. Ñies a' ulitane e' wööwa diöshet ñi yöki, a' ñi dalöió er bua' wa. Skëköl yëkkuö tö ichè:

“Wépa e' ttsökka taië, esepa wöklö'weke Skëköl tö.

Erë wépa e' wööwa diöshet, esepa a' ie' er buaë chò.”\*

<sup>6</sup> E' kuëki a' e' wööwa diöshet ie' diché ta' taië e' yöki, as ie' tö a' kikòka mik ikéwö de etä. <sup>7</sup> Ie' er me'rie a' ki a' kkö'noie, e' kuëki kè a' tkinuk i' ki. I' kos tö a' tkiweke, a' tsiriweke, e' múat ie' ulà a.

<sup>8</sup> ;A' tso' erki, a' e' kkö'nú! Bé dör a' bolök. Ie' tso' a' tötiuk wës ma'name arke taië, e' tö iyiwak tötiëke katèwa es. <sup>9</sup> A' e' tkówa darërë a' erblöke Skëköl mik e' a, es a' tö Satanás wöklö'weraë. A' wä ijcher tö ká wa'ñe s'yamipa tso' weinuk wës a' es. E' kuëki a' e' tkówa darërë Skëköl a. <sup>10</sup> Ie' er buaë ché se' a taië shütë. Ie' tö se' shukitbak as se' döñak ie' olo yöbië e' a, se' batsulewä Cristo mik e' wa. Se' weirke ekuölö è ká i' a, mik e' tka, etä i' sulu tso'ia se' a, e' yerattsaitö sekkä. Ie' tö se' tkewaraë darërë. Ie' tö se' er diché ieraë, kè i' e' alòpakaia se' ki. <sup>11</sup> Ie' diché ta' taië íyi ulitane tsata. Ie' dör íyi ulitane wökir kekraë. Es e' idir.

*Pedro e' chéat*

<sup>12</sup> Ye' tö Silvano ké yëkkuö i' shtök. Ye' wä ijcher tö ie' dör s'yami e' tkëulewä darërë ese. Yëkkuö i' shtéyö a' a' er diché kí ioie. Skëköl er buaë ché se' a taië, e' shtéyö yëkkuö i' ki. Ye' tö ichè tö e' dör ttè mokië, e' a a' e' tkówa darërë.

<sup>13</sup> Jesús mik erblökwakpa kos tso' Babilonia, e'pa tö a' shké'wémi. E'pa shukit Skëköl tö wës ie' tö a' shukit es. Ñies Marcos dör wës ye' wák alà es, e' tö a' shké'wémi. <sup>14</sup> A' ñi shké'ú er bua' wa.

A' kos dör Cristo icha, e'pa senú bèrë.

\* 5:5 Proverbios 3.34



## Yëkkuö skà kit Pedro tö, i' tã ide böt 2 Pedro

Yëkkuö skà i' kit Pedro tö. Ie' wã ijchenewã tö iblërkewatke, e' yë'itö 2 Pedro 1.12-15 e' kî. Jesús mik erblökwakpa weirke ierblö ñe' kuëkî, e'pa a Pedro tö yëkkuö i' kit ie'pa er one Jesús tté mokië e' ska' as iserdak yësyësë ena këkraë Jesús a. E' kîieta ie' tö ie'pa a ieri mène tö pë' e' ò tö ie'pa dör Jesús mik erblökwakpa esepa döraë ie'pa shua ikîtöukrak. Ie' tö ie'pa a iché tö wes s'kîtö'ukwakpa ñe'sepa serdaë. Ñies ie' tö ie'pa a iché tö s'kîtö'ukwakpa we'ikeraë Skëköl tö. E' kîieta ì tkömi ká i' erkewatke etã e' eri mène Pedro tö ie'pa a. Ie' tö iché ká i' erkewa e' këwö dewatke tsinet, e' këwö ska' tã ie'pa kawöta senuk yësyësë Jesús kîkokaie.

Ñies Pedro tö iché tö mokië Jesús datkene erë Skëköl tö sulitane suëke er siarë wa ena ie' kî ikiane tö se' er mane'ù tã se' erblö Jesús mik. E' paneke ie' tö er bua' wa, e' kuëkî kam ie' tö Jesús patköne.

### *Shkë'wè*

<sup>1</sup> Ye' dör Simón Pedro. Ye' dör Jesucristo kanè méso. Ñies ye' dör ittekölpa tsá, e'pa eköl. Jesucristo dör Skëköl ena S'tsatkëkwak. Ie' dör yësyësë, e' batamik sa' de erblök ie' mik. Ye' tso' yëkkuö i' shtök wépa de erblök ie' mik buaë mokië wes sa' es, esepa a.

<sup>2</sup> Skëköl ena Skëképa Jesús as e'pa er buaë chò ena sene bèrë mù a' a taië, a' kî batsmir buaë ie'pa mik e' a.

### *Se' er diché iò senuk yësyësë Skëköl a*

<sup>3</sup> Jesús tö se' klöo'bak as se' dö ie' tã ñita ie' olo taië e' a, ñies as se' ser wes ie' ser es. Se' bàtse ie' mik, e' wa ì kôs kiane se' kî senoië wes ie' kî ikiane es e' me'tkeitö se' a ie' diché taië e' wa. <sup>4</sup> Íyi ekkë kôs wa ie' kablë' se' a as se' dö wes ie' wák dër es, as se' tkòshkar ì sulu tso' ká i' a wamblak se' éna tö se' sulu'wëwami ese ulà a. Skëköl kablë' se' a, e' me'tkeitö se' a, e' dör taië buaë shute. <sup>5</sup> E' kuëkî a' e' diché ió a' erblöke Cristo mik, e' kîie senuk yësyësë. Sene yësyësë, e' kîie Skëköl íyi anuk. <sup>6</sup> Skëköl íyi ane, e' kîie e' kkö'nuk. E' kkö'nè, e' kîie íyi panuk bèrë. Íyi panè bèrë, e' kîie er mukwã Skëköl è kî. <sup>7</sup> Er mèwã Skëköl è kî, e' kîie ñi sauk er bua' wa wes ñi èlpa es. Ñi suë er bua' wa, e' kîie ñi dalëritsök. <sup>8</sup> Íyi ekkë kôs weke a' tö, ñies ikî weke a' tö këkraë, e' tã e' wã kiane ché tö moki a' bàtse buaë Skëképa Jesucristo mik. A' serke es, e' tã ì kôs weke a' tö Skëköl a, e' wã dörattsa buaë. <sup>9</sup> Erë wépa e' chò tö ie'pa erblö Cristo mik, erë ie'pa kè tö íyi ekkë wawè, esepa dör wes s'wöbla kè wawër buaë es. Ie'pa kè éna iwà ane buaë. Wësua ie'pa éna ichowa tö ì sulu wamblë' ie'pa tö, e' pairi'ttsã Skëköl tö ie'pa kî. <sup>10</sup> A yamipa, a' e' diché ió senuk buaë yësyësë këkraë, e' wa iwà kkayërdaë tö moki Skëköl tö a' klöo'bak, a' shukitbakitö iwák a. A' tö iwé es, e' tã a' erblöke Cristo mik, e' kè olo'yepa a' tö yës. <sup>11</sup> E' wa aishkuö tã a' kirdawã buaë ì blúie Skëképa Jesucristo dör S'tsatkëkwak, e' tso' e' a. E' dör yöbië.

<sup>12</sup> Íyi ekkë jcher a' wã buaë. Tté moki wa a' e' wöblaö, e' a a' tso' e' tkëulewã darërëë. Erë ye' tö a' a' ikî ché michoë as a' kè éna ichöwa. <sup>13</sup> Ye' tso'ia' ttsë'ka, etã ye' a' tã buaë idir tö ye' tö a' a' tté i' kî ché as a' tö íyi ekkë wã bikeitsò këkraë. <sup>14</sup> Skëképa Jesucristo tö ye' a' iyë' tö wekkë alè tã ye' kè ku'ia' ká i' kî. <sup>15</sup> Ye' tö ì kôs wëraë as tté i' kè chöwa a' éna yës i' ñe' tã ñies mik ye' blënewatke e' ukuöki tã.

<sup>16</sup> Skëképa Jesucristo olo tã' taië, e' su' sa' tö sa' wákpa wöbla wa. E' kuëkî mik sa' tö a' wöblaö' ie' diché tã' taië ena ie' datkene e' tté wa, etã kè sa' wã ipakane a' a' tté kè wã tã' wes sa' wákpa tö ibikeitsè ché es a' kîtö'woie. <sup>17-18</sup> Mik sa' dë'rö ie' tã kabata batse'r,

e' tukir *kᵢ*, eᵗa ee Skéköl dör S'yé, e' tö ie' *kᵢkékā taië*. Ttò datse Skéköl olo *tā' taië* e' ska', e' tö ie' *ché i'* es: “Se dör ye' alà dalër *taië ye' éna*, e' wër ye' wa buaë *shüte*.” E' *kos su'* sa' tö. Ttò ñe' datse *ká jai a*, e' *ttsë' sa' tö*, sa' tso'ñak ie' *tā ee* e' *kuëki*.

<sup>19</sup> Ì *su' sa' tö*, ì *ttsë' sa' tö*, e' tö *ikᵢ cheke se' a* tö Jesús tté tso' kitule Skéköl yëkkuö *kᵢ ká iaiä* ittekölpa *wā*, e' yëne *mokᵢ*. E' *kuëki* ttè kit ie'pa tö yëkkuö *kᵢ*, e' wà *iütök a' kawöta* bua'iewā. Ttè e' dör *wes bö'wö batsëka* stui *a* tö *ká* olo ppeeke ese es. E' tö se' *er ñi'weke as* se' *éna iar* tö ì dör *mokᵢ*, ì dör *kache*. Ttè e' tö se' *kimeraë* dò mik Skékëpa Jesucristo datskene *eᵗa*. Mik ie' de, *eᵗa* ì *kos ardaë* buaë se' *éna*, e' dör *wes ká ñir s'ki* es. Jesucristo dör *wes bëkwö bërie wërke bla'mi* e' es. <sup>20-21</sup> Erë ì *kos tsata a' wā ijchenú* tö ì yë' Skéköl ttekölpa tö, tso' kitule Skéköl yëkkuö *kᵢ*, e' kè yëne ie'pa *wā* ie'pa *wákpa er wa*. Erë Skéköl tö ie'pa ké *ichök wes ie' kᵢ ikiane* es Wiköl Batse'r wa. E' *kuëki* ì kit Skéköl ttekölpa tö *ká iaiä*, e' kè yëne ie'pa *wā iwákpa er wa*, e' dör Skéköl ttè *mokᵢ*.

## 2

### *S'wöbla'ukwakpa kache tté wa*

<sup>1</sup> *Ká iaiä* Israel aleripa *shua kachökwakpa e'* ka'ka *e'* chök tö ie'pa dör Skéköl ttekölpa. Es ñies *i'ñe tā a' shua kachökwakpa e'* *köraka e'* chök tö ie'pa dör *s'wöbla'ukwakpa* Skéköl ttè wa. Ie'pa *e'* ò tö ie'pa tso' ttè *mokᵢ pakök*, erë ttè wa ie'pa tö *s'wöbla'weke*, e' tö *s'er sulu'wëwami* e' *iütësö*, e' *tā* Skéköl tö *s'we'ikeraë*. Skékëpa Jesucristo tö ie'pa *nuᵢ to'ttsa*, erë e' *wák watëttsa* ie'pa tö. E' *kuëki* ie' tö ie'pa *we'ikeraë* bet. <sup>2</sup> Erë *taië s'yamipa ardarö kache* ttè e' *a* *itrërdarak taië* *wes iwöbla'ukwakpa* es. Ie'pa *kuëki* ttè *mokᵢ e'* *cheraë suluë pë' malepa* tö. <sup>3</sup> *S'wöbla'ukwakpa kache tté wa*, e'pa *kᵢ inuköl è* kiane *taië*, e' *kuëki* ie'pa tö a' *inuköl yerattsā* ttè kè wà *tā' pakeke* ie'pa tö ese wa. E' *kuëki ká iaiä* ie'pa *esepa wöme'ttsabak* *weinuk* Skéköl tö, e' kè *ché'wa* ie' *éna*.

<sup>4</sup> *Ká iaiä* Skéköl *biyöchökwakpa wëlepa* tö ì *sulu wamblë' ie' kᵢ*, e' *nuᵢ kè* olo'yane ie' *wā* ie'pa *kᵢ*. Ie' tö ie'pa *batrélor bö' ké a*, ee ie'pa tso' *wötëule moulewa* stui *a* ie'pa *kichateraëitö aishkuö tā e'* panuk. <sup>5</sup> Ñies *ká iaiä* wakpa bak *senuk Noé këska' tā*, e'pa tö ì *sulu wamblë' taië*, e' *nuᵢ kè* olo'yane ie' *wā* ie'pa *kᵢ*. Noé tö *ipaka' ie'pa a* tö ie'pa *kawöta senuk yësyësë*, erë ie'pa kè *wā* ie' ttè *iütëne*. E' *kuëki* Skéköl tö ie'pa *ewéwa di' taië wa*. Noé ena *imalepa döka kul (7)*, e'pa è *tsatké* Skéköl tö *di' taië yöki*. <sup>6-8</sup> Ñies *ká iaiä ká* böt kiè *Sodoma* ena *Gomorra*, e' wakpa dör *pë' sulusi*. E'pa *shua wëm serke eköl* kiè *Lot*, e' *serke yësyësë*. Ie'pa *trër taië*, e' *ttseke*, e' *sueke* ie' tö *këkraë*, e' tö ie' dör buaë e' *erieweke siarë*. Ie'pa *nuᵢ kᵢ* Skéköl tö ie'pa *wömëttsā ewëwa*. Ie' tö ie'pa ena ie'pa *ká e'* *kos ña'wëwa seraq imuluchka è atë*. Erë *Lot*, e' è *tsatkëttsaitö*. Ie' tö ie'pa *ewéwa* es *iwā kkachoie sultane a* tö es *itköraë pë' sulusipa kos* *esepa tā*.

<sup>9</sup> E' *kos bak ká iaiä*, e' wa se' *wā ijcher* tö *wépa serke buaë yësyësë*, *esepa tsatkërmi* buaë Skéköl *a* ì *kos* tö ie'pa *we'ikeke* e' *ulà a*. Ñies se' *wā ijcher* tö *wépa* dör ì *sulu wamblökwakpa*, *esepa tso' blëule* ie' *wā ishulirkerak* e' *kéwö panuk*. <sup>10</sup> *Wépa e'* *mettsa e'* *ia'ukka sene sulusi* wa *wes* ie'pa *wák dër sulu kᵢ ikiane* es ena Skéköl ttè *watëttsarakitö*, *esepa kos* *we'ikeraëitö taië s'malepa tsata*.

*S'wöbla'ukwakpa kache tté wa*, e'pa *e'* *wamblörak kësik kësik*, kè tö ì *ulé klö'wëta'*, *iwökir darërëë*. Ie'pa kè *suane wépa* olo *tā' taië*, *esepa chök suluë*. <sup>11</sup> Skéköl *biyöchökwakpa diché tā' taië*, olo *tā' taië s'wöbla'ukwakpa kache tté wa*, *esepa tsata*, erë ie'pa kè tö *imalepa dör suluë esepa cheta' Skéköl a* *suluë as* *ikichatër*. <sup>12</sup> Erë ì *sulu wambleke s'wöbla'ukwakpa kache tté wa*, *esepa tö*, e' *wamblekerakitö kè wà bikeitsule* *wes* *iyiwak kañiru kè a ká artā' tso' klö'wëwā ttëwā* es. Ì kè *ane* ie'pa *éna*, e' *kos cheke* *suluë* ie'pa tö. Ie'pa *duörawā wes* *iyiwak kañiru ttëwā* es. <sup>13</sup> Ie'pa tö *s'malepa we'ikeke*, e' *skéie* ie'pa *weirdä siarë*. Ì *sulu* tö ie'pa *ttsë'weke buaë*, *ese kos wambleke* ie'pa tö *taië ñiwe kè jaër tā'ia*, *ese* tö ie'pa *ttsë'weke buaë*. Mik a' *ñi dapa'uke chkök ñita di'yök*

ñita, etä ie'pa tso' a' shua ì sulu wamblök e' ttsë'woie buaë. Ese wa ie'pa éna a' kitö'wak. Es ie'pa tö a' kawö sulu'wekewa. Ie'pa tö a' jaëwekeka taië. <sup>14</sup> Ie'pa er me'rie trë è ki. Ie'pa kè shtrirta'wa ì sulu wamblök. Wépa kè e' tkënewa darërë S'tsatkökwaq ttë a, esepa dakiñekerakitö as ie'pa tö ì sulu wamblöne wes ie'pa es. Ie'pa tö inuköl è kkecheke taië kekraë. Ie'pa wöme'ttsabak kichatée Skëköl tö. <sup>15-16</sup> Ie'pa dör wes s'cholur es. Nāla yësyësë e' olo'yé ie'pa tö e' wambloie wes ká iaiäë Beor alà kiè Balaam dör Skëköl tteköl, e' e' wamblë' es. Ie' mí ì sulu wamblök inuköl è dalërmik, erë Skëköl tö ie' burro ké ttökka ie' ta ta iuñéitö ta ichéitö ia: ¿ì wambleke be' tö aliie? E' tö Balaam wöklö'wë.

<sup>17</sup> S'wöbla'ukwakpa kache ttë wa, e'pa dör wes di' tum itö kè a di' ta' es. Ie'pa dör wes kalì morka mochka a uyë siwa' tö kè wà yërta' es. Ie'pa wömeulettsa weinuk michoë stui ké a. <sup>18</sup> Ttë pakeke ie'pa tö e' ttsë'r buaë, erë kè iwà ta'. Ì sulu kukuéña ie'pa wa ena ì sulu kiane s'wák dër sulu e' ki, e' wa ie'pa tö wépa e' yëttsa tsaririë isërkerak kitëule e' ulà a, esepa erkiöwekekane as iarmine ì sulu a. <sup>19</sup> Ie'pa tö icheke: “A' tö sa' ttë iuté, e' ta a' kè ku'ia klöulewa ì ulà a, a' sërmi wes a' wákpa ki ikiane es.” Ie'pa tö icheke es, erë ie'pa wákpa tso' klöulewa ì sulu ulà a, ie'pa kè a e' yërpattsä wes. Mik se' kè a e' yënëttsä ì ulà a, etä e' wà dör tö se' tso' klöulewa ulà a. <sup>20</sup> Skëképa Jesucristo dör S'tsatkökwaq e' mik se' e' batsé, e' wa sene sulusi tso' ká i' a e' olo'ya'sö. Erë se' anemine ì sulu ulà ane, kè tö ilo'yeta', e' ta se' a e' dör sulu ichökle kewe tsata. <sup>21</sup> Se' tö sene yësyësë e' ttë klö'bak buaë kewe. Erë e' ukuöki ta ttë dalöiëno batse'r mène se' a, e' olo'yésö, e'ma buaë idir tö kè sö iklö'úpa. <sup>22</sup> E' dör wes ttë mokì i' tö iché es: “Chichi chöli tuëttsä, e' ukuöki ta inéwaneitö.”\* Nies skà tö iché: “Köchi kuöwésö buaë, e' míä kuekane dó a.”

### 3

#### *Skëképa Jesús dörane*

<sup>1</sup> A yamipa dalër taië ye' éna, ye' tö yëkkuö tsá kit a' a, e' skà shtekeyö a' a, i' ta ide böt. Yëkkuö böt e' ki ye' tso', ttë jchertke a' wa, e' chökne a' a a' pattök as a' er arne iska' ta iwà bikeitsö bua'iewa yësyësë. <sup>2</sup> Ì ye' Skëköl ttekölpa batse'r e'pa tö ká iaiäë, e' ska' a' er anú. Nies ttë dalöiëno me'at Skëképa dör S'tsatkökwaq e' tö, e' ska' a' er anú. Sa' dör ittekölpa tsá, e'pa tö ttë e' yë' a' a.

<sup>3</sup> A' wa ijchenú bua'iewa tö ká i' erkewatke e' këwö ska' ta pë' serke suluë esepa döraë. Ie'pa tö ì sulu è wambleke wes ier sulu tö ikieke ia es. Ie'pa tö a' wayueraë <sup>4</sup> ta a' a ichakeraë: “Jesucristo kablë' dökne ¿wes e' de? Ikkë ta kè iwër ta, ¿wé idir? Se' kékëpa blërulunebak, etä iyi kos mir iwák suë wes iyöne kuaë es.” <sup>5</sup> Erë ie'pa wa ijcher tö ì cheke ie'pa tö e' kè yëne. Ie'pa kè ki ikiane ttsëno tö ká iaiäë Skëköl tö ká jai ena ì kos tso' ia, e' yö' ittö è wa. Nies ká i' ena ì kos tso' iki, e' yö' ie' tö ittö è wa. Ká i' dë'ka ie' wa di' a, es di' tso' ká i' pamik shkit. <sup>6</sup> Ie'pa kè ki ikiane ttsëno tö ì ulitane bak senuk ká i' a, e' eo'wa Skëköl tö di' taië bak e' wa. <sup>7</sup> Erë ká jai ena ká i' tso' i'ñe ta, e' kicha a'ria ie' wa iwák ttë wa dò mik ie' tö iëwekewa bö' wa aishkuö ta etä. E' kos tköraë mik pë' sulusipa shulirke kichatërkettsä e' këwö de etä.

<sup>8</sup> A yamipa dalër taië ye' éna, kè a' éna ichökwa tö Skëköl a ká etkë, e' dör wes duas dökä mil eyök es, nies duas dökä mil eyök, e' dör wes ká etkë es. <sup>9</sup> Skëképa Jesús kablë', e' wà tköraë. Ie' datskene sulitane shulök mik Skëköl ki ikiane etä. E' kè dör tö ie' kablë' e' chowa ie' éna wes pë' welepa tso' ibikeitsök es. E' kè dör es. Ie' kè ki ikiane tö yi weir aishkuö ta. Ie' ki ikiane tö sulitane er mane'ù ie' a. E' wà panuk ie' tso' enaë. E' kueki ie' kam döne.

<sup>10</sup> Erë ie' dörane, kè tköpa. Mik ie' datskene, etä e' këwö döraë kè e' biyó yëule wes akblökwaqpa döwa nañewe es. Mik ie' de, etä ká jai kos blardaë taië ta ichörawa kè wërpaia. Ì kos tso' ká jai a, e' ñardawa diardawa. E' sù ká i' ena ì kos tso' iki, e' ñardawa

\* 2:22 Proverbios 26.11

sekka, kè ì atukia. <sup>11</sup> E' kos ɛrdawa es, e' ta ɔwɛs kè se' serpa batse'r e' tkèulewà darèrèè Skèköl è a? <sup>12</sup> E' kèwö panuk se' tso' poë, e' dalewa se' e' chò senuk wɛs Skèköl kɪ ikiane es as ikèwö e' dò bet. Mik e' kèwö de, età ká jai ñardawa ena ì kos tso'ia, e' diardawà ɛrdawa bö' wa. <sup>13</sup> Erè Skèköl kablè' ká jai pa'alì ena ká i' pa'alì e' yuök se' a. Wépa serke yèsyèsè, esepa è serdaë eë. Eë ì sulu kè ta'. E' wà paneke se' tò poë.

<sup>14</sup> A yamipa dalër taië ye' éna, a' tso' íyi ekkè wà panuk, e' dalewa a' e' tkówà darèrèè senuk as mik e' kèwö de, età ie' tò a' kù senuk bèrè ñita, kè iauleka, kè kɪ ì sulu tté ta'.

<sup>15</sup> A' éna ianú tò Skèképa Jesús kam dò, ie' tso'ia ipanuk as s'tsátkër. Ñies ttè e' kitat a' a yèkkuö kɪ s'yami Pablo dalër taië se' éna e' tò. Ie' tò ikitat erbikè taië me' Skèköl tò ie' a e' wa. <sup>16</sup> Ttè i' kit Pablo tò yèkkuö kos kit ie' tò ekkè kɪ. Ie' ttè wɛle dör darèrè, kè wà ar se' éna bet. Pè' wɛlepa kè yöule buaë, kè e' tkèulewà buaë Jesucristo ttè a, esepa tò Pablo ttè darèrè, e' wà shkuli'wèkewà wɛs ie'pa tò Skèköl ttè kitule yèkkuö kɪ malepa, e' wà shkuli'wèkewà es. E' nuí kɪ ie'pa weirdaë siarè.

#### *Ttè bata*

<sup>17</sup> A yamipa dalër taië ye' éna, íyi ekkè kos jchertke a' wà buaë. E' kuëkɪ a' e' kkö'nú pè' sulusi ñe'sepa yöki as a' kè tò ie'pa ttò iutò. A' tso' erkɪ as a' e' tkèulewà buaë S'tsátkökwak mik, e' kè olo'yò a' tò. <sup>18</sup> Skèképa Jesucristo dör S'tsátkökwak, e' er buaë ché se' a, e' ttè wa a' kí e' yuó. Ie' mik a' kí e' batsó bua'ie. ¡As ie' kikarka taië i'ñe ta ena kekraë! Es e' idir.

## Yëkkuö tsá kit Juan tö 1 Juan

Yëkkuö i' kit Jesús ttekölpa tsá e' eköl kiè Juan e' tö. Ie' tö ikit Jesús mik erblökwakpa serke Asia e'pa a. 1 Ìñe ta ká e' kiè Turquía. Ie' tö ikit etá ie' dewatke kékëla. Nies yëkkuö skà kit ie' tö döká tkël, e' böt dör tsitsir, böt dör blublu. Yëkkuö blublu e' et kiè 'Jesús Tté Buaë kit Juan tö' ena iët kiè 'Ì Kkayë' Jesucristo tö Juan a e' Pakè.'

Skëköl éna Jesús mik erblökwakpa dalër taië ena íyi taië buaë o' ie' tö ie'pa a Jesucristo batamik, e' pakè Juan tö yëkkuö i' kî. Nies ie' tö iché tö mik se' ñi dalëritsöke etá se' wa ijcher tö Skëköl dör se' wák, e' kuëki se' kawöta ñi dalëritsök.

E' kîje ta ie' tö yëkkuö i' kit Jesús mik erblökwakpa a s'wöbla'ukwakpa kache tté wa esepa biyó choie. Ie'pa tö s'wöbla'weke tö Jesús kè dör wes s'ditsö es. Ie'pa tö ichè tö ie' wër se' sù erè kè idör se' es. Jesús mik erblökwakpa kè kàne ie'pa ttò ttsök. Ie'pa dör s'kitö'ukwak. Skëköl Wiköl e' je' tö Skëköl ena ilà Jesucristo e'pa tté mokî e' kkacheraë se' a. Es Juan tö iché yëkkuö i' kî.

### *Sene michoë mukwak*

<sup>1</sup> Itso' eköl dör ttè tö sene michoë meke se' a e'. E' tté pakeke ye' tö a' a yëkkuö i' kî. Tsawemi ta ie' tso'tke, erè ìñe ta sa' tö ichè a' a tö ie' ttò ttsé' sa' tö, ie' su' sa' tö ena ì o' ie' tö e' su' sa' tö, ñies ie' ka' sa' tö sa' ulà wa. <sup>2</sup> Ie' dör sene michoë mukwak, e' patkë'bitu S'yé tö ká i' a s'ditsöie e' kkachök se' a, e' su' sa' tö. E' kuëki sa' tö ie' tté mokî e' pakeke a' a. Sa' tö ichè a' a tö ie' tö sene michoë meke se' a. Ie' bak S'yé ta ñita kuaë kekraë, erè S'yé tö ie' kkayë' sa' a. <sup>3</sup> Es ie' su' sa' tö, ittò ttsé' sa' tö, e' tté pakeke sa' tö a' a i' ta as a' bàtswa sa' mik wes sa' batsulewá S'yé mik ena ilà Jesucristo mik es. <sup>4</sup> Yëkkuö i' shteke sa' tö a' a as a' ttsé'r buaë mokîë.

### *Sene yësyësë*

<sup>5</sup> Tté wa Jesucristo tö sa' wöbla'o', e' wà pakeke sa' tö a' a, e' dör i': Skëköl dör buaë yësyësë, kè kî ì sulu ta' wes ká ñi kè a ká ttsettse ta' es. <sup>6</sup> E' kuëki se' e' chò tö se' batsulewá ie' mik, erè se' tso'ia ì sulu wamblök, e' ta se' tso' kachök. Se' kè tö tté mokî e' iuteku'. E' dör wes se' serkeia ká ttsettse a es. <sup>7</sup> E' skéie, se' serke yësyësë wes ie' ser yësyësë es, e' ta se' bàtsë buaë ñi mik. Nies ie' alà Jesucristo, e' pé wa se' pairirke se' nuì kos e' kî.

<sup>8</sup> Se' e' chò tö se' kè tö ì sulu wambleta', e' ta se' wák e' kitö'uke, ñies tté mokî kè ku' se' er a. <sup>9</sup> Erè Skëköl ttò mokîë ena ie' dör yësyësë. E' kuëki se' e' kkatéka ie' a, e' ta se' nuì olo'yeraëitö se' kî, ñies sene sulu nuì kos paikleraëitö se' er a. <sup>10</sup> Se' e' chò tö se' kè tö ì sulu wambleta', e' ta se' tso' ichök tö Skëköl kachöta', ñies iwënewá tö ie' tté kè ku' se' er a.

## 2

<sup>1</sup> A' ye' ala'rla, ye' tso' tté ikkë shtök a' a as a' kè tö ì sulu wamblö. Erè se' wele tö ì sulu wamblé, e' ta s'tsatkökwak tso' eköl S'yé ska', e' dör Jesucristo dör yësyësë e'. <sup>2</sup> Jesucristo e' me'ttsa ttèwá se' skéie sene sulu nuì olo'yoie se' kî. Erè ie' kè kötewá se' è nuì kî, ñies ie' kötewá ká ulitane wakpa nuì kî.

### *Se' kawöta ñi dalëritsök*

<sup>3</sup> Skëköl tté dalöiëno e' dalöiekesö, e' ta e' wa se' wá ijcher buaë tö se' bàtsë ie' mik. <sup>4</sup> Yi e' chò: "Ye' bàtsë buaë Skëköl mik", erè ese kè tö ittè dalöieku', e' ta ie' tso' kachök, kè ittò mokî. <sup>5</sup> Erè yi tö ie' tté dalöieke, ese je' éna ie' dalër mokîë. Es se' wá ijcher tö se' batsulewá ie' mik. <sup>6</sup> Yi e' chò: "Ye' tkérie Skëköl mik", ese ké senuk wes Jesucristo sene es.

<sup>7</sup> A yamipa dalër taië ye' éna, ttè dalöiëno shtekeyö a' a' i', e' kè dör ttè pa'ali a' a'. Tsawe ta ttè e' yënebak a' a'. Ttè e' meneat ká iaiaë, e' ttsëuletke a' wa, e' dör i': se' kawöta ñi dalërītsök. <sup>8</sup> Ttè e' meneat ká iaiaë, erë e' kèwö ska' ta se' er tso'ia wës ká ttsettse a es, e' kueki kè se' éna iwà ane buaë. Erë i'ñe ta se' er a ká ñirketke Cristo ttè moki e' kueki. Wës Cristo éna se' dalëne, ñies wës a' ñi dalër, e' wa iwër wësua tö ttè e' dör pa'ali.

<sup>9</sup> Yi e' chò: “Cristo ttè tö ye' er ñi'wé”, erë ese éna iyami ar suluë, e' ta ie' er kam ñir, ie' er tso'ia ká ttsettse a. <sup>10</sup> Erë ye' éna iyami dalër moki, ese er a ká ñine buaë, kè ì tö ie' epamine sene sulu a. <sup>11</sup> Erë ye' éna iyami ar suluë, ese er tso'ia ká ttsettse a. Ie' e' wamblò suluë, kè ie' wa ijcher ì dör suluë. Ie' dör wës s'shköke ká ttsettse a es. Ká ttsettse kè tö ie' kawö mè ká sauk, e' kueki kè ie' wa ijcher wé ie' mírö.

*A' kè kàne er mukwa ì kos tso' ká i' a ese ki*

<sup>12</sup> A ala'rla, a' nuì kos olo'yane a' ki Jesús batamik, e' kueki ye' tso' yëkkuö i' shtök a' a'. <sup>13</sup> A' dör kèkèpatke, a' bàtse Jesús tso'tke tsawe ta e' mik, e' kueki ye' tso' yëkkuö i' shtök a' a'. A duladulapa, a' e' ali'ka bé ki, e' kueki ye' tso' yëkkuö i' shtök a' a'.

A ala'r, a' dör wës ye' ala'rla es, a' bàtse S'yé mik, e' kueki ye' tso' yëkkuö i' shtök a' a'. <sup>14</sup> A' dör kèkèpatke, a' bàtse Jesús tso'tke tsawe ta e' mik, e' kueki ye' tso' yëkkuö i' shtök a' a'. A duladulapa, a' e' tkéwa darërè Skèköl ttè a, e' tso' a' er a, ñies a' e' ali'ka bé ki, e' kueki ye' tso' yëkkuö i' shtök a' a'.

<sup>15</sup> Kè a' er mukwa ká i' ki ena ì tso' iki ese ki. Yi er méwa iki ese kè éna S'yé dalërta'. <sup>16</sup> ¿ì tso' ká i' a? E' dör ì kos tö s'wák dër sulu ttsë'weke buaë ese. Ñies e' dör ì kos wa s'wöbatsö kkechekesö taië ese. Ñies e' dör íyi tso' se' wa wa se' e' ttsòka taië ese. Íyi ekkè kos tso' ká i' a, ese kè menebitu S'yé wa se' a, e' datse ì sulu tso' ká i' a ese wa. E' kueki kè se' er mukwa íyi ekkè ki. <sup>17</sup> Ká i' erkewatke, ñies ì sulu kos tso' iki tö se' erkiöweke ese erkewatke. Erë wépa tö ì kiane Skèköl ki ese weke, esepa ser michoë.

<sup>18</sup> A ye' ala'rla, ká i' erkewa e' kèwö döketke. A' éna iane tö sa' tö a' a iyè' tö mik ká i' erkewatke, eta eköl idatse kiè Cristo Bolök. Es i'ñe ta a' tö isueke tö taië Cristo bolökpa tso', e' kueki se' wa ijcher tö ká i' erkewa e' kèwö döketke. <sup>19</sup> Ie'pa bak se' èltépa ta, erë ie'pa e' yélurne. E' wa iwënewa tö ie'pa kè dör moki se' èltépa. Ie'pa chópa se' èltépa moki, e' ma ie'pa tso'ia se' ta. Erë ie'pa e' yélurne, e' wa iwënewa wöshak tö ie'pa kè dör se' èltépa.

<sup>20</sup> Cristo dör ye' dör batse'r ichökle, e' tö a' batse'wé Wiköl Batse'r wa, e' kueki a' wa Cristo ttè mokié e' jcher. <sup>21</sup> Ye' tso' yëkkuö i' shtök a' a, e' wà kè dör tö a' kè wa Cristo tté jcher. E' skéie a' wa ie' tté jcher buaë, e' kueki ye' tso' yëkkuö i' shtök a' a. A' wa ijcher tö kachökwakpa kè tö ttè moki paketa'. <sup>22</sup> Eta ¿wépa dör kachökwakpa? Wépa tö icheke tö Jesús kè dör wé pairine'bitu idi' wa s'blúie e', esepa dör kachökwakpa. Esepa dör Cristo bolökpa, ie'pa tö S'yé ena ilà watéttsa e' kueki. <sup>23</sup> Wépa tö icheke tö Cristo kè dör Skèköl Alà, esepa tso' ie' watöktsa, ñies ie'pa tso' S'yé watöktsa. Erë wépa tö icheke tö Cristo dör Skèköl Alà, esepa tso' buaë S'yé ta.

<sup>24</sup> Cristo ttè moki ttsé' a' tö mik a' tö iklöo' tsawe ta, e' seú a' er a kekraë. E' wé a' tö es, e' ta a' serdaë batsulewa S'yé ena ilà mik kekraë. <sup>25</sup> Ì muk Jesucristo kablè' se' a' e' dör i': sene michoë e'.

<sup>26</sup> Ye' tso' yëkkuö i' shtök a' a as a' e' kkö'nù s'kitö'ukwakpa yöki. <sup>27</sup> Erë Cristo tö a' batse'wé Wiköl Batse'r wa, e' tso'ie a' a, e' kueki ye' wa ijcher tö ie'pa kè tö a' kitö'wépa. Wiköl Batse'r mène a' a, e' tö a' er ñi'weke as ttè ikké kos wà ar buaë a' éna. Ttè wa ie' tö a' wöbla'weke, e' dör ttè moki, kè dör kache. E' kueki a' kè ki ikiane tö yi skà bitu a' wöbla'uk. Es a' senú batsulewa Cristo mik wës Wiköl Batse'r tö a' wöbla'weke es.

*A' kè e' muktsa e' kitö'uk ye' a' ì sulu wamblöie*



<sup>28</sup> A ala'rla, a' senú batsulewá Cristo mik kékraë as a' kè suar ena a' kè jaër ie' wörki mik idatskene eta.

<sup>29</sup> A' wá ijcher tö Cristo ser yësyësë, e' kueki a' wá ijcher ñies tö wépa serke yësyësë, esepa dör Skëköl ala'r.

### 3

<sup>1</sup> A' ittso tö wekkë Skëköl dör S'yé e' éna se' dalër, ie' tö se' kiè iwák ala'r. Moki se' detke ie' ala'rie. Erë wépa kè tö ie' dalöië, esepa kè e' batsöta' ie' mik, e' kueki ie'pa kè éna iwà ane tö se' dör ie' ala'r. <sup>2</sup> A yamipa dalër taië ye' éna, i'ñe ta se' tso'tke Skëköl ala'rie, aishkuö ta ie' tö se' mane'wëraë bua'ie, erë kam se' éna iwà ar tö wës se' mane'ormi. Mik Cristo datskene, eta se' tö ie' wák sueraë, e' kueki se' wá ijcher buaë tö se' döraë wës ie' wák es. <sup>3</sup> Wépa kos tso' ttè e' wá panuk, esepa e' batse'uke senoie yësyësë wës Cristo ser es.

<sup>4</sup> Yi tö Skëköl ttè dalöiëno e' dalösewëkewa, ese tö ì sulu wambleke. E' kueki wépa tö ì sulu wamblekeia, esepa tö Skëköl ttè dalöiëno, e' dalösewëkewa. <sup>5</sup> A' wá ijcher buaë tö Jesucristo dë'bitu ká i' a se' nuì olo'yök. Ie' kè tö ì sulu wambleta' yës. <sup>6</sup> E' kueki wépa tkërie Cristo mik, esepa kè ku'ia ì sulu wamblök. Erë wépa tö ì sulu wamblekeia, esepa kè wá Cristo suule moki, ie'pa kè bats ie' mik. <sup>7</sup> A ye' ala'rla, a' kè e' muktsa e' kitö'uk yi a ì sulu wamblöie. Yi serke yësyësë, ese dör yësyësë wës Cristo dör yësyësë es. <sup>8</sup> Erë yi tö ì sulu wambleke, ese dör bé icha. Ie' e' wamblö sulu kuaëmi', es ie' dör kékraë. E' kueki yi tö ì sulu wambleke, ese dör ie' icha. Erë Skëköl Alà dë'bitu e' wá dör bé kanë kos e' olo'yökwa. <sup>9</sup> Wépa erblé Jesucristo mik, esepa kunene etökichane Wiköl Batse'r wa, ie'pa dör Skëköl ala'r, e' kueki ie'pa wák dër wës Skëköl wák es. E' kueki ie'pa kè serku'ia klöulewá ì sulu ulà a. Ie'pa dör Skëköl ala'r e' kueki ie'pa kè a ì sulu wamblënkua. <sup>10</sup> ¿Ì wa isuëmisö tö wépa dör Skëköl ala'r ö bé ala'r? Wépa kè ser yësyësë, kè tö s'yamipa dalëritsë, esepa kè dör Skëköl ala'r.

#### *Se' ñi dalëritsö*

<sup>11</sup> Kuaë, mik a' tsá erblé' Cristo mik, e'tami ttè i' ttsé'bitu a' tö: se' ñi dalëritsö. <sup>12</sup> Kè se' kàne ñi sauk suluë wës Caín tö iël su' suluë es. Ie' dör bé icha. Ie' tö iël kötwa. Ie' e' wamblö suluë erë iël ser yësyësë, e' kueki ie' tö ikötwa.

<sup>13</sup> A ye' yamipa, wépa kè tö Skëköl dalöië esepa tö a' suëke suluë, e' ta kè e' ki a' tkinuk. <sup>14</sup> Se' ñi dalëritsöke e' wa iwënewá tö Skëköl tö se' er mane'wëttsa pa'ali. Kam se' erblö Skëköl mik, eta se' dör wës s'duulewá es ie' a, erë i'ñe ta se' dör ttsé'ka ie' a. Yi kè tö iyami dalëritsë, ese tso'ia wës s'duulewá es ie' a. <sup>15</sup> Ie' a wépa kos tö s'yamipa suëke suluë, esepa dör s'ttökwa wakpa. A' wá ijcher tö s'ttökwa wakpa kos kè wá sene michoë ta'. <sup>16</sup> Jesucristo e' me'ttsa ttëwá se' skéie, e' wa ie' tö iwà kkaché tö wës se' kawöta ñi dalëritsök. E' kueki se' kawöta e' muktsa s'yamipa kimuk se' wák er wa dò s'ttëwá ie'pa skéie ekkë. <sup>17</sup> E' kueki yi wá íyi tso' ká i' a, ese tö s'yamipa sué tö iweirke, erë ie' er téwá darëre iyöki, kè tö ì kakmè ia, e' ta ¿wës ie' ichëmi tö ie' éna Skëköl dalër? <sup>18</sup> A ye' ala'rla, kè se' kàne ñi dalëritsök kkò è wa, e' skéie se' kawöta ñi dalëritsök mokië iwawatke.

<sup>19-20</sup> Se' ñi dalëritsöke, e' wa se' wá ijcher mokië tö se' serke buaë wës Skëköl ttè moki tö ichè es. Mikle ta se' wák er tö se' kcateke tö kè se' ku' iwà iütök buaë. Erë Skëköl dör se' er tsata, ie' wá íyi ulitane jcher. E' kueki se' ñi dalëritsöke, e' ta se' er ttsé'rdaë buaë ie' wöa kè suane. <sup>21</sup> A yamipa dalër taië ye' éna, se' er kè tö se' kkatè, e' ta se' ttsé'rmi buaë Skëköl wöa kè suane. <sup>22</sup> Ie' ttè iütokesö ena ì wër buaë ie' wa ese wëkesö, e' ta ì kos kiekësö ie' a, e' meraëitö se' a. <sup>23</sup> Ie' ttè dalöiëno, e' dör i': se' kawöta erblök ie' alà Jesucristo mik, ñies se' kawöta ñi dalëritsök wës Cristo tö se' a iyë'at es. <sup>24</sup> Wépa tö ie' ttè dalöieke, esepa serke batsulewá ie' mik, ñies ie' tso' batsulewá ie'pa mik. Ie' tö iWiköl me' se' a, e' wa se' wá ijcher tö ie' tso' batsulewá se' mik.

## 4

*A' ké ttè ulitane wà sɔk buaë tò mokì idir*

<sup>1</sup> A yamipa dalër ye' éna, taië kachökwakpa tso' ká wa'ñe e' chök tò ie'pa dör Skököl ttekölpa. Esepa webló buaë tò ie'pa dör Skököl icha ö au. <sup>2</sup> Wépa tò ichekeka tò Jesucristo yöne s'ditsöie, eseпа dör Skököl icha. Es a' wà ijchermi tò wépa a Skököl Wiköl tso'. <sup>3</sup> Erë wépa kè tò Jesús chè es, eseпа kè a Skököl Wiköl ku'. E' skéie Cristo Bolök wiköl tso' iarak. A' wà ittseüle tò ie'pa eseпа datske, itso'rakke i'ñe tã ká i' a.

<sup>4</sup> A ala'rla, a' dör Skököl icha. Ie' Wiköl tso' a' a, e' diché taië tkòka yi tso' wépa kè tò ie' dalöieta' eseпа a e' tsata. E' kueki a' e' aléka kachökwakpa ñe'pa ki. <sup>5</sup> Ie'pa kè tò Skököl dalöie, e' kueki ie'pa tò s'wöbla'weke ttè ese wa. Imalepa tò ie'pa ttè ttseke buaë. <sup>6</sup> Erë se' kè dör es, se' dör Skököl icha. Wépa batsë ie' mik, eseпа tò se' ttè ttseke buaë. Wépa kè dör ie' icha, eseпа kè tò se' ttè ttsepa. E' wa sö isuëmi tò yi tò s'wöbla'weke ttè mokì wa Wiköl Batsë'r wa, ö yi tò s'wöbla'weke kache ttè wa.

*Skököl tò se' dalëritseke taië*

<sup>7</sup> A yamipa dalër taië ye' éna, Skököl tò se' a diché mé ñi dalëritsoie, e' kueki se' ké ñi dalëritsök. Wépa ñi dalëritsöta', eseпа dör ie' icha, ñies ie'pa batsë ie' mik. <sup>8</sup> Skököl wák éna s'dalër, es ie' dör, e' kueki wépa kè ñi dalër, eseпа kè bats ie' mik. <sup>9</sup> Ie' tò ilà eköl ème e' patkë' ká i' a as sene michoë dò se' ulà a ilà batamik, e' wa ie' tò se' a iwà kkaché tò se' dalër ie' éna. <sup>10</sup> Skököl dalër se' éna, e' kè dör iwà. Iwà dör tò ie' tò se' dalëritsé tã ilà patkéitò ttèwã se' skéie as se' nuì olo'yar.

<sup>11</sup> A yamipa dalër taië ye' éna, ekkë Skököl tò se' dalëritsé, e' kueki se' ké ñi dalëritsök. <sup>12</sup> Kè yi wà ie' suule iwöbla wa, erë se' ñi dalëritsöke mokie, e' tã e' wa iwënewã tò ie' batsulewã se' mik ena se' ñi dalëritsöke wes ie' ki ikiane es. <sup>13</sup> Ie' tò iWiköl me' se' a, e' wa se' wà ijcher tò se' batsulewã ie' mik ena ie' batsulewã se' mik. <sup>14</sup> Ñies sa' tò isu' tò S'yé tò ilà patkë' ká i' a sulitane tsatkök. Ì cheke sa' tò, e' dör mokì. <sup>15</sup> Wépa tò iklö'wé tã icheke tò Jesús dör Skököl Alà, eseпа mik Skököl batsulewã, ñies ie'pa batsulewã ie' mik.

<sup>16</sup> Es se' wà ijcher ena iklö'wésö tò Skököl éna se' dalër taië. Këkraë ie' wák éna se' dalër taië. Wépa éna s'malepa dalër ena ie' dalër, eseпа batsulewã ie' mik ena ie' batsulewã ie'pa mik. <sup>17</sup> Se' ñi dalëritsò wes ie' ki ikiane es, e' tã es se' serke yösyësë ká i' a wes Jesucristo ser es. Se' serke es as kè se' suar s'shulirke e' kéwö yöki. <sup>18</sup> Se' suane Skököl yöki, e' tã e' wà kiane chè tò se' éna iane tò se' weirdaë ì sulu wamblekesö ese nuí ki. Erë wépa éna ie' dalër ena s'malepa dalër, eseпа kè suane ishulirketke aishkuö tã e' yöki. E' kueki wépa suane e' yöki, e' wà kiane chè tò kam ie'pa éna ie' dalër ena s'malepa dalër buaë wes ie' ki ikiane es.

<sup>19</sup> Skököl tò se' dalëritsé këwe, e' kueki se' ñi dalër. <sup>20</sup> Se' e' chö tò se' éna ie' dalër, erë s'yamipa erblöke Jesús mik, eseпа suëkesö suluë, e' tã se' tso' kachök. S'yami suësö, ese kè dalër se' éna, e' tã ¿wes Skököl kè sune s'wã e' dalërmi se' éna? E' kueki se' wà ijcher tò se' e' chö es, e' tã s'tso' kachök. <sup>21</sup> Ie' tò ttè i' me'at se' a dalöie: yi éna Skököl dalër, ese ké iyamipa dalëritsök ñies.

## 5

*Se' erblö wa se' e' alòka ì sulu tso' ká i' a ese ki*

<sup>1</sup> Wépa kòs tò iklö'wé mokie tò Jesús dör wé pairine'bitu idi' wa s'blúie e', eseпа dör Skököl ala'r mokie. Yi tò iyé dalëritseke, ese tò ila'r dalëritseke ñies. <sup>2</sup> Skököl dalër se' éna ena ittè dalöiëno e' wà iutekesö, e' wa se' wà ijcher tò mokì se' tso' Skököl ala'r dalëritsök ñies. <sup>3</sup> Skököl dalër se' éna e' wà dör tò ittè dalöiëno e' wà iutekesö. Ie' ttè dalöiëno, e' kè dör darërëe se' a iutè. <sup>4</sup> E' wà dör tò wépa dör Skököl ala'r, eseпа e' alòka ì sulu tso' ká i' a ese ki. Se' erblöke Jesús mik, e' wa se' a diché mène e' aloka ì sulu kòs ese ki. <sup>5</sup> Wépa tò iklö'wé mokie tò Jesús dör Skököl Alà, eseпа è e' alòka ì sulu kòs tso' ká i' a ese ki.

<sup>6</sup> Jesucristo dē'bitu ká i' a, e' wösuk Juan tö di' a, ñies ie' kötewā krus mik ipé tēne taië; e' wa se' tö isueke tö ie' dör Skëköl Alà. Ie' kè dē'bitu wösue è, ñies ie' dē'bitu ttewā pé tēne taië. Skëköl Wiköl tö se' a ikkacheke tö mokjē idir, ie' ttò mokjē kekraë e' kuëkì. <sup>7</sup> Jesucristo dör Skëköl Alà, e' wà kkayēne se' a íyi mañatökicha wa. <sup>8</sup> Skëköl Wiköl tö icheke se' a tö mokj idir, ñies ie' wösune di' a, ñies ie' kötewā krus mik ipé tēne; ttè mañat e' tö icheke ñikkëë. <sup>9</sup> S'ditsö ttè klö'wésö, e' yita Skëköl ttè klö'wëmisö buaë, e' dör ibua'ie e' kuëkì. E' dör ie' Alà chéitö se' a e' tté. <sup>10</sup> Yi erblöke ie' alà mik, ese wā ijcher buaë tö mokj Jesús dör ie' Alà wës ie' tö iyë' es. Erë yi kè tö iklö'wè, ese tö Skëköl sueke kachökwakie, ie' kè tö ittè klö'wè e' kuëkì. <sup>11</sup> Ttè e' dör i' es: Skëköl tö sene michoë meke se' a ie' Alà batamik. <sup>12</sup> Yi batsulewā ie' Alà mik, ese wā sene michoë tso'. Erë yi kè ku' batsulewā imik, ese kè wā ita'.

#### *Ttè bata*

<sup>13</sup> Ye' tso' yëkkuö i' shtök a' erblöke Skëköl Alà mik esepa a as a' éna iar buaë tö a' wā sene michoë tso'.

<sup>14</sup> E' dör es, e' tã kè se' suane ilè kiök Skëköl a. E' wà dör tö se' wā ijcher tö ilè kiésö ie' a e' dör ì kiane ie' kì ese, e' tã ie' tö ittésé. <sup>15</sup> Se' wā ijcher tö ie' tö ittésé, e' tã se' wā ijcher tö ì kiésö ie' a, e' detke se' ulà a.

<sup>16</sup> Yile tö isué tö iyami erblöke Cristo mik, ese tso' ì sulu wamblök, erë e' kè kì ie' kichatë nuk aishkuö tã, e' tã a' kawöta ikiök Skëköl a iki tã ie' tö inuí olo'yeraë iki tã sene michoë meraëitö ia. Erë ì sulu tso' et, e' nuí kè olo'yepa Skëköl tö se' kì, e' nuí kì se' kichatërdaë wake'. Ye' kè tö ichekü' tö a' tö ikió yi tö ì sulu e' wamblé ese kì. <sup>17</sup> Ì sulu kōs wamblekesö, e' dör suluë S'yé wöa. Ì sulu wamblekesö kōs e' nuí olo'yèmiitö se' kì. Erë ì sulu chéyö ñe' è nuí kè olo'yepaitö se' kì.

<sup>18</sup> Se' wā ijcher tö wépa wā Skëköl tso' iYéie, esepa kkö'neke Skëköl Alà tö as bé kè a ie'pa or wës, e' kuëkì ie'pa kè tö ì sulu wamblëia. <sup>19</sup> Se' wā ijcher tö se' dör Skëköl icha, ñies se' wā ijcher tö pé' malepa kōs tso' klöulewā bé ulà a. <sup>20</sup> Ñies se' wā ijcher tö Skëköl Alà dē'bitu ká i' a, e' tö se' er ñi'wé as se' e' batsö yi dör Skëköl ichökle e' mik. Ì ñe tã se' serke batsulewā yi dör ichökle e' mik, se' batsulewā ilà Jesucristo mik e' wa, e' dör Skëköl ichökle ena sene michoë e' mukwak. <sup>21</sup> A ala'rla, a' e' kkö'nú, íyi diököl tso' dalöiè ese kōs yöki.

## Yëkkuö skà kit Juan tö i' tã ide böt 2 Juan

Yëkkuö i' kit Jesús ttekölpa tsá e' eköl kiè Juan e' tö. Ie' tö yëkkuö skà kit dökã tkël. Pë' welepa tö ibikeitsè tö ie' tö yëkkuö i' kit alaköl eköl ena ila'rla e'pa a. Erë iëltëpa tö ibikeitsè tö "alaköl" ena "ala'rla" e' wà kiane chè Skëképa Jesús icha erule wele. E' kueki welepa tö ibikeitsè tö ie' tö ikit Skëképa icha erule wele a.

S'kítö'ukwakpa dë'mi Jesús mik erblökwakpa shua e'pa kè tö s'wöbla'weku' Jesús ttë buaë e' wa. Ie'pa éna Jesús mik erblökwakpa tsakmi ñalã sulusi kï. E' kueki Juan tö yëkkuö i' kit pë' ñëkkëpa biyó choie ie'pa a. Ñies ie' tö iché tö Jesús mik erblökwakpa kawötã ñi dalëritsök.

### *Shkë'wè*

<sup>1</sup> A tayë\*, be' shukitbak Skëköl tö. Ye' kiè a' tö blë'këképa, e' tso' yëkkuö i' shtök be' a ena be' ala'r a. Mokië a' dalër taië ye' éna. Ñies wëpa tö Skëköl ttë moki e' klö'wé, esepa kos éna a' dalër taië. <sup>2</sup> Ttë moki e' tso' se' kos er a, e' tso' se' tã kekraë, e' kueki sa' éna a' dalër taië. <sup>3</sup> Skëköl dör S'yé ena ilã Jesucristo, as e'pa er buaë chò a' a ena a' saù er siarë wa. As ie'pa tö sene bèrë mù a' serke ttë moki a ena ñi dalëritsè a, esepa kos a.

### *Se' kawötã ñi dalëritsök*

<sup>4</sup> Ye' wã ijchenewã tö be' ala'r welepa tso' S'yé ttë mokië, e' wà dalöiök buaë wes ie' tö ime'at se' a es. E' tö ye' ttsë'weke buaë. <sup>5</sup> A tayë, ye' tö be' a ichè tö se' ulitane kawötã ñi dalëritsök. Ttë e' kè dör ttë dalöiëno pa'alí shtekeyö a' a. E' dör ttë yënebitu se' a tsawe e'. <sup>6</sup> Se' serke yësyësë wes Skëköl ttë dalöiëno tö ichè es, e' tã se' tso' Skëköl dalëritsök mokië. Ie' ttë dalöiëno tö ichè tö se' kawötã ñi dalëritsök. Ttë e' ttsë'bitu a' tö tsawe.

### *S'wöbla'ukwakpa kãche ttë wa*

<sup>7</sup> Taië s'kítö'ukwakpa tso' kã wa'ñe. Ie'pa tö icheke tö Jesucristo dë', erë kè idë'bitu s'ditsöie. Yi tö icheke es, ese dör s'kítö'ukwak ena Cristo Bolök. <sup>8</sup> A' e' kkö'nú pë' esepa yöki as sa' kaneblë' a' shua, e' kè wà weirwa éme. Ye' kï ikiane tö iské mú dò a' ulã a seraã.

<sup>9</sup> Ttë wa Cristo tö s'wöbla', e' kè klö'weku'ia yile tö erë ikí kuötkékaitö taië kos Cristo tö iyë', e' tsatã, e' tã ese kè batsulewã Skëköl mik. Erë yi e' tkéwã darërëë Cristo ttë moki a, ese batsulewã S'yé mik ena ilã mik. <sup>10</sup> Yile de a' ska' kè wã Cristo ttë moki mir, etã kè ese a weshkë char, kè ishke'war. <sup>11</sup> Yi tö ishke'wé, ese tö ì sulu wamblekeitö e' kimeke. E' kueki esepa kè shkë'war.

### *Juan e' chéat*

<sup>12</sup> Taië ye' wã íyi tso' chè a' a, erë kè ye' éna ishtak yëkkuö kï. Ye' mú mi' a' ska' tã se' tö iwã chëmi ñi a. Es se' ttsë'rdaë buaë shute.

<sup>13</sup> Be' ël shukitbak Skëköl tö, e' ala'r tö be' shkë'wëmi.

\* 1:1 tayë: Es Juan tö Skëképa icha erule a ie' tso' yëkkuö i' shtök e'pa kiè.

## Yëkkuö skà kit Juan tö i' ta ide mañat

### 3 Juan

Juan tö yëkkuö et ena böt kit e' wák tö i' kit. Ie' tö ikit isini' eköl kiè Gayo e' a. Ie' tö yile patkë' Gayo ska' Jesús tté buaë pakök erë wëm eköl e' ttsòkà taië kiè Diótrefes e' kè éna Juan tö ipatkë' e'pa kiakwà. E' kè mène buaë Juan a, e' kuekì ie' tö yëkkuö i' kit Gayo a. Ie' wöà iwëne buaë tö Gayo tö s'wöbla'ukwakpa kiekewà buaë e' chak ie' éna Gayo a ena ie' kì ikiane tö e' kì wè Gayo tö es. E' kuekì ie' tö yëkkuö i' kit.

#### *Shkë'wè*

<sup>1</sup> A Gayo, ye' dör blë'këképa, e' tso' yëkkuö i' shtök be' a. Ye' éna be' dalër taië Jesús ttè mokì e' kuekì.

#### *Juan tö Gayo kíkëkà buaë*

<sup>2</sup> A yami dalër taië ye' éna, ye' tso' ikiök Skëköl a tö be' mú mir buaë ì kòs tso' be' wà e' a, ena be' mú tso' buaë kè duötà' wës be' er tso' buaë Skëköl ta es. <sup>3</sup> Mik s'yamipa welepa dë' ye' ska', e'ta e'pa tö ye' a iyë' tö be' serke buaë këkraë yësyësë wës Skëköl ttè mokìe tö ichè es. E' tö ye' ttsé'wëke buaë. <sup>4</sup> Këkraë mik ye' tö ittse tö wépa dör wës ye' ala'r es, esepa serke buaë yësyësë wës Skëköl ttè mokì tö ichè es, e'ta e' tö ye' ttsé'wëke buaë tkòkà iyi ulitane tsata.

<sup>5</sup> A yami, be' dalër taië ye' éna, s'yamipa shkëke kà wa'ñe Jesús tté buaë pakök, esepa kiekewà be' tö buaë këkraë, bua'iewà wépa kè sùule be' wà esepa. <sup>6</sup> Ie'pa welepa dene sa' ska', e'pa tö be' paké Skëképa Jesús icha erule e'pa a tö be' éna ie'pa dalër taië. Ye' tö be' a ichè tö ie'pa esepa kì kìmú. Ì kòs kiane ie'pa kì shkoie Jesús tté buaë pakök, ese kòs wa ie'pa kìmú. Ie'pa kìmú er bua' wa wës Skëköl kì ikiane es. <sup>7</sup> Ie'pa mi'ke kà wa'ñe kaneblök Jesucristo a, ie'pa kè tö ì kieta' pè' kè tö Skëköl dalöieta' esepa a. E' kuekì ie'pa kìmú. <sup>8</sup> Se' ulitane kawötà ie'pa kìmuk, ì kòs kiane ie'pa kì e' wa. Es se' kòs tö ie'pa kimekeñak Jesús tté mokì e' wà pakök.

#### *Diótrefes dör se' e' ttsòkà taië ese*

<sup>9</sup> Skëképa Jesús icha erule serke a' kà a, e'pa a ye' tö yëkkuö kit. Erë wëm tso' eë eköl kiè Diótrefes, e' wöbatsö e' tkòkà imalepa wökirie, e' kuekì kawö mène ye' a Jesús ttekölie, e' watéttsaitö. <sup>10</sup> E' kuekì mik ye' de a' ska', e'ta ì sulu wamblé ie' tö, e' cherakayö a' ulitane kukua. Ie' tso' kachök ye' ta. E' kíie ta mik s'yamipa de a' weblök, e'ta e'pa kè kièwà ie' tö. A' welepa éna ie'pa kiakwà e'pa wöklö'wëkeitö, uyekettsaitö Skëképa Jesús icha erule e' shua.

<sup>11</sup> A yami dalër taië ye' éna, ì sulu wambleke pè' tö, ese kè wamblar be' tö. E' skéie pè' ser buaë yësyësë, es be' senú buaë yësyësë. Yi serke yësyësë, ese dör Skëköl icha. Yi e' wamblò sulu, ese kè bàtse Skëköl mik.

<sup>12</sup> Sulitane tö icheke tö wëm kiè Demetrio, e' dör pè' buaë. Ie' serke buaë yësyësë wës Skëköl ttè mokì tö ichè es. E' wa iwënewà tö ie' dör pè' buaë. Ñies sa' tö ichè tö ie' dör pè' buaë. Be' wà ijcher tö ì kòs cheke sa' tö e' dör mokì.

#### *Juan e' chéat*

<sup>13</sup> Ye' wà iyi tso' taië chè be' a, erë kè ye' éna ishtak yëkkuö kì. <sup>14</sup> Ye' mú mi' be' ska' bet, e' wa ye' tö be' a iwà chè.

<sup>15</sup> As be' ttsé'r buaë. Ie' s'yamipa tö be' shkë'wémi. S'yamipa tso' be' ska', e'pa shkë'ú ña eköl eköl.

## Yëkkuö kit Judas tö Juan

Yëkkuö i' kit Judas tö. Kè s'wà ijcher mokië tö yi dör ie'. Erë welepa tö ibikeitsè tö Jesús ttekölpa tsá e' eköl kiè Judas cheke Lucas tö (Lucas 6.16; Hechos 1.13), e' tö ikit. Pë' taië tö ibikeitsè tö ie' dör Jesús ël eköl wes Santiago es. Mateo 1.55 ena Marcos 6.3 e' tö Jesús ël kiè Judas e' chë, e' kuëki welepa tö ibikeitsè es.

Judas tö yëkkuö i' kit Jesús mik erblökwakpa a, ie'pa a s'wöbla'uk kache tté wa, esepa biyó choie. Pë' esepa dë'bitu e' chök tö ie'pa dör Jesús mik erblökwakpa erë ie'pa dör s'kitö'ukwakpa ème. Ie'pa ki Jesús mik erblökwakpa kiane tsëmi ñala sulu ki. E' chök Judas tso' ie'pa a tö a' e' kkö'nú iyöki. Ie'pa esepa tö s'wöbla'weke tö Skëköl éna se' dalër taië ena ì sulu nú tso' se' ki e' olo'ya'itö s'ki, e' kuëki se' a ì sulu kí wamblërmi. Judas tö iché tö e' kè dör es. Ká iaiäé wépa bak e' wamblök suluë e'pa we'ik Skëköl tö siarë. E' sù ie' tö s'kitö'ukwakpa ñe' we'ikeraë. E' kkachak Judas éna Jesús mik erblökwakpa a e' kuëki ie' tö yëkkuö i' kit.

### *Shke'wè*

<sup>1</sup> Ye' dör Judas, ye' dör Jesucristo kanè méso, ñies ye' dör Santiago ël, e' tso' yëkkuö i' shtök a' a. Skëköl dör S'yé e' tö a' klöq'bak ie' ala'rie. Taië a' dalër ie' éna. Jesucristo tso' a' tsatkök ì sulu qos yöki. <sup>2</sup> As Skëköl tö a' saü er siarë wa ena sene bèrë kí mù a' a. Ñies as a' kí ñi dalërítsò taië.

### *Jesús tté buaë, e' tsatkó*

<sup>3</sup> A yamipa, a' dalër taië ye' éna. Kewe ta ye' ibikeitsé yëkkuö shtök a' a se' tsatkëne e' tté pakoie. Erë ye' ittse tö ye' kawöta kköchök a' a tö ttè mik se' erblöke e' tsatkó kekraë. Ttè e' meneat etökicha ème s'batse'rpa a' kkö'nè kekraë. <sup>4</sup> Pë' welepa dewa a' shua, erë a' kibiiepa kè wà ijcher tö e'pa dör s'kitö'ukwakpa. E' kuëki ye' tso' yëkkuö i' shtök a' a. Esepa kè tö Skëköl dalöieta' moki. Ie'pa tö icheke tö ie' er buaë ché se' a, e' kuëki ì sulu qos wamblak se' éna, e' wamblëmisö, kè ulé klöule. Erë kè idör es. Ttè e' wa ie'pa tö Skëképa Jesucristo dör se' blú eköl è, e' dalösewéwa. Ká iaiäé Skëköl tö iyë'bak iyëkkuö ki tö esepa qos wömeulettsatke weinuk aishkuö ta. E' kuëki ye' tso' a' a ichök tö Jesús tté buaë tsatkó ie'pa esepa yöki.

### *Skëköl tö ì sulu wamblökwakpa we'ikeraë*

<sup>5</sup> A' wà ijchertke buaë, erë ye' éna ichakne a' a, as a' éna iarne tö Skëköl tö Israel aleripa tsatkë'ttsa egiptowak ulà a, yé'ttsa Egipto. E' ukuöki ta ie'pa wépa kè erblëne ie' mik e'pa eo'waitö. <sup>6</sup> Ñies a' éna ianú tö Skëköl biyöchökwakpa, e'pa welepa tö kanè mène ie'pa a, e' olo'yé ta ie' yélur wé ie'pa bak senuk ee. E' kuëki ie' wà ie'pa tso' wötëule stui ké a. Eë ie'pa tso' moule tabechka kè butsta'ttsa yöbië ese wa. Eë ie'pa tso' ikichatërke e' kéwö panuk. <sup>7</sup> Es ñies a' éna ianú tö Sodoma ena Gomorra wakpa, ñies ká tso' tsinet ie'pa o'mik e' wakpa, e'pa bak trënuq taië ena e' ya'uk suluë. E' kuëki Skëköl tö ie'pa qos we'ik michoë bö' wa. Ie'pa wa ie' tö ikkaché tö ì tköraë ì sulu wamblökwakpa ta'.

<sup>8</sup> Es ñies wépa chök ye' tso' a' a, esepa e' wamblö suluë. Ie'pa e' ia'ukeka trë wa ta ichekerakitö tö e' kkayëne ie'pa a kabsuë a. Ñies Skëköl ttè watekerakitö ena ibiyöchökwakpa olo ta' taië, e'pa chekerakitö suluë. <sup>9</sup> Ká iaiäé mik Moisés blënewa, eta bé ki inú kiane, erë Skëköl biyöchökwak wökir eköl kiè Miguel, e' kè tö imë ie' a, e' kuëki ie'pa ñi iüté iki. Miguel dör Skëköl biyöchökwak olo ta' taië ese, erë ie' kè wà bé yëne suluë as ikichatër. Ie' tö iché ia: "Skëköl tö be' uñú." E' è ché Miguel tö ie' a. Eta ¿wes wépa chök ye' tso' esepa tö Skëköl biyöchökwakpa chëmi suluë? <sup>10</sup> ì kè ane ie'pa éna,



ì kè jcher ie'pa wà, ese kòs cheke suluë ie'pa tò. Erë ì jcher ie'pa wà iwákpa er wa, ese wambleke ie'pa tò kè wà bikeitsule wës iyiwak es. E' kuëki ie'pa weirdaë siarë aishkuö ta.

<sup>11</sup> ¡Wëstela ina ie'pa ta! Ie'pa e' wamblò suluë wës Caín e' o' es. Ie'pa tò ttè moki olo'yé inuköl klö'woie wës Balaam es. Ie'pa tò Skëköl dalösewéwa wës Coré tò Moisés dalöseo'wa es. E' kuëki aishkuö ta ie'pa weirdaë siarë wës Coré es. <sup>12</sup> Mik a' ñi dapa'uke chkök di'yök ñita er bua' wa Cristo kötëwa e' kèwö tkö'uk, eta e' sulu'wekewa ie'pa tò wës ie' wamblörak ese wa. Ie'pa kè jaër ì sulu wamblök kawö e' a. Ie'pa er me'rie iwákpa è kkö'nuk. Ie'pa dör s'kitö'ukwakpa wës kalì dami siwa' wa taië, erë kè iwà yër yës es. Ie'pa dör wës kal kè wör ta' mik iwörke e' kèwö ska' es. Ie'pa dör wës kal ponettsa iwìe e' sirwa es. <sup>13</sup> Ie'pa tò ì sulu wambleke kè jaër ta', e' uyekerakitö wës dayë tò íyi tso' kòs ie' a e' uyëttsa u'rki es. Ie'pa dör wës bëkwö kè ku'ar ek tsinì ème es. Skëköl wà ká tso' ie'pa a ttsetseë, eë ie'pa wötërdawa kè yërpattsäia.

<sup>14</sup> Adán aleripa de ie' itökì dökà kul, e' shüa wëm eköl bak, e' kiè Enoc. Ie' tò pë' sulusi esepa yë' i' es Skëköl ttekölie: “Ye' ttò ttsó. Skëköl döraë ibiyöchökwakpa batse'r taië shütë e'pa ta <sup>15</sup> sulitane shulök. Pë' sulusipa kè tò ie' dalöieku' tò ì sulu wambleke tò ie' cheke suluë, esepa kòs wömerattsä ie' tò weinuk.” <sup>16</sup> Wépa chök ye' tso' a' a, esepa wa íyi ulitane wër suluë, íyi ulitane tò ie'pa kköchöweke. Ì sulu kiane ie'pa kì wamblè ese wamblekerakitö. Ie'pa e' ttsökà taië. Ñies s'malepa dakiñekerakitö ttè ttsë'r bua' ese wa as tò iü wës ie'pa kì ikiane es.

#### *A' e' tkówa darërëë Skëköl ttè a*

<sup>17</sup> Erë a yamipa, a' dalër taië ye' éna. Ì yë' Skëképa Jesucristo ttekölpa tsá e'pa tò, e' ska' a' er anú. <sup>18</sup> Ie'pa tò se' a iyë': “Mik ká i' erkewatke, eta s'wayuökwakpa datse taië. Ie'pa serdaë wës ie'pa wák dër suluë kì ikiane senuk es.” <sup>19</sup> Ye' tò a' a ichè tò pë' esepa tso' a' shüa a' blabatsök. Ie'pa serke wës ie'pa er tò ikieke ia es. Skëköl Wiköl kè ku' ie'pa ta.

<sup>20</sup> Erë a yamipa dalër taië ye' éna, ttè batse'r ichökle mik se' erblöke, e' a a' kì er diché ió. A' ttó Skëköl ta Wiköl Batse'r wa. <sup>21</sup> Skëképa Jesucristo tò se' sué er siarë wa, e' kuëki sene michoë döraë se' ulà a aishkuö ta, e' wà panuk se' tso' er bua' wa. E' dalewa kè a' éna ichökwa tò Skëköl éna se' dalër taië, e' a a' e' tkówa darërëë.

<sup>22</sup> A' wépa erblöke Jesús mik, erë ibikeitsekeia bötböt, esepa saú er siarë wa ta ie'pa kimú. <sup>23</sup> A' wépa skà mi'ketke ì sulu a, esepa tsatkó wës s'ñarkewa ese tsatkèsö es. A' wépa skà tso' ì sulu wamblök taië ichók, esepa saú er siarë wa ta ikimú, erë a' tso' erki dö' a' armi ì sulu wambleke ie'pa tò e' a. Ì sulu wambleke ie'pa tò, e' yöki a' suanú taië; e' kè kiarwa a' a elkela wë'ia.

#### *Ttè bata*

<sup>24</sup> Skëköl è a se' kkö'narmi as kè s'armine ì sulu a. Ie' è a se' nuì olo'yarmi as se' dò ie' olo taië e' wörki ttsë'ne buaë wa, kè kì ì sulu ta' yës. E' kuëki ie' kikökasö ttè bua' wa. <sup>25</sup> Ie' kikökasö Skëképa Jesucristo batamik. Ie' dör eköl ème. Ie' dör S'tsatkökwak. Tsawe ta, i'ñe ta, ñies dò kekraë ie' olo ta' taië, ie' diché ta' taië íyi ulitane tsata. Ie' dör se' blú taië. As sulitane tò ie' kikökà er bua' wa kekraë. Es e' idir.

## Ì kkayè' Jesucristo tö Juan a, e' tté paké Apocalipsis

Jesús ttekölpa tsá eköl kiè Juan e' tö yèkkuö i' kit. Ie' bak klöulewá dayénane kiè Patmos ee. Ee ie' bak senuk mik ie' tö yèkkuö i' kit etá.

Jesucristo wák tö Juan ka' ishtök. Ì kos kkayène ie' a ena yène ie' a kabsueie, e' shtök Jesucristo tö ie' ka'. Mik Jesucristo e' kkayè' ie' a kabsueie etá e' tö ika' yèkkuö i' shtök Skékëpa icha erule erule döka kul serke ká kuá'kí kuá'kí tso' Asia shuá e' pa a.

E' kíie tá Satanás ñippöke Skéköl tá wës e' ukuö miria Juan kéwö ska' ena e' ukuöki, e' paké ie' tö yèkkuö i' kí as Jesús mik erblökwakpa wá ijcher tö Skéköl ena Jesucristo e' alóraká da'áie Satanás ena iklépa kí.

### Shké'wè

<sup>1</sup> Tté shtök ye' tso' yèkkuö i' kí e' dör ì kkayè' Skéköl tö Jesucristo a as ie' tö ikkachène ikanè mésopa a as ie' pa éna iar tö ì tköraë bet. Ye' kiè Juan, ye' dör Cristo kanè méso. Ie' tö ibiyöchökwak patké' eköl ye' ska' íyi ikké kkachök ye' a. <sup>2</sup> Ì kos sué ye' tö, e' shteke ye' tö yèkkuö i' kí seraá. Ye' tö a' a ichè tö e' dör Skéköl ttè moki, ñies e' dör ttè moki kkayè' Jesucristo tö e'.

<sup>3</sup> Ì shteke ye' tö yèkkuö i' kí, e' wà döketke bet. E' kueki wépa tö iaritseke ena ittseke ena iwà iuteke, ayécha buaë esepa.

<sup>4-5</sup> Ye' tso' yèkkuö i' shtök Skékëpa Jesús icha eruleë serke ká kuá'kí kuá'kí döka kul ate Asia e' pa a. Skéköl ena iWiköl ena Jesucristo, as e' pa er buaë chò ena sene bèrè mù a' a. Skéköl e' tso'tke tsawe tá, i'ñe tá, ñies kekraë. Wikölpa Kul\* tso' wé Skéköl tkër s'blúie e' wörki. Jesucristo tö Skéköl ttè cheke yësyësë kekraë. Ie' dör s'duulewá e' tsá shkenekane sulitane yöki kéwe e'. Ie' dör ká ulitane blúpa e' pa blú. Ie' éna se' dalër taië. Ie' kötwá, ie' pé tène se' skéie, e' wa ie' tö se' tsatkée sene sulu nuí ulá a. <sup>6</sup> Ie' tö se' shukit as se' dò s'blúpaie ena sacerdotepaie kaneblök Skéköl dör ie' yé e' a. Jesucristo olo tá' taië, ie' diché tá' taië, as sulitane tö ie' kikòkà kekraë. Es e' idir.

<sup>7</sup> ¡Ittsó! Jesucristo datse mò a.

Sulitane tö ie' sueraë,  
ñies wépa tö ie' kötwá, ie' tkè'rakitö kuaböt wa,  
e' pa tö isueraë.

Mik ká ulitane wakpa tö isué,  
etá ie' pa iuraë siarè suane yöki.  
Es iwà tköraë. Es e' idir.

<sup>8</sup> Skéköl diché tá' taië íyi ulitane tsata, ie' tso'tke tsawe tá, i'ñe tá, ñies kekraë. Ie' tö ichè: “Ye' dör íyi wì ena íyi bata.”

### Juan tö Jesucristo sué kabsueie

<sup>9</sup> Ye' dör a' yami Juan, e' batsulewá Jesús mik e' wa ye' tso'ñak a' tá wépa blúie Skéköl tso' esepa shuá. Ñies ye' tso'ñak weinuk a' tá ena idalè'ttsök a' tá er bua' wa. Ye' tö s'wöbla' wé Skéköl ttè wa, ñies ye' tö Jesús tté paké sulitane a, e' kueki ie' pa tö ye' uya'mi senuk dayè nane kiè Patmos e' a. <sup>10</sup> Skékëpa Jesús diwö, e' dör Domingo, e' kéwö ska' tá Skéköl Wiköl de ye' kí taië, etá ye' ittsé ye' tsikka tö yi tté ye' tá, e' ttò dör darèrèë wës duk blar es. <sup>11</sup> Ie' tö ye' a iché: “Ì sueke be' tö, e' shtó yèkkuö kí tá ipatkómi Skékëpa Jesús

\* 1:4-5 Wikölpa Kul: Mik yèkkuö i' tö Wikölpa Kul cheke, etá e' wà kiane chè Wiköl Batse'r. Isalema Juan tö ikié es ichoie tö ì kaneweke Wiköl Batse'r tö ese dör tsakjè buaë kè ì kianeig iki. Apocalipsis 3.1; 4.5; 5.6 saú.

icha eruleë serke Éfeso, Esmirna, Pérgamo, Tiatira, Sardes, Filadelfia ena Laodicea e'pa kos a.”

<sup>12</sup> Ye' wötrée isaük tö yi ttöke ye' ta, eta bö'wöla wöbastulur döka kul, e' sué ye' tö. E' tulur ituloka yöule orochka wa e' ki. <sup>13</sup> Bö'wöla kul shua, ye' tö isué tö ì dur s'ditsö sué. Ie' datsi' dör batsië dötsa iklökue ki. Ikiparuo àr icho' mik e' dör oro. <sup>14</sup> Ie' tsakö dör saruru shuteë wes suiyök es wes mochka saruruë es† Ie' wöbla wër wes bö'wö wöñar es. <sup>15</sup> Ie' klö wër dalölöe wes tabechka bua' bua ba'wè bö' a ena ipaiklè ta iwër dalölöe es. Ie' ttö ttsër wes di' blar taië ákttö mik es. <sup>16</sup> Ie' ulattö bua'kka a ie' wa bëkwö tso' döka kul. Ie' kkö a tabè dettsa kaule di'dië wi'kè io'kè. Ie' wö wër dalölöe wes mik diba arke buaë eta diwö wër es.

<sup>17</sup> Mik ye' tö ie' sué, eta ye' anewa wöwakköt ie' klö ska' wes s'duowa es. Erë ie' ulà bua'kka méka ye' ki ta ichéitö ye' a: “Kè be' suanuk. Ye' dör ttè tsá ena ttè bata. <sup>18</sup> Ye' dör sene michoë e' wák. Ye' du'wa e' tso'ne ttsé'ka kekraë. Ye' wa diché tso' s'duowa ki. S'wimblu ké e' wékkö yottsá tso' ye' wa. Ie'pa shkeormika ye' a. <sup>19</sup> Ì tso' ì'ne ta ena ì kos datseia suëke be' tö e' shtó yëkkuö ki. <sup>20</sup> Bëkwö döka kul sué be' tö ye' ulattö bua'kka a ñies bö'wöla tuloka yöule orochka wa, e' wà cheke ye' tö be' a i' ta. Bëkwö kul, e' tö Skëköl biyöchökwakpa döka kul e'pa wà chè. E'pa dör Skëköpa Jesús icha eruleë serke ká kul a ñe' kkö'nukwakpa. Bö'wöla döka kul, e' tö Skëköpa Jesús ichapa eruleë serke ká kul a ñe' wà chè.”

## 2

### *Ì ché Jesucristo tö ie' ichapa erule serke Éfeso, e'pa a*

<sup>1</sup> Eta ie' tö ye' a iché: “Yëkkuö shtó Skëköl biyöchökwak tso' ye' icha erule serke Éfeso, e'pa kkö'nuk e' a. Yëkkuö e' ki ishtómi ie' a i' es:

‘Yi wa bëkwö kul tso' iulatö bua'kka a, ñies yi shkòdur bö'wöla tuloka yöule orochka wa, e' shua, e' tö ichè a' a i' es: <sup>2</sup> Wes a' serke e' kos jcher ye' wa. A' kanèblöke darërëë, a' weirke kos ye' kuëki, e' dalè'ttseke a' tö er bua' wa, e' kos jcher ye' wa. Ye' wa ijcher tö pè' sulusipa kè wër a' wa buaë. Wépa de a' ska' e' chök tö ie'pa dör ye' ttekölpa erë ikachörak, esepa ma'wé a' tö ta a' isué tö ie'pa dör kachökwakpa. <sup>3</sup> A' weirke taië ye' tté kuëki, e' dalè'ttseke a' tö er bua' wa, kè ilo'yane a' wa. <sup>4</sup> Erë ye' wa ilè tso' ki a' kkatè: a' kè ñi dalèritsöku'ia ena a' kè ye' dalèritsèia wes kuaë es. <sup>5</sup> E' kuëki wes kuaë ta a' éna ye' dalër, ñies wes kuaë ta a' ñi dalèrits e' anú a' éna. A' er mane'úne ta a' senúne wes a' sene' kuaë es. A' kè er maneone, e' ta ye' datskene bet a' ska' ta a' bö'wöla tuloka e' yerattsa ye' tö. <sup>6</sup> Erë ì sulu wambleke Nicolaiwakpa tö e' suëke a' tö suluë wes ye' tö isuëke es, e' tö ye' ttsé'wé buaë. <sup>7</sup> Ì cheke Skëköl Wiköl tö ye' icha eruleë e'pa a, e' ttsó a' ulitane tö! Wépa e' aléka ì sulu ki, kè wa ye' tté olo'yaule, esepa kos a ye' tö kawö meraë sene michoë e' kéli wö katök. E' kéli àr ká buaala tso' ká jai a ee.’”

### *Ì ché Jesucristo tö ie' ichapa erule serke Esmirna, e'pa a*

<sup>8</sup> E' ukuöki ta ie' tö iché ye' a: “Yëkkuö shtó Skëköl biyöchökwak tso' ye' icha erule serke Esmirna, e'pa kkö'nuk e' a. Yëkkuö e' ki ishtómi ie' a i' es:

‘Yi dör ttè tsawe ena ttè bata. Yi kötëwa e' shkenekane, e' tö ichè a' a i' es: <sup>9</sup> A' weirke siarë ye' tté kuëki ñies a' kè wa ì ta', e' kos jcher ye' wa, erë a' dör Skëköl icha e' kuëki a' dör wes inuköl blüpa es. Ñies ye' wa ijcher tö pè' welepa tö a' cheke suluë. Ie'pa e' chò tö ie'pa dör Skëköl icha, ñermata ie'pa dör Satanás icha. <sup>10</sup> A' weirdaë kos, e' kè yöki a' suanuk. Ye' ttö ttsó: Bé tö a' welepa uyerawa s'wöto wé a, a' erblöke ye' mik e' ma'woie. A' weirdaë siarë döka ká dabop è. Ie'pa tö a' ttëwami ye' tté kuëki, erë a' erblöke ye' mik, e' kè olo'yar a' tö yës, e' ta sene michoë meraëyo a' a' iskieie. <sup>11</sup> Ì cheke Skëköl Wiköl tö

† 1:14 suiyök ena mochka: Si'kuaie e' dör lana ena nieve.

ye' icha eruleë esepa a, e' ttsó a' ulitane tö! Wépa e' aléka ì sulu ki, kè wà ye' tté olo'yaule, esepa kè duòpawà bötökicha.' ”\*

*Ì ché Jesucristo tò ie' ichapa erule serke Pérgamo, e'pa a*

<sup>12</sup> E' ukuöki ta ie' tò iché ye' a: “Yékkuö shtó Skéköl biyöchökwak tso' ye' icha erule serke Pérgamo, e'pa kkö'nuk e' a. Yékkuö e' ki ishtómi ie' a i' es:

‘Yi wà tabè tso' kaoule di'dië wì'kè io'kè, e' tò ichè a' a i' es: <sup>13</sup> Ye' wà ijcher tö a' serke wé Satanás tkér blu'ie ee, erè a' e' tkéwà darërèe ye' a. Eré ye' tté chökwak eköl yésyèsè kiè Antipas, e' kötwa ie'pa tò a' ké a wé Satanás serke ee, erè a' kè wà a' erblöke ye' mik e' olo'yane. <sup>14</sup> Erè ilè tso' ye' wà böt mañat ki a' kkatè: A' shua wélepa tso', e'pa tso' tté sulu iütök. Ttè e' dör wes ttè wa Balaam bak s'wöbla'uk es. Ká iaiäé Balaam tö Balac wöbla' as ie' tò Israel aleripa kò ì sulu wamblök. Balaam tö Israel aleripa dakiñé chkè meule íyi diököl tso' dalöie ese a, ese katök ñies trénuk taië. <sup>15</sup> Es ñies a' shua wélepa tso', e'pa kè éna Nicolaiwakpa tté olo'yak. <sup>16</sup> E' kuëki a' er mane'úne Skéköl a. A' kè tò iwè es, e' ta bet ye' datske ñippök ie'pa ta tabè tso' ye' kkò a e' wa. <sup>17</sup> ì cheke Skéköl Wiköl tö ye' icha eruleë e'pa a, e' ttsó a' ulitane tö! Wépa e' aléka ì sulu ki, kè wà ye' tté olo'yaule, esepa kos tieraëyö chkè tso' blëulewà kiè maná ese wa. Ñies ákwöla sarurula meraëyö ie'pa a eköl eköl, e' ki kiè pa'alì tso' kitule. Kiè e' kè jcher yi wà. Yi a imène, ese è wà ijcherdaë.’ ”

*Ì ché Jesucristo tò ie' ichapa erule serke Tiatira, e'pa a*

<sup>18</sup> E' ukuöki ta ie' tò iché ye' a: “Yékkuö shtó Skéköl biyöchökwak tso' ye' icha erule serke Tiatira, e'pa kkö'nuk e' a. Yékkuö e' ki ishtómi ie' a i' es:

‘Skéköl Alà, e' wöbla wër wes bö'wö wöñar es. Ie' klò wër dalölöe wes tabechka bua'bu paiklèsö ta iwèr dalölöe es, e' tò ichè a' a i' es: <sup>19</sup> Wes a' serke e' kos jcher ye' wà. Ye' wà ijcher tö a' ñi dalèritsöke buaé ena a' erblöke ye' mik. Ñies ye' wà ijcher tö a' ñi kímuke ñikkèe buaé ena a' weirke kos, e' dalè'ttseke a' tò er bua' wa. I'ñe a' tò ikí weke bua'ie, kuaé a' tò io' e' tsata. <sup>20</sup> Erè ye' wà ilè tso' ki a' kkatè: alaköl tso' a' shua kiè Jezabel, e' a' a' tò kawö meke s'wöbla'uk. Ie' e' chò tò ie' dör Skéköl tteköl, erè ie' tò s'wöbla'weke, e' wa ie' tò ye' kanè mésopa dakiñeke as itrèr ñies as itörak chkè meule íyi diököl dalöie ese a, ese katò. <sup>21</sup> Ye' tò ie' pané taië as ie' tò íyi suluë e' olo'yò ta ier mane'ù ye' a, erè ie' kè er mane'wak yès. <sup>22</sup> E' kuëki súyö duè patkè ie' ki darërèe as kè ikarkaiä. Ñies wépa kos trène ie' ta, esepa we'ikerayö. Ie'pa kè er mane'ù, kè tò ì sulu e' olo'yè, e' ta bet ye' tò ie'pa we'ikeraë. <sup>23</sup> Ñies ye' tò alaköl e' klépa tteralur. Es ye' icha eruleë serke ká wa'ñe, e'pa wà ijcherdaë tö ye' wà sulitane er sùule buaé tò wes idir, wes iser. Ye' tò a' ulitane a iské meraë eköl eköl wes iser es. <sup>24</sup> Erè a' malepa tso' Tiatira, a' kè ku' tté sulu e' iütök. Ttè e' kiè ie'pa tò “Satanás ttè blëulewà se' esepa yöki.” Ttè e' dör suluë. E' kè iütene a' wà, eta e' dör buaé. E' kuëki ye' tò a' a' ichè tò ye' kè tò ttè dalöiëno darërèe ese skà kí meku' a' a dalöie. <sup>25</sup> Erè ye' ttè tso'tke a' wà klöule, e' a' a' e' tkówà darèrèe michoë dò mik ye' datskene eta. <sup>26-27</sup> Wépa e' aléka ì sulu ki, kè wà ye' tté olo'yaule, wépa serke wes ye' ki ikiane es dò mik s'enewa ekkè, esepa a ye' tò kawö meraë s'blúpaie wes ye' Yé tò ye' a imé es. Ie'pa tkeraká ye' tò ká ulitane wakpa wökirpaie. Ie'pa tò ká ulitane wakpa wëttseraë yésyèsè kè janéwetá yès. Wépa tò ie'pa ttè dalösewéwà, esepa olordawà wes skauña olorwà es. <sup>28</sup> Ñies ye' tò bëkwö kiè dukir wërke bla'mi e' meraë ie'pa a. <sup>29</sup> ì cheke Skéköl Wiköl tö ye' icha eruleë e'pa a, e' ttsó a' ulitane tö! ”

3

*Ì ché Jesucristo tò ie' ichapa erule serke Sardes, e'pa a*

\* 2:11 kè duòpawà bötökicha: S'duòwà bötökicha e' dör se' uyèwà bö' ké a wé s'weir michoë ee e'. Apocalipsis 20.16 saú.

<sup>1</sup> E' ukuök<sub>i</sub> t<sub>a</sub> ie' tö ye' a ichè: “Yëkkuö shtó Skëköl biyöchökwak tso' ye' icha erule serke Sardes, e'pa kkö'nuk e' a. Yëkkuö e' k<sub>i</sub> ishtómi ie' a i' es:

‘Yi w<sub>a</sub> Skëköl Wikölpa Kul\* tso'. Nies yi w<sub>a</sub> iulatö a bëkwö tso' döka kul, e' tö ichè a' a i' es: Wes a' serke e' kos jcher ye' w<sub>a</sub>. Sulitane tö ibikeitseke tö a' serke buaë ye' a erë ye' w<sub>a</sub> ijcher tö e' kè dör es. A' kè serku'ia ye' a buaë. Ye' a t<sub>a</sub> a' dör wes s'duulew<sub>a</sub> es. <sup>2</sup> Ye' tö isué tö a' serke Skëköl a, e' kam döka wë' ie' wöa. E' kuek<sub>i</sub> a' t<sub>i</sub>'núne, a' senúne ye' a buaë. Ì buaë tso'ia a' a elkela, e' a a' e' diché ióne kam ichòwa da'a e' yök<sub>i</sub>. <sup>3</sup> Ttè buaë wa a' wöblane, e' ska' a' er anúne. Ttè e' iutóne. Ì sulu wamblé a' tö, ese olo'yó t<sub>a</sub> a' er mane'ú ye' a. A' kè tö iwè es, e' t<sub>a</sub> ye' döraë a' ska' wes akblökwak es a' we'ikök, e' kèwö kè jcherpa a' w<sub>a</sub>. <sup>4</sup> Erë a' tso' Sardes, e'pa welepa kè e' iaoneka sene sulu wa. E'pa serke yësyësé ye' a, e' kuek<sub>i</sub> aishkuö t<sub>a</sub> ie'pa shköraë ye' t<sub>a</sub> paiëule buaë datsi' saruru wa. <sup>5</sup> Es nies wépa e' aléka sene sulu k<sub>i</sub>, kè w<sub>a</sub> ye' tté olo'yaule, esepa k<sub>i</sub> datsi' saruruë iërdaë. Ie'pa kiè kè yepattsayö sene michoë e' yëkkuö k<sub>i</sub>. E' skéie ye' tö icheraë Skëköl wörk<sub>i</sub> ena Skëköl biyöchökwakpa wörk<sub>i</sub> tö ie'pa dör ye' icha. <sup>6</sup> ì cheke Skëköl Wiköl tö ye' icha eruleë e'pa a, e' ttsó a' ulitane tö! ”

#### *Ì ché Jesucristo tö ie' ichapa erule serke Filadelfia, e'pa*

<sup>7</sup> E' ukuök<sub>i</sub> t<sub>a</sub> ie' tö ye' a ichè i' es: “Yëkkuö shtó Skëköl biyöchökwak tso' ye' icha erule serke Filadelfia, e'pa kkö'nuk e' a. Yëkkuö e' k<sub>i</sub> ishtómi ie' a i' es:

‘Yi dör bats'e'r ena ttò mok<sub>i</sub>ë e' ulà a s'blú bak kiè David e' ké ukkö yotts<sub>a</sub> tso'. Ie' w<sub>a</sub> kawö t<sub>a</sub> 'íyi ulitane k<sub>i</sub>. Mik ie' tö iukkö yétt<sub>a</sub>, e<sub>t</sub>a kè yi a iwötënukwane. Mik ie' tö iukkö wötéw<sub>a</sub>, e<sub>t</sub>a kè yi a ikkö yënuksane. Ie' tö ichè a' a i' es: <sup>8</sup> Wes a' serke e' kos jcher ye' w<sub>a</sub>. Ye' w<sub>a</sub> ijcher tö eré a' kè dalöiërta' taië, erë a' tö ye' tté iuté buaë, a' kè w<sub>a</sub> ye' watënett<sub>a</sub>. E' kuek<sub>i</sub> ukkö yétt<sub>a</sub> ye' tö a' a, kè yi a iwötënukwane. <sup>9</sup> Ye' ttò ttsó. A' shu<sub>a</sub> welepa tso', e'pa dör Satanás icha. Ie'pa e' chò tö ie'pa dör Skëköl icha, erë ie'pa kachò. Ie'pa keraë ye' tö e' tulökwa kuchë k<sub>i</sub> a' wörk<sub>i</sub>. Es ie'pa w<sub>a</sub> ijcherdaë tö ye' tö a' dalëritseke. <sup>10</sup> A' weirke ye' tté kuek<sub>i</sub>, e' dalé'ttsé a' tö er bua' wa wes ye' tö a' patkë' iwà uk es. E' wà iuté a' tö buaë, e' kuek<sub>i</sub> ye' tö a' tsatkeraë mik s'weirke taië e' kèwö de ká ulitane wakpa k<sub>i</sub> ima'woie e<sub>t</sub>a. <sup>11</sup> Ye' datsene bet. Ye' ttè wa a' wöblane, e' a a' e' tkówa darërë kekraë as kè yi tö a' ulà a' iské buaë e' yött<sub>a</sub>. <sup>12</sup> Wépa e' aléka sene sulu k<sub>i</sub>, kè w<sub>a</sub> ye' tté olo'yane, esepa döraë wes u chki' bua'ie es Skëköl wé tso' ká jai a e' a. Eë ie'pa ser michoë kekraë. Skëköl kiè shteraëyö ie'pa mik. Nies Skëköl ké, e' kiè shteraëyö ie'pa mik. Ká e' kiè Jerusalén Pa'al<sub>i</sub>, e' datse ká jai a. Nies ye' wák kiè pa'al<sub>i</sub>, e' shteraë ye' tö ie'pa mik. <sup>13</sup> ì cheke Skëköl Wiköl tö ye' icha eruleë e'pa a, e' ttsó a' ulitane tö! ”

#### *Ì ché Jesucristo tö ie' ichapa erule serke Laodicea, e'pa*

<sup>14</sup> E' ukuök<sub>i</sub> t<sub>a</sub> ie' tö ye' a iché i' es: “Yëkkuö shtó Skëköl biyöchökwak tso' ye' icha erule serke Laodicea e'pa kkö'nuk e' a. Yëkkuö e' k<sub>i</sub> ishtómi ie' a i' es:

‘Yi dör ì kos yë' Skëköl tö e' wà, yi tö ie' tté cheke yësyësé kekraë, yi t<sub>a</sub> ie' tö 'íyi ulitane yó', e' tö ichè a' a i' es: <sup>15</sup> Wes a' serke e' kos jcher ye' w<sub>a</sub>. Ye' w<sub>a</sub> ijcher tö a' tö ye' tté dalöieke bërëbërë è, kè bua'ie. A' dör wes di' bashbash es, kè dör ba'baë, kè dör seseë, a' dör bashbash è. ìA' mú dör ba'baë ö seseë! <sup>16</sup> Erë a' dör wes di' bashbash es ye' a. A' kè dör ba'baë, nies a' kè dör seseë. E' kuek<sub>i</sub> ye' tö a' tueratt<sub>a</sub> ye' kkò a. <sup>17</sup> A' tö ichè tö a' dör inuköl blúpa. A' tö ichè tö a' kawö tköke buaë, kè ì k<sub>i</sub> kianeia' a' k<sub>i</sub>. Erë a' kè w<sub>a</sub> ijcher tö ñermata ye' a t<sub>a</sub> a' dör wes pë' weirke siarë es. A' dör wes se' wër siarë s'yamipa wa es. A' dör wes pë' kè w<sub>a</sub> ì ku'ia es. A' dör wes pë' wöbla kè wawër es. A' dör wes pë' kè w<sub>a</sub> datsi' t<sub>a</sub> es. <sup>18</sup> E' kuek<sub>i</sub> ye' tö a' patteke tö a' tö orochka t<sub>a</sub>ú ye' ska'. Oro ese dör oro bua'bu diaoule bö' wa ibua'bu yotts<sub>a</sub> ese. E' je' tö a' blu'wëmi buaë. Nies datsi' saruruë

\* 3:1 Apocalipsis 1.3 saú.

ese taú ye' ska'. E' wa a' e' paiòmi buaë as a' kè jaëria. Ñies a' tò kapöli taú ye' ska' a' wöbla bua'woie as iwawër buaë. <sup>19</sup> Wépa dalër ye' éna, e'pa kòs uñeke ye' tò shurueke ye' tò as iserdak buaë. E' kuëki ye' dalöiò er bua' wa. Ì sulu wambleke a' tò, ese watótsa. A' er mane'ú bua'iewa ye' a. <sup>20</sup> ¡Ye' ttò ttsó! Ye' dör wes wëm dur eköl ukkö a a' a ikiök tò ye' a kawö mú shkowā es. Yi tò ye' ttò ttsé ta ye' kiéwaitö weshke, e' ta ye' dörawa ta ye' chköraë ie' ta. <sup>21</sup> Ye' e' aléka íyi ulitane ki ta ye' e' tkéka ye' Yé ta wé ie' tkër blu'ie ee. Es ñies wépa e' aléka ì sulu ki, kè wa ye' tté olo'yane, esepa a kawö meraë ye' tò e' tköksër ye' ta wé ye' tkër blu'ie ee. <sup>22</sup> ¡Ì cheke Skéköl Wiköl tò ye' icha eruleë e'pa a, e' ttsó a' ulitane tö! ”

## 4

*Skéköl kīkarkeka buaë ká jai a*

<sup>1</sup> E' ukuöki ta ye' tò íyi skà sué kabsueie. Ye' isué tò ká jai a ukkö tso' áie ta s'ttò ttsé' ye' tò kewe wes duk blar es, e' tò ye' a ichè: “Be' shkóka íe, eta ì wamblërmi i' ukuöki ta, e' kkacheke ye' tò be' a.”

<sup>2</sup> E' wösha ta Skéköl Wiköl de ye' ki taië, ta ye' tò blu' kulé tso' ká jai a e' sué et. E' ki itkër eköl. <sup>3</sup> Yi tkër kula' e' ki, e' dalöburke dalölöë wes ák bua'buá dalöbur es, e' wöaule spašpa ena mat wes ák bua'buá kiè diamante ena rubí es. Ie' kula' pamik shkaba' tkërke oloburke dalölöë, e' wöaule spašpa wes ák bua'buá kiè esmeralda es. <sup>4</sup> Ñies ie' kula' pamik blu' kulé skà suéyo doka dabom böyök kī tkël (24). E' ki kéképa tulus doka dabom böyök kī tkël (24), e'pa paiëulewā datsi' saruruë wa, ñies ie'pa wā orochka tso' yöule tkëuleka iwökir ki wes blu'pa es. <sup>5</sup> Blu' kulé sué ye' tò kewe, ee alá wönarke taië, talachke blarke taië. Kula' e' wöshaë bö'wö ñarke kul wes kuatak wöbatsesö es. Bö'wö kul, e' tò Skéköl Wiköl chè. <sup>6</sup> Kula' e' wöshaë ì me'r dayëie kkueie wër sarërëë wes vidrio es.

Ì ttsé'ka tso' kula' pamik doka tkël e'pa wöbla dör taië tsikka wökka. <sup>7</sup> Itsá e' wökir wër ma' name sué. Iëtö wökir wër baka wë'ñe sué. Iëtö skà wö dör s'ditsö wö sué. Ibata wër wes pu ur àr es. <sup>8</sup> Itsá pik dör teröl, es imalepa kòs pik dör teröl ñies. Ie'pa pa kòs e' dör wöbla è döttsa ipik dikia. Ñië nañeë ie'pa tso' Skéköl ttseittsök, kè ie' wöklö'uta' rak ta ichekerakitö i' es:

“Skéköl dör batse'r taië, ie' dör batse'r taië, ie' dör batse'r taië.  
Ie' diché ta' taië íyi ulitane tsata.  
Ie' tso'tke tsawe ta, i'ñe ta, ñies kekraë.”

Es ie'pa tò icheke kekraë.

<sup>9</sup> Skéköl yöbië tkër kula' e' ki, e' pamik ì ttsé'ka tso' tkël, e'pa tso' ie' kīkōkka, ie' olo kīkōkka, ie' a wéstela chök kekraë. <sup>10</sup> Mik ie'pa tso' e' uk, e' dalewa kéképa doka dabom böyök kī tkël (24) tulus ie' pamik, e'pa e' tulökeser iski wöwakköt itkër kula' ki e' dalöioie. Ie'pa tso' Skéköl ser michoë e' dalöiök, e' dalewa ì tkër ie'pa wökir ki yöule orochka wa, e' kòs mekewarakitö iski Skéköl kula' wöshaë ta ichekerakitö:

<sup>11</sup> “A Sa' Kéköl, íyi ulitane yö' be' tö.

Íyi ulitane tso' be' wák ttò wa.

E' kuëki sa' ulitane kawöta ichök tò be' olo ta' taië.

Sa' ulitane kawöta be' dalöiök ñies be' diché kīkōkka.”

## 5

*Yëkkuö kitule wörratule ena Obeja Pupula, e' pakè*

<sup>1</sup> E' ukuöki ta ye' tò isué tò itkër kula' ki, e' wā yëkkuö wörratule a'tser iulà bua'kka, e' ki its'o' kitule ikikke ena ishüa. Yëkkuö e' kkò wöbatsulewā doka kul. <sup>2</sup> Eta Skéköl biyöchökwak sué ye' tò eköl, e' diché taië, e' tò ichaké aneule: “¿A yi wëë, yi e' didir



yëkkuö wöbatsulewā, e' kkò batsöök wé iwöbatsulewā ee tā ishuppöök?” <sup>3</sup> Erë ká jài a ena ká i' kī ena ká dià kaska' kè yi didir yës yëkkuö e' shuppöök ena iwà sauk. <sup>4</sup> Ye' iuke taië, kè yi didir yëkkuö e' shuppöök ena iwà sauk e' kuëkī. <sup>5</sup> Etā skëkëpa tso' ee dabom böyök kī tkël (24), e' eköl tö ye' a iché: “Kè be' iukia. Ittsó, eköl kiè Ma'name e' dör judáwak ditséwö, ie' kéköl dör blu' bak ká iaiäe kiè David e'. Ie' e' ali'kabak ibolökpa kōs kī. Ie' je' didir yëkkuö wöbatsulewā kul e' kkò batsöök ena ishuppöök.”

<sup>6</sup> Etā ye' tö obeja wë'ñe pupula sué etö, e' pa kī itö tso' wësua ijchëulea mē Skëköl a, ese shkënekane. E' dur itkër kula' kī e' o'mik, ì ttsé'ka dōka tkël ena kékëpa dōka dabom böyök kī tkël (24) e'pa shushā. Obeja e' dula' dōka kul ñies iwöbla dōka kul. Iwöbla dōka kul e' wà dör tö Skëköl Wiköl Kul\* patké Skëköl tö ká wa'ñe. <sup>7</sup> Obeja Pupula e' de itkër kula' kī e' ska' tā yëkkuö a'tser itkër kula' kī e' ulà bua'kka, e' klö'wëitö. <sup>8</sup> Mik ie' tö yëkkuö klö'wé, etā ì ttsé'ka dōka tkël ena kékëpa dōka dabom böyök kī tkël (24), e'pa kōs e' télur wöwakköt Obeja Pupula wörki. E'pa kōs wā ma'ma tso' blanco kicha tā' kiè arpa. Ñies tkā' yöule orochka wa, ese tso' ie'pa kōs wā. Tka' e' a iyi masmas tso' ña'wë Skëköl a, ese tso' chikchië. E' tö s'batse'rpa ttöke ie' tā e' wà chë. <sup>9-10</sup> ì ttsé'ka dōka tkël ena kékëpa dōka dabom böyök kī tkël, e'pa kōs ttsémi ttsè pā'alī wa Obeja Pupula kīkokaie. Ie'pa tö ittseittsé i' es:

“Be' kütulewā, be' pé tēne taië  
wēs obeja pupula jchë mē Skëköl a es,  
e' wa be' tö s'ditsö ttö kuā'kī kuā'kī ena ditsöwö kuā'kī kuā'kī ena ká kuā'kī kuā'kī wakpa  
tō'ttsa  
as ekkëpa ulitane shua se' dō taië Skëköl ichaie.  
E'pa klö'wé be' tö as ie'pa kanëblö Skëköl a blu'paie ena sacerdotepaie.  
Ie'pa dōraë ká ulitane wakpa blúpaie, es ie'pa tö s'wëttseraë.  
E' kuëkī be' je' didir mokī yëkkuö wörratule sē, e' klö'uk ena ikkò batsökök wé  
iwöbatsulewā ee.”

<sup>11</sup> E' ukuökī tā ye' wökéka etā ye' tö isué tö Skëköl biyöchökwakpa tso' taië, kè ishtanuk yi a, e'pa ttö ttsé ye' tö. Ie'pa tso' itkër kula' kī ena ì ttsé'ka dōka tkël ena kékëpa dōka dabom böyök kī tkël, e'pa pamik. <sup>12</sup> Ie'pa tö ittseittsé wī'wīë i' es:

“Obeja Pupula kütulewā, e' je' kī sulitane ie' kīkëka e' mēne buaë.  
Ie' olo tā' taië, ie' dör iyi ulitane wák, ie' wā iyi ulitane jcher, ie' diché tā' taië,  
e' kuëkī sulitane kawötā ie' dalöiök, ie' kīkōkka.”

<sup>13</sup> Ñies ye' tö ittse tö iyi ulitane yö' Skëköl tö tso' ká jài a ena ká i' kī ena ká dià kaska' ena dayë a, e' kōs tö iché i' es:

“Itkër kula' kī ena Obeja Pupula, e'pa olo tā' taië, diché tā' taië iyi ulitane tsatā,  
e' kuëkī sulitane kawötā ie'pa kīkōkka, ie'pa dalöiök kekraë.”

<sup>14</sup> ì ttsé'ka dōka tkël e'pa tö iché: “jEs e' idir!” Kékëpa dōka dabom böyök kī tkël, e'pa e' télur wöwakköt Skëköl ena Obeja Pupula wörki ie'pa dalöiök.

## 6

### *Yëkkuö wörratule e' kkò batsulewā dōka kul e' batsée Obeja Pupula tö etk etk*

<sup>1</sup> E' ukuökī tā ye' tö isué tö Obeja Pupula tö yëkkuö wörratule e' kkò batsulewā dōka kul e' tsā batsée. Etā ì ttsé'ka dōka tkël, e' eköl ttö ttséyö, e' ttö darërëë wēs alá blar es. Wépa tso' ipatkërke e' panuk e' eköl a ie' tö iché: “jBe' yú!” <sup>2</sup> Ye' wökéka tā kabaio saruru

\* 5:6 Apocalipsis 1.3 saú.

suéyö etö. Yi tkërka iki, e' ulà a shkame' àr, ñies ì tkekeka wökir kī iwà kkachöie tö ie' dör e' alökwak ese mène ie' a et. Ie' mía kī e' alökka ibolökpa kī.

<sup>3</sup> Mik Obeja Pupula tö yëkkuö kkò batsulewa, e' skà batsée et, etä ye' tö ittsé tö ì ttsé'ka dökä tkël, e' skà tö iché wépa tso' ipatkërke e' panuk e' skà a: “¡Be' yú!” <sup>4</sup> Etä kabaio batsé dettsa. Yi tkërka iki, e' a kawö mène sene bèrè ñita e' yòttsa ká i' a as pè' ñi ttòwa. Ie' a tabè bérie mène.

<sup>5</sup> Mik Obeja Pupula tö yëkkuö kkò batsulewa, e' skà batsée et, i' ta ide mañat, etä ye' tö ittsé tö ì ttsé'ka dökä tkël, e' skà tö iché wépa tso' ipatkërke e' panuk e' skà a: “¡Be' yú!” Ye' wökéka etä ye' tö kabaio dalolo sué etö. Yi tkërka iki, e' wa íyi es ma'woie dami iulà a. <sup>6</sup> Ì ttsé'ka dökä tkël, e' shua ye' tö ttò ttsé tö iché: “Harinachka kilo elka è e' tordaé s'kaneblò ká et e' ské ekké. Ñies cebada kilo mañalka tordaé s'kaneblò ká et e' ské ekké; eré olivo kié ena vino e' kè sulu'warwa be' tö.”

<sup>7</sup> Mik Obeja Pupula tö yëkkuö kkò batsulewa, e' skà batsée et, i' ta ide tkël, etä ye' tö ittsé tö ì ttsé'ka dökä tkël, e' bata tö iché wépa tso' ipatkërke e' panuk e' skà a: “¡Be' yú!”

<sup>8</sup> Ye' wökéka etä kabaio tskrittiskris suéyö etö wër suluë. Yi tkërka iki, e' kiè dör S'duòwa. E' itöki eköl skà datse e' kiè dör S'wimblu Ké. Ie'pa a kawö mène ká ulitane wakpa e' mú blatèsö tkël tsíní ta e' et tsíní eukwa tabè wa, bli wa, duè wa ena iyiwak dör se' name ese wa.

<sup>9</sup> Mik Obeja Pupula tö yëkkuö kkò batsulewa, e' skà batsée et, i' ta ide skel, etä s'kötulewa Skéköl ttè paka' ie'pa tö taninië e' kueki, e'pa wimblupa suéyö ka' tso' íyi moka Skéköl a e' dikia. <sup>10</sup> Ie'pa tso' ichök Skéköl a aneule: “A Sa' Kéköl, be' dör íyi ulitane tsata, be' dör batse'r, be' ttò mokië. ¿Dò mik be' tö wépa serke dià íyök kī tö sa' kötulur esepa dalé'ttsekerö? ¿Mik be' tö ie'pa wömekettsa weinuk ì wamblé'rakitö sa' kī, e' nuí skéie?” <sup>11</sup> Etä ie'pa wakpa bil ekké e'pa a datsi' saruru mène iè. Skéköl tö iché ie'pa a: “A enúia bərbër è dò mik pè' tö a' malepa dör ye' kanè mésopa kianeia ttèlur, e'pa kos ttekeluria wes a' kötulurakitö es etä. E'pa panúia tsir.”

<sup>12</sup> Mik Obeja Pupula tö yëkkuö kkò batsulewa, e' skà batsée et, i' ta ide teröl, etä í tka darèrèë. Diwö ttsenewa mía ttsettseë wes datsi' daloloë es. Si'wö mía batsé wes pé es.

<sup>13</sup> Bëkwö darolone íyök kī wes kalwö tkëttsa siwa' tö mik ibitsirke taië etä es. <sup>14</sup> Etä ká jai, e' wörratéwa wes yëkkuö wötréwasö es, kè iwértaiä. Kabata ulitane, dayë nane ulitane, e' kos e' skélur bánet. <sup>15</sup> Etä ká blúpa kos, pè' taië kos, ñippökwakpa wökirpa kos, inuköl blúpa kos, s'dalöier ta' taië esepa kos, ñies s'klöulewa kanè mésoie, ñies kanè mésopa malepa, esepa kos e' blélur ákuk a ena ák blublu tso' kabata a ese dikia e' tsatkoie. <sup>16</sup> Etä ie'pa tö iché aneule kabata a ena ák blublu a: “¡Sa' bló a' dikia, sa' kkö'nú Skéköl tkër ikula' kī ká jai a e' yöki! Ñies Obeja Pupula kësik yöki sa' kkö'nú. <sup>17</sup> Ie'pa tö sulitane we'ikeraë siarè e' kèwö detke, kè yi tkòpashkar e' ulà a.”

## 7

### *Skéköl kanè mésopa wakyöule ie' a*

<sup>1</sup> E' ukuöki ta ye' tö Skéköl biyöchökwakpa sué dökä tkël, e'pa iëter wé ká i' erkerö e' kkò mik. Böl iëter diwö tskirke e' kke; eköl dur ulà bua'kka, eköl dur ulà bakli'kka. Böl iëter diwö mi'kewa e' kke; eköl dur ulà bua'kka, eköl dur ulà bakli'kka. Ie'pa tso' siwa' kos bitsirke e' wöklö'uk as kè ibitsiria ká i' kī, dayë kī, kal kī, ì kī yës. <sup>2</sup> Ie'pa a kawö mène ká i' ena dayë sulu'ukwa. Ñies ye' tö Skéköl biyöchökwak skà sué eköl, e' datse diwö tskirke e' kke. E' ulà a íyi tso' s'wakyuoie Skéköl chók wa, e' a'tser. Ie' ane imalepa tkël tsaka ta ichéitö ie'pa a: <sup>3</sup> “¡A' kè tö ká sulu'ukwa, dayë sulu'ukwa, kal sulu'ukwa kam sa' tö Skéköl kanè mésopa wakyuö iwötsa kī e' yöki!”

<sup>4-8</sup> Etä bil wakyöule e' yëne ye' a. Wépa wakyöule e'pa dör se' yé bak ká iaiaë kiè Israel, e' ala'r dabom eyök kī böi (12), e'pa aleripa shukitë iditséwö wa iditséwö wa. Ie'pa

ditséwö kiè Judá, Rubén, Gad, Aser, Neftalí, Manasés, Simeón, Leví, Isacar, Zabulón, José ena Benjamín. Ekképa ditséwö shukite dōka 12.000 iditséwö wa iditséwö wa. Ishukite e'pa dör seraa 144.000 ekké.

<sup>9</sup> E' ukuōki ta ye' wō kéka ta ye' isué tö s'ditsö dapané taië kè shtanuk yi a ekké. E'pa dör ká ulitane wakpa, ttò kua'ki kua'ki, ditsöwö kua'ki kua'ki. Ie'pa iëter, itkér kula' ki ena yi kiè Obeja Pupula, e'pa wörki. Ie'pa kōs datsi' ié saruruë. Ie'pa ulitane wa sí kò dami iulà a. <sup>10</sup> Ie'pa tö iché aneule:

“;S'tsatkè e' datse  
Skéköl tkér kula' ki ena Obeja Pupula e'pa wa!”

<sup>11</sup> Kéképa dōka dabom böyök kí tkél (24) ena ì ttsé'ka dōka tkél, e'pa pamik Skéköl biyöchökwakpa kōs iëter. E'pa kōs e' télur wōwakköt, itkér kula' ki, e' dalöioie <sup>12</sup> etā ichérakitö:

“;Es e' idir!  
Be' dör sa' blú yöbië, sa' tö be' kikekeka kekraë.  
Be' olo ta' taië, be' wa iyi ulitane jcher buaë.  
Sa' tö wéstela cheke be' a kekraë.  
Be' dalöieke sa' tö kekraë.  
Be' diché ta' taië iyi ulitane tsata, be' è a ì kōs or,  
;Es e' idir!”

<sup>13</sup> E' ukuōki ta kéképa dōka dabom böyök kí tkél (24), e'pa eköl tö ye' a ichaké: “;Ie'pa paiëule datsi' saruru wa, e'pa dör yi? ;Wé ie'pa datse?” <sup>14</sup> Ye' tö ie' iüté: “A kéképa, ye' kè wa ijcher, ichó ye' a.” Etā ie' tö ye' a iché: “Ie'pa dör wépa weine siarë sulitane weirke taië e' kēwō ska' e'pa. Erë e' dalé'ttsé' ie'pa tö buaë. Ie'pa tö idatsi' skué yi kiè Obeja Pupula e' pé wa etā idatsi' míā saruruë.

<sup>15</sup> “E' kuēki ie'pa iëter Skéköl tso' ikulé ki, e' wörki.

Ñië nañëe ie'pa tso' ie' dalöië e' wakanéuk iwé a.

Ie'pa tso' ie' ta ena ie' tö ie'pa kkö'neraë kekraë.

<sup>16</sup> Ie'pa kè duöpaia bli wa, ie'pa kè er sirpaia.

Dìba kè tö ie'pa ña'wepaia, kaba kè tö ie'pa we'ikepaia.

<sup>17</sup> Obeja Pupula tso' Skéköl kula' o'mik,

e' dör ie'pa kkö'nukwak, e' kuēki ie'pa kè weirpaia yës.

Obeja Pupula tö ie'pa wëttseraë di' tum tö sene michoë meke se' a, e' di' yök.

Skéköl tö ie'pa wöriö kōs e' paikleraë as ie'pa ttsé'r buaë.”

## 8

### *Obeja Pupula tö yëkkuö wörratule e' kkò batsulewa dōka kul, e' bata batsée*

<sup>1</sup> Mik Obeja Pupula tö yëkkuö wöbatsulewa, e' bata kkò batsée, etā ká jaì a ká míā mejmeë dò hora shaböts ekké.

<sup>2</sup> E' ukuōki ta Skéköl biyöchökwakpa dōka kul iëter Skéköl wörki, e'pa suéyö. Ie'pa a duk mène eköl eköl. <sup>3</sup> E' ukuōki ta Skéköl biyöchökwak skà de wé ka' tso' iyi moka Skéköl a e' wörki. Ie' wa iulà a tkā' yöule orochka wa ese a'tser. Ie' a iyi masmas mène taië s'batse'rpa kōs e'pa ttöke Skéköl ta e' kí ioie as ie' tö iña'ù ka' yöule orochka wa iña'woie tso' Skéköl kulé wö shaë, e' ki. <sup>4</sup> Etā ie' tö iyi masmas ña'wé ka' ñe' ki, e' shkle tka ie' ulà mik deka Skéköl wörki s'batse'rpa ttöke ie' ta e' ta ñita. <sup>5</sup> Ie' tö itka' wà iéka bö' wörkua tso' ka' ñe' ki, e' wa. Bö' wörkua e' uyémi ie' tö iyök ki. Etā ká wa'ñe ki alá wöñane taië, iblane taië, ká wöti'wé taië í tö.

*Duk dōkə kul*

<sup>6</sup> Skëköl biyöchökwakpa dōkə kul, e'pa wə duk tso' iwakpa bil ekkë, ie'pa tso'tke iduk bla'weke e' panuk.

<sup>7</sup> Eta Skëköl biyöchökwak eköl tö iduk bla'wé kewe. Eta mò wöli wösi seseë, ñies bö'wö shutuule pé ta, ese dane taië íyök kī wēs kalī yēr es. Ká i' ena kal e' ñanewa taië. Ká i' ena kal qos e' mú blatèsö mañat tsiní ta e' et tsiní ñanewa. Ñies kakö qos tso' ká i' kī e' ñanewa seraä.

<sup>8</sup> E' ukuökī ta Skëköl biyöchökwak skà tö iduk bla'wé. Eta ì bitëshka kabataie bérie wöñarke bö'ie, e' anewa dayë a. Eta dayë mú blatèsö mañat tsiní ta e' et tsiní míā péie. <sup>9</sup> Iyiwak qos serke dayë a ena kanò qos shköke dayë kī, e' mú blatèsö mañat tsiní ta e' et tsiní enewa.

<sup>10</sup> E' ukuökī ta Skëköl biyöchökwak skà tö iduk bla'wé, i' ta ide mañatökicha. Eta bëkwö bérie wöñarke wēs kuatak wöñar es, e' bitëshka anewa di' a ena di' tum a taië. Di' tso' qos ena di' tum tso' qos, e' mú blatèsö mañat tsiní ta e' et tsiní a bëkwö anewa. <sup>11</sup> Bëkwö e' kiè Bacha'bachaë. Wé bëkwö e' anewa, e' di' qos míā bacha'bachaë. Di' e' tö s'ttélur taië.

<sup>12</sup> E' ukuökī ta Skëköl biyöchökwak skà tö iduk bla'wé, i' ta ide tkëtökicha. Eta diwö ena si'wö ena bëkwö, e' qos mú blatèsö mañat tsiní ta e' et tsiní qos ttsenewa. E' kuekī ñiwe ena nañewe, e' mú blatèsö mañat tsiní ta e' et tsiní ttsenewa.

<sup>13</sup> E' ukuökī ta ye' wökéka ta ye' tö pu suë et ur àr kashuk a, e' tö iché aneule: “¡Ayëwëë, ayëwëë, ayëwëë! ¡Wéstela ina ká ulitane wakpa ta, mik Skëköl biyöchökwakpa tso'ia mañal e'pa tö iduk bla'weke eta!”

## 9

<sup>1</sup> E' ukuökī ta Skëköl biyöchökwak skà tö iduk bla'wé, i' ta ide skëtökicha. Eta bëkwö et anewabak, e' suéyö iski. Ee kauk ter taië iskië, kè s'wö dë'mi ekkë. Kauk e' kkò wötëule, e' kköyottsä mène bëkwö suéyö iski, e' a. <sup>2</sup> Mik ie' tö kauk kköyéttsä, eta e' a ishklé deka taië wēs bö' wöñar taië e' shklë es. E' tö kashuk ttsewéwa, e' kuekī diwö kè olo buneia. <sup>3</sup> Shklë e' shuā ditski blubluë dettsä taië íyök kī, poneka ká wa'ñe, ká ulitane wà iéwa. Ie'pa a kawö mène s'we'ikök wēs bachë' tö s'kuèwa ta idalë'r es. <sup>4</sup> Ie'pa kè a kawö mène kakö qos, kalkö qos, e' katök. Ie'pa a kawö mène, wépa kè wakyöule Skëköl wə iwö tsà kī, esepa è we'ikök. <sup>5</sup> Erë ie'pa kè a kawö mène ittökukur. Ie'pa a kawö mène irreuk idalë'r taië wa dò si' skël ekkë. E' dalër taië wēs bachë' s'kuèwa es. <sup>6</sup> E' kèwö ska' ta s'ditsö tö duèwa yuleraë poë, erë duèwa wák, e' tkörashkar ie'pa yökī.

<sup>7</sup> Ditski e' wër wēs kabaio tso' ñippoie ese payöule es. Iwökir kī itkëuleka, ì tkëka blu' tö iwökir kī yöule orochka wa ese suë. Iwö wër wēs s'ditsö wö wër es. <sup>8</sup> Itsà batsië wēs alakölpa tsà es. Ikà dör wēs namu kà es. <sup>9</sup> Tabechka àr ibatsi' mik wēs ñippökwakpa tö ieke e' tsatkoie e' sù. Ipiq blar taië wēs carreta skè kabaio tö tñeule michoë ñippök es. <sup>10</sup> Ikirë dör wēs bachë' kirë es, e' diché wa ie'pa tö s'we'ikeke dò si' skël ekkë. <sup>11</sup> Ie'pa blú e' dör Skëköl biyöchökwak dör kauk iskië, e' wökir. Hebreoie e' kiè dör Abadón. Griegoie e' kiè dör Apolión (kiè e' wà kiane chë: Se' eukwawak).

<sup>12</sup> Íyi sulu e' tsá tka et, erë iskà kianeia böt.

<sup>13</sup> E' ukuökī ta Skëköl biyöchökwak skà tö iduk bla'wé, i' ta ide tektökicha. Ye' tö s'ttò ttsé datse ká' tso' yöule orochka wa íyi moka Skëköl a ee. Ká' e' bata tkël a iyöule dula'ie, e' shuā s'ttò ttséyö. <sup>14</sup> E' tö iché Skëköl biyöchökwak tö iduk bla'wé író e' a: “Skëköl biyöchökwakpa dōkə tkël tso' moulewa di' taië kiè Éufrates e' kkömik, e'pa wöttsólör be' tö.” <sup>15</sup> Skëköl biyöchökwakpa dōkə tkël e'pa tso'tke Skëköl wə iwakanéwoie i' kèwö ska'. Ie'pa kanè dör pé' taië eukwa. Pé' ulitane mú blatèsö mañat tsiní ta e' et tsiní erdawa seraä ie'pa ulà a. Eta Skëköl biyöchökwakpa dōkə tkël wöttsërolone iwakanéuk. <sup>16</sup> Eta ye' a iyëne tö ñippökwakpa dami kabaio kī, e'pa dōkə 200.000.000.

<sup>17</sup> Ñippökwakpa ekkëpa dami kabaio *ki*, e' sué ye' tö, e'pa wä tabechka àr ibatsi' mik e' tsatkoie, e' wöaule batsë wës bö' wörkua suèsö es ena siè wës ák bua'buá kiè jacinto es, ena tskiriri wës azufre es. Kabaio ekkëpa wökir wër wës namu wökir es. Ñies ikkò a bö' ena shklë ena azufre, e' dökettsa. <sup>18</sup> Bö' ena shklë ena azufre dökettsa kabaio ekkëpa kkò a, e' dör ì mañat suluë döke pë' *ki* e'. E' tö pë' ewéwa taië. Pë' ulitane mú blatèsö mañat tsíní tã e' et tsíní enewa seraa. <sup>19</sup> E' wà dör tö kabaio ekkëpa wä diché tso' ikkò a ena ikirë a s'we'ikoie. Ikirë bata dör tkabë chók wökir es, e' wa s'shka'wekeitö.

<sup>20</sup> Erë pë' malepa atë kè durulune ì sulu tka e' wa, e'pa kè wä ì sulu wamblekerakitö ese olo'yane. Ñies aknamapa ena íyi diököl dalöiekerakitö esepa kè olo'yanerak iwä. Íyi diököl ñe'pa yöule orochka wa, inukölchka wa, broncechka wa, ákchka wa ena kal tak wa, ese kos wöbla kè wawër, kè kukuò wattsër, kè shko, erë ie'pa tso'ia idalöiök ikékölie.

<sup>21</sup> Ie'pa kè er maneone. Ie'pa s'ttekewaiã, alibchökeia, trërkeia, akblökeia.

## 10

### *Skököl biyöchökwak e' wä yëkkuö a'tser iulà a*

<sup>1</sup> E' ukuöki tã ye' tö Skököl biyöchökwak sué eköl, e' diché tã taië. Ie' datse ká jai a paiëulewä buaë mò wa. Shkaba' tkënear iwökir tsaka. Ie' wö dalöburke wës diwö es. Ie' klölobo wa'ñe wër wës bö' wöñar es. <sup>2</sup> Ie' wä yëkkuö tsitsirla a'tser iulà a shubukaule. Ie' klò bua'kka tkékaitö dayë *ki*, iklö bakli'kka tkékaitö ká sí *ki*. <sup>3</sup> Eta ie' ane taië wës ma'name ar es. Mik e' one, eta alá blane döka kuktökicha. <sup>4</sup> Ì ché alá tö e' shtök ye' mí yëkkuö *ki*, erë ttò ttséyö datse ká jai a e' tö iché: “Kè ishtar, iblówabö bèrë.”

<sup>5</sup> Eta Skököl biyöchökwak suéyö iklö et tkërka dayë *ki*, iklö et tkërka ká sí *ki*, e' ulà bua'kka kéka ká jai a <sup>6</sup> tã ichéitö: “Skököl ser michoë e' tö ká jai ena ká i' ena dayë ena ì kos tso'ia, e' yö'. Ie' wörki ye' tö iché tö ì cheke ye' tö e' dör moki. Skököl kè tö ì panepaiã. <sup>7</sup> Ì tso' Skököl wä ier a blëule wè, e' yë'bakitö ikanè mésopa dör ittekölpa e'pa a, e' wä ordaë mik Skököl biyöchökwak bata tö iduk bla'wé eta.”

<sup>8</sup> Eta s'ttò ttsé'yö datse ká jai a, e' tténe ye' tã tã ichéitö: “Be' yú Skököl biyöchökwak klö et tkërka dayë *ki* eta iklö et tkërka ká sí *ki*, e' ska', eta yëkkuö a'tser iulà a shubukaule, e' klö'ú.” <sup>9</sup> Eta ye' mí Skököl biyöchökwak dur e' ska' tã yëkkuö e' kiéyö ie' a. Ie' tö ye' a iché: “Íkë, ikatöwabö. Be' kkò a be' tö ittseraë tö blo'bloë idir wës bulali es, erë be' shua imiaraë bacha'bachaë.”

<sup>10</sup> Eta yëkkuö a'tser Skököl biyöchökwak ulà a, e' klö'wéyö tã ikatéwayö. Ye' kkò a tã blo'bloë idir wës bulali es, erë mik ide ye' shua, eta imía bacha'bachaë. <sup>11</sup> Eta ttè i' yène ye' a: “Ì wamblërmi ká kua'ki kua'ki wakpa taië tã, ñies ditsöwö kua'ki kua'ki wakpa taië tã, ñies s'ttò kua'ki kua'ki wakpa taië tã, ñies ká blúpa taië tã, e' kos chök be' kawöta Skököl ttekölie.”

## 11

### *Skököl ttekölpa böl*

<sup>1</sup> Eta ye' a kua' mène ká ma'woie. Ye' a iyène: “Be' yú, Skököl wé kibi, e' ma'uk. Ñies ka' tso' íyi moka Skököl a, e' ma'ú. Bil s'tso' Skököl dalöiök iwé a, e' shta'úttsa. <sup>2</sup> Erë Skököl wé kibi upa atë u'rki e' meule pë' kè dör judiowak esepa a, e' kueki e' kè ma'war be' tö. Ie'pa tö Skököl ké, e' dör Jerusalén dör batse'r e', e' klö'wërawä, sulu'wërawä ì sulu wa dò si' döka dabom tkëyök kí böt (42) ekkë. <sup>3</sup> Eta eë ye' tö ye' ttekölpa patkeraë böl ye' tté pakök ká döka mil eyök kí cien böyök kí dabom teryök (1.260 días) ekkë. Ie'pa paiëule datsi' kra'kraë wa s'ká datsi' sù.”

<sup>4</sup> Olivo klò bölka ena bö'wöla tukur itulokã *ki* döka böt tso' Skököl wörki ká jai a, e' yë'bak ká iaiaë Zacarías tö, e' wà dör ttekölpa böl e'. <sup>5</sup> Yi datse ie'pa böl we'ikök suluë kiane ppè, kiane ttèwä, e' tã ese ewërawa ie'pa tö bö' dökettsa ie'pa kkò a e' wa. <sup>6</sup> Ie'pa

tso' Skëköl ttè pakök ittekölpaie, e' dalewa ie'pa a kawö mène kalì wöklö'ukwä as kè iyër. Ñies ie'pa a kawö mène di' mane'uksane péie. Ñies kawö mène ie'pa a ì sulu qos mukka ká i' wakpa kì bitökicha ie'pa kì ikiane ekkè.

<sup>7</sup> Erë mik ie'pa tö Skëköl ttè paké one, etä yiwak sulusi aknamaie e' dörakā kauk taië iskië e' a. E' ñippöraë ie'pa ta, etä ie' alörakā ie'pa kì, etä itteraluritö. <sup>8</sup> Ie'pa nu ardaë tkëter Jerusalén ká shushaë sulitane wörki. Ká e' a ie'pa Këköl kötwarakitö wötëulewā krus mik. Skëköl a ká e' dör suluë wes Sodoma ena Egipto es. <sup>9</sup> Pë' datse ká wa'ñe, ditséwö kuā'kì kuā'kì, ttò kuā'kì kuā'kì ena ká kuā'kì kuā'kì wakpa e'pa tö Skëköl ttekölpa nu sueraë dò ká mañat kì shāböts ekkè. Ie'pa kè tö kawö mepa yi a inú wötökwa. <sup>10</sup> Ká ulitane wakpa ttsë'rdaë buaë, ie'pa bül duolur e' kuëki. Skëköl ttekölpa bül tö ie'pa we'ik siarë, e'pa duolur, e' tö ie'pa ttsë'weraë buaë, e' kuëki ie'pa iyi kakmeraë ñi a.

<sup>11</sup> Mik ká mañat kì shāböts e' tka, etä Skëköl tö ittekölpa bül duolur, e'pa shkë'wékane ta ie'pa e' duéka. Wépa tö e' sué, e'pa qos suane iyöki taië. <sup>12</sup> E' ukuöki ta ttò darërë datse ká jai a, e' ttsé ittekölpa tö, e' tö iché: “¡A' shkóka íe!” Etä ie'pa mika ká jai a mò shua, e' sué ibolökpa tö. <sup>13</sup> E' wösha ta í tka darërëë, e' tö Jerusalén mú blatèsö dōka dabop ta e' et tsiní chōraë í ulà a. Iwakpa duolur dōka mil kuryök (7.000). Imalepa ate ttsë'ka, e'pa qos suanerak taië. Ie'pa tö Skëköl tso' ká jai a, e' kikéka.

<sup>14</sup> Es ì suluë skà tka, i' ta ide bötökicha. Ì suluë skà datseia bet, e' ta ide mañatökicha.

#### *Duk blane, i' ta ide kuktökicha*

<sup>15</sup> Etä Skëköl biyöchökwak bata tö iduk bla'wé, i' ta ide kuktökicha. Etä s'ttò ttsëne taië darërëë ká jai a, e'pa tö iché:

“I' ta ká ulitane wakpa ena iwökirpa,  
e'pa de Skëköl ena wé pairine'bitü idi' wa s'blúie, e'pa ulà a.  
Ie'pa tö s'wëttsë michoë blu'ie.”

<sup>16</sup> E' ukuöki ta këkëpa dōka dabom böyök kì tkël (24) tulur ikula' kì Skëköl ska', e'pa e' tëlur wöwakköt Skëköl wörki idalöiök. <sup>17</sup> Ie'pa tö iché:

“A sa' Këköl, be' diché ta' taië iyi ulitane tsata.

Be' tso'tke tsawe ta, be' tso' i'ñe ta, ñies be' tso' aishkuö ta këkraë.

Be' e' tkéka ká ulitane wakpa blúie be' diché taië wa,

e' kuëki sa' tö icheke wéstela be' a.

<sup>18</sup> Ká ulitane wakpa wépa dör be' bolökpa,

esepa we'ikeketke be' tö kësik wa, e' kèwö de i' ta.

E' kuëki ie'pa ulune taië be' kì.

S'duulewā qos e' shulirke, e' kèwö detke.

Ñies be' kanè mésopa ena be' ttekölpa ena s'batse'r malepa tö be' dalöieke, pë' dalöiërta'

esepa ena pë' ësapa,

e'pa qos a iské meketke be' tö, e' kèwö de.

Wépa tö s'ditsö ewéwa ká i' kì,

esepa ewekewa be' tö, e' kèwö detke.”

<sup>19</sup> Etä Skëköl wé tso' ká jai a, e' wékkö bunane, e' shua Skëköl tö ittè me' se' a, e' kélkuö suéyö. Etä alá wöñane blane taië, e' ttséyö. Í tka darërëë, ñies mò wösi sēsëë blubluë, e' dane taië kalije.

## 12

#### *Alaköl eköl ena bé dör këtali këkölie e'*

<sup>1</sup> E' ukuöki ta ilè taië suéyö ká jai a ilè wà kkachoie. E' dör alaköl eköl parratulewā diwö wā. Si'wö tso' ie' klò dikia. Iwökir kì ì tkërka wes blu' wökir kì itkëka es, e' yöule bëkwö



dōka dabom eyök k<sub>1</sub> böt (12) e' wa. <sup>2</sup> Alaköl batsöketkër buklú, e' kirinemitke, e' tö ie' kköchöweke taië.

<sup>3</sup> E' ukuöki ta ye' tö ilè skà sué ká jai a ilè wà kkachoie. E' dör iyiwak sulusi aknamaie blubluë, e' dör këtali kéköl wák batsé e'. Iwökir dōka kul, e' k<sub>1</sub> idula' tulturka dōka dabop. Ñies iwökir kōs k<sub>1</sub> itulurka wēs blu' wökir k<sub>1</sub> itkër es. <sup>4</sup> Bëkwö kōs mú blatèsö mañat tsiní ta e' et tsiní kaléttsaitö dò ká i' k<sub>1</sub> ikirë wa. Ie' e' duéka alaköl alà kurketke, e' wōshaë ipanuk ilà kurketke e' katowaie. <sup>5</sup> Alaköl alà kune wēm, e' suletënebak ká ulitane wakpa wëttsuk iblúie. Ie' tö ie'pa wëttseraë yësyësë idiché taië wa. Erë alà e' yënettsa imì ulà a, minetsēr wē Skéköl tkër ikulé k<sub>1</sub> ee. <sup>6</sup> Alaköl e' tkashkar këtali kéköl yöki ta imía ká sir poë wē kè yi serku' taië ese ska'. Eë Skéköl tö ká me'baktke ie' a. Eë ie'pa tö alaköl se'weke ká dōka mil eyök k<sub>1</sub> cien böyök k<sub>1</sub> dabom teryök ekkë (1260).

<sup>7</sup> E' ukuöki ta ie'pa ñippémi taië ká jai a. Skéköl biyöchökwak kibi kiè Miguel, e' ena imalepa, e'pa ñippé taië këtali kéköl ta. Këtali kéköl ena iklépa, e'pa ñippé taië ñies, <sup>8</sup> erë Miguel e' aléka ie'pa k<sub>1</sub>. E' kueki këtali kéköl ena iklépa, e'pa kè a kawö mène senukia ká jai a. <sup>9</sup> Es këtali kéköl bërie uyéttsarakitö ká jai a döttsa ká i' k<sub>1</sub> iklépa kōs eta. Këtali kéköl e' dör tkabè bak ká iaiaë kiè Bé ena Satanás e'. Ie' dör ká ulitane wakpa kitö'ukwak as ie'pa tö ì sulu wamblò.

<sup>10</sup> E' ukuöki ta ttò darërëë ttséyö ká jai a tö iché:

“Bata ekkë ta Skéköl tö se' tsatkée,  
ie' e' tkékatke ì ulitane blúie diché ta' taië.  
Wé pairi'bitu ie' tö idi' wa s'blúie  
e' detke ká ulitane wakpa wökirie.  
Satanás bak s'yamipa kkatök ñië nañeë Skéköl a,  
erë bata ekkë ta ie' uyéttsaitö.

<sup>11</sup> Obeja Pupula kötewa, e' pé tène se' skéie,  
ie' mik s'yamipa erblé,  
e' tté buaë paké ie'pa tö,  
e' kueki ie'pa e' aléka Satanás k<sub>1</sub>.  
Ie'pa kè tkine tté buaë e' dalërmik ittèwa e' k<sub>1</sub>.

<sup>12</sup> ¡A Skéköl biyöchökwakpa serke ká jai, a' ttsë'nú buaë!  
Erë ¡wéstela ina wépa tso' ká i' k<sub>1</sub> ena dayë k<sub>1</sub> esepa ta!  
Bé wa ijcher tö ie' kèwö dökewatke tsinet,  
e' kueki ie' ulune taië, ie' dë'ttsa a' we'ikök.”

<sup>13</sup> Mik këtali kéköl tö isué tö ie' uyanettsa döttsa ká i' k<sub>1</sub>, eta ie' tö alaköl alà kune', e' tötíemi. <sup>14</sup> Erë alaköl a pu pik mène as iur kamië këtali kéköl yöki ie' ká tso' ká sir poë wē kè yi serku' ee. Eë ie'pa tö ie' se'weraë dò duas mañal k<sub>1</sub> shaböts. <sup>15</sup> Eta këtali kéköl tö di' tué ikkò a taië as e' tö alaköl katömi. <sup>16</sup> Erë íyök tö alaköl kimé. Íyök tskinane ta di' tué këtali kéköl tö ikkò a, e' yéwa íyök tö. <sup>17</sup> E' tö këtali kéköl uluwéka taië alaköl k<sub>1</sub>. E' kueki ie' mía ñippök alaköl e' aleripa datse ie' itöki e'pa ta. Ie'pa dör wépa tö Skéköl tté dalöieno, e' iuteke buaë e'pa. Ñies ie'pa e' tkéwa darërëë këkraë Jesús tté mok<sub>1</sub> e' a kè olo'yeta'. <sup>18</sup> Eta këtali kéköl demi e' duéka dayë kkò mik.

## 13

### *Iyiwak sulusi aknamaie e' deka dayë a*

<sup>1</sup> Eta ye' tö isué tö iyiwak sulusi aknamaie deka etö dayë a, e' wökir dōka kul, idula' tulturka dabop. Idula' kōs k<sub>1</sub> itulurka wēs itkër blu' wökir k<sub>1</sub> es. Ie' wökir bik ekkë k<sub>1</sub> kiè kitule et et, e' kōs tö Skéköl cheke suluë. <sup>2</sup> Iyiwak sulusi sué ye' tö, e' dör wēs namu es, iklö dör wēs sini'urri bërie klò es, ikkò dör wēs ma'name kkò es. Iyiwak sulusi e' a këtali kéköl tö idiché ena kawö mé s'blúie s'wëttsöie. <sup>3</sup> Iyiwak sulusi e' wökir dōka kul, iwökir

ek shka'ule taië wësua ittewamiitö ekkë. Erë e' buanene bet. E' tö ká ulitane wakpa tkiwéwá taië. E' kueki ie'pa tö ie' klö'wé iblúie. <sup>4</sup> Kétali kéköl tö idiché me'baktke iyiwak sulusi dë'ka dayë a e' a, e' kueki ie'pa tö idalöié ikékölie. Nies ie'pa tö iyiwak sulusi e' dalöié. Ie'pa tö iché: “Kè yi dör wës ie' es. Kè yi e' alòpaka ie' ki.”

<sup>5</sup> Iyiwak sulusi dë'ka dayë a e' a kawö mène e' ttsökka taië, Skéköl chök suluë. Nies kawö mène ie' a blu'ie s'wëttsuk si' dökä dabom tkëyök ki böt ekkë (42). <sup>6</sup> Eta es ie' tö iwà wamblé. Ie' tö Skéköl ena Skéköl kiè e' ché suluë. Nies ie' tö Skéköl wé ena wépa serke ká jai a, e' kos ché suluë. <sup>7</sup> Nies kawö mène ie' a ñippök s'batse'rpa tso' ká i' ki e'pa ta e' alökka ie'pa ki. Kawö mène ie' a blu'ie ká ulitane wakpa, s'ttò ku'a'ki ku'a'ki, ditsöwö ku'a'ki ku'a'ki, e'pa kos wëttsuk. <sup>8</sup> Wépa dör Obeja Pupula kötulewá se' skéie, e' icha, esepa kiè tso' kitule iyëkkuö ki kuaë, mik Skéköl tö ká i' yö' e' yökí. Yëkkuö e' dör sene michoë e' yëkkuö. Wépa kiè tso' kitule yëkkuö e' ki, esepa kè wá iyiwak suluë e' dalöiëne'. Erë ká ulitane wakpa malepa, wépa kiè kè ku' kitule sene michoë yëkkuö ki, esepa kos tö iyiwak sulusi dë'ka dayë a e' dalöié ikékölie.

<sup>9</sup> Ì cheke ye' tö, e' ttsó a' ulitane tö:

<sup>10</sup> “Wépa suletë'bak Skéköl tö klö'wèwá, esepa tserdami klöulewá.

Wépa suletë'bak Skéköl tö duökwa tabè kkó a, esepa tterawá tabè wa.”

E' wa s'batse'rpa e' tköwá darërë ena ierblö ie' mik e' wërdaë.

#### *Iyiwak Sulusi aknamaie deka etö iyök a*

<sup>11</sup> E' ukuökí ta ye' tö iyiwak sulusi aknamaie skà sué etö, e' deka iyök a. Idula' dör bötö wës obeja wë'ne dula' es, ittò wës kétali kéköl ttò es. <sup>12</sup> Ie' wá kawö tso' ì kos wöie wës iyiwak sulusi dë'ka dayë a e' wá itso' es. Ie' kanëblöke iyiwak sulusi dë'ka dayë e' a. Ie' kanè dör ká ulitane wakpa kók iyiwak sulusi dë'ka dayë a shka'ule taië iwökir ki wësua ittewamiitö, e' dalöiök. <sup>13</sup> Ì kè or yi a, ese wéitö taië dökä bö' kiéitö ká jai a, e' ta ibiteshka taië döttsa ká i' ki sulitane wörki. <sup>14</sup> Ì kè or yi a, ese wé taië ie' tö iyiwak sulusi dë'ka dayë a e' wörki. E' wa ie' tö ká ulitane wakpa kè dör Skéköl icha, esepa kos kitö'wé taië. Ie' tö ie'pa a iché: “Iyiwak sulusi dë'ka dayë a e' shka'ule taië iwökir ki tabè wa erë ishkenekane e' diököl yuó iwák sué idalöioie.” <sup>15</sup> Iyiwak sulusi dë'ka iyök a e' a kawö mène siwá' muk iyiwak dë'ka dayë a e' diököl yöne e' a as ittöká, ñies as tö wépa kè tö idalöie, esepa ttökwa patkò. <sup>16</sup> Nies iyiwak sulusi dë'ka iyök a, e' tö ká ulitane wakpa ké e' muk wakyuè iulà bua'kka ki ö iwötsa ki. Pè' esepa ena pè' dalöiërta', pè' siarëpa ena pè' inuköl blúpa, pè' klöulewá kanè mésoie ena pè' kè dör es, e'pa kos kawöta e' muk wakyuè. <sup>17</sup> Wépa wakyöule es, esepa è a kawö mène íyi tauk ena íyi watauk. Ie'pa kos wakyöule iyiwak sulusi dë'ka dayë a e' kiè wa ö ikiè e' número wa.

<sup>18</sup> A' kawöta iwà bikeitsökwa buaë as a' éna iar tö ì kiane yënuke. Wépa didir ena ká ane buaë, esepa éna iwà armi buaë. Iyiwak sulusi dë'ka dayë a e' número dör s'ditsö eköl e' número, e' dör cien teryök ki dabom teryök kí teröl (666).

## 14

#### *Obeja Pupula ena wépa tsatkëne esepa*

<sup>1</sup> E' ukuökí ta ye' tö Obeja Pupula sué tö idur kabata kiè Sión e' wöbata ki. Ie' ta pè' tso' taië dökä 144.000 ekkë. Ie'pa kos wötsa ki Obeja Pupula ena iyé, e'pa kiè tso' kitule. <sup>2</sup> E' ukuökí ta ye' tö ittse tö ì blarke taië ká jai a, e' blar wës di' blar taië ákttö mik es, wës alá blar taië es, e' dör wës s'blar taië ma'ma kiè arpa wa es. <sup>3</sup> Pè' tso' taië dökä 144.000, e'pa iëter Skéköl kulé wöshäë ñies itso' ttsë'ka dökä tkël ena kékëpa dökä dabom böyök

kí tkël (24), e'pa wöshaë ie'pa iëter. Ie'pa tso' ttsök ttsè pa'ali wa. Ká ulitane wakpa shua e'pa è tsatkëne, e' kueki kè yi skà a e' yönuk ttsè e' wa. <sup>4</sup> Ie'pa dör yësyësë, kè e' iaouleka trë wa yës. Ie'pa michoë Obeja Pupula itöki wé imi'ke ee. Ie'pa tsatkëne, ie'pa dör wës íyi tsá mène Skëköl a ena Obeja Pupula a es. <sup>5</sup> Ie'pa kè kayëule yës. Ie'pa kè kí ì sulu ta' Skëköl wöa.

### *Skëköl biyöchökwakpa döka teröl*

<sup>6</sup> E' ukuöki ta ye' tö Skëköl biyöchökwak skà sué eköl urkear kashuk a. E' wa Skëköl tté buaë yöbië e' dami wà pakè ká ulitane wakpa a, s'ditsöwö ulitane a ena s'ttò kuakí kuakí ulitane a. <sup>7</sup> Ie' tö iché aneule: “Skëköl tö sulitane shuleketke, e' kèwö detke. E' kueki Skëköl dalöiö, ie' kikóka. Kashuk ena ká i' ena dayë ena di' ulitane, e' kos yö'itö, e' kueki idalöiö sulitane tö.”

<sup>8</sup> Eta Skëköl biyöchökwak skà debitu idë'bitu kewe, e' itöki, e' tö iché: “Ká kibi taië bua'iewa kië Babilonia, e' enewa sëraa, sulunewa. Babilonia wakpa tö ká malepa wakpa erkiowé ì sulu wamblök ie'pa ta wës s'ttëka blo' wa senokka ita es. E' kueki ká e' wakpa enewa.”

<sup>9</sup> Eta Skëköl biyöchökwak skà debitu itöki, e' tö iché: “Wépa tö iyiwak sulusi dë'ka dayë a e' ena idiököl dalöié ta ie' mérak wakyuë iwötsa kí ö iulà kkue kí, <sup>10</sup> esepa we'ikeraë Skëköl tö. Ie' kësik taië e' ardaë sëraa ie'pa kí. E' dör wës ie' tö ie'pa ké ì bacha'bachaë e' yökwa sëraa es. Ie' tö ie'pa we'ikeraë taië kekraë bö' wöñarke azufre ta e' wa ibiyöchökwakpa batse'r e'pa wörki ena Obeja Pupula wörki. <sup>11</sup> Wépa tö iyiwak sulusi dë'ka dayë a e' dalöié, ñies idiököl dalöierakitö, e'pa e' me' wakyuë iyiwak sulusi e' kië wa, esepa weirke bö' ké a, e' shkle batrö michoë kè iwöitta'wa ñië nañeë.”

<sup>12</sup> S'batse'rpa tö ie' ttè dalöiëno, e' iuté buaë, ñies ie'pa tkëulewa darërëë Jesús mik. E' wa ie'pa diché wërdaë.

<sup>13</sup> E' ukuöki ta ye' tö ttò datse ká jai a e' ttsé. E' tö ye' a iché: “I'ñe ta ena aishkuö ta wépa erblé' Jesús mik ta idurulune es, ayëcha buaë esepa.” Ñies Skëköl Wiköl tö iché: “E' dör moki, ie'pa kanëblé' darërëë Skëköl a ká i' kí, e'pa enuraë aishkuö ta. Ì buaë kos o' ie'pa tö, e' ské döraë ie'pa ulà a.”

<sup>14</sup> E' ukuöki ta ye' tö mò saruru sué, mò saruru e' kí yi tkër eköl wër tö ie' dör S'ditsö Alà. Ie' wökir kí itkëuleka ì tkekeka blu' wökir kí yöule orochka wa ese. Tabe kà di'dië tso' iyiwö toie, ese a'tser ie' wa. <sup>15</sup> Eta Skëköl biyöchökwak eköl e' yéttsa Skëköl wé tso' ká jai a e' a, eta iché aneule yi tkër mò bata kí e' a: “Ká ulitane wakpa dör wës iyiwö es, e' kèwö detke wöshtè wës íyi wöshtësö es. E' kueki e'pa wöshtó be' tabè wa.” <sup>16</sup> Eta yi tkër mò bata kí, e' tö itabè waté ká i' kí, eta iwà wöshtéitö.

<sup>17</sup> E' ukuöki ta Skëköl biyöchökwak skà e' yéttsa Skëköl wé tso' ká jai a e' a. Ie' wa tabè kà di'dië a'tser. <sup>18</sup> E' ukuöki ta Skëköl biyöchökwak skà tso' e' dör ka' tso' íyi moka Skëköl a e' bó kanéukwak. Ie' dettsa ta ichéitö aneule wé wa tabè dami e' a: “Uwawö kos tso' ká dià a e' detke wöshtè, e' kueki uwawöli kicha tó tabè wa.” <sup>19</sup> Eta Skëköl biyöchökwak, e' tö uwawöli kos kicha té ta iékaitö ákuk a wé iwóli ñateke idiö yottsaië e' a. Ákuk e' wà kiane chë tö Skëköl tö ibolöka we'ikeraë ikësik wa wës uwawö ñatësö es. <sup>20</sup> Ákuk e' tso' Jerusalén bänet, e' a iwöshté Skëköl biyöchökwak tö e' iëne. Mik inatëne, eta s'pé tene taië wër wës di' taië suësö es. Ibatsí dör kilómetro döka cien mañayök (300) ekkë, ishöló dör metro et kí shaböts.

## 15

### *Ì sulu bata datse*

<sup>1</sup> E' ukuöki ta ye' tö ì skà sué ká jai a ilè wà kkachöie, e' tö ye' tkiwéwa. E' dör Skëköl biyöchökwakpa döka kul, e'pa wa ì sulu bata datse döka kul ká i' wakpa kí, e' dami. Mik ì sulu ikképa tka, eta Skëköl kësik taië e' wöklöne.

<sup>2</sup> Ñies ye' tō isué tō ì me'r bērie dayē suē, e' wēr wōsuochka suē sarērēē shūtūule bö' wörkua wa. Ñies wépa e' ali'kábak iyiwak sulusi dē'kà dayē a e' ki ena idiököl ki, esepa suéyö. Ie'pa kē e' menettsa wakyuē iyiwak sulusi kiē e' número wa. Ie'pa iēter dayē e' kkömik. Ma'ma blarta' kiē arpa me' Skököl tō ie'pa a, e' a'tser ie'pa wā. <sup>3</sup> Skököl kanè méso kiē Moisés e' ttsè, ñies Obeja Pupula ttsè, e' ttseittseke ie'pa tō, e' tō ichè i' es:

“A Skököl, be' diché tã' taië iyi ulitane tsata.

Ì kos wé be' tō, e' dör taië buaë, e' tō sa' tkiwéwā.

Be' è dör ká ulitane wakpa blú.

Be' dör yēsýēsē, be' ttò etkè.

<sup>4</sup> A Skököl, sulitane tō be' dalöieraë.

Sulitane tō be' kikerakā.

Be' è dör batse'r.

Sulitane wā ijcher tō be' tō s'shuleke yēsýēsē,

e' kueki ká ulitane wakpa dōraë be' ska' be' dalöiök.”

<sup>5</sup> E' ukuöki tã Skököl wé tso' ká jai a, e' úshu dalöiërta' taië shute, e' suéaryö áie, e' shua ttè me'bak Skököl tō se' a e' tso' bléule. <sup>6</sup> Skököl biyöchökwakpa dōkã kul wā ì sulu datse ká i' ki e' damirak iwā iulà a, e'pa dettsa Skököl wé e' a. Ie'pa datsi' yöule datsi' kiē lino ese wa e' dör saruruë wōñarke dalalalä, ikiparuo àr iwā icho' mik, e' dör oro. <sup>7</sup> Ì tso' ttsè'ka dōkã tkël, e' eköl tō tka' yöule orochka wa, e' mé Skököl biyöchökwakpa kul a eköl eköl. Tka' e' a Skököl ser michoë e' kēsik iēne chië. <sup>8</sup> Etã Skököl wé e' wā iēneka Skököl olo taië ena idiché taië e' shklē wa. Kè yi dōpawā Skököl wé e' a dō mik, ì sulu dami Skököl biyöchökwakpa kul wā, e' wā tka etã.

## 16

<sup>1</sup> Ye' tō yile ttò ttsé darērēē Skököl wé a, e' tō iché Skököl biyöchökwakpa kul a: “¡A' yú tã a' tka' wā iēne Skököl kēsik wa, e' wā tkóttsa ká dià ki!”

*Tka' wā iēne Skököl kēsik wa dōkã kul*

<sup>2</sup> Skököl biyöchökwak tsá, e' tō itka' wā tkéttsa ká i' ki, etã wépa wakyöule iyiwak sulusi dē'kà dayē a e' kiē wa ñies idiököl dalöiérakitö, esepa kos ki s'méwö sulusi tschine dalër taië.

<sup>3</sup> E' ukuöki tã Skököl biyöchökwak skà tō itka' wā tkéttsa dayē ki. Etã dayē míã péie wes wēm kötulewā pé es. Iyiwak kos tso' dayē a duolur yēs.

<sup>4</sup> E' ukuöki tã Skököl biyöchökwak skà tō itka' wā tkéttsa di' kos ki. Etã di' kos míã péie.

<sup>5</sup> E' ukuöki tã ye' tō ittse tō Skököl biyöchökwak dör di' kkö'nukwak, e' tō iché:

“A Skököl, be' dör batse'r,

be' tso'tke tsawe tã, i'ñe tã ena kekraë.

Kekraë be' tō s'shuleke yēsýēsē,

e' kueki e' dör buaë tō be' tso' ie'pa we'ikök es.

<sup>6</sup> Ie'pa tō s'batse'rpa ena be' ttekölpa,

e'pa kötulur pé tēne taië, e' kueki e' dör buaë tō be' tō ie'pa we'ikè es.

I'ñe tã be' tō ie'pa ské kéne pé yök.

Es ie'pa ki inuí ské dene.”

<sup>7</sup> E' ukuöki tã kã' tso' iyi mokã Skököl a eë ttò ttséyö se' ttöie e' tō iché: “A Skököl, be' diché tã' taië iyi ulitane tsata, ayécha e' dör mokïë, be' tō ie'pa nuí shulé mokïë yēsýēsē.”

<sup>8</sup> E' ukuöki tã Skököl biyöchökwak skà tō itka' wā tkéttsa, e' ane diwö ki. Etã diwö a kawö mène s'ditsö ña'ukwa iba taië e' wa. <sup>9</sup> Dìba e' tō sulitane pa shayo'wéttsa taië. Ì sulu

ikkë kōs patké Skëköl tō ie'pa kī, erë ie'pa kè éna ì sulu wambleke ie'pa tō ese olo'yak, ie'pa kè er mane'wak ie' a. Ie'pa kè éna ie' kikakka. E' skéie ie'pa tō ie' ché suluë.

<sup>10</sup> E' ukuökī tā Skëköl biyöchökwak skà tō itka' wà tkéttsa, e' ane wé iwiwak sulusi dè'ka dayë a e' tkërka e' kī. Etā ie' ká kōs ttsenewa wēs stui es. Ká ulitane wakpa tō iku' kuele ipà dalër taië e' è kuëkī. <sup>11</sup> Erë ì sulu wambleke ie'pa tō, ese kè olo'yè ie'pa tō. Ie'pa pa dalër taië ñies ie'pa tteke smewö sulusi tō, e' kuëkī ie'pa tō Skëköl tso' ká jai a e' ché suluë.

<sup>12</sup> Skëköl biyöchökwak skà tō itka' wà tkéttsa, e' ane di' taië kiè Éufrates e' a. Etā di' taië e' sinewa as blu'pa datse diwö tskirke e' wa, esepa tkömi buaë inippökwakpa tā. <sup>13</sup> E' ukuökī tā ye' tō wimblupa sulusi sué bukuë'ie mañat. Et dettsa këtali kéköl e' kkò a. Et dettsa iwiwak sulusi dè'ka dayë a e' kkò a. Ibata èt dettsa iwiwak sulusi e' tteköl kkò a. <sup>14</sup> Bukuë' e'pa dör aknamapa. Ì kè or yi a, ese ormi ie'pa a. Ie'pa mi'ke blu'pa tso' ká wa'ñe, e'pa dapa'uk ñippök Skëköl diché tā' taië íyi ulitane tsata, e' tā, mik ikéwö de sulitane shulök etā.

<sup>15</sup> Skëképa Jesucristo tō iché i' es: “Ye' ttò ttsó. Mik ye' datsene, etā ye' datse kè e' biyó yëule wēs akblökwak döwa es. Wépa tso' erki ye' panuk, idatsi' tso'tke buaë iënoie, ayëcha buaë esepa. Es ie'pa kè shkòpa sume sulitane wörki tā ijaërkarak.”

<sup>16</sup> Etā aknamapa mañal, e'pa tō blu'pa dapa'wéka ká kiè hebreoie Armagedón eë.

<sup>17</sup> Etā Skëköl biyöchökwak bata tō itka' wà tkéttsa, e' ane kashuk a. Etā se' ttöie darërëe tse ye' tō datse blu' kulé tso' Skëköl wé a e' ska', e' tō iché aneule: “jYe' tō iwakanewétke!” <sup>18</sup> Etā alá wöñane taië iblane taië. Í tka darërëe, e' tō ká wötí'wé taië kōs í bakule ká i' kī e' tsata. <sup>19</sup> Ká wa'ñe wé s'ditsö serke, e' ké kōs enewa. Ká kibi taië bua'iewa kiè Babilonia, e' tskinewa atë mañat tsiní. Es Babilonia kī Skëköl kësik suluë blé, ì sulu wamblekerakitö ese nuí kuëkī. E' dör wēs Skëköl tō ie'pa ké ì bacha'bachaë yökwa seraq es. <sup>20</sup> Dayë nane kōs, kabata kōs, e' cholur. <sup>21</sup> Ñies mò wöli wösi seseë, e' wösi es tkòka dabom tkëyök (40) kilo tsata, ese dane taië s'ditsö kī wēs kalí yër es. E' tō s'ditsö we'iké taië e' kuëkī ie'pa uluneka Skëköl kī tā ie' ché suluë.

## 17

### *Alaköl trër taië e' weirdäë*

<sup>1</sup> Skëköl biyöchökwakpa döka kul wā tka' tso', e' eköl de ye' ska' tā ye' a ichéitö: “Be' shkó ye' tā, súyö be' a ikkachè wēs Skëköl tō alaköl trër taië kkeauleka taië, e' we'iké. Alaköl e' tkërka di' tso' taië e' bata ki. <sup>2</sup> Ká ulitane blúpa e' mettsa trënuke ie' tā. Ñies ká ulitane wakpa e' mettsa ì sulu wamblök wēs ie' es kè wöklörta' wēs s'tteke blo' tō es.”

<sup>3</sup> E' ukuökī tā Skëköl Wiköl de taië ye' kī tā Skëköl biyöchökwak wā ye' mítser ká sir poë wé kè yi serku' taië ese ska'. Etā eë ye' tō alaköl sué eköl tkërka iwiwak sulusi dè'ka dayë a wák batsë e' kī. Iwiwak sulusi e' pa kōs kī kiè tso' kitule taië kuā'kī kuā'kī. Kiè e' wā kōs tō Skëköl cheke suluë. Iwökir döka kul, idula' döka dabop. <sup>4</sup> Alaköl e' paiëule buaë idatsi' dör siësiël ena batsë. Ikitkëule buaë taië oro wa ena ák bua'buwa wa ena ákwöla bua'buwa kiè perla ese wa. Tka' yöule oro wa, e' a'tser iwā wā iëule chië blo' wa. Blo' e' tō ì kōs wër suluë Skëköl wa ena alaköl e' ia'wéka trë wa e' chë. <sup>5</sup> Ie' wötsa kī ttè tso' kitule. Ttè e' wā blëulewā se' yöki, e' tō iché: “Ye' dör ká kibi taië kiè Babilonia. Ye' dör alakölpa trër suluë esepa kōs mì. Ñies ye' dör ì kōs tso' ká i' kī wër suluë Skëköl wa ese mì.” <sup>6</sup> Etā ye' tō isuë tō alaköl tteke blo' tō. Blo' e' dör s'batse'rpa kütulur ie'pa tō Jesús tté kuëkī, e'pa pé. E' tō alaköl e' tteke blo'ie. Mik ye' tō ie' sué etā ye' tkinewa taië. <sup>7</sup> Etā Skëköl biyöchökwak tō ye' a ichaké: “jÌ kuëkī be' tkinewa? Alaköl e' ena iwiwak sulusi wökir döka kul, idula' döka dabop, e' kī alaköl tkërka, e' wā pakeke ye' tō be' a. <sup>8</sup> Iwiwak sulusi sué be' tō, e' bak senuk ká iaiaë, e' kè ku'ia i'ñe tā, erë ie' döraka kauk taië iskië, kè s'wö dè'mi ekkë, e' a. E' ukuökī tā Skëköl tō ie' we'ikök patkeraë kekraë. Wépa kiè kè ku' kitule kuaë sene michoë yëkküö kī kam Skëköl tō ká i' yuò e' yöki, esepa kōs tkirdawarak

mik ie'pa tö iyiwak sulusi dë'ka dayë a e' sué etä. Iyiwak sulusi e' bak senuk, e' kè ku'ia i'ñe ta, erë ie' dörane.

<sup>9</sup> “Wépa didir ena ká ane buaë, esepa éna ì cheke ye' tö a' a e' wà armi buaë. Iyiwak sulusi e' wökir döka kul, e' wà kiane chè kabata döka kul, e' kî alaköl sulusi tkërka. Ñies e' wà kiane chè blu'pa döka kul. <sup>10</sup> E' skël blërulunebak, e' eköl tso' blu'ie, blu' bata doia itöki erë e' kè kaneblöpa ká taië blu'ie. <sup>11</sup> Iyiwak sulusi bak senuk ká iaiaë, e' kè ku'ia i'ñe ta, mik ie' dene blu'ie, etä ide pàköl, ie' dör blu' bak kul e' eköl ñies. Erë ie' dene blu'ie weinuk è.

<sup>12</sup> “Idula' döka dabop sué be' tö, e' wà kiane chè tö blu'pa döka dabop e'pa doia. Ie'pa a kawö merdaë s'wëttsöie iyiwak sulusi e' ta ekuölö ème. <sup>13</sup> Blu'pa döka dabop, e'pa er mé ñikkë iwákpa bil ekkë, kawö ena diché tso' ie'pa wa s'wëttsöie, e' muk iyiwak sulusi e' a. <sup>14</sup> Ie'pa ñippöraë Obeja Pupula ta, erë e' e' alöraká ie'pa ki. Ie' dör skëkölpá ulitane e' këköl, ñies ie' dör blu'pa ulitane e' blú, e' kuëki ie' e' alöraká ie'pa ki. Wépa tso' ie' ta, e'pa klöo'bak Skëköl tö, ñies ie'pa shukitbakitö. Ie'pa dör Obeja Pupula ttökatapa e' tkökewa darërëe ie' a ese.”

<sup>15</sup> Ñies Skëköl biyöchökwak tö ye' a iché: “Di' tso' taië sué be' tö, e' bata kî alaköl trër taië, e' tkërka, e' wà kiane chè, ká tso' taië e' wakpa s'tso' taië ttò kuá'ki kuá'ki e'. <sup>16</sup> Idula' döka dabop ena iyiwak sulusi, e'pa tö alaköl trër taië e' sueraë suluë. Ì kos tso' ie' wa, e' yerattsarakitö iulà a, imeraarakitö sume. Ie'pa tö ie' chkà katerawa etä ikuö atë e' ña'wërawa ie'pa tö. <sup>17</sup> Skëköl wák tö blu'pa dabop er méwa ñikkë as ie'pa wa kawö tso' s'wëttsöie, e' mùitörak iyiwak sulusi e' a. Es ie'pa tö iweraë dö mik iwà tka wës Skëköl tö iyë'at es. <sup>18</sup> Alaköl trër taië sué be' tö, e' wà dör ká kibi taië. Ká e' wakpa e' aléka ká malè blúpa ki.”

## 18

### *Babilonia wakpa enewa ta iké sulunewa*

<sup>1</sup> E' ukuöki ta ye' tö Skëköl biyöchökwak skà sué eköl datse ká jaì a, e' diché ta' taië. Ilo taië, e' buneka ká i' kos ki. <sup>2</sup> Ie' tö iché aneule:

“jBabilonia wakpa enewa ta iké sulunewa!  
Ká e' sulunewa míane aknamapa kéie.  
Eë wimblupa sulusi tsakjé e' dapa'wéka senuk.  
E' dör iyiwak sulusi dör ñá ena dù dör ñá, ese wé.  
<sup>3</sup> Ká ulitane wakpa erkiöwéka Babilonia wakpa tö trënuke wës s'tteke blo' tö es.  
Ká ulitane blúpa senéka ie' ta.  
Ì sulu kos tuëke ie' tö ì sulu wambloie,  
e' tö dalì wataukwakpa ulitane blu'wéka taië.”

<sup>4</sup> Ttò skà ttsé ye' tö datse ká jaì a, e' tö iché:  
“Wépa dör ye' icha, e'pa kos e' yóllur Babilonia  
as a' kè tö ì sulu wamblërke eë e' wamblöñak.  
Ñies a' e' yóllur as ì sulu datse ie'pa ki e' kè dö a' ki.  
<sup>5</sup> Ì sulu wamblé ie'pa tö, e' dör taië shute,  
e' mú dapa'wësö, e' ma ideka ká jaì a.  
Ì sulu wamblé ie'pa tö, e' jcher buaë Skëköl wa.  
<sup>6</sup> Etä ttò ttsé ye' tö e' iché inamépa a:  
Ì sulu wamblé ie'pa tö pë' malepa ki,  
e' nuí ské patkóne ie'pa ki taië dö bötökicha.  
Ì sulu wamblé ie'pa tö pë' malepa ki,  
e' dör wës ie'pa tö pë' malepa ké ì bacha'bachaë yök es.



E' kuɛki ibaché dōkɑ bōtōkicha,  
e' ské yōkwa ie'pa kó inuīe.

<sup>7</sup> Ie'pa e' kkeòkɑ taië, ie'pa wɑ íyi bua'buɑ tso' taië shute,  
ekké ie'pa we'ikó taië shute.

Ie'pa e' bikeitsò:

'Se' tso' buaë wɛs alaköl dör blu' es,  
se' kè dör wɛs schó es weir siarë.'

<sup>8</sup> Ie'pa e' bikeitsò es, e' kuɛki ì suluë dōraë ie'pa kī bet.

Ie'pa teraë bli tō, ie'pa weirdaë siarë,

ie'pa duōralur, ie'pa ñardawa bö' a.

Skéköl diché tɑ' taië íyi ulitane tsɑta,

e' wa ie' tō ie'pa wōme'ttsɑbak weinuk."

<sup>9</sup> Ì sulu wambleke Babilonia wakpa tō, ese wamblë'ñak kɑ blúpa tō ie'pa tɑ. Ñies íyi bua'buɑ tso' taië Babilonia, e' tō ie'pa ttsë'wé buaë. Mik ie'pa tō Babilonia ñarkewa e' shklɛ sué, etɑ ie'pa eriardaë taië, iuraë siarë. <sup>10</sup> Ie'pa suardaë dö' ì sulu e' dö' ie'pa kī ñies. E' kuɛki ie'pa e' tsuraarak kamië ikí sauk tɑ icherarakitō:

“¡Wéstela ina Babilonia wakpa tɑ!

Ie'pa dör pè' taië. Ie'pa kɑ dör taië buaë.

¡ì sulu wamblé ie'pa tō e' nuí de ie'pa kī bet,

ekuólöie ie'pa enewa, ie'pa kɑ sulunewa!”

<sup>11</sup> Dalì wataukwakpa tso' kɑ i' kī e'pa eriardarak siarë iurarak taië, kè yi ku'ia Babilonia ie'pa dalì tauk e' kuɛki. <sup>12</sup> Dalì watuëke ie'pa tō e' dör orochka, inukölchka, ák bua'buɑ, ákwōla bua'buɑ kiè perla, datsi' bua'buɑ kiè lino ena seda, ñies datsi' bua'buɑ wōaule sielsiɛl ena batsë; ñies kal ulitane alar jamamaë; ñies íyi ulitane bua'buɑë yöule marfil\*, ena kaltak bua'buɑ wa, ena tabechka kiè hierro e' wa ena tabechka kiè bronze e' wa, ena ák bua'buɑ kiè mármol e' wa; <sup>13</sup> ñies canela klò e' kkuölit, ñies íyi poie alar jamamaë ena íyi masmas ña'wè, kiò masmas kiè mirra ena íyi masmas poie tuè darërè kiè olibano; ñies vino ena kiò, ñies harina bua'buɑ ena trigowö; ñies baka ena obeja ena kabaio ena carreta; ñies pè' klöulewɑ kanè mésoie ena pè' skà tso' watuè ese. Íyi ekkè kōs watuëke ie'pa tō. <sup>14</sup> Dalì wataukwakpa tō icheraë:

“A Babilonia wakpa, ì kōs bua'buɑë kiarke a' kī taië,

e' kè ku'ia a' wɑ.

Íyi bua'buɑ kōs wër buaë wōñarke dalölöë,

e' kōs kè dë'ia a' ulà a.”

<sup>15</sup> Dalì wataukwakpa e' blu'wé Babilonia wakpa wa, e'pa e' tsuraarak kamië ikí sauk. Ie'pa suane dö' ì sulu tka Babilonia wakpa kī, e' dö' ie'pa kī ñies. Ie'pa eriardaë siarë, iuraë taië. <sup>16</sup> Ie'pa tō icheraë:

“¡Wéstela ina Babilonia wakpa tɑ!

A' e' paiëule datsi' bua'buɑ kiè lino ese wa

ñies datsi' wōaule sielsiɛl ena batsë ese wa.

A' e' kītkëule buaë oro wa ena ák bua'buɑ wa ena ákwōla bua'buɑ kiè perla ese wa.

<sup>17</sup> ¡Ká etkè tɑ a' wɑ íyi tso' bua'buɑë taië, a' blune taië, e' enewa!”

\* 18:12 marfil: E' dör iyiwak kiè elefante ese kà taléki wà.

Es ñies kanò blubluë shkòke taië dayë k<sub>i</sub>, e' wòkirpa kòs ena ikaneblòkerak kòs ena wépa shkòke kanò sh<sub>u</sub>a, wépa kòs inukòl klò'wéke kaneblòk kanò wa, esepa kòs e' tséat k<sub>a</sub>mië Babilonia k<sub>i</sub>sauk. <sup>18</sup> Mik ie'pa tò ká e' ñanewá e' shkle sué, etá ie'pa ane taië: “¿Ká wé skà dör buaë taië wés Babilonia es?” <sup>19</sup> Ie'pa tò ká po tkéka e' wòkir k<sub>i</sub> iwà kkachoië tò ie'pa erianerak taië ta i<sub>u</sub>ke taië ta ichérakitò aneule:

“¡Wéstela ina ká e' buaë taië, e' wakpa ta!  
Sa' kòs wá kanò tso', e'pa blune taië ie'pa batamik.  
¡Ká etkè ta ká e' sulunewá!”

<sup>20</sup> ¡A a' tso' ká jai a,  
Skékòl tò Babilonia wakpa ewéwa,  
e' kuëk<sub>i</sub> a' ttsé'nú buaë!  
A' dör batse'rpa,  
ñies Jesús ttekòlpa tsá,  
ñies Skékòl ttekòlpa, je'pa kòs ttsé'nú buaë!  
Skékòl tò Babilonia wakpa we'iké,  
ì sulu wamblé ie'pa tò a' k<sub>i</sub>, e' nuí ské de ie'pa k<sub>i</sub>,  
e' kuëk<sub>i</sub> a' ttsé'nú buaë.

<sup>21</sup> E' ukuök<sub>i</sub> ta Skékòl biyöchökwak skà de ekòl diché ta taië. E' tò ák bërie kéka, ák e' dör kòs ák tso' wawè ekkè, e' uyémiitò dayë a ta ichéitò:

“A Babilonia wakpa, a' chörawa  
wés ák i' chowa dayë a es,  
kè yi tò a' suepaia.  
<sup>22</sup> Ma'ma tso' bla'wè kiè arpa ena flauta ena duk,  
ese kè blarpaia a' ká a.  
A' kanè mésopa kòs kè ku'ia.  
Ák tso' wawè ese kè blarpaia a' ká a.  
<sup>23</sup> Bö'wö ñarke e' kè wöñarpaia a' ká a.  
Kè yi ku'ia ulabatsök.  
A' dalì wataukwakpa e'pa kkeauleka taië,  
ie'pa dör pè' taië ká i' k<sub>i</sub>.  
Es a' tò ká ulitane wakpa kitö'wé alibchò wa,  
e' kuëk<sub>i</sub> íyi ikké sulu de a' k<sub>i</sub>.”

<sup>24</sup> Skékòl ttekòlpa ena s'batse'r malepa kòs kòtulur Babilonia wakpa tò, e'pa pé tène ie'pa ká k<sub>i</sub>. Ñies pè' malepa taië kòtulur ie'pa tò. E' kuëk<sub>i</sub> e' nuí de ie'pa k<sub>i</sub>.

## 19

<sup>1</sup> E' ukuök<sub>i</sub> ta ye' tò ittse tò ká jai a pè' daparke taië, e'pa tté darèrè ta ichérakitò aneule:

“Skékòl tò s'shulè yësyësè ttè moki wa,  
e' kuëk<sub>i</sub> ¡kikìkòkasò!  
Ie' dör S'tsatkòkwak.  
Ie' olo ta' taië, ie' diché ta' taië íyi ulitane tsata. <sup>2</sup> Babilonia wakpa dör wés alakòl trèr taië es.  
Ie'pa bak ká ulitane wakpa erkiöuk ì sulu wamblök wés ie'pa es.  
Ie'pa tò Skékòl kanè mésopa kòtulur.  
E' nuí k<sub>i</sub> Skékòl tò ie'pa ká sulu'wéwa ta iwakpa ewéwaitò.  
E' kuëk<sub>i</sub> se' wá ijcher tò ie' s'shüleke yësyësè mokië.”

<sup>3</sup> E' ukuöki ta ie'pa tö iska chéne:  
 “¡Skököl kikökasö!  
 Babilonia shkle dià e' batrö michoë.”

<sup>4</sup> Këkëpa doka dabom böyök ki tkël (24) ena ì ttsë'ka doka tkël, e'pa e' télur iski wöwakköt ta Skököl tkërka ikulé ki, e' dalöierakitö. Ie'pa tö iché: “¡Es e' idir! ¡Skököl kikökasö!” <sup>5</sup> Skököl tkër e' ska' ttò ttsé ye' tö, e' iché:

“¡A' ulitane tö se' Këkök kikóka,  
 se' tsitsipa ñies se' blublupa.  
 A' dör ie' kanè mésopa tö ie' dalöieke,  
 e'pa kos tö Skököl kikóka!”

*Obeja Pupula ulabatsöke e' kéwö tkö'uk*

<sup>6</sup> Eta ye' tö ittsé tö ì blarke taië wes s'tso' taië ttò es, wes di' blar taië ákttö mik es, wes alá blar taië es, e' tö iché:

“¡Skököl kikökasö!  
 Këké dör se' Këkök, e' diché ta' taië íyi ulitane tsata.  
 Ie' detke s'blúie s'wëttsuk,  
 e' kueki ikikökasö.

<sup>7</sup> Obeja Pupula ulabatsöketke, e' kéwö dewatke,  
 e' tayë e' kané wétke ulabatsöie ie' ta.  
 E' kueki se' ttsë'nù buaë kaneë, ie' olo kikökasö.

<sup>8</sup> Ie' tayë a datsi' bua'buakiè lino e' mène e' paioie,  
 Datsi' e' dör saruruë, wõnarke dalalaë.  
 Datsi' e' wà kiane ché  
 s'batse'rpa ser yësyësë e'.”

<sup>9</sup> Skököl biyöchökwak tö ye' a iché: “Ishtë yëkkuö ki i' es: ‘Wépa shkeñaule Obeja Pupula ulabatsöketke, e' kéwö tkö'uk, ayëcha buaë esepa.’” Ñies ie' tö iché ye' a: “Ttè e' dör Skököl ttè mokjë.”

<sup>10</sup> Ye' e' téwa iski wöwakköt Skököl biyöchökwak wöshäë idalöiök, erë ie' tö ye' a iché:  
 “¡Së kë war! Ye' dör Skököl kanè méso wes be' ena be' malepa e' tkëulewa darërë Jesús ttè a e'pa es. ¡Skököl è dalöiól!”

Jesús tté e' tö Skököl ttekölpa erkiöweke s'pattök.

*Itkërka kabaio saruru ki*

<sup>11</sup> E' ukuöki ta ye' tö isué tö ká jai a ukkö tso' áie, eë kabaio suéyö etö saruruë. E' ki itkërka, e' kiè dör Ttò Yësyësë Kekraë. Ie' tö s'wëttseke yësyësë. Mik ie' e' kéka ñippök e' kë dör é. <sup>12</sup> Ie' wöbla wër wes bö'wö wõnar es. Ie' wökir ki ì tkërka taië wes itso' tkëka blu' wökir ki es. Ie' ki ikiè tso' kitule. Kiè e' kë jcher yi wa, e' jcher ie' wák è wa. <sup>13</sup> Ie' datsi' nuuleka pé wa. Ie' kiè dör Skököl Ttè. <sup>14</sup> Ñippökwakpa tso' taië ká jai a, e'pa datse ie' itöki kabaio saruru ki. Ie'pa paiëule datsi' bua'buakiè lino ese wa, datsi' e' dör saruruë wõnarke dalalaë. <sup>15</sup> Ie' kkò a tabè dökettsa kà yëule di'dië, tabè e' wa ie' e' alöraka ká ulitane wakpa ki. Ie' tö ie'pa wëttseraë yësyësë idiché taië wa. Skököl diché ta' taië íyi ulitane tsata, e' kësik wa ie' tö ibolökpa ñatskerawa wes uvawö ñatskèwasö s'klò wa idiö yottsä es. <sup>16</sup> Itu' shä ie' paio ki itso' kitule, e' tö iché: “Blu'pa ulitane e'pa Blú, skökölpa ulitane e'pa Këkök.”

*S'tsätkökwak e' aléka iyiwak sulusi ki*

<sup>17</sup> E' ukuöki ta ye' isué tö Skököl biyöchökwak dur eköl diwö ki. E' tö iché aneule dù kos urke kashuk a e' a: “¡A' shkó, a' ñi dapa'úka chkè tso' taië Skököl wa a a e' katök! <sup>18</sup> A'

shkó blu'pa chkà katök, ñies ñippökwakpa wökirpa ena wëpa kësik suluë, esepa chkà katök a' shkó. Kabaio ena iwákpa e'pa chkà katök a' shkó. S'klöulewà kanè mésoie ena pë' kè dör es, ñies s'dalöiër tã' taië ena se' ësepa ena pë' ulitane chkà katök a' shkó.”

<sup>19</sup> Etã ye' tö iyiwak sulusi dë'kã dayë a e' sué. Kã ulitane blúpa ena iñippökwakpa, e'pa tso' ie' tã. E'pa ñi dapa'uke ñippök itkërka kabaio saruru kï ena iñippökwakpa e'pa tã. <sup>20</sup> Iyiwak sulusi dë'kã dayë a ena itteköl e'pa klö'wëwarakitö. Itteköl e' tö ì kè or yi a ese o' iyiwak sulusi wörki. Ese wa ie' tö wëpa e' me' wakyuë iyiwak sulusi e' kië wa ena idiököl dalöië', esepa kitöo'kã. Etã iyiwak sulusi ena itteköl, e'pa batrélormi ttsë'ka bö' me'r taië batsöriie e' a. Eë bö' wöñarke taië azufre tã. <sup>21</sup> Imalepa ttélur itkërka kabaio kï e' tö, tabè dökettsã ikkò a e' wa. Etã dù tö ie'pa chkà katé taië dò che.

## 20

### *Skëköl e' aléka Satanás kï*

<sup>1</sup> E' ukuöki tã Skëköl biyöchökwak sué ye' tö eköl, e' datse kã jai a. Ie' wã kauk ter taië iskië e' kköyottsã tso'. Ñies tabecka kichaie bërie e' a'tser iwã. <sup>2-3</sup> Etã ie' tö këtali këköl klö'wëwã. Këtali këköl e' dör Bé kië Satanás dë'kã tkabëie kã iaiã e'. Skëköl biyöchökwak tö ie' muëwã tabecka kichaie wa batréemi kauk ter taië iskië e' a. Tã e' kkò wötëwãitö daloie ena iwakyuëitö as kè yi a ikköyerttsane. Eë ie' wötëne dò duas mil eyök as kè ie' a kã ulitane wakpa kitëria. Erë mik duas mil eyök deka, etã ie' wötsënardaë erë ekuölö è.

<sup>4</sup> E' ukuöki tã ye' tö s'blúpa kulé sué tular kã jai a. Wëpa tular kula' e' kï, e'pa a kawö mène s'wëttsuk. Ñies wëpa kuli' tërdulune Skëköl tté ena Jesús tté moki pakè kueki, esepa wiköl sué ye' tö. Ie'pa kè wã iyiwak sulusi dë'kã dayë a ena idiököl dalöiëne'. Ñies ie'pa kè e' mène wakyuë iyiwak sulusi kië wa iwötsã kï ö iulà kkue kï. Ie'pa shkenekane, etã ie'pa tö s'wëttsé Cristo tã döka duas mil eyök. <sup>5</sup> Ie'pa shkenekane e' dör s'duulewã e' tsã shkenekane. S'duulewã malepa e'pa kè shkerpakane dò mik duas mil eyök ene etã. <sup>6</sup> Wëpa shkerdakane kewë, ayëcha buaë esepa. Ie'pa dör wëpa batseo' Skëköl tö esepa kï. Ie'pa kè duöpawã bötökicha. Ie'pa kanëblöraë Skëköl a ena Cristo a sacerdotepaie. Ñies ie'pa tö s'wëttsëraë Cristo tã ñitã dò duas mil eyök ekkë.

<sup>7</sup> Mik duas mil eyök deka, etã Satanás yërdattsane wé itso' wötëulewã eë. <sup>8</sup> Ie' e' yörattsã Gog ena Magog kitö'uk. Gog ena Magog, e' wã kiane chè kã ulitane wakpa. Satanás tö ie'pa dapa'wëraë ñippök Skëköl tã. Ie'pa ñippökwakpa dör taië wes dayë tséwö es.

<sup>9</sup> Ie'pa ulitane datse kã wa'ñe demi Jerusalén. Eë s'batse'rpa serke. Kã e' dalër taië Skëköl éna. Ie'pa tö kã e' kköiëwã shkit s'batse'rpa ewowa, erë bö' biteshka kã jai a, e' tö Skëköl bolökpa ewëwa seraã. <sup>10</sup> Etã Bé tö ie'pa kitöo', e' batréemi bö' wöñarke azufre tã me'r taië batsöriie e' a. Eë iyiwak sulusi dë'kã dayë a ena itteköl e'pa uyanemibak. Eë ie'pa weir michoë ñië nañeë.

### *Skëköl tö sulitane shuleke bata ekkë tã*

<sup>11</sup> E' ukuöki tã ye' tö isuë tö Skëköl tkër ikulé kï. Ikula' dör bërie saruruë. Kã jai ena kã i' e' tkashkar ie' yöki, kè iwëneia yës. <sup>12-13</sup> Etã ye' tö isuë tö s'duulewã qos iëter Skëköl kulé wörki as ishulirdak. Wëpa datse s'wimblu ké a esepa tso', ñies wëpa durulune dayë a esepa tso'. S'dalöiërta' taië ena s'ësepa qos iëter Skëköl wörki as ie' tö ie'pa shulò wes ie'pa e' wamblë' es. Yëkkuö tso' tseë eë, e' kï ì qos o'sö ena ì qos wamblë'sö e' tso' kitule. Yëkkuö skà tso' eë et, e' dör sene michoë yëkkuö. Yëkkuö e' kï wëpa ulà a sene michoë döraë, e'pa kië tso' kitule. Yëkkuö e' shuppélor, etã s'duulewã qos shulé Skëköl tö wes ie'pa e' wamblë' es, ñies wes itso' kitule iyëkkuö kï es. <sup>14</sup> E' ukuöki tã s'duöwã ena s'wimblu ké e' qos batréemi bö' me'r taië batsöriie e' a, e' dör s'duöwã bötökicha e'. <sup>15</sup> Wëpa qos kië kè ku' kitule sene michoë yëkkuö kï, e'pa batréemi bö' ñe' a.

## 21

*Ká jai pa'ali ena ká i' pa'ali*

<sup>1</sup> E' ukuöki ta ye' tö isué tö ká jai tsá ena ká i' tsá, e' kè ku'ia, e' kos ské yönene pa'ali. Nies dayë kè ku'ia. <sup>2</sup> Eta ye' tö isué tö ká batse'r dör Jerusalén pa'ali e' datse ká jai a Skëköl ska'. Ká e' wër buaala wes tayë ulabatsketke e' paiò buaala iwëm wörki es. <sup>3</sup> Skëköl tkër, e' ska' ttò ttsé ye' tö, e' tö iché aneule: “Ittsó, i'ñe Skëköl de senuk s'ditsö shua. Ie' serdaë ie'pa ta kekraë. Ie'pa döraë ie' ichaie. <sup>4</sup> Ie'pa wöriö kos paikleraëitö. Kè yi duöpawia, kè yi eriarpaia, kè yi kköchöpaia, kè yi mik ì dalërpaia, íyi ekkè kos bakbak e' kueki.”

<sup>5</sup> Eta Skëköl tkër ikula' ki, e' tö iché: “Ye' tso' íyi kos yuökne pa'ali.” Nies ie' tö ye' a iché: “Ttè i' dör mokië, e' mik be' erblömi, e' kueki ishtó yëkkuö ki.”

<sup>6</sup> E' ukuöki ta ie' tö iché ye' a: “Iwà yöne one. Ye' dör íyi wì ena íyi bata, ttè tsá ena ttè bata. Wépa ersine, esepa a kawö meraë ye' tö, sene michoë di' yök éme, kè tuè ta'. <sup>7</sup> Wépa e' aléka ì sulu ki, kè wa ye' tté olo'yaule, esepa a íyi ekkè kos ské meraë ye' tö. Ye' döraë ie'pa Këköl ena ie'pa döraë ye' ala'rie. <sup>8</sup> Erë wépa tö ye' tté olo'yé suane kueki, wépa kè erblöta' ye' mik, wépa e' ia'uke ì sulu wamblekerakitö ese wa, wépa dör s'ttökwakpa, wépa trërta', wépa wöbatsö alibchök, wépa tö íyi diököl dalöieke skëkölíe, nies wépa dör kachökwakpa, esepa kos batreerami bö' wöñarke azufre ta me'r taië batsöriie e' a. E' dör s'duöwä bötökicha e'.”

*Jerusalén pa'ali kkayëne Juan a*

<sup>9</sup> Skëköl biyöchökwakpa döka kul suéyo kewe tö tka' damirak iwä wà tkëttsa ká ulitane wakpa we'ikoie, e' eköl de ye' ska', e' tö iché ye' a: “Be' shkó ye' ta. Obeja Pupula ulabatsöketke, e' tayë kkacheke ye' tö be' a.” <sup>10</sup> Eta Skëköl Wiköl de taië ye' ki ta Skëköl biyöchökwa ye' mítser kabata bërie kakkeë e' ki. Ie' tö Jerusalén dör batse'r datse ká jai a e' kkaché ye' a, e' dör Skëköl ké. <sup>11</sup> Ká e' wöñarke dalölöë Skëköl olo taië e' wa. Ká e' olo burke taië dalölöë wes ák bua'buwa tuè darërëë kiè jaspe es. Ák e' wöaule spaspa ena mat, e' wër sarërëë. <sup>12</sup> Ká e' kköiëulewä shkit kakkeë buririë. E' ukkö döka dabom eyök ki böt (12). E' ukkö kos a Skëköl biyöchökwakpa iëter eköl eköl. Nies Israel aleripa ditséwö döka dabom eyök ki böt, e'pa kiè tso' kitule eköl eköl ukkö kos e' mik. <sup>13</sup> Ukkö tso' mañat diwö tskirke, e' kke. Ukkö tso' mañat diwö mi'kewa, e' kke. Ukkö tso' mañat wì wa. Nies ukkö tso' mañat i' wa. <sup>14</sup> Ká e' kköiëulewä shkittke, e' yöule ák blubluë ki döka dabom eyök ki bök. Obeja Pupula ttekölpa tsá dabom eyök kí böl, e'pa kiè tso' kitule eköl eköl ák blubluë kos e' mik.

<sup>15</sup> Skëköl biyöchökwa tso' ttök ye' ta, e' wä orochka yöule batsië ká ma'woie, ese a'tser. E' wa ie' tö ká kos ñe' ma'weke, ikköiëulewä shkit ena iukkö kos e' ma'weke ie' tö. <sup>16</sup> Ká e' yöule ñikkëë, kos ibatsí dör, ekkè ishóló dör. Skëköl biyöchökwa tö ká e' ma'wé ká ma'wo a'tser ie' wä e' wa. Ká e' batsí dör kilómetro döka mil böyök kí cien tkëyök (2.400); nies ishóló ena ikákke e' dör ekkè ñies. <sup>17</sup> E' ukuöki ta Skëköl biyöchökwa tö ká kköiëulewä shkit, e' burri ma'wé. E' dör metro döka dabom teryök kí teröl (66). Skëköl biyöchökwa tö ima'wé wes s'ditsö tö ká ma'wé es.

<sup>18</sup> Ká kköiëulewä shkit, e' yöule ák bua'buwa kiè jaspe ese wa. Ká e' yöule orochka wák è wa; e' damiwä sarërëë wes vidrio es. <sup>19</sup> Ák blubluë tuluulewä ká kköiëulewä e' chkíe, e' mik ák bua'buwa kuá'ki kuá'ki bastulur taië. Ák blubluë e' tsá e' dör ák bua'buwa kiè jaspe; ák blubluë skà dör zafiro; iskà dör ágata; iskà dör esmeralda; <sup>20</sup> iskà dör ónice; iskà dör cornalina; iskà dör crisólito; iskà dör berilo; iskà dör topacio; iskà dör crisoprasa; iskà dör jacinto; ibata dör amatista. <sup>21</sup> Ukkö döka dabom eyök kí böt, e' dör ák bua'buwa saruru kiè perla döka dabom eyök kí böt. Ukkö bit e' dör perla et. Ká e' ñalé kibi e' yöule orochka wák è wa damiwä sarërëë.

<sup>22</sup> Kè ye' wä Skëköl wé sune ká e' ki. Skëköl diché ta' taië íyi ulitane tsata ena Obeja Pupula e'pa serke ee, e' kueki Skëköl wé kè ta'. <sup>23</sup> Skëköl olo burke taië ká e' a, nies Obeja

Pupula olo burke taië ká e' kòs a wës bö'wö taië olo bur es. E' kuëki diwö kè ta', si'wö kè ta'. <sup>24</sup> Ká ulitane wakpa serdaë ká e' olo burke e' a. Ká ulitane blúpa wá íyi bua'buatso' e' bituraë ie'pa wá mè ká e' wakpa a. <sup>25</sup> Ká e' a nañewe kè ta', kekraë ká dör ñiwe. E' kuëki iukkò kè wötërta'wá yës. <sup>26</sup> Ká ulitane wakpa wá íyi bua'buatso' kòs tso', e' bituraë mè ká e' wakpa a. <sup>27</sup> Erë íyi ulitane kè dör batse'r, ñies wépa tò ì wër suluë Skëköl wa ese wambleta' ö s'kitö'weta', esepa kòs kè döpawá eë. Wépa kiè tso' kitule Obeja Pupula yëkküö kî, yëkküö e' dör sene michoë yëkküö, e'pa è dówami eë.

## 22

<sup>1</sup> E' ukuöki ta' Skëköl biyöchökwak tò ye' a di' kkaché etö. Di' e' dör maneneë, damiwa sarërëë, e' dör sene michoë dí. E' tskirke wé Skëköl ena Obeja Pupula tulur ikulé kî e' ska'. <sup>2</sup> Di' e' dami ká e' ñalé kibi e' shushaë. Di' e' kkömik kal tso' wi'kè io'kè. Kal e' dör sene michoë moie se' a. E' wörke si' bit ekkè. E' wá kiane ché tò duas ek ta' iwöne doka dabom eyök kî bötökicha (12). Kal e' kò dör buaë kapölie ká ulitane wakpa bua'woie. <sup>3</sup> Ì kòs kè dör buaë Skëköl wöa, e' kè ku' ká e' a. Eë ie' ena Obeja Pupula, e'pa tulur ikulé kî. Eë Skëköl kanè mésopa tò ie' dalöieraë. <sup>4</sup> Ie'pa tò ie' sueraë iwöbla wa. Ie' kiè tso' kitule ie'pa wötsá kî. <sup>5</sup> Ká e' ñi'weraë ie' olo tò, e' kuëki nañewe kè ta'ia ká e' a. Kè yi kî diwö ena bö'wö kiarpaia ká suöie. Ká e' wakpa tò s'wëttsè michoë blu'paie.

### *Jesucristo datkene e' kèwö dökewatke tsinet*

<sup>6</sup> Eta' Skëköl biyöchökwak tò ye' a iché: “Ttè kòs ttsé be' tò e' dör mokïë e' mik be' erblömi. Skëköl tò ittekölpa patkè' ittè pakök, e' wák tò ibiyöchökwak patkè' ì tköraë bet, e' kkachök ikanè mésopa a.”

<sup>7</sup> Jesús tò ichè: “¡Ittsó! Ye' datkene bet. Ì tköke i'ñe ta' ena ì tköraë aishkuö ta' ese ttè tso' kitule yëkküö i' kî. Wépa tò ttè e' wá iuteke, ayëcha buaë esepa.”

<sup>8</sup> Ye' dör Juan. Ye' tò íyi ikkè ttsé sué. Mik ye' tò ittsé ena isué, eta' ye' e' téwa wöwakköt Skëköl biyöchökwak wörki idalöiök. <sup>9</sup> Erë ie' tò ye' a iché: “¡Se kè war! Ye' dör Skëköl kanè méso wës be' ena be' yamipa dör Skëköl ttekölpa ena wépa kòs tò ttè tso' kitule yëkküö i' kî e' wá iuteke, esepa es. ¡Skëköl è dalöió!”

<sup>10</sup> Ñies ie' tò ye' a ichè: “Ttè tso' kitule yëkküö i' kî, e' wá tköketke bet, e' kuëki kè iblarwá be' wák è a. <sup>11</sup> Wépa e' wamblö sulu esepa múat as ikí e' ia'ù sene sulusi wa. Erë wépa dör yësyësë as esepa kî ser yësyësë. Ñies wépa batseo' Skëköl tò as esepa kî ser batse'r.”

<sup>12</sup> Jesús tò ichè: “Ye' datkene bet. Ye' wá iské datse mè sulitane a eköl eköl wës iser es. <sup>13</sup> Ye' dör íyi wì ena íyi bata, ttè tsá ena ttè bata. Ye' tso'tke íyi ulitane yöki kewe, ñies ye' ser michoë kekraë.”

<sup>14</sup> Wépa tò idatsi' skueke Obeja Pupula pé wa as idöttsa buaë maneneë Skëköl a, ayëcha buaë esepa. Esepa è a kawö merdaë dökwa Skëköl ká a, sene michoë e' kéli wö katök. <sup>15</sup> Erë wépa dör ì sulu wamblökwakpa, wépa wöbatsö alibchök, wépa trërta', wépa dör s'ttökwakpa, wépa tò íyi diököl dalöieke, wépa wöbatsö kachök, esepa kòs ate u'rki, kè dè'wá Skëköl ká a.

<sup>16</sup> Jesús tò ichè: “Ye' dör Jesús, e' tò Skëköl biyöchökwak patké ttè i' kòs chök ye' icha eruleë e'pa a. Ye' dör s'blú bak ká iaiaë kiè David, e' aleri datse s'blúie ie' skéie e'. Ye' dör wës bëkwö olo burke dalölöë ká ñirketke eta' es.”

<sup>17</sup> Wiköl Batse'r ena Obeja Pupula tayë, e'pa tò ichè: “¡A' shkó!” Ñies wépa tò ttè i' ttsé, e'pa tò ichó: “¡A' shkó!” Wépa kòs ersine éna sene michoë dí yák, esepa mú dò sene michoë dí yök éme kè tuë ta'.

<sup>18</sup> Ì tköraë e' tso' kitule yëkküö i' kî, wépa tò ittsé, esepa a ye' tò ichè i' es: Yi tò ttè i' kî kuötkéka, e' ta' esepa we'ikeraë siarë Skëköl tò ì sulu kòs tso' kitule yëkküö i' kî ese wa.



<sup>19</sup> Ñies yi tö ttè tso' kitule yëkkuö i' k<sub>i</sub> e' wele yéttsa, e' ta esepa a Skëköl kè tö kawö mepa senuk Skëköl ká batse'r e' a, sene michoë kéli wö katök wes itso' kitule yëkkuö i' k<sub>i</sub> es.

<sup>20</sup> Jesús tö ttè i' kos ché a' a, e' tö ichè: “Mok<sub>i</sub> ye' datskene bet.”

Es e' idir. ¡A Skëképa Jesús, be' shkó!

<sup>21</sup> As Skëképa Jesús er buaë chò s'batse'rpa ulitane a.